


Tupanaarü Ore i Tóru Cori ya Ngechuchu ya

Cristuchiga



New Testament in Ticuna (PE:tca:Ticuna)

Tupanaarü Ore i Tóru Cori ya Ngechuchu ya Cristuchiga New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
9d5dc22a-30be-5d26-85a9-76047f4c89e6

Contents

MATEU	1
MARCU	75
LUCA	118
CUÁŨ	195
PURACŨGŨ	250
DUMACŨĂX	317
1 CORĪTIUCŨĂX	351
2 CORĪTIUCŨĂX	382
GÁRATAANECŨĂX	402
EPÉCHIUCŨĂX	414
PIRIPUCŨĂX	425
COROCHACŨĂX	433
1 TECHARÓNICACŨĂX	440
2 TECHARÓNICACŨĂX	446
1 TIMUTĒU	450
2 TIMUTĒU	459
TITU	465
FILEMŨŨ	469
EBRĒUGŨ	471
CHAŨTIÁGU	498
1 PEDRU	506
2 PEDRU	515
1 CUÁŨ	521
2 CUÁŨ	528
3 CUÁŨ	529
YUDA	531
APOCARÍCHIU	534

ORE I MEXÜ GA MATEU ÜMATÜXÜ

*Ngechuchu ya Cristu natanüwa ngóxü ga duüxügüchiga
(Lc 3.23-38)*

¹ Ñaã nixĩ ga yema nuxcümáxügüxü ga duüxügü ga Ngechuchu ya Cristu natanüwa ngóxü. Rü yematanüwa rü Dabí nixĩ ga wüxi, rü Abráü nixĩ ga to.

² Rü Abráü rü Ichaánatü nixĩ.

Rü nüma ga Ichaá rü Acóbunatü nixĩ.

Rü nüma ga Acóbo rü Yudánatü rü naëneëgünatü nixĩ.

³ Rü Yudá rü Fárenatü rü Záranatü nixĩ. Rü Támara iyixĩ ga norü mamá.

Rü nüma ga Fáre rü Eróünatü nixĩ.

Rü nüma ga Eróü rü Aráünatü nixĩ.

⁴ Rü Aráü rü Aminadánatü nixĩ.

Rü nüma ga Aminadá rü Nachóünatü nixĩ.

Rü nüma ga Nachóü rü Charmóünatü nixĩ.

⁵ Rü Charmóü rü Boónatü nixĩ, rü Raá iyixĩ ga naë.

Rü nüma ga Boó rü Obénatü nixĩ, rü nae rü Rux iyixĩ.

Rü nüma ga Obé rü Ichaxínatü nixĩ.

⁶ Rü nüma ga Ichaxí rü äëxgacü ga Dabínatü nixĩ.

Rü nüma ga äëxgacü ga Dabí rü Charomóünatü nixĩ. Rü ngima ga Bechabé ga Uriá namëxchirëx ixícü iyixĩ ga naë ga Charomóü.

⁷ Rü Charomóü rü Roboáünatü nixĩ.

Rü nüma ga Roboáü rü Abíanatü nixĩ.

Rü nüma ga Abía rü Achánatü nixĩ.

⁸ Rü Achá rü Yochapánatü nixĩ.

Rü Yochapá rü Yoráünatü nixĩ.

Rü nüma ga Yoráü rü Uchíanatü nixĩ.

⁹ Rü Uchía rü Yotáünatü nixĩ.

Rü Yotáü rü Acánatü nixĩ.

Rü nüma ga Acá rü Echequíánatü nixĩ.

¹⁰ Rü Echequíá rü Manachénatü nixĩ.

Rü Manaché rü Amóünatü nixĩ.

Rü nüma ga Amóü rü Yochíanatü nixĩ.

¹¹ Rü Yochía rü Yeconíanatü rü naëneëgünatü nixĩ. Rü yexguma nixĩ ga Babiróniäcüäx ga churaragü Yudiügüxü íyauüxü rü Babiróniäñewa nagagüäxü.

¹² Rü yexguma Babiróniäwa Yudiügüxü nagagüguwena, rü Yeconía nane ga Charatíe nabu. Rü nüma ga Charatíe rü Chorobabénatü nixĩ

¹³ Rü Chorobabé rü Abiúnatü nixĩ.

Rü Abiú rü Eriaquíünatü nixĩ.

Rü nüma ga Eriaquíü rü Achónatü nixĩ.

¹⁴ Rü Achó rü Chadóxnatü nixĩ.

Rü Chadóx rü Aquíünatü nixĩ.

Rü nüma ga Aquíü rü Eriúnatü nixĩ.

¹⁵ Rü Eriú rü Ereachánatü nixĩ.

Rü Ereachá rü Matáünatü nixĩ.

Rü nüma ga Matáü rü Acóbunatü nixĩ.

16 Rū Acóbu rü Yúchenatü nixĩ. Rū nüma ga Yúche rü María ngíte nixĩ. Rū ngima ga María rü Ngechuchu ya Cristu naë iyixĩ. Rū guma Ngechuchuxũ nixĩ ga naxunetaxũ ga Tupana.

17 Rū yemaãcü Abrátüwa inaxügü ga yema duũxügü rü 14 nixĩ ñuxmata Dabíwa nangu. Rū yemawena to ga 14 inaxügü ga Dabíwa rü ñuxmata Babiróniãcüãx ga churaragü Yudiügüxũ íyauũxguwa nangu. Rū yemawena to ga 14 inaxügü ga yexguma Yudiügüxũ ínayauũxguwena rü ñuxmata Cristu buxguwa nangu.

Ngechuchu ya Cristuarü buxchiga

(Lc 2.1-7)

18 Rū ñaãcü nixĩ ga yexguma nabuxgu ga Ngechuchu. Rū naë ga María rü marü Yúchemã ixãtechaũ. Natürü naxũpa ga nüguna na nangugüxũ rü marü Tupanaãë i Üünexũärü ñnüãxũ ixããcü.

19 Rū Yúche ga María ngítechaũ ixĩcü rü wüxi ga mecü nixĩ. Rū yemacèx tama nanangoxëëchaũ ga yema na naxããcüxũ ga María. Rū nagu narüxĩnü ga bexmamare ngĩxũ na ínatãxũ. 20 Rū yexguma yemagu ínaxĩnúyane, rü wüxi ga daxücüãx ga Tupanaãrü orearü ngeruũ, rü nanegüwa naxcèx nangox rü namaã nidexa. Rū ñanagürü nüxũ: —Pa Yúche Pa Dabítanüxũx, jãxũ i ngĩxũ cuxoxũ i María na ngĩmaã cuxãmaxũ! Erü Tupanaãë i Üünexũ ngĩxna ñnüxügagu nixĩ i naxããcüxũ. 21 —Rü ngĩma tá ngĩxũ nangëxma ya wüxi ya ngine, rü cuma rü tá Ngechuchugu cunaxüéga. Rū ngëma naëga rü ‘maxëëruuxũ’ ñaxüchiga nixĩ, erü nüma tá norü pepadugüwa ínananguxũxëë i norü duũxügü —ñanagürü. 22 Rū guxüma ga yema orearü ngeruũ nüxũ ixuxũ rü nangupetü na yangüxcèx ga Cori ga Tupanaãrü ore ga nuxcümaũxũ ga norü orearü uruũwa nüxũ yaxuxũ ga ñaxũ:

23 “Rü tá tauemacü ngĩxũ inayarütaxu i ngëma nge i taguma yatüxũ cuèxcü. Rü tá nayatü. Rü Emanuë tá nixĩ i naëga. Rü ngëma naëga rü ‘Tupana tatanüwa nangu’, ñaxüchiga nixĩ”,

ñanagürü. 24 Rū yexguma pewa nabëiãchigu ga Yúche, rü nanaxü ga yema Tupanaãrü orearü ngeruũ ga daxücüãx namaã nüxũ ixuxũ. Rū Maríamaã naxãmèx. 25 Natürü taguma ngĩxũnëxũ nacüèx ñuxmata nabu ga guma ngĩne. Rū Ngechuchugu nanaxüéga.

2

Ngechuchuxũ ínayadaugü ga yatügü ga nüxũ cuèxüchigüxũ

1 Rū Ngechuchu rü Yudéanewa yexmane ga íãne ga Beréügu nabu ga yexguma Erode ãëxgacü ixĩxgu ga yema nachiuãnewa. Rū yexguma nixĩ ga íãne ga Yerucharéüwa nangugüxũ ga ñuxre ga yatügü ga nüxũ cuèxüchigüxũ ga woramacuriwa ngüxũ ga yaxüwa ne íxũ ga üèxcü ne üxüwa. 2 Rū duũxügüna nacagüe, rü ñanagürügü: —¿Ngextá nixĩ i nangëxmaxũ ya yima Yudiügüarü ãëxgacü ya ngexwacèx bucü? Toma rü yéama tochiuãnewa nüxũ tadau ya norü woramacuri rü ngëmacèx núma taxĩ na nüxũ tayarücuèxüügüxüxcèx —ñanagürügü. 3 Rū yexguma yemachigaxũ nacüèxgu ga ãëxgacü ga Erode rü poraãcü naxoegaãë. Rū guxüma ga duũxügü ga Yerucharéücüãxgü rü ta naxoegaãëgü. 4 Rū yexguma ga ãëxgacü ga Erode rü naxcèx nangema ga guxüma ga paigüarü ãëxgacügü rü ngüexëëruügü ga ore ga mugüwa ngüxëëtaëgüxũ.

Rü nüxna naca, rü ñanagürü: —¿Ngexta nixĩ i nabuégaxũ ya Cristu? — ñanagürü. ⁵ Rü nümagü nanangãxũgü, rü ñanagürügü: —Nuã Yudéaanewa ngëxmane ya ñãne ya Beréũgu tá nixĩ i nabuxũ. Yerü nuxcúmaũcü ga Tupanaãrü orearü uruũ rü nachiga nanaxúmatü, rü ñanagürü ga yema ore:

⁶ “Rü Beréũ ya ñãne ya Yudéaanewa ngëxmane, rü yima rü tama wüxi ya ngexnerüünemare ya ñãne nixĩ, erü nagu tá nabu i ngëma ãëxgacü i taxũ i Cristu. Rü nüma tá nüxna nadau i guxũma i Tupanaãrü duũxũgü i Yudiũgü”,

ñanagürü. ⁷ Rü yexguma ga ãëxgacü ga Erode rü bexma naxcèx naca ga yema yatügü ga nüxũ cuèxüchigüxũ ga yaxũwa ne ñxũ. Rü nüxna naca ga tãxacü rü ngunexũ na nangóxũ ga noxri ga guma woramacuri.

⁸ Rü ñuxũchi ga Erode rü Beréũwa nanamugü ga yema yatügü. Rü ñanagürü nüxũ: —¡Rü ngema pexĩ rü meã naxcèx peyadëux i ngëma buxũ. Rü ngëxguma nüxũ ipeyangauxgu rü chomaã nüxũ pixu na choma rü ta ngëma chaxũxçèx, na nüxũ chayarücuèxüxçèx i ngëma buxũ! —ñanagürü. ⁹ Rü yexguma yema orexũ naxĩnëguwena, rü inaxĩãchi ga yema yatügü. Rü guma woramacuri ga noxri nüxũ nadaugücü rü napëxegu nixũchigü rü ñuxmata guma bucü ga Ngechuchu íyexmaxüetüwa nangu. Rü yéma nayachaxãchi. ¹⁰ Rü yexguma guma woramacurixũ nadaugügu ga yema yatügü, rü poraãcü nataãëgü.

¹¹ Rü nagu nichocu ga guma í ga nawa nayexmane, rü yexma nüxũ nayangau ga guma bucü ngĩmaã ga naë ga María. Rü guma bucüpegu nacaxãpüxügü, rü nüxũ nicuèxüügü. Rü ñuxũchi nayawãxna ga norü baúxacügü, rü õxchanana nanaxãmaregü ga uiru rü pumaragü ga yixichixũ. ¹² Rü yemawena, ga yexguma napeeyane ga yema yatügü, rü nanegüwa Tupana nayaxucüxëgü na tama Erodecèx nawoeguxçèx. Rü yemacèx to ga namagu nachiũãnecèx nawoegu.

Equituanewa nabuxmü

¹³ Rü yexguma marü íyaxĩxguwena ga yema yatügü rü wüxi ga daxũcũãx ga Tupanaãrü orearü ngeruũ, rü nanegüwa Yúhecèx nangox, rü ñanagürü nüxũ: —¡Nabèixãchi rü írüda! ¡Rü inaxũxü namaã ya yima bucü rü naë rü Equituanewa naxũ! ¡Rü ngëma pengëxmagü ñuxmatáta choma cumaã nüxũ chixu na ñuxgu tá cutaeguxũ! Erü ãëxgacü i Erode rü yima bucüçèx tá nadau na yamáãxçèx —ñanagürü nüxũ. ¹⁴ Rü yexguma ga Yúche rü nabèixãchi rü inarüda. Rü yexgumatama chütacü namaã inaxũãchi ga guma bucü ga Ngechuchu rü naë. Rü Equituanewa naxĩ. ¹⁵ Rü Equituanewa nayexmagü ñuxmata nayux ga ãëxgacü ga Erode. Rü yemaãcü nangupetü na yanguxçèx ga Tupanaãrü ore ga nuxcúmaũcü ga norü orearü uruũ nüxũ ixuxü ga ñaxũ:

“Naxcèx changema ya Chaune rü Equituanena chanataeguxëë”, ñaxũ ga yema ore.

Erode nanamu na tüxũ nadèixçèx ga buxegü

¹⁶ Rü yexguma ãëxgacü ga Erode nüxũ cuèxgu ga to ga namagu na nawoeguxũ ga yema yatügü ga nüxũ cuèxüchigüxũ ga yaxũwa ne ñxũ, rü poraãcü nanu. Rü Beréũwa nanamugü ga norü churaragü na guxũ ga yema naãnewa tüxũ nadèixçèx ga guxãma ga guxema buxegü ga iyatüxe ga yexwacèx buexe rü ñuxmata taxre ga tauncü tüxũ yexmagüxewa nangu. Yerü yema yatügü ga yaxũwa ne ñxũ rü marü nüxũ nixugügü rü

taxre ga taunecü nixĩ ga noxri na nangóxũ ga guma woramacuri. ¹⁷ Rũ yemaãcü ningu ga ore ga nuxcũmaũxũ ga Tupanaãrũ orearũ uruũ ga Yeremiã ümatũxũ ga ñaxũ:

¹⁸ “Rũ Ramáwa nüxũ taxĩnũe i wũxi i naga i poraãcü ngechaũgaãcũma auxexũ. Rũ Raquera iyixĩ i ngĩxãcũgücex poraãcü auxcü. Rũ taxuacũma ngĩxũ tataãẽxẽẽega, erũ nayue i ngĩxãcũgũ”,

ñanagürũ ga yema ore. ¹⁹ Natürũ yexguma marũ nayuxguwena ga ãẽxgacũ ga Erode, rũ Equituanewa rũ wũxi ga daxũcũãx ga Tupanaãrũ orearũ ngeruũ rũ nanegũwa Yúchecex nangox. Rũ ñanagürũ nüxũ:

²⁰ —Pa Yúchex, ¡írũda, rũ pechiũñanecex namaã pewoegu ya yima bucũ ya Ngechuchu! Erũ marũ nayue i ngema duũxũgũ ya yima bucũxũ imẽxgũchaxũxũ —ñanagürũ. ²¹ Rũ yexguma ga Yúche rũ inarũda rũ nachiũñanecex namaã nataegu ga guma bucũ rũ naẽ. ²² Natürũ yexguma

Yúche nüxũ cuáchigagu na Aquerãnu ãẽxgacũxũ ingucuchixũ nanatũ ga Erodechicũũ ga Yudéaanewa, rũ namuũ ga Yúche ga yéma na naxũxũ. Yerũ wũxi ga daxũcũãx ga Tupanaãrũ orearũ ngeruũ nanegũwa nanaxucuxẽ

na tama yéma Yudéaanewa na naxũxũcex. Rũ yemacex Gariréaanewa naxĩ, rũ yexma naxãchiũgũ. Rũ yemaãcü nangupetũ na yanguxũcex ga yema ore ga nuxcũmaũgũxũ ga Tupanaãrũ orearũ uruũgũ nüxũ ixugũxũ

ga ñaxũ:

“Ngechuchu ya Cristu rũ Nacharétucũãxmaã tá nanaxugũ”, ñaxũ.

3

Cuãũ ga baiũxẽẽruũ nüxũ nixu ga Tupanaãrũ ore ga dauxchitawa ga ngextá taxúema íxãpataxũwa

(Mr 1.1-8; Lc 3.1-9, 15-17; Cu 1.19-28)

¹⁻² Rũ yexguma Nacharétuwa nayexmagu ga Ngechuchu, rũ Cuãũ ga baiũxẽẽruũ inanaxũgũ ga Tupanaãrũ orexũ na yaxuxũ ga Yudéaanewa ga dauxchitawa ngextá taxúema íxãpataxũwa. Rũ duũxũgũmaã nüxũ nixu rũ ñanagürũ: —¡Nüxũ perũxoe i pecũma i chixexũ! Erũ marũ ningaica

na perũ ãẽxgacũ na yĩxũ ya Tupana —ñanagürũ. ³ Rũ guma Cuãũ ga baiũxẽẽruũchiga nixĩ ga naxũmatũãxũ ga nuxcũmaũcü ga Tupanaãrũ orearũ uruũ ga Ichaxía ga yexguma ñaxgu:

“Rũ dauxchitawa i ngextá taxúema íxãpataxũwa tá nangẽxma i wũxi i duũxũ i ngema tagaãcü ñaxũ: ‘¡Pegũ pemexẽẽx naxcex ya Cori! ¡Rũ naxcex ipeyanawẽxãchixẽẽx i perũ maxũ!’ ”

ñaxũ. ⁴ Rũ naxchiru ga Cuãũ rũ cameyutèxanaxcex nixĩ, rũ norũ goyexũ rũ naxchèxmünaxcex nixĩ. Rũ beruremaã rũ munũmaã naxãwemũ. ⁵ Rũ yéma Cuãũxõtawa inayarũxĩnũegũxũ ga duũxũgũ ga Yerucharéũcũãx, rũ duũxũgũ ga guxũ ga Yudéaanewa ne íxũ, rũ duũxũgũ ga natũ ga Yudáũrũ ngaicamagu ãchiũgũxũ. ⁶ Rũ guxema duũxẽgũ ga nüxũ ixugũexe ga tũmaãrũ pecadugũ, rũ Cuãũ rũ tũxũ ínabaiũxẽẽ ga natũ ga Yudáũwa. ⁷ Natürũ yexguma Cuãũ nüxũ dèuxgu ga naxũtawa na nangugũxũ ga muxũma ga ãẽxgacũgũ ga Parichéugũ rũ Chaduchéugũ na ínabaiũxẽẽãxũcex, rũ Cuãũ ñanagürũ nüxũ: —Pa Áxtapearũ Duũxũgũx,

¿rũ texé pemaã nüxũ tixu na naxchaxwa pibuxmũxũcex i ngẽma Tupanaãrũ poxcu i ãcũmaxũ i marũ ingaicaxũ? ⁸ —¡Rũ penaxwèxe na Tupana naxwèxexũãcũma pemaxẽxũ na ngẽmaãcü guxũma i duũxũgũ

nüxü nadaugüxücèx na aixcüma marü nüxü perüxoexü i ngëma pecüma i chixexü! ⁹ —Erü Tupanapëxewa rü taxuwama name na pegü pixuxü na Abráütanüxü i Yudiügü pixígüxü erü tama ngëmacèx nixi ya Tupana na xwèxegu, rü tama nüxü naguxcha na daa nutawa Abráütanüxü nanguxüxëxü. ¹⁰ —Rü Tupanaärü yuema rü marü ímemare na nadaxüxücèx i ngëma nanetügü i tama mexü. Rü guxüma i nanetügü i chixearü õðxü rü tá nadaxü, rü ñuxüchi tá ínagu —ñanagürü. ¹¹ Rü ñanagürü ta ga Cuáü: —Choma rü aixcüma dexáwamare pexü íchabaiüxëë na togü i duüxügü nüxü cuáxücèx na aixcüma marü nüxü perüxoexü i pecüma i chixexü. Natürü chowema tá ínagu i to i Tupanaärü orearü urü. Rü nüma tá pexütawa nanamu i Tupanaäë i üünexü na napo-raexëëaxü i ngëma Tupanawe rüxixü, rü nüma tá nanapoxcue i ngëma Tupanaxü oexü. Erü nüma rü poraäcü choxü narüyexera na äëxgacü yïixü. Rü choma rü napëxewa rü taxuwama chame rü bai i norü chapatarü ngewaxüra chame. ¹² —Rü nüma rü marü ínamemare na ñoma i naänewa yadexchiäxücèx i norü duüxügü ñoma wüxi i yatü trigu naätüna idexechürü. Rü ngëmaäcü tá nayadexchi i ngëma noxrü ixígüxü na naxütawa nangëxmagüxücèx, natürü ngëma tama noxrü ixígüxü rü tá ínagu nawa ya yima üxü ya taguma ixoxüne —ñanagürü ga Cuáü.

Ngechucharü baiechiga

(Mr 1.9-11; Lc 3.21-22)

¹³ Rü yexguma nixi ga Gariréanewa ne naxüxü ga Ngechuchu. Rü Cuáüxütawa nanguxü ga Yudáü ga natüwa, na Cuáü ínabaiexëëxücèx. ¹⁴ Rü noxri rü tama Ngechuchuxü ínabaiexëëchaü ga Cuáü. Rü ñanagürü nüxü: —Choxü waxi nixi i namexü na ícubaixëëxü. ¿Rü ñuxäcü i cuma i chauxütawa cuxüxü na choma cuxü íchabaiexëëxücèx? —ñanagürü. ¹⁵ Natürü ga Ngechuchu rü ñanagürü nüxü: —Name nixi i choxü ícubaixëë i ñuxmax. Erü name nixi i tanaxü i guxüma i ngëma Tupana tüxü muxü —ñanagürü. Rü yexguma ga Cuáü rü: —Ngü —ñanagürü. ¹⁶ Rü yexguma marü Cuáü Ngechuchuxü íbaixëëguwena, rü dexáwa ínaxüächigu ga Ngechuchu. Rü yexgumatama niwäxna ga daxüguxü ga naäne, rü Ngechuchu nüxü nadau ga Tupanaäë i Üünexü ga wüxi ga muxtcurüü na inagoxü rü nüxna na nanguxü. ¹⁷ Rü dauxüwa inanaxü ga wüxi ga naga ga ñaxü: —Daa nixi ya Chaune ya nüxü changechaüxüchicü, rü poraäcü namaä chataäëxüchicü —ñaxü.

4

Ngechuchuxü naxü ga Chataná

(Mr 1.12-13; Lc 4.1-13)

¹ Rü yemawena rü Tupanaäë i Üünexü rü wüxi ga nachica ga ngextá taxüema íxäpataxüwa Ngechuchuxü naga na yéma Chataná nüxü üxücèx. ² Rü taguma nachibü ga 40 ga ngunexü rü 40 ga chütaxü. Rü yemawena rü nataiya. ³ Rü yexguma ga ngoxo ga Chataná rü Ngechuchuxütawa nangu, na nüxü naxüxücèx. Rü ñanagürü nüxü: —Ega aixcüma Tupana Nane quixígu, ¡rü daa nutagüxü namu na pãuxü nanguxüxücèx! —ñanagürü ga Chataná. ⁴ Natürü Ngechuchu nanangäxü, rü ñanagürü: —Tupanaärü ore i umatüxü rü ñanagürü: “Täütama pãuxica nanamaxëë i duüxügü, natürü guxüma i ore i Tupana nüxü ixuxü nixi i duüxügüxü maxëxëëxü”,

ñanagürü. ⁵ Rû yexguma ga ngoxo ga Chataná rû guma ñâne ga üünene ga Yerucharéüwa nanaga. Rû tupauca ga taxünetapêxegu nanamunagü.

⁶ Rû ñanagürü nüxü: —Ega aixcûma Tupana Nane quixîgu, jrû nuã cugü rütáe! Erü Tupanaârü ore i ümatüxüwa rû ñanagürü:

“Tupana tá nanamu i norü orearü ngeruügü i daxüçüâx na cuxna nadaugüxüçèx. Rû naxmêxmaã tá cuxü niyauxgü na tama ñacu rû nutagu cunguxüçèx”,

ñanagürü. ⁷ Rû Ngechuchu nanangäxü rû ñanagürü: —Rû Tupanaârü ore i ümatüxü rû ñanagürü ta:

“¡Tama name i nüxü na cuxüxü ya Cori ya curü Tupana!”

ñanagürü. ⁸ Rû yexguma wenaxârü ga ngoxo ga Chataná rû wüxi ga mëxpüne ga máxpüxüchinetapezewa nanaga. Rû yéma Ngechuchuxü nanawêx ga guxüma ga nachüñânegü na ñuxäcü yamexêchixü. ⁹ Rû Chataná rû ñanagürü nüxü: —Choma chi cuxna chanaxâ i guxüma i ñaã cuxü chawéxü i ngêxguma chi chopêxegu cucaxäpüxügu rû choxü quicuèxüügu —ñanagürü. ¹⁰ Rû yexguma ga Ngechuchu rû ñanagürü nüxü: —¡Choxna ixügachi, Pa Chataná! Erü Tupanaârü ore i ümatüxü rû ñanagürü:

“¡Nüxü icuèxüü ya Cori ya curü Tupana, rû yimaãxüxîcatama napuracü!” ñanagürü. ¹¹ Rû yexguma ga ngoxo ga Chataná rû Ngechuchuna nixügachi. Rû Ngechuchuxütawa nangugü ga daxüçüâx ga Tupanaârü orearü ngeruügü. Rû Ngechuchuxü narüngüxêëgü rû nüxna nadaugü.

Ngechuchu rû inanaxügü ga norü puracü ga Gariréaanewa

(Mr 1.14-15; Lc 4.14-15)

¹² Rû yexguma Ngechuchu nüxü ñnügu ga na napoxcuxü ga Cuáü ga baiüxêëruü, rû Gariréaanewa naxü. ¹³ Natürü tama ñâne ga Nacharétugu narüxäüx, rû ñâne ga Capernáüwa naxü na yexma yaxächüxüçèx. Rû guma ñâne rû nextaxa ga Gariréacutüwa nayexma ga Chaburáütanüxü rû Netarítanüxü ga duüxügü ixächüügüxüwa. ¹⁴ Rû yema nangupetü na yanguxüçèx ga ore ga nuxcümaücü ga Tupanaârü orearü uruü ga Ichaxía ümatüxü ga ñaxü:

¹⁵⁻¹⁶ “Rû duüxügüçèx tá nangox i wüxi i ngóonexêëruü i Chaburáüârü naãnewa, rû Netaríarü naãnewa, rû Yudáüârü tocutüwa rû ngêma nama i taxtücutüwa nadaxüwa, rû Gariréaanewa i ngextá duüxügü i tama Yudíugü ixígüxü ixächüügüxüwa. Rû ngêmaäcü i ngêma duüxügü ga noxri êanexüwa yexmagüxü, rû tá nüxü nadaugü i wüxi i taxü i ngóonexêëruü. Rû ngêma duüxügü ga noxri yutüüwa yexmagüxü rû tá nüxü nabaxi i ngêma ngóonexêëruü”,

ñanagürü ga yema Ichaxíaarü ore. ¹⁷ Rû yexgumaücüü nixí ga inaxügüâxü ga Ngechuchu rû nüxü na yaxuchigaxü ga norü ore ga ñaxü: —¡Nüxü perüxoe i pecüma i chixexü! Erü marü ningaica na perü äëxgacü na yíxü ya Tupana —ñaxü.

Ngechuchu rû naxçèx naca ga ägümücü ga püchaetanüxü

(Mr 1.16-20; Lc 5.1-11)

¹⁸ Rû yexguma nextaxa ga Gariréaanacügu yaxüxgu ga Ngechuchu, rû yéma nüxü nadau ga taxre ga yatü ga nügüeneëgü ixígüxü. Rû wüxi rû Chimáü ga Pedrugu äëgaxü nixí. Rû to rû Äüdrëgu äëgaxü nixí. Rû nümagü rû inapüchaëgü, yerü woetama püchaetanüxü nixígü. ¹⁹ Rû yexguma ga Ngechuchu rû ñanagürü nüxü: —¡Chowe perüxü! Rû chorü

puracüwa tá pexü chamugü na chauxütawa penagagüxcèx i duüxügü — ñanagürü. ²⁰ Rü yexgumatama ga yema taxre, rü yéma nanatèxgü ga norü püchagü. Rü Ngechuchuwe narüxí. ²¹ Rü yéamaxüra naxü ga Ngechuchu, rü yéma nüxü nadau ga to ga taxre ga nügüeneëgü. Rü Acobu nixí ga wüxi, rü Cuáü nixí ga to. Rü Zebedéu nanegü nixí ga nümagü. Rü nanatümaã wüxi ga nguewa nayexmagü. Rü yéma ínanangáitagü ga norü püchagü. Rü Ngechuchu naxcèx naca. ²² Rü yexgumatama yéma nguewa tüxü natèxgü ga nanatü. Rü Ngechuchuwe narüxí.

Ngechuchu nanangüexëë ga muxüma ga duüxügü
(Lc 6.17-19)

²³ Rü guxü ga Gariréaanegu nixügüchigü ga Ngechuchu. Rü wüxichigü ga ñanewa, rü duüxügüarü ngutaquëxepataüwa ninguxëëtaechigü. Rü duüxügümaã nüxü nixuchiga ga ore ga mexü na ñuxäcü äëxgacü yüxü ya Tupana. Rü guxüma ga duüxügü ga yema idaaweexü rü nanameëxëë ga woo nañuxraüxü ga norü daawe nüxü yexmaxü, rü naxcèx nitaanegü. ²⁴ Rü Ngechuchuxü nacuáchigagü ga guxüma ga duüxügü ga Chíriaanecüäx. Rü naxütawa nanagagü ga nagüxüraüxü ga daxweanemaã idaaweexü. Rü yematanüwa nayexma ga duüxügü ga ngüanemaã idaaweexü, rü duüxügü ga poraäcü naxünewa nangüxü, rü duüxügü ga ngoxo nawa yexmaxü, rü duüxügü ga óxwaäxgüxü, rü duüxügü ga nawáixächigüxü. Rü Ngechuchu nanameëxëë ga guxüma ga yema. ²⁵ Rü Ngechuchuwe narüxí ga muxüma ga duüxügü ga Gariréaanecüäx, rü Decaporíchiuanecüäx rü Yerucharéücüäx, rü Yudéaanecüäx, rü natü ga Yudáüärü tocutücüäx.

5

Ngechuchu rü mëxpünewa nüxü nixu ga Tupanaärü ore

¹ Rü yexguma Ngechuchu nüxü dèuxgu ga yema muxüma ga duüxügü, rü wüxi ga mëxpünewa ínaxüächi namaã ga norü ngüexügü. Rü yéma narüto, rü norü ngüexügü nüxü ínachomaëguächi.

Yíxema taãëgüxechiga
(Lc 6.20-23)

² Rü ínanaxügü ga Ngechuchu ga na nangüexëëäxü, rü ñanagürü: ³ — Tataãëgü ya yíxema nüxü icuèxächitanüxë i tumaärü pecadu rü nüxü rüxoexe. Erü tümacèx nixí i ngema daxügüxü i naane i Tupana äëxgacü íxüxüwa. ⁴ —Tataãëgü ya yíxema ngechaügüxe, erü Tupana tá tüxü nataãëxëë. ⁵ —Tataãëgü ya yíxema tama tügü icuèxüxügüxe, erü tá tanayauxgü i ñoma i naãne i Tupana tümamaã ixunetaxü. ⁶ —Tataãëgü ya yíxema poraäcü tüxü nangüchaüxë na Tupanapëxewa meã tamaxëxü, erü Tupana tá tüxna nanaxã i ngëma maxü i mexü i naxcèx tadaugüxü. ⁷ —Tataãëgü ya yíxema togü i duüxügü tüxü ngechaütümüügüxe, erü tümagü rü tá ta Tupanaãxü tangechaütümüügü. ⁸ —Tataãëgü ya yíxema tama chixëxügu rüxínüxë i tümääëwa, erü yíxemaü tá tixigü ya Tupanaxü daugüxe. ⁹ —Tataãëgü ya yíxema togüarü chogüruü íxügüxe, erü Tupana rü nanegümaã tá tüxü naxu. ¹⁰ —Tataãëgü ya yíxema togü i duüxügü tümachi aiexe naxcèx na Tupana naxwëxëüäcüma meã tamaxëxü. Erü tümacèx nixí i ngema daxügüxü i naane i Tupana äëxgacü íxüxüwa. ¹¹ —Petaãëgü i pema ega duüxügü tacü pemaã ixugüegu, rü chixri pemaã namaxëgu, rü chaugagu doramaã poraäcü chixri pechiga yad exagügu.

12 —¡Rü petaãëgüama rü tama pexoegaãëgü! Erü daxüguxü i naãnewa tá penayauxgü i wüxi i perü ãmare i mexëchixü. Rü ngëma ñuxma pexü ngupetüxürüü nixí ga nüxü nangupetüxü ga nuxcúmaügüxü ga Tupanaãrü orearü uruügu, yerü ga duüxügu rü naxchi rü ta naxaie.

*Yucürarüü rü omürüü pixígu i ñoma i naãnewa
(Mr 9.50; Lc 14.34-35)*

13 —Pema rü ñoma yucürarüü pixígu i ñoma i naãnewa. Erü yima yücüra rü ñna na namexëxürüü, rü ngëxgumarüü ta i pema rü ñoma i naãnecüãx i duüxügüarü mexëëruü pixígu. Natürü ngëxguma chi nangeacagu ya yücüra, ¿rü tacüwa chi i namexü i ngëxgumax? Rü dücax, rü taxuwama name, rü ítanatëxmare, rü ngema duüxügu nawa nangagü. 14 —Pema rü ñoma i naãnecüãxãrü ngóonexëëruü pixígu. Rü wüxi ya ñãne ya wüxi ya mëxpúnewa ngëxmane, rü taxuacüma inicux. 15 —Rü taxúema wüxi i omüwa tanangixichi na wüxi i caichãütüügu na tayaxücuchixücëx. Natürü wüxi i omüwa tanangixichi na norü üchicaügu tanaxünagüxücëx, na ngema tüxü nabaxixücëx ya guxãma ya yíxema yima íwa ngëxmagüxe. 16 —Rü name nixí i duüxügüpëxewa na meã pemaxëxü. Erü ngëmaãcü i pema rü omügürüü tá pinaügu. Rü ngëmaãcü duüxügu tá nüxü nadaugü i ngëma mexü i pexüxü, rü tá nüxü nicuëxüügu ya Penatü ya daxüwa ngëxmacü.

Ngechuchu nanangüexëë ga mugüchiga

17 —Tama name i nagu perüxnüë na núma chaxüxü na ichayanaxoxëëxücëx i Tupanaãrü mugü ga Moiché ümatüxü, rü yema ore ga nuxcúmaügüxü ga Tupanaãrü orearü uruügu namaã nguxëëtaegüxü. Natürü núma chaxü na meã chayanguxëëxücëx i ngëma mugü, rü tama na ichayanaxoxëëxücëx. 18 —Rü aixcúma pemaã nüxü chixu, rü ñuxma na tama nangupetüxü i daxüguxü i naane rü ñoma i naãne rü taxucürüwa naxüchicüxü i ngëma mugü, rü bai i írarüwa ñuxmatáta yangu i guxüma i ngema mugü nüxü nixuxü. 19 —Rü ngëmacëx ya yíxema tama naga ñnuxë i ngëma mugü, rü woo i tacü i íraxü i ngéma nüxü yaxuxü rü duüxügüxü tangüexëëxgu na nümagü rü ta tama naga naxñnüëxücëx, rü yíxema rü tá guxüãrü yexera wixweama tatëx i Tupana ãëxgacü íixüüwa. Natürü yíxema naga ñnuxë i Tupanaãrü mugü rü duüxügüxü ngüexëëxë na tümagü rü ta naga taxñnüëxücëx, rü guxüpëxewa tá taxü i Tupana ãëxgacü íixüüwa. 20 —Rü pemaã nüxü chixu, rü ngëxguma tama Parichéugü rü ngüexëëruügu i ore i mugüwa nguxëëtaegüxüãrü yexera meã pemaxëgu, rü tagutáma Tupana íngexmaxüwa pichocu.

*Ngechuchu nanangüexëë na tama namexü na texé tümaëneëmaã na nuxü
(Lc 12.57-59)*

21 —Pema rü marü nüxü pexñnüë ga Moíchéarü ore ga nuxcúmaügüxü ga duüxügümaã nüxü yaxuxü ga ñaxü:

“¡Tãxü i pemáëtagüxü! Erü texé yamáëtaxe rü tá tapoxcu”, ñaxü. 22 —Natürü choma rü pemaã nüxü chixu rü texé ya tümaëneëmaã nuxë, rü tá tapoxcu. Rü texé ya tacü tümaëneëmaã ixugüxe, rü ãëxgacügüpëxewa tá tüxü nagagü na tüxü napoxcuxücëx. Rü texé ya tümaëneëxü ngoxo wogüxe, rü äücümaxüwa tangëxma, erü ngürüächi tá tapoxcu nagu ya yima üxü ya ngoxo nagu poxcuene. 23-24 —Rü ngëxguma tupaucawa Tupanana cunaxãxgu i curü díëru, rü ngema nüxna cucuëxãchigu na tacücëx cumaã nanuxü i cueneë, ¡rü ngëxma

tupaucagutama naxü i ngêma curü âmare i Tupanana cuxâxchaüxü! ;Rü cueneëxütawa naxü, rü namaã yamexëëxîra i ngêma cuxchi na naxaixü! Rü ngêmawena rü marü name i tupaucacëx cutaegu na Tupanana cuyaxâmarexüçëx i curü dîeru. ²⁵—Rü ngêxguma chi wüxie wüxi i ngetanüçëx cuxü íxuaxügu, rü âëxgacüxütawa cuxü tagaxgu, rü name nixî i namawatama tüxü curüngüxmüxëë na tama âëxgacüpëxewa cuxü tagaxüçëx. Erü wüxicana na âëxgacüxütawa cunguxü, rü âëxgacü tá purichíagüna cuxü namu na cuxü napoxcuxüçëx. ²⁶—Rü aixcüma cumaã nüxü chixu rü tãütáma ngema poxcupataüwa ícunguxuchi ñuxmatáta ngîxü cuxütanü i guxcü i ngêma dîeru i nüxü ngîxü cungetanüçü. Rü name nixî i paxa Tupanana peca na pexü nüxü nangechaüxüçëx i perü pecadugü na tama pexü napoxcuexüçëx.

Ngechuchu namaã nangúexëëtae na tama namexü na wüxi i ngemaã chixexügu rüxinüxü

²⁷—Pema marü nüxü pexînüë ga Tupanaärü mu ga Moïché nuxcüma nüxü ixuxü ga ñaxü:

“¡Tama name i naí i ngemaã na icupexü!”

ñaxü. ²⁸—Natürü choma rü pemaã nüxü chixu, rü yíxema texé ya wüxi i ngexü dawenüxë rü tüxü nangúchaüxë na ngîmaã itapexü, rü Tupanapëxewa rü marü chixexü ngîmaã taxü i tümaãëwa. ²⁹—Rü ngêxguma chi yima curü tügünexëtü pecadu cuxü üxëëgu rü ¡noxtacüma nayaxu rü yaxügu naña! Erü narümemaë nixî na yima cuxetüxicatama iyarütaxuxü na tama guxü i cuxune iyarütaxuxüçëx nagu ya yima üxü ya ngoxogü nagu poxcuene. ³⁰—Rü ngêxguma chi yima curü tügünemëxë pecadu cuxü üxëëgu, rü name nixî i noxtacüma ícunadae rü yaxügu cuyaña. Erü narümemaë nixî na yima cuxmëxícatama iyarütaxuxü na tama guxü i cuxune iyarütaxuxüçëx nagu ya yima üxü ya ngoxogü nagu poxcuene. Rü ngêmaãcü ega woo pexü naguxchagu rü name nixî i nüxna pixígachi i guxüma i chixexü i nagu piyixchaüxü —ñanagürü.

Ngechuchu namaã nangúexëëtae na tama namexü na texé tümamëxü ítáxü

(Mt 19.9; Mr 10.11-12; Lc 16.18)

³¹Rü ñanagürü ta ga Ngechuchu: —Moïché rü üpa nüxü nixu rü yíxema tümamëxü ítáxe, rü tanaxwëxe i ngîxna tanaxâ i wüxi i popera i nawa nüxü tixuxü na marü ngîxü ítátáxü. ³²—Natürü choma rü pemaã nüxü chixu, rü ngêxguma wüxi ya yatü naxmëxü ítèxgu, rü chi tama naí ya yatümaã nangëãëxügagu yixîgu, rü äücümáxüwa ngîxü tangëxmaxëë erü ngêmaãcü ngürüächí pecadu ixü. Rü yíxema ngîmaã ämaxë i wüxi i nge i marü ngíte ngîxü ítèxçü, rü tüma rü ta pecadu taxü.

Ngechuchu namaã nangúexëëtae ga unetachiga

³³Rü ñanagürü ta ga Ngechuchu: —Pema rü marü nüxü pexînüë ga Moïchéarü ore ga nuxcümaügüxü ga duüxügümaã nüxü yaxuxü ga ñaxü: “Ngêxguma Tupanaegagu texémaã tacüçëx icuxunetagu, rü name nixî i cuyanguxëë i ngêma curü uneta”,

ñaxü. ³⁴—Natürü choma rü pemaã nüxü chixu rü tama name i texéégagu rü ëxna tacüégagu wüxi i duüxümaã ipexuneta. Rü tama name i daxüguxü i naãneegagu ipexuneta, erü ngema narüto ya Tupana. ³⁵—Rü tama name i ñoma i naãneegagu ipexuneta, erü Tupanaärü cuaixcutüchica nixî. Rü tama name i Yerucharéüegagu ipexuneta, erü

Tupana ya guxũārũ âêxgacũarũ ãne nixĩ. ³⁶—Rũ tama name i cugüéga gu icuxuneta, erũ woo wũxitama i cuyae rũ taxucũrũwa cunaxũchicũũ na nachóxũcèx rũ êxna nawaxũxũcèx. ³⁷—Rũ ngêmacèx rũ ngêxguma icuxunetagu rũ narũmemaê nixĩ i: —Ngũ, tá chanaxũ —ñaperũgũ, rũ êxna: —Tãütáma chanaxũ —ñaperũgũ. Erũ guxũma i to i ore i namaã icuxunetaxũ, rũ ngoxo i Chatanáwa ne ũxũ nixĩ.

Ngechuchu namaã nangúexêetae na ñuxãcü namexũ na namaã ichopetũxũ i ngêma duũxũgũ i chixri tamaã maxêxũ

³⁸ Rũ ñanagũrũ ta ga Ngechuchu: —Pema rũ marũ nüxũ pexĩnũe ga Tupanaãrũ mu ga Moĩché nuxcũma nüxũ ixuxũ ga ñaxũ:

“Ngêxguma texé wũxi i duũxũxũ icháixetũxêêgu, rũ tũmaxêtũmaãtama tayangutanũxêê. Rũ texé wũxi i duũxũxũ ibüepũtagu, rũ tũmapũtamaãtama tayangutanũxêê”,

ñaxũ. ³⁹—Natürũ choma rũ pemaã nüxũ chixu rũ tama name i pegũtama ípexoxũ nüxna i duũxũ i chixecũmaxũ. Rũ ngêxguma texé cuxũ pechiwegu, rũ marũ name i curũ tochiwe rũ ta icunaxã na ngema rũ ta cuxũ tapechiwexũcèx rũ tama name na cuxũtanũxũ. ⁴⁰—Rũ ngêxguma texé cuxũ íyaxuaxũgu rũ cuxna tayapuchaxũgu i curũ daxũ, rũ name nixĩ i curũ gáuxũchiru rũ ta noxtacũma tũxna cunaxã. ⁴¹—Rũ ngêxguma texé cuxũ muxgu na wũxi i kilómetrugu ñacũ tũxũ quingexũcèx, rũ name nixĩ i taxre i kilómetrugu tũxũ cuyange. ⁴²—Rũ ngêxguma texé curũ ngêmaxũcèx cuxna caxgu, rũ name nixĩ i tũxna cunaxã. Rũ tama name na namaã cuxaũxũ i curũ ngêmaxũgũ ega texé paxaãchi cuxna naxcèx caxgu.

Name nixĩ i nüxũ tangechaũ i ngema tamaã rüuwanũgũxũ

⁴³ Rũ ñanagũrũ ta ga Ngechuchu: —Pema rũ marũ nüxũ pexĩnũe ga Tupanaãrũ mu ga Moĩché nuxcũma nüxũ ixuxũ ga ñaxũ:

“¡Nüxũ nangechaũ i cumücũ, rũ naxchi naxai i curũ uwanũ!”

ñaxũ. ⁴⁴—Natürũ i choma rũ pemaã nüxũ chixu rũ: —¡Nüxũ pengechaũ i perũ uwanũgũ! ¡Rũ naxcèx peyumũxê i ngêma duũxũgũ i chixexũmaa pewe ingexũtanũxũ! ⁴⁵—Rũ ngêxguma ngêmaãcü pemaxêgu rũ aixcũma Penatũ ya daxũgucũ nanegũ tá pixĩgũ. Erũ nũma rũ inanabáixêê ya üèxcũ naxcèx i mexũ i duũxũgũ rũ chixexũ i duũxũgũ. Rũ nanapuxêê naxcèx i duũxũgũ i meã maxêxũ rũ duũxũgũ i chixri maxêxũ. ⁴⁶—Rũ ngêxguma chi ngêma duũxũgũ i pexũ ngechaũgũxũxũxĩcatama pengechaũgũgu, ¿rũ ñacũ rũ ãmare tá Tupanaxũtawa peyaxũgũ naxcèx i ngêma? Erũ ngêma yatũgũ i Dumaãrũ âêxgacũcèx díeru ngĩxũ ideetanũxũwa puracũxũ rũ ngêxgumarũũ nanaxũgũ. ⁴⁷—Rũ ngêxguma chi peeneêgũxũxĩcatama perũmoxêgu, rũ guxũ i duũxũgũrũũtama pixĩgũ. Erũ woo ngêma duũxũgũ i tama Tupanaxũ cuèxgũxũ, rũ ngêxgumarũũtama nanaxũgũ. ⁴⁸—Rũ ngêmacèx penaxwae na aixcũma namexũ i perũ maxũ naxrũxũ ya Penatũ ya Tupana ya aixcũma mearũ maxũãcü.

6

Ngechuchu rũ norũ ngúetanũxũxũ nangúexêe na ñuxãcü mexũ naxũgũxũ

¹ Rũ ngêxguma ñacũ rũ mexũ pexũxchaũgu, rũ name nixĩ i pexuãe na tama duũxũgũpêxewa penaxũxũ i ngêma na duũxũgũ pexũ daxũcèx rũ pexũ yacuèxũgũxũcèx. Erũ ngêxguma duũxũgũ pexũ icuèxũgũxũcèx mexũ pexũxgu, rũ Penatũ ya daxũgucũ rũ tãütáma ãmare pexna naxã. ²—Rũ ngêmacèx ngêxguma texéxũ curũngũxêêchaũgu, rũ name nixĩ i tama

poraãcü nüxü quixuchiga i ngêma. Rû tama name i ngêma duũxüğü i togüpêxewa meã maxênetaxürüü na quiixü. Erü nümagü rü norü me nixi i ngutaquêxepataüğüwa rü itamüğüwa nüxü nixuchiga ega tacü rü mexü naxüğü. Rû ngêmaãcü nanaxüğü na togü meã nachiga idexagüxcêx. Natürü choma rü aixcüma pemaã nüxü chixu rü ngêma na duũxüğü nüxü icuêxüüğüxü nixi i norü âmare, rü tãütáma nanayauxgü i to i âmare i Tupanaxütawa. ³⁻⁴—Natürü i cuma rü ngêxguma tacü tüxna cuxãxgu ya yixema ngearü ngêmaxüãxgüxe, rü name nixi i taxüema cuxü dauãcüma na cunaxüxü i ngêma. Rû woo cumücüxüchi rü tama name i nüxü na nacuáxü i ngêma. Rû Cunaü ya daxügücü ya nüxü daucü i ngêma cuxicatama cuxüxü, rü tá cuxna nanaxã i curü âmare.

Ngechuchu nanangüexê ga yumüxêchiga
(Lc 11.2-4)

⁵—Rü ngêxguma peyumüxêgüğü, rü tama name i ngêma duũxüğü i togüpêxewa meã maxênetaxürüü pixigü. Erü nümagü rü ngêxguma nayumüxêgüğü, rü norü me nixi na chiãcü nayumüxêgüxü i ngutaquêxepataüğüwa rü itamüğüwa na duũxüğü nüxü na daugüxcêx. Rû aixcüma pemaã nüxü chixu rü ngêma na duũxüğü nüxü daugüxüxcatama nixi i norü âmare. ⁶—Natürü ngêxguma cuyumüxêgu, rü name nixi i curü ucapugu cuxücu, rü cunawãxta i curü îãx, rü ngema cuyumüxê namaã ya Cunaü ya bexma cumaãxcatama ngema ngêxmacü. Rû ngêxguma ya yíma Cunaü ya Tupana ya nüxü daucü i ngêma cúãcü cuxüxü, rü núma tá cuxna nanaxã i curü âmare. ⁷—Rü tama name i natüçêma cunamêxêê i curü yumüxê naxrüü i ngêma duũxüğü i tama Tupanaxü cuêxgüxü. Erü nümagü rü nagu narüxñnê rü ngêma na namêxêgüãxüçêx i norü yumüxê rü Tupana tá nüxü naxñnü. ⁸—Rü tama name i ngêma duũxügürüü pixigü, erü woo tauta naxcêx ípecaxgu rü Penatü ya Tupana rü marü nüxü nacuêx na tacü pexü taxuxü. ⁹—Rü ngêmacêx rü ñaãcü tá peyumüxêgü i pemax:

“Pa Tonatü ya Daxügücüx, rü aixcüma üü necü quixi i cumax. ¹⁰ ;Rü núma naxü na torü âêxgacü quiüxcêx! Rû tanaxwêxe i curü ngüchañ na naxüğüxü i duũxüğü i ñoma i naãnewa ngêxgumarüü i daxügüxü i naãnewa na curü ngüchañ ínaxüğüxürüü. ¹¹ ;Rü toxna naxã i torü õna i ñoma i ngunexüçêx ixixü! ¹² ;Rü toxü nüxü nangechañ i torü chixexü i taxüxü ngêxgumarüü i toma rü tüxü nüxü na tangechañxürüü ya yixema chixexü tomaã ügüxe! ¹³ ;Tãxü i tacü rü chixexüpêxewa toxü cuwogüxü na tama nagu tayixüçêx! Natürü tanaxwêxe i toxna cudadu na tama ngêma chixexü taxüğüxcêx. Erü cuma rü guxüğüma guxüârü âêxgacü quixi rü cuporaxüchi rü cumexêchi. Rû ngêmaãcü yí”.

¹⁴—Rü ngêxguma pema nüxü nüxü pengechaüğü i ngêma duũxüğü i chixexü pemaã ügüxü, rü Penatü ya daxügücü rü tá ta pexü nüxü nangechañ i perü pecadugü. ¹⁵—Natürü ngêxguma tama nüxü nüxü pengechaüğü i ngêma duũxüğü i chixexü pemaã ügüxü, rü Penatü ya daxügücü rü tá ta tãütáma pexü nüxü nangechañ i perü pecadugü.

Ngechuchu nanangüexê ga aurechiga

¹⁶—Rü ngêxguma tama pechibüeãcüma peyumüxêgüğü rü tama name i pegü pengechañchiwêxê naxrüü i ngêma duũxüğü i togüpêxewa meã maxênetaxü. Erü nümagü rü ngêmaãcü nanaxüğü na togü nüxü na

daugüxücèx i ngêma na Tupanacèx naxaureexü. Rû aixcûma pemaã nüxü chixu rû ngêma na duüxügü nüxü daugüxüxícatama nixí i norü âmare. ¹⁷—Natürü ngêxguma cuma rû tama cuchibüâcüma cuyumüxêgu rû name nixí i meã cugü cuyauxchiwe rû meã cugü curüxíxêëru. ¹⁸—Rû ngêmaâcü i togü i duüxügü rû tâxütáma nüxü nacuèxgü na tama cuchibüâcüma cuyumüxêxü. Rû Cunatü ya bexma cumaã ngema ngêxmacüxícatátama cuxü nadau, rû tá cuxna nanaxã i curü âmare naxcèx i ngêma cuxüxü.

Nüxâcü tüxü nangêxma i tórü meruügü i daxüguxü i naãnewa
(Lc 12.33-34)

¹⁹—Rû tama name i pegücèx penanutaquêxe i muxüma i perü meruügü i ñoma i naãnewa. Erü ñoma i naãnewa rû paxama nagux i perü ngêmaxügü, rû naweane rû paxama nanachixexêë, rû ngítèèxgüxü rû naxcèx nangíxgü. ²⁰—Rû narümemaë nixí i penamuxêë i perü meruü i daxüguxü i naãnewa. Erü ngema rû tâxütáma nagux, rû naweane rû tâxütáma nanachixexêë, rû ngítèèxgüxü rû tâxütáma ngexma nachocu na naxcèx nangíxgüxücèx. ²¹—Erü ngextá ínangêxmaxüwa i perü nge-maxügü, rû ngêxma nixí i perüxínüèxü.

Taxüneârü omüchiga
(Lc 11.34-36)

²²—Cuxetügü rû ñoma wüxi i omürüü nixí i cuxunecèx. Rû ngêxguma ngêma Tupana cuxü naxwèxexücèx cudèuxgu, rû guxüma i curü maxü rû name. ²³—Natürü ngêxguma ñoma i naãneârü ngúchaüçèx cudèuxgu, rû guxüma i curü maxü rû chixexüwa nangêxma. Rû aixcûma nataxuma i êanexü i ngêmaârü yexera íxíxü i Tupanapêxewa.

¿Texécèx tá cumaxü, Tupanacèx rû êxna dîêrucèx?
(Lc 16.13)

²⁴—Taxucürüwa wüxi i duüxü rû nataxrearü coriãx. Erü wüxi i norü corichi rû tá naxai, rû ngêma to rû tá nüxü nangechaü. Rû êxna wüxicèx rû tá meã napuracü, rû ngêma to rû tá nüxü naxo. Rû taxucürüwa Tupanacèx pemaxê, ega perü dîêruguama perüxínüègu.

Tupana rû naxâcügüna nadau
(Lc 12.22-31)

²⁵—Rû ngêmacèx pemaã nüxü chixu rû: ¡Tãxü i pexoegaãègüxü naxcèx na ñacü tá pengõxgüxü rû ñacü tá pixaxgüxü, rû ñacümaã tá na pexãxchirügüxü! Erü perü maxü rû ñnaârü yexera nixí, rû pexene rû naxchiruarü yexera nixí. ²⁶—¡Dücèx penangugü i werigü i tama toegüchiréxü, rû tama nanetüarü o ibuxgüxü, rû ngepatagüxü na ngexta namaã nanguxügüxücèx i norü ñna! Natürü Penatü ya daxügücü rû nanaxüwemü. Rû pema rû Tupanacèx rû guxüma i werigüarü yexera pixígü. ²⁷—Rû taxuwama name na ñacücèx pexoegaãègüxü. Erü taxucürüwa ya wüxie i pema rû wüxi i oragu rû ipenamèxãchixêë i perü maxü ega woo poraãcü naxcèx pexoegaãègügu. ²⁸—¿Rû tüxcüü pexoegaãègü naxcèx i pexchiru? ¡Dücèx penangugü i ngêma putüragü i ngextámare yaexü i tama puracüexü, rû tama nügü üxchirügüxü! ²⁹—Natürü pemaã nüxü chixu rû woo guma ãèxgacü ga Charumóu ga na namexêchixü ga naxchiru, rû taguma wüxi ga putürachacurüü namexêchi. ³⁰—Rû ngêxguma Tupana ngêmaâcü nangêxãègu i ngêma putüragü i ñuxma ngêxmagüxü natürü moxü rû marü taxuxü, rû yexera tá pexna

nadau i pemax, Pa Yatügü i Tama Aixcüma Meã Yaxögüx. ³¹ —Rü ngëmacèx tama name i pexoegaãëgü rü ñaperügü: —¿Tacu tá tangöxgü? rü éxna —¿tacü tá tixaxgü? rü éxna —¿tacümaã tá taxäxchirügü? —ñaperügü. ³² —Erü ñoma i naãnecüãx i duüxügü rü naxcèx nadaugü i guxüma i ngëma pemaã nüxü chixuxü. Natürü pema rü pexü naxcèxma ya Penatü ya daxügücü ya nüëchama nüxü cuácü i pexü na nataxuxü i guxüma i ngëma. ³³ —Natürü narümemaë nixi i Tupanacèxira pedaugü na ngëma nüma pexü nanaxwëxëxüxira pexügüxcèx. Rü naëtü tá pexna nanaxã i guxüma i tacü i pexü taxuxü. ³⁴ —¿Tãxü i naxcèx pexoegaãëgüxü i ngëma moxü tá üpetüxü! Erü ngëma moxüârü ngunexü rü tá nüxü nangëxma i guxchaxügü i namaã ñanguxü. Erü wüxichigü i ngunexü rü nüxü nangëxma i noxrütama guxchaxügü, rü ngëmacèx tama name i moxüârü guxchaxügücèx pexoegaãëgü i ñuxmax —ñanagürü.

7

Tama name i toguexü tixu (Lc 6.37-38, 41-42)

¹ Rü Ngechuchu rü ñanagürü ta: —¿Rü taxü i togüxü pixuxü! Rü ngëxguma ya Tupana rü täxütama pexü nixu na pechixexü. ² —Erü ngëxgumarüü na togüxü pixuxü rü Tupana rü tá pexü nixu na pechixexü. Rü ngema na togüxü pepoxcuxexü, rü ngemaãcü tátama nixi ya Tupana i pexü napoxcuxexü. ³ —¿Rü tüxcüü i nüxü cudawenüxü i ngëma cueneëârü üxaxetüxü i íraxü, ega chi tama naxcèx cuxoegaãëgu i ngëma cuxetüwatama ngëxmaxü i naïpüta i taxü? ⁴ —Rü ngëxguma cuxetüwatama nangëxmagu i wüxi i naïpüta i taxü ¿rü ñuxãcü i cueneëxü cuchixewexü, rü ñacuxü nüxü:

“¿Pa Chaueneëx, cuxü chanayauxchaü i ngëma curü üxaxetüxü!” —ñacuxü? ⁵ —Pa Duüxü i Meã Maxnetaxüx, rü name nixi i cunayauxira i ngëma naïpüta i cuxetüwatama ngëxmaxü, rü ngëmaãcü tá mea nüxü cudadu na cunayaxüxcèx i ngëma cueneëârü üxaxetüxü. [Rü ngëmacèx name nixi i cuxira nüxü curüxo i ngëma chixexü i taxü i cumatama cuxüxü, rü ngëxguma tá cume na nüxü curüngüxëëxüxcèx i cueneë na nüxü naxoxüxcèx i ngëma chixexü i íraxü i naxüxü.] ⁶ —Rü tama name i Tupanaârü ore i üünexümaã penachixewe i ngëma duüxügü i chixecümagüxü i tama yaxögüchaüxü, erü ngürüãchi ngëmacèx tá pexü nimëxgü. Rü ngëxgumarüü tama name i Tupanaârü oremaã penachixewe i ngëma duüxügü i tama nüxü cuëxgüchaüxü, erü tá ñanatëxgü.

Name nixi i tórü yumüxëwa Tupanana naxcèx taca rü naxcèx tadaugü rü ñãxwa: Tu tu tu, ñatarügügü
(Lc 6.31, 11.9-13)

⁷ —¿Tupanana naxcèx peca! rü nüma tá pexna nanaxã. ¿Rü Tupanaxütagu naxcèx pedau! rü tá nüxü ipeyangau. ¿Rü norü ñãxwa: Tu tu tu, ñapegü! rü tá pexcèx nayawãxna. ⁸ —Erü guxãma ya yixema naxcèx ícaxe, rü tanayaxu. Rü guxãma ya naxcèx dauxe, rü nüxü itayangau. Rü guxãma ya yixema ñãxwa: Tu tu tu, ñagüxe, rü tá tümacèx niwãxna. ⁹ —Rü dücax i pemax, rü ngëxguma chi wüxi i pexacü päücèx ícaxgu, rü ¿ñuxãcü chi wüxi ya nuta nüxna pexãxü? ¹⁰ —Rü ngëxguma chi choxnicèx pexna nacaxgu rü ¿ñuxãcü chi i äxtape nüxna pexãxü? ¹¹ —Rü pema na pichixecümachirëxü rü nüxü pecuèx na mexü i ämare pexacügüna pexãxü. Natürü Penatü ya daxügücü rü ngëma pema pexacügüna pexãxüârü

yexera tá tũxna naxã ya yixema naxũtawã naxcèx íçaxe. ¹²—Rũ pemaã nũxũ chixu, rũ ngẽma pema penaxwèxexũ i togũ pemaã na naxũxũ, rũ name nixĩ i pema rũ ta ngẽmaãcũtama namaã penaxũ. Erũ ngẽmaãcũ tũxũ namu i Tupanaãrũ ore ga Moíché ũmatũxũ rũ yema ore ga nuxcũmaũgũxũ ga Tupanaãrũ orearũ uruũgũ ũmatũxũ.

Ĩãx i íraxũchiga
(Lc 13.24)

¹³—Name nixĩ i ngẽma ĩãx i íraxũwaama pichocu. Erũ ngẽma ĩãx i yuwa tũxũ gaxũ rũ ngẽma nama i yuwa daxũ rũ nata. Rũ muxũchixũma i duũxũgũ nagu naxĩ. ¹⁴—Natũrũ ngẽma nama i maxũwa nadaxũ rũ ngẽma ĩãx i maxũcèx nawa ixũcuxũ rũ naxĩra. Rũ noxretama nixĩ i duũxũgũ i nũxũ iyangaugũxũ.

Wũxi i nanetũ rũ norũ owa nixĩ i nũxũ icuáxũ
(Lc 6.43-44)

¹⁵—Rũ naxcèx pexuãẽgũ i ngẽma doratèèxgũxũ i nũgũ ixugũnetaxũ na Tupanaãrũ orearũ uruũgũ yixĩgũxũ. Erũ nũmagũ rũ petanũwa nangugũ, rũ nũgũ mexũ i duũxũgũneta nixĩgũxẽẽ. Natũrũ naãẽwa rũ poraãcũ chixexũgu narũxĩnũẽ. ¹⁶—Rũ pema rũ nacũmawa tá nũxũ pecuèx i ngẽma duũxũgũ, ngẽxgumarũũ i wũxichigũ i nanetũgũ rũ norũ owa na nũxũ icuáxũrũũ ngoxi name rũ ěxna tama. Rũ wũxi i torawa rũ taxucũrũwama ubagũ tayaxu. Rũ wũxi i chuchuxũwa rũ taxucũrũwama orĩx i igu tayaxu. ¹⁷—Erũ guxũma i nanetũ i mexũ rũ name i norũ o. Rũ guxũma i nanetũ i chixexũ rũ nachixẽ i norũ o. ¹⁸—Rũ wũxi i nanetũ i mexũ rũ taxucũrũwama nachixẽ i norũ o. Rũ wũxi i nanetũ i chixexũ rũ taxucũrũwama name i norũ o. ¹⁹—Rũ guxũma i nanetũ i tama mexũ i norũ o rũ tayadaxũchi, rũ ñuxũchi tayagu. ²⁰—Rũ ngẽxgumarũũ nacũmawa tá nũxũ pecuèx i ngẽma duũxũgũ i Tupanaãrũ orearũ uruũgũneta ixĩgũxũ.

Tãũtãma guxũma i duũxũgũ nichocu i ngextã Tupana ãẽxgacũ íixĩxũwa
(Lc 13.25-27)

²¹—Rũ tama guxũma i duũxũgũ i nũgũ ixugũxũ na chorũ duũxũgũ yixĩgũxũ rũ tá nichocu i ngextã Tupana ãẽxgacũ íixĩxũwa. Natũrũ yixema aixcũma Chaunatũ ya daxũgucũga ĩnũẽxẽxĩcatãtãma tixĩ ya ngema ichocuxe. ²²—Rũ ngẽxguma ngẽma ngunexũ i naãneãrũ guxwa nangugũ, rũ muxũma i duũxũgũ rũ choxũ tá ñanagũrũgũ: —Pa Corix, toma rũ togũ i duũxũgũmaã nũxũ tixu i curũ ore, rũ cuégagu ítanawoxũ i ngoxogũ, rũ cuégagu tanaxũ i muxũma i mexũ i taxũ i Tupanaãrũ poramaã taxũxũ —ñanagũrũgũ tá choxũ. ²³—Natũrũ ngẽxguma rũ tá ñacharũgũ nũxũ: —Taguma chorũ duũxũgũ pixĩgũ. ¡Rũ choxna pixĩgachi i pema i chixexũ ũgũe! —ñacharũgũ tá.

Yatũ i Cristuga ĩnũxũ rũ yatũ i tama Cristuga ĩnũxũchiga
(Mr 1.22, Lc 6.47-49)

²⁴—Rũ ngẽmacèx ya yixema choxũ ĩnũxẽ rũ naxũxe i ngẽma choma tũxũ chamuxũ, rũ wũxi ga yatũ ga meã naãẽxũ cuácũ ga nuta ga tacuètũgu ũpatacũrũũ tixĩ. ²⁵—Rũ pucũ ga tacũ ínangu, rũ narũmèx ga taxtũ, rũ nixũũchi ga wũxi ga tacũ ga buanecũ rũ guma ĩgu nanguema. Natũrũ guma ĩ rũ tama niwèxtãũ yerũ wũxi ga nutaètũgu naxũ. ²⁶—Natũrũ yixema choxũ ĩnũxẽ rũ tama naxũxe i ngẽma choma tũxũ chamuxũ, rũ wũxi ga yatũ ga tama naãẽxũ cuácũ ga naxnũcũgumare ũpatacũrũũ tixĩ. ²⁷—Rũ pucũ ga tacũ ínangu, rũ narũmèx ga taxtũ, rũ wũxi ga

tacü ga buanecü nixũüchi rü nagu nanguema ga guma í. Rü niwèxtaũ, rü yexma nayarũxo ga guxũma —ñanagürü ga Ngechuchu. ²⁸ Rü yexguma yagüegagu ga Ngechuchu ga na yadexaxũ, rü ga duũxũgü rü nabèixãchiãegü namaã ga norü nguxêetae. ²⁹ Yerü nüma rü Tupanaãrũ poramaã nanangüexêê, rü tama yema ngüexêeruũgü ga ore ga mugüwa nguxêetaegüxürüü nixĩ.

8

Ngechuchu rü wüxi ga rüchaxünexũcèx nayataanexêê

(Mr 1.40-45; Lc 5.12-16)

¹ Rü yexguma guma mèxpũnewa yanaxüegu ga Ngechuchu, rü muxũma ga duũxũgü nawe narüxĩ. ² Rü Ngechuchucèx nixü ga wüxi ga yatü ga chaxünemaã idaawecü. Rü Ngechuchupêxegu nayacaxãpũxü, rü ñanagürü nüxü: —Pa Corix, ngêxguma chi cuma cunaxwèxegu, rü chi cuxũ natauxcha na choxũ curümexêẽxü —ñanagürü. ³ Rü yexguma ga Ngechuchu rü nüxü ningögü, rü ñanagürü nüxü: —Ngü, chanaxwèxe. ¡Rüme! —ñanagürü. Rü yexguma yema ñaxgu ga Ngechuchu, rü naxcèx nitaane ga guma yatü ga na nachaxüneãxü. ⁴ Rü Ngechuchu rü ñanagürü nüxü: —¡Dücèx, taxuemaã tá nüxü quixu! ¡Natürü ngema paixütawa naxü, rü cugü iyawèx! ¡Rü nüxna naxã i ngêma ãmare ga Moïché tüxü muxü na duũxũgü nüxü cuãxücèx na curümexü! —ñanagürü.

Ngechuchu rü Dumacũãx ga churaragüarü ãëxgacüarü duũxũxü narümemêê

(Lc 7.1-10)

⁵⁻⁶ Rü Capernáüwa naxü ga Ngechuchu. Rü yexguma yéma nangxgu, rü wüxi ga churaragüarü ãëxgacü ga capitãü ga Dumacũãx rü Ngechuchucèx nixü. Rü Ngechuchuxũ nacèexũ, rü ñanagürü: —Pa Corix, chorü duũxü rü nanawãixãchi. Rü ngürücarewa nangêxma i chopatawa, rü poraãcũxüchima ngúxü ninge —ñanagürü. ⁷ Rü Ngechuchu rü ñanagürü nüxü: —Marü tá ngema chaxü na naxcèx chayataanexêẽxücèx —ñanagürü. ⁸ Natürü nüma ga capitãü nanangãxü, rü ñanagürü: —Pa Corix, choma rü taxuwama chame na chopatagu na cuxücuxücèx. Rü chanaxwèxe i curü orewaxicatama nüxü quixu, rü tá naxcèx nitaane i chorü duũxü. ⁹ —Erü choma rü ta rü chorü ãëxgacümêxêwa changêxma. Rü choxmêxwa nangêxmagü ta i ñuxre i churaragü. Rü ngêxguma chanamuxgu i wüxi na ngextã naxũxücèx, rü ngema naxü. Rü ngêxguma chaugüxütawa naxcèx changemagu i to, rü chauxütawa nangu. Rü ngêxguma wüxi i chorü duũxũxü chamuxgu na tacü na naxũxücèx, rü choxü nanaxü —ñanagürü. ¹⁰ Rü yexguma yemaxü naxĩnügu ga Ngechuchu rü nabèixãchiãê. Rü ñanagürü nüxü ga yema duũxũgü ga nawe rüxixü: —Aixcuma pemaã nüxü chixu rü taxuũma i Yudiügütanüwa nüxü ichayangau i wüxi i duũxü i ñaã yatürüü aixcuma yaxõxü. ¹¹ —Rü choma rü pemaã nüxü chixu rü muxüchixü i duũxũgü rü guxüwama tá ne naxĩ, rü Tupana ãëxgacü íxixüwa tá nachibüe namaã ya tórü oxigü ya Abrãü rü Ichaá, rü Acobu. ¹² —Natürü muxüma i Abrãütanüxũgü i Yudiügü rü tãütama nichocu i ngextã Tupana ãëxgacü íxixüwa. Rü êãnexüwa tá nawogü. Rü ngema tá naxauxe, rü tá nixüxchapütagü —ñanagürü. ¹³ Rü yexguma ga Ngechuchu rü ñanagürü yema capitãüxü: —¡Cupatacèx nataegu! Rü tá naxcèx nitaane i curü duũxü, erü cuyaxõ na

naxcèx tá yataanexũ —ñanagürü. Rũ yexgumatama naxcèx nitaane ga yema capitáũärü duũxũ.

Ngechuchu rü Pedru nèxècèx nayataanexêẽ
(Mr 1.29-31; Lc 4.38-39)

¹⁴ Rũ Pedrupatawa naxũ ga Ngechuchu. Rũ yéma ngĩxũ nadau ga Pedru nèxè ga ngürücaregu irũxãũxcü yerü iyaxaxüne. ¹⁵ Rũ Ngechuchu ngĩxmèxgu ningögü, rũ yexgumatama igèuxãchi ga yema na yaxaxünexũ. Rũ írũda ga ngĩmax. Rũ ñuxũchi naxcèx inamexêẽ ga òna.

Ngechuchu rü muxũma ga idaaweexũcèx nayataanexêẽ
(Mr 1.32-34; Lc 4.40-41)

¹⁶ Rũ yexguma marũ yanaxücuchaũgu ga üèxcü, rũ Ngechuchuxũtawana nanagagũ ga muxũma ga duũxũgü ga ngoxoãxgũxũ. Rũ wũxitama ga oremaã Ngechuchu ínanawoxũ ga yema ngoxogü. Rũ nanameẽxêẽ ta ga guxũma ga yema togü ga idaaweexũ. ¹⁷ Rũ yemaãcü Ngechuchunayanguxêẽ ga yema ore ga nuxcümaũxũ ga Tupanaärü orearü uruũ ga Ichaxía nüxũ ixuxũ ga ñaxũ:

“Rũ nüma rũ tüxũ naporaexêẽ i ngèxguma ituraegu, rũ tüxũ narümeexêẽ i ngèxguma idaaweegu”,
ñaxũ.

Duũxũgü ga Ngechuchuwe rüxãxhaũxũchiga
(Lc 9.57-62)

¹⁸ Rũ yexguma Ngechuchu nüxũ dèuxgu ga muxũma ga duũxũgü na nüxũ íchomaèguãchixũ, rũ norü ngüexũgümaã nüxũ nixu, rũ ñanagürü: —jRũ ngĩxã, rũ naxtaxaarü tocutüwa taxĩ! —ñanagürü. ¹⁹ Rũ wũxi ga ngüexêëruũ ga ore ga mugüwa nguxêëtaexũ, rũ Ngechuchucèx nixũ, rũ ñanagürü nüxũ: —Pa Ngüexêëruũ Pa Ngechuchux, cuwe charüxũxchaũ i ngextá cuma ícuxũxũwa —ñanagürü. ²⁰ Rũ Ngechuchunanangãxũ rũ ñanagürü: —Ngowagü rũ nüxũ nangèxma i naxmaũgü, rũ werigü rũ nüxũ nangèxma i naxchiãũgü. Natürü choma i Tupana Nane na duũxũxũ chĩxũ, rũ nataxuma i chauchica i ngextá nagu chicuxeruxũ —ñanagürü. ²¹ Rũ wũxi ga to ga norü ngüexũ, rũ ñanagürü nüxũ: —Pa Corix, cuwe charüxũxchaũ, natürü chanaxwèxe i chaunatü tüxũ ichayatèxira —ñanagürü. ²² Rũ Ngechuchunanangãxũ, rũ ñanagürü nüxũ: —jNoxtacüma chowe rüxũ! Rũ nüe i ngèma cutanũxũ i tama yaxögũxũ iyatèxgü i ngèma yuexũ —ñanagürü.

Ngechuchu rü buanecüxũ rü yuapexũ ínayachaxãchixêẽ
(Mr 4.35-44; Lc 8.22-25)

²³ Rũ yexguma ga Ngechuchu rü wũxi ga nguegu nixüe. Rũ norü ngüexũgü rü ta ínayaxũmücügü, rü inaxĩãchi. ²⁴ Rũ ngürüãchi naxtaxaarü ngãxũtũgu nüxũ naxü ga wũxi ga buanecü ga taxüchicü. Rũ guma nguewa rü niyaucuchichigü ga dexá. Natürü ga Ngechuchu rü nape. ²⁵ Rũ yexguma ga norü ngüexũgü rü ínanabèixgügü, rü ñanagürügü nüxũ: —Pa Corix, jtoxũ rüngũxêẽ, erü ngè mama itabaxũgü! —ñanagürügü. ²⁶ Rũ Ngechuchunanangãxũ, rü ñanagürü nüxũ: —Pa Duũxũgü i Tama Aixcüma Yaxögũxũx, ¿tüxcüũ pemuũê? —ñanagürü. Rũ yexguma ga Ngechuchu rü ínarũda. Rũ buanecü rü yuapena nachogü. Rũ ínayachaxãchi ga buanecü, rü inayarüxo ga yuape, rü ínachaxanemare. ²⁷ Rũ

nümagü ga norü ngúexüğü rü nabèixächiãëgü, rü nügümaã ñanagürüğü: — ¿Tacü éxna nixí i ñaã yatü rü ngëmacèx woo ya buanecü rü yuape rü naga naxínüëxü? —ñanagürüğü.

Yatüğü ga Gadáracüãx ga ngoxogü nawa yexmagüxü
(Mr 5.1-20; Lc 8.26-39)

²⁸ Rü Ngechuchu rü norü ngúexüğü rü naxtaxaarü tocutüwa nangugü ga Gadáaraarü nañewa. Rü yexguma yéma nangugügu, rü Ngechuchucèx yéma nibuxmü ga taxre ga yatüğü ga duüxèchiquëxetanügu yarüxauchigütanüneüxü. Rü yema taxre rü ningoõãx, rü nidüraexüchi. Rü yemacèx taxucürüwama texé yéma namawa taxüpetü. ²⁹ Rü yema taxre rü aita naxüe, rü ñanagürüğü: —¿Tüxcüü toxü nuã cuyachixewe, Pa Ngechuchu ya Tupana Nane? ¿Éxna nuã cuxü na toxü ícuwoxüxüçèx tauta nawa nanguyane na Tupana toxü poxcuexü? —ñanagürüğü. ³⁰ Rü yema nachicaarü ngaicamana nachibüe ga muxüma ga cuchigü. ³¹ Rü yema ngoxogü rü Ngechuchuxü nacèèxüğü, rü ñanagürüğü: —Rü ngëxguma toxü ícuwoxügu, ¡rü ngëma cuchigügu toxü nachocuxëë! —ñanagürüğü. ³² Rü yexguma ga Ngechuchu, rü ñanagürü nüxü: —Ëcü, ¡ngema pexí! —ñanagürü. Rü yexguma ga yema ngoxogü rü ínachoxü nawa ga yema taxre ga yatüğü, rü yema cuchigügu nayachocu. Rü ñuxüchi guxüma ga yema cuchigü rü inaxüãchi, rü naxtaxacutüarü mëxpüxüwa nayarüyuxgü, rü yexma nayí. ³³ —Rü yema cuchigüarü dauruüğü rü nabèixächiãëgü, rü ñanecèx nibuxmü. Rü yexguma ñanewa nangugügu, rü nüxü nixugüğü ga guxüma ga yema ngupetüxü ga ñuxãcü naxcèx na yataanegüxü ga yema taxre ga yatüğü ga ngoxoãxgüxü. ³⁴ —Rü yexguma ga guxüma ga yema ñanecüãx ga duüxüğü, rü Ngechuchuxütawa naxí. Rü yexguma Ngechuchuxü nadaugügu, rü nüxü nacèèxüğü na inaxüxüçèx ga yema norü nañewa.

9

Ngechuchu rü wüxi ga yatü ga nawãixächicüçèx nayataanexëë
(Mr 2.1-12; Lc 5.17-26)

¹ Rü yexguma ga Ngechuchu rü wüxi ga ngegu nixüe. Rü naxtaxaarü tocutüwa naxü, rü noxrütama ñanewa nangu. ² Rü yéma guma ñanewa rü duüxüğü rü Ngechuchuxütawa nanangetaüğü ga wüxi ga yatü ga nawãixächicü. Rü yexguma Ngechuchu nüxü dëuxgu ga ñuxãcü aixcüma na yaxögüãxü ga yema duüxüğü rü ñanagürü nüxü ga guma idaawecü: — ¡Nataãë, Pa Chaunex! Erü curü pecadugü rü marü cuxü nüxü changechaü —ñanagürü. ³ Rü yéma nayexma ga ñuxre ga ngúexëëruüğü ga ore ga mugüwa nguxëëtaegüxü. Rü nümagü rü naãxëgüwa ñanagürüğü: —¿Ñaã yatü rü tacü Tupanamaã nixugü? —ñanagürüğü. ⁴ Natürü ga Ngechuchu rü nüxü nacüèxama ga yema naãëwa nagu naxínüëxü. Rü yemacèx ñanagürü nüxü: —¿Tüxcüü chixexügu perüxínüë? ⁵ —¿Tacü nixí i ngëma rütauxchamaëxü na namaã nüxü ixuxü ya daa nawãixächicü:

“Rü curü pecadugü rü marü cuxü nüxü changechaü”, rü éxna:

“¡Inachi rü íixü!” ñagüxü nüxü? ⁶ —Natürü i ñuxma rü tá pexü nüxü chadauxëë na Chaunatü ya Tupana núma choxü muxü na duüxügüaxü nüxü changechaüxüçèx i norü pecadugü —ñanagürü. Rü yexguma rü ñanagürü nüxü ga guma nawãixächicü: —¡Inachi, rü nayaxu i curü carü, rü cupatawa naxü! —ñanagürü. ⁷ —Rü yexgumatama ga guma

nawāixāchicü rü inachi, rü napatawa naxū. ⁸ Rū yexguma yemaxū nadaugūgu ga duūxūgū, rü poraācū namuūē. Rū Tupanaxū nicuēxūūgū, rü ñanagürügü: —Moxē, Pa Tupanax, erü cunaporaxēē i ñaā yatü na ngēmaācū mexū toxçex naxūxūçex —ñanagürügü.

Mateuçex naca ga Ngechuchu

(Mr 2.13-17; Lc 5.27-32)

⁹ Rū yexguma yéma inaxūāchigu ga Ngechuchu, rü yéma nüxū nadau ga wūxi ga yatü ga Mateugu āegaxū ga yéma rütöxū ga ngextá Dumaārü āēxgacūçex dīeru ngīxū inayauxgūxūwa yerü woetama yemawa napuracü. Rū Ngechuchu rü ñanagürü nüxū: —¡Chowe rüxū! —ñanagürü. Rū yexguma ga Mateu rü inachi, rü nawe narūxū. ¹⁰ Rū Mateupatawa naxū ga Ngechuchu, rü yéma nachibü. Rū inangugü ta ga muxūma ga togü ga duūxūgū ga Dumaārü āēxgacūçex dīeru ngīxū yauxgūxūwa puracūexū, rü togü ga duūxūgū ga taxúema nacūmamaā taāēgūxū. Rū yema duūxūgū rü yéma mechawa narütogü namaā ga Ngechuchu rü norü ngúexūgū. ¹¹ Natürü yexguma yemaxū nadaugūgu ga Parichéugü, rü Ngechuchuarü ngúexūgūna nacagü, rü ñanagürügü: —¿Nuxācū i perü ngúexēeruū rü namaā nachibü i āēxgacūarü duūxūgū i dīeruarü yauxwa puracūexū, rü duūxūgū i pecaduāxgūxū? —ñanagürügü. ¹² Rū yexguma yemaxū naxīnūgu ga Ngechuchu, rü ñanagürü nüxū ga Parichéugü: —Ngēma poraxū rü tama nanaxwēxegü ya duturu, natürü ngēma idaaweexū nixī i naxwēxegūxū. ¹³ —¡Rü ípixī, rü nawa pengúe i Tupanaārü ore i umatūxū i ñaxū:

“Choma rü tama chanaxwēxe i chauxçex peyamèx i carnerugü, natürü chanaxwēxe i togü pexū nangechaūtümūgü”, ñaxū! Rū ñanagürü ta ga Ngechuchu: —Choma rü tama mexūgūna na chaxuxūçex nixī i nūma chaxūxū, natürü nūma chaxū na nüxna chaxuxūçex i ngēma pecaduāxgūxū na ngēmaācū nüxū naxoexūçex i nacūmagü i chixexūgü —ñanagürü.

Ngechuchuna nacagüe ga aurechiga

(Mr 2.18-22; Lc 5.33-39)

¹⁴ Rū yexguma ga Cuáú ga baiūxēēruñārü ngúexūgü, rü Ngechuchucèx naxī, rü nüxna nacagüe, rü ñanagürügü: —Toma i Cuáúñārü ngúexūgü na tixīgūxū rü nūmagü i Parichéugü rü muēxpūxcūna tama tachibüeācūma tayumūxēgü. ¿Rü tūxcūü i curü ngúexūgü rü tama toxrūü tama nachibüācūma nayumūxēgü? —ñanagürügü. ¹⁵ Rū Ngechuchu nanangāxū rü ñanagürü: —¿Éxna wūxi i ngīgūarü petawa rü pexçex namexū na nangechaūēxū rü naxaureexū i ngēma nüxna naxugūxū ega natanūwa nangēxmagu i ngēma yatü i ngexwacèx āmaxū? Maneca tama nixī. Natürü wūxi i ngunexūgu rü ngēma yatü i ngexwacèx āmaxū rü tá namücügūna nixūgachi. Rū ngēma ngunexūgu tá nixī i aixcūma naxaureexū i namücügü. ¹⁶ —Rü taxúema tanapaita i wūxi i naxchiru i ngauxū namaā i wūxi i natūchi i ngexwacaxūxū i tauta nañaāchimūxū. Erü ngēxguma nayauxgu i ngēma naxchiru rü tá nügü inanaxíraxāchi i ngēma natūchi i ngexwacaxūxū, rü tá nanagauxēē i ngēma wexachiru. Rū noxriarü yexera tá nixī i na nagauxū. ¹⁷ —Rü ngēxgumarūü ta rü taxúema ngexwacaxūcū ya binu rü nagu tayabacuchi i wūxi i naxchixū i marü ngauxū i naxchēxmūnaxçex. Erü ngēxguma ngēmaācū naxūxgu rü yima binu ya ngexwacaxūcū rü narūngu, rü tá nayawāixēē i ngēma

naxchixü i ngauxü i naxchëxmünaxcëx. Rü ngëxma tá nayarütaxu ya binu rü ngëma naxchixü rü ta. Rü ngëmacëx tanaxwëxe ya ngexwacaxücü ya binu rü ngexwacaxüxü i naxchixügu tayabacuchi. Rü ngëmaäcü täütáma inayarütaxu. [Rü chorü nguxëëtae i ngexwacaxüxü rü ngëxgumarüü ta nixü na taxucürüwama namaã nawüxiguxü i ngëma nuxcümaüxü i pecümagü —ñanagürü ga Ngechuchu.]

Yáiruxacüchiga rü yema nge ga Ngechuchuchirugu ingöögücüchiga
(Mr 5.21-43; Lc 8.40-56)

¹⁸ Rü yexguma yemaäcü ínanjúexëëtaeyane ga Ngechuchu, rü naxütawa nangu ga wüxi ga äëxgacü ga Yudiügarü. Rü Ngechuchupëxegu nayacaxäpüxü, rü ñanagürü nüxü: —Pa Corix, chauxacü rü ngexwacëx iyu. Natürü ngëxguma chi ngema cuxüxgu rü ngüxü quingögügu, rü wena chixarü imaxü —ñanagürü. ¹⁹ Rü inachi ga Ngechuchu, rü norü ngüexügümaã yema äëxgacüwe narüxü. ²⁰ Rü yexguma yéma naxüyane ga Ngechuchu rü wüxi ga ngecü ga 12 ga taunecü ägüechacü rü naweama ne ixü. Rü naxpechinüchirugu iyangögü. ²¹ Yerü ngüma rü nagu irüxünü rü yexguma chi naxchiruxüxicatama yangögümaregu, rü chi ngüxcëx nitaane. ²² Natürü nüma ga Ngechuchu rü nügü ínidau, rü ngüxü nadau ga yema nge. Rü ñanagürü ngüxü: —¡Nataãë, Pa Chauxacü! Marü cuxcëx nitaane, erü cuyaxö —ñanagürü. Rü yexgumatama ngüxcëx nitaane. ²³ Rü yexguma yema äëxgacüpatawa nanguxgu ga Ngechuchu, rü nüxü nadau ga paxetatanüxü ga marü na ínamemaregüxü na ngüxü iyatëxgüxü ga yema bucü. Rü ga duüxügü rü nixáicha rü naxauxe. ²⁴ Rü Ngechuchu ñanagürü nüxü ga yema duüxügü: —¡Ípechoxü i nuã! Erü ngëma bucü rü tama iyu. Rü ipemare —ñanagürü. Natürü nümagü ga duüxügü rü Ngechuchuxü nacugüeama. ²⁵ Rü yexguma Ngechuchu ínachoxüxëëxgu ga duüxügü, rü yema bucüarü ucapugu naxücu. Rü ngüxmëxgu nayayauxächi, rü yexgumatama írüda ga ngümax. ²⁶ Rü guxüwama ga yema naãnewa, rü duüxügü nüxü nixuchigagü ga yema Ngechuchu üxü.

Ngechuchu naxcëx nayataanexëë ga taxre ga yatü ga ingexetüxü

²⁷ Rü yexguma yéma ínaxüüxgu ga Ngechuchu, rü taxre ga ngexetüxü rü nawe nangëgü. Rü tagaäcü ñanagürügü: —Pa Ngechuchux, Pa Dabítanüxüx, ¡cuxü tangechaütümüügü! —ñanagürügü. ²⁸ Rü yexguma Ngechuchu guma í ga nagu napexünegu naxücuxgu, rü yema taxre ga ngexetüxü rü naxcëx naxü. Rü Ngechuchu nüxna naca, rü ñanagürü: —¿Peyaxögüxü yüxü na chaporaxü na pexü charümeëxëëxüxcëx? —ñanagürü. Rü nümagü nanangäxügü, rü ñanagürügü: —Ngü, Pa Corix, tayaxögü —ñanagürügü. ²⁹ Rü yexguma ga Ngechuchu rü naxëtügügu ningögü, rü ñanagürü nüxü: —¡Cü pexcëx yataane, erü peyaxögü! —ñanagürü. ³⁰ Rü naxcëx nitaanegü. Rü Ngechuchu rü poraäcü nayaxucuxëgü na taxüemaãma nüxü na yaxugüxüxcëx ga yema nüxü ngupetüxü. ³¹ Natürü yema taxre rü yexguma yéma ínachoxügu rü guxüwama ga yema naãnewa rü nüxü nixugüeama ga yema Ngechuchu üxü.

Ngechuchu rü naxcëx nayataanexëë ga wüxi ga yatü ga tama idexacü

³² Rü yexguma yema taxre ga yatü íchoüxguwena, rü ñuxre ga duüxügü rü Ngechuchuxütawa nanagagü ga wüxi ga yatü ga tama idexacü yerü ngoxo nawa nayexma. ³³ Rü Ngechuchu ínatëxüchi ga yema ngoxo. Rü yexgumatama ínanaxügü ga na yadexaxü ga guma yatü. Rü nümagü ga

duŭxŭgŭ rŭ nabèixāchiāēgŭ. Rŭ ñanagŭrŭgŭ: —Taguma nŭxŭ tadau i nuā tachiŭānewa i ŭacŭ i ñaārŭŭ ixīxŭ —ñanagŭrŭgŭ. ³⁴ Natŭrŭ ga Parichéugŭ rŭ ñanagŭrŭgŭ: —Ñaā yatŭ rŭ ngoxogŭarŭ āēxgacŭ i Chatanáārŭ poramaā nixī i ínawoxŭāxŭ i ngoxogŭ —ñanagŭrŭgŭ.

Ngechuchuaxŭ nangechaŭtŭmŭŭgŭ ga duŭxŭgŭ

³⁵ Rŭ yema naānewa rŭ guxŭnema ga ŭānegŭgu rŭ ŭānexācŭgŭgu nixŭgŭchigŭ ga Ngechuchu. Rŭ wŭxichigŭ ga ŭānewa, rŭ duŭxŭgŭarŭ ngutaquēxepataŭwa ninguxēētaechigŭ. Rŭ duŭxŭgŭmaā nŭxŭ nixuchigŭ ga ore ga mexŭ na ñuxācŭ āēxgacŭ na yīxŭ ya Tupana. Rŭ nanameēxēē ga duŭxŭgŭ ga idaaweexŭ. Rŭ woo nañuxraŭxŭ ga norŭ daawe nŭxŭ yexmaxŭ, rŭ nanameēxēē. ³⁶ Rŭ yexguma Ngechuchu nŭxŭ dēuxgu ga yema muxŭma ga duŭxŭgŭ ga naxŭtawa ngugŭxŭ, rŭ nŭxŭ nangechaŭtŭmŭŭgŭ. Yerŭ carnerugŭ ga ngearŭ dauruŭāxŭrŭŭ nanaxixāchiāēgŭ, rŭ tama nataāēgŭ. ³⁷ Rŭ yexguma ga Ngechuchu rŭ ñanagŭrŭ nŭxŭ ga norŭ ngŭexŭgŭ: —Aixcŭma pemaā nŭxŭ chixu rŭ nangēxma i muxŭchixŭ i duŭxŭgŭ i ímemaregŭxŭ na yaxōgŭāxŭ i Tupanaārŭ ore. Natŭrŭ nanoxreēxpŭx i Tupanaārŭ puracŭtanŭxŭ na namaā nŭxŭ yaxugŭxŭcèx i ngēma ore. ³⁸ Rŭ ngēmacèx name nixī i duŭxŭgŭarŭ yora ya Tupanana naxcèx peca i perŭ yumŭxēwa na yamugŭāxŭcèx i norŭ puracŭtanŭxŭ i orearŭ uruŭgŭ na ngēma duŭxŭgŭmaā nŭxŭ yaxugŭxŭcèx i norŭ ore i mexŭ —ñanagŭrŭ ga Ngechuchu.

10

Ngechuchu nanade ga 12 ga norŭ ngŭexŭgŭ na toxnamana namugŭāxŭcèx

(Mr 3.13-19; Lc 6.12-16)

¹ Rŭ yexguma ga Ngechuchu, rŭ yema 12 ga norŭ ngŭexŭgŭcèx naca. Rŭ nŭxna naxāga rŭ nanaporaexēē na ínawoxŭāxŭcèx ga ngoxogŭ rŭ nameēxēēāxŭcèx ga duŭxŭgŭ ga idaaweexŭ ga woo nañuxraŭxŭ ga daawe nŭxŭ yexmaxŭ. ² Rŭ ñaā nixī ga naegagŭ ga yema 12 ga Ngechuchuarŭ ngŭexŭgŭ ga imugŭxŭ. Rŭ natanŭwa rŭ Chimáŭ ga Pedrugŭ āēgacŭ nixī ga naērŭ ixīxŭ. Rŭ to nixī ga Pedrueneē ga Aŭdré. Rŭ to nixī ga Chaŭtiágu rŭ to nixī ga Chaŭtiágueneē ga Cuáŭ. Rŭ yema taxre rŭ Zebedéu nanegŭ nixīgŭ. ³ Rŭ togŭ nixī ga Piripi, rŭ Baturumé, rŭ Tumachi, rŭ Mateu ga Dumaārŭ āēxgacŭcèx dīēruarŭ yaxwa puracŭchirécŭ. Rŭ togŭ nixī ga Chaŭtiágu ga Arupéu nane, rŭ Tadéu. ⁴ Rŭ to nixī ga Chimáŭ ga iporaāēcŭcŭ. Rŭ to nixī ga Yuda ga Icariúte ga yixcama bexma cúacŭ Ngechuchuxŭ íxuaŭxŭ.

Ngechuchu rŭ norŭ ngŭexŭgŭxŭ nimugŭ na nŭxŭ yanaxugŭexŭcèx ga norŭ ore

(Mr 6.7-13; Lc 9.1-6)

⁵ Rŭ Ngechuchu nayamugŭ ga yema 12 ga norŭ ngŭexŭgŭ. Rŭ nŭxna naxāga, rŭ ñanagŭrŭ: —¡Tāŭtāma natanŭwa pexī i ngēma duŭxŭgŭ i tama Yudŭgŭ ixīgŭxŭ! ¡Rŭ tāŭtāma Chamáriacŭāx i duŭxŭgŭarŭ ŭānegŭwa pexī! ⁶ —Natŭrŭ chanaxwēxe i ngēma Yudŭgŭ i carnerugŭrŭŭ iyarŭtauxexŭtanŭwa pexī. ⁷ —¡Rŭ ngema natanŭwa nŭxŭ peyarŭxu na marŭ yangaicaxŭ ya Tupana na norŭ āēxgacŭ yīxŭ! ⁸ —¡Rŭ pe-nameēxēēx i ngēma duŭxŭgŭ i idaaweexŭ! ¡Rŭ wena penamaxēxēēx

i ngēma duūxūgū i marū yuexū! ¡Rū penameēxēēx i ngēma duūxūgū i chaxūnemaā idaaweexū! Rū ngēma duūxūgū i ngoxogū nawa ngēxmagūxū ¡rū nūxū ¡penawoxūx! Rū tama name i penaxātanū ega texēxū perūmexēēxgu, erū pema rū pexū nangetanūmare i ngēma pora. ⁹⁻¹⁰ —¡Rū tāūtáma ¡pingearū dīēruāxgū na perū ¡acūcèx petaxegūxūcèx rū bai i perū choca i perū namawaū! ¡Rū wūxitama i pexchiru ¡pinge, rū bai i perū chapatu, rū bai ya perū caxūchigūxū ya naīxmenèxā ¡pinge! Rū pemaā nūxū chixu rū wūxi i puracūtanūxū rū name nixī i ngēma duūxū i nūxū napuracūxūtawa nachibū. ¹¹ —Rū ngēxguma wūxi ya ¡ānewa rū ēxna wūxi ya ¡ānexācūwa pengugūgu i pemax, ¡rū naxcèx pedèux i wūxi i duūxū i mecūmaxū! ¡Rū ngēmaxūtagu perūcho űuxmatáta ipexīāchi i ngēma ¡ānewa! ¹² —Rū ngēxguma yima ¡patagu pechocugu, rū meā tá nūxū perūmoxēgū i ngēma duūxūgū i ngēma ngēxmagūxū rū: “¡Tupana pexū rūngūxēēx!” űaperūgūgū tá nūxū. ¹³ —Rū ngēxguma ngēma duūxūgū rū meā pexū nayauxgu rū Tupana tá nūxū narūngūxēē. Natūrū ngēxguma tama meā pexū nayauxgu i napatawa rū űaperūgūgū tá nūxū:

“Marū name i toxnamana taxī”, űaperūgūgū tá. ¹⁴ —Rū ngēxguma wūxi ya ¡wa rū ēxna wūxi ya ¡ānewa duūxūgū tama meā pexū yauxgūgu rū tama nūxū naxīnūēchaūgu i perū ore, ¡rū ¡pechoxū! Rū ngēxguma ¡pechoūxgu, ¡rū meā pegū ¡pepagūcutū i perū űaxaxūcutū, na ngēmawa nūxū nacūxgūxūcèx na chixexū na naxūgūxū i ngēma duūxūgū! ¹⁵ —Rū aixcūma pemaā nūxū chixu rū ngēma ngunexū i nagu nagūxū i naāne, rū Chodomacūāx rū Gomoracūāx i duūxūgūarū yexera Tupana tá nanapoxcue i ngēma duūxūgū i tama meā pexū yauxgūxū.

Guxchaxūgūmaā tá pewé ningexūtanū i duūxūgū

¹⁶ —Dūcèx, āncūmaxūwa pexū chamugū, ngēxgumarūū i carnerugūxū aigūtanūwa imugūxūrūū. ¡Rū ngēmacèx penaxwèxe i āxtapegūrūū pexuāēgū, natūrū muxtucugūrūū taxuūma i chixexū pexūgū! ¹⁷ —¡Rū pegūna pedaugū! Erū duūxūgū rū tá pexū ¡nayauxū, rū āēxgacūgūxūtawa tá pexū nagagū na pexū napoxcuexūcèx. Rū ngutaquēxepataūgūgu tá pexū nīcuaixgū. ¹⁸ —Rū chaugagu tá āēxgacūgū ya tacūgūpēxewa pexū nagagū. Rū ngēmaācū tá chauchigagu pidexagū napēxewa i ngēma āēxgacūgū rū napēxewa i ngēma duūxūgū i tama Yudīugū ixīgūxū. ¹⁹ —Natūrū ngēxguma āēxgacūgūpēxewa pexū nagagūgu na pexū napoxcuexūcèx, ¡rū taxucèxtáma pexoegaāēgū na ¡acūmaā tá penangāxūxū rū ēxna ¡acūxū tá namaā na pixuxū! Erū ngēxguma nawa nanguxgu na pidexagūxū, rū Tupanaāē tá pexū nanguxēē na ¡acūxū tá namaā pixuxū. ²⁰ —Rū tāūtáma pema nixī i pidexagūxū, natūrū Tupanaāē i űūnexū tá nixī i pewa idexaxū. ²¹ —Rū nūgūeneēgūwa rū tá nūgū ¡naxuaxūgū na āēxgacūgū yamēxgūxūcèx. Rū ngēxgumarūū tá ta nanatūgū rū naxācūgūxū ¡naxuaxūgū, rū naxācūgū rū nanatūgūxū tá ¡naxuaxūgū na āēxgacūgū tūxū imēxgūxūcèx. ²² —Rū chaugagu tá guxū i duūxūgū pexchi naxaie. Natūrū yīxema aixcūma yaxōdmāxē i chorū ore rū tama choxū ítáxe, rū yīxema tá tixī ya nayaxūxe i ngēma maxū i taguma gūxū. ²³ —Rū ngēxguma wūxi ya ¡ānewa rū duūxūgū pexū daixchaūgu, rū name nixī i pibuxmū ya yima ¡ānewa, rū nái ya ¡ānewa pexī. Rū aixcūma pemaā nūxū chixu rū tāūtáma guxūne ya Yudīugūarū ¡ānewa pengugū naxūpa na chataeguxū i chomax. ²⁴ —Rū taxuūma i wūxi i ngūexū rū norū ngūxēēruūxū narūyexera. Rū taxuūma i wūxi i coriarū duūxū rū norū

corixũ narũyexera. ²⁵—Rũ ngẽma norũ ngúexẽeruũxũ ùpetũxũrũũ tátama nũxũ naxũpetũ i ngẽma norũ ngúexũ. Rũ ngẽma norũ corixũ ùpetũxũrũũ tátama nũxũ naxũpetũ i ngẽma norũ duũxũ. Rũ ngẽxguma duũxũgũ rũ ngoxo i Bechebũ choxũ nawogũegu, ¿rũ ñuxãcũ tá pexũ naxu i pemax?

Name nixĩ na Tupanaxũ pemuũẽxũ

(Lc 12.2-7)

²⁶—Rũ ngẽmacẽx ãtãxũ i nũxũ pemuũẽxũ i ngẽma duũxũgũ! Erũ guxũma i ngẽma cúãcũ ùxũ rũ tá nangoxoma. Rũ guxũma i ngẽma ñuxma duũxũgũcẽx ẽxũguxũ, rũ yixcũra rũ tá nũxũ nacuẽxgũama. ²⁷—Rũ guxũma i ngẽma pemaãxĩcatama nũxũ chixuxũ, ¡rũ meã duũxũgũcẽx penangoxẽẽx! Rũ guxũma i ngẽma bexma pemaã nũxũ chixuxũ, ¡rũ tagaãcũ guxũ i duũxũgũmaã nũxũ pixu! ²⁸—¡Rũ tãxũ i nũxũ pemuũẽxũ i ngẽma duũxũgũ i pexũ daixchaũxũ! Erũ taxũnexũxĩcatama nimẽxgũ. ¡Natũrũ name nixĩ i nũxũ pemuũẽ ya yima Tupana! Erũ nũma nũxũ nangẽxma i pora na napoxcuãxũcẽx i pexene rũ peãẽ rũ ta i ngẽma ngoxogũxũ ¡napoxcuẽxũgu. ²⁹—¿Tama ẽxna wũxitachinũ i dĩerugu namaã petaxe i taxre i werixacũgũ? Natũrũ bai i wũxi i ngẽma werixacũ rũ ñãxtũanegu nangu, ega tama nanaxwẽxegu ya Penatũ ya Tupana. ³⁰—Rũ woo i peyae rũ Tupana rũ wũxichigũ rũ nayaxugũ, rũ nũxũ nacuẽx na ñuxre ngẽxmaxũ. ³¹—Rũ ngẽmacẽx ãtãxũ i pemuũẽxũ! Erũ pema rũ muxũma i werixacũgũarũ yexeraxũchi pexũ nangechaũ ya Tupana.

Yĩxema duũxũgũpẽxewa tũgũ ixuxe na Ngechuchu ya Cristuarũ duũxũgũ tĩxũ

(Lc 12.8-9)

³²—Rũ guxãma ya texé i ñoma i naãnewa i duũxũgũpẽxewa tũgũ ixuxe na chorũ duũxũ tĩxũ, rũ choma rũ tá ta Chaunatu ya daxũgucũpẽxewa tũxũ chixu na chorũ duũxũ tĩxũ i tũmax. ³³—Natũrũ texé ya ñoma i naãnewa i duũxũgũpẽxewa tũgũ ixuxe na tama chorũ duũxũ tĩxũ, rũ choma rũ tá ta Chaunatu ya daxũgucũpẽxewa tũxũ chixu na tama chorũ duũxũ tĩxũ i tũmax.

Ngechuchugagu nixĩ i yatoyexũ i duũxũgũ

(Lc 12.51-53; 14.26-27)

³⁴—Rũ tama name i nagu perũxĩnũẽ na núma chaxũxũ na guxũ i duũxũgũ rũ wũxigu naxĩnũẽxũcẽx. Natũrũ pemaã nũxũ chixu rũ núma chaxũ na chaugagu yatoyexũcẽx i duũxũgũ. ³⁵—Rũ nuã chaxũ na wũxi ya yatũ rũ tama nanatũmaã wũxigu naxĩnũxũcẽx, rũ wũxi i paxũ rũ tama naẽmaã wũxigu naxĩnũxũcẽx, rũ wũxi i naneãx rũ tama ngĩxẽmaã na wũxigu naxĩnũxũcẽx. ³⁶—Rũ ngẽmaãcũ wũxi ya ¡wa, rũ nũgũtanũxũmaã tátama naxuwanũãxgũ. ³⁷—Rũ yĩxema texé ya choxũ na tangechaũxũãrũ yexera tũmanatũxũ rũ ẽxna tũmaẽxũ ngechaũxẽ, rũ taxucũrũwama chorũ duũxũ tixĩ. Rũ yĩxema texé ya choxũ na tangechaũxũãrũ yexera tũmanexũ rũ ẽxna tũmaxãcũxũ ngechaũxẽ, rũ taxucũrũwama chorũ duũxũ tixĩ. ³⁸—Rũ yixema tama yaxna namaã ¡nũxẽ i ngẽma guxchaxũgũ i chaugagu tũmacẽx ¡nguxũ rũ ngẽmaãcũ chowe rũxũxẽ, rũ taxucũrũwama chorũ duũxũ tixĩ. ³⁹—Rũ texé ya tũgũ maxẽẽchaũxẽ rũ tá itayarũtaxu. Natũrũ texé ya chauxcẽx yuxe rũ tá tanayaxu i maxũ i taguma gũxũ.

Ãmarechiga
(Mr 9.41)

40 —Rü texé ya pexũ yaxúxe rü choxũ nixĩ i tayaxuxũ. Rü texé ya choxũ yaxúxe rü yima núma choxũ mucũ ya Chaunatũxũ nixĩ i tayaxuxũ. 41 —Rü texé ya wüxi i orearũ uruũ i Tupana ngema muxũxũ yaxúxe, rü ngẽmatama ãmare i wüxi i orearũ uruũ yaxuxũraũxũ tátama tayaxu. Rü texé ya wüxi i yatũ i mecũmaxũxũ yaxúxe erũ namecũma, rü ngẽmatama ãmare i wüxi i yatũ i mecũmaxũ yaxuxũraũxũ tátama tayaxu. 42 —Rü texé ya wüxi i pochiyuãcu i dexá i gẽuxchiũxũ nüxna ãxẽ i ngẽxũrüũxũ i chorũ buxũgũ i chowe rüxĩxũ, rü aixcũmaxũchi tá tanayaxu i tũmaãrũ ãmare —ñanagũrũ ga Ngechuchu.

11

*Cuáũ ga baiũxẽerũ nanamu ga ñuxre ga norũ duũxũgũ na Ngechuchuxũtawa íyadaugũxũcèx
(Lc 7.18-35)*

¹ Rü yexguma nüxũ nachauxgu ga Ngechuchu ga na yaxucũxẽgũãxũ ga yema 12 ga norũ ngũexũgũ, rü inaxũãchi ga yema na duũxũgũxũ nangũxẽxũcèx rü nüxũ yaxúxũcèx ga ore ga mexũ ga guxũne ga ãnegũ ga yema naãnewa yexmagũnewa. ²⁻³ Rü Cuáũ ga baiũxẽerũ rü yexguma poxcupataxũwa nayexmayane, rü nüxũ nacuãxchiga ga yema Ngechuchu üxũ. Rü yemacèx ga Cuáũ rü Ngechuchuxũtawa nanamugũ ga ñuxre ga norũ duũxũgũ na nüxna yacagũxũcèx rü aixcũma Cristu ga ínguxẽegũcü yĩ, rü ãxna to tá yĩ ya Cristu. ⁴ Rü Ngechuchu nanangãxũ rü ñanagũrũ nüxũ ga yema duũxũgũ: —¡Pewoegu rü Cuáũmaã nüxũ peyarũxu i ngẽma pematama nüxũ pedaugũxũ rü nüxũ pexĩnũxũ! ⁵ —¡Rü namaã nüxũ pixu rü ngẽma ngexetũgũxũ rü marũ nidauchigũ, rü ngẽma ichixeparaxũ rü marũ inachigũ, rü ngẽma chaxũneãxgũxũ rü marũ naxcèx nitaanegũ, rü ngẽma ngauchixẽgũxũ rü marũ ningoxnamachixẽgũ, rü ngẽma yuexũ rü wenaxãrũ namaxẽ, rü ngẽma ngearũ ngẽmaxũãxgũxũ rü marũ namaã nüxũ tixu i Tupanaãrũ ore i mexũ! ⁶ Rü tataãe ya yixema texé ya tama nüxũ rüxoxe na choxũ tayaxõxũ —ñanagũrũ ga Ngechuchu. ⁷ Rü yexguma nawoeguxgu ga yema Cuáũ ga baiũxẽerũãrũ duũxũgũ, rü Ngechuchu inanaxũgũ ga guma Cuáũchiga na yadexaxũ. Rü ñanagũrũ nüxũ ga duũxũgũ: —¿Tacũ nixĩ ga pema ípeyadaugũxũ ga dauxchitawa ga ngextá taxúema íãpataxũwa? —¿Éxna wüxi ga ngẽxũrüũxũmare ga yatũ ga ñoma dexne ga buanecũ yaxĩãxtanücüxẽècürũ ixĩxũ nixĩ ga ípeyadaugũxũ? ⁸ —Rü ãxna ega tama guma ípeyadaugũgu, ¿rũ tacũ nixĩ ga ípeyadaugũxũ? ¿Éxna wüxi ga yatũ ga poraãcü nügũ ngẽxãxũ yĩxũ ga ípeyadaugũxũ? Pema nüxũ pecuèx i ngẽma poraãcü nügũ ngẽxãgũxũ rü ãẽxgacũgũ ya tacũgũpatawa nangẽxmagũ. ⁹ —¿Tacũ ãxna nixĩ ga ípeyadaugũxũ? ¿Éxna wüxi ga Tupanaãrũ orearũ uruũxũ? Ngẽmaãcü aixcũma yema nixĩ ga ípeyadaugũxũ. Rü pemaã nüxũ chixu rü Cuáũ ya baiũxẽerũ rü tama wüxi i ngẽxũrüũxũmare i Tupanaãrũ orearũ uruũ nixĩ. ¹⁰ —Rü Cuáũchiga nixĩ ga naxũmatũxũ ga yema Tupanaãrũ ore ga ñaxũ:

“Cupẽxegu chayamu i chorũ orearũ ngerũ na cuxcèx namexẽẽãxũcèx i duũxũgũarũ maxũ”,
ñaxũ. ¹¹ —Rü aixcũma pemaã nüxũ chixu rü guxũ i duũxũgũtanũwa rü nataxuma i Tupanaãrũ orearũ uruũ i Cuáũ ya baiũxẽerũãrũ yexera ixĩxũ. Natürũ yixema Tupana ãẽxgacũ íxĩxũtwa wixwexũchi üxe,

rü Cuáúarü yexera tixí. ¹² —Rü yexguma noxri Cuáú ya baiüxêëruü inaxügüga na nüxü yaxúxü i ñuxácü Tupana âëgacü ixíxüwa nangugüxü i duüxügü, rü nüma ga duüxügü rü norütama ngúchaxümaã nawa nangugüchaxü i ngema nachica. Rü ñuxma rü ta ngemagutama narüxínüe. ¹³ —Rü guxüta ga Tupanaärü orearü uruügüarü orewa, rü ore ga mugü ga Moíché ümatüxüwa rü nüxü nixuchigagü na ínanguégaxü ya Cristu na âëxgacü na yíxücëx. Rü yemaácü nixí ñuxmata ínangu ga Cuáú. ¹⁴ —Rü ngëxguma chi peyaxögüchaügu i ñaã chorü ore, rü pemaã nüxü chixu rü Cuáú ya baiüxêëruü nixí ya yima yanguxêëcü ga yema ore ga guma nuxcúmaücü ga orearü uruü ga Eria ga ípenanguxêëcüchiga ümatüxü. ¹⁵ —Rü yíxema ächixëgüxe, jrü naga taxínüe i ngëma ore! —ñanagürü. ¹⁶ Rü ñanagürü ta ga Ngechuchu: —¿Tacügu tá chanangu i ñaã duüxügü i ñuxma maxëxü? Maneca ñaã duüxügü rü taxumaãma nataãëgü ngëxgumarüü i ñuxre i buxügü i nügümaã ñäxtüwa rütogüxü, rü íxínücëxwëxëgüxü, rü tagaácü namücügüxü ñagüxü:

¹⁷ “Marü wowerumaã pexcëx tapaxetagü, natürü tama ípixüächitanüxü. Rü marü ngechaü i wiyaeagu pexcëx tawiyaegü, natürü tama pexauxe”, ñagüxü. Rü ngëma buxügürüü nixí i ñaã duüxügü. ¹⁸ —Yerü núma naxü ga Cuáú ga baiüxêëruü rü tama pâü nangõx rü tama binu nayaxaxü. Rü yexguma ga nümagü rü: “Nangoxoãx” ñanagürügü nüxü. ¹⁹ —Rü ñuxüchi núma chaxü i choma ya Tupana Nane na duüxüxü chiixü. Rü choma rü õna changõx rü binu chayaxaxü. Rü ngëxguma i nümagü rü taanüxüchixü rü ngäxwëxexü choxü nawogüe. Rü nüxü nixugüe rü pecaduãxgüxümaã chaxämücü, rü namaã chaxämücü i ngëma duüxügü i Dumaärü äëxgacücëx dïëru ngíxü ideetanüxü. Natürü Tupanaärü cuëx rü meãma nangõx tümawa ya yíxema aixcüma nawe rüxíxë —ñanagürü ga Ngechuchu.

*Íãnegü ga tama Tupanaga ñnüëne
(Lc 10.13-15)*

²⁰ Rü yexguma ga Ngechuchu rü inanaxügü ga na yangagüãxü ga yema duüxügü ga guma íãnegücüãx ga ngextá yexeraácü ínaxüaxüwa ga taxü ga mexügü ga Tupanaärü poramaã naxüxü. Rü poraácü nayan-gagü, yerü yema duüxügü rü tama nüxü narüxoe ga norü chixexü. ²¹ Rü ñanagürü ga Ngechuchu: —Rü wüxi i ngechaü nixí i pexcëx, Pa Corachíücüãxgü rü Pa Bechaídacüãxgüx, yerü yexguma chi Tiruarü íãnewa rü Chidáüarü íãnewa chanaxüxgu ga yema mexügü ga cuëxruügü ga Tupanaärü poramaã petanüwa chaxüxü, rü woo ga na poraácü yachixexü ga yema duüxügü rü nuxcümama chitama nüxü narüxoe ga yema nacüma ga chixexü, rü poraácüxüchi chima nügümaã nangechaügü rü naxauxe, yerü chi nügü nicuëxächitanü ga na yapecaduãxgüxü. ²² —Natürü pemaã nüxü chixu rü ngëma ngunexü i Tupana nagu napoxcuexü i pecaduãxgüxü, rü ngëma ngunexügü rü Tirucüãxgü rü Chidáücüãxgüarü yexera tá pexü napoxcue i pemax, Pa Corachíücüãxgü rü Bechaídacüãxgüx. ²³ —Rü pemax, Pa Capernáücüãxgü i Duüxügüx, jrü pema nagu perüxínüëgu rü daxügüxü i naãnewa tá ipexíxü? Pemaã nüxü chixu rü naãnetüüwa i ngextá Tupana Chatanáxü ípoxcuxüwa tá nixí i pewogüxü. Rü yexguma chi Chodomaärü íãnewa chanaxüxgu ga yema mexügü ga cuëxruügü ga Tupanaärü poramaã petanüwa chaxüxü, rü guma íãne ga nuxcüma norü pecadugagu iyarüxoxüne rü ñuxma rü chi nangëxma. ²⁴ —Natürü pemaã nüxü chixu rü ngëma ngunexü

i Tupana nagu napoxcuexũ i pecaduãxgũxũ, rü ngẽma ngunexũgu rü Chodomacũãxgũarũ yexera tá pexũ napoxcue i pemax, Pa Capernáucũãxgũx —ñanagürũ.

Chauxcèx pexĩ na chauxũtagu perũngũẽxũcèx
(Lc 10.21-22)

²⁵ Rũ yexguma rü ñaãcũ nayumũxẽ ga Ngechuchu, rü ñanagürũ: — Pa Chaunatũ ya Daxũguxũ i Naãne rü Ñoma i Naãneãrũ Yorax, cuxũ chicuèxũũ, erũ ñaã chorũ ngúexũgũxũ nüxũ cucuèxẽẽ i ñaã ore i naxchaxwa iquicúxũ i duũxũgũ i ñoma i naãnewa nüxũ cuèxũchigũxũ. ²⁶ — Rũ moxẽ cuxna chaxã, Pa Chaunatũx, erũ cuma cunaxwèxe na ngẽmaãcũ cunaxũxũ —ñanagürũ. ²⁷ Rũ ñanagürũ ta ga Ngechuchu: —Chaunatũ choxna nanaxã i guxũma i ñacũ i ngẽmaxũ. Rũ Chaunatũxicatama choxũ nacuèx na texé chiĩxũ i choma i Nane. Rũ tama guxũma i duũxũgũ aixcũma nüxũ nacuèx na texé yĩxũ ya Chaunatũ. Rũ choma ya Nane, rü ngẽma duũxũgũ i Chaunatũxũ nüxũ chadauxẽẽchaũxũxĩcatama nixĩ i aixcũma nüxũ cuèxgũxũ na texé yĩxũ ya Chaunatũ. ²⁸ —Rũ nuã chauxũtawa pexĩ i guxãma i pema ya ipaexe nagagu i perũ chixexũgũ rü perũ ìxãchiãægũ! Rũ choma rü tá pexna chanayaxu i pexweta na iperũngũẽxũcèx. ²⁹ —Rũ ñuxũchi penayaxu i chorũ ucuxægũ rü naxcèx pedauxũtaegũ i chaucũma! Erũ choma rü yaxna pemaã chaxĩnũ rü taguma chaugũ chicuèxũxũ. Rũ ngemaãcũ tá nüxũ ipeyangau i ngema taãe i aixcũma ixĩxũ. ³⁰ —Erũ ngẽma pexũ chamuxũ rü natauxcha na naga pexĩnũẽxũ. Rũ ngẽma pexũ chanaxwaexũ rü tama naguxcha na penaxũxũ —ñanagürũ ga Ngechuchu.

12

Ngechuchuarũ ngúexũgũ rü trigu nicãũetanũ ga ngũchigaarũ ngunexũgu
(Mr 2.23-28; Lc 6.1-5)

¹ Rũ wũxi ga ngũxchigaarũ ngunexũgu rü Ngechuchu rü norũ ngúexũgũmaã trigunecũgu nixũ. Rũ nataiyae ga norũ ngúexũgũ, rü yemacèx inaxĩãcũma yoxocũne triguta nicãũetanũ, rü inayangõẽtanũ. ² Rũ yexguma yemaxũ nadaugũgu ga Parichéugũ rü ñanagürũgũ Ngechuchuxũ: —Dücèx i curũ ngúexũgũ rü chixexũ naxũe. Erũ ngũxchigaarũ ngunexũgu napuracũe, rü nachuxu nixĩ i ngẽma —ñanagürũgũ. ³ Rũ Ngechuchu nanangãxũ, rü ñanagürũ: —¿Taguma ãxna poperawa nüxũ pedau ga ñacũ na naxũxũ ga nuxcũmaũcũ ga ãẽxgacũ ga Dabí ga yexguma nataiyèxgu ga nüma rü natanũxũgũ? ⁴ —Rũ Tupanapatagu naxũcu rü nanangõx ga yema pãũ ga üünexũ ga Dabícèx rü natanũxũgũcèx chuxuxũ ga na nangõxgũãxũ. Yerũ paigũcèxicatama nixĩ ga yema pãũ. ⁵ —Rũ pemax, Pa Parichéugũx ¿taguma ãxna nawa pengúe ga yema ore ga mugũpanegu Moíchẽ úmatũxũ ga ñaxũ rü marũ name i paigũ rü ngũxchigaarũ ngunexũgu napuracũe i tupauca ya taxũnewa? Rũ ngẽma rü tama wũxi i pecadu nixĩ naxcèx i ngẽma paigũ. ⁶ —Natürũ pemaã nüxũ chixu rü nuã petanũwa nangẽxma i wũxi i duũxũ i tupauca ya taxũneãrũ yexera ixĩxũ i Tupanapèxewa. ⁷ —Natürũ pema rü tama nüxũ pecuèx i ñuxũ ñaxũchiga nixĩ i ngẽma Tupanaãrũ ore i úmatũxũ i ñaxũ: “Choma rü tama chanaxwèxe i chauxcèx peyamèx i carnerugũ, natürũ chanaxwèxe i togũ pexũ nangechaũtũmũũgũ”,

ñaxũ. Rũ ngẽxguma chi meã nũxũ pecuẽxgũgu i ngẽma ore, rũ tãũ chima chixri nachiga pidexagũ i ñaã chorũ ngũexũgũ i taxuũma i chixexũ ũgũxũ i Tupanapẽxewa. ⁸—Rũ choma i Tupana Nane na duũxũxũ chiĩxũ, rũ aixcũma ngũxchigaarũ yora chixĩ—ñanagũrũ ga Ngechuchu.

Wũxi ga yatũ ga yumécũchiga
(Mr 3.1-6; Lc 6.6-11)

⁹ Rũ yexguma yema nachicawa ínaxũũxgu ga Ngechuchu, rũ guma ñãneãrũ ngutaquẽxepataũgu naxũcu. ¹⁰ Rũ yẽma nayexma ga wũxi ga yatũ ga norũ wũxichacũũwa yumécũ. Rũ nũmagũ ga Parichéugũ rũ naxcẽx nadaugũ ga ñuxãcũ norũ ãẽxgacũgũxũtawã Ngechuchuxũ na ínaxuaxũgũxũ. Rũ yemacẽx Ngechuchuna nacagũe, rũ ñanagũrũgũ: —¿Namexũ yĩĩxũ na texé naxcẽx yataanexẽẽxũ i wũxi i ðaawexũ i ngũxchigaarũ ngunexũgu?—ñanagũrũgũ. ¹¹ Rũ Ngechuchu nanangãxũ, rũ ñanagũrũ: —¿Texé i petanũwa rũ ngẽxguma chi ngũxchigaarũ ngunexũgu wũxi i perũ carneru puchugu nguxgu, rũ taux éxna i ngẽxgumatama ípẽyadaugũxũ rũ ípenatũãchixũ woo ngũxchigaarũ ngunexũ yixĩgu? ¹²—Natũrũ Tupanapẽxewa rũ wũxi i duũxũ rũ porãcũxũchima wũxi i carneruarũ yexera nixĩ. Rũ ngẽmacẽx name nixĩ i mexũ taxũ i woo ngũxchigaarũ ngunexũ yixĩgu—ñanagũrũ. ¹³ Rũ ñuxũchi ga Ngechuchu rũ ñanagũrũ nũxũ ga guma yatũ ga yumécũ: —¡Iyarũwẽxãchimẽxẽ!—ñanagũrũ. Rũ guma yatũ rũ inayarũwẽxãchimẽxẽ, rũ yexgumatama narũmemẽx, rũ naĩ ga naxmẽx ga mexũnerũĩ nixĩ. ¹⁴ Rũ yexguma yemaxũ nadaugũgu ga Parichéugũ, rũ ínachoxũ ga yẽma. Rũ inanaxũgũe na naxcẽx nadaugũxũ ga ñuxãcũ tá na Ngechuchuxũ yamẽxgũxũ.

Nuxcũmaũxũ ga ore ga Ngechuchuchiga

¹⁵ Rũ yexguma Ngechuchu nũxũ cuáchigagu na Parichéugũ na yamẽxgũchaũxũ, rũ ínaxũxũ ga guma ñãnewã. Rũ muxũma ga duũxũgũ rũ nawe narũxĩ. Rũ nũma ga Ngechuchu rũ nanameẽxẽẽ ga guxũma ga yema duũxũgũ ga idaaweexũ. ¹⁶ Rũ duũxũgũna naxãga na tama nũxũ yaxugũexũcẽx na texe na yĩĩxũ ga nũmax. ¹⁷ Rũ yemaãcũ nanaxũ ga Ngechuchu na yanguxẽẽãxũcẽx ga yema ore ga nuxcũmaũcũ ga Tupanaãrũ orearũ uruũ ga Ichaxía nũxũ ixuxũ ga ñaxũ:

¹⁸ “Daa nixĩ ya chorũ duũ ya chomatama nũxũ chaxunetacũ rũ nũxũ changechaũcũ rũ namaã chataãẽxũchicũ. Rũ Chauãe i Üünexũ rũ nũxna tá chanamu. Rũ nũma tá guxũ i duũxũgũ i tama Yudiũgũ ixĩgũxũmaã nũxũ nixu i ore i mexũ i aixcũma ixĩxũ. ¹⁹ Rũ tagutãma ngextã texémaã niporagacũũ rũ taxũemaãtãma ngextã nipura. Rũ tagutãma texé ñãneãrũ ítamũgũwa nũxũ taxĩnũ na natagaxũ. ²⁰ Rũ nũma rũ tãũtãma nanadai i ngẽma duũxũgũ i norũ õwa turaexũ, rũ tãũtãma inayanaxoxẽẽ i ngẽma duũxũgũ i írarũwatama yaxõgũxũ. Rũ ngẽmaãcũ tá nixĩ ñuxmatãta guxũ i naãnewã nangu i ngẽma norũ ore i aixcũma ixĩxũ. ²¹ Rũ guxũ i duũxũgũ i tama Yudiũgũ ixĩgũxũ rũ tá naxcẽx naxĩ na ngẽmaãcũ naxũtawã nayauxgũãxũcẽx i norũ maxũ i taguma gũxũ”, ñanagũrũ ga Ichaxía.

Parichéugũ rũ Ngechuchuxũ nixugũe na ngoxoarũ poramaã napuracũxũ
(Mr 3.20-30; Lc 11.14-23, 12.10)

22 Rū Ngechuchuxūtawa nanagagü ga wüxi ga yatü ga ngoxoäcü ga ngexetücü rü tama idexacü. Rū Ngechuchu nanamexëë. Rū guma yatü rü yexgumatama nidauchi rü nidexa. 23 Rū guxüma ga duüxügü rü nabëixächiaëgü ga yexguma yemaxü nadaugügu. Rū ñanagürügü: — ¿Taux ëxna daa yïxü ya Dabí nane ya Cristu? —ñanagürügü. 24 Natürü yexguma yemaxü naxïnüëgu ga Parichéugü, rü ñanagürügü: —Ñaa yatü i Ngechuchu, rü ngoxogünatü i Bechebúarü poramaã nixí i ínawoxüãxü i ngoxogü —ñanagürügü. 25 Natürü nüma ga Ngechuchu rü nüxü nacuëxama ga tacügu na naxïnüëxü. Rū yemacëx ñanagürü nüxü: —Ngëxguma chi wüxi i nachiuãnecüãx i duüxügü nügü itoyegu rü nügütanüwa chitama nügü nadaixgu, rü nügü chitama naguxëë. Rū ngëxguma chi wüxi ya íanecüãx rü ëxna wüxi ya ícüãx nügümaã nuëëchagu rü nügü nadaixgu, rü nügü chitama naguxëë. 26 —Rū ngëxguma chi Bechebú nügütama ítëxüchigu rü nügütama yamëxgu, ¿rü ñuxäcü chi äëxgacüëcha yïxü? 27 —Rū pemax, Pa Parichéugüx, rü choxü pixuxgu rü Bechebúarü poramaã íchanawoxü i ngoxogü. Natürü ngëxguma chi Bechebúarü poramaã íchanawoxüxgu i ngoxogü, ¿rü texéarü poramaã nixí i perü ngüexügü rü ínawoxüãxü i ngoxogü? Rū dücax, rü ngëma perü ngüexügütama nixí i pexcëx nangoxëëxü na ípetüexü. 28 —Natürü pemaã nüxü chixu rü aixcüma Tupanaãe i Üünexüãrü poramaã nixí i íchanawoxüxü i ngoxogü. Rū ngëmawa pexü nüxü chacuëxëë na marü nüma petanüwa nanguxü ya Tupana, na perü äëxgacü yïxüçëx. 29 — ¿Rü ñuxäcü texé wüxi ya yatü ya poracüpatagu taxücu na tanapuxüxüçëx i norü ngëmaxügü, ega tama tayanëixiragu i noxrix? Rū ngëxguma tayanëixiraguxicatama nixí i nüxna tanapuxüxü i norü ngëmaxügü ya yima yatü ya poracü. 30 —Rü yixema tama choxü ngechaüxë rü chauxchi taxai. Rū yixema tama choxü rüngüxëxë na Tupanacëx tananutaquëxexü i duüxügü rü chauxchawa tanangianexëë. 31 —Rü ngëmacëx pemaã nüxü chixu rü Tupana tá nüxü nüxü nangechaü i guxüma i pepadugü i duüxügü ügüxü rü guxüma i norü dexagü i chixexü. Natürü yixema Tupanaãe i Üünexümaã tacü ixugüxe, rü Tupana rü tagutáma tüxü nüxü nangechaü i ngëma chixexü. 32 —Rü guxáma ya texé ya tacü chomaã ixugüxe rü Tupana tá tüxü nüxü nangechaü i ngëma. Natürü texé ya Tupanaãe i Üünexümaã tacü ixugüxe, rü Tupana rü tagutáma tüxü nüxü nangechaü i ngëma, rü bai i ñoma i naãnewa, rü bai i daxüguxü i naãnewa.

*Wüxi i nanetü rü norü owa nixí i nüxü icuáxü na tacü rü nanetü yïxü
(Lc 6.43-45)*

33 —Rü ngëxguma wüxi i nanetü rü namexgu, rü norü o rü ta name. Natürü ngëxguma wüxi i nanetü rü nachixëxgu, rü norü o rü ta nachixe. Rü wüxi i nanetü rü norü owa nixí i nüxü icuáxü ngoxi name rü ëxna tama. 34 —Pa Äxtapearü Duüxügüx, ¿ñuxäcü i mexü i orexü pixuxü ega pematama rü pichixecümagu? Erü ngëma ore i peëxmaã nüxü pixuxü rü peãëwa nixí i ne naxüxü. 35 —Wüxi ya mecü ya yatü rü mexü i orexü nixu, erü naãëwa rü aixcüma mexügu narüxínü. Natürü wüxi i yatü i chixecümaxü rü chixexü i orexü nixu, erü naãëwa rü chixexügu narüxínü. 36 —Rü choma pemaã nüxü chixu rü ngëma ngunexü i nagu nagüxü i naãne, rü Tupana rü tá nüxna naca i guxü i duüxügü naxcëx i guxüma i ore i chixexü i nüxü yaxuxü i ñoma i naãnewa. 37 —Erü ngëma

curü dexagüwa rü Tupana tá cuxü nangugü, rü tá cumaã nüxü nixu ngoxita cume i napêxewa rü êxna tama —ñanagürü ga Ngechuchu.

Duïxügü ga tama yaxôgüchaïxü rü naxcêx ínacagü ga to ga cuèxruï ga Tupanaârü poramaã üxü

(Mr 8.12; Lc 11.29-32)

³⁸ Rü yexguma rü ñuxre ga Parichéugü rü Yudiúgüarü ngúexêëruügü ga ore ga mugüwa nguxêëtaegüxü rü ñanagürügü Ngechuchuxü: — Pa Ngúexêëruüx, cuxü tadauxchaï na cunaxüxü i wüxi i cuèxruï i mexü i Tupanaârü poramaã cuxüxü —ñanagürügü. ³⁹ Rü Ngechuchu nanangãxü, rü ñanagürü: —Ñãã duïxügü i chixecümagüxü rü tama yaxôgüxü rü naxcêx ínacagü i wüxi i cuèxruï i mexü i Tupanaârü poramaã üxü. Natürü yema cuèxruï ga nuxcümaücü ga Tupanaârü ore arü uruï ga Yonáxü ngupetüxüxüxüca tátama nadaugü. Rü taxuütáma i to i cuèxruï nüxü tadauxêë i ñãã duïxügü. ⁴⁰ —Rü yexgumarüü ga Yoná ga tomaêxpüx ga ngunexü rü tomaêxpüx ga chütaxü choxni ga taxü ga bayenaãnúwa na nayexmaxü rü wenaxârü na nangóxü, rü ngêxgumarüü tá ta nixü i choma i tomaêxpüx i ngunexü rü tomaêxpüx i chütaxü i chatáxüwa changêxmaxü. Natürü wena táxaru changox. ⁴¹ —Rü ngêxguma naãneãrü guxgu rü Tupana rü ñãã duïxügüna nacaxgu i norü pecaduchiga, rü nuxcümaügüxü ga Nínibecüãx ga duïxügü rü tá inachigü. Rü Tupanapêxewa tá ínanaxuaxügü i ñãã duïxügü i ñuxma maxêxü. Yerü nümagü ga Nínibecüãx rü nüxü narüxoe ga nacümagü ga chixexü ga yexguma Yoná namaã nüxü ixuxgu ga Tupanaârü ore. Natürü ñuxma nuã petanüwa nangêxma i wüxi i Yonáârü yexera íxüxü. ⁴² —Rü ngêxguma naãneãrü guxgu rü Tupana rü ñãã duïxügüna nacaxgu i norü pecaduchiga, rü ngüma ga nuxcümaücü ga Chabaaneãrü ãêxgacü rü tá iichi. Rü tá ínanaxuaxü i ñãã duïxügü i ñuxma maxêxü. Yerü ngüma rü yaxüwaxüchi ne ixü na ãêxgacü ga Charumóüxü naxínüxücêx ga ñuxácü poraãcü nüxü na nacüxüchixü. Natürü ñuxma nuã petanüwa nangêxma i wüxi i Charumóüârü yexera íxüxü.

ngoxo i taeguxüchiga

(Lc 11.24-26)

⁴³⁻⁴⁴ —Rü ngêxguma wüxi i ngoxo rü wüxi ya yatüwa ínaxüüxgu, rü dauxchitawa i ngextá taxüema íxãpataxüwa rü nu ne nanaxümare. Rü naxcêx nadau na ngexta na nangüxücêx. Rü ngêxguma taxuxguma nüxü iyangauxgu na ngexta nangülegaxü, rü nagu narüxñü na wena nataeguxü naxcêx ya yima yatü ga noxri nawa ínaxüxüchirécü. Rü ngêxguma nataegugu, rü nüxü inayangau ya yima yatü na wüxi ya ï ya ngêãcüne rü mexêene rü meã nabixichinerüü na yïxü. ⁴⁵ —Rü ngêma ngoxo rü ínixü rü naxcêx nayadau i to i 7 i ngoxogü i norü yexera i chixexü. Rü guxüma i ngêma rü yima yatüga nayachocu, rü ngêxma naxãchiügü. Rü ngêxguma ya yima yatü rü noxriarü yexera nachixe. Rü ngêxgumarüü tá ta nüxü naxüpetü i ñãã duïxügü i chixecümagüxü —ñanagürü ga Ngechuchu.

Ngechucharü mamá rü naêneêgüchiga

(Mr 3.31-35; Lc 8.19-21)

⁴⁶ Rü yexguma duïxügümaã íyadexayane ga Ngechuchu, rü yéma tangu ga naë rü naêneêgü. Rü ípataarü düxétügu tarücho, rü Ngechuchumaã tidexagüchaï. ⁴⁷ Rü wüxi ga duïxü Ngechuchumaã nüxü nixu, rü

ñanagürü: —Yéa düxétüwa tangëxma ya cue rü cueneëgü, rü cumaã tidexagüchaũ —ñanagürü nüxü. ⁴⁸ Natürü Ngechuchu nanangãxü ga yema duüxü ga namaã nüxü ixuxü ga yema ore, rü ñanagürü nüxü: —¿Texé tixí ya chaue? ¿Rü texégü tixí ya chaueneëgü? —ñanagürü. ⁴⁹ Rü yexguma ga Ngechuchu rü norü ngüexüügüxü naxuneta, rü ñanagürü: —Düçex, daxé tixí ya chaue, rü daagü nixí ya chaueneëgü. ⁵⁰—Erü guxãma ya texé ya naxúxe i Chaunatü ya daxüguçüarü ngüchaũ, rü yíxema tixí ya chaueneë rü chaueyèx rü chaue —ñanagürü ga Ngechuchu.

13

Ore ga toecügu ixuxü

(Mr 4.1-9; Lc 8.4-8)

¹ Rü yematama ngunexügu ga Ngechuchu rü ínaxüxü nawa ga guma ï ga nagu napexüne. Rü naxtaxaãnacüwa nayarüto. ² Rü muxüma ga duüxügü rü yéma naxcèx nangutaquëxegü. Rü yemacèx düxwa wüxi ga nguegu nixüe ga Ngechuchu, rü guma nguewa narüto. Rü guxüma ga duüxügü rü yexma naxnecütëxegu nachigü. ³ Rü yexguma ga Ngechuchu rü muxüma ga ore ga cuèxruüwa nanangüexëë ga duüxügü. Rü norü ngüxëëtaewa rü ñanagürü: —Rü wüxi ga yatü ga toecü rü trigumaã nanagüane. ⁴—Rü yexguma trigumaã nagüaneãgu, rü ñuxre ga guma trigu rü namacüwagu nayi. Rü ínangugü ga werigü, rü nanawecu. ⁵—Rü náigü ga trigu rü nutatanügu nayi ga ngextá ínachixcaxüwa ga waixümü. Rü paxa narüxügü ga guma trigu, yerü ga waixümü rü tama nayaxcü. ⁶—Rü yexguma nangunagügu ga üèxcü, rü narüngëxgü ga guma trigu. Rü nayue yerü tama poraãcü nixãmëxã. ⁷—Rü náigü ga trigu rü tuxnecügu nayi. Rü yexguma nayaegu ga tuxugü, rü guma triguxü ínawocu, rü nanadaí. ⁸—Natürü náigü ga trigu rü mexü ga waixümügu nayi. Rü yexguma nayaegu rü muxüma ga trigu nawa ínanguxuchi. Rü nümaxü rü wüxireewa rü 100 püxü ínanguxuchi ga norü o, rü náireegüwa rü 60, rü náireegüwa rü 30. ⁹—Rü yíxema áchixëgüxe, ¡rü nagu tarüxnüë i ngëma ore! —ñanagürü.

Tacüçex nixí ga yema ore ga cuèxruügügu ixuxü

(Mr 4.10-12; Lc 8.9-10)

¹⁰ Rü yexguma ga norü ngüexügü rü Ngechuchucèx naxí, rü nüxna nacagüe, rü ñanagürügü: —Pa Corix, ¿Tüxcüü i cuèxruügügu cuyaxuãcüma cunangüexëëxü i ñaã duüxügü? —ñanagürügü. ¹¹ Rü Ngechuchu nanangãxü, rü ñanagürü nüxü: —Tupana rü pexüxícatama nüxü nacüexëë i ngëma ëxüguxü na ñuxãcü äëxgacü yíxü i nümax. Natürü nüma i togü i duüxügü rü tama nüxü nüxü nacüexëë i ngëma. ¹²—Rü texé ya aixcüma naga ínuxë i chorü ore, rü Tupana rü yexeraãcü tá tüxü nüxü nacüexëë. Rü ngëmaãcü tá tüxü nangëxma i taxü i cuèx. Natürü texé ya tama naga ínuxë i ñaã ore rü Tupana tá tüxna nanayaxu i ngëma íraxü i cuèx i tüxü ngëxmachiréxü. ¹³—Rü ngëmacèx nixí i ore i cuèxruümaã chanangüexëëxü i ngëma duüxügü. Erü nümagü rü woo nüxü nadaugügu, rü ñoma tama nüxü nadaugüxürüü nixígü. Rü woo nüxü naxínüëgu, rü ñoma tama nüxü naxínüëxürüü nixígü. Rü tama nüxü nacüëxgüéga. ¹⁴—Rü aixcüma ngëma duüxügüchiga nixí ga yema Tupanaãrü ore ga nuxcümaücü ga norü orearü urüü ga Ichaxía nüxü ixuxü ga ñaxü:

“Rü ngêma duñxügü rü tá aixcúma nüxü naxĩnüê, natürü tãütáma nüxü nacuèxgüéga i tacüchiga na yĩxü i ngêma nüxü naxĩnüêxü. Rü aixcúma tá nüxü nadaugü, natürü tãütáma nüxü nacuèxgü na tacüchiga yĩxü i ngêma nüxü nadaugüxü. ¹⁵ Erü ngêma duñxügü rü tãütáma nüxü nacuèxgüchaü i chorü ore, rü naxchaxwa tá nügü narütütamachixégü rü tá naxchaxwa napexetügü. Rü ngêmaãcü tá nanaxügü na tama nüxü nadaugüxüçèx i ngêma mexü i naxcèx chaxüxü, rü tama nüxü naxĩnüêxüçèx i chorü ore, rü tama nüxü nacuèxgüxüçèx na ñuxãcü choma chanaxwèxexüãcüma na namaxèxü, rü tama chauxcèx nadaugüxüçèx na chana-maxèxèxüçèx”,

ñanagürü. ¹⁶ Rü ñanagürü ta ga Ngechuchu: —Natürü pemax, Pa Chorü Ngüexügüx, rü petaãégü erü pexetügümaãtama nüxü pedaugü i ngêma chaxüxü rü pexmachixémaãtama nüxü pexĩnüê i chorü ore. ¹⁷ —Rü aixcúma pemaã nüxü chixu rü muxüchixü ga nuxcúmaügüxü ga Tupanaärü orearü uruügü rü muxüchixü ga duñxügü ga imecümáxü, rü nüxü nadaugüchaü i ngêma ñuxma chauxütawa nüxü pedaugüxü. Natürü tama nüxü nadaugü. Rü nüxü naxĩnüêchaü i ngêma ore i ñuxma chauxütawa nüxü pexĩnüêxü. Natürü tama nüxü naxĩnüê —ñanagürü.

Ngechuchu rü meã nanangoxèê ga yema ore ga toecüchigagu yaxuxü (Mr 4.13-20; Lc 8.11-15)

¹⁸ Rü ñanagürü ta ga Ngechuchu: —¡Düçèx, iperüxĩnüê na ñuxü ñaxüchiga yĩxü i ngêma ore i cuèxruü i toecüchiga! ¹⁹ —Rü guma trigu ga namagu yixünerüü tixígü ya yixema nüxü ñnüêxè i ore i mexü na ñuxãcü aëxgacü yĩxü ya Tupana natürü tama nüxü cuèxgüxe i ñuxü ñaxüchiga na yĩxü i ngêma ore. Rü tümáxütawa nangu i Chataná, rü tuxü nüxü inayarüngümaëxèê i ngêma ore i tümáëwa ngëxmachiréxü. ²⁰ —Rü guma trigu ga nutatanügu yixünerüü nixĩ i ngêma duñxügü i nüxü ñnüêxü i Tupanaärü ore rü taãëãcüma nayauxgüxü. ²¹ —Natürü ngêma na tama aixcúma nagu naxĩnüêxü i ngêma ore, rü paxaãchitama nayaxögü, rü yixcüra ngëxguma ngêma oregagu guxchaxügü nüxü üpetügu rü èxna duñxügü naxchi aiegu, rü ñnanatèxgü i ngêma ore. ²² —Rü guma trigu ga tuxunecügu yixünerüü nixĩ i ngêma duñxügü i Tupanaärü orexü ñnüêxü rü yaxögüxü. Natürü ñoma i naãneärü ngëmaxügüçèx oegaãégüxü, rü ngëmaguama rüxĩnüêxü, rü düxwa nüxü inayarüngümaë i ngêma ore. Rü guxüma i ngêma rü Tupanaärü orexü nüxü narüxoxèê na tama aixcúma meã Tupanawe naxüçèx i ngêma duñxügü. ²³ —Natürü guma trigu ga mexü ga waixümügu yixünerüü nixĩ i ngêma duñxügü i nüxü ñnüêxü i Tupanaärü ore, rü nüxü cuèxgüxü i tacüchiga na yĩxü, rü naga ñnüêxü rü meã naxcèx maxèxü. Rü tümáxè rü guma trigu ga 100 püxü nawa ínguxuchinerüü tixĩ. Rü tümáxè rü guma 60 püxü nawa ínguxuchinerüü tixĩ. Rü tümáxè rü guma 30 püxü nawa ínguxuchinerüü tixĩ —ñanagürü ga Ngechuchu.

Ore ga chixexü ga natüane ga trigutanügu toxüchigagu ixuxü

²⁴ Rü Ngechuchu rü to ga ore ga cuèxruüxü duñxügümaã nixu, rü ñanagürü: —Rü nüma ya Tupana rü ñoma wüxi ga yatü ga mexüne ga triguchire naãnegu tocürüü tá nanaxü. ²⁵ —Rü guma yatü rü yexguma ínapeyane rü wüxi ga norü uwanü ga naxchi aixü rü yéma naxü. Rü naëchita yexma trigunecügu nayatogü ga chixexü ga natüane. Rü ñuxüchi

ínixũ. ²⁶ —Rü yexguma naxügügu ga trigu rü nayaegu rü yexwacèx yaxoxgu, rü yema natüane rü ta nangox. ²⁷ —Rü yexguma ga yema yatüarü duüxügü, rü namaã nüxü nayarüxügü, rü ñanagürügü:

“Pa Corix, cuma rü cuanegu rü triguxicachirèx ngèxma cuto. ¿Natürü ñuxácü i ñuxma rü chixexü i natüane rü ta ngema naxügüxü?” ñanagürügü. ²⁸ —Rü yexguma ga yema naãneãrü yora, rü ñanagürü nüxü:

“Maneca wüxi i chorü uwanü i chauxchi aixü nixí i ngema ngexü wagüxü” ñanagürü. Rü yexguma ga norü duüxügü rü nüxna nacagü, rü ñanagürügü:

“Pa Corix, ¿cunaxwèxexü na tanabéxü i ngèma chixexü i natüane?” ñanagürügü. ²⁹ —Natürü nüma ga norü cori rü ñanagürü nüxü ga yema norü duüxügü:

“¡Nüetama ngèma nangèxmagü! Erü ngèxguma chi penabèxgu, rü ngürüächi trigumaã chi ta penangauxèe na penabéxü. ³⁰ —Rü narümemaë nixí i nüetama ngèma nayae ñuxmatáta triguarü buxgüwa nangu. Rü ngèxguma rü ngema tá chanamugü i chorü puracütanüxü, rü tá nanabèxira i ngèma chixexü i natüane. Rü tá ínanagoxücüta, rü ñuxüchi tá ínanagu. Rü ngèmawena tá nayabuxgü i trigu, rü naxchiügu tá choxü namaã nanguxügü” ñanagürü.

Ore ga motachachiregu ixuxü

(Mr 4.30-32; Lc 13.18-19)

³¹ Rü Ngechuchu rü to ga ore ga cuèxruüxü duüxügümaã nixu, rü ñanagürü: —Rü ngèma Tupanaarü ore rü yexera nixüchigü. Rü ñoma wüxi ya motachachire ya wüxi ya yatü naãnegu toxünerüü nixí. ³² —Rü woo naxíraxüchichirèx ya yima naxchire, natürü ngèxguma naxüxgu rü nayèxgu, rü wüxi i nanetü i taetaxü nixí. Rü ngèmacèx i werigü rü natanüwa naxí, rü ngèxma nayarüxüchíãügü —ñanagürü.

Ore ga pãüãrü puxèëruügu ixuxü

(Lc 13.20-21)

³³ Rü Ngechuchu rü to ga ore ga cuèxruüxü duüxügümaã nixu, rü ñanagürü: —Rü Tupanaarü ore rü duüxügütanüwa nangu. Rü nixüchigü rü nanaxüchicüxü i norü maxü. Rü ñoma íxraxü i pãüãrü puxèëruü i wüxi i nge taxü i ngírü pãüchara namaã ipuxèëxürüxü nixí —ñanagürü ga Ngechuchu.

Cuèxruügu ixuxü ga oremaã nidexa ga Ngechuchu na yanguxèëãxüçèx ga Tupanaãrü ore

(Mr 4.33-34)

³⁴ Rü guxüma ga yema ore ga Ngechuchu duüxügümaã nüxü ixuxü, rü cuèxruügu yaxuãcüma namaã nüxü nixu. Rü yemaãcüxicatama nixí ga namaã nüxü yaxuxü. ³⁵ Rü yemaãcü nanaxü ga Ngechuchu na yanguxèëãxüçèx ga yema Tupanaãrü ore ga nuxcümaücü ga norü orearü uruü ga Ichaxía umatüxü ga ñaxü:

“Choma rü cuèxruügu ixuxü i oremaã tá duüxügümaã chidexa. Rü tá namaã chanangoxèe i ngèma cuèx i èxüguxü ga yexguma noxri naãne ixügügumama iicüxü”,

ñaxü.

Ngechuchu nanangoxèe na tacüchiga yïxü ga yema ore ga chixexü ga natüane ga trigutanügu toxüchigagu ixuxü

36 Rū Ngechuchu ínyamugū ga duñxūgū, rū guma í ga nagu napexūnegu naxūcu. Rū norū ngúexūgū rū yéma naxcèx naxī, rū ñanagūrūgū nūxū: —Pa Corix, ¡tomaã nangoxēē na ¡acūchiga yīxū i ngēma chixexū i natūanegu ixuxū i ore! —ñanagūrūgū. 37 Rū yexguma ga Ngechuchu rū ñanagūrū nūxū: —Rū yima mexū i trigumaã toecū, rū nūma nixī ya Tupana Nane ya duñxūxū ixīcū. 38 —Rū ngēma naāne i nagu natoexū, rū ñoma i naāne nixī. Rū ngēma mexū i trigu rū ngēma nixī i duñxūgū i Tupanaārū duñxūgū ixīgūxū. Rū ngēma chixexū i natūane, rū ngēma nixī i duñxūgū i Chatanaārū ixīgūxū. 39 —Rū ngēma norū uwanū i chixexū i natūanemaã naēchita naānegu yatoexū, rū ngēma nixī i Chataná. Rū ngēma ngunexū i nagu nabuxuxū i trigu rū naāneārū gūxchiga nixī. Rū ngēma puracūtanūxū i triguarū buxwa puracūexū, rū Tupanaārū orearū ngeruūgū i daxūcūāx nixīgū. 40 —Rū ngēxgumarū i ngēma chixexū i natūane rū na nabéxū rū ñuxūchi na ínaguxū, rū ngēxgumarū tá ta nixī i naāneārū guxgu. 41 —Rū choma i Tupana Nane na duñxūxū chiīxū, rū tá chanamū i chorū orearū ngeruūgū i daxūcūāx na nadeāxūcèx i ngēma duñxūgū i chixexū ūgūxū rū ngēma duñxūgū i toguāxū chixexū ūgūxēxū. Rū tá ínanawoxū. 42 —Rū tá ūxūxetūwa nayawocu. Rū ngema tá naxauxe rū tá nixūxchapūtagū. 43 —Natūrū guxūma i ngēma duñxūgū i Tupanaga ínūexū, rū tá ūexcūrū inabaixgū i ngextá Tanatū ya Tupana āēxgacū íxīxūwa. Rū yíxema āchixēgūxe, ¡rū nūxū taxīnūē i ngēma ore! —ñanagūrū.

Ore ga taxū ga dīeru ga icúxūgu ixuxū

44 Rū Ngechuchu rū to ga ore ga cuēxruūxū duñxūgūmaã nixu, rū ñanagūrū: —Rū ngēma na āēxgacū yīxū ya Tupana rū duñxūgūcèx rū namexechi ñoma wūxi i uiru i wūxi i naānegu icúxūrūxū. Rū wūxi ya yatū rū ngēxguma nūxū iyangauxgu i ngēma uiru, rū paxa wena ngēma naānegu nayacūx. Rū taāēācūma namaã nataxe i guxūma i norū ngēmaxūgū na naxcèx nataxexūcèx i ngēma naāne na noxrū yīxūcèx i ngēma uiru —ñanagūrū.

Ore ga nuta ga ngēxāeruū ga tatanūcūgu ixuxū

45 Rū ñanagūrū ta ga Ngechuchu: —Rū duñxūgū rū ñoma wūxi i taxetanūxū i nutagū ya ngēxāeruūcèx dauxūrū nixīgū na poraācū Tupanaxcèx nadaugūxū na nūma norū āēxgacū yixīxūcèx. 46 —Rū ngēma taxetanūxū rū ngēxguma dūxwa nūxū iyangauxgu ya wūxi ya nuta ya ngēxāeruū ya guxūārū yexera mexēchicū, rū namaã nataxe i guxūma i norū ngēmaxūgū na naxcèx nataxexūcèx ya yima nuta ya mexēchicū, na noxrū yīxūcèx.

Ore ga pūchagu ixuxū

47 —Rū ngēma Tupana na āēxgacū yixīxū rū wūxi i pūcha i nagúxūraūxū i choxni namaã iyaxuxūxūrū nixī. 48 —Rū ngēxguma naxāācuxgu i ngēma pūcha, rū ngēma pūchaetanūxū rū naxnecūpechinūgu ínanatūāchīgū. Rū ngema narūtogū rū nayadexechi i ngēma mexū i choxni, rū pexchigu nananucu. Rū ngēma tama ingōxū i choxni rū ínanawogū. 49-50 —Rū ngēxgumarū tá nixī i ngēxguma naguxgu i naāne. Erū Tupanaārū orearū ngeruūgū i daxūcūāx, rū nūma tá naxī. Rū tá nayadexechi i ngēma mexū i duñxūgū nūxna i ngēma ichixexū, rū tá ūxūxetūwa nayawocu i ngēma duñxūgū i chixexū. Rū ngema tá naxauxe, rū tá nixūxchapūtagū —ñanagūrū ga Ngechuchu.

Ngexwacaxügüxü rü nuxcümaügüxü i ngëmaxügüchiga

⁵¹ Rü yexguma ga Ngechuchu rü norü ngüexügüna naca, rü ñanagürü: —¿Nüxü pecuáxü yïixü na tacüchiga yïixü i ngëma pemaã nüxü chixuxü? —ñanagürü. Rü nümagü nanangäxügü rü ñanagürügü: —Ngëmaãcü, Pa Corix, nüxü tacuëx —ñanagürügü. ⁵² Rü yexguma ga Ngechuchu rü ñanagürü nüxü: —Rü ngëxguma wüxi i ngüexëëruü i ore i mugüwa nguxëëtaexü aixcüma nüxü cuëxgu na ñuxäcü äëxgacü yïixü ya Tupana, rü nanaxwëxe na meã nüxü nacuáxü i ngëma nuxcümaüxü i Tupanaärü ore rü ñaã ngexwacaxüxü i chorü ore rü ta, ngëxgumarüü i wüxi i cori i norü taxepatawa duüxügücëx inawéxü i norü ngëmaxügü i ngexwacaxügüxü rü norü ngëmaxügü i nuxcümaügüxü ta —ñanagürü ga Ngechuchu.

Ngechuchu rü Nacharétuwa nayexma

(Mr 6.1-6; Lc 4.16-30)

⁵³ Rü yexguma Ngechuchu nüxü rüchaxgu ga yema ore ga cuëxruügüxü na yaxuxü, rü inaxüächi ga yéma. ⁵⁴ Rü guma ñane ga nawa nayaxüne ga Nacharétuwa naxü. Rü guma ñaneärü ngutaquëxepataügu naxücu rü yéma nanangüexëë ga duüxügü. Rü yema duüxügü rü nabëixächiäëgü namaã ga norü ore. Rü ñanagürügü: —¿Ngextá nüxü nacuëx i ngëma nguxëëtae? ¿Rü ñuxäcü nüxü nacuëx na naxüäxü i ngëma mexügü i taxügü i Tupanaärü poramaã naxüxü? ⁵⁵ —¿Taux éxna i daa yïixü ya carpinteru ya Yúche nane ya María ngíne, ya Chaütiágu rü Yúche rü Chimáü rü Yuda naëneë ixícü? ⁵⁶ —¿Rü taux éxna i naëyëxgü rü nuxma tatanügu naxächüügüxü? ¿Rü ngëxguma i ngextá yïixü i nayauxäxü i ngëma nüxü nacuáxü? —ñanagürügü. ⁵⁷ Rü yemacëx ga duüxügü rü tama nüxü inarüxüñüëchaü. Natürü Ngechuchu rü ñanagürü nüxü: —Guxüma i togü i duüxügü rü namaã nataäëgü i wüxi i Tupanaärü orearü uruü. Natürü ngëma orearü uruüchiüñanewatama rü duüxügü rü tama namaã nataäëgü —ñanagürü. ⁵⁸ Rü yema duüxügütanüwa rü tama poraãcü nanaxü ga mexügü ga taxügü ga Tupanaärü poramaã naxüxü, yerü tama nüxü nayaxögüchaü ga yema duüxügü.

14

Nayu ga Cuáü ga baiüxëëruü

(Mr 6.14-29; Lc 9.7-9)

¹ Rü yema ngunexügügu nixí ga Gariréaaneärü äëxgacü, ga Erode rü Ngechuchuxü nacuáchigaxü. ² Rü Erode rü norü duüxügümaã ñanagürü: —Yima nixí ya Cuáü ga baiüxëëruü rü marü wena namaxü. Rü ngëmacëx nüxü nangëxma i pora na naxüäxü i ngëma mexügü i taxügü i Tupanaärü poramaã naxüxü —ñanagürü. ³ Rü yema ñanagürü, yerü nümatama ga Erode rü üpaacü norü churaragüxü namu na Cuáüxü yayauxgüxüçëx rü cadenamaã yanëixgüäcüma poxcupataüwa nagagüäxüçëx. Rü yemaãcü nanaxü ga Erode, yerü yemaãcü naxcëx íca ga naxmëx ga Erodía ga naëneë ga Piripi naxmëxchirëx ixícü. ⁴ Rü Erode rü Cuáümaã nanu yerü ga Cuáü rü ñanagürü nüxü: —Tama name na cuxumëxmaã cuxãmaxü —ñanagürü. ⁵ Rü Erode rü Cuáüxü nimáxchaü, natürü duüxügüxü namuü yerü guxüma ga duüxügü rü nagu narüxüñüë rü aixcüma Tupanaärü orearü uruü nixí ga Cuáü. ⁶ Natürü yexguma norü taunecüarü ngunexüwa nanguxgu ga Erode rü wüxi ga peta naxü. Rü yema petawa rü Erodíaxacü rü íyayüxparachigüxü napëxewa ga yema petatanüxü. Rü nüma ga äëxgacü ga Erode rü poraãcü norü me nixí ga yema naxüxü

ga naxãcürücü. ⁷ Rû yemacèx ngîmaã inaxuneta rû ñanagürü ngîxû: — ¡Choxna naxcèx naca i tacû i cunaxwèxexû, rû aixcûma tá cuxna chanaxã! —ñanagürü. ⁸ Rû yexguma ga ngîma rû ngîxûtawa ixû, rû ngîèna iyaca, rû ngîgürügü: —Pa Ma, çtacû i cunaxwèxexû na naxcèx íchaçaxû? —ngîgürügü. Rû ngîè ngîxû ingãxû, rû ngîgürügü: —¡Naxcèx ínaca i Cuáú ya baiüxèèruüëru! —ngîgürügü ga ngîè. Rû yexguma ga yema pacû rû ngîgürügü nüxû ga Erode: —Chanaxwèxe i wüxi ya poratugu choxna cunaxã i Cuáú ya baiüxèèruüëru —ngîgürügü. ⁹ Rû yexguma ga ãëxgacû ga Erode rû inayarümaãchi namaã ga yema ore, natürü norü unetacèx rû norü petatanüxcèx rû tama ngîxû nawomüxèèchaû. Rû nanamu ga ñuxre ga norü churaragü na ngîxna naxãgüãxücèx ga yema naxcèx ínaçaxû. ¹⁰ Rû yemaãcû poxcupataüwa nanamu na yéma Cuáúxû yanadaenaãxücèx. ¹¹ Rû yemawena wüxi ga poratugu ngîxûtawa nanange ga Cuáúëru, rû yema pacûna nayaxã. Rû ngîma rû ñuxüchi ngîèna iyaxã. ¹² Rû yexguma ga Cuáúärü ngüexügü rû yéma naxî, rû nayangegü ga naxüne, rû inayatèxgü. Rû yemawena rû Ngechuchumaã nüxû nayarüxugüe.

Ngechuchu rû nanachibüexèë ga 5000 ga yatügü

(Mr 6.30-44; Lc 9.10-17; Cu 6.1-14)

¹³ Rû yexguma yemaxû nacuáchigagu ga Ngechuchu, rû nüxîcatama wüxi ga nguegu nixüe, rû ínaxüxü ga yéma. Rû wüxi ga nachica ga taxúema íxãpataxüwa naxû. Natürü ga duüxügü rû nüxû nacuèxgüama ga ngextá na naxüxû. Rû ínachoxû ga norü ñanegüwa, rû dauxchitagu nawe narüxî. ¹⁴ Rû yexguma nguewa ínaxüegu ga Ngechuchu rû nüxû nadau ga yema muxüma ga duüxügü. Rû nüxû nangechaütümügü. Rû nanameèxèë ga yema duüxügü ga idaaweexû ga naxcèx yéma nagagüxû. ¹⁵ Rû yexguma marü nachütachaügu rû Ngechuchucèx naxî ga norü ngüexügü, rû ñanagürügü nüxû: —Marü nachütachaü, rû ñuxüchi taxúema nuxma taxãpata i nuã. Rû name nixî ícuyamugü i ñaã duüxügü na ñanexãcügü ya ngaicamana ngèxmagünewa naxîxücèx, rû ngema norü õnatèex yataxegüxcèx —ñanagürügü. ¹⁶ Natürü ga Ngechuchu rû ñanagürü nüxû: —Taxuacûma nawoegu. ¡Rû pematama penachibüexèëx! —ñanagürü. ¹⁷ Rû nümagü nanangãxügü, rû ñanagürügü: —Natürü nuã rû wüximèèxpüx i pãu rû taxre i choxnixîcatama toxû nangèxma —ñanagürügü. ¹⁸ Rû Ngechuchu nanangãxû rû ñanagürü: —¡Nuã chauxütawa penana! —ñanagürü. ¹⁹ Rû yexguma ga Ngechuchu rû duüxügüxû namu na maxètèxewa natogüxcèx. Rû ñuxüchi nanade ga yema wüximèèxpüx ga pãu rû yema taxre ga choxnigü. Rû daxügu nadawenüãcûma Tupanana moxè naxã, rû ñuxüchi inanabücu ga yema pãügu. Rû norü ngüexügüna nanana, rû yema duüxügüxû nayanu. ²⁰ Rû guxüma ga yema duüxügü rû meãma nachibüe. Rû yemawena rû 12 ga pexchigü nanapagüamatama namaã ga yema pãu rû choxnichipèxegü ga íyaxügüxû. ²¹ Rû yema yéma chibüexû rû 5000 ga yatügü nixî, natürü ga ngexügü rû buxügü rû tama nayaxugü.

Dexáétügu nixû ga Ngechuchu

(Mr 6.45-52; Cu 6.16-21)

²² Rû yemawena ga Ngechuchu rû duüxügüxû íyamugüyane rû wüxi ga nguegu nayachüxèë ga norü ngüexügü na yoxni naxtaxaarü tocutüwa naxîxücèx. ²³ Rû yexguma duüxügüxû íyamugüguwena rû guma

mèxpúnewa ínaxũãchi ga Ngechuchu na nũxĩca yéma yayumũxêxũcèx. Rũ yexma nũxĩcatama nachũtaũ. ²⁴ Natürũ ga norũ ngúexũgũ rũ naxtaxaarũ ngãxũtũchiũgu nixãgũ ga yexguma. Rũ tacũ ga buanecũ yexma nũxũ naxũ, rũ poraãcũ nayuape. ²⁵ Rũ yexguma marũ yangunechaũgu rũ norũ ngúexũgũwe inaxũãchi ga Ngechuchu. Rũ dexãchiuétũgu nixũ naxcèx ga norũ ngúexũgũ. ²⁶ Rũ yexguma norũ ngúexũgũ nũxũ daugũgu ga dexãchiuétũgu na yaxũxũ, rũ poraãcũ nabèjxãchiãègũ. Rũ norũ muũmaã aita naxũe, rũ ñanagürũgũ: —Wũxi i naxchiximare nixĩ — ñanagürũgũ. ²⁷ Natürũ ga Ngechuchu rũ namaã nidexa rũ ñanagürũ nũxũ: —¡Peporae! rũ choma chixĩ. ¡Rũ tãxũ ipemuũèxũ! —ñanagürũ. ²⁸ Rũ yexguma ga Pedru rũ Ngechuchumaã nidexa rũ ñanagürũ: —Pa Corix, ega chi cuma quixĩgu, ¡rũ choxũ namu na choma rũ ta dexáétũgu chixũxũcèx rũ cuzũtawa na chaxũxũcèx! —ñanagürũ. ²⁹ Rũ Ngechuchu ñanagürũ nũxũ: —Ècũ ¡nuã naxũ! —ñanagürũ. Rũ yexguma ga Pedru rũ ínaxũe ga nguewa. Rũ inanaxũgũ ga dexáétũgu na yaxũxũ na Ngechuchuxũtawa naxũxũcèx. ³⁰ Natürũ yexguma nũxũ yacuèxãchigu ga na naporaxũ ga buanecũ rũ namuũ, rũ inanaxũgũ ga na dexãchiũgu nanguxũ. Rũ aita naxũ rũ ñanagürũ: —Pa Corix, ¡choxũ rüngũxèè! —ñanagürũ. ³¹ Rũ yexgumatama ga Ngechuchu rũ Pedrumèxègu nayayauxãchi, rũ ñanagürũ nũxũ: —Cuma rũ írarũwatama cuyaxõ. ¿Rũ tũxcũũ tama aixcũma cuyaxõxõchi? —ñanagürũ. ³² Rũ yexguma nguegu yachoũgu ga Ngechuchu rũ Pedru, rũ nangupetũ ga guma buanecũ. ³³ Rũ guxũma ga norũ ngúexũgũ ga nguewa yexmagũxũ rũ Ngechuchupèxegu nacaxãpũxũgũ rũ nũxũ nicuèxũũgũ, rũ ñanagürũgũ nũxũ: —Aixcũmaxũchi cuma nixĩ i Tupana Nane quĩxũ — ñanagürũgũ.

Yenecharétuanewa Ngechuchu nanameèxèè ga idaaweexũ

(Mr 6.53-56)

³⁴ Rũ yexguma marũ yanguũgu ga naxtaawa, rũ Yenecharétuanewa nangugũ rũ yéma ínachoũ. ³⁵ Rũ yexguma yema duũxũgũ ga yémacũãx nũxũ icuèxãchitanũgu ga Ngechuchu na yĩxũ ga guma, rũ guxũma ga yema naãnewa nanguchiga ga yéma na nayexmaxũ ga Ngechuchu. Rũ yemacèx naxũtawa nanagagũ ga yema duũxũgũ ga idaaweexũ. ³⁶ Rũ Ngechuchuxũ nacèèxũgũ na naxchirupechinũgumare yangõgũgũxũcèx. Rũ guxũma ga yema naxchirupechinũgu ingõgũèxũ rũ narũmeè.

15

Tacũ nixĩ i Tupanapèxewa duũxũgũxũ chixexèèxũ

(Mr 7.1-23)

¹ Rũ Ngechuchucèx naxĩ ga ñuxre ga Parichéugũ rũ ngúexèèruũgũ ga ore ga mugũwa nguxèètaegũxũ ga Yerucharéũwa ne íxũ. Rũ Ngechuchuna nacagũ, rũ ñanagürũgũ: ² —¿Tũxcũũ i curũ ngúexũgũ rũ tama nagu naxĩ i nuxcũmaũgũxũ i tórũ oxigũcũma? ¿Rũ tũxcũũ tama nayanguxèègũ i ngèma nacũma na Tupanacèx nayauxmèxgũxũ naxũpa na nachibũèxũ? —ñanagürũgũ. ³ Natürũ ga Ngechuchu rũ nũxna naca ga yema Parichéugũ rũ ngúexèèruũgũ, rũ ñanagürũ nũxũ: —¿Rũ tũxcũũ i pema rũ nũxũ pexo i Tupanaãrũ mu na nagu pexĩxũcèx i pecũmagũtama? ⁴ Erũ Tupana rũ norũ orewa rũ ñanagürũ: “¡Tũxũ nangechaũ ya cunatu rũ cue!”

ñanagürü. Rū ngēma orewa rü ñanagürü ta:

“Rū texé ya tümanatümaã rü êxna tümaēmaã guxchigaxe rü name nixĩ i noxtacüma ngēmacèx tüxũ tayuxēē”, ñanagürü. ⁵ Natürü pema rü ñaperügügü:

“Marü name ega wüxi ya yatü nanatüxũ rü naèxũ ñaxgu: ‘Taxucürüwa chorü ngēmamaxümaã cuxũ charüngüxèē erü guxüma i chorü ngēmamaxũ rü marü Tupanana chanaxã’,” ñaxgu. ⁶ Rū ngēxguma texé ngēma ñagügu rü pexcèx rü marü namexũ na tama tümanatüxũ rü tümaèxũ tarüngüxèèxũ. Rū ngēmaãcü ipeyanaxoxèē i Tupanaärü mu na nagu pexixücèx i pecümagütama. ⁷ Pema nixĩ i duüxügü i togüpèxewa rü meã pemaxènetaxũ, natürü peãèwa rü chixexügu perüxĩnüē. Rū aixcüma nixĩ ga yema ore ga nuxcümaücü ga Tupanaärü orearü uruũ ga Ichaxia pechiga ümatüxũ ga ñaxũ:

⁸ “Ñãã duüxügü rü naãxmaãmare choxũ nicuèxüügü. Natürü naãèwa rü tama aixcüma chaugu narüxĩnüē. ⁹ Rū taxuwama name na ngēmaãcü natücèxma choxũ yacuèxüügüxũ. Rū guxüma i norü nguxèètae rü yatügüarü mugümare nixĩ rü tama aixcüma chorü mu nixĩ”,

ñaxũ. ¹⁰ Rū ñuxüchi ga Ngechuchu rü duüxügücèx naca, rü ñanagürü nüxũ: —¡Meã iperüxĩnüē i ñãã chorü ore, rü nagu perüxĩnüē! ¹¹ Ngēma õna i duüxügü ngõxũ rü tama ngēma nixĩ i napecaduãxèègüxũ. Natürü ngēma ore i chixexũ i nüxũ yaxuxũ, rü ngēma waxi nixĩ i napecaduãxèègüxũ — ñanagürü. ¹² Rū ñuxüchi ga norü ngüexügü rü naxcèx naxĩ, rü ñanagürügü nüxũ: —¡Pa Corix, tama êxna nüxũ cucuèx na Parichéugüãèwa nangúxũ i ngēma ore i namaã nüxũ quixuxũ? —ñanagürügü. ¹³ Natürü nüma ga Ngechuchu rü nanangaxũ rü ñanagürü nüxũ: —Guxüma i ngema nanetü i tama Chaunatü itoxũ rü tá nanabèx. ¹⁴ Rū nüetama i ngēma Parichéugü, erü namaärü cuèxruügü i ngexetüxürüü nixĩgü. Rū ngēxguma wüxi i ngexetüxũ rü naxrüü ngexetüxümaã inacuèxgu rü ngürüächi ngēma taxre rü wüxi i äxmaxügu tá nügümaã nayayicu —ñanagürü. ¹⁵ Rū ñuxüchi ga Pedru rü Ngechuchuna naca, rü ñanagürü: —¡Tomaã meã nangoxèē na ñuxũ ñaxüchiga yĩxũ i ngēma ore i tomaã nüxũ quixuxũ! —ñanagürü.

¹⁶ Rū Ngechuchu nanangãxũ rü ñanagürü: —¡Êxna pema rü ta tama nüxũ pecuèxgüéga i ngēma ore? ¹⁷ ¡Tama êxna nüxũ pecuèx rü guxüma i ngēma õna i duüxügü ngõxũ rü naãnüwa naxũ, rü yixcama rü ñuxüchi ínaxüxũ? ¹⁸ Natürü guxüma i ngēma ore i duüxügü nüxũ ixuxũ rü naãèwa nixĩ i ne naxüxũ. Rū ngēma ore i chixexũ waxi nixĩ i napecaduãxèègüxũ i ngēma duüxügü. ¹⁹ Erü naãèwa nixĩ i chixexügu naxĩnüèxũ i duüxügü. Rū ngema ne naxü na namáètaxũ, rü to i ngexũ i ätexümaã na inapexũ, rü na nangèãèmarexũ, rü na nangĩxũ, rü na yadoratèxáxũ, rü na naguxchigawèxexũ. ²⁰ Rū guxüma i ngēma chixexũ waxi nixĩ i duüxügüxũ pecaduãxèèxũ. Natürü ngēma na tama nayauxmèxgüxũ naxüpa na nachibüexũ, rü ngēma rü tama nanapecaduãxèè i duüxügü —ñanagürü.

Wüxi ga ngecü ga to ga nachiüãnecüãx ga Ngechuchuaxũ yaxõxcüchiga (Mr 7.24-30)

²¹ Rū yexguma yéma inaxüächigu ga Ngechuchu, rü Tiruane rü Chidãüãneärü ñanegüwa naxü. ²² Rū Ngechuchuxütawa ingu ga wüxi ga ngecü ga Canácüãx ga Tiruanegu ächiücü. Rū tagaãcü ngigürügü nüxũ: —Pa Cori Pa Dabítanüxüx, ¡cuxũ changechaütümüü! Erü chauxacü rü

wüxi i ngoxo ngîwa nangëxma i poraäcü ngîxü chixewexü —ngîgürügü. ²³ Natürü ga Ngechuchu rü tama ngîxü nangäxü. Rü düxwa ga norü ngüexügü rü naxcëx naxî, rü Ngechuchuxü nacëexügü, rü ñanagürügü: —Pa Corix ¡Ngîmaä nüxü ixu i ngëma nge rü íyaxü, erü tawe iyacaechigü! —ñanagürügü. ²⁴ Rü yexguma ga Ngechuchu rü ñanagürü: —Tupana núma choxü namu na Yudiugü i pecaduäxgüxüçëxicatama na chadauxüçëx —ñanagürü. ²⁵ Natürü ngîma ga yema nge ga tama Yudüu ixücü rü Ngechuchucëx iyaxü. Rü napëxegu iyacaxápüxü, rü ngîgürügü nüxü: —Pa Corix ¡choxü rüngüxëé! —ngîgürügü. ²⁶ Natürü Ngechuchu rü ñanagürü: —Tama name i taxacügüna tanapu i norü ñna na airügüna naxäxüçëx —ñanagürü. [Rü yema ñanagürü yerü nümagü ga Yudiugü rü nügü nixugü na Tupanaxäcügüxüchi yîgüxü rü yema togü rü ñoma airügürü na yixîgüxü.] ²⁷ Natürü ngîma ga yema nge rü ngîgürügü: —Rü aixcüma nixî i curü ore, Pa Corix, natürü airügü rü ta norü yoraarü ñnatüchi i mechawa rüyixü nangõx —ngîgürügü. ²⁸ Rü yexguma ga Ngechuchu rü ñanagürü ngîxü: —Pa Ngecüx, aixcümaxüchi cuyaxõ. Marü tá chanaxü i ngëma cuma cunaxwëxexü —ñanagürü. Rü yexgumatama ngîxcëx nitaane ga ngîxäcü.

Ngechuchu rü nanameëxë ga muxüma ga idaaweexü

²⁹ Rü yemawena ga Ngechuchu rü inaxüächi ga yema nañnewa, rü nax-taxa ga Gariréacutüwa naxü. Rü ñuxüchi wüxi ga mëxpünewa ínaxüächi, rü yéma nayarüto. ³⁰ Rü muxüma ga duüxügü naxütawa nangugü. Rü yéma naxütawa nanagagü ga duüxügü ga ichixeparagüxü, rü ngexetügüxü, rü tama idexagüxü, rü chixechacüügüxü, rü muxüma ga togü ga idaaweexü. Rü Ngechuchupëxegu nayamugü, rü nüma ga Ngechuchu rü nanameëxë. ³¹ Rü ga duüxügü rü poraäcü nabeixächiäëgü ga yexguma nüxü nadaugü ga ñuxäcü yema noxri tama idexagüxü rü marü na yadexagüxü, rü yema noxri chixechacüügüxü rü marü naxcëx na yataanegüxü, rü yema noxri chixeparagüxü rü marü na nameparagüxü, rü yema noxri ngexetügüxü rü marü na yadauchigüxü. Rü yemacëx ga duüxügü rü Tupanaxü nicüexüügü.

Ngechuchu nanachibüexë ga 4000 ga yatügü

(Mr 8.1-10)

³² Rü ñuxüchi ga Ngechuchu rü norü ngüexügücëx naca, rü ñanagürü nüxü: —Choxü nangechaütümügü i ñaä duüxügü, erü marü tomaëxpüx i ngunexü nuä chauxütawa nangëxmagü, rü nüxü nataxuma i norü ñna. Rü taxuacüma ngëmaäcümare nachüüwa chanamugü, erü ngürüächi namagu tá nayaturae —ñanagürü. ³³ Rü norü ngüexügü rü ñanagürügü nüxü: —¿Natürü ngextá tá tanayaxu i ñna naxcëx i guxüma i ñaä duüxügü? Erü taxüema nuxma taxäpata i nuä —ñanagürügü. ³⁴ Rü Ngechuchu nüxna naca, rü ñanagürü: —¿Ñuxre i päu pexü nangëxma i pemax? —ñanagürü. Rü nanangäxügü, rü ñanagürügü: —Toxü nangëxma i 7 i päu rü noxretama i choxnixäcügüxicatama —ñanagürügü. ³⁵ Rü ñuxüchi ga Ngechuchu rü duüxügüxü namu na ñaxtüanewa natogüxüçëx. ³⁶ Rü nanade ga yema 7 ga päu rü yema choxnigü. Rü Tupanana moxë naxä. Rü ñuxüchi inanabücu. Rü norü ngüexügüna nanana na duüxügüxü yanaxüçëx. ³⁷ Rü guxüma ga duüxügü rü meäma nachibüe. Rü yemawena rü 7 ga pexchigü nanapagüamatama namaä ga yema päu rü choxnichipëxegü ga íyaxügüxü. ³⁸ Rü yema yéma chibüexü rü 4,000

ga yatügü nixî, natürü ga ngexügü rü buxügü rü tama nayaxugü. ³⁹ Rü yemawena ga Ngechuchu rü duüxügüxü ínimugü. Rü ñuxüchi wüxi ga nagueu nixüe, rü Magadäärü nañewa naxü.

16

Parichéugü rü Chaduchéugü naxcèx ínacagü na nüxü nüxü nadauxëégüxücèx ga wüxi ga cuèxruü ga Tupanaärü poramaã naxüxü
(Mr 8.11-13; Lc 12.54-56)

¹ Rü ga Parichéugü rü Chaduchéugü rü Ngechuchuxü ínayadaugü. Rü Ngechuchuna nacagüe na nüxü nüxü nadauxëégüxücèx ga wüxi ga cuèxruü ga Tupanaärü poramaã naxüxü, yerü nüxü naxügüchaümare. ² Natürü nüma ga Ngechuchu rü nanangãxü, rü ñanagürü nüxü: —Pema rü yáuanecü rü ñaperügügü:

“Name tá nixî i moxüärü ngunexü, erü nadautüweane”, ñaperügügü.

³ Rü ngëxguma pèxmama nadautüweanegu rü poraãcü nacaixanegu, rü:

“Nachixe tá nixî i ngunexü” ñaperügügü. Pema nixî i duüxügü i togüpèxewa meã pemaxënetaxü, natürü chixexügu perüxínüë. Rü pema nüxü pecuèx na penangugüxü i ñuxgu tá nameänexü rü ñuxgu tá nachixeanexü. Natürü ñuxma na yanguxü i ngëma cuèxruüga ga nuxcüma Tupana pemaã ixunetaxü rü tama nüxü pecuèxgüëga na ñacüchiga yíxü —ñanagürü. ⁴ Rü ñanagürü ta ga Ngechuchu: —Ñaa duüxügü i chixecümagüxü rü tama yaxögüxü rü naxcèx ínacagü i wüxi i cuèxruü i Tupanaärü poramaã üxü. Natürü yema cuèxruü ga nuxcümaücü ga Tupanaärü orearü uruü ga Yonáxü ngupetüxürüüxicatátama nadaugü. Rü yexgumarüü na bayenaänüwa na ínaxüxüxü, rü choma rü ichatáxüwa tá íchaxüxü. Rü taxuxütáma i to i cuèxruüxü nüxü chadauxëë i ñaa duüxügü —ñanagürü. Rü ñuxüchi nüxna yéma nixü ga Ngechuchu, rü inaxüächi.

Parichéugüarü pãüärü puxëëruüchiga
(Mr 8.14-21)

⁵ Rü yexguma naxtaxaarü tocutüwa naxíxgu ga norü ngúexügü, rü nüxü inayarüngümaë na nawemü ta íyangegüxü. ⁶ Rü yexguma ga Ngechuchu rü ñanagürü nüxü: —jDücèx, pexuãëgü naxcèx i Parichéugü rü Chaduchéugüarü pãüärü puxëëruü! —ñanagürü. ⁷ Rü yema norü ngúexügü rü inanaxügüë ga nügü na ñagüxü: —Ngëma ñanagürü tüxü, erü tama tawemüta ítingegü —ñanagürügü. ⁸ Natürü ga Ngechuchu rü nüxü nacuèxama ga ñuxãcü na yadexagüxü ga norü ngúexügü. Rü yemacèx ñanagürü nüxü: —jTüxcüü,

“Tüxü nataxu i tawemü” ñaperügügü? Pema rü tama aixcüma peyaxögü. ⁹ —jTama éxna nüxü pecuèxgüëga rü nüxna pecuèxáchie ga yema wüximëxpüx ga pãü ga yema 5,000 ga yatügücèx ichabücuxü? jRü ñuxre ga pexchi penaxüãcuxü namaã ga yema naxchipëxegü ga íyaxügüxü? ¹⁰ —jRü tama éxna nüxna pecuèxáchie ga yema 7 ga pãü ga yema 4,000 ga yatügücèx ichabücuxü? jRü ñuxre ga pexchi penaxüãcuxü namaã ga yema naxchipëxegü ga íyaxügüxü? ¹¹ —jRü ñuxãcü nixî i tama nüxü pecuáxü i tama pãüchiga na chidexaxü i ngëxguma ñachagu:

“jPexuãëgü naxcèx i Parichéugü rü Chaduchéugüarü pãüärü puxëëruü!” ñachagu? —ñanagürü ga Ngechuchu. ¹² Rü yexguma ga norü ngúexügü rü nüxü nacuèxgü ga tama pãüärü puxëëruüchiga na yadexaxü ga

Ngechuchu, natürü Parichéugü rü Chaduchéugüarü nguxêetaechiga na yïixü ga na yadexaxü.

Pedru nanangoxêê na Cristu na yïixü ga Ngechuchu

(Mr 8.27-30; Lc 9.18-21)

¹³ Rü yexguma Checharéa ga Piripuaneärü ngaicamana nanguxgu ga Ngechuchu, rü norü ngúexügüna naca, rü ñanagürü: —¿Ñuxü ñaxü i duüxügü i chauchiga na texé chiixü i chomax? —ñanagürü. ¹⁴ Rü nüma ga norü ngúexügü rü nanangäxü rü ñanagürügü: —Nangêxma i duüxügü rü:

“Cuáu ya baiüxêêruü quixi” ñagüxü. Rü togü i:

“Eria quixi” ñagüxü. Rü togü i:

“Yeremiã quixi” ñagüxü. Rü togü rü:

“Wüxi ga nuxcümaücü ga Tupanaärü orearü uruü quixi” ñagüxü — ñanagürügü. ¹⁵ Rü yexguma ga Ngechuchu rü nüxna naca rü ñanagürü: —¿Rü pema i ñuxü ñapegüxü choxü na texé chiixü? —ñanagürü. ¹⁶ Rü Chimáü ga Pedru nanangäxü, rü ñanagürü nüxü: —Cuma nixi i Cristu ya Tupana ya maxücü Nane quiixü —ñanagürü. ¹⁷ Rü Ngechuchu nanangäxü rü ñanagürü nüxü: —Cuma rü aixcüma cutaêê, Pa Chimáüx, Pa Yoná Nanex, erü taxuüma i duüxü nixi i cuxü nüxü cuèxêêxü i ngêma, natürü Chaunatü ya daxügücü nixi ya cuxü nüxü cuèxêêcü na Nane chiixü. ¹⁸ —Rü choma cumaã nüxü chixu rü cuma rü Pedru quixi. Rü ngêma cuéga rü “nuta” ñaxüchiga nixi. Rü cuma tá nixi i chorü duüxügüarü dauruü quiixü. Rü Chataná rü tãütáma nüxü narüyexera i ngêma chorü duüxügü. ¹⁹ —Rü choma rü tá cuxna chanaxã i chorü ore na duüxügümaã nüxü quixuxüçex na nüxü nacuèxgüxüçex na ñuxäcü daxüguxü i nañewa nangugüxü i ngextá Tupana äêxgacü íixüüwa. Rü yixema tama cuxü irüxínüêê i ngêma ore rü tãütáma ngêma tichocu. Natürü yixema meã cuxü irüxínüêê i ngêma ore rü aixcüma ngêma Tupana äêxgacü íixüüwa tá tangugü —ñanagürü. ²⁰ Rü yexguma ga Ngechuchu rü norü ngúexügümaã nüxü nixu, rü ñanagürü: —¡Taxüemaãtáma nüxü pixu na choma rü Cristu chiixü! —ñanagürü.

Ngechuchu nanaxunagü ga norü yuxchiga

(Mr 8.31-9.1; Lc 9.22-27)

²¹ Rü yemawena inanaxügü ga norü ngúexügümaã nüxü na yaxuxü ga tacü tá nüxü na üpetüxü. Rü ñanagürü: —Choma rü Yerucharéüwa tá chaxü, rü ngema poraäcü ngúxü tá choxü ningexêêgü. Rü choxü tá nimèxgü i Yudíugüarü äêgacügüerugü rü paigüarü äêxgacügü rü ngúexêêruügü i ore i mugüwa nguxêêtaegüxü. Natürü tomaêxpüx i ngunexü ngupetügu rü wena táxaruü chamaxü —ñanagürü. ²² Rü yexguma ga Pedru rü nüxica noxrüwama Ngechuchuxü naga, rü inanaxügü ga na naxucuxêäxü, rü ñanagürü: —Pa Corix, Tupana rü tama nanaxwêxe na ngêmaäcü quidexaxü. Rü tãütáma ngêmaäcü cuxü nangupetü i cumax —ñanagürü. ²³ Natürü ga Ngechuchu rü Pedrucèx nadaueguãchi, rü ñanagürü nüxü: —¡Choxna ixügachi, Pa Chatanáx, erü chixexügu choxü cunguxêêchaü! Rü tama Tupana nagu rüxínüxügu curüxínü, rü yatügü nagu rüxínüxügumare curüxínü i cumax —ñanagürü. ²⁴ Rü yexguma ga Ngechuchu rü norü ngúexügüxü ñanagürü: —Rü ngêxguma texé chowe rüxüxchaügu, jécü nüxü tarüxo i tümaärü ngúchaü, rü namaã tapora i ngêma guxchaxügü i tümacèx ínguxü i ñoma curuchawa tipotaxürüü tuxü íxêêxü, rü ngêmaetüwa chowe tarüxüãma! ²⁵ Erü yixema tügü

maxêchaxêêchaũxê rü tá tayu. Natürü yíxema chauxcèx yúxe rü aixcúma tá tüxü nangêxma i maxü i taguma gúxü. ²⁶ Rü ¿Tacüwa i nüxü namexü ya wüxi ya yatü ega nayauãxgu i guxüma i ñoma i naãneãrü ngêmaxügü, natürü iyanatauxêêãgu i norü maxü? Erü taxucürüwama wüxi ya yatü rü norü dñerumaã naxcèx nataxe i norü maxü. ²⁷ Erü choma i Tupana Nane na duũxüxü chiũxü rü wena táxarü núma chaxü. Rü ngêxguma rü Chaunatü ya Tupanarüü tá ãêxgacü chixĩ, rü daxüçüãx i orearü ngeruũgümaã tá íchangu. Rü ngêxguma tá nixĩ i nüxü chanaxütanüxü i wüxichigü i duũxügü i ngêma ñuxãcü chauxcèx na namaxêxürüüãcüma maxêxü. ²⁸ Rü aixcúma pemaã nüxü chixu rü nangêxma i ñuxre i duũxügü i núma ngêxmagüxü rü tãütãma nayu ñuxmatãta choxü nadaugü na yuwa ícharüdaxü rü aixcúma ãêxgacü ya poracü na chiũxü —ñanagürü ga Ngechuchu.

17

Ngechuchu rü toraxüãcü nangox

(Mr 9.2-13; Lc 9.28-36)

¹ Rü 6 ga ngunexüguwena rü Ngechuchu ínayagü ga Pedru rü Chaũtiãgu rü Cuãü ga Chaũtiãgueneê. Rü nüxícatama wüxi ga mëxpúnewa noxrüwama namaã naxü. ² Rü yéma yema ngúexügüpêxewa rü toraxüãcü nangox ga Ngechuchu. Rü üèxcürüü nixĩ ga nachiwe ga na yayauracüüxü. Rü naxchiru rü ta üèxcüemarüü nixĩ ga na nangóonexêêãxü. ³ Rü ngürüãchi yéma naxcèx nangoxgü ga Moíché rü Ería. Rü Ngechuchumaã yéma nidexagü. ⁴ Rü yexguma ga Pedru rü ñanagürü Ngechuchuxü: —Pa Corix, name nixĩ nuã tangêxmagü. Rü ngêxguma cunaxwêxegu rü tá tanaxü ya tomaêxpüx ya düxenü, rü wüxi ya cuxcèx, rü náí ya Moíchécèx, rü náí ya Eríacèx —ñanagürü. ⁵ Rü yexguma íyadexayane ga Pedru rü wüxi ga caixanexü ga nangóonexêêxü rü natanügu nayangaixema. Rü yema caixanexüwa inanaxü ga wüxi ga naga ga ñaxü: —Daa nixĩ ya Chaune ya nüxü changechaũxüchicü rü namaã chataãêxüchicü. ¡Rü naga pexĩnüê! —ñanagürü. ⁶ Rü yexguma yemaxü naxĩnüêgu ga yema ngúexügü, rü ñaxtúanegu nanangücuchiãchitanü, yerü poraãcü namuüê. ⁷ Natürü ga Ngechuchu rü naxcèx nixü, rü nüxü nayarüngögü, rü ñanagürü nüxü: —¡Ipechigü rü tãxü ipemuüêxü! —ñanagürü. ⁸ Rü yexguma wenaxãrü nadaunagütanügu, rü Ngechuchuxüxícatama nadaugü rü taxúema ga toguexü nadaugü. ⁹ Rü yexguma ínaxígügu ga guma mëxpúnewa, rü Ngechuchu nayaxucuxêgü ga taxúemaãma na nüxü yaxugüexüçèx ga yema yéma nüxü nadaugüxü, ñuxmatãta yuwa ínadaxgu rü wena namaũxgu. ¹⁰ Rü ñuxüchi ga yema ngúexügü rü Ngechuchuna nacagü, rü ñanagürügü: —¿Tüxcüü i ngêma ngúexêêruügü i ore i mugüwa nguxêêtaegüxü rü ñanagürügü:

“Ería tá nixĩ ya nüxíra cuxüpa nuã ücü?” ñanagürügü. ¹¹ Rü Ngechuchu nanangãxü, rü ñanagürü: —Aixcúma nixĩ i Ería na nüxíra tá núma naxüxü na chauxüpa Tupanacèx yamexêêãxüçèx i duũxügü. ¹² Natürü choma pemaã nüxü chixu, rü Ería rü marü núma naxü, natürü duũxügü rü tama nüxü nacüèxgü na texe yíixü. Rü yemacèx chixri namaã nachopetü. Rü ngêxgumarüü tá ta nixĩ na chixri tá chomaã nachopetüxü i duũxügü —ñanagürü. ¹³ Rü yexguma ga yema ngúexügü rü nüxü nicuêãchitanü ga Cuãü ga baiüxêêruüchiga na yíixü ga yema Ngechuchu namaã nüxü ixuxü.

*Ngechuchu rü nanamexêê ga wüxi ga bucü ga ngoxo nawa yexmacü
(Mr 9.14-29; Lc 9.37-43)*

¹⁴ Rü yexguma duüxügü íyexmaxüwa nangugügu, rü wüxi ga yatü Ngechuchucêx nixü. Rü napêxegu nayacaxápüxü rü ñanagürü nüxü: ¹⁵ —Pa Corix, ¡nüxü nangechaü ya chaune rü naxcêx yataanexêê! Erü muêxpüxcüna rü naxãüãêxü, rü poraãcü nüxü nangux. Rü muêxpüxcüna rü üxüxetügu nayanguxêê, rü êxna dexágu. ¹⁶ —Rü nuã curü ngúexüügüxtawa chanaga, natürü nümagü rü tama nüxü nacuêxgü na namexêêgüãxü —ñanagürü. ¹⁷ Rü yexguma Ngechuchu nanangãxü, rü ñanagürü nüxü ga yema duüxügü ga yéma yexmagüxü: —Pa Duüxügü i Tama Yaxögüxü i Chixri Maxêxüx, ¿ñuxguratáta i pemaã chanuxmaxü rü yaxna pemaã chaxñnüxü? ¡Nuã penaga ya yima bucü! —ñanagürü. ¹⁸ Rü Ngechuchu nananga ga yema ngoxo ga guma bucüwa yexmaxü. Rü yemaãcü ínanatêxüchi ga yema ngoxo. Rü yexgumatama naxcêx nitaane ga guma bucü. ¹⁹ Rü yemawena ga norü ngúexüügü rü noxrüwama Ngechuchumaã nidexagü. Rü nüxna nacagüe, rü ñanagürügü nüxü: —Pa Corix, ¿tüxcüü i toma rü taxuacüma ínanatêxüchi i ngêma ngoxo? —ñanagürügü. ²⁰ Rü Ngechuchu nanangãxü, rü ñanagürü nüxü: —Pema rü taxuacüma ípenatêxüchi erü tama aixcüma peyaxögü. Rü aixcüma pemaã nüxü chixu, rü ngêxguma chi woo wüxi ya motachachirerüxü naxiraxüchigu i perü ô, rü chi daa mëxpünemaã nüxü pixuxgu na yaxügachixücêx, rü chi pega naxñü. Rü taxuxü chima pexü naguxcha ega aixcüma peyaxögügu. ²¹ —Natürü ñaärüü i ngoxo rü tama ínaxüxü ega tama ixaureãcüma iyumüxêgu —ñanagürü.

*Ngechuchu rü wenaxärü nanaxunagü ga norü yuxchiga
(Mr 9.30-32; Lc 9.43-45)*

²² Rü yexguma norü ngúexüügümaã Gariréaarü naãnegu yaxüxgu ga Ngechuchu, rü norü ngúexüügümaã nüxü nixu, rü ñanagürü: —Choma ya Tupana Nane na duüxüxü chiixü, rü chixri tá chomaã nachopetü rü ãêxgacügüna tá choxü namugü i duüxügü. ²³ —Rü tá choxü nimêxgü, natürü tomaêxpüx i ngunexüguwena rü wena táxarü chamaxü —ñanagürü. Rü yexguma yema orexü naxñnüêgu ga norü ngúexüügü, rü poraãcü nangechaügü.

*Ngechuchu ngixü naxütanü ga yema dïeru ga tupauca ga taxü necêx
ngixü nayauxgüci*

²⁴ Ngechuchu rü norü ngúexüügümaã Capernáüärü ñãnewa naxí. Rü yexguma yéma nangugügu rü Pedruxü ínayadaugü ga yema yatügü ga tupauca ga taxü necêx dïeru ngixü yauxgüxü. Rü Pedruna nacagüe rü ñanagürügü: —¿Yima curü Cori rü tama êxna ngixü naxütanü i ngêma dïeru i tupauca ya taxü neärü ixícu? —ñanagürügü. ²⁵ Rü Pedru nanangãxü, rü ñanagürü: —Ngêmaãcü nanaxütanü —ñanagürü. Rü yixcama ga yexguma íxgu naxücuxgu ga Pedru, rü Ngechuchuxira Pedru-maã nidexa, rü ñanagürü nüxü: —¿Ñuxü ñacuxü i cumax, Pa Pedrux, rü ngextá nixí i nayauxgüãxü i norü dïeru i guxü i nachiüãneärü ãêxgacügü? ¿Cuxcêx i nügütanüwatama rü êxna togü i duüxügütanüwa? —ñanagürü. ²⁶ Rü Pedru nanangãxü, rü ñanagürü: —Maneca togü i duüxügütanüwa nixí i nayauxgüãxü —ñanagürü. Rü ñuxüchi Ngechuchu nanangãxü rü ñanagürü: —Rü ngêxguma ngêmaãcü yixígu, rü yixcama na Tupanaärü ixígüxü rü taxucêxma tanaxütanügü. ²⁷ —Natürü ngêma na taxúema

tamaã nuxúcex, rü chanaxwèxe i cuyaxütanü i ngêma dîêru. ¡Rü yéa naxtaawa naxü, rü ngema yapoxwaxe! ¡Rü ngêma nüxíraüxü i choxni i cunapoxwaüxü rü naãxwa tá nüxü icuyangau i wüxi i dîêru i nagu mexü na yangutanüxêêxúcex i chauxcèx rü cuxcèx rü ta! ¡Rü tupauca ya taxünewa nange i ngêma dîêru, rü yaxütanü! —ñanagürü.

18

¿Texé tá tixí ya guxãärü yexera ixíxê?
(Mr 9.33-37; Lc 9.46-48)

¹ Rü yexguma ga norü ngúexügü rü Ngechuchucèx naxí rü nüxna nacagü, rü ñanagürügü: —¿Pa Corix, texé tá tixí ya guxãärü yexera ixíxê i ngêma Tupana aëxgacü íxíxüwa? —ñanagürügü. ² Rü yexguma ga Ngechuchu rü wüxi ga buxúcèx naca, rü norü ngúexügüarü ngãxütanügu nanachixêê. ³ Rü ñuxüchi ñanagürü nüxü: —Dücèx, Pa Chorü Ngúexügüx, aixcüma pemaã nüxü chixu, rü ngëxguma tama nüxü perüxoegu i ngêma na togüarü yexera pegü pixígüxêêchaüxü rü ñuxüchi tama ñaã buxürüü pegü íperüxíragu, rü taxucürüwa pichocu i ngextá Tupana aëxgacü íxíxüwa. ⁴ —Rü aixcüma yíxema tügü íruxíraxe rü ñaã buxürüü ixíxê, rü yíxema tá tixí ya guxãärü yexera ixíxê i ngextá Tupana aëxgacü íxíxüwa. ⁵ —Rü texé ya chauégagu meã nayaxúxe i wüxi i buxü i ñaärüü ixíxü rü choxü nixí i tayaxüü.

Naxãcüma nixí na pecadugu inguxü
(Mr 9.42-48; Lc 17.1-2)

⁶ —Rü texé ya pecadugu nanguxêexê i wüxi i ñaã buxügü i choxü yaxögüxü rü tümacèx rü narümemaê chi nixí na noxtacüma wüxi ya nuta tümanaãwa nayangacuchixü, rü ñuxüchi ngêmaacü taxtüchiüwa tuxü nayarütáexü na ngëxma tayuxúcèx. ⁷ —Ñoma i naãnecüãx i duüxügücèx rü wüxi i taxü i ngechaü nixí na nangëxmaxü i muxüchixü i tacü i pecadugu nayixêêxü. Rü guxüguma tá nangëxma i ngêma chixexügü, natürü wüxi i ngechaüxüchi tá nixí naxcèx i ngêma yatü i togüxü pecadugu nguxêêxü. ⁸ —Rü ngëmacèx i ngëxguma chi cuxmëx rü êxna cucutü pecadugu cuxü nguxêêgu, rü name nixí i noxtacüma ícunadae rü yaxügu cuyaña. Erü narümemaê nixí i cuboxmëxácüma rü êxna cubocutüácüma na cunayaxuxü i curü maxü na tama guxüne ya cuxmëxmaã rü êxna guxüne ya cucutümaã üxü ya taguma ixoxünewa quitëxcuchixúcèx. ⁹ —Rü ngëxguma chi cuxetü pecadugu cuxü nguxêêgu, rü name nixí i ícunacaxüchi, rü yaxügu cunaña. Erü narümemaê nixí i wüxixetümaã na cunayaxuxü i curü maxü na tama guxüne ya cuxetümaã üxü ya ngoxogü nagu poxcuenewa na quitëxcuchixúcèx. [Rü ngêmaacü woo cuxü naguxchagu, natürü name nixí i nüxna quixügachi i guxüma i ngêma chixexügü i nagu cunguchaüxü.]

Ore ga carneru ga iyarütaxuxügu ixuxü
(Lc 15.3-7)

¹⁰ —Rü tama name i nüxü pexoox i wüxi i buxü i ñaärüü choxü yaxöxü. Erü ngêma norü dauruügü i orearü ngeruügü i daxücüãx rü guxüguma Chaunatü ya daxügücüpëxewa nangëxmagü na ngema ngêma buxüetüwa nachogüxúcèx. ¹¹ —Rü choma i Tupana Nane na duüxüü chíixü rü núma chaxü na chanamaxêêxúcèx i duüxügü iyarütaxuxü. ¹² —¿Rü ñuxü ñapegüxü i pema ega wüxi ya yatü rü nüxü nangëxmagu

i 100 i carnerugü rü wüxi nüxü iyarütauxgu? ¿Taux éxna i nachitaügu namugüäxü i ngëma 99, rü ñuxüchi naxcëx yadauxü i ngëma nüxü iyarütaxuxü? ¹³—Rü ngëxguma nüxü iyangauxgu, rü namaã nataãëxüchi i ngëma norü carneru. Rü woo guxüguma namaã nataãë i ngëma 99 i tama iyarütauxexü, natürü yexeraãcuxüchi namaã nataãë i ngëma wüxi i iyarütaxuxü, erü marü nüxü inayangau. ¹⁴—Rü ngëxgumarüü ta nixü ya Penatü ya daxüguccü na tama nanaxwëxexü na wüxi i ñaã buxü na iyarütaxuxü.

Ñuxäcü tamücüxü na ingechaüxüchiga
(Lc 17.3)

¹⁵—Rü ngëxguma cueneë chixexü cumaã üxgu, rü name nixü i nüxücatama namaã quidexa, rü nüxna nüxü cucuëxächixëë i ngëma norü chixexü i cumaã naxüxü. Rü ngëxguma cuga naxüügu, rü marü wë-naxarü mexüccëx cunataeguxëë i ngëma cueneë. ¹⁶—Natürü ngëxguma tama cuga naxüügu i ngëma cueneë, rü name nixü i naxcëx cuca i wüxi rü éxna taxre i duüxügu na nümagü rü ta namaã yadexagüxcëx i ngëma cueneë. ¹⁷—Rü ngëxguma rü ta tama nüxü inaxüügu i ngëma taxre i duüxüguärü ore, rü name nixü i guxü i yaxögüxümaã nüxü quixu na ngëma cueneëmaã yadexagüxcëx. Rü ngëxguma rü ta tama nüxü inaxüügu i ngëma yaxögüxüärü ore, rü name nixü i wüxi i duüxü i tama yaxöxürüügu namaã curüxü. ¹⁸—Rü aixcüma pemaã nüxü chixu rü yixema núma ñoma i naãnewa tama pexü irüxüxüxë i chorü ore rü täütäma Tupana äëxgacü ixüxüwa tichocu. Natürü yixema meã pexü irüxüxüxë i ngëma ore rü aixcüma ngëma tá tangu. ¹⁹—Rü pemaã nüxü chixu rü ngëxguma chi taxre i pema i núma ñoma i naãnewa rü wüxigu tacüccëx ípecaxgu i Chaunatü ya daxüguccüxütawa, rü núma ya Chaunatü rü tá pexna nanaxã. ²⁰—Erü ngëma ngextá taxre rü éxna tomaëxpüx i duüxügu chauégagu íngutaquëxexüwa, rü choma rü ta norü ngäxütanüwa changëxma —ñanagürü. ²¹ Rü yexguma ga Pedru rü Ngechuchucëx nixü, rü nüxna naca, rü ñanagürü: —¿Pa Corix, ngëxguma chaueneë chixexü chomaã üxgu, rü ñuxreëxpüxcüna i namexü na nüxü nüxü changechaüxü naxcëx i ngëma chixexü i chomaã naxüxü? ¿Rü marü namexü i cuxcëx ega 7 ëxpüxcüna yixügu na nüxü nüxü changechaüxü? —ñanagürü. ²² Rü Ngechuchu nanangäxü rü ñanagürü: —Tama name i 7 ëxpüxcünaxücatama nüxü nüxü cungechaü. Natürü guxügutäma nixü i nüxü nüxü na cungechaüxü woo 70 ëxpüxcüna i 7 wa nangu —ñanagürü.

Ore ga äëxgacüarü duüxü ga tama namücüaxü nüxü ngechaüxü ga norü ngetanügu ixuxü

²³ Rü Ngechuchu rü ñanagürü: —Rü ngëma Tupana na äëxgacü ixüxü, rü ñoma wüxi ga nachüñaneärü äëxgacü ga norü duüxügu ga nüxü ngetanügüxümaã namexëëchaüxürüü nixü. ²⁴—Rü yexguma inaxügüägu ga meã nüxü na yadaugüxü ga yema nüxü nangetanügüxüpane, rü naxütawa nanagagü ga wüxi ga norü duüxü ga taxüchicü ga díeru nüxü ngüxü ngetanüxü. ²⁵—Natürü ga yema norü duüxü rü nangearü díeruäx, rü taxuacüma norü cori ga äëxgacüxü nanaxütanüega. Rü yemacëx ga yema äëxgacü rü norü churaragüxü namu na to ga corixü namaã nataxegüxcëx ga yema yatü, wüxigu tümamaã ga naxmëx rü naxäcügü rü norü yemaxügu, na yema natanü ga díerumaã naxütanüäxüccëx ga norü

ngetanü. ²⁶—Rü yexguma ga yema norü duüxü rü norü âëxgacüpëxegu nacaxäpüxü, rü nüxü nacèèxü, rü ñanagürü:

“Pa Corix jchoxü nangechaü! Rü marü tá chapuracü, rü tá cuxü chanaxütanü i guxüma”, ñanagürü. ²⁷—Rü yema norü âëxgacüaxü nangechaütümüü, rü yemacëx namaã nüxü nixu ga marü tama nüxü na naxütanüâxücëx ga yema norü ngetanü. Rü ñuxüchi ñananguxuchixëë. ²⁸—Natürü yexgumatama yéma âëxgacüxütawa ñaxüüxgu ga yema yatü, rü nüxü inayangau ga wüxi ga namücü ga írarüwatama nüxü nange-tanüxü. Rü yema yatü rü nüxna natüxüe, rü nananuxnaxã, rü ñanagürü nüxü:

“jChoxü ngixü naxütanü i ngëma díeru i ngixü cungetanücü!” ñanagürü. ²⁹—Rü yexguma ga yema namücü rü yema yatüpëxegu nacaxäpüxü, rü nüxü nacèèxü, rü ñanagürü:

“Pa Chomücüx, jchoxü nangechaü! Rü marü tá chapuracü, rü tá cuxü chanaxütanü i guxüma”, ñanagürü. ³⁰—Natürü ga yema yatü rü tama nüxü nacuáxchaü ga yema ore. Rü poxcupataügu tüxü napoxcuama ñuxmata nüxü tanaxütanü ga yema tümaärü ngetanü. ³¹—Rü yexguma togü ga yema âëxgacüarü duüxügü nüxü daugügu ga yema ngupetüxü, rü poraãcü naãëwa nangux ga yema naxüxü ga yema yatü. Rü norü corixütawa naxí rü nüxü nayarüxügüe ga guxüma ga yema ngupetüxü. ³²—Rü yexguma ga yema âëxgacü rü nanamu ga norü churagü na naxütawa nagüâxücëx ga yema yatü. Rü yexguma naxütawa nanguxgu, rü ñanagürü nüxü:

“Wüxi i chixexü i chorü duüxü quixí. Choma rü cuxü nüxü changechaü ga yema choxü cungetanüxü, erü choxü cucèèxü na tama cuxü chapox-cuxücëx. ³³—Rü cuma rü chita nüxü nüxü cungechaü i ngëma cumücü i cuxü nangetanüxü, yexgumarüü ga choma rü cuxü nüxü na changechaüxürüü ga yema choxü cungetanüxü”, ñanagürü nüxü. ³⁴—Rü poraãcü nanuxüchi ga yema âëxgacü. Rü norü churaragüxü namu na napoxcugüâxücëx ga yema yatü ñuxmata guxü nüxü naxütanü ga yema nüxü nangetanüxü —ñanagürü ga Ngechuchu. ³⁵ Rü ñuxüchi ñanagürü ta: —Rü ngëxgumarüü tá pemaã nanaxü ya Chaunatü ya daxügücü i ngëxguma tama wüxichigü aixcüma peenexëgüaxü nüxü perüngümaegu i ngema chixexü i pemaã naxüxü —ñanagürü.

19

Parichéugü rü Ngechuchuna nacagüe i táxmëxchiga
(Mr 10.1-12; Lc 16.18)

¹ Rü yema ñaxguwena ga Ngechuchu rü inaxüächi ga Gariréaarü naãnewa. Rü natü ga Yudáüärü tocutüwa naxü ga Yudéaarü naãnewa. ² Rü muxüma ga duüxügü nawe narüxí, rü nüma ga Ngechuchu rü yéma nanameëxëë ga yema idaaweexü. ³ Rü Ngechuchucëx naxí ga ñuxre ga Parichéugü, rü nüxna nacagü rü ñanagürügü: —jCuxcëx namexü i wüxi i yatü na ñatáxmëxmarexü ega tacü rü chixexü taxüxgu ya naxmëx? —ñanagürügü. Rü yemaãcü nüxna nacagü yerü Ngechuchuxü chixexügu nanguxëëgüchaü. ⁴ Rü Ngechuchu nanangãxü rü ñanagürü: —jTaguma ëxna nawa pengüe i ngëma Tupanaärü ore i ümatüxü i nüxü ixuxü ga noxri Tupana naxüxgu ga duüxügü, rü yatüxü rü ngecücü na naxüxü? ⁵—Rü ñanagürü ga Tupana:

“Rü ngëmacëx ya yatü rü tá nanatü rü naëna nixügachi na namëxmaã inaxãuxücëx. Rü ngëmaãcü i ngëma taxre rü ñoma wüxitama i duüxürüü tá nixügü”.

6 —Rü ñuxüchi tama taxre nixí, rü wüxitama nixí. Rü ngëmacëx taxucürüwa texé nügüna tayaxígachitanüxëë i ngëma taxre i Tupana nügüna mugüxü —ñanagürü. 7 Rü yexguma Ngechuchuna nacagü rü ñanagürügü: —¿Tüxcüü nixí ga Moiché ga duüxügümaã nüxü yaxuxü rü ngëxguma texé tümamëxü ítáxchaügu rü name nixí i wüxi i popera i tëxgüpane ngíxna taxã, rü ñuxüchi ngíxü ítatëx? ñaxü —ñanagürügü. 8 Rü Ngechuchu nanangãxü, rü ñanagürü nüxü: —Pegagu nixí ga Moiché ga tama pexna nachúxãxü na pexmëxü ípetãxü. Yerü nüma nüxü nacuëx na tama aixcüma peyaxögüxü. Natürü noxriarü ügügu rü tama yemaãcü nixí. 9 —Rü choma pemaã nüxü chixu rü tama name na texé tümamëxü ítáxü ega tama naí ya yatümaã nangëãëxügagu yixígu. Rü ngëxguma chi yima yatü rü ñuxüchi naí i ngemaã naxãxmëxgu, rü chixexü naxü, rü ñoma naí i ngemaãmare nangëãëxürüü nixí. Rü texé ya ngímaã ámaxë i ngëma nge i ngíte ngíxü ítëxcü, rü ñoma naí i ngemaãmare ítapexürüü tixí —ñanagürü ga Ngechuchu. 10 Rü ñuxüchi ga norü ngüexügü rü ñanagürügü nüxü: —Ega ngëmaãcü yixígu rü name nixí i noxtacüma tama naxãmëx ya yatü rü tama ixãte i nge —ñanagürügü. 11 Rü Ngechuchu norü ngüexügüxü nangãxü rü ñanagürü: —Taxucürüwa guxüma i duüxügü nüxü nacuëx i tacüchiga na yíxü i ngëma nguxëëtae. Natürü yíxema Tupana tüxü nüxü cuëxëxëxícatama tixí ya nüxü cuëxgüxe. 12 —Rü nangëxma i nagúxüraüxü i guxchaxü na tama naxãmëxücëx ya yatü. Erü nümaxü i yatü rü woetama taxucürüwa naxãmëx erü norü bucüma nangepüxüchare. Rü nümaxü i yatü rü taxucürüwa naxãmëx erü nayauxpüxücharee. Rü togü tama naxãmëx erü Tupanaärü ngúchaüxícatama naxügüchaü. Rü texé ya ngëmaãcü maxchaüxë rü marü name i ngëmaãcü tamaxü —ñanagürü ga Ngechuchu.

*Ngechuchu rü buxügüxü nameãxë
(Mr 10.13-16; Lc 18.15-17)*

13 Rü duüxügü rü Ngechuchuxütawa nanagagü ga ñuxre ga buxügü na Ngechuchu nüxü ingögüxücëx rü namaã nayumüxëxücëx. Natürü ga Ngechuchuarü ngüexügü rü inanaxügüe ga na yangagüãxü ga yema duüxügü ga Ngechuchuxütawa buxügüxü gagüxü. 14 Natürü ga Ngechuchu rü ñanagürü nüxü ga norü ngüexügü: —Marü name i chauxütawa naxí i buxügü. ¡Rü táxü i nüxna penachuxuxü! Erü Tupana äëxgacü íixíxüwa rü tümacëx nixí ya yíxema ñaã buxügürüü meã yaxögüxe —ñanagürü. 15 Rü ñuxüchi ga Ngechuchu rü yema buxügüëtü naxümëx. Rü yemawena inaxüächí ga yéma.

*Wüxi ga ngextüxücü ga dïëruãxüchicü Ngechuchumaã nidexa
(Mr 10.17-31; Lc 18.18-30)*

16 Rü wüxi ga ngextüxücü rü Ngechuchuxütawa nangu, rü nüxna naca, rü ñanagürü: —Pa Ngüexëëruü ya Mecüx, ¿tacü tá chaxüxü na chanayaxuxücëx i maxü i taguma gúxü? —ñanagürü. 17 Rü Ngechuchu nanangãxü rü ñanagürü nüxü: —¿Tüxcüü “Mecü” ñacurügü choxü? Erü Tupanaxícatama nixí ya mecü íxícü, rü nataxuma i to. Natürü ngëxguma cunayauxchaügu i maxü i taguma gúxü, rü ¡naga naxínü i Tupanaärü

mugü! —ñanagürü. ¹⁸ Rû yexguma ga guma ngextüxücü rû ñanagürü: —¿Ngëxürüxü tá nixî i Tupanaârü mugü i naga chaxînxü? —ñanagürü. Rû Ngechuchu nanangâxü rû ñanagürü nüxü: —¡Tâütama cumâeta, rû tâütama nai i ngemaâ icupe, rû tâütama cungîtêex, rû tâütama doraxü quixu i togüchiga! ¹⁹ —¡Rû tûmaga naxînú ya cunatü rû cue, rû nüxü nangechaü i cumücügü ngêma na cugü cungechaüxürü! —ñanagürü. ²⁰ Rû yexguma ga guma ngextüxücü rû ñanagürü: —Guxüma i ngêma mugü i nüxü quixuxü rû woetama chorü bucüma meâ chayanguxêê. ¿Rû tacü rû to tá chaxü na choxü nangëxmaxüçex i maxü i taguma gúxü? —ñanagürü. ²¹ Rû Ngechuchu nanangâxü rû ñanagürü nüxü: —Ega aixcüma Tupanapêxewa mecü quixîxchaügu, rû name nixî i namaâ cutaxe i guxüma i curü ngëmaxüçü rû togü i ngearü ngëmaxüâxgüxüna cunaxâ i ngêma curü natanü. Rû ngëxguma tá cuxü nangëxma i cuchica i daxüguxü i nañewa. Rû ñüxüchi marü name i chowe curüxü —ñanagürü. ²² Natürü yexguma yemaxü naxînügu ga guma ngextüxücü rû poraâcü nangechaü, yerü namuârü dîeruâxüchi. ²³ Rû yexguma ga Ngechuchu rû norü ngüexügü ñanagürü: —Aixcüma pemaâ nüxü chixu rû naguxchaxüchi nixî na wüxi i duüxü i dîeruâxüchixü rû Tupana âëxgacü íixüwä na nanguxü. ²⁴ —Rû aixcüma pemaâ nüxü chixu rû ñoma wüxi i cameyu na taxucürüwama wüxi ya ucumaxëtüwa naxüpetüxüârü yexera narüguxchamaê naxçex i wüxi i duüxü i dîeruâxüchixü na yaxücuxü i ngextá Tupana âëxgacü íixüwä —ñanagürü. ²⁵ Rû yexguma yemaxü naxînüëgu ga norü ngüexügü rû poraâcü nabëixâchiâëgü. Rû nügüna nacagüe rû ñanagürügü: —¿Rû texé tá êxna tixî ya nayaxúxe i maxü i taguma gúxü? —ñanagürügü. ²⁶ Rû Ngechuchu nüxü nadawenü rû ñanagürü nüxü: —Duüxügü rû taxuacüma nügü namaxêê, natürü Tupanaâxü rû natauxcha na namaxêxêêâxü —ñanagürü. ²⁷ Rû yexguma ga Pedru rû ñanagürü nüxü: —Pa Corix, toma rû marü ítanawogü ga guxüma ga torü yemaxügü na cuwe tarüxüçex. ¿Rû tacü tá nixî i torü natanü i ñüxmax? —ñanagürü. ²⁸ Rû Ngechuchu nanangâxü rû ñanagürü nüxü: —Aixcüma pemaâ nüxü chixu rû ngêma ngunexü i Tupana nagu nangexwacaxüêêxü i guxüma, rû choma rû âëxgacü ya tacü tá chixî. Rû chorü tochica i mexêchixüwa tá charüto. Rû pema i 12 i chorü ngüexügü na chowe perüxü rû pema rû tá ta pexü nangëxma i perü tochicaxü i mexêchixü i chauxütawa. Rû ngema tá perütogü na norü maxüchigacex nüxü picagüxü i guxüma i Yudügu. ²⁹ Rû guxâma ya yíxema tûmapata chauxçex ítáxe, rû êxna tûmaêneëgü rû tûmaëyëxgüxü chauxçex ítáxe, rû êxna tûmanatü rû tûmaêxü chauxçex ítáxe, rû êxna tûmamêx rû tûmaxâcügüxü rû tûmaârü naâne chauxçex ítáxe, rû 100 êxpüxcüna i ngêma noxri tûxü ngëxmaxüârü yexera tá tayaxu. Rû naetü tá tanayaxu i maxü i taguma gúxü. ³⁰ —Natürü muxüma i nümaxü i ñoma i nañewa duüxügü wixpêxewa ügüxêêxü, rû daxüguxü i nañewa rû Tupana tá wixweama nanaxügüxêê. Rû muxüma i nümaxü i ñoma i nañewa duüxügü wixweama ügüxêêxü, rû daxüguxü i nañewa rû Tupana tá wixpêxewa nanaxügüxêê.

20

Ore ga puracütanüxügu ixuxü

¹ —Rû ngêma Tupana âëxgacü íixüwä rû ñoma wüxi ga ubanecüarü yora ga pëxmama norü puracütanüxü ta yadaucürütü nixî. ² Rû

yema puracütanüxümaã nanamexêê na wüxitachinü ga dîêru gu nüxü na naxütanüãxücèx ga wüxichigü ga ngunexügu. Rü ñuxüchi naãnewa nanamugü na yema yapuracüexücèx. ³—Rü yixcama ga 9 arü oragu rü ínayadau ga ngextá yatügü ga puracücèx daugüxü íngutaquêxegüxüxüwa. Rü yexma nüxü nayangau ga ñuxre ga yatügü ga ngearü puracüãxgüxü. ⁴—Rü ñanagürü nüxü:

“¡Ngema chorü ubanecüwa peyapuracüe! Rü meã tá pexü chanaxütanü”, ñanagürü. Rü nümagü rü yéma naxí. ⁵—Rü yema ubanecüarü yora rü tocuchigu rü wenaxârü togü ga puracütanüxü ta nayadau. Rü tomaêxpüxarü oragu ga yáuanecü rü wenaxârü yexgumarü ta nayadau. ⁶—Rü yixcama ga wüximêêxpüxarü oragu ga yáuanecü rü wenaxârü ínayadau ga ngextá yatügü ga puracücèx daugüxü íngutaquêxegüxüxüwa. Rü yexma nüxü nayangau ga ñuxre ga togü ga yatügü ga ngearü puracüãxgüxü. Rü ñanagürü nüxü:

“¿Tüxcüü i pema rü nuxã perüchomare i guxü i ñoma i ngunexügu, rü tama pepuracüe?” ñanagürü. ⁷—Rü nümagü nanangãxügü, rü ñanagürügü nüxü:

“Tama tapuracüe erü taxüema toxçèx tadau na tüxü tapuracüexücèx”, ñanagürügü. Rü yexguma ga yema naãneãrü yora rü ñanagürü nüxü:

“¡Pema rü ta ngema chorü ubanecüwa pexí rü peyapuracüe! Rü meã tá pexü chanaxütanü”, ñanagürü. ⁸—Rü yexguma marü nachütagu rü yema naãneãrü yora, rü naxçèx naca ga norü puracütanüxüãrü dauruü, rü ñanagürü nüxü:

“¡Naxçèx naca i ngêma puracütanüxü. Rü nüxíra nüxü naxütanü i ngêma wixwenaxüchima ngema íxü, rü nawa tá icyuyacuêê i ngêma nüxíra ngema puracüexü!” ñanagürü. ⁹—Rü yéma naxí ga yema puracütanüxü ga wüximêêxpüxarü oragu ga yáuanecü puracüwa íxü. Rü wüxichigü ngíxü nayauxgü ga wüxitachinü ga dîêru. ¹⁰—Rü yemawena rü yéma naxí ga yema nüxírama puracüexü ga puracütanüxü. Rü nümagü nagu naxínüêgu rü yexera tá ngíxü nayauxgü ga dîêru, natürü nümagü rü ta ngíxü nayauxgü ga wüxitachinütama ga dîêru ga wüxichigü. ¹¹—Rü yexguma ngíxü nayauxgü rü inanaxügü ga chixri na yadexagüxü nachigagu ga yema naãneãrü yora. ¹²—Rü ñanagürügü:

“Yixema rü guxü i ngunexügu üêxcüxetüwa tapuracüe, natürü i ñaã puracütanüxü i wixwenaxüchi íngugüxü rü wüxi i oratama napuracüe. Natürü ngema tüxü naxütanüãxüxpüxtama nüxü nanaxütanü”, ñanagürügü. ¹³—Natürü ga yema ubanecüarü yora nanangãxü, rü ñanagürü nüxü ga wüxi ga yema puracütanüxü:

“Pa Chomücüx, tama cuxü changíx. ¿Tama êxna i wüxitachinügu yíxü ga chomaã cunamexêêxü na cuxü chanaxütanüxü i ngema puracü? ¹⁴—¡Ñaa i curü dîêru, rü íxü! Rü ngema puracütanüxü i wüxi i oratama puracüexü, rü choma nüxna ngíxü chaxãxchaü i ngema cuxna ngíxü chaxãcüêxpüx. ¹⁵—¿Tama êxna name i ngema choma chanaxwêxexüãcüma ngímaã na chaxüxü i chorü dîêru? ¿Rü êxna quixãüãchi erü ngemaãcü chamecüma?” ñanagürü. ¹⁶—Rü yixema ñuxma duüxügü wixweama tüxü ügüxêxê, rü daxüguxü i naãnewa rü Tupana tá wixpêxewa tüxü naxügüxêê. Rü yixema ñuxma duüxügü wixpêxewa tüxü ügüxêxê rü daxüguxü i naãnewa rü Tupana tá wixweama tüxü naxügüxêê. Erü Tupana rü muxüchiena naxu, natürü noxretama tixí ya yixema tüxü nadexe —ñanagürü ga Ngechuchu.

*Ngechuchu rü norü tomaëxpücüna nanaxunagü ga norü yuxchiga
(Mr 10.32-34; Lc 18.31-34)*

¹⁷ Rü yexguma namagu yaxüxgu ga Ngechuchu ga Yerucharéüwa na naxüxü rü noxrüwama naxcèx naca ga yema 12 ga norü ngüexügü, rü ñanagürü nüxü: ¹⁸ —Pema nüxü pecuèx na marü ingaicaxü na Yerucharéüwa ingugüxü. Rü ngema rü duüxügü rü tá chixri chomaã nachopetü. Rü tá paigüarü äëxgacügü rü ngüexëëruügü i ore i mugüwa ngüxëëtaegüxüna tá choxü namugü. Rü nümagü rü tá chomaã nanaxuegugü na chayuxücèx. ¹⁹ —Rü tá to i nachüüñecüãxna choxü namugü. Rü ngëmagü tá nixi i chaugu idauxcüraügüxü rü choxü cuaixgüxü. rü ñüxüchi tá curuchawa choxü nipotagü na ngëxma chayuxücèx. Natürü tomaëxpüx i ngunexügüwena rü tá wenaxärü chamaxü —ñanagürü.

*Wüxi ga ngüxëècèx íca ga Chaütiágu rü Cuáülarü mamá
(Mr 10.35-40)*

²⁰ Rü yéma iyexma ga naë ga Chaütiágu rü Cuáü. Rü yema taxre rü Zebedéu nanegü nixigü. Rü ngíma rü Ngechuchucèx iyaxü namaã ga yema taxre ga ngínegü. Rü Ngechuchupëxegu iyacaxápüxü, rü wüxi ga ngüxëècèx nüxna iyaca. ²¹ Rü nüma ngíxna naca, rü ñanagürü: —¿Tacü nixi i cunaxwèxexü? —ñanagürü. Rü ngíma inangäxü rü ngígürügü: —Pa Corix, ngëxguma äëxgacüxü quingucuchigu rü chanaxwèxe i cunamu na wüxi i ñaã chaune rü curü tügüncüwawa na natoxü, rü ngëma to i curü toxwecüwawa na natoxü —ngígürügü. ²² Natürü Ngechuchu ngíxü nangäxü rü ñanagürü: —Pema rü tama nüxü pecuèx na tacücèx ípecaxü. ¿Namaxä chi peporaexü i ngëma ngüxü i tá choxü üpetüxü? —ñanagürü. Rü nümagü nanangäxügü rü ñanagürügü: —Ngëmaãcü namaã tá taporae —ñanagürügü. ²³ Rü Ngechuchu nanangäxü rü ñanagürü nüxü: —Aixcüma tá nixi i chauxrüü ngüxü pingegüxü. Natürü ngëma chorü tügüncüwawa rü chorü toxwecüwawa na perütögüxücèx, rü tama choxmëxwa nangëxma na pexna chanaxäxü. Rü Chaunatümëxëwa nixi na nangëxmaxü i ngëma, rü nüma tá tüxna nanaxä ya yíxema tümacèx íyíxë —ñanagürü. ²⁴ Rü yexguma yemaxü naxinüëgu ga yema togü ga 10 ga Ngechuchuarü ngüexügü, rü Chaütiágumaã rü Cuáümaã nanuë. ²⁵ Natürü Ngechuchu naxcèx naca rü ñanagürü nüxü: —Pema nüxü pecuèx rü guxü i nachüüñnegüarü äëxgacügü rü poraãcü nanamu i norü duüxügü. Rü ngëma äëxgacügü i taxügü rü norü duüxügüarü yora nügü nixigüxëë. ²⁶ —Natürü täütama ngëmaãcü nixi i petanüwa. Rü ngëxguma texé naxwèxegu na äëxgacü tixü i petanüwa, rü name nixi i noxri rü guxäarü ngüxëëruü tixi. ²⁷ —Rü ngëxguma chi texé i petanüwa naxwèxegu na tümamücügüeru na tixü, rü name nixi i noxri rü guxüma i tümamücügüarü ngüxëëruü tixi. ²⁸ —Yerü chomatama i Tupana Nane na duüxüxü chiüxü rü tama togü choxü rüngüxëëxücèx nixi i núma chaxüxü. Natürü núma chaxüxü na duüxügüxü charüngüxëëxücèx rü naxcèx na chayuxücèx rü ngëmaãcü chanaxütanüxücèx na muxüma i nümagü rü nüxü nangëxmaxücèx i maxü i taguma gúxü —ñanagürü.

*Ngechuchu nanameëxëë ga taxre ga ngexetügüxü
(Mr 10. 46-52; Lc 18.35-43)*

²⁹ Rü yexguma Ngechuchu norü ngüexügümaã Yericüarü íañewa íchoüxgu, rü muxüma ga duüxügü nawe narüxü. ³⁰ Rü yéma namacüwawa narütögü ga taxre ga ingexetüxü. Rü yexguma nüxü naxinüëgu

na Ngechuchu yéma üpetüxü, rü tagaäcü Ngechuchuna nacagüe, rü ñanagürügü: —Pa Corix, Pa Dabítanüxüx, ¡Cuxü tangechaütümügü! —ñanagürügü. ³¹ Rü yema duüxügü ga Ngechuchuwe rüxixü rü nayan-gagü na iyanangeëxgüxcëx. Natürü nümagü ga yema ingexetüxü rü yexeraäcü Ngechuchuna nacagüe, rü ñanagürügü: —Pa Corix, Pa Dabítanüxüx, ¡cuxü tangechaütümügü! —ñanagürügü. ³² Rü yexguma ga Ngechuchu rü yexma nayachiächi rü naxcëx naca ga yema ingex-etüxü. Rü nüxna naca rü ñanagürü: —¿Tacü i penaxwëxexü na pexcëx chanaxüxü? —ñanagürü. ³³ Rü nümagü nanangäxügü rü ñanagürügü: —Pa Corix, tanaxwëxe na toxü quidauchitanügüxëëxü —ñanagürügü. ³⁴ Rü yexguma ga Ngechuchu rü nüxü nangechaütümügü, rü naxëtügügu ningögü. Rü yexgumatama nidauchigü, rü Ngechuchuwe narüxü.

21

Yerucharéügu naxücu ga Ngechuchu (Mr 11.1-11; Lc 19.28-40; Cu 12.12-19)

¹ Rü yexguma marü yangaicagügu ga Yerucharéüwa na nangugüxü, rü nawa nangugü ga guma iäne ga Bechagué ga Oríbunecüarü mëxpüneärü ngaicamana yexmane. Rü Ngechuchu nanamu ga taxre ga norü ngüexügü. ² Rü ñanagürü nüxü: —¡Gua tórü toxmëxtawa ngëxmane ya iänexäcüwa pexü! Rü ngëxma tá ngixü pengau i wüxi i buru i ngëxma ngaxücü namaä i wüxi i ngixäcü i yatüxü i ngixütagu irüxäüxü. ¡Rü ngixü piwëxü, rü nuä chauxütawa ngixü pega namaä i ngixäcü! ³ Rü ngëxguma texé pexna caxgu na tacücëx ngixü piwëxüxü, ¡rü tümamaä nüxü pixu rü ñapegü:

“Torü Cori nangixwëxe namaä i ngixäcü, natürü paxa tá ngixü na-woeguxëë”, ñapegügü tüxü! —ñanagürü. ⁴ Rü yema naxüpetü yerü yemaäcü Tupana nayanguxëë ga norü ore ga nuxcümaüxü ga norü orearü uruü ümatüxü ga ñaxü:

⁵ “¡Yerucharéücüäxgümaä nüxü pixu rü ñapegü: ‘¡Dücëx ya perü äëxgacü ya nuä pexütawa ücü! Rü nüma rü tama nügü yacuëxüüäcü ínangu, rü wüxi i buruxacüétügumare naxaunagü!’ ”

ñanagürü ga yema ore. ⁶ Rü yexguma ga yema taxre ga norü ngüexügü rü yéma naxü, rü nanaxügü ga yema Ngechuchu namaä nüxü ixuxü. ⁷ Rü Ngechuchuxütawa ngixü nagagü ga yema buru ngixacümaä. Rü yema norü ngüexügü rü naxchirumaä nanaçhatagü ga yema ngixacü, rü ñuxüchi ga Ngechuchu rü natagu naxaunagü. ⁸ Rü yema muxüma ga duüxügü ga nawe rüxixü rü naxchirumaä nayaçhamatanü ga nama. Rü togü rü naixätü ta nadaügü rü yemamaä nayaçhamatanü ga nama. ⁹ Rü yema duüxügü ga napëxegu ägüxü, rü yema togü ga wixweama ägüxü, rü tagaäcü ñanagürügü: —¡Nüxü ticuëxüxügü ya daa äëxgacü ya Dabítanüxü! ¡Rü namecümaxüchi ya daa Tupanaegagu núma ücü! ¡Rü pema rü ta, Pa Daxücüäx, rü nüxü picuëxüxügü ya Tupana! —ñanagürügü. ¹⁰ Rü yexguma Ngechuchu Yerucharéüwa ixücuçgu, rü guxüma ga yema iänecüäx rü nanaxixächiäëgü, rü ñanagürügü: —¿Texe nixü ya daa? —ñanagürügü. ¹¹ Rü yema Ngechuchuwe rüxixü ga duüxügü rü nanangäxügü rü ñanagürügü: —Daa nixü ya Tupanaärü orearü uruü ya Ngechuchu ya Gariréaanewa ngëxmane ya iäne ya Nacharétucüäx ixücü —ñanagürügü.

Ngechuchu rü tupauca ga taxñewa ínanawoxũ ga duũxũgũ ga yéma taxegũxũ

(*Mr 11.15-19; Lc 19.45-48; Cu 2.13-22*)

¹² Rü tupauca ga taxñegu naxücu ga Ngechuchu, rü ínanawoxũ ga yema yéma tacümaã taxegũxũ rü naxcèx taxegũxũ. Rü nanangüegutanü ga norü mechagü ga yema duũxũgũ ga yéma Tupanaarü ämarewa mexü ga dñerumaã taxegũxũ rü muxtucugümaã taxegũxũ. ¹³ Rü ñanagürü nüxü ga yema duũxũgũ: —Tupanaarü ore i ümatüxüwa rü ñanagürü:

“Chopata rü yumüxèpataũ nixĩ”.

Natürü pema rü ngítèèxgüxpataũ peyaxĩxèè —ñanagürü. ¹⁴ Rü yéma tupauca ga taxñewa rü Ngechuchucèx naxĩ ga ñuxre ga ingexetügüxũ rü ichixeparagüxũ. Rü Ngechuchu nanameèxèè. ¹⁵ Natürü ga paigüarü äèxgacügü rü ngúexèèrüügü ga ore ga mugüwa nguxèètaegüxũ, rü nüxü nadaugü ga yema mexügü ga taxügü ga Tupanaarü poramaã naxüxü ga Ngechuchu rü buxügüxũ naxĩnüè ga na ñagüxũ: —¡Namexèchi ya daa äèxgacü ya Ngechuchu ya Dabítanüxü! —ñagüxũ. Rü yemacèx ga yema äèxgacügü rü nanuè. ¹⁶ Rü ñanagürügü Ngechuchuxũ: —¿Nüxü cuxĩnüxü i ngèma buxügü namaã idexagüxü? —ñanagürügü. Rü Ngechuchu nanangãxü, rü ñanagürü: —Ngü, nüxü chaxĩnü. ¿Natürü taguma èxna nawa pengúe i Tupanaarü ore i ümatüxü i ñaxü:

“Rü ngèma buxügü i íraxüchixü rü õxchanagü rü tá ta cuxü nicuèxüügü”, ñaxü? —ñanagürü. ¹⁷ Rü yexguma ga Ngechuchu rü nüxna yéma nixü, rü ñuxüchi ínaxüxü ga guma ñañewa. Rü ñañe ga Betániawa naxü, rü yexma nayape.

Ngechuchu rü orix ga iguera ga ngearü oõxümaã chixexü naxuegu

(*Mr 11.12-14, 20-26*)

¹⁸ Rü moxüãcü ga pèxmama rü yexguma wenaxärü Yerucharéüçèx nataegugu ga Ngechuchu rü nataiya. ¹⁹ Rü namacüwawa nüxü nadau ga wüxi ga orix ga iguera. Rü naxcèx nixü, natürü taxuüma ga norü oxü inayangau, rü naätüxüxícata ma inayangau. Rü yemacèx ñanagürü nüxü ga yema orix: —Rü tagutáma wena cuxox, —ñanagürü. Rü yexgumatama narüñexè ga yema orix. ²⁰ Rü yexguma yemaxü nadaugügu ga norü ngúexügü, rü nabèixächiaëgü. Rü Ngechuchuna nacagüe rü ñanagürügü: —¿Rü ñuxãcü i ñañ orix i paxama nañexèxü? —ñanagürügü. ²¹ Rü Ngechuchu nanangãxü rü ñanagürü: —Aixcüma pemaã nüxü chixu rü ngèxguma chi meã peyaxögügu rü tama ngèma igueramaã chaxüxüxíca chi pexü. Natürü yexeraxü chi pexü. Rü ngèxguma chi daa mëxpünemaã nüxü pixuxgu na yaxügachixüçèx rü taxtü i taxüchiüwa naxüxüçèx, rü pega chi naxĩnü. ²² Rü guxüma i tacü i naxcèx ípèçaxü i perü yumüxèwa, rü tá penayauxgü ega aixcüma peyaxögüãcüma naxcèx ípèçaxgu.

Ngechuchuna nacagüe na texégagu tupauca ga taxñewa nanguxèètaexü

(*Mr 11.27-33; Lc 20.1-8*)

²³ Rü Ngechuchu rü tupauca ga taxñegu naxücu. Rü yexguma yéma ínanguxèètaeyane rü naxcèx naxĩ ga paigüarü äèxgacügü rü Yudiügarü äèxgacügüerügü. Rü Ngechuchuna nacagüe rü ñanagürügü: —¿Rü texégagu nixĩ i cunaxüxü i ngèma núma cuxüxü? ¿Rü texé cuxü tamu na cunaxüxüçèx i ngèma? —ñanagürügü. ²⁴⁻²⁵ Rü Ngechuchu nanangãxü rü ñanagürü: —Choma rü tá ta pexna chaca, rü ngèxguma choxü pengãxügu

i ngēma pexna naxcèx chaçaxũ, rü choma rü tá ta pemaã nüxũ chixu na ngëxũrüüxũ i âëxgacü na choxũ muxũ na nuã changuxëëtaexũ. ¿Rü texé tanamu ga Cuáũ na duũxũgũxũ ínabaiũxëëxüçèx? ¿Pexcèx rü Tupana yĩixũ ga namucü rü êxna duũxũgũmare? —ñanagürü. Rü yexguma ga yema âëxgacügü rü inanaxügüe ga nügümaã na yaporagatanüçüxũ. Rü nügümaãtama ñanagürügü: —¿Ñuxũ ñagügüxũ tá? Erü ngëxguma chi nüxũ ixuxgu na Tupana núma namuxũ rü núma rü tá ñanagürü tüxũ:

“¿Rü tüxcüü ga tama nüxũ peyaxögüxũ?” ñanagürü tá. ²⁶ —Rü ngëxguma chi nüxũ ixuxgu na yatügümare núma namuxũ rü taxcèx rü tá naxãücüma, erü duũxũgü tá tüxũ nadai. Erü nümagü i duũxũgü rü nagu narüxĩnüë na Tupana yĩixũ ga Cuáũxũ núma mucü —ñanagürügü. ²⁷ Rü yemacèx Ngechuchuxũ nangãxũgü rü ñanagürügü: —Tama nüxũ tacüex ga texé núma na namuxũ ga Cuáũ ga baiũxëëruũ —ñanagürügü. Rü yexguma ga Ngechuchu rü ñanagürü nüxũ: —Choma rü tá ta tãütama pemaã nüxũ chixu na texé choxũ muxũ na chanaxüxũ i ngēma choxna naxcèx peçaxũ —ñanagürü.

Ore ga taxre ga nanegügu ixuxũ

²⁸ Rü ñanagürü ta ga Ngechuchu —¿Ñuxũ ñapegüxũ naxcèx i ñaã ore i tá pemaã nüxũ chixuxũ? Rü wüxi ga yatü rü nüxũ nayexma ga taxre ga nane. Rü wüxi ga guma nanemaã nüxũ nixu rü ñanagürü nüxũ:

“Pa Chaunex, chanaxwëxe i yéa chorü ubaarü buxgüwa cuyapuracü”, ñanagürü. ²⁹ —Rü guma nane nanangãxũ rü ñanagürü:

“Choxũ nawèxtümüü na ngema chaxüxũ”, ñanagürü. Natürü ga yixcamaxüra rü nagu narüxĩnü rü düxwa yéma nayapuracü. ³⁰ —Rü yixcúra ga guma nanatü rü naĩ ga nanexütawa naxü, rü yexgumarü ta nüxũ yema ñanagürü. Rü guma nane nanangãxũ rü ñanagürü:

“Marü name, Pa Pa, rü ngema tá chaxü”, ñanagürü. Natürü tama aixcüma yéma naxü. ³¹ —Rü ñuxma chanaxwëxe i chomaã nüxũ pixu rü ngexcürüçüçü ga guma taxre ga nane ga aixcüma naxüçü ga yema nanatü naxwëxexũ —ñanagürü. Rü nümagü nanangãxũgü rü ñanagürügü: —Ga guma nüxĩra namuãcü nixĩ ga naga ñnüçü —ñanagürügü. Rü yexguma ga Ngechuchu rü ñanagürü nüxũ: —Aixcüma pemaã nüxũ chixu rü ngēma yatügü i Dumaãrü âëxgacüçèx dïëru ngĩxũ dexũ rü ngēma ngexügü i chixri maxëxũ tá nixĩ i pexüpa nüxĩra ichocuxũ i ngextá Tupana âëxgacü íixĩxüwa. ³² —Yerü Cuáũ ga baiũxëëruũ rü núma naxü na pemaã nüxũ yaxuxüçèx na ñuxãcü tá na pemaxëxũ, natürü ga pema rü tama nüxũ peyaxögü. Natürü ga yema yatügü ga Dumaãrü âëxgacüçèx dïëru ngĩxũ dexũ rü yema ngexügü ga chixri maxëxũ rü Cuáũãxũ nayaxögü. Natürü ga pema rü woo nüxũ na pedaugüxũ ga ñuxãcü na yaxögüãxũ, rü tama nüxũ perüxoechaũ i pecüma i chixexũ na peyaxögüxüçèx —ñanagürü.

Ore ga chixexũ ga puracütanüxũgu ixuxũ

(Mr 12.1-12; Lc 20.9-19)

³³ Rü ñanagürü ta ga Ngechuchu: —Rü chanaxwëxe i iperüxĩnüë i ñaã to i ore i cuëxruũ i tá pemaã nüxũ chixuxũ. Rü nayexma ga wüxi ga yatü ga nüxũ nayexmacü ga wüxi ga norü naãne. Rü yexma nanato ga muxüma ga orix ga uba. Rü ñuxüchi ínanapoxegu, rü nanaxü ga wüxi ga ubaarü yaxtũüxüchica rü wüxi ga dauxütaechica. Rü ñuxüchi ñuxre ga puracütanüxüna nüxũ nadauxëë. Rü namaã nanamexëë na ngãxũgu namaã ngĩxũ yatoyexüçèx ga yema ubatanü. Rü ñuxüchi

ga yema naãneãrũ yora rũ wũxi ga to ga nachiuãne ga yaxũguxũwa naxũ. ³⁴ —Rũ yexguma norũ ubaarũ buxgũwa nanguxgu, rũ yema naãneãrũ yora rũ yema nanamugũ ga ñuxre ga norũ duũxũgũ na yema puracũtanũxũna ngĩxcẽx yaçaxũcẽx ga yema ubatanũ ga nũxna ũcũ. ³⁵ Natũrũ ga yema puracũtanũxũgũ rũ ínanayauxũ ga yema coriarũ duũxũgũ. Rũ nanaçuaixgũ ga wũxi, rũ ga to rũ nayamẽxũchigũ, rũ ga yema to rũ nutamaã ínanamuxũchigũ. ³⁶ —Rũ yema naãneãrũ yora rũ wenaxãrũ noxriarũ yexera rũmumaẽxũ ga norũ duũxũgũ yema namugũ. Natũrũ ga yema puracũtanũxũgũ rũ yema togũrũũtama chixri namaã nachopetũ. ³⁷ —Rũ dũxwa ga yema naãneãrũ yora rũ yema nanexũchixũ namu yerũ nũma nagu naxĩnũgu rũ chi nanega naxĩnũe ga yema puracũtanũxũgũ. ³⁸ —Natũrũ yexguma yema cori nanexũ nadaugũgu ga yema puracũtanũxũgũ, rũ nũgũmaã ñanagũrũgũ:

“Ngẽmaãrũ tá nixĩ i ñaã naãne i yixcama. ¡Rũ ngĩxã tayamẽxgũ na tóxrũ yĩixũcẽx!” ñanagũrũgũ. ³⁹ —Rũ nayayauxgũ, rũ toxnama nanagagũ, rũ yexma nayamẽxgũ —ñanagũrũ. ⁴⁰ Rũ yexguma ga Ngechuchu rũ yema paigũarũ ãẽxgacũgũna naca rũ ñanagũrũ: —¿Rũ ngẽxguma ínanguxgu i ngẽma naãneãrũ yora, rũ tacũ tá yema puracũtanũxũmaã naxũ? —ñanagũrũ. ⁴¹ Rũ yema ãẽxgacũgũ rũ Ngechuchuxũ nangãxũgũ, rũ ñanagũrũgũ: —Ngẽma naãneãrũ yora rũ tama nũxũ nangechaũtũmũũãcũma tá nanadai i ngẽma puracũtanũxũgũ i chixri maxẽxũ. Rũ ñuxũchi togũ i puracũtanũxũgũ i meã namaã ngĩxũ itoyexũ i dĩeruna tá nũxũ nadauxẽẽ —ñanagũrũgũ. ⁴² Rũ Ngechuchu rũ ñanagũrũ nũxũ: —¿Taguma ãxna nawa pengũe i Tupanaãrũ ore i ũmatũxũ? Erũ ngẽmawa rũ ñanagũrũ:

“Rũ yima nuta ya mecũ ya íãrũ ũruũgũ nũxũ oechirẽcũ rũ ñuxma rũ yimatama nixĩ ya Tupana nũxĩra yaxũcuchicũ na namaã inaxũgũãxũcẽx ya ípata. Rũ tóru Cori ya Tupana nixĩ ga naxũcũ ga yema, rũ ñuxma rũ namexẽchi i taxcẽx”,

ñanagũrũ i ngẽma ore. ⁴³ —Rũ ngẽmacẽx pemaã nũxũ chixu rũ woo pexcẽxchirẽx na yĩixũ i ngẽma naãne i ngextã Tupana ãẽxgacũ íixĩxũwa, natũrũ pexna tá nanapũ. Rũ togũ i duũxũgũ i aixcũma Tupanaga ñnũẽxũna tá nanaxã. ⁴⁴ —Rũ yima nuta ega texé namaã yarũñaxgu rũ tá itapoũgũ. Rũ yixema tũmaetũgu nanguxe ya yima nuta, rũ tá tũxũ niñãixmũ —ñanagũrũ ga Ngechuchu. ⁴⁵ Rũ yexguma ga paigũarũ ãẽxgacũgũ rũ Parichẽugũ nũxũ ñnũẽgu ga yema ore ga cuẽxruũ ga Ngechuchu namaã nũxũ ixuxũ, rũ nũxũ nicuẽxãchitanũ ga nachiga na yĩixũ ga yema ore. ⁴⁶ Rũ yexgumatama ga yema ãẽxgacũgũ rũ Ngechuchuxũ niyauxgũega. Natũrũ taxucũrũwama nayayauxgũ yerũ duũxũgũxũ namuũẽ, yerũ nũmagũ ga duũxũgũ rũ nayaxõgũ ga aixcũma Tupanaãrũ orearũ uruũ na yĩixũ ga Ngechuchu.

22

*Ore ga ngĩgũarũ petagu ixuxũ
(Lc 14.15-24)*

¹ Rũ Ngechuchu rũ wenaxãrũ nanangũexẽẽ. Rũ ore ga cuẽxruũgu namaã nayaxu, rũ ñanagũrũ nũxũ: ²—Rũ ngẽma Tupana na ãẽxgacũ íixĩxũ rũ ñoma wũxi ga nachiuãneãrũ ãẽxgacũ ga naneãrũ ngĩgũ ũchiũcũrũũ nixĩ. ³ —Rũ norũ duũxũgũxũ namu na naxcẽx yaçaxũcẽx ga yema duũxũgũ ga marũ ũpaacũ nũxna naxuxũ. Natũrũ yema duũxũgũ ga

marü nüxna naxuchiréxü rü tama yéma naxixchaü. ⁴—Rü wenaxärü togü ga norü duüxügüxü yéma namugü. Rü ñanagürü nüxü:

“iNgema pexi naxütawa i ngéma duüxügü i nüxna chaxuchiréxü, rü namaã nüxü peyaxü rü marü íname i chorü òna i taxü. Rü marü chanadai i chorü wocagü i ingüexü rü guxüma marü ínamemare. Rü chanaxwèxe i paxa nuã naxí naxcèx i ñaã chorü peta!” ñanagürü. ⁵—Natürü yema duüxügü ga nüxna naxuchiréxü rü tama naga naxínüë. Rü wüxi rü naãnewa naxü, rü ga to rü norü taxepataüwa naxü. ⁶—Rü ga togü rü yema ãëxgacüarü duüxügüxü ínayauxü rü nayaçuaixgü ñuxmata nayuxëëã. ⁷—Rü yexguma ga guma ãëxgacü rü poraãcü nanu. Rü norü churaragüxü yéma namugü na yadaiãxüçèx ga yema duüxügü ga máëtagüxü, rü na yagugüãxüçèx ga guma norü íãne. ⁸—Rü ñuxüchi ñanagürü nüxü ga norü duüxügü:

“Guxüma i chorü peta rü marü ínamemare. Natürü ga yema duüxügü ga nüxna chaxuchiréxü rü woetama nüxü chaxo na nuã naxíxüçèx. ⁹—iRü yéa taxü i ítamüwa pexi, rü nüxna peyaxu i guxü i duüxügü i ngema nüxü pedauxü, na núma chorü petawa naxíxüçèx!” ñanagürü. ¹⁰—Rü yema ãëxgacüarü duüxügü rü yéma ítamüwa naxí. Rü nüxna nixuetanü ga guxüma ga duüxügü ga mexügü rü chixexügü ga nüxü iyangaugüxü. Rü yemaãcü duüxügümaã nanapa ga guma ãëxgacüpata. ¹¹—Rü yexguma ga guma ãëxgacü rü nixücu nawa ga yema ucapu ga nawa peta naxüxü, yerü ínayadau ga yema duüxügü ga nüxna naxuxü. Natürü yéma nüxü nadau ga wüxi ga yatü ga tama norü ngèxãëchirugu icüxü. ¹²—Rü ñanagürü nüxü:

“Pa Chomüçix çñuxãcü i nuxã cuxüçuxü na tama curü ngèxãëchirugu quicüxü?” ñanagürü. Natürü núma ga yema yatü rü nangeëxmare. ¹³—Rü yexguma ga guma ãëxgacü rü ñanagürü nüxü ga yema norü duüxügü:

“iMeã peyanëixpara rü peyanëixchacüügü i ñaã yatü, rü yéama düxétüwa i poraãcü ínaxëänexüwa peyatá! Rü ngema tá narüdoxü rü tá nixüxchapüta erü poraãcü tá nüxü nangux”, ñanagürü. ¹⁴—Rü Tupana rü muxüchiena naxu, natürü noxretama tixi ya yíxema aixcüma Tupana tüxü ndexe —ñanagürü ga Ngechuchu.

Dïeru i ãëxgacüna ngxü ixãcüchiga

(Mr 12.13-17; Lc 20.20-26)

¹⁵ Rü yexguma ga Parichéugü rü nixígachi. Rü noxrüwama nügümaã nayamexëëgü na tacü rü oremaã tá Ngechuchuna nacagüexüçèx na chixexügu nanguxëëgüãxüçèx rü ñuxüchi ãëxgacüxütawa na ínaxuaxügüãxüçèx. ¹⁶ Rü yemacèx Ngechuchuxütawa nanamugü ga ñuxre ga norü duüxügü namaã ga ñuxre ga Erodearü duüxügü na yema oremaã Ngechuchuna na yacagüexüçèx. Rü yexguma Ngechuchuxütawa nangugügu rü ñanagürügü: —Pa Ngüexëëruüx, nüxü tacuèx rü aixcüma nixi i ngéma nüxü quixuxü i curü ore. Rü aixcüma cunangüexëë i duüxügü na Tupana naxwèxexüãcüma namaxëxüçèx. Rü tama duüxügügamare cuxínü, erü tama norü düxétüxünegu cudawenü, natürü nacüma nixi i cungugüxü. ¹⁷—iRü tomaã nüxü ixu! rü ngéma dïeru ya ãëxgacü ya tacü ya Dumacüãx totanüwa yayauxchaüxü, çrü namexü yíxü na nüxna ngíxü taxãxü rü éxna tama? —ñanagürügü. ¹⁸ Natürü Ngechuchu nüxü nacüexama na chixexügu naxínüëxü ga yema duüxügü, rü yemacèx ñanagürü nüxü: —Pema nixi i togüpëxewa meã pemaxënetaxü, natürü peãëwa rü chixexügu perüxínüë. çRü tüxcüü i

chixexũgu choxũ penguxẽẽchaũxũ? ¹⁹—jChoxũ ngĩxũ pewé i wũxi i dĩeru i ngĩmaã ãẽxgacũaxũ penaxũtanũcũ! —ñanagũrũ. Rũ yema naxũtawa ngĩxũ nangegũ ga wũxitachinũ ga yema dĩeru. ²⁰ Rũ yexguma Ngechucha ngĩxũ dẽuxgu, rũ nũxna naca, rũ ñanagũrũ —jRũ texẽchicũnẽxã rũ texeéga nixĩ i ngĩgu ũxũ? —ñanagũrũ. ²¹ Rũ nũmagũ nanangãxũgũ, rũ ñanagũrũgũ: —Dumacũñax ya ãẽxgacũ ya tacũchicũnẽxã nixĩ —ñanagũrũgũ. Rũ yexguma ga Ngechucha rũ ñanagũrũ nũxũ: —jãẽxgacũna ngĩxũ pexã i ngẽma ãẽxgacũarũ ixĩcũ, rũ Tupanana ngĩxũ pexã i ngẽma Tupanaãrũ ixĩcũ! —ñanagũrũ. ²² Rũ yexguma yema orexũ naxĩnũẽgu, rũ nabẽixãchiãẽgũ. Rũ Ngechuchuna inixĩ.

*Ngechuchuna nacagũe rũ ngoxi yuwa ínadaqũ i duĩxũgũ
(Mr 12.18-27; Lc 20.27-40)*

²³ Rũ yematama ngunexũgu rũ ñuxre ga Chaduchéugũ rũ Ngechuchuxũtawa naxĩ. Rũ nũmagũ nixĩ ga nagu naxĩnũẽxũ na yuexũ rũ tagutáma wena namaxẽxũ. Rũ yemacẽx Ngechuchuna nacagũe, rũ ñanagũrũgũ: ²⁴ —Pa Ngúexẽẽruũx, Moĩché nũxũ ixuxgu rũ ngẽxguma wũxi ya yatũ naxãmẽx rũ nangexacũyane nayuxgu, rũ name nixĩ i naẽneetama ngĩmaã naxãmẽx i ngẽma yutecũ i naxũmẽx, na ngẽmaãcũ naxãxãcũxũcẽx nũxũ ya yima naẽneẽ ya marũ yucũ —ñanagũrũ ga yema ore. ²⁵ Rũ ñanagũrũgũ ta ga Chaduchéugũ: —Nayexma ga totanũwa ga 7 ga nũgũeneẽ. Rũ naxãmẽx ga guma yacũ, natũrũ tauta naxãxãcũyane nayu. Rũ yexguma ga naĩ ga naẽneẽ nũxĩ ngĩmaã naxãmẽx ga yema ngecũ. ²⁶ —Rũ guma rũ ta nayu, rũ nangexacũ. Rũ yexguma rũ naĩ ga naẽneẽ nũxĩ ngĩmaã naxãmẽx. Rũ yemaãcũ gucũma ga guma 7 ga nũgũeneẽ rũ ngĩmaã naxãmẽx ga yema nge. Rũ gucũma nayue tauta naxãxãcũyane. ²⁷ —Rũ yemawena rũ ngĩma rũ ta iyu ga yema nge. ²⁸ —Rũ ngẽxguma yuexũ wena maxẽgu, jũrũ ngexcũrũcũ ga guma 7 ga nũgũeneẽ naxmẽx tá iyixĩ i ngẽma nge? Yerũ gucũma ga guma 7 ga nũgũeneẽ ngĩmaã naxãmẽx —ñanagũrũgũ. ²⁹ Rũ yexguma ga Ngechucha rũ nanangãxũ, rũ ñanagũrũ: —Pema rũ ípetũe erũ tama nũxũ pecuèx i Tupanaãrũ ore i ũmatũxũ, rũ tama nũxũ pecuèx i ñuxãcũ na yĩxũ i Tupanaarũ pora. ³⁰ —Rũ ngẽxguma yuexũ wena maxẽgu rũ taxũetáma tixãmẽxgũ rũ ěxna tixãtegũ. Erũ daxũcũñax i Tupanaãrũ orearũ ngeruũgũrũũ tá tixĩgũ i ngẽxguma. ³¹ —Pema choxna peca i yuexũãrũ dagũchiga. jNatũrũ tama ěxna nawa pengũe i Tupanaãrũ ore i ũmatũxũ i ngextã Tupanatama ngẽmachigaxũ pemaã íyaxuxũwa? Erũ ngẽma rũ ñanagũrũ ya Tupana: ³² “Choma nixĩ i Abrãũãrũ Tupana, rũ Ichaãarũ Tupana, rũ Acobuarũ Tupana”, ñanagũrũ. Rũ ngẽma orewa nũxũ tacuèx rũ woo ñoma i naãnewa nayuegu i duĩxũgũ, natũrũ Tupanaarũ inũwa rũ guxũguma namaxẽ —ñanagũrũ ga Ngechucha. ³³ Rũ yexguma yemaxũ naxĩnũẽgu ga duĩxũgũ, rũ guxũma nabẽixãchiãẽgũ namaã ga norũ nguxẽẽtae ga Ngechucha.

*Ngẽma Tupanaãrũ mu i guxũ i norũ mugũarũ yexera ixĩxũ
(Mr 12.28-34)*

³⁴ Rũ nangutaguẽxegũ ga Parichéugũ ga yexguma nũxũ naxĩnũẽgu ga ñuxãcũ Ngechucha rũ yema Chaduchéugũxũ na iyanangeẽxgũxẽẽxũ. ³⁵ Rũ wũxi ga yema Parichéugũ ga ore ga mugũwa nguxẽẽtaexũ rũ Ngechuchuxũ chixexũgu nanguxẽẽchaũ. Rũ yemacẽx Ngechuchuna naca rũ ñanagũrũ: ³⁶ —Pa Ngúexẽẽruũx, jngẽxũrũũx i Tupanaãrũ mu

nixĩ i guxũ i norũ mugũarũ yexera ixĩxũ? —ñanagũrũ. ³⁷ Rũ Ngechuchu nanangãxũ rũ ñanagũrũ: —Ngẽma Tupanaãrũ mu i guxũ i norũ mugũarũ yexera ixĩxũ, rũ ñanagũrũ:

“¡Rũ nüxũ nangechaũ ya Cori ya curũ Tupana i guxũne ya curũ maxũnemaã, rũ guxũ i cuãẽmaã, rũ guxũ i nagu curũxĩnũxũmaã!” ñanagũrũ. ³⁸ —Rũ ngẽma nixĩ i Tupanaãrũ mu i guxũ i norũ mugũarũ yexera ixĩxũ. Rũ ngẽma nixĩ i nüxĩraũxũ i norũ mu ga duũxũgũna naxãxũ ga Tupana. ³⁹ —Rũ ngẽma norũ taxre i Tupanaãrũ mu, rũ ngẽma nüxĩraũxũ i norũ murũõtama nixĩ, rũ ñanagũrũ:

“¡Nüxũ nangechaũ i cumücü ngẽma na cugũ cungechaũxũrũ!” ñanagũrũ. ⁴⁰ —Rũ ngẽma taxre i Tupanaãrũ mugũwa nixĩ inaxũgũxũ i guxũma i Tupanaãrũ mugũ ga Moĩché ũmatũxũ rũ nuxcũmaũgũxũ ga Tupanaãrũ orearũ uruũgũ namaã nguxẽẽtaegũxũ —ñanagũrũ.

¿Texétaa yĩxũ ya Cristu?

(Mr 12.35-37; Lc 20.41-44)

⁴¹⁻⁴² Rũ yoxni ga Parichéugũ rũ yéma nangutaquẽxegũ, rũ Ngechuchu nüxna naca, rũ ñanagũrũ: —¿Rũ ñuxũ ñapegũxũ i pema nüxũ ya Cristu? ¿Rũ texétaa yĩxũ? —ñanagũrũ. Rũ nümagũ ga Parichéugũ rũ nanangãxũgũ rũ ñanagũrũgũ: —Cristu rũ nuxcũmaũcü ga ãẽxgacũ ga Dabítaa nixĩ —ñanagũrũgũ. ⁴³ Rũ yexguma ga Ngechuchu rũ ñanagũrũ: —¿Tũxcũũ ga Dabĩ ga norũ Corimaã naxuaxũ ga Cristu ga yexguma Tupanaãẽ ga Ũnẽxũ Dabĩxũ idexaxẽẽgu? Yerũ ga Dabĩ rũ ñanagũrũ:

⁴⁴ “Tupana rũ chorũ Cori ya Cristuxũ ñanagũrũ: ‘¡Nuã chorũ tũgũnecũwawa rũto ñuxmatáta nüxũ charũporamaẽ i curũ uwanũgũ na cuga naxĩnũẽxũcèx!’ ” ⁴⁵ —Natürũ ¿ñuxũcürũwa i Dabítaa yĩxũ ya Cristu ega nümatama ga Dabĩ rũ norũ Corimaã naxuãgu? —ñanagũrũ ga Ngechuchu. ⁴⁶ Rũ taxumaãma nanangãxũgũgẽga ga yema Parichéugũ, rũ bai ga wũxi ga oremaã. Rũ yemawena rũ guxũma namuũẽ na ñacũcèx Ngechuchuna nacagũexũ.

23

Ngechuchu rũ duũxũgũtanũwa ínanaxuaxũ ga Parichéugũ rũ ngũexẽẽruũgũ ga Moĩchéarũ mugũwa nguxẽẽtaegũxũ

(Mr 12.38-40; Lc 11.37-54, 20.45-47)

¹ Rũ yemawena ga Ngechuchu rũ duũxũgũxũ rũ norũ ngũexũgũxũ ñanagũrũ: ² —Ngẽma ngũexẽẽruũgũ i ore i mugũwa nguxẽẽtaegũxũ rũ Parichéugũ, rũ meãma nüxũ nacuèxgũ ga Tupanaãrũ ore ga Moĩché ũmatũxũ. ³ —Rũ ngẽmacèx name i naga pexĩnüẽ i guxũma i ngẽma pemaã nüxũ yaxugũxũ. Natürũ tama name i nüma namaxẽxũãcũma pemaxẽ, erũ nüma nüxũ nixugũ i mexũ i ore natürũ chixri namaxẽ. ⁴ —Erũ nüma rũ poraãcü pexũ namu na naga pexĩnũẽxũcèx i norũ mugũ i guxchaxũ i taxucürũwama texé aurexũ. Natürũ nümagũtama rũ bai i írarũwa naga na naxĩnũẽxũ i ngẽma nawa pexũ namuxũ. ⁵ —Rũ guxũma i ngẽma naxũgũxũ, rũ nanaxũgũ na duũxũgũ nüxũ daugũxũcèx. Rũ ina-yangegũ i Tupanaãrũ ore na ngẽmaãcü duũxũgũ nagu rũxĩnũẽgu rũ aixcũma Tupanaãrũ duũxũgũ na yĩgũxũ. Rũ nügũ nangexãẽgũ na duũxũgũ nüxũ rũdaunũxũcèx. ⁶ —Rũ petagũarũ õnawa rũ nümagũ i Parichéugũ rũ nanaxwèxegũ i õnaãrũ yoraxũtawaxũchi na natogũxũ na duũxũgũ ngẽma nüxũ rũdaunũxũcèx. Rũ ngutaquẽxepataũgũwa rũ nanaxwèxegũ

na napêxewaxüchi ügüxü i naxmêxwêxegüwa natogüxü. ⁷—Rü ñãneärü ítamügüwa rü nanaxwêxegü na duüxügü meã nüxü rümoxêgüxü ñoma âêxgacüxü meã rümoxêxürüü. Rü nanaxwêxegü na duüxügü rü: “Pa Ngúexêeruüx” ñagüxü nüxü. ⁸—Natürü pema rü pegüeneêgü pixîgü, rü wüxixicatama nixî ya perü ngúexêëruü ixîcü. ⁹—Rü tama name i ñoma i naãnecüâxmaã pexãnatü, erü wüxixicatama nixî ya Penatü, rü nüma rü daxüwa nangêxma. ¹⁰—Rü tama name i texé: “Pa Âêxgacüx” ñatarügü pexü. Erü chaxicatama nixî i perü âêxgacü chiïxü. ¹¹—Rü yíxema petanüwa guxãärü yexera ixîxê rü tanaxwêxe na guxüma i tümamücüarü ngüxêëruü tiïxü. ¹²—Erü yíxema tügü írütaxe rü Tupana tá tüxü naxãnexêë. Natürü yíxema tügü írúxíraxe, rü Tupana tá tüxü nicuêxüü. ¹³—Pa Ngúexêëruügü i Ore i Mugüwa Ngüxêëtaegüxü rü Pa Parichêügüx, pema nixî i togü i duüxügüpêxewa meã pemaxênetaxü natürü peãëwa rü chixexügu perüxîñüêxü. Rü wüxi i ngechaü nixî i pexcêx erü pegagu nixî na tama Tupanaxütawa nangugüxü i togü i duüxügü. Rü pema rü ta rü täütama ngêxma pechocu, Rü ngêxgumarüü ta rü nüxü penaguxchaxêë na tama ngêxma nachocuxücêx i togü i ngêxma chocuchaüxü. ¹⁴—Pa Ngúexêëruügü i Ore i Mugüwa Ngüxêëtaegüxü rü Pa Parichêügüx, pema nixî i togü i duüxügüpêxewa meã pemaxênetaxü natürü peãëwa rü chixexügu perüxîñüêxü. Rü wüxi i ngechaü nixî i pexcêx erü tüxna penapuxü ya tümapata ya yíxema yutegüxe. Rü ñuxüchi penamêxêë i perü yumüxêgü na duüxügü nagu rüxîñüêgu rü aixcüma mexü i Tupanaärü duüxügü na pixîgüxü. Rü ngêmacêx pema tá nixî i togü i duüxügüarü yexera pepoxcuexü. ¹⁵—Pa Ngúexêëruügü i Ore i Mugüwa Ngüxêëtaegüxü rü Pa Parichêügüx, pema nixî i togü i duüxügüpêxewa meã pemaxênetaxü natürü peãëwa rü chixexügu perüxîñüêxü. Rü wüxi i ngechaü nixî i pexcêx erü guxüwama pexî na togü i duüxügümaã nüxü peyarüxuxücêx i ore na wüxitama ya duüxê pexrüü na yaxôxücêx. Rü ngêxguma marü pexü tanguüxgu, rü tüxü pechixexêë na düxwa taxreëxpüxcüna perü yexera chixexüwa tangêxmaxücêx. ¹⁶—Pa Ngúexêëruügü i Ore i Mugüwa Ngüxêëtaegüxü rü Pa Parichêügüx, pema rü ñoma cuëxruügü i ngxetüxürüü pixîgü. Rü wüxi i ngechaü nixî i pexcêx, erü nüxü pixuxgu rü:

“Ngêxguma texé ya tupauca ya taxüneegagu ñacücêx ixunetagu, rü marü name ega tama tayanguxêëgu i ngêma tümäärü uneta”, ñaperügügü. Natürü ngêxguma texé tupauca ya taxüneärü dïëruégagu ñacücêx ixunetagu, rü:

“Tanaxwêxe i aixcüma tayanguxêë i ngêma tümäärü uneta”, ñaperügügü. ¹⁷—Pema rü pengêãêgü rü ñoma pengexetügüxürüü pixîgü. ¿Pexcêx rü ñacü nixî i yexera rümemaêxü, tupauca ya taxüneärü dïëru rü êxna nümatama ya tupauca ya nagagu naxüünene i ngêma dïëru? ¹⁸—Rü tupauca ya taxünewa nangêxma i ngêma ãmarechica i ngexta Tupanacêx ínadaiaxüwa i naxüñagü na Tupanana naxãmarexücêx. Rü pema rü ñaperügügü:

“Rü ngêxguma texé ya tupauca ya taxüneärü ãmarechicaégagu ñacücêx ixunetagu, rü marü name ega tama tayanguxêëgu i ngêma tümäärü uneta. Natürü ngêxguma texé tupauca ya taxüneärü ãmarechicawa ngêxmaxü i ãmareégagu ñacücêx ixunetagu, rü tanaxwêxe i aixcüma tayan-guxêë i ngêma tümäärü uneta”, ñaperügügü. ¹⁹—Pema rü pengêãêgü rü ñoma pengexetügüxürüü pixîgü. ¿Pexcêx rü ñacü nixî i yexera

rümemaëxũ, rü yima tupauca ya taxũneârũ ãmarechicawa ngëxmaxũ i ãmare rü êxna nũmatama ya tupauca ya taxũneârũ ãmarechica i nagagu naxũunexũ i ngëma ãmare? ²⁰ —Erũ yixema tupauca ya taxũneârũ ãmarechicaégagu tacũcëx ixunetaxe, rü tama ngëma nachicaégaguxicatama itaxuneta, natürũ ngëma ãmare i ngëma nachicawa ngëxmaxũégagu rü ta itaxuneta. ²¹ —Rü yixema tupauca ya taxũneégagu tacũcëx ixunetaxe, rü tama ngëma tupaucaégaguxicatama itaxuneta, natürũ Tupana ya ngëma maxũcüégagu rü ta itaxuneta. ²² Rü yixema daxũguxũ i naãneégagu tacũcëx ixunetaxe, rü Tupanaârũ toruüégagu rü ta itaxuneta, rü ngëxgumarũ ta Tupana ya ngëma rütocüégagu rü ta itaxuneta. ²³ —Pa Ngüexêëruügu i Ore i Mugüwa Nguxêëtaegũxũ rü Pa Parichéugũx, pema nixĩ i togü i duũxũgüpëxewa meã pemaxënetaxũ, natürũ peãewa rü chixexũgu perũxĩnũëxũ. Rü wüxi i ngechaũ nixĩ i pexcëx, erũ woo tacü i íraxũ i pexũ ngëxmaxũ rü Tupanana penaxã i ngëma nũxna üxũ. Natürũ tama naga pexĩnũë i Tupanaârũ mugü i guxũ i mugüarũ yexera ixĩxũ. Erũ pexũ nataxu na ãëxgacügü i aixcũma meãma duũxũgümaã icuëxgũxũ na pixĩgũxũ, rü pexũ nataxu na duũxũgü pexũ nangechaũtũmũüxũ, rü aixcũma meã Tupanamaã pixaixcũmagũxũ. Rü guxũma i ngëma nixĩ i Tupana naxwëxexũ na penaxũxũ, tama nũxũ ipeyarüngümaëãcũma i ngëma mexũ i marũ pexũxũ. ²⁴ —Pa Cuëxruügu i Ngexetügũxũx, pema rü guxũma i mugü i woo íraxũchixũ rü meãma penaxaure, natürũ tama Tupana naxwëxexũãcũma pemaxë. Pema rü ñoma wüxi i duũxũ i tunücëx norü axexũ bapetũxũ rü ñuxũchi arũ wüxi i cameyu ixaxwetaũxũrũü pixĩgü. ²⁵ —Pa Ngüexêëruügu i Ore i Mugüwa Nguxêëtaegũxũ rü Pa Parichéugũx, pema nixĩ i togü i duũxũgüpëxewa meã pemaxënetaxũ natürũ peãewa rü chixexũgu perũxĩnũëxũ. Rü wüxi i ngechaũ nixĩ i pexcëx, erũ perũ düxëtũxũnewaxicatama pegü pemexêëchaũ, natürũ perũ maxũwa rü poraãcü pichixe. Erũ penawomüxêëãcũma poraãcü naxcëx pengĩx i duũxũgüarũ ngëmaxũgü, rü pegüguxicatama perũxĩnũë. ²⁶ —Pa Parichéugü i Ñoma Ngexetũxũrũü Ixĩgũxũx, name nixĩ i pegü pimexêë i perũ aixepewa i perũ maxũwa. Rü ngëxguma tá nixĩ i perũ düxëtüwa rü tá ta pimexũ. ²⁷⁻²⁸ —Pa Ngüexêëruügu i Ore i Mugüwa Nguxêëtaegũxũ rü Pa Parichéugũx, pema nixĩ i togü i duũxũgüpëxewa meã pemaxënetaxũ natürũ peãewa rü chixexũgu perũxĩnũëxũ. Rü wüxi i ngechaũ nixĩ i pexcëx, erũ ñoma yuetachiquëxegü i düxëtüwa cómxũmaã chauxetügũxũ natürũ aixepewa rü yuetachinaxãmaã rü nagũxũraũxũ i ãũãchixũmaã napagũxũrũü pixĩgü. Erũ perũ düxëtüwa i duũxũgü nũxũ ídaugũxũwaxicatama pime, natürũ aixepewa i peãewa rü poraãcü pichixe. ²⁹ —Rü wüxi i ngechaũ nixĩ i pexcëx, Pa Ngüexêëruügu i Ore i Mugüwa Nguxêëtaegũxũ rü Pa Parichéugũx. Pema rü peyamecagü ga naxchiquëxegü ga nuxcũmaũgũxũ ga Tupanaârũ orearũ uruügu rü yema duũxũgü ga imexũ ga yuexũ. ³⁰ —Rü ñuxũchi ñaperüggü:

“Rü yexguma chi nuxcũmaũgũxũ ga tórü oxigü maxëyane imaxëgu, rü tãũ chima nũxũ tarüngũxêë ga na nadaiãxũ ga yema nuxcũmaũgũxũ ga Tupanaârũ orearũ uruügu”, ñaperüggü. ³¹ —Rü ngëma oremaã rü pegü pengoxêë na nataagü pixĩgũxũ ga yema duũxũgü ga nuxcũmaũgũxũ ga Tupanaârũ orearũ uruüggüxũ dëixũ. ³² —¡Ëcü, noxtacũma chomaã rü ta peyanguxêëx ga yema chixexũ ga nuxcũmaũgũxũ ga perũ oxigü ügüexũ! ³³ —Pa Æxtapearũ Duũxũgũx, pema rü poraãcü pichixe. ¿Ñuxãcü tá naxchaxwa pibuxmü ya yima üxü ya Tupana tá namaã pexũ poxcuene? ³⁴ —

Rü ngēmacèx i choma rü tá pexcèx núma chanamugü i Tupanaärü orearü uruügü, rü yatügü i mexügü i nüxü cuèxüchigüxü, rü ngüxèëruügü i mexügü. Natürü pema rü tá curuchawa peyapotaügücuma penadai i ñuxre. Rü togü rü ngutaquèxepataügüwa rü tá peyacuaxgü, rü togü rü ñānechigüwa rü tá nawe pingèxütanü na chixexü namaā pexügüxücèx. ³⁵—Natürü Tupana tá pexü napoxcue naxcèx i guxüma ga norü duüxügü ga imexügü ga perü oxigü dèixü. Rü Abéwa nixi ga inaxügüāxü ga na nadaiāxü rü Chacaría ga tupauca ga taxünegu peyamèxgücügu nixi ga yacuāxü ga yema. ³⁶—Rü aixcüma pemaā nüxü chixu rü guxüma ga yema chixexücèx rü Tupana tá nanapoxcue i duüxügü i ñomaücüü maxèxü —ñanagürü ga Ngechuchu.

*Ngechuchu rü Yerucharéücüāx ga duüxügücèx naxaxu
(Lc 13.34-35)*

³⁷ Rü ñanagürü ta ga Ngechuchu: —Pa Yerucharéücüāx, pema penadai i Tupanaärü orearü uruügü, rü nutamaā ípenamuxüchigü i Tupanaärü orearü ngeruügü i pexcèx núma namugüxü. Rü ñuxreëxpüxcüna wüxigu chaugüxüttagu pexü chanutaquèxexèëchaü ñoma wüxi i ota i naxācüxā nügütüügu tüxü nutaquèxexürüü. Natürü pema rü tama penaxwèxe. ³⁸—Dücèx i ñuxma ya perü ñāne, rü Tupana tá ínanatèx. ³⁹—Rü pemaā nüxü chixu rü tāütáma wena choxü pedau ñuxmatáta daxügüxü i naānewa ne chaxü. Rü ngèxguma rü tá choxü pedaugü rü tá ñaperügügü:

“Namexèchi nixi ya yima Cori ya Tupana núma namucü”, ñaperügügü tá —ñanagürü ga Ngechuchu.

24

*Ngechuchu nanaxunagü na tupauca ga taxüne rü tá nagu na napogüexü
(Mr 13.1-2; Lc 21.5-6)*

¹ Rü yexguma tupauca ga taxünewa ínaxüüxgu ga Ngechuchu, rü norü ngüxèügü naxcèx naxi. Rü ñanagürügü nüxü: —Dücèx, Pa Corix, ñuxācü nimexèchi ya daa tupauca ya taxüneärü ípatagü —ñanagürügü. ² Natürü Ngechuchu nanangāxü rü ñanagürü: —Pema nüxü pedaugü ya guxünema ya yima tupauca ya taxüneärü ípatagü. Natürü pemaā nüxü chixu rü aixcüma guxünema ya daa ípatagü rü tá nagu napogüe. Rü naxtapüxaru nutagü rü taxucütáma nügüetü naxüxüra, rü bai ya wüxi —ñanagürü.

*Cuèxruügü i tá nüxü idauxü naxüpa na nagüxü i naāne
(Mr 13.3-23; Lc 17.22-24, 21.7-24)*

³ Rü ñuxüchi guma Mèxpüne ga Oríbunecügu āeganewa naxi. Rü yexguma guma mèxpünewa natoxgu ga Ngechuchu rü norü ngüxügüxícatama naxütawa naxi na noxrüwama nüxna nacagüexücèx. Rü ñanagürügü: —Tanaxwèxe i tomaā nüxü quixu na ñuxgu tá nangupetüxü i ngēma nüxü quixuxü. ¿Rü tacü tá nixi i norü cuèxruü i nawa nüxü tacuāxü i ñuxgu tá wena núma na cuxüxü rü tá na nagüxü i naāne? —ñanagürügü. ⁴ Rü yexguma ga Ngechuchu rü ñanagürü nüxü: —¡Pexuāëgü na taxüema pexü womüxèëxücèx! ⁵—Erü muxüchixü i duüxügü tá ínangugü, rü chaugu tá nügü nicüxgü rü tá ñanagürügü:

“Choma nixi i Cristu”, ñanagürügü tá. Rü muxüchixü i duüxügüxü tá nawomüxèë. ⁶—Rü tá nüxü pexinüéchiga na nügü nadèixü i ñuxre i naxiüānegü rü nügü na nadaixchaüxü i togü i naxiüānegü. ¡Natürü

tāūtáma ngēmacèx pebèixāchiāēgü! Erü woetama ngēmaäcü tátama nangupetü i noxrix. Natürü tātáma naāneärü gux nixī i ngēma. ⁷—Erü wüxi i nachiuāne rü to i nachiuānemaā tá nügü nadai. Rū wüxi i āēxgacü rü to i āēxgacümaā tá nanu, rü norü churagarü rü ngēma to i āēxgacüarü churagarümaā tá nügü nadai. Rū tá taiya nangux, rü tá nataxüchi i daaweanegü, rü muxüma i nachicawa rü tá naxīāxāchiane. ⁸—Rü guxüma i ngēma pemaā nüxü chixuxü, rü ngēma nixī i norü ügümare i ngēma ngúxü i tá ngupetüxü. ⁹—Rü ngēxguma i togü i duüxügü rü tá pexü inayauxü na chixexü pemaā naxügüxüçèx. Rū tá pexü nadai. Rū guxü i naānewa i duüxügü rü tá pexchi naxaie, erü chorü duüxügü pixīgü. ¹⁰—Rü ngēxguma rü tá muxüchixü i chorü duüxügü inanatèxgü i chorü ore, rü nügütanüwa rü tá nügüchi naxaie. Rū nügüechita tá āēxgacüxütawa nügü inayauxüxügü. ¹¹—Rü muxüchixü i orearü uruüguneta tá inangugü. Rū tá nüxü nixugügü na Tupana yīxü ya núma namugücü na nüxü yaxugüxüçèx i ore. Rü ngēmaäcü tá muxüchixü i duüxügüxü nawomüxēēgü. ¹²—Rü poraäcü tá nangēxma i chixexü, rü ngēmagagu rü muxüchixütáma i duüxügü rü tātáma nügü nangechaügü. ¹³—Natürü yíxema naetüwa meā Tupanaāxü yaxōdmáxē rü yíxema tá tixī ya aixcüma yaxaxúe i maxü i taguma gúxü. ¹⁴—Rü ngēma Tupanaärü ore i mexü rü guxü i naānewa tá nüxü nixugügü na guxü i duüxügü nüxü na cuèxgüxüçèx. Rü ngēmawena tá nixī i nagúxü i naāne. ¹⁵—Rü nuxcümaücü ga Tupanaärü orearü uruü ga Danié nachiga nanaxümatü i ngēma chixexü i Tupanapēxewa āüāchixü i inguxchaüxü. Rü ngēxguma nüxü pedèuxgu na tupauca ya taxünewa nangóxü i ngēma chixexü i Tupanapēxewa chixexüchixü, rü name nixī i pexuāēgü. ¹⁶—Rü ngēxguma ngēma üpetügu, rü ngēma Yudēaanewa ngēxmagüxü i duüxügü rü nanaxwèxe na mēxpúneānewa nabuxmüxü. ¹⁷—Rü ngēma ngunexügu ega texé tümapatatèxtüwa ngēxmagu, rü tama name i tümapatagu tayangaxi na tümaärü ngēmáxü tayayaxuxüçèx. ¹⁸—Rü texé ya tümaānewa ngēxmaxē rü tama name i tümapatacèx tataegu na tümachirugü tayayaxuxüçèx. ¹⁹—Rü ngēma ngunexügügu rü wüxi i ngechaü tá nixī i tümacèx ya yíxema ngeāxtagü ya tacharaügüxe rü yíxema imaixācügüxe. ²⁰—Rü Tupanana naxcèx peça i perü yumüxéwa na tama gáuane ixüyane rü ēxna ngüxchigaarü ngunexüguyane pexü na nangupetüxüçèx i ngēma chixexü! ²¹—Erü ngēma ngunexügügu rü poraäcü tá nangēxma i ngúxü ga noxri naāne ixügügumama taguma yexmaxü, rü ngēmawena rü tagutáma wena nangēxma. ²²—Rü ngēxguma Tupana tama nanoxrexēēgu i ngēma ngunexügü, rü taxüetáma tamaxü. Natürü Tupana tá nananoxrexēē i ngēma ngunexügü tümacèx ya yíxema nüma tüxü nadexe. ²³—Rü ngēxguma texé pexü ñagügu:

“Düçèx, daa nixī ya Cristu” ñagügu, rü ēxna:

“Gua nixī ya Cristu” ñagügu, rü tama name i nüxü peyaxōgü! ²⁴—Erü Cristugünetá rü Tupanaärü orearü uruüguneta tá inangugü. Rü tá nanaxügü i muxüma i cuèxruügü i taxügü na ngēmaäcü, ega nüxü natauxchagu, na tüxü nawomüxēēgüxüçèx èixrüxe ya yíxema duüxügü ya Tupanatama tüxü dexe. ²⁵—Düçèx, naxüpa na nangupetüxü i guxüma i ngēma ngúxü, rü marü pemaā nüxü chixu i nachiga. ²⁶—Rü ngēmacèx i ngēxguma duüxügü ñagügu pexü:

“Düçèx, yéa taxüema íxāpataxüwa nangēxma ya Cristu”, ñagügu, rü tama name i ngēma pexü. Rü ngēxguma ñagügu pexü:

“Düçêx, nuã ucapuwa nangêxma ya Cristu”, ñagügu, rü tama name i nüxü peyaxögü. ²⁷ —Erü ñoma wüxi i bëixbêxane i guxüwama nangóonexêxürüü tá nixi i ngêxguma wenaxârü núma chaxüxgu i choma i Tupana Nane na duüxüxü chíixü. ²⁸ Rü duüxügü rü tá chauxcêx nangutaquêxegü ñoma êxchagü nawemücêx ngutaquêxexürüü.

Ñuxácü tá nixi i ngêxguma nataegugu ya Tupana Nane ya duüxüxü ixcü
(Mr 13.24-37; Lc 21.25-33, 17.26-30, 34-36)

²⁹ —Rü nawena i ngêma ngúxügü rü tá nixo ya üèxcü, rü täütáma inabáxi ya tauemacü. Rü woramacurigü rü êxtagü rü tá narüyi. Rü guxüma i ñoma i naâne rü üèxcü rü tauemacü rü woramacurigü rü êxtagü rü tá naxiãxächitanü rü tá nu ne nanaximare. ³⁰ —Rü ñuxüchi duüxügü tá nüxü nadaugü na ñuxácü daxüwa ne chaxüxü. Rü guxü i nachiüãnecüãx i duüxügü rü tá naxauxe. Rü tá choxü nadaugü i ngêxguma caixanexügügu ícharüixgu rü núma chaxüxgu. Rü ngêxguma i choma rü ãêxgacü ya poraxüchicü rü mexêchicü tá chixi. ³¹ —Rü tá chanamu i chorü orearü ngeruügü i daxücüãx na yacuegüãxücêx ya norü cornetagü na ngêmaãcü naxítaquêxexêãxücêx i guxüma i ngêma duüxügü i chadexü i guxüwama ngêxmagüxü ñuxmata naâne iyacuáxüwa ngêxmagüxü. ³² —¡perüxinüê i ñaã ore i cuèxruü i orix i iguerachiga, rü naxcêx pengüe! Rü ngêxguma ngexwacaxüxü i nachacüügü iyarüyixgu rü naxüátügu, rü ngêmawa nüxü pecuèx na paxa tá taunecü na yüxü. ³³ —Rü ngêxgumarüü tá nixi i ngêxguma nagúxchaügu i naâne. Erü ngêxguma nüxü pedèuxgu na nangupetüxü i ngêma pemaã nüxü chixuxü, rü ngêmawa tá nüxü pecuèx na marü chingaicaxüchixü. ³⁴ —Rü aixcüma pemaã nüxü chixu rü guxüma i ngêma nüxü chixuxü rü tá nangupetü naxüpa na nayuexü i duüxügü i ñomaücüü maxêxü. ³⁵ —Rü ñoma i naâne rü ngêma daxüwa nüxü idauxü rü tá nagux. Natürü chorü ore rü tagutáma inayarüxo rü aixcüma tá ningü. ³⁶ —Natürü ngêma ngunexü rü ora i nagu tá nangupetüxü i ngêma pemaã nüxü chixuxü, rü Chaunatü ya Tupanaxícatama nüxü nacuèx na ñuxgu tá nangupetüxü i ngêma, rü taxüema ya togue nüxü tacuèx. Rü woo i norü orearü ngeruügü i daxücüãx rü tama nüxü nacuèxgü, rü woo i choma i Nane na chíixü rü tama nüxü chacuèx na ñuxgu tá nangupetüxü i ngêma. ³⁷ —Rü yexgumarüü ga duüxügüxü ngupetüxü ya yexguma Noë maüxgu, rü ngêxgumarüü tá ta nüxü nangupetü i ngêxguma íchanguxgu i choma i Tupana Nane na duüxüxü chíixü. ³⁸ —Rü yexguma, naxüpa ga guma mucü ga taxüchicü ga guxüwama inanguanexêëcü, rü ga duüxügü rü nachibüe, rü naxaxegü, rü nixãmèxgü rü nixütexacügü ñuxmata nawa nangu ga yema ngunexü ga nagu Noë naweügu ixüexü. ³⁹ —Rü noxri ga yema duüxügü rü tama nüxü nacuèxgüéga ga ñacü tá nüxü na ngupetüxü. Natürü yexguma ínanguxgu ga guma mucü ga taxüchicü ga yema duüxügüxü ñaicü, rü yexguma nixi ga nüxü yacuèxächitanüxü. Rü ngêxgumarüü tá ta nixi i ngêxguma wenaxârü núma chaxüxgu i choma i Tupana Nane na duüxüxü chíixü. ⁴⁰ —Rü ngêma ngunexügu rü taxre i yatügü rü wüxi i naãnewa tá nügümaã nangêxmagü. Rü wüxi tá nixi i Tupana igaxü rü ngêma to rü tá ngema natêx. ⁴¹ —Rü taxre i ngexügü tá nügümaã ínacaegü. Rü wüxi tá nixi i Tupana igaxü rü ngêma to rü tá ngema natêx. ⁴² —¡Rü pexuãëgü! Erü tama nüxü pecuèx i ñacü rü ora tá íchangu i chomax. ⁴³ —¡Rü nagu perüxinüê i ñaã ore! Rü ngêxguma chi wüxi i ípataarü yora nüxü cuèxgu na ñacü rü oragu tá ínanguxü i ngítêxáxü

rü tãu chima nape. Erü nüxna chi nadau ya napata na tama ngëxma naxücuxücèx i ngëma ngîtèxáxü na tacücèx ngema yangîxücèx. ⁴⁴—Rü ngëmacèx name nixî i pexuãægü i pemax. Erü ngëma ngunexü i tama nagu îperüxnüèxügu tá nixî i ngürüächî íchanguxü i choma i Tupana Nane na duüxüxü chiüxü.

Wüxi ga duüxü ga meã norü coriga ñnuxü rü to ga tama meã norü coriga ñnuxüchiga

(Lc 12.41-48)

⁴⁵—¿Rü texé tîixü ya tümaãrü coriarü duüxü ya aixcüma yanguxëxë rü tümaãxü cuáxe? ¿Tama éxna yíxema tîixü ya tümaãrü cori tüxna ágaxe na meã nüxna tadauxücèx rü meã oragu tanachibüexëèxücèx i norü duüxügü? ⁴⁶ Rü tataãe ya yíxema coriarü duüxë ega ngëxguma ínanguxgu i tümaãrü cori rü tüxü íyanguexügu na meãma ítanaxüxü i ngëma puracü i nagu tüxü namuxü. ⁴⁷—Rü aixcüma pemaã nüxü chixu rü ngëma tümaãrü cori rü tá guxüma i norü ngëmaxügüarü dauruüxü tá tüxü nixîxë. ⁴⁸⁻⁵⁰—Natürü ngëxguma chi ngëma coriarü duüxü rü wüxi i yatü i chixexü yixîgu, rü chi nagu naxînúgu na tãütáma paxa ínanguxü i norü cori, rü chi ínaxügüãgu na chixri namuãxü i namücügü i norü coriarü duüxügü, rü chi ngãxëxütanügu naxãxgu na namaã nachibüxücèx rü naxaxexücèx, rü ngürüächî ngëma ngunexü rü ngëma ora i tama nagu ínanguxëèxügu rü tá ínangu i norü cori. ⁵¹—Rü poraãcüxüchima tá nanapoxcu i ngëma norü duüxü, ñoma meã maxënetaxü i duüxügüxü napoxcuexürü. Rü ngëma tá narüdoxü rü nixüxchapüta.

25

Ore ga 10 ga pacügu ixuxü

¹ Rü ñnagürü ga Ngechuchu: —Pemaã tá nüxü chixu i wüxi i ore na nawa nüxü pecuáxücèx i ñuxácü tá duüxügüarü aëxgacü na yîixü ya Tupana i ngëxguma naguxgu i naãne. Rü iyexma ga 10 ga pacü ga ngürü daparinamaã ngîgürü petawa ícü na yaxümücügüãxücèx ga guma yatü ga ingîxchaücü. ²—Rü 5 ga yema pacü rü tama ixuãægü. Rü yema nañ ga 5 ga pacü rü meãma ixuãægü. ³—Rü yema tama uãægücü, rü yexguma ngürü daparina íyangegügu rü tama to ga ngürü queruchinu ta íyangegü. ⁴—Natürü ga yema uãægücü rü to ga ngürü queruchinu ta íyangegü. ⁵—Natürü ga guma yatü ga ingîxchaücü rü tama paxa ínangu. Rü düxwa ga yema pacügü rü ipee yerü iyaxtae. ⁶—Rü yexguma ngãxücüüwa nanguxgu, rü yema pacügü nüxü ixînúe ga wüxi ga naga ga ñaxü:

“Domama nixî ya yima yatü ya ingîxchaücü. ¡Rü îperüdagü, rü îpeyadaügü!” ñaxü. ⁷—Rü guxcüma ga yema pacügü rü írüdagü, rü iyamexëègü ga ngürü daparinagü. ⁸—Rü yexguma ga yema 5 ga pacügü ga tama uãægücü rü ngîgürügügü ngîxü ga yema pacügü ga uãægücü:

“¡Íraxü i perü queruchinu toxnata pexã, erü torü omügü rü nixogü!” ngîgürügügü. ⁹—Natürü ga yema pacügü ga uãægücü rü ngîxü ingãxügü, rü ngîgürügügü:

“Taxucürüwa pexna ta taxã, erü ngëxguma chi pexna ta taxãxgu rü tãu chima ningü i toxcèx rü pexcèx. Rü ngëmacèx narümemaë nixî i ngextá namaã ínataxegüxüwa pegüxü nawa pexî”, ngîgürügügü. ¹⁰—Natürü yexguma ga yema 5 ga pacügü ga tama uãægücü ngürü queruchinuwa naxíyane, rü ínangu ga guma yatü ga ingîxchaücü. Rü ga yema pacügü ga

uãëgücü rü iyachocu nawa ga guma í ga nawa iyangĩxũne. Rũ ñuxũchi narüwãxta ga ããx. ¹¹—Rũ yemawena íngugü ga yema pacügü ga tama uãëgücü, rü ngĩgürügügü:

“¡Pa Corix, toxcëx yawãxna i ããx!” ngĩgürügügü. ¹²—Natürü nũma ga cori, rü ngĩxũ nangãxũ, rü ñanagürü:

“Pemaã nüxũ chixu rü aixcũma tama pexũ chacuèx na texégü pixĩgũxũ”, ñanagürü. ¹³Rũ ñuxũchi ñanagürü ga Ngechuchu: —¡Pexuãëgü! Erü tama nüxũ pecuèx i tacü rü ngunexũ rü tacü rü ora tá íchangu i choma i Tupana Nane na duũxũxũ chiĩxũ —ñanagürü.

*Ore ga dñeru gu ixuxũ
(Lc 19.11-27)*

¹⁴Rũ ñanagürü ta ga Ngechuchu: —Rũ ngẽma Tupana na duũxũgüarü ãëxgacü na ixĩxũ rü ñoma wũxi ga yatü ga ixũãchichaũcü ga to ga nachiuãnewa na naxũxücëxrüü nixĩ. Rũ nũma ga guma yatü rü norü duũxũgücëx naca, rü nüxna ngĩxũ naxã ga dñeru na nüxũ ngĩmaã nanguxũxücëx rü ngĩmaã na ínapuracüexücëx. ¹⁵—Rũ wũxi ga yema norü duũxũna ngĩxũ naxã ga 5000 tachinü ga dñeru. Rũ yema tona ngĩxũ naxã ga 2000 tachinü ga dñeru. Rũ yema tona ngĩxũ naxã ga 1000 tachinü ga dñeru. Rũ yemaãcü nanangugü na ñuxãcü tá yema dñerumaã napuracüexũ ga wũxichigü ga norü duũxũgü rü yemaãcü wũxichigüna ngĩxũ naxã ga yema dñeru. Rũ ñuxũchi inaxũãchi ga yema cori na to ga nachiuãnewa naxũxücëx. ¹⁶—Rũ yema norü duũxũ ga 5000 tachinü ga dñeru ngĩxũ yaxuxũ, rü ngĩmaã napuracü, rü naĩ ga 5000 tachinü ngĩmaã nayaxu. ¹⁷—Rũ yexgumarüü ta ga yema norü duũxũ ga 2000 tachinü ga dñeru ngĩxũ yaxuxũ, rü ngĩmaã napuracü, rü naĩ ga 2000 tachinü ngĩmaã nayaxu. ¹⁸—Natürü ga yema norü duũxũ ga 1000 tachinü ga dñeru ngĩxũ yaxuxũ, rü ngĩmaã ínixũ. Rũ ngĩxũ nixaixmaũ, rü yexma ngĩxũ natëx ga yema norü coriarü dñeru. ¹⁹—Rũ nuxcũxürama nataegu ga yema duũxũgüarü cori. Rũ yexguma ínanguxgu rü inanaxügü ga norü duũxũgümaã na namexëããxũ ga norü dñeruchiga. ²⁰—Rũ nüxĩra norü corixũtawa naxũ ga yema norü duũxũ ga 5000 tachinü ga dñeru ngĩxũ yaxuxũ. Rũ norü corina ngĩxũ naxã ga yema 5000 tachinü. Rũ ngĩetü ngĩxũ inaxã ga naĩ ga 5000 tachinü ga ngĩxũ nayaxucü ngĩmaã ga yema norü cori nüxna ngĩxũ ãcü ga dñeru. Rũ ñanagürü norü corixũ:

“Dücëx Pa Corix, ñaã iyixĩ ga yema 5000 tachinü ga dñeru ga choxna ngĩxũ cuxãcü. Marü ngĩmaã chapuracü rü ngĩmaã cuxũ ngĩxũ chayaxu i ñaã naĩ i 5000 tachinü”, ñanagürü. ²¹—Rũ norü cori rü ñanagürü nüxũ:

“Pa Chorü Duũxũx, wũxi i mexëchixũ quixĩ, rü meãma cupuracü. Rũ meã nüxna cudau ga yema noxre ga dñeru ga cuxna ngĩxũ chaxãcü, rü meãma ngĩmaã cupuracü. Rũ ngẽmacëx i ñuxma rü tá rümumaëcũna cuxũ chadauxëë. ¡Rü ixücu i chopatawa rü ngĩã tataãëgü!” ñanagürü. ²²—Rũ yemawena ínangu ga yema to ga norü duũxũ ga 2000 tachinü ga dñeru ngĩxũ yaxuxũ. Rũ ñanagürü norü corixũ:

“Dücëx Pa Corix, ñaã iyixĩ ga yema 2000 tachinü ga dñeru ga choxna ngĩxũ cuxãcü. Marü ngĩmaã chapuracü rü ngĩmaã cuxũ ngĩxũ chayaxu i naĩ i 2000 tachinü. Rũ ñaã iyixĩ”, ñanagürü. ²³—Rũ norü cori rü ñanagürü nüxũ:

“Pa Chorü Duũxũx, wũxi i mexëchixũ quixĩ, rü meãma cupuracü. Rũ meã nüxna cudau ga yema noxre ga dñeru ga cuxna ngĩxũ chaxãcü, rü meãma ngĩmaã cupuracü. Rũ ngẽmacëx i ñuxmax rü tá rümumaëcũna cuxũ

chadauxëë. ¿Rü ixücu i chopatawa rü ngĩxã tataãëgü!” ñanagürü. ²⁴ — Natürü yexguma norü corixütawa nanguxgu ga yema norü duüxü ga 1000 tachinü ga dïeru ngĩxü yaxuxü, rü ñanagürü norü corixü:

“Dücëx Pa Corix, choma nüxü chacuëx rü wüxi i yatü i aüxü quixi. Rü cunayaxu i nanetüarü o i ngextá tama ícutoëxüwa, rü cunabuxarü oõx i nanetü i tama icutoxü. ²⁵ —Rü yemacëx chamuü. Rü waixümügu ngĩxü chixaixmaü rü ngĩxü ichatëx. Natürü ñãã iyixi i ngëma curü dïeru”, ñanagürü. ²⁶ Rü yexguma ga norü cori rü nanangãxü rü ñanagürü:

“Pa Chorü Duüxüx, wüxi i chixexü rü oxü i chorü duüxü quixi. Rü cuma meãma nüxü cucuëx rü ngextá tama íchatoëxüwa rü chanayaxu i nanetüarü o, rü chanabuxarü oõx i nanetü i tama ichatoxü. ²⁷ —Rü yemacëx narümemaë chi nixi ga bancugu choxü ngĩmaã na cunguxüxü ga chorü dïeru na ngema choxü ngĩxü yamuxëëgüxücëx, rü ngëmaãcü mucü ngĩxü na chayaxuxücëx i ngëxguma íchanguxgu”, ñanagürü. ²⁸ —Rü yexguma ga yema cori rü nanamu ga yema togü ga norü duüxügü ga yema yexmagüxü, rü ñanagürü nüxü:

“¿Nüxna ngĩxü peyaux i ngëma dïeru, rü ngëma yatü i 10,000 i dïeru nüxü ngëxmaxüna ngĩxü pexã! ²⁹ —Erü yixema tüxü nangëmëxcü rü yexera tá tüxna ngĩxü taxã, rü ngëmaãcü tá tüxü imuxüchi. Natürü yixema tüxü natauxcü rü woo ngëma noxre i tüxü ngëmëxcü rü tá tüxna ngĩxü tayaxu. ³⁰ —¿Rü yéama düxëtüwa i poraãcü ínaxëãnexüwa peyatã i ñãã chorü duüxü i taxuwama mexü! Rü ngëma tá narüdoxü rü tá nixüxchapüta”, ñanagürü.

Naãneãrü guxgu rü Cristupëxegu tá nangutaquëxegü i guxü i nachiüãnecüãx i duüxügü na yadexechiãxücëx i ngëma mexügü rü na napoxcueãxücëx i ngëma chixexügü

³¹ Rü ñanagürü ga Ngechuchu: —Rü ngëxguma wenaxãrü núma chaxüxgu i choma i Tupana Nane na duüxüxü chiixü, rü chorü orearü ngeruügü i daxücüãx rü tá choxü naxümücügü. Rü ãëxgacü ya tacü tá chixi rü chorü tochica i mexëchixüwa tá charüto. ³² —Rü guxü i nachiüãnecüãx i duüxügü rü tá chopëxegu nangutaquëxegü. Rü choma rü tá chayadexechi ñoma wüxi i carneruarü dauruü i norü carnerugü rü chibugü noxrüwama mugüxüürü. ³³ —Rü ngëma choxrü ixigüxü rü chorü tügüncëwawa tá chanangëxmagüxëë. Rü ngëma tama choxrü ixigüxü rü chorü toxwecüwawa tá chanangëxmagüxëë. ³⁴ —Rü ngëxguma i choma i tá ãëxgacü ya tacü na chiixü rü ñacharügü tá nüxü i ngëma chorü duüxügü:

“¿Nuã pexi i pema ya texé ya Chaunatü ya Tupana tüxü rüngüxëëgüxe, rü penayaxu i ngëma pechica i ngextá núma ãëxgacü iyixüwa! Yerü Chaunatü rü pexcëx nanamexëë i ngëma pechica ga yexguma tauta naãne naxüxgu. ³⁵ —Rü ngëmaãcü tá pemaã namecüma yerü yexguma chataiyagu rü pema rü choxü pechibüxëë. Rü yexguma chitawagu rü choxü pexaxexëë. Rü yexguma tama nüxü pecuëxgu na texé chiixü rü meã choxü peyaxügü ga pepatawa. ³⁶ —Rü yexguma changexchirugu rü choxü pexüxchiru. Rü yexguma chidaawegu rü choxü perüngüxëë. Rü yexguma poxcupataüwa chayexmagu rü choxü ípeyadau”, ñacharügü tá nüxü. ³⁷ —Rü ngëxguma i ngëma duüxügü i chadexü rü ñanagürügü tá choxü:

“Pa Corix, ¿ñuxgu ga cuxü tadauxü ga na cutaiyaxü rü cuxü tachibüxëëxü? ¿Rü ñuxgu ga cuxü tadauxü ga na quitaawaxü rü cuxü taxaxëëxü? ³⁸ —¿Rü ñuxgu ga tochixüwa cunguxü rü meã cuxü

tayauxgũxũ ga woo tama cuxũ tacuèxgũgu? ¿Rũ ñuxgu ga cungexchiruxũ rũ cuxũ taxũxchirugũxũ? ³⁹ —¿Rũ ñuxgu ga cuxũ tadaugũxũ na quidaawexũ rũ ěna poxcupataũwa cuyexmaxũ rũ cuxũ itayadaugũxũ?” ñanagũrũgũ tá choxũ. ⁴⁰ —Rũ choma na ãëxgacũ ya tacũ na chiĩxũ, rũ tá chanangãxũ, rũ ñacharũgũ tá:

“Aixcũma pemaã nũxũ chixu rũ yexguma nũxũ perũngũxëëgũgu i ngẽma chorũ duũxũ i yexeraãcũ ngearũ ngemaxũáxũ, rũ choxũ nixĩ ga perũngũxëëgũxũ”, ñacharũgũ tá nũxũ. ⁴¹ Rũ ñuxũchi i choma na ãëxgacũ ya tacũ na chiĩxũ, rũ ñacharũgũ tá nũxũ i ngẽma tama chorũ duũxũgũ ixĩgũxũ:

“¡Choxna pixĩgachi i pema i perũ chixexũcèx poxcuexe! ¡Rũ ngema pexĩ nawa ya yima ùxũ ya taguma ixoxũne ya Tupana ímexëene naxcèx i ngoxo i Chataná rũ norũ duũxũgũ! ⁴² —Yerũ yexguma chataiyagu rũ pema rũ tama choxũ pechibũxëë. Rũ yexguma chitawagu rũ tama choxũ pexaxëë. ⁴³ —Rũ yexguma tama nũxũ pecuèxgu na texé chiĩxũ rũ tama meã choxũ peyaxgũ ga pepatawa. Rũ yexguma changexchirugu rũ tama choxũ pexũxchirugũ. Rũ yexguma chidaawegu rũ poxcupataũwa chayexmagu rũ tama choxũ ípeyadaugũ”, ñacharũgũ tá nũxũ. ⁴⁴ —Rũ ngẽxguma i nũmagũ i tama chorũ duũxũgũ ixĩgũxũ, rũ ñanagũrũgũ tá choxũ:

“Pa Corix, ¿ñuxgu tochixũwa cingu rũ tama meã cuxũ tayauxgũ yerũ tama cuxũ tacuèxgũ? ¿Rũ ñuxgu ga cuxũ tadaugũxũ ga na cutaiyaxũ, rũ ěna na quitaawaxũ, rũ ěna na cungexchiruxũ, rũ ěna quidaawexũ, rũ ěna poxcupataũwa na cuyexmaxũ, rũ tama cuxũ tarũngũxëëgũxũ?” ñanagũrũgũ tá choxũ. ⁴⁵ —Rũ choma na ãëxgacũ ya tacũ na chiĩxũ, rũ tá chanangãxũ, rũ ñacharũgũ tá nũxũ:

“Aixcũma pemaã nũxũ chixu rũ yexguma tama nũxũ perũngũxëëgũgu ga wũxi ga duũxũ ga yexeraãcũ ngearũ ngemaxũáxũ, rũ choxũ rũ ta tama perũngũxëëgũ”, ñacharũgũ tá nũxũ. ⁴⁶ —Rũ ñuxũchi i ngẽma duũxũgũ i tama chorũ duũxũgũ ixĩgũxũ rũ tá poxcu i taguma gũxũwa naxĩ. Natürũ ngẽma duũxũgũ i aixcũma meã chauxcèx maxëxũ rũ tá nanayauxgũ i maxũ i taguma gũxũ, —ñanagũrũ ga Ngechuchu.

26

Yudũgũarũ ãëxgacũgũ naxcèx nadaugũ na ñuxãcũ Ngechuchuxũ yayauxgũxũ

(Mr 14.1-2; Lc 22.1-2; Cu 11.45-53)

¹ Rũ yexguma Ngechuchu nũxũ rũchaxgu ga yema orexũ na yaxuxũ, rũ ñanagũrũ norũ ngũexgũxũ: ² —Pema nũxũ pecuèx rũ taxre i ngunexũ nataxu na nangõxgũãxũcèx i ngẽma õna i Üpetũchigaarũ petacèx naxũgũxũ. Rũ ngẽxguma tá nixĩ i choxũ yayauxgũxũ i chorũ uwanũgũ na curuchawa choxũ yapotagũxũcèx —ñanagũrũ. ³ Rũ yexgumaũcũũ ga paigũarũ ãëxgacũgũ, rũ ngũexëëruũgũ ga ore ga mugũwa nguxëëtaegũxũ, rũ Yudũgũarũ ãëxgacũgũerugũ rũ nangutaquëxegũ ga napatawa ga Caipá ga paigũarũ ãëxgacũ ixĩcũ. ⁴ Rũ yéma nũgũmaã nanamexëëgũ na Ngechuchuxũ nawomũxëëgũãcũma na yayauxgũãxũcèx rũ na yamëxgũãxũcèx. ⁵ Natürũ nũgũmaã ñanagũrũgũ: —Taxucürũwama i ñuxma petagu tayayauxgũ, erũ duũxũgũ rũ tá tamaã nanuë —ñanagũrũgũ.

Wüxi ga nge rü Ngechuchuerugu inaba ga pumara

(Mr 14.3-9; Cu 12.1-8)

⁶ Rü Ngechuchu rü Betániãwa nayexma napatawa ga Chimáú ga rüchaxüñecümaã naxügüäcü. ⁷ Rü Ngechuchucèx yéma iyaxü ga wüxi ga ngecü ga yéma nangecü ga wüxiweü ga pumara ga tatanüxüchixü ga mexëchicü ga butiyamaã ächiüxü. Rü yexguma mechawa ínachibüyane ga Ngechuchu, rü ngïma rü naërugu inaba ga yema pumara. ⁸ Rü yexguma yemaxü nadaugügu ga Ngechuchuarü ngüexügü, rü naãëwa nanguxgü, rü inanaxügüe ga na ñagüxü. —¿Tüxcüü ngëxma inaxaiyaxü i ngëma pumara? ⁹—Rü narümemaë chi nixi i tatanüxügu namaã itaxe, rü ñuxüchi ngëma dïërumaã nüxü irüngüxëe i ngëma duüxügü i ngearü ngëmaxüãxgüxü —ñanagürügü. ¹⁰ Rü Ngechuchu nüxü naxïnü. Rü ñuxüchi ñanagürü norü ngüexügüxü: —¿Tüxcüü ngïxü pechixewe i ngëma nge? Erü ngëma chomaã naxüxü rü wüxi i mexü nixi. ¹¹—Ngëma ngearü ngëmaxüãxgüxü rü guxügutáma petanüwa nangëxmagü. Natürü choma rü täütáma guxügu petanüwa changëxma. ¹²—Rü ngëma chomaã naxüxü i ñaã ngecü na chaxunegu nabaãxü i ngëma pumara i yixixü, rü ngëmaäcü inaxü erü paxa tá chayü rü tá choxü inatëxgü. Rü ngëmacèx nixi i chaxunegu nabaãxü i ngëma pumara. ¹³—Rü aixcüma pemaã nüxü chixu rü guxü i naãnewa i ngextá duüxügü nüxü íixugügüxüwa i Tupanaärü ore i mexü, rü ñaã ngecü chomaã üxü rü tá ta nüxü nixugügü. Rü ngëmaäcü tá ngïxna nacüexächie i duüxügü —ñanagürü ga Ngechuchu.

Yuda rü äëxgacügümaã nanamexëe na ñuxäcü Ngechuchuxü yayauxgüxüçèx

(Mr 14.10-11; Lc 22.3-6)

¹⁴ Rü ñuxüchi ga wüxi ga Ngechuchuarü ngüexü ga Yuda ga Icarüite rü paigüarü äëxgacügüxütawa naxü rü namaã nayarüdexa. ¹⁵ Rü Yuda rü ñanagürü nüxü: —¿Ñuxre tá choxü penaxütanüxü i ngëxguma pexü chanatauxchaxëëgu na Ngechuchuxü piyauxgüxüçèx? —ñanagürü. Rü yexguma ga nümagü ga paigüarü äëxgacügü rü 30 tachinü ga dïerugu namaã naxuneta. ¹⁶ Rü yexgumama inanaxügü ga Yuda ga naxcèx na nadauxü ga ñuxäcü nüxü na natauxchaxëëgüãxü na Ngechuchuxü yayauxgüxüçèx.

Coriarü ðnachiga

(Mr 14.12-25; Lc 22.7-23; Cu 13.21-30; 1 Co 11.23-26)

¹⁷ Rü nawa nangu ga ngunexü ga nagu inaxügüxü ga yema peta ga pãü ga ngearü puxëeruüãxü nagu nangõxgüxü. Rü norü ngüexügü rü Ngechuchucèx naxi, rü ñanagürügü nüxü: —¿Ngextá tá tanamexëe i nachica i nawa nangõxgüxü i ðna i Üpetüchigaarü petagu ingõxü? —ñanagürügü. ¹⁸ Rü nüma ga Ngechuchu rü ñanagürü nüxü: —¿Ngema ñãnewa pexi, rü yima yatü ya pemaã nüxü chaxunetacüpatawa pexi! ¡Rü namaã nüxü pixu rü ñapegügü:

“Torü ngüexëeruü rü ñanagürü: ‘Marü ningaicaxüchi na chayuxü rü nuã cupatawa rü chorü ngüexügümaã chanangupetüxëëchaü i Üpetüchigaarü peta’,” ñaperügügü tá nüxü! ¹⁹ Rü yéma naxi ga yema norü ngüexügü. Rü yema Ngechuchu namaã nüxü ixuxürü nanaxügü. Rü nanamexëëgü ga yema ðna ga Üpetüchigaarü petagu tá nangõxgüxü. ²⁰ Rü yexguma nachütagu rü yéma mechawa nachibü ga Ngechuchu namaã ga yema 12 ga norü ngüexügü. ²¹ Rü yexguma ínachibüeyane, rü

Ngechuchu rü ñanagürü nüxü: —Aixcūma pemaã nüxü chixu rü wüxie i petanüwa tá tixí ya bexma chauechita choxü íyaxuaxüxê —ñanagürü. ²² Rū yexguma ga nūmagü ga norü ngúexügü rü poraãcū nangechaügü. Rū wüxichigü nüxna nicachigü, rü ñanagürügü: —Pa Corix, ¿choma êxna tá chiixü ya yíxema cuxü íyaxuaxüxê? —ñanagürügü. ²³ Rū nūma ga Ngechuchu nanangãxü rü ñanagürü: —Ngēma wüxi ya poratuwa namaã tá chachibüxü, rü ngēma tá nixí i chauechita choxü íyaxuaxüxü. ²⁴ — Rū choma i Tupana Nane na duüxüxü chiixü rü tá chayü ngēxgumarüü i Tupanaärü ore i ümatüxü nüxü ixuxürüü. Natürü wüxi i ngechaüxüchi nixí naxcèx i ngēma yatü i choxü íyaxuaxüxü. Rū narümemaë chi nixí ga noxtacūma tãu chima na nabuxü —ñanagürü. ²⁵ Rū nadexaãchi ga Yuda ga naëchita íyaxuaxüxü, rü ñanagürü: —Pa Ngúexêëruüx, ¿tãütãma choma nixí? —ñanagürü. Rū Ngechuchu nanangãxü rü ñanagürü: —Ngēmaãcū cuma nixí —ñanagürü. ²⁶ Rū yexguma ínachibüeyane rü Ngechuchu nanayaxu ga wüxi ga pãu. Rū Tupanana moxê naxã, rü inanabücu, rü norü ngúexügüxü nayanu. Rū ñanagürü: —Ñã pãu rü chaxunechiga nixí. Rū ¡penangõ! —ñanagürü. ²⁷ Rū yemawena rü nanayaxu ga wüxi ga pochiyu ga binumaã äacuxü. Rū yexgumarüü ta Tupanana moxê naxcèx naxãxíra, rü ñuxüchi norü ngúexügüna nanaxã, rü ñanagürü nüxü: —¡Rü guxãma i pema rü peyaxèüx ya daa binu! ²⁸ —Erü daa binu rü nachiga nixí ya chaugü ya muxüma i duüxügücèx tá ibacü na ngēmaãcū Tupana nüxü nüxü nangechaüxücèx i norü pepadugü. Rū yimawa Tupana nanangoxêë na aixcūma yíixü i norü uneta. ²⁹ —Rü pemaã nüxü chixu rü tagutãma wena binu chayaxaxü ñuxmatãta Chaunatü ya Tupana äëxgacü íixíxüwa ngexwacaxücü ya binu pemaã chayaxèüx —ñanagürü.

Ngechuchu nüxü nixu rü Pedru rü taxütãma nügü nixu na norü ngúexü yíixü

(Mr 14.26-31; Lc 22.31-34; Cu 13.36-38)

³⁰ Rū ñuxüchi nawiyaegü ga wüxi ga Tupanaärü wiyaeü. Rū yemawena rü guma Mèxpüne ga Oríbunecügu äeganewa naxí. ³¹ Rū yexguma ga Ngechuchu rü ñanagürü nüxü ga norü ngúexügü: —Guxãma i pema rü tá choxü ípetèxgü i ñoma i chütaxügu. Erü Tupanaärü ore i ümatüxüwa rü ñanagürü:

“Tã chayamèx ya carneruarü dauruü, rü tá nanaxüanemare i carnerugü”, ñanagürü i ngēma ore. ³² —Natürü ngēxguma marü yuwa ícharüdaxguwena, rü tá chaxira pexüpa Gariréaanewa chaxü —ñanagürü. ³³ Rū yexguma ga Pedru rü nanangãxü rü ñanagürü: —Rü woo guxüma i togü cuxü ítèxgu, natürü i chomax rü tãütãma cuxü íchatèx —ñanagürü. ³⁴ Rū Ngechuchu ñanagürü nüxü: —Aixcūma cumaã nüxü chixu rü ñomatama i chütaxügu rü naxüpa na otã ícaxü, rü tomaëxpüxcüna tá cugü iquicux na chorü duüxü quiixü. ³⁵ Rū Pedru nanangãxü rü ñanagürü: —Rü woo wüxigu cumaã chayuxgu rü tãütãma chaugü ichicux na curü duüxü chiixü —ñanagürü. Rū guxüma ga togü ga norü ngúexügü rü ta yema ñanagürügü.

Ngechuchu rü Yechemaníwa nayayumüxê

(Mr 14.32-42; Lc 22.39-46)

³⁶ Rū Ngechuchu rü norü ngúexügümaã nawa nangugü ga wüxi ga nachiga ga Yechemanígu äegaxü. Rū Ngechuchu rü ñanagürü nüxü: —¡Nuã perütogü! Rū paxa yoxni yéa chayayumüxê —ñanagürü. ³⁷ Rū

Ngechuchu nügüwe nanagagü ga Pedru rü Zebedéu nanegü ga Chaŭtiágu rü Cuáü. Rü Ngechuchucèx inaxügü ga na poraäcü nangechaŭxü rü naxixächiaëxü. ³⁸ Rü yexguma ga Ngechuchu rü ñanagürü nüxü: —Poraäcü changechaŭ rü nagu charüxínü rü ngëmamaã tá chayü. ¡Rü nuxa perücho i pemax, rü chauxrüŭ ipedaue! —ñanagürü. ³⁹ Rü yexguma ga Ngechuchu rü yéaxüra naxü. Rü waixüümüãnegu nanangücuchi. Rü nayumüxè rü ñanagürü: —Pa Chaunatüx, ngëxguma cuma cunaxwëxegu, ¡rü nüxna choxü ínanguxuchixëë i ñaã ngúxü i tá choxü üpetüxü! Natürü chanaxwëxe i cuxrütama ngúchaŭ cuxü rü tama i choxrü —ñanagürü. ⁴⁰ Rü yemawena ga Ngechuchu rü nataegu ga yema norü ngüexügü íyexmagüxüwa. Rü nüxü inayangau ga na ínapeexü. Rü ñanagürü Pedruxü: —Pa Pedrux, ¿taxucürüwama éxna namaã peporae na chomaã ipedauexü, rü bai i wüxi i ora? ⁴¹ —¡Rü pexuãëgü rü Tupanana naxcèx peça na pexü nangüxëëxücèx na tama choxü ípetáxücèx ega ngëxguma facü rü guxchaxü pexü üpetügu! Erü aixcüma peãëwa rü ípememare, natürü pexene nixí ituraxü —ñanagürü. ⁴² Rü yexguma rü wenaxärü noxri ínayumüxëxücèx nataegu ga Ngechuchu. Rü wenaxärü nayumüxë, rü ñanagürü: —Pa Chaunatüx, ngëxguma tama cunaxwëxegu na nawa choxü ícunguxuchixëëxü i ñaã ngúxü i tá chingexü, rü marü name i ngëma cuma cunaxwëxexüãcüma chomaã cunaxü —ñanagürü. ⁴³ Rü ñuxüchi wenaxärü norü ngüexügü íyexmagüxüwa naxü. Rü nüxü inayangau ga na ínapeexü, yerü poraäcü nayaxtaexüchi. ⁴⁴ Rü yéma nüxna nixü, rü wenaxärü nayayumüxë. Rü noxriãcütama nayumüxë. ⁴⁵ Rü yemawena rü norü ngüexügü íyexmagüxüwa naxü. Rü ñanagürü nüxü: —¡Ñuxma waxi pepee rü iperüngüë! Erü marü nawa nangu i ora na chorü uwanü choxü iyauxgüxü rü pecaduãxgüxüna choxü namugüxü. ⁴⁶ ¡Ipechigü rü ngíã ítixí! Erü marü ñomatáma nixí i ngëma choxü íyaxuaxüxü —ñanagürü.

Ngechuchuxü niyauxgü

(Mr 14.43-50; Lc 22.47-53; Cu 18.2-11)

⁴⁷ Rü yexguma íyadexayane ga Ngechuchu, rü ínangu ga Yuda ga norü ngüexüchirëx ixixü. Rü nawe narüxi ga muxüma ga duüxügü ga taramaã rü naímaã ixãxnexü. Rü yema nixí ga duüxügü ga paigüarü äëxgacügü rü Yudiágarü äëxgacügüerugü yéma mugüxü. ⁴⁸ Rü ga Yuda ga ínaxuaxüxü rü marü yema duüxügümaã nanamexëë, rü ñanagürü: —Ngëma nüxü chachúxuxü tá nixí i Ngechuchu. Rü ngëma tá nixí i piyauxgüxü —ñanagürü: ⁴⁹ Rü yexguma Ngechuchucèx nixü, rü ñanagürü nüxü: —Nuxmaë Pa Ngüexëëruüx —ñanagürü. Rü ñuxüchi nüxü nachüxu. ⁵⁰ Rü Ngechuchu nanangãxü rü ñanagürü: —Pa Chomücüx, ¿tacüwa nuã cuxü? —ñanagürü. Rü yexgumatama Ngechuchuxü niyauxgü ga yema duüxügü ga Yudawe rüxixü. ⁵¹ Rü wüxi ga Ngechuchumücü nanawëxechi ga norü tara, rü paigüarü äëxgacüarü duüxüxü ínadaechinü. ⁵² Rü yexguma ga Ngechuchu rü ñanagürü: —¡Naxchiügu yaxücuchi i curü tara! Erü guxáma ya yíxema taramaã nuëxë, rü taragu tátama tayue. ⁵³ —¿Tama éxna nüxü cucuèx rü ngëxguma chi choma chanaxwëxegu, rü Chaunatüna chi naxcèx chaca na choxü núma namugüãxücèx i muxüma i norü orearü ngeruügu i daxücüãx na choxü yanangüxëëgüxücèx? ⁵⁴ —Natürü ngëxguma chi ngëma chaxüxgu, rü ¿ñuxäcü chi ningü i Tupanaärü ore i ümatüxü i nüxü ixuxü na choma rü tá chayuxü? ⁵⁵ Rü yexguma

ga Ngechuchu rü ñanagürü nüxü ga yema duñxüğü: —¿Tüxcüü taragü rü naixmenèxägümaã chauxcèx nuã pexi na choxü peyarüyauxgüxcèx ñoma wüxi i ngítèxáxü chüürüü? Rü guxü ga ngunexügu rü tupauca ga taxünewa changuxètae natürü taguma yexma choxü piyauxgü. ⁵⁶— Natürü guxüma i ñaã ñuxma ngupetüxü, rü ngèmaãcü nangupetü na yanguxücèx i Tupanaärü ore ga nuxcümaügüxü ga norü orearü uruügü ümatügüxü —ñanagürü. Rü yexguma ga guxüma ga norü ngüexüğü rü nüxna nibuxmü. Rü nüxicatama yéma nanatèxgü ga Ngechuchu.

Äëxgacügü ga taxügüpèxewa Ngechuchuxü nagagü
(Mr 14.53-65; Lc 22.54-55, 63-71; Cu 18.12-14, 19-24)

⁵⁷ Rü Caipá ga paigüarü äëxgacüxtawa Ngechuchuxü nagagü ga yema duñxüğü ga yayauxgüxü. Rü yexma nixi ga nangutaquèxegüxü ga ngüexèëruügü ga ore ga mugüwa nguxèëtaegüxü rü Yudiügüarü äëxgacügüerügü. ⁵⁸ Natürü ga Pedru rü yaxügu nawe nixächigü ñuxmata paigüarü äëxgacü ga Caipáxtawa nangu. Rü purichíagü ga tupaucaarü dauruügümaã yéma iãxtüwa narüto, yerü nüxü nadauxchaü ga tacü tá Ngechuchumaã na naxüexü. ⁵⁹ Rü ga paigüarü äëxgacügü rü guxüma ga Yudiügüarü äëxgacügüerügü rü naxcèx nadaugü ga wüxi ga ore ga doramare ixixü na yemamaã Ngechuchuxü inaxuaxüğüxcèx na yamèxgüãxücèx. ⁶⁰⁻⁶¹ Natürü woo muxüma ga duñxüğü doraxümare nachigaxü yéma yarüxugüe, natürü taxuxüma ga chixexü inyangaugü ga naxcèx tá yamèxgüãxü. Rü düxwa yéma naxi ga taxre ga yatügü ga doraxümare yéma yarüxugüxü. Rü ñanagürügü: —Toma nüxü taxinüë i ñaã yatü rü ñanagürü:

“Tá nagu chapogü ya daa tupauca ya taxüne ya Tupanaärü, rü tomaèxpüx i ngunexügu tá wenaxärü ichanadaxèë”, ñanagürügü. ⁶² Rü yexguma ga paigüarü äëxgacü ga Caipá rü inachi, rü ñanagürü Ngechuchuxü: —¿Rü tacümaã cunangãxü i ñuxmax? ¿Rü ñuxü ñaxü yüxü i ngèma cuchiga i nüxü yaxugügüxü? —ñanagürü. ⁶³ Natürü ga Ngechuchu rü nangeèxmare. Rü yemacèx ga paigüarü äëxgacü ga Caipá rü ñanagürü nüxü: —Tupana ya Maxücüegagu chanaxwèxe i aixcüma tomaã nüxü quixu na texé quiixü. ¿Rü cuma èxna i Cristu ya Tupana Nane quiixü, rü èxna tama? —ñanagürü. ⁶⁴ Rü Ngechuchu nanangãxü rü ñanagürü: —Ngü, rü ngèma nüxü quixuxü chixi. Rü pemaã nüxü chixu rü tá choxü pedaugü i ngèxguma Chaunatü ya Poracüxtawa charütöxgu rü ngèxguma caixanexügu wenaxärü núma chaxüxgu —ñanagürü. ⁶⁵ Rü yexguma ga paigüarü äëxgacü rü norü numaã nügüchirugu nagaugü. Rü ñanagürü: —Rü ñaã yatü rü tacü Tupanamaã nixugü. Rü taxucèxma marü tanaxwèxe i ñuxma i to i ore na napoxcuxücèx i ñaã yatü. Rü pematama marü nüxü pexinüë na ñuxãcü chixexümaã na yadexaxü. ⁶⁶ —¿Ñuxü ñapegüxü i pemax? —ñanagürü. Rü nümagü ga togü ga äëxgacügü rü nanangãxüğü rü ñanagürügü: —Ngèmaãcü chixexü naxü. Rü name nixi i noxtacüma nayu —ñanagürügü. ⁶⁷ Rü yexguma rü Ngechuchuchiwewa naçuaixgüe. Rü nüxna nanaçuaixcagü. Rü togü rü nanapegüchiewegü. ⁶⁸ Rü ñanagürügü: —Pa Cristux, ñuxü nacüex na texé cuxü pegüchiewegüxü rü cuxna naçuaixcagüxü! —ñanagürügü.

Pedru rü tama nügü nixu na Ngechuchuxü nacuaixü
(Mr 14.66-72; Lc 22.56-62; Cu 18.15-18, 25-27)

69 Rū yoxni ga Pedru rü ãëxgacüpataëxtüwa narüto. Rū wüxi ga pacü ga ãëxgacüarü duüxü ixicü, rü Pedrucëx iyaxü. Rū ngigürügü nüxü: —Cuma rü ta namücü quixi i ngëma Ngechuchu i Garirëaanecüãx —ngigürügü. 70 Natürü ga Pedru rü guxü ga yema duüxügüpëxewa rü tama nügü nixu na Ngechucharü duüxü yixü, rü ñanagürü: —Choma rü tama nüxü chacuëx i tacüchiga nixi i ngëma nüxü quixuxü —ñanagürü. 71 Rū yexguma marü yema ñpataëxtüarü ñãxwa ínaxüüxgu ga Pedru, rü nañ ga pacü nüxü idau. Rū ngigürügü namaã ga yema duüxügü ga yéma yexmagüxü: —Ñãã yatü rü Ngechuchu ya Nacharëtucüãxmcü nixi —ngigürügü. 72 Natürü ga Pedru rü wenaxärü tama nügü nixu na Ngechucharü duüxü yixü. Rū ñanagürü: —Choma rü tama nüxü chacuëx i ngëma yatü. Rū Tupana choxü poxcux ega tama aixcüma yixüga i chorü ore —ñanagürü. 73 Rū yixcamaxüra rü yema duüxügü ga yéma yexmagüxü rü Pedrucëx naxi, rü ñanagürügü nüxü: —Aixcüma nixi i cuma rü ta rü ngëma Ngechuchutanüxü quiixü, erü wüxi i Garirëaanecüãx idexaxürüü quidexa —ñanagürügü. 74 Rū nüma ga Pedru rü poraäcü nügü nixã, rü ñanagürü nüxü: —Rü aixcüma tama nüxü chacuëx i ngëma yatü. Rū ngëxguma doraxü chixuxgu rü Tupana choxü poxcux —ñanagürü. Rü yexgumatama nica ga otá. 75 Rü nüma ga Pedru rü yexguma nüxna nacüëxãchi ga yema ore ga Ngechuchu namaã nüxü ixuxü ga ñaxü:

“Rü naxüpa na otá içaxü, rü cuma rü tomaëxpüxcüna cugü tá quixã na chorü duüxü quiixü”, ñaxü. Rü yéma ínaxüxü ga Pedru rü poraäcüxüchima naxaxu.

27

Yudüguäarü ãëxgacügü rü Piratuxütawa nanagagü ga Ngechuchu
(Mr 15.1; Lc 23.1-2; Cu 18.28-32)

1 Rü yexguma yangungu rü guxüma ga paigüarü ãëxgacügü rü Yudüguäarü ãëxgacügüerügü, rü nügümaã nanamexëëgü na ñuxãcü Ngechuchuxü yamëxgüxü. 2 Rü nayanëixgüchacüügü rü yemaäcü ãëxgacü ga Piratuxütawa nanagagü. Piratu nixi ga Dumacüãx ga ãëxgacü ga Yudëaanemaã icuácü.

Nayu ga Yuda

3 Rü nüma ga Yuda ga Ngechuchuxü íyaxuaxüxü rü nüxü nadau ga Ngechuchuxü na napoxcuëxü. Rü poraäcü nagu narüxnü ga yema chixexü ga nümatama naxüxü. Rü yéma naxü naxütawa ga yema paigüarü ãëxgacügü rü yema Yudüguäarü ãëxgacügüerügü. Rü ngixü nayataeguxëë ga yema 30 tachinü ga diëru ga nüxna ngixü naxägücü. 4 Rü ñanagürü nüxü: —Choma rü marü chixexü chaxü, erü naëchita íchayaxuaxü i wüxi i yatü i taxuüma i chixexü üxü, rü ñuxma rü tá ngëmagagu nayu —ñanagürü. Natürü nümagü ga ãëxgacügü rü nanangãxügü, rü ñanagürügü: —Toma rü tama nüxü tacuáxchaü i ngëma. Cugagutama nixi, rü cuma i nüxü cucuáxü na ñuxãcü cügümaã cunamexëëxü i ngëma —ñanagürügü. 5 Rü yexguma ga Yuda rü yexma tupauca ga taxünechiãgu ngixü nawotanü ga yema diëru. Rü ñuxüchi ínixü rü nügü nayawëxnaxã. 6 Rü ga paigüarü ãëxgacügü rü ngixü nade ga yema diëru. Rü ñanagürügü: —Taxucürüwa tupauca ya taxüneärü diëruchiügu ngixü tanu i ñãã diëru, erü ngëmamaã tanaxütanü i ngëma yatü i tá yuxü —ñanagürügü. 7 Rü ñuxüchi nügümaã nanamexëëgü na yema diërumaã naxcëx nataxegüxüçëx ga

wüxi ga naâne ga waixüümü ga üwechixü nawa nayauxgüxü. Rü yema naâneçex nataxegü na nüxü nayexmaxüçex ga nachica ga ngexta na natëxgüäxüçex ga yema duüxüğü ga togü ga nachiuänecüäx ixigüxü. ⁸ Rü ngëmacëx i ñuxma rü ta i ngëma naâne rü Nagüchitaügu naxäega. ⁹ Rü yemaäcü ningu ga Tupanaärü ore ga nuxcümaücü ga norü orearü uruü ga Yeremíä ümatüxü ga ñaxü:

“Rü nümagü ngixü nade ga yema 30 tachinü ga dïeru ga Cristutanü Yudiügü ngixü ixägücü. ¹⁰ Rü yema dïerumaä naxcëx nataxegü ga wüxi ga naâne ga waixüümü ga üwechixü nawa nayauxgüxü, yema Cori ga Tupana chomaä nüxü ixuxürüü”,
ñaxü.

Piratupëxewa nayexma ga Ngechuchu
(Mr 15.2-5; Lc 23.3-5; Cu 18.33-38)

¹¹ Rü äëxgacü ga Piratuxütawa Ngechuchuxü nagagü. Rü nüma ga Piratu rü Ngechuchuna naca, rü ñanagürü: —¿Cuma quiixü i Yudiügüarü äëxgacü ya tacü? —ñanagürü. Rü Ngechuchu nanangäxü, rü ñanagürü: —Ngü, rü ngëma nüxü quixuxü chixi i chomax —ñanagürü. ¹² Rü Ngechuchuxü ínaxuaxüğü ga paigüarü äëxgacügü rü Yudiügüarü äëxgacügüerügü. Natürü ga Ngechuchu rü taxuxümaäma nanangäxü. ¹³ Rü yexguma ga Piratu rü ñanagürü: —¿Tama ëxna nüxü cuxinü i ngëma ore i namaä cuxü ínaxuaxüğüxü? —ñanagürü. ¹⁴ Natürü ga Ngechuchu rü taxuxümaäma nanangäxü. Rü yemacëx poraäcü nabëixächiaë ga äëxgacü ga Piratu.

Piratu rü Ngechuchumaä nanaxuegu na nayuxüçex
(Mr 15.6-20; Lc 23.13-25; Cu 18.38-19.16)

¹⁵ Rü guxüguma ga yema Üpetüchigaarü petagu, rü Piratu ínananguxuchixëëxü ga wüxi ga poxcuxü ga duüxüğü naxcëx ícagüxü, yerü yema nixi ga nacüma. ¹⁶ Rü yéma nayexma ga wüxi ga poxcuxü ga guxü ga duüxüğü meä nüxü cuäxü. Rü Barabá nixi ga naega. ¹⁷ Rü yexguma yéma nangutaquëxegüga duüxüğü, rü Piratu nüxna naca, rü ñanagürü: —¿Rü ngexürüxüxü i penaxwäexü na íchananguxuchixëëxü? ¿Penaxwëxexü na Barabáxü íchananguxuchixëëxü rü ëxna Ngechuchu i Cristumaä naxugüxüxü íchananguxuchixëëxü? —ñanagürü. ¹⁸ Rü yema ñanagürü ga Piratu yerü nüxü nacüx na Ngechuchuchi naxaïexü ga Yudiügüarü äëxgacügü, rü yemacëx nixi ga naxütawa nagagüäxü. ¹⁹ Rü yexguma norü tochicawa natoxgu ga Piratu, rü naxmëx yéma imuga, rü ngigürügü: —Tama name i cunapoxcu i ngëma yatü i taxuüma i chixexü üxü. Yerü nagagu ñne chütacü rü poraäcü chachixenegü —ngigürügü. ²⁰ Natürü yema paigüarü äëxgacügü rü Yudiügüarü äëxgacügüerügü, rü duüxüğüxü naxucuxëgü na naxcëx ínacagüxüçex na Barabáxü ínanguxuchixëëxüçex rü Ngechuchuxü na nayuxëëgüxüçex. ²¹ Rü äëxgacü ga Piratu rü wenaxärü duüxügüna naca, rü ñanagürü: —¿Ngëxürüxüxü i ngëma taxrewa i pema penaxwëxexü na íchananguxuchixëëxü? —ñanagürü. Rü nümagü ga duüxüğü nanangäxüğü, rü ñanagürügü: —Tanaxwëxe i Barabáxü ícunguxuchixëë —ñanagürügü. ²² Rü yexguma ga äëxgacü ga Piratu rü nüxna naca, rü ñanagürü: —¿Tacü tá chaxüxü namaä i ngëma Ngechuchu i Cristugu äegaxü? —ñanagürü. Rü guxüma ga duüxüğü rü nanangäxüğü, rü ñanagürügü: —¿Curuchawa yapota! —ñanagürügü. ²³ Rü yexguma ga Piratu rü ñanagürü nüxü:

—¿Natürü tacü rü chixexü naxü? —ñanagürü. Natürü ga nümagü ga duüxügü rü wenaxärü tagaacü ñanagürügü: —¡Curuchawa yapota! —ñanagürügü. ²⁴ Rü yexguma Piratu nüxü deüxgu ga marü taxucürüwama Ngechuchuxü na inanguxuchixêëgaxü, yerü ga duüxügü rü marü nanaxixächiãëgüchaü, rü yemacëx wüxi ga norü duüxüxü namu ga dexá naxütawa na tanangexücëx. Rü nügü nayauxmëx ga Piratu napëxewa ga guxüma ga yema duüxügü. Rü ñanagürü: —Tama chaugagu tá nixí i na nayuxü i ñaã yatü i taxuüma i chixexü üxü, rü pegagu tátama nixí —ñanagürü. ²⁵ Rü guxüma ga yema duüxügü nanangäxügü, rü ñanagürügü: —Togagu rü toxocügügagu tá nixí i nayuxü —ñanagürügü. ²⁶ Rü yexguma ga Piratu rü Barabáxü inanguxuchixêë. Rü ñuxüchi norü churaragüxü namu na Ngechuchuxü nacuaixgüxücëx, rü yemawena curuchawa na yanapotagüãxücëx. ²⁷ Rü ñuxüchi ga yema churaragü rü Piratupataarü aixepewa Ngechuchuxü nagagü. Rü yexma Ngechuchuxütagu nanangutaquëxexêë ga guxüma ga churaragü. ²⁸ Rü ñuxüchi Ngechuchuxü inacuxuchigü, rü wüxi ga máxü ga naxchiru ga dauxüga chuchuxüwa naxügüxü. ²⁹ Rü naëruwa nayangëxcuchigü ga wüxi ga boxü ga chuchuxüwa naxügüxü. Rü wüxi ga naixmenëxãxãcüxü nüxü nayayauxächixêë ga norü tügünemëxëwa. Rü ñuxüchi napëxegu nacaxãpüxügü, rü nüxü nacugüe, rü ñanagürügü: —¡Namaüx ya Yudíugüarü Æëxgacü ya Tacü! —ñanagürügü. ³⁰ Rü nüxna nacuaixgüe. Rü nüxna nanayauxgü ga guma naixmenëxãxãcü, rü naëruwa namaã nanaçuaixcagü. ³¹ Rü yexguma nüxü nacugüeguwena rü inacuxuchigü ga yema naxchiru ga daucharaxü. Rü wenaxärü naxchirugutama nayacuxêëgü. Rü ñuxüchi nayagagü na curuchawa yanapotagüãxücëx.

Ngechuchuxü curuchawa nipotagü

(Mr 15.21-32; Lc 23.26-43; Cu 19.17-27)

³² Rü yexguma yéma inaxíächigu, rü nüxü nadaugü ga wüxi ga yatü ga Chiréneçüãx ga Chimáügu äegacü. Rü guma yatüxü ngíxü iningexêëgü ga Ngechucharü curucha. ³³ Rü nawa nangugü ga wüxi ga nachica ga Górgutagu äegaxü. Rü ngëma naega rü Duüxêëruchinëxã ñaxüchiga nixí. ³⁴ Rü nüxna nanaxägü ga binu ga ngúxüãrü naächixêëruümaã äëxücü na yaxaxãxücëx. Rü Ngechuchu nüxü naxaxneta, natürü tama nayaxaxü. ³⁵ Rü yexguma marü curuchawa yapotagüãxguwena rü ga churaragü rü nanade ga Ngechuchuchiru. Rü ñuxüchi wüxi ga díëru ngíxü nañanagügü na yemawa nüxü nacuëxgüxücëx na tacü tá nayaxuxü ga wüxichigü. ³⁶ Rü ñuxüchi yéma narütogü ga churaragü na Ngechuchuna yéma nadaugüxücëx. ³⁷ Rü norü curuchatapëxewa nayapocuchi ga wüxi ga mürapewa ga äëgatachinüxü ga nüxü ixuxü ga tacüçëx Ngechuchuxü curuchawa na yapotagüxü. Rü ñanagürü: “Ñaã nixí i Ngechuchu i Yudíugüarü Æëxgacü ya Tacü”, ñanagürü. ³⁸ Rü yexgumarüü ta curuchawa nayapotagü ga taxre ga máëtagüxü. Rü wüxi rü Ngechucharü tügünecüwawa naxü, rü to ga norü toxwecüwawa. ³⁹⁻⁴⁰ Rü yema duüxügü ga yéma chopetüxü, rü Ngechuchumaã naguxchigagü, rü nanexãërugüãcüma ñanagürügü: —Dücëx, cuma cunangutaüxêëga ya tupauca ya taxüne, rü tomaëxpüx i ngunexügu wenaxärü icunadaxêëga. ¡Cügütama namaxêë i ñuxmax! Rü ngëxguma chi aixcüma Tupana Nane quixügu, rü írüxí i curuchawa! —ñanagürügü. ⁴¹ Rü yexgumarüü ta Ngechuchuxü nacugüecüraxü ga paigüarü äëxgacügü, rü

ngúxēēruŭgü ga ore ga mugüwa nguxēētaegüxü, rü Parichéugü, rü Yudiŭgüarü äëxgacüguerugü. Rü nügümaã ñanagürügü: ⁴² —Rü nüma rü togüxü namaxēxē natürü i ñuxma rü tama nüxü nacuèx na nügütama namaxēxü. Rü ngëxguma chi aixcüma Yudiŭgüarü äëxgacü yixügu, jrü ñuxma rü ínaxix i curuchawa na nüxü yaxögüxüçèx! ⁴³ —Rü nüma nagu naxñügu rü Tupana tá nüxü narüngüxēē. Écü, ñuxma rü Tupana nüxü rüngüxēēx ega aixcüma nüxü nangüxēēchaŭgu. ¿Tama éxna nümatama tamaã nüxü yaxuxü na Tupana Nane yixü? —ñanagürügü. ⁴⁴ Rü woo ga yema máëtagüxü ga naxrüü curuchawa ipotagüxü, rü namaã naguxchigagü.

Nayu ga Ngechuchu

(Mr 15.33-41; Lc 23.44-49; Cu 19.28-30)

⁴⁵ Rü yexguma rü guxü ga naãnewa naxēãne. Rü tocuchigu inaxügü ga yema ñuxmata tomaëxpüxarü orawa nangu ga yáuanecü. ⁴⁶ Rü yema tomaëxpüxarü oragu nixi ga Ngechuchu ga tagaãcü aita naxüxü, rü ñaxü: —Eri, Eri, ¿damá chabátani? —ñanagürü. Rü ngëma rü ñaxüchiga nixi:

“Pa Chorü Tupana, Pa Chorü Tupanax, ¿tüxcüü choxna quixügachixü?” ñaxüchiga nixi. ⁴⁷ Rü nümaxü ga duüxügü ga yéma yexmagüxü rü nüxü naxñüé, rü ñanagürügü: —Ñaa yatü rü nuxcümaücü ga Tupanaärü ore-arü uruü ga Eriacèx naca —ñanagürügü. ⁴⁸ Rü yexgumatama rü wüxi ga yema duüxügü ga yéma yexmagüxü rü inañaãchi rü Ngechuchuxütawa nanange ga wüxi ga tüaxmü ga binu ga marü ngúchièxüchicümaã yawaixēxü. Rü wüxi ga dexnewa nayanëix. Rü ñuxüchi Ngechuchuèxgu nanawëx na nüxü natuxuxüçèx. ⁴⁹ Natürü ga yema togü ga duüxügü ga yéma yexmagüxü rü ñanagürügü: —Yixrüma. Rü ngixã itarüdaunü ngxoxita Eria nuã ü na nüxü yanangüxēxüçèx —ñanagürügü. ⁵⁰ Rü wenañrü tagaãcü aita naxü ga Ngechuchu, rü ñuxüchi nayü. ⁵¹ Rü yexgumatama ga tupauca ga taxüñeärü tüyemachiãxü rü taxregu narügaute. Rü daxüwa inanaxügü ga na nagautexü rü ñuxmata ñaxtüwa nangu. Rü naxiãxächiane, rü narüngüxtegü ga nutagü ga itacü. ⁵² Rü yuetamaügü rü ningenagü. Rü wena namaxë ga muxüma ga duüxügü ga yuechiréxü ga Tupanaãxü yaxögüxü. ⁵³ Rü yexguma Ngechuchu wena maüxguwena, rü naxmaüwa ínachoxü ga yema duüxügü ga wena maxëxü. Rü Yerucharéüwa naxi. Rü muxüma ga duüxügü nüxü nadaugü. ⁵⁴ Rü yema churaragüarü äëxgacü rü norü churaragü ga Ngechuchuna ídaugüxü, rü nüxü nadaugü ga na naxiãxächianexü rü guxüma ga yema ngupetüxü. Rü yexguma rü poraãcü namuüë, rü ñanagürügü: —Aixcüma nixi ya daa yatü i Tupana Nane na yixü —ñanagürügü. ⁵⁵ Rü iyexmagü ga mucüma ga ngeçügü ga yéma yaxüwa nüxü rüdaunücü. Rü yema ngeçügü iyixi ga Ngechuchuxü íxümüçügü rü nüxü rüngüxēēgüçügü ga yexguma Gariréaanewa ne naxüxgu. ⁵⁶ Rü yema ngeçügütanüwa iyexma ga María ga Magadácüãx, rü María ga Chaütiágu rü Yúche naë, rü Zebedéu namëx ga Chaütiágu rü Cuáü naë.

Ngechuchu rü naxmaügu nayaxüchigü

(Mr 15.42-47; Lc 23.50-56; Cu 19.38-42)

⁵⁷ Rü yexguma marü nachütachaŭgu, rü yéma nangu ga wüxi ga yatü ga Arimatéacüãx ga taarü diëruãcü ga Yúhegu äegacü. Rü nüma rü ta Ngechuchuaxü nayaxö. ⁵⁸ Rü nüma rü Piratuna nayaca rü ngxoxita name

na nayauxãxũ ga Ngechuchuxũne ga curuchawa. Rũ Piratu norũ churagarũxũ namu na nũxna naxãgũãxũcèx ga Ngechuchuxũne. ⁵⁹ Rũ Yũche nanayaxu ga Ngechuchuxũne ga curuchawa. Rũ wũxi ga naxchãpenũũ ga ngẽmataxũmaã nananuque. ⁶⁰ Rũ yema naxmaũ ga yexwacaxũũ ga Yũche nũgũcèxtama duũxũgũxũ yacaxmaxẽẽxũ ga nuta ga tacũarũ mèxpũxũwa yexmaxũgu nayaxũcuchi ga Ngechuchuxũne. Rũ ñuxũchi nanangũxtaũ namaã ga wũxi ga nuta ga taxũchicũ. Rũ yemawena rũ ínixũ. ⁶¹ Rũ yẽma Ngechuchumaũãrũ toxmèxtawa irũtogũ ga María ga Magadãcũãx rũ naĩ ga María.

Purichĩagũ nũxna nadaugũ ga yema naxmaũ ga Ngechuchuxũ nagu yaxũcuchigũxũ

⁶² Rũ moxũãcũ ga ngũxchigaarũ ngunexũgu rũ paigũarũ ãẽxgacũgũ rũ Parichẽgũ rũ yẽma Piratuxũtawã naxĩ. ⁶³ Rũ ñanagũrũgũ nũxũ: —Pa Corix, nũxna tacuèxãchie ga yema yatũ ga Ngechuchu ga idoratèxãxũ rũ yexguma namaũxgu rũ ñanagũrũ tomaã:

“Ngẽxguma chayuxgu rũ tomaẽxpũx i ngunexũguwena rũ wena táxarũ ícharũda”, ñanagũrũ tomaã. ⁶⁴ —Rũ ngẽmacèx tanaxwèxe i churagarũ ngẽma cumugũ na nũxna yadaugũxũcèx i ngẽma naxmaũ ñuxmatãta tomaẽxpũx i ngunexũwa nangu na tama chũtacũ ngẽma naxĩxũcèx i norũ ngũexũgũ na yayauxgũãxũcèx i naxũne rũ ñuxũchi duũxũgũmaã nũxũ na yaxugũxũcèx na marũ wena namaxũxũ. Erũ ngẽxguma chi ngẽmaãcũ naxũpetũgu, rũ noxriarũ yexera tá nixĩ na duũxũgũxũ nawomũxẽẽxũ —ñanagũrũgũ. ⁶⁵ Rũ Piratu ñanagũrũ nũxũ: —Ngẽãgũ nixĩ i churagarũ i pexcèx. ¡Ècũ ngẽma namaã pexĩ na meãma pema penaxwèxexũãcũma nũxna pedaugũxũcèx i naxmaũ! —ñanagũrũ. ⁶⁶ Rũ yema churagarũmaã yẽma naxĩ, rũ meãma nayataixẽẽgũ ga guma nuta ga Ngechuchumaxũ namaã rũngũxtaũcũ. Rũ nanaxũarũ cuèxruũãxgũ na taxũema naẽchita ínaxũgachigũxũcèx ga guma nuta. Rũ ñuxũchi yexma nanamugũ ga churagarũ na nũxna nadaugũxũcèx.

28

Yuwa ínarũda ga Ngechuchu

(Mr 16.1-8; Lc 24.1-12; Cu 20.1-10)

¹ Rũ sabaduarũ ngunexũguwena ga yũxũarũ pèxmama, rũ yẽma naxmaũwa íyadaugũ ga María ga Magadãcũãx rũ naĩ ga María. ² Rũ ngũrũãchi porãcũ naxĩãxãchiane, yerũ wũxi ga daxũcũãx ga Cori ga Tupanaãrũ orearũ ngeruũ ínarũxĩ, rũ naxmaũwa nangu rũ ínanangũxgachi ga guma nuta ga namaã nangũxtaũcũ ga yema naxmaũ. Rũ ñuxũchi guma nutaètũwa narũto. ³ Rũ yema orearũ ngeruũ rũ wũxi ga bèixbèxanexũrũũ niyauracũũ. Rũ nacómũxũchi ga naxchiru. ⁴ Rũ yexguma yemaxũ nadaugũga ga churagarũ rũ norũ muũmaã nidurũxe, rũ yexma niyuãchitanũ. ⁵ Rũ yexguma ga yema orearũ ngeruũ, rũ ñanagũrũ ngĩxũ ga yema ngecũgũ: —¡Tãxũ i pemuũẽxũ! Choma nũxũ chacuèx rũ naxcèx pedaugũ ya Ngechuchu ga guma curuchawa yapotagũãcũ. ⁶ Nataxuma i nuã, erũ marũ wena namaxũ, yema nũma ũpa pemaã nũxũ yaxuxũrũũ. ¡Rũ nuã pexĩ, rũ ípeyadèux i naxmaũ i ngẽma inaxũgũãxũwa ga naxũne! ⁷ ¡Rũ paxã ípĩxĩ, rũ norũ ngũexũgũmaã nũxũ peyarũxugũe rũ marũ ínarũda rũ wena namaxũ ya Ngechuchu! Rũ ñuxma rũ marũ pexũpa nũxĩra Gariréaanewa naxũ i nũmax. Rũ ngẽma tá nixĩ i nũxũ

peyadauxũ. Rũ ngẽma nixĩ i ore i pemaã nũxũ chayarũxuxũ —ñanagũrũ. ⁸ Rũ yexguma ga yema ngecũgũ rũ paxama nũxna iyaxĩ ga yema naxmaũ. Rũ imuũẽ, natũrũ itaãẽgũ ta. Rũ poraãcũ iixũãchi na Ngechucharũ ngũexũgũmaã nũxũ na yanaxugũexũcẽx ga yema ore ga daxũcũãx ngĩmaã nũxũ ixuxũ. ⁹ Rũ yexguma inaxũãchiyane, rũ ngũrũãchi yẽma ngĩxcẽx nangox ga Ngechuchu, rũ ngĩxũ narũmoxẽ. Rũ ngĩmagũ rũ Ngechuchucẽx iyabuxmũ rũ nũxũ iyacuẽxũgũ, rũ naparawa inẽxãchitanũ. ¹⁰ Rũ nũma ga Ngechuchu rũ ñanagũrũ ngĩxũgũ: —;Tãxũ i pemuũẽxũ! ;Rũ ípixĩ rũ chaueneẽgũ i chorũ ngũexũgũmaã nũxũ peyarũxu rũ Gariréaanewa naxĩ! Rũ ngema tá nixĩ i choxũ nadaugũxũ —ñanagũrũ.

Churaragũ rũ paigũarũ ãẽxgacũgũmaã nũxũ nayarũxugũe ga yema ngu-petũxũ

¹¹ Rũ yexguma ga yema ngecũgũ rũ namagu naxĩyane, rũ ñuxre ga churaragũ ga yẽma naxmaũwa dauxũtaegũxũ rũ Yerucharẽũwa naxĩ. Rũ paigũarũ ãẽxgacũgũmaã nũxũ nayarũxugũe ga guxũma ga yema ngupetũxũ. ¹² Rũ yema paigũarũ ãẽxgacũgũ rũ namaã nayarũdexagũ ga Yudĩugũarũ ãẽxgacũgũerugũ. Rũ nũgũmaã nanamexẽẽgũ ga tacũmaã tá churaragũxũ na yaxucũxẽgũxũ. Rũ ñuxũchi nũxna ngĩxũ naxãgũ ga tacũ ga dĩeru. ¹³ Rũ namaã nũxũ nixugũe rũ ñanagũrũgũ: —;Pema rũ ñaperũgũgũ tá:

“Ngẽxguma chũtacũ tapeeyane, rũ norũ ngũexũgũ toechita ngema naxĩ rũ nayayauxgũ ga naxũne” ñaperũgũgũ tá! ¹⁴ Rũ ngẽxguma ãẽxgacũ ya Piratu tá nũxũ cuẽxgu i ngẽma ngupetũxũ, rũ toma rũ tá namaã tidexagũ rũ namaã tá tanamexẽẽ na taxuũma pemaã naxũcũcẽx —ñanagũrũgũ. ¹⁵ Rũ yexguma ga yema churaragũ rũ ngĩxũ nayauxgũ ga yema dĩeru. Rũ yema ãẽxgacũgũ namaã nũxũ ixugũxũrũũ duũxũgũmaã nũxũ nixugũe. Rũ ñuxma rũ ta ngẽmatama dexa nixĩ i nũxũ yaxugũxũ i Yudĩugũ.

Ngechuchu nanamu ga norũ ngũexũgũ

(Mr 16.14-18; Lc 24.36-49; Cu 20.19-23)

¹⁶ Rũ yema 11 ga Ngechucharũ ngũexũgũ rũ Gariréa- anewa naxĩ ga guma mẽxpũne ga Ngechuchu namaã nũxũ ixuxũnewa. ¹⁷ Rũ yexguma Ngechuchuxũ nadaugũgu rũ nũxũ nicuẽxũgũ, woo ñuxre ga norũ ngũexũgũ rũ tama aixcũma nayaxõgũ na Ngechuchu yĩxũ. ¹⁸ Rũ yexguma ga Ngechuchu rũ naxcẽx nixũ, rũ ñanagũrũ nũxũ: —Tupana rũ ãẽxgacũxũ choxũ nixĩxẽẽ i guxũ i daxũgũxũ i naãnewa rũ guxũ i ñoma i naãnewa. ¹⁹ —Rũ ñuxma rũ chanaxwẽxe i guxũ i nachiũãnewa pexĩ i guxũ i duũxũgũtanũwa. ;Rũ chorũ duũxũgũxũ peyaxĩgũxẽẽx! ;Rũ ípenabaiũxẽẽx chauégagu rũ Chaunatuégagu rũ Naãe i Üünexũegagu! ²⁰ ;Rũ penangũexẽẽx na naga naxĩnũẽxũcẽx i guxũma i ngẽma pexũ chamuxũ! ;Rũ dũcax, guxũgutãma pexũtawa changẽxmaẽcha ñuxmatãta nagũ i naãne! —ñanagũrũ ga Ngechuchu.

ORE I MEXÜ GA MARCU ÜMATÜXÜ

Cuáü ga baiüxēeruü nüxü nixu ga Tupanaärü ore ga dauxchitawa ga ngextá taxúema íxâpataxüwa

(Mt 3.1-12; Lc 3.1-9, 15-17; Cu 1.9-28)

¹ Ñã nixi i norü ügü i ore i mexü ya Ngechuchu ya Cristu ya Tupana Nanechiga. ² Rü nuxcümaücü ga Tupanaärü orearü uruü ga Ichaxía ümatüxü ga Tupanaärü ore, rü ñanagürü:

“Cupëxegu chayamu i chorü orearü ngeruü na namexēēaxüçèx i cumaü.

³ Rü dauxchitawa i ngextá taxúema íxâpataxüwa rü tá nangëxma i wüxi i duüxü i ngëma tagaäcü ñaxü: ‘¡Pegü pemexēëx naxçèx ya Cori. Rü naxçèx ipeyanawëxächixëëx i perü maxü!’ ”

ñaxü tá. ⁴ Rü Cuáü rü dauxchitawa ga ngextá taxúema íxâpataxüwa nangox rü yéma ínanabaiüxëë ga duüxügü. Rü namaã nüxü nixu ga na namexü na Tupanacèx nadaugüxü rü ínabaiüxü na Tupana nüxü nüxü nangechaüxüçèx ga norü pecadugü. ⁵ Rü guxüma ga duüxügü ga Yudeaanecüäx rü ñãne ga Yerucharéüçüäx rü yéma Cuáüxütawa naxüxü ga na nüxü iyanaxüñüxüçèx. Rü nümagü rü norü pecadugüxü yéma nayarüxugüxü, rü Cuáü rü natü ga Yudáüwa ínayabaiüxëëtanü. ⁶ Rü naxchiru ga Cuáü rü cameyutëxanaxçèx nixi, rü norü goyexü rü naxchëxmünaxçèx nixi. Rü beruremaã rü munümaã naxäwemü. ⁷ Rü Cuáü rü yema nüxü yaxuxü ga orewa, rü ñanagürü: —Choweama tá ne naxü ya choxü rüyexeracü. Rü choma rü taxuwama chame rü bai na ichayarümaxächixü na íchayawëxüçèx i norü chapatucunügü. ⁸ —Choma rü dexáwamare pexü íchabaiüxëë, natürü nüma rü tá Tupanaãe i Üünexü pexna nanguxëë —ñanagürü ga Cuáü.

Ngechuchuarü baiechiga

(Mt 3.13-17; Lc 3.21-22)

⁹ Rü yema ngunexügügu, rü Ngechuchu rü ínaxüxü nawa ga guma ñãne ga Nacharétu ga Gariréaanewa yexmane. Rü Cuáü rü natü ga Yudáüwa ínanabaieçëë. ¹⁰ Rü yexguma dexáwa ínaxüächigu, rü Ngechuchu nüxü nadau ga na yangenaxü ga daxüwa. Rü yema Tupanaãe i Üünexü rü wüxi ga muxtucurüü inanago, rü Ngechuchuna nangu. ¹¹ Rü daxüwa inanaxü ga wüxi ga naga ga ñaxü: —Cuma nixi i Chaune i cuxü changechaüxüchixü rü cumaã chataäexüchixü —ñaxü.

Ngechuchuxü naxü ga Chataná

(Mt. 4.1-11; Lc 4.1-13)

¹² Rü yemawena rü Tupanaãe i Üünexü rü dauxchitawa ga ngextá taxúema íxâpataxüwa Ngechuchuxü naga. ¹³ Rü yéma nayexma ga 40 ga ngunexü. Rü naëügü ga idüraexü íyexmagüxüwa nayexma, rü ngoxo ga Chataná rü nüxü naxü. Natürü Tupanaärü orearü ngeruügü ga daxüçüäx rü Ngechuchuxü narüngüxëëgü.

Ngechuchu rü Gariréaanewa inanaxügü ga norü puracü

(Mt 4.12-17; Lc 4.14-15)

¹⁴ Rü nawena ga poxcupataügu na napoxcuxü ga Cuáü, rü Gariréaanewa naxü ga Ngechuchu na naxunagüäxüçèx ga Tupanaärü ore i mexü. ¹⁵ Rü ñanagürü: —Marü nawa nangu i ngunexü ga Tupana

nagu unetaxũ, rü pexcèx ningaica na perü ãëxgacü na yĩxũ. ¡Rü ñuxma rü name nixĩ i Tupanacèx pedaugü rü peyaxögü i ngëma norü ore i mexũ! —ñanagürü.

Ngechuchu rü ägümicü ga püchaetanixũcèx naca
(Mt 4.18-22; Lc 5.1-11)

¹⁶ Rü yexguma naxtaxa ga Gariréaanacügu yaxũxgu ga Ngechuchu, rü yéma nüxũ nadau ga Chimáũ rü naëneë ga Aüdré. Rü nümagü rü woetama püchaetanixũ nixĩgü rü yéma naxtaawa napüchaegü. ¹⁷ Rü Ngechuchu rü ñanagürü nüxũ: —¡Chowe perüxĩ rü tá pexũ charüngũxëë na chauxütawa penagagüxũcèx i duũxügü! —ñanagürü. ¹⁸ Rü yexgumatama ga yema taxre, rü yéma nanawogü ga norü püchagü. Rü Ngechuchuwe narüxĩ. ¹⁹ Rü yéamaxüra naxü ga Ngechuchu, rü yéma nüxũ nadau ga Chaütiágu rü naëneë ga Cuáũ. Rü Zebedéu nanegü nixĩgü ga nümagü. Rü wüxi ga nguewa nayexmagü, rü yéma ínanangáitagü ga norü püchagü. ²⁰ Rü yexgumatama Ngechuchu naxcèx naca. Rü nümagü rü yéma nguewa tüxũ natèxgü ga nanatü ga Zebedéu namaã ga tümaärü puracütanixũgü, rü Ngechuchuwe narüxĩ.

Wüxi ga yatü ga ngoxo nawa yexmaxũchiga
(Lc 4.31-37)

²¹ Rü íãne ga Capernáũwa nangugü. Rü yexguma ngüxchigaarü ngunexüwa nanguxgu, rü Ngechuchu rü ngutaquëxepataüwa naxü rü yexma naxücu. Rü yéma inanaxügü ga na nangüxëëtaexũ. ²² Rü duũxügü rü nabèixächiãëgü namaã ga norü nguxëëtae, yerü aixcüma Tupanaärü poramaã meã nanangüxëë rü tama ngüxëëruülgü ga Moíchëarü mugüwa nguxëëtaegüxürüũ nixĩ. ²³⁻²⁴ Rü guma íãneärü ngutaquëxepataüwa nayexma ga wüxi ga yatü ga ngoxo nawa yexmaxũ. Rü aita yéma naxü, rü ñanagürü: —¿Tüxcüũ totanüwa cuxũ, Pa Ngechuchu Pa Nacharétucüãx? ¿Nuã cuxũ na toxũ cuyadèixũcèx? Choma rü cuxũ chacuèx na Tupana Nane ya Üünecü quiixũ —ñanagürü. ²⁵ Rü Ngechuchu nüxũ naxoox ga yema ngoxo, rü ñanagürü: —¡Iyarüngeëx rü ínaxüxü nawa ya yima yatü! —ñanagürü. ²⁶ Rü yexguma ga yema ngoxo rü guma yatüxũ niyuächixëë, rü tagaãcü aita naxüãcüma nawa ínaxüxü. ²⁷ Rü guxüma ga duũxügü rü nabèixächiãëgü, rü namücügüna nicachigü rü ñanagürügü: —¿Tacü nixĩ i ñaã? Maneca wüxi i ngexwacaxüxü i nguxëëtae nixĩ. Nüma rü aixcüma Tupanaärü poramaã meã nanguxëëtae. Rü woo i ngoxogü rü naga naxĩnüë i ngëxguma namuãxgu —ñanagürügü. ²⁸ Rü yemaãcü nixĩ ga paxa guxüwama ga Gariréaanewa rü Ngechuchuchigaxũ nacüëxgüxü ga duũxügü.

Ngechuchu rü Chimáũ ga Pedru nèxècèx nayataanexëë
(Mt 8.14-15; Lc 4.38-39)

²⁹ Rü yexguma ngutaquëxepataüwa ínaxüxügu ga Ngechuchu, rü Chaütiágu rü Cuáũmaã Chimáũ rü Aüdrépatawa naxü. ³⁰ Rü Chimáũ nèxë rü ngürücarewa iyexma, yerü iyaxaxüne. Rü Ngechuchumaã ngĩxũ nixugüë. ³¹ Rü ngĩxcèx nixü, rü ngĩxmëxgu nayayauxächi, rü ngĩxũ ínarüdaxëë. Rü yexgumatama igèuxächi ga na yaxaxünexũ. Rü írüda, rü inaxügü ga naxcèx na namexëëãxü ga òna.

Ngechuchu rü muxüma ga idaaweexũcèx nayataanexëë
(Mt 8.16-17; Lc 4.40-41)

³² Rū yexguma marū yanaxūcuxgu ga üèxcü ga na nachütachaüxü, rü Ngechuchuxütawa nanagagü ga guxüma ga duüxügü ga idaaweexü rü guxüma ga ingoxoāxgüxü. ³³ Rū guxüma ga yema iānecüāx rü yexma guma İpataarü İāxwa naxcèx nangutaquèxegü. ³⁴ Rū nūma nanameèxèè ga muxüma ga duüxügü ga nagúüraüxü ga daawemaā idaaweexü. Rū İnanawoxü ga muxüma ga ngoxogü, natürü nüxna nanachuxu ga na yadexagüxü, yerü nümagü ga ngoxogü rü nüxü nacuèxgü na texé yİxü.

Ngechuchu rü nanaxunagü ga ore ga mexü ga ngutaquèxepataüwachigü

(Lc 4.42-44)

³⁵ Rū ngunetüü ga tauta yangóonegu, rü inaxüāchi ga Ngechuchu. Rū İāneärü yéaxüra ga ngextá taxúema İxāpataxüwa naxü na yéamaxüra yayumüxèxècèx. ³⁶ Rū Chimāü rü namücügümaā Ngechuchucèx nayadaugü. ³⁷ Rū yexguma nüxü iyangaugügu, rü ñanagürügü nüxü: —Guxüma i duüxügü rü cuxcèx nadaugü —ñanagürügü. ³⁸ Natürü ga nūma rü nanangāxü rü ñanagürü nüxü: —İNgİxā rü toxnamana taxİ náİgü ya İānexācügü ya ngaicamagünewa na ngema rü ta chanaxunagüxüçèx i ore i mexü! Erü woetama ngēmacèx nixİ i Capernāüärü İānewa İchaxüxüxü. ³⁹ Rū yemaācü ga Ngechuchu rü guxüma ga Gariréaanegu nixüāgüchigü. Rū wüxichigü ga İāneärü ngutaquèxepataüwa rü nüxü nixuchigü ga ore ga mexü, rü İnayawoxüètanü ga ngoxogü.

Ngechuchu rü wüxi ga rüchaxünexüçèx nayataanexèè

(Mt 8.1-4; Lc 5.12-16)

⁴⁰ Rū Ngechuchucèx nixü ga wüxi ga yatü ga chaxünemaā idaawecü. Rū napèxegu nayacaxāpüxüācüma ñanagürü nüxü: —Pa Corix, ngèxguma cunaxwèxegu na choxü curümexèèxü, rü cuxü natauxcha na chauxcèx cuyataanexèèxü —ñanagürü. ⁴¹ Rū Ngechuchuaxü nangechaütümüü ga guma yatü. Rū nüxü ningögü rü ñanagürü nüxü: —Ngü, chanaxwèxe. İMarü curüme! —ñanagürü. ⁴² Rū yexgumatama nüxü inayarüxo ga na nachaxünexü ga guma yatü. Rū meāma naxcèx nitaane. ⁴³⁻⁴⁴ Rū Ngechuchu rü yexgumatama İnayamu. Rū meāma nanaxucuxè rü ñanagürü nüxü: —İDüçèx, tāxütāma texémaā nüxü quixu! İNatürü ngema paixütawa naxü, rü cügü nüxü yadauxèè! İRü curü mexèècèx nüxna yaxuaxü i curü āmare ga yema Moİché tüxü muxü na nüxü nacuáxüçèx i duüxügü na curümexü nawa i curü daawe! —ñanagürü. ⁴⁵ Natürü nūma ga guma yatü rü İnixü rü İnanaxügü ga na guxāmaāma nüxü yaxuxü ga yema nüxü ngupetüxü. Rū yemacèx ga Ngechuchu rü marü taxucürüwa ngóxüwama duüxügüpèxewa İānegügu naxücu. Natürü dauxchitagu ga ngextá duüxügü İtaxuxügu narüxāüx. Rū yéma naxcèx naxİxü ga duüxügü ga guxüānewa ne İxü.

2

Ngechuchu rü wüxi ga yatü ga nawāİxāchicüçèx nayataanexèè

(Mt 9.1-8; Lc 5.17-26)

¹⁻² Rū yixcama ga ñuxre ga ngunexüwena rü wenaxärü Capernāüärü İānegu naxücu ga Ngechuchu. Rū yexguma duüxügü nüxü cuāchigagügu na İpatawa nayexmaxü, rü yéma nangutaquèxegü ga muxüma ga duüxügü. Rū düxwa ga İāxtüwa rü nanapá. Rū nūma ga Ngechuchu rü namaā nüxü nixu ga ore i mexü. ³ Rū yéma nangugü ga āgümücü ga

yatügü ga yéma nangetaügüxü ga wüxi ga yatü ga nawãixächicü. ⁴ Natürü yema na namuxüchixü ga duüxügü, rü taxucürüwama Ngechuchuxütawa nangugü. Rü yemacëx Inanapogüetü ga Ngechuchu íyexmaxüwa ga guma ípata. Rü yéma norü caruügu Inanaçhüxüetaügü ga guma nawãixächicü. ⁵ Rü yexguma Ngechuchu nüxü dëuxgu ga ñuxácü aixcüma na yaxõgüãxü ga yema duüxügü, rü ñanagürü nüxü ga guma nawãixächicü: —Pa Chaunex, curü pecadugü rü marü cuxü nüxü changechaü —ñanagürü. ⁶⁻⁷ Natürü ñuxre ga ngúexëëruügü ga Moïchéarü mugüwa nguxëëtaegüxü rü yéma narütogü. Rü naãëwa ñaxügu narüxínüë: —¿Ñuxácü tama namuü na ngëmaácü yadexaxü? ¿Rü tacü Tupanamaã yaxugüxü? Erü Tupanaxícatama nixí ya duüxügüarü pecaduxü ngechaücü —ñaxügu narüxínüë. ⁸ Natürü yexgumatama ga Ngechuchu rü nüxü nicuëxächi ga yema nagu naxínüëxü, rü yemacëx nüxna naca rü ñanagürü nüxü: —¿Tüxcüü ngëmagu perüxínüë i pemax? ⁹ —¿Tacü nixí i rütauchamaëxü na namaã nüxü ixuxü ya daa nawãixächicü:

“Curü pecadugü rü marü cuxü nüxü changechaü”, rü ëxna:

“¡Inachi, rü nayaxu i curü caruü, rü íixü!” ñaxü? ¹⁰⁻¹¹ —Natürü ñuxma rü tá pexü nüxü chadauxëë na Chaunatü núma choxü muxü na duüxügüaxü nüxü changechaüxüçëx i norü pecadugü —ñanagürü. Rü yexguma yema ñaxguwena rü guma nawãixächicüxü ñanagürü: —Cumaã nüxü chixu rü ¡inachi, rü nayaxu i curü caruü, rü cupatawa naxü! —ñanagürü. ¹² Rü yexgumatama inachi ga guma idaawecü. Rü nanayaxu ga norü caruü, rü inaxüxü napëxewa ga guxüma ga yema duüxügü ga yéma yexmagüxü. Rü yemacëx ga yema duüxügü rü nabëixächiaëgü, rü Tupanaxü nicuëxüügü, rü ñanagürügü: —Taguma nüxü tadau i tacü i ñaãrüü íixü —ñanagürügü.

Lebícëx naca ga Ngechuchu
(Mt 9.9-13; Lc 5.27-32)

¹³ Rü yemawena rü wenaxãrü naxtaacutüwa naxü ga Ngechuchu. Rü yema muxüma ga duüxügü rü naxcëx naxí. Rü nüma rü nanangüexëë. ¹⁴ Rü yexguma yéma naxüpetügu ga Ngechuchu, rü yéma nüxü nadau ga Lebí ga Arupéu nane. Rü nüma ga Lebí rü yéma narüto nawa ga yema nachica ga duüxügüna díëru ngíxü Inayaxuxüwa naxcëx ga Dumacüãxãrü aëxgacü yerü woetama yema nixí ga norü puracü. Rü Ngechuchu rü ñanagürü nüxü: —¡Chowe rüxü! —ñanagürü. Rü inachi ga Lebí, rü nawe narüxü. ¹⁵ Rü yéma Lebípatawa nachibü ga Ngechuchu. Rü yéma nachibüe ga muxüma ga duüxügü ga Lebírüü Dumaãrü aëxgacüçëx díëru ngíxü yauxgüxü. Rü nayexmagü ta ga togü ga duüxügü ga taxüema nacümanaã taãëgüxü ga yéma mechawa rütogüxü namaã ga Ngechuchu rü norü ngüexügü. Yerü namu ga yema nawe rüxíxü. ¹⁶ Rü yéma nayexmagü ta ga ñuxre ga Parichéugü rü ngúexëëruügü ga Moïchéarü mugüwa nguxëëtaegüxü. Rü yexguma nüxü nadaugügu ga yema togümaã na nachibüxü ga Ngechuchu, rü norü ngüexügüna nacagü, rü ñanagürügü: —¿Ñuxácü i perü ngúexëëruü rü namaã nachibü i aëxgacüarü duüxügü i díëruarü yauxwa puracüexü rü duüxügü i pecaduãxgüxü? —ñanagürügü. ¹⁷ Rü yexguma yemaxü naxínügu ga Ngechuchu rü ñanagürü nüxü: —Ngëma poraexü rü tama nanaxwëxe ya duturu, natürü ngëma idaaweexü

waxi nixĩ i naxwèxexũ ya duturu. Choma rü tama mexũgũna na chaxuxũcèx nixĩ ga núma chaxũxũ, natürü núma chaxũ na nüxna chaxuxũcèx i pecaduãxgũxũ —ñanagürü.

Ngechuchuna aurechigacèx nacagüe

(Mt 9.14-17; Lc 5.33-39)

¹⁸ Rü wüxi ga ngunexũgu rü tama nachibüe yerü Tupanacèx naxauree ga Cuáũ ga baiũxèẽruũãrũ ngúexũgü rü Parichéugüarü ngúexũgü. Rü yemaxũ nadaugüga ga ñuxre ga duũxũgü, rü Ngechuchuxũtawa naxĩ rü nüxna nayacagüe, rü ñanagürügü: —Ngẽma Cuáũãrũ ngúexũgü rü Parichéugüarü ngúexũgü rü naxauree. ¿Rü tüxcüũ i curü ngúexũgü i tama naxaureexũ? —ñanagürügü. ¹⁹ Rü Ngechuchu nanangãxũ rü ñanagürü nüxũ: —¿Éxna wüxi i ngĩgüarü petawa rü pexcèx namexũ na naxaureexũ i ngẽma nüxna naxugũxũ ega natanüwa nangẽxmagu i ngẽma yatü i ngexwacèx ãmaxũ? Pemaã nüxũ chixu rü ngẽxguma natanüwa nangẽxmayane i ngẽma yatü i ngexwacèx ãmaxũ rü taxucürüwama naxauree i ngẽma nüxna naxugũxũ. ²⁰ —Natürü wüxi i ngunexũ rü ngẽma yatü i ngexwacèx ãmaxũ rü tá namücügũna nixũgachi. Rü ngẽma ngunexũgu tá nixĩ i naxaureexũ. [Rü chorü ngúexũgü rü taxucürüwama naxauree i ñuxma erü natanüwa changẽxma. Natürü ínangu tá i ngẽma ngunexũ na nüxna chixũgachixũ, rü ngẽxguma tá nixĩ i naxaureexũ.] ²¹ —Rü taxúema wüxi i naxchirutüchi i ngexwacaxũxũmaã tanapaita i wüxi i naxchiru i ngauxũ. Erü ngẽxguma nañaãchimügu i ngẽma natüchi i ngexwacaxũxũ, rü tá nanagãuxèẽ i ngẽma ngauxũ i naxchiru. Rü noxriarü yexera tá narügáu. ²² —Rü ngẽxgumarüũ ta taxúema ngexwacaxũcü ya binu rü wüxi i marü ngauxũ i naxchiũ i naxchẽxmünaxcèxgu tayabacuchi. Erü ngẽxguma ngẽmaãcü naxũxgu rü yima binu ya ngexwacaxũcü rü narüngu, rü tá nayawãixèẽ i ngẽma naxchiũ i ngauxũ i naxchẽxmünaxcèx. Rü ngẽxma tá inayarüxo ya binu rü naxchiũ rü ta. Rü ngẽmacèx tanaxwèxe ya ngexwacaxũcü ya binu rü ngexwacaxũxũ i naxchiũgu tayabacuchi. [Rü chorü nguxèẽtae i ngexwacaxũxũ rü ngẽxgumarüũ ta nixĩ na taxucürüwama namaã nawüxiguxũ i ngẽma nuxcümaũxũ i pecümagü —ñanagürü ga Ngechuchu.]

Ngechuchuarü ngúexũgü rü trigu nibuxetanü ga ngũxchigaarü ngunexũgu

(Mt 12.1-8; Lc 6.1-5)

²³ Wüxi ga ngũxchigaarü ngunexũgu ga Ngechuchu rü norü ngúexũgümaã trigunecüwa nachopetü. Rü nümagü ga norü ngúexũgü rü inaxĩãcüma inanaxügüe ga trigu na yabuxetanüxũ. ²⁴ Rü yema Parichéugü rü Ngechuchuna nacagü rü ñanagürügü: —Dücèx ¿rü tüxcüũ i curü ngúexũgü rü nanaxügü i ngẽma tama mexũ i ngũxchigaarü ngunexũgu na naxũxũ? —ñanagürügü. ²⁵ Natürü nüma ga Ngechuchu rü ñanagürü nüxũ: —¿Taguma éxna poperawa nüxũ pedau ga tacü na naxũxũ ga nuxcümaũcü ga ãẽxgacü ga Dabí rü natanüxũgü ga yexguma õna nüxũ taxũxgu rü nataiyaeü? ²⁶ Rü yexguma paigüarü ãẽxgacü yixĩgu ga Abiatáru, rü Dabí rü Tupanapatagu naxücu. Rü nanangõx ga yema pãũ ga üünexũ ga paigücèxicatama ixĩxũ. Rü nüma ga Dabí rü natanüxũmaã rü ta nangau ga yema pãũ —ñanagürü. ²⁷ Rü ñanagürü ta ga Ngechuchu: —Ngẽma ngũxchigaarü ngunexũ rü duũxũgücèx nixĩ ga naxũxũ. Rü tama ngũxchigaarü ngunexũcèx nixĩ ga naxũxũ ga duũxũgü. ²⁸ —Rü

ngëmacèx ya Tupana Nane ya duũxũxũ ixĩcũ rü namaã inacuèx ta i ngũxchigaarũ ngunexũ —ñanagürũ.

3

Wüxi ga yatü ga yumécüchiga
(Mt 12.9-14; Lc 6.6-11)

¹ Rũ wenaxârũ ngutaquëxepataũgu naxücu ga Ngechuchu. Rũ yéma nayexma ga wüxi ga yatü ga norü wüxichacüüwa yumécü. ² Rũ yema Parichéugü, rü Ngechuchuxũ nangugügü ngoxi tá namexëëã ga ngũxchigaarũ ngunexũgu, na yemaãcü nüxũ nayexmaxüçèx ga tacüçèx na ínaxuaxügüãxũ. ³ Rũ yexguma ga Ngechuchu rü ñanagürũ nüxũ ga guma yumécü: —Írũda, rü nuxã ngãxũtanügu yachi! —ñanagürũ. ⁴ Rũ yexguma ga Ngechuchu rü yema togü ga yéma yexmagüxũna naca, rü ñanagürũ nüxũ: —¿Tacü nixĩ i mexũ na naxüxũ i ngũxchigaarũ ngunexũgu? ¿Namexũ na naxüxũ i mexũ rü éxna chixexũ? ¿Rũ namexũ na namaxëëxũ rü éxna yamáxũ? —ñanagürũ. Natürü ga nümagü rü yexma nayarüngeëxgümare. ⁵ Rũ nüma ga Ngechuchu rü nuchametüãcüma nüxũ nidaugüãchi ga yema nüxũ íchomaëguãchixũ. Rũ nangechaũ yerü tama inaxĩnüëchaũ ga yema duũxügü. Rũ guma yatüxũ ñanagürũ: —¡Iyanawëxãchixëë ya cuxmëx! —ñanagürũ. Rũ yexguma ga guma yatü rü nügü inayarüwëxãchimëxëëë. Rũ yexgumatama rü narümemëx. ⁶ Natürü yexguma yemaxũ nadaugügu ga Parichéugü, rü ínachoxũ ga yéma. Rũ Erodetanüxũmaã inanaxügüe ga na naxçèx nadaugüxũ ga ñuxãcü tá na Ngechuchuxũ yamëxgüxũ.

Naxtaacutüwa Ngechuchucèx nangutaquëxegü ga muxüma ga duũxügü

⁷ Rũ Ngechuchu rü norü ngüexügümaã naxtaacutüwa naxü. Rũ muxüma ga duũxügü ga Gariréaanecüãx rü nawe narüxĩ. ⁸ Rũ yexguma nüxũ nacuáchigagügu ga guxüma ga yema mexügü ga naxüxũ ga Ngechuchu, rü naxçèx naxĩtaquëxe ga muxüma ga duũxügü ga Yudéaanecüãx, rü Yerucharéucüãx, rü Iduméãanecüãx, rü Yudáũrũ tocutüçüãx rü yema naãne ga Tíru rü Chidáũrũ íãnegü nawa yexmaxüçüãx. ⁹ Rũ yemacèx ga Ngechuchu rü norü ngüexügüxũ namu na wüxi ya ngue naxçèx namexëëgüxüçèx na tama yéma yaxüxtügüãxüçèx ga yema muxüma ga duũxügü. ¹⁰ Yerü nüma rü nanameëxëë ga muxüma, rü yemacèx guxüma ga yema idaaweexü rü naxçèx naxĩ na nüxũ yangögügüxüçèx. ¹¹ Rũ yexguma yema ngoxoãxgüxũ ga duũxügü nüxũ daugügu, rü napëxegu nacaxãpüxügü rü tagaãcü ñanagürügü: —Cuma nixĩ ya Tupana Nane quiixũ —ñanagürügü. ¹² Natürü nüma ga Ngechuchu rü poraãcü nayaxucuxëgü na tama duũxügümaã nüxũ yaxügüexüçèx ga nachiga.

Ngechuchu nanade ga 12 ga norü ngüexügü na toxnamana namugüãxüçèx

(Mt 10.1-4; Lc 6.12-16)

¹³ Rũ yemawena ga Ngechuchu rü wüxi ga mëxpúnewa ínaxũãchi. Rũ yéma naxçèx naca ga yema ngüexügü ga nüma nanaxwëxexũ. Rũ naxütagu naxĩtaquëxegü. ¹⁴ Rũ yematánüwa nayadexechi ga 12 ga norü ngüexügü na namüçügüxüchi yíixüçèx, rü na yamugüãxüçèx ga norü orearü unagüwa. Rũ yemagü rü Imugüxũgu nanaxüéga. ¹⁵ Rũ pora nüxna

naxã na Tupanaãrũ poramaã ínawoxũãxũcèx ga ngoxogũ. ¹⁶ Rũ ñaãgũ nixĩ ga naega ga yema 12 ga norũ ngúexũgũ ga nadexũ. Rũ wũxi nixĩ ga Chimáũ ga Pedrugu naxüéga. ¹⁷ Rũ togũ nixĩ ga Chaũtiágu rũ naëneë ga Cuáũ. Rũ nũmagũ rũ Zebedéu nanegũ nixĩ. Rũ Ngechuchu rũ Boanéregu nanaxüéga. Rũ ngẽma nixĩ i Duruanexũ Nanegũ —ñaxũchiga. ¹⁸ Rũ togũ nixĩ ga Aũdré, rũ Piripi, rũ Baturumé, rũ Mateu, rũ Tumachi, rũ Chaũtiágu ga Arupéu nane, rũ Tadéu, rũ Chimáũ ga iporaãcũcũ. ¹⁹ Rũ to nixĩ ga Yuda ga Icariúte ga yixcama bexma Ngechuchuxũ íxuaxũ.

*Ngechuchuxũ nixugũe na ngoxoarũ poramaã napuracũxũ
(Mt 12.22-32; Lc 11.14-23, 12.10)*

²⁰ Rũ yemawena rũ wũxi ga ĩpatagu naxũcu ga Ngechuchu. Rũ wena-xãrũ naxcèx nangutaquẽxegũ ga muxũma ga duũxũgũ. Rũ yemacèx woo na nachibüexũcèx rũ nangechicagũ ga nũma rũ norũ ngúexũgũ. ²¹ Rũ yexguma yemaxũ taxĩnũégu ga guxema natanũxũgũ ga Ngechuchu, rũ ítayadaugũ na tayagagũxũcèx, yerũ nũxũ tixugũgũ rũ: —Naxãũãemare —ñatagũrũgũ. ²² Rũ yexgumarũũ ta ga yema ngúexẽëruũgũ ga Moĩchearũ mugũwa nguxẽëtaegũxũ ga Yerucharéũwa ne ĩxũ, rũ ñanagũrũgũ: —Ñãã yatũ i Ngechuchu, rũ ngoxogũnatũ i Bechebúarũ poramaã nixĩ i ínawoxũãxũ i ngoxogũ —ñanagũrũgũ. ²³ Natũrũ ga Ngechuchu rũ naxcèx naca ga yema ngúexẽëruũgũ. Rũ wũxi ga ore ga cuèxruũxũ namaã nixu, rũ ñanagũrũ: —¿Rũ ñuxãcũ i Chataná i nũgũtama ínatèxũchixũ? ²⁴ —Rũ ngẽxguma chi wũxi i nachiũãnecũãx i duũxũgũ rũ nũgũtanũxũwatama nũgũ nadaixgu, rũ taxuacũma natai i ngẽma nachiũãne. ²⁵ —Rũ ngẽxguma chi wũxi ya ĩpatacũãx nũgũ itoyegu, rũ taxuacũma natai ya yima ĩpata. ²⁶ —Rũ ngẽxgumarũũ chi ta nixĩ i Chataná ega nũgũmaã nanuxgu rũ nũgũ yamèxgu, rũ taxuacũ chima natai i ngẽxguma. Rũ chi ngẽxma nagux. ²⁷ —Rũ taxuacũma texé wũxi ya yatũ ya poracũpatagu taxũcu na nũxna tanapuxũxũcèx i norũ ngẽmaxũgũ, ega tama tayanèixiragu. Erũ ngẽmaãcũxica tá nixĩ i tũxũ nanguxũxũ na tanapuxũxũ i norũ ngẽmaxũgũ. ²⁸ —Rũ aixcũma pemaã nũxũ chixu rũ Tupana tá nũxũ nũxũ nangechaũ i duũxũgũ i guxũma i norũ pecadugũ rũ guxũma i ñacũ i chixexũ i namaã yadexagũxũ. ²⁹ —Natũrũ texé ya chixexũ namaã ixugũxe i Tupanaãe i Üünexũ, rũ tagutãma tũxũ nũxũ nangechaũ ya Tupana. Rũ guxũgutãma chixexũwa tũxũ natèx —ñanagũrũ. ³⁰ Rũ yema ñanagũrũ ga Ngechuchu, yerũ yema ngúexẽëruũgũ ga Moĩchearũ mugũwa nguxẽëtaegũxũ rũ: “Nangoxoãx” ñanagũrũgũ nũxũ.

*Ngechuchuarũ mamá rũ naëneëgũchiga
(Mt 12.46-50; Lc 8.19-21)*

³¹ Rũ yexgumayane rũ ítangugũ ga Ngechuchuarũ mamá rũ naëneëgũ. Natũrũ ĩpataarũ düxétũgu tarũcho, rũ naxcèx yéma tangemagũ. ³² Rũ yema duũxũgũ ga Ngechuchuxũ íchomaëguãchixũ, rũ ñanagũrũgũ nũxũ: —Curũ mamá rũ cueneëgũ rũ cueyèxgũ, rũ yéa düxétũwa tangèxmagũ, rũ cuxcèx tadaugũ —ñanagũrũgũ. ³³ Rũ nũma nanangãxũ, rũ ñanagũrũ: —¿Texé tixĩ ya chaue rũ chaueneëgũ? —ñanagũrũ. ³⁴ Rũ yema nũxũ íchomaëguãchixũxũ nidaugũãchi, rũ ñanagũrũ: —Rũ daxegũ tixĩ ya chaue rũ chaueneëgũ. ³⁵ —Erũ guxãma ya texé ya naxũxe i Tupanaãrũ ngũchaũ, rũ yíxema tixĩ ya chaueneë rũ chaueyèx rũ chaue —ñanagũrũ.

4

Ore ga toecügu ixuxü
(Mt 13.1-9; Lc 8.4-8)

¹ Rü wenaxârü inanaxügü ga Ngechuchu ga na nangüexêêãxü ga duüxügü ga guma nextaxaãnacüwa. Rü muxüma ga duüxügü yexma naxcèx nangutaquëxegü. Rü yemacèx düxwa wüxi ga ngue ga yéma nextaawa yexmanegu nixüe ga Ngechuchu, rü gumawa narüto. Rü yema duüxügü rü nextaxaãnacügu narücho. ²⁻³ Rü yexguma ga Ngechuchu rü inanaxügü ga muxüma ga ore ga cuèxruüwa na nangüexêêãxü ga duüxügü. Rü norü nguxêêtaewa rü ñanagürü: —¡Dücèx, iperüxñnüe i ñaã ore! Wüxi ga yatü ga toecü rü triguarü towa naxü. ⁴ —Rü yexguma triguchiremaã nagüaneãgu, rü ñuxre ga triguchire rü namagu nayi. Rü íngugü ga werigü, rü nanawecu. ⁵ —Rü náigü ga triguchire rü nutatanügu nayi ga ngextá ínachicaxüwa ga waixümmü. Rü paxa narüxügü ga guma triguchire, yerü ga waixümmü rü tama nayaxcü. ⁶ —Natürü yexguma nangunagügu ga üèxcü, rü ínanagu ga guma trigu rü narüñëxgü. Rü nayue, yerü tama poraãcü nixãmaxã. ⁷ —Rü náigü ga triguchire rü toranecügu nayi. Rü yexguma nayaegu ga tora, rü guma triguxü inawocu, rü yemacèx tama nixo. ⁸ —Natürü náigü ga triguchire rü mexü ga waixümmügu nayi. Rü meãma nayae, rü muxüma ga trigu nawa ínguxuchi. Rü nümaxüneyèxawa rü 30 püxü ínguxuchi ga norü o, rü náigüwa rü 60, rü náigüwa rü 100 ínguxuchi —ñanagürü. ⁹ Rü ñuxüchi ñanagürü ta: —Rü yíxema áchjègüxe, jrü nüxü taxñnüe i ñaã ore! —ñanagürü.

Tacüchiga nixí ga yema ore ga cuèxruügu ixuxü
(Mt 13.10-17; Lc 8.9-10)

¹⁰ Rü yemawena ga yexguma nanüxícèxgu ga Ngechuchu, rü yema naxüttagugüxü wüxigu namaã ga yema 12 ga norü ngüexügü, rü nüxna nacagüe ga na tacüchiga yíixü ga yema ore ga cuèxruügu ixuxü. ¹¹⁻¹² Rü nüma nanangãxü rü ñanagürü nüxü: —Tupana rü pexü nüxü nacuèxêê i ngëma èxügüxü i taxuüma i togü nüxü cuáxü na ñuxãcü ãëxgacü na yíixü i nümax. Natürü ngëma togü i tama tatanüxü ixíxücèx rü cuèxruügu chayaxuãcüma namaã nüxü chixu i ore na woo nüxü nadaunügu rü ñoma tama nüxü nadaugüxürü na yíixücèx, rü woo nüxü naxñnüegu rü tama nüxü na nacuèxgüxücèx. Rü ngëmaãcü namaã nüxü chixu na tama nüxü naxoexücèx i nacüma i chixexü rü tama Tupana nüxü nüxü ngechaüxücèx i norü pecadugü —ñanagürü.

Ngechuchu rü meã nanangoxêê ga yema ore ga cuèxruü ga toecüchigagu ixuxü
(Mt 13.18-23; Lc 8.11-15)

¹³ Rü Ngechuchu ñanagürü nüxü: —¿Pema rü ta èxna tama nüxü pecuèxgü na tacüchiga yíixü i ngëma ore i cuèxruü i nüxü chixuxü? ¿Rü ñuxücürüwa tá nüxü nacuèxgü i ngëma togü? ¹⁴ —Rü yíxema toexe, rü yíxema tixí ya ore i mexü unagüxe. ¹⁵ —Rü nangëxma i duüxügü i guma triguchire ga namagu yixünerüü ixígüxü. Rü nümagü rü nüxü naxñnüe i ore i mexü, natürü yixcama marü nüxü naxñnüëguwena, ngëma nangu i Chataná rü nüxna nanapu i ngëma ore i mexü ga noxri yaxögüxü. ¹⁶ —Rü togü rü ngëma triguchire ga nutatanügu yixünerüü nixígü. Rü ngëmagü nixí i nüxü ñnüèxü i ore i mexü, rü taãëcüma nayauxgüxü. ¹⁷ —Natürü

ngēma na tama aixcūma nagu naxīnūēxū i ngēma ore, rü paxaāchitama nayaxōgū. Rū ngēmacēx i yīxcama ngēxguma ngēma oregagu guxchaxūgū nūxū ūpetūgu rü ēxna duūxūgū naxchī aiegu, rü nūxū narūxoē i ngēma ore ga noxri yaxōgūxū. ¹⁸⁻¹⁹—Rū togū rü guma triguchire ga toranecūgu yixūnerūū nixīgū. Nūmagū rü nūxū naxīnūē i ngēma ore i mexū, natürü ñoma i naāneārū ngēmaxūgūcēx naxoegaāēgū rü norū dīēruaguama narūxīnūē, rü nanaxwēxegū i nūxū na nangēxmaxū i muxūma i to i norū ngēmaxūgū. Rū guxūma i ngēma rü nūxū nūxū inayarūngūmaēxēē i ngēma ore i mexū rü nūxū nūxū narūxoexēē na tama naxūgūāxūcēx i ngēma mexū i Tupana nūxū naxwēxexū. ²⁰—Rū togū rü guma triguchire ga mexū ga waixūmūgu yixūnerūū nixīgū. Ngēmagū nixī i nūxū ñnūēxū i ore i mexū rü nayauxgūxū rü meā Tupana naxwēxexūācūma maxēxū. Rū nūmaxū rü guma trigu ga 30 pūxū nawa ínguxuchinerūū nixīgū. Rū nūmaxū rü guma 60 pūxū nawa ínguxuchinerūū nixīgū. Rū nūmaxū rü guma 100 pūxū nawa ínguxuchinerūū nixīgū —ñanagürü.

Ore ga omūgu ixuxū
(Lc 8.16-18)

²¹ Rū yexgumarūū ta ñanagürü nūxū: —¿Éxna nuā tanange i wūxi i omū na wūxi i caichāūtūūgu rü ēxna wūxi i pechicatūūgu na yaxūcuchixūcēx? Tama ngēmaācū nixī, erū wūxi i omū rü dauxnagu tanaxūnagū na ngēma inabaxixūcēx. ²²—Rū ngēxgumarūū ta i guxūma i tacū iicūxū, rü yīxcūra rü duūxūgū rü tá nūxū nacuēxgūama. Rū guxūma i ngēma ñuxma duūxūgūcēx ēxūguxū rü tá nangoxoma i yīxcūra. ²³—Rū yīxema āchixēgūxe, ¡rū nūxū taxīnūē i ngēma ore! —ñanagürü. ²⁴ Rū yexgumarūū ta ñanagürü nūxū: —¡Meā naga pexīnūē i ngēma nūxū pexīnūēxū! Rū ngēma pema naga na pexīnūēxūrūū tá nixī i Tupana i pexna naxāāxū i cuēx. Rū naētū tá poraācū pexū narūngūxēē. ²⁵—Rū pemaā nūxū chixu, rü texé ya aixcūma naga ñnūxē i ñāā ore i mexū rü Tupana rü yexeraācū tá tūxū nūxū nacuēxēē. Natürü yīxema tama naga ñnūxē i ñāā ore rü Tupana tá tūxna nanayaxu i ngēma íraxū i cuēx i tūxū ngēxmachirēxū —ñanagürü.

Ore ga triguchire ga rüxūxūgu ixuxū

²⁶ Rū Ngechuchu rü ñanagürü ta: —Pemaā tá nūxū chixu i wūxi i ore i cuēxrūū na nūxū pecuáxūcēx na ñuxācū āēxgacū na yīxū ya Tupana. Rū wūxi ya yatū rü waixūmūgu nanato ya triguchire. ²⁷—Rū nūma ya yatū rü chūtacū nape rü moxūācū ínarūda, rü yoxni ya yima triguchire rü narūxū rü niyachigū. Natürü nūma ya yatū rü tama nūxū nacuēx na ñuxācū na naxūxū rü na nayaxū. ²⁸—Rū ngēmaācū i ngēma waixūmū rü nūēchatama nanaxūxēē ya yima triguchire. Rū naātūgūxira narūxū rü yīxcama i nachacu rü ngēmawena nachacuwa nanguxū i norū o. ²⁹—Rū ngēxguma marū yadauxgu i ngēma norū o, rü nanabuxu erū marū nawa nangu i norū buxgū —ñanagürü.

Ore ga motachachiregu ixuxū
(Mt 13.31-32; Lc 13.18-19)

³⁰ Rū ñanagürü ta ga Ngechuchu: —Rü Tupanaarū ore rü yexera nixūchigū ¿Rü nanañacūraxū rü tacūgu tanangu? ³¹⁻³²—Rü ñoma wūxi ya motachachire ya waixūmūgu itoxūnerūū nixī. Rū woo guxūnema ya nanetūchirexū narūxīramaē, natürü ngēxguma inatoxgu, rü narūxū rü naya ñuxmata guxūma i togū i nanetūxū nayexera. Rū nachacūū rü nita, rü woo werigū rü natanūgu nixūachiāū —ñanagürü.

Cuèxruũgu ixuxũ ga oremaã nidexa ga Ngechuchu

(Mt 13.34-35)

³³ Rũ yemaãcũ ga Ngechuchu rũ muxũma ga nayexgumaãchiraũxũ ga ore ga cuèxruũgũmaã nanangúexêê ga duũxũgũ. Natürũ yema cuèxruũgũ rũ tama yema duũxũgũarũ cuèxũ nangupetũ. ³⁴ Rũ ore ga cuèxruũgu ixuxũxĩcatama nixĩ ga norũ ngxuxêetae. Rũ yixcama ga yexguma nanũxĩcèxgũgu, rũ norũ ngúexũgücèx meãma nanangoxêê ga guxũma.

Ngechuchu rũ buanecũxũ rũ yuapexũ ínayachaxãchixêê

(Mt 8.23-27; Lc 8.22-25)

³⁵ Rũ yematama ngunexũgu ga marũ nachütachaũgu, rũ Ngechuchu rũ ñanagürũ nüxũ ga norũ ngúexũgũ: —¡Ngĩxã rũ naxtaxaarũ tocutũwa taxĩ! —ñanagürũ. ³⁶ Rũ yexguma duũxũgũna yéma inaxĩãchi. Rũ norũ ngúexũgũ rũ Ngechuchuxũ nigagũ naga ga guma ngue ga marũ nawa nayexmane. Rũ yexgumarũũ ta ga togũ ga duũxũgũ rũ náigũ ga nguegũgu ínayaxũmücũgũ. ³⁷ Rũ yexguma yaxãũyane rũ inaxũ ga wũxi ga buanecũ ga taxũchicũ. Rũ yema na nataxũchixũ ga buanecũ, rũ guma nguegu niyauxcuchichigũ ga yuape, rũ yexma nabaxũgũchaũ. ³⁸ Natürũ ga Ngechuchu rũ guma nguechinũwa wũxi ga cũxeruũgu naca, rũ yéma nape. Rũ ínanaãaixgũgũ, rũ ñanagürũgũ nüxũ: —Pa Ngúexêẽruũx, ¿éxna curũ me nixĩ na nuxma ibaxũgũxũ? —ñanagürũgũ. ³⁹ Rũ yexguma ínaruãda ga Ngechuchu. Rũ buanecũna nachogũ rũ ñanagürũ nüxũ ga guma naxtaxa: —¡Iyarũchiane rũ Íyachaxãchi! —ñanagürũ. Rũ ínayachaxãchi ga buanecũ rũ guxũwama ínachaxanemare. ⁴⁰ Rũ yemawena ga Ngechuchu rũ norũ ngúexũgũxũ ñanagürũ: —¿Tũxcũũ ngẽmaãcũ poraãcũ pemuêê? ¿Ñũxma rũ ta éxna tama aixcũma peyaxõgũ? —ñanagürũ. ⁴¹ Natürũ nũmagũ ga norũ ngúexũgũ rũ poraãcũ namuêê. Rũ nũgũna nacagũe rũ ñanagürũgũ: —¿Texe éxna nixĩ ya daa rũ èixrucũ ya buanecũ rũ yuape rũ naga naxĩnũèxũ? —ñanagürũgũ.

5

Yatũ ga Gadáracũãx ga ngoxogũ nawa yexmagũxũ

(Mt 8.28-34; Lc 8.26-39)

¹ Rũ naxtaxaarũ tocutũwa nangugũ ga Gadáranewa. ²⁻³ Rũ yexguma marũ nguewa ínaxũegu ga Ngechuchu, rũ yéma naxcèx nixũ ga wũxi ga yatũ ga ngoxo nawa yexmaxũ. Rũ yema yatũ rũ duũxẽgũchĩquẽxewa ne naxũ, yerũ yexma nixĩ ga yanaxauchigũnèxũxũ. Rũ taxũexũma nanguxũ na tayanáixũ, woo cadenamaã. ⁴ Rũ woo muẽxpũxcũna cadenamaã nayanèixparagũ rũ nayanèixchacũgũ, natürũ nũma rũ guxũguma íraxũgu inanacauũgũama, rũ yemaãcũ taxũexũma nanguxũ. ⁵ Rũ ngunecũ rũ chũtacũ rũ yuetachiquẽxetanũgu rũ naxpũxgũgu nanaxauchigũane. Rũ yexma nanacaeane, rũ nutamaã nũgũgu napogũ. ⁶ Natürũ yexguma yaxũgutama Ngechuchuxũ nadèuxgu, rũ naxcèx inaããchi, rũ napèxegu nayacaxãpũxũ. ⁷ Rũ aita naxũãcũma ñanagürũ nüxũ: —¿Tũxcũũ nuã choxũ cuyachixewe, Pa Ngechuchux, Pa Tupanaxũchi Nanex? Rũ Tupanaegagu cuxũ chacèèxũ na tama ngúxũ choxũ quingexêèxũ —ñanagürũ. ⁸ Rũ yemaãcũ nidexa ga yema ngoxo yerũ Ngechuchu rũ marũ ñanagürũ nüxũ: —Pa ngoxox, ¡ínaxũxũ nawa ya yima yatũ! —ñanagürũ. ⁹ Rũ yexguma ga Ngechuchu rũ

nüxna naca, rü ñanagürü: —¿Tacü nixĩ i cuéga? —ñanagürü. Rü nüma ga ngoxo nanangãxũ, rü ñanagürü: —Muxũchixũ nixĩ i chauéga, erü tamu i tomãx —ñanagürü. ¹⁰ Rü porãcũ Ngechuchuxũ nacèèxũgü na tama ínawoxũãxũcèx ga yema naãnewa. ¹¹ Rü yema nachicaarü ngaicamana ga naxpũxpechinüwa rü nayexmagü ga muxüma ga cuchigü ga yéma chibüexũ. ¹² Rü yemacèx ga yema ngoxogü rü Ngechuchuxũ nacèèxũgü, rü ñanagürügü: —¿Ngema cuchitanüwa toxũ namugü na nagu tachocuxũcèx! —ñanagürügü. ¹³ Rü Ngechuchu rü: —Ngü —ñanagürü. Rü yexguma ga yema ngoxogü rü guma yatüwa ínachoxũ, rü yema cuchigügu nayachocu. Rü yema cuchigü ga wixgu 2000 ixigũxũ rü inaxũãchi, rü naxtaacutüarü mëxpũxüwa nayarüyuxgü. Rü yexma nayi. ¹⁴ Rü yema cuchigüarü dauruũgü rü ñãnewa nabuxmü. Rü ñãnewa rü yema ñãneärü ngaicamana ipeagũxũ ga duũxũgütanüwa nüxũ nayarüxugügü ga yema üpetüxũ. Rü ga duũxũgü rü ínayadaugü. ¹⁵ Rü yexguma Ngechuchu íyexmaxüwa nangugügu, rü yéma nüxũ nadaugü ga guma yatü ga ngoxoãxchirécü. Rü yéma narüto, rü naxãxchiru, rü meãma naãexũ nacüex. Rü porãcũ nabaixãchiãègü ga duũxũgü. ¹⁶ Rü yema cuchigüarü dauruũgü ga nüxũ daugũxũ ga tacü na nüxũ ngupetüxũ ga guma yatü ga ngoxoãxchirécü rü tacü nüxũ na ngupetüxũ ga yema cuchigü, rü yema nixĩ ga togü ga duũxũgümaã nüxũ ixugüexũ ga guxüma ga yema ngupetüxũ. ¹⁷ Rü yexguma yemaxũ naxĩnüègu ga duũxũgü, rü inanaxügüe ga Ngechuchuxũ na nacèèxũgüxũ ga na ínaxũxũcèx ga yema naãnewa. ¹⁸ Rü yexguma wenaxãrü nguegu yaxüegu ga Ngechuchu, rü guma yatü ga ngoxoãxchirécü, rü nüxũ nacèèxũ na Ngechuchuwe naxũxũcèx. ¹⁹ Natürü ga Ngechuchu rü tama nanaxwèxe, rü ñanagürü nüxũ: —¿Cuchiüwa naxü rü cutanüxümaã nüxũ yarüxu i guxüma i ngèma cuxcèx naxüxũ ya Cori ya Tupana, rü ñuxãcü nüxũ na cungechaütümüxũ! —ñanagürü. ²⁰ Rü nüma ga guma yatü rü ínixũ. Rü inanaxügü ga guxüma ga Decaporíchiuanewa yexmagüne ga ñãnegüwa nüxũ na yaxuxũ ga yema Ngechuchu naxcèx üxũ. Rü guxüma ga duũxũgü rü nabaixãchiãègü.

*Yáiruxacüchiga rü yema nge ga Ngechuchuchirugu ingögücüchiga
(Mt 9.18-26; Lc 8.40-56)*

²¹ Rü yexguma nguegu naxtaxaarü tocutüwa nataegugu ga Ngechuchu, rü muxüma ga duũxũgü rü naxcèx yéma nangutaquèxegü. Rü nüma rü naxtaapechinüwa nayexma. ²² Rü yexguma yéma nayexmayane, rü yéma naxütawa nangu ga ngutaquèxepataüãrü ãèxgacü ga Yáirugu ãegacü. Rü yexguma Ngechuchuxũ nadèuxgu, rü napèxegu nanangücuchi. ²³ Rü porãcũ nüxũ nacèèxũ, rü ñanagürü nüxũ: —Chauxacü rü ituraxüchi. Rü chanaxwèxe i ngèma cuxü na ngĩxũ cuyarüngögüxũcèx na ngĩxcèx yataanexũcèx rü namaxũxũcèx —ñanagürü. ²⁴ Rü yexguma ga Ngechuchu rü nawe narüxũ. Rü muxüma ga duũxũgü ínayaxümcügü. Rü yéma nayaxüxtügü. ²⁵ Rü yema muxü ga duũxũgütanüwa iyexma ga wüxi ga nge ga 12 ga taunecü idaawecü namaã ga na naxãgüechaxũ. ²⁶ Rü muxüma ga duturugü ngĩxũ naxüxũgü rü porãcũ ngüxũ ngĩxũ ningexèègü. Rü yemaãcü natücèxma ngĩxũ iguxèè ga guxcü ga ngĩrü dïeru. Natürü tama ngĩxcèx nitaaneega, rü niyexeraguchigüama ga ngĩrü ñaawe. ²⁷ Rü üpaacü togüèxwa Ngechuchuchigaxũ ixĩnü. Rü yemacèx yéma ixũ. Rü natanüwa ga yema muxüma ga duũxũgü rü

Ngechuchuweama ne ixū rü naxchirugu iyangögü. ²⁸ Yerü ñaxūgu irüxīnū: —Ngēxguma chi naxchiruxūmare chingögügu, rü chi chauxcèx nitaane —ñaxūgu irüxīnū. ²⁹ Rü yexgumatama ínayachaxāchi ga ngīgü, rü nüxü iyacuèxāchi ga ngīxīnewa ga na ngxicèx yataanexü. ³⁰ Natürü ga Ngechuchu rü nüxü nicuèxāchi ga na nawa ínaxüxüxü ga pora. Rü naxcèx nadauegu ga yema muxūma ga duüxügü, rü nüxna naca, rü ñanagürü: —¿Texé tixī ya chauxchirugu ingögüxe? —ñanagürü. ³¹ Rü norü ngüexügü nanangāxügü, rü ñanagürügü: —Cuma nüxü cudau i ñuxre i duüxügü ngema cuxü na yaxütügüxü rü ngēxguma rü ta:

“¿Texé ya choxü ingögüxe?” ñacuxü —ñanagürügü. ³² Natürü ga Ngechuchu rü nüxü nidaugüāchiana na tüxü nadauxcèx ga na texé na tixü ga guxema nüxü ingögüxe. ³³ Rü yexguma ga yema nge rü ngírü muümaā yaduruxācūma naxütawa ingu, yerü nüxü icuèx ga tacü na ngīxü ngupetüxü. Rü napēxegu iyacaxāpüxü, rü aixcūmaxüchī namaā nüxü iyaxu ga guxūma. ³⁴ Rü nüma ga Ngechuchu rü ñanagürü ngīxü: —Pa Chauxacüx, curüme erü cuyaxō. ¿Rü taēācūma íxü, erü marü naxüxü i curü daawe! —ñanagürü. ³⁵ Rü yexguma íyadexayane, yéma nangugü ga ñuxre ga natanüxügü ga guma ngutaquēxepataüärü āēxgacü rü ñanagürügü nüxü: —Cuxacü rü marü iyu. ¿Tüxcüü nüxü cuchixeweecha ya Ngüexēēruü? —ñanagürügü. ³⁶ Natürü ga Ngechuchu rü tama nüxü nacuāxchaü ga yema duüxügüarü dexa. Rü yemacèx guma ngutaquēxepataüärü āēxgacüxü ñanagürü: —¿Tāxü i cumuüxü, rü yaxōmare! —ñanagürü. ³⁷ Rü yexguma ga Ngechuchu rü ínayagagü ga Pedru rü Chaütiágu rü Cuáü ga Chaütiágueneē. Natürü tama nanaxwèxe na texé ga togue nawe rüxīxü. ³⁸ Rü yexguma guma ngutaquēxepataüärü āēxgacüpatawa nangugügu, rü Ngechuchu nüxü nadau ga na íyacuxcuxü rü poraäcü aita naxüeācūma naxauxexü ga duüxügü. ³⁹ Rü guma ípatagu naxücu ga Ngechuchu, rü ñanagürü: —¿Tüxcüü ípicuxcu rü ngēmaācü pexauxe? Ngēma bucü rü tama iyu. Rü ipemare —ñanagürü. ⁴⁰ Rü nüxü nacugüecüraxüāma ga duüxügü. Natürü nüma ga Ngechuchu rü íāxtüwa nanamugü ga guxūma. Rü yema bucünatücèx naca rü ngīē, rü yema namücügü, rü namaā nixücu ga íyayexmaxüwa ga yema bucü. ⁴¹ Rü ngīxmèxgu nayayauxāchi, rü ñanagürü ngīxü: —Tarita cumi —ñanagürü. Rü ngēma ore rü ñaxüchiga nixi:

“¡Inachi, Pa Bucü, ñacharügü cuxü!” ñaxüchiga nixi. ⁴² Rü yexgumatama ga yema bucü ga 12 ga taunecü ngīxü yexmèxcü, rü írüda rü iyaxü. Rü poraäcü nabaixāchiāēgü ga duüxügü. ⁴³ Natürü ga Ngechuchu rü poraäcü nüxna nanachuxu na taxúemaāma nüxü yaxugüexcèx ga yema ngupetüxü. Rü ñuxüchi nanamu na ngīxü naxüwemügüxcèx ga yema bucü.

6

Nacharétuwa nayexma ga Ngechuchu (Mt 13.53-58; Lc 4.16-30)

¹ Rü yéma ínaxüāchi ga Ngechuchu, rü guma íāne ga Nacharétu ga nawa nayaxünewatama naxü. Rü norü ngüexügü rü nawe narüxü. ² Rü yexguma ngüxchigaarü ngunexüwa nanguxgu rü ínanaxügü ga na nangüexēētaexü ga ngutaquēxepataüwa. Rü yema muxūma ga duüxügü ga yéma irüxīnūèxü, rü nabaixāchiāēgü. Rü nügüna nacagüe rü ñanagürügü: —¿Ngextá naxcèx nangux i guxūma i ngēma ngüxēētae? ¿Rü

ngextá nanayaxu i ngēma cuèx? ¿Rü ñuxãcü nanaxü i ngēma mexügü i taxügü i naxüxü? ³ —¿Taux êxna ñaã yïixü i carpinteru i Ngechuchu, i Mariane, ya Chaŕtiágu rü Yúche rü Chimáú rü Yudaēneē ixícü? ¿Rü taux êxna i naēyèxgü rü nuxma tatanügu naxãchiüügüxü? —ñanagürügü. Rü yemacèx ga yema duüxügü rü tama naga naxïnüēchaü. ⁴ Natürü ga Ngechuchu rü ñanagürü nüxü: —Wüxi i Tupanaärü orearü uruü rü guxüwama i duüxügü rü nüxü nangechaügü. Natürü norü ñānewatama rü natanüxügütanüwatama rü napatawatama rü tama aixcüma nüxü nangechaügü —ñanagürü. ⁵ Rü yemacèx taxuacüma yéma nanaxü ga muxüma ga mexügü ga Tupanaärü poramaã naxüxü. Rü noxretama ga duüxügü ga idaaweexüxüxücatama ningögü rü naxcèx nayataanexēēgü. ⁶ Rü nabaixãchiãē ga Ngechuchu, yerü yema duüxügü rü tama nüxü nayaxögü.

Ngechuchu rü norü ngüexügüxü nimugü na nüxü yanaxugüexücèx ga Tupanachiga

(Mt 10.5-15)

Rü Ngechuchu rü guma ngaicamagüne ga ñānexãcügügu nixügüchigü, rü nayangüexēētanü ga duüxügü. ⁷ Rü naxcèx naca ga yema 12 ga norü ngüexügü, rü inanaxügü ga na namuãxü ga taxrechigü. Rü nüxna nanaxã ga pora na ñawoxüãxücèx ga ngoxogü. ⁸ Rü nüxna naxãga ga na taxuxüma íyangegüxücèx ga norü namawaxü, rü bai ga choca rü bai ga pãu rü bai ga norü dñeru. Rü nanaxwèxe ga naxnetüxüxücatama na íyangegüxü. ⁹ Rü namaã nüxü nixu na nacuaixcuxü ga norü chapatu. Natürü tama nanaxwèxe ga taxre ga naxchiru na íyangegüxü. ¹⁰ Rü ñanagürü nüxü: —Rü ngëxguma wüxi ya ñānewa wüxi ya ígu pechocuxgu, jrü ngëxma pepegu ñuxmata pema ñuxgu ngema ipexiãchix nawa ya yima ñāne! ¹¹ —Rü ngëxguma ngexnerüüne ya ñānewa tama meã pexü nayauxgüchaügu rü tama pexü inaxïnüēchaügu, jrü ípechoxü i ngēma! Rü ngëxguma ipexiãchigu, jrü ipenapagü i perü üxaxücutü na ngēmawa nüxü nacüexgüxücèx na nataxüchixü tá i norü poxcu i ngëxguma naguxgu i naãne! —ñanagürü. ¹² Rü yexguma inaxiãchi ga norü ngüexügü. Rü duüxügümaã nüxü nixugüe ga na nüxü naxoexücèx ga nacüma ga chixexü rü Tupanacèx na nadaugüxücèx. ¹³ Rü ñanawoxü ta ga muxüma ga ngoxogü. Rü chixümaã yachagüãcüma nanameēxēē ga muxüma ga idaaweexü.

Nayu ga Cuáü ga baiüxēēruü

(Mt 14.1-12; Lc 9.7-9)

¹⁴ Rü Ngechuchuchigaxü naxïnü ga ãëxgacü ga Erode, yerü guxüwama duüxügü poraãcü nachiga nidexagü. Rü yexguma ga Erode rü ñanagürü: —Rü ngēma Ngechuchu nixi i Cuáü i baiüxēēruü ixixü rü wena namaxü, rü ngēmacèx nixi i nüxü nangëxmaxü i pora na naxüãxücèx i ngēma taxü i mexü i Tupanaärü poramaã naxüxü. ¹⁵ Natürü ga togü rü ñanagürügü: —Nuxcümañcü ga orearü uruü ga Ería nixi —ñanagürügü. Rü togü rü ñanagürügü: —Wüxi i Tupanaärü orearü uruü i nuxcümaügüxürü nixi —ñanagürügü. ¹⁶ Natürü yexguma yemaxü naxïnügu ga Erode, rü ñanagürü: —Rü ngēma Ngechuchu nixi i Cuáü ga chorü churaragüxü chidayenaxãxēēchirëxü, rü ñuxma rü wenaxärü namaxü —ñanagürü. ¹⁷ Rü yema ñanagürü ga Erode yerü marüchirëx Cuáüxü niyaxu rü poxcupataügu cadenamaã nayachota. Rü yemaãcü nanaxü ngígagu ga

naxmèx ga Erodía ga naëneë ga Piripimèxchirèx ixïcù ga ngìxù napucù ga Erode. ¹⁸ Yerù ùpaacù ga Cuáù rù Erodemaã ñanagürü: —Tama name i cumxèx cuyaxìxèè i cueneëmèx —ñanagürü. ¹⁹ Rù yemacèx ga Erodía rù poraãcù Cuáùchi ixai rù inaxwèxe ga na yamáãxù, natürü poraãcù ngìxù naguxcha. ²⁰ Yerù ngìte ga Erode rù Cuáùxù namuü, yerü nüxù nacuèxchirèx na wüxi ga yatü ga mecü rù üünecü na yìixù, rù yemacèx nixì ga naëtüwa nachogüxù. Rù yexguma Cuáùârü orexù naxìnügu ga Erode, rù naxoegaãè, natürü meã nüxù inarüxìnü. ²¹ Natürü wüxi ga ngunexù nawa nangu na ngìxù natauxchaxù na yamáãxùcèx ga Cuáù, ga yexguma Erodearü taunecüarü ngunexüwa nanguxgu rù wüxi ga peta ga taxù naxüxgu naxcèx ga norü ñatügumaègüxù ga àèxgacügü, rù norü churagarüarü àèxgacügü rù yema Gariréaanecüãx ga corigü ga taxügü. ²² Rù yema petawa iyaxücu ga Erodíaxacü, rù yema petatanüxüpèxewa íyañaächixüchigüxù. Rù poraãcù norü me iyixì ga Erode rù norü petatanüxügü. Rù yemacèx ga nüma ga àèxgacü ga Erode rù ñanagürü ngìxù ga yema pacü: —¡Choxna naxcèx naca i tacü i cunaxwèxexù, rù tá cuxna chanaxã! —ñanagürü. ²³ Rù aixcümáxüchi ngímaã inaxuneta, rù ñanagürü: —Ngèxürüüxù i tacü i choxna naxcèx cuçaxù rù tá cuxna chanaxã, woo ngãxügu i chorü naãne yixìgu —ñanagürü. ²⁴ Rù nüxna iyaxügachi, rù ngíèna iyaca, rù ngígürügü: —¿Tacü i cunaxwèxexù na naxcèx íchaçaxù? —Ngígürügü. Rù ngíè ngìxù ingãxù, rù ngígürügü: —¡Naxcèx ínaca i Cuáù ya baiüxèèruüèru! —ngígürügü. ²⁵ Rù yexgumatama ga yema pacü rù paxa iyaxücu ga àèxgacüxütawa rù ngígürügü: —Chanaxwèxe i ñuxmatama paxa wüxi ya poratugu choxna cunaxã i Cuáù ya baiüxèèruüèru —ngígürügü. ²⁶ Rù nüma ga àèxgacü rù poraãcù inayarümaãchi, natürü yema norü petatanüxüpèxewa marü ngímaã na inaxunetaxücèx, rù tama ngìxù nawomüxèèchaü. ²⁷ Rù yemacèx ga Erode rù yexgumatama yéma ínapoxcuxüwa nanamu ga wüxi ga churara na naxütawa nangeaxücèx ga Cuáùèru. ²⁸ Rù poxcupataüwa naxü ga yema churara, rù Cuáùxù nidaeru. Rù wüxi ga poratugu àèxgacüxütawa nanange ga yema naèru. Rù yema pacüna nanaxã. Rù ngíma rù ngíèna iyaxã. ²⁹ Rù yexguma yemaxù nacuáchigagügu ga norü ngúexügü ga Cuáù, rù yéma poxcupataüwa nayayauxgü ga naxüne, rù inayatèxgü.

Ngechuchu rù nanachibüexèè ga 5000 ga yatügü
 (Mt 14.13-21; Lc 9.10-17; Cu 6.1-14)

³⁰ Rù yemawena rù yema norü ngúexügü ga yamugüxù rù Ngechuchumaã nangutaquèxegü. Rù namaã nüxù nixugüe ga guxüma ga yema naxügüxù rù yema nanguxèètaegüxù. ³¹ Rù Ngechuchu rù ñanagürü nüxù: —¡Nuã pexì, rù ngìxã, wüxi i nachica i ngextá taxúema íxãpataxüwa taxì, na paxaãchi ngèxma yarüngügüxücèx! —ñanagürü. Rù yema ñanagürü yerü namu ga duüxügü ga yéma ingugütanücüüxù rù woeguxù ga togü. Rù yemacèx ga Ngechuchu rù norü ngúexügü rù woo na nachibüexücèx rù nangechicagü. ³² Rù yemacèx wüxi ga nguegu nichoü, rù noxrüwama wüxi ga nachica ga taxúema íxãpataxüwa naxì. ³³ Natürü muxüma ga duüxügü nüxù nadaugü ga yexguma inaxiãchigu, rù nüxù nacüèxgü ga texégü na yìixù. Rù yemacèx guxüne ga guma ñanegücüãx ga duüxügü, rù dauxchitagu nibuxmü rù napèxegu nayayi. ³⁴ Rù yexguma nguewa ínaxüegu ga Ngechuchu, rù nüxù nadau ga yema muxüma ga duüxügü. Rù nüxù nangechaütümüügü yerü ñoma

carnerugü ga ngearü dauruñãxgüxürü nixīgü. Rū inanaxügü ga na nangúexēēãxü ga muxüma ga norü ore. ³⁵ Rū yexguma marü nayáuanegu, rü norü ngúexügü rü naxcèx naxī, rü ñanagürügü: —Marü nayáuanexüchi rü ñaã rü wüxi i nachica i taxüema nagu ápataxü nixī. ³⁶ —Rū ngēmacèx name nixī i ícuyamugü i duñxügü na namapechinüwa ipeagüxü i duñxügüxütawa rü ñānexācügü ya ngaicamagünewa naxīxücèx na ngema norü ònacèx yataxegüxücèx —ñanagürügü. ³⁷ Natürü ga Ngechuchu rü nanangãxü, rü ñanagürü nüxü: —¡Pematama penaxüwemü! —ñanagürü. Rū nümagü nanangãxügü rü ñanagürügü: —¿Éxna cunaxwèxe i 200 tachinü i díeru naguxü i pāwècèx nüxü tayataxexü na ngēmamaã tanachibüexēēxücèx? —ñanagürügü. ³⁸ Rū yexguma ga Ngechuchu rü ñanagürü nüxü: —¿Ñuxre i pāü pexü nangēxma? ¡Rü ípeyadèyx! —ñanagürü. Rū yexguma íyadaugüãgu, rü ñanagürügü nüxü: —Toxü nangēxma i wüximēēxpüx i pāü rü taxre i choxni —ñanagürügü. ³⁹ Rū yexguma ga Ngechuchu rü duñxügüxü namu na ñuxrechigü nügüxütawa rütogüxücèx ga maxētēxewa. ⁴⁰ Rū ínarütogü ga 100 chigü rü 50 chigü ga duñxügü. ⁴¹ Rū yexguma ga Ngechuchu rü nanade ga yema wüximēēxpüx ga pāü rü yema taxre ga choxni. Rū daxügüxü ga nañegu nadawenüãcüma Tupanana moxē naxã. Rū inanabücu ga yema pāü, rü norü ngúexügüna nanana na yema duñxügüxü yanuãxücèx. Rū yema taxre ga choxni rü ta guxüma ga yema duñxügüxü nüxü nayanuxēē. ⁴² Rū guxüma nachibüe ñuxmata meãma nüxü yangu. ⁴³ Rū yemawena rü 12 ga pexchigü nanapagüamatama namaã ga yema pāü rü choxni ga íyaxügüxü. ⁴⁴ Rū yema yema pāügü ngõxgüxü rü 5000 ga yatügü nixī.

Dexáétügu nixü ga Ngechuchu
(Mt 14.22-27; Cu 6.16-21)

⁴⁵ Rū yemawena ga Ngechuchu rü duñxügüxü íyamugüyane rü wüxi ga ngegu nayachoñxēē ga norü ngúexügü na yoxni naxtaxaarü tocutüwa Bechaídawa naxīxücèx. ⁴⁶ Rū yexguma duñxügüxü íyamugüguwena, rü mēxpünewa naxü ga Ngechuchu na yema yayumüxèxücèx. ⁴⁷ Rū yexguma marü nachütagu, rü naxtaxaarü ngãxütüwa nayexmagü ga norü ngúexügü. Rū Ngechuchu rü nüxīcatama dauxchitawa nayaxüãchi. ⁴⁸ Rū nüxü nadau na guxchaxüãcüma yaxãgüxü ga norü ngúexügü, yerü ga buanecü rü nawaama nabuxuchi. Rū yexguma marü yangunechaügu, rü Ngechuchu rü dexáétügu nawe narüxü. Natürü ñoma nüxü naxüpetüchañxürü nügü nixīxēē. ⁴⁹⁻⁵⁰ Rū yexguma norü ngúexügü nüxü daugüga ga dexáétüga na yaxüxü, rü nagu narüxñnüē ga wüxi ga naxchiximare na yīxü. Rū yemacèx aita naxüe, yerü guxüma nüxü nadaugü rü poraãcü nabaixãchiãgü. Natürü yexgumatama ga Ngechuchu rü namaã nidexa rü ñanagürü nüxü: —¡Peporael Rū chomachirēxtama chixī. ¡Tãxü i pemuñxü! —ñanagürü. ⁵¹⁻⁵² Rū ngegu nixüe, rü inarüxó ga buanecü. Natürü nümagü ga norü ngúexügü rü nabaixãchiãgümare yerü woo nüxü na nadaugüxü ga yema mexü ga Tupanaãrü poramaã naxüxü ga Ngechuchu ga yexguma yema pāü yamuxēēgu, natürü tama nüxna nacüē x-ãchie na Tupana Nane na yīxü yerü nüxü naguxcha na yaxögüãxü.

Yenecharétuanewa Ngechuchu nanameēxēē ga idaaweexü
(Mt 14.34-36)

⁵³ Rū yexguma marū yanguūgu ga naxtaawa, rū Yenecharétuanewa nangugū. Rū yexma naxānacūgu nanangaxūgū ga naweū. ⁵⁴ Rū yexguma nguewa ínachoūgu, rū yexgumatama ga duūxūgū rū nūxū nicuēxāchitanū ga Ngechuchu na yīixū. ⁵⁵ Rū yema naānewa rū guxūne ga ġūwa nabuxmū ga yema duūxūgū. Rū yexguma nūxū nacuēxgūgu ga ngextá na nayexmaxū ga Ngechuchu, rū yéma norū caruūgūgu naxcèx nana-gagū ga idaaweexū. ⁵⁶ Rū guxūwama ga ngextá íyanguchigūxūwa ga Ngechuchu, ga ġānexācūgūwa rū ġānegū ga itaxūnewa, rū ġānepechinūwa, rū yexma ítamūpechinūgu naxcèx nayamugū ga idaaweexū. Rū nūxū naceēxūgū na tama nūxna nachūxāxūcèx na naxchirupechinūgumare yangōgūgūxūcèx. Rū guxūma ga yema nūxū ingōgūexū, rū naxcèx nitaanegū.

7

Tacū nixī i Tupanapēxewa duūxūgūxū chixexēēxū
(Mt 15.1-20)

¹ Rū Ngechuchucèx naxī ga Parichéugū namaā ga ñuxre ga ngúexēēruūgū ga mugūwa nguxēētaegūxū ga Yerucharéūwa ne ġū. ² Rū yexguma ñuxre ga Ngechuchuarū ngúexūgūxū nadaugūgu ga tama Yudiūgūcūma na yanguxēēgūxū, rū tama Yudiūgū yauxmēxgūxūrū na nayauxmēxgūxū naxūpa na nachibūexū, rū chixri nachiga nidexagū. ³ Yerū nūmagū ga Parichéugū rū guxūma ga togū ga Yudiūgū rū nagu naxī ga norū oxīgūcūma na nayauxmēxiraxū na yemaācū Tupanapēxewa nūgū yamexēēgūxū naxūpa ga na nachibūexū. ⁴ Rū ngēxguma taxepataūwa ne naxīxgu ga nūmagū rū tama nachibūe ega tama ngēmaācū nūgū nayauxmēxiragu. Rū nangēxma i muxūma i togū i nuxcūmaūxū i nacūmagū. Rū ngēmacèx nagu naxī i ngēma nacūmagū na Tupanacèx nayauxgūāxū i norū pochiyugū rū basugū rū paneragū rū pechicaxūgū. ⁵ Rū yemacèx ga yema Parichéugū rū ngúexēēruūgū rū Ngechuchuna nacagū, rū ñanagūrūgū: —“Tūxcūū i curū ngúexūgū i tama nagu naxīxū i ngēma tórū oxīgūcūma rū tama toma tayauxmēxgūxūrū nayauxmēxgūxū naxūpa na nachibūexū? —ñanagūrūgū. ⁶ Natūrū Ngechuchu nanangāxū rū ñanagūrū: —Pa Duūxūgū ya Pegū Naxaixcūmaraūgūxe, rū aixcūma pechiga nixī ga yema ore ga nuxcūmaūcū ga Tupanaārū orearū uruū ga Ichaxía ūmatūxū ga ñaxū: “Ñāā duūxūgū rū naāxmaāmare choxū nicuēxūūgū, natūrū naāēwa rū tama chaugu narūxīnūē. ⁷ Rū taxuwama name na ngēmaācū natūcèxma choxū yacuēxūūgūxū. Erū guxūma i ngēma norū nguxēētae rū yatūgūarū mugūmare nixī, rū tama aixcūma chorū mu nixī”, ñaxū. ⁸ —Rū pema i ñuxma rū aixcūma nūxū perūxoe i Tupanaārū mugū na nagu pexīxūcèx i ngēma duūxūgūcūmamare ixīxū —ñanagūrū. ⁹ Rū yexgumarū ta ñanagūrū nūxū: —Pema rū penangexrū i Tupanaārū mugū na pecūmagūgutama pexīxūcèx. ¹⁰ —Yerū ga Moīché rū ñanagūrū: “¡Tūxū nangechaū ya cunatū rū cue!” ñanagūrū. Rū ñanagūrū ta: “Texé ya tūmanatūmaā rū ēxna tūmaēmaā chixexū ixugūxe, rū āēxgacū tá tūmamaā nanaxuegu na tayuxūcèx”, ñanagūrū. ¹¹ —Natūrū pema rū ñaperūgūgū:

“Marü name ega wüxi ya yatü nanatüxü rü naëxü ñaxgu: ‘Taxucürüwama chorü ngëmaxümaa cuxü charüngüxëë, erü guxüma i chorü ngëmaxü rü marü Tupanana chanaxâ,’ ñaxgu. ¹² —Rü ngëxguma texé ngëma ñagügu, rü pexcëx rü marü namexü na tama tümanatüxü rü tümaëxü tarüngüxëëxü. ¹³ —Rü ngëmaäcü ipeyanaxoxëë i Tupanaärü mugü, na nagu pexixütcëx i pecümagütama i togüwa pexüexëëxü. Rü ngëxgumarüü ta muxüma i to i pecümagü i ngëmarüü ixixügu pexi —ñanagürü. ¹⁴ Rü yexgumawena duüxügücëx naca ga Ngechuchu, rü ñanagürü nüxü: —¿Meã choxü iperüxñüë, rü nüxü pecuá i ñaã chorü ore! ¹⁵ —Rü taxuüma i tacü i düxétüwa ne üxü rü taëxwa ixücuxü nixi i Tupanapëxewa tüxü chixexëëxü. Natürü ngëma taãewa ne üxü, rü ngëma waxi nixi i tüxü chixexëëxü i Tupanapëxewa. ¹⁶ —Rü ngëxguma pixächixëëgu, jrü nüxü pexiñüë i ngëma ore! —ñanagürü. ¹⁷ Rü yexguma Ngechuchu duüxügüna ixügachigu rü ñpatagu naxüucxgu, rü norü ngüexügü nüxna nacagü nachiga ga yema nguxëëtae. ¹⁸ Rü nüma rü ñanagürü nüxü: —¿Pema rü ta ëxna tama nüxü pecuëxéga i ngëma? ¿Éxna tama i nüxü pecuáxü na taxuüma i tacü i düxétüwa ne üxü rü taëxwa ixücuxü yixü i Tupanapëxewa tüxü chixexëëxü? ¹⁹ —Erü guxüma i ngëma düxétüwa ne üxü rü taëxwa ixücuxü, rü tama taãewa nangu. Natürü taanüwa naxümare na yixcama taxünewa inaxüxüxcëx —ñanagürü. Rü yemaäcü nüxü nixu na guxüma i ñna rü namexü na nangöxü. ²⁰ Rü ñanagürü ta: —Rü ngëma duüxüãëwa ne üxü, rü ngëma waxi nixi i Tupanapëxewa nachixexëëxü. ²¹⁻²² —Erü norü aixepewa i naãewa nixi i ne naxüxü i muxüma i chixexügü. Rü ngëma nixi i chixexügu na naxiñüxü, rü naxüñearü ngüchaüwe na naxüxü, rü na nangixü, rü na namáetaxü, rü nañ i ngemaã na inapexü, rü togüarü ngëmaxü na nüxü nanguchaüxü, rü chixexü na naxüxü, rü na yadoratëxáxü, rü chixexü i nacümagügu na naxáxü, rü na yaxáixächiwëxëxü, rü na naxoregütëxáxü, rü nügü na yacuëüxü, rü tama meã naãëxü na nacuáxü. ²³ —Rü guxüma i ngëma chixexügü rü duüxüärü aixepewa nixi i ne naxixü, rü ngëma nixi i Tupanapëxewa nachixexëëxü —ñanagürü.

Wüxi ga ngecü ga to ga nachiuñanecüãx ga Ngechuchuxü yaxöcüchiga (Mt 15.21-28)

²⁴ Rü yemawena rü ñane ga Tiru nawa yexmaxü ga nañnewa naxü ga Ngechuchu. Rü yéma wüxi ga ñpatawa nangu, natürü tama nanaxwëxe na texé nüxü cuáxü ga yéma na nanguxü. Natürü taxuacüma nügü inicux. ²⁵ Rü paxama nüxü icuáchiga ga wüxi ga nge ga ngixácüwa ngoxo yexmëxcü. Rü yéma ixü, rü Ngechuchupëxegu iyacaxápüxü. ²⁶ Rü yema nge rü to ga nachiuñanecüãx ga Chiropeníchiucüãx iyixi. Rü Ngechuchucëx iyaxü, rü nüxü icëëxü na ngixácüwa inatëxüchiãxütcëx ga yema ngoxo. ²⁷ Natürü ga Ngechuchu rü ñanagürü ngixü: —Name nixi i taxacügüxüxira tachibüxëë. Erü tama name i taxacügüna tanayaxu i norü ñna na airügüna naxãxütcëx —ñanagürü. [Rü yema ñanagürü yerü nümagü ga Yudügu rü nügü nixugü na Tupanaxácügüxüchi yixigüxü rü yema togü rü ñoma airügürü na yixigüxü.] ²⁸ Natürü ngëma ga yema nge rü inangãxü, rü ngigürügü: —Aixcüma nixi i curü ore, Pa Corix, natürü woo airügü rü ta nanangöx i ngëma ñnatüchi i mechatüügu nayixëëxü i ngëma ñpataarü yoraxacügü —ngigürügü. ²⁹ Rü yexguma ga Ngechuchu rü ñanagürü ngixü: —Aixcüma name nixi i ngëma nüxü quixuxü. Rü marü

name i cutaegu, erü ngēma ngoxo rü marü ínaxũxũ ngíwa i cuxacü — ñanagürü. ³⁰ Rü yexguma ngĩpatawa nanguxgu ga yema ngecü, rü yema ngĩrü ngürücarewa ngĩxũ iyanguéũ ga ngĩrü bucü. Natürü marü ngĩxna ínaxũxũ ga yema ngoxo.

Ngechuchu nanamexēē ga wüxi ga yatü ga ngauchixēcü rü moxücü

³¹ Rü Tiruanewa nataegu ga Ngechuchu. Rü Chidãũãrũ ãñewa naxüpetü, rü ñuxũchi Decaporíchiuaneãrũ ãñegüwa rü ta naxüpetü rü ñuxmata Gariréaaneãrũ naxtaawa nangu. ³² Rü yéma naxütawa nana-gagü ga wüxi ga yatü ga ngauchixēcü rü moxücü, rü nüxna naxcèx nacagü ga nüxũ na yangögüxüçèx. ³³ Rü yexguma ga Ngechuchu rü noxrüwama duũxügüna nanaga. Rü naxmachixēgu nixuxmēx, rü naxbüxágümaã nügü yawaixmēxēēãcüma norü conügu ningögü. ³⁴ Rü yemawena rü daxü nadawenüãcüma yaxna narüngü, rü guma yatüxũ ñanagürü: —Epéta —ñanagürü. Rü ngēma rü: “¡Ingoxna!” ñaxũchiga nixĩ. ³⁵ Rü yexgumatama ningoxnamachixē ga guma ngauchixēcü, rü norü conü rü marü narüme rü meã nidexa. ³⁶ Rü Ngechuchu rü duũxügüxũ namu na taxüemaãma nüxũ yaxugüexüçèx. Natürü yexguma yexeraãcü duũxügüna nachúxãgu ga na taxüemaãma nüxũ yaxugüexüçèx ga nachiga rü yexeraãcü nüxũ nixugüeama. ³⁷ Rü poraãcü nabaixãchiãgü ga duũxügü, rü ñanagürügü: —Meãma nanaxü i guxüma rü woo ngauchixēgüxũ rü nayangoxnamachixēgüxüēē, rü ngeèxgüxũ rü nayadexagüxüēē —ñanagürügü.

8

Ngechuchu nanachibüexēē ga 4000 ga duũxügü
(Mt 15.32-39)

¹ Rü wüxi ga ngunexügu wenaxãrũ naxcèx naxĩtaquēxe ga muxüma ga duũxügü, rü nüxũ nataxuma ga norü õnagü. Rü Ngechuchu rü norü ngüexüçèx naca, rü ñanagürü nüxũ: ² —Choxũ nangechaütümüügü i ñaã duũxügü, erü marü tomaèxpüx i ngunexü nuã chauxütawa nangēxmagü, rü nataxuma i nawemü i nangoxgüxũ. ³ —Rü ngēxguma chi ngēmaãcümare íchayamugügu, rü chi ngürüãchi namagu tá nayaturae, erü nümaxügü rü yaxüwama ne naxĩ —ñanagürü. ⁴ Rü norü ngüexüçèx rü nanangãxügü, rü ñanagürügü: —¿Natürü ñuxãcü tá tanachibüexēē i núma i ngextá taxüema íxãpataxüwa? —ñanagürügü. ⁵ Rü Ngechuchu nüxna naca, rü ñanagürü: —¿Ñuxre i pãü pexü nangēxma i pemax? —ñanagürü. Rü nümagü nanangãxügü, rü ñanagürügü: —Toxũ nangēxma i 7 i pãü —ñanagürügü. ⁶ Rü ñuxũchi ga Ngechuchu rü duũxügüxũ namu na ñaxtüanewa natogüxüçèx. Rü nanade ga yema 7 ga pãü, rü Tupanana moxē naxã. Rü ñuxũchi inanabücu, rü norü ngüexügüna nanana. Rü nümagü rü duũxügüxũ nayanu. ⁷ Rü nüxũ nayexma ta ga ñuxre ga choxnixãcügü. Rü Ngechuchu rü Tupanana moxē naxã, rü ñuxũchi norü ngüexügüxũ namu na iyanaãxüçèx. ⁸ Rü guxüma ga yema duũxügü rü meãma nachibüe ñuxmata meã nüxũ yangu. Rü yexguma rü ta 7 ga pexchi nanapagü namaã ga yema íyaxügüxũ. ⁹ Rü yema duũxügü ga yéma chibüexü rü maneca 4000 nixĩ. Rü yemawena ga Ngechuchu rü duũxügüxũ ínimugü. ¹⁰ Rü ñuxũchi wüxi ga nguegu nixüe namaã ga norü ngüexügü, rü Damanútaanewa naxü.

Parichéugü naxcèx ínacagü ga wüxi ga cuèxruü ga Tupanaärü poramaã üxü

(Mt 16.1-4; Lc 12.54-56)

¹¹ Rü Ngechuchuxütawa nangugü ga Parichéugü, rü inanaxügüe ga na namaã yaporagatanücüüxü. Rü nüxna nacagüe na nüxü nüxü nadauxëëxücèx ga wüxi ga cuèxruü ga Tupanaärü poramaã naxüxü, na yemaãcü nüxü naxügüxücèx, rü nüxü nacuèxgüxücèx ngoxi aixcüma Tupana Nane yïxü. ¹² Rü Ngechuchu rü poraãcü yaxna narüngü, rü ñanagürü: —¿Tüxcüü i ñaã duüxügü naxcèx ínacagü i wüxi i cuèxruü i Tupanaärü poramaã üxü? Rü aixcüma pemaã nüxü chixu rü bai i wüxi i cuèxruü tá nüxü chawëx —ñanagürü. ¹³ Rü yema ñaxguwena, rü nüxna yéma nixü ga yema duüxügü. Rü wenaxärü nguegu nixüe rü naxtaxaarü tocutüwa naxü.

Parichéuarü pãüärü puxëëruüchiga

(Mt 16.5-12)

¹⁴ Natürü ga norü ngüexügü rü nüxü inayarüngümaë ga norü òna na íyangegüxü, rü wüxixicatama ga pãü nüxü nayexma ga nguewa. ¹⁵ Rü yexguma ga Ngechuchu rü nayaxucüxëgü, rü ñanagürü nüxü: —¿Dücèx, pexuãë naxcèx i Parichéugüärü rü Erodearü pãüärü puxëëruü! — ñanagürü. ¹⁶ Rü yema norü ngüexügü rü inanaxügüe na nügümaã ñagüxü: —Ngëma ñanagürü tüxü erü tama tawemü ta ítingegü —ñanagürügü. ¹⁷ Natürü ga Ngechuchu rü nüxü nacuèxama na yema ñagüxü, rü yemacèx ñanagürü nüxü: —¿Tüxcüü “Tangearü ònaãx”, ñaperügügü? ¿Éxna ñüxma rü ta tama nüxü pecuèxgüéga rü tama nüxü picuèxächitanü i ngëmachiga? ¿Éxna pexcèx naxë i ngëma? ¹⁸ Pema rü pexãxëtügüchirëx, ¿rü ñuxãcü i tama nüxü pedauxü? Rü pexãxmachixëgüchirëx, ¿rü ñuxãcü i tama nüxü pexñüëxü? ¿Rü éxna tama nüxna pecuèxächie ga yexguma chayamuxëëgu ga yema pãü rü choxni? ¹⁹ —Rü yexguma yema 5000 ga duüxügüxü chayanuxgu ga yema wüximëëxpüx ga pãü, ¿rü ñuxre ga pexchigü yïxü ga napagücü ga yexguma penadexgu ga yema íyaxügüxü? —ñanagürü. Rü nümagü nanangãxügü rü ñanagürügü: —Rü 12 ga pexchigü —ñanagürügü. ²⁰ Rü ñüxüchi ñanagürü ta ga Ngechuchu: —Rü yexguma yema 4000 ga duüxügüxü chayanuxgu ga yema 7 ga pãü, ¿rü ñuxre ga pexchigü yïxü ga napagücü ga yexguma penadexgu ga yema íyaxügüxü? —ñanagürü. Rü nanangãxügü rü ñanagürügü: —7 ga pexchigü —ñanagürügü. ²¹ Rü yexguma rü ñanagürü nüxü: —¿Rü ñüxma rü ta taütama nüxü pecuèxgüégaxü na Parichéugücüma rü Erodecüma i chixexüchiga yïxü i ngëma pãüärü puxëëruügu pemaã chixuxü? —ñanagürü.

Ngechuchu rü nanamexëë ga wüxi ga ngexetücü ga Bechaídawa

²² Rü yemawena rü Bechaídaarü ñanewa nangugü. Rü yéma Ngechuchuxütawa nanagagü ga wüxi ga ngexetücü. Rü nüxü nacèxügü na nüxü yangögüxücèx. ²³ Rü Ngechuchu rü guma ngexetücumëëxëgu nayayauxãchi, rü ñaneärü yéamaxüra nanaga. Rü yéma naxbüxágümaã nayawaixetüxëë, rü ñüxüchi naxëtügu ningögü, rü nüxna naca ngoxi marü tacüxü nadau. ²⁴ Rü yexguma ga guma ngexetücü rü inanaxügü ga na yadauchixü. Rü ñanagürü: —Nüxü chadau i duüxügü i ñoma naígü i ixixünerüü ixigüxü —ñanagürü. ²⁵ Rü yexguma ga Ngechuchu rü wenaxärü naxëtügu ningögü. Rü nüma ga guma yatü rü meãma

inadawenü. Rû yemaãcü naxcèx nitaane rû meãma naxcèx nangox ga guxüma. ²⁶ Rû yemawena ga Ngechuchu rû napatawa nanamu. Rû namaã nüxü nixu na tama ñanecèx nataeguxü.

Pedru nüxü nixu rû Ngechuchu nixi ya yima Tupana nüxü unetacü ya Cristu

(Mt 16.13-20; Lc 9.18-21)

²⁷ Rû yemawena rû Checharéa ga Piripuanewa yexmane ga ñanexäcüguwa naxü ga Ngechuchu norü ngúexüügümaã. Rû namawa rû Ngechuchu rû norü ngúexüügüna naca, rû ñanagürü nüxü: —¿Ñuxü ñagüxü i duüxügü i chauchiga na texé chiixü i chomax? —ñanagürü. ²⁸ Rû norü ngúexü nanangäxügü rû ñanagürügü: —Nangëxma i duüxügü rû:

“Cuáü ya baiüxëëruü quixi”, ñagüxü, rû togü i:

“Ería quixi”, ñagüxü, rû togü rû:

“Wüxi ga nuxcümaücü ga Tupanaärü orearü uruü quixi”, ñagüxü —ñanagürügü. ²⁹ Rû yexguma Ngechuchu rû nüxna naca rû ñanagürü: —¿Rû pema i ñuxü ñapegügüxü choxü na texé chiixü? —ñanagürü. Rû Pedru nanangäxü rû ñanagürü: —Cuma nixi i Cristu i Tupana cuxü unetacü quixü —ñanagürü. ³⁰ Rû yexguma ga Ngechuchu rû norü ngúexüügüxü namu na taxüemaãma nüxü yaxugüexücèx ga yema ore ga nachiga.

Ngechuchu nanaxunagü ga norü yuchiga

(Mt 16.21-28; Lc 9.22-27)

³¹ Rû yemawena rû Ngechuchu inanaxügü ga norü ngúexüügümaã nüxü na yaxuxü ga tacü tá nüxü na üpetüxü. Rû ñanagürü nüxü: —Choma i Tupana Nane na duüxüxü chiixü, rû poraãcü ngúxü tá chinge. Rû choxü tá naxoxgü i Yudíugüarü äëxgacügüerugü, rû paigüarü äëxgacügü, rû ngëma ngúexëëruügü i Moíchéarü mugüwa nguxëëtaegüxü. Rû tá choxü nimëxgü, natürü tomaëxpüx i ngunexügu rû wena táxaru chamaxü —ñanagürü. ³² Rû yema ore rû meãma namaã nanangoxëë. Natürü yexguma ga Pedru rû nüxica noxrüwama Ngechuchuxü naga, rû inanaxügü ga na naxucuxëäxü na tama yemaãcü yadeaxücèx. ³³ Natürü ga Ngechuchu rû nadauegu, rû norü ngúexüügüxü nadawenü. Rû Pedruxü nanga, rû ñanagürü: —¡Choxna ixügachi, Pa Chataná! Cuma rû tama Tupana nagu rüxínüxügu curüxínü, erü yatügü nagu rüxínüxügmare nixi i curüxínüxü —ñanagürü. ³⁴ Rû yexguma ga Ngechuchu rû norü ngúexüügüçèx rû duüxüügüçèx naca. Rû ñanagürü nüxü: —Rû ngëxguma texé chowe rüxüxchaügu, jëcü nüxü tarüxo i tümaärü ngúchaü, rû ñoma wüxi i curucha ngüxü tayaxuxürüü namaã tabora i guxüma i ngúxü i chauxcèx tingexü, rû chowe tarüxü! ³⁵ —Erü yíxema tügü maxëchaxëëchaüxë rû tá tayu. Natürü yíxema chaugagu rû ore i mexügagu yuxe, rû aixcüma tá tamaxü. ³⁶ —¿Rû tacüwa nüxü namexü ya yatü ega ngëxguma nayauxägu i guxüma i ñoma i naãneärü ngëmmaxügü, natürü norü maxü iyanatauxëëgu? ³⁷ —Rû ngëxgumarüü ta, ¿rü ñuxre i dïëru iyangu na ngëmamaã naxcèx nataxexü i norü maxü i wüxi ya yatü? ³⁸ —Rû ngëxguma texé i ñaã duüxügü i pecaduäxgüxü i tama yaxögüxüpëxewa chauxcèx taxänegu rû naxcèx taxänegu i chorü ore, rû choma i Tupana Nane i duüxüxü na chiixü rû tá ta tümacèx chaxäne i ngëxguma Chaunatüarü poramaã rû norü orearü ngerüügü i daxüçüäx i üünegüxümaã wenaxärü núma chaxüxgu.

9

¹ Rū yexgumarūū ta ga Ngechuchu rū ñanagürü nüxū: —Aixcūma pemaã nüxū chixu rū ñuxre i duñxūgü i nuã ngëxmagüxū rū tãütãma nayu ñuxmatãta nüxū nadëux na ñuxãcü ãëxgacü ya poracü na yïixū ya Tupana —ñanagürü.

*Ngechuchu rū toraxūãcü nangox
(Mt 17.1-13; Lc 9.28-36)*

² Rū 6 ga ngunexūguwena rū Ngechuchu rū wüxi ga mëxpúnëwa naxū. Rū ínayagagü ga Pedru rū Chaütiãgu rū Cuãüxĩcatama. Rū yéma yema ngüexūgüpëxëwa toraxūãcü nangox ga Ngechuchu. ³ Rū niyauracüü ga naxchiru rū nacómüxüchi. Rū nataxuma i yaxuchiruxū i nüxū cuãxū na ngëmaãcü nacómüxëëãxū. ⁴ Rū nüxū nadaugü ga Ería rū Moïché ga yéma Ngechuchumaã idexagüxū. ⁵ Rū yexguma ga Pedru rū ñanagürü Ngechuchuxū: —Pa Ngüexëëruüx, namexëchi nixĩ na nuã ingëxmagüxū. Rū tá tanaxü ya tomaëxpüx ya düxenü, rū wüxi ya cuxcèx, rū naĩ ya Moïchécèx, rū naĩ ya Eríacèx —ñanagürü. ⁶ Rū yema na poraãcü nahãixãchiãëgüxū ga yema ngüexügü, rū yemacèx ga Pedru rū tama nüxū nacüex ga na ñuxū ñaxū. ⁷ Rū yexgumatama wüxi ga caixanexū ínaruĩ, rū natanügu nayangëixëma. Rū yema caixanexūwa inanaxū ga wüxi ga naga ga ñaxū: —Daa nixĩ ya Chaune ya nüxū changechaüxüchicü. ¡Rū nüxū iperüxĩnüë! —ñaxū. ⁸ Rū yexgumatama nügücüwagu ínadaueguãchitanü, rū taxüexüma ga toguexū nadaugü, rū Ngechuchuxüxĩcatama. ⁹ Rū yexguma ínaxĩgügu nawa ga guma mëxpúnë, rū Ngechuchu nüxna naxãga ga taxüemaãma na nüxū yaxugüexū ga yema yéma nüxū nadaugüxū, ñuxmatãta yuwa ínadxgu ga nümax. ¹⁰ Rū yemacèx ga yema ngüexügü rū bexma nüxū nacüexgü ga yema nüxū nadaugüxū. Natürü nügüna nacagü ga tacüchiga na yïixū ga:

“Yuwa ínadxgu”, ñaxū. ¹¹ Rū ñuxüchi ga yema ngüexügü rū Ngechuchuna nacagü, rū ñanagürügü: —¡Tüxcüü i ngüexëëruügü i ore i mugüwa nguxëëtaegüxū rū ñanagürügü:

“Ería tá nixĩ ya nüxĩra cuxüpa núma ücü?” ñanagürügü. ¹² Rū Ngechuchu nanangãxū, rū ñanagürü nüxū: —Aixcūma nixĩ i Ería na nüxĩra núma naxüxū na chauxüpa namexëëãxüçèx i guxüma. ¡Natürü tüxcüü i ore i ümatüxüwa i ñaxū:

“Rū Tupana Nane ya duñxüxū ixĩcü rū tá ngüxū ninge, rū duñxügü rū tá nüxū naxoe”,

ñaxū? ¹³ Natürü i choma rū pemaã nüxū chixu, rū Ería rū marü núma naxū. Natürü ga duñxügü rū nümagü nanaxwëxëgüxüãcüma poraãcü chixri namaã nachopetü, yexgumarüü ga ore ga ümatüxüwa nüxū yaxuxürüü —ñanagürü.

*Ngechuchu nanamexëë ga wüxi ga buxü ga ngoxo nawa yexmaxü
(Mt 17.14-21; Lc 9.37-43)*

¹⁴ Rū yexguma yema togü ga norü ngüexügütanüwa nangugügu, rū yéma nüxū nadaugü ga muxüma ga duñxügü ga yema ngüexügüxū íchomaëguãchixü. Rū ñuxre ga ngüexëëruügü ga Moïchéarü mugüwa nguxëëtaegüxü, rū yéma niporagatanücüü namaã ga yema ngüexügü. ¹⁵ Rū yexguma Ngechuchuxū nadaugügu ga yema muxüma ga duñxügü, rū poraãcü nahãixãchiãëgü. Rū guxüma naxcèx nibuxmü na nüxū yanamoxëgüxüçèx. ¹⁶ Rū nüma ga Ngechuchu rū nüxna naca, rū

ñanagürü nüxü: —¿Tacü nixi i pema namaã naxcèx ípiporagatanücüüxü? —ñanagürü. ¹⁷ Rû wüxi ga yema duüxügü ga yéma yexmagüxü rü nanangãxü, rü ñanagürü: —Pa Ngúexêëruüx, nuã cuxcèx tüxü chaga ya chaune, erü tümawa nangëxma i wüxi i ngoxo i tüxü ngegapêëxü. ¹⁸ — Rû ngextá ítangëxmaxüwa rü ngëxma tüxü yaxüxgu rü waixümüãnegu tüxü naña. Rû tarüchièx, rü tixüxchapüta, rü ngëxma tiyuãchi. Rû marü nüxü chacèèxü i curü ngúexügü na tümawa ínatèxüchiãxücèx i ngëma ngoxo, natürü tama nüxü inaxínü —ñanagürü. ¹⁹ Rû Ngechuchu nanangãxü, rü ñanagürü: —Pa Duüxügü i Tama Yaxögüxü, ¿ñuxguratáta i pemaã chanuxmaxü rü yaxna pemaã chaxínüxü? ¡Nuã penaga ya yima bucü! —ñanagürü. ²⁰ Rû Ngechuchuxütawa nanagagü ga guma bucü. Natürü yexguma Ngechuchuxü nadèuxgu ga yema ngoxo, rü guma bucüxü naxü ga na yayuãchixêëãxü. Rû yexma ñaxtüanegu nayangu. Rû yexma nidixegugü, rü narüchièx. ²¹ Rû Ngechuchu rü guma bucünatüna naca, rü ñanagürü: —¿Rü ñuxgumama nixi ga naxcèx inaxügüxü ga yema? —ñanagürü. Rû guma bucünatü nanangãxü rü ñanagürü: —Nabuxgumamatama. ²² Rû muëxpüxcüna i ngëma ngoxo rü üxüxetügu rü dexágu nanañaüxü na ngëmaãcü yamáãxücèx. Rû ngëmacèx ega cumaã nanguxügu na tacü toxcèx cuxüxü, ¡rü cuxü tangechaütümügü, rü toxü rüngüxêë! —ñanagürü. ²³ Rû yexguma ga Ngechuchu rü ñanagürü nüxü: —¿Rü tüxcüü “ega chomaã nanguüxgu”, ñacurügü? Erü guxüma natauxcha tümacèx ya yíxema yaxõxê —ñanagürü. ²⁴ Rû yexguma ga guma bucünatü rü tagaãcü ñatarügü: —Chayaxõ. ¡Choxü rüngüxêë na yexeraãcü chayaxõxücèx! —ñatarügü. ²⁵ Rû yexguma Ngechuchu nüxü dèuxgu na muxüma ga duüxügü marü yexma ngutaquëxexü, rü nananga ga yema ngoxo. Rû ñanagürü nüxü: —Pa ngoxo i Ngegapêëruü rü Ngauchixêëruüx, ¡choma cuxü chamu na nawa ícuxüxüxü ya daa bucü, rü tagutáma wena nagu cuyaxücuxü! —ñanagürü. ²⁶ Rû yexguma ga yema ngoxo rü aita naxü, rü wenaxärü guma bucüxü niyuãchixêë. Rû ñuxüchi nawa ínaxüxü, rü ñoma nayuxuchixürüü yéma nanatèx. Rû yemacèx ga muxüma ga duüxügü rü ñanagürügü: —Marü nayuxuchi nixi —ñanagürügü. ²⁷ Natürü ga Ngechuchu rü naxmëxgu nayayauxãchi, rü ínanadaxêë. Rû nüma ga guma bucü rü inachi. ²⁸ Rû yemawena ga Ngechuchu rü wüxi ga ípatagu nayaxücu namaã ga norü ngúexügü. Rû yéma nüxíca nüxna nacagü, rü ñanagürügü nüxü: —Pa Corix, ¿tüxcüü i toma rü taxuacüma ítanatèxüchi i ngëma ngoxo? —ñanagürügü. ²⁹ Rû Ngechuchu nanangãxü rü ñanagürü: —Tama ngëmaãcümare ítanatèxüchi i ngëmarüü íxixü i ngoxo. Natürü tanaxwëxe i Tupanana tanaxuaxü i tórü yumüxëwa na nüma ínatèxüchiãxücèx. Rû ngëmaãcüxícatama nixi i ínaxüxüxü —ñanagürü.

Ngechuchu ru wenaxärü nanaxunagü ga norü yuchiga
 (Mt 17.22-23; Lc 9.43-45)

³⁰⁻³¹ Rû yéma inaxíãchi rü Gariréaanewa nachopetü. Natürü ga Ngechuchu rü tama nanaxwëxe ga texé nüxü na cuáxü ga na yéma nayexmaxü, yerü norü ngúexügüxü ínangúexêë. Rû ñanagürü nüxü: —Tupana Nane ya duüxüxü íxícu, rü duüxügü tá nayayauxgü rü tá nayamëxgü. Natürü tomaëxpüx i ngunexügu rü wena tá ínarüda —ñanagürü. ³² Natürü ga nümagü rü tama meã nüxü nacuëxgü ga tacüchiga na yíxü ga yema ore, rü namutê ga nüxna na nacagüexü.

¿Texé tá tixí ya guxãârü yexera ixîxê?

(Mt 18.1-5; Lc 9.46-48)

³³ Rû Capernáũârü îãnewa nangugü. Rû yexguma İxwa nayexmagügu, rû Ngechuchu nüxna naca, rû ñanagürü: —¿Rû tacü nixí ga pegümaã naxcèx piporagaetanüxü ga namawa? —ñanagürü. ³⁴ Natürü ga nûmagü rû nangeèxgümare, yerü ga namawa rû nachigagu nügümaã niporagaetanü ga texé tiixü ga natanüwa rüyexeramaëxê. ³⁵ Rû yexguma ga Ngechuchu rû İnarüto, rû naxcèx naca ga yema 12 ga norü ngüxügü, rû ñanagürü nüxü: —Rû ngëxguma texé naxwèxegu na guxâetüwa na taxüxü, rû name nixí i noxri rû guxãârü ñaxtûmaëwa tügü taxüxêê na guxãârü ngüxêëruü tiixü —ñanagürü. ³⁶ Rû yemawena rû norü ngãxütanügu nayachixêê ga wüxi ga buxü. Rû ñuxüchi nachacüügu yayauxãchiãcûma ñanagürü: ³⁷ —Rû texé ya chauégagu meã nayaxúxe i wüxi i buxü i ñaãrüü, rû choxü nixí i tayaxuxü. Rû texé ya choxü yaxúxe, rû tama choxüxícata tayaxu, natürü yima núma choxü mucü ya Chaunatüxü rû ta nixí i tayaxuxü —ñanagürü.

Texé ya tama taxchi aixe rû torü ngüxêëruü tixí

(Mt 10.42; Lc 9.49-50)

³⁸ Rû yexguma ga Cuáü rû ñanagürü nüxü: —Pa Ngüxêëruüx, nüxü tadau ga wüxi ga yatü ga cuégagu ngoxogü íwoxüxü. Natürü toma nüxna tanachüxu ga yema, yerü tama tatanüxü nixí ga nûmax —ñanagürü. ³⁹ Natürü Ngechuchu nanangãxü, rû ñanagürü: —Tama name i nüxna na penachuxuxü. Erü texé ya chauégagu naxúxe i wüxi i mexü i Tupanaãrü poramaã üxü, rû taxucürüwama yixcama chixri chauchiga tidexa. ⁴⁰ Erü texé ya tama taxchi aixe, rû tórü ngüxêëruü tixí. ⁴¹ Rû texé ya woo wüxitama i pochuyuãcu i dexá pexna äxê naxcèx na chorü duüxügü pixígüxü, rû aixcûma pemaã nüxü chixu rû tá tüxü nangëxma i tûmaãrü ämare —ñanagürü.

Naxãücûma nixí na pecadugu inguxü

(Mt 18.6-9; Lc 17.1-2)

⁴² Rû ñanagürü ta: —Texé ya pecadugu nanguxêëxê i wüxi i ñaã buxügü i choxü yaxögüxü, rû tûmacèx rû narümemaë chi nixí i noxtacûma wüxi ya nuta ya tacü tûmanaxãwa tayangacuchi, rû ngëmaãcü taxtûchiüwa tüxü tayatáe. ⁴³⁻⁴⁴ —Rû ngëxguma chi wüxi ya cuxmëx pecadugu cuxü nguxêëgu, rû name nixí i noxtacûma ícunadae. Erü narümemaë nixí i cuboxmëxãcûma cunayaxu i curü maxü na tama guxüne ya cuxmëx ya mexünemaã nawa quitëxcuchixüçèx ya yima üxü ya ngoxogü nagu poxcuene ya taguma ixoxüne. ⁴⁵⁻⁴⁶ —Rû ngëxguma chi wüxi ya cucutü pecadugu cuxü nguxêëgu, rû name nixí i noxtacûma ícunadae. Erü narümemaë nixí i cubocutüãcûma cunayaxu i curü maxü na tama guxüne ya cucutü ya mexünemaã nawa quitëxcuchixüçèx ya yima üxü ya ngoxogü nagu poxcuene. ⁴⁷⁻⁴⁸ —Rû ngëxguma chi wüxi ya cuxetü pecadugu cuxü nguxêëgu, rû name nixí i noxtacûma ícunacaxüchi. Erü narümemaë nixí i wüxitama ya cuxetümaã Tupana äëxgacü íixüxüwa quixücu, na tama guxüne ya cuxetü ya mexünemaã nawa quitëxcuchixüçèx ya yima üxü ya taguma ixoxüne ya ngoxogü nagu poxcuene i ngextá õxmigü taguma íyuxüwa. ⁴⁹ —Rû aixcûma ñoma õnawa yucüra nagüxürüü tá nixí na guxâtama guxchaxüwa chopetüxü. ⁵⁰ —Name ya yucüra. Natürü ngëxguma chi nangeacagu, ¿rû ñuxãcü tá wenaxãrü naxããca? ¿Rû

meã pegüna pedaugü na ñoma yucüra ya taguma iyarüngeacacürüü na namexücèx i perü maxü! ;Rü meã pegümaã pemaxê! —ñanagürü.

10

Ngechuchu namaã nangúexêtae na tama namexü na texé tümamèxü ítáxü

(Mt 19.1-12; Lc 16.18)

¹ Rü yexguma ga Ngechuchu rü Capernáürü ñanewa inaxüãchi. Rü Yudéaanewa naxüpetü rü ñuxmata natü ga Yudáürü tocutüwa nangu. Rü yéma rü wenaxärü naxcèx nangutaquëxegü ga duüxügü. Rü nüma rü inanaxügü ga na nangúexêtaexü guxügurüü. ² Rü ñuxre ga Parichéugü rü naxcèx naxí ga na nüxü yaxügüxücèx yerü chixexügu nananguxêëgüchaü. Rü yemacèx nüxna nacagüe, rü ñanagürügü: —¿Namexü i cuxcèx na wüxi ya yatü rü naxmèxü inatáxü? —ñanagürügü. ³ Rü nüma nanangãxü, rü ñanagürü nüxü: —¿Rü tacü yíixü ga Moïché pexü muxü? —ñanagürü. ⁴ Rü nümagü nanangãxügü, rü ñanagürügü: —Moïché nüxü nixu ga na tama nachuxuxü na wüxi ya yatü rü inatámaxü, ega wüxi i popera i tèxgüpane ngïxna naxãxgu —ñanagürügü. ⁵ Rü yexguma ga Ngechuchu rü nanangãxü, rü ñanagürü nüxü: —Rü yema na taxüegama na pexinüëxügagu nixí ga Moïché ga tama pexna nachüãxü ga pexmèxü na ípetáxü. ⁶ —Naturü noxriarü ügügu, rü Tupana nanaxü ga yatüxü rü ngexü. ⁷ —Rü ngëmacèx ya yatü rü tá nanatü rü naëna nixügachi na naxmèxmaã inaxüãxücèx. ⁸ —Rü ngëmaãcü i ngëma taxre rü ñoma wüxitama i duüxürüü tá nixígü. Rü marü täütáma taxre nixí, erü wüxi tátama nixí. ⁹ —Rü ngëmacèx taxucürüwa texé nügüna tayaxígachixêë i ngëma taxre i Tupana nügüna mugüxü —ñanagürü. ¹⁰ Rü yexguma marü ípatawa nangugügu, rü norü ngüexüü rü wenaxärü nüxna nacagüe naxcèx ga yema. ¹¹ Rü Ngechuchu rü ñanagürü nüxü: —Rü yíxema tümamèxü ítáxe rü naí i ngemaã ámaxê rü pecadu taxü ngímaã i ngëma noxriücü i tümamèx. ¹² —Rü ngëxgumarüü ta, ega wüxi i nge ítèxtegu rü naí ya yatümaã naxãtegu, rü ngíma rü ta pecadu ixü —ñanagürü.

Ngechuchu rü buxügüxü nameãxê

(Mt 19.13-15; Lc 18.15-17)

¹³ Rü yéma Ngechuchuxütawa tüxü nagagü ta ga ñuxre ga buxegü na tüxü yangögügüxücèx. Naturü ga yema norü ngüexüü rü inanaxügüe ga tüxü na yangagüxü ga guxema tümaxãcuxegüxü Ngechuchuxütawa gagüxe. ¹⁴ Rü yexguma yemaxü nadèuxgu ga Ngechuchu, rü naãewa nangux, rü ñanagürü nüxü: —Chanaxwèxe i chauxütawa naxí i buxügü. ;Rü táxü i nüxna penachuxuxü! Erü Tupana äëxgacü íixüüwa rü tümacèx nixí ya yíxema ñaã buxügürüü taxuüma i chixexüü icuáxe. ¹⁵ —Rü aixcüma pemaã nüxü chixu rü texé ya tama wüxi i buxürüü Tupanaxü yaxüxe na tümäärü äëxgacü yíixücèx, rü tagutáma nagu taxücu i ngëma naãne i Tupana äëxgacü íixüüwa —ñanagürü. ¹⁶ Rü nüma rü tüxü naganagütanü ga guxema buãxta, rü tümærugügu naxümèxãcüma ñanagürü tüxü: —;Tupana pexü rüngüxêëx! —ñanagürü.

Wüxi ga yatü ga dïeruãxüchixü Ngechuchumaã nidexa

(Mt 19.16-30; Lc 18.18-30)

¹⁷ Rü yexguma marü inaxüãchichaügu ga Ngechuchu, rü yéma naxcèx niña ga wüxi ga yatü. Rü napèxegu nayacaxãpüxü, rü nüxna naca

rü ñanagürü nüxü: —Pa Ngúexêëruü ya mecüx, ¿tacü tá chaxüxü na chanayaxuxücèx i maxü i taguma gúxü? —ñanagürü. ¹⁸ Rü Ngechuchu nanangãxü, rü ñanagürü nüxü: —¿Tüxcüü, “Mecü” ñacurügü choxü? Erü Tupanaxícatama nixí ya mecü ixícü, rü nataxuma i to. ¹⁹ Cuma rü marü nüxü cucuèx i Tupanaärü mugü i ñaxü:

“¡Tãütáma cumáeta, rü tãütáma naí i ngemaã icupe, rü tãütáma cungítèèx, rü tãütáma doraxü quixu i togüchiga, rü tãütáma quidoratèèx, rü tümaga naxínü ya cunatü rü cue!”

ñaxü —ñanagürü. ²⁰ Rü yexguma ga guma yatü rü ñanagürü nüxü: —Pa Ngúexêëruüx, rü chorü bucümatama meã chanaxaure i guxüma i ngëma mugü i nüxü quixuxü —ñanagürü. ²¹ Rü yexguma ga Ngechuchu rü nüxü nangechaüãcüma nüxü nadawenü, rü nanangãxü rü ñanagürü: —Rü wüxixicatama cuxü nataxu. ¡Rü íxü, rü namaã yataxe i guxüma i curü ngëmaxügü, rü ñuxüchi togü i ngearü ngëmaxüãxgüxüna naxã i ngëma curü natanü! Rü ngëmaãcü tá cuxü nangëxma i cuchica i daxüguxü i naãnewa. Rü ngëmawena rü marü name i chowe curüxü —ñanagürü. ²² Natürü nüma ga guma yatü rü nanaxíxãchiãè ga yexguma nüxü naxínügu ga yema ore. Rü nangechaüãcüma ínixü, yerü namuxüchi ga norü yemaxügü. ²³ Rü Ngechuchu rü nüxü nidaugüãchi, rü ñanagürü norü ngúexügüxü: —Naguxchaxüchi tá nixí na Tupana ãëxgacü íyíxüwa na yachocuxü i ngëma díëruãxüchigüxü —ñanagürü. ²⁴ Rü ñaãxãchiãègü ga norü ngúexügü namaã ga yema ore. Natürü ga Ngechuchu rü wenaxãru namaã nüxü nixu, rü ñanagürü: —Pa Chauxacügüx, ñuxãcü wüxi i guxchaxüchixü nixí na Tupana ãëxgacü íyíxüwa na yaxücuxü i wüxi i duüxü. ²⁵ —Rü aixcüma pemaã nüxü chixu rü ñoma wüxi i cameyu na taxucürüwama wüxi ya ucumaxëtüwa naxüpetüxüãrü yexera narüguxchamaè naxcèx i wüxi i duüxü i díëruãxüchixü na yaxücuxü i ngextá Tupana ãëxgacü íxíxüwa —ñanagürü. ²⁶ Rü yexguma yemaxü naxínüègu ga norü ngúexügü, rü yexeraãcü ñaãxãchiãègü. Rü nügüna nacagüè, rü ñanagürügü: —¿Rü texé tá éxna tixí ya nayaxúxe i maxü i taguma gúxü? —ñanagürügü. ²⁷ Rü Ngechuchu rü nüxü nadawenü, rü nanangãxü rü ñanagürü nüxü: —Yatügü rü taxuacüma nügü namaxèè, natürü Tupanaãxü rü natauxcha i ngëma, erü Tupanacèx rü nataxuma i tacü i guxchaxü —ñanagürü. ²⁸ Rü yexguma inanaxügü ga Pedru ga na yadexaxü, rü ñanagürü nüxü: —Toma rü marü yéma tanawogü ga guxüma ga torü yemaxügü na cuwe tarüxíxücèx —ñanagürü. ²⁹⁻³⁰ Rü Ngechuchu nanangãxü, rü ñanagürü: —Aixcüma pemaã nüxü chixu rü texé ya chaugagu rü ore i maxëxêëruügagu tümapatana, rü éxna tümãèneègüna, rü éxna tümãèyèxgüna, rü éxna tümãèna, rü éxna tümãnatüna, rü éxna tümãxãcügüna, rü éxna tümããnegüna ngema ixüxè, rü tá tanayaxu i tümãärü natanü. Rü aixcüma ñuxma i ñoma i naãnewa rü tá tanayaxu i 100 èxpüxcüna ya tümapatagü, rü tümãèneègü, rü tümãèyèxgü, rü tümãègü, rü tümãxãcügü, rü tümããnegü. Natürü ngëxgumarüü tá ta tanayaxu i ngúxügü i togü tá tüxü ingexèègüxü. Natürü yixcamaxüra i daxüguxü i naãnewa rü tá tanayaxu i maxü i taguma gúxü. ³¹ —Natürü muxüma i nümaxü i ñuxma ñoma i naãnewa duüxügü wixpëxewa ügüxèèxü, rü daxüguxü i naãnewa rü Tupana tá wixweama nanaxügüxèè. Rü muxüma i nümaxü i ñuxma ñoma i naãnewa duüxügü wixweama ügüxèèxü, rü daxüguxü i naãnewa rü Tupana tá wixpëxewa nanaxügüxèè —ñanagürü.

*Ngechuchu rü wenaxârü nanaxunagü ga norü yuxchiga
(Mt 20.17-19; Lc 18.31-34)*

³² Rü Yerucharéüwaama naxĩ. Rü nüma ga Ngechuchu rü norü ngúexügüpêxegu nixü. Rü nümagü rü nabaixâchiâégü, rü yema togü ga duüxügü ga wixweama ägüxü rü namuüê. Rü Ngechuchu rü wenaxârü noxrüwama naxcêx naca ga yema 12 ga norü ngúexügü. Rü inanaxügü ga namaã nüxü na yaxuxü ga tacü tá nüxü na ngupetüxü. ³³ Rü ñanagürü nüxü: —Pema nüxü pecuêx na marü ingaicaxü na Yerucharéüwa ingugüxü. Rü ngema rü duüxügü rü tá chixri chomaã nachopetü. Rü paigüarü äêxgacügü rü ngúexêëruügü i ore i mugüwa nguxêëtaegüxüna tá choxü naxuaxügü. Rü nümagü rü tá chomaã nanaxuegugü na chayuxü, rü tá ngêma Dumacüãxgüna choxü namugü. ³⁴ Rü ngêmagü tá nixĩ i chaugu idauxcüräügüxü. Rü tá choxna nacuaixgüe, rü tá choxna nanaçuaixcagü, rü tá choxü nayuxêëgü. Natürü tomaêxpüx i ngunexüguwena táxarü chamaxü —ñanagürü.

*Chaütiágu rü Cuáü rü wüxi ga ngüxêêcêx ínacagü
(Mt 20.20-28)*

³⁵ Rü Ngechuchucêx naxĩ ga Chaütiágu rü Cuáü ga Zebedéu nanegü, rü ñanagürügü nüxü: —Pa Ngúexêëruüx, tanaxwêxe i toxcêx cunaxü i ngêma ngüxêê i naxcêx tá cuxna taçaxü —ñanagürügü. ³⁶ Rü nüma rü nüxna naca, rü ñanagürü: —¿Tacü nixĩ i penaxwêxexü na pexcêx chanaxüxü? —ñanagürü. ³⁷ Rü ñanagürügü: —Rü ngêxguma äêxgacüxü quingucuchigu, rü tanaxwêxe na wüxie i toma rü curü tügüncüwawa tarüttoxü, rü togue i curü toxwecüwawa —ñanagürügü. ³⁸ Rü Ngechuchu nanangãxü, rü ñanagürü nüxü: —Pema rü tama nüxü pecuêx na tacücêx ípeçaxü. ¿Rü pexü chi natauxchaxü i na peyaxaxüxü i ngêma axexü i üxchiüxü i choma tá chixaxüxü? ¿Rü namaã chí peporaexü i ngêma ngúxü i tá chingexü? —ñanagürü. ³⁹ Rü nümagü nanangãxügü rü ñanagürügü: —Ngêmaãcü, namaã tá taporae —ñanagürügü. Rü Ngechuchu nanangãxü, rü ñanagürü nüxü: —Aixcüma tá nixĩ i chauxrüü peyaxaxüxü i ngêma axexü i üxchiüxü rü chauxrüü ngúxü na pingegüxü. ⁴⁰ —Natürü ngêma chorü tügüncüwawa rü chorü toxwecüwawa na perütögüxücêx, rü tama choxmêxwa nangêxma na pexna chanaxãxü, erü Chaunatü tá tûxna nanaxã ya yíxema tûmacêx íyílxê —ñanagürü. ⁴¹ Rü yexguma yemaxü naxĩnüëgu ga yema togü ga 10 ga ngúexügü, rü Chaütiágumaã rü Cuáümaã nanuê. ⁴² Natürü Ngechuchu naxcêx naca rü ñanagürü nüxü: —Pema nüxü pecuêx i togü i nachiuñanegüwa rü nangêxmagü i äêxgacügü i nügü nacuêxgügu na namexü na nuãcü namuãxü i norü duüxügü. Rü ngêma äêxgacügü i taxügü rü norü duüxügüarü yora nügü nixĩgüxêê. ⁴³ —Natürü täütama ngêmaãcü nixĩ i petanüwa. Erü ngêxguma texé naxwêxegu na guxãârü yexera na tiixü i petanüwa, rü name nixĩ i noxri rü guxãârü ngüxêëruü na tiixü. ⁴⁴ —Rü ngêxguma chi texé i petanüwa naxwêxegu na tûmamücügüeru na tiixü, rü name nixĩ i noxri rü guxüma i tûmamücügüarü ngüxêëruü na tiixü. ⁴⁵ —Rü woo i choma i Tupana Nane na duüxüxü chiixü, rü tama togü choxü rüngüxêëxücêx nixĩ i núma chaxüxü. Natürü núma chaxü na duüxügüxü charüngüxêëxücêx rü naxcêx ichanaxãxücêx i chorü maxü, na ngêmaãcü chanaxütanüxücêx na norü pecadugüna ínangüxüxücêx i muxüma i duüxügü —ñanagürü.

Bartiméu ga ngexetücüxü narümexê ga Ngechuchu

(Mt 20.29-34; Lc 18.35-43)

⁴⁶ Rû Yericüarü îanewa nangugü. Rû Ngechuchuwe narüxî ga norü ngüexügü rû muxüma ga togü ga duüxügü. Rû yexguma guma îanearü guxwa nangugüchaügu ga nüxna na ínachoxüxü, rû yéma namacüwawa narüto ga wüxi ga ngexetücü ga Bartiméügu ägegacü ga Timéü nane. ⁴⁷ Rû yexguma guma ngexetücü nüxü ínügu ga Ngechuchu ga Nacharétüçüâx na yîixü ga guma yéma üpetücü, rû inanaxügü ga poraacü aita na naxüxü, rû: —Pa Ngechuchu ya Dabítanüxüx, ¡cuxü changechaütümüü! —ñanagürü. ⁴⁸ Natürü muxüma ga yema duüxügü rû ínanangaxüchigüama ga na iyanangeáxüçèx. Natürü ga nüma rû yexeraacü aita naxüama, ñaxümaã: —Pa Dabítanüxüx, ¡cuxü changechaütümüü! —ñaxümaã. ⁴⁹ Rû yexguma ga nüma ga Ngechuchu rû inayachiãchi, rû ñanagürü: —¡Naxcèx peca! —ñanagürü. Rû guma ngexetüçücèx nacagü, rû ñanagürügü: —¡Nataãè rû inachi! Rû cuxcèx nixî i naçaxü —ñanagürügü. ⁵⁰ Rû guma ngexetücü rû yexacü nanaña ga norü gáuüchiru. Rû inayuxnagü rû Ngechuchucèx nixü. ⁵¹ Rû Ngechuchu nüxna naca, rû ñanagürü nüxü: —¿Tacü nixî i cunaxwèxexü na cuxcèx chanaxüxü? —ñanagürü. Rû nüma ga guma ngexetücü, rû nanangãxü, rû ñanagürü: —Pa Ngüexêëruüx, chanaxwèxe na chidauchixü —ñanagürü. ⁵² Rû yexguma ga Ngechuchu, rû ñanagürü nüxü: —¡Ëcü, íixü! Rû marü cuxcèx nitaane erü cuyaxõ —ñanagürü. Rû yexgumatama ga guma ngexetücü rû nidauchi, rû Ngechuchuwe narüxü ga namawa.

11

Ngechuchu rû Yerucharéügu naxücu

(Mt 21.1-11; Lc 19.28-40; Cu 12.12-19)

¹ Rû marü Yerucharéüarü ngaicamana nangugü ga Oríbuncüarü Mèxpüneaüru ngaicamana yexmagüne ga îanexácügü ga Bechagué rû Betániã. Rû yexguma yéma nangugügu, rû Ngechuchu nanamu ga taxre ga norü ngüexügü. ² Rû ñanagürü nüxü: —¡Gua torü toxmèxtawa ngèxmane ya îanexácüwa pexî! Rû ngèxguma nawa pengugügu, rû ngèxma tá nüxü peyangau i wüxi i buru i ngèxma ngaxüxü i taguma texé natagu aunagüxü. ¡Rû peyawèxü rû nuã penaga! ³ —Rû ngèxguma texé pexna caxgu na tacücèx peyawèxüxü i ngéma buru, ¡rû tûmamaã nüxü pixu rû ñapegügü:

“Torü Cori nanaxwèxe, rû ñuxma tátama nanataeguxêë”, ñapegügü!

⁴ Rû yéma naxî. Rû yexma namacüwagu nüxü nayangaugü ga yema buru ga wüxi ga ípataèxütagu ngaxüxü. ⁵ Rû ñuxre ga duüxügü ga yéma yexmagüxü rû nüxna nacagüe, rû ñanagürügü: —¿Tacü ípexüe? ¿Rû tüxcüü peyawèxü i ngéma buru? —ñanagürügü. ⁶ Rû nûmagü ga yema ngüexügü, rû yema ore ga Ngechuchu namaã nüxü ixuxüácü nanangãxügü. Rû yemacèx tama nüxna nanachuxgü. ⁷ Rû natagu nanaçhagümü ga naxchirugü. Rû yemaacü Ngechuchuxütawa nanaçagü. Rû nüma ga Ngechuchu rû natagu naxaunagü. ⁸ Rû muxüma ga duüxügü rû naxchirumaátama nanaçhamagü. Rû togü rû naixátügü ga naãnewa nadaüxümaã nayaçhamagü. ⁹ Rû yema duüxügü ga napèxegu ägüxü rû yema togü ga wixweama ägüxü, rû tagaacü ñanagürügü: —¡Cuxü ticüèxüxügü! ¡Rû naxüüne ya daa Tupanaegagu núma ücü! ¹⁰ ¡Rû äëxgacü ya Dabírüxü namecümáxüchi ya daa äëxgacü ya núma ngücü! ¡Rû pema

rü ta, Pa Daxücüâx, rü nüxü picuèxüxügü ya Tupana! —ñanagürügü.
 11 Rü Yerucharéügu naxücu ga Ngechuchu, rü tupauca ga taxü necèx nixü. Rü meâma guxüwama inanadauaxüne. Rü ñuxüchi yema norü 12 ga ngüexügümaâ Betániâârü ñanecèx nataegu, yerü marü nayáuanegü.

*Ngechuchu rü orix ga iguera ga ngearü oõxümaâ chixexü naxuegu
 (Mt 21.18-19)*

12 Rü moxüâcü yexguma Betániâwa inaxiâchigu ga Ngechuchu rü nataiya. 13 Rü yaxügu nüxü nadau ga wüxi ga orix ga iguera ga äätüxü. Rü nüma ga Ngechuchu rü naxcèx nixü na iyadauâxüçèx rü ngoxi nayexmèx ga norü o. Natürü yexguma naxütawa nanguxgu, rü taxuüma inayangau, rü naätüxüxícata, yerü tauta norü owa nangu. 14 Rü yexguma rü ñanagürü igueraxü: —¡Tagutáma texé wena cuxü tamúârü oõx! —ñanagürü. Rü norü ngüexügü rü nüxü naxinüè ga yema.

Ngechuchu ínanawoxü ga yema tupauca ga taxünewa taxegüxü ga duüxügü

(Mt 21.12-17; Lc 19.45-48; Cu 2.13-22)

15 Rü yexguma Yerucharéüwa nangugügu, rü Ngechuchu rü tupauca ga taxünegü naxücu. Rü inanaxügü ga na ínawoxüâxü ga yema yéma ñacümaâ taxegüxü rü naxcèx taxegüxü. Rü nanangüegutanü ga norü mechagü ga yema duüxügü Tupanaarü âmarewa mexü ga díerumaâ taxegüxü rü muxtucumaâ taxegüxü. 16 Rü nanachüxu ga texé ñacü na yéma ngepetüxü tupauca ga taxünemachiawa. 17 Rü inanaxügü ga na nangüexèetaexü, rü ñanagürü: —Tupanaârü ore i úmatüxüwa rü ñanagürü:

“Chopata rü guxüma i nachüâñecüâxgüarü yumüxèpataügu tá naxâega”, ñanagürü. Natürü pema rü ngitèèxgüxüpataü peyaxixèè —ñanagürü. 18 Natürü yexguma yemaxü naxinüègu ga paigüarü âèxgacügü rü ngüexèèruügü ga Moíchéarü mugüwa ngüxèetaegüxü, rü inanaxügüga ga naxcèx na nadaugüxü ga ñuxâcü Ngechuchuxü na yamèxgüxü. Natürü duüxügüxü namuüè, rü yemacèx taxucürüwama duüxügüpegu nayayauxgü. Yerü nüma ga duüxügü rü namaâ nataâxègü ga yema Ngechuchuarü ngüxèetae. 19 Natürü yexguma marü nayáuanegü, ga Ngechuchu rü norü ngüexügümaâ nawa ínachoxü ga guma ñane.

Nariñexè ga yema iguera ga ngearü oõxü

(Mt 21.20-22)

20 Rü moxüâcü pèxmama rü igueraxütawa nachopetü. Rü yéma nüxü nadaugü ga na ñañexèxü ñuxmata naxchümèxâwa nangu. 21 Rü yexguma ga Pedru rü nüxna nacuèxâchi ga yema ñneâcü ngupetüxü, rü ñanagürü Ngechuchuxü: —Pa Ngüexèèruüx, dücax i iguera ga chixexü namaâ cuxuegüxü, rü marü narüñexè —ñanagürü. 22 Rü Ngechuchu nanangâxü, rü ñanagürü: —¡Nüxü peyaxögü ya Tupana! 23 —Rü aixcüma pemaâ nüxü chixu rü ngèxguma chi wüxie daa mëxpünexü tamuxgu na yaxügachixüçèx rü taxtü i taxüchiüwa nügü na yatáexüçèx, rü chi pega naxinü, ega aixcüma peyaxögüâcüma nüxü ngéma ñapegügu. 24 —Rü ngèmacèx pemaâ nüxü chixu rü guxüma i ñacü i naxcèx ípeçaxü i perü yumüxèwa, rü name nixü na peyaxögüxü na marü penayaxuxü, rü aixcüma tá penayaxu. 25 —Rü ngèxguma peyumüxègügu, natürü nangèxmagu i ñacüçèx texémaâ na penüèxü, ¡rü tüxü nüxü pengechaü! na Penatü ya daxügücü rü ta pexü nüxü nangechaüxüçèx i perü pecadugü. 26 —Natürü ngèxguma pema

tama tũxũ nũxũ pengechaũgũgu, rũ Penatũ ya daxũgucũ rũ tá ta tãtãtama pexũ nũxũ nangechaũ —ñanagũrũ.

Ngechuchuna nacagũe na texearũ oregagu tupauca ga taxũnewa nanguxẽetaexũ

(Mt 21.23-27; Lc 20.1-8)

²⁷ Rũ yemawena rũ Yerucharẽcẽx nawoegu. Rũ yexguma Ngechuchu rũ tupauca ga taxũnegu yaxũgũchigũyane, rũ naxcẽx naxĩ ga paigũarũ ãẽxgacũgũ, rũ ngũxẽẽruũgũ ga Moĩchearũ mugũwa ngxũẽetaegũxũ, rũ Yudĩugũarũ ãẽxgacũgũerugũ. ²⁸ Rũ nũxna nacagũe, rũ ñanagũrũgũ: —¿Texearũ mugagu nixĩ i cunaxũxũ i ngẽma núma cuxũxũ? ¿Rũ texe cuxũ tamu na cunaxũxũcẽx i ngẽma? —ñanagũrũgũ. ²⁹⁻³⁰ Rũ yexguma ga Ngechuchu rũ nanangãxũ, rũ ñanagũrũ nũxũ: —Choma rũ tá ta pexna chaca, rũ ngẽxguma choxũ pengãxũgu i ngẽma pexna naxcẽx chaçaxũ, rũ choma rũ tá ta pemaã nũxũ chixu na texe choxũ muxũ na chanaxũxũcẽx i ngẽma. ¿Rũ texe tanamu ga Cuáũ na duũxũgũxũ ínabaiũxẽẽxũcẽx? ¿Rũ Tupana yĩixũ ga namucũ rũ ẽxna duũxũgũmare? —ñanagũrũ. ³¹ Rũ yexguma ga nũmagũ rũ inanaxũgũe ga nũgũmaã na yaporagatanũcũxũ, rũ ñanagũrũgũ: —Rũ ngẽxguma chi:

“Tupana núma nanamu”, ñagũgũgu, rũ nũma rũ chi ñanagũrũ tũxũ:

“¿Tũxcũũ ga tama nũxũ peyaxõgũxũ?” ñanagũrũ chi tũxũ. ³² ¿Rũ ñũxũcũrũwa rũ:

“Yatũgũmare núma nanamu”, ñatarũgũgũ tá? Rũ yema ñanagũrũgũ yerũ duũxũgũxũ namuẽ. Yerũ guxũma ga duũxũgũ rũ nayaxõgũ rũ aixcũma Tupana nanamu ga Cuáũ na nũxũ yaxuxũcẽx ga norũ ore. ³³ Rũ yemacẽx Ngechuchuxũ nangãxũgũ, rũ ñanagũrũgũ: —Tama nũxũ tacuẽx ga texe núma na namuxũ ga Cuáũ ga baiũxẽẽruũ —ñanagũrũgũ. Rũ yexguma ga Ngechuchu rũ nanangãxũ rũ ñanagũrũ nũxũ: —Choma rũ ta tãtãtama pemaã nũxũ chixu na texe choxũ muxũ na chanaxũxũ i ngẽma choxna naxcẽx peçaxũ —ñanagũrũ.

12

Ore i puracũtanũxũ i chixexũgũgu ixuxũ

(Mt 21.33-46; Lc 20.9-19)

¹ Rũ Ngechuchu rũ inanaxũgũ ga ore ga cuẽxruũgũgu ixuxũmaã na nangũxẽẽtaexũ. Rũ ñanagũrũ nũxũ: —Nayexma ga wũxi ga yatũ ga norũ naãnegu ubanecũ ucũ. Rũ ínapanoxegu, rũ nanaxũ ga wũxi ga ubaarũ yaxutũxũchica, rũ wũxi ga dauxũtaechica na meã nũxna nadauxũcẽx ga guxũma. Rũ ñũxũchi ñuxre ga puracũtanũxũna nũxũ nadauxẽẽ. Rũ namaã nanamexẽẽ na ngãxũgu namaã ngĩxũ yatoyexũcẽx ga yema ubatanũ. Rũ ñũxũchi ga yema naãneãrũ yora rũ to ga nachiũãnewa naxũ. ² —Rũ yexguma nawa nanguxgu ga na yadauxũ ga yema ubagũ, rũ guma yatũ rũ yema puracũtanũxũgũxũtawã nanamu ga wũxi ga norũ duũxũxũ na naxcẽx iyaçaxũcẽx ga yema ubagũ ga nũxna uxũ. ³ —Natũrũ yema puracũtanũxũgũ rũ nayayauxgũ, rũ nanaçuaixgũ ga guma yatũarũ duũxũ. Rũ taxuũma ga ubagũ nũxna naxãgũ, rũ yemaãcũ ínayamugũ. ⁴ —Rũ yexguma ga guma yatũ rũ to ga norũ duũxũxũ yema namu. Natũrũ ga guma rũ nayamẽxerugũ, rũ namaã naguxchigagũ. ⁵ —Rũ yexguma rũ to ga norũ duũxũxũ yema namu. Natũrũ nayamẽxgũ. Rũ yemawena, rũ yema nanamugũ ga muxũma ga togũ ga norũ duũxũgũ. Natũrũ ga yema puracũtanũxũgũ rũ nayaçuaixgũ ga ñuxre, rũ togũ rũ

nanadai. ⁶—Rü yexguma rü nüxü ínayaxü ga nanexüchi ga poracü nüxü nangechaücü. Rü düxwa guma nanexü yéma namu, yerü nüma nagu naxínügu rü chi nanega naxínüë ga yema puracütanüxügü. ⁷—Natürü yexguma guma cori nanexü nadaugügu ga yema puracütanüxügü, rü nügümaã ñanagürügü:

“Ngëmaãrü tá nixí i ñaã naãne i yixcama. ¡Rü ngíxã tayamèxgü na tóxrü na yíixüçèx!” ñanagürügü. ⁸—Rü yemaãcü nayayauxgü, rü nayamèxgü. Rü yema ubanecüpechinüwa nayatèxgü ga naxüne. ⁹—Rü ñuxma rü pexna chaca, ¿pexcèx rü tacü tá naxü ya yima ubanecüarü yora namaã i ngëma puracütanüxügü i chixexügü? Rü dücax, rü ngëma tá naxü, rü tá nanadai i ngëma puracütanüxügü, rü togüna tá nanaxã i ngëma ubanecü. ¹⁰—¿Taguma éxna nawa pengüë i Tupanaãrü ore i ümatüxü? Erü ngëmawa rü ñanagürü:

“Rü yima nuta ya mecü ya ñãrü üruügü nüxü oechirécü, rü ñuxma rü yimatama nixí ya Tupana nüxíra yaxüchicü na namaã inaxügüãxüçèx ya ípata. ¹¹ Rü tórü Cori ya Tupana nixí ga naxücü ga yema, rü ñuxma rü namexëchi i taxcèx”,

ñanagürü i ngëma ore. ¹² Rü yexguma ga yema paigüarü ãëxgacügü, rü ngüxëëruügü ga Moíchéarü mugüwa ngüxëëtaegüxü, rü Yudiügarü ãëxgacügüerügü, rü Ngechuchuxü niyauxgüchaü. Yerü nüxü nacüèxgü ga nachiga na yíixü ga yema ore ga cuèxruügu yaxuxü. Natürü duüxügüxü namuüë rü yemacèx taxuüma namaã naxüë. Rü nüxna yéma ínixímare.

Ãëxgacüaxü dïërumaã naxütanüxüchiga
(Mt 22.15-22; Lc 20.20-26)

¹³ Rü yexguma ga yema ãëxgacügü rü Ngechuchuxütawa nana-mugü ga ñuxre ga norü duüxügü ga Parichéugü rü Erodetanüxügü na nüxna yacagüexüçèx, rü ngoxi tacü rü chixexü ga dexamaã nüxü nangãxü na yemaãcü ãëxgacügüxütawa na íyaxuaxügüãxüçèx. ¹⁴ Rü nümagü rü naxütawa naxí, rü ñanagürügü nüxü: —Pa Ngüxëëruüx, nüxü tacüèx rü aixcüma nixí i ngëma nüxü quixuxü i ore. Rü tama duüxügügamare cuxínü, erü tama norü düxétüxünegu cudawenü, natürü nacüma nixí i cungugüxü. Rü aixcüma cunangüexëë i duüxügü na Tupana naxwèxexüãcüma namaxëxüçèx. ¡Tomaã nüxü ixu! Rü ngëma dïëru ya ãëxgacü ya tacü ya Dumacüãx totanüwa ngíxü yauxchaücü ¿rü namexü yíixü na nüxna ngíxü taxãxü, rü éxna tama? —ñanagürügü. ¹⁵ Natürü ga Ngechuchu rü nüxü nacüèxama ga na chixexügu namaã naxínüëxü ga yema duüxügü woo meã namaã na yanadexagüxü. Rü yemacèx ñanagürü nüxü: —¿Tüxcüü chixexügu choxü pengüxëëchaüxü? ¡Nuã ngíxü pinge i wüxítachinü i dïëru na ngíxü chadauxüçèx! —ñanagürü. ¹⁶ Rü yéma naxütawa ngíxü nangegü ga wüxítachinü ga dïëru. Rü Ngechuchu rü ñanagürü nüxü: —¿Texéchicünèxã rü texééga nixí i ngígu üxü? —ñanagürü. Rü nümagü nanangãxügü, rü ñanagürügü: —Dumacüãx ya ãëxgacü ya tacüchicünèxã nixí —ñanagürügü. ¹⁷ Rü yexguma ga Ngechuchu rü ñanagürü nüxü: —¡Ãëxgacüna ngíxü pexã i ngëma ãëxgacüarü ixícü, rü Tupanana ngíxü pexã i ngëma Tupanaãrü ixícü! —ñanagürü. Rü yexguma yema orexü naxínüëgu, rü namaã nabaixãchiãëgü.

Ngechuchuna nacagüë rü ngoxi wena namaxë i duüxügü
(Mt 22.23-33; Lc 20.27-40)

18 Rū yemawena rū Ngechuchuxūtawa ínayadaugū ga ñuxre ga Chaduchéugū. Rū nūmagū nixī i nūxū yaxugūexū na tagutáma wena namaxēxū i yuexū. Rū yemacēx Ngechuchuna nayacagūe, rū ñanagūrūgū: 19 —Pa Ngúexēēruūx, Moíchéarū mugūwa rū ñanagūrū:

“Rū ngēxguma wūxi ya yatū naxmēx ngexacūyane nayuxgu, rū name nixī i naēneētama ngīmaā naxāmēx i ngēma yutecū i naxūmēx, na ngēmaācū naxāxācūxūcēx ya naēneē ga marū yucū”,

ñanagūrū ga yema ore. 20 —Dūcēx, nayexma ga 7 ga nūgūeneēgū. Rū naxāmēx ga guma yacū, natūrū tauta naxāxācūyane nayu. 21-22 —Rū yexguma ga naī ga naēneē nūxī ngīmaā naxāmēx ga yema ngecū, natūrū guma rū ta nayu rū nangexacū. Rū yexguma ga guma norū tomaēxpūx ga naēneē nūxī ngīmaā naxāmēx, natūr ū yexgumarūūtama nūxū nangupetū. Rū yemaācū, gucūma ga guma 7 ga nūgūeneē rū ngīmaā naxāmēx ga yema nge. Rū gucūma nayue tauta naxāxācūyane. Rū dūxwa ngīma rū ta iyu ga yema nge. 23 —Rū dūcax, ngēxguma yuexū wena maxēgu, ¿rū ngecxūrūcū naxmēx tá iyixī i ngēma nge? Yerū gucūma ga guma 7 ga nūgūeneēgū ngīmaā naxāmēx —ñanagūrūgū. 24 Rū yexguma ga Ngechuchu rū nanangāxū, rū ñanagūrū nūxū: —Pema rū ípetūe erū tama nūxū pecuēx i Tupanaārū ore i ūmatūxū, rū tama nūxū pecuēx i ñuxācū na naporaxū ya Tupana. 25 —Rū ngēxguma yuexū wena maxēgu, rū taxúetáma tixāmēxgū rū éxna tixātegū. Erū daxūcūāx i Tupanaārū orearū ngeruūgūrūū tá tixīgū i ngēxguma. 26 —Pema choxna peca i yuexūārū dagūchiga. ¿Natūrū tama éxna nawa pengúe i Tupanaārū ore ga Moíché ūmatūxū ga naīxācū ga íyauXRatanūnechigaxū íyaxuxūwa? Erū yema orewa rū Moíchéxū ñanagūrū ga Tupana:

“Choma nixī i Abráūrū Tupana, rū Ichaárū Tupana, rū Acobuarū Tupana”,

ñanagūrū. 27 —Rū ngēma orewa nūxū tacuēx rū Tupana rū maxēxūārū Tupana nixī rū tama yuexūārū Tupana nixī, erū Tupanaarū ínūwa rū taxúema tayu. Rū ngēmaācū i pema rū poraācū ípetūe —ñanagūrū.

Ngēma Tupanaārū mu i guxū i norū mugūarū yexera ixīxū
(Mt 22.34-40)

28 Rū wūxi ga ngúexēēruū ga Moíchéarū mugūwa nguxēētaexū, rū nūxū naxīnū ga yema togū ga namūcūgū ga Ngechuchumaā na íyaporagatanūcūxū. Rū nūma rū nūxū nicuēxāchi ga meāma na nangāxūāxū. Rū yemacēx Ngechuchucēx nixū, rū nūxna naca, rū ñanagūrū nūxū: —Pa Ngúexēēruūx, ¿ngēxūrūūxū i Tupanaārū mu nixī i guxū i norū mugūarū yexera ixīxū? —ñanagūrū. 29 Rū Ngechuchu nanangāxū, rū ñanagūrū: —Ngēma Tupanaārū mu i guxū i norū mugūarū yexera ixīxū, rū ñāā nixī, ñanagūrū:

“¡Iperūxīnūē, Pa Iraéanecūāxgū! Rū nūma ya Cori ya tórū Tupana, rū yixicatama nixī ya tórū Cori. 30 ¡Rū nūxū nangechaū ya Cori ya curū Tupana guxūne ya curū maxūnemaā, rū guxū i cuāēmaā, rū guxū i nagu curūxīnūxūmaā, rū guxū i curū poramaā!”

ñanagūrū. 31 —Rū ngēma norū taxre i Tupanaārū mu, rū ñanagūrū:

“¡Rū nūxū nangechaū i cumūcū na cugū cungechaūxūrū!”

ñanagūrū. Rū nataxuma i to i Tupanaārū mu i ngēmagūarū yexera ixīxū —ñanagūrū. 32 Rū yexguma ga yema ngúexēēruū ga mugūwa nguxēētaexū, rū ñanagūrū Ngechuchuxū: —Marū name, Pa Ngúexēēruūx, erū aixcūma nixī i ngēma nūxū quixuxū na wūxixicatama na yīxū ya Tupana, rū

nataxuma ya naĩ. ³³ —Rü ngêma Tupanaxũ na ingechaũxũ guxũne ya tórü maxũnemaã, rü guxũ i nagu rüxĩnũxũmaã, rü guxũ i tórü poramaã, rü nüxũ na ingechaũxũ i tamücü i yigü na ingechaũxũrũ, rü ngêma rü guxũma i carnerügü i Tupanacêx idêixũ rü iguxũlarü yexera narümemaẽ —ñanagürü. ³⁴ Rü yexguma Ngechuchu nüxũ dèuxgu ga mexũgu na naxĩnüácüma na nangãxũãxũ ga yema ngúexêëruũ ga mugüwa nguxêëtaexũ, rü ñanagürü nüxũ: —Marü tama taxũ cuxũ nataxu na cunayaxuxũ ya Tupana na curü ãêxgacü yĩxũcêx —ñanagürü. Rü yemawena rü marü taxuũma nügü naporaxêë na nüxna yacachigũxũcêx.

¿Texé nane nixĩ ya Cristu?

(Mt 22.41-46; Lc 20.41-44)

³⁵ Rü yexguma tupauca ga taxũnewa ínangúexêëtaeyane ga Ngechuchu, rü duũxũgüna naca, rü ñanagürü: —¿Tũxcüü nixĩ i ngêma ngúexêëruũgü i mugüwa nguxêëtaegũxũ i ñagũxũ:

“Yima Cristu ya Tupana nüxũ unetacü rü nuxcũmaücü ga ãêxgacü ga Dabítaa nixĩ”, ñagũxũ? ³⁶ —¿Rü ñuxácü i ngêmaãcü yadexagũxũ? Yerü nümatama ga Dabí, rü yexguma Tupanaãe i Üünexũ naãêwa ideaxgu rü ñanagürü:

“Cori ya Tupana rü chorü Corixũ ñanagürü: ‘¡Nuã chorü tügü necüwawa rüto ñuxmatáta nüxũ charüporamaẽ i curü uwanügü na cuga naxĩnüêxũcêx!’ ”

ñanagürü ga yema orewa. ³⁷ —¿Natürü ñuxcürüwa i Dabítaa yĩxũ ya Cristu, ega nümatama ga Dabí, rü norü Corimaã naxuãgu? —ñanagürü. Rü yema muxũma ga duũxũgü ga yéma yexmagũxũ, rü taãêcũma Ngechuchuaxũ inarũxĩnüe.

Ngechuchu rü nüxũ nixu na tama yameãrũ maxũãxgũxũ ga yema ngúexêëruũgü ga Moĩchéarũ mugüwa nguxêëtaegũxũ

(Mt 23.1-36; Lc 11.37-54, 20.45-47)

³⁸ Ngechuchu rü norü nguxêëtaewa rü ñanagürü: —¡Pexuãêgü naxcêx i ngêma ngúexêëruũgü i Moĩchéarũ mugüwa nguxêëtaegũxũ! Erü nümagü rü norü me nixĩ i mexũ i naxchirumaã na naxĩãneãxũ. Rü nanaxwêxegü na ítamüwa duũxũgü meã nüxũ na rümoxêgũxũ. ³⁹ —Rü ngutaquêxepataũgüwa rü norü me nixĩ i ãêxgacügümèxwêxewa na natogũxũ. Rü õnagü i taxũwa rü ngêma õnaãrũ yoraxũtawa ügũxũ i nachicacêx nadaugü. ⁴⁰ —Natürü tũxna nanapuxũ ya tũmapatagü ya yíkema yutegũxe. Rü ñuxũchi nanamèxêë i norü yumũxêgü na ngêmagu nügü yacuxgũxũcêx rü duũxũgü nagu rüxĩnüêxũcêx na aixcũma mexũgü na yixĩgũxũ. Natürü nümagü tá nixĩ i yexeraãcü napoxcuxexũ —ñanagürü.

Yutecü ga ngearü dïëruãxcü ga Tupanacêx dïëru ngĩxũ ixãcü

(Lc 21.1-4)

⁴¹ Wüxicana ga Ngechuchu rü tupauca ga taxũneãrũ dïëruchiũãrũ toxmèxtawa narüto. Rü yéma inadawenü ga ñuxácü duũxũgü yexma ngĩxũ yanaxücuchigũxũ ga norü dïërugü. Rü muxũma ga duũxũgü ga idïëruãxgũxũchixũ rü yexma ngĩxũ nayarũxücuchigü ga muxũchicü ga norü dïëru. ⁴² Rü ngürü yéma ingu ga wüxi ga yutecü ga ngearü dïëruãxcü. Rü ngĩma rü wüxi ga yema dïëruchiũgu ngĩxũ iyarũxücuchi ga taxretachinü ga dïërucacü ga ítanücü. ⁴³ Rü yexguma ga Ngechuchu rü norü ngúexũgüçêx naca, rü ñanagürü nüxũ: —Aixcũma pemaã nüxũ chixu rü ñãã ngecü i yutecü i ngearü dïëruãxcü, rü guxũ i ngêma togü i dïëruchiũgu

dīēru ngīxū ixūcuchigūxūārū yexera ngīxū ixā. ⁴⁴ Erū guxūma i togū rū ngīxū inaxāgū i ngēma nūxū íyaxūgūcū. Natūrū ngīma ngīxū natauxyane ngīxū ixā i guxcūma i ngīxū ngēxmēxcū i ngīrū ōnatanū —ñanagūrū.

13

*Ngechuchu nanaxunagū na tupauca ga taxūnegu tá na napogūexū
(Mt 24.1-2; Lc 21.5-6)*

¹ Rū yexguma tupauca ga taxūnewa ínaxūxūgu ga Ngechuchu, rū wūxi ga norū ngūexūgū rū ñanagūrū nūxū: —Pa Ngūexēēruūx ¡dūcax ñuxācū nimexēchi ya daa tupauca ya itaxūne rū naxtapūxarū nutagū! —ñanagūrū. ² Natūrū Ngechuchu nanangāxū, rū ñanagūrū: —Pema nūxū pedaugū ya guxūnema ya yima tupauca ya taxūneārū ípatagū. Natūrū pemaā nūxū chixu rū aixcūma guxūnema ya daa ípatagū rū tá nagu napogūe. Rū norū nutagū rū taxucūtáma nūgūétū naxūxūra, rū bai tá ya wūxi —ñanagūrū.

*Cuēxruūgū i tá nūxū idauxū naxūpa na nagúxū i naāne
(Mt 24.3-28; Lc 21.7-24, 17.22-24)*

³⁻⁴ Rū yemawena rū Oríbunecūarū Mēxpúne ga tupauca ga taxūneārū toxmēxtawa yexmanewa naxī. Rū yéma narūto ga Ngechuchu. Rū Pedru rū Chaūtiágu rū Cuáū rū Aūdré rū naxūtawa naxī na noxrūwama nūxna nacagūexūcēx. Rū ñanagūrūgū: —Tanaxwēxe i tomaā nūxū quixu na ñuxgu tá nangupetūxū i ngēma nūxū quixuxū. ¿Rū ¡tacū tá nixī i norū cuēxruū i nawa nūxū tacuáxū ega nawa tá nanguxgu i ngēma? —ñanagūrūgū. ⁵ Rū yexguma ga Ngechuchu rū nanangāxū rū ñanagūrū nūxū: —¡Pexuāēgū na taxūema pexū womūxēēxūcēx! ⁶—Erū muxūchixū i duūxūgū tá ínangugū, rū chaugu tá nūgū nicuxgū, rū ñanagūrūgū tá:

“Choma nixī i Cristu”, ñanagūrūgū tá. Rū muxūchixū i duūxūgūxū tá nawomūxēē. ⁷—Rū ngēxguma nūxū pexīnūēgu na nūgū nadēixū i nachiūānegū i ngaicamagūxū rū togū i nachiūānegū i yaxūgugūxū, ¡rū tāūtáma ngēmacēx pebaixāchiāēgū! Erū woetama ngēmaācū tá nangu-petū. Natūrū tāūtáma naāneārū gux nixī i ngēma. ⁸—Erū wūxi i nachiūāne rū to i nachiūānemaā tá nūgū nadai. Rū wūxi ya āēxgacūarū churaragū rū to i āēxgacūarū churaragūmaā tá nūgū nadai. Rū muxūma i nachicawa rū tá naxīāxāchiane. Rū tá taiya nangux. Natūrū guxūma i ngēma rū norū ūgūmare nixī i ngēma ngúxū i tá ínguxū. ⁹—¡Rū meā pegūna pedaugū! Erū āēxgacūgūpēxewa tá pexū nagagū, rū ngutaquēxepataūgūgu tá pexū nicuaixgū. Rū nachiūānegūarū āēxgacūgūpēxewa tá pexū nagagū naxcēx na chorū duūxūgū na pixīgūxū. Natūrū ngēmaācū tá pexū natauxcha na ngēma āēxgacūgūmaā nūxū pixuxū i chauchiga. ¹⁰—Natūrū naxūpa na nagúxū i naāne rū tá nūxū nixugūe i Tupanaārū ore i guxū i nachiūānegūwa. ¹¹—Natūrū ngēxguma āēxgacūgūpēxewa pexū nagagūgu, ¡rū tāūtáma pexoegaāēgū naxcēx na ¡acūmaā tá penangāxūxū! ¡Rū namaā nūxū pixu i ngēma ore i ngēxgumatama Tupana pexna āxū na nūxū pixuxūcēx! Erū tāūtáma pema nixī na pidexagūxū, natūrū Tupanaāē i Ūūnexū tá nixī i pewa idexaxū. ¹²—Rū nūgūeneēgūwa tátama rū āēxgacūgūxūtawa nūgū ínayaxuaxūgū na ngēmaācū tūxū nadēixūcēx. Rū ngēxgumarūū tá ta i papāgū rū mamāgū rū tá naxācūgūxū ínayaxuaxūgū. Rū nūmagū i naxācūgū rū tá nanatūgūmaā rū naēgūmaā nanuē, rū tá tūxū ínayaxuaxūgū na āēxgacūgū tūxū nadēixūcēx. ¹³—Rū guxū i naānewa

rü duüxügü tá pexchi naxcèx na chorü duüxügü pixigüxü. Natürü yíxema naetüwa meã Tupanaãxü yaxõomáxë, rü yíxema tá tixí ya aixcúma nayaxúxe i maxü i taguma gúxü. ¹⁴—Rü ngëxguma nüxü pedèuxgu i ngëma ãüächixü rü ãücúmaxüchixü i chixexëeruü i ngextá tama ínaxwèxexüwa na nangëxmaxü, rü ngëxguma ya yíxema Yudéaanewa ngëxmagüxe, rü tanaxwèxe i mèxpúneãnewa tabuxmü. Rü texé ya yíxema nüxü daumatüxe, jrü name nixí i meã nagu tarüxñü i ngëma! ¹⁵—Rü ngëma ngunexügu texé tümapatàxtüwa ngëxmagu, rü tama name i tümapatagu tayangaxi na tacü i tümäärü ngëmaxü tayayaxuxücèx. ¹⁶—Rü texé ya tümãnewa ngëxmaxë rü tama name i tümapatacèx tataegu na tümachirugü tayayaxuxücèx. ¹⁷—Rü ngëma ngunexügügu, rü wüxi i ngechaü tá nixí i tümacèx ya yíxema ngexegü ya itacharaügüxe rü yíxema maíxácügüxe. ¹⁸—jRü Tupanana naxcèx peca i perü yumüxëwa na tama gáuane ixüyane pexü na nangupetüxücèx i ngëma chixexü! ¹⁹—Erü ngëma ngunexügügu rü poraãcü tá nangëxma i ngúxü ga noxri Tupana naãne ixügügumama taguma yexmaxü, rü ngëmawena rü tagutáma nangëxma. ²⁰—Rü ngëxguma Tupana tama nanoxrexëëgu i ngëma ngunexügü, rü taxúetáma tamaxü. Natürü Tupana rü marü nananoxrexëë i ngëma ngunexügü erü tüxü nangechaü ya yíxema noxrüxü tüxü nadexe. ²¹—Rü ngëxguma texé pexü ñagügu:

“Dúcèx, daa nixí ya Cristu”, ñagügu, rü éxna:

“Gua nixí ya Cristu”, ñagügu, jrü táxü i nüxü peyaxõgüxü! ²²—Erü Cristugüneta rü Tupanaãrü orearü uruügüneta tá ínangügü. Rü tá nanaxügü i muxüma i cuèxruügü i taxügü. Rü ngëmaãcü, ega nüxü natauxchagu, rü tá tüxü nawomüxëëgü woo ya yíxema duüxëgü ya Tupanatama tüxü dexe. ²³—jPexuãëgü! Erü guxüma i ngëma tá ngupetüxü, rü marü naxüpa pemaã nüxü chixu.

Ñuxãcü tá nixí i ngëxguma nataegugu ya Tupana Nane ya duüxüxü ixícü (Mt 24.29-35, 42, 44; Lc 21.25-36)

²⁴—Natürü marü nangupetügu i ngëma ngúxügü, rü ngëma ngunexügügu rü tá nixo ya üèxcü rü tãütáma inabaxi ya tauemacü. ²⁵—Rü woramacurigü rü èxtagü rü tá narüyi. Rü guxüma i daxüwa ngëxmaxü rü tá naxíãxächitanü rü nachicana tá nixígachitanü. ²⁶—Rü ngëxguma i duüxügü rü tá nüxü nadaugu ya Tupana Nane ya duüxüxü ixícü na caixanexügu ínaxixü i guxüma i norü poramaã rü norü ngóonexümaã. ²⁷—Rü tá nanamu i norü orearü ngeruügü i daxücüãx na tüxü nanutaquëxexücèx ya yíxema Tupana tüxü idexechixe ya guxüwama ngëxmagüxe ñuxmatáta naãne íyacuáxüwa nangu. ²⁸—jIperüxñüë i ñaã nguxëëtae i orix i iguerachiga, rü naxcèx pengüé! Rü ngëxguma ngexwacaxüxü i nachacüüxacügü iyarüyixgu rü naxüátügu, rü ngëmawa nüxü pecuèx na paxa tá taunecü yíxü. ²⁹—Rü ngëxgumarüü ta, rü ngëxguma nüxü pedèuxgu na nangupetüxü i ngëma pemaã nüxü chixuxü, rü ngëmawa tá nüxü pecuèx na paxaxüchi tá ínanguxü ya Tupana Nane ya duüxüxü ixícü. ³⁰—Rü guxüma i ngëma ñuxma pemaã nüxü chixuxü rü aixcúma tá nangupetü naxüpa na nayuexü i ngëma duüxügü i ngëxguma maxëxü. ³¹—Daxüguxü i naãne rü ñoma i naãne rü tá inayarüxo. Natürü chorü ore rü tagutáma inayarüxo, rü aixcúma tá ningü. ³²—Natürü ngëma ngunexü rü ora i nagu tá nangupetüxü i ngëma pemaã nüxü chixuxü, rü Tanatü ya Tupanaxícatama nüxü nacuèx

i ñuxgu tá na nangupetüxü i ngêma, rü taxúema ya togue nüxü tacuèx. Rü woo i norü orearü ngeruüğü i daxüçüâx rü tama nüxü nacuèxgü, rü woo i choma na Nane chíxü rü tama nüxü chacuèx i ñuxgu tá na nangupetüxü i ngêma. ³³—Rü ngêmacèx, ipedaue rü pexuâégü! Erü tama nüxü pecuèx i tacü rü ora tá íchangu i chomax. ³⁴—Rü guxüma i ngêma pemaã nüxü chixuxü, rü ñoma wüxi ga yatü ga ixüâchichaücü na to ga nachiüânewa naxüçüçêrxüxü nixí. Rü yemacèx norü puracütanüxüna naxâga na mea nüxna nadaugüxüçèx ga guma napata. Rü ñuxüchi wüxichigüna nanaxâ ga norü puracü. Rü yêma íâxârü dauruü rü nagu nanamu na mea nadauxütaegüxüçèx. ³⁵⁻³⁶—¡Rü ngêmacèx i pema rü name na ípexuâxégüxü! Erü tama nüxü pecuèx i ñuxgu tá ínangu ya yima cori ya ípataarü yora, rü bexmana noxri nachütagu, rü êxna ngâxüçüügu, rü êxna otá icaxgu, rü êxna noxri yangóonegu. ¡Rü ngêmacèx ipedaue na ngürüâchi ínanguxgu tama ípepeeyane pexü na íyanguéüxüçèx! ³⁷—Rü ngêma ore i pemaã nüxü chixuxü, rü guxü i duüxügüçèx nixí. ¡Rü ipedaueecha! —ñanagürü.

14

Âêxgacügü naxcèx nadaugü na ñuxâcu Ngechuchuxü yayauxgüxü
(Mt 26.1-5; Lc 22.1-2; Cu 11.45-53)

¹ Rü taxre ga ngunexü nataxu ga na nawa nanguxü ga Yudíugüarü peta ga Üpetüchiga ga nagu nangõxgüâxü ga pãü ga ngearü puxêëruüâxü. Rü ga paigüarü âêxgacügü rü ngúexêëruüğü ga mugüwa nguxêëtaegüxü rü naxcèx nadaugü ga ñuxacü bexma duüxügüechita Ngechuchuxü na yayauxgüxü rü na yamèxgüâxüçèx. ² Yerü nümaxü rü ñanagürüğü: —Taxucürüwama ñuxma petagu tayayauxgü, erü duüxügü rü tá tamaã nanuê —ñanagürüğü.

Wüxi ga nge rü Ngechuchuerugu inaba ga pumara
(Mt 26.6-13; Cu 12.1-8)

³ Rü Ngechuchu rü Betániãwa naxü napatawa ga Chimáü ga rüchaxüneçümaã naxugüâcü. Rü yexguma mechawa natoyane, rü yêma ingu ga wüxi ga ngeçü ga wüxiweü ga pumara ga yixichixü ga tatanüxüchixü yêma ngeçü. Rü iyapoyenagu ga yema pumarachixü ga nuta ga mexêchicünaxcèx, rü Ngechuchuerugu inaba. ⁴ Natürü ñuxre ga yema yêma yexmagüxü rü nanuê naxcèx ga yema naxüxü ga yema ngeçü, rü nügümaã ñanagürüğü: —¿Tüxcüü ngêxma inaxaiyaxü i ngêma pumara? ⁵—Rü narümemaê chi nixí i 300 tachinü i díerugu namaã itaxe, rü ñuxüchi ngêma díerumaã nüxü irüngüxêë i ngêma duüxügü i ngearü díeruâxgüxü —ñanagürüğü. Rü yemaãcü ngíchiga nidexagü ga yema nge. ⁶ Natürü ga Ngechuchu rü ñanagürü nüxü: —¡Ngexrüma! ¿Tüxcüü ngíxü pechixewe? Erü ngêma chomaã naxüxü, rü wüxi i mexü nixí. ⁷—Rü ngêma ngearü díeruâxgüxü rü guxügutáma petanüwa nangêxmagü, rü ngêmaãcü pexü natauxcha na nüxü perüngüxêëxü i ngêxguma penaxwèxegu. Natürü i choma rü táütáma guxügu petanüwa changêxma. ⁸—Rü ñaã nge rü inaxü i guxüma i ngêma ngíxü tauxchaxü, rü ngêmacèx yoxni choxü ipumaraxüne naxüpa na ichatáxü. ⁹—Rü aixcüma pemaã nüxü chixu rü guxü i naãnewa i ngextá duüxügü nüxü íxugügüxüwa i ore i maxêëëruü, rü ñaã ngeçü chomaã üxü rü tá ta nüxü nixugügü. Rü ngêmaãcü tá ngíxna nacuèxâchie i duüxügü —ñanagürü ga Ngechuchu.

Yuda rü ãëxgacügümaã nanamexëë na ñuxãcü tá na Ngechuchuxü yayauxgüxüçèx

(Mt 26.14-16; Lc 22.3-6)

¹⁰ Rü Yuda Icaríute ga wüxi ga yema 12 ga ngúexütanüxü ixíxü, rü Yudíugüarü paigüarü ãëxgacügütanüwa naxü na namaã yamexëëãxüçèx na ñuxãcü tá na Ngechuchuxü yayauxgüxüçèx. ¹¹ Rü yexguma yemaxü naxínüëgu, rü nümagü ga yema ãëxgacügü rü nataãëgü. Rü díëru Yudana ngíxü naxuaxügü. Rü yexgumama inanaxügü ga Yuda ga naxcèx na nadauxü ga ñuxãcü nüxü na natauxchaxëëgüãxü na duüxügüechita Ngechuchuxü yayauxgüxüçèx.

Coriarü ðnachiga

(Mt 26.17-29; Lc 22.7-23; Cu 13.21-30; 1 Co 11.23-26)

¹² Rü nawa nangu ga ngunexü ga nagu inaxügüxü ga yema peta ga pãu ga ngearü puxëëruüãxü nagu nangõxgüxü. Rü yema nixí ga ngunexü ga nagu carneruxacü naxcèx yamëxgüxü ga Üpetüchigaarü peta. Rü yexguma ga norü ngúexügü rü Ngechuchuna nacagüe, rü ñanagürügü: —¿Ngextá cunaxwèxe na tanamexëëxü i ðna i Üpetüchigaarü petagu ingõxü? —ñanagürügü. ¹³ Rü yexguma ga nüma rü nanamu ga taxre ga norü ngúexügü, rü ñanagürü nüxü: —¡Ëcü, yéa ñãnewa pexí! Rü ngëxma tá nüxü peyangau i wüxi i yatü i wüxi ya tüxü ya dexámaã ããcuxe ngëxma tüxü ingexü. ¡Rü nawe perüxí! ¹⁴ —¡Rü yima ípata ya nagu yaxücune i ngëma yatü, rü yima íarü yoramaã nüxü pixu, rü ñapegügü nüxü:

“Torü ngúexëëruü nüxü nacuáxchaü na ngëxü yíxü i ngëma ucapu i norü ngúexügümaã tá nawa nachibüxü i Üpetüchigaarü ðnagu”, ñapegügü nüxü! ¹⁵ —Rü nüma tá pexü nüxü nadauxëë i wüxi i ucapu i taxü i marü meã mexëëxü i norü daxüchiüwa ngëxmaxü. ¡Rü ngëma penamexëëx i tóru ðna i Üpetüchigacèx ixíxü! —ñanagürü nüxü. ¹⁶ Rü inaxíãchi ga yema taxre ga ngúexügü, rü ñãnewa naxí. Rü yexma nüxü inayangaugü ga guxüma yema Ngechuchu namaã nüxü ixuxürüü. Rü yéma nanamexëë ga ðna ga Üpetüchigacèx ixíxü. ¹⁷ Rü yexguma marü nachütachaügu, rü ínangu ga Ngechuchu namaã ga yema 12 ga norü ngúexügü. ¹⁸ Rü yexguma mechawa ínachibüeyane, rü Ngechuchu rü ñanagürü nüxü: —Aixcüma pemaã nüxü chixu rü wüxie ya petanüwa i ñuxma chomaã nuã chibüxe tá tixí ya bexma choxü íyaxuaxüxë —ñanagürü. ¹⁹ Rü yexguma ga nümagü ga norü ngúexügü rü poraãcü nangechaügu. Rü inanaxügüe ga na wüxichigü nüxna icachigüxü, rü ñanagürügü: —Pa Corix, ¿choma tá chíxü i cuxü íchayaxuaxüxü? —ñanagürügü. ²⁰ Rü nüma ga Ngechuchu nanangãxü rü ñanagürü nüxü: —Wüxi i pema i 12 tanüwa i daatama poratuwa norü pãu iwaixëëxü, rü ngëma tá nixí i choxü íyaxuaxüxü. ²¹ —Rü choma i Tupana Nane na duüxüxü chíxü, rü tá chayü ngëma Tupanaãrü ore i ümatüxü nüxü ixuxürüü. Natürü wüxi i ngechaüxüchi nixí naxcèx i ngëma yatü i choxü íyaxuaxüxü. Rü narümemaë chi nixí ga noxtacüma tãü chima na nabuxü —ñanagürü. ²² Rü yexguma ínachibüeyane, rü Ngechuchu nanayaxu ga pãu. Rü Tupanana moxë naxã, rü inanabücu, rü norü ngúexügüxü nayanu. Rü ñanagürü nüxü: —¡Penayaux i ñãã pãu! Rü ngëma rü chaxunechiga nixí —ñanagürü. ²³ Rü yemawena nanayaxu ga wüxi ga pochíyu ga binumaã ããcuxü. Rü yexgumarüü ta Tupanana moxë naxcèx naxãxíra, rü ñuxüchi norü ngúexügüna nanaxã. Rü guxüma nawa naxaxegü. ²⁴ Rü ñanagürü nüxü: —Daa binu ya chaugü i muxüma

i duǔxǔgücèx ibacüchiga nixĩ. Rũ yimawa Tupana meãma nanangoxẽẽ na aixcũma yĩixũ i norũ uneta. ²⁵ —Rũ aixcũma pemaã nüxũ chixu rũ tãxütãma wena chayaxaxũ ya daa binu ñuxmatãta Tupana ãẽxgacũ íixĩxũwa binu ya ngezwacaxücü chayaxaxũx —ñanagürũ.

Ngechuchu nüxũ nixu rũ Pedru rũ taxütãma nügũ nixu na norũ ngüexũ yĩixũ

(Mt 26.30-35; Lc 22.31-34; Cu 13.36-38)

²⁶ Rũ ñuxũchi nawiyaegũ ñuxre ga Tupanaãrũ wiyaeegu. Rũ yemawena rũ Oribunecüarũ Mèxpúnewa naxĩ. ²⁷ Rũ yexguma ga Ngechuchu rũ ñanagürũ nüxũ: —Guxãma i pema rũ tá choxũ ípetèxgũ. Erũ ngẽmaãcü nüxũ nixu i Tupanaãrũ ore i ñumatüxũ i ñaxũ:

“Tã chayamèx ya carneruarũ dauruũ, rũ tá nanaxüanemare i carnerugũ”, ñaxũ. ²⁸ —Natürũ ngèxguma marũ yuwa ícharüdaxguwena, rũ chaxira tá pexüpa Gariréaanewa chaxũ —ñanagürũ. ²⁹ Rũ yexguma ga Pedru rũ ñanagürũ nüxũ: —Woo guxũma i togü cuxũ ítèxgu, rũ choma rũ tãütãma cuxũ íchatèx —ñanagürũ. ³⁰ Rũ Ngechuchu nanangãxũ rũ ñanagürũ nüxũ: —Aixcũma cumaã nüxũ chixu rũ ñomatama i chütaxũgu rũ naxüpa na taxreèxpüxcüna yaçaxũ i otã, rũ tomaèxpüxcüna taxütãma cugũ quixu na chorũ duũxũ quĩxũ —ñanagürũ. ³¹ Natürũ nüma ga Pedru rũ ñanagürüama: —Woo wüxigu cumaã chayuxgu, rũ tãxütãma chaugũ ichicux na curũ duũxũ chiixũ —ñanagürũ. Rũ guxũma ga togü ga norũ ngüexũgũ rũ ta yema ñanagürügũ.

Ngechuchu rũ Yechemaníwa nayayumüxẽ

(Mt 26.36-46; Lc 22.39-46)

³² Rũ yemawena rũ Ngechuchu rũ norũ ngüexũgũ rũ nawa naxĩ ga wüxi ga nachica ga Yechemanígu ãegaxũ. Rũ Ngechuchu rũ ñanagürũ nüxũ: —¡Nuã perütogü yoxni paxa yéa chayayumüxẽ! —ñanagürũ. ³³ Rũ ñuxũchi ínayagagũ ga Pedru, rũ Chaütiãgu, rũ Cuãũ. Rũ naxcèx inaxügũ ga na poraãcü nangechaũxũ rũ naxixãchiãèxũ. ³⁴ Rũ yexguma rũ ñanagürũ nüxũ: —Poraãcü changechaũ, rũ nagu charüxĩnũ na ngẽmamaã tá chayuxũ. ¡Rũ nuxa perücho i pemax, rũ ipedaue! —ñanagürũ. ³⁵ Rũ yexguma ga Ngechuchu rũ yéaxüra naxũ. Rũ ñaxtünegü nanangücuchi. Rũ Tupanana naxcèx naca na nawa ínanguxuchixüçèx ga yema ngüxũ ga yexguma chi Tupanaãrũ ngüchaũ yixĩgu. ³⁶ Rũ norũ yumüxèwa rũ ñanagürũ: —Pa Chaunatüx, cuxcèx rũ guxũma natauxcha. ¡Rũ nüxna choxũ ínanguxuchixèẽ i ñaã ngüxũ i tá choxũ üpetüxũ! Natürũ chanaxwèxe i cunaxü i cuxrütama ngüchaũ rũ tama i choxrũ —ñanagürũ. ³⁷ Rũ ñuxũchi nataegu ga norũ ngüexũgũ íyexmagüxũwa. Rũ nüxũ inayangau ga na ínapeexũ. Rũ ñanagürũ Pedruxũ: —Pa Chimãux, ¿ícupe? ¿Tama èxna namaã cupora na icudauxũ, rũ bai i wüxi i ora? ³⁸ —¡Rũ ipedaue, rũ Tupanana naxcèx peça na pexũ nangüxèèxüçèx na tama choxũ ípetãxüçèx i ngèxguma íacü rũ guxchaxũ pexũ üpetügu! Erũ aixcũma peãèwa rũ ípememare, natürũ pexene nixĩ i ngẽma turaxũ —ñanagürũ. ³⁹ Rũ wenaxãrũ ínixũ, rũ noxrirüütama nayayumüxẽ. ⁴⁰ Rũ yexguma wenaxãrũ norũ ngüexũgücèx nayaexgugu, rũ nüxũ inayangau ga na wenaxãrũ ínapeexũ, yerũ poraãcü naxaxtaexüchi. Rũ yemacèx ga nümagü rũ tama nüxũ nacüèxgü ga na íacümaã tá nangãxüğüãxũ. ⁴¹ Rũ norũ tomaèxpüxcüna wenaxãrũ norũ ngüexũgücèx nataegu, rũ ñanagürũ nüxũ: —¿Ñuxma rũ ta èxna ípepeeama rũ iperüngüèãma? ¡Rũ marütama!

Erü choma i Tupana Nane na duũxũxũ chiĩxũ rü marü nawa nangu i ora na choxũ na yayauxgũxũ rü nüxna na choxũ namugũxũcèx i duũxũgü i chixexũ i pecaduãxgũxũ. ⁴² —;Rü ipechigü, rü ngĩxã ítixĩ! Erü marü ñomama nixĩ i ngẽma choxũ íyaxuaxũxũ —ñanagürü.

Ngechuchuxũ niyauxgü

(Mt 26.47-56; Lc 22.47-53; Cu 18.2-11)

⁴³ Rü yexguma íyadexayane ga Ngechuchu, rü ínangu ga Yuda ga norü ngúexũchirèx ixĩxũ. Rü nawe narũxĩ ga muxũma ga duũxũgü ga taramaã rü naĩmaã ixãxnexũ. Rü yema nixĩ ga duũxũgü ga yema namugũxũ ga paigüarü ãèxgacügü rü ngúexèèruũgü ga mugüwa nguxèètaegũxũ rü Yudiũgüarü ãèxgacügüerugü. ⁴⁴ Rü Yuda ga ínaxuaxũxũ rü marü yema duũxũgümaã nanamexèè, rü ñanagürü:

“Ngẽma nüxũ chachũxuxũ nixĩ i Ngechuchu. Rü ngẽma tá nixĩ i piyauxgũxũ rü meã peyanáĩácũma peyagagũxũ” —ñanagürü. ⁴⁵ Rü yemaãcü Ngechuchucèx nixũ, rü ñanagürü nüxũ: —Pa Ngúexèèruũx —ñanagürü. Rü ñuxũchi nanachũxu. ⁴⁶ Rü yexgumatama Ngechuchuxũ niyauxgü. ⁴⁷ Natürü wüxi ga Ngechuchutanũxũ nanawèxechi ga norü tara, rü yemamaã paigüarü ãèxgacüarü duũxũxũ ínadaechinü. ⁴⁸ Rü yexguma ga Ngechuchu rü yema duũxũgüna naca, rü ñanagürü nüxũ: —¿Tũxcüũ taragü rü naĩxmenèxãgũmaã chauxcèx nuã pexĩ na choxũ peyarüyauxgũxũcèx ñoma wüxi i ngítèxáxũ chiĩxũrüü? ⁴⁹ —Rü guxũ ga ngunexũgu rü petanüwa chayexma ga yexguma tupauca ga taxũnewa changuxèètaegu, rü taguma choxũ piyauxgü. Natürü ñaã ñuxma ngupetũxũ, rü nangupetü na yanguxũcèx i Tupanaãrũ ore i ümatũxũ —ñanagürü. ⁵⁰ Rü yexguma ga guxũma ga norü ngúexũgü rü nüxna nibuxmü. Rü nüxĩcatama yema nanatèxgü ga Ngechuchu. ⁵¹ Natürü wüxi ga ngextũxücü ga düxruũmaãxĩca nügü nuquecü nawe nixũchigü. Rü yema duũxũgü rü nayayauxgü. ⁵² Natürü nüma rü nüxũ ningèx ga yema düxruũ, rü yemaãcü ngexchiruãcüma niña.

Ãèxgacügüpèxewa Ngechuchuxũ nagagü

(Mt 26.57-68; Lc 22.54-55, 63-71; Cu 18.12-14, 19-24)

⁵³ Rü yexguma ga yema duũxũgü rü paigüarü ãèxgacüpèxewa nana-gagü ga Ngechuchu. Rü yexma nangutaquèxegü ga guxũma ga togü ga paigü ga ãèxgacügü ixĩgũxũ, rü yema Yudiũgüarü ãèxgacügüerugü, rü yema ngúexèèruũgü ga mugüwa nguxèètaegũxũ. ⁵⁴ Natürü ga Pedru rü yaxũgu nawe nixãchigü ñuxmata guma paigüarü ãèxgacüpataèxtüwa nangu. Rü purichĩagü ga tupauca ga taxũneãrũ dauruũgümaã yema ãèxtüwa narũto. Rü nügü yema nanaĩxũ üxũxũtawã. ⁵⁵ Rü yema paigüarü ãèxgacügü rü guxũma ga yema togü ga ãèxgacügü ga itaxũ rü naxcèx nadaugü ga ñuxãcü Ngechuchuxũ na ínaxuaxũgũxũ rü na yamèxgüãxũcèx. Natürü taxucürüwa nüxũ inayangaugü ga tacücèx tá na yamèxgüãxũ. ⁵⁶ Yerü woo muxũma ga duũxũgü rü nüxũ nixugüe ga doramare ga nachiga, natürü nügütanüwatama rü tama nawüxigu ga norü ore. ⁵⁷⁻⁵⁸ Rü ñuxre ga togü inachigü rü doraxũmare nixugüe ga Ngechuchuchiga. Rü ñanagürügü: —Toma nüxũ taxĩnüe ga na ñaxũ:

“Tá chanangutaxũxèè ya daa tupauca ya taxũne ya duũxũgü üxũne. Rü tomaèxpũx i ngunexũgu tá chanaxü ya náí ya tama duũxũgü üxũne”, ñaxũ —ñanagürügü. ⁵⁹ Natürü woo yema oremaã, rü tama nawüxiguéga ga norü ore. ⁶⁰ Rü yexguma ga guma paigüarü ãèxgacü rü guxũpèxewa

inachi. Rū Ngechuchuna naca, rū ñanagürü: —¿Éxna taxuxūmaāma cunangāxū i ñuxmax? ¿Rū tacū nixī i ngēma nūxū yaxugūxū i cuchiga? —ñanagürü. ⁶¹ Natürü ga Ngechuchu rū nangeëxmare, rū taxuxūmaāma nanangāxū. Rū yemacēx ga nūma ga paigüarū āëxgacū rū wenaxārū nūxna naca, rū ñanagürü: —¿Rū cuma quixū ya Cristu ya Tupana ya mecū Nane? —ñanagürü. ⁶² Rū Ngechuchu rū ñanagürü nūxū: —Ngū. Ngēma nūxū quixuxū chixī. Rū tá choxū pedaugū i ngēxguma Tupana ya poracüarū tügünecüwawa charütöxgu rū ngēxguma caixanexūgu wenaxārū nūma chaxūxgu —ñanagürü. ⁶³ Rū yexguma ga guma paigüarū āëxgacū rū norū numaā nügüchirugu nagaugū. Rū ñanagürü: —¿Tüxcüū marū tanaxwēxe i to i duñxū i nūxū ixugūxū i nachiga? ⁶⁴ —Rū pematama marū nūxū pexññē na ñuxācū Tupanamaā naguxchigaxū. ¿Rū ñuxū ñapegūxū i ñuxmax? —ñanagürü. Rū guxūma wūxigu narūññē rū: —Aixcūma nixī na chixexū naxūxū rū namexū na nayuxū —ñanagürügü. ⁶⁵ Rū ñuxre ga nūmagü rū inanaxügüe ga nūxna na naçuaixgüexū. Rū nanatüxetügü rū ñuxūchi nūxū nidagügü ñaxūmaā: —¡Nūxū nacüex na texé cuxū idagūxū! —ñanagürügü. Rū yema tupauca ga taxūneärü dauruügü ga purichíagü rū nanapechwegü.

Pedru rū tama nügü nixu na Ngechuchuxū nacuáxū

(Mt 26.69-75; Lc 22.56-62; Cu 18.15-18, 25-29)

⁶⁶ Rū yoxni ga Pedru rū ñaxtüwa āëxgacüpataëxtüwa nayexma. Rū yexgumayane yéma ingu ga wūxi ga pacü ga guma āëxgacüarū duñxū ixícü. ⁶⁷ Rū yexguma Pedruxū nadēuxgu ga yéma üxūxütawa nügü na nanaixūxū, rū meā nūxū idawenü, rū ngīgürügü nūxū: —Cuma rū ta namücü quixī i ngēma Ngechuchu i Nacharétucüāx —ngīgürügü. ⁶⁸ Natürü ga Pedru rū nügü inicux na Ngechucharü duñxū yixū, rū ñanagürü: —Choma rū tama nūxū chacuèx ya yima. Rū tama nūxū chacuèx i tacüchiga nixī i ngēma nūxū quixuxū —ñanagürü. Rū yexguma ga nūma rū ñpataëxtüarü düxétüwa naxū. Rū yexgumatama nica ga otá. ⁶⁹ Natürü ga yema pacü rū wenaxārü Pedruxū idau, rū inaxügü ga yema togümaā nūxū na yaxuxū, rū ngīgürügü: —Ñañ rū wūxi i natanūxū nixī —ngīgürügü. ⁷⁰ Natürü nūma ga Pedru rū wena tama nügü nixu. Rū yixcamaxūra rū yema duñxügü ga yéma yexmagūxū rū wenaxārü ñanagürügü nūxū: —Aixcūma nixī na cuma rū ta ngēma Ngechuchutanūxū na quixū, erü wūxi i Gariréaanecüāx quixī —ñanagürügü. ⁷¹ Rū yexguma ga Pedru rū poraäcü nügü nixā, rū ñanagürü: —Rū aixcūma tama nūxū chacuèx i ngēma yatü i nachiga pidexagūxū. Rū ngēxguma doraxū chixuxgu rū ¡Tupana choxū poxcux! —ñanagürü. ⁷² Rū yexgumatama norü taxreëxpüxcüna nica ga otá. Rū yexguma ga Pedru rū nūxna nacüexāchi ga yema ore ga üpaacü Ngechuchu namaā nūxū ixuxū ga ñaxū: “Rū naxüpa na taxreëxpüxcüna otá icaxū, rū cuma rū tá tomaëxpüxcüna cugü quicüx na chorü duñxū quixū”, ñaxū. Rū yexguma ga Pedru rū poraäcüxüchima naxaxu.

15

Piratupëxewa nayexma ga Ngechuchu

(Mt 27.1-2, 11-14; Lc 23.1-5; Cu 18.28-38)

¹ Rū yexguma yangunegu, rū nangutaquëxegü ga āëxgacügü ga taxügü ga paigüarü āëxgacügü rū Yudiugüarü āëxgacügüerugü rū

ngúxēēruŭgü ga mugüwa nguxēētaegüxü rü guxüma ga togü ga yema ãëxgacügütanüwa ügüxü. Rü Ngechuchuxü yanëixgüchacüüäcüma ãëxgacü ga Piratuxütawa nanagagü. ² Rü nüma ga Piratu rü Ngechuchuna naca rü ñanagürü: —¿Cuma quüixü i Yudiügüarü ãëxgacü ya tacü? —ñanagürü. Rü Ngechuchu nanangãxü, rü ñanagürü: —Ngü, yima nüxü quixücü chixí —ñanagürü. ³⁻⁴ Natürü yema paigüarü ãëxgacügü rü poraäcü ínanaxuaxügüama, rü yemacëx ga Piratu rü wenaxärü Ngechuchuna naca, rü ñanagürü: —¿Éxna taxuxümaãma cunangãxü? ¿Dücëx i ñuxre i cuchiga i nüxü yaxugüexü! —ñanagürü. ⁵ Natürü ga Ngechuchu rü taxuxümaãma nanangãxü. Rü yemacëx ga Piratu rü poraäcü nabaixächiaë.

Piratu rü Ngechuchumaã nanaxuegu na nayuxücëx
(Mt 27.15-31; Lc 23.13-25; Cu 18.38-19.16)

⁶ Rü gucü ga tauncügu ga yexguma yema Üpetüchigaarü petawa nangxgu rü Piratu ínananguxuchixëëxü ga wüxi ga poxcuxü ga duüxügü naxcëx ícagüxü, yerü yema nixí ga nacüma. ⁷ Rü wüxi ga yatü ga Barabágu äëgaxü, rü poxcupataügu napoxcu wüxigu namaã ga togü ga natanüxü ga máëtagüxü ga yexguma ãëxgacüxü ínatëxüchigüchaügu. ⁸ Rü yema duüxügü rü yema Piratuxütawa nangugü. Rü ínanaxügüe ga Piratuna na nacagüexü na naxcëx yangéãxücëx ga wüxi ga poxcuxü aixrügumarüü. ⁹ Rü Piratu nanangãxü, rü ñanagürü: —¿Penaxwëxexü na pexcëx íchananguxuchixëëxü ya yima Ngechuchu ya duüxügü Yudiügüarü ãëxgacümaã naxugüäcü? —ñanagürü. ¹⁰ Rü yema ñanagürü ga Piratu yerü nüxü nacüex ga na yema paigüarü ãëxgacügü rü na yaxauxächixëëxü yüxü ga Ngechuchu nüxna yamugüãxü. ¹¹ Natürü ga yema paigüarü ãëxgacügü rü duüxügüxü namugü ga na tagaäcü naxcëx ínacagüxü ga na Barabáxü yangéxücëx. ¹² Rü yexguma ga Piratu rü nüxna naca, rü ñanagürü: —¿Rü tacü nixí i penaxwëxexü na chanaxüxü namaã ya yima Yudiügüarü ãëxgacügu pexüégacü? —ñanagürü. ¹³ Rü nümagü ga duüxügü rü tagaäcü nanangãxügü, rü ñanagürügü: —¿Curuchawa yapota! —ñanagürügü. ¹⁴ Rü yexguma ga Piratu rü ñanagürü nüxü: —¿Natürü tacü rü chixexü naxü? —ñanagürü. Natürü ga nümagü rü wenaxärü tagaäcü ñanagürügü: —¿Curuchawa yapota! —ñanagürügü. ¹⁵ Rü yexguma ga Piratu rü Barabáxü ínanguxuchixëë, yerü duüxügüxü nataëëxëëchaü. Rü yexguma churaragüxü Ngechuchuxü naçuaixëëguwena ga Piratu, rü ñuxüchi nüxna nanamu na curuchawa yanapotagüãxücëx. ¹⁶ Rü yexguma ga nümagü ga churaragü rü ãëxgacüpataëxtüwa nanagagü. Rü yema nanangutaquëxexëë ga guxüma ga namücügü ga churaragü. ¹⁷ Rü ñuxüchi ga yema churaragü rü wüxi ga máxü ga daucharaxü ga naxchirugu nayacüxëëgü. Rü naëruwa nayangëxcuchigü ga wüxi ga boxü ga chuchuxüwa naxügüxü. ¹⁸ Rü yemawena ínanaxügüe na tagaäcü ñagüxü: —¿Namaxü ya Yudiügüarü ãëxgacü! —ñagüxü. ¹⁹ Rü wüxi ga naixmenëxãmaã naëruwa nanaçuaixcagü, rü nüxna nacuaixgüe. Rü napëxegu nacaxápüxügü rü nüxü nicuëxüügüneta. ²⁰ Rü yexguma yemaäcü nagu yadauxcüraxügüguwena, rü ínacacüxuchigü ga yema naxchiru ga daucharaxü. Rü wenaxärü naxchirugutama nayacüxëëgü. Rü ñuxüchi ínanagaxüchigü na curuchawa yanapotagüãxücëx.

Ngechuchuxü curuchawa nipotagü
(Mt 27.32-44; Lc 23.26-43; Cu 19.17-27)

21 Rū yéma naxüpetü ga wüxi ga yatü ga Chireneçũãx ga Chimáügu ãegacü ga Areyáüdrü rü Rufu nanatü ixícü ga naãnewa ne ücü. Rū yexguma yéma naxüpetügu rü yema churaragü rü guma yatüxü ngĩxü iningexêëgü ga Ngechuchuarü curucha. 22 Rū Ngechuchuxü nawa nagagü ga wüxi ga nachica ga Górgutagu ãegaxü. Rū yema naega rü: Duüxêêruchinèxãchitaü, ñaxüchiga nixĩ. 23 Rū nüxna nanaxãgü ga binu ga miramaã ãeücü. Natürü nüma ga Ngechuchu rü tama nayaxaxü. 24 Rū yemawena curuchawa nayapotagü. Rū nümagü ga churaragü rü wüxi ga diëru ngĩxü nañanagügü na yemawa nüxü nacüexgüxüçèx na ñuxãcü tá nügümaã yatoyeãxüçèx ga Ngechuchuchiru, rü tacü tá na yangexü ga wüxichigü. 25 Rū meãma 9 arü oragu ga pèxmama nixĩ ga curuchawa yapotagüãxü. 26 Rū yéma nayapocuchi ga wüxi ga mürapewa ga ãegatachinüxü ga nüxü ixuxü ga tacüçèx curuchawa na yapotagüãxü. Rū yema naega ga mürapewagu üxü, rü ñanagürü: “Yudüguãrü ãëxgacü”, ñanagürü. 27 Rū naxrüü curuchawa nayapotagü ga taxre ga máëtagüxü rü wüxi ga norü tügüncëwawa rü to ga norü toxwecüwawa. 28 Rū yemaãcü ningu ga Tupanaãrü ore ga ümatüxü ga ñaxü: “Ngëma chixexü ügüxütanüwaama natèx”, ñaxü. 29-30 Rū yema duüxügü ga yéma chopetüxü, rü Ngechuchumaã naguxchigagü, rü nanexãerugüãcüma ñanagürügü: —Düçèx! Cuma cunangutaüxêëga ya tupauca ya taxüne, rü tomaëxpüx i ngunexügu wenaxãrü icunadaxêëga. ¡Ëcü! ¡Cugütama namaxêë i ñuxmax, rü íruxĩ i curuchawa! —ñanagürügü. 31 Rū yexgumarüü ta Ngechuchuxü nacugüecüraxü ga paigüarü ãëxgacügü, rü ngüxêëruügu ga ore ga mugüwa nguxêëtaegüxü. Rū ñanagürügü: —Nüma rü togüxü namaxêëë, natürü taxucürüwama nügütama namaxêë. 32 —¡Ñuxma rü ínaxĩx i curuchawa i ngëma Cristu i Iraéanecüãxãrü ãëxgacü na nüxü idaugüxüçèx rü nüxü yaxögüxüçèx! —ñanagürügü. Rū woo ga yema máëtagüxü ga naxrüü curuchawa ipotagüxü, rü namaã naguxchigagü.

Nayu ga Ngechuchu

(Mt 27.45-56; Lc 23.44-49; Cu 19.28-30)

33 Rū yexguma tocuchiwa nanguxgu, rü guxü ga naãnewa naxëãne ñuxmata yáuanecü tomaëxpüxarü orawa nangu. 34 Rū yematama oragu rü tagaãcü aita naxü ga Ngechuchu, rü ñanagürü: —Eríx, Eríx, ¿damá chabátani? —ñanagürü. Rū ngëma rü ñaxüchiga nixĩ: “Pa Chorü Tupanax, Pa Chorü Tupanax ¿tüxcüü choxü nuã cutèx?” ñaxüchiga nixĩ. 35 Rū nümaxü ga duüxügü ga yéma yexmagüxü, rü nüxü naxĩnüë rü ñanagürügü: —¡Düçèx, nüxü pexĩnüë! Nuxcümaücü ga Tupanaãrü orearü uruü ga Eríacèx naca —ñanagürügü. 36 Rū yexguma rü wüxi ga yema duüxügü ga yéma yexmagüxü, rü inañaãchi rü wüxi ga tüaxmü niwaixêë namaã ga binu ga marü ngüchièxüchicü. Rū wüxi ga dexnewa nayanëix, rü ñuxüchi Ngechuchuèxgu nanawëx na nüxü natuxuxüçèx. Rū yema togüxü ñanagürügü: —¡Yixrüma! ¡Ngĩxã rü itarüdaunü ngoxita Ería nuã ü na curuchawa ínaxĩxêëãxüçèx! —ñanagürügü. 37 Natürü nüma ga Ngechuchu rü tagaãcü aita naxü, rü ñuxüchi nayu. 38 Rū yexguma ga tupauca ga taxüneãrü tüyemachiãxü rü taxregu narügaute. Rū daxüwa inaxügü ga na nagaütexü rü ñuxmata ñaxtüwa nangu. 39 Rū guma churaragüarü ãëxgacü ga Dumacüãx ga Ngechuchupëxewa yexmacü, rü yexguma nüxü nadèuxgu ga na nayuxü, rü ñanagürü: —Aixcüma nixĩ

ya daa yatü i Tupana Nane na yïixü —ñanagürü. ⁴⁰ Rû iyexmagü ta ga ñuxre ga ngecügü ga yéma yaxüwa nüxü rüdaunücü. Rû yematanüwa iyexmagü ga María ga Magadácüâx, rü Charumé, rü María ga Yúche rü Chaütiágu ga rübumaëcü naë. ⁴¹ Rû yema ngecügü iyixi ga Ngechuchuxü íxümücügü rü nüxü rüngüxëëgücü ga yexguma Gariréaanewa nayexmagu. Rû yexgumarüü ta yéma iyexmagü ga mucüma ga naïgü ga ngecügü ga Ngechuchuwe rüxïcü ga yexguma Yerucharéüwa naxüxgu.

Ngechuchu rü naxmaxügu nayanaxücuchigü
(Mt 27.57-61; Lc 23.50-56; Cu 19.38-42)

⁴²⁻⁴³ Rû yexguma marü nachütachaügu ga yema ngunexü ga Yudiügü nagu nügü imexëëgüxü naxcëx ga ngüxchigaarü ngunexü, rü noxtacüma Piratuxütawa naxü ga Yúche ga Arimatéacüâx. Rû nüma ga guma Yúche rü Yudiügüarü äëxgacügü ga tacütanüwa naxü, rü wüxi ga äëxgacü ga poraäcü nüxü nangechaügücü nixi. Rû nüma rü ta ínananguxëë na Tupana norü äëxgacü yïixücëx. Rû Piratuxütawa naxcëx ínayaca ga Ngechuchuxüne. ⁴⁴ Rû nabaixächiäë ga Piratu ga marü na nayuxü. Rû yemacëx norü churaragüarü äëxgacücëx nangema na nüxna naçaxücëx na ñuxgumama yïixü ga marü na nayuxü. ⁴⁵ Rû yexguma norü churaragüarü äëxgacü namaä nüxü ixuxgu ga marü na nayuxü, rü nüma ga Piratu rü Yúchena nanaxã ga naxüne. ⁴⁶ Rû yexguma ga Yúche rü naxcëx nataxe ga wüxi ga naxchápenüü ga mexëchixü. Rû curuchawa nanayaxu ga Ngechuchuxüne, rü yema naxchápenüümaä nananuque. Rû wüxi ga mëxpüne ga nutanaxcëxgu üpaacü yacaxmaügüxü ga naxmaxügu nayanaxücuchi. Rû ñuxüchi wüxi ga nuta ga tacümaä nanangüxtaü. ⁴⁷ Rû María ga Magadácüâx rü María ga Yúche naë rü nüxü írüdaunü ga ngexta na yanaxücuchigüâxü.

16

Wenaxãrü namaxü ga Ngechuchu
(Mt 28.1-10; Lc 24.1-12; Cu 20.1-10)

¹ Rû sabaduarü ngunexüguwena, rü María ga Magadácüâx, rü Charumé, rü María ga Chaütiágu naë naxcëx itaxegü ga pumara na namaä nachaäxücëx ga Ngechuchuxüne. ² Rû pëxmamaxüchi ga noxri üëxcü iyarügoxgu ga yüxüarü ngunexügu, rü yema ngecügü rü íyadaugü ga yema naxmaxü ga nagu yanaxücuchigüâxüwa. ³ Rû ngígü ngígürügü: —¿Texé tá taxcëx ítanaxügachi ya yima nuta ya namaä nangüxtaücü? —ngígürügü. ⁴ Natürü yexguma meäma nüxü nadaunügu, rü nüxü idaugü ga marü na ínaxügachixü ga guma nuta ga tacü ga namaä nangüxtaücü ga yema naxmaxü. ⁵ Rû yexguma nagu nadaugügu ga yema naxmaxü, rü nüxü idaugü ga wüxi ga ngextüxücü ga mëxchiruxü ga cómüchiruxü ga yéma naxmaxüarü tügüncüwawa rütöxü. Rû poraäcü íbaixächiäëgü ga yema ngecügü. ⁶ Natürü nüma rü ñanagürü ngixü: —¡Tãxü i pebaixächiexü! Pema rü naxcëx pedaugü ya Ngechuchu ya Nacharétüâx ga guma curuchawa yapotagüäcü. Marü wena namaxü, rü nataxuma i nuä. ¡Dücëx, meä nüxü pedëux i ñaä nachica ga nagu naxügüâxü! ⁷ —¡Rü paxa ípixi rü Pedrumaä rü ngëma togü i ngüexügümaä nüxü peyarüxugüe, rü ñapegügü nüxü:

“Nüma ya Ngechuchu rü marü nüxüra pexüpa Gariréaanewa naxü. Rü ngëma tá nüxü peyadaugü ngëma pemaä nüxü yaxuxürüü”, ñapegügü

nüxü! —ñanagürü. ⁸ Rū yexguma ga yema ngecügü rü nüxna íyabuxmü ga yema naxmaxü, yerü ngîrū muüëmaã poraãcü iyaduruxe. Rū taxüemaãma nüxü iyaxugü, yerü poraãcü imuüë.

*Ngechuchu rü ngîxcèx nangox ga María ga Magadácüãx
(Cu 20.11-18)*

⁹ Rū yexguma Ngechuchu yuwa írüdaxguwena ga noxri yangunegu ga yüxüarü ngunexügu, rü ngîxcèxira nangox ga María ga Magadácüãx ga ngîwa ínawoxüãcü ga 7 ga ngoxogü. ¹⁰ Rū ngîma rü íyaxü, rü namaã nüxü iyarüxu ga yema Ngechuchumücügü ga ingechaügüxü rü íxauxexü. ¹¹ Natürü ga nümagü rü tama nayaxögüchaü ga yexguma nüxü naxînüëgu ga na namaxüxü ga Ngechuchu rü na nüxü nadauxü ga ngîmax.

*Ngechuchu rü taxre ga norü ngúexügüçèx nangox
(Lc 24.13-35)*

¹² Rū yemawena ga Ngechuchu rü tðöcü nangox naxcèx ga taxre ga norü ngúexügü ga yexguma nama ga naãnewaama nadaxügu naxîxgu. ¹³ Rū nümagü rü nawoegu, rü yema togü ga ngúexügümaã nüxü nayarüxugü. Natürü yemagüaxü rü ta tama nayaxögü.

*Ngechuchu nanamu ga norü ngúexügü
(Mt 28.16-20; Lc 24.36-49; Cu 20.19-23)*

¹⁴ Rū yemawena ga Ngechuchu rü naxcèx nangox ga yema 11 ga norü ngúexügü ga yexguma mechawa ínachibüeyane. Rū nayangagü naxcèx ga tama aixcüma na yaxögüãxü rü tama na inaxînüëxü. Yerü ga nümagü rü tama nüxü nayaxögüchaü ga yema nüxü daugüxü ga marü wena na namaxüxü. ¹⁵ Rū ñanagürü nüxü: —¡Guxü i naãnewa pexî rü guxü i duüxügümaã nüxü peyarüxu i ore i mexü! ¹⁶ —Rü yíxema yaxõxë rü íbaixexë rü tá tüxü nangëxma i maxü i taguma gúxü. Natürü yíxema tama yaxõxë rü tá tapoxcu. ¹⁷ —Rü ñaã tá nixî i cuèxruügü i nawa nüxü icuáxü i ngëma yaxögüxü. Rū chauégagu tá ínanawoxü i ngoxogü. Rū ngexwacaxüxü i nagagüwa tá nidexagü. ¹⁸ —Rü naxmëxmaã tá nüxü nayayauxâchi i äxtapegü. Rū ngëxguma yaxaxgüãgu i tacü i nawa iyuxü, rü täütâma nanachixexëë. Rū tá tüxü ningögügü ya idaaweexe rü tá tümacèx nitaanegü —ñanagürü.

*Ngechuchu rü daxügüxü ga naãnewa naxü
(Lc 24.50-53)*

¹⁹ Rū nüma ga Cori ga Ngechuchu rü yexguma norü ngúexügümaã yadeaxguwena, rü Tupana rü daxügüxü ga naãnewa nanaga. Rū Tupanaärü tügüncüwawa nayarüto. ²⁰ Rū nümagü ga norü ngúexügü rü inaxîãchi na guxüwama nüxü yanaxugüexü ga ore i mexü. Rū nüma ga Cori rü nüxü narüngüxëë, rü nanangoxëë na aixcüma yîixü ga yema ore, yerü wüxigu namaã napuracü na naxügüãxüçèx ga mexü ga taxügü ga Tupanaärü poramaã naxügüxü.

ORE I MEXÜ GA LUCA ÜMATÜXÜ

Norü ügü i ore ga Ngechuchuchiga

¹⁻² Pa Mecü Pa Teóquirux, nayexma ga tacü ga totanüwa ngupetüxü. Rü muxüma ga duüxügü rü marü nanaxümatügü ga yemachiga, yexgumarüü ga tomaã nüxü na yaxugüexürüü ga yema duüxügü ga noxriarü ügügumama Ngechuchuxü daugüxü rü nüxü rüngüxëëgüxü ga norü orearü uchigawa. ³⁻⁴ Rü ngëmacëx, Pa Teóquirux, rü choma rü ta meãma naxcëx íchaca ga nachiga ga guxüma ga yema Ngechuchu üxü. Rü nüxma rü chauxcëx rü name na meãma cuxcëx chanaxümatüxü i ngëma na meãma nüxü cucuáxücëx na aixcüma yïixü ga yema ore ga marüchirëx cuxü nangüxëëgüxü ga togü.

Tupanaärü orearü ngeruü ga daxücüãx nanaxunagü ga Cuáü ga baiüxëëruüärü buxchiga

⁵ Rü yexguma Erobe äëxgacü ixixgu ga Yudéaanewa, rü yéma nayexma ga wüxi ga Yudíugüarü pai ga Zacariagu äëgacü. Rü pai ga Aráütaa ga Abíatanüxü nixi ga nümax. Rü namëxéga rü Erichabé nixi. Rü tüma rü ta pai ga Aráütanüxü tixi. ⁶ Rü nüma ga Zacaría rü namëx ga Erichabé rü meãma Tupanapëxewa, namaxë rü aixcüma naga naxinüë ga norü mugü. Rü yemaäcü taxucürüwa texé chixri nachiga tidexagü. ⁷ Natürü nangexacügü yerü namëx rü ingexacü. Rü nüxüchi ga nümagü rü marü yaguãxgü nixigü. ⁸ Rü wüxi ga ngunexügu rü yema paigütücumü ga Zacaría natanüwa üxügu nangu na tupauca ga taxünewa Tupanaärü puracü naxügüxücëx. ⁹ Rü yema paigü rü nacüma nixi ga nüxü na naxunetagüxü ga wüxi ga natanüxü na tupaucaarü aixpegu naxücuxüçëx rü yéma Tupanacëx na yaguãxücëx ga pumara ga yixixü. Rü yema ngunexügu rü Zacariagu nangu na tupaucaarü aixpegu naxücuxüçëx na yéma yaguãxücëx ga pumara. ¹⁰ Rü yema pumara íyaguyane rü guxüma ga duüxügü ga düxétüwa yexmagüxü rü ínayümüxëgü. ¹¹ Rü ngürüächi Zacariacëx nangox ga wüxi ga Tupanaärü orearü ngeruü ga daxücüãx. Rü yema nachica ga pumara nawa yagugüüxüärü tügü necüwagu nachi. ¹² Rü yexguma Zacaría nüxü dëuxgu ga yema Tupanaärü orearü ngeruü ga daxücüãx, rü poraäcü nabaixächiãë, rü poraäcü namuü. ¹³ Natürü yema daxücüãx ga Tupanaärü orearü ngeruü rü ñanagürü nüxü: — Pa Zacaría, ¡täxü i cumuüxü! Erü Tupana rü marü nüxü naxinü i curü yumüxë. Rü cuxmëx i Erichabé rü cuxü tá ixãxäcü, rü Cuáügu tá cunaxüéga. ¹⁴ —Rü cuma rü tá poraäcü cutaãëxüchi i ngëxguma nabuxgu. Rü muxüma i togü i duüxügü rü tá ta nataãëgüxüchi. ¹⁵ —Erü yima cune rü Tupanapëxewa rü tá wüxi ya mexëchicü nixi. Rü täütama binu nayaxaxü, rü taxuüma to i tacü rü ngüchixáxü tá nixaxü. Rü tauta nabuyane rü Tupanaãë i Üünexü rü tá nüxna nangu. ¹⁶ —Rü nüma tá muxüma i Yudíugüxü narüngüxëë na norü Cori ya Tupanacëx nawoegüxücëx. ¹⁷ —Rü nüma ya Cuáü rü tá Cori ya Cristupëxegu nixü. Rü nuxcümaücü ga Tupanaärü orearü uruü ga Eríarüü tá nixi erü tá nüxü nangëxma i Tupanaãë i poraxü. Rü ngëmaäcü tá nüxü narüngüxëë i papágü na naxäcügüxü nangechaüxü, rü ngëma tama Tupanaga ínüëchaüxü rü na aixcüma inaxinüëxücëx. Rü ngëmaäcü tá duüxügüxü ínamexëë naxcëx

ya Cori ya Cristu —ñanagürü ga yema daxüçüâx. ¹⁸ Rû Zacaría rû yema daxüçüâxna naca, rû ñanagürü: —¿Ñuxäcü tá nixî i ngêma na naxâxäcüxü i choxmêx? Erü marü chayaxüchi i chomax rû ngîma rû ta marü iya —ñanagürü. ¹⁹ Rû Zacaríaü nangäxü ga yema daxüçüâx, rû ñanagürü: —Choma nixî i Gabi i Tupanaärü puracü chaxüxü. Rû nüma núma choxü namu na cumaã nüxü na chixuxüçêx i ñaã ore i mexü. ²⁰ —Natürü ñuxma i cuma rû tama choxü cuyaxõ i ngêma ore i cumaã nüxü chixuxü. Rû ngêmacêx i ñuxma rû tá cungega ñuxmatáta nabu i ngêma cune. Natürü ngêma cumaã nüxü chixuxü, rû aixcüma tá ningu nagu i ngêma ngunexü i Tupana ixunetaxü —ñanagürü. ²¹ Rû yoxni ga duüxügü rû tupaucaarü düxétüwa Zacaríaü nananguxêêgü. Rû nügüna nacagüe ga tacüçêx na tama paxa yéma ínaxüxüxü. ²² Rû yexguma Zacaría tupaucawa íxüüxgu, rû taxucürüwa duüxügümaã nidexa, yerü nangege. Rû nümagü ga duüxügü rû nüxü nicuèxächitanü ga tacüxü na nadauxü ga Zacaría ga tupaucaarü aixepena. Rû Zacaría rû naxmêxmaã duüxügüxü nüxü nacuèxêê ga tacü nüxü na üpetüxü, yerü nangege. ²³ Rû yexguma Zacaría naguxêêgu ga na naxüâxü ga Tupanaärü puracü ga tupauca ga taxünewa, rû wenaxärü napataçêx nataegu. ²⁴ Rû yemawena rû Zacaría namêx ga Erichabé rû ixâxäcü. Rû ngîpatagu irüxãüêcha, rû wüximêêxpüx ga tauemacü taguma düxétüwa ixü. ²⁵ Rû ngîxícatama ngîgürügü: —Cori ya Tupana rû poraäcü choxü narüngüxêê. Rû ñuxma rû marü táütáma chixri chauchiga nidexagü i duüxügü naxçêx na changexacüxü —ngîgürügü.

Wüxi ga Tupanaärü orearü ngeruü ga daxüçüâx nüxü nixu ga Ngechuchuarü buxchiga

²⁶ Rû 6 ga tauemacü marü ngîxü mexgu ga Erichabé ga yema na naxâxäcüxü, rû Gariréaanewa yexmane ga ñãne ga Nacharétuwa Tupana nanamu ga norü orearü ngeruü ga Gabi. ²⁷ Rû ngîxütawa naxü ga wüxi ga pacü ga taguma yatü ngîmaã maüxcü. Rû María nixî ga ngîega. Rû ngîma rû ixâtechaü namaã ga wüxi ga yatü ga Yúchegu äegacü. Rû nüma ga Yúche rû nuxcümaüçü ga äêxgacü ga Dabitanüxü nixî. ²⁸ Rû yema nachica ga María nawa yexmaxügu naxücu ga Gabi, rû ñanagürü ngîxü: —Nuxmaê Pa Maríax. Tupana rû poraäcü cumaã nataãê. Rû Cori ya Tupana rû cuxütawa nangêxma, rû guxü i ngexügüarü yexera marü cuxü narüngüxêê —ñanagürü. ²⁹ Natürü yexguma María nüxü dèuxgu ga yema daxüçüâx ga Tupanaärü orearü ngeruü, rû namaã ibaixächiaê ga yema norü ore ga ngîmaã nüxü yaxuxü. Rû ngîgüãêwa nagu irüxínü ga tüxcüü yemaäcü ngîxü na namoxêxü. ³⁰ Rû yexguma ga Gabi rû ñanagürü ngîxü: —Pa Maríax, tama name na cumuüxü, erü Tupana rû poraäcü cumaã nataãê. ³¹ —Rû ñuxma rû tá tauemacü cuxü inayarütaxu, rû tá cuxâxäcü, rû tá nayatü i cuxacü. Rû Ngechuchugu tá cunaxüéga. ³² —Rû nüma rû wüxi ya äêxgacü ya taxüchicü tá nixî. Rû Tupana ya Taxüchicü Nane tá nixî i naega. Rû Cori ya Tupana rû tá nuxcümaüçü ga äêxgacü ga Dabírüü äêxgacüxü nayaxíxêê. ³³ —Rû nüma rû guxügütáma Yudíugüarü äêxgacü nixî. Rû tagutáma ínanguxuchi na äêxgacü na yiüxü —ñanagürü. ³⁴ Rû yexguma ga María rû Gabina ica, rû ngîgürügü: —¿Ñuxäcü tá nixî i ngêma na chaxâxäcüxü, erü tauta chaxáte? —ngîgürügü. ³⁵ Rû nüma ga Gabi rû ngîxü nangäxü, rû ñanagürü: —Tupanaãe i Üünexü tá cuxna nangu. Rû Tupana ya Tacüarü pora rû wüxi i caixanexürüü tá cugu

nayangaixema. Rū ngēmacèx ngēma òxchana i namaã cuxãxãcũxũ rü Tupanapëxewa mecũxũchi tá nixĩ, rü Tupana Nanemaã tá nanaxugũ i duũxũgũ. ³⁶ —Rü cutanũxũ i Erichabé rü marü ixãxãcũ woo marü yaguãxchirëx na yĩxũ. Rü woo ga duũxũgũ rü:

“Tagutãma ixãxãcũ” ñanagürügũ ngĩxũ, natürü i ñuxma rü marü 6 ya tauemacü ngĩxũ name na marü naxãxãcũxũ. ³⁷ —Erü Tupanaãxũ rü taxuũma naguxcha —ñanagürü. ³⁸ Rü yexguma ga María rü ngĩgürügũ: —Chorü Cori ya Tupanaãrũ duũxũ chixĩ i chomax. Rü marü name i chomaã nanaxü i ngēma chomaã nüxũ quixuxũãcũma —ngĩgürügũ. Rü yexguma ngĩxna Ínixũ ga yema Tupanaãrũ orearü ngeruũ ga daxũcũãx ga Gabi.

María rü Erichabéxũtagu inaxũãne

³⁹ Rü yexgumaücüü ga María rü paxama nawa ixũ ga guma ñãne ga Zacariãpata nawa yexmane ga Yudéaaneãrũ dauxchitawa. ⁴⁰ Rü Zacariãpatawa ingu, rü iyaxücu, rü Erichabéxũ irümoxë. ⁴¹ Rü yexguma Erichabé nüxũ ñnũgu ga Maríaarũ moxë, rü ngĩrũ òxchana ga ngĩãnũwa yexmaxũ rü nixĩãxcüü. Rü Tupanaãë ga Üünexũ rü Erichabéna nangu. ⁴² Rü yexguma ga Erichabé rü tagaãcũ Mariãxũ ngĩgürügũ: —Guxũ i ngexũgüarũ yexera cuxũ narüngũxëë. Rü ngëxgumarüũ ta cunexũ narüngũxëë. ⁴³ —¿Tacüwa chame na nuã chauxũtagu cunaxũãnexũ? Pa Chorü Cori Naëx. ⁴⁴ —Erü ngëxguma nüxũ chaxĩnũgu i curü moxë, rü chauxacü i chauanũwa ngëxmaxũ rü norü taãëmaã nixĩãxcüü. ⁴⁵ —Cuma rü cutaãë erü nüxũ cuyaxõ i norü ore ya Tupana. Rü ngēmacèx Tupana tá nayanguxëë i ngēma ore i cumaã nüxũ yaxuxũ —ngĩgürügũ ga Erichabé. ⁴⁶ Rü yexguma ga María rü ngĩgürügũ: —Choma rü chauãëwa poraãcũ Tupanaxũ chicuëxũ. ⁴⁷ —Rü chorü Cori ya chorü Maxëëruũmaã chataãëxũchi. ⁴⁸ —Rü woo wüxi i Tupanaãrũ duũxũ i ngearü dïëruãxë chixĩ, natürü Tupana chaugu narüxinũ. Rü ñuxmaücüü i duũxũgũ rü taãëxcümaã guxũgutãma choxũ naxugüë. ⁴⁹ —Erü Tupana ya Poracü rü taxũ i mexũ chauxcèx naxü. Rü naxüüne i naega ya Tupana. ⁵⁰ —Rü nüma ya Tupana rü guxũgutãma nüxũ tangechaũtümüügũ ya guxãma ya yixema aixcũma nüxũ muũëxë. ⁵¹ —Rü guxũ ga norü poramaã tüxũ narüyexera ga guxema tügütama icuëxũüügüxe. ⁵² —Rü marü ñnanawoxũ ga yema ãëxgacügũ ga nügũ icuëxũüügüxũ. Natürü guxema duũxëgũ ga tama tügũ icuëxũüügüxe, rü poraãcũ tüxũ narüngũxëë. ⁵³ —Rü guxema tüxũ nataxúxe, rü muxũma tüxna naxã. Natürü guxema muãrũ dïëruãxgüxe rü taxuũma tüxna naxããcũma tüxũ ñnimugũ. ⁵⁴ —Rü poraãcũ nüxũ narüngũxëë ga norü duũxũgũ ga Yudiugũ. Rü tama nüxũ inarüngũma na nüxũ ingechaũtümüügüxũ, yexgumarüũ ga nuxcũmaüügüxũ ga tatanüxũmaã na inaxunetaxũ. ⁵⁵ —Yerü yemaãcũ inaxuneta namaã ga tórũ oxĩ ga Abrãũ rü namaã ga tatanüxũgũ na guxũgutãma tüxũ nangũxëëxũ —ngĩgürügũ ga María. ⁵⁶ Rü tomaëxpüx ga tauemacü Erichabéxũtagu irüxãũx ga María. Rü ñuxũchi ngĩpatacèx itaegu.

Cuãũ ga baiũxëëruũãrũ buxchiga

⁵⁷ Rü nawa nangu ga ngunexũ ga na naxíraxacũxũ ga Erichabé. Rü nayatũ ga ngĩãcũ. ⁵⁸ Rü yexguma nüxũ nacuëxgügu na ñuxãcũ Tupana ngĩmaã mecũmaxũ, rü ngĩrũ ngaicamagu pegüxũ ga duũxũgũ rü

ngĩtanũxũgũ rü ngĩxũ ínayadaugũ, rü ngĩxũ narümoxëgũ rü ngĩxũ nay-
ataãëgũxëë. ⁵⁹ Rũ 8 ga ngunexũguwena rü ínayawiechëxmüpëxechiraũgũ
ga guma ngĩne. Rũ nanatũ ga Zacaríagu nanaxüëgagũchaũ ga duũxũgũ.
⁶⁰ Natürũ naë ga Erichabé rü tama inaxwëxe. Rũ ngĩgürügũ: —
Narümemae nixĩ i Cuáũgu tanaxüëga —ngĩgürügũ. ⁶¹ Rũ duũxũgũ rü
ñanagürügũ ngĩxũ: —¿Tũxcüũ cunaxwëxe i ngëma naega? Erũ cu-
tanũxũtanüwa rü tataxuma ya texé ya ngëmagu ãegaxe —ñanagürügũ.
⁶² Rũ yexguma ga duũxũgũ rü naxmëxwa nanatũ ga Zacaríana nacagüe
ga tacü rü naegagu tá na naxüëgaãxũ. ⁶³ Rũ yexguma ga Zacaríá rü
poperaxũ naxuneta na yexma na naxümatüãxüçëx ga naega. Rũ yexma
nanaxümatü, rü ñanagürü:

“Cuáũ tá nixĩ i naega”, ñanagürü ga namatü. Rũ guxũma ga duũxũgũ
rü nabaixächiaëgũ ga yexguma yema naegaxũ nadaugũgu. ⁶⁴ Rũ yexgu-
matama wenaxärü nidexa ga Zacaríá. Rũ inanaxügũ ga Tupanaxũ
na yacuëxüũxũ. ⁶⁵ Rũ yemaçëx guxũma ga yema duũxũgũ ga norü
ngaicamagu äpatagũxũ rü poraãcü nabaixächiaëgũ. Rũ guxũwama ga
yema naãnewa ga Yudeaanewa rü duũxũgũ nüxũ nixuchigagũ ga yema
ngupetüxũ. ⁶⁶ Rũ guxũma ga nüxũ cuächigagũxũ ga yema ngupetüxũ, rü
nügüãxëwa nagu narüxĩnüëëcha, rü ñanagürügũ: —¿Tacü tá nixĩ i ngëma
buxũ? Erũ Tupana rü aixcüma naxũtawana ngëxma —ñanagürügũ.

Zacaríá rü Tupanaxũ nicuëxüũ

⁶⁷ Rũ nanatü ga Zacaríana nangu ga Tupanaaë i Üünexũ. Rũ nüxũ
nixu ga yema ore ga Tupana namaã nüxũ ixuxũ. ⁶⁸ Rũ ñanagürü:
—Name nixĩ i nüxũ ticuëxüũgũ ya tórü Cori ga nuxcümaücü ga tórü
oxi ga Iraéarü Tupana. Erũ núma tatanüwa nangu na tüxũ ya-
maxëxëëxüçëx i yixema i norü duũxũgũ na ixigũxũ. ⁶⁹ —Rü ngëmacëx
tüxna nanamu ya wüxi ya poracü ya tórü maxëxëëruũ ga nuxcümaücü
ga norü duũxũ ga Dabítanũxüwa ne ücü. ⁷⁰ —Rü yemaãcü Tupana
tamaã inaxuneta nawa ga yema nuxcümaügũxũ ga norü orearü uruũgũ
ga üünegũxũ. ⁷¹ —Rü yema orearü uruũgüwa nüxũ nixu rü tá tüxũ
ínguxüxëë naxmëxwa i tórü uwanügũ rü guxũma i ngema duũxũgũ
i taxchi aioxũ. ⁷² —Rü nuxcümaügüxe ga tórü oxigümaã nüxũ nixu na
nüxũ tangechaütümüügũxũ rü tagutáma nüxũ iyanangümaxũ ga yema
tümamaã inaxunetaxũ. ⁷³⁻⁷⁵ —Rü yemaãcü ga Tupana rü nuxcümaücü
ga tórü oxi ga Abráũmaã inaxuneta. Rü namaã nüxũ nixu rü tá tüxũ
ínguxüxëë nüxna i tórü uwanügũ na tama imuũëãcüma naxüxüçëx
i Tupanaärü puracü rü aixcüma mecü na ixigũxũ napëxewa i guxũ i
tórü maxüwa i wüxichigü i ngunexũgu —ñanagürü ga Zacaríá. ⁷⁶ Rũ
ñanagürü ta: —Cumax, Pa Chaunex, rü Tupana ya Taxüchicüarü orearü
uruũmaã tá cuxũ naxugü. Erũ cuma rü tá Corixüpa yoxni duũxũgümaã
nüxũ quixu i nachiga ya Cori. ⁷⁷ —Cuma rü Coriarü duũxũgũxũ tá
nüxũ cucuëxëë na Tupana tá nüxũ nüxũ ngechaũxũ i norü pecadugü
na ngëmaãcü nayauxgüãxüçëx i maxũ i taguma gúxũ. ⁷⁸⁻⁷⁹ —Erũ nüxũ
tangechaütümüügũ ya Tupana ya poraãcü tüxũ ngechaücü. Rũ ngëmacëx
daxüguxũ i naãnewa taxçëx ne nanamu i ñoma i naãneärü ngóonexëëruũ
i ngëxwacaxüxũ na nangóonetanüxëëãxüçëx i ngëma duũxũgũ ga noxri
guxũguma norü chixexütagu äücümaxüwa yexmagüxũ. Rũ núma tá tüxũ
narüngüxëë na Tupanaaã rüngüxmüëxüçëx —ñanagürü ga Zacaríá.
⁸⁰ Rũ yema buxũ rü niyachigü rü wüxichigü ga ngunexũgu yexeraãcü

Tupanaxü nicuáchigü. Rü dauxchita ga ngextá taxúema íxâpataxüwa nayexma ñuxmata yema ngunexüwa nangu ga na Yudíugüxü nügü nacuêêxü.

2

Ngechucharü buxhiga

(Mt 1.18-25)

¹ Rü yexguma Agutu âêxgacü ga tacü ixíxgu ga Dumawa, rü nanax-unagü ga na yaxugüâxü ga guxüma ga duüxügü ga guxü ga naânewa. ² Rü yema nüxíraüxü ga duüxügüarü ugüchiga, rü nanaxü ga yexguma Quirinu âêxgacü ixíxgu ga Chíríaarü naânewa. ³ Rü guxüma ga duüxügü rü wüxichigü norü íâne ga nagu nabuxünewa nixüchigü ga yéma na yaxugüâxücêx. ⁴ Rü yemacêx ga Yúche rü Gariréaanewa yexmane ga íâne ga Nacharétuwa ínaxüxü, rü Yudéaarü naânewa yexmane ga íâne ga Beréüwa naxü. Rü guma nixí ga íâne ga nuxcúmaücü ga âêxgacü ga Dabí nagu buxüne. Rü yemacêx nixí ga Yúche ga yéma naxüxü, yerü Dabítanüxü nixí ga númax. ⁵ Rü Beréüwa naxü ga Yúche na yaxugüxücêx wüxigu ngímaâ ga María ga ngímaâ naxâmêxchatücü. Natürü ga María rü itacharaü ga na naxâxâcüxü. ⁶ Rü yexguma Beréüwa nayexmagüyane, ngíxna nangu ga ngírü ngunexü ga na naxíraxacüxü ga María. ⁷ Rü yexma nabu ga nüxíraücü ga ngíne. Rü naxchápenüümaâ inanuque. Rü wüxi ga wocaarü chibüchicagumare inacanagüxêê, yerü marü guxüma nixáâcu ga ucapu nawa ga guma pegüpataü.

Tupanaârü orearü ngeruü ga daxücüâx rü carnerugüarü dauruücêx nangox

⁸ Rü Beréüarü ngaicamana nayexmagü ga ñuxre ga carnerugüarü dauruügü ga chütacü nachitaüwa norü carnerugüna ídaugüxü. ⁹ Rü ngürüâchi yema carnerugüarü dauruügücêx nangox ga wüxi ga orearü ngeruü ga daxücüâx. Rü Cori ya Tupanaârü üüne rü nawa nayexma rü yemacêx poraâcü nangóone. Rü yema carnerugüarü dauruxügü rü poraâcü namuêê. ¹⁰ Natürü yema orearü ngeruü ga daxücüâx, rü ñanagürü nüxü: —¡Tâxü i pemuêêxü! erü pexcêx nuâ chanange i wüxi i ore i mexêchixü i guxü i duüxügüarü taâêxêêruü tá ixíxü. ¹¹ —Erü ñuxma rü Beréügu nabu ya perü maxêêêruü. Rü núma rü Cori ya Cristu nixí. ¹² —Rü ñaâ tá nixí i perü cuêxruü. Rü tá nüxü ipeyangau i wüxi i õxchana i naxchápenüümaâ nuquexü rü wocaarü chibüchicagu caxü —ñanagürü. ¹³ Rü yexgumatama ngürüâchi yema daxücüâx ga orearü ngeruüxütawa nangox ga muxüma ga togü ga daxücüâx ga orearü ngeruügü. Rü Tupanaxü nicuêxüügü, rü ñanagürügü: ¹⁴ —Rü ñuxma rü Tupanaxü ínicuêxüügü rü ínataâégü i daxügüxü i naânewa. Rü pema i ñoma i naânecüâx i Tupana pemaâ taâégüe, rü name nixí i pegümaâ perüngüxmüê —ñanagürügü. ¹⁵ Rü yexguma daxüwa naxíxguwena ga yema orearü ngeruügü rü yema carnerugüarü dauruügü rü nügümaâ ñanagürügü: —¡Ngíxã ítayadau i Beréüwa i ngéma ngupetüxü i Cori ya Tupana tamaâ nüxü ixuxü nawa i norü orearü ngeruügü! —ñanagürügü. ¹⁶ Rü paxa inaxíâchi, rü yéma naxí. Rü yexma inayangaugü ga Yúche rü María rü guma bucü ga wocaarü chibüchicagu cacü. ¹⁷ Rü yexguma yema bucüxü nadaugüga yema carnerugüarü dauruügü, rü duüxügümaâ nüxü nixugüe ga yema ore ga Tupanaârü orearü ngeruü ga daxücüâx namaâ nüxü ixuxü ga guma bucüchiga. ¹⁸ Rü guxüma ga duüxügü

ga nūxū ĩnūēxū ga yema carnerugūarū dauruūgūarū ore rū namaā nabaixāchiāēgū. ¹⁹ Natūrū ga María rū inayaxu ga guxūma ga yema ngupetūxū rū ngīāēgu namaā inguxū rū nagu irūxīnūēcha. ²⁰ Rū nawoegu ga yema carnerugūarū dauruūgū. Rū taāēācūma Tupanaxū nicuēxūūgū naxcēx ga guxūma ga yema nūxū naxīnūēxū rū nūxū nadaugūxū yerū aixcūma yema orearū ngeruū ga daxūcūāx namaā nūxū ixuxūācūma nangupetū.

Bucū ga Ngechuchu rū tupauca ga taxūnewa nanagagū

²¹ Rū yexguma 8 ga ngunexū nūxū yexmagu ga na nabuxū ga ōxchana, rū ĩnanawiechēxmūpēxechiraūgū. Rū Ngechuchugu nanaxūēgagū. Rū yematama nixī ga naega ga daxūcūāx ga Tupanaārū orearū ngeruū Maríamaā nūxū ixuxū ga tauta namaā naxāxācūgu. ²² Rū yexguma marū yanguxgu ga yema ngunexū na tupauca ga taxūnewa Tupanapēxewa na nūgū yamexēēgūxū rū yéma naxī na yemaācū Tupanapēxewa yanguxēēgūāxūcēx ga yema Moīchēarū mugū nūxū ixuxūrūū. Rū Yerucharēūwa ga tupauca ga taxūnewa nanagagū ga guma bucū na Tupanana namugūāxūcēx. ²³ Rū yemaācū nanaxūgū yerū Tupanaārū mugūwa naxūmatū, rū űnanagūrū:

“Ngēxguma wūxi i nge rū nayatūgu i nūxīraūxū i ngīxācū, rū name i Cori ya Tupanana inamu”,

űnanagūrū. ²⁴ Rū yéma naxī rū yéma nanagagū ga taxre ga muxtucugū ga yexwacēx yaexū, na Tupanacēx nadaiāxūcēx ga paigū ga tupaucawa, yerū yema űnanagūrū ga Tupanaārū mugūwa. ²⁵⁻²⁶ Rū yexgumaūcūū Yerucharēūgu naxāchiū ga wūxi ga yatū ga Chimeūgu āegacū. Rū wūxi ga yatū ga mecūmacū nixī ga nūmax, rū aixcūma Tupanaxū ngechaūcū nixī. Rū nūma rū guxūguma ĩnananguxēē na űnuxguacū tá ĩnguxū ya Yudīgūarū nguxūxēēruū ya Cristu. Rū Tupanaāē i Ūūnexū rū Chimeūxūtawa nayexma, rū nūxū nūxū nacuēxēē na tāūtāma nayuxū ega tama nūxū nadauxiragu ya Cristu ya Cori ya Tupana nūma namucū.

²⁷ Rū yema ngunexūgu rū tupauca ga taxūnewa Chimeūxū naxūxēē ga Tupanaāē i Ūūnexū. Rū yéma nayexma ga Chimeū ga yexguma Yúche rū María tupaucawa nagagūgu ga guma bucū ga Ngechuchu na Tupanana namugūāxūcēx na yemaācū yanguxēēgūāxūcēx ga Moīchēarū mu. ²⁸ Rū Ngechuchuxū naganagū ga Chimeū. Rū Tupanaxū nicuēxūū, rū űnanagūrū:

²⁹ —Pa Corix, űuxma rū marū name na chayuxū, erū marū cuyanguxēē ga yema chomaā icuxunetaxū. ³⁰⁻³¹ —Rū chauxetūmaāxūchi nūxū chadau ya daa Maxēxēēruū ya guxū i duūxūgūcēx nūma cunamucū. ³² —Rū nūma nixī i ngōonexēēruū naxcēx i guxūma i duūxūgū i tama Yudīgū ixīgūxū. Rū űnā ōxchanagagu rū togū i duūxūgū tá nūxū nicuēxūūgū i curū duūxūgū i Yudīgū —űnanagūrū. ³³ Rū Yúche rū María rū nabaixāchiāēgū namaā ga Chimeūārū ore ga űnuxācū guma ōxchanachigamaā na yadexaxū. ³⁴ Rū yexguma ga Chimeū rū Tupanana naca na meā nūxū nangupetūgūxūcēx ga Yúche rū María rū guma ōxchana. Rū űnanagūrū ngīxū ga María ga Ngechuchu naē: —Dūcēx, daa ōxchana rū tá nanamaxēēē i muxūma i Yudīgū, natūrū ngēma tama nūxū yaxōgūchaūxū rū tá inayarūtauxe. Rū nūma rū wūxi i cuēxruū tá nixī i duūxūgūcēx, rū muxūma tá nūxū naxoe. ³⁵ —Rū ngēmaācū tá nananguxēēāma i guxūma i naāewa nagu naxīnūēxū i muxūma i duūxūgū. Rū guxūma i ngēma tá űnā ōxchanaxū ngupetūxū rū űnoma wūxi

i cūxchi i curū maxūnewa yarūwáxūrūū tá cuxū nangux, Pa Maríax — ñanagürü. ³⁶ Rū yéma ta iyexma ga wūxi ga ngecū ga Tupanaärü orexū ixucū. Rū Ana nixī ga ngēga. Rū Panuexācū iyixī, rü Ácherutanūxū iyixī. Rū marū yaguāxūchi iyixī. Rū yexguma napaxūchigutama ixāte. Natürü 7 ga tauncü- guxicatama ngītemaā iyarūxūxū, yerü nayu ga ngīte. ³⁷ Rū yemaācū wūxi ga yutecū ga yaguāxūchi iyixī, yerü 84 nixī ga ngīrū tauncü. Rū taguma tupauca ga taxūnewa íxūxū. Rū guxūguma ngunecū rü chütacū rü naxaureācūma iyumūxēēcha. Rū yemaācū Tupanaxū iyacuèxūū rü inataxēē. ³⁸ Rū yexgumatama Chimeū ídexayane, rü yéma ingu ga Ana. Rū Tupanana moxē ixā. Rū iinaxūgū ga ōxchana ga Ngechuchuchiga na yadexaxū napēxewa ga guxūma ga yema Yudiūgū ga Yerucharéūcūāx ga Cristuxū ínanguxēēgūxū na norū nguxuchixēēruū yīxūcèx.

Īāne ga Nacharétucèx nawoegu

³⁹ Rū yexguma marū yanguxēēgūāguwena ga guxūma ga yema Tupanaärü mugū nūxū ixuxū, rü Yúche rü María rü naxcèx nawoegu ga norū Īāne ga Nacharétu ga Gariréaanewa yexmane. ⁴⁰ Rū guma bucū rü niyachigū, rü yexeraācū nīporachigū, rü yexeraācū nūxū nicuāchigū. Rū Tupana rü poraācū nūxū narūngūxēē.

Bucū ga Ngechuchu rü tupauca ga taxūnewa naxo

⁴¹ Nanatū rü naē rü gucū ga tauncūgu Yerucharéūwa taxīxū naxcèx ga Ūpetūchigaarū peta. ⁴² Rū yexguma Ngechuchu 12 ga tauncū nūxū yexmagu, rü Yerucharéūwa taxī namaā ga nanatū rü naē, yerü yema nixī ga Yudiūgūcūma naxcèx ga Ūpetūchigaarū peta. ⁴³ Rū yexguma yagūechigagu ga Ūpetūchigaarū peta, rü tūmachiūcèx tawoegu ga nanatū rü naē. Natürü ga Ngechuchu rü tūmaēchita tūxna Yerucharéūgu narūxāūx. ⁴⁴ Rū tūma nūxū tacuèxgūgu rü yema muxū ga duūxūgū ga tūmaweama ixīxūtanūxūtanūgu naxā ga Ngechuchu. Rū yemaācū marū itaxī ga wūxi ga ngunexū. Natürü yexguma naxcèx tadaugūgu tūmatanūxūtanūgu rü yema tūxū cuèxgūxūtanūgu rü tama nūxū itayangaugū. ⁴⁵ Rū yemacèx wenaxārū Yerucharéūcèx tawoegu na yexma naxcèx tayadaugūxūcèx. ⁴⁶ Rū tomaēxpūx ga ngunexūguwena Ngechuchuxū itayangaugū ga tupauca ga taxūnegu. Rū yéma narūto natanūwa ga yema nguexēēruūgū ga Tupanaärü mugūwa nguxēētaegūxū, rü inarūxīnū ga norū nguxēētae, rü nūxna nicachigū. ⁴⁷ Rū guxūma ga yema duūxūgū ga Ngechuchuxū ĩnūēxū, rü nabaixāchiāēgū na ñuxācū nūxū nacuèxūchixū rü meāma nangāxūāxū. ⁴⁸ Rū yexguma nanatū rü naē nūxū daugūgu rü tabaixāchiāēgū. Rū naē rü ñatarūgū nūxū: — Pa Chaunex, ¿tūxcūū tomaā ngexū cuwagū? Cunatū rü choma rü poraācū cuxcèx taxoegaāēcūma cuxcèx tadaugūēcha —ñatarūgū. ⁴⁹ Rū yexguma ga Ngechuchu rü ñanagürü: —¿Tūxcūū chauxcèx pedaugū? ¿Tama ēxna nūxū pecuèx na woetama Chaunatūchiūwa tá changēxmaxū? —ñanagürü. ⁵⁰ Natürü ga tūmagū rü tama nūxū tacuèxgūēga ga yema tūmamaā nūxū yaxuxū. ⁵¹ Rū yexguma ga Ngechuchu rü tūmawe nataegu ga Nacharétuwa. Rū guxūguma meā tūmaga naxīnūēcha. Rū naē ga María rü ngīāēwa nagu irūxīnūēcha ga guxūma ga yema ngupetūxū. ⁵² Rū niyachigū ga Ngechuchu, rü yexeraācū nūxū nicuāchigū. Rū Tupana rü namaā nataāē, rü guxūma ga duūxūgū rü ta namaā nataāēgū.

3

Cuáü ga baiüxêëruü nüxü nixu ga Tupanaarü ore ga dauxchitawa ga ngextá taxúema íxãpataxüwa

(Mt 3.1-12; Mr 1.1-8; Cu 1.19-28)

¹ Rü yexguma Tibériu 15 ga taunecü Dumaarü âêxgacü yixîxgu, rü yexguma nixî ga Põüchiu Piratu rü Yudéaaneärü âêxgacü yixü, rü Erode rü Gariréaaneärü âêxgacü yixü, rü naëneë ga Piripi rü Itúreaane rü Traconíteaneärü âêxgacü yixü, rü Lichániä rü Abiriniãaneärü âêxgacü yixü. ² Rü yexguma ga Aná rü Caipá rü paigüeru nixîgü. Rü yexguma nixî ga Zacaría nane ga Cuáümaã yadexaxü ga Tupana ga dauxchitawa ga ngextá taxúema íxãpataxüwa. ³ Rü guxüma ga yema nachicagü ga Yudaücutüarü ngaicamana yexmagüxügu nixügüchigü ga Cuáü. Rü duüxügümaã nüxü nixuchigü na nüxü naxoexücëx ga nacümagü ga chixexü rü ínabaiüxücëx na yemaäcü Tupana nüxü nüxü rüngümmaxücëx ga norü pecadugü. ⁴ Rü guma nuxcümaücü ga Ichaxía ga Tupanaarü orearü uruü naxümatüxürüü nixî ga nangupetüxü. Yerü duüxügüarü maxüarü mexêëchigaxü nixu ga yexguma ñaxgu:

“Ngëma nachica i ngextá taxúema íxãpataxüwa rü tá nangëxma i wüxi i duüxü i ngema tagaäcüma ñaxü: ‘¡Pegü pemexêë naxcëx ya Cori! ¡Rü naxcëx ipeyanawëxächixêë i perü maxü!’ ⁵ Rü guxãarü maxü rü tá inayarüwëxächi ñoma wüxi i ngatexü rügütaxürüü na iyawëxücëx i nama. Rü guxãma ya yixema togüëtüwa tügü ngëxmaxêëgüxe rü tá ítarüxî ñoma wüxi ya mëxpüne rü wüxi i ngüchitaeru idoxochixêëxürüü. Rü guxüma i nacüma i wüxü rü tá inayarüwëxächigü. Rü ngëma duüxügüarü maxüwa tama mexü rü tá nayamexêëgü. ⁶ Rü guxüma i duüxügü rü tá nüxü nadaugü ya yima Maxêëëruü ya Tupana núma namucü”,

ñanagürü ga Ichaxía ümatüxü ga ore. ⁷ Rü yexguma Cuáüxütawa naxîxgu ga duüxügü na ínabaiüxêëäxücëx, rü nüma ga Cuáü rü ñanagürüama nüxü: —Pa Äxtapearü Duüxügüx ¿Rü ñuxäcü nagu perüxîñue na naxchaxwa pibuxmüxü i ngema poxcu i marü ingaicamaxü ega tama nüxü perüxoegu i pecüma i chixexü? ⁸ —¡Rü meã pemaxë na ngëmaäcü guxüma i duüxügü nüxü daugüxücëx na aixcüma marü nüxü perüxoexü i pecüma i chixexü! Rü tama name i ñaperügügü:

“Tãütáma Tupana toxü napoxcue, erü Abráütanüxü tixîgü” ñaperügügü. Erü tama ngëmacëx nixî ya Tupana i duüxügüxü nayaxuxü. Rü pemaã nüxü chixu rü ngëxguma Tupana naxwëxegu rü tama nüxü naguxcha na daa nutawa Abráütanüxü nanguxüxêëxü. ⁹ —Tupanaarü yuema rü marü ímemare na yadaxüäxücëx i ngëma nanetügü i tama mexü. Rü guxüma i nanetügü i chixearü õõxü rü tá nadaxü, rü ñuxüchi üxüwa tá ínagu —ñanagürü ga Cuáü. ¹⁰ Rü yexguma ga duüxügü rü Cuáüna nacagü, rü ñanagürügü: —¿Tacü êxna nixî i mexü na tanaxüxü? —ñanagürügü. ¹¹ Rü Cuáü rü nanangãxü rü ñanagürü: —Texé ya taxrearü gáuxüchiruãxë rü name nixî i texé ya tüxü nataxüxena tanaxã. Rü texé ya õnaãxë rü name nixî i texé ya ngearü õnaãxëmaã tangau i túmaarü õna —ñanagürü. ¹² Rü Cuáüxütawa naxî ta ga ñuxre ga yatügü ga Dumaarü âêxgacüxëx diëru ngixü ideetanüxü. Rü nanaxwëxegu ga Cuáü na ínabaiüxêëxü. Rü Cuáüna nacagü, rü ñanagürügü: —Pa Ngüexêëruüx, ¿Tacü nixî i mexü na tanaxüxü i tomax? —ñanagürügü. ¹³ Rü Cuáü

rü ñanagürü nüxü: —Tama name i ãëxgacü pemaã nüxü ixuxüãrû yexera penayauxgü i dïeru i duüxügüxütawa —ñanagürü. ¹⁴ Rü ñuxre ga churaragü rü ta Cuáña nacagüe, rü ñanagürügü: —¿Toma rü tacü nixí i mexü i tanaxüxü? —ñanagürügü. Rü nanangãxü ga Cuáñ rü ñanagürü: —Tama name i texéxü pexãxüneãcüma tümaãrû ngëmaxügü pepuxü. Rü tama name i tacü rü doraxü tümachigaxü pixu na ngëmaãcü tümaãrû ngëmaxügü pepuxüxcèx. Rü name nixí i ngëma dïeru i ãëxgacü pexü ngïmaã naxütanücümaãtama petaãëgü rü tama yexeracücèx ípeca —ñanagürü. ¹⁵ Rü yexguma ga duüxügü rü poraãcü ínananguxëëgü na paxa ínanguxü ga Tupana Nane ga Cristu. Rü nagu narüxñüë ga na bexmana Cuáñ rü Cristu yíixü. ¹⁶ Natürü ga Cuáñ rü guxãxü ñanagürü: —Aixcüma i choma rü dexáwamare pexü íchabaiüxëë, natürü tá ínangu i to i Tupanaãrû orearü uruü, rü nüma tá pexna nananguxëë i Tupanaãë i Üünexü wüxi i üxüemarüü. Erü nüma rü poraãcü choxü narüyexera na ãëxgacü yíixü. Rü choma rü napëxewa rü taxuwama chame rü bai i norü chapatucunüãrû wëgüwa chame. ¹⁷ —Rü nüma rü marü ínamemare na ñoma i naãnewa yadexechiãxücèx i norü duüxügü ñoma wüxi ya yatü trigu naãtüna idexechixürüü. Rü ngëmaãcü tá nayadexechi i ngëma noxrü ixíigüxü na naxü- tawa nangëxmagüxcèx, natürü ngëma tama noxrü ixíigüxü, rü tá ínanagu nawa ya yima üxü ya taguma ixoxüne —ñanagürü. ¹⁸ Rü yema oremaã rü muxüma ga to ga ucuxëgümaã, rü Cuáñ duüxügümaã nüxü nixu ga ore ga mexü ga Ngechuchuchiga. ¹⁹ Rü Cuáñ rü ãëxgacü ga Erodexü nanga, yerü ngïmaã naxãmèx ga Erodía ga naëneë ga Piripi namèx. Rü nananga ta naxcèx ga yema togü ga chixexü ga naxüxü. ²⁰ Natürü ga Erode rü tama Cuáña naxñü. Rü yexeraxü ga chixexü naxü, yerü poxcupataüwa Cuáñxü namu.

Ngechucharü baiechiga
(Mt 3.13-17; Mr 1.9-11)

²¹ Rü yexguma taxüta napoxcugu ga Cuáñ, rü guxü ga duüxügüxü ínabaiüxëëxyane, rü yexguma ta nixí ga Ngechuchuxü ínabaiexëëxü. Rü yexguma Ngechuchu íyumüxëyane rü ningena ga daxüguxü ga naãne. ²² Rü Tupanaãë i Üünexü rü wüxi ga muxtucurüü inanago rü Ngechuchuna nangu. Rü daxüwa inanaxü ga wüxi ga naga ga ñaxü: —Cuma nixí, Pa Chaunex, i cuxü changechaüxüchixü rü cumaã chataãëxü —ñaxü.

Ngechuchu ya Cristu natanüwa ngóxü ga duüxügüchiga
(Mt 1.1-17)

²³ Ngechuchu rü 30 ga taunecü nüxü nayexma ga yexguma ínaxügüãgu na guxüwama duüxügümaã nüxü yaxuxü ga Tupanaarü Ore. Rü duüxügü nagu narüxñüë rü Yüche nane nixí ga nümax.

- Rü Yüche rü Erí nane nixí.
- ²⁴ Rü Erí rü Matáx nane nixí.
- Rü Matáx rü Lebí nane nixí.
- Rü Lebí rü Merequí nane nixí.
- Rü Merequí rü Yana nane nixí.
- Rü Yana rü Yüche nane nixí.
- ²⁵ Rü Yüche rü Matatía nane nixí.
- Rü Matatía rü Amó nane nixí.
- Rü Amó rü Naüü nane nixí.
- Rü Naüü rü Echi nane nixí.
- Rü Echi rü Nagai nane nixí.

- 26 Rū Nagái rü Maãx nane nixĩ.
 Rū Maãx rü Matatía nane nixĩ.
 Rū Matatía rü Chemeĩ nane nixĩ.
 Rū Chemeĩ rü Yuchéx nane nixĩ.
 Rū Yuchéx rü Yudá nane nixĩ.
- 27 Rū Yudá rü Yuanáũ nane nixĩ.
 Rū Yuanáũ rü Récha nane nixĩ.
 Rū Récha rü Chorobabé nane nixĩ.
 Rū Chorobabé rü Charatía nane nixĩ.
 Rū Charatía rü Nerí nane nixĩ.
- 28 Rū Nerí rü Merequí nane nixĩ.
 Rū Merequí rü Adí nane nixĩ.
 Rū Adí rü Cocháũ nane nixĩ.
 Rū Cocháũ rü Elmadáũ nane nixĩ.
 Rū Elmadáũ rü Erú nane nixĩ.
- 29 Rū Erú rü Yochué nane nixĩ.
 Rū Yochué rü Erieché nane nixĩ.
 Rū Erieché rü Yoriũ nane nixĩ.
 Rū Yoriũ rü Matáx nane nixĩ.
 Rū Matáx rü Lebí nane nixĩ.
- 30 Rū Lebí rü Chimeũũ nane nixĩ.
 Rū Chimeũũ rü Yudá nane nixĩ.
 Rū Yudá rü Yúche nane nixĩ.
 Rū Yúche rü Yonáũ nane nixĩ.
 Rū Yonáũ rü Eriaquíũ nane nixĩ.
- 31 Rū Eriaquíũ rü Meréa nane nixĩ.
 Rū Meréa rü Ména nane nixĩ.
 Rū Ména rü Matáta nane nixĩ.
 Rū Matáta rü Natáũ nane nixĩ.
 Rū Natáũ rü Dabí nane nixĩ.
- 32 Rū Dabí rü Ichaxí nane nixĩ.
 Rū Ichaxí rü Obé nane nixĩ.
 Rū Obé rü Boó nane nixĩ.
 Rū Boó rü Cháru nane nixĩ.
 Rū Cháru rü Nachóũ nane nixĩ.
- 33 Rū Nachóũ rü Aminadá nane nixĩ.
 Rū Aminadá rü Admíũ nane nixĩ.
 Rū Admíũ rü Arni nane nixĩ.
 Rū Arni rü Esróũ nane nixĩ.
 Rū Esróũ rü Fare nane nixĩ.
 Rū Fare rü Yudá nane nixĩ.
- 34 Rū Yudá rü Acóbu nane nixĩ.
 Rū Acóbu rü Ichaá nane nixĩ.
 Rū Ichaá rü Abráũ nane nixĩ.
 Rū Abráũ rü Taré nane nixĩ.
 Rū Taré rü Nacúx nane nixĩ.
- 35 Rū Nacúx rü Cherúx nane nixĩ.
 Rū Cherúx rü Ragáu nane nixĩ.
 Rū Ragáu rü Peréx nane nixĩ.
 Rū Peréx rü Ebéx nane nixĩ.
 Rū Ebéx rü Cháru nane nixĩ.
- 36 Rū Cháru rü Caináũ nane nixĩ.
 Rū Caináũ rü Arpacháx nane nixĩ.
 Rū Arpachá rü Chéũ nane nixĩ.
 Rū Chéũ rü Noę nane nixĩ.
 Noę rü Laméx nane nixĩ.
- 37 Rū Laméx rü Matucharéũ nane nixĩ.
 Rū Matucharéũ rü Enóx nane nixĩ.
 Rū Enóx rü Yaréx nane nixĩ.

Rü Yaréx rü Maararéx nane nixĩ.
 Rü Maararéx rü Caináũ nane nixĩ.
 38 Rü Caináũ rü Enóx nane nixĩ.
 Rü Enóx rü Chex nane nixĩ.
 Rü Chex rü Adáũ nane nixĩ.
 Rü Adáũ rü Tupana nane nixĩ.

4

Ngechuchuxũ naxũ ga Chataná
 (Mt 4.1-11; Mr 1.12-13)

¹ Ngechuchuxũtawa nayexma ga Tupanaãe i Üünexũ. Rü yexguma Yudaũchiüwa ínaxũächigu ga Ngechuchu, rü Tupanaãe i Üünexũ rü dau-chitawa ga ngextá taxúema íxãpataxũwa nanaga. ² Rü yéma nayexma ga 40 ga ngunexũ. Rü ngoxo ga Chataná rü nüxũ naxũ. Rü yexguma yéma nayexmagu rü taguma nachibü. Natürü ga yixcama rü nataiya. ³ Rü yexguma ga ngoxo ga Chataná rü ñanagürü nüxũ: —Ega aixcüma Tupana Nane quixĩgu, rü jdaa nutamaã nüxũ ixu na pãũxũ nanguxuchixüçèx! —ñanagürü ga Chataná. ⁴ Rü Ngechuchu nanangãxũ rü ñanagürü: —Tupanaãrü ore i ümatüxũwa rü ñanagürü:

“Tãütáma õnamaãxĩca namaxê i duũxũgü, natürü guxũma i ore i Tupana nüxũ ixuxũ tá nixĩ i duũxũgüxũ maxêxêxũ”,

ñanagürü. ⁵ Rü yexguma ga ngoxo ga Chataná rü wüxi ga mëxpünechitaerüwa nanaga. Rü yéma paxaãchi nüxũ nüxũ nadauxêe ga guxũma ga nachiüãnegü ga ñoma ga naãnecũãx. ⁶ Rü Chataná rü ñanagürü nüxũ: —Guxũ i ñaã nachiüãnegü i mexũ rü norü ngẽmaxũgü rü chi cuxna chanaxã. Erü choxrü nixĩ i guxũma i ñaãgü, rü tüxna chanaxã ya texé ya choma chorü me ixixê na tüxna na chanaxãxũ. ⁷ —Rü ngẽxguma chi chopëgegu cucaxãpüxügu rü choxü quicuèxüügu rü cuxrü chi nixĩ i guxũma i ñaã cuxũ chawéxũ —ñanagürü. ⁸ Natürü ga Ngechuchu rü nanangãxũ, rü ñanagürü: —jChoxna ixügachi! Pa Chatanãx. Erü Tupanaãrü ore i ümatüxũwa rü ñanagürü:

“jNüxũ icuèxüü ya Cori ya curü Tupana, rü yimaãxũxĩcatama napuracü!” ñanagürü. ⁹ Rü yexguma ga ngoxo ga Chataná rü Yerucharéü ga ñãnewa nanaga. Rü tupauca ga taxünetapëxëgu nanamunagü. Rü ñanagürü nüxũ: —Ega aixcüma Tupana Nane quixĩgu, rü jnuã cugü rütae! ¹⁰ —Erü Tupanaãrü ore i ümatüxũwa rü ñanagürü:

“Tupana tá nanamu i norü orearü ngeruügu i daxüçũãx na cuxna nadaugüxüçèx. ¹¹ Rü naxmëxmaã tá cuxũ niyauxgü na tama jacü rü nutagu cunguxüçèx”,

ñanagürü. ¹² Rü Ngechuchu nanangãxũ rü ñanagürü: —Tupanaãrü ore i ümatüxũwa rü ñanagürü ta:

“jTama name i nüxũ na cuxüxũ ya Cori ya curü Tupana!”,

ñanagürü. ¹³ Rü yexguma marü taxucürüwama Ngechuchuxũ naxüxgu, rü nüma ga Chataná rü nüxna niña ñüxmata nüxũ iyangau na ñuxãcü wena nüxũ na naxüxũ.

Ngechuchu rü Gariréaanewa inanaxügu ga norü puracü
 (Mt 4.12-17; Mr 1.14-15)

¹⁴ Rü Ngechuchu rü Gariréaanecèx nataegu. Rü Tupanaãe i Üünexũ rü naxũtawa nayexma rü poraãcü nanaporaxêe. Rü ga duũxũgü rü nachiga nidexagü ga guxũ ga yema naãnewa. ¹⁵ Rü wüxichigü ga ñãneãrü

ngutaquëxepataũgüwa rü nanguxëëtae. Rü guxũma ga duũxũgü rü nüxũ nicuëxũũgü.

Nacharëtuwa nayexma ga Ngechuchu
(Mt 13.53-58; Mr 6.1-6)

¹⁶ Rü Nacharëtuwa naxũ ga Ngechuchu. Rü guma nixĩ ga ãne ga nanatũgü nawa nayaxëëgüne. Rü ngũxchigaarü ngunexũgu rü ngutaquëxepataũgu naxücu, yerü yema nixĩ ga nacüma ga guxũ ga ngũxchigaarü ngunexũgu. Rü yéma inachi rü duũxũgücëx nüxũ nadaumatü ga Tupanaärü ore ga ümatüxũ. ¹⁷ Rü nüxna nanaxãgü ga popera ga Tupanaärü orearü uruũ ga Ichaxía ümatüxũ. Rü yexguma yangenaãtũãgu, rü nüxũ inayangau ga ngextá ínaxümatüxũwa ga ore ga ñaxũ:

¹⁸ “Cori ya Tupanaãë rü chauxõtawa nangëxma. Rü nüma rü choxũ naxuneta na nüxũ chixuxücëx i ore i mexũ namaã i ngëma duũxũgü i ngearü ngëmaxũãxgũxũ. Rü choxũ namu na ngëma duũxũgü i pecadutũwa ngëxmagũxũmaã nüxũ na chixuxücëx rü tá na ínanguxũxũ. Rü choxũ namu na chayadauchixetüxëëgũxũcëx i ngëma ingexetügũxũ rü na íchananguxũxëëxücëx i ngëma duũxũgü i togümëxëwa ngëxmagũxũ. ¹⁹ Rü núma choxũ namu na duũxũgümaã nüxũ chixuxücëx na Tupana nüxũ rüngũxëëchaũxũ i ngëma nüxũ yaxögũxũ”,

ñanagürü ga yema ore. ²⁰ Rü yexguma ga Ngechuchu rü nügüna nananuxãchiátü ga popera. Rü ngutaquëxepataũärü dauruüna nanaxã rü ñuxũchi ínarüto. Natürü guxũma ga yema ngutaquëxepataũwa yexmagũxũ ga duũxũgü rü nüxũ narüdaunüëcha. ²¹ Rü yexguma ga Ngechuchu rü inanaxũgü ga na yadexaxũ, rü ñanagürü: —Ñuxmatama nixĩ i pepëxewa Tupana yanguxëëxũ i ñãã ore ga Ichaxía ümatüxũ —ñanagürü. ²² Rü guxũma ga duũxũgü rü meã Ngechuchuchiga nidexagü. Rü nañaxãchiãëgü namaã ga yema ore ga mexũ ga namaã nüxũ yaxuxũ. Natürü tama aixcüma nayaxögüchaũ. Rü yemacëx nügüna nacagü rü ñanagürügü: —¿Taux ëxna daa yĩxũ ya Yúche nane? —ñanagürügü. ²³ Rü Ngechuchu rü ñanagürü nüxũ: —Choma nüxũ chacuëx rü tá chomaã penaxuxuchi i ngëma ore i ñaxũ:

“Pa Duturux ¡Cugütama rümexëë!” ñaxũ. Rü ëxna tá choxũ ñaperügügü:

“Yema mexũ ga taxü ga nüxũ taxĩnüëxũ ga Tupanaärü poramaã cuxũxũ ga Capernáüwa, rü tanaxwëxe i nuã curü ãnëwa rü ta na cunaxũxũ”, ñaperügügü tá. ²⁴ Rü nayadaxëë ga Ngechuchu na yadexaxũ rü ñanagürü: —Aixcüma pemaã nüxũ chixu rü guxũma i Tupanaärü orearü uruũ, rü norü ãnëwatama i duũxũgü rü tama meã nanayauxgü. ²⁵ —Rü aixcüma pemaã nüxũ chixu rü Iraéanëwa rü nayexma ga muxũchixũma ga ngexũgü ga iyutegũxũ ga yexguma Ería maũxgu. Rü yexguma nixĩ ga tomaëxpũx ga taunecüarü ngãxũ rü taguma napuxũ, rü poraãcü nangúxũ ga taiya ga guxũ ga ñaa nachixũanëwa. ²⁶ —Natürü ga Tupana rü tama wüxi ga Iraéanecũãx ga yutecüxõtawa Eríaxũ namu. Natürü ngĩxõtawa nanamu ga yema yutecü ga Charëpacũãx ga Chidãũärü ãnëarü ngaicamagu ãchiücü. ²⁷ —Rü yexguma namaũxgu ga Erichéu, rü Iraéanëwa nayexmagü ta ga muxũma ga duũxũgü ga chaxünëmaã idaaweexũ. Natürü taxuüma ga yema idaaweexũ ga Iraéanëwa yexmagũxũ rü naxcëx nitaanë. Rü Namáũ ga Chíríaanecũãxícátama nixĩ ga guma naxcëx yataanecü —ñanagürü ga Ngechuchu. ²⁸ Rü

yexguma yema orexũ naxĩnũegu, rü guxũma ga yema duũxũgũ ga guma ngutaquẽxepataũwa yexmagũxũ rü poraãcü naxcèx nanuẽ. ²⁹ Rü inachigũ ga duũxũgũ rü Ngechuchuxũ inatèxũchigũ ga guma Ìãnewa. Rü guma mèxpũne ga guma Ìãne nawa yexmanechitaeruwa nanagagũ na yema yanataegũãxũcèx. ³⁰ Natürü ga Ngechuchu rü norü ngãxũtanũwa Ìnaxũũãma, rü Ìnixũ.

Wüxi ga yatü ga ngoxo nawa yexmaxũchiga

(Mr 1.21-28)

³¹ Rü yexguma ga Ngechuchu rü Gariréaaneãrũ Ìãne ga Capernãũwa naxũ. Rü ngũxchigaarũ ngunexũgu yéma duũxũgũxũ nangũexèẽ. ³² Rü duũxũgũ rü nabaixãchiãẽgũ namaã ga norü nguxèẽtae, yerü Tupanaãrũ poramaã nidexa. ³³ Rü guma ngutaquẽxepataũwa nayexma ga wüxi ga yatü ga ngoxo nawa yexmaxũ. Rü aita yéma naxũ, rü ñanagürü: ³⁴ —¡Toxna ixũgachi! ¿Tũxcũũ totanũwa cuxũ, Pa Ngechuchux, Pa Nacharétucũãx? ¿Nuã cuxũ na toxũ cudèixũcèx? Choma cuxũ chacuèx na Tupana Nane ya Üüncü na quĩĩxũ —ñanagürü. ³⁵ Rü Ngechuchu nananga ga yema ngoxo rü ñanagürü: —¡Iyarüngeèx rü Ìnaxũxũ nawa ya yima yatü! —ñanagürü. Rü yexguma ga yema ngoxo rü duũxũgũpẽxegu nayanguxèẽ ga guma yatü, rü nawa Ìnaxũxũ. Natürü tama nanapixèẽ. ³⁶ Rü guxũma ga duũxũgũ rü nabaixãchiãẽgũ. Rü nügümücügũmaãchigũ nachiga nidexagũ, rü ñanagürügü: —¿Tacü rü ore nixĩ i ngẽma? Erü ñaã yatü rü aixcũma ngẽma ngoxogũmaã Ìnacuèx rü poraãcü nanamu. Rü nümagü rü naga naxĩnũẽ, rü Ìnachoxũ —ñanagürügü. ³⁷ Rü guxũwama ga yema naãnewa rü Ngechuchuchigaxũ nixugũe ga duũxũgũ.

Ngechuchu rü Chimáũ ga Pedru nèxècèx nayataanexèẽ

(Mt 8.14-15; Mr 1.29-31)

³⁸ Rü guma ngutaquẽxepataũwa Ìnaxũxũ ga Ngechuchu rü Chimáũpatawa naxũ. Rü Chimáũ nèxè rü poraãcü iyaxaxũne. Rü Ngechuchuna nacagũe ga ngĩxcèx na yataanexèẽãxũcèx. ³⁹ Rü nüma rü ngĩxũtagu nayachi rü narümèxãchi rü nananga ga yema axũne. Rü yexgumatama igèuxãchi ga na yaxaxünexũ. Rü yexgumatama Ìirüda, rü naxcèx inamexèẽ ga õna.

Ngechuchu rü muxũma ga idaaweexũcèx nayataanexèẽ

(Mt 8.16-17; Mr 1.32-34)

⁴⁰ Rü yexguma marü yanaxücuhaũgu ga üèxcü, rü Ngechuchuxũtawana nanagagũ ga guxũma ga duũxũgũ ga nagũxũraũxũ ga ðaaweanemaã ðaaweexũ. Rü ga Ngechuchu rü wüxichigũ ga yema duũxũgũxũ ningõgũ, rü yemaãcü naxcèx nayataanexèẽchigũ. ⁴¹ Rü nanameèxèẽ ga muxũma ga duũxũgũ ga idaaweexũ ga ngoxo nawa yexmagũxũ. Rü yema ngoxogü rü aita naxüe, rü ñanagürügü: —Cuma nixĩ i Tupana Nane quĩĩxũ —ñanagürügü. Natürü ga Ngechuchu rü nayangagũ ga yema ngoxogü. Rü nüxna nanachuxu ga na yadexagũxũ, yerü yema ngoxogü rü nüxũ nacuèxgũ na Cristu yĩĩxũ.

Ngechuchu rü nanaxunagü ga ore ga mexũ ga ngutaquẽxepataũwachigü

(Mr 1.35-39)

⁴² Rü yexguma noxri yangóonegu rü yema Ìãnewa Ìnaxũxũ ga Ngechuchu. Rü wüxi ga nachica ga taxúema Ìxãpataxũwa naxũ. Natürü ga duũxũgũ rü naxcèx nadaugü rü düxwa naxũtawana nangugü. Rü nüxũ

nacèèxügü ga tama na ínaxüxüxcèx ga yema norü naãnewa. ⁴³ Natürü ga Ngechuchu rü ñanagürü nüxü: —Taxucürüwama petanügu charüxãüêcha erü chanaxwèxe na náigü ya íãnegüwa ngëxmagüxü i duüxügümaã rü ta nüxü chixuxü na ñuxácü âëxgacü yíixü ya Tupana. Erü woetama ngëmacèx núma choxü namu —ñanagürü. ⁴⁴ Rü yemaãcü Ngechuchu nüxü nixuchigü ga ore ga ngutaquëxepataügüwachigü ga guxüma ga Gariréaanewa.

5

Muxüma ga choxni na ínayauxüxüchiga

(Mt 4.18-22; Mr 1.16-20)

¹ Rü wüxicana ga yexguma naxtaxa ga Yenecharétuanacüwa nayexmagu ga Ngechuchu, rü muxüma ga duüxügü rü naxütawa nangugü. Rü düxwa yéma nayaxãütügü, yerü nüxü naxínüêchaü ga Tupanaärü ore. ² Rü Ngechuchu yéma nüxü nadau ga taxre ga ngue ga ingeãcune. Rü guma nguegü rü naxnecüpechinüwa nanadagü, yerü ga püchaetanüxü rü nüxna yéma ínachoü, yerü norü pücha niyauxgü. ³ Rü wüxi ga guma nguegu nixüe ga Ngechuchu. Rü guma ngue rü Chimáüärü nixí. Rü Chimáüna naca ga naxnecüpechinüärü ngãxütüwaxüra na nangeaxüxcèx. Rü guma nguewa narüto ga Ngechuchu. Rü yéma inanaxügü ga duüxügüxü na nangüexëèxü. ⁴ Rü yexguma yagüegagu ga Ngechuchu ga na yadexaxü, rü Chimáüxü ñanagürü: —jyéa ínamátamaxüwa namaã naxã ya daa ngue. Rü ngema penatáe i perü pücha na choxnita piyauxgüxcèx! —ñanagürü. ⁵ Rü Chimáü nanangãxü, rü ñanagürü nüxü: —Pa Ngüexëëruüx, ngewèx rü guxü i chütaxü rü tapüchae, natürü taxuüma i choxni tiyaxu. Natürü ñuxma na choxü cumuxü rü wena táxarü íchanatáe i chorü pücha —ñanagürü. ⁶ Rü yexguma ínatáegüãgu ga norü pücha, rü muxüma ga choxni ínayauxü. Rü düxwa narügáuxchaü ga norü pücha yerü namuxüchi ga choxni. ⁷ Rü naxmëxmaã náí ga nguewa yexmagüxü ga natanüxügüxcèx nacagü na nüxü yanangüëëgüxüxcèx. Rü yéma naxí ga yema natanüxügü ga naxcèx nacagüxü. Rü nanaxüãcugü ga guma taxre ga ngue rü wixgutaèx inangutaügü yerü namuxüchi ga choxni. ⁸ Rü yexguma yemaxü nadëuxgu ga Chimáü ga Pedru, rü Ngechuchupëxegu nayacaxãpüxü, rü ñanagürü nüxü: —jChoxna ixügachi! Pa Corix. Erü choma rü wüxi i duüxü i pecaduãxü chixí —ñanagürü. ⁹ Rü yema ñanagürü ga Chimáü yerü nüma rü guxüma ga natanüxügü rü namaã nabãixãchiãëgü ga yema muxüma ga choxni na ínayauxüxü. ¹⁰ Rü nabãixãchiãëgü ta ga Chimáümücügü ga Chaütiãgu rü Cuáü ga Zebedéu nanegü. Natürü Ngechuchu rü Chimáüxü ñanagürü: —jTãxü i cumuüxü! Erü ñuxmacürüwa rü tá choxü cupuracü na chauxütawa cunagagüxcèx i duüxügü —ñanagürü. ¹¹ Rü yexguma naxãnacüwa namaã nangugüga ga naweügü, rü yéma nanawogü ga norü guxüma rü Ngechuchuwe narüxí.

Ngechuchu rü wüxi ga rüchaxünexüxcèx nayataanexëë

(Mt 8.1-4; Mr 1.40-45)

¹² Rü yexguma wüxi ga yéma yexmagüne ga íãnewa nayexmagu ga Ngechuchu, rü yéma naxütawa nangu ga wüxi ga yatü ga chaxünemaã idaawexü. Rü yexguma Ngechuchuxü nadëuxgu rü napëxegu nayacaxãpüxü rü yexma nanangücuchi. Rü Ngechuchuxü nacëèxü, rü ñanagürü: —Pa Corix, ngëxguma cuma cunaxwëxegu, rü cuxü natauxcha na choxü curümexëèxü nawa i chorü daawe —ñanagürü. ¹³ Rü yexguma

ga Ngechuchu rü nüxü ningögü, rü ñanagürü nüxü: —Ngü, chanaxwèxe. ¡Rüme! —ñanagürü. Rü yexguma yema ñaxgu ga Ngechuchu, rü naxcèx nitaane ga yema yatü ga chaxüneäxü. ¹⁴ Rü Ngechuchu nanaxucuxê rü ñanagürü nüxü: —¡Dücèx, taxüemaâtáma nüxü quixu, natürü paixü cugü yadauxê na curümexü rü yanguxê i ngëma Tupana Moichéwa nüxü ixuxü na duüxügü nüxü cuáxücèx na marü curümexü nawa i curü daawe! —ñanagürü. ¹⁵ Natürü ga Ngechuchuchiga rü guxüwama ninguchigüama. Rü muxüma ga duüxügü rü naxcèx naxítaquëxegü na norü orexü naxínüëxücèx, rü naxcèx na yataaneëxëäxücèx ga norü daawegüwa. ¹⁶ Natürü Ngechuchu rü ñuxguacü rü ngextá taxüema íxápataxüwa naxüüxü. Rü yéma nayayumüxëxü.

Ngechuchu rü wüxi ga yatü ga nawãixächicücèx nayataanexê
(Mt 9.1-8; Mr 2.1-12)

¹⁷ Rü wüxi ga ngunexü Ngechuchu ínguxêëtaeyane, rü yéma narütogü ga ñuxre ga Parichéügü rü ñuxre ga ngüxêëruüügü ga Moichéarü mugümaã nguxêëtaegüxü ga guxü ga Gariréaaneärü íänexácügüwa ne íxü, rü Yudéaanewa ne íxü, rü Yerucharéüwa ne íxü. Rü Tupana rü poraãcü Ngechuchuwa inanawëx ga norü pora rü muxüma ga idaaweexü narümeëxêë. ¹⁸ Rü Ngechuchuxütawa nangugü ga ñuxre ga yatügü, rü naxcèx yéma nanangetaügü ga wüxi ga yatü ga nawãixächicü. Rü ípatagu nanangecuchitaügüchaü na Ngechuchupëxegu yaxütaügüäxücèx. ¹⁹ Natürü taxuacüma yexma nanangecuchitaügüéga, yerü namuxüchi ga duüxügü. Rü yemacèx íacèxwëxgu naxígü. Rü meäma Ngechuchu íyexmaxüetüwa ínanapogüäxügü ga guma ípata. Rü yéma duüxügütanüwa Ngechuchupëxewa ínanachüxüetaügü ga guma nawãixächicü. ²⁰ Rü yexguma Ngechuchu nüxü dëuxgu ga na nüxü yaxögüäxü ga yema yatügü, rü ñanagürü guma nawãixächicüxü: —Pa Chaunex, marü cuxü nüxü changechaü i curü pepadugü —ñanagürü. ²¹ Natürü yema ngüxêëruüügü ga Moichéarü mugüarü nguxêëtaeruüügü rü Parichéügü, rü nagu narüxínüë, rü nügüäëwa ñanagürügü: —¿Täcü nixí i ñaã yatü ecèx Tupanamaã chixexü yaxugüxü? Erü taxüema pora tüxü nangëxma na duüxügüaxü pepaduxü tangechaüxü. Rü Tupanaxícatama nixí ya nüxü nangëxmacü i ngëma pora —ñanagürügü naäëwa. ²² Natürü ga Ngechuchu rü nüxü nacüex ga íacügu na ínaxínüëxü. Rü yemacèx ñanagürü nüxü: —¿Tüxcüü ngë-magu perüxínüë i pemax? ²³ —¿Täcü nixí irütauxchamaëxü na namaã nüxü ixuxü ya daa yatü ya nawãixächicü:

“Curü pepadugü rü marü cuxü nüxü changechaü”, rü éxna:

“¡Inachi rü íxü!” ñágüxü nüxü? ²⁴ —Natürü ñuxma rü tá pexü nüxü chadauxêë na Chaunatü núma choxü muxü na duüxügüaxü nüxü changechaüxücèx i norü pepadugü —ñanagürü. Rü yexguma yema ñaxguwena rü guma nawãixächicüxü ñanagürü: —Cumaã nüxü chixu rü ¡inachi, rü nayaxu i curü carüü, rü cupatawa naxü! —ñanagürü. ²⁵ Rü yexgumatama guxü ga duüxügüpëxewa inachi ga guma nawãixächicü. Rü nanayaxu ga norü carüü ga nagu nacaxü. Rü Tupanaxü yacuëxüüchigüäcüma napatawa naxü. ²⁶ Rü guxüma ga duüxügü rü nabaixächíäëgü. Rü Tupanaxü nicuëxüüügü. Rü poraãcü namüëäcüma ñanagürügü: —Ñuxma rü nüxü tadaugü i ñuxre i Tupanaärü puracügü i aixcüma mexëchixüügü —ñanagürügü.

*Lebícex naca ga Ngechuchu**(Mt 9.9-13; Mr 2.13-17)*

²⁷ Rū yemawena ga Ngechuchu rü inaxūxū ga guma ĩwa. Rū wūxi ga yatū ga Dumaārū āēxgacūcēx dīeru ngīxū ideetanūxūxūtawa naxūpetū. Rū guma yatū rü Lebī nixī ga naega. Rū yēma dīeru ngīxū inadxūwa narūto. Rū Ngechuchu rü ñanagürū nüxū: —ǰChowe ruxū! —ñanagürū. ²⁸ Rū inachi ga Lebī, rü yēma nanatēx ga norū guxūma, rü Ngechuchuwe narūxū. ²⁹ Rū yixcama ga Lebī rü Ngechuchucēx napatawa wūxi ga taxū ga ōna naxū. Rū muxūma ga yatūgū ga Lebīrū dīeruarū degūwa puracūexū, rü muxūma ga togū ga duūxūgū rü ta yēma mechawa narūtogū. ³⁰ Natürū ga yema Parichēugū rü ngúexēeruūgū ga Moīchēarū mugūarū nguxēētaeruūgū, rü inanaxūgūe na Ngechuchuarū ngúexūgūchigagu chixri yadexagūxū. Rū ñanagürūgū: —ǰTūxcū wūxiwa pechibūe rü namaã pexaxegū i ngēma yatūgū i Dumaārū āēxgacūcēx dīeru ngīxū dexū rü ngēma pecaduāxgūxū? —ñanagürūgū. ³¹ Rū Ngechuchu nanangāxū, rü ñanagürū nüxū: —Ngēma poraexū rü taxucēxma duturu nanaxwēxegū, natürū ngēma idaaweexū nixī i duturu naxwēxegūxū. ³² —Choma rü tama mexūgūna na chaxuxūcēx nixī i nūma chaxūxū, natürū pecaduāxgūxūna na chaxuxūcēx nixī i nūma chaxūxū na ngēmaācū nüxū naxoexūcēx i nacūmagū i chixexūgū rü Tupanawe naxīxū —ñanagürū.

*Ngechuchuna nacagūe ga aurechiga**(Mt 9.14-17; Mr 2.18-22)*

³³ Rū yexguma Ngechuchuna nacagūe ga duūxūgū, rü ñanagürūgū: —Cuāñ ya baiūxēēruūārū ngúexūgū rü Parichēugūarū ngúexūgū rü nayumūxēgūeche, rü muēxpūxcūna rü naxauree rü tama nachibūe erū Tupanagu narūxīnūē. Natürū i curū ngúexūgū, rü guxūguma nachibūe rü naxaxegūmare —ñanagürūgū. ³⁴ Natürū ga Ngechuchu rü nanangāxū, rü wūxi ga ore ga nūgūchigaxūtama namaã nixu, rü ñanagürū: —ǰÉxna wūxi i ngīgūarū petawa rü pexcēx namexū na penaxaureexēēxū i ngēma nüxna naxugūxū ega natanūwa nangēxmagu i ngēma yatū i ngexwacēx āmaxū? Rū tama nixī. ³⁵ —Natürū wūxi i ngunexū rü ngēma yatū i ngexwacēx āmaxū, rü tá namūcūgūna nixūgachi. Rū ngēma ngunexūgu tá nixī i aixcūma naxaureexū i namūcūgū —ñanagürū. ³⁶ Rū yexguma ga Ngechuchu rü namaã nüxū nixu ga ore ga yema duūxūgūcūma ga nuxcūmaūxūchiga rü noxrūtama nguxēētae i ngexwacaxūxūchiga. Rū ñanagürū: —Taxúema wūxi i ngexwacaxūxū i naxchiruta tiyo na namaã tanapaitaxūcēx i wūxi i naxchiru i marū ngauxū. Erū ngēxguma ngēmaācū tanaxūxgu rü tanachixexēē i ngēma naxchiru i ngexwacaxūxū. Rū ñuxūchi ngēma natūchi i ngexwacaxūxū rü tama nüxū nayatāūxū i ngēma naxchiru i marū ngauxū. ³⁷ —Rū ngēxgumarū ta rü taxúema ngexwacaxūcū ya binu rü nagu tayabacuchi i wūxi i naxchiū i marū ngauxū i naxchēxmūnaxcēx. Erū ngēxguma ngēmaācū naxūxgu rü yima binu ya ngexwacaxūcū rü tá narūngu, rü tá nayawāīxēē i ngēma naxchiū i ngauxū i naxchēxmūnaxcēx. Rū ngēxma tá nayarūtaxu ya binu rü ngēma naxchiū rü ta. ³⁸ —Rū ngēmacēx tanaxwēxe na yima ngexwacaxūcū ya binu rü ngexwacaxūxū i naxchiūgu yabacuchixū. Rū ngēmaācū rü taxuūtāma inayarūtaxu. ³⁹ —Rū taxúema ya texé ya tūmamaã yaxūxe na ngúchiacū ya binu tayaxaxūxū rü tūxū nangūchañ na tayaxaxūxū ya binu ya ngexwacaxūcū ya maīcuracū. Rū ngēxgumarū ta nixī i

ngëma duũxũgũ i marũ namaã yaxũxũ i nuxcũmaũxũ i nacũma i chixexũ rũ tama nanayauxgũchaũ i ngëma mexũ i ngxũẽẽtae i ngxewacaxũxũ — ñanagũrũ ga Ngechuchu.

6

Ngechuchuarũ ngũexũgũ rũ trigu nicãũẽtanũ ga ngũxchigaarũ ngunexũgu

(Mt 12.1-8; Mr 2.23-28)

¹ Rũ wũxi ga ngũxchigaarũ ngunexũgu rũ Ngechuchu rũ norũ ngũexũgũmaã trigunecũwa nachopetũ. Rũ norũ ngũexũgũ rũ inaxĩãcũma yoxocũne trigu nicãũtanũ. Rũ naxmẽxmaã nanadaxi ga trigu rũ nayangõẽtanũ. ² Rũ ñuxre ga Parichéugũ rũ yema ngũexũgũna nacagũ, rũ ñanagũrũgũ: —¿Tũxcũũ ngũxchigaarũ ngunexũgu penabuxu i trigu? Erũ ngũxchigaarũ ngunexũgu rũ nachuxu na texé puracũxũ —ñanagũrũgũ. ³ Rũ Ngechuchu nanangãxũ, rũ ñanagũrũ: —¿Taguma êxna poperawa nũxũ pedau ga tacũ na naxũxũ ga nuxcũmaũcũ ga ãẽxgacũ ga Dabí ga yexguma nataiyagu ga nũma rũ natanũxũgũ? ⁴ —Rũ Tupanapatagu naxũcu rũ nũxũ nadau ga yema pãũ ga üünexũ ga yexma nuxũ. Rũ yema pãũ rũ nachuxu ga ngxerũxemare na nangõxũ, rũ paigũcèxicatama nixĩ. Natũrũ Dabí nanayaxu ga yema pãũ rũ nanangõx, rũ natanũxũmaã rũ ta nangau —ñanagũrũ. ⁵ Rũ ñanagũrũ ta ga Ngechuchu: —Tupana Nane ya duũxũxũ ixĩcũ rũ namaã inacũex i ngũxchigaarũ ngunexũ —ñanagũrũ.

Wũxi ga yatũ ga yumécũchiga

(Mt 12.9-14; Mr 3.1-6)

⁶ Rũ to ga ngũxchigaarũ ngunexũgu rũ Ngechuchu rũ ngutaquẽxepataũgu naxũcu. Rũ inanaxũgũ ga na nanguxẽẽtaexũ. Rũ yéma nayexma ga wũxi ga yatũ ga norũ tũgũnewa yumécũ. ⁷ Rũ yema ngũexẽẽruũgũ ga Moĩchearũ mugũwa ngxũẽẽtaegũxũ rũ Parichéugũ, rũ Ngechuchuxũ nangugũgũ ngoxita ngũxchigaarũ ngunexũgu guma yumécũxũ namexẽẽ, yerũ naxcèx nadaugũ ga ñuxãcũ norũ ãẽxgacũgũxũtawana na ínaxuaxũgũãxũ. ⁸ Natũrũ nũma ga Ngechuchu rũ nũxũ nacũex ga yema naãẽwana naxĩnũẽxũ ga yema yatũgũ. Rũ yemacèx guma yumécũxũ ñanagũrũ: —¿Írũda rũ nuxã ngãxũtanũgu yachi! —ñanagũrũ. Rũ guma yumécũ rũ inachi rũ norũ ngãxũtanũgu nayachi. ⁹ Rũ yexguma ga Ngechuchu rũ nũxna naca ga yema Parichéugũ rũ yema mugũwa ngxũẽẽtaegũxũ, rũ ñanagũrũ nũxũ: —¿tacũ nixĩ i ngema mexũ ixũxũ i ngũxchigaarũ ngunexũgu? ¿Rũ ngema mexũ rũ êxna chixexũ? ¿Rũ namexũ i na namaxẽẽxũ rũ êxna yamáxũ? —ñanagũrũ. ¹⁰ Rũ yexguma Ngechuchu nũxũ nidaugũãchi ga yema duũxũgũ ga yéma yexmagũxũ. Rũ guma yumécũxũ ñanagũrũ: —¿Iyanawẽxãchixẽẽ ya cuxmẽ! —ñanagũrũ. Rũ guma yatũ rũ nũgũ inayarũwẽxãchimẽxẽxẽ, rũ narũmemẽx. ¹¹ Natũrũ yema Parichéugũ rũ ngũexẽẽruũgũ ga Moĩchearũ mugũwa ngxũẽẽtaegũxũ, rũ porãcũ nanuẽ. Rũ nũgũ nixucũxẽgũ na ñuxãcũ tá Ngechuchuxũ na yamèxgũxũ.

Ngechuchu nanade ga 12 ga norũ ngũexũgũ na tóxnamana namugũãxũcèx

(Mt 10.1-4; Mr 3.13-19)

¹² Rũ yexguma ga Ngechuchu rũ dauxchitawana, wũxi ga mèxpũnewa naxũ na yéma yayumũxẽxũcèx. Rũ guxũ ga yema chũtaxũgu rũ yéma

nayumüxê. ¹³ Rü yexguma yangóonegu, rü Ngechuchu norü ngúexüügücèx naca. Rü natanüwa nayadexechi ga 12. Rü yema nixí ga yatügü ga Ngechuchu nüxü unetagüxü na tóxnamana nangegüâxücèx ga norü ore. ¹⁴ Rü yema yatügü ga nadexü rü Chimáú ga Pedrugu nanaxüéga nixí ga wüxi. Rü to nixí ga Aüdré ga Chimáú naêneé, rü Chaütiágu rü Cuáú, rü Piripi, rü Baturumé, ¹⁵ rü Mateu, rü Tumachi, rü Chaütiágu ga Arupéu nane rü Chimáú ga iporaêcücü, ¹⁶ rü Yuda ga Chaütiágueneé, rü Yuda Icariúte ga yixcama Ngechuchuxü íxuaxüxü naêchita.

Ngechuchu rü muxüma ga duüxüügüxü nangüexêê
(Mt 4.23-25)

¹⁷ Rü Ngechuchu rü yema yatügü ga nadexümaâ ínarüxígu nawa ga guma mëxpúne. Rü wüxi ga nachica ga ínametachinüânexüwa nayachaxächitanü. Rü yéma nayexmagü ga muxüma ga duüxüügü ga guxü ga Yudéaanewa ne íxü, rü Yerucharéüwa ne íxü, rü taxtü ga taxüânacüwa ga Chidáüwa rü Tiruwa ne íxü. Rü yéma naxí yerü Ngechuchuxü naxínüêchaü, rü nanaxwèxegü ga Ngechuchu na nameêxêêxü ga norü ðaawegüwa. ¹⁸ Rü yema duüxüügü ga chixexü ga naê nawa yexmagüxü rü ta naxcèx nitaanegü. ¹⁹ Rü guxüma ga duüxüügü rü Ngechuchuxü ningögügüchaü, yerü norü poramaâ nanameêxêê.

Duüxüügü i taãégüxüchiga rü duüxüügü i ngechaüügüxüchiga
(Mt 5.1-12)

²⁰ Rü yexguma Ngechuchu rü norü ngúexüügüxü nadawenü, rü ñanagürü nüxü: —¡Petaãégü i pema ya ingearü ngêmaxüâxgüxe! Rü Tupana âëxgacü íxíxüwa rü pema rü tá ta pexâchica. ²¹ —¡Rü petaãégü i pema i ñüxma taiyaexe! ¡Rü tá meâma pingâxcharaügu! ¡Rü petaãégü i pema i ñüxma auxexe! Rü yixcama rü tá pecugüe. ²² —¡Rü petaãégü i pema i ngêxguma duüxüügü pexchi aiegu, rü pexü ínawoüxgu, rü tacü pemaâ yaxugüegu, rü chaugagu chixri pechiga yadexagügu! ²³ —Rü ngêxguma ngêma pexü üpetügu, rü ¡petaãégüama rü tama pexoegaãégü! Erü daxüügüxü i naânewa rü tá penayauxgü i wüxi i perü âmare i mexêchixü. Rü dücax, ñaâ duüxüügü i ñüxma pexchi aiexüârü oxigü rü yexgumarü ta nixí ga naxchi na naxaixü ga nuxcümaüügüxü ga Tupanaârü orearü uruügü. ²⁴ —Natürü wüxi i ngechaü tá nixí i pexcèx i pema ya muârü ngêmaxüâxgüxe erü núma ñoma i naânewa rü marü petaãégü. ²⁵ —Rü wüxi i ngechaü tá nixí i pexcèx i pema ya marü ingaxcharaüügüxe erü tá petaiyae. Rü wüxi i ngechaü tá nixí i pexcèx i pema i ñüxma marü cugüexe, erü yixcama rü perü ngechaümaâ tá pexauxe. ²⁶ —Rü wüxi i ngechaü tá nixí i pexcèx i ngêxguma guxüma i duüxüügü pexü icuèxüügügu. Erü ngêma duüxüügü i ñüxma pexü icuèxüügüxüârü oxigü rü yexgumarü nüxü nicuèxüügü ga nuxcümaüügüxü ga orearü uruügünetá.

Name nixí i nüxü tangechaü i ngêma tamaâ rüxüwanüügüxü
(Mt 5.38-48, 7.12)

²⁷ —Natürü pema i ñüxma na choxü pexínüêxü rü pemaâ nüxü chixu rü: —¡Nüxü pengechaü i ngema pemaâ rüxüwanüügüxü! ¡Rü meâ nüxü perüngüxêêx i ngêma pexchi aiexü! ²⁸ —¡Rü meâ nachiga pidexagü rü naxcèx ípeca i Tupanaârü ngüxêê naxcèx i ngêma pemaâ guxchigagüxü! ¡Rü naxcèx peyumüxêgü i ngêma chixri pechigamaâ idexagüxü! ²⁹ —Rü ngêxguma texé cumaâ nuxgu rü cuxü tapechiwegu rü neme nixí i tama

cuxütanü ega woo curü tochiwewa rü ta cuxü tapechiwegu. Rü ngëxguma texé cuxü napuarü gáuxüchiruãxgu, rü name nixĩ i tüxü cungechaũãma ega woo curü daxü rü ta cuxna tanapuxgu. ³⁰ —¡Rü tüxna naxã ya texé ya curü ngëmaxüçèx içaxe! Rü ngëxguma texé curü ngëmaxü cuxna napuxgu, rü tama name i naxçèx cungema. ³¹ —Rü ngëma mexü i pema penaxwèxexü na togü pemaã naxüxü, rü name nixĩ i pema rü ta ngëmaãcü mexü namaã pexü. ³² —Rü ngëxguma pema rü ngëma duüxügü i pexü ngechaũxüxüxĩcatama pengechaũgu, rü çtacüwa namexü i ngëma? Erü ngëma duüxügü i tama yaxögüxü rü ngëmaãcü nanaxügü. ³³ —Rü ngëxguma ngëma duüxügü i cuxü rüngüxëèxüxüxĩcatama curüngüxëègu, rü çtacüwa namexü i ngëma? Erü ngëma duüxügü i tama yaxögüxü rü ngëmaãcü nanaxügü. ³⁴ —Rü ngëxguma ngëma duüxügü i ixããrü dïeruãxünaxĩcatama cunaxãxgu i curü dïeru, rü çtacüwa namexü i ngëma? Erü ngëma duüxügü i tama yaxögüxü rü ngëmaãcü nanaxügü, erü nüxü nacüxgü rü tá nüxü nanataeguxëè i ngëma dïeru. ³⁵ —Natürü pema rü name nixĩ i nüxü pengechaũ i ngema pemaã rüxüwanügüxü, rü nüxü perüngüxëè. Rü ngëxguma çacüçèx pexna nacaxgu, rü name nixĩ i tama pexoegaãèacüma nüxna penaxã ega woo nagu perüxĩnügü na ngürüachi tãütama pexü nataeguxëèãxü. Erü ngëxguma ngëmaãcü penaxüxgu, rü Tupana rü ngëmaãrü yexera tá poraãcü pexü nanataeguxëè, rü naxãcügü tá pixigü ya yima Tupana ya Poraxüchicü ya nüxü rüngüxëècü ta i ngëma taguma moxë nüxna ägüxü rü ngëma chixecümagüxü. ³⁶ —Rü pema rü name nixĩ i pengechaũwaxegü, ngëma Penatü ya Tupana na ngechaũwaxexürü.

*Tama name i chixexügu namaã perüxĩnüe i togü
(Mt 7.1-5)*

³⁷ —¡Rü taxü i togüxü pixuxü! Rü ngëxguma ya Tupana rü täxütáma pexü nixu na pechixexü. ¡Rü taxü i poxcu namaã pexueguxü i togü! Rü ngëxguma ya Tupana rü täxütáma poxcu pemaã naxuegu. ¡Rü nüxü nüxü perüngümae i norü chixexü i togü! Rü ngëxguma ya Tupana rü tá pexü nüxü narüngüma i perü chixexü. ³⁸ —¡Rü togümaã pengau i perü ngemaxügü! Rü ngexguma ya Tupana rü tá pexna nanaxã. Rü ñoma wüxi i choca i meãma napaxürü rü meama ípoçcuxürü tá Tupana pexna nanaxã. Erü ngema nguruxü i namaã cumücüna cuxãxü i curü ngemaxü rü ngematama nguruxümaã tá Tupana cuxna nanaxã —ñanagürü. ³⁹ Rü Ngechuchu rü ñaã cuèxruü norü ngüexügümaã nixu, rü ñanagürü: — çÑuxãcü i wüxi i ngexetüxü rü to i ngexetüxüxü namaxü nacüxëèxü? Erü ngëma taxre i ngexetüxü rü wüxi i äxmaxügu tá nügümaã nayayicu. ⁴⁰ —Rü taxuüma i ngüexü rü norü ngüexëèruüxü narüyexera. Natürü ngexguma meã nanguxgu rü tá naxrüxü nixĩ ya norü ngüexëèruü. ⁴¹ — çRü tüxcüü nachiga quidexa i cumücü naxçèx i ngëma íraxü i chixexü i naxüxü natürü tama cugütama cungugü naxçèx i ngëma chixexü i taxü i cuxüxü? ⁴² —Rü ngëxguma tama nüxna cucüxãchigu i ngëma chixexü i taxü i cumatama cuxüxü, rü çñuxücürüwa i nagu curüxĩnügü na cunamexëèxü i ngëma cumücüarü chixexü i íraxü? Pa Duüxü i Meã Maxnetaxüx, name nixĩ i cuxira nüxü curüxo i ngëma chixexü i taxü i cumatama cuxüxü, rü ngëxguma tá cume na nüxü curüngüxëèxüçèx i cumücü na nüxü naxoxüçèx i ngëma chixexü i íraxü i naxüxü.

Wüxi i nanetü rü norü owa nixi i nüxü icuáxü
(Mt 7.17-20, 12.34-35)

⁴³—Nataxuma i nanetü i mexü i chixearü oóxü. Rü nataxuma i nanetü i chixexü i meärü oóxü. ⁴⁴—Rü wüxichigü i nanetü rü norü owa nixi i nüxü icuáxü. Rü wüxi i torawa rü taxucürüwama wüxi i orix i imúxü tayaxu. Rü wüxi i chuxchuxüwa rü taxucürüwa uba tayaxu. ⁴⁵—Rü wüxi ya mecü ya yatü rü mexü i orexü nixu, erü naãëwa rü aixcuma mexügu narüxñü. Natürü wüxi i yatü i chixecümaxü rü chixexü i orexü nixu, erü chixexügu narüxñü. Rü ngëma naãëwa ngexmaxü i chixexü nixi i nüxü yaxuxü.

Ïpata ya nutaétügu üxñne rü ïpata ya naxnücüétügu üxñnechiga
(Mt 7.24-27)

⁴⁶—¿Tüxcüü i pema rü: “Pa Torü Corix” ñaperügü choxü, natürü tama penaxü i ngëma pemaã nüxü chixuxü? ⁴⁷—Rü ñuxma tá pemaã nüxü chixu na ñuxãcü tíxü ya yixema chowe rüxüxë rü choxü ñnuxë rü naxúxe i ngëma tümamaã nüxü chixuxü. ⁴⁸—Rü tümä rü wüxi ga yatü ga üpatacü rü yamëxmaücü ga norü caxta ñuxmata nutawa nangucürüü tixi. Rü yexguma namëxgu ga taxtü rü yabaixügu ga napata, rü woo ga na naporaüchiüü, rü tama niwëxtaü, yerü meäma inapugüarü caxtaãx ga guma i. ⁴⁹—Natürü yixema nüxü ñnümarexe i chorü ore natürü tama naxúxe i ngëma tümamaã nüxü chixuxü, rü wüxi ga yatü ga naxnücüétügumare üpatacürüü tixi. Rü yexguma namëxgu ga taxtü, rü nibaixü ga napata, rü naporaüchiü. Rü niwëxtaü ga napata, rü yexma nayarüxo ga guma i.

7

Ngechuchu rü Dumacüãx ga churaragüarü äëxgacüarü duüxüxü narüümexëë
(Mt 8.5-13)

¹ Rü yexguma nüxü nachauxgu ga duüxügümaã na yadexaxü ga Ngechuchu, rü Capernáüwa naxü. ² Rü yéma nayexma ga wüxi ga churaragüarü capitáü ga Dumacüãx. Rü guma capitáü rü nüxü nayexma ga wüxi ga norü duüxü ga poraãcü nüxü nangechaüxü. Rü yema norü duüxü rü niãaawe, rü naturaxüchi. ³ Rü yexguma Ngechuchuxü naxñnuchigagu ga guma capitáü, rü Ngechuchuxütawa nanamugü ga ñuxre ga Yudiügüarü äëxgacügüerugü. Rü ñanagürü nüxü: —Ñngema Ngechuchuxütawa pexi na nüxü pecëëxügüxücëx rü núma naxü na chorü duüxücëx yanataanexëëãxücëx! —ñanagürü. ⁴ Rü Ngechuchuxütawa naxi, rü poraãcü nüxü nacëëxügü, rü ñanagürügü: —Name nixi i nüxü curüngüxëë ya torü capitáü. ⁵—Erü núma rü guxü i Yudiügüxü nangechaü. Rü nümatama nanaxütanü na naxügüãxücëx ga torü ngutaquëxepataü —ñanagürügü. ⁶ Rü yexguma ga Ngechuchu rü nawe narüxü. Natürü yexguma marü capitáüpataxü yangaicagu, rü núma ga capitáü rü Ngechuchucëx yéma nanamu ga ñuxre ga namücügü na namaã nüxü yanaxugüxücëx ga norü ore ga ñaxü: —Pa Corix, tama cuxü chachixewechaü na chopatawa cunguxü erü choma rü taxuwama chame na chopatagu na cuxücuxü. ⁷—Rü ngëmacëx nixi i tama chomatama cuxcëx chayaçaxü. Rü chanaxwëxe i curü orewaxicatama nüxü quixu na naxcëx yataanexü tá i chorü duüxü. ⁸—Erü choma rü ta chorü äëxgacüëmëxëwa changëxma, rü choxmëxwa nangëxmagü ta i ñuxre i churaragü. Rü ngëxguma chanamuxgu i wüxi na ngextá naxüxücëx, rü

ngema naxū. Rū ngēxguma chaugūxūtawa naxcèx changemagu i to, rū chauxūtawa nangu. Rū ngēxguma chorū duūxūxū chamuxgu na tacū na naxūxūcèx, rū choxū nanaxū —ñanagürü. ⁹ Rū nūma ga Ngechuchu rū yexguma nūxū naxīnūgu ga yema capitáũârū ore rū nãaixãchiãe. Rū yema duūxūgū ga nawe ruxixūxū nadawenū, rū ñanagürü: —Aixcūma pemaã nūxū chixu rū taxuūma i Yudiugütanūwa nūxū ichayangau i wūxi i duūxū i ngēma yatürüü aixcūma yaxōxū —ñanagürü. ¹⁰ Rū yexguma nawoegugu ga yema capitáũmücügū ga Ngechuchuxūtawa namugūxū, rū nūxū inayangaugū ga marū naxcèx na yataanexū ga yema capitáũârū duūxū.

Ngechuchu ínanadaxēē ga wūxi ga yutecū ngīne

¹¹ Rū yemawena ga Ngechuchu rū wūxi ga ñãne ga Naīgu ãeganewa naxū. Rū nawe narūxī ga norū ngúexūgū, rū muxūma ga togū ga duūxūgū. ¹² Rū yexguma guma ñãneârū ngaicamana nanguxgu, rū tūxū nadau ga wūxi ga yueta ga tēxgūwa tūxū nangegūxe. Rū guxema yuetaarū mamá rū tayute rū guma yucū rū guxicatama nixī ga tūmane ixīcū. Rū muxūma ga duūxūgū ga guma ñãnecūãx rū tūxū ínixūmücügū. ¹³ Rū yexguma Cori ga Ngechuchu guma yucūarū mamaxū dēuxgu, rū nūxū ingechaūtūmūū. Rū ñanagürü ngīxū: —¡Tãxū i cuxaxuxū! —ñanagürü. ¹⁴ Rū yexguma ga Ngechuchu rū yuetacèx nixū, rū nūxū ningōgū ga tūmachiū. Rū yema tūxū ingetaūgūxū rū tūmamaã inayachiãchitanū. Rū ñanagürü ga Ngechuchu tūxū ga guxema yueta: —Pa Ngextūxūcūx, ¡írūda! —ñanagürü. ¹⁵ Rū yexguma ga guxema yuchiréxe rū ítarūto, rū itanaxūgū ga na tidexaxū. Rū Ngechuchu rū tūmaēna tūxū namu. ¹⁶ Rū yexguma yemaxū nadaugūgu ga duūxūgū, rū guxūma namuūē. Rū inanaxūgūe ga Tupanaxū na yacuēxūūgūxū. Rū ñanagürügū: —Wūxi i Tupanaârū orearū uruū i poraxū tatanūwa nangox. Rū ñanagürügū ta: —Tupana nuã naxū na norū duūxūgūxū yanangūxēēxūcèx —ñanagürügū. ¹⁷ Rū guxūma ga Yudéaanewa rū norū ngaicamana, rū duūxūgū nūxū nacuáchigagū ga yema Ngechuchu ūxū.

Cuáũ ga baiūxēēruū rū Ngechuchuxūtawa nanamugū ga taxre ga norū duūxūgū

(Mt 11.2-19)

¹⁸ Rū Cuáũ ga baiūxēēruū rū nūxū nacuáchiga ga guxūma ga yema Ngechuchu ūxū, yerū norū ngúexūgū ga Cuáũ rū namaã nūxū nixugū. Rū yemacèx ga Cuáũ rū taxre ga norū ngúexūgūcèx naca. ¹⁹ Rū Ngechuchuxūtawa nanamugū. Rū Cuáũ rū ñanagürü nūxū: —¡Ngema pexī rū Ngechuchuna peca rū ñapegūgū nūxū: “¿Cuma yīxū i Cristu i cuxū ítananguxēēxū, rū ēxna to tá yixī i Cristu?” ñapegūgū nūxū! ²⁰ Rū yema yatūgū ga Cuáũ Ngechuchuxūtawa mugūxū, rū Ngechuchucèx naxī. Rū ñanagürügū nūxū: —Cuáũ ya baiūxēēruū nūma cuxūtawa toxū namugū na cuxna tayacagūxūcèx rū ¿aixcūma cuma quīxū i Cristu ya nūma nguxchaūcū, rū ēxna to tá yixī i Cristu? —ñanagürügū. ²¹ Rū yexgumatama Ngechuchuxūtawa nangugūgu ga Cuáũârū ngúexūgū, rū Ngechuchu nanameēxēē ga muxūma ga duūxūgū ga nagūxūraūxū ga ðaawemaã ðaaweexū rū yema ingoxoãxū. Rū nayadauchigūxēē ga muxūma ga ingextūxū. ²² Rū yemacèx Ngechuchu nanangāxū rū ñanagürü: —¡Pewoegu rū Cuáũmaã nūxū peyarūxu i ngēma pematama nūxū pedauxū rū nūxū pexīnūēxū! ¡Rū namaã nūxū pixu i ñuxãcū i ngēma ingextūxū rū

marü nidauchigü, rü ngëma ichixeparaxü rü marü inachigü, rü ngëma chaxüneãxgüxü rü marü naxcèx nitaanegü, rü ngëma ngauchixëgüxü rü marü ningoxnamachixëgü, rü ngëma yuexü rü wenaxârü namaxë, rü ngëma ingearü ngëmaxüãxümaã rü marü nüxü tixu i Tupanaârü ore i mexü! ²³ —Rü tataãe ya yíxema texé ya tama choxü rüxoxe —ñanagürü ga Ngechuchu. ²⁴ Rü yexguma nawoeguxgu ga yema duüxügü ga Cuáü yéma mugüxü, rü Ngechuchu inanaxügü ga guma Cuáüchiga na yadexaxü. Rü duüxügümaã nüxü nixu, rü ñanagürü: —¿Tacü nixí ga pema ípeyadaugüxü ga dauxchitawa ga taxúema íxãpataxüwa? ¿Éxna wüxi ga yatü ga turaxü ga ñoma dexne ga buanecü yaxíãxtanücüüxëëcüüü íxíxü nixí ga ípeyadaugüxü? ²⁵ —Rü éxna tama guma ípeyadaugügu, ¿rü tacü nixí ga ípeyadaugüxü? ¿Éxna wüxi ga yatü ga poraãcü nügü ngèxãëcü ípeyadaugü? Pema nüxü pecuèx i ngëma poraãcü nügü ngèxãëgüxü rü ãëxgacügü ya tacügüpatawa nangëxmagü, rü taxucèxma dauxchitawa nangëxmagü. ²⁶ —¿Tacü éxna nixí ga ípeyadaugüxü? ¿Éxna wüxi ga Tupanaârü orearü uruü? Ngëmaãcü aixcüma yema nixí ga ípeyadaugüxü. Rü pemaã nüxü chixu rü Cuáü ya baiüxëëruü rü tama wüxi i ngëxüüüxü i Tupanaârü orearü uruü nixí. ²⁷ —Rü Cuáüchiga nixí ga naxümatüxü ga yema Tupanaârü ore ga ñaxü:

“Cupëxegu chayamu i chorü orearü ngeruü na cuxcèx namexëëãxüçèx i duüxügüarü maxü”,

ñaxü. ²⁸ —Rü pemaã nüxü chixu rü guxü i duüxügütanüwa rü nataxuma i Tupanaârü orearü uruü i Cuáü ya baiüxëëruüârü yexera. Natürü yíxema Tupana ãëxgacü íxíxüwa wixwexüchi üxe, rü Cuáüârü yexera tixí —ñanagürü. ²⁹ Rü guxüma ga duüxügü rü woo yema yatügü ga Dumaârü ãëxgacüçèx díëru ngíxü ideetanüxü, rü nüxü naxínüë ga yema Ngechuchuarü ore rü ñuxüchi Tupanaxü nicuèxüügü yerü nüxü nicuèxächitanü na aixcüma mecü yíxü ga Tupana. Rü yema nixí ga duüxügü ga üpaacü Cuáü íbaiüxëëxü. ³⁰ Natürü yema Parichéugü rü yema ngüexëëruüügü ga Moíchéarü mugüwa nguxëëtaegüxü rü tama nanaxwèxëgü ga Cuáü na ínbaiüxëëxü. Rü yemaãcü nüxü naxoxe ga yema mexü ga Tupana naxcèx üxchaüxü. ³¹ Rü nüma ga Cori ga Ngechuchu rü ñanagürü: —¿Tacügu tá chanangu i ñomaücüü maxëxü i duüxügü? ¿Rü nanaçacüraügü? ³² —Rü ñaã duüxügü rü taxuxümaãma nataãëgü ngëxgumarüü i ngema buxügü i íãxtüwa rütogüxü, rü íxínüçèxwèxëgüxü, rü tagaãcü namücügüxü ñagüxü:

“Marü wowerumaã pexcèx tapaxetagu natürü tama ípixüãchitanüxü. Rü marü ngechaüxü i wiyae gu pexcèx tawiyae gü natürü tama pexauxe”, ñagüxü. Rü ngëma buxügürüü taxuxümaãma nataãëgü i ñomaücüü i duüxügü. ³³ —Yerü ga Cuáü ga baiüxëëruü rü núma naxü, rü tama pãü nangõx rü tama binu nayaxaxü. Rü yexguma ga pema rü: “Nangoxoãx” ñaperügü nüxü. ³⁴ —Rü ñuxüchi núma chaxü i choma ya Tupana Nane na duüxüxü chiüxü, rü õna changõx rü binu chayaxaxü. Rü ngëxguma i pema rü ñaperügügü choxü:

“Choma rü chataanüxüchi rü changãxwèxe, rü pecaduã x-güxü i duüxügümaã chaxãmücü, rü yatügü i Dumaârü ãëxgacüçèx díëru ngíxü ideetanüxümaã chaxãmücü”, ñaperügügü choxü. ³⁵ —Natürü Tupanaârü cuèx rü meãma nangox tùmawa ya yíxema aixcüma nawe rüxíxë —ñanagürü ga Ngechuchu.

Ngechuchu rü Chimáú ga Parichéupatawa nayexma

³⁶ Rü wüxi ga Parichéu rü Ngechuchuna naxu na napatawa nachibüxcèx. Rü yéma naxü ga Ngechuchu rü yema Parichéuarü mechawa nayarüto. ³⁷ Rü wüxi ga ngecü ga chixri maüxcü ga gama ñanecüâx, rü yexguma nüxü nacuáchigagu na Parichéupatawa tá na nachibüxü ga Ngechuchu, rü yéma ixü. Rü yéma inange ga wüxi ga pumara ga yixixü ga wüxi ga butiya ga nutanaxcèxmaã äxchiüxü. ³⁸ Rü naxauxäcüma Ngechuchucutüxütawa iyarütoxöchi. Rü ngîxgüxüxëtümaã iyawaicutüxëë. Rü ngîyaemaã ínapicutü, rü inachuxcutü. Rü ñuxüchi yema pumaramaã inachacutü. ³⁹ Rü yexguma yemaxü nadëuxgu ga yema Parichéu ga Ngechuchuna uxü, rü naãëwa nagu narüxñü rü nügümaãtama ñanagürü: —Ngëxguma chi ñaã Ngechuchu rü aixcüma wüxi i Tupanaârü orearü uruü yixîgu, rü nüxü chi nacuèx na tacü yîixü i ñaã ngexü i nüxü ingöögüxü rü ñuxäcü na namaxüxü rü poraãcü na napecaduäxü —ñanagürü ga naãëwa. ⁴⁰ Rü yexguma ga Ngechuchu rü nüxü nacuèxama rü Parichéuxü ñanagürü: —Pa Chimáux, choxü nangëxma i wüxi i ore i cumaã nüxü chixuxchaüxü —ñanagürü. Rü nüma ga Parichéu rü Ngechuchuxü nangäxü, rü ñanagürü: —jËcü, chomaã nüxü ixu, Pa Ngüexëëruüx! —ñanagürü. ⁴¹ Rü ñanagürü ga Ngechuchu: —Taxre ga yatügü rü wüxi ga corixütawa nanangetanü. Rü wüxi nanangetanü ga 500 tachinü ga dîëru rü to nanangetanü ga 50 tachinü. ⁴² —Natürü yema taxre rü taxuacü nanaxütanü ga norü ngetanü. Rü yemacèx düxwa yema norü cori rü nüxü nüxü narüngüma ga yema nüxü na nangetanügüäxü. Rü ñuxmax, Pa Chimáux, rü jchomaã nüxü ixu! rü jngëxürüxü ga yema taxre ga yatügü rü yexeraãcü norü corixü nangechaü? —ñanagürü. ⁴³ Rü Ngechuchuxü nangäxü ga Chimáú, rü ñanagürü: —Chauxcèx ga yema yexeraãcü nüxü nangetanüxü nixî ga yexeraãcü norü corixü ngechaüxü —ñanagürü. Rü Ngechuchu rü ñanagürü nüxü: —Ngëmäãcü aixcüma nüma nixî —ñanagürü. ⁴⁴ Rü yexguma ga Ngechuchu rü ngîxü nadawenü ga yema ngecü, rü ñanagürü Chimáuxü: —jNgîxü cudauxü i ñaã ngecü? Rü cupatagu chaxücu i chomax, Pa Chimáux, natürü tama dexá choxnata cuxá chorü yauxcutüruü. Natürü ñaã ngecü rü ngîxgüxüxëtümaã choxü iyawaicutüxëë, rü ngîyaemaã choxü ípicutü. ⁴⁵ —Cuma rü tama choxü cuchuxu i noxri choxü curümoxëgu, natürü ngîma i ñaã ngecü rü noxri núma changuxgumama rü choxü iyachuxcutüchigü. ⁴⁶ —Cuma rü tama pumaramaã choxü cuchaeruxüra, natürü ngîma i ñaã ngecü rü chaucutügu inaba i pumara. ⁴⁷ —Rü ngëmacèx woo namu i ngîrü pecadugü natürü Tupana ngîxü nüxü nangechaü i guxüma, erü ngîma rü aixcüma choxü ingechaü. Natürü yîxema tama aixcüma ngechaücèx íyaxaxe, rü tama poraãcü Tupanaxü tangechaü —ñanagürü. ⁴⁸ Rü yexguma ga Ngechuchu rü yema ngecüxü ñanagürü: —Curü pecadugü rü marü cuxü nüxü changechaü —ñanagürü. ⁴⁹ Rü yema togü ga nüxna naxugüxü ga yéma Ngechuchumaã mechawa yexmagüxü, rü inanaxügü ga nügümücügümaãchigü na yadexagüxü. Rü ñanagürügü: —jTacü nixî i ñaã yatü, ecèx ngëmaãcü duüxügüaxü pecaduxü nangechaüxü? —ñanagürügü. ⁵⁰ Natürü Ngechuchu rü ñanagürü ngîxü ga yema ngecü: —Marü cuxü nangëxma i maxü i taguma güxü, erü choxü cuyaxö. jÑuxma rü taãëcüma cuchiüwa naxü! —ñanagürü.

8

Ngexüğü ga Ngechuchuxü rüngüxëëgüxü

¹ Rū yemawena ga Ngechuchu rü Gariréaaneärü ñänegügu nixüägüchigü. Rū duüxügümaã nüxü nixuchigü ga Tupanaärü ore na ñuxäcü äëxgacü yïixü ya Tupana. Rū ínyaxümücügü ga yema 12 ga ngúexügü ga marü nadexü. ² Rū yexgumarüü ta íiyaxümücügü ga ñuxre ga ngecügü ga üpaacü ngoxogü ngíwa ínawoxücü rü ngírü ðaaweewa ngíxü nameëxëëcü. Rū yematanüwa iyexma ga María ga Magadácüäxmaã ngíxü naxugücü ga üpaacü Ngechuchu 7 ga ngoxo ngíwa ínawoxücü. ³ Rū yéma iyexma ta ga Cuána ga Cuchu naxmèx. Rū Cuchu nixí ga wüxi ga äëxgacü ga Erodeaxü puracüxü. Rū yéma nayexmagü ta ga Chuchana rü mucüma ga náigü ga ngecügü ga ngírü dïerumaã Ngechuchuxü rüngüxëëgücü.

*Ore ga toecügu ixuxü
(Mt 13.1-9; Mr 4.1-9)*

⁴ Rū muxüma ga yema ñänegücüäx ga duüxügü, rü Ngechuchuxütawa ínayadaügü. Rū yexguma yéma nangutaquëxegügu ga muxüma ga duüxügü, rü Ngechuchu namaã nüxü nixu ga wüxi ga ore ga cuëxruü, rü ñanagürü nüxü: ⁵ —Wüxi ga yatü ga toecü rü trigumaã nanagüane. Rū yexguma trigumaã nagüaneägu rü ñuxre ga trigu, rü namagu nayi. Rū duüxügü nawa nangagüxü, rü werigü rü nanawecu. ⁶ —Rü náigü ga trigu rü nutatanügu nayi. Rū yexguma naxügügu ga guma trigu, rü nipagü rü nayuemare, yerü nataxuma ga norü waiänexü. ⁷ —Rü náigü ga trigu rü tuxunecügu nayi. Natürü yexguma nayaegu ga tuxugü rü guma triguxü ínawocu rü nanadai. ⁸ —Natürü náigü ga trigu rü mexü ga waixümügu nayi. Rū yemacèx ga yexguma nayaegu rü muxüma ga trigu nawa ínanguxuchi. Rū wüxipüxü ga triguwa ínanguxuchi ga 100 püxü ga trigu —ñanagürü. Rū yemawena rü Ngechuchu tagaäcü ñanagürü nüxü ga duüxügü: —Rü yíxema ächixëgüxe, rü ñnaga taxínüë i ngëma ore! —ñanagürü.

*Tacüchiga nixí ga yema ore ga cuëxruüğügu ixuxü
(Mt 13.10-17; Mr 4.10-12)*

⁹ Rū yexguma ga norü ngúexügü rü nüxna nacagüe na tacüchiga yïixü ga yema ore ga yatü ga toecügu ixuxü. ¹⁰ Rū Ngechuchu ñanagürü nüxü: —Tupana rü pexü nüxü nacuëxëë i ngëma ëxüguxü i taxuüma i togü nüxü cuáxü i ñuxäcü äëxgacü na yïixü i nümax. Natürü togücèx rü cuëxruügu chayaxüäcüma namaã nüxü chixu i ore. Rū ngexguma woo nüxü nadaugügu rü ñoma tama nüxü nadaugüxürüü nixígü, rü woo nüxü naxínüëgu rü ñoma tama nüxü naxínüëxürüü nixígü —ñanagürü.

*Ngechuchu rü meã nanangoxëë ga yema ore ga toecüchigagu yaxuxü
(Mt 13.18-23; Mr 4.13-20)*

¹¹ Rū Ngechuchu rü ñanagürü: —Ngëma ore i toecüchigagu pemaã chixuxü rü ñaächiga nixí. Rū ngëma trigupüxü rü Tupanaärü orchiga nixí. ¹² —Rü guma trigu ga namagu yixünerüü nixí i duüxügü i ngëma orexü ñnüëxü. Natürü Chataná rü ngëma duüxügüxü nüxü inayarüngümaëxëë i ngëma ore, na tama yaxögüäxücèx rü tama nayauxgüäxücèx i maxü i tagama gúxü. ¹³ —Rü guma trigu ga nutatanügu yixüne, rü ngëma nixí i duüxügü i nüxü ñnüëxü i Tupanaärü ore rü taäëcüma yaxögüxü. Natürü tama aixcüma nanayauxgü i ngëma ore, erü paxaächí nayaxögü,

rü yixcūra guxchaxũ nüxũ üpetügu, rü nüxũ narüxoe i ngêma ore. ¹⁴—Rü guma trigu ga tuxuncügu yixũne, rü ngêma nixĩ i duũxũgũ i Tupanaãrũ orexũ ñnüexũ rü yaxõgũxũ natürũ ñoma i naãneãrũ ngêmaxũcèx oegaãegũxũ, rü norũ ngêmaxũguama rüxñnüexũ rü tama nüxũ rüxoechaũxũ i norũ ngũchaũgũ. Rü ngêmagagu düxwa tama Tupanacèx namaxê. ¹⁵—Natürũ guma trigu ga mexũ ga waixũmügu yixũne, rü ngêma nixĩ i duũxũgũ i aixcũma taãeãcũma nayauxgũxũ i Tupanaãrũ ore, rü naga ñnüexũ, rü meã naxcèx maxèxũ. Rü ngêma nixĩ i duũxũgũ i aixcũma Tupanawe rüxĩxũ rü naxũgũxũ i ngêma nüma nanaxwèxexũ.

Cuèxruuxũ ga omügu ixuxũ

(Mr 4.21-25)

¹⁶—Taxúema wüxi i omüwa tanangixichi na tanatüxpechitaxũcèx rü êxna tümaãrũ pechicatüügu tayaxücuchixũcèx. Natürũ ngõxũgu tanaxũ na tüxũ nabaxixũcèx ya yixema ngexma chocuxe. ¹⁷—Rü ngêxgumarũ ta i guxũma i tacü i cúãcũma ixuxũ rü yixcūra rü duũxũgũ tá nüxũ nacüexgũama. Rü guxũma i ngêma ñuxma duũxũgũcèx èxũguxũ rü tá nangoxoma. ¹⁸—¡Meã iperũxñnüe i ñuxmax! Erũ texé ya naga ñnüxè i ngêma ore i mexũ, rü Tupana tá yexeraãcũ tüxũ nüxũ nacüexèè. Natürũ yixema tama naga ñnüxè, rü yexeraãcũ tá tüxna nanayaxu i ngêma íraxũ i tümaãrũ cuèx i noxri tüxũ ngêxmachiréxũ —ñanagürũ.

Ngechucharũ mamá rü naëneëgũchiga

(Mt 12.46-50; Mr 3.31-35)

¹⁹Rü naë ga Ngechuchu rü naëneëgũ, rü yema Ngechuchu íyexmaxũwa tangugũ. Natürũ taxuacü naxütawaxüchi tangugũ, yerũ namuxüchi ga duũxũgũ. ²⁰Rü wüxi ga duũxũ Ngechuchumaã nüxũ nixu, rü ñanagürũ: —Yéa düxétüwa tangèxma ya cue rü cueneëgũ, rü cuxũ tadaugũchaũ —ñanagürũ. ²¹Natürũ nüma ga Ngechuchu rü ñanagürũ nüxũ ga duũxũgũ: —Rü yixema nüxũ ñnüexè i Tupanaãrũ ore rü naga maxexe rü yixema tixĩ ya chaue rü chaueneëgũ ixĩgũxe —ñanagürũ.

Ngechuchu rü buanecüxũ rü yuapexũ ínayachaxãchixèè

(Mt 8.23-27; Mr 4.35-41)

²²Rü wüxi ga ngunexũgu ga Ngechuchu rü norũ ngüexũgũmaã wüxi ga ngegu nichoũ. Rü ñanagürũ nüxũ: —¡Ngĩxã daa naxtaxaarũ tocutüwa taxĩ! —ñanagürũ. Rü inaxĩãchi. ²³Rü yexguma yaxãũtyane rü nipechigũ ga Ngechuchu. Rü ngürũãchi yexma nüxũ naxü ga wüxi ga tacü ga buanecü. Rü guma nguewa rü niyauxcuchichigũ ga dexá. Rü düxwa inayangutaũgũchaũ. ²⁴Rü yemacèx nüma ga norũ ngüexũgũ rü Ngechuchuxũ nacagũ ga na ínadaxũcèx. Rü ñanagürũgũ nüxũ: —Pa Ngüexèëruũx, ngêmama itabaxũgũ —ñanagürũgũ. Rü yexguma ga Ngechuchu rü ínarũda, rü buanecüxũ rü yuapexũ nanga. Rü ínayachaxãchi ga buanecü, rü inayarũxo ga yuape, rü ínachaxanemare. ²⁵Rü yexguma ga Ngechuchu rü ñanagürũ nüxũ ga norũ ngüexũgũ: —¿Tacü pexũ naxüpetü ecèx tama meã peyaxõgũxũ? —ñanagürũ. Natürũ ga nümagũ rü nabaixãchiãëgũ. Rü nügũmücũgũna nicachigũ, rü ñanagürũgũ: —¿Tacü êxna nixĩ i ñaã yatü rü ngêmacèx èixrücü ya buanecü rü yuape rü naga naxñnüexũ? —ñanagürũgũ.

Yatü ga Gadáracũx ga ngoxogũ nawa yexmagüxũ

(Mt 8.28-34; Mr 5.1-20)

26 Rū dūxwa naxtaxaarū tocutūwa nangugū ga Gadáaraarū naānewa. Rū yema naane rū Gariréaaneārū toxmèxtawa nayexma. 27 Rū yexguma marū nguewa ínaxūegu, ga Ngechuchu, rü naxcèx nixū ga wūxi ga yatū ga guma íānecūāx ga mucū ga taunecū ngoxogū nawa yexmagücü. Rū guxūguma nangexchiruecha. Rū tama íwa nayexma, yerū duūxēchíquēxetanūgu nayarūxaxchigünexū. 28 Rū yexguma Ngechuchuxū nadèuxgu, rü napéxegu nayacaxāpūxū. Rū aita naxūācūma ñanagürü: —¿Tūxcūū nuā choxū cuyachixewe, Pa Ngechuchux, Pa Tupana ya Tacūxūchi Nanex? Rū cuxū chacèèxū na tama ngūxū choxū quingexēèxū —ñanagürü. 29 Rū yema ñanagürü yerū Ngechuchu marū nanamu ga yema ngoxogū na ínachoxūxūcèx. Rū muēxpūxcūna rü guma yatūxū naxāūāèxēèxū ga yema ngoxogū. Rū duūxūgū rü cadenamaā nayanēixchacūgūxū rü nayanēixparagūxū na taxuwama naxūxūcèx. Natürü nūma rü nagu nacaugūama ga cadenagū. Rū yema ngoxogū rü dauxchitawa ga taxúema íxāpataxūwa nanagagū. 30 Rū Ngechuchu nūxna naca rü ñanagürü: —¿Tacū nixī i cuéga? —ñanagürü. Rū nūma rü Ngechuchuxū nangāxū, rü ñanagürü: —Muxūchixū nixī i chauéga —ñanagürü. Rū yema ñanagürü yerū namuxūchi ga yema ngoxogū ga guma yatūgu chocuxū. 31 Rū yema ngoxogū rü Ngechuchuna nacagū ga tama ngēma poxcuchica i āxmaxū i taguma iyacuáxūgu na nawocuāxūcèx. 32 Rū guma mèxpūneārū tuāchiwa nayexmagū ga muxūma ga cuchigū ga yema chibūexū. Rū yemacèx ga yema ngoxogū rü Ngechuchuxū nacèèxūgū na yema cuchigūgu nayachocuxūcèx. Rū Ngechuchu rü: —Ngū —ñanagürü. 33 Rū yexguma ga yema ngoxogū rü guma yatūwa ínachoxū rü yema cuchigūgu nayachocu. Rū guxūma ga yema cuchigū rü inaxūāchi, rü naxtaacutūarū mèxpūxūwa nayarūyuxgū, rü yexma nayi. 34 Rū yexguma yema cuchigūarū dauruūgū nūxū daugūgu ga yema ngupetūxū, rü nabaixāchiāègū rü ínibuxmū. Rū íānewa nūxū nayarūxugūe, rü yema íāneārū ngaicamana ipeagūxū ga duūxūgūtanūwa rü ta nūxū nayarūxugūgū. 35 Rū ga duūxūgū rü ínayadaugū ga yema ngupetūxū. Rū yexguma Ngechuchuxūtawa nangugūgu, rü yema nūxū nadaugū ga guma yatū ga ngoxoāxchirécū. Rū Ngechuchucutūxūtawa narūto, rü marū tama naxāūāè. Rū namuē ga duūxūgū. 36 Rū yema duūxūgū ga nūxū daugūxū ga yema ngupetūxū, rü yema íyadaugūxūmaā nūxū nixugūgū ga ñuxācū Ngechuchu na namexēèxū ga guma yatū ga ngoxoāxchirécū. 37 Rū yexguma yemaxū naxīnūegu, rü guxūma ga yema Gadáranecūāx ga duūxūgū, rü Ngechuchuxū nacèèxūgū na ínaxūxūcèx ga yema naānewa, yerū poraācū namuē. Rū yemacèx ga Ngechuchu rü nguegu nixūe, rü inaxūāchi. 38 Rū guma yatū ga ngoxoāxchirécū rü Ngechuchuxū nacèèxū ga nawe na naxūxūcèx. Natürü ga Ngechuchu rü nanamu ga yexma na naxāūxūcèx, rü ñanagürü nūxū: 39 —¿Cuchiūwa naxū, rü duūxūgūmaā nūxū yarūxu ga tacū cuxcèx na naxūxū ga Tupana! —ñanagürü. Rū ínixū ga guma yatū, rü guxūma ga yema íānecūāx ga duūxūgūmaā nūxū nayarūxu ga tacū naxcèx na naxūxū ga Ngechuchu.

*Yáiruxacūchiga rü yema nge ga Ngechuchuchirugu ingōgücūchiga
(Mt 9.18-26; Mr 5.21-43)*

⁴⁰ Rū yexguma Ngechuchu wenaxārū taegugu ga naxtaxaarū tocutūwa, rū duūxūgū rū taāēācūma nanayauxgū, yerū guxūma ínananguxēēgū. ⁴¹ Rū yéma Ngechuchuxūtawa nangu ga wūxi ga yatū ga Yáiru ga naega. Rū nūma ga Yáiru rū wūxi ga ngutaquēxepataūārū āēxgacū nixī. Rū Ngechuchupēxegu nayacaxāpūxū rū nūxū nacēxū ga napatawa na naxūxūcēx. ⁴² Yerū nūxū iyexma ga wūxi ga naxācū ga ngīgūmaā wūxicacū, rū iyadaawe, rū ituraxūchi. Rū ngīma rū maneca 12 ga taunecū ngīxū nayexma. Rū yexguma Yáirupatawa naxūxgu ga Ngechuchu, rū muxūchixū ga duūxūgū nawe narūxī, rū dūxwa ínayaxūxtūgū. ⁴³ Rū yema duūxūgūtanūwa iyexma ga wūxi ga ngecū ga 12 ga taunecū āgūechacū. Rū yemamaā iyadaaweēcha. Rū duturugūxūtagu ngīxū iguxēē ga guxcū ga ngīrū dīēru, natūrū taxūema ga texé ngīxcēx tayataanexēēga. ⁴⁴ Rū yema ngecū ga Ngechuchuweama ne ixū, rū naxpechinūchirugu iyangōgū. Rū yexgumatama ínayachaxāchi ga na naxāgūxū. ⁴⁵ Rū yexguma ga Ngechuchu rū duūxūgūna naca, rū ñanagūrū: —¿Texé tixī ya choxū ingōgūxe? —ñanagūrū. Rū guxūma ga duūxūgū rū: —Taxūema — ñanagūrūgū. Rū yexguma ga Pedru rū namūcūgū rū ñanagūrūgū: — Pa Ngúexēēruūx, cuma nūxū cudau i ñuxre i duūxūgū ngēma cuxū na nayaxūxtūgūxū, rū ngēxguma rū ta:

“¿Texé ya choxū ingōgūxe?” ñacuxū —ñanagūrūgū. ⁴⁶ Natūrū ga Ngechuchu rū ñanagūrū: —Ngēmaācū wūxie choxū tingōgū, erū nūxū chicuēxāchi na chorū poramaā tūxū na charūmexēēxū —ñanagūrū. ⁴⁷ Rū yexguma nangoxomagu ga na nūxū nacūexamaxū ga Ngechuchu ga yema nūxū na yangōgūxū, rū yadurūxācūma naxūtawa ixū ga yema ngecū. Rū napēxegu iyacaxāpūxū. Rū guxū ga duūxūgūpēxewa namaā nūxū iyaxu ga tacūcēx nūxū na yangōgūxū, rū ñuxācū yexgumatama ngīxcēx na yataanexū. ⁴⁸ Rū yexguma ga Ngechuchu rū ñanagūrū ngīxū: —Pa Chauzacūx, cuxcēx nitaane, erū cuyaxō. ¡Rū ñuxma rū taāēācūma íixū! —ñanagūrū. ⁴⁹ Rū yexguma íyadexayane ga Ngechuchu, rū yéma nangu ga wūxi ga duūxū ga ngutaquēxepataūārū āēxgacū ga Yáirupatawa ne ūxū. Rū ñanagūrū Yáiruxū: —Cuxacū rū marū iyu. ¡Rū tāxū i cuyachixewe chigūxū ya Ngúexēēruū! —ñanagūrū. ⁵⁰ Natūrū yexguma yema orexū naxīnūgu ga Ngechuchu, rū ñanagūrū Yáiruxū: —¡Tāxū i cuyanguāēxū! Erū ngēxguma cuyaxōxgu rū cuxacū rū tá wena imaxū —ñanagūrū. ⁵¹ Rū yexguma Yáirupatawa nangugūgu, rū Ngechuchu nayachocuxēē ga Pedru rū Chaūtiāgu rū Cuáū rū ngīnatū rū ngīē ga yema bucū ga yūxcū. Natūrū tama nanaxwēxe na togū yexma chocuxū. ⁵² Rū guxūma ga duūxūgū ga yéma yexmagūxū rū naxauxe rū ngīxcēx nangechaūgū. Natūrū Ngechuchu rū ñanagūrū nūxū: —¡Tāxū i pexauxexū! Erū ngēma bucū rū tama nixī i nayuxū. Rū ipemare —ñanagūrū. ⁵³ Natūrū ga yema duūxūgū rū Ngechuchuxū nacugūeama, yerū ngīxū nadaugū rū aixcūma marū iyu. ⁵⁴ Rū yexguma ga Ngechuchu rū ngīxmēxgu nayayauxāchi, rū tagaācū ñanagūrū: —Pa Bucūx, ¡rūda! —ñanagūrū. ⁵⁵ Rū yexguma ga ngīma rū wena imaxū, rū yexgumatama írūda. Rū Ngechuchu rū duūxūgūmaā nūxū nixu na ngīxū naxūwemūgūxūcēx. ⁵⁶ Rū ngīnatū rū ngīē ga yema bucū, rū poraācū taḃaixāchiāēgū. Natūrū Ngechuchu rū tūxū namu na taxūemaāma nūxū na tixuxūcēx ga yema ngupetūxū.

Ngechuchu norü ngúexüğüxü namu na nüxü yanaxugüexüçèx ga Tupanaarü ore

(Mt 10.5-15; Mr 6.7-13)

¹ Rü Ngechuchu rü nanangutaquëxexëë ga yema 12 ga norü ngúexüğü. Rü pora nüxna naxã rü nüxna naxãga na ínawoxüãxüçèx ga nagúxüraüxü ga ngoxogü, rü na nameëxëëãxüçèx ga duüxüğü ga idaaweexü. ² Rü nayamugü na duüxüğümaã nüxü yaxugüexüçèx ga ore ga mexü na ñuxãcü ãëxgacü yïxü ya Tupana, rü na nameëxëëãxüçèx ga duüxüğü ga idaaweexü. ³ Rü ñanagürü nüxü: —¡Rü taxuxütáma ípinge i perü namawaü, rü bai ya perü caxüchigüxü ya naïxmenëxã, rü bai i perü choca, rü bai i perü pãü, rü bai i perü dïëru. Rü wüxitama i perü daxü ípinge, rü tama i taxre! ⁴ —Rü ngëxguma wüxi ya ñãnewa pengugügu, ¡rü wüxi ya ípatagutama perücho rü ñuxmata ipexiãchi nawa ya yima ñãne! ⁵ —Rü ngextá tama pexü ínayauxgüxüwa, ¡rü ípechoxü nawa ya yima ñãne! Rü ngëxguma ngema ipexiãchigu ¡rü ipepagücutü i perü üxaxücutü na ngëmawa nüxü nacüexgüxüçèx na chixexü naxüğüxü i ngëma duüxüğü! —ñanagürü. ⁶ Rü inaxiãchi, rü guxüma ga ñanexãcügüwa naxi. Rü nüxü nixugüetanü ga Tupanaarü ore ga mexü. Rü guxüwama nanameëxëëtanü ga duüxüğü ga idaaweexü.

Eróde rü tama nüxü nacüexéga na texe yixüxü ga Ngechuchu

(Mt 14.1-12; Mr 6.14-29)

⁷ Rü Gariréaaneärü ãëxgacü ga Erode, rü nüxü nacüáchiga ga guxüma ga yema Ngechuchu üxü. Rü poraãcü nagu narüxñü rü naxoegaãe ga Erode, yerü nümaxü ga duüxüğü rü ñanagürüğü: —Cuáü ya baiüxëëruü nixi ya yima, rü marü wena namaxü —ñanagürüğü. ⁸ Natürü togü rü ñanagürüğü: —Nuxcümaücü ga Tupanaarü orearü uruü ga Ería nixi, rü wena nangox —ñanagürüğü. Rü togü rü ñanagürüğü: —Bexmana náí ga nuxcümaücü ga Tupanaarü orearü uruü nixi, rü wena namaxü —ñanagürüğü. ⁹ Natürü Erode rü ñanagürü: —Chomatama chanamu ga churaragü na Cuáüxü yadaenaxägüxüçèx. ¿Rü tacü ëxna nixi i ngëma yatü i duüxüğü ngëmaãcü poraãcü nüxü ixuchigagüechaxü? —ñanagürü. Rü Erode rü nüxü nangüchxüxüchi na ñuxãcü Ngechuchuxü na nadauxü.

Ngechuchu rü nanachibüexëë ga 5000 ga yatüğü

(Mt 14.13-21; Mr 6.30-44; Cu 6.1-14)

¹⁰ Rü yexguma nawoeguxgu ga yema Ngechuchuarü ngúexüğü ga yamugüxü, rü Ngechuchumaã nüxü nixugüe ga yema naxüğüxü. Rü nüma ga Ngechuchu rü yema norü ngúexüğümaã nixügachi, rü Bechaídaarü ñãnewa namaã naxü. ¹¹ Natürü yexguma duüxüğü nüxü cuëxgügu ga ngextá na nayexmaxü, rü Ngechuchuwe narüxi. Rü Ngechuchu rü meãma yema duüxüğüxü nayaxu, rü namaã nüxü nixu na ñuxãcü ãëxgacü yïxü ya Tupana. Rü nanameëxëë ga yema duüxüğü ga idaaweexü. ¹² Rü yexguma marü nayáuanegu, rü Ngechuchucèx naxi ga yema 12 ga ngúexüğü ga yamugüxü. Rü ñanagürüğü nüxü: —¡yamugü i ñãã duüxüğü na ñanexãcügü rü ípatagü ya ngaicamana ngëxmagünewa na naxüçèx, rü ngëxma na napegüxüçèx rü norü ñonateëx yataxegüxüçèx! Erü nuã íngëxmagüxüwa rü nataxuma i tacü rü ñã —ñanagürüğü. ¹³ Natürü Ngechuchu rü ñanagürü nüxü: —¡Pematama penaxüwemü! —ñanagürü. Rü nanangãxüğü, rü ñanagürüğü: —Wüximëëxpüx i pãü rü taxre i choxnixiãcatama toxü nangëxma. ¿Rü ëxna cunaxwëxe na naxcèx

tayataxegüxü i ðona naxcèx i guxüma i ñaã duüxügü? —ñanagürügü. ¹⁴ Rü 5000 ga yatügü nixi ga yema yéma yexmagüxü. Natürü Ngechuchu rü ñanagürü nüxü ga norü ngüexügü: —¡Ëcü ípenatogüxèëx rü 50 chigü i wüxi tücumüwachigü! —ñanagürü. ¹⁵ Rü yemaäcü nanaxügü ga norü ngüexügü. Rü ñanatotgüëë ga guxüma ga duüxügü. ¹⁶ Rü yexguma ga Ngechuchu rü nanade ga yema wüximèëxpüx ga pãü rü yema taxre ga choxni. Rü daxügu nadawenüäcüma Tupanana moxè naxã, rü ñuxüchi inanabücu ga yema pãü rü choxni. Rü norü ngüexügüna nanaxã na nüxü yanuãxücèx ga yema duüxügü. ¹⁷ Rü guxüma ga yema duüxügü rü meãma nachibüe. Rü yemawena rü 12 ga pexchigü nanapagüamatama namaã ga yema pãü rü choxnichipèxegü ga iyaxügüxü.

Pedru nanangoxèë na Cristu na yüxü ga Ngechuchu

(Mt 16.13-19; Mr 8.27-29)

¹⁸ Rü wüxi ga ngunexü rü Ngechuchu norü ngüexügümaã noxrüwama yayumüxègu, rü nüma rü norü ngüexügüna naca, rü ñanagürü: —¿Ñuxü ñaxü i duüxügü i chauchiga i choma na texé chiüxü? —ñanagürü. ¹⁹ Rü norü ngüexügü nanangãxügü rü ñanagürügü: —Nangèxma i duüxügü rü: “Cuáü ya baiüxèëruü quixi”, ñagüxü, rü togü rü:

“Eria quixi”, ñagüxü, rü togü rü:

“Wüxi ga nuxcümaücü ga Tupanaärü orearü uruü i wena maxücü quixi”, ñagüxü —ñanagürügü. ²⁰ Rü yexguma Ngechuchu nüxna naca rü ñanagürü: —¿Rü pema i ñuxü ñapegüxü choxü na texé chiüxü? —ñanagürü. Rü Pedru nanangãxü rü ñanagürü: —Cuma nixi i Cristu i Tupana Nane —ñanagürü.

Ngechuchu nanaxunagü ga norü yuxchiga

(Mt 16.20-28; Mr 8.30-9.1)

²¹ Rü Ngechuchu rü nayaxucuxègü ga norü ngüexügü na taxúemaãma nüxü yaxugüexücèx ga nüma rü Cristu na yüxü. ²² Rü ñanagürü nüxü ga norü ngüexügü: —Choma i Tupana Nane na duüxüxü chiüxü, rü poraäcü ngüxü tá chinge. Rü choxü tá naxooxgü i Yudiügüarü äëxgacügüerugü, rü paigüarü äëxgacügü, rü ngëma ngüexèëruügü i Moïchéarü mugüwa ngüxèëtaegüxü. Rü tá choxü nimèxgü, natürü tomaëxpüx i ngunexügü rü wena táxarü chamaxü —ñanagürü. ²³ Rü yixcama rü guxüma ga norü ngüexügüxü ñanagürü: —Rü ngèxguma texé chowe rüxüxchaügu, ¡ëcü nüxü tarüxo i tümaärü ngüchaü, rü namaã tapora i ngëma guxchaxügü i tümacèx ínguxü i ñoma curuchawa tipotaxürüü tüxü ixixèëxü, rü ngëmaetüwa chowe tarüxüãma! ²⁴ —Erü yixema tügü maxèchaxèëchaüxè rü tá tayu, natürü yixema chauxcèx yuxe rü aixcüma tá tüxü nangèxma i maxü i taguma güxü. ²⁵ ¿Rü tacüwa i nüxü namexü ya wüxi ya yatü ega nayauxägu i guxüma i ñoma i naãneärü ngëmaxügü, natürü iyanatauxèëägu i norü maxü? ²⁶ —Rü ngèxguma texé chauxcèx änegu rü naxcèx taxänegu i chorü ore, rü choma i Tupana Nane i duüxüxü na chiüxü rü tá ta tümacèx chaxãne i ngèxguma äëxgacü chixiäcüma nüma chaxüxgu. Rü ngèxguma wenaxärü nüma chaxüxgu rü Chaunatü ya Tupanarüü tá chapora, rü daxücüãx i Tupanaärü orearü ngeruügü i üünegüxürüü tá chamexèchi. ²⁷ —Rü aixcüma pemaã nüxü chixu rü ñuxre i duüxügü i nuã ngèxmagüxü rü tá nüxü nadaugü na ñuxäcü äëxgacü na yüxü ya Tupana naxüpa na nayuexü —ñanagürü.

Ngechuchu rü toraxü nangox

(Mt 17.1-8; Mr 9.2-8)

²⁸ Rü 8 ga ngunexüguwena ga na yema ñaxü, rü Ngechuchu rü wüxi ga mëxpúnewa naxü na yema yayumüxëxüçëx. Rü ínayaxümücügü ga Pedru rü Chaütiágu rü Cuáü. ²⁹ Rü yexguma ínayumüxëyane ga Ngechuchu rü nachiwe rü ngürüächi niyauracüü, rü naxchiru rü ta niyauracüü, rü poraäcüxüchima nacómü. ³⁰ Rü yexguma rü yéma nangox ga taxre ga yatügü ga Ngechuchumaã idexagüxü. Rü Moíché nixí ga wüxi, rü Eria nixí ga to. ³¹ Rü yema taxre íyexmagüxüwa rü poraäcüxüchi nangóone. Rü ínidexagü nachiga ga ñuxäcü Yerucharéügu tá na nayuxü ga Ngechuchu. ³² Rü woo ga Pedru rü namücügü rü poraäcü na nayaxtaexü rü tama napee. Rü nüxü nadaugü ga ñuxäcü poraäcü na nangóonexü ga naxütawa ga Ngechuchu rü yema taxre ga yatügü ga namaã yexmagüxüxütawa. ³³ Rü yexguma yema taxre ga yatügü Ngechuchuna íxígachitanügu, rü Pedru rü ñanagürü Ngechuchuxü: —Pa Ngúexëëruüx, namexëchi nixí na nuã ingëxmagüxü. ¡Rü ngíxã tanaxü ya tomaëxpüx ya düxenü, rü wüxi ya cuxcëx, rü náí ya Moíchécëx, rü náí ya Eriácëx! —ñanagürü. Natürü ga Pedru rü tama nüxü nacüex ga na ñuxü ñaxü yerü poraäcü nabaixächiãë. ³⁴ Rü yexguma íyadexayane ga Pedru, rü wüxi ga caixanexü natanügu nayangëixema. Rü poraäcü namuë ga yema ngúexügu ga yexguma yema caixanexü natanügu yangëixemagu. ³⁵ Rü yema caixanexüwa inanaxü ga wüxi ga naga ga ñaxü: —Daa nixí ya Chaune ya nüxü changechaüxüchicü. ¡Rü naga pexínüë! —ñaxü. ³⁶ Rü yexguma yema ñaxguwena ga yema naga rü Ngechuchuarü ngúexügu rü taxúexüma ga toguexü nadaugü, rü Ngechuchuxüxícatama nadaugü. Rü yema ngúexügu rü taxúemaãma nüxü nixugüe ga yema nüxü nadaugüxü.

Ngechuchu rü nanamexëë ga wüxi ga bucü ga ngoxo nawa yexmacü

(Mt 17.14-21; Mr 9.14-29)

³⁷ Rü yexguma moxüäcü ga guma mëxpúnewa yanachouügu, rü muxüma ga duüxügü yexma Ngechuchuxü nayangaugü. ³⁸⁻³⁹ Rü yema duüxügütanüwa rü wüxi ga yatü tagaäcü Ngechuchuxü ñanagürü: —Pa Ngúexëëruüx, ¡choxü rüngüxëë, rü tüxü nadau ya chaune! Erü tügümaã choxü tawüxicëx, rü wüxi i ngoxo tümawa nangëxma. Rü ngëxguma tüxü naxüxgu, rü aita tüxü naxüxëë, rü tüxü naxüãäxëë, rü tüxü narüchiëxëë. Rü chixexü tümamaã naxü, rü tama tüxü ningëxchaü. ⁴⁰ Rü marü nüxü chacëexü i curü ngúexügu na tümawa ínatëxüchigüãxüçëx i ngëma ngoxo, natürü tama nüxü inaxínü —ñanagürü. ⁴¹ Rü yexguma Ngechuchu nanangäxü, rü ñanagürü: —Pa Duüxügü i Tama Yaxögüxüx, ¿Ñuxgurátáta i pemaã chanuxmaxü rü yaxna pemaã cha xí-nüxü? ¡Nuã naga ya cune! —ñanagürü. ⁴² Natürü yexguma Ngechuchuxütawa nanguxgu ga guma bucü, rü yema ngoxo rü guma bucüxü ñaxtüanegu nayangüxëë, rü nanaxüãäxëë. Natürü Ngechuchu nananga ga yema ngoxo, rü nanamexëë ga guma bucü. Rü ñuxüchi nanatüxütawa nanamu. ⁴³ Rü guxüma ga duüxügü rü nabaixächiãëgü ga yexguma nüxü nadaugügu ga ñuxäcü na naporaxü ya Tupana.

Ngechuchu rü wenaxärü nanaxunagü ga norü yuxchiga

(Mt 17.22-23; Mr 9.30-32)

Rü yexguma duüxügü namaã ñaixächieyane ga yema Ngechuchu üxü, rü ñanagürü ga Ngechuchu nüxü ga norü ngúexügu: ⁴⁴—¡Meã iperüxínüë i

ñaã ore i pemaã nüxü chixuxü! ;Rü täütáma nüxü ipeyarüngümaë! Choma i Tupana Nane na duüxüxü chiüxü, rü chauechita tá choxü ínaxuaxüügü i duüxügü na äëxgacügü choxü iyauxgüxüçèx —ñanagürü. ⁴⁵ Natürü ga norü ngüexüügü rü tama nüxü nacuëxgüéga ga yema namaã nüxü yaxuxü. Yerü Tupana rü tama naxcèx nanangoxëë ga yema ore na nüxü nacuëxgüxüçèx. Rü yema ngüexüügü rü namuüë ga Ngechuchuna na nacagüxü na meã namaã nangoxëëãxüçèx ga yema namaã nüxü yaxuxü.

¿Texé tá tixí ya guxãärü yexera ixíxë?

(Mt 18.1-5; Mr 9.33-37)

⁴⁶ Rü yexguma ga norü ngüexüügü rü inanaxügüë ga nügümaã na yaporagatanücüüxü nachiga ga texé tá tiüxü ya natanüwa guxãärü yexera ixíxë. ⁴⁷ Natürü Ngechuchu rü nüxü nacuëxama ga yema norü ngüexüügü nagu rüxínüëxü. Rü yemacèx wüxi ga buxü nügüxütawa naga, rü nügüxütagu nayachixëë. ⁴⁸ Rü ñanagürü nüxü ga norü ngüexüügü: —Texé ya ñaã buxüxü meã yaxúxe chauégagu, rü choxü nixí i tayaxuxü. Rü yíxema meã choxü yaxúxe, rü Chaunatü ya núma choxü mucüxü rü ta meã tayaxu. Rü yíxema guxãärü yexera tügü írúxíraxe, rü yíxema tixí ya guxãärü yexera ixíxë —ñanagürü.

Texé ya tama taxchi aixe rü tórü ngüxëëruü tixí

(Mr 9.38-40)

⁴⁹ Rü yexguma ga Cuáü rü ñanagürü nüxü: —Pa Ngüexëëruüx, nüxü tadau ga wüxi ga yatü ga cuégagu ngoxogü íwoxüxü. Rü toma nüxna tanachüxu ga yema yerü tama tatanüxü nixí ga nümax —ñanagürü. ⁵⁰ Natürü Ngechuchu rü ñanagürü nüxü: —Tama name i nüxna na penachüxuxü. Erü texé ya tama taxchi aixe, rü tórü ngüxëëruü tixí —ñanagürü.

Ngechuchu nayangagü ga Chaütiágu rü Cuáü

⁵¹ Rü yexguma marü yangaicagu ga Ngechuchu ga daxügüxü ga naãnewa na naxüxü, rü tama namuüácüma ínaxüãchi ga Yerucharéüwa na naxüxü. ⁵² Rü nügüpëxegu nayamugü ga ñuxre ga norü orearü ngeruüügü. Rü nümagü rü nawa naxí ga wüxi ga íänexácü ga Chamáriaanewa yexmane, na yexma naxcèx yadaugüxüçèx ga wüxi ga í na Ngechuchu nagu pexünexü. ⁵³ Natürü yema Chamáriaanecüãx rü tama nanayauxgüchaü, yerü nüxü nacuëxgü ga Yerucharéüwa tá na naxüxü. ⁵⁴ Rü yexguma yemaxü nadaugügu ga norü ngüexüügü ga Chaütiágu rü Cuáü, rü ñanagürügü Ngechuchuxü: —Pa Corix, ¿cunaxwëxexü na Tupanana naxcèx tacaxü na daxüwa ne namuãxüçèx ya üxü na nagüxëëãxüçèx i guxüma i ñaã duüxüügü, yema nuxcümaüçü ga Tupanaärü orearü uruü ga Ería üxürüü? —ñanagürügü. ⁵⁵ Rü yexguma ga Ngechuchu rü nüxü nadawenü, rü nayangagü, rü ñanagürü nüxü: —Pema rü tama nagu perüxínüë na texéarü duüxüügü pixíxüxü. ⁵⁶ —Erü choma i Tupana Nane na duüxüxü chiüxü, rü tama duüxügüarü tauxexëëwa núma chaxü, natürü núma chaxü na duüxügüxü chamaxëëxüçèx —ñanagürü. Rü yexguma rü náí ga íänexácüwa naxí.

Duüxüügü ga Ngechuchuwe rüxíxchaüxüchiga

(Mt 8.19-22)

⁵⁷ Rü yexguma namagu naxíxgu rü wüxi ga yatü Ngechuchuxü ñanagürü: —Pa Corix, cuwe charüxüxchaü i ngextá cuma ícuxüxüwa —ñanagürü. ⁵⁸ Rü Ngechuchu nanangãxü rü ñanagürü: —Ngowagü

rü nüxü nangëxma i naxmaxügü, rü werigü rü nüxü nangëxma i naxchiãügü, natürü choma i Tupana Nane na duüxüü chiixü, rü nataxuma i chauchica i ngextá nagu chicuxeruxü —ñanagürü. ⁵⁹ Rü Ngechuchu ñanagürü nüxü ga wüxi ga to ga yatü: —¡Chowe rüxü! —ñanagürü. Natürü nüma ga yema yatü rü ñanagürü nüxü: —Pa Corix, noxri chanawëxe i chaunatüxü ichayatëxira —ñanagürü. ⁶⁰ Rü Ngechuchu nanangãxü rü ñanagürü: —Nüe ngëma cutanüxü i tama yaxõgüxü iyatëxgü i ngëma naxrüü yuexü, natürü cuma rü curü puracü nixi na paxa duüxügümaã nüxü cuyarüxuxü i Tupanaãrü ore na ñuxãcü guxããrü ãëxgacü na yïxü i nümax —ñanagürü. ⁶¹ Rü wüxi ga to ga duüxü rü ñanagürü Ngechuchuxü: —Pa Corix, ngëmaãcü cuwe charüxüxchaü, natürü noxri chanaxwëxe i nüxü chayarümoxë i ngëma chopatacüãxgü —ñanagürü. ⁶² Natürü Ngechuchu rü ñanagürü nüxü: —Texé ya yïxema inaxügüxe na Tupanaãrü puracüwa tapuracüxü natürü tümaãrü ngëmaxüguama rüxïnüxë, rü tama tame na Tupanaãxü tapuracüxü —ñanagürü.

10

Ngechuchu nayamugü ga 72 ga norü ngüexügü

¹ Rü yemawena ga Cori ga Ngechuchu rü nayadexechi ga 72 ga to ga norü ngüexügü. Rü taxrechigü inayamugü na yoxni guxü ga yema ñanegü rü nachicagü ga Ngechuchu nawa üxchaüxüwa na naxixücëx. ² Rü ñanagürü nüxü: —Aixcümãxüchi nangëxma i muxüchixü i duüxügü i yaxõgüchaüxü natürü ngema Tupanaãrü orearü uwa puracüexü rü noxretama nixi. Rü ngëmacëx name i perü yumüxëwa nüxna peca ya yima puracüarü yora na ngema norü puracüwa namugüãxücëx i to i puracütanüxü. ³ —¡Rü ipexiãchi rü ngema pexi! Rü dücax, ñoma carnerugü i aigütanüwa imugüxürüü nixi i pexü chimugüxü. ⁴ —¡Rü täütáma choca ípinge, rü bai i perü díeru, rü bai i perü chapatu! Rü tama chanaxwëxe i namagu penüxcü i ngëxguma namawa texéxü perümoxëgügu. ⁵ —Rü ngëxguma wüxi ya ñwa pengugügu, rü ñaãcü tá nüxü perümoxëgü i ngëma duüxügü:

“¡Petaãxë erü Tupana rü napetanügul!”, ñaperügügu tá. ⁶ —Rü ngëxguma ngema nangëxmagu i duüxügü i Tupanaxü cuëxgüchaüxü rü Tupana rü tá nüxna nanaxã i taãxë. Natürü ngëxguma ngema nataxuxgu i duüxügü i Tupanaxü cuëxgüchaüxü, rü ngema Tupanaarü taãxë rü pexrütáma nixi. ⁷ —¡Rü wüxi ya ígutama perücho, rü ngema pechibüe rü peyaxü i ngëma nüxü ngëxmaxü i ngëma ícüãxgü! Erü wüxi i puracütanüxü rü name nixi na nayauxãxü i norü natanü naxcëx i norü puracü. Rü yima ñanewa pengëxmagüyane rü tama chanaxwëxe i náí ya ígu peyapegü. ⁸ —Rü ngëxguma wüxi ya ñane ya nawa meã pexü nayaxunewa pengugügu, ¡rü penangõ i ngëma õna i pexna naxãgüxü! ⁹ —¡Rü penameëxëx i ngëma idaaweexü i yima ñanewa ngëxmagüxü! ¡Rü namaã nüxü pixu rü ñapegügu nüxü:

“Tupanaãrü pora rü marü pexna nangaicama rü napexütagu”, ñapegügu nüxü! ¹⁰ —Natürü ega nawa pengugügu ya wüxi ya ñane i ngextá duüxügü tama meã pexü íyaxgüxüwa, ¡rü ngëma ítamügu ípechoxü rü ñapegügu nüxü i ngëma ñanecüãx!:

¹¹ “Rü woo ñaã perü ñaneãrü üxaxü i tocutüwa yaxüxü, rü itanapagü, na ngëmawa nüxü pecuãxücëx na Tupana rü tama pemaã nataãxü. ¡Natürü tama nüxü ipeyarüngümaë na marü pexna nangaicamaxüchichiréxü ya

Tupana na perü ãëxgacü yïixü”, ñaperügügü tá nüxü i ngëma ãnecüãx!
 12 —Rü pemaã nüxü chixu rü ngëma ngunexü i nagu nagúxü i naãne,
 rü Chodomacüãx i duüxügüarü yexera Tupana tá nanapoxcue i ngëma
 duüxügü i tama meã pexü yauxgüxü.

Ïãnegü ga tama Tupanaga ïnüene

(Mt 11.20-24)

13 —Rü wüxi i ngechaü nixi i pexcëx, Pa Corachïcüãx rü Bechaïdacüãx
 i Duüxügüx, yerü yexguma chi Tiruarü ãñewa rü Chidãüãrü ãñewa
 chanaxüxgu ga yema mexügü ga cuëxruügü ga Tupanaãrü poramaã
 petanüwa chaxüxü, rü woo ga na poraãcü yachixexü ga yema Tirucüãx
 rü Chidãücüãx ga duüxügü rü nuxcümama chitama nüxü narüxoe ga
 nacüma ga chixexü, rü poraãcüxüchi chima nügümaã nangechaügü rü
 naxauxe, yerü chi nügü nicuëxächitanü ga na yapecaduãxgüxü. 14 —
 Natürü pemaã nüxü chixu rü ngëma ngunexü i Tupana nagu napoxcuexü
 i pecaduãxgüxü, rü ngëma ngunexügu rü Tirucüãx rü Chidãücüãxãrü
 yexera tá pexü napoxcue i pemax. 15 —Rü pemax, Pa Capernãcüãxgü
 i Duüxügüx ¿ëxna pema nagu perüxïnüëgu rü daxügüxü i naãnewa tá
 pexixü? Pemaã nüxü chixu rü naãnetüüwa i ngextá Tupana Chatanáxü
 ipoxcuxüwa tá nixi i pewogüxü. 16 Rü ñüxüchi norü ngüexügüxü ñanagürü:
 —Rü yixema pega ïnüëxë, rü chauga rü ta taxïnüë. Natürü yixema tama
 pega ïnüëxë, rü chauga rü ta tama taxïnüë. Rü yixema tama chauga ïnüëxë,
 rü tama naga taxïnüë ya Chaunatü ya núma choxü mucü —ñanagürü ga
 Ngechuchu.

Nawoegu ga yema 72 ga Ngechucharü ngüexügü

17 Rü taãëcümama nawoegu ga yema 72 ga norü ngüexügü ga yamugüxü.
 Rü ñanagürügü nüxü: —Pa Corix, ngëxguma cuégagu tidexagügu, rü
 èixruxü i ngoxogü rü toga naxïnüë —ñanagürügü. 18 Rü Ngechuchu
 rü ñanagürü nüxü: —Ngëmaãcü aixcümama nixi. Yerü nüxü chadau ga
 Chataná ga daxügüxü ga naãnewa na nataëxü wüxi ga ãëmacürüü. 19 —
 Rü choma nixi ga pexna chanaxãxü ga pora na tama chixexü pemaã
 naxügüxütcëx ega woo äxtapegüwa rü éxna tuxchinawegüwa pengagügu.
 Rü yexgumarüü ta pexna chanaxã ga pora na nüxü perü- yexeraxütcëx i
 guxüma i Chatanáãrü pora na ngëmaãcü taxucürüwama tacü rü chixexü
 pemaã naxüxütcëx. 20 —iNatürü tãxü i petaãëgüxü naxcëx i ngëma na
 pega naxïnüëxü i ngoxogü! Rü narümemaë nixi i petaãëgü naxcëx na
 marü naxümatüxü i peëga i Tupanaãrü poperawa i daxügüxü i naãnewa
 —ñanagürü.

Ngechuchu rü nataãë

(Mt 11.25-27, 13.16-17)

21 Rü yexgumatama ga Tupanaãë ga Üünexü rü poraãcü Ngechuchuxü
 nataãëxëë. Rü ñanagürü ga Ngechuchu: —Pa Chaunatü, Pa Daxügüxü
 i Naãne rü Ñoma i Naãneãrü Yorax, cuyü chicuëxüü, yerü ñaã chorü
 ngüexügüxü nüxü cucuëxëë i ñaã ore ga naxchaxwa iquicüxü ga
 duüxügü i ñoma i naãnewa nüxü cuëxüchigüxü. Rü yemaãcü cunaxü,
 Pa Chaunatüx yerü yemaãcü nixi ga cunaxwëxexü —ñanagürü. 22 Rü
 ñanagürü ga Ngechuchu: —Chaunatü choxna nanaxã i guxüma i tacü
 i ngëxmaxü. Rü taxüema choxü tacuëx na Tupana Nane chiixü. Rü
 Chaunatüxicatama nixi ya choxü cuácü na Nane chiixü. Rü ngëxgumarüü

ta taxúema nüxü tacuèx na texe yïxü ya Chaunatü. Rü choma ya Nane rü ngëma duüxügü i Chaunatüxü nüxü chadauxëêchaüxüxícatama nixí i nüxü cuèxgüxü na texe yïxü —ñanagürü. ²³ Rü yexguma norü ngúexügüxü nadawenü, rü namaãxíca ñanagürü: —Tataãgü ya yixema tümáxëtümaãxüchi nüxü daugüxe i ñaã ñuxma pema nüxü pedaugüxü. ²⁴ —Erü pemaã nüxü chixu, rü muxüma ga nuxcümaügüxü ga Tupanaãrü orearü uruügü rü äëxgacügü ga tacügü, rü nüxü nangúchaü ga nüxü na nadaugüchaüxü i ñaã ñuxma pema chauxütawa nüxü pedaugüxü. Natürü tama nüxü nadaugü. Rü nüxü nangúchaü ga nüxü na naxínüechaüxü i ñaã ñuxma pema chauxütawa nüxü pexínüexü. Natürü tama nüxü naxínüë —ñanagürü.

Ore ga mecü ga Chamáriacüãxgu ixuxü

²⁵ Rü yexguma inachi ga wüxi ga ngúexëëruü ga Moïchéarü mugüwa nguxëëtaexü, rü Ngechuchuxütawa naxü na namaã yanadexaxüçex. Rü Ngechuchuxü naxüchaü, rü yemacèx nüxna naca rü ñanagürü: —Pa Ngúexëëruü ya Ngechuchux, ¿Tacü nixí i mexü na chanaxüxü na choxü nangëxmaxüçèx i maxü i taguma gúxü? —ñanagürü. ²⁶ Rü Ngechuchu nanangãxü, rü ñanagürü: —¿Ñuxü ñaxü i ngëma ore i Moïchéarü mugüwa ümatüxü? ¿Rü tacüxü i cumaã yaxuxü? —ñanagürü. ²⁷ Rü yema ngúexëëruü ga Moïchéarü mugüwa nguxëëtaexü, rü Ngechuchuxü nangãxü, rü ñanagürü: —¿Nüxü nangechaü ya Cori ya curü Tupana i guxüma i curü maxümaã, rü guxü i cuãëmaã, rü guxü i curü poramaã, rü guxü i nagu curüxínüxümaã! ¿Rü nüxü nangechaü i cumücü ngëma na cugütama cungechaüxürüü! —ñanagürü. ²⁸ Rü yexguma ga Ngechuchu rü ñanagürü nüxü: —Ngëma ore i choxü namaã cungãxüxü rü marü name. Rü ngëxguma ngëma ore quinguxëëxgu, rü tá cunayaxu i maxü i taguma gúxü —ñanagürü. ²⁹ Natürü ga yema ngúexëëruü ga Moïchéarü mugüwa nguxëëtaexü, rü nügüétüwa nachogüchaü. Rü yemacèx Ngechuchuna naca, rü ñanagürü: —¿Rü texé tixí ya chomücü? —ñanagürü. ³⁰ Rü yexguma ga Ngechuchu rü nanangãxü, rü ñanagürü nüxü: —Wüxi ga yatü Yerucharéüwa ne naxü, rü Yericú ga iãnewa naxü. Rü namagu nüxü nangaugü ga ngítèèxgüxü. Rü guxüma ga norü yemaxüçèx nangïxgü, rü èixrüxü ga naxchiru rü ta naxcèx nangïxgü. Rü nanaçuaixgü, rü nayayuächixëëgü, rü yemaãcü yéma nanatèxgü. ³¹ —Rü yematama namawa naxüpetü ga wüxi ga Yudíugüarü pai. Natürü yexguma yema yatüxü nadèuxgu rü nüxü yéma naxüpetümare. ³² —Rü yéma naxüpetü ta ga wüxi ga Lebítanüxü ga tupauca ga taxünewa puracüxü. Rü yexguma yema yatüxü nadèuxgu, rü nüma rü ta nüxü naxüpetümare. ³³ —Natürü yixcüra rü wüxi ga Chamáriaanecüãx ga yatü rü yematama namawa naxüpetü. Rü yexguma guma yatüxü nadèuxgu rü nüxü nangechaütümüü. ³⁴ —Rü guma yatüçèx nixü. Rü chixü rü binumaã nanaxüxü ga norü oxrigü, rü meãma nayanèixgü ga yema norü oxrigü. Rü ñuxüchi norü burugu nanamunagü, rü wüxi ga pegüchicawa nanaga. Rü yéma nüxna nadau. ³⁵ —Rü moxüãcü ga yexguma inaxüãchigu ga yema Chamáriaanecüãx, rü ngïxü nayaxu ga taxretachinü ga norü dïeru, rü yema pegüchicaarü yorana ngïxü naxã. Rü ñanagürü nüxü:

“¿Nüxna nadau i ñaã yatü! Rü ngëxguma yexeragu naxãtanügu na nuã nangëxmaxü, rü choma tá cuxü chanaxütanü i ngëxguma chataeguxgu”, ñanagürü. ³⁶ Rü ñanagürü ga Ngechuchu nüxü ga yema ngúexëëruü ga

Moïchéarü mugüwa nguxêetaexü: —Ñuxma chanaxwêxe i chomaã nüxü quixu i ngêxürüxü ga yema tomaexpüxtanüwa ga aixcüma namücü ixixü ga yema yatü ga ngîtêexgüxü imêxgüxü —ñanagürü ga Ngechuchu. ³⁷ Rü yexguma ga yema ngúexêeruü ga Moïchéarü mugüwa nguxêetaexü rü ñanagürü: —Yema Chamáriaanecüâx nixi ga yema yatümücü ixixü, yerü nüxü nangechaütümü —ñanagürü. Rü yexguma ga Ngechuchu rü ñanagürü nüxü: —Ñuxma rü íxü rü yema Chamáriaanecüâx üxürü naxü! —ñanagürü nüxü.

Marta rü Maríapatawa nangu ga Ngechuchu

³⁸ Rü yexguma Ngechuchu namagu ixüxgu norü ngúexügümaã rü wüxi ga ñanexácüwa nangu. Rü yéma guma ñanexácüwa rü wüxi ga nge ga Martagu äegacü ngigüpatawa inanguxê. ³⁹ Rü Martaaxü iyexma ga wüxi ga ngîeyêx ga Maríagu äegacü. Rü ngîma rü Ngechuchucutüxütawa irüto na inaxñüxcêx ga Ngechucharü ore. ⁴⁰ Natürü ga Marta rü itaarü puracüâx rü yemaãcü ngîrü puracüguama irüxñü. Rü yemacêx Ngechuchucêx iyaxü, rü ngîgürügü nüxü: —Pa Corix, ¿tama êxna nagu curüxñü i ngêma na chataarü puracüâxü rü ngêma chaueyêx rü choxnaxíca na nataáaxü i guxüma i ngêma puracü? ¿Rü namaã nüxü ixu na choxü nangüxêexücêx! —ngîgürügü. ⁴¹ Natürü Ngechuchu rü ngîxü nangäxü, rü ñanagürü ngîxü: —Pa Martax, cuma rü poraãcü curü puracücêx cuxoegaã, rü muxüma i ngêmaxügu curüxñü. ⁴² —Natürü wüxixicatama nixi i guxüârü yexera i mexü na nagu rüxñüxü. Rü María iyixi i ngêmagu rüxñücü. Rü taxúetáma ngîxna tayanuxü i ngêma —ñanagürü ga Ngechuchu.

11

Ngechuchu nanangúexêê ga yumüxêchiga

(Mt 6.9-15, 7.7-11)

¹ Rü wüxicana wüxi ga nachicawa nayumüxê ga Ngechuchu. Rü yexguma nüxü nachauxgu, rü wüxi ga norü ngúexü rü ñanagürü nüxü: —Pa Corix ¡toxü nangúexêê na ñuxácü tayumüxêgüxü, yema Cuáü ga baiüxêeruü norü ngúexügüxü nangúexêexürüü! —ñanagürü. ² Rü Ngechuchu ñanagürü nüxü: —Rü ngêxguma peyumüxêgügu rü ñaperügügü tá:

“Pa Tonatü ya Daxügücüx, rü aixcüma Üüncü quixi i cumax. ¿Rü núma naxü na torü äêxgacü quiüxcêx! Rü tanaxwêxe i curü ngúchaü na naxügüxü i duüxügü i ñoma i nañewa, ngêma daxügüxü i nañewa na curü ngúchaü inaxügüxürüü. ³ ¿Rü toxna naxã i torü ñna i wüxichigü i ngunexücêx ixixü! ⁴ ¿Rü toxü nüxü nangechaü i torü pecadugü, erü toma rü ta tüxü nüxü tangechaü ya guxãma ya yixema chixri tomaã chopetüxe! ¿Rü tâxü i ¿acü rü chixexüpêxewa toxü cuwogüxü na tama nagu tayixücêx!”

ñanagürü. ⁵ Rü ñanagürü ta ga Ngechuchu: —Ngêxguma chi wüxie i pema rü tüxü nangêmaxgu i wüxi i tümamücü, rü chi ngâxücüü napatawa taxüxgu rü ñatagügu nüxü:

“Pa Chomücüx, ¡tomaexpüx i pãu choxna naxã! ⁶ —Erü wüxi i chomücü rü yaxüwa ne naxü, rü ngexwacêx chopatawa nangu. Rü choma rü changearü ñnaãx, rü taxuümaãma chanachibüxêêega”, ñatagügu. ⁷ —Rü ngêma tümamücü i napatawa ngêxmaxü, rü chi tüxü nangäxgu rü ñaxgu:

“¡Tãxũ i choxũ cuchixewexũ! Chorũ ãx rü marũ narũwãxta, rü choma rü chauxacügü rü ngürücarewa tangëxmagü. Rũ ngëmacëx taxucürüwa ícharüda na ñacü cuxna na chaxãxüçëx”, ñaxgu chi tũxũ. ⁸—Rũ pemaã nüxũ chixu, rü ngëma na tümamücü yĩxüçëx rü täütãma ínarüda na ñacü tüxna naxãxüçëx. Natürü tá ínarüda na tama tanachixeweechaxüçëx, rü tá tüxna nanaxã i guxũma i ñacü i tanaxwëxexũ. ⁹—Rũ ngëmacëx pemaã nüxũ chixu rü, ¡Naxcëx ípeça rü Tupana rü tá pexna nanaxã! ¡Rũ Tupanacëx pedëux rü tá nüxũ ipeyangau! ¡Rũ ãxwa: Tu tu tu ñapegü, rü tá pexcëx niwãxna i ãx! ¹⁰—Erü guxãma ya yíxema naxcëx íçaxe rü tanayaxu, rü guxãma ya naxcëx dauxe rü nüxũ itayangau. Rũ guxãma ya ãxwa: Tu tu tu ñagüxe, rü tümacëx tá niwãxna i ãx. ¹¹—¿Rũ ñuxãcü i wüxi i pema na papágü piixũ rü penena penaxãxũ ya wüxi ya nuta ega pãüçëx pexna nacaxgu, rü éxna wüxi i áxtape ega choxnicëx pexna nacaxgu? ¹²—¿Rũ texé i petanüwa rü penena penaxã i tuxchinawe ega wüxi ya otacharaüçëx pexna nacaxgu? ¹³—Rũ ngëma pema na pichixecümachirëxũ natürü nüxũ pecuëx na ñuxãcü mexũ i ämare pexacügüna na pexãxũ, rü pemaã nüxũ chixu rü Penatü rü Daxügücü rü perü yexera tá nixĩ na pexna mexũ naxãxũ. Rũ guxãma ya yíxema Tupanaxütawa Naãe i Üünexüçëx íçaxe, rü tá tüxna nanaxã —ñanagürü ga Ngechuchu.

*Ngechuchuxũ nixugüe na ngoxoarü poramaã napuracüxũ nawogüe
(Mt 12.22-30; Mr 3.20-27)*

¹⁴ Rũ Ngechuchu ínanatëxüchi ga wüxi ga ngoxo ga wüxi ga yatüxũ ngegaxëëxũ. Rũ yexguma ínaxüüxgu ga yema ngoxo rü guma yatü rü nidexa. Rũ guxũma ga duüxügü rü nabaixãchiãgü ga yexguma yemaxũ nadaugügu. ¹⁵ Natürü ñuxre ga duüxügü rü ñanagürügü: —Ñãã yatü i Ngechuchu, rü Bechëbú i ngoxögüarü äëxgacüarü poramaã nixĩ i ínanawoxũãxũ i ngoxogü —ñanagürügü. ¹⁶ Natürü ga togü rü nüxũ naxügüchaũ, rü yemacëx naxcëx ínacagü ga nüxũ na nawéaxũ ga wüxi ga cuëxruũ ga daxüçüãx na yemawa nüxũ nacüëxgüxüçëx rü ngoxi aixcüma Cristu yĩ. ¹⁷ Natürü nüma ga Ngechuchu rü nüxũ nacüëxama ga ñacügu na naxĩnüëxũ, rü yemacëx ñanagürü nüxũ: —Ngëxguma chi wüxi i nachiüãnecüãx i duüxügü nügü itoyegu rü nügütanüwa chitama nügü nadaixgu, rü nügü chitama nagüëë. Rũ ngëxguma chi wüxi ya íçüãx nügümaã nuëëchagu rü nügü nadaixgu, rü nügü chitama nagüëë. ¹⁸—¿Rũ ngëxguma chi Chataná nügümaãtama nuxgu, rü nügütama yamëxgu, rü ñuxãcü chi i äëxgacüecha yĩxũ? Rũ ngëma ñacharügü i ñuxma erü pema choxũ pixuxgu rü Bechëbúarü poramaã íchanawoxũ i ngoxogü. ¹⁹—Natürü ngëxguma chi Chatanáãrü poramaã íchanawoxügu i ngoxogü, rü perü ngüëxügü rü chita Chatanáãrü poramaã ínanawoxũ i ngoxogü. Rũ ngëmawa meã nüxũ tacuëx na pema rü ípetüëxũ. ²⁰—Natürü pemaã nüxũ chixu rü aixcüma Tupanaãrü poramaã nixĩ i íchanawoxüxũ i ngoxogü. Rũ ngëmawa pexũ nüxũ chacuëëë na núma petanüwa nanguxũ ya Tupana na äëxgacü yĩxüçëx. ²¹—Rũ ngëxguma wüxi ya yatü ya poracü rü meãma nügü naxüxnegu rü nüxna nadëuxgu ya napata, rü taxüetãma naxcëx tangix i norü ngëmaxũ i napatawa ngëxmaxũ. ²²—Natürü ngëxguma ínanguxgu i to i yatü i nüxũ rüporamaëxũ, rü nüxũ nayexeragu, rü tá nüxna nanapuxũ ya naxne ya nügü namaã ínaporaãxüne, rü tá nüxna nanapuxũ i guxũma i norü ngëmaxũ, rü tá nayana. ²³—Yíxema tama

choxü ngechaüxê rü chauxchi taxai. Rü yíxema tama choxü rüngüxêxê na Tupanacèx tayagaxü i duüxügü rü chauxchawa tanangianexê.

ngoxo i taeguxüchiga

(Mt 12.43-45)

²⁴ —Rü ngëxguma wüxi i ngoxo rü wüxi ya yatüwa ínaxüüxgu, rü dauxchitagu nanañaãne, rü naxcèx nadau na ngextá na nangüxü. Rü ngëxguma taxuguma nangüëgagu, rü nügü ínicuèx rü ñanagürü:

“Maneca naxcèx tá chataegu ya yima yatü ga noxri nawa íchaxüüchirécü”, ñanagürü. ²⁵ —Rü ngëxguma nataegugu, rü yima yatüxü inayangau na ñoma wüxi ya í ya mexêene rü meã nabixichinerüü na yíixü. ²⁶ —Rü ínixü rü naxcèx nayadau i to i 7 i ngoxogü i norü yexera i chixexü. Rü guxüma i ngëma ngoxogü rü wüxigu yima yatügu nachocu, rü ngëxma naxächüügü. Rü ngëxguma ya yima yatü rü noxriarü yexera nachixe —ñanagürü.

Taãê i aixcüma ixüxüchiga

²⁷ Rü yemaxü íyaxuyane, rü wüxi ga ngecü rü duüxügütanüwa tagaãcü ngígürügü: —Tataãê ya yíxema tügüanüwa cuxü yaxêexê rü tügü nixüwa cuxü maixê —ngígürügü. ²⁸ Natürü ga Ngechuchu rü ñanagürü: —Yexeraãcü tataãê ya yíxema nüxü ínuxê i Tupanaärü ore rü naga ínuxê —ñanagürü.

Duüxügü ga tama yaxögüchaüxü rü naxcèx ínacagüama ga to ga cuèxruü ga Tupanaärü poramaã üxü

(Mt 12.38-42; Mr 8.12)

²⁹ Rü nimuëtanü ga duüxügü ga Ngechuchuxütawa ngutaquëxegüxü. Rü inanaxügü ga Ngechuchu ga namaã na yadexaxü. Rü ñanagürü: —Ñãã duüxügü i ñomaücüü maxêxü rü nichixecüma. Rü naxcèx ínacagü i wüxi i cuèxruü i mexü i Tupanaärü poramaã üxü. Natürü Tupana rü wüxixicatama i cuèxruü tá nüxü nawêx. Rü ngëma nixí i cuèxruü ga Tupanaärü orearü uruü ga Yonáwa duüxügüxü nawéxü na nüxü nacüëxgüxücèx na aixcüma Tupana yíixü ga guma yéma namucü. ³⁰ —Rü yexgumarüü ga Yoná rü wüxi ga cuèxruü nixí naxcèx ga Nínibecüãx ga duüxügü, rü ngëxgumarüü tá ta nixí ya Tupana Nane ya duüxüxü íxícü na wüxi i cuèxruü tá yíixü naxcèx i ñomaücüü maxêxü i duüxügü.

³¹ —Rü ngëxguma naãneärü guxgu rü Tupana rü ñomaücüü maxêxü i duüxügüna nacèxgu i norü pecaduchigacèx, rü ngíma ga nuxcümaücü ga Chabaaneärü äëxgacü tá íirüda rü tá ínaxuaxü i ñomaücüü maxêxü i duüxügü. Yerü ngíma rü yaxüwaxüchi ne ixü ga na äëxgacü ga Charumóuxü naxínüxücèx ga ñuxácü poraãcü nüxü na nacüëxüchixü. Natürü ñuxma nuã petanüwa nangëxma i wüxi i Charumóüärü yexera íxícü. ³² —Rü ngëxguma naãneärü guxgu rü Tupana rü ñomaücüü maxêxü i duüxügüna nacèxgu norü pecaduchigacèx, rü nuxcümaügüxü ga Nínibecüãx ga duüxügü rü tá ínarüdagü rü tá ínanaxuaxüügü i ñomaücüü maxêxü i duüxügü. Yerü nümagü ga Nínibecüãxgü ga duüxügü rü nüxü narüxoe ga nacümagü ga chixexü ga yexguma Yoná namaã nüxü ixuxgu ga Tupanaärü ore. Natürü ñuxma nuã petanüwa nangëxma i wüxi i Yonáärü yexera íxícü.

Taxüneärü omüchiga

(Mt 5.15, 6.22-23)

33 —Taxúema wüxi i omüwa tanangixichi rü ñuxüchi itayacux rü éxna tacütüügu tayaxücuchi. Natürü norü üchicaügu tanaxünagü na ngema tüxü nabaxixüçex ya yixema duüxëgü ya yima ïgu chocuxe. 34 —Cuxetügü rü ñoma wüxi i omürüü nixi i cuxunecèx. Rü ngëxguma ngëma Tupana cuxü naxwèxexüçex cudèuxgu, rü guxüma i curü maxü rü name. Natürü ngëxguma ñoma i naãneärü ngúchaüçex cudèuxgu, rü guxüma i curü maxü rü chixexüwa nangëxma. 35 —¡Meã cugüna nadau na tama eãnexüxü nanguxuchixüçex i ngëma ore i mexü i cuxü ngëxmaxü, i ñoma wüxi i omürüü ixixü! 36 —Ngëxguma chi guxü i curü maxüwa nangëxmagu i Tupanaärü ngóonexü rü taxuwama nachixëxgu i curü maxü, rü meã chi nüxü cucuèx i Tupanaärü ngúchaü ñoma wüxi i omü i cuxü baxixürüü —ñanagürü.

Ngechuchu rü duüxügütanüwa ínanaxuaxü ga Parichéugü rü ngúexëeruügü ga Moïchéarü mugüwa nguxëëtaegüxü

(Mt 23.1-36; Mr 12.38-40; Lc 20.45-47)

37 Rü yexguma nüxü nachauxgu ga na yadexaxü ga Ngechuchu rü wüxi ga Parichéu nüxna naxu ga napatawa na yachibüxüçex. Rü yema Parichéupatawa naxü, rü mechawa nayarüto. 38 Rü yema Parichéu rü nabaixächiaë ga yexguma Ngechuchuxü nadèuxgu na tama yanguxëëaxü ga yema Moïchéarü mu na nayauxmëxgüxiraxü ga yexguma nachibüegu. 39 Natürü nüma ga Cori ga Ngechuchu rü ñanagürü nüxü: —Pema i Parichéugü rü ñoma pochiyu rü poratu i düxétüwaxicatama iyaxuxürüü pixigü. Natürü i peãxëwa rü nagu perüxĩnüë na pengíxü rü chixexü pexüxü. 40 —Pa Naëchitamare Maxëxüx, çtama éxna nüxü pecuèx na guma Tupana ga naxücü i ngëma tórü düxétüxünëwa ngëxmaxü, rü gumatama yixü ga naxücü ga tórü maxü i tórü aixepewa ngëxmaxü? 41 —Rü name nixi i Tupanana penaxã i perü maxü na aixcüma naxcèx pemaxëxüçex. Rü ngëmaäcü tá pime i guxüwama. 42 —Natürü wüxi i ngechaü nixi i pexcèx, Pa Parichéugüx, erü pema rü perü ngëmaxüwa rü meã Tupanana penaxã i ngëma noxrü ixixü, natürü perü maxüwa rü tama aixcüma naga pexĩnüë rü tama nüxü pengechaü. Rü marü name na perü ngëmaxüwa Tupanana penaxãxü i ngëma noxrü ixixü. Natürü perü maxüwa rü ta penaxwëxe i meã naga na pexĩnüëxü rü nüxü na pengechaüxü. 43 —Rü wüxi i ngechaü nixi i pexcèx, Pa Parichéugüx, erü pema rü pexü nangúchaü i äëxgacüchicagüwa na perütogüxü i ngutaquëxepataügüwa. Rü penaxwëxe na ñoma äëxgacüxü rümoxëxürüü na meã pexü namoxëgüxü i duüxügü i ítamügüwa. 44 —Rü wüxi i ngechaü nixi i pexcèx, erü ñoma yuetamaügü i tama nüxü idauxü i duüxügü naëchitamare naëtüwa chopetüxürüü pixigü. Erü woo perü düxétüwa pime, natürü aixepewa i peãxëwa rü poraäcü pichixe —ñanagürü ga Ngechuchu. 45 Rü wüxi ga ngúexëeruü ga Moïchéarü mugüwa nguxëëtaexü, rü Ngechuchuxü nangãxü rü ñanagürü: —Pa Ngúexëeruü Pa Ngechuchux, rü ngëma na ngëma ñacuxü, rü toma rü toãxëwa nangux —ñanagürü. 46 Natürü Ngechuchu rü ñanagürü nüxü: —Wüxi i ngechaü nixi i pexcèx, Pa Ngúexëeruügü i Moïchéarü Mugüwa Nguxëëtaegüxüx, erü poraäcü penamu i duüxügü na naga naxĩnüëxüçex i ngëma Moïchéarü mugü i guxchaxü i pematama bai i írarüwa naga pexĩnüëchaüxü. 47 —Rü wüxi i ngechaü nixi i pexcèx, erü peyamexëëgü i tümamaügü ga guxema nuxcümaügüxe ga Tupanaärü orearü uruügu ta perü oxigü tüxü dëjxe. 48 —Rü ngëmawa nüxü tacuèx na pema rü ta ipexãgüxü nawa

ga yema chixexũ ga perũ oxigũ ügũxũ. Yerũ nümagũ rü tüxũ nadai ga guxema Tupanaãrũ orearũ uruũgũ, rü ñuxma i pema rü peyamexẽegũ i tũmamaũgũ. ⁴⁹—Rü yemacẽx nixĩ ga Tupana ga ñaxũ:

“Ngẽma duũxũgũtanũwa tá chanamugũ i chorũ orearũ uruũgũ rü chorũ orearũ ngeruũgũ. Natürũ ngẽma duũxũgũ i chixexũgũ rü tá nanadai i nümaxũ rü togũxũ rü tá nachixewegũ rü tá nawe ningẽxũtanũ”,

ñaxũ ga Tupana. ⁵⁰⁻⁵¹ Rü ñanagürũ ga Ngechuchu: —Rü pemaã nüxũ chixu rü Tupana tá nayapeguãchixẽẽ i pema i ñuxma maxẽxẽ erũ pema rü ta perũ oxigũcũmagu pexĩ. Nümagũ rü noxritama naãneãrũ ügũgumama rü nanadai ga muxũma ga Tupanaãrũ orearũ uruũgũ. Rü nüxĩra nayamẽxgũ ga Abẽ rü gumawena nayadaietanũ ga muxũma ga togũ ñuxmata Zacaría ga tupauca ga taxũnegu yamẽxgũãcũwa nangu. Rü guxũma ga yema orearũ uruũgũ ga perũ oxigũ dẽixũcẽx rü Tupana tá pexna naca, erũ pema rü ta perũ oxigürũtama pixĩgũ rü tama nüxũ perũxoechaũ i ngẽma chixexũ i pexũxũ. ⁵²—Rü wũxi i ngechaũ nixĩ i pexcẽx, Pa Ngúexẽeruũgũ i Moĩchẽarũ Mugũwa Nguxẽẽtaegũxũx, erũ duũxũgũchaxwa ipeyacux i Tupanaãrũ ore i aixcũma ixĩxũ i pematama tama pixõgũxũ. Rü nüxna penachuxu i togũ i duũxũgũ i aixcũma yaxõgũchaũxũ na nümagũ rü ta tama yaxõgũãxũcẽx —ñanagürũ ga Ngechuchu. ⁵³⁻⁵⁴ Rü yexguma Ngechuchu yema ñaxgu, rü yema ngúexẽeruũgũ ga Moĩchẽarũ mugũwa nguxẽẽtaegũxũ rü yema Parichẽugũ rü poraãcũ Ngechuchumaã nanuẽ. Rü inanaxũgũ ga nüxna na nacagũexũ naxcẽx ga muxũma ga ore ga guxchaxũmaã na yemaãcũ chi nüxũ iyangaugũxũcẽx ga ore ga chixexũ na yemamaã norũ ãẽxgacũgũxũ-tawa Ngechuchuxũ iyaxuaxũgũxũcẽx.

12

Ngechuchu nanangũexẽẽ na tama namexũ na duũxũgũpẽxewa meã imaxnetaxũ natürũ taãewa rü chixexũgu rüxĩnũxũ

¹ Rü yoxni yexma nangutaquẽxegũ ga muxũchixũ ga duũxũgũ. Rü yema na namuxũchixũcẽx rü düxwa nügũcutũwa ningagũetanũ ga duũxũgũ. Rü Ngechuchu inanaxũgũ ga norũ ngúexũgũmaãxĩra na yadexaxũ, rü ñanagürũ: —¡Pexuãẽgũ naxcẽx i Parichẽugũ! Erũ duũxũgũpẽxewa meã namaxẽneta natürũ naãewa rü chixexũgu narũxĩnũẽ. ²—Natürũ guxũma i tacũ i wũxie cúãcũ üxũ rü tá nangoxoma. Rü guxũma i tacũ iicũxũ rü yixcũra rü tá duũxũgũ nüxũ nacuẽxgũama. ³—Rü ngẽmacẽx guxũma i ngẽma ore i eãnexũwa cúãcũ nüxũ pixuxũ rü yixcũra rü tá nangoxoma rü guxũ i duũxũgũ tá nüxũ naxĩnũẽ. Rü ngẽma ore i ucapuarũ aixepewa cúãcũ nüxũ pixuxũ, rü yixcũra rü guxãpẽxewa tá nüxũ nixugũgũ i duũxũgũ.

Name nixĩ na Tupanaxũ pemuũẽxũ

(Mt 10.26.31)

⁴—Rü ngẽmacẽx i pemax, Pa Chomücũgũx, rü pemaã nüxũ chixu rü itama nüxũ pemuũẽ i ngẽma duũxũgũ i pexũ daixchaũxũ! Erũ taxũnexũxĩcatama nimẽxgũ, natürũ taxucürũwama taãẽxũ nimẽxgũ. ⁵—Natürũ pemaã tá nüxũ chixu na texẽxũ tá na pemuũẽxũ. ¡Nüxũ pemuũẽ ya Tupana! Erũ nüma nüxũ nangẽxma i pora na yamaãxũ i pexene, rü napoxcũãxũ i peãẽ i ngextã ngoxogũxũ ñnapoxcũxũgu. ¡Rü yimaxũ tá nixĩ i pemuũẽxũ! ⁶—¿Tama eãna taxretachinũ i dẽeruxacũgu namaã petaxe i

wüximēxpüx i werixacügü? Natürü Tupana rü tama tüxü inayarüngüma ya yixema werixacüaxgü, rü bai ya wüxi. ⁷ —Rü woo i peyaegü rü Tupana nüxü nacuèx na ñuxre i peyae ngëxmaxü. Rü ngëmacèx, ¡täxü i pexoegaägüxü! Erü pema rü muxüma i werixacügüarü yexeraxüchi pexü nangechaü ya Tupana.

Yixema duüxügüpëxewa tügü ixuxe na Ngechuchu ya Cristuarü duüxü tiixü

(Mt 10.32-33, 12.32)

⁸ —Rü pemaã nüxü chixu rü guxâma ya texé i ñoma i nañewa duüxügüpëxewa tügü ixuxe na chorü duüxü tiixü, rü choma i Tupana Nane na duüxüxü chiixü, rü napëxewa i Tupanaärü orearü ngeruügü i daxüçüax rü tá tüxü chixu na chorü duüxü tiixü i tümax. ⁹ —Natürü texé ya ñoma i nañewa duüxügüpëxewa tügü ixuxe na tama chorü duüxü tiixü, rü choma rü tá ta napëxewa i Tupanaärü orearü ngeruügü i daxüçüax rü tá tüxü chixu na tama chorü duüxü tiixü i tümax. ¹⁰ —Rü guxâma ya texé ya chixri chauchiga idexaxe i choma i Tupana Nane na duüxüxü chiixü, rü Tupana tá tüxü nüxü nangechaü i ngëma. Natürü texé ya Tupanaãe i Üünexüchiga chixri idexaxe, rü Tupana rü täütâma tüxü nüxü nangechaü i ngëma. ¹¹ —Rü ngëxguma duüxügü ngutaquëxepataügüwa rü ëxna äëxgacügüpëxewa pexü nagagügu na pexü napoxcuexüçèx, rü ¡täxü i pexoegaägüxü na ¡acümaã tá penangäxüxü rü ëxna ¡acüxü tá namaã na pixuxü! ¹² —Erü ngëxguma nawa nanguxgu na pidexagüxü, rü Tupanaãe i Üünexü tá pexü nanguxëe na ¡acüxü tá namaã pixuxü —ñanagürü ga Ngechuchu.

Wüxi i äücümaxü nixü na imuärü dïeruäxü

¹³ Rü yema duüxügütanüwa rü wüxi ga yatü Ngechuchuxü ñanagürü: —Pa Ngúexëeruüx, ¡namaã nüxü ixu ya chaueneë rü choxna naxãã i ngëma chaunatü ga yucüarü ngëmaxü i choxna üxü! —ñanagürü. ¹⁴ Natürü Ngechuchu rü ñanagürü nüxü: —Pa Yatüx, ¿texé perü äëxgacüxü choxü tingucuchixëe na chatatoyexüçèx i ngëma penatüarü ngëmaxü? —ñanagürü. ¹⁵ Rü ñanagürü ta ga Ngechuchu: —¡Pexuãe na tama pexü nangüchaüxüçèx i togüarü ngëmaxü! Erü wüxi i duüxü rü tama ngëma na namuärü ngëmaxüäxüçèx nixü i nayauxäxü i norü maxü i taguma gúxü —ñanagürü. ¹⁶ Rü yexguma wüxi ga ore ga cuèxruüxü namaã nixu, rü ñanagürü: —Nayexma ga wüxi ga yatü ga muärü dïeruäcü, rü guxüma ga yema nanetügü ga nañegu natogüxü rü meãma nüxü nixo. ¹⁷ —Rü guma yatü rü nagu narüxüñü rü naãëwa ñanagürü:

“¿¡acü tá chaxüxü i ñuxmax? Erü nataxuma i chorü nachica i ngexta namaã na changuxüxü i chaunetügüarü o”, ñanagürü. ¹⁸ —Rü naãëwa ñanagürü:

“Marü nüxü chacuèx na ¡acü tá chaxüxü. Rü nagu tá chapogü ya guxünema ya chorü ¡patagü ga nagu namaã changuxüne ga chaunetügüarü o. Rü náí ya taxüragüne tá chaxü na ngëxma namaã changuxüxüçèx i guxüma i chaunetügüarü o rü guxüma i chorü ngëmaxügü. ¹⁹ —Rü ngëxguma marü namexgu i guxüma, rü chaugümaã tá ñacharügü: ‘Ñuxma rü tá icharüngü rü meã tá chachibü rü meã chaxaxe rü ngëmaäcü tá chataãe. Erü namuxüchi i chorü ngëmaxügü, rü mucüma ya tauncü tá choxü nataí’, ñacharügü tá chaugümaã”. ²⁰ —Natürü Tupana rü ñanagürü guma yatüxü:

“Pa Yatüx, cungëãẽmare i cuma erü ñoma i chütaxügu tátama cuyu. Rü ngëma curü ngëmaxügu i namaã cunguxüxü, rü çtexëarü tá nixi i ngëxguma?” ñanagürü ga Tupana. ²¹—Rü ngëxgumarüü tá ta namaã nangupetü i ngëma duüxügu i nügücëxtama norü ngëmaxüguãma nguxüxü rü tama nügü ímexëẽxü i Tupanapëxewa —ñanagürü ga Ngechuchu.

Tupana rü naxäcügüna nadau

(Mt 6.25-34)

²² Rü yemawena rü norü ngúexügüxü ñanagürü ga Ngechuchu: —Pemaã nüxü chixu jrü täxü i pexoegaãëgüxü naxcëx i çacü tá na pengõxü rü çacümaã tá na pixäxchiruxü! ²³—Erü perü maxü rü õnaãrü yexera nixi, rü pexene rü naxchiruarü yexera nixi. ²⁴—jDücëx penangugü i werigü i tama toegüchirëxü, rü tama nanetüarü o ibuxgüxü, rü ngepatagüxü na ngexta namaã nanguxügüxücëx i norü õna! Natürü Tupana rü nanaxüwemü. Rü pema rü Tupanacëx rü poraãcü guxüma i werigüarü yexera pixigü. ²⁵—Rü taxuwama name na pexoegaãëgüxü. Erü taxucürüwama wüxie i pema rü pegütama ipemëxächixëẽ ngäxü ya metrugu ega woo poraãcü naxcëx pexoegaãëgügu. ²⁶—Rü ngëxguma tama pemaã nanguxü i ngëma íraxü rü taxucürüwama pegütama ipemëxächixëẽ ega woo naxcëx pexoegaãëgügu, rü çtüxcüü i ngëxguma rü ta çacü i togü i ngëmaxügücëx pexoegaãëgüxü? ²⁷—jDücëx penangugü i putüragü na ñuxäcü nayaexü i nachacu! Rü tama napuracüxü, rü tama nügü üxchirugüxü. Natürü woo guma äëxgacü ga Charumóu na namexëchixü ga naxchiru rü taguma wüxi ga putürachacuarü mexürüü nixi. ²⁸—Rü marü nüxü pedau i ñuxäcü Tupana na nangëxãëxü i putüragü i ñuxma naãnewa rüxügümarexü natürü moxü rü marü taxuxü. Rü ngëxguma Tupana ngëmaãcü nangëxãëgu i putüragü rü pema rü tá ngëmaãrü yexera pexchiru pexna naxã, Pa Duüxügu i Írarüwatama Yaxögüxüx. ²⁹—Rü ngëmacëx tama name i pexoegaãë naxcëx i çacü tá na pengõxü rü çacü tá na pixaxüxü. ³⁰—Erü ñoma i naãnecüãx i duüxügu rü naxcëx nadaugü i guxüma i ngëma pemaã nüxü chixuxü. Natürü pema rü pexü nangëxma ya Penatü ya Tupana ya nüëchama nüxü cuäcü na pexü nataxuxü i guxüma i ngëma. ³¹—Rü ngëmacëx narümemaẽ nixi na Tupanaãrü ngúchaüçëx pedaügüxü na perü äëxgacü yiixücëx. Rü ñuxüchi nüma rü tá pexna nanaxã i guxüma i çacü i pexü taxuxü.

Ñuxäcü tüxü nangëxma i tóru ngëmaxügu i daxügüxü i naãnewa

(Mt 6.19-21)

³²—jTäxü i pemuüëxü, Pa Chauxacügüx! Pema rü noxretama pixigü natürü Penatü ya Tupana rü norü ngúchaü nixi na pexna naxããxü i pechica i ngextá nüma äëxgacü íyixüwa. ³³—jRü namaã petaxe i perü ngëmaxügu rü togü i duüxügu i nüxü nataxuxüna penaxã i ngëma díëru! Rü ngëmaãcü tá pegüxü penangëxmaxëë i perü ngëmaxügu i taguma pexü ngauxü rü taguma gúxü i daxügüxü i naãnewa i ngextá tama íyaxücuxüwa i ngítëxáxü rü naweane tama ínachixëëëxüwa. ³⁴—Erü ngextá ínangëxmaxüwa i perü ngëmaxügu, rü ngëxma nixi i perüxñüëxü.

Name nixi i yigü ítamexëëgü naxüpa na ínanguxü ya Cristu

³⁵—jRü ípememare namaã i perü omügü i naigüxü! ³⁶—Rü name nixi i wüxi i coriarü duüxügu i ímemaregüxürüü na pixigüxü. Rü penaxwëxe na ñoma duüxügu i íãxwa norü corixü nanguxëëgüxürüü na pixigüxü. Rü ngëxguma norü cori rü wüxi i ngígüarü petawa ne naxüxgu rü: Tu tu

tu ñaxgu, rü paxa naxcèx nayawãxnagü i ñãx. ³⁷ —Rü nataãëgü i ngëma coriarü duüxügü ega inadauegu i ngëxguma ínanguxgu i norü cori. Rü pemaã nüxü chixu rü ngëma cori rü norü mechawa tátama nanatogüxëë i ngëma norü duüxügü i nüxü ínanguxëëgüxü, rü núma tátama ngëma norü duüxügüxü inaxüwemü. ³⁸ —Rü woo ngãxücüü ínanguxgu rü éxna marü yangunechaügu rü nataãëgü i ngëma coriarü duüxügü ega inadauegu i ngëxguma ínanguxgu i norü cori. ³⁹ —Rü ngëxguma chi wüxi ya ñãrü yora nüxü cuèxgu na ñuxguacü ínanguégaxü i ngítèxáxü, rü tãü chima nape. Rü chi nüxna nadau ya napata na tama yawãxnaãxüçèx rü tama na nüxü nangíxüçèx. ⁴⁰ —Rü pema rü ta penaxwëxe na ípememarexü. Erü ngürüächi tama nagu íperüxnüëyane tá íchangu i choma i Tupana Nane na duüxüxü chiüxü —ñanagürü ga Ngechuchu.

Wüxi ga duüxü ga meã norü coriga ñnüxü rü to ga tama meã norü coriga ñnüxüchiga

(Mt 24.45-51)

⁴¹ Rü yexguma ga Pedru rü Ngechuchuna naca rü ñanagürü: —Pa Corix, ¿toxcèxicatama éxna nixí i ñaã ore i cuèxruü i tomaã nüxü quixuxü, rü éxna guxü i duüxügüçèx yíxü? —ñanagürü. ⁴² Rü ñanagürü ga Cori ga Ngechuchu: —¿Texé tíxü ya yíxema túmaärü coriarü duüxë ya aixcüma yanguxëëxë rü meã túmaãëxü cuáxe? ¿Tama éxna yíxema tíxü ya túmaärü cori tüxna ägaxe na meã nüxna tadauxüçèx rü meã oragu tanachibüexëëxüçèx i norü duüxügü? ⁴³ —Rü tataãë ya yíxema coriarü duüxë i ngëxguma ínanguxgu i túmaärü cori rü tüxü íyangueügu na meãma ítanaxüxü i ngëma puracü i nagu tüxü namuxü. ⁴⁴ —Rü aixcüma pemaã nüxü chixu rü ngëma túmaärü cori rü tá guxüma i norü ngëmaxügüarü dauruüxü tá tüxü nixíxëë. ⁴⁵⁻⁴⁶ —Natürü ngëxguma chi ngëma duüxü nagu rüxnügu rü norü cori rü tama paxa na ínanguxü, rü inaxügüãgu na chixri namuãxü i natanüxügü i yatüxügü rü ngexügü, rü peta naxüxgu rü nachibüxgu, rü naxaxegu, rü nügü nangãxëëgu, rü ngürüächi ngëma ngunexü rü ngëma ora i tama nagu ínanguxëëãxügu tá ínangu i norü cori. Rü poraãcüxüchi tá nanapoxcu ngëma duüxügü i tama norü coriga ñnüëxüxü napoxcuexürü. ⁴⁷ —Rü ngëma coriarü duüxü i nüxü cuèxchiréxü na ñacü nanaxwëxexü i norü cori, natürü tama nügü ímexëëxü rü tama norü coriga ñnüxü, rü tá poraãcü nanaçuaxi. ⁴⁸ —Natürü ngëma coriarü duüxü i tama nüxü nacuããcüma chixri norü coriga ñnüxü, rü chixexü üxü, rü tá írarüwaxüra nanaçuaxi. Rü texé ya Tupana muxüma tüxna äxë, rü muxüçèxtáma tüxna naca. Rü texé ya muxüna tüxü nadauxëxë rü tá yexeraãcü tüxna naca.

Ngechuchugagu nixí i yatoyexü i duüxügü

(Mt 10.34-36)

⁴⁹ —Núma chaxü na ñoma i naãnewa duüxügüxü chidauchitanüxëëxüçèx. Rü chierü aixcüma marü yadauchitanügu. ⁵⁰ —Rü choma rü tá poraãcü ngüxü chinge, rü chanaxixãchiãë ñuxmatáta yangu i ngëma. ⁵¹ —Rü tama name i nagu perüxnüë na núma chaxüxü na guxü i duüxügü rü wüxigu naxínüëxüçèx. Natürü pemaã nüxü chixu rü núma chaxü na chaugagu yatoyexüçèx i duüxügü. ⁵² —Erü ñaãwena wüxi ya ípatawa nangëxmagu i wüximëëxpüx i duüxügü, rü tomaëxpüx tá choxü nayaxögü rü taxre i tama, rü éxna taxre tá choxü nayaxögü rü tomaëxpüx i tama. ⁵³ —Rü wüxi i papá tá nayaxö rü nane rü tãütáma

nayaxō, rü ěxna nane tá nayaxō natürü nanatü i tama. Rü ngëxgumarüü ta wüxi i mamá tá iyaxō rü ngïxácü rü tãütáma iyaxōxcháü, rü ěxna ngïxácü tá iyaxō rü ngïe rü tãütáma iyaxōxcháü. Rü wüxi ya ngïxê tá iyaxō rü ngïneâx rü tãütáma iyaxō, rü ěxna ngïneâx tá iyaxō rü ngïxê rü tãütáma iyaxō —ñanagürü ga Ngechuchu.

Cuèxruügü i nachiga i tacü tá nangupetüxü

(Mt 16.1-4; Mr 8.11-13)

⁵⁴ Rü Ngechuchu ñanagürü ta nüxü ga duüxügü: —Ngëxguma nüxü pedëuxgu na naxëächianexü, rü nagu perüxinüë tá na napuxü. Rü aixcüma ngëmaãcü nixi. ⁵⁵ —Rü pema nüxü pecuèx na ñuxácü penangugüxü ya buanecü, rü ngëmaãcü nüxü pecuèx rü tá na nanguxetüxü. Rü aixcüma ngëmaãcü nixi. ⁵⁶ —Pa Duüxügüx, pema rü togü i duüxügüpëxewa meã pemaxënetá, natürü peãëwa rü chixexügu perüxinüë. Pema nüxü pecuèx na ñuxácü penangugüxü ega tá napuxgu rü ěxna tá nanguxetügu. ¿Rü ñuxácü i ñuxma i tama nüxü pecuáxü na Tupana yïxü ya petanüwa ngucü?

Name nixi na curüngüxmüxü namaã i curü uwanü

(Mt 5.25-26)

⁵⁷ —Rü tüxcüü tama nüxü pecuáxchaü i ngëma nama i mexü i Tupana pexü naxwëxexü na nagu pexixü. ⁵⁸ —Rü ngëxguma chi wüxie wüxi i ngetanücëx cuxü íxuaxügu rü äëxgacüxütawa cuxü tagaxgu, rü name nixi i namawatama tüxü icurüngüxmüxëë na tama äëxgacüpëxewa cuxü tagaxücëx. Erü wüxicana na äëxgacüxütawa cunguxü rü äëxgacü tá purichíagüna cuxü namu. Rü purichíagü tá cuxü napoxcu. ⁵⁹ —Rü cumaã nüxü chixu rü ngëxma poxcuchicagu tá curüxãux ñuxmatáta ngïxü cuxütanü i guxcü i díeru i nüxü ngïxü cungetanücü. [Rü aixcüma ngëxgumarüü tá cumaã nanaxü ya Tupana ega tama namaã cunamexëëxgu i curü maxü —ñanagürü ga Ngechuchu.]

13

Wüxi i mexü nixi na nüxü rüxoexü i tacüma i chixexü

¹ Rü yexgumatama Ngechuchuxütawa nangugü ga ñuxre ga duüxügü. Rü Ngechuchumaã nüxü nixugü ga na ñuxácü äëxgacü ga Piratu namuxü ga norü churaragü na nadaiaxücëx ga ñuxre ga yatügü ga Garirëaanecüãx ga yexguma yema yatügü rü Tupanacëx carneru nadaixgu tupauca ga taxünewa. ² Rü Ngechuchu nüxna naca rü ñanagürü nüxü: —¿Pema nagu perüxinüëgu rü yemaãcü nüxü nangupetü ga yema yatügü, yerü yema togü ga Garirëaanecüãxärü yexera nipecaduãxgü? ³ —Pemaã nüxü chixu rü tama nixi. Rü ngëxguma chi pema rü tama nüxü perüxoegu i pecüma i chixexü, rü guxãma i pema rü tá ta ipeyarütauxe. ⁴ —¿Rü ěxna pema nagu perüxinüëgu rü guxü ga Yerucharëüçüãxärü yexera nipecaduãxgü ga yema 18 ga yatügü ga yuexü ga yexguma Chiruéwa yexmaxü ga dauxütaechica naëtü rüngutaügu? ⁵ —Pemaã nüxü chixu rü tama nixi. Rü ngëxguma chi pema rü tama nüxü perüxoegu i pecüma i chixexü, rü guxãma i pema rü tá ta ipeyarütauxe —ñanagürü ga Ngechuchu.

Ore ga nanetü ga iguera ga ngearü ðöxügu ixuxü

⁶ Rü nüma ga Ngechuchu rü nüxü nixu ga wüxi ga ore ga igueragu ixuxü, rü ñanagürü: —Rü wüxi ga yatü nüxü nayexma ga wüxi ga ubanecü. Rü yexma nanato ga wüxi ga iguera. Rü nüma ga guma yatü rü

ínayadauxxü ga yema iguera rü ngoxi naxõõ, natürü taxuxüma ga norü oxü inayangau. ⁷—Rü yemacèx yema norü duüxü ga norü naänena dauxxü ñanagürü:

“Dücèx, tomaèxpüx ya taunecü guxüguma íchayadauxxü i ñaã iguera, rü taguma naxo. Rü ngèmacèx chanaxwèxe na cuyadaxüchixü na tama natücèxma nuã naänewa naxíaneãxücèx”, ñanagürü nüxü. ⁸—Natürü ga yema norü duüxü ga norü naänena dauxü, rü norü corixü nangãxü, rü ñanagürü:

“Pa Corix, jñütama doma taunecüxícata ma nangèmèx! Rü tá chanaxaimüãnepüne rü waxmüãnexümaã tá chanagüpüne. ⁹—Rü bexmana ngèxguma rü tá naxo. Natürü ngèxguma táütáma naxoxgu rü tá chayadaxüchi”, ñanagürü.

Ngechuchu rü ngüxchigaarü ngunexügu ngíxcèx nayataanexèè ga wüxi ga ngecü ga pücèxwecü

¹⁰ Rü wüxi ga ngüxchigaarü ngunexügu rü Ngechuchu nanguxèètae ga wüxi ga ngutaquèxepataüwa. ¹¹ Rü yéma iyexma ga wüxi ga ngecü ga 18 ga taunecü idaaawecü. Rü ipücèxwe yerü wüxi ga ngoxo ngíxü napücèxwexèè, rü taxuacüma iyarüwèxãchi. ¹² Rü yexguma Ngechuchu ngíxü dèuxgu rü ngíxcèx naca, rü ñanagürü ngíxü: —Pa Ngecüx, ñuxma rü marü cuxcèx nitaane i curü daawewa —ñanagürü. ¹³ Rü yexguma rü ngíxü ningögü, rü yexgumatama iyarüwèxãchiwemüxü, rü inaxügü ga Tupanaxü na yacuèxüüxü. ¹⁴ Natürü yema ngutaquèxepataüãrü ãèxgacü rü nanu, yerü Ngechuchu rü ngüxchigaarü ngunexügu ngíxü narümexèè ga yema nge. Rü yemacèx ga yema ãèxgacü rü ñanagürü duüxügüxü: —Nangèxma i 6 i ngunexü i nagu namexü na ipuracüexü. Rü ngèma ngunexügügu nixü i namexü na nuã pexixü na pegü peyarümexèègüxütcèx rü tama i ngüxchigaarü ngunexügu —ñanagürü. ¹⁵ Rü yexguma ga Cori ga Ngechuchu rü nanangãxü, rü ñanagürü: —Pa Duüxügüx, pema rü togü i duüxügüpèxewa meã pemaxènetá, natürü peãewa rü chixexügu perüxínüè. ¿Tama èxna guxã i pema rü ngüxchigaarü ngunexügu peyawèxü i perü woca rü èxna perü buru na peyaxaxèègüxütcèx? ¹⁶—Rü ñaã ngecü rü Abrãütanüxü iyixü, rü Chataná rü 18 ya taunecü ngíxü nachixexèè namaã i ñaã daawe. ¿Rü taux èxna i namexü na ngíxcèx chayataanexèèxü i ngüxchigaarü ngunexügu? —ñanagürü. ¹⁷ Rü yexguma yema ñaxgu ga Ngechuchu, rü guxüma ga norü uwanügü rü poraãcü naxãneè. Natürü guxüma ga togü ga duüxügü rü nataãègü ga yexguma nüxü nadaugügu ga yema mexügü ga Ngechuchu üxü.

Ore i motacha- chiregu ixuxü

(Mt 13.31-32; Mr 4.30-32)

¹⁸ Rü ñanagürü ga Ngechuchu: —¿Ñuxãcü nixü i ãèxgacü na yíixü ya Tupana, rü nañuxraüxü i nüma ãèxgacü íyíixüwa? ¿Rü tacügu tá chanangu? ¹⁹—Maneca wüxi ya motachachire ya wüxi ya yatü naãnegu toxünerüü nixü. Rü woo naxíraxüchichirèx ya naxchire natürü narüxü, rü naya ñuxmata wüxi i nanetü i taetaxü nixü. Rü ngèmacèx i werigü rü natanügu nixüachiãü —ñanagürü.

Ore i pãüãrü puxèèruügu ixuxü

(Mt 13.33)

²⁰ Rü ñanagürü ta ga Ngechuchu: —¿Ñuxãcü nixü i Tupana ãèxgacü íixüwa? ¿Rü tacügu tá chanangu? ²¹—Rü pãüãrü puxèèruüü nixü

na guxūwama nanguxū. Erū wūxi i ngecū rü íraxū- tama i pāūārū puxēeruūmaā inaxüéú i taxū i ngírū pāūchara. Rū ngēma pāūārū puxēeruū rü woo naxíra rü nayapuxēē i guxūma i ngírū pāūchara —ñanagürü ga Ngechuchu.

Īāx i íraxūchiga

(Mt 7.13-14, 21-23)

²² Rū inixūchigü ga Ngechuchu ga Yerucharéúwa na naxūxū. Rū yexguma namagu yaxūxgu rü ĩānegüwa rü ĩānexācügüwa nixüpetūchigü, rü yéma nayanguéxētānū ga duūxügü. ²³ Rū wūxi ga duūxū nüxna naca rü ñanagürü: —Pa Corix ¿noxretátama nixī i ngēma nayauxgūxū i maxū i taguma gúxū? —ñanagürü. Rū nūma ga Ngechuchu nanangāxū, rü ñanagürü: ²⁴ —Daxūguxū i naānēārū ĩāx rü naxíraxūchi. ¡Rū paxa naxcèx pedau na nawa pichocuxūcèx! Erū pemaā nüxū chixu rü muxūchixūma i duūxügü tá nüxū nangúchaū na nawa yachocuxū, natürü tāūtāma nawa nichocu. ²⁵ —Erū ngēxguma ĩārū yora marū nawāxtagu i ĩāx, rü pema i düxétüwa ngēxmagüxe rü tá penatutuāū. Rū ñaperügügü tá:

“Pa Corix, ¡paxa toxcèx yawāxna i ĩāx!” ñaperügügü tá. Natürü nūma i cori rü tá pexū nangāxū, rü ñanagürü tá:

“Tama pexū chacuèx na ngextácūāx pixīgūxū”, ñanagürü tá pexū. ²⁶ —Rū ngēxguma rü tá ñaperügügü nüxū:

“Cumaāchirēx wūxiwa tachibüe rü taxaxegü. Rū toxū cungúxēē ga torū ĩānēārū ítamügüwa”, ñaperügügü tá. ²⁷ —Natürü nūma rü tá pexū nangāxū rü ñanagürü tá: “Marū pemaā nüxū chixu rü tama pexū chacuèx na ngextácūāxgü pixīgūxū. ¡Rū ípixī i nuā chauxūtawa i guxāma i pemax, Pa Chixri Maxēxū!” ñanagürü tá. ²⁸ —Rū ngema tá pexaxe, rü tá pixūxchapütāgü i ngēxguma nüxū pedèuxgu i Abrāū rü Íchaā rü Acobu rü guxūma i Tupanaārū orearū uruūgü na Tupana āēxgacū íxíxūwa na nangēxmagüxū rü pema rü nüxna na ípewoxūxū. ²⁹ —Erū guxūwatāma ne naxī i duūxügü. Rū Tupana āēx- gacū íxíxūwa tá nangēxmagü. Rū ngema tá narütogü na ngema nachibüexūcèx. ³⁰ —Rü tá nangēxma i nümaxū i ñoma i naānewa duūxügü nüxū oexū, natürü daxūguxū i naānewa rü Tupana tá wixpēxewa nanaxügüxēē. Rü tá nangēxma i nümaxū i ñoma i naānewa duūxügü nüxū icuèxūūgūxū, natürü daxūguxū i naānewa rü Tupana rü tá wixweama nanaxügüxēē —ñanagürü ga Ngechuchu.

Ngechuchu rü Yerucharéúcuāx ga duūxügüçèx naxaxu

(Mt 23.37-39)

³¹ Rū yematama ga ngunexūgu rü Ngechuchuxūtawa nangugü ga ñuxre ga Parichégü. Rū ñanagürügü Ngechuchuxū: —¡Íixū i nuā! Erū āēxgacū ya Erode rü cuxū nimèxéga —ñanagürügü. ³² Natürü nūma ga Ngechuchu nanangāxū rü ñanagürü: —¡Naxūtawa pexī i ngēma yatū i nüxū cuèxūchixū na ñuxācū duūxügūxū nawomüxēēxū, rü namaā nüxū pixu rü ñuxma rü moxū rü tá íchana- woxū i ngoxogü, rü tá chanameēxēē i ngēma duūxügü i idaaweexū, rü pèxmaācū tá chanaguxēē! ³³ —Natürü chanaxwèxe i ichixūchigü i ñuxma rü moxū rü paxmaācū ñuxmatāta Yerucharéúwa changu. Erū Yerucharéúgu nixī i na nayuexū i guxūma i Tupanaārū orearū uruūgü. ³⁴ —Rü dücax, Pa Yerucharéúcuāx, pema peyadaietanū i Tupanaārū orearū uruūgü, rü nutamaā ípenamuxūchigü i Tupanaārū orearū ngeruūgü i pexcèx nūma namugūxū. Rū ñuxreēxpūxcūna wūxigu chaugūxūtāgu

pexü chanutaquëxexëëchaü, ñoma wüxi i ota ya naxäcüâx nügütüügu tüxü nutaquëxexürüü. Natürü pema rü tama penaxwëxe. ³⁵ —Dücëx i ñuxma ya perü ñäne, rü Tupana tá ínanatëx. Rü pemaã nüxü chixu rü tãütãma wena choxü pedau ñuxmatãta daxüguxü i naãnewa ne chaxü. Rü ngëxguma rü tá choxü pedau rü tá ñaperügügü:

“Namexëchi nixí ya yima Cori ya Tupana núma namucü”, ñaperügügü tá —ñanagürü ga Ngechuchu.

14

Ngechuchu rü naxcëx nayataanexëë ga wüxi ga yatü ga rüchaxünexü

¹ Rü wüxi ga ngüxchigaarü ngunexügu rü Ngechuchu rü wüxi ga Parichéupatawa nayachibü. Rü yéma nayexmagü ga togü ga Parichéugü ga yéma bexma Ngechuchuxü ngugëxü. ² Rü yéma nayexma ta ga wüxi ga yatü ga idaawexü ga rüchaxünexü. ³ Rü yexguma ga Ngechuchu rü yema ngüexëëruügü ga Moïchéarü mugüwa nguxëëtaegüxüna rü Parichéugüna naca, rü ñanagürü: —¿Tama penachuxuxü ega ngüxchigaarü ngunexügu chanamexëëxgu i wüxi i idaawexü? —ñanagürü. ⁴ Natürü ga nümagü rü nangeëxgümare. Rü yexguma ga Ngechuchu rü naxmëxgu nayayauxãchi ga yema idaawexü, rü nanamexëë. Rü namaã nüxü nixu ga na íyaxüxütcëx. ⁵ Rü Ngechuchu rü ñanagürü Parichéugüxü: —¿Texé i pema i ngëxguma perü buru rü éxna perü woca puchugu nagoxgu, rü taux éxna i ngëxgumatama ípeyadauxü rü ípe- yatüãchixü i woo ngüxchigaarü ngunexügu? —ñanagürü. ⁶ Rü nümagü rü taxuümaãma nanangãxügü.

Duüxügü ga ngígüarü petawa nüxna naxugüxüchiga

⁷ Rü yexguma mechawa natogüchaügu ga yema nüxna naxugüxü, rü Ngechuchu nüxü nadau na wüxichigü rü íärü yoraxütawaxüchi natoxchaüxü. Rü yexguma yemaxü nadëuxgu rü nayaxucuxëgü, rü ñanagürü: ⁸ —Ngëxguma texé cuxna uxgu i wüxi i ngígüarü petawa, rü tama name i petaarü yoraxütawaxüchi üxü i naxmëxwëxewa cuyarüto. Erü yixcüra ngürüãchi tá ínangu i to i nüxna naxuxü i curü yexeraxüchi ixixü. ⁹ —Rü ngëma petaarü yora i pexna uxü, rü tá cumaã nüxü nayarüxu na icuchixütcëx i ngëma nachicawa na ngëma natoxëëãxütcëx i ngëma to i curü yexera ixixü. Rü ngëxguma i cuma rü poraãcü cuxãneãcüma rü nawa iyacuáxü i naxmëxwëxewa tá cuyarüto. ¹⁰ —Rü narümemae ega texé cuxna uxgu, rü nawa iyacuáxü i naxmëxwëxewa curüto. Rü ngëxguma i ngëma petaarü yora i cuxna uxü rü ñanagürü tá cuxü:

“Pa Chomücüx, ¡nuã chauxütawa yarüto!” ñanagürü tá cuxü. Rü ngëmaãcü ngëma petaarü yora rü wüxi i mexü tá cumaã naxü napëxewa i guxüma i duüxügü i nüxna naxuxü i cumaã ngëma rütogüxü. ¹¹ —Erü texé ya tügü írütaxe rü Tupana tá tüxü naxãnexëë. Natürü texé ya tügü íruxíraxe rü Tupana tá tüxü nicuëxüü —ñanagürü ga Ngechuchu. ¹² Rü ñanagürü ta ga Ngechuchu nüxü ga yema yatü ga nüxna uxü: —Rü ngëxguma wüxi i ðnacëx rü éxna petacëx texéna cuxuxchaügu, rü tama name i nüxna cuxu i cumücügü, rü bai i cueneëgü, rü bai i cutanüxügü, rü bai i curü ngaicamagu pegüxü i duüxügü i díeruãxgüxü. Erü nümagü rü tá nüxü cuxna naxugüe, rü ngëmaãcü tá cuxü nanaxütanügü. ¹³ —Natürü ngëxguma wüxi i peta cuxüxgu, rü narümemae nixí i nüxna cuxu i duüxügü i ngearü díeruãxgüxü, rü duüxügü i taxucürüwama puracüexü,

rü ngëma ichixeparagüxü, rü ngëma ingexetügüxü. ¹⁴—Rü tá cutaãëxüchi i ngëxguma erü nümagü rü taxucürüwa cuxü nanaxütanügü. Natürü tá cunayaxu i curü natanü i ngëxguma wena namaxëgu i Tupanaärü duüxügü i mexü —ñanagürü.

Ore i taxü i ðnagu ixuxü

(Mt 22.1-10)

¹⁵ Rü yexguma yemaxü naxĩnügü ga wüxi ga yatü ga mechawa rütöxü rü Ngechuchuxü ñanagürü: —Rü tataãë ya yíxema Tupana ãëxgacü íxixüwa chibüxe —ñanagürü. ¹⁶ Rü yexguma ga Ngechuchu rü ñanagürü nüxü: —Wüxi ga yatü nanaxü ga wüxi ga ðna ga taxü. Rü norü duüxüxü namu na nüxna yaxuxüçex ga muxüma ga duüxügü. ¹⁷ —Rü yexguma marü namexgu ga norü ðna, rü wena norü duüxüxü namu na yema duüxügü ga marü nüxna naxugüxümaã nüxü na yanaxuxüçex ga marü na namemarexü ga norü ðna, rü paxa yéma na naxixüçex. ¹⁸ —Natürü guxüma ga yema nüxna naxugüxü, rü inanaxügü ga nügü na ínaxuegüxü. Rü yema nüxĩra nüxna naxu rü ñanagürü:

“Ngexwacaxtama naxçex chataxe i wüxi i naãne. Rü paxa tá íchayadau. ¡Rü namaã nüxü ixu i cori rü taxucürüwama ngëma chaxü!” ñanagürü. ¹⁹—Rü ga yema to rü ñanagürü:

“10 i wocagü i puracürüçex chataxe, rü tá ngëmaxü chayaxü. ¡Rü namaxã nüxü ixu i cori rü taxucürüwama ngëma chaxü!” ñanagürü. ²⁰—Rü ga to rü ñanagürü:

“Ngexwacaxtama chaxãmèx rü ngëmacèx taxucürüwama ngema chaxü”, ñanagürü. ²¹—Rü yexguma nataegugu ga yema coriarü duüxü, rü norü corimaã nüxü nixu ga guxüma ga yema ore. Rü yexguma ga norü cori rü nanu, rü ñanagürü nüxü ga norü duüxü:

“¡Paxa ngema ítamügü i taxüwa rü ítamüacügüwa naxü, rü nuã nagagü i ngëma duüxügü i ngearü dïeruãxgüxü, rü ngëma duüxügü i taxucürüwama puracüexü, rü ngëma ichixeparagüxü, rü ngëma ingexetügüxü!” ñanagürü. ²²—Rü yixcamaxüra ga yema norü cori namaã nüxü ixuxü naxüxguwena rü yema norü duüxü ñanagürü nüxü:

“Pa Corix, marü chanaxü i ngëma chomaã nüxü quixuxürüü, natürü naxãchicaaneãmatama i nuã cupatawa”, ñanagürü. ²³—Rü yexguma ga norü cori rü ñanagürü nüxü:

“¡Paxa ngëma nama i taxügüwa rü nama i íraxügüwa naxü, rü nuã nagagü i togü i duüxügü na nuxã chopatagu nachocuxüçex, rü ngëmaãcü na naxãacuxüçex ya daa chopata! ²⁴ Erü pemaã nüxü chixu rü taxuüma ga yema nüxĩra nüxna chaxuxü rü nuã chorü ðnawa tá nachibüe”, ñanagürü.

Tama natauxcha na Cristuwe rüxüxü

(Mt 10.37-38)

²⁵ Rü muxüchixüma ga duüxügü Ngechuchuwe narüxĩ. Rü nadauegu ga Ngechuchu, rü ñanagürü nüxü: ²⁶ —Rü ngëxguma texé chowe rüxüxchaügu, rü tanaxwèxe i choxü tangechaü tümanatüarü yexera, rü tümaëärü yexera, rü tümamëxärü yexera, rü tümaxãcügüarü yexera, rü tümaëneëgüarü yexera, rü tümaëyëxgüarü yexera, rü tümaärü maxüärü yexera rü ta. Rü ngëxguma tama ngëmaãcü choxü tangechaügu rü taxucürüwama aixcüma chorü ngüexü tixĩ. ²⁷ —Rü yíxema tama naxwëxexë na chaugagu ngüxü tingeäcüma chowe tarüxüxü, rü taxucürüwama chorü ngüexü tixĩ. ²⁸ —Rü ngëxguma chi wüxie i petanüwa rü wüxi ya ípata ya

taxũne taxũxchaũgu, ¿rũ tama êxna i noxri i tanangugũxiraxũ na ñuxre i diẽru tá nagu ngĩxũ ítatáxũ? Rũ ngẽmawa nüxũ tacuèx rũ marũ tüxũ iyangu i ngẽma tũmaãrũ diẽru i tüxũ ngẽxmacũ na tayanguxẽxũcèx ya yima ĩ. ²⁹—Erũ ngẽxguma chi tama meã tanangugũgu i tũmaãrũ diẽru na ñuxregu tá naxãtanũxũ ya yima ĩ, rũ norũ caxtaxica chi itapugũgu rũ yixcũra rũ taxucũrũwa chi tanaguxẽẽgu i ngẽma puracũ, rũ guxũma i duũxũgũ i nüxũ daugũxũ i ngẽma tũmaãrũ puracũ rũ tá tüxũ nacugũe. ³⁰—Rũ ñanagũrũgũ tá:

“Ngẽma yatũ inanaxũgũ na naxũpataxũ, natũrũ taxucũrũwama nayan-guxẽẽ”, ñanagũrũgũ tá. ³¹—Rũ ngẽxguma wũxi i nachiũãneãrũ ãẽxgacũ rũ to i nachiũãneãrũ ãẽxgacũmaã nügũ nadaixchaũgu, ¿rũ tama êxna i noxri inangugũãxũ rũ ngoxi 10,000 i churragũ rũ yangu na nügũ nadaixũcèx namaã i norũ uwanũ i 20,000 i churaragũ nüxũ ngẽxmaxũ? ³²—Rũ ngẽxguma nangugũãgu na tama yanguxũ i norũ churaragũ rũ, ¿taux êxna i ngẽxguma yaxũwa nangẽxmagutama i norũ uwanũ, rũ naxũtawa namugũãxũ i norũ orearũ ngeruũgũ, rũ namaã nüxũ na yanaxugũexũcèx na nügũmaã nangũxmũẽxũ? ³³—Rũ ngẽxgumarũũ tá ta nixĩ i pemax, erũ ngẽxguma ngexerũxũxe i petanũwa tama ngema tanawogũgu i guxũma i tüxũ ngẽxmaxũ na chowe tarũxũxũcèx, rũ taxucũrũwama aixcũma chorũ ngũexũ tixĩ.

Ngẽxguma nangeacagu ya yucũra rũ taxuwama name

(Mt 5.13; Mr 9.50)

³⁴—Pema rũ ñoma yucũrarũũ pixĩgũ i ñoma i naãnewa, erũ yima yucũra rũ õna na namexẽẽxũrũũ rũ pema rũ ñoma i naãnecũãx i duũxũgũtanũwa rũ norũ mexẽẽruũ pixĩgũ. Name ya yucũra. Natũrũ ngẽxguma chi nangeacagu, ¿rũ ñuxãcũ tá wenaxãrũ naxããca? ³⁵—Rũ taxuwama name. Rũ woo waixũmũãrũ waxmũãnexẽẽruũcèx rũ tama name. Rũ ítanatẽxmare. Rũ yixema aixcũma ãchixexẽ, ¿rũ name nixĩ i nagu tarũxĩnũẽ i ñãã ore! —ñanagũrũ.

15

Ore i carneru i iyarũtaxuxũgu ixuxũ

(Mt 18.10-14)

¹ Rũ guxũma ga yema yatũgũ ga Dumaãrũ ãẽxgacũcèx diẽru ngĩxũ ideetanũxũ, rũ togũ ga duũxũgũ ga chixexũ ga nacũmagu ĩxũ, rũ Ngechuchucèx naxĩ na iyanaxĩnũẽxũcèx ga norũ ore. ² Rũ yemacèx ga Parichẽugũ rũ ngũxẽẽruũgũ ga Moĩchẽarũ mugũwa nguxẽẽtaegũxũ, rũ Ngechuchuxũ nixugũe, rũ ñanagũrũgũ: —Ñãã yatũ rũ norũ me nixĩ i pecaduãxgũxũmaã na naxãmũcũxũ, rũ namaã na nachibũxũ — ñanagũrũgũ. ³ Rũ yexguma ga Ngechuchu rũ ñãã ore ga cuẽxruũxũ namaã nixu, rũ ñanagũrũ: ⁴ —¿Texé i petanũwa rũ ngẽxguma tüxũ nangẽxmagu i 100 i tũmaãrũ carnerugũ rũ wũxi tüxũ iyarũtauxgu, rũ taux êxna i nachitaũwa tanawogũxũ i ngẽma 99, rũ naxcèx tayadauxũ i ngẽma tüxũ iyarũtaxuxũ ñuxmata nüxũ itayangau? ⁵—Rũ ngẽxguma nüxũ itayangẽuxgu rũ taãẽãcũma tũgũãtũgu tayagaxũ. ⁶—Rũ ngẽxguma tũmapatawa tanguxgu, rũ tanangutaquẽxexẽẽ i tũmamũcũgũ, rũ duũxũgũ i tũmaãrũ ngaicamagu pegũxũ, rũ ñatagũxũ nüxũ:

“¡Wũxigu chomaã petaãgũ, Pa Chomũcũgũ! Erũ marũ nüxũ ichayangau i ngẽma chorũ carneru ga iyarũtaxuxũ”, ñatagũxũ nüxũ. ⁷—Rũ pemaã nüxũ chixu rũ ngẽxgumarũũ ta nataãgũ i daxũcũãx i ngẽxguma

nangëxmagu i 99 i duüxügü i mexügü i marü Tupanaärü ixīgüxü, natürü yexeraäcü nataäëgü i ngëxguma wüxi i duüxü i pecaduäxü nüxü rüxoxgu i nacüma i chixexü rü Tupanaäxü yaxöögu —ñanagürü.

Ore ga dïeru ga iyarütauxcügu ixuxü

⁸ Rü Ngechuchu rü wüxi ga to ga ore ga cuëxruüxü nixu, rü ñanagürü: —Ngëxguma chi wüxi i ngecüaxü nangëxmagu i 10 tachinü i dïeru, rü wüxi ngixü iyarütauxgu, ¿rü taux ëxna i omüwa nangixichiäxü rü nabixichiäxü ya ngipata, rü meäma ngixcëx nadauxü ñuxmata ngixü iyangau? ⁹ —Rü ngëxguma ngixü iyangauxgu, rü inangutaquëxexëe i ngimücügü i ngexügü rü ngitanüxügü i ngirü ngaicamagu pegüxü, rü ngixü nüxü:

“¡Wüxigu chomaã petaäëgü, Pa Chomücügüx! Erü marü ngixü ichayangau i ngëma chorü dïeru ga iyarütauxchirëxcü”, ngixü. ¹⁰ —Rü pemaã nüxü chixu rü ngëxgumarü ta nataäëgü i daxüçüäx i Tupanaärü orearü ngeruügü i ngëxguma wüxi i duüxü i pecaduäxü nüxü rüxoxgu i nacüma i chixexü rü Tupanaäxü yaxöögu —ñanagürü ga Ngechuchu.

Ore ga wüxi ga ngextüxcü ga nanatüna ixücügu ixuxü

¹¹ Rü ñanagürü ta ga Ngechuchu: —Nayexma ga wüxi ga yatü ga taxre ga nane nüxü yexmacü. ¹² —Rü guma rübumaëcü, rü nanatüxü ñanagürü:

“Pa Pa, ¡choxna naxã i ngëma curü ngëmaxügü i choxna üxü!” ñanagürü. Rü yexguma ga nanatü rü yema taxre ga nanemaã nayatoye ga norü yemaxügü. ¹³ —Rü ñuxre ga ngunexüguwena rü guma nane ga rübumaëcü rü nananutaquëxe ga guxüma ga norü yemaxügü rü namaã nataxe. Rü yema dïerumaã rü to ga nachiuänewa naxü. Rü chixri yéma namaxü, rü yemaäcü ngixü naguxëe ga guxcüma ga norü dïeru. ¹⁴ —Natürü yexguma marü ngixü naguxëëguwena ga guxcüma ga norü dïeru, rü poraäcü nataxu ga ðna ga yema nachiuänewa. Rü yemacëx ga guma ngextüxcü rü inanaxügü ga taiya nüxü na ngüxü. ¹⁵ —Rü yexguma rü norü puracüçëx nadau naxütagu ga wüxi ga yatü ga yema nachiuäneçüäx. Rü nüma ga yema yatü rü norü naänewa nanamu na yéma norü cuchigüna yadauxüçëx. ¹⁶ —Rü düxwa nüxü nachixéga ga yema cuchiwemü, yerü poraäcü nataiyaxüchi. Natürü taxüema ðna nüxna taxã. ¹⁷ —Rü yexguma naäëwa nagu narüxinü, rü ñanagürü:

“¿Ñuxre i chaunatüarü puracütanüxü rü nüxü nangëxma i ðna rü nüxü inayaxü? Rü choma i nuã rü taiyamaã tá nuxma chayü. ¹⁸ —Rü chaunatüçëx tá chataegu, rü ñachagürü tá tüxü: ‘Pa Papax, marü chixexü Tupanapewa chaxü rü cupewa rü ta. ¹⁹ —Rü tama marü chame na Chaune, ñacuxü choxü. ¡Rü wüxi i curü puracütanüxüxü choxü ixixëe!’ ñacharügü tá tüxü ya chaunatü”, ñanagürü. ²⁰ —Rü inaxüächi rü nanatüpatacëx nataegu. Rü yexguma yangaicagu ga nanatüpata, rü yaxügu nüxü tadau ga nanatü, rü tüxü nangechaütümü. Rü naxcëx tiña, rü nüxna tanëixächi, rü nüxü tachüxu. ²¹ —Rü yexguma ga nüma ga tümame rü ñanagürü tüxü:

“Pa Papax, marü chixexü Tupanapewa chaxü, rü cupewa rü ta. Rü ngemacëx marü tama name na ‘Chaune’ ñacuxü choxü”, ñanagürü. ²² —Natürü tüma ga nanatü rü tümaärü duüxügüxü ñatarügü:

“¡Paxa nuã penange i naxchiru i mexëchixü rü peyacüxcuchix! ¡Rü wüxi i anera ta naxmëxwa ngixü pingëxcuchix! ¡Rü chapatu rü ta nuäta penge, rü peyacuaixcuchix! ²³ —¡Rü peyayaxux i ngëma wocaxcü i

rüngümaexũ, rü peyamá, rü ngĩxã namaã tachibüe rü tapetae! ²⁴ — Erü daa chaune rü chauxcèx rü marü nayu, natürü maxücü chauxcèx ínangu. Rü marü inayarütauxchirèx, rü wenaxârü nangox”, ñanagürü. Rü yexguma inanaxügüe ga na napetaegüxũ. ²⁵ —Rü yoxni ga guma nane ga rüyamaècü, rü naãnewa nayexma. Rü yexguma nataegugu rü marü ñârü ngaicamana nangugu, rü nüxũ naxĩnũ ga na ínapaxetagüxũ rü íyaxũãchitanüxũxũ. ²⁶ —Rü wüxi ga nanatüarü duüxüçèx naca, rü nüxna naca ga tacü na ínaxüexũ ga íwa. ²⁷ —Rü yema nanatüarü duüxũ rü nanangãxũ, rü ñanagürü: “Cueneë rü marü ínangu. Rü ngëmacèx cunatü toxũ tamu na tayamáxüçèx i ngëma wocaxacü i rüngümaexũ, erü cueneë rü mecü ínangu rü tama niðaawe”, ñanagürü nüxũ. ²⁸ —Natürü ga guma naëneë ga rüyamaècü rü nanu, rü tama ígu naxücuchaũ. Rü yemacèx düxwa ga nanatü rü naxcèx ítaxũxũ, rü nüxũ tayacèèxũ na yaxücuxüçèx. ²⁹ —Rü nüma rü ñanagürü tüxũ ga nanatü:

“Cuma nüxũ cucuèx i ñuxre ya taunecü cuxũ chapuracü, rü taguma chixri cuga chaxĩnũ. Rü bai i ñuxgu wüxicana wüxi i chibuxacü choxna cumu na chomüçügümaã chapetaexüçèx. ³⁰ —Natürü ñuxma na ínanguxũ i ngëma cune i chixri curü diëru ngĩxũ guxèèxũ nagu i ngexügü i ngëãèxũ, rü naxcèx cuyamèx i ngëma wocaxacü i rüngümaexũ”, ñanagürü. ³¹ —Rü yexguma ga nanatü rü ñatarügü nüxũ:

“Pa Chaunex, cuma rü guxütguma chauxütawa cungèxma, rü guxüma i chorü ngëmaxügü rü cuxrü nixĩ. ³² —Natürü ñuxma rü name nixĩ na ipetaegüxũ rü na itaãègüxũ erü cueneë ga guma chauxcèx rü marü yucü, rü maxücü taxcèx ínangu. Rü woo tüxna inayarütaxu, rü wenaxârü taxcèx nangox”, ñatarügü.

16

Ore ga yatü ga chixri norü coriarü yemaxüna dauxügu ixuxü

¹ Rü ñanagürü ta ga Ngechuchu norü ngüexüçüxũ: —Nayexma ga wüxi ga cori ga muârü yemaxüãxüchixũ. Rü nüxũ nayexma ga wüxi ga norü duüxü ga norü yemaxüârü dauruũ. Natürü togü ga duüxügü rü norü corimaã nüxũ nixugü na yema norü duüxü rü chixri norü yemaxüna na nadauxũ. ² —Rü yexguma ga yema cori rü yema norü duüxüçèx naca, rü ñanagürü nüxũ:

“Düçèx, cuchigaxü chomaã nixugügü i duüxügü. ¿Rü tacü nixĩ i ngëma? ¿Rü chomaã nüxũ ixu rü ñuxãcü nixĩ i curü puracü, erü marü tãütama chorü ngëmaxüârü dauruüxü cuxũ chixixèè!” ñanagürü nüxũ. ³ —Rü yexguma ga yema coriarü duüxü rü nagu narüxĩnũ, rü nügüãewa ñanagürü:

“¿Tacü tá chaxü i ñuxmax, erü chorü cori rü marü choxũ ínatèxüchi i ngëma chorü puracüwa? Tama chapora na naãnewa chapuracüxüçèx, rü chaxãne na diërucèx na íchaçaxũ nüxna i togü. ⁴ —Rü marü nüxũ chacuèx na tacü tá na chaxüxũ na choxũ nangëxmaxüçèx na texé tûmapatawa choxũ yaxuxũ i ngëxguma changearü puracüãxgu”, ñanagürü. ⁵ —Rü yexguma nügüxütawa naxcèx naca ga wüxichigü ga yema duüxügü ga norü coriaxü yangetanügüxũ. Rü yema nüxĩra yéma naxütawa nguxüna naca, rü ñanagürü:

“¿Ñuxre i nüxũ cungetanüxũ i chorü cori?” ñanagürü. ⁶ —Rü nüma nanangãxũ, rü ñanagürü:

“Nüxü chanangetanü i 100 i data i chixü”, ñanagürü. Rü yema coriarü duüxü rü ñanagürü nüxü:

“Ñã nixi i popera i curü ngetanü nawa ngóxü. ¡Rü paxa íruto rü to i popera naxü, rü 50 i dataguxicatama naxü i curü ngetanü!” ñanagürü. ⁷—Rü yemawena rü yema to ga duüxü ga norü coriaxü nangetanüxüna naca, rü ñanagürü:

“¿Cuma rü ñuxre yixü i nüxü cungetanüxü i chorü cori?” ñanagürü. Rü nüma rü nanangäxü, rü ñanagürü:

“Nüxü chanangetanü i 100 i choca i trigu”, ñanagürü. Rü yema coriarü duüxü rü ñanagürü nüxü:

“Ñã nixi i popera i curü ngetanü nawa ngóxü. ¡Rü paxa íruto rü to i popera naxü rü 80 i chocaguxicatama naxü i curü ngetanü!” ñanagürü. ⁸—Rü norü cori rü nüxü nicuèxüñãma ga yema norü duüxü ga chixexü, yerü nüxü nadau ga ñuxäcü na naxãäëxüchixü. Rü pemaã nüxü chixu rü ñoma i naãnecüãx i duüxügü, rü ngëma Tupanaãxü yaxögüxü i duüxügüarü yexera paxa naxcëx nadaugü na ñux- äcü nüxü natúxü i duüxügü. ⁹—Rü pemaã nüxü chixu rü ngëma ñoma i naãne i chixexüwa pexü ngëxmaxü rü name nixi i ngëmamaã nüxü penangüchaüxëë i duüxügü na Tupanaxütawa nangugüxü. Rü ngëmaãcü i ngëxguma naguxgu i ngëma ñoma i naãnewa pexü ngëxmaxü rü peyuxgu, rü tá pexü nangëxma ya Penatü ya pexü yaxucü i daxüguxü i naãnewa. ¹⁰—Yixema meã namaã icuáxe ega woo noxretama tümamëxëwa ngëxmagu, rü ngëxguma muxüma tümamëxëwa ngëxmagu rü tá ta meã namaã itacuëx. Natürü yixema chixri namaã icuáxe ega noxretama tümamëxëwa ngëxmagu, rü ngëxguma muxüma tümamëxëwa ngëxmagu rü ngëxgumarüü tá ta chixri namaã itacuëx. ¹¹—Rü ngëxguma tama meã namaã ipecuëxgu i ngëma pexmëxwa ngëxmaxü i ñoma i naãne i chixexüwa, ¿rü texé tá pexmëxgu tanaxü i ngëma aixcüma mexü i Tupanaärü ixixü? ¹²—Rü ngëxguma tama meã namaã ipecuëxgu i ngëma Tupana pexna äxü i ñoma i naãnewa, ¿rü ñuxäcü tá pexna nanaxã i pechica i daxüguxü i naãnewa? ¹³—Taxucürüwama i wüxi i duüxü rü nataxrearü coriãx. Erü wüxi i norü corichi rü tá naxai, rü ngëma to rü tá nüxü nangechaü. Rü ëxna wüxicëx rü tá meã napuracü rü ngëma to rü tá nüxü naxo. Rü pema rü taxucürüwama Tupanacëx pemaxë ega perü diëruguxicatama perüxñnüëgu —ñanagürü ga Ngechuchu. ¹⁴Natürü ga yema Parichéugü rü poraäcü norü diërugama narüxñnüë. Rü yemacëx Ngechuchuxü nacugüe ga yexguma nüxü naxñnüëgu ga guxüma ga yema ore. ¹⁵Rü yexguma ga Ngechuchu rü ñanagürü nüxü: —Pema nixi i duüxügüpëxewa meã pemaxënetaxü, natürü Tupana pexü nacuëx na tacügu perüxñnüëxü. Rü woo duüxügü pexü nicuèxüügü naxcëx i ngëma pexüxü, natürü Tupana rü naãëwa nangux i ngëma —ñanagürü ga Ngechuchu.

Tupanaärü mugü ga Moiché ümatüxü rü ñuxäcü äëxgacü na yixü ya Tupanachiga

¹⁶ Rü yexguma ga Ngechuchu rü ñanagürü: —Noxri nayexma ga Tupanaärü mugü ga Moiché duüxügüxü nguxëëxü, rü yema nguxëëtae ga nuxcümaügüxü ga Tupanaärü orearü uruügü duüxügüxü namaã nguxëëxü. Natürü yexguma Cuãü ga baiüxëëruü inguxguwena, rü marü duüxügümaã nüxü chixuchiga i Tupanaärü ore i mexü i ñuxäcü äëxgacü na yixü. Rü ñuxma rü guxüma i ngëma duüxügü rü poraäcü nügü

naporaexêê na yachocuxûcèx i ngema Tupana âêxgacû íixîxûwa. ¹⁷ — Naxûpa na yanguxû i Tupanaârû mugû rû woo wûxi i mu i íramarexû yixîgu, rû naguxchaxûchi na iyanaxoxû i ngema nûxû yaxuxû. Natûrû aixcûma narûtauxchamaê nixî na iyanaxoxû i ñoma i naâne rû guxûma i ngema daxûwa nûxû idauxû.

Ngechuchu namaã nangûexêêtae na tama namexû na texé tûmamaxû ítáxû

(Mt 19.1-12; Mr 10.1-12)

¹⁸ — Ngêxguma wûxi ya yatû ítámèxgu rû naí i ngemaã naxâmèxgu rû Tupanapêxewa rû pecadu naxû. Rû texé ya yíxema ngîmaã ãmaxê i wûxi i nge i ngîte ngîxû ítêxcû, rû Tupanapêxewa rû tûma rû ta pecadu taxû.

Yatû i dîeruãxûchixûchiga rû Dácharuchiga

¹⁹ — Nayexma ga wûxi ga yatû ga dîeruãxûchixû ga guxûguma mexêchixû ga naxchirugu icúxû. Rû guxû ga ngunexûgu rû taxûma ga ôna naxû rû napetaexû. ²⁰ — Rû nayexma ta ga wûxi ga yatû ga ngearû dîeruácû ga Dácharugu âegacû. Rû guxûguma yema dîeruãxûchixûpataêxwa nayarûtooxû. ²¹ — Rû guma Dácharu rû nanangôxchañ ga yema ônatûchi ga yema yatû ga dîeruãxûchixûârû mechawa rüyiiiixû. Rû naxcèx naxí ga airugû, rû nanawearû oxriãxgû. ²² — Rû wûxi ga ngunexû nayu ga guma ngearû dîeruácû, rû daxûcûãx ga Tupanaârû orearû ngeruûgû rû daxûguxû ga naãnewa nanagagû na wûxiwa Abráûmaã nayexmaxûcèx. Rû nayu ta ga yema yatû ga dîeruãxûchixû, rû inayatèxgû ga duûxgû. ²³ — Rû ngema nachica i Tupana ngoxogûxû nagu poxcuxûwa naxû ga yema yatû ga dîeruãxûchixû rû yéma poraacû ngúxû ninge. Rû daxû nadau, rû yaxûgu Abráûxû nadau na Dácharumaã wûxiwa nayexmaxû ga daxûguxû ga naãnewa. ²⁴ — Rû yexguma ga yema yatû ga dîeruãxûchichiréxû rû aita naxû rû ñanagûrû:

“Pa Oxi Pa Abráûx, jçuxû changechaütümû, rû nuã namu ya Dácharu na dexámaã nügû yawaixpêxemêxêácûma choxû yanawaixpêxearû conûãxúcèx! Erû poraacû choxû nangux i nuã úxûwa”, ñanagûrû. ²⁵ — Natûrû Abráû rû ñanagûrû nûxû:

“Pa Chaunex, jñuxna nacuèxãchi na taxuûma cuxû taxuxû ga yexguma cumaûxgu! Natûrû Dácharu rû poraacû chixexû nûxû naxûpetû. Rû ngêmacèx i ñuxma rû nuã mexûwa nangêxma, rû cuma rû ngema poxcuchicawa ngúxû quinge. ²⁶ — Rû ñuxûchi nangêxma i wûxi i taxûchixû i ngatexû i tórû ngãxûwa úxû. Rû ngêmacèx ega númacûãx ngema íxchaûgu, rû taxucûrûwama ngema naxí. Rû woo ngemacûãx núma íxchaûgu rû taxucûrûwama núma naxí”, ñanagûrû. ²⁷ — Rû yexguma ga yema yatû ga dîeruãxûchichiréxû rû ñanagûrû:

“Cuxû chacèèxû, Pa Oxi, Pa Abráûx, na chaunatûpatawa cunamuxúcèx ya Dácharu. ²⁸ — Erû ngema nangêxmagû ya wûximêêxpûx ya chaueneêgû. Rû chanaxwèxe na namaã nûxû na yanaxuxûcèx na tama nuã ñaã poxcuchica i poraacû choxû ínangúxûwa naxíxúcèx”, ñanagûrû. ²⁹ — Natûrû ga Abráû rû ñanagûrû nûxû:

“Cueneêgû nûxû nangêxma i Tupanaârû mugû ga Moíché úmatûxû rû yema ore ga nuxcûmaûgûxû ga Tupanaârû orearû uruûgû úmatûxû. Rû name nixî i ngema orega na naxínûèxû”, ñanagûrû. ³⁰ — Rû yexguma ga yema yatû ga dîeruãxûchichiréxû rû Abráûxû nangãxû, rû ñanagûrû:

“Ngẽmaãcü, Pa Oxi, Pa Abráũx, natürü ngẽxguma chi wüxi i duũxü i yuchiréxü ngema ũxgu rü namaã nüxü yanaxuxgu, rü chi nüxü narüxoe i nacüma i chixexü”, ñanagürü. ³¹—Natürü Abráũ, rü ñanagürü nüxü:

“Ngẽxguma tama naga naxĩnüëgu ga yema ore ga Moĩché ũmatüxü rü yema ore ga nuxcümaũgüxü ga Tupanaãrũ orearũ woũgü ũmatüxü, rü woo chi wüxi i marü yuwa írüdaxü i duũxü ngema ũxgu, rü namaã nüxü yanaxuxgu i ore, rü tãũ chima nüxü nayaxõgü”, ñanagürü.

17

Naxãücüma nixĩ na pecadugu inguxü
(Mt 18.6-7, 21-22; Mr 9.42)

¹ Rũ Ngechuchu rü norü ngüexũgüxü ñanagürü: —Rũ guxũgutãma nangẽxma i tacü i duũxũgüxü pecaduãxẽxü. Natürü wüxi i ngechaũ tá tũmacèx nixĩ ya yíxema duũxẽ ya togüxü pecadugu nguxẽxẽ. ²⁻³ —Rũ tũmacèx rü narümemãẽ nixĩ na tũmanaxãwa yangacuchixü ya wüxi ya nuta ya tacü rü ngẽmaãcü taxtüwa tüxü na itãexü naxüpa na pecadugu tananguxẽxü i wüxi i chorü duũxü. ¡Rũ ngẽmacèx name nixĩ i pexuãëgü i pemax! Rũ ngẽxguma wüxi i cueneẽ chixexü cumaã ũxgu rü ¡meã naxuxcuxẽ! Rũ ngẽxguma nüxü naxoxgu i nacüma i chixexü rü ¡nüxü nüxü nangechaũ i ngẽma! ⁴ —Rũ woo 7 êxpüxcüna chixexü cumaã naxüxgu i wüxi i ngunexũgu, rü 7 êxpüxcüna cuxna yacaxgu na nüxü nüxü cungechaũxücèx, rü name nixĩ i nüxü nüxü cungechaũ —ñanagürü ga Ngechuchu.

Ñuxãcü tabora ega yaxõxgu

⁵ Rũ norü ngüexũgü ga norü orearü uwa namugüxü rü ñanagürügü: —Pa Corix, ¡toxü rüngüxẽẽ na yexeraãcü tayaxõgüxücèx! —ñanagürügü.

⁶ Rũ yexguma ga Cori ga Ngechuchu rü ñanagürü nüxü ga norü ngüexũgü: —Rũ ngẽxguma chi woo naxĩraxüchigu i perü õ, rü daa naĩ rü chi pega naxĩnü ega ñapegügu:

“¡Cugü nabẽx i nuã rü taxtüchiügu cugü yato!” ñapegügu, rü chi pega naxĩnü.

Wüxi i ngüxẽẽruũãrũ puracüchiga

⁷ —Ngẽxguma chi wüxie i petanüwa rü tüxü nangẽxmagu i wüxi i tũmaãrũ duũxü i tũmaãnewa ne ũxü i puracüwa rü êxna carneruarü dauwa, rü tama nügücèxira naxüwemü. ⁸ —Natürü norü corixũxĩra naxüwemü na nachibüxücèx rü naxaxexücèx, rü nüma rü yixcama nachibü. ⁹ —Rũ norü cori rü tama moxẽ nüxna naxã na naxüwemüãxücèx, erü woetama ngẽma nixĩ i norü puracü i ngẽma norü duũxü. ¹⁰ —Rũ ngẽxgumarüũ tá pixĩgü i pemax. Erü ngẽxguma ngẽma Tupana pexü üxẽẽxüxĩcatama pexüxgu, rü penaxwèxe i pegü ñaperügügu:

“Puracütanüxü i taxuwama mexü tixĩgü, erü ngẽma nawa tüxü namuxũxĩcatama nixĩ i tinguxẽẽxü”, ñaperügügu —ñanagürü ga Ngechuchu.

Ngechuchu nanameẽxẽẽ ga 10 ga yatügü ga chaxüneãxgüxü

¹¹ Rũ yexguma namagu yaxüxgu ga Ngechuchu ga Yerucharéüwa na naxüxü, rü Chamãriaane rü Gariréaane nügümaã ixüyexüwa naxüpetü. ¹² Rũ yexguma wüxi ga ñanexãcüwa nanguxgu, rü yexma napẽxegu nayayi ga 10 ga yatügü ga chaxünemaã idaaweexü. Rũ yaxügu nüxü nachigü. ¹³ Rũ tagaãcü ñanagürügü nüxü: —Pa Ngechuchux, Pa Ngüexẽẽruũx, ¡cuxü tangechaũtümüügü! —ñanagürügü. ¹⁴ Rũ yexguma

Ngechuchu nüxü dèuxgu, rü ñanagürü nüxü: —¡Yéa paigüxütawa pexī, rü nüxü pegü peyawëxgü! —ñanagürü. Rü yexguma namagu naxīyane, rü naxcèx nitaanetanü ga yema yatügü. ¹⁵ Natürü natanüwa rü nayexma ga wüxi ga Ngechuchucèx taeguxü ga yexguma marü nügü nadèuxgu ga naxcèx na yataanexü. Rü tagaäcü Tupanaxü nicuèxüüchigü. ¹⁶ Rü Ngechuchupëxegu nanangücuchi rü moxë nüxna naxā. Rü yema yatü rü Chamáriaanecüãx nixī. ¹⁷ Rü yexguma ga Ngechuchu rü ñanagürü: —¿Taux éxna i 10 chiréx pixīgüxü na pexcèx chayataanexëégüxü? ¿Ngëxügü nixī i ngëma togü i 9 i yatügü? ¹⁸ —¿Rü ñaā to i nachiüãnecüãx i duüxüxīcatama nixī itaeguxü na Tupanaxü yacuèxüüxücèx? —ñanagürü. ¹⁹ Rü yexguma rü guma yatüxü ñanagürü: —¡Inachi rü íxü! Cuxcèx nitaane, erü cuyaxō —ñanagürü.

Ñuxäcü tá nixī i ngëxguma ínanguxgu ya Tupana na äëxgacü yīxü
(Mt 24.23-28, 36-41)

²⁰ Rü Parichéugü rü Ngechuchuna nacagü, rü ñanagürügü: —¿Ñuxgu tá nixī na yangucuchixü ya Tupana na äëxgacü yīxücèx i núma? —ñanagürügü. Rü Ngechuchu nanangäxü, rü ñanagürü: —Norü nguchiga ya Tupana rü tama wüxi i ñacü i nüxü idauxürüü nixī. ²¹ —Rü taxuacüma ñaperügügü:

“Daa nixī”, rü éxna “Gua nixī”, ñaperügügü. Erü marü petanüwa nangu ya Tupana na äëxgacü yīxücèx —ñanagürü. ²² Rü yexguma norü ngüexügüxü ñanagürü: —Rü tá pexcèx ínangu i ngunexü i nagu poraäcü tá choxü pedaügüchaüxü woo wüxi i paxaächicèxtama yixīgu. Natürü täütáma choxü pedaügü i ngëxguma. ²³ —Rü duüxügü rü tá ñanagürügü pexü:

“Daa nixī ya Cristu”, rü éxna, “Gua nixī ya Cristu”, ñanagürügü tá. Natürü pemax jrü täütáma nüxü peyaxögü, rü täütáma nawe perüxī! ²⁴ —Rü ngëxguma íchanguxgu i choma i Tupana Nane na duüxüxü chíxü, rü wüxi i äëmacü i guxüãneguma baxixürüü tá chixī. ²⁵ —Natürü noxri rü tá poraäcü ngüxü chinge, rü ñoma i naãnecüãx i duüxügü i ñuxma maxëxü rü tá choxü naxoe. ²⁶ —Rü yexgumarüü ga duüxügü na chixri maxëxü ga yexguma Noë maüxgu, rü ngëxgumarüü tá ta chixri namaxë i duüxügü i ngëxguma íchanguxgu i choma i Tupana Nane na duüxüxü chíxü. ²⁷ —Rü ga duüxügü ga yexguma rü nachibüe, rü naxaxegü, rü nixämëxgü, rü nixütexacügü ñuxmata nawa nangu ga yema ngunexü ga Noë naweügu nagu ixüexü. Rü ínangu ga mucü ga taxüchicü, rü guxüma ga yema duüxügü rü nayue. ²⁸ —Rü yexgumarüü ta nangupetü ga yexguma nuxcümaäcü ga Lox maüxgu. Rü duüxügü rü nachibüe, rü naxaxegü, rü norü yemaxücèx nataxegü, rü namaã nataxegü, rü nixüanegü rü nitoegü, rü nixüpatagü. ²⁹ —Natürü yexguma Lox ixüxgu nawa ga guma íãne ga Chodoma, rü daxüwa narüyi ga üxü ga naxīchine, rü nanadai ga guxüma ga yema duüxügü. ³⁰ —Rü ngëxgumarüü tá ta nangupetü i ngëxguma íchanguxgu i choma i Tupana Nane na duüxüxü chíxü. ³¹ Rü ngëma ngunexügu rü texé tama tümapataarü aixepewa ngëxmagu, rü tama name i tümapatagu tayangaxi na tümaärü ngëmaxügü tayatoxücèx. Rü texé ya tümaãnewa ngëmaxë, rü tama name i tümapatacèx tataegu na ñacü ngëma tayayaxücèx. ³² —Rü nüxna pecuèxächigü ga ñuxäcü ngüxü na naxüpetüxü ga Lox namëx ga na nayuxü, ga yexguma ngügüweama nadèuxgu. ³³ —Erü yíxema tügü maxëchaxëëchaüxë rü tá itayarütaxu,

natürü yíxema chauxcèx yuxe rü aixcüma tá tüxü nangëxma i maxü i taguma güxü. ³⁴—Rü pemaã nüxü chixu rü ngëma chütaxügu rü wüxi i ngürücarewa tá nangëxmagü i taxre i duüxügu. Rü wüxi tá niga, rü ngëma to rü tá ngëma natèx. ³⁵—Rü taxre i ngëxügu tá nügümaã ínacaegü. Rü wüxi tá niga rü ngëma to rü tá ngëma natèx. ³⁶—Rü taxre i yatügu rü wüxi i naãnewa tá nangëxmagü. Rü wüxi tá niga rü ngëma to rü tá ngëma natèx —ñanagürü ga Ngechuchu. ³⁷ Rü yemaxü naxínüëgu ga norü ngüexügu, rü Ngechuchuna nacagü, rü ñanagürügü: —Pa Corix, ¿ngextá tá nixí i nangupetüxü i ngëma nüxü quixuxü? —ñanagürügü. Rü nüma ga Ngechuchu rü nanangäxü, rü ñanagürü: —Duüxügu rü tá chauxcèx nangutaquëxegü ñoma ëxchagü nawemücèx ngutaquëxexürü —ñanagürü.

18

Ore ga ãëxgacügu rü yutecügu ixuxü

¹ Rü Ngechuchu rü wüxi ga to ga orexü namaã nixu na yemawa nangüexëãxücèx na ñuxácü nanaxwëxexü na taguma nüxü nachaueácüma guxüguma nayumüxëgüxü. ² Rü ñanagürü nüxü ga norü ngüexügu: —Wüxi ga íãnewa nayexma ga wüxi ga ãëxgacü ga tama Tupanaga íñuxü rü taxüexüma ngechaüxü. ³—Rü guma íãnewatama iyexma ga wüxi ga nge ga yutecü ga ngxü nayexmacü ga wüxi ga guxcha namaã ga to ga duüxü. Rü yemacèx yema ãëxgacüxütawa ixüxecha na ngxü namexëãxücèx ga yema guxcha. ⁴—Rü muëxpüxcüna yéma ixüüxü, natürü yema ãëxgacü rü tama ngixü narüngüxëëchaü. Natürü düxwa nagu narüxínü ga yema ãëxgacü rü naãewa ñanagürü:

“Choma rü tama Tupanaxü changechaü, rü taxüexüma chacuáxchaü. ⁵ —Natürü ngëma choxü na nachixeweechaxücèx i ñaã nge, rü noxtacüma tá ngixü charüngüxëë na tama yeücürü choxü nachixeweechaxücèx”, ñanagürü. ⁶ Rü Cori ga Ngechuchu rü ñanagürü: —Yema nixí ga norü ore ga yema ãëxgacü ga chixexü. ⁷—¿Taux éxna i Tupana rü paxa tüxü ínapoxüxü ya yíxema duüxë ya tüxü nayaxuxe i ngëxguma chütacü rü ngunecü rü norü ngüxëecèx nüxna tacaxgu i túmaärü yumüxëwa? ⁸—Rü pemaã nüxü chixu rü Tupana rü paxatáma tüxü narüngüxëë. Natürü ngëxguma wenaxärü núma chaxüxgu i choma i Tupana Nane na duüxüxü chíixü, ¿rü ñuxre i duüxügu i aixcüma yaxögüxüxü tá ichayangau i ñoma i naãnewa? —ñanagürü ga Ngechuchu.

Ore i Parichégu ixuxü rü dïëruarü deruügu ixuxü

⁹ Rü Ngechuchu rü nüxü nixu ga ñaã ore nachiga ga yema duüxügu ga nügü írümegünetaxü rü tama togüxü cuáxchaügüxü. ¹⁰ Rü ñanagürü: —Taxre ga yatü rü tupauca ga taxünewa nayayumüxëgü. Rü wüxi rü Parichéu nixí, rü yema to rü wüxi ga yatü ga Dumaärü ãëxgacücèx dïëru ngixü dexü nixí. ¹¹—Rü yema Parichéu rü yexma nachí, rü ñaãcü nayumüxë:

“Pa Tupanax, moxë cuxna chaxã erü tama togü i duüxügürüü chixí. Rü tama togürüü changítèx, rü tama ngëmarüü taxü i chixexü chaxü rü éxna wüxi i nge i átecümaã ichape. Rü bai i ñaã yatü i Dumaärü ãëxgacücèx dïëru ngixü dexürüü chixí. ¹²—Choma rü guxcü ya yüxügu rü taxreëxpüxcüna chaxaure rü tama chachibü na cugu charüxínüxücèx. Rü chorü dïëruwa rü guxüguma meã cuxna chanaxã i ngëma cuxna üxü”,

ñanagürü. ¹³ —Natürü ga guma yatü ga Dumaärü äëxgacüçèx dīëru ngīxü decü, rü yaxügu narüxäüx. Rü namuü ga daxü na nadawenüxü, rü yema norü ngechaümaä nügü napaxremü, rü ñanagürü:

“Pa Tupanax, ¡Cuxü changechaütümüü! Erü wüxi i pecaduäxü chixī”, ñanagürü ga guma yatü. ¹⁴ —Rü ngëmacèx pemaä nüxü chixu rü guma yatü ga Dumaärü äëxgacüçèx dīëru ngīxü decü rü yexguma napatacèx nataegugu rü Tupanaxewewa rü mecü nixī. Natürü yema Parichéu rü Tupana rü tama namaä nataäë. Erü texé ya tügü icuèxüxüxe rü Tupana tá tükü naxänexëë. Natürü texé ya tama tügü icuèxüxüxe rü Tupana rü tá tükü nicuèxüxü —ñanagürü ga Ngechuchu.

Ngechuchu rü meä buäxgüxü nayaxu

(Mt 19.13-15; Mr 10.13-16)

¹⁵ Rü yéma Ngechuchuxütawa tükü tagagü ta ga buäxgü na tükü yangögüchigüçèx. Natürü yexguma norü ngüexügü yemaxü dauxgügu rü tükü ningagü ga guxema tümäxäcügü Ngechuchuxütawa tükü gagüxe. ¹⁶ Natürü Ngechuchu rü nügüxütawa tümacèx naca ga guxema buäxta rü ñanagürü norü ngüexügüxü: —Chanaxwëxe i chauxütawa naxī i buxügü. ¡Rü täxü i nüxna penachuxuxü! Erü Tupana äëxgacü íxixüwa rü tümacèx nixī ya yixema ñaä buxügürü ixigüxe. ¹⁷ —Aixcüma pemaä nüxü chixu rü texé ya tama wüxi i buxürü Tupanaxü yaxüxe na tümäärü äëxgacü na yīxüçèx, rü tagutáma nagu taxücu i Tupana äëxgacü íxixüwa —ñanagürü ga Ngechuchu.

Wüxi ga yatü ga dīëruäxüchicü Ngechuchumaä nidexa

(Mt 19.16-30; Mr 10.17-31)

¹⁸ Rü wüxi ga yema Yudiügüarü äëxgacü rü Ngechuchuna naca rü ñanagürü: —Pa Ngüexëëruü ya Mecüx, çtaçü tá chaxüxü na chanayax-üçèx i maxü i taguma gúxü? —ñanagürü. ¹⁹ Rü Ngechuchu nanangäxü rü ñanagürü nüxü: —¿Tüxcüü “Mecü” ñacurügü choxü? Erü Tupanaxīcatama nixī ya mecü ixicü, rü nataxuma i to i mecü ixixü. ²⁰ —

Cuma nüxü cucuèx i Tupanaärü mugü i ñaxü: “¡Täütáma na i ngemaä icupe, rü täütáma cumáëta, rü täütáma cungitèèx, rü täütáma doraxü quixu i togüchiga, rü tümaga naxinü ya cunatü rü cue!”

²¹ Rü yexguma ga guma yatü rü ñanagürü Ngechuchuxü: —Woetama chorü bucüma meäma chayangüxëë i guxüma i ngëma mugü i nüxü quixuxü —ñanagürü. ²² Rü yemaxü naxinügu ga Ngechuchu rü ñanagürü: —Wüxixicatama cuxü nataxu, rü ngëma nixī na namaä cutaxexü i guxüma i curü ngëmaxügü rü togü i ngearü ngëmaxüäxgüxüna na cunaxäxü i curü natanü, rü ngëxguma rü tá cuxü nangëxma i cuchica i daxügüxü i naänewa. Rü ñuxüchi marü name i chowe curüxü —ñanagürü. ²³ Natürü yemaxü naxinügu ga guma yatü rü poraäcü in-ayarümaächi, yerü namuärü dīëruäxüchi. ²⁴ Rü yexguma Ngechuchu nüxü dëuxgu ga ñuxäcü na nangechaüxü, rü ñanagürü nüxü ga norü ngüexügü: —Naguxchaxüchi tá nixī na Tupana äëxgacü íxixüwa na yachocuxü i ngëma dīëruäxüchigüxü. ²⁵ —Rü dücax, wüxi i cameyu rü taxucürüwama wüxi ya ucumaxëtüwa naxüpetü. Rü ngëxgumarü ta nixī i wüxi i duüxü i dīëruäxüchixü rü taxucürüwama Tupana äëxgacü íxixüwa nixücu [ega norü dīëruaguama naxinügu rü tama yaxöðgu —ñanagürü.]

²⁶ Rü yexguma yemaxü naxinüëgu ga duüxügü rü ñanagürügü: —¿Éxna

texé tá ya nayaxúxe i maxũ i taguma gúxũ? —ñanagürügü. ²⁷ Rũ Ngechuchu ñanagürü nüxũ: —Duũxũgü rü taxuacüma nügü namaxëë, natürü Tupanaãxũ rü natauxcha na namaxëxëãxũ —ñanagürü. ²⁸ Rũ Pedru ñanagürü Ngechuchuxũ: —Pa Corix, toma rü yéma tanawogü ga guxũma ga torü yemaxũgü na cuwe tarüxĩxũcèx —ñanagürü. ²⁹⁻³⁰ Rũ yexguma ga Ngechuchu rü ñanagürü nüxũ ga norü ngúexũgü: —Aixcüma pemaã nüxũ chixu rü texé ya Tupanacèx tümapatana, rü êxna tümanatüna, rü êxna tümaëna, rü êxna tümaëneëgüna, rü êxna tümaëyëxgüna, rü êxna tümamëxna, rü êxna tümaxãcügüna ngëma ixüxë na Tupanaãxũ tapuracüxũcèx, rü ñoma i naãnewa tátama poraãcü tanayaxu i tümaãrũ natanü. Rũ daxũguxũ i naãnewa rü tá ta tanayaxu i maxũ i taguma gúxũ —ñanagürü.

*Ngechuchu rü wenaxãrũ nanaxunagü ga norü yuxchiga
(Mt 20.17-19; Mr 10.32-34)*

³¹ Rũ Ngechuchu rü noxrüwama naxcèx naca ga norü ngúexũgü, rü ñanagürü nüxũ: —Ñuxma rü Yerucharéüwa tá taxĩ na ngëma yanguxũcèx i guxũma ga yema ore ga nuxcümaũgüxũ ga Tupanaãrũ orearü uruũgü ümatüxũ ga chauchiga. ³² —Rũ Yerucharéücüãx i duũxũgü rü tá to i nachüüñecüãxna choxũ namugü. Rũ ngëma duũxũgü rü tá chaugu nidauxcüraũgü, rü tá chomaã naguxchigagü, rü tá chauchiwewa nacuaixgü. ³³ —Rũ tá choxũ naçuaixgü, rü yixcüra rü tá choxũ nimëxgü. Natürü tomaëxpüx i ngunëxüguwena rü tá wenaxãrũ chamaxũ —ñanagürü. ³⁴ Natürü yema norü ngúexũgü rü tama nüxũ nacuëxgüéga ga na ñacüchiga yĩxũ ga yema ore ga namaã nüxũ yaxuxũ. Yerü poraãcü nüxũ naguxcha ga aixcüma nüxũ na nacuëxgüxũcèx.

*Ngechuchu nanamexëë ga wüxi ga ngexetücü ga Yericüwa
(Mt 20.29-34; Mr 10.46-52)*

³⁵ Rũ yexguma Ngechuchu iãne ga Yericüwa ngxuchaũgu, rü yéma namacüwawa narüto ga wüxi ga yatü ga ngexetücü ga diërucèx yéma iwémécü. ³⁶ Rũ yexguma guma ngexetücü nüxũ ñnügü ga muxũma ga duũxũgü na yéma chopetüxũ, rü duũxũgüna naca ga ñacü na ngupetüxũ. ³⁷ Rũ nanangãxũgü, rü ñanagürügü: —Ngechuchu ya Nacharëtucüãx nuã naxüpetü —ñanagürügü. ³⁸ Rũ yexguma ga guma ngexetücü rü tagaãcü ñanagürü: —Pa Ngechuchux, Pa Dabítanüxũx, ¡cuxũ changechaũtümüü! —ñanagürü. ³⁹ Rũ yema duũxũgü ga Ngechuchupëxegu ñxũ, rü nanangagü ga na iyanangeáxũcèx. Natürü guma ngexetücü rü yexeraãcü tagaãcü ñanagürü: —Pa Dabítanüxũx, ¡cuxũ changechaũtümüü! —ñanagürüama. ⁴⁰ Rũ yexma nayachiãchi ga Ngechuchu, rü duũxũgüxũ namu na naxütawa nagagüãxũcèx. Rũ yexguma marü naxütawa nanguxgu, rü guma ngexetücüna naca ga Ngechuchu, rü ñanagürü: ⁴¹ —¿Tacü i cunaxwèxexũ na cumaã chanaxüxũ? —ñanagürü. Rũ guma ngexetücü nanangãxũ rü ñanagürü: —Pa Corix, chanaxwëxe na choxũ quidauchixëëxũ —ñanagürü. ⁴² Rũ Ngechuchu ñanagürü nüxũ —¡Idauchi! Rũ marü cuxcèx nitaane erü cuyaxõ —ñanagürü. ⁴³ Rũ yexgumatama nidauchi ga guma ngexetücü, rü Ngechuchuwe narüxũ, rü Tupanaxũ nicuëxüchigü. Rũ guxũma ga duũxũgü ga nüxũ daugüxũ ga yema ngupetüxũ rü Tupanaxũ nicuëxüũgü ta.

19

Ngechuchu rü Zaquéuchiga

¹ Rü Ngechuchu rü Yericúarü ñanewa naxüpetü. ² Rü yéma nayexma ga wüxi ga yatü ga díeruãxüchixü ga Zaqéuğu ägaxü. Rü nüma nixi ga naeru ga yema yatüğü ga Dumaärü äëxgacüçex díeru ngixü ideetanüxü. ³ Rü yema Zaqéu rü poraäcü nüxü nangúchaü ga Ngechuchuxü na nadauxü na nüxü nacuáxüçex. Natürü taxuacüma nüxü nadau, yerü namuxüchi ga duüxüğü, rü ñuxüchi nanuxchanexüchi ga nümax. ⁴ Rü yemacëx Ngechuchupëxegu nayangu, rü namacüwawa wüxi ga naïgu naxïnagü na Ngechuchuxü nadauxüçex ga yexguma yéma naxüpetüğü. ⁵ Rü yexguma yéma naxüpetüğü ga Ngechuchu, rü daxü nadau natüüwa ga guma nai. Rü ñanagürü nüxü: —Pa Zaqéux, ipaxa íruxi i ngema! Erü cupatawa tá changu i ñuxma —ñanagürü. ⁶ Rü paxa ínarüxi ga Zaqéu, rü taäëäcüma Ngechuchuxü nayaxu. ⁷ Rü yexguma yemaxü nadaugüğü ga duüxüğü, rü guxüma inanaxüğüe ga chixri Ngechuchuchiga na yadexagüxü. Rü ñanagürüğü: —¿Ñuxäcü i nüma rü wüxi i duüxü i pecaduáxüpatawa nangu? —ñanagürüğü. ⁸ Rü yexguma ga Zaqéu rü inachi rü ñanagürü Ngechuchuxü: —Düçex, Pa Corix, choma rü ngearü díeruãxgüxüna tá chanaxä i ngäxüğü i guxüma i chorü ngëmaxüğü. Rü ngëxguma chi texé tüxü chawomüxëëäcüma tüxü changixgu, rü ägümücüexpüxcüna tá tüxü ngixü chataeguxëe i ngëma tümaärü díeru —ñanagürü. ⁹ Rü Ngechuchu rü ñanagürü nüxü: —Rü ñoma i ngunexüğü cupatawa nangu i maxü i taguma güxü, erü cuma rü ta rü Abráürü cuyaxö. ¹⁰ —Rü choma i Tupana Nane na duüxüxü chiixü, rü ñoma i nañewa chaxü na naxcëx chayadauxüçex i ngëma duüxüğü i iyarütauxexü na chanamaxëxëxüçex —ñanagürü.

*Ore i díerugu ixuxü**(Mt 25.14-30)*

¹¹ Rü yoxni yema Ngechuchuarü ore inaxïnüeyane ga duüxüğü, rü Ngechuchu rü wüxi ga to ga ore ga cuëxruüxü namaä nixu, yerü marü Yerucharéüxü ningaica, rü duüxüğü nagu rüxïnüegu rü paxa tá íangu ga Tupana na norü äëxgacü yixüçex. ¹² Rü yexguma ga Ngechuchu rü nügüchiga nidexa rü ñanagürü nüxü: —Nayexma ga wüxi ga yatü ga taxü ga cori íxücü ga nayaxücü ga ore na nachüüñaneärü äëxgacüxütawa naxüxüçex ga yaxüwa na yema äëxgacü nüxü unetaxüçex na guma nawa ne naxüxüne ga íañeärü äëxgacü yixüçex. ¹³ —Rü yexguma tauta inaxüächigu, rü naxcëx nangema ga 10 ga norü duüxüğü. Rü wüxichigüna ngixü naxä ga wüxítachinü ga tatanücü ga díeru. Rü ñanagürü nüxü:

“¡Ngímaä pepuracüe rü ngixü pimuxëe i ñaä díeru ñuxmatáta chataegu!” ñanagürü. ¹⁴ —Natürü yema íañecüãx ga duüxüğü rü naxchi naxaie ga guma cori. Rü yemacëx nawenaäma nayamugü ga ñuxre ga orearü ngerüğü na nachüüñaneärü äëxgacümaä nüxü yanaxugüxüçex na tama nanaxwëxegüxü na norü äëxgacüxü na yixüçex ga guma cori. ¹⁵ —Natürü nachüüñaneärü äëxgacü rü nayangucuchixëëäma ga guma cori. Rü ñuxüchi ga guma cori rü norü íañecëx nataegu na yéma äëxgacü na yixüçex. Rü yexguma íanguxgu rü naxcëx nangema ga yema 10 ga norü duüxüğü ga díeru nüxna ngixü naxäxü, yerü nüxü nacuáxchaü ga ñuxrechigü ngixü na yamuxëexü ga norü díeru ga wüxichigü ga yema

norü duüxügü. ¹⁶—Rü yema nüxıra dïeru nüxna ngïxü naxãxü rü norü corixütawa nangu, rü ñanagürü:

“Pa Corix, curü dïeru rü 10 êxpüxcüna ngïxü chimuxêê”, ñanagürü. ¹⁷—Rü guma Cori ga yexwaca âêxgacüxü ingucuchicü rü nanangãxü, rü ñanagürü:

“Wüxi i mexü i chorü duüxü quixi. Maneca meãma namaã cupuracü i ngëma íraxü i dïeru i cuxna chaxãxü. Rü ñuxma rü 10 ya ñãnegüarü âêxgacüxü tá cuxü chixixêê”, ñanagürü. ¹⁸—Rü yéma nangu ga to ga norü duüxü, rü ñanagürü:

“Pa Corix, curü dïeru rü wüximêêxpüxcüna ngïxü chimuxêê”, ñanagürü. ¹⁹—Rü norü cori nanangãxü rü ñanagürü nüxü:

“Cuma rü wüximêêxpüx ya ñãnegüarü âêxgacüxü tá cuxü chixixêê”, ñanagürü. ²⁰—Rü yéma nangu ga to ga norü duüxü rü ñanagürü nüxü:

“Pa Corix, ñãã iyixi i curü dïeru. Rü wüxi ya dechugu ngïxü chanuque, rü ngëmaãcü ngïmaã changuxü. ²¹—Yerü cuxcëx chamuü, erü wüxi i yatü i aüxü quixi. Rü cunayaxtanü i ngëma tama cuxrü ixixü, rü cunayaxu i nanetüarü o i ngextá tama cuma ícutoexüwa”. ²²—Rü yexguma ga guma âêxgacü rü ñanagürü nüxü:

“Wüxi i chorü duüxü i chixexü quixi i cumax. Rü curü oretama nixi i cuxü ixuxü na cuchixexü. Marü nüxü cucuëxchirëx ga na chaxaüxü, rü chanayautanüxü i ngëma tama choxrü ixixü, rü chanayaxuxü i nanetüarü o i tama choma ichatoxü. ²³—¿Natürü tüxcüü tama bancugu choxü ngïmaã cunguxü i chorü dïeru na ngëma choxü ngïxü yamuxêêgüxücëx, rü ngëmaãcü mucü ngïxü na chayaxuxücëx i ngëxguma íchanguxgu?” ñanagürü. ²⁴—Rü yexguma ga âêxgacü rü yema yexmagüxümaã nüxü nixu, rü ñanagürü:

“¡Nüxna ngïxü peyaxu i ngëma dïeru, rü ngëma 10 i dïeru nüxü ngëxmaxüna ngïxü pexã!” ñanagürü. ²⁵—Rü nümagü rü nanangãxügü, rü ñanagürügü:

“Natürü, Pa Corix, nüma rü marü nüxü ingëxma i 10 i dïeru”, ñanagürügü. ²⁶—Rü guma âêxgacü nanangãxü, rü ñanagürü:

“Pemaã nüxü chixu rü texé ya chauga ñnuxê rü yexera tá tüxna chanaxã. Natürü texé ya tama chauga ñnuxê rü tá tüxna chanayaxu i woo ngëma íraxü i tüxü ngëxmaxü. ²⁷—Rü yema chorü uwanügü ga tama naxwëxegüxü ga norü âêxgacüxü na chiixü, ¡rü nuã penagagü, rü nuã chopëxegu peyãdai!” ñanagürü.

Ngechuchu rü Yerucharéügu naxücu

(Mt 21.1-11; Mr 11.1-11; Cu 12.12-19)

²⁸ Rü yema orexü yaxuxguwena ga Ngechuchu, rü inixüchigü ga Yerucharéüwa na naxüxü. ²⁹ Rü yexguma marü nawa nangugüchaügu ga guma ñãnegü ga Bechagué rü Betániã ga Oríbunecüarü Mëxpüneärü ngaicamana yexmagüne, rü Ngechuchu nanamu ga taxre ga norü ngüexügü. ³⁰ Rü ñanagürü nüxü: —¡Gua ñãnexãcüwa pexi! Rü ngëxma tá nüxü peyangau i wüxi i buru i ngëxwaca yaxü i ngëxma ngaxüxü i taguma texé natagu aunagüxü. ¡Rü peyawëxü, rü nuã penaga! ³¹—Rü ngëxguma texé pexna çaxgu na tacücëx peyawëxüxü i ngëma buru, ¡rü tümamaã nüxü pixu rü ñapegügü:

“Torü Cori nanaxwëxe”, ñapegügü tüxü! ³² Rü yéma naxi ga yema taxre ga norü ngüexügü. Rü yexma nüxü nayangau ga yema buru ga Ngechuchu namaã nüxü ixuxürü. ³³ Rü yexguma yawëxügüãgu

ga yema buru, rü norü yoragü rü yema ngúexüğüna nacagüe, rü ñanagürügü: —¿Tüxcüü peyawëxü i ngëma buru? —ñanagürügü. ³⁴ Rü nümagü nanangãxüğü, rü ñanagürügü: —Rü tayawëxü erü torü Cori nanaxwëxe —ñanagürügü. ³⁵ Rü Ngechuchuxütawa nanagagü ga yema buru. Rü yema norü ngúexüğü rü norü gáuxüchirumaã nanatütägü. Rü ñuxüchi Ngechuchuxü natagu naxaunagüxëëgü. ³⁶ Rü duüxüğü rü Ngechuchupëxewa norü gáuxüchirumaã nayaçhamagü ga nama. ³⁷ Rü yexguma inaxüğüägu na ínaxígxü nawa ga yema nama ga Oríbnecüarü Mëxpúnëwa yarüdaexü, rü guxüma ga yema duüxüğü ga yaxögüxü ga nawe rüxü rü inanaxüğü ga taãëacüma aita na naxüexü rü tagaãcü Tupanaxü na yacuëxüügxü naxcëx ga guxüma ga yema cuëxruüğü ga taxü ga nüxü nadaugüxü ga Tupanaärü poramaã naxüxü ga Ngechuchu. ³⁸ Rü ñanagürügü: —¡Namecümáxüchi ya daa tórü äëxgacü ya Tupanaégagu núma ücü! ¡Rü pema rü ta, Pa Daxüçüãx, rü petaãëgü rü nüxü picuëxüüğü ya Tupana! —ñanagürügü. ³⁹ Rü yéma duüxügütanüwa nayexmagü ga ñuxre ga Parichéugü. Rü ñanagürügü Ngechuchuxü: —Pa Ngúexëëruüx, ¡Yangagü i ngëma cuwe rüxü i duüxüğü na yanachi-anëgüxüçëx! —ñanagürügü. ⁴⁰ Natürü Ngechuchu nanangãxü rü ñanagürü nüxü: —Pemaã nüxü chixu rü ngëxguma chi iyanangeëxgü i ñaã duüxüğü, rü daa nutagü ya namacüwawa ngëxmagücü rü chi nüxü aita naxüe —ñanagürü. ⁴¹ Rü yexguma Yerucharéüarü ngaicamana nanguxgu ga Ngechuchu, rü guma íänecüãx ga duüxügüçëx naxaxu. ⁴² Rü ñanagürü: —Pa Yerucharéüçüãxgü, chierü ñoma i ngunexügu nüxü pecuëxgu na texé aixcüma taãë pexna äxü. Natürü ngëma rü pexchawa ínicux i ñuxma, rü taxuacüma nüxü pecuëx. ⁴³ —Rü tá guxchaxüğü pexü naxüpetü. Rü perü uwanüğü tá nanaxü i norü poxüchica i norü guxücüwawa ya perü íäne. Rü norü churragü tá pexü ínachoëguãchi, rü guxücüwawa tá pexcëx ne naxí. ⁴⁴ —Rü tá nagu napogüe ya perü íäne, rü tá pexü nadai. Rü taxucütáma ya nuta ngextá nügüxétü nanugüxüra i perü íäneärü poëguxütapüwa. Rü ngëmaãcü tá pexü naxüpetü, yerü tama nüxü pecuëxgüchäü ga yexguma Tupana petanügu naxüãnegu —ñanagürü.

Ngechuchu rü tupauca ga taxünewa ínanawoxü ga duüxüğü ga yéma taxëgüxü

(Mt 21.12-17; Mr 11.15-19; Cu 2.13-22)

⁴⁵ Rü Ngechuchu rü tupauca ga taxünewa nangu rü yexma naxücu. Rü inanaxüğü na ínawoxüãxü ga yema duüxüğü ga tupauca ga taxünewa taxëgüxü. ⁴⁶ Rü Ngechuchu rü ñanagürü nüxü: —Tupanaärü ore i ümatüxüwa rü ñanagürü:

“Chopata rü yumüxëpataü nixí”.

Natürü pema rü ngítëëgxüxüpataü peyaxíxëë —ñanagürü. ⁴⁷ Rü guxü ga ngunexügu rü tupauca ga taxünewa nayanguxëëtae ga Ngechuchu. Natürü ga paigüarü äëxgacüğü, rü ngúexëëruüğü ga Moíchéarü mugüwa nguxëëtaëgüxü, rü Yerucharéüarü äëxgacüğü, rü naxcëx nadaugü ga ñuxäcü tá na yamëxgüãxüçëx. ⁴⁸ Natürü taxucürüwa ¡acü namaã naxüğü, yerü guxüma ga duüxüğü rü namaã nataãëgü, rü meã inarüxínüë ga norü ore.

20

Ngechuchuna nacagü na texéarü oregagu tupauca ga taxünewa nanguxêetaexü

(Mt 21.23-27; Mr 11.27-33)

¹ Wüxi ga ngunexü ga Ngechuchu rü tupauca ga taxünewa nayexma. Rü nanangúexêê ga duüxügü, rü namaã nüxü nixu ga Tupanaârü ore. Rü yexguma iyadexayane rü yéma nangugü ga paigüarü âëxgacügü, rü ngüxêêruügü ga Moïchéarü mugüwa ngüxêetaegüxü, rü Yudiügüarü âëxgacügüerugü. ² Rü ñanagürügü nüxü: —¿Texéarü mugagu nixü i cunaxüxü i ngéma núma cuxüxü? ¿Rü texé cuxü tamu na cunaxüxücèx i ngéma? —ñanagürügü. ³ Rü yexguma ga Ngechuchu rü ñanagürü nüxü: —Choma rü tá ta pexna chaca, rü chanaxwëxe i choxü pengäxügü. ⁴ —¿Rü texé tanamu ga Cuáü na duüxügüxü ínabaiüxêëxücèx? ¿Pexcèx rü Tupana yüxü ga namucü rü êxna duüxügümare? —ñanagürü. ⁵ Rü yexguma ga Parichéugü rü inanaxügüe ga nügümaã na yaporagatanücüxü. Rü nügümaãtama ñanagürügü: —¿Nüxü ñagügüxü tá? Erü ngëxguma chi:

“Tupana núma nanamu”, ñagügu, rü nüma rü chi ñanagürü tüxü:

“¿Rü tüxcüü ga tama nüxü peyaxögüxü?” ñanagürü chi tüxü. ⁶ —Rü ngëxguma chi ñagügu:

“Yatügümare nuã nanamu”, ñagügu, rü guxü i duüxügü chi nutamaã tüxü ínamuxüchigü, rü tüxü chi nadai. Erü nümagü i duüxügü rü nagu narüxüñüê na Tupana yüxü ga Cuáüxü mucü. ⁷ Rü Ngechuchuxü nangäxügü rü ñanagürügü: —Tama nüxü tacuèx ga texé núma na namuxü ga Cuáü ga baiüxêêruü —ñanagürügü. ⁸ Rü yexguma ga Ngechuchu rü ñanagürü nüxü: —Choma rü ta tãütama pemaã nüxü chixu na texé choxü muxü na chanaxüxücèx i ngéma choxna naxcèx peçaxü —ñanagürü.

Ore ga puracütanüxü ga chixexügu ixuxü

(Mt 21.33-44; Mr 12.1-11)

⁹ Rü inanaxügü ga Ngechuchu ga duüxügümaã na yadexaxü. Rü ñaã ore ga cuèxruüxü namaã nixu, rü ñanagürü: —Nayexma ga wüxi ga yatü ga wüxi ga ubanecü ücü ga norü naãnewa. Rü ñuxüchi ñuxre ga puracütanüxüna nanaxã na nüxna nadaugüxücèx rü yixcama rü norü yoramaã na yayauxyegüäxücèx ga yema norü o. Rü ñuxüchi ga guma yatü rü nixü ga yéma rü nuxcüma nataegu. ¹⁰ —Rü yexguma nawa nanguxgu ga na yadauxü ga yema ubagü, rü guma yatü rü yéma puracütanüxügüxütawa nanamu ga wüxi ga norü duüxü na naxcèx íyaçaxücèx ga yema ubagü ga nüxna üxü. Natürü yema puracütanüxügü rü nanaçuaixgü ga guma yatüarü duüxü, rü taxuüma ga uba nüxna naxägü. Rü yemaãcü ínayamugü. ¹¹ —Rü yexguma ga guma yatü rü wenaxârü to ga norü duüxü yéma ta namu. Natürü ga yema puracütanüxügü rü chixexü namaã nixugüe, rü nanaçuaixgü, rü taxuüma ga uba nüxna naxägü. Rü yemaãcü ínayamugü. ¹² —Rü wenaxârü to ga norü duüxü yéma ta namu ga guma yatü. Natürü ga yema puracütanüxügü rü nanapixêê, rü ínatatèxüchigü ga yema naãnewa. ¹³ —Rü düxwa ñanagürü ga guma naãneârü yora:

“¿Tacu tá chaxüxü i ñuxmax? Rü name nixü i chaune ya nüxü changechaücü ngéma chanamu. Rü ngëxguma nüxü nadaugügu rü bexmana naga tá naxüñüê”, ñanagürü. ¹⁴ —Natürü ga yema puracütanüxügü rü yexguma guma yatü nanexü nadaugügu, rü nügümaã ñanagürügü:

“Ñañaârü tá nixî i ñaã naãne i yixcama. ¡Rü ngîxã tayamèxgü na tórü na yîixúcèx!” ñanagürügü. ¹⁵—Rü ñanatèxüchigü ga yema naãnewa, rü nayamèxgü —ñanagürü ga Ngechuchu. Rü yexguma ga Ngechuchu rü duüxügüna naca, rü ñanagürü: —¿Tacü tá ngëma puracütanüxümaã naxü i ngëma naãneârü yora i ñuxmax? ¹⁶—Rü ngema tá naxü rü tá nanadai i ngëma puracütanüxügü, rü togüna tá nanaxã i norü naãne —ñanagürü ga Ngechuchu. Rü yexguma yemaxü naxîñüëgu ga duüxügü rü ñanagürügü: —Chierü tama ngëmaãcü nangupetüxëëãxgu ya Tupana —ñanagürügü. ¹⁷ Natürü Ngechuchu rü nüxü nadawenü, rü ñanagürü nüxü: —¿Natürü ñuxü ñaxüchiga nixî i ngëma Tupanaârü ore i ümatüxü i ñaxü?:

“Yima nuta ya mecü ya îârü ürüügü nüxü oechirécü, rü ñuxma rü yimatama nixî ya Tupana nüxîra yaxücuchicü na namaã inaxügüãxü ya ñpata”,

ñaxü. ¹⁸ Rü ñanagürü ta ga Ngechuchu: —Texé ya yima nutamaã yarüñaxë, rü tá itapoügü. Rü yixema tümaetügu nanguxe ya yima nuta, rü tá tüxü niñáixmü —ñanagürü ga Ngechuchu. ¹⁹ Rü ga paigüarü äëxgacügü rü ngüexëëruügü ga Moîchëarü mugüwa nguxëëtaegüxü, rü yexgumatama Ngechuchuxü niyauxgüchaü. Yerü nüxü nacüxgü ga nachiga na yîixü ga yema ore ga cuèxruü ga nüxü yaxuxü. Natürü tama nayayauxgü, yerü duüxügüxü namuë.

*Äëxgacüaxü dîërumaã naxütanüxüchiga
(Mt 22.15-22; Mr 12.13-17)*

²⁰ Rü yemacèx ga yema paigüarü äëxgacügü rü Ngechuchuxütawa nanamagü ga ñuxre ga norü duüxügü na mexü i duüxügürü yéma iyanaxîñüëxücèx natürü naxcèx na nadaugüxücèx ga ñuxácü nachiüñeârü äëxgacüxütawa Ngechuchuxü na inaxuaxügüxücèx. ²¹ Rü yemacèx Ngechuchuna nacagü rü ñanagürügü: —Pa Ngüexëëruüx, toma nüxü tacuèx rü aixcüma nixî i ngëma nüxü quixuxü rü ngëma namaã cungüexëëtaexü. Rü tama duüxüârü düxétüxünegu cudawenü erü nacüma nixî i cungugüxü. Rü aixcüma cunangüexëë i duüxügü na Tupana naxwèxexüácüma namaxèxücèx. ²² —Rü dücax, ngëma îaneârü dîëru i äëxgacü ya tacü ya Dumacüãx naxwèxexü na tanaxütanüxü, ¿rü namexü yîixü na nüxü tanaxütanüxü rü éxna tama? —ñanagürügü. ²³ Natürü Ngechuchu nüxü nacüèxama na chixexügu naxîñüëxü ga yema duüxügü, rü yemacèx ñanagürü nüxü: —¿Tüxcüü i chixexügu choxü penguxëëchaü? ²⁴ —¡Choxü ngîxü pewé i wüxi i dîëru na ngîxü chadauxücèx! ¿Rü texéhicünèxã rü texéega ngîgu üx? —ñanagürü. Rü nanangãxügü rü ñanagürügü: —Dumacüãx ya äëxgacü ya tacüchicünèxã nixî —ñanagürügü. ²⁵ Rü yexguma ga Ngechuchu rü ñanagürü nüxü: —¡Äëxgacüna ngîxü pexã i ngëma äëxgacüarü ixîcü, rü Tupanana ngîxü pexã i ngëma Tupanaârü ixîcü! —ñanagürü. ²⁶ Rü yemaãcü ga Ngechuchu rü woo norü orewa rü taxucürüwama chixexügu nanangxëëgü ga duüxügüpèxewa, yerü meãma nanangãxü. Rü guxüma ga duüxügü rü nangeèxgümare yerü nabaixãchiãëgü namaã ga yema norü ore.

*Chaduchéugü rü Ngechuchuna nacagüe rü ngoxi wena namaxë i duüxügü
(Mt 22.23-33; Mr 12.18-27)*

²⁷ Rü Ngechuchuxütawa ñayadaugü ga ñuxre ga Chaduchéugü. Rü nümagü nixî ga nagu naxîñüëxü na tagutáma wena namaxèxü i yuexü.

Rü yemacèx Ngechuchuxũ ñanagürügü: ²⁸ —Pa Ngúexêëruũx, Moïchéarü mugüwa rü ñanagürü:

“Ngêxguma wüxi ya yatü naxmèx ngexacüyane nayuxgu, rü name nixĩ i naêneëtama ngĩmaã naxãmèx i ngêma yutecü i naxümmèx, na ngêmaãcü naxãxãcüxücèx nüxũ ya naêneë ya marü yucü”, ñanagürü ga yema ore. ²⁹ Rü ñanagürügü ta ga Chaduchéugü: —Nayexma ga 7 ga nügüeneë. Rü naxãmèx ga guma yacü, natürü tauta naxãxãcüyane nayu. ³⁰ —Rü yexguma naĩ ga naêneë nüxĩ ngĩmaã naxãmèx ga yema ngecü. Rü guma rü ta nayu, rü nangexacü. ³¹ —Rü yexguma rü naĩ ga naêneë nüxĩ ngĩmaã naxãmèx. Rü yemaãcü gucüma ga guma 7 ga nügüeneëgü rü ngĩmaã naxãmèx ga yema nge. Rü gucüma nayue tauta naxãxãcüyane. ³² —Rü ngĩma rü ta düxwa iyu ga yema nge. ³³ Rü ngêxguma yuexü wena maxêgu, ¿rü ngecürüücü naxmèx tá iyixĩ i ngêma nge? Yerü yexguma namaxêgu rü gucüma ga guma 7 ga nügüeneë ngĩmaã naxãmèx —ñanagürügü. ³⁴ Rü yexguma ga Ngechuchu rü nanangãxũ rü ñanagürü: —Ñoma i naãnewa rü yatügü rü nixãmèxgü rü ngexügü rü nixãtegü. ³⁵ —Natürü ngêma duũxügü i Tupanapêxewa mexü na wena namaxêxũ na daxüguxũ i naãnewa naxĩxücèx rü ngema rü tãütáma nixãmèxgü rü êxna nixãtegü. ³⁶ —Erü ngêma rü tagutáma nayue. Rü daxüçãx i Tupanaãrü orearü ngeruũgürüũ tá nixigü. Rü aixcüma Tupanaxãcügü nixigü erü yuwa Ínarüdagü. ³⁷ —Rü yema ore ga naĩxãcü ga iyauratanücüxũnechigawa, rü Moïché tüxũ nüxũ nacüxèë rü yuexü rü tá wena na namaxêxũ. Erü yema orewa, rü ñanagürü ga Cori ga Tupana: “Choma nixĩ i Abráũãrü Tupana, rü Ichaáarü Tupana, rü Acobuarü Tupana”, ñanagürü. ³⁸ —Rü ngêmwawa nüxũ tacuèx rü woo ñoma i naãnewa nayuegu i duũxügü, natürü Tupanacèx rü guxüguma namaxê —ñanagürü. ³⁹ Rü yexguma ga ñuxre ga ngúexêëruũgü ga Moïchéarü mugüwa nguxêëtaegüxũ rü ñanagürügü: —Aixcüma meãma nüxũ quixu, Pa Ngúexêëruũx —ñanagürügü. ⁴⁰ Rü yemawena rü marü namuũë ga ñacüchigacèx Ngechuchuna na nacagüexũ.

¿Texé nane nixĩ ya Cristu?

(Mt 22.41-46; Mr 12.35-37)

⁴¹ Rü Ngechuchu rü ñanagürü nüxũ: —¿Tüxcüũ duũxügü nüxũ nixugüe rü Cristu rü nuxcümaãcü ga ãêxgacü ga Dabítaa nixĩ? ⁴²⁻⁴³ —Yerü Dabítama ñaããcü nanaxümatü ga Wiyaeğüarü poperawa: “Tupana rü chorü Cori ya Cristuxũ ñanagürü: ‘¡Nuã chorü tügü necüwawa rüto, ñuxmatáta cuxmèxwa chanangêxmagüxèë i curü uwanügü na namaã icucuáxücèx!’ ” ñaããcü nanaxümatü. ⁴⁴ Rü ñanagürü ga Ngechuchu: —¿Ñuxücürüwa i Dabítaa yĩxũ ya Cristu ega nümatama ga Dabí rü norü Corimaã naxuãgu? —ñanagürü.

Ngechuchu rü nüxũ nixu na tama nameãrü maxüãxgüxũ ga yema ngúexêëruũgü ga Moïchéarü mugüwa nguxêëtaegüxũ

(Mt 23.1-36; Mr 12.38-40; Lc 11.37-54)

⁴⁵ Rü guxüma ga duũxügü rü yéma inarüxĩnüë ga yexguma Ngechuchu norü ngüexügüxũ ñaxgu: ⁴⁶ —¡Pexuãëgü naxcèx i ngêma ngúexêëruũgü i Moïchéarü mugüwa nguxêëtaegüxũ! Erü nümagü rü norü me nixĩ i mexü i naxchirumaã na naxĩãneãxũ. Rü ítamüwa nanaxwèxegü na

duũxügü meã nüxü rümoxëgüxü. Rü ngutaquëxepataügüwa rü norü me nixĩ i ãëxgacügümëxwëxewa na natogüxü. Rü òna i taxüwa rü ngëma ònaãrü yoraxütawa ügüxü i nachicacëx nadaugü. ⁴⁷—Rü tüxü nawomüxëëgüãcüma tükna nanapuxü ya tümapatëx ya yixema yutëgüxe. Rü ñuxüchi nanamëxëë i norü yumüxëgü na duũxügü nagu rüxĩnëxüçëx na aixcüma mexügü yügüxü. Natürü nümagü tá nixĩ i yexeraãcü napox-cuexü —ñanagürü.

21

*Yutecüarü ãmarechiga
(Mr 12.41-44)*

¹ Rü yëxguma tupauca ga taxünewa nayëxmagu ga Ngechuchu, rü yéma nüxü nadau ga ñuxãcü duũxügü ga idiëruãxü Tupanana ngixü na naxãgüxü ga norü dïëru ga tupaucaarü dïëruchiüwa. ² Rü ngixü nadau ta ga wüxi ga ngecü ga yutecü ga ngearü dïëruãxcü ga tupaucaarü dïëruchiügu taxretachinü ga íraxüchicü ga dïëru ngixü ixücuchicü. ³ Rü ñanagürü ga Ngechuchu: —Aixcüma pemaã nüxü chixu rü ñaã ngecü i yutecü i ngearü dïëruãxcü rü guxü i togü i dïëru ngixü ixãgüxüãrü yexera ngixü ixã. ⁴—Erü guxüma i togü rü ngixü inaxã i ngema nüxü íyaxügücü. Natürü ngïma ngixü natauxyane ngixü ixã i guxcüma i ngixü ngëxmaxcü i ngïrü ònatanü —ñanagürü.

*Ngechuchu nanaxunagü na tupauca ya taxünegu tá napogüexü
(Mt 24.1-2; Mr 13.1-2)*

⁵ Rü ñuxre ga norü ngüexügü rü nidëxagü nachiga ga tupauca ga taxüne ga ñuxãcü na namëxëchixü ga naxtapüx ga nutanaxcëxgü, rü na namëxëchixü ga guxüma ga guma tupaucaarü yëmaxügü ga duũxügü nüxna ãmarexü. Rü yëxguma ga Ngechuchu rü ñanagürü: ⁶—Rü nawa tá nangu i ngunëxügü i guxünetama ya daa tupauca ya nüxü pedauxüne, rü tá nagu napogüe. Rü naxtapüxarü nutagü rü taxucütáma nügüëtü naxüxüra, rü bai ya wüxi —ñanagürü.

*Cuëxrüügü i tá nüxü idaaxü naxüpa na nagüxü i naãne
(Mt 24.3-28; Mr 13.3-23)*

⁷ Rü yëxguma ga norü ngüexügü rü Ngechuchuna nacagü, rü ñanagürügü: —Pa Ngüxëëruüx, ¿ñuxgu tá nixĩ i nangupetüxü i ngëma nüxü quixuxü? ¿Rü tacüwa tá nüxü tacüx na nangupetüxü tá i ngëma? —ñanagürügü. ⁸ Rü Ngechuchu rü ñanagürü: —¡Pëxuãëgü tá na taxuüma pëxü womüxëëxüçëx! Erü muxüchixü tá chaugu nügü nicuxgü rü tá ínangügü rü ñanagürügü tá:

“Choma nixĩ i Cristu, rü paxa tá nagux i naãne”, ñanagürügü tá pëxü. ¡Natürü täütáma nüxü peyaxögü! ⁹—Rü ngëxguma tá nüxü pëxĩnügü na nügü nadëixü i wüxi i nachiüãne to i nachiüãnemaã, rü ëxna nüxü pëxĩnügü na wüxi i nachiüãnewatama rü duũxügü rü norü ãëxgacümaã nügü nadëixü, ¡rü täütáma pebaixãchiãëgü! Erü ngëmaãcü tá nangupetü i noxrix. Natürü täütáma naãneãrü gux nixĩ i ngëma. ¹⁰—Erü wüxi i ãëxgacüarü churaragü rü to i ãëxgacüarü churaragümaã tá nügü nadai. Rü wüxi i nachiüãne rü to i nachiüãnemaã tá nügü nadai. ¹¹—Rü nümãxü i nachiüãnegüwa rü porãcü tá naxĩãxãchiane, rü porãcü tá nangux i taiya, rü tá nataxüchi i daaweane. Rü duũxügü tá nüxü nadaugü

i daxūwa i tacū i namaã nabaixāchiexū, rü taxū i cuèxruūgü. ¹² — Natürü naxūpa i guxūma i ngēma rü duūxūgü tá pexū ínayauxū, rü tá pewe ningēxūtanū. Rü ngutaquēxepataūgüwa tá pexū nagagü na ngema pexna nacagūxūcèx, rü tá pexū napoxcue. Rü nachiuñānegüarū ãēxgacügüpēxewa tá pexū nagagü, naxcèx na chorü duūxūgü pixīgūxū. ¹³ —Rü ngēmaãcü tá pexū natauxcha na ãēxgacügümaã nüxū pixuxū i chauchiga. ¹⁴ —Rü ngēxguma tá ngema pexū nagagügu, jrü tãxū i pexoegaãēgūxū naxcèx na tacūmaã tá penangāxūxū na pegüétüwa pèchogūxūcèx! ¹⁵ —Erü choma tá pexū charüngūxēē na nüxū pecuáxūcèx na tacūmaã penangāxūxū i perü uwanügü. Rü nūmagü rü tãütáma nüxū nacuèxgü na tacūmaã pexū nangāxūgūxū i ngēxguma. ¹⁶ —Natürü pema rü woo penatügü, rü peegü, rü peeneēgü, rü peeyēxgü, rü petanūxūgü, rü pemücügü rü tá napeechitaegü na purichíagūxūttawa pexū íyaxuaxūgūxū. Rü purichíagü rü tá pexū nadai i ñuxre i pemax. ¹⁷ —Rü guxū i naānewa rü duūxūgü tá pexchi naxaie, erü choxū peyaxōgü rü chorü duūxūgü pixīgü. ¹⁸ —Natürü woo tacū pexū üpetügu rü Tupanamēxēwa tá pengēxmagü, rü nūma tá pexū ínapoxū rü bai i wūxi i peyae tá inayarütaxu. ¹⁹ —Rü ngēxguma aixcūma peyaxōgüamagu rü tama choxū ípetēxgu, rü tá penayauxgü i maxū i taguma gūxū. ²⁰ —Rü ngēxguma nüxū pedēuxgu na perü uwanügüarū churaragü Yerucharéūxū íchomaēguāchixū, rü ngēmawa tá nüxū pecuèx na paxa tá nagu napogüexū ya yima ñāne. ²¹ —Rü yíxema Yudéaanewa ngēxmagüxe rü name nixī i mēxpúneānewa tabuxmü. Rü yíxema Yerucharéūwa ngēxmagüxe rü tanaxwēxe na paxa ítachoxūxū. Rü yíxema tūmaānewa ngēxmagüxe rü tama name na ñānecèx tawoeguxū. ²² —Erü ngēma ngunexūgügu tá ínangu i Tupanaärü poxcu. Rü ngēmaãcü tá nayanguxēē i guxūma i ngēma norü ore i úmatūxūwa nüxū yaxuxū. ²³ —Rü ngēma ngunexūgügu rü tá poraãcü tūxū naguxcha ya yíxema ngexegü ya iitacharaūgüxe rü yíxema imaīxācügüxe. Erü tá nangēxma i taxū i ngūxū, rü Tupana rü poraãcü tá nanapoxcue i ngēma duūxūgü. ²⁴ —Rü ñuxre, rü tá norü uwanügü taramaã nanadai. Rü togü, rü tá ínayauxū na to i nachiuñānewa nagagūāxūcèx. Rü ñuxūchi i ngēma norü uwanügü rü tá nagu napogüe ya yima ñāne ya Yerucharéū. Rü ngēmaãcü tá nangupetü ñuxmatáta nawa nangu na Tupana ínamuxūxū i ngema.

Tupana Nanearü taeguchiga

(Mt 24.29-35, 42-44; Mr 13.24-37)

²⁵ —Rü ngexguma rü tá nangox i cuèxruūgü. Rü üèxcü rü tauemacü rü woramacurigü rü tá nixīgachitanü i nachicawa. Rü guxū i nachiuñānegüwa rü duūxūgü rü tá nanaxixāchiāētanü rü tá nabaixāchiāēgü namaã na poraãcü naxāūgaāchixū i taxū i taxtū rü norü yuapegü. ²⁶ —Rü duūxūgü rü norü muñmaã tá inayayiāxē i ngēxguma nüxū nadaugu i ngēma üpetüchaūxū i ñoma i naānewa. Erü woo guxūma i tacū i daxūwa nüxū idauxū rü tá naxīāxāchitanü rü tá nu ne nanaxīmare. ²⁷ —Rü ngēxguma rü guxū i duūxūgü i ñoma i naānecūāx rü tá choxū nadaugü i ngēxguma wūxi i caixanexūgu ícharūxīxgu rü nūma chaxūxgu namaã i chorü pora rü üüne. ²⁸ —Rü ngēxguma inaxūgügu na naxüpetūxū i ngēma pemaã nüxū chixuxū, rü name nixī na petaāēgūxū rü meā pedaunagūxū, erü paxa tá íchangu na pexū íchanguxūxēèxūcèx —ñanagürü. ²⁹ Rü yemawena rü wūxi ga ore ga cuèxruūxū namaã nixu ga Ngechuchu, rü ñanagürü: —¡Dücèx penangugü i iguera, rü éxna

ngëxürüüxümare i to i naĩgü! ³⁰ —Rü ngëxguma nüxü pedëuxgu na ngexwaca naxüatüxü, rü ngëmawa nüxü pecuëu na paxa tá taunecü na yüixü. ³¹ —Rü ngëxgumarüü ta i ngëxguma nüxü pedëuxgu na nangu-petüxü i ngëma pemaã nüxü chixuxü, rü ngëmawa tá nüxü pecuëx na yimama yüixü ya Tupana na äëxgacü yüixüçëx. ³² —Aixcüma pemaã nüxü chixu rü guxüma i ngëma nüxü chixuxü rü tá ningu naxüpa na nayuxü i duüxügü i ñuxma maxëxü. ³³ —Daxüguxü i naãne rü ñoma i naãne rü tá nagux. Natürü chorü ore rü tagutáma inayarüxo. ³⁴ —¡Pexuãëgü na tama tacü rü chixexügagu düxwa nüxü perüxoexü na peyaxögüxü! Rü ngëmacëx penaxwëxe na pegüna pedaugüxü na tama pengãxëxü rü ëxna ñoma i naãneärü ngüchaüguama na perüxinüëxü. Erü ngürüächi ngëmagu Íperüxinüëyane tá pexü Íchayabaixgü. ³⁵ —Rü ñoma wüxi ya yüta ya ngürüächi tacü iyaxünerüü tá nixí naxcëx i guxüma i duüxügü i ñoma i naãnecüãx i ngëxguma wenaxãrü núma chaxüxgu. ³⁶ —Rü ngëmacëx name nixí i pegü Ípemexëëgü. ¡Rü guxüguma peyumüxëgü na ngëmaãcü tama pexü naxüpetüxüçëx i ngëma äücümaxügü, rü aixcüma pimexüçëx i ngëxguma chopëxewa pengugü! —ñanagürü ga Ngechuchu. ³⁷ Rü guxü ga ngunexügügu rü tupauca ga taxünewa nayexma ga Ngechuchu, rü duüxügüxü nangüexëë. Rü chütacü rü guma Mëxpüne ga Oribunecügu äëganegu nayapeexü. ³⁸ Rü guxüma ga duüxügü rü pëxmamaxüchi tupauca ga taxünewa nangugüxü na Ngechuchuxü naxüinüëxüçëx.

22

Äëxgacügü naxcëx nadaugü na ñuxãcü Ngechuchuxü yayauxgüxü
(Mt 26.1-5, 14-16; Mr 14.1-2, 10-11; Cu 11.45-53)

¹ Rü marü ningaica ga Yudüguärü peta ga Üpetüchiga ga nagu nangöxgüãxü ga pãu ga ngearü puxëëruüãxü. ² Rü ga paigüarü äëxgacügü rü ngüexëëruügü ga Moïchëarü mugüwa nguxëëtaegüxü rü naxcëx nadaugü ga ñuxãcü duüxügüechita Ngechuchuxü na yamëxgüxü, yerü duüxügüxü namuüë. ³ Rü yexguma ga Chataná rü Yuda ga Icarütegu nangaxí. Rü núma ga Yuda rü yema 12 ga Ngechucharü ngüexügü ga imugüxütanüxüchirëx nixí. ⁴ Rü núma ga Yuda rü Ínayadau natanüwa ga paigüarü äëxgacügü rü tupauca ga taxüneärü purichíagüarü äëxgacügü. Rü namaã nüxü nixu ga ñuxãcü na natauxchaxü ga Ngechuchuxü na yayauxgüxüçëx. ⁵ Rü nümagü ga yema äëxgacügü rü nataãëgü. Rü díëru Yudana ngíxü naxuaxügü. ⁶ Rü Yuda rü ngixü nayaxu ga yema díëru. Rü inanaxügü ga naxcëx na nadauxü ga ñuxãcü duüxügüechita Ngechuchuxü na yayauxgüxü ga äëxgacügü.

Üpetüchigaarü ðnawa nachibü ga Cori

(Mt 26.17-29; Mr 14.12-25; Cu 13.21-30; 1 Co 11.23-26)

⁷ Rü nawa nangu ga yema petaarü ngunexü ga nagu nangöxgüãxü ga pãu ga ngearü puxëëruüãxü. Rü yema nixí ga ngunexü ga nagu carneruxacü yamëxgüxü naxcëx ga Üpetüchigaarü peta. ⁸ Rü Ngechuchu nanamu ga Pedru rü Cuáü, rü ñanagürü nüxü: —¡Peyamexëëx i tóru ðna i Üpetüchigacëx! —ñanagürü. ⁹ Rü nümagü Ngechuchuxü nangãxügü, rü ñanagürügü: —¡Ngextá nixí i cunaxwëxexü na tanamexëëxü? —ñanagürügü. ¹⁰ Rü Ngechuchu nanangãxü, rü ñanagürü: —Ngëxguma Yerucharëüwa pengugügu rü ngëxma tá nüxü peyangu i wüxi ya yatü i wüxi i tüxü i dexámaã äãcücü ngíxü ingexü. ¡Rü nawe perüxí ñuxmatáta

napatawa pengugü! ¹¹—¡Rü yima ípata ya nagu yaxücune ya yima yatü, rü yima íarü yoramaã nüxü pixu rü ñapegügü nüxü:

“Torü ngúexêeruü rü nüxü nacuáxchaü na ngêxürüüxü yíixü i ngêma ucapu i norü ngúexügümaã tá nawa nachibüxü i Üpetüchigaarü ðnacêx”, ñapegügü nüxü! ¹²—Rü tá pexü nüxü nadauxêê i wüxi i ucapu i taxü i marü mexêêxü i norü daxüchiüwa ngêxmaxü. ¡Rü ngêmawa tá penamexêê i ngêma ðna i Üpetüchigacêx ixíxü! —ñanagürü nüxü. ¹³ Rü yéma naxí ga nümagü rü nüxü inayangaugü ga guxüma yema Ngechuchu namaã nüxü ixuxürüü. Rü yéma nanamexêêgü ga ðna ga Üpetüchigacêx ixíxü. ¹⁴ Rü yexguma nawa nanguxgu ga ora ga na nachibüexü, rü mechawa narüto ga Ngechuchu namaã ga norü ngúexügü. ¹⁵ Rü yexguma ga Ngechuchu rü ñanagürü: —Ñuxácü poraacü choxü nangúchaü na pemaã chachibüxü i ñaã Üpetüchigaarü ðnawa naxüpa na chayuxü. ¹⁶—Natürü pemaã nüxü chixu rü tãütama wenaxärü Üpetüchigaarü ðnawa chachibü, ñuxmatáta chowa yangu i ngêma Tupana naxwêxexü —ñanagürü. ¹⁷ Rü yexguma nanayaxu ga wüxi ga pochiyu ga binumaã äácuxü. Rü Tupanana moxê naxãxíra, rü ñuxüchi ñanagürü nüxü ga norü ngúexügü: —¡Peyaxaxü ya daa binu, rü pegümaã pengau! ¹⁸—Erü pemaã nüxü chixu rü tagutáma wena chayaxaxü ya binu ñuxmatáta nawa nangu na pecaduarü ütanücêx chayuxü na aixcüma pemaã inacuáxücêx ya Tupana —ñanagürü. ¹⁹ Rü nanayaxu ta ga pãü, rü Tupanana moxê naxcêx naxã. Rü ñuxüchi inanabücu, rü norü ngúexügüna nanaxã. Rü ñanagürü nüxü: —Ñaã pãü rü chaxune i pexcêx yuxüchiga nixí. ¡Rü ñaãwena rü ñaãcü tá penaxü na choxna pecuêxächixêx! —ñanagürü. ²⁰ Rü marü chibüwena rü to ga pochiyu ga binumaã äácuxü norü ngúexügüna naxã, rü ñanagürü: —Daa binu rü Tupanaärü uneta i ngexwacaxüxüärü cuêxruü nixí. Rü chaugü ya pexcêx ibacüwa Tupana pexü nüxü nadauxêê na aixcüma yíixü i ngêma norü uneta. ²¹—Natürü ngêma yatü i chauechita äêxgacügüna choxü muxchaüxü, rü nuã mechawa tamaã narüto i ñuxmax. ²²—Rü choma i Tupana Nane na duüxüxü chíxü, rü Chaunatü ixunetaxürüü tá chayü. Natürü wüxi i ngechaüxüchi tá nixí naxcêx i ngêma yatü i äêxgacügüna choxü muxü. ²³ Rü yexguma ga norü ngúexügü rü inanaxügüe ga nügüna na nacagüexü, rü ñanagürügü: —¿Texé tá tixí ya yíxema naêchita äêxgacügüna namuxê? —ñanagürügü.

Norü ngúexügü rü nügüna nacagüe na texé tá tixíxü ya guxãxü rüyexeraxe i natanüwa

²⁴ Rü yexguma ga yema ngúexügü rü nügümaã niporagatanücüü nachiga na texé tá tíixü ya natanüwa guxãärü yexera ixíxê. ²⁵ Natürü ga Ngechuchu rü ñanagürü nüxü: —Ñoma i naãnewa rü guxü i nachüüñegüarü äêxgacügü, rü poraacü norü duüxügüxü namugü. Rü ñuxüchi nügü yaxugügu rü norü duüxügüarü dauruü i mexügü nixígü. ²⁶—¡Natürü pema rü tãütama ngêxgumarüü pixígü! Rü ngêxguma texé naxwêxegu na guxãärü yexera tíixü i petanüwa, rü name nixí na tügü ítarüxíraxü i guxüma i tümamücügütanüwa. Rü texé naxwêxegu na peeru tíixü i petanüwa, rü name nixí i noxri rü guxãärü ngúxêeruü tixí. ²⁷—Rü ñoma i naãnewa rü corigü rü mechawa narütogü na nachibüexücêx, rü norü duüxügü nixí i ngêma naxcêx ðna ixüxü rü nüxü rüngüxêêxü. Natürü tatanüwa rü tama ngêmaacü nixí, erü choma i perü cori na chíixü rü perü ngúxêeruü chixí. ²⁸—Rü pemagü nixí ga guxügüma chauxütawa

peyexmagüxü ga yexguma ngúxü chingexgu. ²⁹—Rü ngēmacèx i choma rü âëxgacügüxü pexü chixigüxëë yema chaunatü âëxgacüxü choxü ingucuchixëëxürüü. ³⁰—Rü ngēmaäcü âëxgacü íchixüwa rü chomaã tá pechbüe rü tá pexaxegü. Rü âëxgacüchicawa tá perütogü na norü maxütcèx nüxna pecagüxü i guxüma i Yudíugü —ñanagürü.

Ngechuchu nüxü nixu na Pedru tá nügü icüxü na norü ngüexü yüxü
(Mt 26.31-35; Mr 14.27-31; Cu 13.36-38)

³¹ Rü Pedruxü ñanagürü ta ga Cori ga Ngechuchu: —Pa Pedrux, Chataná rü pexcèx ínaca na chixexümaã poraäcü pexü naxüxütcèx. ³²—Natürü choma rü Chaunatüxü cuxcèx chacèxü na taguma nüxü curüxoxütcèx na cuyaxõxü. Rü ngēmacèx i cumax, Pa Pedru, rü ngëxguma chauxcèx cutaeguxgu, rü chanaxwèxe i nüxü curüngüxëë i cumücügü na nümagü rü yaxõgüechaäxütcèx —ñanagürü. ³³ Rü ñanagürü ga Pedru: —Pa Corix, choma rü marü íchamemare na wüxigu cumaã na chapoxcuxü rü êxna wüxigu cumaã na chayuxü —ñanagürü. ³⁴ Natürü Ngechuchu rü ñanagürü nüxü: —Pa Pedrux, cumaã nüxü chixu rü ñomatama i chütaxügu naxüpa na otá íçaxü, rü cuma rü tomaëxpüxcüna tá nüxü quixu na tama choxü cucuáxü —ñanagürü.

Marü ningaica ga na guxchaxüğü nüxü üpetüxü

³⁵ Rü yexguma ga Ngechuchu rü norü ngüexügüna naca, rü ñanagürü: —Yexguma pexü chimugügu ngearü chocaãxgüxemaã rü ngearü dïeruãxgüxemaã rü ngearü chapatuãxgüxemaã, çrü tacü pexü taxuxü ga yexguma? —ñanagürü. Rü nümagü nanangãxüğü rü ñanagürügü: —Taxuüma —ñanagürügü. ³⁶ Rü yexguma norü ngüexügüxü ñanagürü ga Ngechuchu: —Natürü ñuxma rü texé ya petanüwa ya chocaãxé rü tanaxwèxe na ítayangexü i tümaärü choca rü tümaärü dïeruchixü rü ta. Rü ngëxguma texé ngearü taraãxgu rü tanaxwèxe i namaã tataxe i tümaärü gáuxüchiru na tümaärü poxüruü i taracèx tataxexütcèx. ³⁷—Erü pemaã nüxü chixu rü chauchiga nixü i ngēma Tupanaärü ore i ümatüxü i ñaxü: “Wüxi i máëtaxürüü tá nanapoxcugü rü tá nayamèxgü”, ñaxü. Erü guxüma i ngēma chauchiga ümatüxü i Tupanaärü ore i ümatüxüwa rü aixcüma ngēmaäcü tá ningu —ñanagürü. ³⁸ Rü yexguma ga norü ngüexügü rü ñanagürügü: —Pa Corix, nuã nangëxma i taxre i tara —ñanagürügü. Rü nüma ga Ngechuchu rü nanangãxü rü ñanagürü: —Marü ningu i ngēma —ñanagürü.

Ngechuchu rü Yechemanüwa nayayümüxë
(Mt 26.36-46; Mr 14.32-42)

³⁹ Rü yexguma ga Ngechuchu rü ínaxüxü ga guma ñanewa. Rü Oríbunecüarü Mëxpünewa naxü, yerü woetama nacüma nixü ga yéma na naxüxüxü. Rü norü ngüexügü rü ta nawe narüxü. ⁴⁰ Rü yexguma yema nachicawa nanguxgu, rü norü ngüexügüxü ñanagürü: —jTupana naxcèx peça na pexü nangüxëëxütcèx na tama Chatanáärü ügagu chixexügu peyixütcèx! —ñanagürü. ⁴¹ Rü yexguma ga Ngechuchu rü yéamaxüra 50 ga metruwa norü ngüexügüna naxü. Rü yexma nacaxäpüxü rü nayümüxë. ⁴² Rü ñanagürü: —Pa Chaunatüx, ngëxguma cuma cunaxwèxegu, çrü nüxna choxü ínanguxuchixëë i ñaã ngüxü i tá choxü üpetüxü! Natürü chanaxwèxe i cunaxü i curü ngüchaü rü tama i choxrü —ñanagürü. ⁴³ Rü yexguma wüxi ga daxüçüãx ga Tupanaärü orearü ngerü rü naxcèx nangox, rü nanaporaxëë. ⁴⁴ Rü poraäcü

nanaxixächiaê ga Ngechuchu, rü yemacèx yexeraãcü nayumüxê. Rü yema na naxixächiaêxümaã poraãcü nanaxaiyaächi. Rü guma norü aiyacümaã nichuruxüne. Rü ñoma nagü waixümüãnewa ichuruxürüü nixi ga norü iyacü. ⁴⁵ Rü yema inayumüxêxüwa rü inachi ga Ngechuchu, rü norü ngüexügütanüwa naxü. Rü nüxü inayangau ga na ñapeexü yerü norü ngechaümaã düxwa nayaxtae. ⁴⁶ Rü yexguma ga Ngechuchu rü ñanagürü nüxü: —¿Tüxcüü ípepee? ¡Íperüdagü rü Tupanana naxcèx peça na pexü nangüxêêxücèx na tama Chatanáãrü ügagu chixexügu peyixücèx! —ñanagürü.

Ngechuchuxü niyauxgü

(Mt 26.47-56; Mr 14.43-50; Cu 18.2-11)

⁴⁷ Rü yexguma iyadexayane ga Ngechuchu, rü yéma nangugü ga muxüma ga duüxügü. Rü Yuda ga Ngechuchuarü ngüexüchirêx ixixü nixi ga naxüpêxexü. Rü Ngechuchucèx nixü na nüxü nachüxãcüma nüxü namoxêxücèx. ⁴⁸ Rü Ngechuchu rü ñanagürü: —Pa Yudax, ¿tüxcüü wüxi i chüxumaã cuchauechitae? —ñanagürü. ⁴⁹ Rü yema togü ga Ngechuchuarü ngüexügü ga naxütawa yexmagüxü, rü yexguma nüxü nadaugügu ga yema ngupetüxü rü ñanagürügü nüxü: —Pa Corix, ¿cunaxwêxexü na taramaã tanadêixü? —ñanagürügü. ⁵⁰ Rü wüxi ga Ngechuchuarü ngüexü rü paigüarü âêxgacüarü duüxüxü nanapixêê, rü ñanadae ga norü tügünechinü. ⁵¹ Natürü Ngechuchu rü ñanagürü: —¡Ngexrüma na pegü namaã pedêixü! —ñanagürü. Rü yexguma ga Ngechuchu rü yema yatü ga ídaechinüxüxü ningögü, rü nanamexêê. ⁵² Rü Ngechuchu namaã nidexa ga yema âêxgacügü ga norü yauxwa yéma íxü. Rü yema âêxgacügütanüwa nayexmagü ga paigüarü âêxgacügü, rü tupauca ga taxüneaãrü purichíagüarü âêxgacügü, rü Yudiugüarü âêxgacügüerügü. Rü Ngechuchu rü ñanagürü nüxü: —¿Tüxcüü taragü rü naixmenêxãgümaã chauxcèx nuã pexi ñoma wüxi i ngítèxáxü chíixürüü? ⁵³ —Rü guxü ga ngunexügu ga yexguma petanüwa chayexmagu ga tupauca ga taxünewa, rü tama choxü piyauxgü. Natürü marü nawa nangu na pexü natauxchaxü na choxü piyauxgüxü, erü ñoma nixi i ora na naporaxü i Chataná —ñanagürü.

Pedru inayacux na Ngechuchuxü nacúaxü

(Mt 26.57-58, 69-75; Mr 14.53-54, 66-72; Cu 18.12-18)

⁵⁴ Rü Ngechuchuxü niyauxgü, rü paigüarü âêxgacüpatawa nanagagü. Rü Pedru rü nawe narüxü, natürü yaxüguma nüxü nixüchigü. ⁵⁵ Rü yéma paigüarü âêxgacüpataxüarü ngãxüwa, rü purichíagü nanaxügü ga wüxi ga üxü. Rü nüxü ñachomaêguãchi. Rü Pedru rü ta yéma natanüwa narüto. ⁵⁶ Rü yexguma yéma üxücutüwa natoxgu ga Pedru, rü wüxi ga ngecü ga âêxgacüarü duüxü nüxü idau. Rü meãma nüxü idawenü, rü ngígürügü: —Ñaa yatü rü Ngechuchutanüxü nixi —ngígürügü. ⁵⁷ Natürü Pedru rü tama nüxü nacúaxchañ ga yema ore, rü ñanagürü: —Pa Ngecüx, choma rü tama nüxü chacuèx ya yima Ngechuchu —ñanagürü. ⁵⁸ Natürü yixcamaxüra rü to ga duüxü Pedruxü nadau, rü ñanagürü nüxü: —Cuma rü ta Ngechuchutanüxü quixi —ñanagürü. Natürü Pedru nanangãxü rü ñanagürü: —Tama nixi, Pa Yatüx. Tama natanüxü chixi —ñanagürü. ⁵⁹ Rü wüxi ga ora ngupetüguwena rü to ga duüxü rü nüxü ñanagürüama: —Aixcümáxüchi ñaa yatü rü Ngechuchutanüxü nixi, erü Gariréañecüãx nixi —ñanagürü. ⁶⁰ Rü yexguma ga Pedru rü ñanagürü: —Pa Yatüx, tama

nüxü chacuèx na tacüchigaxü quixuxü —ñanagürü. Rü yexgumatama Pedru ídexayane rü nica ga otá. ⁶¹ Rü yexguma ga Cori ga Ngechuchu rü Pedrucèx nügü ínidau. Rü numa ga Pedru rü nüxna nacuèxáchi ga yema ore ga Cori ga Ngechuchu namaã nüxü ixuxü ga ñaxü:

“Ñomatama i chütaxügu naxüpa na otá icaxü, rü tomaèxpüxcüna taxütáma cugü quixu na chorü duüxü quiixü”, ñaxü. ⁶² Rü yexguma ga Pedru rü ínaxüxü ga yéma. Rü poraãcüxüchi naxaxu.

Ngechuchugu nidaux-cüraügü
(Mt 26.67-68; Mr 14.65)

⁶³ Rü yema yatügü ga Ngechuchuna daugüxü, rü nagu nidauxcüraügü, rü nüxna nanacuáixcagüxü. ⁶⁴ Rü nayadüxétügü, rü nachiwegu nidagügü, rü ñanagürügü: —¡Nüxü nacuèx na texé cuxü na idagüxü! —ñanagürügü. ⁶⁵ Rü muxüma ga to ga ore ga chixexü namaã nixügüe.

Àëxgacügü ga tacügüpëxewa nanagagü ga Ngechuchu
(Mt 26.59-66; Mr 14.55-64; Cu 18.19-24)

⁶⁶ Rü yexguma yangunegu rü nangutaquëxegü ga Yudíugüarü àëxgacügüerügü, rü paigüarü àëxgacügü, rü ngüexëèruügü ga Moíchéarü mugüwa nguëètaegüxü. Rü ñuxüchi norü purichíagüxü namu na napëxewa Ngechuchuxü nagagüxücèx. Rü yéma Ngechuchuna nacagü, rü ñanagürügü: ⁶⁷ —Toma rü nüxü tacuáxchaü rü cuma quiixü i Cristu rü èxna tama. ¡Tomaã cugü ixu! —ñanagürügü. Rü Ngechuchu nanangäxü rü ñanagürü: —Ngëxguma chi pemaã nüxü chixuxgu na choma chíixü i Cristu, rü tãu chima choxü peyaxögü. ⁶⁸ —Rü ngëxguma chi pexna chacaxgu na tacücèx choxna peçaxü, rü tãu chima choxü pengäxüga, rü tãu chima choxü pingëxgü. ⁶⁹ —Natürü ñuxmawena rü choma i Tupana Nane na duüxüxü chíixü rü Chaunatü ya Tupana ya poracüxütawa tá changëxma —ñanagürü. ⁷⁰ Rü yexguma guxüma ga yema àëxgacügü nüxna nacagü, rü ñanagürügü: —¿Èxna cuma quiixü i Tupana Nane? —ñanagürügü. Rü Ngechuchu nanangäxü, rü ñanagürü: —Ngü. Tupana Nane chixí ngëxgumarüü i pematama nüxü pixuxürüü —ñanagürü. ⁷¹ Rü yexguma nügümaã ñanagürügü ga yema àëxgacügü: —Ñuxma rü marü taxucèxma naxcèx tadau i to i duüxügü i nüxü ixuxü i ñaã yatüchiga. Erü yixematama marü naãxwatama nüxü taxíñüë i norü ore na ñuxü ñaxü —ñanagürügü.

23

Piratupëxewa nayexma ga Ngechuchu
(Mt 27.1-2,11-14; Mr 15.1-5; Cu 18.28-38)

¹ Rü guxüma ga yema àëxgacügü rü inachigü, rü àëxgacü ga Dumacüãx ga Piratuxütawa Ngechuchuxü nagagü. ² Rü yéma Piratupëxewa inanaxügüe ga Ngechuchuxü na yaxugüexü. Rü ñanagürügü: —Ñaã yatü rü nüxü itayangaugü na cumaã nanuëxëèãxü i duüxügü. Rü tomaã nüxü nixu na tama namexü na àëxgacü ya Dumawa ngëxmacüaxü na tanaxütanüxü. Rü nügü nixu na numa na yíixü i torü àëxgacü i Cristu —ñanagürügü. ³ Rü yexguma ga Piratu rü Ngechuchuna naca rü ñanagürü: —¿Cuma quiixü i Yudíugüarü àëxgacü? —ñanagürü. Rü Ngechuchu nanangäxü rü ñanagürü: —Ngëmaãcü, ngëma nüxü quixuxü chixí i chomax —ñanagürü. ⁴ Rü yexguma ga Piratu rü ñanagürü

nüxü ga paigüarü äëxgacügü rü togü ga duüxügü: —Chauxcèx rü taxuüma i chixexü naxü i ñaã yatü —ñanagürü. ⁵ Natürü nümagü rü yexeraäcü Ngechuchuxü nixugüeama, rü ñanagürügü: —Nüma rü guxü i Yudéaanewa nanangüexëe i duüxügü na cuxchi naxaixücèx. Rü Gariréaanewa inanaxügü ga yemaäcü na duüxügüxü nangüexëëxü, rü ngëmaäcü nanaxü ñüxmata nüma Yudéaanewa nangu —ñanagürügü.

Erodepëxewa nayexma ga Ngechuchu

⁶ Rü yexguma yemaxü naxïnúga ga Piratu, rü duüxügüna naca rü ngoxi Gariréaanecüãx yixi ga Ngechuchu. ⁷ Rü yexguma Piratu nüxü ñnúga ga aixcüma Gariréaanecüãx na yïxü ga Ngechuchu rü Gariréaanearü äëxgacü ga Erodexütawa nanamu, yerü Yerucharéüwa nayexma ga Erode ga yexguma. ⁸ Rü yexguma Ngechuchuxü nadëuxgu ga Erode rü nataäëxüchi. Yerü nuxcü mama poraäcü nüxü nadauxchaü, yerü üpaacü nüxü naxïnü ga nachiga. Rü ínanangüexëe na Ngechuchuxü nadauxchaüxü na napëxewa naxüãxü ga wüxi ga mexü ga taxü ga Tupanaarü poramaã naxüxü. ⁹ Rü muëxpüxcüna Ngechuchuna naca ga Erode. Natürü Ngechuchu rü tama nanangãxü. ¹⁰ Rü yéma nayexmagü ta ga paigüarü äëxgacügü rü ngüexëëruügü ga Moïchéarü mugüwa ngüxëëtaegüxü. Rü nümagü rü poraäcü Ngechuchuxü ínaxuaxügü. ¹¹ Rü yexguma ga Erode rü norü churaragü rü poraäcü chixri Ngechuchumaã nachopetü. Rü nagu nidauxcüraügü. Rü ñüxüchi wüxi ga äëxgacüchirugu nayacüxëëgü na yemaäcü nüxü nacugüexücèx. Rü yemawena Piratuxüta wenaxärü Ngechuchuxü namu ga Erode. ¹² Rü woo üpaacü ga Piratu rü Erodemaã nügüchi na naxaixü, natürü yema ngunexügu nixi ga nügümaã nangüxmüëxü.

Piratu rü Ngechuchumaã nanaxuegu na nayuxücèx

(Mt 27.15-26; Mr 15.6-15; Cu 18.39-19.16)

¹³ Rü yexguma ga Piratu rü nanangutaquëxexëe ga paigüarü äëxgacügü, rü togü ga Yudügarü äëxgacügü, rü guxüma ga duüxügü ga yéma yexmagüxü. ¹⁴ Rü Piratu ñanagürü nüxü: —Pema nuã chauxcèx penaga i ñaã yatü, rü nüxü pixu na chomaã nanüxëëãxü i duüxügü. Natürü pepëxewa nüxna chaca i ngëmachiga rü ñüxma rü marü nüxü pedau na taxuüma nawa ichayangauxü i ngëma chixexü i naxcèx ípenaxuaxüxü. ¹⁵ —Rü Erode rü ta taxuüma nawa inayangau i ngëma chixexü, rü ngëmacèx wenaxärü taxcèx nanamuëgu. Rü dücax, taxuüma i chixexü naxü na ngëmagagu nayuxücèx. ¹⁶ —Rü ngëmacèx chorü churaragüxü tá chamu na naçuaixgüãxücèx, rü ñüxüchi tá chayangëx —ñanagürü. ¹⁷ Rü nüma ga Piratu rü guxüguma ga yexguma yema petawa nanguuüxgu rü duüxügüxü nataäëxëëchaü namaã ga na yangéãxü ga wüxi ga yatü ga poxcuxü. ¹⁸ Natürü guxüma ga yema duüxügü rü wüxigu inanaxügü ga aita na naxüexü. Rü ñanagürügü: —¡Napoxcu i ngëma Ngechuchu! ¡Rü Barabáxü waxi ínanguxuchixëe! —ñanagürügü. ¹⁹ Rü yema Barabá rü napoxcu yerü üpaacü Yerucharéüwa äëxgacümaã nananuëxëe ga duüxügü, rü ñüxüchi namáëta. ²⁰ Natürü ga Piratu rü wenaxärü duüxügümaã nidexa, yerü nüma rü Ngechuchuxü ningëxchaü. ²¹ Natürü ga duüxügü rü yexeraäcü aita naxüe rü ñanagürügü: —¡Curuchawa yapota! ¡Curuchawa yapota! —ñanagürügü. ²² Rü Piratu norü tomaëxpüxcüna duüxügümaã nidexa, rü ñanagürü: —Dücèx, çtacü rü chixexü éxna naxü? Choma rü taxuüma i chixexüxü nawa

ichayangau na ngēmacēx chanayuxēēxū. Rū chorū churaragūxū tá chamu na naçuaixgūāxūcēx, rū ñuxūchi tá chayangēx —ñanagürü. ²³ Natürü nümagü ga duñxügü rü yexeraācū aita naxūeama, rū naxcēx ínacagü na curuchawa yapotaāxūcēx. Rū yema na nayexeragūamaxū ga yema duñxügü rü düxwa ga Piratu rü duñxügüga naxīnū. ²⁴ Rū nüma ga Piratu rü norü churaragūxū namu na naxügüāxūcēx ga yema duñxügü naxwēxegūxū. ²⁵ Rū Barabáxū ningēx, yerü yema nixī ga duñxügü naxcēx ícagūxū. Rū yema Barabá nixī ga poxcuxū naxcēx na duñxügūxū āēxgacūmaā nanuēxēēxū rü namáētaxū. Rū yexguma ga Piratu rü duñxügüna Ngechuchuxū namu na namaā naxügüāxūcēx ga yema nümagü nanaxwēxegūxū.

Ngechuchuxū curuchawa nipotagü

(Mt 27.32-44; Mr 15.21-32; Cu 19.17-27)

²⁶ Rū yema duñxügü rü Ngechuchuxū nigagü na curuchawa yanapotagüāxūcēx. Rū yexguma Ngechuchuxū yagagüyane, rū yexma namagu nüxū nangaugü ga wüxi ga yatü ga Chireneçūāx ga nañnewa ne ũcū. Rū Chimáú nixī ga naega. Rū Chimáúxū niyauxgü ga duñxügü, rū naātügu ngīxū naxünagügü ga curucha na Ngechuchuwe ngīxū nangexūcēx. ²⁷ Rū muxūma ga duñxügü rü nawe narūxī. Rū yema duñxügütanūwa nayexmagü ga muxūma ga ngexügü ga auxexū rü aita ũexū, yerü Ngechuchucēx nangechaügü. ²⁸ Natürü ga Ngechuchu rü yema ngexügūxū nadawenü, rū ñanagürü nüxū: —Pa Ngeçügüx, Pa Yerucharēúçūāx ¡tāxū i chauxcēx pexauxexū, natürü pegüçèxtama pexauxe rü pexacügüçè! ²⁹ —Erü nawa tá nangu i ngunexügü i nagu ñagūxū tá i duñxügü:

“Tataāēgü ya yíxema ngeāxta ya taxuacūma āxācügüxe, rū taguma tacharaügüxe, rū taguma maīxācügüxe, erü taxucatáma tūmaxācügüçèx taxauxe”, ñagūxū. ³⁰ —Rū ngēxguma i duñxügü rü tá mēxpūnegūxū nacēxügü rü ñanagürügü tá:

“¡Toétügu rübuemü!” ñanagürügü tá. Rū tá ngüchitaerugūxūxū nacēxügü, rü ñanagürügü tá:

“¡Toxū idüxétügü!” ñanagürügü tá. ³¹ —¿Erü ñuxācū tá namaā n- chopetü i ngēma duñxügü i aixcūma chixexū ügūxū, ega ñaā chix- exū chomaā naxügüga na woo taxuūma i chixexū chaxūchiréxū? —ñanagürü ga Ngechuchu. ³² Rū yéma nanagagü ta ga taxre ga máētagūxū na Ngechuchurū curuchawa yanapotagüāxūcēx. ³³ Rū yexguma nawa nangugüga ga yema nachica ga Duñxēēruchinēāgu āegaxū, rū yéma curuchawa Ngechuchuxū nipotagü. Rū yema taxre ga máētagūxū rü ta Ngechuchurū curuchawa nipotagü, wüxi ga norü tügüncēwawa rü to ga norü toxwecūwawa. ³⁴ Rū yexguma Ngechuchuxū curuchawa iyapotagüyane, rū ñanagürü ga Ngechuchu: —Pa Chaunatūx, ¡nüxū nangechaū i ñaā duñxügü, erü tama nüxū nacüèxgü na ¡acü rü chixexū naxüexū! —ñanagürü. Rū yema chur- aragü rü nanade ga Ngechuchuchiru. Rū ñuxūchi wüxi ga dīeru ngīxū nañanagügü na yemawa nüxū nacüèxgūxūcēx na texéarü tá yīxū ga yema Ngechuchuchiru. ³⁵ Rū duñxügü rü yéma inarüdaunü. Natürü yema Yudiugüarü āēxgacügü rü Ngechuchuxū nacugüte, rü ñanagürügü: —Nüma rü togūxū namaxēē. ¡Écū, ñuxma rü nügütama namaxēē ega aixcūma Cristu ya Tupana nüxū unetacü yixīgu! —ñanagürügü. ³⁶ Rū

yema churaragü rü ta Ngechuchuxü nacugüe. Rü naxütawa naxi, rü nüxna nanaxä ga binu ga üxchiücü. ³⁷ Rü ñanagürügü nüxü: —Ega Yudiügüarü äëxgacü ya tacü quixigu, jrü cugütama rüngüxëë i ñuxmax, na ícunguxuchixüçex! —ñanagürügü. ³⁸ Rü norü curuchatapëxewa nipota ga wüxi ga mürapewaxacü ga äegatachinüxü ga Griégugügawa rü Dumacüäxgügawa rü Yudiügügawa ümatüxü ga ñaxü: —Daa nixi ya Yudiügüarü Äëxgacü ya Tacüxüchi —ñaxü. ³⁹ Rü wüxi ga yema máëtaxü ga naxrüü curuchawa ipotaxü rü Ngechuchumaã naguxchiga, rü ñanagürü: —Ega aixcüma Cristu quixigu, jrü cugütama rüngüxëë na ícunguxuchixüçex, rü toxü rü ta rüngüxëë na ítanguxüxüçex! —ñanagürü. ⁴⁰ Natürü ga yema to ga máëtaxü rü namücüxü ínangaxüchiana, rü ñanagürü nüxü: —Cuma rü naxrüü na curuchawa quipotachirëxü, jrü ngëxguma rü ta tama Tupanaxü cumuüxü? ⁴¹ —Yixema rü name nixi na ipoxcuexü erü tagagutama nixi i ngüxü ingegüxü erü ngëma nixi i tórü natanü naxcëx ga yema chixexü ga ixügüxü. Natürü daa yatü rü taxuüma i chixexü naxü —ñanagürü. ⁴² Rü yexguma ga yema máëtaxü rü ñanagürü: —Pa Ngechuchux, jchoxna nacüxächi i ngëxguma wenaxärü núma cuxüxgu rü äëxgacüxü ícunguxgu! —ñanagürü. ⁴³ Rü Ngechuchu nanangäxü rü ñanagürü: —Aixcüma cumaã nüxü chixu rü ñomatátama i ngunexügu chomaã cungëxma i mexëchixü i naãnewa —ñanagürü.

Nayu ga Ngechuchu

(Mt 27.45-56; Mr 15.33-41; Cu 19.28-30)

⁴⁴ Rü yexguma tocuchiwa nanguxgu rü guxüwama naxëäne ñuxmata tomaëxpüxarü orawa nangu ga yáuanecü. ⁴⁵ Rü ga üëxcü rü nixo. Rü tupauca ga taxüneärü tüyemachiüxü rü ngäxügu narügaute. ⁴⁶ Rü yexguma ga Ngechuchu rü poraäcü aita naxü rü ñanagürü: —Pa Chau-natüx, cuxmëxwa chanangëx i chauäë —ñanagürü. Rü yema ñaxguwena rü nayu. ⁴⁷ Rü yexguma yema churaragüarü äëxgacü ga Dumacüäx nüxü dëuxgu ga yema ngupetüxü, rü Tupanaxü nicüxüü, rü ñanagürü: —Aixcüma ñaã yatü rü taxuüma i chixexü naxü —ñanagürü. ⁴⁸ Rü guxüma ga yema togü ga duüxügü ga yéma yexmagüxü rü nüxü daugüxü ga yema ngupetüxü, rü poraäcü nangechaügüäcüma napatacëx nawoegu. ⁴⁹ Natürü guxüma ga yema duüxügü ga aixcüma Ngechuchuxü cuëxgüxü rü yaxüwa- tama nüxü narüdaunü ga yema ngupetüxü. Rü yema duüxügütanüwa ta iyexmagü ga yema ngecügü ga Ngechuchuwe rüxücü ga yexguma Garirëaanewa ne naxüxgu.

Ngechuchu rü naxmaügu nayanaxüchigü

(Mt 27.57-61; Mr 15.42-47; Cu 19.38-42)

⁵⁰ Rü nayexma ga wüxi ga yatü ga Yudeáanewa yexmane ga iãne ga Arimatëacüäx, rü Yüche nixi ga naëga. Rü núma rü Yudiügüarü äëxgacügütanüwa naxü, natürü namecüma rü meã namaxü. ⁵¹ Rü núma rü poraäcü ínanguxëë na ínanguxü ga Tupana na yéma äëxgacü yíxüçex. Rü yemacëx tama norü me nixi ga yema Ngechuchumaã naxügüxü ga yema togü ga namücügü ga äëxgacügü. ⁵² Rü núma ga Yüche rü Piratuxütawa naxü, rü Ngechuchuxü necëx ínayaca. ⁵³ Rü curuchawa nayayaxu ga Ngechuchuxüne, rü wüxi ga düxruümaã nananuque. Rü wüxi ga naxmaü ga nutaarü mëxpüxüwa yacaxmaügüxügu nayanaxüchü. Rü yema naxmaü rü nayexwacaxü, rü taguma texëxü nagu yaxüchigüxü nixi. ⁵⁴ Rü yema nixi ga ngunexü ga nagu

Yudíngü nügü imexêëgüxü naxcèx ga ngüxchigaarü ngunexü. Rü marü ningóonechaü ga yema ngüxchigaarü ngunexü. ⁵⁵ Rü yema ngecügü ga Ngechuchumaã Gariréaanewa ne İcü, rü Ngechuchuxü İyaxücuchigüxüwa İyadaugü. Rü nüxü idaugü ga ñuxácü na İyaxücuchigüãxü ga naxüne. ⁵⁶ Rü yexguma ngıpatawa nangugügu, rü inamexêëgü ga pumara rü chixü. Rü İrüngügü ga ngüxchigaarü ngunexügu, yerü yema nixı ga Tupanaãrü mu.

24

Yuwa İnarıda ga Ngechuchu

(Mt 28.1-10; Mr 16.1-8; Cu 20.1-10)

¹ Rü pèxmamaxüchi ga yüxüarü ngunexügu, rü yema ngecügü rü we-naxãrü naxmaüwa İyadaugü. Rü yema inangegü ga yema pumara ga yamexêëgüxü. Rü naİgü ga ngecügü rü ta ngıxü İyaxümücügü. ² Rü yexguma yema nangugügu, rü nüxü İyangaugü ga marü na İnaxügachixü ga guma nuta ga naxmaüãrü ngüxtaüxü. ³ Rü yexma nagu İchocu, natürü taxuüma idaugü ga naxüne ga Cori ga Ngechuchu. ⁴ Rü yema ngecügü rü poraãcü İbaixãchiãëgü, rü tama nüxü İcuëxgüëga ga İacü na naxügüxü. Rü ngürüãchi nüxü idaugü ga taxre ga yatügü ga ngıxütagu chigüxü ga poraãcü İyaurachirutanücüxü. ⁵ Rü yema ngecügü rü İyarümaxãchierugü, yerü poraãcü İmuüë. Rü yemacèx ga yema yatügü rü ñanagürügü ngıxü: —¿Tüxcüü nuxã yuetamaügu naxcèx peyadau ya yima maxücü? ⁶ —Nataxuma i nuã ya Ngechuchu, erü marü wena namaxü. İRü nüxna pecuëxãchie ga yema ore ga pemaã nüxü yaxuxü ga yexguma Gariréaanewa nayexmagu! ⁷ —Yerü pemaã nüxü nixu ga ñuxácü pecaduãxgüxü tá na yayauxgüxü, rü curuchawa na yapotagüãxü, rü ñuxácü tomaëxpüx i ngunexügu tá wena na namaxüxü —ñanagürügü ga yema yatügü. ⁸ Rü yexguma ga yema ngecügü rü nüxna İcuëxãchie ga yema Ngechucharü ore. ⁹ Rü nüxna İwoegu ga yema naxmaü. Rü yema 11 ga Ngechucharü ngüexügümaã nüxü İyarüxugüë ga guxüma ga yema nüxü nadaugüxü. Rü guxüma ga togü ga yaxögüxü ga yema yexmagüxümaã rü ta nüxü İyarüxugüë. ¹⁰ Rü María ga Magadácüãx, rü Cuána, rü María ga Chaütiágu naë, rü naİgü ga ngecügü İyixı ga wüxigu yema Ngechucharü ngüexügüxütawa nangegücü ga yema ore. ¹¹ Natürü yema ngüexügücèx rü İnucamare nixı ga yema ore, rü tama ngıxü nayaxögüchaü. ¹² Natürü ga Pedru rü İnañaãchi, rü İnayadau ga naxmaüwa. Rü yexguma nagu yadaucuchigu ga naxmaü, rü nüxü nadau ga düxruügü ga wüxicüwagu na nanuxü. Rü poraãcü naıaixãchiãë namaã ga yema ngupetüxü, rü İaixãchiãëãcüma napatacèx nataegu.

Emaüãrü namawa nangox ga Ngechuchu

(Mr 16.12-13)

¹³ Rü yema ngunexügutama rü taxre ga yema Ngechucharü ngüexügü rü wüxi ga İãne ga Emaüwa naxı. Rü norü yaxü ga guma İãne rü 11 ga kilómetru nixı nüxna ga Yerucharëü. ¹⁴ Rü yexguma namagu naxıyane, rü nachigagu nıdexatanü ga guxüma ga yema ngupetüxü. ¹⁵ Rü yexguma yemachigagu İyadexatanüyane, rü nümatama ga Ngechuchu rü ngürüãchi naxcèx yema nixü, rü natanügu nixüchigü. ¹⁶ Natürü yema ngüexügü rü woo Ngechuchuxü nadaugü, rü tama nüxü nacuëxgüëga na Ngechuchu İıxü, yerü Tupana rü nanatoëëgü na tama Ngechuchuxü nacuëxgüxüçèx. ¹⁷ Rü yexguma ga Ngechuchu, rü yema taxre ga

ngúexũgũna naca, rü ñanagürü: —¿Tacüchiga nixĩ i pidexatanüxũ na nuxã namagu na pexĩxũ? ¿Rü tacücèx nixĩ i pengechaũèx? —ñanagürü. ¹⁸ Rũ wũxi ga yema ngúexũ ga Creopágu äegaxũ nanangãxũ, rü ñanagürü: —Guxũma i duũxũgũ nixĩ i nüxũ cuáxũ ga yema yexwaca ngupetũxũ ga Yerucharéũwa. Rũ cuma na yexma cunaxũãnechiréxũ rü maneca cuxicatama nixĩ i tama nüxũ cucuáxũ ga yema ngupetũxũ —ñanagürü. ¹⁹ Rũ yexguma ga nüma ga Ngechuchu rü ñanagürü: —¿Tacü nangupetü ga Yerucharéũwa? —ñanagürü. Rũ nanangãxũgũ ga yema ngúexũgũ, rü ñanagürügü: —Poraãcü chixexũ nüxũ naxüpetü ga Ngechuchu ga Nacharétucũãx. Nüma ga Ngechuchu rü Tupanaãrũ orearü uruũ ga mecü nixĩ. Rũ Tupanapêxewa rü duũxũgũpêxewa namecũma rü nanaxü ga taxũ ga cuèxruũgũ ga Tupanaãrũ poramaã naxüxũ, rü meã duũxũgũxũ nangúexèè. ²⁰ —Natürü ga paigüarü äëxgacügü rü tórü äëxgacügü rü nayayauxgü. Rũ Dumacũãx ga äëxgacügũna nanamugü na curuchawa yapotagüãcüma nayuxèègũãxüçèx. Rũ yemaãcü nayamëxgü. ²¹ —Toma nüxũ tacuèxgu rü nüma tá nixĩ i tomaã naporaxũ na ínganguchixüçèx i tachiũãne nüxna i Dumacũãxãrũ äëxgacü. Rũ ñuxma rü marü tomaëxpüx i ngunexũ nawena nixĩ ga na yamèxgũãxũ. ²²⁻²³ —Natürü tama ngèxĩcatama nixĩ, yerü ñuxre ga ngexũgü ga totanüxũ rü toxũ ínayabaixgügü. Yerü yema ngexũgü rü pèxmamaxũchi ínayadaugü ga naxmaũwa, rü tama nüxũ inayangaugü ga naxũne ga guma Ngechuchu. Rũ yemacèx ga yema ngexũgü rü toxçèx nawoegu, rü tomaã nüxũ nayarüxugüe ga nüxũ na nadaugũxũ ga Tupanaãrũ orearü ngeruũgü ga daxüçũãx. Rũ yema daxüçũãxgü rü namaã nüxũ nixugügü ga Ngechuchu rü na namaxũxũ —ñanagürügü. ²⁴ Rũ yexguma yema ngexũgüarü orexũ taxĩnèëgu, rü ñuxre ga tomücügü rü naxmaũwa ínayadaugü. Rũ yema ngexũgü nüxũ ixugũxürü nüxũ inayangaugü ga naxmaũ. Natürü tama Ngechuchuxũ nadaugü —ñanagürügü. ²⁵ Rũ yexguma ga Ngechuchu rü ñanagürü nüxũ: —¿Tüxcüũ tama peãeta ipexü i pemax? ¿Rü ñuxgura tá ta ipeyaxögüxũ i nuxcũmaũgüxũ ga Tupanaãrũ orearü uruũgüarü ore? ²⁶ ¿Rü tama èxna nüxũ pecuèx ga yema ngüxũ tá na yangexũ ga Cristu naxũpa na daxũguxũ i naãnewa naxũxũ, na ngema äëxgacü yĩxüçèx? —ñanagürü. ²⁷ Rũ yexguma inanaxügü ga namaã na nangoxèèãxũ ga guxũma ga Tupanaãrũ ore ga nachiga ümatüxũ. Rũ yema Tupanaãrũ ore ga Moiché ümatüxũmaã inanaxügü. Rũ ñuxũchi namaã nüxũ nixu ga guxũma ga yema Tupanaãrũ ore ga nuxcũmaũgüxũ ga Tupanaãrũ orearü uruũgü ümatügüxũ. ²⁸ Rũ yexguma yema ñãne ga Emaũwa nangugügu, rü Ngechuchu rü nümaxũ toxnamana nügü naxũxèènetã. ²⁹ Natürü ga yema ngúexũgü rü nüxũ nacèèxũgü na yexma naxãũüçèx, rü ñanagürügü: —¿Nuxma toxũtagu nape, erü marü nayáuane, rü paxã tá nachüta! —ñanagürügü. Rũ yexguma ga Ngechuchu rü nawe yexma narüxãũx. ³⁰ Rũ yexguma chibüçèx wũxiwa mechawa natogügu, rü Ngechuchu nanayaxu ga pãũ. Rũ Tupanaana moxè naxçèx naxã. Rũ ñuxũchi inanabücu, rü wüxichigũna nanaxã. ³¹ Rũ yexgumatama naãèxũ nicuèxãchitanü. Rũ nüxũ nacuèxgü na guma yĩxũ ga Ngechuchu. Natürü yexgumatama ngürüãchi inayarütaxu ga nümax. ³² Rũ yema taxre ga ngúexũgü rü nügũmaã ñanagürügü: —¿Tama èxna ga itaãègüxũ ga tórü maxũnewa ga yexguma namawa tamaã yadeaxgu rü tamaã nangoxèèãgu ga Tupanaãrũ ore i ümatüxũ? —ñanagürügü. ³³ Rũ yexgumatama ga yema taxre ga ngúexũgü rü inaxĩãchi ga Yerucharéüçèx

na nawoeguxũ. Rũ yexma nũxũ nayangau ga na ínangutaquẽxegũxũ ga yema 11 ga Ngechucharũ ngúexũgũ rũ togũ ga natanũxũgũ. ³⁴ Rũ yema duũxũgũ ga íngutaquẽxegũxũ rũ ñanagũrũgũ nũxũ: —Aixcũma nixĩ i marũ wena namaxũxũ ya Cori ya Ngechuchu. Rũ Chimáũ ga Pedru rũ marũ nũxũ nadau —ñanagũrũgũ. ³⁵ Rũ yexguma ga yema taxre ga ngúexũgũ rũ ta nũxũ nixugũgũ ga yema nũxũ ngupetũxũ ga namawa, rũ ñuxãcũ nũxũ na yacuèxãchitanũxũ ga guma na yĩxũ ga Ngechuchu ga yexguma pãũ inabũcũxgu.

Ngechuchu rũ norũ ngúexũgũcèx nangox
(Mt 28.16-20; Mr 16.14-18; Cu 20.19-23)

³⁶ Rũ yexguma yemaãcũ íyadexagũyane, rũ ngũrũãchi norũ ngãxũtanũgu nachi ga Ngechuchu. Rũ nũxũ narũmoxẽ, rũ ñanagũrũ: —Nuxmaẽ Pa Chorũ Duũxũgũx —ñanagũrũ. ³⁷ Natũrũ nũmagũ rũ nabaixãchiãẽgũ, rũ poraãcũ namuũẽ, yerũ nagu naxĩnũẽgu rũ wũxi ga naxchixixũmare nadaugũ. ³⁸ Natũrũ ga Ngechuchu rũ ñanagũrũ nũxũ: —¿Tũxcũũ pebaixãchiãẽgũ rũ tama peyaxõgũ na choma chiĩxũ? ³⁹ —¿Dũcèx, nũxũ pedèux ya choxmèxgũ rũ chaucutũgũ! Rũ chomatama chixĩ. ¿Rũ choxũ pingõgũ rũ meã choxũ perũdaunũ! Erũ wũxi i naxchixi rũ tama choxũ pedauxũrũũ naxãmachi rũ naxãxchinèxã —ñanagũrũ. ⁴⁰ Rũ yema ñaxguwena, rũ nũxũ nanawèx ga naxmèx rũ nacutũ. ⁴¹ Natũrũ ga yema duũxũgũ rũ yexguma rũ ta tama nũxũ nayaxõgũ, yerũ nabaixãchiãẽgũ rũ nataãẽgũ. Rũ yemacèx ga Ngechuchu rũ nũxna naca rũ ñanagũrũ nũxũ: —¿Pexũ nangèxmaxũ i õna i nuã? —ñanagũrũ. ⁴² Rũ yexguma nũxna nanaxãgũ ga wũxi ga choxni ga iguxũchipèxe rũ wũxiweũ ga berure. ⁴³ Rũ nũma ga Ngechuchu rũ nanayaxu. Rũ yema duũxũgũpèxewa nanangõx. ⁴⁴ Rũ ñuxũchi ñanagũrũ nũxũ: —Rũ yema choxũ ngupetũxũ rũ yema nixĩ ga pemaã nũxũ chixuxũ ga yexguma tauta chayũxgu rũ petanũwa chayexmagu. Yerũ yexguma rũ pemaã nũxũ chixu rũ ñacharũgũ:

“Rũ tá ningũ i guxũma i Tupanaãrũ ore i chauchiga ùmatũxũ i Wiyægũarũ poperawa, rũ Moĩché ùmatũxũ i mugũwa, rũ ore i nuxcũmatũgũxũ ga Tupanaãrũ orearũ uruũgũ ùmatũxũwa”, ñacharũgũchirèx pexũ. ⁴⁵ Rũ yemaãcũ namaã nanangõxèẽ ga Tupanaãrũ ore ga ùmatũxũ. ⁴⁶ Rũ ñanagũrũ nũxũ: —Tupanaãrũ ore i ùmatũxũwa rũ nũxũ nixu rũ choma i Cristu rũ tá chayũ, rũ tomaèxpũx i ngunexũgu rũ tá wena chamaxũ. ⁴⁷ —Rũ yematama ore i ùmatũxũwa nũxũ nixu rũ tá chauégagu tá nixĩ i nũxũ yaxugũxũ i ore i mexũ. Rũ Yerucharèũwa tá inaxũgũ i ngẽma ñuxmatáta guxũ i naãnewa nangu na ngẽmaãcũ duũxũgũ nũxũ rũxoexũcèx i nacũma i chixexũ na Tupana nũxũ nũxũ ngechaũxũcèx i norũ pecadugũ. ⁴⁸ —Rũ ñuxma rũ pematama nixĩ i chorũ orearũ uruũgũ, rũ tá duũxũgũmaã nũxũ pixu ga yema chauxũtawã nũxũ pedaugũxũ rũ nũxũ pexĩnũèxũ. ⁴⁹ —Rũ dũcax, choma rũ pexcèx tá nũma chanamu i Naãẽ i Üünexũ ga pexcèx nũxũ naxunetaxũ ya Chaunatu. Natũrũ chanaxwèxe i númatátama daa ñãne ya Yerucharèũwa pengèxmagũ, ñuxmatáta penayauxgũ i ngẽma Tupanaãẽ i Üünexũ i daxũwa ne ùxũ i tá pexũ poraexèèxũ —ñanagũrũ.

Ngechuchu rũ daxũguxũ ga naãnewa naxũ
(Mr 16.19-20)

⁵⁰ Rū yexguma ga Ngechuchu rü Yerucharéũârü toxnamana norü ngúexũgũxũ nagagü, ñuxmata Betániãârü ngaicamana nangugü. Rū yéma norü ngúexũgüétü nawémẽx, rü Tupanana naxcèx naca na nüxũ nangũxẽxũcèx. ⁵¹ Rū yexguma yema ngúexũgücèx nayumũxèguwena rü nüxna nixũgachi. Rū Tupana daxũguxũ ga naãnewa nanaga. ⁵² Rū nümagü ga norü ngúexũgü rü Ngechuchuxũ nicuèxüũgü. Rū ñuxũchi taãẽãcüma Yerucharéũcèx nawoegu. ⁵³ Rū guxũguma tupauca ga taxũnewa naxĩxũ, rü yéma Tupanaxũ nicuèxüũgü. Rū ngẽmaãcü yĩ.

ORE I MEXŨ GA CUÁŨ ÜMATŨXŨ

Tupana Nane rü duũxũãcü nangox

¹ Naxũpa ga guxũma, rü marü nayexma ga Tupana Nane. Rü Tupana-maã nayexma rü woetama Tupana nixĩ ga nümax. Nüma rü Tupanaãrũ Ore nixĩ i naega erũ tamaã nüxũ nixu i Tupanachiga. ² Rü naxũpa ga guxũma rü nüma ga Tupana Nane rü naxũtawatama nayexma. ³ Rü guma Nanexũ nixĩ ga namuxũ ga Tupana na naxũãxũcèx ga guxũma. Rü nataxuma i tacü i ñuxma ngẽxmaxũ i tama nüma naxũxũ. ⁴ Rü Nanewa nixĩ i nangexmaxũ i maxũ. Rü ngema maxũ rü guxũ i duũxũgũarũ ngóonexẽẽruũ nixĩ. ⁵ Rü yima Nane rü woo chixexũ íporaxũwa rü duũxũgũxũ nüxũ nacuèxẽẽ i Tupanachiga. Rü ngẽma chixexũ rü taxucũ-rũwama ngẽma mexũxũ narüyexera. ⁶⁻⁷ Rü nayexma ga wũxi ga yatũ ga Cuáũ ga baiũxẽẽruũgu ãegacũ. Rü guma nixĩ ga Tupana nüma namucũ na nüxũ yaxuxũcèx ga nachiga ga guma ngóonexẽẽruũ na yemaãcü guxãma nüxũ yaxõgũxũcèx. ⁸ Rü nüma ga Cuáũ rü tama Tupana Nane ya duũxũgũarũ ngóonexẽẽruũ nixĩ. Natürũ nüma nixĩ ga Tupana nüma namuxũ na nüxũ yaxuxũcèx ga nachiga ga guma ngóonexẽẽruũ. ⁹ Rü ñoma ga naãnewa nangu ya yima aixcũma Tupana Nane ixĩcü i guxũma i duũxũgũxũ ngóonetanũxẽẽcü. ¹⁰ Rü nüma ga guma Nane ga Tupanaãrũ Ore ixĩcü rü ñoma ga naãnewa nayexma. Rü woo nagagu nixĩ ga naxũãxũ ga guxũma ga ñoma ga naãne, natürũ ñoma ga naãne-cũãx ga duũxũgũ rü tama nüxũ nacuèxgũ na texe yĩxũ. ¹¹ Nuã norũ naãnewatama nangu, natürũ norũ duũxũgũ ga Yudíugũ rü tama nanayauxgũ. ¹² Natürũ guxema nayauxgũxe rü nüxũ yaxõgũxe rü tüxũ nanatauxchaxẽẽ na Tupanaxãcũgũ tixĩgũxũ. ¹³ Rü ñuxma rü Tupanaxãcũgũ tixĩgũ ga guxema yaxõgũxe. Natürũ tama noxri tabuexũgagu nixĩ i ngẽma rü tama tũmanatũgũarũ ngũchaũgagu nixĩ. Natürũ i ñuxma rü Tupanaxãcũgũ tixĩgũ ga guxema yaxõgũxe yerũ nümatama ga Tupana rü naxãcũgũxũ tüxũ nixĩgũxẽẽ. ¹⁴ Rü nüma ya yima Nane ya Tupanaãrũ ore ixĩcü rü duũxũãcü nangox. Rü totanũwa nayexma rü poraãcü toxũ nangechaũ rü aixcũma nixĩ ga norũ ore. Rü toma nüxũ tadaugũ ga ñuxãcü na naxũünexũ. Rü Nanatũxũtawa nanayaxu ga yema üüne yerũ nügũmaã nüxũ nawũxicèx ga nüma. ¹⁵ Rü gumachigaxũ nixĩ ga yaxuxũ ga Cuáũ ga yexguma ñaxgu: —Daa nixĩ ga guma pemaã nüxũ chixuchigacũ ga yexguma ñachaxgu:

“Rü yima choweama ne ücü rü choxũ rüyexeracũ nixĩ, yerũ woetama marũ nayexma ga tauta chabuxgu ga chomax”, ñanagürũ ga Cuáũ. ¹⁶ Rü yima Tupana Nane rü namecũmaxũchi rü naxmẽxwa nangẽxma i guxũma. Rü naxũtawa nixĩ i nayauxgũxũ i guxũma i ngũxẽẽgũ. ¹⁷ Rü Moĩchéxũ nixĩ ga namuxũ ga Tupana na tüxũ nangúexẽẽxũcèx ga yema norũ mugũ. Natürũ Ngechuchu ya Cristuxũ nixĩ ga namuxũ na tüxũ nangúexẽẽxũcèx na yigũ ingechaũgũxũ rü nagu imaxẽxũcèx i ore i aixcũma ixĩxũ. ¹⁸ Taguma texé ñuxgu nüxũ tadau ga Tupana. Natürũ Nane ya nügũmaã nüxũ wũxicacũ nixĩ ya tüxũ nüxũ cuèxẽẽcü. Rü yima Nane rü Tupanaxũchi nixĩ, rü Nanatũmaã wũxiwa nangẽxmagũ.

*Cuáŭ ga baiŭxêëruŭ rü nüxŭ nixu ga Ngechuchu ya Cristuchiga
(Mt 3.11-12; Mr 1.7-8; Lc 3.15-17)*

¹⁹ Rü yema Yudíugüarü äëxgacügü ga Yerucharéüçüâx rü Cuáŭ ga baiŭxêëruŭxŭtawa nanamugü ga paigü rü Lebítanüxügü na nüxna yacagüexŭcêx na texe yíxŭ. ²⁰ Rü nüma ga Cuáŭ rü meäma nügü nixu, rü ñanagürü: —Tama nixí i Cristu chiŭxŭ i chomax —ñanagürü. ²¹ Rü wenaxârü nüxna nacagü rü ñanagürügü: —¿Texé éxna quiixí? ¿Éxna cuma ga nuxcúmaŭcü ga Tupanaârü orearü uruŭ ga Ería quiixŭ? —ñanagürügü. Rü Cuáŭ nanangâxŭ rü ñanagürü: —Tama Ería chixí —ñanagürü. Rü nümagü rü wenaxârü nüxna nacagüe rü ñanagürügü: —¿Éxna cuma quiixŭ ya yima orearü uruŭ ga Moïché nüxŭ ixucü ga ínguxchaŭcü? —ñanagürügü. Rü Cuáŭ nanangâxŭ rü ñanagürü: —Tama yima chixí —ñanagürü. ²² Rü yexguma ñanagürügüama: —¿Éxna texé quiixŭ? Erü tanaxwêxe i ngêma núma toxŭ mugüxŭxŭtawa tanange i curü ngâxŭga. ¿Rü ñuxŭ ñacuxŭ i ñuxma na texé quiixŭ? —ñanagürügü. ²³ Rü Cuáŭ nanangâxŭ rü ñanagürü nüxŭ: —Choma nixí i ngêma duŭxŭ i dauxchitawa i ngextá taxúema íxâpataxŭwa tagaäcü ñachaxŭ:

“¡Rü nüxŭ perüxoe i pecúma i chixexŭ rü ipeyanawêxächixêëx i perü maxŭ naxcêx ya Cori ya Tupana!” ñachaxŭ, guma nuxcúmaŭcü ga orearü uruŭ ga Ichaxía nüxŭ ixuxürüŭ —ñanagürü. ²⁴⁻²⁵ Rü yexguma ga yema paigü rü Parichéugü yéma mugüxŭ ga Cuáŭmaã na yanadexagüxŭcêx rü wenaxârü nüxna nacagüe, rü ñanagürügü: —Rü ngêxguma tama Cristu quiixígu, rü tama Ería quiixígu, rü tama yima orearü uruŭ ya ínguxchaŭcü quiixígu, ¿rü tüxcüŭ i duŭxŭgüxŭ ícubaiŭxêëxŭ i ñuxmax? —ñanagürügü nüxŭ. ²⁶⁻²⁷ Rü Cuáŭ nanangâxŭ rü ñanagürü: —Choma rü dexáwamare íchanabaiŭxêë i duŭxŭgü. Natürü petanüwa nangêxma ya yima tama nüxŭ pecuäcü ya choweama ne ücü. Rü choma rü napêxewa rü taxuwama chame, rü bai i norü chatatucunügüarü wêgüwa chame —ñanagürü ga Cuáŭ. ²⁸ Rü yema nachica ga Betániägu äegaxŭwa nixí ga Cuáŭ ga nüxŭ yaxuxŭ ga yema ore. Rü natü ga Yudáŭârü tocutüwa nixí ga yema nachica ga ngextá Cuáŭ duŭxŭgüxŭ íbabiŭxêëxŭwa.

Ngechuchu nixí ga Tupana núma namucü na duŭxŭgüarü pecaducêx nayuxŭcêx

²⁹ Rü moxŭäcü ga Cuáŭ rü Ngechuchuxŭ nadau ga naxcêx na yaxŭxŭ. Rü ñanagürü ga Cuáŭ: —¡Rü dücax! Daa nixí ya yima Tupana núma namucü na nayuxŭcêx na ñoma i nañecŭâx i duŭxŭgüarü pecaduxŭ iyanaxoxêëxŭcêx. ³⁰ —Rü choma rü daa Ngechuchuchigaxŭ nixí ga chixuxŭ ga yexguma ñachagu:

“Rü choweama ne naxŭ ya wüxi ya chorü yexeracü, yerü nüma rü woetama nayexma ga tauta chabuxgu ga chomax”, ñachagu. ³¹ —Rü chomatama ga noxri rü tama nüxŭ chacuêx ga texe na yíxŭ ga nümax. Natürü núma chaxŭ na dexáwamare duŭxŭgüxŭ íchabaiŭxêëtanüxŭcêx na tatanüxŭ i Yudíugü nüxŭ cuêxgüxŭcêx na texé yíxŭ —ñanagürü. ³² Rü ñanagürü ta ga Cuáŭ: —Rü chomatama nüxŭ chadau ga Tupanaäe ga Üünexŭ ga yexguma wüxi ga muxtucurüŭ daxŭwa ínaxexeegu rü Ngechuchuxŭnegu yanawêxgux. ³³ —Choma rü noxri tama nüxŭ chacuêx ga texe na yíxŭ ga nümax. Natürü ga Tupana ga choxŭ mucü na dexáwamare duŭxŭgüxŭ íchabaiŭxêëxŭcêx, rü ñanagürü choxŭ:

“Rü yima nüxũ cudaucü ya chauãê i Üünexũ naetügu íruxexeeçü, rü yima tá nixĩ ya chauãê i Üünexũ duũxũgũna nguxêẽçü”, ñanagürü choxũ.
³⁴—Choma rü marü yima Ngechuchuxũ chadau rü pemaã nüxũ chixu na nüma rü aixçüma Tupana Nane yĩxũ —ñanagürü.

Nüxĩraĩxũ ga norü ngúexũgü ga Ngechuchu

³⁵ Moxũãçü rü wenaxãrü Cuáũmaã yema nachicawa tayexmagü ga toma ga taxre ga norü ngúexũgü. ³⁶Rü yexguma Ngechuchuxũ nadêuxgu ga yéma na naxüpetüxũ, rü Cuáũ rü ñanagürü toxũ: —¡Dücèx! Yima nixĩ ya Tupana nüma namucü na pecaducèx nayuxüçèx —ñanagürü. ³⁷Rü toma ga Cuáũãrü ngúexũgü rü nüxũ taxĩnüê ga yexguma yema ñaxgu. Rü Ngechuchuwe tarüxĩ. ³⁸Rü nügü Ínidau ga Ngechuchu, rü toxũ nadau ga nawe na tarüxĩxũ. Rü toxna naca rü ñanagürü toxũ: —¿Tacüçèx pedau? —ñanagürü. Rü tomagü rü ñatarügügü: —Pa Ngúexêẽruũx, ¿ngexta nixĩ i cupexü? —ñatarügügü. ³⁹Rü Ngechuchu toxũ nangãxũ, rü ñanagürü toxũ: —¡Nuã chowe perüxĩ rü ípeyadêux! —ñanagürü. Rü nawe tarüxĩ, rü nüxũ tadaugü ga na ngexta napexũ. Rü yexguma yéma tangugügu, rü marü ägümüçiarü orawa nangu ga na nayáuanexũ. Rü yexma naxũtagu tarücho rü ñuxmata nachüta. ⁴⁰Rü choma chixĩ ga noxri Cuáũ ga baiüxêẽruũxü chaxĩnüxũ ga yixcama Ngechuchuwe charüxüxũ. Rü chomüçü rü Aüdré nixĩ. Rü nüma rü Pedru ga Chimáüeneê nixĩ. ⁴¹Rü yexgumatama ga Aüdré, rü naêneê ga Chimáüçèx nayadau. Rü ñanagürü nüxũ: —Rü marü nüxũ itayangau ya yima Cristu ga nuxçüma Tupana nüxũ unetacü —ñanagürü. ⁴²Rü yemawena, rü Ngechuchu íyexmaxüwa Chimáüxũ naga ga Aüdré. Rü yexguma Ngechuchu Chimáüxũ dêuxgu, rü ñanagürü nüxũ: —Cuma nixĩ i Chimáü i Cuáũ nane quĩxũ. Natürü i ñuxmawena rü Nuta tá nixĩ i cuéga —ñanagürü. Rü ngéma naega rü Pedru ñaxüchiga nixĩ.

Ngechuchu rü naxçèx naca ga Piripi rü Natanae

⁴³ Rü moxũãçü ga Ngechuchu rü nügü namexêẽ na Gariréaanewa naxüxüçèx. Rü Piripixü inayangau rü ñanagürü nüxũ: —¡Chowe rüxü! —ñanagürü. ⁴⁴Rü nüma ga Piripi rü ñãne ga Bechaídacüãx nixĩ. Rü yémacüãx ta nixĩ ga Aüdré rü Pedru. ⁴⁵Rü Piripi rü Natanaeçèx nayadau, rü ñanagürü nüxũ: —Marü nüxũ itayangau ya yima Cristu ga Moïché nachiga naxümatüçü ga mugüarü poperawa, rü nuxçümaügüxü ga Tupanaãrü orearü uruügu ta nachiga naxümatügüçü. Yima nixĩ ya Yúche nane ya Ngechuchu ya Nacharétucüãx —ñanagürü. ⁴⁶Rü ñanagürü ga Natanae: —¿Ñuxãçü i tacü rü mexũ i Nacharétuwa ne naxüxü? —ñanagürü. Rü Piripi nanangãxũ, rü ñanagürü nüxũ: —¡Dücèx, ngĩxã rü ítayadau! —ñanagürü. ⁴⁷Rü yexguma Ngechuchu Natanaexü dêuxgu ga naxçèx na yaxüxũ, rü ñanagürü: —¡Dücèx! Yéa ne naxü i wüxi i yatü i aixçüma Yudíu ixĩxũ i aixçüma ngearü chixexüãxü —ñanagürü. ⁴⁸Rü yexguma ga Natanae rü Ngechuchuna naca, rü ñanagürü nüxũ: —¿Ñuxãçü i choxũ cucuáxü? —ñanagürü. Rü Ngechuchu nanangãxũ rü ñanagürü nüxũ: —Naxüpa ga Piripi cuxçèx na yaçaxü, rü choma rü cuxü chadau ga yexguma orix ga igueratüügu curüxãüxgux —ñanagürü. ⁴⁹Rü Natanae nanangãxũ rü ñanagürü nüxũ: —Pa Ngúexêẽruũx, cuma rü Tupana Nane quixĩ. Rü cuma nixĩ i guxüma i Yudíugüarü Äëxgacü

quĩĩxũ —ñanagũrũ. ⁵⁰ Rũ Ngechuchu nanangãxũ, rũ ñanagũrũ nũxũ: —Cuma rũ choxũ cuyaxõ erũ cumaã nũxũ chixu na igueratũũwa cuxũ na chadauxũ. Rũ ngẽmacẽxĩcatama nĩxĩ i cuyaxõxũ. Natũrũ ngẽma ñũxma nũxũ cudauxũãrũ yexera tá nĩxĩ i nũxũ cudauxũ i yixcũra —ñanagũrũ. ⁵¹ Rũ ñanagũrũ ta ga Ngechuchu: —Rũ aixcũma pemaã nũxũ chixu rũ tá nũxũ pedaugũ na yawãxnaxũ i daxũguxũ i naãne. Rũ tá nũxũ pedaugũ i Tupanaãrũ orearũ ngeruũgũ i daxũcũãx i ngema daxũ ãgũxũ rũ írũxĩgũũxũ i naetũwa ya Tupana Nane ya duũxũxũ ixĩcũ —ñanagũrũ.

2

Ngĩarũ peta ga ããne ga Canáwa ùxũ ga Gariréaanewa

¹ Rũ yexguma marũ tomaẽxpũx ga ngunexũ Gariréaanearũ ãane ga Canáwa nayexmagu ga Ngechuchu, rũ nayexma ga wũxi ga ngĩarũ peta. Rũ yemawa ngxina naxugũ ga naẽ ga Ngechuchu. ² Rũ Ngechuchuna rũ toxna rũ ta naxugũe na yẽma taxĩxũcẽx. ³ Rũ nagux ga norũ axexũ ga binu. Rũ Ngechuchu naẽ ngĩgũrũgũ nũxũ ga Ngechuchu: —Marũ nagũarũ binuãxgũ —ngĩgũrũgũ. ⁴ Natũrũ Ngechuchu ngĩxũ nangãxũ, rũ ñanagũrũ: —Pa Mamax, ¿tũxcũũ chomaã nũxũ quixu i ngẽma? Erũ tauta nawa nangu na chanaxũxũcẽx i tacũ rũ mexũ i Tupanaãrũ poramaã ùxũ —ñanagũrũ. ⁵ Natũrũ ga ngĩma ga naẽ rũ ngĩgũrũgũ nũxũ ga yema baegũxũ namaã ga binuchũ: —¡Penaxũx i guxũma i ngẽma nũma pemaã nũxũ yaxuxũ! —ngĩgũrũgũ. ⁶ Rũ yẽma iyexma ga 6 ga tũxũ ga nutagũngĩxcẽx. Rũ wũxichigũ ga yema tũxũwa rũ maneca yexma name ga 50 rũ ãxna 70 litrugũ ga dexá. Rũ yema tũxũgũ iyixĩ ga yema Yudiugũ ngĩxũ ixũgũãcugũcũ ga yexguma dexámaã nũgũ yayauxmẽxgũchaũgu na Tupanacẽx nũgũ yamexẽẽgũxũcẽx. ⁷ Rũ Ngechuchu rũ yema baegũxũxũ namu, rũ ñanagũrũ: —¡Dexámaã ngĩxũ pixũgũãcu i ñãã tũxũgũ! —ñanagũrũ. Rũ nũmagũ ga yema baegũxũ rũ meãma ngĩxũ nixũgũãcu. ⁸ Rũ Ngechuchu ñanagũrũ nũxũ: —Rũ ñũxma chanaxwẽxe i íraxũ peyaxu, rũ petaarũ yoraxũtawa penange —ñanagũrũ. Rũ yemaãcũ nanaxũgũ ga yema baegũxũ. ⁹ Rũ yema petaarũ yora nũxũ naxaxneta ga yema dexá ga binuxũ nacẽxichixũ. Natũrũ tama nũxũ nacuẽx ga ngextá na nayauxgũãxũ. Rũ yema baegũxũxĩcatama nixĩ ga nũxũ cuẽxgũxũ ga dexámare na yĩxũ ga noxrix. Rũ yexgumatama ga yema petaarũ yora rũ yema yatũ ga ingĩxũcẽx naca. ¹⁰ Rũ ñanagũrũ nũxũ: —Guxũ i naãnewa rũ duũxũgũ rũ noxri rũ namaã nabae ya mecũ ya binu. Rũ ngẽxguma marũ meãma guxũma axegũgũ i ngẽma nũxna naxuxũ, rũ ngẽmawena rũ nũxna nanaxã ya ngexcũrũũcũmare ya binu. Natũrũ i cuma rũ marũ nagũxchaũgu i peta, rũ mexẽchicũ ya binumaãtama cuyaxaxegũxẽẽ i duũxũgũ —ñanagũrũ. ¹¹ Rũ guma Gariréaanewa yexmane ga ããne ga Canáwa nixĩ ga yema naxũxũ ga Ngechuchu. Rũ yema nixĩ ga nũxĩraũxũ ga cuẽxruũ ga Tupanaãrũ poramaã ùxũ ga nawa nũgũ inawéxũ ga Tupana Nane na yĩxũ. Rũ toma ga norũ ngũexũgũ rũ nũxũ tayaxõgũ. ¹² Rũ yemawena rũ Capernáũ ga ããnewa naxũ ga Ngechuchu. Rũ naẽ rũ naẽneẽgũ rũ toma ga norũ ngũexũgũ rũ ta itayaxũmũcũgũ. Rũ yẽma guma ããnewa tayexmagũ ga ñuxre ga ngunexũ.

Ngechuchu rũ tupauca ga taxũnewa ãnanawoxũ ga yema duũxũgũ ga yẽma taxegũxũ

(Mt 21.12-13; Mr 11.15-18; Lc 19.45-46)

¹³ Rŭ toma ga Yudiŭgŭ rŭ marŭ ningaica ga torŭ peta ga Ũpetŭchiga. Rŭ yemacèx ga Ngechuchu rŭ Yerucharéŭwa naxŭ. ¹⁴ Rŭ yexma tupauca ga taxŭnegu nŭxŭ nayangau ga duŭxŭgŭ ga yéma norŭ wocagŭmaã rŭ carnerugŭmaã rŭ muxtucugŭmaã taxegŭxŭ. Rŭ yéma nŭxŭ nadau ta ga duŭxŭgŭ ga norŭ taxechicawa rŭtogŭxŭ rŭ Tupanaarŭ ãmarewa mexŭ ga diêrumaã yéma taxegŭxŭ. ¹⁵ Rŭ yexguma yemaxŭ nadèuxgu ga Ngechuchu, rŭ nanaxŭ ga wŭxi ga cŭaixruŭ ga naxchèxmŭnaxcèx. Rŭ yemamaã tupauca ga taxŭnewa ínanawoxŭ ga yema duŭxŭgŭ guxŭma ga norŭ carnerugŭmaã rŭ wocagŭmaã. Rŭ yema diêrucèx taxegŭxŭãrŭ diêru rŭ ngŭxŭ narŭwoŭ ñaxtŭanegu. Rŭ norŭ mechagŭ rŭ ta nŭxŭ nawoneta.

¹⁶ Rŭ yema muxtucugŭmaã taxegŭxŭxŭ ñanagŭrŭ: —¡Ípeyana i ngêma perŭ muxtucugŭ i nuã! Tama name i taxepataŭxŭ peyaxŭxèê ya daa Chaunatŭpata —ñanagŭrŭ. ¹⁷ Rŭ yexguma ga toma ga norŭ ngúexŭgŭ rŭ nŭxna tacuèxãchie ga nuxcŭmaŭxŭ ga ŭmatŭxŭ ga ñaxŭ:

“Duŭxŭgŭ rŭ tá chauxchi naxaie erŭ chanachuxu i tacŭ i chixexŭ na naxŭgŭxŭ i Tupanapatawa”, ñaxŭ. ¹⁸ Rŭ yexguma ga yema ãèxgacŭgŭ rŭ Ngechuchuna nacagŭ, rŭ ñanagŭrŭgŭ: —¿Tacŭ rŭ cuèxruŭxŭ toxŭ cudadaxèê na nawa nŭxŭ tacuáxŭcèx na aixcŭma Tupana yŭxŭ ya cuxŭ mucŭ na ícunawoxŭxŭcèx i ñaã duŭxŭgŭ i nuã? —ñanagŭrŭgŭ. ¹⁹ Rŭ Ngechuchu nanangãxŭ, rŭ ñanagŭrŭ: —¡Nagu pepogŭe ya daa tupauca ya taxŭne! Rŭ choma rŭ tomaèxpŭx i ngunexŭgu rŭ tá wena íchanadaxèê —ñanagŭrŭ. ²⁰ Rŭ yexguma ga yema ãèxgacŭgŭ rŭ nanangãxŭgŭ, rŭ ñanagŭrŭgŭ: —Rŭ 46 ga tauncŭ nawa napuracŭe ga duŭxŭgŭ na naxŭgŭãxŭcèx ga daa tupauca ya taxŭne. ¿Rŭ ñuxãcŭ tá i cuma i tomaèxpŭx i ngunexŭ tátama wena ícunadaxèêxŭ? —ñanagŭrŭgŭ. ²¹ Natŭrŭ guma Tupanapata ga Ngechuchu nachiga idexane rŭ naxŭnechigatama nixŭ. ²² Rŭ yemacèx ga toma ga norŭ ngúexŭgŭ, rŭ yexguma Ngechuchu yuwa írŭdaxgu, rŭ nŭxna tacuèxãchie ga yema ore ga Ngechuchu nŭxŭ ixuxŭ. Rŭ aixcŭma tayaxôgŭ ga yema ore ga nŭxŭ yaxuxŭ rŭ yema Tupanaãrŭ ore ga nuxcŭmaŭgŭxŭ ga orearŭ uruŭgŭ Ngechuchuchigagu ŭmatŭgŭxŭ.

Ngechuchu rŭ nŭxŭ nacuèx i guxŭma i duŭxŭgŭ

²³ Rŭ yexguma Ngechuchu Ũpetŭchigaarŭ petacèx Yerucharéŭwa yexmagu, rŭ muxŭma ga duŭxŭgŭ rŭ nŭxŭ nayaxôgŭ, yerŭ nŭxŭ nadaugŭ ga yema taxŭ ga mexŭgŭ ga Tupanaãrŭ poramaã naxŭxŭ. ²⁴ Natŭrŭ ga nŭma ga Ngechuchu rŭ tama yema duŭxŭgŭmèxèwa nŭgŭ nayexmaxèèchaŭ, yerŭ woetama marŭ nŭxŭ nacuèx ga tacŭgu na naxŭnŭèxŭ ga guxŭma ga yema duŭxŭgŭ. ²⁵ Rŭ yemacèx ga nŭma rŭ taxucèxma texé namaã nŭxŭ tixu na tacŭgu naxŭnŭèxŭ ga yema duŭxŭgŭ. Yerŭ nŭmatama marŭ nŭxŭ nacuèx ga tacŭgu na naxŭnŭèxŭ ga naãewa ga wŭxichigŭ.

3

Ngechuchuxŭtagu nanaxŭãne ga Nicodému

¹ Nayexma ga wŭxi ga Parichéu ga Nicodémugu ãegacŭ. Rŭ nŭma rŭ wŭxi ga ãèxgacŭ ga nŭxŭ nangechaŭgŭcŭ nixŭ ga Yudiŭgŭtanŭwa. ² Rŭ guma Nicodému rŭ Ngechuchuxŭtagu nanaxŭãne ga chŭtacŭ. Rŭ ñanagŭrŭ Ngechuchuxŭ: —Pa Ngúexèeruŭx, toma nŭxŭ tacuèx na

aixcūma Tupana núma cuxŭ muxŭ na toxŭ cungúexēēxŭcèx. Erŭ taxucürŭwa texé cuxrŭŭ tanaxŭ i ngēma taxŭ i mexŭgŭ i Tupanaärŭ poramaã ũxŭ, ega tama Tupana tümamaxŭtawana ngēxmagu —ñanagürŭ. ³ Rŭ Ngechuchu nanangãxŭ rŭ ñanagürŭ nüxŭ: —Aixcūma cumaã nüxŭ chixu, rŭ yíxema tama wenaxärŭ buxe rŭ taxucürŭwama Tupana ãēxgacŭ íxixŭwa tangu —ñanagürŭ. ⁴ Rŭ Nicodému rŭ Ngechuchuna naca, rŭ ñanagürŭ nüxŭ: —¿Natürŭ ñuxãcŭ i wŭxi i yatŭ i marŭ yaxŭ i wena nabuxŭ? ¿Éxna wena naēãnügu naxŭcuxŭ rŭ ngēmaãcŭ wena nabuxŭ? —ñanagürŭ. ⁵ Rŭ Ngechuchu nanangãxŭ rŭ ñanagürŭ: —Rŭ aixcūma cumaã nüxŭ chixu rŭ yíxema tama nüxŭ rŭxoxe i tümäärŭ pecadu rŭ tama Tupanaãe i Üünexŭwa nayaxúxe i maxŭ i ngexwacaxŭxŭ, rŭ taxucürŭwama Tupana ãēxgacŭ íxixŭwa tichocu ⁶ —Yíxema duŭxŭwa buxe rŭ duŭxŭtama tixŭ. Natürŭ yíxema Naãe i Üünexŭwa nayaxúxe i maxŭ i ngexwacaxŭxŭ, rŭ Tupanaxãcŭ tixŭ. ⁷ —¿Tãütama cubaixãchiãe na cumaã nüxŭ chixuxŭ na Tupana naxwēxexŭ na guxŭma i duŭxŭgŭ rŭ wena nabuxŭ! ⁸ —Ya buanecŭ rŭ núma ínanaxwēxexŭwa nabu. Rŭ nüxŭ cuxinŭ i naga, natürŭ tama nüxŭ cucuēx na ngextáama ne naxŭxŭ rŭ ngextáama na naxŭxŭ. Rŭ ngēxgumarŭŭ ta tixŭgŭ ya guxãma ya yíxema Naãe i Üünexŭwa nayaxúxe i maxŭ i ngexwacaxŭxŭ —ñanagürŭ. ⁹ Rŭ Nicodému wenaxärŭ Ngechuchuna naca, rŭ ñanagürŭ: —¿Natürŭ ñuxãcŭ nixŭ i ngēma? —ñanagürŭ. ¹⁰ Rŭ Ngechuchu nanangãxŭ, rŭ ñanagürŭ nüxŭ: —Cuma rŭ Yudíugüarŭ ngúexēeruŭ i nüxŭ cuáxŭ quixŭ. ¿Rŭ ñuxãcŭ chi i cuma i tama nüxŭ cucuáxŭ i ngēma? ¹¹ —Aixcūma cumaã nüxŭ chixu rŭ toma rŭ namaã tidexagŭ i ngēma nüxŭ tacuáxŭ. Rŭ norŭ uruŭ tixŭgŭ i ngēma nüxŭ tadaugŭxŭ. Natürŭ pema rŭ tama toxŭ peyaxögŭ i ngēma pemaã nüxŭ tixuxŭ. ¹² —Rŭ ñuxma na tama choxŭ peyaxögŭxŭ i ngēma pemaã nüxŭ chixuxŭ i ñoma i naãneärŭ ngēmaxŭchiga, rŭ ¿ñuxãcŭ tá peyaxögŭxŭ ega pemaã nüxŭ chixuxgu i daxŭguxŭ i naãneärŭ ngēmaxŭchiga? ¹³ —Taguma texé daxŭguxŭ i naãnewa taxŭ. Natürŭ i choma i Tupana Nane na duŭxŭxŭ chiŭxŭ, rŭ chaxicatama nixŭ i ngēma ne chaxŭxŭ rŭ ngēma tá chaxŭxŭ. ¹⁴⁻¹⁵ —Pema nüxŭ pecuēx ga ñuxãcŭ nuxcūmaxŭchima yema nachica ga ngextá taxúema íxãpataxŭwa, rŭ Moiché wŭxi ga naigu nanaxünagŭ ga yema äxtape ga díerumünaxcèx. Rŭ ngēxgumarŭŭ tá ta i choma i Tupana Nane i duŭxŭxŭ chiŭxŭ, rŭ wŭxi i naigu tá choxŭ naxünagŭgŭ i duŭxŭgŭ na guxãma ya texé ya choxŭ yaxögŭxe rŭ tüxŭ nangēxmaxŭcèx i maxŭ i taguma gúxŭ.

Tupana rŭ poraãcŭ nüxŭ nangechaŭ i ñoma i naãnecŭãx

¹⁶ —Rŭ Tupana rŭ poraãcŭ nüxŭ nangechaŭ i ñoma i naãnecŭãx i duŭxŭgŭ. Rŭ yemacèx inanamu ga Nane ga nügŭmaã wŭxicacŭ na guxãma ya texé ya nüxŭ yaxögŭxe rŭ tama itarŭtauxexŭcèx rŭ tüxŭ nangēxmaxŭcèx i maxŭ i taguma gúxŭ. ¹⁷ —Yerŭ ga Tupana rŭ tama ñoma ga naãnewa nanamu ga Nane na duŭxŭgŭmaã naxueguãxŭcèx na napoxcuxŭ. Natürŭ núma nanamu na namaxēxēãxŭcèx i duŭxŭgŭ. ¹⁸ —Rŭ yíxema Tupana Naneãxŭ yaxŭxē, rŭ Tupana rŭ tama tümamaã nanaxuegu na tapoxcuxŭ. Natürŭ yíxema tama nüxŭ yaxŭxē, rŭ marŭ tümamaã nanaxuegu na tapoxcuxŭ, erŭ tama nüxŭ tayaxŭ ya yima Tupana Nane ya nügŭmaã wŭxicacŭ. ¹⁹ —Rŭ yíxema tama nüxŭ yaxögŭxe, rŭ Tupana rŭ marŭ tümamaã nanaxuegu na tapoxcuxŭ. Yerŭ yexguma ñoma ga naãnewa nanguxgu ga Tupana Nane ya duŭxŭgŭarŭ

ngóonexêëruũ, rü tama nawe tarüxíxchaũ. Natürü yexera tümaãrũ me nixĩ ga êãnexüwaama na tayexmagüxũ, yerü chixexũ taxügü. ²⁰ — Guxãma ya yíxema chixexũ ügüxe rü naxchi taxaie i ngóonexũ. Rü tama nüxna tangaicamagüchaũ erü tama tanaxwêxe na nangóxũ i ngêma chixexũ i ítaxügüxũ. ²¹ —Natürü yíxema aixcüma Tupanaãrũ ore nüxũ ixuxüãcüma meã maxêxê rü nüxna tangaicama i ngêma ngóonexũ. Rü ngêmaãcü tanaxü na meã nangóxüçêx na Tupanaãrũ ngüchaũãcüma na yíixũ i guxüma i ngêma taxügüxũ —ñanagürü.

Cuáũ ga baiüxêëruũ rü wenaxãrũ nüxũ nixu ga Ngechuchuchiga

²² Rü yemawena rü tomaã Yudéaanewa naxü ga Ngechuchu. Rü ñuxre ga ngunexũ tomaã yéma nayexma rü yéma duüxügüxũ ítabaiüxêëgü. ²³ Rü Cuáũ ga baiüxêëruũ rü Enóãrũ íãnewa ga Charíarũ ngaicamana rü ínanabaiüxêë ta ga duüxügü yerü yéma nayexma ga taxü ga dexá. Rü yema yéma íngugüetanüxũ ga duüxügü, rü Cuáũ ínayabaiüxêëtanü. ²⁴ Rü yemaãcü nangupetü naxüpa ga na poxcupataügu yatêxcuchixũ ga Cuáũ. ²⁵ Rü yexguma rü ñuxre ga norü nguëxügü ga Cuáũ, rü wüxi ga Yudíumaã niporagatanücüü nachiga ga nacümagü na ñuxãcü namexũ na Tupanacêx nügü yamexêëgüxũ ga duüxügü. ²⁶ Rü Cuáũmaã nüxũ nayarüxugüe, rü ñanagürügü: —Pa Ngúexêëruũx, dücax guma yatü ga tomaã nüxũ quixucü rü cumaã yexmacü ga natü i Yudátüãrũ tocutüwa, rü yima rü ñuxma rü duüxügüxũ ínabaiüxêë, rü guxüma i duüxügü rü nawe narüxĩ —ñanagürügü. ²⁷ Rü Cuáũ nanangãxũ rü ñanagürü nüxũ: —Taxúema tacü tüxũ nangêxma ega Tupana tama tüxna naxãxgu. ²⁸ —Pematama rü marü choxü pexĩnüe ga yexguma ñachagu:

“Choma rü tama Cristu chixĩ. Natürü choma chixĩ i Tupana yima Cristupêxegu choxü imuxũ na nüxũ chixuxüçêx i nachiga”, ñachagu. ²⁹ —Rü wüxi i ngígüwa rü yima yatü ya íngícü rü naxmêxãrũ yora nixĩ. Rü yima yatümücü i naxütawa ngêxmaxũ rü nüxũ inarüxĩnü i norü ore. Rü nataãe i ngêxguma nüxũ naxĩnügu i ngêma na yadexaxũ. Rü ngêxgumarüũ i choma rü aixcüma Cristumaã chataãêxüchi i ñuxmax. ³⁰ —Nüma rü tá nixĩnagüchigü na ãêxgacü yíixũ, natürü i choma rü tá ícharüxíchigü.

Yima daxüwa ne üxcüchiga

³¹ —Rü yima Cristu ya daxüwa ne üxcü rü guxãetüwa nangêxma. Natürü i choma rü ñoma i naãnewa changêxma, rü ñoma i naãnecüãx chixĩ, rü ngêma ñoma i naãnewa ngêxmaxüchigaxũ chixu. Natürü i nüma ya Cristu ya daxüwa ne üxcü, rü guxãetüwa nangêxma. ³² —Rü nüma rü tamaã nüxũ nixuchiga ga yema nüxũ nadauxũ rü nüxũ naxĩnüxũ. Natürü noxretama nüxũ nayaxógü i ngêma nüxũ yaxuxũ. ³³ —Natürü ngêxguma texé nüxũ yaxóxgu i norü ore, rü ngêmaãcü tanangoxêë na aixcüma yíixũ i ngêma Tupana nüxũ ixuxũ. ³⁴ —Rü yima Tupana núma namücü, rü Tupanaãrũ orexũ nixu. Erü Tupana rü nüxna nanamu i Naãe i Üünexũ na guxüguma naxütawa nangêxmaxüçêx. ³⁵ —Rü Tanatü ya Tupana rü Nanexũ nangechaũ. Rü ngêmacêx marü naxmêxwa nanangêxmaxêë i guxüma i tacü i ngêxmaxũ. ³⁶ —Rü yíxema Tupana Naneãxũ yaxóxê rü tüxũ nangêxma i maxũ i taguma gúxũ. Natürü yíxema tama nüxũ yaxóxchaüxê ya Tupana Nane, rü tãütama tüxũ nangêxma i ngêma maxũ i taguma gúxũ. Natürü tá tanayaxu i ngêma äücümaxũ i poxcu i Tupana tá namaã tüxũ poxcuxũ —ñanagürü ga Cuáũ ga baiüxêëruũ.

4

Ngechuchu rü Chamáriaanecũãx ga ngecü

¹ Rü Parichéugü rü nüxü nacuáchigagü ga Ngechuchu rü Cuáũãrü yexera nüxü na nayexmaxü ga norü ngúexügü, rü norü yexera duũxügüxü na ínbaiũxëëcü. ² Natürü tama Ngechuchu nixi ga ínbaiũxëëcü ga duũxügü. Rü toma ga norü ngúexügü tixi ga tanaxüxü ga yema. ³ Rü yexguma Ngechuchu nüxü ínügu ga Parichéugü rü nachigagu na yadexagüxü, rü yéma Yudéaanewa ítachoxü na Gariréaanecëx tawoeguxü. ⁴ Natürü ga yema nama ga nagu tawoeguxü rü Chamáriaanewa nadapetü. ⁵ Rü yemacëx ga toma rü nawa tangugü ga wüxi ga Chamáriaaneãrü ããne ga Chicaru. Rü guma ããneãrü ngaicamana nayexma ga yema naãne ga nuxcümaücü ga Acobuaxü yexmaxü rü yixcama rü nane ga Yúchena naxãxü. ⁶ Rü yéma nayexma ga wüxi ga puchu ga duũxügü dexácëx íxaixmaügücü ga Acobuarü Puchugu ãegacü. Rü poraãü nipa ga Ngechuchu ga namaga na yaxüxü. Rü yemacëx guma puchuxütawa nayarütoõchi. Rü tocuchiwa nanguxchaü ga yexguma. ⁷⁻⁸ Rü toma ga norü ngúexügü rü guma ããnewa taxí na torü õnacëx tayataxegüxücëx. Rü towena yéma ingu ga wüxi ga ngecü ga Chamáriaanecũãx ga guma puchuwa dexáwa ücü. Rü Ngechuchu rü ñanagürü ngixü: —Írãxü i dexá choxna naxã! —ñanagürü. ⁹ Natürü ga yema nge rü íbãixãchiãë yerü ga Yudiügu rü Chamáriaanecũãxgümaã nügüchi naxaie rü yemacëx ga yema nge rü inangãxü rü ngigürügü nüxü: —¿Ñuxãcü i cuma na Yudiü quiixü i dexácëx choxna cuçaxü i choma na Chamáriaanecũãx chiixü? —ngigürügü. ¹⁰ Rü Ngechuchu ngixü nangãxü, rü ñanagürü: —Ngëxguma chi nüxü cucuèxgu i ngëma mexü i Tupana cuxna ãxchaũxü, rü chi nüxü cucuèxgu na texé yíixü ya yima dexá cuxna taçacü, rü cuma rü chi nüxnata cuca i dexá i maxü nawa ngëxmaxü rü nüma rü chi cuxna nanaxã i ngëma dexá —ñanagürü. ¹¹ Rü yema ngecü inangãxü, rü ngigürügü nüxü: —Pa Corix, ¿ñuxãcü tá i dexáta cuyaxu? Erü daa puchu rü namátamaxüchi rü cuxü nataxuma na taçümaã Cunayaxuxücëx i dexá. ¿Rü ngextá tá i Cunayaxuxü i ngëma dexá i maxü nawa ngëxmaxü na choxna cunaxãxücëx? ¹² —Nuxcümaücü ga tórü õxi ga Acobu toxcëx núma Chamáriaanewa nanatëx ga daa puchu. Rü gumawa nixi ga naxaxexü ga nüma rü nanegü rü norü wocagü. ¿Rü ñuxãcü chi i cuma i norü yexera quiixü? —ngigürügü. ¹³ Rü Ngechuchu ngixü nangãxü, rü ñanagürü: —Rü guxãma ya texé ya daa pucharü dexáwa axexe, rü wena táxarü tiñawae. ¹⁴ —Natürü texé ya yixema choma tüxna chaxãxü i dexáwa axexe, rü tagutáma wena tiñawa. Erü ngëma dexá i choma tüxna chaxãxü rü wüxi ya puchu ya guxüguma ibaibecürüü tá nixi i tümawa, erü ngëma dexáwa nangëxma i maxü i taguma gúxü —ñanagürü. ¹⁵ Rü ngíma ga yema nge rü inangãxü rü ngigürügü: —Pa Corix, ¿choxna naxã i ngëma dexá na taguma wena chiñawaxücëx, rü taguma wena daa puchuwa dexáwa chaxüxücëx! —ngigürügü. ¹⁶ Rü Ngechuchu ñanagürü ngixü: —Íyadau ya cute, rü naxcëx yaca, rü nuã pexi! —ñanagürü. ¹⁷ Rü yema ngecü rü inangãxü, rü ngigürügü nüxü: —Nataxuma ya chaute —ngigürügü. Rü Ngechuchu ñanagürü ngixü: —Aixcüma nixi i ngëma nüxü quixuxü na nataxuüma ya cute. ¹⁸ —Yerü wüximëëxpüxchirëx nixi ga cute, rü yima ñuxma cuxütawa ngëxmacü rü tama aixcüma cutexüchi

nixĩ. Rũ ngẽmacẽx aixcũma nixĩ i curũ ore i chomaã nüxũ quixuxũ — ñanagũrũ. ¹⁹ Rũ yexguma yemaxũ naxĩnũgu ga yema ngecũ, rũ ngĩgũrũgũ: —Pa Corix, nüxũ chicuẽxãchi rũ cuma rũ wũxi i Tupanaãrũ orearũ uruũ quixĩ. ²⁰ —Nuxcũmaũgũxũ ga torũ oxigũ ga Chamãriaanecũãxgũ rũ daa mẽxpũne ga Garachĩwa Tupanaxũ nicuẽxũũgũ. Natũrũ i pema i Yudĩugũ rũ ñaperũgũgũ:

“Rũ Yerucharẽũ nixĩ i nachica i mexũ i ngextã Tupanaxũ ticuẽxũũgũ”, ñaperũgũgũ. ²¹⁻²² Rũ Ngechuchu ngĩxũ nangãxũ rũ ñanagũrũ: —Pema i Chamãriaanecũãxgũ rũ tama aixcũma nüxũ pecuẽxgũ ya yima nüxũ picuẽxũũgũcũ. Natũrũ toma i Yudĩugũ rũ aixcũma nüxũ tacuẽx ya yima nüxũ ticuẽxũũgũcũ, erũ Yudĩugũgagu nixĩ i Tupana namaxẽxẽxũ i guxũma i duũxũgũ. ¡Choxũ yaxõ, Pa Ngecũx! Rũ aixcũma ínangu tá i ngunexũ na tãũtãma daa mẽxpũnewa rũ õxna Yerucharẽũwa tá nüxũ na picuẽxũũgũxũ ya Tanatũ ya Tupana. ²³ —Erũ yĩxema aixcũma Tupanaxũ icuẽxũũgũxe rũ nüetama nixĩ i ngẽxũrũũxũmare i nachicawa Tupanaxũ ticuẽxũũgũ. Erũ ñuxma rũ ngẽma Naãe i Üünexũ naxwẽxexũ nixĩ na guxũma i tũmaãẽmaã rũ tũmaãrũ maxũmaã aixcũma Tupanaxũ ticuẽxũũgũxũ. Rũ ngẽmaãcũ nixĩ i nanaxwẽxexũ ya Tanatũ na nüxũ ticuẽxũũgũxũ. ²⁴ —Erũ Tupana rũ wũxi i Naãe nixĩ. Rũ ngẽmacẽx yĩxema texẽ ya nüxũ icuẽxũũgũxe rũ tanaxwẽxe i guxũma i tũmaãẽmaã rũ tũmaãrũ maxũmaã na aixcũma nüxũ ticuẽxũũgũxũ, ngẽma Naãe i Üünexũ naxwẽxexũãcũma —ñanagũrũ. ²⁵ Rũ yema ngecũ inangãxũ rũ ngĩgũrũgũ: —Choma nüxũ chacuẽx rũ tá ñoma i naãnewa nangu ya yima Cristu ya Tupana nüxũ unetacũ. Rũ ngẽxguma yima núma õxgu rũ tá tamaã nanangoxẽe i guxũma i Tupanachiga —ngĩgũrũgũ. ²⁶ Rũ Ngechuchu rũ ñanagũrũ ngĩxũ: —Choma na cumaã chidexaxũ, rũ yima chixĩ —ñanagũrũ. ²⁷ Rũ yexguma iyadexayane rũ itangugũ ga toma ga norũ ngũexũgũ. Rũ tãbaixãchiãẽgũ yerũ ga Ngechuchu rũ wũxi ga ngecũmaã ínidexa. Natũrũ taxũema ga toma rũ togũ taporaxẽe ga nüxna na tacagũxũ ga tacũ ngĩmaã na nanaxwẽxexũ rũ tacũchiga yĩxũ ga ngĩmaã na iyadexaxũ. ²⁸ Rũ yexguma ga yema ngecũ rũ yema ngĩxũ itẽx ga ngĩrũ tũxũ. Rũ ñãnewa ixũ na duũxũgũmaã nüxũ yanaxuxũcẽx. ²⁹ Rũ ngĩgũrũgũ: —¡Ngĩxã rũ itayadaugũ i wũxi i yatũ i chomaã nüxũ ixuxũ ga guxũma ga tacũ ga chaxũxũ! ¿Taux õxna yima yĩxũ ya Cristu? —ngĩgũrũgũ. ³⁰ Rũ inaxĩãchi ga yema ñãnecũãx, rũ Ngechuchu iyexmaxũwa naxĩ. ³¹ Rũ yoxni ga toma ga norũ ngũexũgũ rũ Ngechuchuxũ tachixewegũ na nachibũxũcẽx. ³² Natũrũ ga nüma rũ ñanagũrũ toxũ: —Choma rũ choxũ nangẽxma i chowemũ i pema tama nüxũ pecuãxũ —ñanagũrũ. ³³ Rũ yexguma ga toma ga norũ ngũexũgũ rũ togũna tacagũe, rũ ñatarũgũgũ: —Bexmana marũ ¿texẽ nuã tanange i nawemũ? —ñatarũgũgũ. ³⁴ Natũrũ ga Ngechuchu rũ ñanagũrũ toxũ: —Ngẽma õna i choxũ poraxẽẽxũ nixĩ na chanaxũxũ i norũ ngũchaũ ya yima nuã choxũ mucũ ya Chaunatũ, rũ na chayanguxẽẽxũ i norũ puracũ. ³⁵ —Rũ pema rũ ñaperũgũgũ:

“Rũ ãgũmũcũ ya tauemacũ nataxu na yabuxgũxũ i trigu”, ñaperũgũgũ. Natũrũ i choma rũ ñacharũgũ pexũ:

“¡Dũcẽx, rũ meã penangugũ i duũxũgũ! Erũ marũ ínamegũ na Tupanaxũ nayauxgũxũcẽx, ngẽxgumarũ i wũxi i trigunecũ i marũ nawa nanguxũ na yabuxgũxũ erũ marũ nidau”. ³⁶ —Rũ yĩxema Tupanacẽx nadexe i duũxũgũ rũ tá tanayaxu i tũmaãrũ natanũ. Rũ guxũma i ngẽma

duũxũgũ i tũxũ irũxĩnũẽxũ rũ tá nanayauxgũ i maxũ i taguma gũxũ. Rũ ngẽmaãcũ rũ wũxigu tá tataãẽgũ ya yĩxema tũxira ngẽma duũxũgũmaã Tupanaãrũ orexũ ixuxe rũ yĩxema yixcama ngẽma duũxũgũxũ Tupanacẽx dexe. ³⁷—Rũ aixcũma nixĩ i ngẽma ore i ñaxũ:

“Wũxie tixĩ ya namaã toexe i trigu rũ toge tixĩ ya yĩxema yabuxgũxe i norũ o”, ñaxũ. [Rũ ngẽxgumarũũ rũ wũxie tixĩ ya tũxira duũxũgũmaã nũxũ ixuxe i Tupanaãrũ ore, rũ toge tixĩ ya yixcama ngẽma duũxũgũxũ dexe Tupanacẽx.] ³⁸—Rũ noxri rũ togũ nixĩ ga duũxũgũmaã nũxũ ixuxũ ga Tupanaãrũ ore, natũrũ ga duũxũgũ rũ tama nayaxõgũ ga yexguma. Rũ yemawena rũ pexũ chamu na yema duũxũgũmaã nũxũ pixuxũcẽx ga yema ore. Rũ pema nixĩ ga yema duũxũgũxũ pedexũ Tupanacẽx, yerũ nayaxõgũ ga yexguma namaã nũxũ pixuxgu ga yema ore. Rũ yemaãcũ ga pema rũ marũ peyoxniẽ nawa ga togũarũ puracũ — ñanagũrũ. ³⁹ Rũ muxũma ga guma Chamãriaanewa yexmane ga ñãnecũãx rũ Ngechuchuaxũ nayaxõgũ, yerũ nũxũ nayaxõgũ ga yema ore ga yema ngecũ namaã nũxũ ixuxũ ga yexguma ngĩxgu:

“Guxũma ga tacũ ga ũpa chaxũxũ rũ chomaã nũxũ nixu” ngĩxgu. ⁴⁰ Rũ yemacẽx ga yema Chamãriaanecũãxgũ rũ yexguma Ngechuchuxũtawana nangugũgu rũ nũxũ nacẽxũgũ ga yexma natanũgu na naxãũxũcẽx. Rũ taxre ga ngunexũ yexma natanũgu narũxãũx ga Ngechuchu. ⁴¹ Rũ muxũma ga togũamachigũ ga Chamãriaanecũãxgũ rũ Ngechuchuaxũ nayaxõgũ ga yexguma nũxũ naxĩnũẽgu ga yema norũ ore ga nũmatama nũxũ yaxuxũ. ⁴² Rũ yexguma ga yema duũxũgũ rũ ñanagũrũgũ ngĩxũ ga yema ngecũ: —Nũxma waxi nixĩ i aixcũma nũxũ tayaxõgũxũ erũ tomatama nũxũ taxĩnũẽ i ngẽma norũ ore i tomaã nũxũ yaxuxũ. Rũ ngẽmawa nũxũ tacuẽx na aixcũma yima yĩxũ ya Cristu ya ñoma i naãnecũãx i duũxũgũarũ maxẽxẽẽruũ. Rũ tama ngẽma cuma tomaã nũxũ quixuxũcẽxicatama tayaxõgũ —ñanagũrũgũ.

Ngechuchu rũ nanamexẽẽ ga wũxi ga ãẽxgacũ nane

⁴³ Rũ taxre ga ngunexũguwena ga Ngechuchu rũ tomaã inaxũãchi ga Chamãriaanewa na Garirẽaanewa naxũxũcẽx. ⁴⁴ Rũ nũmatama ga Ngechuchu ga ũpaacũ rũ ñanagũrũ: —Wũxi i Tupanaãrũ orearũ uruũ, rũ norũ naãnewatama i duũxũgũ rũ tama meã nanayauxgũ —ñanagũrũ. ⁴⁵ Natũrũ yexguma Garirẽaanewa tangugũgu, rũ yema naãnecũãx ga duũxũgũ rũ meãma nanayauxgũ. Yerũ nũmagũ ga yema naãnecũãxgũ rũ Yerucharẽũwa naxĩ ta naxcẽx ga Ũpetũchigaarũ peta, rũ yẽma nũxũ nadaugũ ga yema taxũ ga mexũgũ ga Tupanaãrũ poramaã naxũxũ ga Ngechuchu ga yexguma. ⁴⁶ Rũ ga Ngechuchu rũ tomaã nataegu naxcẽx ga guma ñãne ga Canã ga Garirẽaanewa yexmane. Rũ guma ñãnema nixĩ ga binuxũ nanguxuchixẽẽãxũ ga dexã. Rũ ñãne ga Capernãũwa nayexma ga wũxi ga tacũ ga ãẽxgacũ, rũ niãaawe ga wũxi ga nane. ⁴⁷ Rũ yexguma guma ãẽxgacũ nũxũ cuãchigagu ga Ngechuchu rũ Garirẽaanewa na nanguxũ ga Yudẽaanewa na ne naxũxũ, rũ naxũtawana naxũ. Rũ nũxũ nayacẽxũ na napatawa naxũxũcẽx, rũ naxcẽx na yanataanexẽẽãxũcẽx ga guma nane ga marũ turaxũchicũ. ⁴⁸ Rũ Ngechuchu nanangãxũ, rũ ñanagũrũ nũxũ: —Pema rũ tama peyaxõgũ ega tama nũxũ pedauxiragu i taxũ i cuẽxruũgũ i Tupanaãrũ poramaã ũxũ —ñanagũrũ. ⁴⁹ Natũrũ ga guma ãẽxgacũ rũ ñanagũrũ nũxũ: —Pa Corix, ipaxa chowe rũxũ naxũpa na nayuxũ ya chaenũ! —ñanagũrũ. ⁵⁰ Rũ Ngechuchu nanangãxũ

rü ñanagürü nüxü: —¡Nataegu i cupatawa! Erü cune rü marü naxcèx nitaane —ñanagürü. Rü guma yatü rü nayaxō ga yema ore ga Ngechuchu namaã nüxü ixuxü. Rü napatacèx nataegu. ⁵¹ Rü yexguma napatawa nanguxchaügu ga guma ãëxgacü, rü norü duüxügü napëxegu nayayi, rü ñanagürügü nüxü: —Cune rü marü naxcèx nitaane —ñanagürügü. ⁵² Rü yexguma rü norü duüxügüna naca, rü ñanagürü nüxü: —¿Tacü rü oragu inaxügüxü na naxcèx yataanexü? —ñanagürü. Rü yema norü duüxügü nanangãxü rü ñanagürügü: —Íne tocuchiguwena nixi ga nüxü nangupetüxü ga na yaxaxünexü —ñanagürügü. ⁵³ Rü guma bucü nanatü rü nüxna nacuèxãchi ga yema oragu na yixü ga Ngechuchu ga ñaxü nüxü: “Cune rü marü naxcèx nitaane” ñaxü. Rü nüma ga guma ãëxgacü rü guxüma ga napatacüãx rü Ngechuchuaxü nayaxōgü. ⁵⁴ Rü yexguma Yudéaanewa ne naxüxgu ga Ngechuchu, rü yema nixi ga norü taxre ga cuèxruü ga taxü ga Tupanaärü poramaã duüxügüxü nawéxü ga Gariréaanewa.

5

Ngechuchu rü nanamexëë ga wüxi ga yatü ga idaawexü ga Betechawa yexmaxü

¹ Rü ñuxre ga ngunexügü ngupetüguwena rü nayexma ga wüxi ga peta ga Yudiügü auregüxü na yemaãcü Tupanaxü yacuèxüüügüxüçèx. Rü yemacèx ga Ngechuchu rü Yerucharéüçèx nataegu. ² Rü guma ñãneärü poxeguxü rü nüxü nayexma ga wüxi ga ñãx ga Carneruarü Choxüchicagu ãegaxü. Rü yema ñãxärü ngaicamana nayexma ga wüxi ga puchu ga Yudiügügawa Betechagu ãegaxü. Rü guma puchuanacüwa nayexma ga wüximëëxpüx ga chopetüchica ga ãxpataüëtügüxü. ³ Rü yema chopetüchicagu nacagü ga muxüma ga duüxügü ga idaaweexü. Rü nümaxü rü nangexetügü, rü togü rü nachixeparagü, rü togü rü nanawãixãchigü. Rü yema idaaweexü rü yema nananguxëëgü ga guma puchu ga na naxiãxãchichiüxüçèx. ⁴ Yerü ñuxguacü rü guma puchugu ñarüxüxü ga wüxi ga daxüçüãx ga Tupanaärü orearü ngeruü, rü nayaxiãxchiüçüxüçèx. Rü guxema tüxira tügü yema táexe nachiuwa ga guma puchu ga yexguma yaxiãxchiüçügu, rü tümacèx nitaane woo ga ngëxürüümare ga ðaawe tüxü yexmaxë. ⁵ Rü yema natanüwa nayexma ga wüxi ga yatü ga marü 38 ga taunecü idaawecü. ⁶ Rü yexguma Ngechuchu nüxü dëuxgu ga guma yatü ga yexma na nacaxü, rü nüxü nacuáchiga ga marü mucüma ga taunecü na yaðaawexü. Rü yemacèx nüxna naca rü ñanagürü nüxü: —¿Cunaxwëxexü i cuxcèx na yataanexü? —ñanagürü. ⁷ Rü Ngechuchuxü nangãxü ga guma idaawecü, rü ñanagürü: —Pa Corix, tataxuma ya texé ya choxü rüngüxëëxë na ngëma choxü tatáexüçèx i ngëxguma naxiãxãchichiügu ya daa puchu. Rü guxüguma i ngëxguma ngëma chaugü chatáechaügu, rü yoxni i togü rü marü nüxira nügü ngëma natáegü —ñanagürü. ⁸ Rü Ngechuchu rü ñanagürü nüxü: —¡Inachi, rü nayaxu i curü caruü, rü ñixü! —ñanagürü. ⁹⁻¹⁰ Rü yexgumatama naxcèx nitaane ga guma yatü. Rü nanayaxu ga norü caruü, rü ñnixü. Natürü ga yema ngunexü rü ngüxchigaarü ngunexü nixi. Rü yemacèx ga yemacüãxgü ga Yudiügüarü ãëxgacügü rü ñanagürügü nüxü ga guma yatü ga naxcèx itaanecü: —Ñoma nixi i ngüxchigaarü ngunexü. Rü ngëmacèx nachuxu nixi na cuyangexü i curü caruü erü yemaãcü tamaã nüxü nixu ga Moïché —ñanagürügü. ¹¹ Natürü ga guma yatü rü

yema Yudiugüarü ãëxgacügüxü nangãxü, rü ñanagürü: —Yima choxü rü mexêêcü rü ñanagürü choxü:

“¡Nayaxu i curü caruü rü íixü!” ñanagürü. ¹² Rü yexguma ga yema ãëxgacügü rü nüxna nacagü, rü ñanagürügü: —¿Texé ngêma ñatarügü cuxü:

“¡Nayaxu i curü caruü rü íixü!” ñatarügü cuxü? —ñanagürügü. ¹³ Natürü ga guma yatü rü tama nüxü nacuèx ga texé naxcèx na yataanexêêxü, yerü namuxüchi ga duüxügü ga yéma, rü yexma nayarütaxu ga Ngechuchu. ¹⁴ Natürü yixcama ga Ngechuchu rü tupauca ga taxünegu nüxü nayangau ga guma yatü, rü ñanagürü nüxü: —¡Düçèx i ñüxma marü cuxcèx na yataanexü, rü tãütama wena chixexü cuxü na tama quidaawexüçèx namaã i wüxi i ñaawe i ngêma marü cuxü ngupetüxüãrü yexera íixü! —ñanagürü. ¹⁵ Rü ínixü ga guma yatü, rü Yudiugüarü ãëxgacügümaã nüxü nayarüxu ga Ngechuchu na yíixü ga guma namexêêcü. ¹⁶ Rü yemacèx nixi ga yema ãëxgacügü ga Ngechuchucèx nadaugüxü na yamèxgüãxüçèx, yerü ngüxchigaarü ngunexügu napuracü. ¹⁷ Natürü ga Ngechuchu rü ñanagürü nüxü: —Chaunatü ya Tupana rü guxü i ngunexügu napuracü rü mexü naxü. Rü ngêmacèx i choma rü ta naxrüü chapuracü —ñanagürü. ¹⁸ Rü yemacèx ga yema Yudiugüarü ãëxgacügü rü yexeraãcü Ngechuchuxü nimèxgüchaü. Yerü tama naxrüü nanaxaure ga ngüxchigaarü ngunexü rü ñüxüchi nüxü nixu ga Nanatüxüchi na yíixü ga Tupana, rü yemaãcü nügu nixu ga Nanatü ga Tupanamaã na nawüxiguxü.

Nüma ga Tupanataka nixi ga Nanena naxããxü ga pora

¹⁹ Rü yexguma ga Ngechuchu rü ñanagürü nüxü ga yema ãëxgacügü: —Aixcüma pemaã nüxü chixu rü choma i Tupana Nane rü tama chorü poramaã chanaxü i ñacü rü puracü i mexü. Natürü ngêma nüxü chadauxü i Chaunatü üxüxícatama nixi ichaxüxü. Rü guxüma i ngêma Chaunatü üxü, rü choma ya Nane rü ta chanaxü. ²⁰ —Chaunatü ya Tupana rü choxü nangechaü, rü ngêmacèx choxü nüxü nadauxêê i guxüma i ñacü i nüma naxüxü. Rü ngêma ñüxma choxü nüxü nadauxêêxüãrü yexera tá choxü nüxü nadauxêê i yixcüra. Rü ngêxguma i pema ega ngêmaxü pedaugügu, rü tá pebaixãchiãëgü namaã. ²¹ —Rü Chaunatü rü ínanadagüxêê i yuexügu rü wena nanamaxêêê. Rü ngêxguma-rüü ta i choma i Nane rü tüxna chanaxã i maxü ya yíxema chatümaxéxe na tüxna chanaxãxü. ²²⁻²³ —Rü tama Chaunatü nixi ya duüxügüxü icagücü i norü maxüchiga. Natürü choxü nixi i namuxü na chanaxüxüçèx i ngêma, na choxü yacuèxüügüxüçèx i duüxügü, ngêma Chaunatüxü na yacuèxüügüxüürü. Rü yíxema tama choxü icuèxüxüxê, rü tama nüxü ticuèxüü ta ya Chaunatü ya choxü nuã mucü. ²⁴ —Aixcüma pemaã nüxü chixu rü yíxema texé ya choxü irüxínüxê i chorü ore, rü nüxü yaxõxê ya yima Chaunatü ya núma choxü mucü, rü tüxü nangèxma i maxü i taguma gúxü. Rü Chaunatü rü tãütama tümamaã nanaxuegu na tapoxcuxü erü marü nawa ítanguxuchi na tayuxü, rü tüxü nangèxma i maxü i taguma gúxü. ²⁵ —Rü aixcüma pemaã nüxü chixu rü marü nawa tá nangu i ngunexü rü ñüxmatama nixi i chauga naxínüxü tá i ngêma duüxügü i norü pecadugu yuexü rü iyarütaxexü. Rü texé ya chauga ínüxê rü tá tamaxê. ²⁶ —Nüma ya Chaunatü rü nüxü nangèxma i pora na namaxêêãxüçèx i duüxügü. Rü ngêma pora rü choxna nanaxã ya Chaunatü na choma rü ta duüxügüxü chamaxêêxüçèx. ²⁷ —Rü

Chaunatü ya Tupana choxü namu na duüxügüna chaçaxüçex naxcex i norü maxüchiga, erü choma nixi i Nane i duüxüxü chiixü. ²⁸ —¡Tãxü i pebaixãchiãägüxü namaã i ñaã ore i pemaã nüxü chixuxü! Erü tá ínangu i ngëma ngunexü i nagu guxüma i duüxügü i yuexü rü tá na nüxü naxínüëxü i chauga. ²⁹ —Rü naxmaügüwa tá ínachoxü. Rü ngëma meã maxëxü, rü tá ínarüdagü na nayauxgüãxüçex i maxü i taguma gúxü. Natürü ngëma chixexü ügüxü, rü tá ínarüdagü na napoxcuexüçex.

Nawa nüxü icuáxü na Tupana yixü ga Ngechuchuna naxãcü ga pora

³⁰ —Choma rü taxucürüwa tacü chaxü chauechamatama ega tama choxü naxüxëãgu ya Chaunatü. Rü Chaunatü chomaã nüxü ixuxüãcüma nixi i nüxna chaçaxü i duüxügü i norü maxüchiga. Rü ngëxguma nüxna chacaxgu rü aixcüma meãma chanangugü i duüxügü. Erü tama choxrütama ngüchaü nixi i ngëma chaxüxü, natürü Chaunatü ya nuã choxü mucüarü ngüchaü nixi i ngëma chaxüxü. ³¹ —Rü ngëxguma chi chauchigaxütama chixuxgu rü taxuwama name i ngëma. ³² —Natürü nangëxma i to i chauchigaxü ixuxü. Rü nüxü chacuëx rü aixcüma nixi i norü ore i pemaã nüxü yaxuxü. ³³ Pema rü Cuáü ya baiüxëëruüxütawa penamugü ga perü duüxügü na nüxü pecuáxüçex ga ore ga aixcüma íxüxü ga chauchiga. Rü yema ore ga Cuáü pexü namaã ngãxüxü rü aixcüma nixi. ³⁴ —Natürü i choma rü tama chanaxwëxe i tacü rü yatü chauëtüwa nachogü, erü choma tátama chaugüna chadau. Natürü pemaã nüxü chixu i ngëma Cuáüärü ore na choxü peyaxögüxüçex rü na penayauxgüxüçex i maxü i taguma gúxü. ³⁵ —Cuáü rü wüxi ga omü ga iyauracüüxü rü pexü báxixü-rüü nixi ga pexcëx. Rü pema rü paxaãchi namaã petaãëgü. ³⁶ —Natürü nangëxma i tacü i Cuáüärü orearü yexera chauëtüwa íchogüxü. Rü ngëma nixi ga yema taxügü ga cuëxruügü ga Chaunatü choxü muxü na norü poramaã chanaxüxüçex. Rü yemawa pexü nüxü chadauxëë na aixcüma Chaunatü ya Tupana yixü ga núma choxü mucü. ³⁷ —Rü ngëxgumarüü ta ya Chaunatü ga guma núma choxü mucü, rü marü chauëtüwa ínachogü, woo taguma nüxü pexínüë ga naga rü taguma nüxü pedau. ³⁸ —Rü ngëma Chaunatüarü ore rü ta tama peãëwa nixücu, erü tama choxü peyaxögü woo Chaunatü núma choxü na muxü. ³⁹⁻⁴⁰ —Pema meãma nawa pengüe i Tupanaärü ore i ümatüxü, erü nagu perüxnüë rü ngëmawa tá nüxü ipeyangau i perü maxü i taguma gúxü. Natürü woo ngëmatama Tupanaärü ore i ümatüxüwa rü chauchiga meã na yadexaxü, natürü i pema rü tama choxü peyaxögüchaü na ngëmaãcü penayauxgüxüçex i ngëma maxü. ⁴¹⁻⁴² —Rü choma rü tama chanaxwëxe na choxü picuëxüügüxü erü meãma pexü chacuëx, rü nüxü chacuëx na tama aixcüma Tupanaxü pengechaügüxü. ⁴³ —Chaunatü ya Tupana nixi ga núma choxü mucü, natürü i pema rü tama choxü peyauxgüchaü. Natürü ngëxguma chi tomare i yatü nagagutama núma üxgu, rü ngëma chi nixi i taãëcüma peyauxgüxü. ⁴⁴ —¿Rü ñuxãcü chi choxü peyaxögü ega penaxwëxegu na pemücügütama pemaã taãëxü rü tama naxcëx pedaugügu na Tupanaxüchi pemaã taãëxü? ⁴⁵ —¡Tãxü i nagu perüxnüëxü na choma tá yixü na pexü chixugüxü i Chaunatüxütawa! Erü Moiché ga guma perü maxüçex nüxü peyaxögücü tátama nixi ya yima pexü ixugücü i Chaunatüxütawa. ⁴⁶ —Rü ngëxguma chi peyaxögügu i ngëma ore ga Moiché ümatüxü, rü choxü rü chi ta peyaxögü. Yerü ga Moiché rü chauchigagu nixi ga naxümatüãxü ga norü poperawa. ⁴⁷ —Natürü ngëxguma tama

peyaxögügu i ngêma Moïché ümatüxü i ore, ¿rü ñuxácü tá peyaxögü i ngêma choma pemaã nüxü chixuxü? —ñanagürü ga Ngechuchu.

6

Ngechuchu rü nanachibüexêê ga 5000 ga yatügü

(Mt 14.13-21; Mr 6.30-44; Lc 9.10-17)

¹ Rü yemawena ga Ngechuchu rü naxtaxa ga Gariréagu äeganearütocütüwa tomaã naxü. Rü norü toéga ga guma naxtaxa rü Tibéria nixi. ² Rü muxüma ga duüxügü rü nawe narüxi. Yerü üpaacü rü marü nüxü nadaugü ga ñuxácü Ngechuchu na naxüxü ga taxü ga mexügü ga Tupanaärü poramaã üxü ga yexguma duüxügü ga idaaweegüxcèx yataanexêêgüägu. ³ Rü yexguma ga Ngechuchu rü wüxi ga mëxpúnewa tomaã ínaxüächi. Rü wüxigu tomaã yéma narüto. ⁴ Rü marü ningaica ga yema Yudiügüarü peta ga Üpetüchiga. ⁵ Rü yexguma Ngechuchu nüxü dawenügu rü nüxü nadau ga muxüma ga duüxügü ga nawe rüxixü. Rü yemacèx Piripina naca, rü ñanagürü: —¿Rü ngextá tá naxcèx tataxe i nawemü i ñaã duüxügü na nachibüexêêxücèx? —ñanagürü. ⁶ Rü nümatama ga Ngechuchu rü marü nüxü nacüex ga tacü tá na naxüxü. Natürü yema ñanagürü Piripixü, yerü nüxü nacüaxchaü ga tacümaã tá na nangäxüächü. ⁷ Rü yexguma Ngechuchuxü nangäxü ga Piripi, rü ñanagürü: —Woo chi naxcèx itaxegügu i 200 i dïeru naguxü i pãü, rü tãü chima nüxü ningu ega woo wüxichigüna íraxü íxächigügu —ñanagürü. ⁸⁻⁹ Rü yexguma ga Aüdré ga Ngechuchuarü ngüexü ga Pedru ga Chimãü naêneê, rü ñanagürü: —Nuã nangêxma i wüxi i buxü rü nüxü nangêxma i 5 i pãü i chebadanaxcèx rü taxre ta i choxni. ¿Natürü tacüwa name i ngêma naxcèx i ñaã muxüchixü i duüxügü? —ñanagürü. ¹⁰ Rü yexguma ga Ngechuchu rü ñanagürü toxü: —¡Ëcü, namaã nüxü pixu i duüxügü na ínalogüxcèx! —ñanagürü. Rü yema nachicawa rü nametëxane ga guma maxê. Rü gumatëxewa narütogü ga duüxügü. Rü maneca 5000 wa nangu ga yexguma yatügüxica ixugügu. ¹¹ Rü yexguma ga Ngechuchu rü nanade ga yema pãügü, rü Tupanana moxê naxã. Rü yemawena rü toxü nayanu na yema duüxügü ga yéma rütogüxüxü tayanuxücèx. Rü yexgumarüü ta ga choxni rü nüxü toxü nayanuxêê, ñuxmata meãma nachibüe ga guxüma ga yema duüxügü. ¹² Rü yexguma marü meã nachibüegu ga guxüma, rü Ngechuchu toxü namu rü ñanagürü toxü: —¡Penade i ngêma naxchipëxegü i íyaxügüxü na tama inaxaiyèxüxcèx! —ñanagürü. ¹³ Rü tanade ga yema naxchipëxegü ga yema 5 ga pãüwa íyaxüxü, rü 12 ga pexchi namaã tanaxüäcugü. ¹⁴ Rü yexguma yema duüxügü nüxü daugügu ga yema mexü ga taxü ga Tupanaärü poramaã naxüxü ga Ngechuchu, rü ñanagürü: —Aixcümäxüchi daa nixi ya Tupanaärü orearü uruü ga guma ínangüxêêcü —ñanagürü. ¹⁵ Natürü ga Ngechuchu rü nüxü nicüexächi ga duüxügü rü na norü äëxgacüxü yangu-cuchixêêgüchaüächü. Rü yemacèx nüxna nixügachi rü yéamaxüra naxü nawa ga guma mëxpüne na nüxícatama nayexmaxücèx.

Dexáétügu nixü ga Ngechuchu

(Mt 14.22-27; Mr 6.45-52)

¹⁶ Rü yexguma marü nachütägu, rü toma ga Ngechuchuarü ngüexügü rü wenaxärü naxtaacutüwa taxü. ¹⁷ Rü poraäcü naxêãne. Rü tama ínangu ga Ngechuchu. Rü yemacèx wüxi ga ngue ga taxünegu tichoü, rü itaxiächi

ga na tocutüwa taxixü ga Capernáürü ñanewa na tangugüxcèx. ¹⁸ Rü yexguma tixáüyane rü inaxügü ga na poraacü yabuaxü. Rü yemagagu rü poraacü nayuape. ¹⁹ Rü yexguma marü 5 ga kilómetru tixáügu, rü Ngechuchuxü tadaugu ga na dexáchiétügu yaxüxü. Rü toma ga norü ngüexügü rü poraacü tamuñe. ²⁰ Natürü núma ga Ngechuchu rü ñanagürü toxü: —Choma chixi. ¡Rü táxü i pemuñéxü! —ñanagürü. ²¹ Rü yexguma ga toma ga norü ngüexügü rü taãéácüma tanayauxgüchaü ga toweüwa. Rü yexgumatama ítangugü ga yema ítaxixüwa.

Ngechuchucèx nadaugü ga duixügü

²² Rü moxüácü ga yema duixügü ga naxtaxaarü tocutügu rüchoxü, rü nüxü nicuèxáchitanü ga toma ga Ngechucharü ngüexügü ga marü nagu na taxixü ga guma ngue ga taxüne ga nügümaã wüxicane. Rü nüxü nacuèxgü ta ga Ngechuchu rü tama towe na naxüxü. ²³ Rü yexguma yemagu ínaxñüéyane, rü yoxocüne ínangugü ga náigü ga ngue ga ítaxüne ga Tibériaarü ñanewa ne íxüne. Rü norü ngaicamana nangugü ga yema nachica ga ngextá Ngechuchu ínachibüexéxüwa ga yema muxüma ga duixügü ga yexguma moxé inaxáxgu naxcèx ga yema pãü. ²⁴ Rü yexguma yema duixügü nüxü daugügu ga guma nguewa na Ngechuchu rü toma ga na tatauxexüma rü yexma guma nguegügu nichoñ na Ngechuchucèx yadaugüxü Capernáürü ñanegu.

Ngechuchu nixi i pãü i maxü tüxna äxü

²⁵ Rü yexguma guma naxtaxaarü tocutüwa nangugügu ga yema duixügü, rü Ngechuchuxü yexma nayangaugü. Rü nüxna nacagüe, rü ñanagürügü: —Pa Ngüexéëruñx, ¿ñuxgu nixi i nuã cunguxü? —ñanagürügü. ²⁶ Rü Ngechuchu nanangãxü, rü ñanagürü nüxü: —Aixcüma pemaã nüxü chixu rü tama yema nüxü na picuèxáchitanüxcèx ga yema mexügü ga Tupanaarü poramaa chaxüxü nixi i chauxcèx pedaugüxü. Natürü chauxcèx pedaugü yerü meãma pechibüe nawa ga yema ðna ga pexna chaxãxü. ²⁷ —¡Tãxü i naxcèx pepuracüexü i ðna i paxama gúxü! Rü narümemaë nixi i naxcèx pepuracüe i ngema maxü i aixcüma íxixü i taguma gúxü. Rü ngëma nixi i maxü i choma i Tupana Nane ya duixüxü chixicü tá pexna chaxãxü, erü Chaunatü ya Tupana rü marü nanangoxéë na aixcüma Nane chíxü —ñanagürü. ²⁸ Rü yexguma ga nümagü rü nüxna nacagü, rü ñanagürügü: —¿Tãcü tá taxüe na tayangüexéxcèx i ngëma Tupana toxü naxwèxexü? —ñanagürügü. ²⁹ Rü Ngechuchu nanangãxü rü ñanagürü nüxü: —Rü Tupana rü núma choxü namu. Rü ngëma núma pexü nanaxwèxexü nixi na choxü peyaxögüxü —ñanagürü. ³⁰ Rü yexguma ga nümagü rü nüxna nacagü, rü ñanagürügü nüxü: —¿Tãcü rü cuèxruñxü tá toxü cudadüxéë na cuxü tayaxögüxcèx na aixcüma Cristu quíxü? ¿Rü tãcü i to i mexü tá toxcèx cuxüxü i ñuxmax? ³¹ Yerü nuxcümañgüxü ga tórü oxigü, rü nanangögüga ga yema pãü ga Tupana nüxna äxü ga chianexüwa ga ngextá taxüema íxãpataxüwa. Rü Tupanaarü ore i ümatüxüwa rü ñanagürü:

“Tupana rü daxücüãx ga pãümaã nanachibüexéë ga duixügü”, ñanagürü i ngëma orewa. ³² Rü Ngechuchu nanangãxü rü ñanagürü nüxü: —Aixcüma pemaã nüxü chixu rü tama nixi ga Moiché yixü ga nüxna naxãxü ga yema pãü ga daxü- cüãx, natürü Chaunatü ga Tupana nixi ga nüxna naxãcü. Rü núma nixi i ñuxma i pexna naxããxü i pãü i aixcüma íxixü i daxüwa ne üxü. ³³ —Erü ngëma pãü i Tupana íxãxü, rü daxügüxü

i naãnewa ne naxũ rũ nanamaxẽxẽẽ i ñoma i naãnecũãx i duũxũgũ — ñanagũrũ. ³⁴ Rũ nũmagũ rũ naxcẽx ínacagũ, rũ ñanagũrũgũ nũxũ: —Pa Corix, ¡guxũguma toxna naxãẽcha i ngẽma pãũ! —Ñanagũrũgũ. ³⁵ Rũ Ngechuchu ñanagũrũ nũxũ: —Choma nixĩ i ngẽma pãũ i maxẽxẽẽruũ chiĩxũ. Rũ yixema texẽ ya chauxũtawa ùxẽ rũ tagutãma tataiwa. Rũ texẽ ya choxũ yaxõxẽ rũ tagutãma titawa. ³⁶ —Natũrũ marũ pemaã nũxũ chixu rũ woo na choxũ pedaugũxũ rũ tama choxũ peyaxõgũ i pemax. ³⁷ —Rũ guxãma ya yixema duũxẽgũ ya Chaunatũ choxna tũxũ mugũxe rũ chorũ duũxũgũ tixĩgũ. Rũ texẽ ya choxũ yaxõgũxe rũ tãũtãma tũxũ chaxoox. ³⁸ —Yerũ tama choxrũtama ngũchaũ na chaxũxũcẽx nixĩ ga daxũguxũ ga naãnewa ne chaxũxũ. Natũrũ nũma chaxũ na chanaxũxũcẽx i norũ ngũchaũ ya Chaunatũ ya nũma choxũ mucũ. ³⁹ —Rũ ngẽma norũ ngũchaũ ya Chaunatũ ya Tupana ya nũma choxũ mucũ nixĩ i na taxũexũma ichayarũtauxẽẽxũ ya yixema choxna tũxũ namugũxe. Erũ nũma ya Chaunatũ nanaxwae na tũxũ yuwa ícharũdagũxẽẽxũ i naãneãrũ guxgu. ⁴⁰ —Choma nixĩ i Tupana Nane chiĩxũ. Rũ ngẽma norũ ngũchaũ ya Chaunatũ ya Tupana ya nũma choxũ mucũ nixĩ na tũxũ nangẽxmaxũ i maxũ i taguma gũxũ ya guxãma ya texẽ ya choxũ daxũgũxe rũ choxũ yaxõgũxe. Erũ choma tá nixĩ i tũxũ ícharũdagũxẽẽxũ i naãneãrũ guxgu —ñanagũrũ. ⁴¹ Rũ yexguma yema orexũ naxĩnũẽgu ga yema Yudĩugũ, rũ inanaxũgũe ga Ngechuchuchiga na yadexagũxũ. Yerũ ñanagũrũ ga Ngechuchu: —Choma nixĩ i pãũ i daxũguxũ i naãnewa ne chaxũxũ — ñanagũrũ. ⁴² Rũ ñanagũrũgũ: —¿Taux õxna ñaã yĩĩxũ i Ngechuchu i Yũche nane? Rũ yixema rũ tũxũ tacuẽx ya nanatũ rũ naẽ. ¿Rũ ñuxãcũ i nũma i “Daxũwa ne naxũxũ”, ñaxũ? —Ñanagũrũgũ. ⁴³ Rũ Ngechuchu ñanagũrũ nũxũ: —¡Nũxũ perũxoe na choxũ na pixuechaxũ! ⁴⁴ —Taxũema chauxũtawa tangu ega tama choxna tũxũ namuxgu ya chaunatũ ga guma nũma choxũ mucũ. Rũ texẽ ya chauxũtawa ngugũxe rũ choma rũ tá wena tũxũ chamaxẽxẽẽ i naãneãrũ guxgu. ⁴⁵ —Nuxcũmaũgũxũ ga Tupanaãrũ orearũ uruũgũarũ poperawa naxũmatũ i ore i ñaxũ:

“Tupana tá guxãxũ nangũexẽẽ”,

ñaxũ. Rũ ngẽmacẽx guxãma ya texẽ ya Chaunatũxũ ñnũxẽ rũ naxũtawa ngũxe, rũ chauxũtawa taxĩ. ⁴⁶ —Taguma texẽ Chaunatũ ya Tupanaxũ tadau. Rũ chaxicatama nixĩ i nũxũ chadauxũ erũ naxũtawa ne chaxũ. ⁴⁷ —Aixcũma pemaã nũxũ chixu rũ texẽ ya choxũ yaxõxẽ rũ tũxũ nangẽxma i maxũ i taguma gũxũ. ⁴⁸ —Choma nixĩ i pãũ i maxẽxẽẽruũ chiĩxũ. ⁴⁹ —Rũ perũ oxigũ ga nuxcũmaũgũxũ rũ nanangõx ga yema pãũ ga Tupana nũxna ãxũ ga yema nachica ga ngextã taxũema íxãpataxũwa. Natũrũ woo nanangõxgũ ga yema pãũ rũ nayueamatama. ⁵⁰ —Natũrũ ñaã pãũ i pemaã nũxũ chixuxũ i daxũwa ne ùxũ rũ chomatama chixĩ. Rũ guxãma ya texẽ ya choxũ yaxũxe ñoma pãũ tangõxũrũũ rũ tá tamaxẽcha. ⁵¹ —Chomatama nixĩ i pãũ i maxẽxẽẽruũ i daxũwa ne chaxũxũ. Rũ texẽ ya ñoma chomaã taxãwemũxũrũũ choxũ yaxõxẽ rũ guxũgutãma tamaxẽcha. Erũ ngẽma pãũ i choma tũxna chaxãxũ rũ chaxunetama nixĩ. Rũ ichanaxã i chaxune na namaxẽxũcẽx i ñoma i naãnecũãx i duũxũgũ —ñanagũrũ ga Ngechuchu. ⁵² Rũ yexguma ga yema Yudĩugũ rũ poragaãcũ nũgũna nacagũe, rũ ñanagũrũgũ: —¿Nuxãcũ tá i ñaã yatũ i naxũne tátama tũxũ nangõxẽẽxũ? —Ñanagũrũgũ. ⁵³ Rũ Ngechuchu ñanagũrũ nũxũ: —Rũ choma i Tupana nane na duũxũxũ chiĩxũ rũ aixcũma pemaã nũxũ chixu rũ ngẽxguma pema rũ tama chaxunemaã pexãwemũgũgu rũ tama nawa

peaxegügu ya chaugü, rü tãütáma pexü nangëxma i maxü i taguma gúxü.
⁵⁴—Texé ya chaxunemaã äwemüxë rü chaugüwa axexe rü tüxü nangëxma
 i maxü i taguma gúxü. Erü choma rü tá tüxü chamaxëë ega naãneärü
 guxgu. ⁵⁵—Erü chaxuna rü ðnaxüchi nixi rü chaugü rü axexüüchi nixi.
⁵⁶—Texé ya chaxunemaã äwemüxë rü chaugüwa axexe rü chowa tayaxüx
 rü choma i tümawa. ⁵⁷—Chaunatü ga núma choxü mucü rü namaxü. Rü
 nüma choxna nanaxã i maxü. Rü ngëxgumarüü ta i choma rü tá tüxna
 chanaxã i maxü ya yixema choxü yaxúxe rü choxü yaxóxë. ⁵⁸—Marü
 pemaã nüxü chixu na choma rü pãu i daxüwa ne üxü chiixü. Natürü
 choma rü tama yema pãu ga nuxcúmaüügüxü ga perü oxigü ngöxgüxü ga
 päürüü chixi. Yerü woo ga yema pãu na nangöxgüxü ga perü oxigü rü
 nayueamatama. Natürü texé ya choxü yaxúxe, ñoma pãu tangöxürüü,
 rü choxü yaxóxë rü guxügutáma tamaxü —ñanagürü. ⁵⁹ Rü Ngechuchu
 rü duüxügümaã nüxü nixu ga yema ore ga yexguma nangüxëëãgu ga
 Yudüguärü ngutaquëxepataüwa ga ñane ga Capernáüwa.

Ngechuchuarü orewa nangëxma i maxü i taguma gúxü

⁶⁰ Rü yexguma nüxü naxĩnüëgu ga yema nguxëëtae, rü muxüma ga
 yema duüxügü ga nawe rüxixü rü ñanagürügü: —Rü ngëma tamaã nüxü
 yaxuxü, rü naguxchaxüchi na nüxü icuáxü na ñuxü ñaxü. ¿Nuxãcü
 texé tüxü natauxcha na naga taxĩnüxü? —ñanagürügü. ⁶¹ Natürü ga
 Ngechuchu rü nüxü nacüexama ga yemaãcü nügümaã na íyadexagüxü
 naxcëx ga yema nguxëëtae, rü yemacëx nüxna naca, rü ñanagürü: —
 ¿Ëxna peãëwa nangux i ngëma ore? ⁶²—Rü ngëxguma peãëwa nanguxgu i
 ngëma ore i pemaã nüxü chixuxü, rü çtacügu chi perüxĩnüëxü ega choxü
 pedëuxgu na wenaxârü daxü na chaxixü, ga noxri ne chaxüüwa na
 chaxüxü i choma i Tupana Nane na duüxüxü chiixü? ⁶³—Tupanaãë
 i Üünexü nixi i inaxãxü i maxü i taguma gúxü. Rü tama pexene nixi
 i pexü maxëxëëxü. Rü ngëma ore i pemaã nüxü chixuxü rü peãcëx
 nixi, rü nawa nangëxma i maxü i taguma gúxü. ⁶⁴—Natürü tangëxma
 i petanüwa ya ñuxre ya tama yaxögüxe —ñanagürü. Rü yema ñanagürü
 ga Ngechuchu yerü noxriarü ügügumama marü nüxü nacüex ga texé tá
 nüxü na yaxögüxü, rü texé tá cúãcü ínaxuaxüxü. ⁶⁵ Rü ñanagürü ta: —Rü
 ngëmacëx marü pemaã nüxü chixu rü taxuacüma texé chauxütawa tangu
 ega tama Chaunatü chauxütawa tüxü gaxgu —ñanagürü. ⁶⁶ Rü yexguma
 inanaxügüe ga nüxna na yaxigüxü ga muxüma ga yema duüxügü ga
 noxri nawe rüxichirëxü. Rü marü tama nawe ínaxixü. ⁶⁷ Rü yexguma
 ga Ngechuchu rü norü 12 ga ngüexügüna naca, rü ñanagürü nüxü: —
 ¿Ëxna pema rü ta choxna pixigachitanüchaü? —ñanagürü. ⁶⁸ Natürü
 Chimáü ga Pedru rü nanangãxü, rü ñanagürü: —Pa Corix, ¿Texëütawa
 chi taxixü ega cuxna tixigachitanügu? Erü cuma rü cuxü nangëxma i
 ore i nawa nangëxmaxü i maxü i taguma gúxü. ⁶⁹—Toma rü marü
 cuxü tayaxögü, rü nüxü tacüex na cuma quixü ya Cristu ya Üünecü ya
 Tupana Nane —ñanagürü. ⁷⁰ Rü Ngechuchu toxü nangãxü, rü ñanagürü:
 —¿Taux ëxna choma yixü ga pexü chidexechixü ga pema ga 12? Natürü
 nangëxma i wüxi i petanüwa i Chatanáärü duüxü ixixü —ñanagürü. ⁷¹ Rü
 Yuda ga Icaríute ga Chimáü nanechiga nixi ga yadexaxü ga Ngechuchu.
 Yerü Yuda tá nixi ga cúãcü ínaxuaxüxü rü woo ga nüma rü wüxi ga
 totanüxüchirëx na yixü.

7

Ngechuchueñgü rü tama nüxĩ nayaxõgü

¹ Rü yemawena ga Ngechuchu rü Gariréaanewa yexmagüne ga ñānegügu nixüāgüchigü. Rü tama Yudéaanewa nayexmachañ yerü yēmacũāx ga Yudiügüarü āēxgacügü rü naxcèx nadaugü ga na yamèxgüchañāxüçèx. ² Natürü marü ningaica ga yema Yudiügüarü peta ga nagu norü düxenügü yaxügüxü na yemawa nüxna nacuèxāchiexüçèx ga ñuxācü nuxcümaũgüxü ga norü oxigü na naxügüxü ga norü düxenügü ga naixātünaxcèx ga yexguma Moïchéwe naxixgu ga ngextá taxúema íxāpataxüwa. Rü yemacèx nixĩ ga Düxenügüarü Petagu naxāegaxü. ³ Rü naēneēgü ga Ngechuchu rü ñānagürügü nüxü: —Tama name i nuxā Gariréaarü naānegu curüxāüx. Rü name nixĩ i petacèx Yudéawa cuxü, na ngēma duüxügü i cuwe rüxixü i ngema ngēxmagüxü nüxü daugüxüçèx i ngēma cuèxruüügü i mexügü i Tupanaārü poramaā cuxüxü. ⁴ —Erü ngēxguma chi wüxi ya yatü rü duüxügüxü nügü nacuèxēēchaügu rü tama cúācü nanaxü i tacü i naxüxü. Rü ñuxma na cunaxüxü i muxüma i mexügü i Tupanaārü poramaā cuxüxü, rü name nixĩ i guxü i duüxügüpēxewa cunaxü —ñānagürügü. ⁵ Rü yema ñānagürügü ga naēneēgü yerü woo ga nümagü rü ta tama nüxü nayaxõgü. ⁶ Rü yexguma ga Ngechuchu rü nanangāxü, rü ñānagürü nüxü: —Tauta nawa nangu i ngunexü na petawa chaxüxü. Natürü pexcèx rü ngēxürüxümare i ngunexü nixĩ i mexü na petawa nagu pexixü. ⁷ —Ngēma duüxügü i ñoma i naānecũāx rü tama pexchi naxaie. Natürü chauxchi naxaie erü chanangoxēē i ngēma naxügüxü rü na nachixexü. ⁸ —Name nixĩ i petawa pexĩ i pemax. Choma rü tauta ngema chaxü erü tauta nawa nangu i ngunexü i nagu ngema chaxüxü —ñānagürü ga Ngechuchu. ⁹ Rü yexguma yema ñaxguwena, rü Gariréaanegu narüxāüx.

Ngechuchu rü Düxenügüarü Petawa naxü

¹⁰ Natürü nawena ga naēneēgü ga petawa na naxixü, rü Ngechuchu rü ta yema naxü. Natürü cúācü yema naxü, rü tama poraācü duüxügüxü nügü nadauxēē. ¹¹ Rü yema Yudiügüarü āēxgacügü rü naxcèx nadaugü ga yema petawa, rü ñānagürügü: —¿Ngextá nangēxma i ngēma yatü? —ñānagürügü. ¹² Rü nügütanüwa ga yema duüxügü ga yema yexmagüxü, rü poraācü Ngechuchuchiga ínidexagü. Rü ñuxre ga yema duüxügü rü ñānagürügü: —Yima rü wüxi ya yatü ya mecü nixĩ —ñānagürügü. Natürü ga togü rü ñānagürügü: —Ngēma yatü rü tama name erü duüxügüxü nawomüxēē —ñānagürügü. ¹³ Natürü taxuüma ga duüxügü rü mea togüpēxewa Ngechuchuxü nicuèxüũgüchañ, yerü yema Yudiügüarü āēxgacügüxü namuñē. ¹⁴ Rü yexguma marü yema petaarü ngāxüwa nanguxgu, rü nixücu ga Ngechuchu nawa ga tupauca ga taxüne. Rü inanaxügü ga na nanguxēētaexü. ¹⁵ Rü yema Yudiügüarü āēxgacügü, rü nabaixāchiāēgü namaā ga yema ore ga Ngechuchu nüxü ixuxü. Rü ñānagürügü: —¿Ñuxācü i ngēmaācü poraācü nüxü nacuāxü, rü taguma texé nanguxēē? —ñānagürügü. ¹⁶ Rü Ngechuchu nanangāxü rü ñānagürü nüxü: —Ñāā chorü nguxēētae rü tama choxrü nixĩ, erü Chaunatü ya núma choxü mucüarü nixĩ. ¹⁷ —Ngēxguma texé naxüxchaügu i Tupanaārü ngüchañ rü yixema tá nüxü tacuèx ngoxi aixcüma Tupanaxütawa chanayaxu i ngēma chorü nguxēētae rü éxna chaugüxütawatama chayaxuxü yixĩ i ngēma. ¹⁸ —Yixema texé ya mexü

i tümachigaxŭtama ixuxe rŭ ngĕmaãcŭ tanaxŭ erŭ tanaxwĕxe i duŭxŭgŭ na tŭxŭ icuĕxŭgŭxŭ. Natŭrŭ texĕ nŭxŭ tixu i ore i mexŭ nachiga i ngĕma tŭxŭ muxŭ, rŭ aixcŭma nixŭ i tŭmaãrŭ ore. Rŭ tama dora nixŭ i ngĕma nŭxŭ tixuxŭ. ¹⁹ —¿Tama ĕxna aixcŭma yŭixŭ ga Moŭchĕ pexna naxãxŭ ga Tupanaãrŭ mugŭ? Natŭrŭ taxŭema i pema naga pexŭnŭĕ i ngĕma mugŭ. ¿Rŭ ñuxma rŭ tŭxcŭŭ nixŭ i choxŭ pimĕxgŭchaŭxŭ? —ñanagŭrŭ. ²⁰ Rŭ yema duŭxŭgŭ nanangãxŭgŭ, rŭ ñanagŭrŭgŭ: —Cuma rŭ ngoxo cuwa nangĕxmamare. ¿Ĕxna texĕ cuxŭ timĕxgŭchaŭ? —ñanagŭrŭgŭ. ²¹ Natŭrŭ ga Ngechuchu rŭ ñanagŭrŭ nŭxŭ: —Choma rŭ ngŭxchigaarŭ ngunexŭgu chanamexĕĕ ga wŭxi ga yatŭ. Rŭ guxãma i pema rŭ penuãĕgŭ naxcĕx ga yema wŭxitama ga mexŭ ga ngŭxchigaarŭ ngunexŭgu chaxŭxŭ. ²² —Natŭrŭ pema rŭ ta ngŭxchigaarŭ ngunexŭgu pepuracŭe na naga pexŭxĕcĕx ga Moŭchĕarŭ mugŭ. Rŭ Moŭchĕ pemaã nŭxŭ nixu na tŭxŭ ĩpewiechĕxmŭpĕxechiraŭxŭ ya guxãma ya yatŭxe ya buxe. Natŭrŭ tama Moŭchĕ nixŭ ga inaxŭgŭcŭ ga yema, yerŭ nuxcŭmaŭgŭxŭ ga perŭ oxigŭwa nixŭ ga ne naxŭxŭ. Rŭ ñuxma i pema rŭ yema mugagu rŭ tŭxŭ ĩpewiechĕxmŭpĕxechiraŭ ya guxãma ya buxe ya yatŭxe woo ngŭxchigaarŭ ngunexŭ yixŭgu. ²³ —Rŭ ngĕmaãcŭ i pema rŭ ngŭxchigaarŭ ngunexŭgu buxexŭ ĩpewiechĕxmŭpĕxechiraŭ erŭ naga pexŭnŭĕchaŭ i Moŭchĕarŭ mugŭ. ¿Rŭ ñuxma rŭ tŭxcŭŭ yŭixŭ i chomaã penuĕxŭ naxcĕx na ngŭxchigaarŭ ngunexŭgu chanamexĕĕxŭ ga wŭxi ga yatŭ ga idaaweecŭ? ²⁴ —Rŭ ngĕmacĕx tama name i ngŭrŭmare penangugŭ i ngĕma chaxŭxŭ. Rŭ penaxwĕxe i meã naga perŭxŭnŭĕxira, na aixcŭma meã penangugŭxĕcĕx —ñanagŭrŭ ga Ngechuchu.

Ngechuchu rŭ Tupana Nane nixŭ

²⁵ Rŭ ñuxre ga yema duŭxŭgŭ ga Yerucharĕgŭ achiŭgŭxŭ rŭ nŭgŭna nacagŭe, rŭ ñanagŭrŭgŭ: —¿Taux ĕxna daa yŭixŭ ya yima yatŭ ya ãĕxgacŭgŭ naxcĕx daugŭcŭ na yamĕxgŭchaŭãxŭcĕx? ²⁶ —¿Dŭcĕ! Gua nixŭ rŭ yĕa guxŭ i duŭxŭgŭpĕxewa nidexa rŭ taxŭema ñuxŭ ñatarŭgŭ nŭxŭ. ¿Taux ĕxna i tŭrŭ ãĕxgacŭgŭ i marŭ nŭxŭ yaxŭgŭãxŭ na aixcŭma Cristu na yŭixŭ i nŭmax? ²⁷ —Natŭrŭ i yixema rŭ nŭxŭ tacuĕxgŭ na ngextã ne naxŭxŭ i nŭmax. Natŭrŭ ngĕxguma aixcŭma Cristu nŭma ŭxgu rŭ taxŭetãma nŭxŭ tacuĕx na ngextã na ne naxŭxŭ —ñanagŭrŭgŭ. ²⁸ Rŭ nŭma ga Ngechuchu rŭ tupauca ga taxŭnewa ĩnanangŭĕxĕĕ ga duŭxŭgŭ. Rŭ yexguma nŭxŭ naxŭnŭgu ga yema ore ga Yudŭgŭ nŭxŭ ixugŭxŭ ga nachiga, rŭ tagaãcŭ ñanagŭrŭ: —Pema rŭ marŭ choxŭ pecuĕx rŭ nŭxŭ pecuĕx na ngextã na ne chaxŭxŭ. Natŭrŭ tama chaugagu nixŭ i nŭma chaxŭxŭ. Choma nŭma chaxŭ yerŭ nŭma choxŭ namu ga Tupana ya naxwĕxecŭ na nŭxŭ yaxŭgŭxŭ natŭrŭ i pema rŭ tama nŭxŭ pecuãcŭ. ²⁹ —Choma rŭ nŭxŭ chacuĕx yerŭ naxŭtawa ne chaxŭ, rŭ nŭma nixŭ i nŭma choxŭ namuxŭ —ñanagŭrŭ. ³⁰ Rŭ yexguma ga yema ãĕxgacŭgŭ rŭ Ngechuchuxŭ niyauxgŭchaŭ. Natŭrŭ taxŭma nayayauxgŭ, yerŭ tauta nawa nangu ga ngunexŭ ga na yayauxgŭãxŭ rŭ na yamĕxgŭãxŭcĕx. ³¹ Natŭrŭ muxŭma ga duŭxŭgŭ rŭ nŭxŭ nayaxŭgŭ. Rŭ ñanagŭrŭgŭ: —¿Ngĕxguma ĩnanguxgu ya Cristu rŭ tacŭ rŭ cuĕxruŭ i taxŭ tã naxŭ ya daa yatŭ tama ŭxŭ i ñuxmax? —ñanagŭrŭgŭ.

Parichĕgŭ rŭ Ngechuchuxŭ niyauxgŭchaŭ

³² Rŭ yema Parichĕgŭ rŭ duŭxŭgŭxŭ naxŭnŭĕ ga yemaãcŭ Ngechuchuchiga na yadexagŭxŭ. Rŭ yemacĕx ga nŭmagŭ rŭ paigŭarŭ

ãëxgacügü rü yéma nanamugü ga tupauca ga taxũneãrũ purichíagü na Ngechuchuxũ yanayauxgũxcèx. ³³ Rü yexguma ga Ngechuchu rü ñanagürü nüxũ: —Paxaãchi tátama nixĩ i petanũwa changëxmaxũ, rü ñuxũchi tá chataegu naxũtawa ya yima núma choxũ mucü. ³⁴ —Pema rü tá chauxcèx pedaugü, natürü tãütãma choxũ ipeyangaugü. Erü ngëma ngextá tá íchangëxmaxũwa rü taxuacü ngëma pengugü. ³⁵ Rü yexguma ga yema Yudíugüarü ãëxgacügü rü nügüna nacagüe, rü ñanagürügü: —¿Ngextá tá naxũ ega taxuacütãma nüxũ iyarüngaugü? ¿Éxna ngëma Yudíugü i to i nachiũñewa ngëmagüxũtanüwa tá naxũ rü éxna ngëma tama Yudíugü ixíngüxũtanüwa tá naxũ na yangüexëãxũcèx? ³⁶ —¿Rü tacüchiga nixĩ i ngëma na ngëma ñaxũ:

“Tá chauxcèx pedaugü natürü tãütãma choxũ ipeyangaugü, erü taxuacütãma ngëma pexĩ i ngëma tá íchangëxmaxũwa”, ñaxũ? —ñanagürügü.

Dexá i maxëëruũchiga nidexa ga Ngechuchu

³⁷ Rü yema nawa iyacuãxũ ga petaarü ngunexũ nixĩ ga guxũ ga togü ga ngunexũãrü yexera rümemaëxũ naxcèx ga Yudíugü. Rü yema ngunexũgu nixĩ ga inachixũ ga Ngechuchu rü tagaãcü ñaxũ: —Rü ngëxguma texé itawaxgu rü jnuã chauxũtawa taxũ rü tayaxaxe! ³⁸ —Rü “texé ya choxũ yaxõxë rü túmaãrũ maxñewa tá nibaibe i taxũ i dexá i maxëëruũ” ngëma Tupanaãrũ ore i úmatüxũ nüxũ ixuxürüũ —ñanagürü. ³⁹ Rü yexguma yema ñaxgu ga Ngechuchu rü Tupanaãë i Üünexũchiga nixĩ ga yadexaxũ. Rü nüxũ nixu ga guxũma ga yema nüxũ yaxõgüxũ rü tá na nayauxgüãxũ i Naãë i Üünexũ. Natürü tama yexgumatama nanayauxgü, yerü tauta wenaxãrũ daxüguxũ ga naãnecèx nataegu ga Ngechuchu na guxũãrũ ãëxgacü na yíixũcèx.

Ngechuchugagu nügü nitoye ga duũxügü

⁴⁰ Rü nümaxũ ga yema duũxügü rü yexguma nüxũ naxĩnũëgu ga yema Ngechuchu nüxũ ixuxũ, rü ñanagürügü: —Aixcúma ñaã yatü nixĩ i ngëma Tupanaãrũ orearü uruũ i ínguxchaũxũ —ñanagürügü. ⁴¹ Rü togü rü ñanagürügü: —Daa nixĩ ya Cristu —ñanagürügü. Natürü togü rü ñanagürügü: —Tama nixĩ, erü taxucürüwa Gariréanecüãx nixĩ ya Cristu. ⁴² —Erü Tupanaãrũ ore i úmatüxũwa rü ñanagürü:

“Cristu rü tá Dabítaa nixĩ, rü tá nangõx i ñãne i Beréũwa ga ngextá Dabí íbuxũwa”,

ñanagürügü. ⁴³ Rü yemaãcü Ngechuchugagu nügü nitoye ga duũxügü. ⁴⁴ Rü ñuxre ga yema duũxügü rü Ngechuchuxũ niyauxgüchaũ, natürü taxuũma nayayauxgü.

Yudíugüarü ãëxgacügü rü tama Ngechuchuaxũ nayaxõgüchaũ

⁴⁵ Rü yema tupauca ga taxũneãrũ purichíagü, rü Parichéugücèx rü paigüarü ãëxgacügücèx nawoegu. Rü yema ãëxgacügü rü nüxna nacagü, rü ñanagürügü: —¿Tüxcüũ tama nuã penaga? —ñanagürügü. ⁴⁶ Rü yema purichíagü rü nanangãxũgü rü ñanagürügü: —Taguma texé tidexa i ñaã yatü idexaxürüũ —ñanagürügü. ⁴⁷ Rü yexguma ga Parichéugü rü ñanagürügü nüxũ: —¿Éxna pexũ rü ta marü nawomüxëë i nümax? ⁴⁸ —Dücèx, rü taxúema i tomãx i Parichéugü rü taxuũma i tórü ãëxgacügü rü nüxũ nayaxõgü i ngëma Ngechuchu. ⁴⁹ —Natürü ñaã duũxügü i tama Tupanaãrũ mugüxũ cuëxgüxũ rü marü nachixexügu —ñanagürügü. ⁵⁰ Natürü Nicodému ga Parichéu ixícü ga wüxicana Ngechuchuxũtagu

naxũãnecũ, rũ ñanagũrũ nũxũ: ⁵¹ —Ngẽma tórũ mugũ i ùmatũxũwa rũ ñanagũrũ:

“Taxuacũma wũxi i yatũxũ tapoxcu ega tama nũxũ ixĩnũẽxĩragu i norũ dexa na nũxũ icuáxũcẽx na ãacũ na naxũxũ”, ñanagũrũ. ⁵² Rũ yexguma ga natanũxũgũ rũ nanangãxũgũ, rũ ñanagũrũgũ nũxũ: —¿Éxna cuma rũ ta Gariréanecũãx quixĩ? ¡Nawa nangux i Tupanaãrũ ore i ùmatũxũ rũ ngema tá nũxũ cudau rũ taxuũtãma i Tupanaãrũ orearũ uruũ rũ Gariréanecũãx nixĩ! —ñanagũrũgũ. ⁵³ Rũ yexguma ga wũxichigũ rũ nachiũwa naxĩ.

8

Nge ga ãtecũ ga naĩ ga yatũmaã ngẽãexcũ

¹ Rũ Ngechuchu rũ Orĩbunecũgu ãegane ga mẽxpũnewa naxũ. ² Rũ moxũãcũ ga yexguma yangunegu, rũ wenaxãrũ tupauca ga taxũnecẽx nataegu. Rũ ga duũxũgũ rũ naxcẽx naxĩ. Rũ nũma ga Ngechuchu rũ ínãrũto, rũ inanaxũgũ ga na nangũxẽẽãxũ ga duũxũgũ. ³ Rũ yema ngũxẽẽruũgũ ga Moĩchẽarũ mugũwa nguxẽẽtaegũxũ rũ Parichẽugũ, rũ Ngechuchuxũtawa ngĩxũ nagagũ ga wũxi ga nge ga ãtecũ ga ngĩxũ nadaugũcũ ga naĩ ga yatũmaã na inapexũ. Rũ guxũma ga yema duũxũgũ ga yema yexmagũxũpẽxegu ngĩxũ nayachixẽẽgũ. ⁴ Rũ ñanagũrũgũ Ngechuchuxũ: —Pa Ngũxẽẽruũx, ñãã nge i ãtecũ rũ ngĩxũ itayangau na naĩ ya yatũmaã na inapexũ. ⁵ Moĩchẽarũ mugũwa tamaã nũxũ nixu na nutamaã ngĩxũ ímũxũchiãcũma ngĩxũ imãxũ i wũxi i nge i ngẽmaãcũ maxũcũ. ¿Ñuxũ ñacuxũ i cuma i ñuxmax? —ñanagũrũgũ. ⁶ Rũ yema ñanagũrũgũ ga nũmagũ, yerũ Ngechuchuxũ guxchaxũgu nanguxẽẽgũchaũ na nũxũ nayexmaxũcẽx ga ãacũcẽx na ínaxuaxũgũãxũ. Natũrũ ga Ngechuchu rũ inayarũmaxãchi rũ inanaxũgũ ga naxmẽxmaã waixũmũwa na naxũmatũãxũ. ⁷ Natũrũ nũxũ nacẽxẽxgũama, rũ yemacẽx dũxwa wenaxãrũ nadaunagũ ga Ngechuchu, rũ ñanagũrũ nũxũ: —Ngexerũxe i petanũwa ya ngearũ pecaduãxẽ rũ tũxira nuta ngĩxũ tanaña —ñanagũrũ. ⁸ Rũ wenaxãrũ inayarũmaxãchi ga Ngechuchu rũ naxmẽxmaã nanaxũmatũ ga waixũmũwa. ⁹ Natũrũ yexguma nũxũ naxĩnũẽgu ga yema ore ga Parichẽugũ rũ inanaxũgũe ga nũgũ na yawũxĩxũ ga nũgũwe na ínachoxũxũ. Rũ yaguãxgũ ga Parichẽugũwa ínaxũgũ ga na ínachoxũxũ rũ dũxwa guxũma ínachoxũ. Rũ yexguma marũ guxũma ga Parichẽugũ íchoũxgu, rũ Ngechuchu rũ yema ngecũxicatama yema duũxũgũpẽxewa nayaxũgũ. ¹⁰ Rũ yexguma ga Ngechuchu rũ wena nadaunagũ. Rũ ngĩxna naca rũ ñanagũrũ ngĩxũ: —Pa Ngecũx, ¿Ngẽxũgũ nixĩ i ngẽma cuxũ ixugũxũ? ¿Rũ taxuũma cuxũ imãxchaũ? —ñanagũrũ. ¹¹ Rũ ngĩma rũ ngĩgũrũgũ nũxũ: —Taxuũma Pa Corix —ngĩgũrũgũ. Rũ yexguma ga Ngechuchu rũ ñanagũrũ ngĩxũ: —Choma rũ ta tama cuxũ chapoxcu. Ñuxma rũ marũ name rũ íquixũ rũ tama wena pecadu cuxũ —ñanagũrũ.

Ngechuchu rũ ñoma i naãneãrũ ngóonex-ẽẽruũ nixĩ

¹² Rũ wenaxãrũ duũxũgũmaã nidexa ga Ngechuchu, rũ ñanagũrũ nũxũ: —Choma nixĩ i ñoma i naãnecũãxãrũ ngóonexẽẽruũ. Rũ yĩxema chowe rũxũxẽ rũ chorũ ngóonexũwa tangẽxma rũ tũxna chanaxã i maxũ. Rũ tá nũxna ítanguxuchi i tũmaãrũ chixexũ —ñanagũrũ. ¹³ Rũ yexguma ga Parichẽugũ rũ ñanagũrũgũ nũxũ: —Cuma rũ cugũchigaxũtama quixu.

Rü ngêma cuchiga i nüxŭ quixuxŭ rŭ taxuwama name —ñanagŭrŭgŭ.
 14 Rŭ Ngechuchu nanangãxŭ rŭ ñanagŭrŭ nüxŭ: —Rŭ ngêma ore i
 chauchiga nüxŭ chixuxŭ rŭ aixcŭma nixŭ woo chomatama yixŭgu i na-
 maã chaugŭétŭwa chidexaxŭ. Erŭ choma rŭ nüxŭ chachuex i ngextá
 ne chaxŭxŭ, rŭ ngextá tá chaxŭxŭ. Natŭrŭ pema rŭ tama nüxŭ
 pecuèx na ngextá ne chaxŭxŭ rŭ tama nüxŭ pecuèx na ngextá tá
 chaxŭxŭ. 15 Pema rŭ choxŭ pengugŭ i ñoma i naãnecŭãx i duŭxŭgŭ
 nagu rŭxŭñŭëxŭãcŭmamare. Natŭrŭ i choma rŭ taxúexŭma changugŭ.
 16 Natŭrŭ ngêxguma chi texéxŭ changugŭgu rŭ aixcŭma meãma tŭxŭ
 changugŭ. Erŭ tama chaxicatama tŭxŭ changugŭ, natŭrŭ yima Chau-
 natŭ ga núma choxŭ mucŭmaã nixŭ i wŭxigu tŭxŭ tangugŭxŭ. 17 Rŭ ngêma
 mugŭ ga Moíché umatŭxŭ i nagu pexŭxŭ, rŭ ñanagŭrŭ:

“Ngêxguma taxre i duŭxŭgŭ rŭ wŭxitama i orexŭ yaxugŭgu, rŭ ngêma
 ãëxgacŭ nüxŭ nacuèx na aixcŭma yŭxŭ i ngêma nüxŭ yaxugŭexŭ”,
 ñanagŭrŭ. 18 Rŭ dücax, choma nixŭ i wŭxi i chauchigaxŭ chixuxŭ rŭ
 Chaunatŭ ga núma choxŭ mucŭ nixŭ ya naŭ. ¿Rŭ tŭxcŭŭ tama choxŭ
 peyaxŭgŭchaŭ i ñŭxmax? —ñanagŭrŭ. 19 Rŭ yexguma ga nümagŭ rŭ
 nüxna nacagŭe rŭ ñanagŭrŭgŭ: —¿Ngexcŭ ya yima Cunatŭ? —ñanagŭrŭgŭ.
 Rŭ Ngechuchu nanangãxŭ rŭ ñanagŭrŭ: —Choxŭ rŭ tama pecuèx rŭ
 Chaunatŭxŭ rŭ chi ta pecuèxgŭ —ñanagŭrŭ. 20 Rŭ yema orexŭ nixu
 ga Ngechuchu ga yexguma nanguxëëtaegu ga tupauca ga taxŭnewa
 naxŭtawa ga yema nachica ga ngextá duŭxŭgŭ tupaucana díeru ngŭxŭ
 íxãgŭxŭwa. Natŭrŭ taxuŭma Ngechuchuxŭ niyauxgŭ, yerŭ tauta nawa
 nangu ga yema ngunexŭ ga nagu yayauxgŭãxŭ.

*Ngechuchu rŭ Parichéugŭmaã nüxŭ nixu rŭ ngextá nüma ínaxŭxŭwa rŭ
 taxucŭrŭwa ngema naxŭ*

21 Rŭ Ngechuchu rŭ wenaxãrŭ namaã nüxŭ nixu, rŭ ñanagŭrŭ: —
 Choma rŭ tá pexna chixŭ i núma, rŭ pema rŭ tá chauxcèx pedaugŭ,
 natŭrŭ tá perŭ pepadugu peyue. Rŭ ngextá íchaxŭxŭwa rŭ taxucŭrŭwama
 ngema pexŭ —ñanagŭrŭ. 22 Rŭ yexguma ga yema Yudiŭgŭ rŭ ñanagŭrŭgŭ:
 —¿Éxna nügŭ tátama nimèx rŭ ngêmacèx tamaã nüxŭ yaxuxŭ na tax-
 ucŭrŭwama ngema ixŭxŭ i ngêma ínaxŭxŭwa? —ñanagŭrŭgŭ. 23 Rŭ
 Ngechuchu ñanagŭrŭ nüxŭ: —Pema rŭ ñoma i naãnecŭãx i duŭxŭgŭ
 pixŭgŭ, natŭrŭ i choma rŭ daxŭguxŭ i naãnewa ne chaxŭ. Pema rŭ ñoma
 i naãneãrŭ duŭxŭgŭ pixŭgŭ natŭrŭ i choma rŭ tama ñoma i naãnecŭãx
 chixŭ. 24 —Rŭ ngêmacèx pemaã nüxŭ chixu rŭ tá perŭ pepadugu peyue.
 Erŭ ngêxguma tama choxŭ peyaxŭgŭgu na choma chíxŭ ya Cristu, rŭ
 perŭ pepadugu tá peyue —ñanagŭrŭ. 25 Rŭ yexguma nüxna nacagŭe,
 rŭ ñanagŭrŭgŭ: —¿Natŭrŭ texé quixŭ i cumax? —ñanagŭrŭgŭ. Rŭ
 Ngechuchu nanangãxŭ, rŭ ñanagŭrŭ: —Marŭ noxritama pemaã nüxŭ
 chixu na texé chíxŭ. 26 —Rŭ choma rŭ choxŭ nangêxma i muxŭma i
 ñacŭ i chomatama pexŭ changúexëëchaŭxŭ rŭ ñacŭcèx pexna na chaçaxŭ,
 natŭrŭ táütama chanaxŭ i ngêma. Erŭ yima Chaunatŭ ga núma choxŭ
 mucŭ chomaã nüxŭ ixuxŭ i orexicatama nixŭ i ñoma i naãnecŭãxgŭmaã
 nüxŭ chixuxŭ. Rŭ guxŭma i ngêma nüxŭ yaxuxŭ ya Chaunatŭ, rŭ
 aixcŭma nixŭ —ñanagŭrŭ. 27 Natŭrŭ nümagŭ rŭ tama nüxŭ nacuèxgŭéga
 ga Nanatŭ ya Tupanachiga na yŭxŭ na yema ñaxŭ ga Ngechuchu. 28 Rŭ
 yemacèx ga Ngechuchu rŭ ñanagŭrŭ nüxŭ: —Choma nixŭ i Tupana Nane

i duũxũ chiĩxũ. Rũ yixcũra ngẽxguma curuchawa choxũ pipotagũgu, rũ tá nũxũ picuẽxãchitanũ na Cristu na chiĩxũ. Rũ tá nũxũ pecuẽx na taxuãma chauechamatama chaxũxũ. Rũ ngẽma Chaunatũ chomaã nũxũ ixuxũxĩcatama nixĩ i pemaã nũxũ chixuxũ. ²⁹—Yima nũma choxũ mucũ ya Chaunatũ rũ chauxũtawa nangẽxma. Rũ taguma choxna nixũgachi, erũ choma rũ guxũguma chanaxũ i ngẽma norũ ngũchaũ ixĩxũ —ñanagũrũ. ³⁰ Rũ yexguma yema ñaxgu ga Ngechuchu rũ muxũma ga duũxũgũ nũxũ nayaxõgũ.

Yixema Tupanaxãcũgũ ixĩgũxechiga, rũ yixema pecadutũtwa ngẽxmagũxechiga

³¹ Rũ yexguma ga Ngechuchu rũ ñanagũrũ nũxũ ga yema Yudiũgũarũ ãẽxgacũgũ ga nũxũ yaxõgũxũ: —Ngẽxguma pema meãma peyaxõgũechagu i ngẽma pemaã nũxũ chixuxũ, rũ aixcũmaxũchi tá chorũ ngũexũgũ pixĩgũ. ³² —Rũ tá nũxũ pecuẽx i ore i aixcũma ixĩxũ. Rũ ngẽma ore tá pexũ ínanguxũxẽẽ —ñanagũrũ. ³³ Rũ nũmagũ rũ Ngechuchuxũ nangãxũgũ, rũ ñanagũrũgũ: —Toma rũ nuxcũmaũcũ ga torũ oxĩ ga Abrãũtaa tixĩgũ rũ taguma texémẽxẽwa tangẽxmagũ. ¿Nũxãcũ i cumax rũ tá na ítanguxũxũ, ñacuxũ? —ñanagũrũgũ. ³⁴ Rũ Ngechuchu ñanagũrũ nũxũ: —Aixcũma pemaã nũxũ chixu rũ guxãma ya pecaduãxẽ rũ pecadutũtwa tangẽxmagũ. ³⁵ —Wũxi i coriarũ duũxũmare rũ tama norũ coripatacũãx nixĩ. Natũrũ wũxi i cori nane rũ guxũguma nanatũ nane nixĩ. ³⁶ —Choma rũ Tupana Nane chixĩ. Rũ ngẽxguma chi choma pecaduna pexũ íchanguũxẽẽgu, rũ aixcũma tá nũxna ípengũũ. ³⁷ —Marũ nũxũ chacuẽx na Abrãũtaa pixĩgũxũ i pemax. Natũrũ choxũ pimẽxgũchaũ erũ tama aixcũma choxũ peyaxõgũ i ngẽma ore i pemaã nũxũ chixuxũ. ³⁸ —Choma rũ yema Chaunatũ choxũ wẽxũ nixĩ i pemaã nũxũ chixuxũ. Natũrũ pema rũ penaxũ i ngẽma penatũ pemaã nũxũ ixuxũ —ñanagũrũ ga Ngechuchu. ³⁹ Rũ nũmagũ rũ Ngechuchuxũ nangãxũ rũ ñanagũrũgũ: —Torũ oxĩ nixĩ ga Abrãũ —ñanagũrũgũ. Natũrũ Ngechuchu nanangãxũ rũ ñanagũrũ nũxũ: —Ngẽxguma chi aixcũma Abrãũtaa pixĩgũgu rũ chi Abrãũ uxũrũũ penaxũ. ⁴⁰ —Natũrũ woo pemaã nũxũ chixu i ore i aixcũma ixĩxũ ga Chaunatũ ga Tupana choxũ nguxẽxũ, rũ pema rũ choxũ pimẽxgũchaũ. Natũrũ ga Abrãũ rũ taguma yemaãcũ nanaxũ. ⁴¹ —Pema rũ penaxũ i penatũgũcũmatama —ñanagũrũ. Rũ yexguma ga nũmagũ rũ ñanagũrũgũ: —Toma rũ tama tangũruwaũgũmare, rũ toxũ nangẽxma ya wũxitama ya tonatũ. Rũ yima nixĩ ya Tupana —ñanagũrũgũ. ⁴² Rũ Ngechuchu nanangãxũ, rũ ñanagũrũ nũxũ: —Ngẽxguma chi aixcũma Tupana yixĩgu ya penatũ rũ choxũ chi pengechaũ, erũ choma rũ Tupanaxũtawa nixĩ i ne chaxũxũ, rũ ngẽmacẽx chanuxma. Rũ tama chauechamatama nũma chaxũ, natũrũ nũma chaxũ yerũ Chaunatũ ya Tupana nũma choxũ namu. ⁴³ —¿Tũxcũũ tama nũxũ pecuẽxẽga i ngẽma pemaã nũxũ chixuxũ? Pexũ naguxcha erũ woetama tama iperũxĩnũẽchaũ i ngẽma pemaã nũxũ chixuxũ i ore. ⁴⁴ —Penatũ rũ Chataná nixĩ rũ pema rũ naxãcũgũ pixĩgũ. Rũ ngẽmacẽx penaxũ i ngẽma nũma pexũ nanaxwẽxexũ. Rũ ngẽma Chataná rũ noxriarũ ügũgumama wũxi i máẽtaxũ nixĩ. Rũ taguma ore i aixcũmaxũgu narũxĩnũ rũ taguma ore i aixcũmaxũ nixu. Rũ ngẽxguma yadeaxgu rũ doraxũxĩcatama nixu, erũ nũma rũ wũxi i doratẽaxũ nixĩ. Rũ guxũma i doratẽaxũnatũ nixĩ. ⁴⁵ —Natũrũ i pema rũ tama choxũ peyaxõgũchaũ erũ ore i aixcũmaxũ chixu. ⁴⁶ —¿Texẽ ya petanũwa choxũ

dauxe na pecadu chaxüxü? Rü ñuxma na nüxü chixuxü i ore i aixcüma ixixü, rü ztüxcüü tama choxü peyaxögü? ⁴⁷ —Texé ya Tupanaärü duüxü ixixé rü itarüxinü i Tupanaärü ore. Natürü i pema rü tama Tupanaärü duüxügü pixigü, rü ngëmacëx nixi i tama iperüxinüechaüxü i Tupanaärü ore —ñanagürü.

Tauta nangoxgu ga Abráü rü Cristu rü marü nayexma

⁴⁸ Rü yexguma ga yema Yudíugüarü äëxgacügü rü ñanagürügü nüxü: —Rü aixcüma nixi ga yema torü ore ga yexguma ñatagügügu:

“Cuma rü wüxi i Chamáriacüâx quixi, rü ngoxo cuwa nangëxma”, ñatagügügu —ñanagürügü. ⁴⁹ Rü Ngechuchu nanangäxü, rü ñanagürü nüxü: —Chowa rü nataxuma i ngoxo. Rü ngëma chaxüxü nixi na Chaunatüxü chicuëxüüxü, natürü i pema rü chixri chauchiga pidexagü. ⁵⁰ —Choma rü tama naxcëx chadau na texé choxü icuëxüügüxüçëx. Natürü Tupana nixi ya naxwëxecü na duüxügü choxü icuëxüügüxü. Rü nüma tá nanapoxcue i ngëma chauxchi aiexü. ⁵¹ —Aixcüma pemaã nüxü chixu, rü texé ya naga ñnuxé i ngëma tümamaã nüxü chixuxü rü guxügütáma tamaxëcha —ñanagürü. ⁵² Rü yexguma ga yema Yudíugüarü äëxgacügü, rü Ngechuchuxü nangäxügü, rü ñanagürügü: —Ñuxma rü meäxüchima nüxü tacuëx na cuwa nangëxmaxü i wüxi i ngoxo. Yerü ga Abráü rü guxüma ga nuxcümaügüxü ga Tupanaärü orearü uruügü rü nayue. Natürü cuma rü ñuxma tomaã nüxü quixu rü texé ya naga ñnuxé i ngëma curü ore rü guxügütáma tamaxëcha —ñacurügü. ⁵³ —¿Éxna cuma rü torü oxí ga Abráüarü yexera quixi? Yerü nüma rü nayu rü guxüma ga nuxcümaügüxü ga Tupanaärü orearü uruügü rü ta nayue. ¿Rü cugüçëx rü texé quixi? —ñanagürügü. ⁵⁴ Rü Ngechuchu nanangäxü, rü ñanagürü nüxü: —Ega chaugü chitama chicuëxüügu rü ngëma rü taxuwama name. Natürü yima choxü icuëxüüçü rü Chaunatü nixi. Rü yima Chaunatütama nixi ya perü Tupana ixicü —ñapegücü nüxü. ⁵⁵ —Natürü i pema rü tama aixcüma nüxü pecuëx ya Chaunatü ya Tupana. Natürü i choma rü ngëmaäcü nüxü chacuëx. Rü ngëxguma chi:

“Tama nüxü chacuëx”, ñachaxgu, rü pexrüü chi wüxi i doratëxäxü chixi. Natürü i choma rü aixcümaxüchima nüxü chacuëx ya Chaunatü ya Tupana, rü naga chaxinü i guxüma i norü ore i chomaã nüxü yaxuxü. ⁵⁶ —Perü oxí ga Abráü rü nataãë yerü aixcüma nayaxö rü tá na íchanguxü i ñoma i nañnewa. Rü yemaxü nacuëx rü yemacëx nataãë —ñanagürü ga Ngechuchu. ⁵⁷ Rü yexguma ga yema Yudíugüarü äëxgacügü rü Ngechuchuxü nangäxügü, rü ñanagürügü: —Cuma rü tauta 50 ya tauncü cuxü nangëxma. ¿Nuxäcü Abráüxü cudau ga tauta cungoxgux ga yexguma? —ñanagürügü. ⁵⁸ Rü Ngechuchu nanangäxü rü ñanagürü nüxü: —Aixcüma pemaã nüxü chixu rü tauta Abráü nangoxgu rü choma rü marü chayexma —ñanagürü. ⁵⁹ Rü yexguma ga nümagü rü nutane nanayauxgü na gumamaã inamuxüchigüäxüçëx. Natürü ga Ngechuchu rü naxchaxwa inicux. Rü yemaäcü inaxüxü nawa ga guma tupauca ga taxüne.

9

Ngechuchu nanamexëë ga wüxi ga yatü ga norü bucüma ngexetüçü

¹ Rü yexguma namagu tomaã yaxüxgu ga Ngechuchu, rü yéma nüxü nadau ga wüxi ga yatü ga woetama norü bucüma ngexetüçü. ² Rü toma

ga norü ngúexŭgü rü nüxna tacagü, rü ñatarügügü: —Pa Ngúexêëruŭx, ¿Tüxcüŭ ngexetücüma nabu ya daa yatü? ¿Éxna nanatü rü naêärü pecadugagu rü éxna norü pecadugagutama? —ñatarügügü. ³ Rü Ngechuchu toxü nangäxü, rü ñanagürü toxü: —Tama norü pecadugagu rü tama i nanatü rü naêärü pecadugagu nixĩ i ngêmaäcü nabuxü. Natürü ngêmaäcü nabu na nawa nüxü pedauxücêx na ñuxäcü Tupana tüxü na rümexêëxü. ⁴ —Rü ñoma rü ta nangune rü name nixĩ na paxama na naxüxü i ngêma puracü ya Chaunatü ga núma choxü mucü tüxna äxü. Erü paxa tá nachüta rü ngêxguma rü taxucürüwama texê tá tapuracü. ⁵ —Rü ñuxma na ñoma i nañewa changêxmaxü rü ñoma i nañeärü ngóonexêëruŭ chixĩ —ñanagürü. ⁶ Rü yexguma yema ñaxguwena rü Ngechuchu waixüümüñewa nacuaxi. Rü yema waixüümü ga iwaixümaã nanachaxetü ga guma yatü ga ngexetücü. ⁷ Rü yexguma guma ngexetücüxü ñanagürü: —¡Dexámaã cugü yayauxetü i Chiruéarü puchuwa! —ñanagürü. Rü ngêma naega rü “Tüxü muxü”, ñaxüchiga nixĩ. Rü yéma naxü ga guma ngexetücü rü nügü dexámaã nayauxetü. Rü yexguma nataegugu rü marü nidauchixetü. ⁸ Rü yexguma ga yema duüxügü ga guma ngexetücüpataarü ngaicamagu pegüxü rü yema duüxügü ga üpaacü nüxü daugüxü ga na nangexetüxü, rü ñanagürügü: —¿Taux éxna i ñaã yïixü ga yema yatü ga ngexetüchiréxü ga duüxügüxü dîerucêx cêêxüxü? —ñanagürügü. ⁹ Rü nümaxü rü ñanagürügü: —Ngêmaäcü núma nixĩ —ñanagürügü. Rü togü rü ñanagürügü: —Tama nixĩ i yima yïixü, natürü nanangêxgumaraŭxüchi —ñanagürügü. Natürü nümatama ga guma yatü ga ngexetüchirécü, rü ñanagürü: —Ngêmaäcü choma chixĩ —ñanagürü. ¹⁰ Rü yexguma ga yema duüxügü rü nüxna nacagü rü ñanagürügü: —¿Rü ñuxäcü nixĩ i marü quidauchixü i ñuxmax? —ñanagürügü. ¹¹ Rü nüma nanangäxü rü ñanagürü: —Yima yatü ya Ngechuchugu äegacü rü yima waixüümüñewa nacuaxi. Rü yema waixüümü ga iwaixümaã choxü nachaxetü. Rü ñanagürü choxü:

“¡Yéa Chiruéarü puchuwa naxü rü ngêma dexámaã cugü yayauxetü!” ñanagürü choxü. Rü yéma chaxü, rü yexguma dexámaã chaugü chayauxetügu rü chidauchi —ñanagürü ga guma yatü. ¹² Rü yexguma nüxna nacagüe, rü ñanagürügü: —¿Ngextá nangêxmaxü i ñuxma ya yima yatü ya cuxü rümexêëcü? —ñanagürügü. Rü nüma ga guma yatü ga ngexetüchirécü rü ñanagürü: —Tama nüxü chacuêx —ñanagürü.

Parichéugü rü guma ngexetücü ga Ngechuchu namexêëcüna nacagüe

¹³⁻¹⁴ Natürü yema ngunexü ga Ngechuchu nagu namexêëxü ga guma ngexetücü, rü ngüxchigaarü ngunexü nixĩ. Rü yemacêx ga duüxügü rü Parichéugüxütawa nanagagü ga guma yatü ga ngexetüchirécü. ¹⁵ Rü yexguma ga yema Parichéugü rü nüxna nacagüe ga guma yatü, rü ñanagürügü: —¿Ñuxäcü i marü curümexëtüxü i ñuxmax? —ñanagürügü. Rü nüma nanangäxü rü ñanagürü: —Waixüümü ga naxbüxágümaã yawaixêëxümaã choxü nachaxetü ga Ngechuchu, rü ñuxüchi dexámaã chaugü chayauxetü, rü ngêmacêx marü chidauchi —ñanagürü. ¹⁶ Rü yexguma ga ñuxre ga Parichéugü rü ñanagürügü: —Yema yatü ga cuxü rümexêëxü rü tama Tupanaärü duüxü nixĩ, erü tama nanaxaure i ngüxchigaarü ngunexü —ñanagürügü. Natürü togü ga Parichéugü rü ñanagürügü: —¿Ñuxäcü nanaxü i ngêma cuêxruŭ i mexü i taxü ega wüxi i pecaduäxü yixixgux? —ñanagürügü. Rü yemaäcü nügü nitoye ga nagu

naxĩnũxũwa ga yema Parichéugũ. ¹⁷ Rũ wena nũxna nacagũe ga guma yatũ ga ngexetũchirécũ, rũ ñanagũrũgũ: —¿Natũrũ cuma rũ ñũxũ ñacuxũ nachiga i ngẽma yatũ ga cuxũ rũmexẽẽxũ? —ñanagũrũgũ. Rũ nũma nanangãxũ, rũ ñanagũrũ: —Chauxcẽx rũ wũxi i Tupanaãrũ orearũ urũ nixĩ —ñanagũrũ. ¹⁸ Natũrũ ga yema Yudiũgũarũ ãẽxgacũgũ rũ tama nũxũ nayaxõgũchaũ ga nũma na yĩxũ ga na nangexetũchiréxũ ga noxrix, rũ ñũxma rũ marũ na yadauchixũ. Rũ yemacẽx ga yema ãẽxgacũgũ rũ tũmacẽx nangemagũ ga nanatũ rũ naẽ ga guma yatũ ga rũmexetũcũ. ¹⁹ Rũ tũxna nacagũ, rũ ñanagũrũgũ: —¿Daa yĩxũ ga guma pene ga nũxũ pixucũ ga woetama ngexetũãcũ bucũ? ¿Ñũxãcũ i ñũxma i yadauchixũ? —ñanagũrũgũ. ²⁰ Rũ nanatũ rũ naẽ tanangãxũgũ rũ ñatarũgũgũ: —Ngẽmããcũ nũxũ tacuèx rũ daa nixĩ ya tone ga ngexetũãcũma buchirécũ. ²¹ Natũrũ tama nũxũ tacuèx ga ñũxãcũ na yadauchixũ i ñũxmax. Rũ tama nũxũ tacuèx ga texé na namexetũxẽẽxũ. ¡Ècũ nũxnatama pecagũ! Erũ nũma rũ marũ naya, rũ nũmatama pemaã nũxũ na yaxuxũcẽx —ñatarũgũgũ. ²² Rũ yema ñatarũgũgũ ga nanatũ rũ naẽ, yerũ tamuũẽ. Yerũ ga Yudiũgũarũ ãẽxgacũgũ rũ marũ nũgũmaã nanamexẽẽgũ na tũxũ ñnatẽxũchigũxũcẽx ga ngutaquẽxepataũwa ga texé ga Ngechuchuaxũ yaxõxẽ na Cristu yĩxũ. ²³ Rũ yemacẽx nixĩ ga nanatũ rũ naẽ ga ñatagũgũxũ: “¡Ècũ, nũxnatama pecagũ! Erũ nũma rũ marũ naya rũ nũmatama pemaã nũxũ na yaxuxũcẽx”, ñatagũgũxũ. ²⁴ Rũ yexguma ga yema Yudiũgũarũ ãẽxgacũgũ rũ wenaxãrũ naxcẽx nacagũ ga guma ngexetũchirécũ. Rũ ñanagũrũgũ nũxũ: —Rũ ñũxma tanaxwẽxe i Tupanapẽxewa rũ aixcũma tomaã nũxũ quixu na texé cuxũ rũmexẽẽxũ. Erũ toma rũ meãma nũxũ tacuèx i ngẽma Ngechuchu rũ wũxi i pecaduãxũ na yĩxũ —ñanagũrũgũ. ²⁵ Rũ nũma nanangãxũ rũ ñanagũrũ nũxũ: —Choma rũ tama nũxũ chacuèx ega wũxi i pecaduãxũ yixĩgu rũ ẽxna tama. Rũ ngẽma nũxũ chacuãxũ nixĩ ga na changexetũchiréxũ ga noxrix rũ ñũxma rũ na chidauchixũ —ñanagũrũ. ²⁶ Rũ wenaxãrũ nũxna nacagũe, rũ ñanagũrũgũ: —¿Rũ tacũ nixĩ ga cumaã naxũxũ? ¿Rũ ñũxãcũ ga naxũãxũ ga cuxũ na yadauchixetũxẽẽxũ? —ñanagũrũgũ. ²⁷ Rũ nanangãxũ rũ ñanagũrũ nũxũ: —Marũ pemaã nũxũ chixu, rũ tama choxũ iperũxĩnũẽchaũ. ¿Tũxcũũ penaxwẽxe na wena pemaã nũxũ chixuxũ? ¿Èxna pema rũ ta nũxũ peyaxõgũchaũ? —ñanagũrũ. ²⁸ Rũ yexguma rũ guma yatũmaã chixexũ nixugũe, rũ ñanagũrũgũ: —Cumaẽrũ nixĩ i nũxũ cuyaxõxũ i ngẽma yatũ, natũrũ i toma rũ Moĩchearũ oreaxũ nixĩ i tayaxõgũxũ. ²⁹ —Toma rũ nũxũ tacuèx ga Tupana rũ aixcũma Moĩchémaã na yadexaxũ, natũrũ ngẽma Ngechuchu rũ tama nũxũ tacuèx na ngextã na ne naxũxũ —ñanagũrũgũ. ³⁰ Rũ guma yatũ nanangãxũ, rũ ñanagũrũ nũxũ: —¿Ñũxãcũ nixĩ i ngẽma? Nũma rũ marũ choxũ narũmexetũxẽẽ, natũrũ ¿ñũxãcũ i pema i tama nũxũ pecuãxũ na ngextã ne naxũxũ? ³¹ —Rũ guxãma i yixema rũ meãma nũxũ tacuèx rũ Tupana tama nũxũ naxĩnũ i pecaduãxgũxũãrũ yumũxẽ. Natũrũ Tupana rũ tũxũ nũxũ naxĩnũ i tũmaãrũ yumũxẽ ya yixema nũxũ icuèxũũgũxe rũ naxũxe i Tupanaãrũ ngũchaũ. ³² —Taguma ñũxgu nũxũ taxĩnũchiga i wũxi i yatũ na yadauchixẽẽãxũ i wũxi i duũxũ i norũ bucũma ngexetũxũ. ³³ —Rũ ngẽxguma chi tama Tupana nũma namũxgux ya daa yatũ ya choxũ rũmexẽẽcũ, rũ taxuacũ chima mexũ naxũ —ñanagũrũ ga guma yatũ ga ngexetũchirécũ. ³⁴ Rũ yexguma ga yema Yudiũgũarũ

ãëxgacügü, rü ñanagürügü nüxŭ: —Cuma na pecadugu na cubuxŭ, çrŭ ñuxácü cunaxwëxe na toxŭ cungúexëëchaŭxŭ? —ñanagürügü. Rü ñuxŭchi ínatëxŭchigü ga ngutaquëxepataŭwa.

Duŭxŭgü i tama yaxõgüxŭ rü ngexetŭxŭrüü nixŭgü

³⁵ Rü Ngechuchu rü nüxŭ nacuáchiga ga na ínatëxŭchigüãxŭ ga guma ngexetŭchirécü. Rü yexguma nüxŭ nadëuxgu, rü ñanagürü nüxŭ: —¿Nüxŭ cuyaxõxŭ ya Tupana Nane ya duŭxŭxŭ ixícü? —ñanagürü. ³⁶ Rü yexguma ga nüma rü Ngechuchuxŭ nangãxŭ rü ñanagürü: —Pa Corix, ¡chomaã nüxŭ ixu na texe yŭxŭ na nüxŭ chayaxõxŭcëx! —ñanagürü. ³⁷ Rü Ngechuchu nanangãxŭ, rü ñanagürü: —Marŭ nüxŭ cudadu ya Tupana Nane. Rü chomatama nixŭ i cumaã na íchidexaxŭ chíxŭ —ñanagürü. ³⁸ Rü yexguma ga guma yatü ga ngexetŭchirécü rü Ngechuchupëxegu nacaxãpŭxŭ, rü nüxŭ nicuëxŭ, rü ñanagürü nüxŭ: —Ngëmáácü cuxŭ chayaxõ, Pa Corix —ñanagürü. ³⁹ Rü yexguma ga Ngechuchu rü ñanagürü: —Rü ñoma i naãnewa chaxŭ na chayadexchixŭcëx i chorü duŭxŭgü nüxna i ngëma duŭxŭgü i tama choxrü ixŭgüxŭ. Rü nuã chaxŭ na chanameëxëëxŭcëx i ngëma duŭxŭgü i noxri tama Tupanaxŭ cuëxgüxŭ. Rü ngëxgumarŭ ta núma chaxŭ na duŭxŭgü i tama choxŭ cuëxgüchaŭxŭxŭ chanawéxŭ na duŭxŭgü i ngexetŭxŭrüü na yixŭgüxŭ, erü tama choxŭ nayaxõgüchaŭ —ñanagürü. ⁴⁰ Rü ñuxre ga Parichéugü ga yéma Ngechuchumaã yexmagüxŭ, rü yexguma yema orexŭ naxŭnŭëgu, rü Ngechuchuna nacagü, rü ñanagürügü: —¿Éxna toma rü ta tama Tupanaxŭ tacuëxgü ñacuxŭ? —ñanagürügü. ⁴¹ Rü Ngechuchu nanangãxŭ rü ñanagürü nüxŭ: —Ngëxguma chi tama aixcüma Tupanaxŭ pecuëxgügu rü tãŭ chima pegagu nixŭ na pepecaduãxgüxŭ. Natürü ngëma na pegü pixuxŭ na Tupanaxŭ pecuáxŭ rü ngëmacëx pegagutama nixŭ na pepecaduãxgüxŭ i ñuxmax —ñanagürü.

10

Carnerugüarü dauruŭ rü norü carnerugü

¹ Rü yexguma ga Ngechuchu rü ñanagürü: —Rü aixcüma pemaã nüxŭ chixu rü ngëma yatü i tama carnerupŭxŭãrŭ ñãxwa ixúcuxŭ rü wüxi i ngŭtëxáxŭ nixŭ i ngëma, erü ngextámare nixücu. ² —Natürü ngëma carnerupŭxŭãrŭ ñãxwa meãma ixúcuxŭ, rü ngëma nixŭ i norü dauruŭxŭchi i carnerugü. ³ —Rü ngëma yatü i carnerupŭxŭãrŭ ñãxna dauxŭ rü nayawãxna i ñãx na yaxúcuxŭcëx i carnerugüarü dauruŭ. Rü nüma i carnerugü rü nüxŭ nacuëxgü i naga i ngëma norü dauruŭ. Rü ngëma norü dauruŭ rü wüxichigü i norü carneru rü naegamaã naxcëx naca na ínamuxŭãxŭcëx i naxpŭxŭwa. ⁴ —Rü ngëxguma ínamuxŭãxgu i guxŭma i norü carnerugü, rü nüma i norü dauruŭ rü napëxegu nixŭchigü. Rü nümagü i carnerugü rü nawe narüxŭ, erü nüxŭ nacuëxgü i naga. ⁵ —Natürü ngëxguma wüxi i yatü i tama aixcüma norü dauruŭ ixŭxŭ, rü tama nawe narüxŭ i ngëma carnerugü. Rü nüxna naxŭgü, erü tama nüxŭ nacuëxgü i naga i ngëma tama norü dauruŭ ixŭxŭ —ñanagürü ga Ngechuchu. ⁶ Rü Ngechuchu rü duŭxŭgümaã nüxŭ nixu ga yema ore ga cuëxruŭ, natürü ga nümagü rü tama nüxŭ nacuëxgüëga ga ñacŭchiga na yŭxŭ.

Ngechuchu rü carneruarü dauruŭ ya mecü nixŭ

7 RŦ yexguma ga Ngechuchu rŦ wenaxârŦ űanagŦrŦ nŦxŦ: —AixcŦma pemaã nŦxŦ chixu rŦ choma nixŦ i carnerupŦxŦãrŦ űãx i nawa yachocuxŦxŦ i carnerugŦ. ⁸ GuxŦma ga yema chopegu nŦxira nŦma űxŦ rŦ ngŦtêëxgŦxŦ rŦ maétagŦxŦ nixŦgŦ. NatŦrŦ yema carnerugŦ rŦ tama naga naxŦnŦê. ⁹ Choma nixŦ i űãx. RŦ texé ya chowa ixŦcuxe rŦ tá tamaxŦ. RŦ meãma tá tŦxŦ naxŦpetŦ ngêxgumarŦŦ i wŦxi i carneru i naxpŦxŦgu ũcuxŦ rŦ űxŦxŦxŦxŦ rŦ nŦxŦ iyangaucŦ ya mecŦ ya maxê. ¹⁰ Ngêma ngŦtêxãxŦ rŦ nŦma naxŦ na yangŦxŦcêx rŦ namáétaxŦcêx rŦ nachixexêãxŦcêx. RŦ ngêmacêxicatama nŦma naxŦ. NatŦrŦ i choma rŦ nŦma chaxŦ na chanamaxêxêxŦcêx i duŦxŦgŦ rŦ na aixcŦma nŦxŦ nangêxmaxŦcêx i maxŦ i taguma gŦxŦ. ¹¹ Choma nixŦ i carneruarŦ dauruŦ ya mecŦ chŦxŦ. ErŦ wŦxi i carneruarŦ dauruŦ ya mecŦ rŦ norŦ carnerugŦxŦ űnapoxŦ rŦ űxŦmata naxcêx nayŦx. ¹² NatŦrŦ ngêma dŦrŦcêxmare puracŦxŦ, rŦ ega ngêxguma aixŦ nadêuxgux rŦ carnerugŦna ngema niűa. RŦ ngêmaãcŦ nanaxŦ erŦ tama aixcŦma norŦ dauruŦ nixŦ i nŦmax, rŦ tama noxrŦ nixŦ i ngêma carnerugŦ. RŦ ngêma ai rŦ carnerugŦxŦ űnayauxŦ rŦ ngêxma tŦxŦ naxŦanexêẽmare. ¹³ RŦ ngêma yatŦ rŦ niűa, erŦ norŦ dŦrŦcêxicatama ngema napuracŦ. RŦ tama aixcŦma carnerugŦgu narŦxŦnŦ. ¹⁴⁻¹⁵ Choma nixŦ i carnerugŦarŦ dauruŦ ya mecŦ chŦxŦ. RŦ ngêxgumarŦŦ ya ChaunatŦ na choxŦ nacuãxŦ rŦ choma rŦ ChaunatŦxŦ na chacuãxŦ, rŦ ngêxgumarŦŦ ta nŦxŦ chacuèx i chorŦ carnerugŦ, rŦ nŦmagŦ rŦ choxŦ nacuèxgŦ. RŦ choma rŦ naxcêx chayu i chorŦ carnerugŦ. ¹⁶ RŦ choxŦ nangêxmagŦ ta i togŦ i carnerugŦ i tama űãã naxpŦxŦwa ngêxmagŦxŦ. RŦ ngêmagŦ rŦ tá ta nuã chana-gagŦ, rŦ tá chauga naxŦnŦê. RŦ wŦxitŦcumŦ tátama nixŦ rŦ choma tátama nixŦ i norŦ dauruŦ chŦxŦ. ¹⁷ ChaunatŦ rŦ choxŦ nangechaŦ, erŦ chorŦ carnerugŦcêx chayu rŦ wena táxarŦ chamaxŦ. ¹⁸ TaxŦema choxŦ tayuxêê, natŦrŦ chomatama chorŦ ngŦchaŦmaãtama ichanaxã i chorŦ maxŦ. ErŦ choxmêxwa nangêxma na ichanaxãxŦcêx, rŦ wena na chanayaxuxŦcêx, yerŦ yemaãcŦ choxŦ namu ga ChaunatŦ —űanagŦrŦ. ¹⁹ RŦ yexguma yema orexŦ naxŦnŦêgu ga yema YudŦgŦarŦ ãêxgacŦgŦ rŦ wenaxârŦ nŦgŦ nitoye ga yema nagu naxŦnŦêxŦwa. ²⁰ RŦ muxŦma ga nŦmagŦ rŦ űanagŦrŦgŦ: —¿TŦxcŦŦ nŦxŦ iperŦxŦnŦê i űãã yatŦ i ngêãêxŦ i ngoxo nawa ngêxmaxŦ? —űanagŦrŦgŦ. ²¹ NatŦrŦ ga togŦ rŦ űanagŦrŦgŦ: —TaxŦma i yatŦ i ngoxo nawa ngêxmaxŦ rŦ űããrŦŦ meã nidexa. ¿űuxãcŦ i wŦxi i yatŦ i ngoxo nawa ngêxmaxŦ rŦ tŦxŦ narŦmexêtŦxê ya wŦxi ya ngexetŦxe? —űanagŦrŦgŦ.

YudŦgŦarŦ ãêxgacŦgŦ rŦ NgechuchuxŦ naxoe

²² RŦ nawa nangu ga yema peta ga gucŦ ga tauncêgu norŦ tupauca ga taxŦnecêx naxŦgŦxŦ ga YudŦgŦ na nŦxna nacuèxãchigŦxŦcêx ga yema ngunexŦ ga nagu yanguxŦ ga guma tupauca. RŦ nagãuane ga YerucharêŦwa ga yexguma. ²³ RŦ guma tupauca ga taxŦnewa nayexma ga wŦxi ga chopetŦchica ga CharumóŦãrŦ ChopetŦchicagu ãegaxŦ. RŦ yemagu nayarŦxŦxŦ ga Ngechuchu. ²⁴ RŦ ga yema YudŦgŦarŦ ãêxgacŦgŦ rŦ nŦxŦ űnachomaêguãchi, rŦ űanagŦrŦgŦ nŦxŦ: —¿űuxgurátama tomaã quixaixcŦma na cugŦ quixuxŦ na texé na quiŦxŦ? Ega aixcŦma cuma rŦ Cristu quixŦgu, rŦ meã noxtacŦma tomaã nŦxŦ űxŦ! —űanagŦrŦgŦ. ²⁵ RŦ Ngechuchu nanangãxŦ, rŦ űanagŦrŦ nŦxŦ: —MarŦ pemaã nŦxŦ chixu, natŦrŦ i pema rŦ tama choxŦ peyaxôgŦ.

Guxŭma i tacü i chaxüxŭ rü Chaunatüarü poramaã nixŭ i chanaxüxŭ, rü ngēmawa meāma pexŭ nüxŭ chadauxēē na choma rü Cristu na chiŭxŭ. ²⁶ —Natürü pema rü tama peyaxōgü, erü tama chorü carnerugütanüxŭ pixŭgü. ²⁷ —Chorü carnerugü rü nüxŭ nacuēx i chauga, rü choma rü chorü carnerügüxŭ chacuēx, rü nüma rü chowe narüxŭ. ²⁸ —Rü choma rü nüxna chanaxã i maxŭ i taguma gúxŭ. Rü nümagü rü tagutáma inayarütaxe, rü taxúetáma choxna tanapuxŭ i choxmēxwa. ²⁹ —Rü yíxema Chaunatü choxna tüxŭ mugüxe ya chorü carnerugü, rü guxŭärü yexera tixŭ i napēxewa. Rü taxúema texé nüxna tüxŭ tapuxŭ. ³⁰ —Chaunatü rü choma rü wüxitama tixŭgü —ñanagürü. ³¹ Rü yexguma ga yema Yudíugüarü ãēxgacügü rü wenaxärü nutane nanayauxgü na gumamaã Ngechuchuxŭ ínamuxŭchigüxŭcēx. ³² Natürü ga Ngechuchu rü ñanagürü nüxŭ: —Pepēxewa chanaxü i muxŭma i mexŭgü i Chaunatüarü poramaã chaxüxŭ. ¿Rü ngēxŭrüüxŭ i ngēma mexŭ i chaxüxŭcēx nixŭ i choxŭ nutamaã ípemuxŭchigüchaŭxŭ? —ñanagürü. ³³ Rü yema Yudíugüarü ãēxgacügü rü Ngechuchuxŭ nangāxŭgü, rü ñanagürügü: —Tama wüxi i puracü i mexŭcēx cuxŭ ítamuxŭchigüchaŭ. Natürü cuxŭ ítamuxŭchigüchaŭ erü Tupanamaã rü tacü quixugü. Cuma rü wüxi i duŭxŭmare quixŭ rü cugü Tupanaxŭ quixŭxēchaŭ —ñanagürügü. ³⁴ Rü nüma ga Ngechuchu rü ñanagürü nüxŭ: —Perü mugüpanewa rü naxümatü i Tupanaärü ore i ñaxŭ:

“Rü pematama nixŭ i tupanagü pixŭgüxŭ”,
ñaxŭ. ³⁵ —Rü ngēma Tupanaärü ore i ümatüxŭwa nüxŭ yaxuxŭ, rü nüxŭ tacuēx rü taxucürüwama texé itayanaxoxēē. Rü ngēma orewa rü Tupana rü ñanagürü:

“Guxãma ya yíxema texé yanayauxgüxe i chorü ore rü tupanagü tixŭgü”,
ñanagürü i ngēma orewa. ³⁶ —Rü Tupana choxŭ nayaxu na chanaxüxŭcēx i norü puracü, rü yemacēx ñoma ga naãnewa choxŭ namu. ¿Rü ñuxãcü i pema nagu perüxŭñüēgu rü chixexŭ Tupanamaã chaxüxŭ i ngēxguma Tupana Nane chixŭ —ñachagu pemaã? ³⁷ —Rü ngēxguma chi tama chanaxüxgu i ngēma mexŭ i Chaunatü üxŭ, rü marü name ega woo tama choxŭ peyaxōgü. ³⁸ —Natürü ngēxguma chanaxüxgu i ngēma Chaunatü üxŭ, rü woo tama choxŭ peyaxōgü, rü chanaxwēxe i nüxŭ peyaxōgü i ngēma taxŭ i mexŭgü i Chaunatüarü poramaã chaxüxŭ. Erü ngēmawa tá nüxŭ pecuēx na Chaunatü rü chowa nangēxmaxŭ rü choma i nawa —ñanagürü. ³⁹ Rü wenaxärü Ngechuchuxŭ niyauxgüchaŭ ga yema Yudíugüarü ãēxgacügü. Natürü nüma ga Ngechuchu rü naxchaxwa niña. ⁴⁰ Rü yexguma ga Ngechuchu rü natü ga Yudáŭärü tocutücēx tomaã nataegu. Rü yema nachica ga Cuáŭ duŭxŭgüxŭ ũpaacü nawa íbaiŭxēxŭgu tomaã narüxãŭx. ⁴¹ Rü muxŭma ga duŭxŭgü rü Ngechuchuxŭ ínayadaugü, rü ñanagürügü: —Cuáŭ rü taxuŭma ga taxŭ ga mexŭ ga cuēxruŭ naxü ga Tupanaärü poramaã. Natürü guxŭma ga ore ga Cuáŭ tamaã nüxŭ ixuxŭ ga ñaã yatüchiga rü aixcuma nixŭ —ñanagürügü. ⁴² Rü yema nachicawa rü muxŭma ga duŭxŭgü rü Ngechuchuaxŭ nayaxōgü.

11

Dácharuarü yuxchiga

¹ Nayexma ga wüxi ga yatü ga idaawecü ga Dácharugu ãegacü. Rü nüma rü naēyēxgü ga María rü Marta rü ñane ga Betániãcŭŭax nixŭgü.

² Rũ yema María iyixĩ ga Cori ga Ngechuchucutuũga pumara bacũ rũ ñuxũchi ngĩyaemaã ínapicutũcũ. Rũ guma Dácharu ga ídaawecũ nixĩ ga ngĩeneẽ. ³ Rũ poraãcũ nĩdaawe ga Dácharu. Rũ yemacẽx ga naeyẽxgũ, rũ Ngechuchuxũtawa imugagũ, rũ ngĩgũrũgũgũ: “Pa Corix, cumũcũ ya Dácharu ya nũxũ cungechaũcũ rũ nĩdaawe”, ngĩgũrũgũgũ. ⁴ Rũ yexguma yema orexũ naxĩnũgu ga Ngechuchu, rũ ñanagũrũ: —Ngẽma ðaawe rũ tãũtãma yumaã inayacuẽx. Natũrũ nĩdaawe na duũxũgũ nũxũ nadaugũxũcẽx na ñuxãcũ naporaxũ ya Tupana rũ ñuxãcũ choma i Nane rũ ta na chaporaxũ —ñanagũrũ. ⁵ Rũ Ngechuchu poraãcũ María rũ Marta rũ Dácharuxũ nangechaũ. ⁶ Natũrũ yexguma nũxũ naxĩnũgu ga na yaðaawexũ ga Dácharu, rũ tama paxa inayadau. Rũ taxre ga ngunexũãmatama yexma narũxãũx ga yema nachica ga nawa nayexmaxũwa. ⁷ Rũ yixcama ga yemawena rũ toxũ ñanagũrũ: —¡Ngĩxã rũ wena Yudéaanewa taxĩ! —ñanagũrũ. ⁸ Rũ toma ga norũ ngũexũgũ rũ ñatarũgũgũ nũxũ: —Pa Ngũexẽeruũx, yexwacatama nixĩ ga yemacũãx ga Yudĩugũarũ ãẽxgacũgũ yexma nutamaã cuxũ ímuxũchigũchaũxũ. ¿Rũ tũxcũũ wena ngẽma cuxũchaũ i ñuxmax? —ñatarũgũgũ. ⁹ Rũ Ngechuchu rũ tomaã nũxũ nixu ga wũxi ga ore na nũxũ tacuẽxgũxũcẽx na tauta nawa nanguxũ na nayuxũ ga nũmax. Rũ ñanagũrũ toxũ: —¿Taux êxna i wũxi i ngunexũ rũ 12 i ora nawa ngẽxmaxũ? Ngẽxguma texé ngunecũ ixũxgu rũ tama ðacũmaã itayarũña, erũ tũmacẽx nangóone. ¹⁰ —Natũrũ ngẽxguma wũxie chũtacũ ixũxgu rũ ngẽmaãcũ ðacũmaã itayarũña, erũ tũmacẽx naxẽãne —ñanagũrũ. Rũ yemaãcũ nanangoxẽẽ na tauta nawa nanguxũ na nayuxũ ga nũmax. ¹¹ Rũ yemawena ga Ngechuchu rũ ñanagũrũ toxũ: —Tamũcũ ya Dácharu rũ napemare. Natũrũ ñuxma rũ tá chayabaixãchixẽẽ —ñanagũrũ. ¹² Rũ yexguma ga toma ga norũ ngũexũgũ rũ ñatarũgũgũ: —Pa Corix, ega napemaregu, rũ ngẽmawa nũxũ tacuẽx na naxcẽx tá yataanexũ —ñatarũgũgũ. ¹³ Natũrũ ga Ngechuchu rũ nũxũ nixuxchaũchirẽx ga Dácharu ga marũ na nayuxũ. Natũrũ ga toma nũxũ tacuẽxgũgũ rũ na napemarexũchigaxũ yĩxũ ga tomaã yaxuxũ. ¹⁴ Rũ yexguma ga Ngechuchu rũ meãma tomaã nũxũ nixu rũ ñanagũrũ: —Dácharu rũ marũ nayu. ¹⁵ —Natũrũ choma rũ chataãẽ na tama ngẽma changẽxmaxũ, erũ ngẽmaãcũ nixĩ i namemaẽxũ i pexcẽx na choxũ peyaxõgũxũcẽx. ¡Rũ ngĩxã rũ ítayadaugũ! —ñanagũrũ. ¹⁶ Rũ yema nayexma ga totanũxũ ga Tumachi ga Wũxigu Buexũ ga Taxrexpũxũmaã, naxugũxũ. Rũ nũma ga Tumachi rũ ñanagũrũ toxũ: —¡Ngĩxã i yixema rũ ta ngẽma taxĩ na wũxigu Ngechuchumaã iyuxẽcẽx! —ñanagũrũ.

Ngechuchu nixĩ i wena namaxẽxẽxũ i yuexũ

¹⁷ Rũ yexguma Betãniãwa tomaã nanguxgu ga Ngechuchu, rũ marũ ãgũmũcũ ga ngunexũ nangupetũ ga na iyatẽxgũãxũ ga Dácharu. ¹⁸ Rũ guma Betãniã rũ Yerucharẽũrũ ngaicamana nayexma. Rũ tomaẽxpũx ga kilõmetru nixĩ ga norũ yaxũ. ¹⁹ Rũ muxũma ga Yudĩugũ rũ Dácharueyẽx ga Marta rũ Mariaxũtawa naxĩ na ngĩxũ yataãẽxẽẽgũxũcẽx, yerũ nayu ga ngĩeneẽ. ²⁰ Rũ yexguma Marta nũxũ cuẽxgu ga marũ na inanguxũ ga Ngechuchu, rũ nũxũ iyatũxãchi. Natũrũ ga María rũ Íxgutama irũxãũx. ²¹ Rũ Marta rũ ngĩgũrũgũ nũxũ ga Ngechuchu: —Pa Corix, yexguma chi cuma cunumẽxgu rũ tãũ chima nayu ga chaueneẽ. ²² —Natũrũ choma nũxũ chacuẽx na woo i ñuxma na nayuxũ, rũ Tupana tá cuxna nanaxã i guxũma i ðacũ i naxcẽx ícuçaxũ —ngĩgũrũgũ. ²³ Rũ Ngechuchu ngĩxũ

nangãxũ rü ñanagürü: —Cueneë rü wena tá namaxũ —ñanagürü. ²⁴ Rü Marta ngĩgürügü nüxũ: —Ngẽmáácü nüxũ chacuèx rü wena tá namaxũ i ngëxguma naguxgu i naâne rü ngëxguma wena namaxëgu i guxũma i yuexũ —ngĩgürügü. ²⁵ Rü yexguma ga Ngechuchu rü ñanagürü: —Choma nixĩ i íchanadagüxëëxũ i yuexũgü, rü wena chanamaxëxëëxũ. Rü yíxema choxũ yaxõxë rü woo tayuxgu rü tá wenaxãrũ tamaxũ. ²⁶ —Rü guxãma ya texé ya maxũxë rü choxũ yaxõxë, rü guxũgutáma tamaxũ. ¿Cuyaxõxũ yĩxũ i ngẽma? —ñanagürü ga Ngechuchu. ²⁷ Rü ngĩma rü ngĩgürügü nüxũ: —Ngũ, Pa Corix, choma rü chayaxõ na cuma rü Tupana Nane ya Cristu ga ítananguxëëcü na quiĩxũ —ngĩgürügü.

Dácharu itáxũwa naxaxu ga Ngechuchu

²⁸ Rü yema ñaxguwena rü Marta rü ngĩyëx ga Mariacè x iyaca. Rü bexma ngĩmaã nüxũ iyarüxu, rü ngĩgürügü: —Marü nuã nangu ya Ngüxëëruũ ya Ngechuchu, rü choxũ cuxcèx nayacaxëë —ngĩgürügü. ²⁹ Rü yexguma María nüxũ ñnügü ga marü yéma na nanguxũ ga Ngechuchu, rü paxa ichi, rü Ngechuchuxũ íiyadau. ³⁰ Rü Ngechuchu rü tauta íãnewa nangu ga yexguma, rü yema nachica ga Marta nüxũ ídauxũwatama nixĩ ga nayexmaxũ. ³¹ Rü Mariapatawa nayexma ga ñuxre ga yémacũãx ga Yudiügüarũ äëxgacügü ga ngĩxũ yéma taãëxëëgũxũ. Rü yexguma ngĩxũ nadaugügu ga paxa na inachixũ rü na ínaxũxũxũ, rü ngĩwe narũxĩ. Yerü nüma nüxũ nacuèxgügu rü yéma Dácharu itáxũwa ixũ na yéma yaxaxuxüçëx. ³² Rü yexguma Ngechuchuxũtawá nanguxgu ga María, rü napëxegu iyacaxãpũxũ, rü ngĩgürügü: —Pa Corix, yexguma chí cuma cunumëxgu rü tãũ chima nayu ga chaueneë ya Dácharu —ngĩgürügü. ³³ Rü yexguma Ngechuchu ngĩxũ dëuxgu ga na naxaxuxũ rü na naxauxexũ ga yema Yudiügüarũ äëxgacügü ga ngĩwe rüxĩxũ, rü poraãcü ngechaũ nüxũ nangux. ³⁴ Rü Ngechuchu nüxna naca rü ñanagürü: —¿Ngexta nixĩ i ipenatáxũ? —ñanagürü. Rü nümagü nanangãxũ rü ñanagürügü: —Pa Corix, ¡dücax, nuã naxũ, rü íyadau! —ñanagürügü. ³⁵ Rü naxaxu ga Ngechuchu. ³⁶ Rü yema Yudiügü rü ñanagürügü: —¡Düçëx ñuxãcü poraãcü Dácharuxũ nangechaũ! —ñanagürügü. ³⁷ Natürü ñuxre ga yema äëxgacügü ga Yudiügüarũ rü ñanagürügü: —Daa nixĩ ga guma yatü ga ngexetüçüxũ rümexëëcü. ¿Rü tüxçüũ taxucürüwa tacü rü mexũ Dácharuçëx naxü na tama nayuxüçëx? —ñanagürügü.

Wenaxãrũ namaxũ ga Dácharu

³⁸ Rü Ngechuchu poraãcü ngechaũ nüxũ nangux rü Dácharumaxüçëx nixũ. Rü wüxi ga mëxpúneãrũ äxmaxũ nixĩ ga yema naxmaxũ. Rü nayexma ga wüxi ga nuta ga norü ngüxtaũruũ. ³⁹ Rü Ngechuchu rü ñanagürü: —¡Ípenangũxgachix ya yima nuta ya namaã nangüxtaũcü! —ñanagürü. Natürü ga Marta ga Dácharuyëx rü ngĩgürügü: —Pa Corix, cuxá marü nayixane nixĩ, erü marü ägümüçü i ngunexũ naetü nixĩ ga na nayuxũ —ngĩgürügü. ⁴⁰ Natürü ga Ngechuchu rü ñanagürü ngĩxũ: ¿Taux ëxna i marü cumaã nüxũ chixuchirëxũ rü ngëxguma cuyaxõxgu rü tá nüxũ cudau i wüxi i mexũ i taxũ i Tupana üxũ? —ñanagürü. ⁴¹ Rü yexguma ínanangũxgachigü ga guma nuta. Rü Ngechuchu daxügu nadawenüãcüma ñanagürü: —Pa Chaunatü Pa Tupanax, moxë cuxna chaxã erü marü choxũ cuxĩnü. ⁴² —Choma nüxũ chacuèx rü guxũguma choxũ cuxĩnü. Natürü moxë cuxna chaxã i ñuxma erü chanaxwëxe i ñaã duũxgü na yaxõgüãxũ na cuma núma choxũ cumuxũ —ñanagürü. ⁴³ Rü

yexguma yema ñaxguwena, rü tagaãcü ñanagürü: —Pa Dácharux, jínaxũxũ i ngema! —ñanagürü. ⁴⁴ Rü ínaxũxũ ga Dácharu ga naxchápenüümaã guxũwama rübu xpũxũcü. Rü Ngechuchu ñanagürü nüxũ ga duũxũgü: — ¡Ípeyawëxpũxũ na Íyaxũxũcëx! —ñanagürü.

Ãëxgacügü naxcëx nadaugü na ñuxãcü Ngechuchuxũ yayauxgüxũ
(Mt 26.1-5; Mr 14.1-2; Lc 22.1-2)

⁴⁵ Rü yema Yudíugüarü ãëxgacügü ga Mariawe rüxĩxũ rü nüxũ nadaugü ga yema Ngechuchu üxũ, rü muxũma Ngechuchuxũ nayaxögü ga yexguma nüxũ nadaugüga ga ñuxãcü wena Dácharuxũ na namaxëëxũ. ⁴⁶ Natürü ñuxre ga yema ãëxgacügü rü Parichéugümaã nüxũ nayarüxugü ga yema Ngechuchu üxũ. ⁴⁷ Rü yexguma ga yema Parichéugü rü paigüarü ãëxgacügü rü nangutaquëxegü namaã ga guxũma ga yema ãëxgacügütücumüwa ügüxũ. Rü ñanagürügü: —¿Tacü tá taxüe? Erü ñaã yatü i Ngechuchu rü nanaxü i muxũma i mexũ i cuëxruügü. ⁴⁸ — Ngëxguma chi tama yayauxgügu, rü guxütáma i duũxũgü rü tá nüxũ nayaxögü, rü Dumacũãxgüarü churaragü rü nüma chi naxĩ rü nagu napogüe ya tóru tupauca ya taxüne, rü düxwa táü chima tóxrü nixĩ i ñaã tachiüãne —ñanagürügü. ⁴⁹ Natürü guma taunecügu rü yema paigütanüwa rü Caipá nixĩ ga norü ãëxgacü. Rü nüma rü ñanagürü nüxũ: —Pemagü rü taxüma pecuëx. ⁵⁰ —¿Éxna tama nüxũ pecuëx rü taxcëx rü na namemaëxũ na wüxitama i yatü guxũ i duũxũgücëx na yuxũ, na tama nayuexücëx i guxũma i tachiüãnecüãx i duũxũgü? — ñanagürü. ⁵¹ Natürü ga Caipá rü tama nüëchama yema ñanagürü, yerü guma taunecügu rü nüma nixĩ ga paigüarü ãëxgacü yĩxũ. Rü yemacëx rü Tupana nixĩ ga Caipáwa idexacü ga yexguma nüxũ yaxuxgu na Ngechuchu rü guxũma i Yudíugücëx tá na nayuxũ. ⁵² Rü yema orewa rü nanangoxëë na tama Yudíugücëxicatama tá na nayuxũ, natürü guxũma i Tupanaãrü duũxũgü i guxũ i naãnewa ngëxmagüxũcëx rü tá ta na nayuxũ, na ngëmaãcü wüxigu nangutaquëxexücëx i guxũma i ngëma duũxũgü i Tupanaãrü ixĩgüxũ. ⁵³ Rü yexgumaücüü nixĩ ga inaxügüeãxũ ga Yudíugüarü ãëxgacügü ga nagu na naxĩnüëxũ ga ñuxãcü tá na Ngechuchuxũ yamëxgüxũ. ⁵⁴ Rü yemacëx ga Ngechuchu rü marü tama yema Yudíugü imuxütanügu naxã. Rü tomaã ínaxũxũ ga Yudéaanewa, rü wüxi ga ñanexãcü ga Efraígu ãeganewa naxü. Rü yexma tomaã narüxãüx. Rü guma ñane rü wüxi ga nachica ga ngextá taxüema Íxãpataxũãrü ngaicamana nayexma. ⁵⁵ Rü marü ningaica ga yema Yudíugüarü peta ga Üpetüchiga. Rü yemacëx muxũma ga duũxũgü ga náí ga ñanecüãx rü Yerucharéüwa naxĩ na Tupanacëx nügü yamexëëgüxũcëx naxüpa ga yema peta. ⁵⁶ Rü Ngechuchucëx nadaugü ga duũxũgü. Rü tupauca ga taxünewa nügüna nicagüetanü, rü ñanagürügü: —¿Ñuxũ ñapegüxũ i pemax? ¿Ñoma i petawa tá naxũxũ rü ëxna tama? —ñanagürügü. ⁵⁷ Rü yema Parichéugü rü paigüarü ãëxgacügü rü duũxũgüna naxãgagü, rü ñanagürügü: —Ngëxguma ngextá nüxũ pedaugügu i ngëma Ngechuchu, ¡rü tomaã nüxũ peyarüxu na tayayauxgüxũcëx! —ñanagürügü.

12

Wüxi ga nge rü Ngechuchucutügu pumara iba
(Mt 26.6-13; Mr 14.3-9)

¹ Rŭ 6 ga ngunexŭ naxŭpa ga Ūpetŭchigaarŭ peta, rŭ Ngechuchu rŭ tomaã Betaniãwa naxŭ. Rŭ guma iãne nixi ga nagu naxãchixŭne ga Dãcharu ga Ngechuchu wena namaxẽecŭ. ² Rŭ yema Dãcharuchixŭwa Ngechuchucẽx nanaxŭgŭ ga taxŭ ga ðna. Rŭ totanŭwa ga yema mechawa yexmagŭxe rŭ Dãcharu nixi ga Ngechuchuxŭtawaama chibŭcŭ. Rŭ Marta iyixi ga inaxŭcŭ ga ðna. ³ Rŭ yexguma ga María rŭ yema inange ga wŭxi ga taxŭraweŭxŭ ga pumara ga yixichixŭ rŭ tatanŭxŭchixŭ. Rŭ Ngechuchuxŭ namaã iyixcutŭ. Rŭ ñuxŭchi ngiãyemaã ínapicutŭ. Rŭ guma i rŭ guxŭwama nayixmachĩã namaã ga yema pumara. ⁴⁻⁵ Rŭ yexguma ga Yuda ga Icariute ga wŭxi ga totanŭxŭchirẽx ixixŭ ga yixcama bexma cúacŭ Ngechuchuxŭ íxuaxŭxŭ, rŭ ñanagŭrŭ: —¿Tŭxcŭŭ tama tatanŭxŭgu namaã itaxe i ngẽma pumara na ngẽma dïerumaã nŭxŭ nangŭxẽẽxŭcẽx i ngẽma duŭxŭgŭ i ngearŭ dïeruãxgŭxŭ? —ñanagŭrŭ. ⁶ Natŭrŭ ga Yuda rŭ tama aixcŭma nagu narŭxĩnŭ ga yema ngearŭ dïeruãxgŭxŭ. Natŭrŭ yema ñanagŭrŭ yerŭ nŭma rŭ wŭxi ga ngitẽxãxŭ nixi. Rŭ naxmẽxwa nayexma ga yema choca ga dïeru ngixŭ nagu taxŭgŭxŭ ga guxãma ga toma ga Ngechucharŭ ngŭexŭgŭ. Rŭ Yuda rŭ ñuxguacŭ rŭ noxrŭxŭtama ngixne nangixŭxŭ. ⁷ Rŭ yexguma ga Ngechuchu rŭ ñanagŭrŭ nŭxŭ: —¡Tãxŭ i ngixŭ cuchixewexŭ! Erŭ choma rŭ paxa tá chayu rŭ tá ichatẽx. Rŭ ngẽmacẽx nixi i ngẽma pumaramaã choxŭ nachaxŭ. ⁸—Ngẽma ngearŭ dïeruãxgŭxŭ rŭ guxŭgutama petanŭwa nangẽxmagŭ. Natŭrŭ i choma rŭ tãutama guxŭgu petanŭwa changẽxma —ñanagŭrŭ.

Paigŭarŭ ãẽxgacŭgŭ rŭ nŭgŭmaã nanamexẽẽgŭ ga ñuxãcŭ Dãcharuxŭ tá na yamẽxgŭxŭ

⁹ Rŭ muxŭma ga Yudiŭgŭ rŭ nŭxŭ nacuãchiga ga Betaniãwa na nayexmaxŭ ga Ngechuchu. Rŭ yema naxi na nŭxŭ nadaugŭxŭcẽx. Rŭ tama Ngechuchuxŭxĩcatama nadaugŭchaŭ natŭrŭ nŭxŭ nadaugŭchaŭ ta ga Dãcharu ga Ngechuchu wena namaxẽecŭ. ¹⁰ Rŭ yexguma ga paigŭarŭ ãẽxgacŭgŭ rŭ nŭgŭmaã nanamexẽẽgŭ ga Dãcharuxŭ rŭ ta na yamẽxgŭxŭcẽx. ¹¹ Yerŭ Dãcharugagu nixi ga muxŭma ga Yudiŭgŭ ga Ngechuchuaxŭ yaxŭgŭãxŭ rŭ yema paigŭna naxigŭxŭ.

*Ngechuchu rŭ Yerucharẽũgu naxŭcu
(Mt 21.1-11; Mr 11.1-11; Lc 19.28-40)*

¹² Rŭ muxŭma ga duŭxŭgŭ rŭ Yerucharẽũwa naxi naxcẽx ga Ūpetŭchigaarŭ peta. Rŭ moxŭãcŭ duŭxŭgŭ nŭxŭ nacuãchigagŭ ga Ngechuchu rŭ guma iãnewa na nanguxchaŭxŭ. ¹³ Rŭ yexguma moruátŭta nadaŭgŭ rŭ yemamaã Ngechuchuxŭ nayatŭxgŭtanŭãchi. Rŭ tagaãcŭ ñanagŭrŭgŭ: —¡Rŭ naxŭũne rŭ namecŭmaxŭchi ya daa Tupanaẽgagu nŭma ũcŭ! ¡Rŭ yixema na Iraetanŭxŭ ixigŭxŭ rŭ namecŭmaxŭchi ya daa tŕrŭ ãẽxgacŭ! —ñanagŭrŭgŭ. ¹⁴ Rŭ Ngechuchu nŭxŭ inayangau ga wŭxi ga buru, rŭ naetŭgu naxaunagŭ ga yema Tupanaãrŭ ore ga ũmatŭxŭ nŭxŭ ixuxŭrŭŭ ga yexguma ñaxgu:

¹⁵ “¡Tãxŭ i pemuũẽxŭ, Pa Yerucharẽũcŭãxgŭxŭ! ¡Rŭ iperũdaunŭ na ngema ne naxŭxŭ ya perŭ ãẽxgacŭ ya wŭxi i buru i íraxŭetŭgu aunagŭcŭ!” ñaxŭ. ¹⁶ Rŭ noxri ga toma ga norŭ ngŭexŭgŭ rŭ tama nŭxŭ tacuẽxgŭẽga ga Ngechuchuchiga na yixŭ ga yema ore. Natŭrŭ yixcŭra marŭ Ngechuchu Tupanaxŭtawa ũxgu, rŭ yexguma nixi ga nŭxna tacuẽxãchiexŭ ga guxŭma ga yema Ngechuchuxŭ ngupetŭxŭ, rŭ yema Tupanaãrŭ ore nŭxŭ ixuxŭãcŭtama nŭxŭ na nangupetŭxŭ. ¹⁷ Rŭ yema duŭxŭgŭ

ga NgechuchuxŦtawa yexmagŦxŦ ga yexguma DácharuxŦ wena namaxêegu, rŦ nŦxŦ nixugŦe ga yema nŦxŦ nadaugŦxŦ. ¹⁸ RŦ yemacêx nixŦ ga duŦxŦgŦ ga NgechuchuxŦ yatŦxâchitanŦxŦ na nayauxgŦâxŦcêx, yerŦ nŦxŦ nacuâchigagŦ ga yema taxŦ ga mexŦ ga TupanaârŦ poramaâ naxŦxŦ. ¹⁹ NatŦrŦ ga yema ParichêgŦ rŦ nŦgŦumaâ ñanagŦrŦgŦ: —MarŦ nŦxŦ pedauxŦ i ñuxma na taxucŦrŦwama ñacŦ namaâ ixŦxŦ. ¡RŦ dŦcax, guxŦma i duŦxŦgŦ rŦ nawe narŦxŦ! —ñanagŦrŦgŦ.

GriêgŦgŦ rŦ NgechuchuxŦ nadaugŦchaŦ

²⁰ RŦ muxŦma ga duŦxŦgŦ rŦ petacêx YerucharêŦwa naxŦ na yêma TupanaxŦ na yanacuêxŦŦgŦxŦcêx. RŦ yema duŦxŦgŦtanŦwa nayexma ga ñuxre ga GriêgŦgŦ. ²¹ RŦ yema GriêgŦgŦ rŦ Piripicêx naxŦ. RŦ nŦma ga Piripi rŦ GarirêaaneârŦ ñâne ga BechaídacŦâx nixŦ. RŦ nŦxŦ nacêêxŦgŦ rŦ ñanagŦrŦgŦ: —Pa Corix, nŦxŦ tadauxchaŦ ya Ngechuchu —ñanagŦrŦgŦ. ²² RŦ Piripi rŦ AŦdrêmaâ nŦxŦ nayarŦxu. RŦ yema taxre rŦ wŦxigu NgechuchuxŦtawa naxŦ, rŦ namaâ nŦxŦ nayarŦxugŦ. ²³ RŦ yexguma ga Ngechuchu rŦ ñanagŦrŦ nŦxŦ: —RŦ marŦ nawa nangu tá na chayuxŦ rŦ wenaxârŦ ChaunatŦxŦtawa tá na chaxŦxŦ i choma i Tupana Nane i duŦxŦxŦ chiŦxŦ. ²⁴ —RŦ aixcŦma pemaâ nŦxŦ chixu rŦ ngêxguma chi wŦxipŦxŦ i trigu tama waixŦmŦânegu toxgu rŦ wŦxipŦxŦe chatama nixŦ. NatŦrŦ ega waixŦmŦgu natoxgu, rŦ ngêma naxŦxgu, rŦ muxŦchinema ínguxuchi. [RŦ ngêxgumarŦŦ tá ta TupanaxŦtawa nangugŦ i muxŦma i duŦxŦgŦ ega chayuxgux.] ²⁵ —RŦ pemaâ nŦxŦ chixu rŦ texê ya yíxema tŦmaârŦ maxŦxŦ ngechaŦxê i ñoma i naânewa rŦ tá itayarŦtaxu. NatŦrŦ texê ya yíxema tama tŦmaârŦ maxŦxŦ ngechaŦxê rŦ tama yuxŦ muŦxê i ñoma i naânewa, rŦ tá tŦxŦ nangêxma i maxŦ i taguma gŦxŦ. ²⁶ —RŦ ngêxguma texê choxŦ puracŦchaŦgu rŦ name nixŦ i chowe tarŦxŦ. RŦ ngêma choma tá íchangêxmaxŦwa rŦ ngêma rŦ tá ta tangêxma i tŦmax. RŦ ngêxguma texê choxŦ puracŦgu rŦ ChaunatŦ ya Tupana rŦ tá tŦmamaâ nataâê —ñanagŦrŦ.

Ngechuchu nanaxunagŦ ga norŦ yuxchiga

²⁷ —RŦ Ngechuchu ñanagŦrŦ: —RŦ ñuxma rŦ poraâcŦ changechaŦ rŦ chanaxŦxâchiâê. ¿RŦ ñacŦxŦ tá ChaunatŦumaâ chixuxŦ? TaxucŦrŦwama namaâ nŦxŦ chixu na choxŦ ínguxuchixêêxŦcêx na tama chayuxŦcêx, erŦ woetama ngêmacêx nŦma chaxŦ —ñanagŦrŦ. ²⁸ RŦ ñanagŦrŦ: —Pa ChaunatŦ, ¡ChoxŦ rŦngŦxêê na duŦxŦgŦpêxewa cuxŦ chataxêêxŦcêx! —ñanagŦrŦ. RŦ yexguma ga yema duŦxŦgŦ ga yêma yexmagŦxŦ rŦ nŦxŦ naxŦnŦê ga wŦxi ga naga ga daxŦwa inaxŦxŦ ga ñaxŦ: —MarŦ cuxŦ charŦngŦxêê na choxŦ cutaxêêxŦ ga noxrix, rŦ wena táxarŦ cuxŦ charŦngŦxêê na choxŦ cutaxêêxŦcêx —ñanagŦrŦ ga yema naga. ²⁹ RŦ yema duŦxŦgŦ ga yêma yexmagŦxŦ ga nŦxŦ inŦêxŦ ga yema naga, rŦ ñanagŦrŦgŦ: —WŦxi i duruanexŦ nixŦ —ñanagŦrŦgŦ. NatŦrŦ togŦ rŦ ñanagŦrŦgŦ: —WŦxi i TupanaârŦ orearŦ ngeruŦ i daxŦcŦâx nixŦ i namaâ idexaxŦ —ñanagŦrŦgŦ. ³⁰ RŦ yexguma ga Ngechuchu rŦ ñanagŦrŦ nŦxŦ: —Tama chauxcêx nixŦ i nŦxŦ pexŦnŦêxŦ i ngêma naga. RŦ pexcêxtama nixŦ i nŦxŦ pexŦnŦêxŦ. ³¹ —RŦ ñuxma tá nixŦ i Tupana inaxŦgŦâxŦ na tŦxŦ napoxcuxŦ ya duŦxê naxcêx i tŦmaârŦ pecadugŦ. RŦ ñuxma tá nixŦ i Tupana ínatêxŦchixŦ i ngêma ñoma i naânewa poraxŦ i Chataná. ³² —RŦ ngêxguma curuchawa chipotagu rŦ chaugŦxŦtawa tá chanagagŦ i guxŦma i duŦxŦgŦ —ñanagŦrŦ ga Ngechuchu. ³³ RŦ yema

orewa duũxũgũmaã nüxũ nixu ga ñuxãcü tá na nayuxũ. ³⁴ Rũ yema duũxũgũ nanagãxũgũ, rũ ñanagũrũgũ: —Torũ mugũ i ũmatũxũwa nüxũ tadaugũ na guxũgutãma namaxẽchaxũ ya Cristu. ¿Rũ ñuxãcü i cuma rũ ñacurũgũ: “Rũ Tupana Nane ya duũxũxũ ixĩcü rũ curuchawa tá nipota”, ñacurũgũ? ¿Rũ texé tixĩ ya yĩxema Tupana Nane ya duũxũxũ ixĩxẽ? — ñanagũrũgũ. ³⁵ Rũ yexguma ga Ngechuchu rũ ñanagũrũ nüxũ: —Ñoma rũ ta petanũwa changẽxma na ñoma i naãnewa pexũ changũexẽẽxũcèx rũ ngẽmaãcü pexũ changõonetanũxẽẽxũcèx. Natürũ paxaãchicèxicatama petanũwa changẽxma. Rũ name nixĩ i paxa choxũ peyaxõgũ ñoma rũ ta pexcèx chanangõonexẽẽ naxũpa na naxẽãnexũ. Erũ yĩxema ãñexũwa ngẽxmaxẽ rũ tama nüxũ tacuèx na ngextá taxũxũ. ³⁶ —Rũ ñoma rũ ta petanũwa changẽxma rũ name nixĩ i paxa choxũ peyaxõgũ na chorũ ngõonexũwa pengẽxmagũxũcèx —ñanagũrũ. Rũ yema ñaxguwena rũ natanũwa ínaxũxũ ga Ngechuchu. Rũ naxchaxwa inicux.

Tacúcèx nixĩ ga Yudũgũ ga tama Ngechuchuaxũ yaxõgũãxũ

³⁷ Rũ woo ga Ngechuchu rũ duũxũgũpẽxewa nanaxũ ga muxũma ga taxũ ga mexũ ga cuèxruũgũ ga Tupanaãrũ poramaã naxũxũ, natürũ yexguma rũ ta tama nüxũ nayaxõgũ ga duũxũgũ. ³⁸ Rũ yemaãcü Tupana nayanguxẽẽ ga yema ore ga Ichaxía ũmatũxũ ga ñaxũ:

“Pa Corix, taxũema tayaxõ ga yema ore ga tũxũ tangũexẽẽxũ. Rũ woo nüxũ tadaugũ na ñuxãcü naporaxũ ya Tupana, rũ tama tayaxõgũ”, ñaxũ. ³⁹⁻⁴⁰ Rũ yemaãcü ga yema duũxũgũ rũ tama nayaxõgũ yema Ichaxía ũmatũxũwa nüxũ yaxuxũrũũ, rũ:

“Yema duũxũgũ rũ tama nüxũ nadaugũchaũ rũ tama nayaxõgũchaũ rũ tama Tupanacèx nawoeguchaũ. Rũ yemacèx ga Tupana rũ nüxna nixũ na tama nüxũ nadaugũxũcèx rũ tama yaxõgũãxũcèx rũ tama naxcèx nawoeguxũcèx na nũma nüxna naxããxũcèx i maxũ i ngexwacaxũxũ”,

ñaxũ. ⁴¹ Rũ yema ñanagũrũ ga Ichaxía yerũ nangoxetũgu marũ nüxũ nadau na ñuxãcü ãẽxgacũ ya tacũxũchi na yĩxũ ya Ngechuchu ya Cristu. Rũ yemaãcü nachiga nidexa. ⁴² Natürũ muxũma ga yema Yudũgũarũ ãẽxgacũgũ rũ Ngechuchuaxũ nayaxõgũ, rũ woo ga ñuxre ga naèrugũ rũ ta nayaxõgũ, natürũ tama nũgũ nixugũchaũ ga duũxũgũpẽxewa, yerũ namuẽ na Parichègũ ngutaquẽxepataũwa ínawoxũxũ. ⁴³ Rũ yemaãcü tama nũgũ nixugũchaũ, yerũ norũ me nixĩ ga duũxũgũ namaã nataãgũxũ rũ tama aixcũma naxcèx nadaugũ na Tupana namaã taãẽxũ.

Texé ya tama Ngechuchuarũ oreaxũ yaxõxẽ rũ tá tapoxcu

⁴⁴ Rũ tagaãcü ñanagũrũ ga Ngechuchu: —Texé ya choxũ yaxõxẽ rũ tama choxũxĩcatama tayaxõ. Natürũ Chaunatũ ya núma choxũ mucũaxũ rũ ta tayaxõ. ⁴⁵ —Rũ texé ya choxũ dauxe, rũ Chaunatũ ya núma choxũ mucũxũ rũ ta tadau. ⁴⁶ —Choma na ngõonexẽẽruũ chĩxũ, rũ ñoma i naãnewa changu na guxãma ya texé ya choxũ yaxõxẽ rũ tama ãñexũwa na tangẽxmagũechaxũcèx. ⁴⁷ —Natürũ ngẽxguma texé nüxũ ñngu i chorũ ore rũ tama tayaxõxgu rũ tama choma nixĩ i tũxũ chapoxcuxũ. Erũ tama ñoma i naãnewa changu na chanapoxcuexũcèx i duũxũgũ, natürũ núma chaxũ na chanamaxẽẽxũcèx. ⁴⁸ —Yĩxema texé ya tama choxũ yaxõxẽ rũ tama chauga ñnũxẽ rũ marũ tũxũ nangẽxma na tacúcèx tá Tupana tũxũ poxcuxũ. Erũ ngẽma ore i nüxũ chixuxũgagu tá tama nixĩ ya Tupana i tũxũ napoxcuxũ i naãñarũ guxgu, erũ tama tayaxõ i ngẽma ore i nüxũ

chixuxŭ. ⁴⁹—Tama chaugagutama chidexa, natŭrŭ guma Chaunatŭ ga nŭma choxŭ mucŭ, rŭ guma nixŭ ga chomaã nŭxŭ ixucŭ na ŭacŭxŭ tá duŭxŭgŭmaã chixuxŭ rŭ ñuxãcŭ tá chanangŭexẽẽxŭ. ⁵⁰—Rŭ nŭxŭ chacux̃ na Chaunatŭarŭ orewa nangẽxmaxŭ i maxŭ i taguma gŭxŭ. Rŭ ngẽmacèx i ngẽma ore i nŭxŭ chixuxŭ, rŭ ngẽmatama ore nixŭ i Chaunatŭ choxŭ muxŭ na nŭxŭ chixuxŭ —ñanagŭrŭ ga Ngechuchu.

13

Ngechuchu rŭ norŭ ngŭexŭgŭxŭ niyauxgŭcutŭ

¹ Rŭ wŭxi ga ngunexŭ nataxu ga nawa na nanguxŭ ga yema Yudŭgŭarŭ peta ga Ũpetŭchiga. Rŭ Ngechuchu nŭxŭ nacuèx ga marŭ nawa na nanguxŭ ga ñoma ga naãnewa na yaxŭxŭ rŭ wenaxãrŭ Nanatŭxŭtawana naxŭxŭ. Rŭ nŭma rŭ yexguma ñoma ga naãnewa nayexmagu rŭ guxŭguma tŭxŭ nangechaŭ ga guxema noxrŭ ixŭgŭxe. Rŭ yexgumarŭŭ ta ga yexguma toxna yaxŭxchaŭgu ga daxŭguxŭ ga naãnewa na naxŭxŭ, rŭ yemaãcŭ poraãcŭ toxŭ nangechaŭ. ²⁻⁴ Natŭrŭ ga Chataná rŭ marŭ Yuda ga Chimãu ga Icarŭte nanena nangu na bexma cŭãcŭ Ngechuchuxŭ inaxuaxŭxcèx. Rŭ Ngechuchu rŭ marŭ nŭxŭ nacuèx ga Nanatŭxŭtawana ne naxŭxŭ rŭ wena táxarŭ Nanatŭcèx na nataeguxŭ. Rŭ nŭxŭ nacuèx ga Nanatŭ rŭ naxmẽxgu na naxŭãxŭ ga guxŭma ga pora. Rŭ yemacèx ga yema chŭtaxŭgu ga yexguma mechawa ítachibŭeyane, rŭ inachi ga Ngechuchu. Rŭ inacŭxuchi ga norŭ gáuxŭchiru, rŭ wŭxi ga tuayamaã nŭgŭ nigoye. ⁵ Rŭ ñuxŭchi yauxmẽxŭpáxŭgu dexáta naba, rŭ toxŭ niyauxgŭcutŭ. Rŭ guma tuaya ga namaã yagoyecŭmaã toxŭ inapigŭcutŭ. ⁶ Rŭ yexguma Chimãu ga Pedruxŭ nayauxcutŭchaŭgu rŭ ñanagŭrŭ ga Pedru: —Pa Corix, ¿ñuxãcŭ tá i cuma i choxŭ cuyauxcutŭxŭ? —ñanagŭrŭ. ⁷ Rŭ Ngechuchu nanangãxŭ rŭ ñanagŭrŭ: —Ñuxma rŭ tama nŭxŭ cucuèx i tŭxcŭtŭ na chanaxŭxŭ i ñaã, natŭrŭ yixcama rŭ tá nŭxŭ cucuèx —ñanagŭrŭ. ⁸ Natŭrŭ ga Pedru rŭ ñanagŭrŭ: —Choma rŭ tãtŭtama chanaxwèxe na choxŭ cuyauxcutŭxŭ —ñanagŭrŭ. Rŭ Ngechuchu nanangãxŭ rŭ ñanagŭrŭ nŭxŭ: —Ngẽxguma tama cuxŭ chayauxcutŭgu, rŭ tãtŭtama choxrŭ quixŭ —ñanagŭrŭ. ⁹ Rŭ yexguma ga Chimãu ga Pedru rŭ ñanagŭrŭ nŭxŭ: —Pa Corix, ¿Tama choxŭ cuyauxcutŭxicatama! Natŭrŭ chanaxwèxe i choxŭ cuyauxmẽx rŭ choxŭ cuyaxeru ta —ñanagŭrŭ. ¹⁰ Natŭrŭ Ngechuchu nanangãxŭ rŭ ñanagŭrŭ nŭxŭ: —Texé ya ngexwacèx aiyaxe rŭ tanaxwèxe i tŭmacutŭxicatama tayaxu, erŭ guxŭwama tangemata. Rŭ pema rŭ marŭ pingematagŭ, natŭrŭ tama guxãma aixcŭma tingemata —ñanagŭrŭ. ¹¹ Rŭ Ngechuchu nŭxŭ nacuèx na texé tá bexma cŭãcŭ inaxuaxŭxŭ, rŭ yemacèx ñanagŭrŭ nŭxŭ: —Natŭrŭ tama guxãma aixcŭma tingemata —ñaxŭ. ¹² Rŭ yexguma toxŭ yayauxgŭcutŭguwena, rŭ Ngechuchu wena nicŭxcuchi ga norŭ gáuxŭchiru. Rŭ wenaxãrŭ mechawa narŭto. Rŭ ñanagŭrŭ toxŭ: —¿Nŭxŭ pecuáxŭ yŭxŭ i ngẽma chaxŭxŭ? ¹³ —Pema rŭ: “Pa Ngŭexẽẽruŭ” rŭ “Pa Corix”, ñaperŭgŭ choxŭ. Rŭ marŭ name i ngẽma ñaperŭgŭ, erŭ aixcŭmaxŭchi ngẽma chixŭ. ¹⁴—Rŭ ñuxma i choma na ngŭexẽẽruŭ chixŭxŭ rŭ pemaã na ichacuáxŭ, rŭ pexŭ chiyauxgŭcutŭ. Rŭ ngexgumarŭxŭ ta i pema rŭ name i wŭxichigŭ i pemŭcŭxŭ piyauxgŭcutŭ. ¹⁵—Choma rŭ pexŭ nŭxŭ chadauxẽẽ na ñuxãcŭ tá penaxŭxŭ na pema rŭ ngema pemaã chaxŭxŭãcŭ penaxŭxcèx. ¹⁶—Rŭ aixcŭma pemaã nŭxŭ chixu

rü taxuŭma i wüxi i coriarü duŭxü rü norü coriétüwa nügü nangexmaxeê. Rü taxuxüma i ãëxgacüarü orearü ngeruxü i norü ãëxgacü i namuxüétüwa nügü nangexmaxeê. ¹⁷—Rü ngëxguma nüxü pecuëxgu i chorü ore rü penaxüxgu i ngëma pemaã nüxü chixuxü, rü aixcüma tá petaãëgü. ¹⁸—Rü tama guxãma i pechiga nixi i chidexaxü. Erü choma rü tüxü chacuèx rü texëgü tixi ya yixema tüxü chidexechixe. Natürü Tupana nayanguxëëchaŭ i norü ore i ümatüxü i ñaxü:

“Texé ya chomaã chibüxe rü chomaã tarüxuwanu”,
ñaxü. Rü ngëmaãcü tá nangupetü na yanguxücèx i ngema Tupanaarü ore. ¹⁹—Natürü naxüpa na nangupetüxü i ngëma, rü pemaã nüxü chixu na choxü peyaxögüxücèx i ngëxguma nangupetüxgu. ²⁰—Aixcüma pemaã nüxü chixu rü texé ya tüxü yaxüxe ya yixema choma ngema tüxü chamuxë, rü choxü nixi i tayaxuxü. Rü texé ya choxü yaxüxe, rü Chaunatü ga núma choxü mucüxü nixi i tayaxuxü —ñanagürü ga Ngechuchu.

Ngechuchu nüxü nixu ga Yuda rü tá bexma cúãcü na ítaxuaxüãxü
(Mt 26.20-25; Mr 14.17-21; Lc 22.21-23)

²¹ Rü yexguma yema ñaxguwena ga Ngechuchu rü poraãcü ngechaŭ nüxü nangux, rü meãma tomaã nanangoxëê, rü ñanagürü toxü: —Aixcüma pemaã nüxü chixu rü wüxie i petanüwa tá nixi i bexma cúãcü choxü ítaxuaxüxü —ñanagürü. ²² Rü yexguma ga toma ga norü ngüexügü rü wüxichigü togü tadawenü, rü tama nüxü tacuëxgü ga texéchiga na yema ñaxü. ²³ Rü choma ga norü ngüexü ga poraãcü choxü nangechaüxë rü nacüwawa charüto ga Ngechuchu ga mechawa. ²⁴ Rü Chimáü ga Pedru rü bexma choxü naxuneta ga na Ngechuchuna chaçaxücèx ga texéchiga na yixü ga yema. ²⁵ Rü yexguma ga choma rü yexeraãcü Ngechuchuna chimaxcuchi rü nüxna chaca, rü ñacharügü: —Pa Corix, çtexé tá tixi ya yixema? —ñacharügü. ²⁶ Rü Ngechuchu choxü nangãxü, rü ñanagürü: —Wüxi i pãüãrü bücuxü tá íchacúe, rü yixema tüxna chanaxãxë, rü yixema tixi —ñanagürü. Rü yexguma ínanacúe ga wüxi ga pãüãrü bücuxü rü Yuda ga Icariúte ga Chimáü nanena nanaxã. ²⁷ Rü yexgumatama Yuda nayauxgu ga yema pãüãrü bücuxü rü ngoxo ga Chataná rü Yudagu naxücu. Rü yexguma ga Ngechuchu rü ñanagürü nüxü: —Rü ngëma cuxüxchaüxü, ¡rü paxa naxü! —ñanagürü. ²⁸ Natürü taxüema ga toma ga mechawa chibüxe nüxü tacuëxgü ga çacüchiga na yixü ga yema ñaxü ga Ngechuchu. ²⁹ Rü nüma ga Yuda rü diëruchiüãrü dauruü nixi. Rü yemacèx ñuxre ga toma nüxü tacuëxgüga rü Ngechuchu taxewa nanamu, na çacüçèx yataxexücèx naxcèx ga peta, rü éxna duŭxügü ga ngearü diëruãxüna ngixü na naxãxücèx ga diëru. ³⁰ Rü yexguma Yuda nayauxgu ga yema pãü, rü ínaxüxü ga yema ucapuwa. Rü marü nachüta ga yexgumax.

Ngechuchu norü ngüexügümaã nüxü nixu ga yexwacaxüxü ga norü mu

³¹ Rü yexguma Yuda íxüxguwena, rü Ngechuchu rü ñanagürü: —Rü ñuxma rü tá aixcüma nangox na ñuxãcü naporaxü ya Tupana Nane ya duŭxüxü ixicü. Rü yimawa tá nixi i nangoxëëãxü ya Tupana i norü pora. ³² —Rü ngëxguma yima Tupana Nane nangoxëëxgu i Tupanaãrü pora, rü ngëxgumarüü tá ta ya Tupana rü nanangoxëê i Naneãrü pora. Rü paxa tá nixi i ngëma. ³³ —Pa Chauxacüãxgüx, täütama muxü i ngunexü petanüwa changëxma. Rü pema rü tá chauçcèx pedaugü, natürü ngëma

choma íchaxũtwa rü taxucürüwama ngema pexĩ. Rũ ñaåtama ore nixĩ ga marü Yudíugüarü âëxgacügümaã nüxũ chixuxũ, rü ñuxma rü pemaã rü ta nüxũ chixuxũ. ³⁴—Rũ pemaã nüxũ chixu i wüxi i ngexwacaxũtũ i mu. Rũ ngema pexũ chamuxũ nixĩ i pemücügũtũ na pengechaũtũ i wüxichigü. Rũ ngema na choma pexũ changechaũtũrũ, rü chanaxwèxe i wüxichigü i pema rü pemücügũtũ pengechaũgü. ³⁵—Rũ ngëxguma wüxichigü pemücügũtũ pengechaũgu, rü guxũma i duũxũgü tá nüxũ nicuèxächitanü na chorü ngúexũgü pixĩgũtũ —ñanagürü.

Ngechuchu nüxũ nixu rü Pedru rü tãxũtãma nügü nixu na norü ngúexũ yixĩtũ

(Mt 26.31-35; Mr 14.27-31; Lc 22.31-34)

³⁶ Rũ Chimáũ ga Pedru rü Ngechuchuna naca, rü ñanagürü: —Pa Corix ¿ngextá tá cuxũ? —ñanagürü. Rũ Ngechuchu nanangãxũ, rü ñanagürü: —Ngema íchaxũtwa rü taxucürüwa chowe curũxũ i ñuxmax. Natürü yixcama rü ngëmaãcũ tá chowe curũxũ —ñanagürü. ³⁷ Rũ yexguma ga Pedru rü ñanagürü: —Pa Corix, ¿tüxcüũ taxucürüwa cuwe charũxũ i ñuxmax? Erü marü íchamemare na cuxcèx na chayuxũ —ñanagürü. ³⁸ Rũ Ngechuchu nanangãxũ, rü ñanagürü: —¿Aixcũma yĩxũ i marü ícümemarexũ na chauxcèx cuyuxũ? Aixcũma cumaã nüxũ chixu rü tãütãtama yacaxgu ya otá, rü tomaëpũxcũna tá nüxũ quixu na tama choxtũ cucuáxũ —ñanagürü ga Ngechuchu.

14

Ngechuchu rü nama i Nanatũxũtawa nadaxũ nixĩ

¹ —¡Tãxũ i penaxĩxãchiãëgũtũ i pemax! ¡Tupanaãxũ peyaxõgü rü choxtũ rü ta peyaxõgü! ²—Chaunatũxũtawa nangëxma i muxũchixũma i nachicagü. Ngëxguma chi natauxguma, rü tãũ chima pemaã nüxũ chixu na pexcèx chayamexëèxũcèx i pechicagü. ³—Rũ ngëxguma marü ngema chaxũxgu rü wüxi i pechica chamexëèxgu, rü wena táxarü núma chaxũ. Rũ pexũ tá chayagagü na ngëma nachica i chomatãtama nawa changëxmaxũtwa na pengëxmagũxũcèx i pemax. ⁴—Rũ pema rü nüxũ pecuèx na ngextá tá na chaxũxũ, rü marü nüxũ pecuèx i nama i ngema nadaxũ —ñanagürü ga Ngechuchu. ⁵ Rũ Tumachi rü ñanagürü: —Pa Corix, tama nüxũ tacuèx na ngextá na cuxũxũ. ¿Rü ñuxãcũ tá i nüxũ tacuáxũ i ngëma nama? —ñanagürü. ⁶ Rũ Ngechuchu nanangãxũ, rü ñanagürü: —Choma nixĩ i ngëma nama i Chaunatũxũtawa nadaxũ chiĩxũ. Rũ aixcũma nixĩ i ngëma ore i nüxũ chixuxũ. Rũ choma nixĩ i duũxũgũtũ chamaxëèxũ. Rũ chaugaguxicatama nixĩ i Chaunatũxũtawa nangugũtũ i duũxũgü. ⁷—Rũ ngëxguma chi pema rü aixcũma meã choxtũ pecuèxgügu, rü Chaunatũxũ rü chi ta pecuèxgü. Rũ ñuxmaũcũ nixĩ i Chaunatũxũ pecuáxũ, erü marü nüxũ pedaugüecha —ñanagürü. ⁸ Rũ yexguma ga Piripi rü ñanagürü: —Pa Corix, ¡Toxtũ nüxũ nadauxëè ya Cunatü! Rũ ngëxĩcatama i tanaxwèxegũtũ —ñanagürü. ⁹ Rũ Ngechuchu nanangãxũ, rü ñanagürü: —Pa Piripix, ¿ñuxre ya taunecü marü petanüwa changëxma rü ñuxma rü ta tama choxtũ cucuèxégaxũ? Yíxema choxtũ dauxe rü Chaunatũxũ rü ta tadau. ¿Rü tüxcüũ i ngëxguma rü ta cunaxwèxexũ i pexũ nüxũ na chadauxëèxũ ya Chaunatü? ¹⁰—¿Tama èxna cuyaxõ na choma rü Chaunatũmaã rü wüxitama tixĩgũtũ? Rũ guxũma i ore i pemaã nüxũ chixuxũ rü tama chauechama nüxũ chixu. Erü

yima Chaunatu ya wūxiwa chomaã ngëxmacü, rü yima nixi ya naxücü i guxüma i noxrütama puracü. ¹¹—Chanaxwëxe i choxü peyaxögü na choma rü Chaunatümaã wūxitama tixigüxü. Natürü woo tama ngëma pixögügu rü chanaxwëxe na choxü peyaxögüxü naxcëx i ngëma mexügü i taxü i Tupanaärü poramaã chaxüxü. ¹²—Aixcüma pemaã nüxü chixu rü yixema choxü yaxöxë rü tá tanaxü i guxüma i choma chaxüxü. Rü ngëma chaxüxüärü yexera tá taxü, erü choma rü tá Chaunatüxütawa chaxü. ¹³—Rü guxüma i tacü i chauégagu Tupanaxütawa naxcëx ipeçaxü rü tá pexna chanaxã. Rü ngëmaãcü tá chanaxü na chaugagu nangóxcëx i Chaunatüarü pora. ¹⁴—Rü choma tá chanaxü i guxüma i tacü i chauégagu choxna naxcëx peçaxü.

Ngechuchu rü norü ngüexügümaã inaxuneta na naxcëx tá núma namuãxü i Naãe i Üünexü

¹⁵—Rü ngëxguma aixcüma choxü pengechaügu, rü naga tá pexinüë i chorü mugü. ¹⁶—Rü choma tá Chaunatüna naxcëx chaca na núma pexcëx namuãxüçëx i to i perü ngüxëëruü i Naãe i Üünexü, na guxügutáma petanüwa nangëxmaxüçëx. Rü núma tá nixi i pexcëx nangoxëëãxü i ore i aixcüma ixixü. ¹⁷—Rü ñoma i naãnecüãx i duüxügü rü taxucürüwama nanayauxgü, erü tama nüxü nadaugü rü tama nüxü nacüexgü. Natürü i pema rü marü nüxü pecuëx, erü núma rü petanüwa nangëxma. Rü guxügutáma pemaã inarüxãüx. ¹⁸—Rü täütáma núma pexü chawogümare i chomax, erü wena táxaru pexcëx chataegu, na petanüwa changëxmaxüçëx. ¹⁹—Rü paxa tá nixi na täütáma choxü nadaugüxü i ñoma i naãnecüãx i duüxügü. Natürü i pema rü tá choxü pedaugü. Rü tá pemaxë, erü choma rü chamaxü. ²⁰—Rü ngëxguma yuwa ícharüdaxgu rü wena chamaüxgu, rü ngëxguma tá nüxü picüexãchitanü na choma rü Chaunatüwa chamaüxü rü pema i chowa rü choma i pewa. ²¹—Yixema texé ya nüxü tuáxe rü naga ñnuxë i chorü mugü, rü tanangoxëë na aixcüma choxü tangechaüxü. Rü Chaunatü tá tüxü nangechaü. Rü tüxü tá chaugü chawëx —ñanagürü ga Ngechuchu. ²² Rü nayexma ga to ga Ngechuchuarü ngüexü ga Yudagu ägaxü ta. Rü yema rü ñanagürü: —Pa Corix, ¿tüxcüü toxü cugü cuwëx, rü tama ñoma i naãnecüãx i duüxügüxü cugü cuwëx? —ñanagürü. ²³ Rü Ngechuchu nanangãxü, rü ñanagürü: —Yixema choxü ngechaüxë rü naga taxinü i ngëma ore i tümamaã nüxü chixuxü. Rü Chaunatü tá tüxü nangechaü. Rü choma rü Chaunatümaã wūxigu tümaxütawa tá tangëxmagü. ²⁴—Yixema tama choxü ngechaüxë rü tama naga taxinü i ngëma chorü ore. Rü ngëma ore i chauxütawa nüxü pexinüëxü rü tama chorü ore nixi, natürü guma Chaunatü ga núma choxü mucüarü ore nixi. ²⁵—Ñoma rü ta petanüwa changëxma rü pemaã nüxü chixu i guxüma i ngëma ore i pexcëx choxü ngëxmaxü. ²⁶—Natürü Chaunatü rü tá chauégagu núma nanamu i Naãe i Üünexü na pexü nangüxëëxüçëx. Rü núma i Naãe i Üünexü tá pexü nangüxëë i guxüma, rü tá nüxna pexü nacüexãchixëë i guxüma i ore ga pemaã nüxü chixuxü. ²⁷—Rü ñuxma na pexna íchixüxü, rü pexna chanaxã i taãe. Natürü ngëma taãe i pexna chaxãxü, rü tama ñoma i naãnecüãx pexna äxü i taãerüü nixi. Rü tama chanaxwëxe i penaxixächiaëgü rü pemuüë. ²⁸—Marü pemaã nüxü chixu na pexna tá íchixüxü rü wena táxaru pexcëx chataeguxü na pemaã changëxmaxüçëx. Rü choxü pexinüë ga yexguma

yema ñachaxgu. Rũ ngẽxguma aixcũma choxũ pengechaũgu rũ tá petaãẽgũ ega nõxũ pecuèxgu na Chaunatũcèx chataeguxũ, erũ Chaunatũ rũ chorũ yexera nixĩ. ²⁹—Rũ naxũpa na nangupetũxũ i ngẽma, rũ pemaã nõxũ chixu na choxũ peyaxõgũxũcèx i ngẽxguma nangupetũgu. ³⁰—Marũ tãútama poraãcũ pemaã chidexa, erũ marũ ñangu i Chataná i ñoma i naãneãrũ ãẽxgacũ ixĩxũ. Natürũ nõma rũ taxuwama choxũ narũyexera. ³¹—Natürũ ngẽma tá choxũ ngupetũxũ, rũ ngẽmaãcũ tá nixĩ na guxũma i ñoma i naãnecũãx i duũxũgũ nõxũ nacuãxũcèx na choma rũ Chaunatũxũ na changechaũxũ, rũ chanaxũxũ i ngẽma nõma choxũ namuxũ. ¡Rũ ipechigũ, rũ ngĩxã ítixĩ! —ñanagürũ ga Ngechuchu.

15

Ubanegu nõgũ nangu ga Ngechuchu

¹ Rũ ñanagürũ ga Ngechuchu: —Choma nixĩ i ñoma wũxi i ubanerũ chĩxũ rũ Chaunatũ nixĩ ya norũ yora ixĩcũ i ngẽma uba. ²—Rũ chorũ duũxũgũ rũ ngẽma ubachacũgürũ nixĩgũ. Rũ ngẽma ubachacũ i tama oxũ, rũ norũ yora rũ nayadae. Natürũ ngẽma nachacũ i oxũ, rũ meã nanamexẽẽtanũ na yexeraãcũ poraãcũ naxoxũcèx. ³—Pema rũ marũ pime, yerũ naga pexĩnũẽ ga yema ore ga pexũ changũexẽẽxũ. ⁴—Rũ name nixĩ i guxũguma chowa peyaxũxgũ, ngẽma na choma rũ pewa chayaxũxürũ. Erũ wũxi i ubachacũ rũ tama nõxĩca naxo, ega tama nanewa yaxũxgux. Rũ ngẽxgumarũ ta i pema rũ taxuacũma chauxcèx pemaxẽ, ega tama chowa peyaxũxgũechagu. ⁵—Choma nixĩ i ubane, rũ pema i nachacũgũ. Rũ yĩxema chowa yaxũẽchaxe rũ choma i tũmawa, rũ aixcũma tá chauxcèx tamaxũ. Rũ ngẽmaãcũ wũxi i ubachacũ i oxürũ tá tixĩ. Natürũ ngẽxguma tama chowa peyaxũxgũechagu, rũ taxucürwama tacũ pexũe. ⁶—Rũ texé ya tama chowa yaxũẽchaxe rũ tá ítatèxũchi. Rũ wũxi i ubachacũ i daexũ rũ ipaxũ rũ iguxürũ tá tixĩ, rũ ngẽxma tá tayarũxo. ⁷—Rũ ngẽxguma chowa peyaxũxgũechagu rũ taguma nõxũ ipeyarũngũmaẽgu i ngẽma ore i pexũ changũexẽẽxũ, rũ marũ name i naxcèx ípeca i tacũ i penaxwèxexũ, rũ choma rũ tá pexna chanaxã. ⁸—Rũ ngẽxguma aixcũma meã chauxcèx pemaxẽgu, rũ Chaunatũxũ tá nicuèxũgũ i duũxũgũ. Rũ ngẽmaãcũ aixcũma chorũ ngũexũgũ tá pixĩgũ. ⁹—Choma rũ pexũ changechaũ ngẽma na Chaunatũ choxũ ngechaũxürũ. Rũ chanaxwèxe i aixcũma meã chauga pexĩnũẽẽcha, erũ choma rũ guxũguma pexũ changechaũ. ¹⁰—Choma rũ naga chaxĩnũ i Chaunatũarũ mugũ rũ nõma rũ guxũguma choxũ nangechaũ. Rũ ngẽxgumarũ tá ta nixĩ ega naga pexĩnũẽgu i chorũ mugũ, rũ guxũgutãma pexũ changechaũẽcha. ¹¹—Choma rũ ngẽmaãcũ pemaã nõxũ chixu na wũxigu chomaã petaãẽgũxũcèx. Rũ ngẽmaãcũ tá aixcũma petaãẽgũ. ¹²—Rũ choma pexũ chamu na pemücũgũxũ pengechaũgũxũcèx, ngẽma choma na pexũ changechaũxürũ. ¹³—Rũ ngẽxguma wũxie aixcũma tũmamücũxũ ngechaũgu, rũ nõxũ tangechaũãma rũ nõetama ega woo tũmamücũcèx tayuxgu. Rũ nataxuma i to i ngechaũ i ngẽmaãrũ yexera. ¹⁴—Pema rũ chomücũgũ pixĩgũ i ngẽxguma chauga pexĩnũẽgu. ¹⁵—Choma rũ marũ tama chorũ duũxũgũmareãcũ pexũ chaxu. Erũ wũxi i coriarũ duũxũmare rũ tama nõxũ nacuèx i ngẽma norũ cori ùxũ. Natürũ ñuxma rũ chomücũgũmaã pexũ chaxu, erũ pexũ nõxũ chacuèẽẽ i guxũma i ore ga Chaunatũ chomaã nõxũ ixuxũ. ¹⁶—Pema rũ tama pexira chauxcèx pedaugũ, natürũ chaxira nixĩ ga pexcèx chadauxũ rũ

pexŭ chamuxŭ na aixcŭma chauxcèx pemaxèxŭcèx rŭ chauxŭtawa pena-gagŭxŭcèx i muxŭma i duŭxŭgŭ na guxŭguma choxŭ yaxŭgŭxŭcèx. Rŭ Chaunatŭ ya Tupana tá pexna nanaxâ i guxŭma i ŭacŭ i chauégagu nŭxna naxcèx pecaxŭ. ¹⁷—Rŭ ngêma nixŭ i pexŭ chamuxŭ na pemŭcŭgŭxŭ nangechaŭgŭxŭcèx.

Ñoma i naãnecŭãx i duŭxŭgŭ rŭ Ngechuchuchi rŭ norŭ ngŭexŭgŭchi naxaie

¹⁸—Ngêxguma ñoma i naãnecŭãx i duŭxŭgŭ pexchi aiegu, rŭ jnŭxna pecuèxâchie ga chaxira chauxchi na naxaieŭ! ¹⁹—Rŭ ngêxguma chi ñoma i naãnecŭãx i duŭxŭgŭrŭ pixŭgŭgu, rŭ ñoma i naãnecŭãx i duŭxŭgŭ rŭ chi pexŭ nangechaŭgŭ ngêma natanŭxŭgŭxŭ na nangechaŭgŭxŭrŭ. Natŭrŭ choma nixŭ ga pexcèx chadauxŭ natanŭwa ga ñoma ga naãnecŭãx ga duŭxŭgŭ. Rŭ ngêmacèx nixŭ i pexchi naxaieŭ, erŭ marŭ tama naxrŭŭ pixŭgŭ. ²⁰—jNŭxna pecuèxâchie ga pemaã ñachagu:

“Taxuxŭma i wŭxi i coriarŭ duŭxŭ rŭ norŭ coriétŭwa nŭgŭ nangex-maxèè”, ñachagu! Rŭ yema na chauxchi na naxaieŭ, rŭ pexchi rŭ tá ta naxaie. Rŭ yexguma chi chauga naxŭnŭègu rŭ ñuxma rŭ chi ta pega naxŭnŭè. ²¹—Rŭ ngêmaãcŭ ta chaugagu pexchi naxaie i ñoma i naãnecŭãx i duŭxŭgŭ erŭ tama nŭxŭ nacuèxgŭ ya Chaunatŭ ga núma choxŭ mucŭ. ²²—Rŭ ngêxguma chi choma tama namaã chanangoxèègu na ñuxâcŭ chixri na namaxèxŭ, rŭ tãu chima nŭxŭ nacuèxgŭ ga pecadu na naxŭgŭxŭ. Natŭrŭ ñuxma namaã nŭxŭ na chixuxŭ na ñuxâcŭ chixri namaxèxŭ, rŭ ngêmacèx i ñuxma rŭ taxuacŭma nŭxŭ nixugŭ na yangearŭ pecaduãxŭ. ²³—Rŭ guxŭma i duŭxŭgŭ i chauxchi aiexŭ rŭ Chaunatŭchi rŭ ta naxaie. ²⁴—Rŭ ngêma duŭxŭgŭpèxewa rŭ Tupanaãrŭ poramaã chanaxŭ i mexŭgŭ i taxŭ i taguma texé ya togue ŭxŭ. Rŭ ngêxguma chi tama napèxewa chanaxŭxgu i ngêma mexŭgŭ rŭ tãu chima Tupana namaã nanaxuegu na nagagutama yapedaduãxgŭxŭ. Natŭrŭ na woo marŭ nŭxŭ nadaugŭxŭ i ngêma mexŭgŭ i taxŭ i Tupanaãrŭ poramaã chaxŭxŭ, rŭ ngêxguma rŭ ta chauxchi naxaieama rŭ Chaunatŭchi rŭ ta naxaie. ²⁵—Natŭrŭ ngêmaãcŭ nangupetŭ erŭ Tupana nayanguxèèchaŭ i norŭ ore i ŭmatŭxŭ i ñaxŭ:

“Chauxchi naxaie woo taxuŭma i chixexŭ chaxŭxgu”, ñaxŭ. ²⁶—Natŭrŭ choma rŭ tá Chaunatŭégagu pexcèx núma chanamu i perŭ ngŭxèèruŭ i Tupanaãè i Ũnexŭ i tá pexŭ nŭxŭ cuèxèèxŭ i ore i aixcŭma ixŭxŭ. Rŭ núma tá nixŭ i meãma pemaã nŭxŭ yaxuxŭ i chauchiga. ²⁷—Rŭ pema rŭ tá ta chauchigaxŭ pixugŭe, yerŭ noxri ichanaxŭgŭgu ga duŭxŭgŭmaã nŭxŭ na chixuxŭ ga chorŭ ore, rŭ woetama marŭ chauxŭtawa peyexmagŭ —ñanagŭrŭ ga Ngechuchu.

16

¹ Rŭ Ngechuchu rŭ ñanagŭrŭ nŭxŭ: —Rŭ pemaã nŭxŭ chixu i ñaã ore na tama nŭxŭ na perŭxoexŭcèx na choxŭ peyaxŭgŭxŭ. ²—Rŭ ngutaquèxepataŭgŭwa tá pexŭ ínawoxŭ. Rŭ aixcŭma tá nawa nangu na texé pexŭ dèixŭ rŭ tá nagu tarŭxŭnŭxŭ na ngêmaãcŭ mexŭ Tupanacèx taxŭxŭ. ³—Rŭ ngêmaãcŭ tá pemaã namaxè i duŭxŭgŭ, erŭ taguma nŭxŭ nacuèxgŭ ya Chaunatŭ, rŭ choxŭ rŭ ta tama nacuèxgŭ. ⁴—Rŭ pemaã nŭxŭ chixu i ñaã ore i ñuxmax, na nŭxna pecuèxâchieŭcèx i ngêxguma yixcŭra ngêmaãcŭ pexŭ nangupetŭgu.

Tupanaãe i Üünexũärü puracũchiga

—Noxri rü tama pemaã nüxũ chixu i ñaã ore, yerü petanügu charũãũx. ⁵—Natürü i ñuxma rü tá pexna íchixũ na Chaunatũ ga nũma choxũ mucũxũtawana na changẽmaxũcẽx. Rũ pema rü taxũema choxna peca na ngextá tá na chaxũxũ. ⁶—Natürü poraãcũ pengechaũgũama erü pemaã nüxũ chixu i ngẽma ore. ⁷—Natürü aixcũma pemaã nüxũ chixu rü pexcẽx narũmemaẽ nixĩ na Chaunatũcẽx chataeguxũ. Rũ ngẽxguma chi tama Chaunatũxũtawana chaxũxgu rü tãũ chima nũma naxũ i Naãe i Üünexũ i pexũ rüngũxẽẽxũ. Natürü ngẽxguma ngema chaxũxgu rü choma tá nũma chanamu i Naãe i Üünexũ. ⁸—Rũ ngẽxguma Naãe i Üünexũ nũma ũxgu rü tá guxũ i duũxũgũxũ nüxũ nacuẽxẽẽ na yapecaduãxgũxũ. Rũ tá nanangoxẽẽ i ñuxãcũ na yĩxũ i ngẽma maxũ i Tupanapẽxewa aixcũma mexũ. Rũ tá duũxũgũxũ nüxũ nacuẽxẽẽ na Tupana tá napoxcuexũ i duũxũgũ naxcẽx i norü pecadugũ. ⁹—Rũ nũma i Naãe i Üünexũ tá duũxũgũxũ nüxũ nacuẽxẽẽ na pecaduãxgũxũ yĩxũ erü tama choxũ nayaxõgũ. ¹⁰—Rũ tá nanangũxẽẽ i ñuxãcũ na yĩxũ i ngẽma maxũ i Tupanapẽxewa aixcũma mexũ, erü choma rü tá Chaunatũxũtawana chaxũ, rü pema rü tãũtãma marü choxũ pedaugũ. ¹¹—Rũ Naãe i Üünexũ tá duũxũgũxũ nüxũ nacuẽxẽẽ na Tupana tá napoxcuexũ i duũxũgũ i chixexũ ügũxũ, erü Tupana rü namaã nanaxuegu na marü napoxcuãxũ i Chataná i ñoma i naãnemaã icuãxũ. ¹²—Choma rü choxũ nangẽxma i muxũma i to i ore i pemaã nüxũ chixuxchaũchirẽxũ. Natürü ega ñuxma chi pemaã nüxũ chixuxgu rü tãũ chima nüxũ pecuẽxgũ. ¹³—Rũ Tupanaãe i Üünexũ rü nüxũ nixu i ore i aixcũma ixĩxũĩcatama. Rũ ngẽxguma nũma naxũxgu rü nũma tá pexũ nangũxẽẽ i guxũma i ore i aixcũma ixĩxũ. Erü nũma rü tama nüẽchama tá nidexa, natürü ngẽma ore i Chaunatũxũtawana rü chauxũtawana nüxũ naxĩnüxũxũxica tátama nixu. Rũ tá pexũ nüxũ nacuẽxẽẽ i guxũma i tacũ i yixcũra tá ngupetũxũ. ¹⁴—Rũ nũma rü tá choxũ nataxẽẽ, erü chauxũtawana tá nanayaxu i norü nguxẽẽtae, rü ñuxũchi tá pexũ nangũxẽẽ namaã i ngẽma nguxẽẽtae. ¹⁵—Guxũma i Chaunatũaxũ ngẽxmaxũ rü choxrü ta nixĩ. Ngẽmacẽx pemaã nüxũ chixu rü Naãe i Üünexũ rü chauxũtawana tá nanayaxu i norü nguxẽẽtae, rü ñuxũchi pexũ tá namaã nangũxẽẽ. ¹⁶—Rũ paxa tãũtãma choxũ pedau. Natürü ngẽmawena rü wena táxaru choxũ pedau erü Chaunatũxũtawana tá chaxũ —ñanagũrü ga Ngechuchu.

Ngema guxchaxũgũ rü yixcũama rü tá taãẽxũ nananguxuchi

¹⁷ Rũ yexguma ñuxre ga toma ga Ngechucharü ngũxũgũ rü togũna tacagũ, rü ñatarũgũgũ: —¿Tacũchiga nixĩ na ngẽma ñaxũ:

“Rũ paxa tãũtãma choxũ pedaugũ. Natürü ngẽmawena rü wena táxaru choxũ pedaugũ”, ñaxũ? ¿Rũ tacũchiga ta nixĩ na ñaxũ:

“Choma rü Chaunatũxũtawana tá chaxũ”, ñaxũ? ¹⁸—¿Rũ tacũchiga ta nixĩ na ñaxũ:

“Rũ paxa tãũtãma choxũ pedaugũ”, ñaxũ? Rũ yixema rü tama nüxũ tacuẽxgũẽga na tacũchigaxũ tamaã yaxuxũ —ñatarũgũgũ. ¹⁹ Rũ Ngechuchu rü nüxũ nacuẽxama ga nüxna na tacagũchaũxũ ga tomãx. Rũ yemacẽx ñanagũrü toxũ: —Choma rü marü pemaã nüxũ chixu rü paxa tãũtãma choxũ pedau, natürü ngẽmawena rü wena táxaru choxũ pedau. ¿Rũ ngẽma dexacẽxtama i pegũna pecagũxũ? ²⁰—Rũ aixcũma pemaã nüxũ chixu rü pema rü tá pexauxe, rü tá pengechaũgũ. Natürü ñoma i

naānecūāx i duūxūgū rü tá nataāēgū. Natürü woo pema tá pengechaūgū, rü ngēma perü ngechaū rü tá taāēxū nananguxuchi. ²¹—Ngēxguma wūxi i nge íraxacūchaūgu rü inaxixāchiāē, erü inguxneca. Natürü ngēxguma marū tabuxgu ya ngīrū ōxchana, rü nūxū iyarūngūma na űuxācū porācū ngīxū na nanguxchirēxū i noxrix, erü tūmamaā itaāē ya ngīrū ōxchana. ²²—Rü ngēxgumarūū tá ta pexū nangupetū i pemax, erü űuxma rü penaxixāchiāēgū. Natürü wena táxarū chataegu rü pexū íchayadau. Rü ngēxguma rü tá pexū nangēxma i wūxi i taāē i taxucürüwama texé pexna yaxuxū. ²³—Rü ngēxguma ínanguxgu tá i ngēma ngunexū na yanguxū i űāā pemaā nūxū chixuxū, rü taxucēxtāma űacūcēx choxna pecagū erü aixcūma Chaunatū tá nixī ya pexna naxācū i guxūma i űacū i chauégagu nūxna naxcēx peçaxū. ²⁴—űuxmarūta i pema rü taxuūcēxma chauégagu ípecagū. ¡Naxcēx ípeca rü tá penayaxu i ngēma naxcēx ípeçaxū! Rü ngēmaācū rü tá aixcūma petaāēgū.

Ngechuchu rü marū nūxū narūyexera i guxūma i űacū i űoma i naānewa ngēxmaxū

²⁵—űuxma rü cuēxruūgūgu chayaxuācūma pemaā nūxū chixu i ore. Natürü nawa tá nangu i ngunexū i marū tāūtāma ngēmaācū pemaā nūxū chixu. Rü ngēxguma rü tá noxtacūma meā pemaā chanangoxēē i Chaunatūchiga. ²⁶⁻²⁷—Rü ngēma ngunexūgu i pema rü Chaunatūxūtawa tá chauégagu naxcēx ípeca i űacū i penaxwēxexū. Rü taxucēxma tūxcūū choma tá Chaunatūxūtawa pexū naxcēx íchaca, erü nūmatama ya Chaunatū rü woetama pexū nangechaū, erü pema rü choxū pengechaū rü peyaxōgū na naxūtawa ne chaxūxū. ²⁸—Chaunatūxūtawa ne chaxū na űoma ga naānewa chaxūxūcēx. Rü űuxma rü tá nūxna chataegu i űoma i naāne na wenaxārū Chaunatūxūtawa chaxūxūcēx —ñanagürü. ²⁹Rü yexguma ga toma ga norü ngúexūgū rü ñatarūgū: —űuxma waxi nixī i meāxūchima tomaā cunangoxēēxū i curū ore i tomaā nūxū quixuxū. Rü tama űacūgu ixuxūācūma tomaā nūxū quixu. ³⁰—Rü űuxma rü nūxū tacuēx na aixcūma guxūxūma na cucuáxū. Rü taxuacūma texé űuxū ñatagürü cuxū. Rü ngēmacēx nixī i tayaxōgūxū na aixcūma Tupanaxūtawa na ne cuxūxū —ñatarūgūgū. ³¹Rü Ngechuchu toxū nangāxū rü ñanagürü: —¿Aixcūma peyaxōgūxū i űuxmax? ³²—Rü nawa tá nangu i ngunexū rü űuxmatátama nixī i na pegū pewoonexū. Rü wūxichigū i pema rü tá pepatawa pexī, rü chaxica tá nuā choxū petēx. Natürü tama chaxica tá icharūxāūx, erü Chaunatū rü chauxūtawa nangēxma. ³³—Rü guxūma i űāā ore rü pemaā nūxū chixu na chaugagu petaāēgūxūcēx. Rü űoma i naānewa rü tá ngúxū pingē. Natürü ¡peporae! erü choma rü marū nūxū charūyexera i guxūma i űacū i űoma i naānewa ngēxmaxū —ñanagürü.

17

Ngechuchu rü norü ngúexūgūcēx nayumūxē

¹Rü yema ñaxguwena rü Ngechuchu daxūgu nadawenū, rü ñanagürü: —Pa Chaunatūx, marū nawa nangu i ngunexū na chayuxū. Rü chanaxwēxe na duūxūgūxū nūxū cucuēxēēxū na aixcūma choma rü cune chiīxū. Rü ngēmaācū i choma rü tá nūxū nūxū chacuēxēē na cuma rü aixcūma Tupana na quīxū. ²—Erū marū guxū i duūxūgūarū āēxgacūxū choxū quixīxēē, na chanamaxēxēēxūcēx i guxūma i duūxūgū i choxna cumugūxū. ³—Rü ngēma duūxūgū tá nūxū nangēxma i maxū i taguma

gúxŦ ega cuxŦ nacuèxgŦgu na cuxicatama Tupana na quiŦxŦ, rŦ choxŦ nacuèxgŦgu na choma rŦ Cristu ga núma choxŦ cumucŦ na chiŦxŦ. ⁴—Choma rŦ marŦ cuxŦ chataxèè i ñoma i nañewa rŦ chayanguxèè i guxŦma i puracŦ ga nawa choxŦ cumuxŦ. ⁵—RŦ ñuxma Pa ChaunatŦx, rŦ chanaxwèxe i cugŦxŦtawa choxŦ cungèxmaxèè na choxŦ nangèxmaxŦcèx ga yematama pora ga cumaã choxŦ yexmaxŦ ga noxri tauta naãne ũxgu. ⁶—RŦ guxema duŦxègŦ ya tŦxŦ quidexechixe ga ñoma ga nañewa na choxna tŦxŦ cumugŦxŦcèx, rŦ marŦ tŦxŦ nŦxŦ chacuèxèè i texè na quiŦxŦ i cumax. RŦ woetama cuxrŦgŦ tixŦgŦ rŦ cuma nixŦ ga choxna tŦxŦ cumugŦxŦ. RŦ tŦmagŦ rŦ marŦ naga taxŦnŦè i curŦ ore. ⁷—RŦ ñuxma rŦ marŦ nŦxŦ tacuèx rŦ guxŦma i ngèma choxna cuxãxŦ, rŦ aixcŦma cuxŦtawa ne naxŦ. ⁸—RŦ choma rŦ marŦ tŦmamaã nŦxŦ chixu ga curŦ ore ga chomaã nŦxŦ quixuxŦ. RŦ tŦmagŦ rŦ marŦ tayaxŦgŦ i ngèma ore. RŦ nŦxŦ ticuèxãchitanŦ na aixcŦma cuxŦtawa na ne chaxŦxŦ i chomax. RŦ tayaxŦgŦ ga cuma núma choxŦ na cumuxŦ. ⁹—RŦ ngèmacèx cuxna chaca na tŦxŦ na curŦngŦxèèxŦcèx. RŦ tama cuxna chaca na nŦxŦ curŦngŦxèèxŦcèx i ñoma i nañecŦãx i duŦxŦgŦ, natŦrŦ cuxna chaca na tŦxŦ curŦngŦxèèxŦcèx ya guxema choxna tŦxŦ cumugŦxe, erŦ curŦ duŦxŦgŦ tixŦgŦ. ¹⁰ RŦ guxãma ya yŦxema choxrŦgŦ ixŦgŦxe rŦ cuxrŦgŦ tixŦgŦ. RŦ guxãma ya cuxrŦgŦ ixŦgŦxe rŦ choxrŦgŦ tixŦgŦ. RŦ tŦmagagu rŦ duŦxŦgŦ choxŦ nicuèxŦgŦ. ¹¹—Choma rŦ marŦ tãtãtãma ñoma i nañewa changèxmaècha, natŦrŦ i tŦmagŦ rŦ ngèmaãcŦ ñoma i nañewa tá tangèxmagŦ ngèxguma cuxŦtawa chaxŦyane. Pa ChaunatŦ ya ŦñecŦx, rŦ chanaxwèxe na curŦ pora ga choxna cuxãxŦmaã tŦxna cudauxŦ ya yŦxema choxna tŦxŦ cumugŦxe, na ngèmaãcŦ guxãma wŦxigu rŦxŦnŦèxŦcèx, ngèma cuma rŦ choma na wŦxigu rŦxŦnŦèxŦrŦ. ¹²—RŦ yexguma guxema choxna tŦxŦ cumugŦxetanŦwa chayexmagu ga ñoma ga nañewa, rŦ curŦ pora ga choxna cuxãxŦmaã tŦxna chadau rŦ tŦxŦ ichapoxŦ. RŦ taxŦma ga guxema choxna tŦxŦ cumugŦxe rŦ itayarŦtauxe. RŦ Yuda ga woetama iyarŦtaxŦxŦxŦcatama inayarŦtaxu na yanguxŦcèx i curŦ ore i ŦmatŦxŦ. ¹³—RŦ ñuxma rŦ cuxŦtawa tá chaxŦ. NatŦrŦ ñomarŦta ñoma i nañewa changèxma-yane rŦ nŦxŦ chixu i ñaã curŦ ore na tŦmagŦ rŦ ta tŦxŦ nangèxmaxŦcèx i ngèma taãè i aixcŦma ixŦxŦ i choma choxŦ ngèxmaxŦ. ¹⁴—Choma rŦ marŦ tŦmamaã nŦxŦ chixu i curŦ ore. NatŦrŦ ñoma i nañecŦãx i duŦxŦgŦ rŦ tŦmachi naxaie, erŦ tŦma rŦ tama naxrŦŦ tixŦgŦ, ngèxgumarŦŦ i choma rŦ tama ñoma i nañecŦãx rŦŦ chixŦ. ¹⁵—Tama cuxna tŦmacèx chaca na tŦxŦ na quigagŦxŦcèx i ñoma i nañewa. NatŦrŦ cuxna chaca na tŦxŦ na icupoxŦxŦcèx nŦxna i ngoxo i Chataná. ¹⁶—Choma rŦ tama ñoma i nañecŦãx chixŦ. RŦ tŦmagŦ rŦ ta tama ñoma i nañecŦãx tixŦgŦ, erŦ cuxrŦgŦ tixŦgŦ i ñuxmax. ¹⁷—CurŦ ore rŦ aixcŦma nixŦ. RŦ chanaxwèxe i tŦxŦ cungŦxèè i curŦ ore, na aixcŦma cupèxewa tixŦñexŦcèx ya yŦxema choxna tŦxŦ cumugŦxe. ¹⁸—RŦ yexgumarŦŦ ga ñoma ga nañecŦãx ga duŦxŦgŦtanŦwa choxŦ na cumuxŦrŦŦ, rŦ ngèxgumarŦŦ i choma rŦ ta ñoma i nañecŦãx i duŦxŦgŦ-tanŦwa tŦxŦ chamugŦ. ¹⁹—RŦ tŦmagagu chaugŦ ichaxã na tŦxŦ changŦxèèxŦcèx i curŦ ore i aixcŦma ixŦxŦ, na cupèxewa tixŦñexŦcèx ya yŦxema choxna tŦxŦ cumugŦxe. ²⁰—NatŦrŦ tama yŦxema ñuxma yaxŦgŦxecèxcatama cuxna chaca. NatŦrŦ cuxna chaca ta tŦmacèx ya yŦxema yŦxcŦra tá yaxŦgŦxe nagagu i tŦmaãrŦ ore ya yŦxema ñuxma yaxŦgŦxe. ²¹—RŦ guxãma ya yŦxemacèx cuxna chaca na aixcŦma wŦxitama tixŦgŦxŦcèx.

Rü ngẽma cuma rü choma na wüxitama ixĩgüxürüü, Pa Chaunatüx, rü chanaxwẽxe i guxãma i tũma rü ta wüxitama tixĩgü. Rü ngẽmaãcü i ñoma i naãnecũãx i duũxügü, rü tá nayaxõgü na cuma núma choxü cumuxü. ²² —Rü choma rü marü tũxna chanaxã i ngẽmatama pora i cuma choxna cuxãxü na ngẽmaãcü wüxitama tixĩgüxüçèx ngẽma cuma rü choma na wüxitama ixĩgüxürüü. ²³ —Rü chanaxwẽxe na tũmawa changẽxmaxü rü cuma i chowa na cungẽxmaxü na ngẽmaãcü aixcüma wüxi-tama ixĩgüxü i guxãma i yixema. Rü ngẽmaãcü i ñoma i naãnecũãx i duũxügü rü tá nüxü nicuèxãchitanü na cuma núma choxü cumuxü, rü tá nüxü nicuèxãchitanü na tũxü cungechaũxü ya yixema choxna tũxü cumugüxe ngẽma na choxü cungechaũxürüü. ²⁴ —Pa Chaunatüx, cuma choxna tũxü cumugü. Rü chanaxwẽxe i chauxütawa tangẽxmagü i ngẽma tá íchangẽxmaxüwa, na nüxü tadaugüxüçèx i chorü pora ga choxna cuxãxü. Yerü choxü cungechaũ ga yexguma tauta naãne ixügügumama. ²⁵ —Pa Chaunatü ya Mecüx, ñoma i naãnecũãx i duũxügü rü tama cuxü nacuèxgü. Natürü choma rü cuxü chacuèx. Rü yixema choxna tũxü cumugüxe rü ta marü nüxü tacuèxgü na cuma núma choxü cumuxü. ²⁶ —Rü marü tũxü nüxü chacuèxẽẽ na texé quiixü. Rü guxügutáma tũxü nüxü chicuèxẽẽãmachigü na cuma choxü cungechaũxürüü tügü tangechaũgüxüçèx rü choma rü tũmaxütawa na changẽxmaxüçèx —ñanagürü ga Ngechuchu.

18

Ngechuchuxü niyauxgü

(Mt 26.47-56; Mr 14.43-50; Lc 22.47-53)

¹ Rü yema ñaxguwena ga Ngechuchu rü tomaã inaxüãchi, na Cheduaruarü ngatexüãrü tocutüwa taxixüçèx. Rü yema nayexma ga wüxi ga nanetü necü. Rü yemawa naxü ga Ngechuchu tomaã. ² Rü Yuda ga yema bexma cúãcü Ngechuchuxü iyaxuaxüxü rü nüxü nacuèx ga yema nachica, yerü Ngechuchu rü muèxpüxcüna yema tomaã nangutaquèxexü. ³ Rü yema nangu ga Yuda namaã ga ñuxre ga churaragü rü ñuxre ga tupauca ga taxüneãrü purichíagü ga yema namugüxü ga paigüarü ãèxgacügü rü parichéugü. Rü meãma nixãxne, rü yema nanangegü ga omügü. ⁴ Natürü ga Ngechuchu rü marü nüxü nacuèx ga guxüma ga tacü tá nüxü na ngupetüxü. Rü yemacèx naxcèx nixü, rü nüxna naca, rü ñanagürü: —¿Texécèx nixí i pedaugüxü? —ñanagürü. ⁵ Rü nümagü rü Ngechuchuxü nangãxügü, rü ñanagü-rügü: —Nacharétucũãx i Ngechuchucèx nixí i tadaugüxü —ñanagürügü. Rü Ngechuchu nanangãxü, rü ñanagürü: —Choma chixí —ñanagürü. Rü Yuda ga bexma cúãcü ínaxuaxüxü rü yema churaragütanüwa nayexma. ⁶ Rü yexguma yema ñaxgu ga Ngechuchu: “Choma chixí”, ñaxgu, rü nügüweama nacaixütanü ga yema churaragü, rü yexma nayayi. ⁷ Rü yexguma ga Ngechuchu rü wena nüxna naca, rü ñanagürü: —¿Texécèx nixí i pedaugüxü? —ñanagürü. Rü nümagü rü nanangãxügü rü ñanagürügü: —Nacharétucũãx i Ngechuchucèx nixí i tadaugüxü —ñanagürügü. ⁸ Rü Ngechuchu rü wenaxãrü ñanagürü nüxü: —Marü pemaã nüxü chixu rü choma chixí. Rü ngẽxguma chauxcèx pedaugü rü jípeyaxixẽẽ i ñaã chorü ngúexügü! —ñanagürü. ⁹ Rü yemaãcü nangupetü na yanguxüçèx ga norü ore ga nümatama ga Ngechuchu nüxü yaxuxü ga ñaxgu:

“Yixema Chaunatü choxna tũxü mugüxe rü taxúetáma itayarütauxe”, ñaxgu. ¹⁰ Rü Chimáü ga Pedru rü nüxü iyexma ga wüxi ga cüxchi. Rü

ngĩxũ nayaxu ga norũ cũxchi rũ yemamaã ínanadaechinũ ga paigũarũ ãẽxgacũarũ duũxũ ga Macugu ãegaxũ. Rũ norũ tũgũnechinũ ínadeae. ¹¹ Natũrũ ga Ngechuchu rũ Pedruxũ ñanagũrũ: —¡Ngĩxchixũũgu ngĩxũ ixũcuchi i curũ cũxchi! ¿Tama ẽxna nũxũ cucuẽx na choma rũ tá ngũxũ chingexũ ngẽma Chaunatu chomaã naxueguxũrũ? —ñanagũrũ.

Anápatawa Ngechuchuxũ nagagũ

(Mt 26.57-58; Mr 14.53-54; Lc 22.54)

¹² Rũ yexguma ga churaragũarũ ãẽxgacũ, namaã ga norũ churaragũ rũ tupaucaarũ purichíagũ, rũ Ngechuchuxũ niyaxugũ. Rũ nayanẽixchacũũgũ. ¹³ Rũ noxri rũ ãẽxgacũ ga Anápatawa nanagagũ. Rũ Aná rũ Caipánẽxtũ nixĩ. Rũ guma taunecũgu ga Caipá rũ paigũeru nixĩ. ¹⁴ Rũ yema Caipá nixĩ ga ũpaacũ yema Yudũgũarũ ãẽxgacũgũmaã nũxũ ixuxũ ga na namemaẽxũ ga wũxitama ga yatũ guxũma ga Yudũgũcèx na yuxũ.

Pedru rũ Ngechuchuxũ nixã

(Mt 26.69-70; Mr 14.66-68; Lc 22.55-57)

¹⁵ Rũ choma rũ Chimáũ ga Pedru rũ wũxigu Ngechuchuwe tarũxĩ. Rũ yema paigũarũ ãẽxgacũ rũ choxũ nacuẽx. Rũ yemacèx ga choma rũ wũxigu Ngechuchumaã tichocu ga ãẽxgacũpataẽxtũwa. ¹⁶ Natũrũ ga Pedru rũ íãxãrũ dũxètũgutama narũxãũx. Rũ yemacèx íchaxũxũ ga choma, rũ yema íãxãrũ dauruũ ga ngecũmaã chayaruẽdexa rũ yexguma Pedruxũ iyamucuchi. ¹⁷ Rũ yexguma ga yema ngecũ ga íãxãrũ dauruũ, rũ Pedruna ica, rũ ngĩgũrũgũ: —¿Tama ẽxna cuma rũ ta wũxi i norũ ngũxũ quiĩxũ i ngẽma yatũ i yayauxgũxũ? —ngĩgũrũgũ. Rũ Pedru ngĩxũ nangãxũ, rũ ñanagũrũ: —Tama nixĩ —ñanagũrũ. ¹⁸ Rũ yema íãxtũwa rũ ãẽxgacũarũ duũxũgũ rũ purichíagũ rũ nanaxũgũ ga wũxi ga ũxũ, yerũ nagauane. Rũ guma ũxũxetũarũ ngaicamagu nachigũ, rũ yema nũgũ ninaĩxũgũ. Rũ Pedru rũ ta yema nũgũ nanaĩxũ naxètũwa ga guma ũxũ.

Paigũarũ ãẽxgacũ rũ Ngechuchuna naca

(Mt 26.59-66; Mr 14.55-64; Lc 22.66-71)

¹⁹ Rũ yema paigũarũ ãẽxgacũ rũ inanaxũgũ ga Ngechuchuna na nacaxũ, rũ ñanagũrũ: —¿Tacũ nixĩ ga duũxũgũxũ namaã cungũxẽẽxũ? ¿Rũ texégũ tixĩ ya yixema curũ ngũxũgũ? —ñanagũrũ. ²⁰ Rũ Ngechuchu ñanagũrũ nũxũ: —Choma rũ guxũ ga duũxũgũpẽxewa nũxũ chixu ga chorũ ore. Rũ ngutaquẽxepataũgũwa rũ tupauca ya taxũnewa i ngextá guxũma i Yudũgũ íngutaquẽxegũxũwa chanangũxẽẽ ga duũxũgũ. Rũ yemaãcũ taxuũma ichicũx ga chorũ ore. ²¹ —¿Rũ tũxcũũ i choxna cucaxũ i ñũxmax? Êcũ, ¡nũxna naca i ngẽma duũxũgũ ga nũxũ ínũẽxũ ga chorũ ore! Rũ nũmagũ tá cumaã nũxũ nixugũe ga tacũchigaxũ namaã na chixuxũ. Erũ nũmagũ rũ nũxũ nacuẽxgũ i guxũma ga tacũ ga namaã nũxũ chixuxũ —ñanagũrũ. ²² Rũ yexguma Ngechuchu yema ñaxgu, rũ wũxi ga tupauca ga taxũneãrũ purichía ga naxũtagu chixũ, rũ Ngechuchuchiwegu nidagũ. Rũ ñanagũrũ Ngechuchuxũ: —¿Tũxcũũ ngẽmaãcũ cunangãxũ ya daa paigũarũ ãẽxgacũ? —ñanagũrũ. ²³ Rũ Ngechuchu nanangãxũ rũ ñanagũrũ: —Rũ ngẽxguma tacũ rũ chixexũxũ chixuxgu, ¡rũ nũxũ ixu na ñũxãcũ chixri na chidexaxũ! Natũrũ ega chorũ ore rũ aixcũma yixĩgu, rũ ¿tũxcũũ i choxũ quidagũxũ i ñũxmax? —ñanagũrũ. ²⁴ Rũ yexguma ga Aná rũ Ngechuchuxũ yanãĩcũma paigũarũ ãẽxgacũ ga Caipáxũtawana nanamu.

Pedru rü wenaxârü tama Ngechuchuxü nacuèxnetá

(Mt 26.71-75; Mr 14.69-72; Lc 22.58-62)

²⁵ Rü yoxni ga Pedru rü üxüarü ngecamagu nachiecha, rü yéma nügü nanaixüâma. Rü yema yéma yexmagüxü rü nüxna nacagüe, rü ñanagürügü: —¿Tama êxna cuma rü ta norü ngüexü quiixü i ngêma yatü i yayauxgüxü? —ñanagürügü. Natürü ga Pedru rü tama nügü nixu, rü ñanagürü: —Tama nixi —ñanagürü. ²⁶ Rü yéma nayexma ga wüxi ga paigüarü âêxgacüarü duüxü. Rü yema rü Pedru ídaechinüxütanüxü nixi. Rü Pedruna naca, rü ñanagürü: —¿Tama êxna cuma yüxü ga nanetü necüwa Ngechuchumaã cuxü chadauxü? —ñanagürü. ²⁷ Rü Pedru rü wena tama nügü nixu. Rü yexgumatama nica ga otá.

Ngechuchu rü Piratu-pêxewa nayexma

(Mt 27.1-2, 11-14; Mr 15.1-5; Lc 23.1-5)

²⁸ Rü yexguma Ngechuchumaã nüxü nachauegu ga nüxna na nacagüxü, rü Caipápatawa ínanagaxüchigü rü Yudéaaneârü âêxgacü ga Dumacüâxpatawa nanagagü. Natürü marü ningóonechaü ga yexguma rü yemacèx ga yema Yudiügü rü tama guma âêxgacüpatagu nachocu, yerü norü mugü nüxü nixu rü taxü ga pecadu nixi na wüxi ga Dumacüâxpatagu na nachocuxü ga yema ngunexügu. Rü yemaãcü tama Tupanapêxewa nügü nixüxaarü maxüâxêégüchaü, yerü yexguma nügü yaxüxaarü maxüâxêégügu, rü taxucürüwa nanangöxgü ga óna ga Üpetüchigaarü petacèx namexêèxü. ²⁹ Rü yemacèx ga guma âêxgacü ga Dumacüâx ga Piratu rü napatawa ínaxüxü ga duüxügümaã na yadexaxücèx. Rü ñanagürü nüxü: —¿Tacücèx ípenaxuaxü ya daa yatü? —ñanagürü. ³⁰ Rü nümagü rü Piratuxü nangâxügü, rü ñanagürügü: —Ngêxguma chi tama wüxi i taxü i chixexü naxüxgu, rü tâü chima cuxütawa tanaga —ñanagürügü. ³¹ Rü yexguma ga Piratu rü ñanagürü nüxü: —¿Ëcü perü âêxgacügüxütawa penaga, rü perü mugü pemaã nüxü ixuxüâcüma penapoxcux! —ñanagürü. Natürü ga yema Yudiügü rü Piratuxü nangâxügü, rü ñanagürügü: —Natürü pema i Dumacüâxgü rü marü toxna penachüxu na texéxü timèxgüxü tümaârü chixexücèx —ñanagürügü. ³² Rü yemaãcü ningu ga yema ore ga Ngechuchu üpaacü nüxü ixuxü ga ñuxâcü tá na nayuxü. ³³ Rü Piratu rü wenaxârü napatagu naxücu, rü Ngechuchucèx nangema. Rü nüxna naca, rü ñanagürü: —¿Cuma yüxü i Yudiügüarü Âêxgacü quiixü? —ñanagürü. ³⁴ Rü Ngechuchu ñanagürü nüxü: —¿Cuechamatama i nagu curüxñnüxü na ngémaãcü choxna cuçaxü, rü êxna togü marü cumaã nüxü nixu na ngémaãcü choxna cuçaxücèx? —ñanagürü. ³⁵ Rü Piratu Ngechuchuxü nangâxü, rü ñanagürü: —¿Êxna cuma nagu curüxñnügu rü Yudiü chiixü? Rü ngêma cuchiüâ necüâxgü rü paigüarü âêxgacügütama nixi i chauxütawa cuxü gagüxü. ¿Êxna tacü rü chixexü cuxü? —ñanagürü. ³⁶ Rü yexguma ga Ngechuchu rü nanangâxü, rü ñanagürü: —Choma rü tama ñoma i naãnewa âêxgacü chixi. Rü ngêxguma ñoma i naãnewa âêxgacü chixigu, rü chorü duüxügü rü chi Yudiügüarü âêxgacügümaã nügü nadai rü tâü chima choxü niyaxgü i ngêxguma. Natürü tama ñoma i naãnewa âêxgacü chixi —ñanagürü. ³⁷ Rü yexguma ga Piratu rü ñanagürü nüxü: —¿Êxna to i nachiüâneârü âêxgacü quixi i cumax? —ñanagürü. Rü Ngechuchu nanangâxü rü ñanagürü: —Cumatama marü nüxü quixu na âêxgacü chiixü. Rü yemacèx ga choma rü chabu rü ñoma ga naãnewa chaxü na

duũxũgũmaã nüxũ chayarũxuxũcèx i ore i aixcũma ixĩxũ. Rũ guxãma ya texé ya nüxũ cuáxchaũxé i ngẽma ore i aixcũma ixĩxũ, rũ choxũ itarũxĩnũé i ngẽma ore i nüxũ chixuxũ —ñanagũrũ. ³⁸ Rũ Piratu rũ ñanagũrũ nüxũ: —¿Tãcũ nixĩ i ngẽma ore i aixcũma ixĩxũ? —ñanagũrũ.

Ngechuchumaã nanaxuegu na yamèxgũãxũ

(Mt 27.15-31; Mr 15.6-20; Lc 23.13-25)

Rũ yemaãcũ Ngechuchuna nacaxguwena ga Piratu, rũ wenaxãrũ Yudiũgũmaã nayarũdexa. Rũ ñanagũrũ nüxũ: —Taxuũma i chixexũxũ nawa chadau i ñãã yatũ. ¿Rũ tüxcũũ chi inapoxcuxũ? ³⁹ —Natürũ guxũguma ega Üpetũchigaarũ petawa nanguxgu, rũ pecũma nixĩ na choxna naxcèx na peçaxũ na íchananguxuchixèẽxũcèx i wũxi i duũxũ i poxcuxũ. ¿Rũ penaxwèxexũ na pexcèx íchananguxuchixèẽxũ i ñãã perũ ãèxgacũ, Pa Yudiũgũx? —ñanagũrũ. ⁴⁰ Rũ yexguma ga guxũma ga yema duũxũgũ, rũ tagaãcũ aita naxũe, rũ ñanagũrũgũ: —Tama tanaxwèxe na cuya-ngéxũ i ngẽma yatũ. Rũ Barabá waxi nixĩ i tanaxwèxexũ na cuyangéxũ —ñanagũrũgũ. Rũ yema Barabá rũ wũxi ga máètaxũ nixĩ.

19

¹ Rũ yexguma ga Piratu rũ churaragũxũ namu na Ngechuchuxũ nacuaixgũxũcèx. ² Rũ yema churaragũ rũ chuchuxũwa nanaxũgũ ga wũxi ga boxũ, rũ ñũxũchi naèruwa nayangèxcuchigũ. Rũ wũxi ga máxũ ga naxchiru ga dauxcharaxũgu nayacũxèègũ. ³ Rũ ñũxũchi naxcèx naxĩ, rũ nüxũ nacugũeãcũma ñanagũrũgũ nüxũ: —¿Namaxũ, Pa Yudiũgũarũ ãèxgacũ! —ñanagũrũgũ. Rũ nanapechiwegũ. ⁴ Rũ Piratu rũ wenaxãrũ düxétũwa naxũ, rũ Yudiũgũxũ ñanagũrũ: —¿Dücèx! ñũxma tá nuã pepèxewa chanaga na nüxũ pecuáxũcèx na taxuũma i chixexũxũ nawa chadauxũ —ñanagũrũ. ⁵ Rũ düxétũwa naxũ ga Ngechuchu. Rũ namaã nangèxcueru ga yema boxũ ga chuchuxũwa naxũgũxũ. Rũ nagu nicũx ga yema máxũ ga naxchiru ga dauxcharaxũ. Rũ yex-guma ga Piratu rũ Yudiũgũxũ ñanagũrũ: —Daa nixĩ ya yima yatũ —ñanagũrũ. ⁶ Natürũ yexguma Ngechuchuxũ nadaugũgu ga paigũarũ ãèxgacũgũ rũ purichíagũ, rũ inanaxũgũe ga aita na naxũexũ. Rũ ñanagũrũgũ: —¿Curuchawa yapota! ¿Curuchawa yapota! —ñanagũrũgũ. Rũ Piratu rũ ñanagũrũ nüxũ: —¿Ècũ, peyaga rũ pematama curuchawa peyapota! Erũ choma rũ taxuũma i chixexũxũ nawa chadau —ñanagũrũ ga Piratu. ⁷ Natürũ ga yema Yudiũgũ rũ Piratuxũ nangãxũgũ, rũ ñanagũrũgũ: —Toma toxũ nangèxma i wũxi i torũ mu. Rũ ngẽma torũ mu toxũ nüxũ nacuèxèẽ na namexũ na nayuxũ i ñãã yatũ, yerũ nũma rũ nüxũ nixu ga Tupana Nane na yĩxũ —ñanagũrũgũ. ⁸ Rũ yexguma yemaxũ naxĩnũgu ga Piratu, rũ yexeraãcũ namuũ. ⁹ Rũ wena Ngechuchumaã napatagu naxũcu. Rũ yema Ngechuchuna nayaca, rũ ñanagũrũ: —¿Ngextácũãx quixĩ i cumax? —ñanagũrũ. Natürũ ga Ngechuchu rũ tama nanangãxũ. ¹⁰ Rũ yexguma ga Piratu rũ Ngechuchuxũ ñanagũrũ: —¿Èxna ngẽma tãütãma choxũ cungãxũ? ¿Tau èxna i nüxũ cucuáxũ na choxmèxwa cungèxmaxũ na curuchawa cuxũ chipotaxũ rũ èxna cuxũ na íchanguxuchixèẽxũcèx? —ñanagũrũ. ¹¹ Rũ Ngechuchu nanangãxũ, rũ ñanagũrũ: —Tãũ chima cuxmèxwa changèxma, ega tama Tupana naxwèxegu. Rũ ngẽmacèx nixĩ i ngẽma duũxũgũ i cuxna choxũ mugũxũ rũ curũ yexera poraãcũ napecaduãxgũ —ñanagũrũ. ¹² Rũ yemawena rũ

Piratu nagu narüxĩnũ ga ñuxãcü Ngechuchuxũ na Ínanguxuchixẽẽgaxũ. Natürũ yema Yudiũgũ rü poraãcü aita naxüe, rü ñanagürũgũ: —Ngẽxguma tá Ícunanguxuchixẽẽxgu rü tama curũ ãẽxgacũ ya tacũ ya Dumacũãx ya Chẽcharuxũ cungechaũ. Erũ ngexerũxe ya ãẽxgacũ ya tacũxũ tũgũ ingucuchixẽexẽ, rü Dumacũãx ya ãẽxgacũ ya tacũ ya Chẽcharuarũ uwanũ tixĩ —ñanagürũgũ. ¹³ Rũ yexguma yemaxũ naxĩnũgu ga Piratu, rü churragũxũ namu ga Ngechuchuxũ düxëtüwa na nagagũxũcèx. Rũ nawa nayarũto ga wũxi ga tochicaũ ga taxũ ga nutagũnaxcèx ga togawa rü Gabatagu ãegaxũ. Rũ yema nachicawa nixĩ ga poxcuexũ ga duũxũgũna naçaxũ ga ãẽxgacũ. ¹⁴ Rũ wũxi ga ngunexũ nataxu ga Üpetũchigaarũ petawa na nanguxũ ga yexguma, rü marũ tocuchiwa nangu. Rũ Piratu rü Yudiũgũxũ ñanagürũ: —¡Daa nixĩ ya yima perũ ãẽxgacũ! ñanagürũ. ¹⁵ Natürũ ga nũmagũ rü aita naxüe, rü ñanagürũgũ: —Tanaxwẽxe na nayuxũ. Rũ ¡curuchawa yapota! —ñanagürũgũ. Rũ Piratu nũxna naca rü ñanagürũ nũxũ: —¿Ñuxãcü i choma rü ichanamu na curuchawa yapotagũãxũcèx ya perũ ãẽxgacũ? —ñanagürũ. Natürũ ga paigũarũ ãẽxgacũgũ rü Piratuxũ nangãxũgũ, rü ñanagürũgũ: —Yima ãẽxgacũ ya tacũ ya Chẽcharu ya Dumawa ngẽxmacũ rü yima nixĩ ya torũ ãẽxgacũ, rü nataxuma i to —ñanagürũgũ. ¹⁶ Rũ yexguma ga Piratu rü yema Yudiũgũna Ngechuchuxũ namu na curuchawa yapotagũãxũcèx. Rũ nũmagũ rü nayagagũ.

Curuchawa Ngechuchuxũ nipotagũ

(Mt 27.45-56; Mr 15.33-41; Lc 23.44-49)

¹⁷ Rũ Ínaxũxũ ga Ngechuchu, rü norũ curucha ngĩxũ ininge. Rũ yéma nanagagũ nawa ga wũxi ga nachica ga “Duũxẽeruchinèxãgu” ãegaxũ. Rũ yema rü Górguta nixĩ ga naega ga togawa. ¹⁸ Rũ yéma curuchawa Ngechuchuxũ nayarũpotagũ. Rũ Ngechuchurũ curuchawa nayapotagũ ga taxre ga to ga yatũgũ, rü wũxi ga norũ tũgũnecũwawa rü to ga norũ foxwecũwawa. ¹⁹ Rũ Piratu rü churragũxũ namu na Ngechucharũ curuchatapẽxewa na yapocuchigũãxũcèx ga wũxi ga mürapewaxacũ ga ãegatachinũxũ ga ñaxũ:

“Ngechuchu ya Nacharëtũãx ya Yudiũgũarũ ãẽxgacũ”, ñaxũ. ²⁰ Rũ muxũma ga yema Yudiũgũ nũxũ nadaumatũ ga yema namatũ ga mürapewaxacũgu üxũ. Yerũ yema nachica ga Ngechuchuxũ curuchawa Íyanapotagũxũwa, rü ñãneãrũ ngaicamana nixĩ. Rũ tomaẽxpũx ga nagawa naxũmatũ ga yema naega ga yema mürapewawa. Rũ togawa rü Griégugũgawa rü Dumacũãxgũgawa naxũmatũ. ²¹ Rũ yemacèx ga yema Yudiũgũarũ paigũarũ ãẽxgacũgũ rü Piratuxũ ñanagürũgũ: —Toma rü tama tanaxwẽxe i cunaxũmatũ i “Yudiũgũarũ ãẽxgacũ”, ñaxũ. Rũ narũmemaẽ nixĩ i cunaxũmatũ rü ñacurũgũ:

“Nũgũ ixucũ na Yudiũgũarũ ãẽxgacũ yĩxũ”, ñacurũgũ. ²² Natürũ Piratu nanangãxũ rü ñanagürũ: —Ngẽma chaxũmatũxũ rü marũ ngẽxma naxũmatũ —ñanagürũ. ²³ Rũ curuchawa marũ Ngechuchuxũ yapotagũguwena ga churragũ, rü nanade ga Ngechuchuchiru. Rũ yema ãgũmücũ ga churragũ rü nũgũmaã nayatoye ga naxchiru. Rũ nanayauxgũ ta ga norũ gãuxũchiru ga máxũ. Natürũ taxuwama narũngẽixte, yerũ woetama yemaãcü naxũ. ²⁴ Rũ yemacèx ga yema churragũ rü nũgũmaã ñanagürũgũ: —¡Tãütáma nagu tagaagũe! Rũ narũmemaẽ nixĩ i naxcèx tá naxĩnũcèxwẽxegũ rü ngĩxũ tañanagũgũ i

wüxi i dĭeru na ngēmawa nüxŭ icuèxgŭxŭcèx na texéarŭ tá na yĭxŭ — ñanagŭrŭgŭ. Rŭ yemaácŭ ningu ga Tupanaârŭ ore ga ũmatŭxŭ ga ñaxŭ: “Nŭgŭmaã nayatoye i chauxchiru, rŭ naxcèx ngĭxŭ tanañanagŭgŭ i wüxi i dĭeru”,

ñaxŭ. Rŭ aixcŭma yemaácŭ nixĭ ga naxŭgŭãxŭ ga churaragŭ. ²⁵ Rŭ Ngechucharŭ curuchapŭnewa iyexma ga naē ga María, rŭ ngĭēyèx, rŭ María ga Creopá naxmèx, rŭ María ga Magadácŭãx. ²⁶ Rŭ yexguma Ngechuchu naēxŭ dèuxgu ga yexma chauxŭtagu na nachixŭ, rŭ ñanagŭrŭ ngĭxŭ: —Pa Mamax, yima nixĭ ya cune, —ñanagŭrŭ. ²⁷ Rŭ yemawena, rŭ ñanagŭrŭ choxŭ: —Ngēma iyixĭ i cue —ñanagŭrŭ. Rŭ yexgumamama rŭ chopatawa ngĭxŭ chayaxu. Rŭ chauxŭtawa iyexmaēcha.

Nayu ga Ngechuchu

²⁸ Rŭ Ngechuchu nüxŭ nacuèx ga marŭ na yanguxŭ ga guxŭma ga norŭ puracŭ ga ñoma ga naãnewa. Rŭ yema Tupanaârŭ ore ga ũmatŭxŭ na yanguxŭēxŭcèx, rŭ ñanagŭrŭ: —Chĭtawa —ñanagŭrŭ. ²⁹ Rŭ yéma iyexma ga wüxi ga tŭxŭãcŭ ga binu ga marŭ ũxchiŭcŭmaã ããcuxcŭ. Rŭ wüxi ga tŭèxmŭ guma binumaã niwaixŭēgŭ, rŭ wüxi ga dexnemenèxãwa nayanèix. Rŭ yemamaã naãxgu nanawèxgŭ. ³⁰ Rŭ Ngechuchu nayaxaxŭ ga guma binu ga ũxchiŭcŭ rŭ ñanagŭrŭ: —Marŭ ningu i guxŭma i chorŭ puracŭ —ñanagŭrŭ. Rŭ ñuxŭchi inayarŭmaxächieru, rŭ nayu.

Wüxi ga churara rŭ wocaxemaã Ngechuchuxŭ nacanapacŭtŭxŭ

³¹ Natŭrŭ ga yema Yudiŭgŭarŭ ãēxgacŭgŭ rŭ tama nanaxwèxegŭ ga curuchagŭwa na nayexmagŭxŭ ga yema naxŭnegŭ. Yerŭ moxŭãcŭ rŭ ngŭxchigaarŭ ngunexŭ nixĭ. Rŭ yema Yudiŭgŭcèx rŭ yema nixĭ ga guxŭ ga ngŭxchigaarŭ ngunexŭârŭ yexera ga ũnèxŭ, yerŭ norŭ peta ga Ũpetŭchigaarŭ ũgŭ nixĭ. Rŭ yemacèx Piratuna naxcèx nacagŭ na churaragŭ yéma namugŭxŭcèx na yapoyeparagŭãxŭcèx na paxa nayuexŭcèx ga yema curuchawa ipotagŭxŭ, rŭ paxa na nadeãxŭcèx ga curuchawa naxŭpa ga ngŭxchigaarŭ ngunexŭ. ³² Rŭ yéma naxĭ ga churaragŭ rŭ inanapoeeparagŭ ga yema taxre ga yatŭgŭ ga Ngechuchumaã yéma curuchawa ipotagŭxŭ. ³³ Rŭ Ngechuchucèx naxĭ ga churaragŭ, natŭrŭ nüxŭ nadaugŭ ga marŭ na nayuxŭ. Rŭ yemacèx tama nayapoyeparagŭ. ³⁴ Natŭrŭ wüxi ga churara rŭ Ngechuchuxŭ nacanapacŭtŭxŭ. Rŭ yexgumatama inayèxŭchi ga nagŭ rŭ dexá. ³⁵ Rŭ choma i Cuáŭ rŭ nüxŭ chadau i guxŭma ga ñaã pemaã nüxŭ chixuxŭ. Rŭ aixcŭma nixĭ i ñaã chorŭ ore. Rŭ chomatama nüxŭ chacuèx i aixcŭma na yĭxŭ, rŭ pemaã nüxŭ chixu na pema rŭ ta peyaxŭgŭxŭcèx. ³⁶ Rŭ yema nangupetŭ na yanguxŭcèx i Tupanaârŭ ore i ũmatŭxŭ i ñaxŭ:

“Rŭ taxŭnetáma ya naxchinèxã nipoyegŭ”,

ñaxŭ. ³⁷ Rŭ toxnamana i Tupanaârŭ ore i ũmatŭxŭwa rŭ ñanagŭrŭ:

“Tá nüxŭ narŭdaunŭ ya yima nacanapacŭtŭxŭgŭãcŭ”, ñanagŭrŭ.

Ngechuchuxŭ inatèxgŭ

(Mt 27.57-61; Mr 15.42-47; Lc 23.50-56)

³⁸ Rŭ nayexma ga wüxi ga yatŭ ga Arimatéacŭãx ga Yúchegu ãegacŭ. Rŭ nŭma rŭ ta Ngechuchuaxŭ nayaxŭ, natŭrŭ cúacŭ nayaxŭ yerŭ natanŭxŭ ga Yudiŭgŭarŭ ãēxgacŭgŭxŭ namuŭ. Rŭ guma nixĭ ga Piratuna yaçacŭ na nayauxãxŭcèx ga Ngechuchuxŭne. Rŭ Piratu rŭ: —Ngŭ, —ñanagŭrŭ.

Rü yexguma ga Yúche rü yéma naxū ga curuchawa íyapotaxūwa, rü curuchawa nayayaxu ga naxūne ga Ngechuchu. ³⁹ Rü yéma nangu ga Nicodému ga ũpaacū chūtacū Ngechuchuxūtagu naxūānecū. Rü yéma nanange ga 30 kilo naguxū ga pumara ga yixichixū na Ngechuchuxū namaā nachaxūnegūxcèx. ⁴⁰ Rü yemaācū ga Yúche rü Nicodému rü curuchawa nanayauxgū ga naxūne ga Ngechuchu. Rü naxchiru ga marū pumaracharaxūmaā nayanáxpūxūgū. Yerū yema nixī ga tocūma ga toma ga Yudíugū ga yexguma wūxi ga yueta tūxū itatèxgūgu. ⁴¹ Rü yema nachica ga Ngechuchu curuchawa ípotaxūwa nayexma ga wūxi ga nanetūnecū. Rü yema nanetūnecūwa nayexma ga wūxi ga naxmaxū ga yexwacaxūxū ga taguma texéxū nagu natèxgūxū. ⁴² Rü yema naxmaxūgu nayaxūcuchigū ga Ngechuchuxūne yerū nangaicama, rü paxa tá ningune ga ngūxchigaarū ngunexūcèx.

20

Ínarūda ga Ngechuchu

(Mt 28.1-10; Mr 16.1-8; Lc 24.1-12)

¹ Rü yūxūarū pèxmamaxūchi ga tauta meā yangóonegu, rü María ga Magadácūāx rü Ngechuchuxū íyaxūcuchigūxūwa ixū. Rü nūxū idau ga guma nuta ga Ngechuchumaxū namaā rüngūxtaūcū, rü marū na ínaxūgachixū. ² Rü yexgumatama íñaāchi, rü yema choma rü Chimáū ga Pedrumaā ítayexmagūxūwa íña. Rü ngīgūrūgū toxū: —Rü marū nanayauxgū ya Cori ya Ngechuchu i naxmaxūwa. Rü tama nūxū tacuèx na ngexta na naxūgūāxū —ngīgūrūgū. ³ Rü yexguma ga choma rü Pedru rü Ngechuchuxū íyaxūcuchigūxūwa taxī. ⁴ Rü wūxigu itaxūāchi ga tomāx, natūrū ga choma rü poraācū Pedruarū yexera ichañaāchi. Rü chaxira Ngechuchuxū íyaxūcuchixūwa changu. ⁵ Rü ichayarūmaxāchi na nagu chidaucuchixūcèx. Rü nūxū chadau ga naxchiru ga namaā yanáxpūxūgūāxū ga yexma na naxūxū. Natūrū tama aixpegu chaxūcu. ⁶ Rü choweama ínangu ga Chimáū ga Pedru. Rü nūma rü yema naxmaxūgu naxūcu. Rü nūma rü ta nūxū nadau ga yema naxchiru ga namaā yanáxpūxūchiréxū. ⁷ Rü nūxū nadau ta ga naxchiru ga namaā yanèixérugūāxū ga meāma dixcumūxū ga nūxrūguma ūxū. Rü tama wūxigu namaā nanu ga yema naxchiru ga namaā yanáxpūxūgūāxū. ⁸ Rü yexguma ga choma ga chaxiraxūchi yéma na changuxū, rü choma rü ta chixūcu. Rü nūxū chadau ga guxūma, rü chayaxō ga Ngechuchu rü marū wena na namaxūxū. ⁹ Yerū noxri rü tama nūxū tacuèxgūéga ga yema Tupanaārū ore ga ūmatūxū ga ñaxū: “Cristu rü tá wena namaxū”, ñaxū. ¹⁰ Rü yexguma ga toma rü tochiūcèx tawoegu.

Ngechuchu rü ngīxcèx nangox ga María ga Magadácūāx

(Mt 16.9-11)

¹¹ Natūrū ga María rü yexma irūxāūx naxūtagu ga Ngechuchumaxū. Rü yéma ixaxu. Rü naxauxācūma iyarūmaxāchi, rü nagu iyadaucuchi ga naxmaxū. ¹² Rü nūxū idau ga taxre ga daxūcūāx ga Tupanaārū orearū ngeruūgū ga ícómūchiruxū. Rü Ngechuchuxūne ixūchiréxūwa narūtogū, rü wūxi ga Ngechuchueru ixūxūwaama rü to ga nacūtawaama. ¹³ Rü yema daxūcūāx ga duūxūgū rü ngīxna nacagūe, rü ñanagūrūgū: —Pa Ngecūx, ¿tacūcèx cuxaxu? —ñanagūrūgū. Rü ngīma rü ínangāxū, rü

ngĩgürügü: —Chaxaxu erü nayangegü i naxũne ya chorü Cori, rü tama nüxũ chacuèx na ngexta naxügüãxũ —ngĩgürügü. ¹⁴ Rü yexgumatama yema ngĩxgu, rü ngĩgüweama idau. Rü nüxũ idau ga Ngechucha ga ngĩxũtawa na nayexmaxũ. Natürü tama nüxũ icuèx ga Ngechuchu na yĩxũ ga guma. ¹⁵ Rü yexguma ga Ngechuchu rü ngĩxna naca, rü ñanagürü: —Pa Ngecüx, ¿tacücèx cuxaxu? ¿Rü texécèx nixĩ i cud-auxũ? —ñanagürü. Rü ngĩma nüxũ nacuèxgu rü yema nixĩ ga yema nanetü necüarü dauruũ. Rü yemacèx ngĩgürügü nüxũ: —Pa Corix, ega cuma cuyangexgu i naxũne ya Ngechuchu, rü ¡chomaã nüxũ ixu na ngexta na cunaxũxũ na choma chayayaxuxücèx! —ngĩgürügü. ¹⁶ Rü yexguma ga Ngechuchu rü ñanagürü ngĩxũ: —Pa Maríax —ñanagürü. Rü ngĩma rü naxcèx idau egüãchi, rü togawa ngĩgürügü nüxũ: —Pa Rabunix —ngĩgürügü. Rü ngẽma rü “Pa Ngüexẽeruũx”, ñaxũchiga nixĩ. ¹⁷ Rü Ngechuchu rü ñanagürü ngĩxũ: —¡Tãxũ i choxũ quingögüxũ, erü tauta Chaunatũxũtawa chaxũ! ¡Natürü ngema chaueneegũtanũwa naxũ rü namaã nüxũ yarũxu na choma rü tá Chaunatũ ya chorü Tupana ya Penatũ ya perü Tupanaxũtawa chaxũxũ! —ñanagürü. ¹⁸ Rü yexguma ga María ga Magadácũãx rü tomaã nüxũ iyarũxu ga marü nüxũ na nadauxũ ga Cori ga Ngechu-chu. Rü ñuxũchi tomaã nüxũ iyaxu ga yema ore ga Ngechuchu ngĩmaã nüxũ ixuxũ.

Norü ngüexũgücèx nangox ga Ngechuchu

(Mt 28.16-20; Mr 16.14-18; Lc 24.36-49)

¹⁹ Rü yema yũxũarü ngunexũarü chũtacü, rü tangutaquèxegü ga toma ga Ngechuchuarü ngüexũgü. Rü togü tarũwãtaũgü, yerü yema Yudĩugũarü ãèxgacügüxũ tamuũe. Rü Ngechuchu rü ngürũãchi yema nangox, rü torü ngãxũtanũgu nachi. Rü toxũ narũmoxẽ, rü ñanagürü: —¡Petaãègü! —ñanagürü. ²⁰ Rü yema ñaxguwena rü toxũ nügü nawémèx, rü nügü inawépacütũxũ. Rü tomagü ga norü ngüexũgü rü tataãègü, yerü nüxũ tadaugü ga guma torü Cori. ²¹ Rü yexguma rü wenaxãrũ ñanagürü toxũ: —¡Petaãègü! Rü yema Chaunatũ núma choxũ na muxũrũũ tátama nixĩ i pexũ chamuxũ i chomax —ñanagürü. ²² Rü yexguma rü toètü “cue” ñanagürü ga Ngechuchu. Rü ñuxũchi ñanagürü toxũ: —¡Penayauxgü i Tupanaãe i Üünexũ! ²³ Rü ngẽxguma duũxũgü nüxũ rüxoegu i norü pecadugü, rü pema rü pexũ nangèxma i pora na namaã nüxũ pixuxũ na Tupana marü nüxũ nüxũ rüngũmaxũ i norü pecadugü. Natürü ngẽxguma duũxũgü tama nüxũ rüxoegu i norü pecadugü, rü pema rü pexũ nangèxma i pora na namaã nüxũ pixuxũ na marü ngẽma norü pecadugüwatama nangèxmagüxũ —ñanagürü ga Ngechuchu.

Tumachi nüxũ nadau ga Cori ga wena maxũcü

²⁴ Natürü totanũxũ ga Tumachi ga Wüxigu Buexũmaã taxugüxũ, rü tama totanũwa nayexma ga yexguma Ngechuchu toxcèx ngoxgu. ²⁵ Rü yixcama ga toma rü Tumachimaã nüxũ tixugüe, rü ñatarügügü: —Marü nüxũ tadau ya tórü Cori ya Ngechuchu —ñatarügügü. Natürü ga Tumachi rü toxũ nangãxũ rü ñanagürü: —Ngẽxguma tama nüxũ chadèuxgu i norü itapuamaxũ i naxmèxwa rü tama nüxũ chingögügu i ngẽma itapuamaxũ rü ngẽma norü cana-pacütũxũ, rü tãütãma chayaxõ i ngẽma ore i chomaã nüxũ pixuxũ —ñanagürü. ²⁶ Rü 8 ga ngunexũguwena rü wenaxãrũ tangutaquèxegü ga toma ga wüxi ga İpatawa. Rü totanũwa nayexma ga Tumachi ga yexguma. Rü woo ga na nawãxtaxũ ga İãx, rü ngürũãchi yéma

nangox ga Ngechuchu, rü torü ngãũtanügu nachi. Rü toxũ narümoxê, rü ñanagürü: —¡Petaãégü! —ñanagürü. ²⁷ Rü yexguma Tumachixũ ñanagürü ga Ngechuchu: —¡Nüxũ ingögü i ñaã chorü itapuamaxũ i choxmëxwa ngëxmaxũ, rü nüxũ nadau ya daa choxmëx! ¡Rü nuxa chorü canapacütüügu ingögü! ¡Rü nüxũ rüxo na tama cuyaxõxũ! ¡Rü meãma yaxõ i ñuxmax! —ñanagürü. ²⁸ Rü yexguma ga Tumachi rü Ngechuchuxũ nangãxũ, rü ñanagürü: —Pa Chorü Corix, cuma nixĩ i chorü Tupana quiixũ —ñanagürü. ²⁹ Rü Ngechuchu rü ñanagürü nüxũ: —Pa Tumachix, cuma cuyaxõ i ñuxma erü choxũ cudau. Natürü tataãégü ya yixema tama choxũ daugüãcuma yaxõguxe —ñanagürü.

Tacüçex naxümatü i ñaã popera

³⁰ Rü Ngechuchu rü topëxewa nanaxü ga muxüma ga to ga mexügu ga cuëxruügu i tama ñaã poperagu ümatüxũ. ³¹ Natürü guxüma i ñaã poperagu ümatüxũ, rü naxümatü na peyaxõgüxüçex na Ngechuchu rü Cristu ya Tupana Nane na yixũ. Rü ngëxguma nüxũ peyaxõgügu rü tá pexũ nangëxma i maxũ i taguma gúxũ.

21

Ngechuchu rü 7 ga norü ngüexüçüçex nangox

¹ Rü yemawena ga Ngechuchu rü wenaxãrü toxçex nangox naxtaxa ga Gariréaanacüwa. Rü Tibéria nixĩ ga to ga naega. Rü ñaãcü nixĩ ga toxçex nangóxũ. ² Rü wüxiwa tayexmagü ga choma rü Chaütiágu ga Zebedeu nanegü rü Chimáü ga Pedru, rü Tumachi ga Wüxigu Buexümaã taxugüxũ, rü Natanae ga Gariréaanegune ga ñane ga Canácüãx, rü to ga taxre ga tomücügu ga Ngechuchuarü ngüexügu. ³ Rü Chimáü ga Pedru rü ñanagürü toxü: —Tá chayapüchae —ñanagürü. Rü yexguma ga toma rü tanangãxüügu, rü ñatarüügü nüxũ: —Toma rü tá ta cuwe tarüxĩ —ñatarüügü. Rü yéma taxĩ, rü wüxi ga nguegu tichoũ. Natürü yema chütaxügu rü taxuüma ga choxni tiyauxgü. ⁴ Rü yexguma noxri yangóonegu rü Ngechuchu toxçex nangox ga naxtaxaanacüwa. Natürü ga toma rü tama nüxũ tacuëxgü ga Ngechuchu na yixũ. ⁵ Rü yexguma ga Ngechuchu rü toxna naca, rü ñanagürü toxü: —Pa Ngextüxüçüçex, çéxna taxuüma i choxni piyauxgü? —ñanagürü. Rü toma rü tanangãxüügu rü ñatarüügü: —Taxuüma —ñatarüügü. ⁶ Rü yexguma ga Ngechuchu rü ñanagürü toxü: —¡Pewetãrü tügüncüwawaama penatáe i perü pücha! rü tá ípenayauxũ i choxni —ñanagürü. Rü yémaãma tanatáegü ga torü pücha, rü taxucürüwa ítanatüãchigü, yerü muxüchixũ ga choxni tiyauxgü. ⁷ Rü yexguma ga choma rü Pedruxũ ñacharüügü: —Yima nixĩ ya Cori ya Ngechuchu —ñacharüügü. Rü yexguma yemaxũ naxinügu ga Pedru ga guma na yixũ ga Cori, rü nicüxcuchi ga naxchiru yerü noxri rü ínacüxuchichirëx. Rü natüchiüwa nayuxu, rü naxãnacüwa naxçex nawëxê. ⁸ Rü toma ga natanüxũ rü nguemaãtama naxãnacüwa taxãgü. Rü yéma tanatüügü ga yema pücha ga choxnimaã ãacuxũ yerü 100 metruxicatama nataxu ga na naxãnacüwa na tangugüxũ. ⁹ Rü yexguma nguewa ítachoügu rü yéma nüxũ tadau ga wüxi ga üxü, rü naxëtügu naxü ga wüxi ga choxni. Rü yéma nayexma ta ga wüxi ga päü. ¹⁰ Rü Ngechuchu rü ñanagürü toxü: —¡Nuãta penge i ñuxre i ngëma choxni i ípeyauxüxũ! —ñanagürü. ¹¹ Rü Chimáü ga Pedru rü nguegu nixüe. Rü yema püchamaã naxnücügu ínanatüãchiwetaũ ga choxni ga inayauxüxũ. Rü 153 ga choxni

ga itaxŦ nayexma nawa ga yema pŦcha. RŦ woo ga na namuxŦchixŦ, rŦ tama narŦgáu ga pŦcha. ¹² RŦ yexguma ga Ngechuchu rŦ űanagŦrŦ toxŦ: —¡Nuā pexŦ rŦ peyachibŦe! —űanagŦrŦ. RŦ taxŦema ga toma rŦ nŦxna tacaxchaŦ na texŦ yŦixŦ ga nŦmax, yerŦ marŦ nŦxŦ tacuŦxgŦ ga guma na yŦixŦ ga Cori ga Ngechuchu. ¹³ RŦ yexguma ga Ngechuchu rŦ yŦema toxŦtawa naxŦ. RŦ nanayaxu ga pāŦ rŦ wŦxichigŦ toxna nanaxā. RŦ yexgumarŦŦ ta ga choxni rŦ toxna nanaxā. ¹⁴ RŦ yema nixŦ ga norŦ tomaŦxpŦxcŦna ga toxcŦ na nangŦxŦ ga Ngechuchu ga yuwa ũnadaxguwena.

Ngechuchu rŦ Pedrumā nidexa

¹⁵ RŦ yexguma chibŦewa tingugŦguwena rŦ Ngechuchu rŦ ChimāŦ ga Pedruna naca, rŦ űanagŦrŦ: —Pa ChimāŦ Pa CuāŦ Nanex, ŦaixcŦma choxŦ cungechaŦxŦ i űāā cumŦcŦgŦxŦ na cungechaŦxŦārŦ yexera? —űanagŦrŦ. RŦ Pedru nanangāxŦ, rŦ űanagŦrŦ: —NgŦ, Pa Corix, cuma nŦxŦ cucuŦ na cuxŦ changechaŦxŦ —űanagŦrŦ. RŦ Ngechuchu rŦ űanagŦrŦ nŦxŦ: —¡NachibŦexŦŦ i chorŦ duŦxŦgŦ! —űanagŦrŦ. ¹⁶ RŦ wenaxārŦ Pedruna naca, rŦ űanagŦrŦ: —Pa ChimāŦ Pa Yonā Nanex, ŦaixcŦma i choxŦ cungechaŦxŦ? —űanagŦrŦ. RŦ Pedru nanangāxŦ, rŦ űanagŦrŦ: —NgŦ, Pa Corix, cuma nŦxŦ cucuŦ na cuxŦ changechaŦxŦ —űanagŦrŦ. RŦ Ngechuchu rŦ űanagŦrŦ nŦxŦ: —ĒcŦ, űnŦxna nadau i chorŦ duŦxŦgŦ! —űanagŦrŦ. ¹⁷ RŦ norŦ tomaŦxpŦxcŦna wenama Pedruna naca, rŦ űanagŦrŦ: —Pa ChimāŦ Pa Yonā Nanex, ŦaixcŦmaxŦchi yŦixŦ i choxŦ cungechaŦxŦ? —űanagŦrŦ. RŦ yexguma ga Pedru rŦ dŦxwa nangechaŦ, yerŦ norŦ tomaŦxpŦxcŦna Ngechuchu nŦxna naca ngoxi aixcŦma nŦxŦ nangechaŦ. RŦ űanagŦrŦ ga Pedru: —Pa Corix, cuma nŦxŦ cucuŦ i guxŦma. RŦ cuma nŦxŦ cucuŦ na aixcŦmaxŦchi cuxŦ changechaŦxŦ —űanagŦrŦ. RŦ Ngechuchu űanagŦrŦ nŦxŦ: —ĒcŦ űnachibŦexŦŦ i chorŦ duŦxŦgŦ! ¹⁸ —RŦ aixcŦma cumaā nŦxŦ chixu rŦ yexguma cunxextŦxŦgu rŦ cugŦ quicŦxcuchi ga na ngextā cuma ũcunaxwŦxŦwa cuxŦxŦcŦx. NatŦrŦ ngŦxguma yaguāx quixŦgu rŦ tá quixuuchichacŦŦ na togue cuxŦ ũcŦxcuchixŦcŦx. RŦ ngŦma tama cuma ũcunaxwŦxŦwa tá cuxŦ nagagŦ —űanagŦrŦ. ¹⁹ RŦ Ngechuchu rŦ yema űanagŦrŦ na nŦxŦ nŦxŦ nacuŦxŦcŦx ga űuxācŦ tá na nayuxŦ ga Pedru na yemaācŦ TupanaxŦ nataxŦxŦcŦx. RŦ yemawena ga Ngechuchu rŦ űanagŦrŦ nŦxŦ: —¡Chowe rŦxŦ! —űanagŦrŦ.

Yema ngŦxŦ ga Ngechuchu poraācŦ nŦxŦ ngechaŦxŦchiga

²⁰ RŦ yexguma nŦgŦweama nadŦxgu ga Pedru rŦ choxŦ nadau ga naweama na ne chaxŦxŦ. RŦ chomachirŦx nixŦ ga chibŦwa NgechuchucŦwawa charŦtoxŦ rŦ nŦxna chaçaxŦ rŦ űachaxŦ:

“Pa Corix, ŦtexŦ tá tixŦ ya yŦxema bexma cuechita cuxŦ ũxuxŦxŦŦ” űachaxŦ. ²¹ RŦ yexguma Pedru choxŦ dŦxgu rŦ Ngechuchuna naca, rŦ űanagŦrŦ: —Pa Corix, Ŧűāā CuāŦ rŦ ŦacŦ tá nŦxŦ ũpetŦxŦ? —űanagŦrŦ. ²² RŦ Ngechuchu nanangāxŦ, rŦ űanagŦrŦ nŦxŦ: —NgŦxguma choma chanaxwŦxŦgu rŦ chanamaxŦŦ űuxmatāta wena nŦma chaxŦ. ŦRŦ tŦxcŦxŦ i nagu curŦxŦnŦxŦ i ngema? RŦ cuma űrŦ chowe rŦxŦ! —űanagŦrŦ. ²³ RŦ yexguma yema chomŦcŦgŦ nŦxŦ ũnŦŦgu ga yema chauchiga, rŦ nagu narŦxŦnŦe na taxŦtama chayuxŦ. NatŦrŦ Ngechuchu rŦ tama nŦxŦ nixu ga tāxŦtāma na chayuxŦ. NatŦrŦ űanagŦrŦmare:

“Ngëxguma choma chanaxwèxegu rü chanamaxëë ñuxmatáta wena núma chaxü. ¿Rü tüxcüxü i nagu curüxĩnüxü i ngëma?”, ñanagürümare.²⁴ Rü chomatama nixĩ ga nüxü chadauxü i guxüma i ñaã pemaã nüxü chixuxü, rü chomatama nixĩ i pexcèx chanaxümatüxü i ñaã ore. Rü guxãma i toma rü nüxü tacuèx na aixcüma na yĩixü i ñaã pemaã nüxü chixuxü.²⁵ Rü nayexma ga to ga muxüchixüma ga tacü ga Ngechuchu üxü. Rü ngëxguma chi naxümatügu i guxüma ga yema naxüxüchiga, rü nagu charüxĩnügu rü tãü chima ñoma i naãnegu name i ngëma poperagü i nachiga ümatüxü.

NGECHUCHUARÜ NGÜEXÜGÜ GA YAMUGÜXÜÄRÜ PURACÜCHIGA

Tupana inaxuneta rü tá ínangu i Naãe i Üünexü

¹⁻² Pa Mecü Pa Teóquirux, nüxíra chaxümatüxü ga poperawa cumaã nüxü chixu ga guxüma ga Ngechuchu üxü rü duüxügüxü namaã nangüexëëxü ga noxritama inaxügüãgu ga norü puracü ñuxmata yema ngunexü ga Tupana daxüguxü ga naãnewa nagaxgu. Rü yexguma tauta daxüguxü ga naãnewa naxüxgu ga Ngechuchu rü nayadexechi ga norü ngüexügü ga yamugüchaüxü na Tupanaärü puracü naxügüxücëx. Rü Tupanaãe i Üünexüärü poramaã nanangüexëë ga yema duüxügü, rü namaã nüxü nixu ga tacü tá na naxüexü. ³ Rü yexguma marü yuwa inadëxguwena ga nüma ga Ngechuchu rü 40 ga ngunexügu rü nügü nangoxëëxü naxcëx ga norü ngüexügü rü muxüma ga togü ga nüxü yaxögüxü na yemaãcü nüxü nacuëxgüxücëx na aixcüma wena namaxüxü. Rü namaã nüxü nixuchiga na ñuxäcü na yixü i Tupana äëxgacü iyixüwa. ⁴ Rü yexguma yema ngüexügü ga yamugüxütanüwa nayexmagu ga Ngechuchu, rü namaã nüxü nixu ga tama nüxna na ngextá naxixücëx ga Yerucharéü. Rü ñanagürü nüxü: —¡Ipenangüexëëx i ngëma Tupanaãe i Üünexü ga Chaunatü pemaã ixunetaxü ga pemaã nüxü chixuchigaxü! ⁵ Aixcüma nixü ga Cuáü rü dexáwa duüxügüxü ínabaiüxëëxü, natürü i pema rü täütáma muxü i ngunexü nangupetü na Tupanaãe i Üünexü tá pexna nguxü —ñanagürü.

Daxüguxü ga naãnewa naxü ga Ngechuchu

⁶ Rü yexguma nangutaquëxegüga ga yema norü duüxügü, rü Ngechuchuna nacagü, rü ñanagürügü: —Pa Corix, ¿éxna ñoma tá nixü i ngunexü i marü ícunawoxü i nuã Yudügüchiüãnewa i torü uwanügüarü churragü na wenaxärü tomatama namaã itacüxücëx i ñaã tochiüãne? —ñanagürügü. ⁷ Rü Ngechuchu nanangäxü, rü ñanagürü: —Pema rü taxucëxma nüxü pecuáxchaü i ñuxgu tá nixü i ngëma ngunexü, erü Chaunatüxicatama nüxü nangëxma i pora na nüxü naxunetaxü i ngëma ngunexü i choxna naxcëx pecaxü. ⁸ Natürü ngëxguma pexna nanguxgu i Tupanaãe i Üünexü, rü tá pexü naporaexëë. Rü tá ípechoxü na nüxü peyarüxügüxücëx i chauchiga i Yerucharéüwa, rü guxüma i Yudeaanewa, rü Chamáriaanewa, rü ñuxmatáta guxü i naãnewa nangu —ñanagürü. ⁹ Rü yexguma yema ñaxguwena rü nüxü ínadaunüyane ga norü ngüexügü, rü Tupana rü daxüguxü ga naãnewa Ngechuchuxü naga. Rü wüxi ga caixanexügu nayaxücu, rü yemaãcü tama wenaxärü nüxü nadaugü. ¹⁰ Rü yexguma Ngechuchuxü ínadaunüyane ga daxüwa na naxüxü, rü ngürüächí natanüwa nangox ga taxre ga yatü ga ícó müchiruxü. ¹¹ Rü ñanagürügü nüxü: —Pa Yatügü i Gariréaanecüãx, ¿tüxcüü daxügu íperüdaunü? Erü daatama Ngechuchu ga petanüwa yexmacü rü ñuxma Tupana daxüwa nagacü, rü ngëma ñuxma nüxü na pedauxü na ñuxäcü daxüwa naxüxü, rü ngëmaãcü tátama nixü i wena núma naxüxü —ñanagürügü.

Yudachicüü nanayauxgü ga Matía

12 Rū yema ngúexŭgŭ ga Ngechuchu imugŭxŭ na Tupanaärŭ puracŭ naxŭgŭxŭcèx, rŭ nŭxna ínixŭ ga guma mèxpŭne ga Oríbunecŭgu äegane. Rŭ Yerucharéücèx nawoegu. Rŭ guma íanearŭ yaxŭ nŭxna ga guma mèxpŭne rŭ wŭxi ga kilómetru nixŭ. 13 Rŭ yexguma Yerucharéüärŭ íañewa nangugŭgu, rŭ nagu nachocu ga guma í ga nagu napegŭne. Rŭ dauxna naxŭgŭ naxcèx ga yema ucapu ga taxŭ ga nagu napegŭxŭ. Rŭ nŭmagŭ nixŭ ga Pedru, rŭ Cuáŭ, rŭ Chaŭtiágu, rŭ Aŭdré, rŭ Piripi, rŭ Tumachi, rŭ Baturumé, rŭ Mateu, rŭ Chaŭtiágu ga Arupéu nane, rŭ Chimáŭ ga Ipóraãécüücü, rŭ Yuda ga Chaŭtiágu nañene. 14 Rŭ guxŭma ga nŭmagŭ rŭ guxŭguma nangutaquèxegŭxŭ na wŭxi gu nayumŭxègŭxŭcèx namaã ga Ngechuchueneègŭ, rŭ ngímaã ga María ga Ngechuchu naè, rŭ ñuxre ga togŭ ga ngexŭgŭ. 15 Rŭ guxŭma ga yema ngunexŭgŭgu rŭ nangutaquèxegŭxŭ ga yema yaxŭgŭxŭ. Rŭ 120 nixŭ. Rŭ wŭxi ga ngunexŭgu ga Pedru rŭ inachi ga norŭ ngãxŭtanŭwa, rŭ ñanagŭrŭ: 16 — Pa Chomŭcŭgŭx, marŭ ningu ga yema Tupanaãè i Üñexŭ nuxcŭma Dabíxŭ muxŭ na naxŭmatŭãxŭcèx nachiga ga Yuda ga namaärŭ cuèxruŭ íxŭxŭ naxcèx ga yema duŭxŭgŭ ga Ngechuchuxŭ iyauxgŭxŭ. 17 — Rŭ tatanŭxŭchirèx nixŭ ga Yuda, rŭ nŭma rŭ ta taxrŭŭ ñaã Tupanaärŭ puracŭwa napuracŭ ga noxrix. 18 — Natŭrŭ nŭma ga Yuda rŭ bexma Ngechuchuxŭ ínaxuaxŭ. Rŭ yemacèx ga äèxgacŭgŭ rŭ nŭxŭ nanaxŭtanŭ. Natŭrŭ yŭxcama ga Yuda rŭ naxcèx ínicèx ga yema chixexŭ ga naxŭxŭ, rŭ yemacèx nanataeguxèè ga yema díeru. Rŭ yemawena rŭ nŭgŭ nawèxnaxã rŭ nañtanŭwa nŭgŭ narŭtáe. Rŭ yexguma duŭxŭgŭ nadaexŭgŭgu rŭ inanago, rŭ niwãxpŭtŭwe rŭ ínayixŭ ga nañnŭta. Rŭ yema díeru ga nataeguxèèxŭmaã ga äèxgacŭgŭ rŭ naxcèx nataxe ga wŭxi ga nañne. 19 — Rŭ nŭxŭ nacuáchigagŭ ga guxŭma ga Yerucharéücŭãx, rŭ yemacèx Achédamagu nanaxŭéga ga yema nañne. Rŭ ngèma nixŭ i “Nagŭchitaŭ” ñaxŭchiga. 20 — Rŭ Wiyægŭarŭ poperawa yemachiga nanaxŭmatŭ ga Dabí, rŭ ñanagŭrŭ:

“Yixrŭma rŭ ngema natá ya napata, rŭ taxúema nagu pe”, ñanagŭrŭ. Rŭ toxnamana i ngèma poperawa rŭ ñanagŭrŭ ta:

“Rŭ name nixŭ na togue naxŭxŭ i ngèma norŭ puracŭ”, ñanagŭrŭ. 21-22 — Rŭ nuã tatanŭwa nangèxmagŭ i ñuxre i yatŭgŭ ga guxŭguma tŭxŭ ümŭcŭgŭxŭ ga yexguma tatanŭwa nanuxmagu ga Cori ga Ngechuchu. Rŭ nŭmagŭ rŭ tawe narŭxŭ ga noxritama Cuáŭ Ngechuchuxŭ íbaixèègu rŭ ñuxmata yema ngunexŭ ga daxŭguxŭ ga nañnewa naxŭxgu. Rŭ name nixŭ i ngèmatanŭwa na nayaxuxŭ i wŭxi i Yudachicüüxŭ na tamŭcü yŭxŭcèx rŭ tarŭŭ nŭxŭ yaxuxŭcèx i ñuxãcü wena na namaxŭxŭ ya Ngechuchu. 23 Rŭ yemawena rŭ nŭxŭ naxunetagŭ ga taxre ga yatŭgŭ. Rŭ wŭxi nixŭ ga Yúche ga Yuchugu äegaxŭ ga Bachabámaã naxugŭxŭ. Rŭ Matía nixŭ ga to. 24-25 Rŭ ñaãcü nayumŭxègŭ: — Pa Corix, cuma nŭxŭ cucuèx i guxŭma i duŭxŭgŭarŭ maxŭ. ¡Rŭ ñuxma rŭ toxŭ nawèx i ngèxŭrŭüxŭ i cuxcèx mexŭ i ñaã taxrewa na cunamuxŭcèx rŭ nŭma na naxŭãxŭcèx i ñaã puracŭ ga Yuda ítáxŭ ga yexguma norŭ poxcuwa naxŭxgu! — ñanagŭrŭgŭ. 26 Rŭ wŭxi ga díeru ga cuèxruŭ ngŭxŭ nañanagŭgŭ na yemawa nŭxŭ nacuèxgŭxŭcèx ga ngèxŭrŭüxŭ ga yema taxre tá na íxŭcuxŭ. Rŭ Matíagu nangu na yangucuchixŭcèx. Rŭ yexgumatama rŭ yema 11 ga duŭxŭgŭ ga Ngechuchu imugŭxŭtanŭgu naxã ga Matía.

2

Īnanqu ga Tupanaãē i Ūūnexŭ

¹ Rŭ nawa nangu ga yema Yudiŭgŭarŭ peta ga Pētecóstege ãegaxŭ. Rŭ yema ngunexŭgu rŭ guxŭma ga yema yaxôgŭxŭ rŭ wŭxi ga nachicawa nangutaquēxegŭ. ² Rŭ ngŭrŭãchi daxŭwa ne naxŭ ga wŭxi ga naga ñoma wŭxi ya buanecŭ ya taxŭchicŭ icuxcugurŭŭ, rŭ guxŭne ga guma ĩ ga nawa nayexmagŭnegu nayaxŭga. ³ Rŭ naxcèx nangox ga ŭxŭema ga ñoma naconŭgŭraŭxŭ. Rŭ yema ŭxŭema rŭ nŭgŭna nixŭgŭ, rŭ wŭxichigŭ ga yema yaxôgŭxŭna ninguchigŭ. ⁴ Rŭ guxŭma ga yema yexmagŭxŭ rŭ Tupanaãxē ga Ūūnexŭ nŭxna nangu. Rŭ yema Naãē i Ūūnexŭ yadexagŭxēxŭãcŭma inanaxŭgŭe ga to ga nagawachigŭ na yadexagŭxŭ. ⁵ Rŭ yema ngunexŭgŭgu rŭ yema petacèx Yerucharēŭwa nayexmagŭ ga muxŭma ga toxnamana ne ĩxŭ ga Yudiŭgu ga Tupanaga ĩnŭxŭ ga guxŭ ga togŭ ga nachŭĭãnewa ne ĩxŭ. ⁶ Rŭ yexguma nŭxŭ naxŭnŭēgu ga ñuxãcŭ na yadexagŭxŭ ga yema yaxôgŭxŭ, rŭ nangutaquēxegŭ ga muxŭma ga yema duŭxŭgŭ ga toxnamana ne ĩxŭ. Rŭ naĭaixãchiãēgŭ yerŭ yema yaxôgŭxŭ rŭ wŭxichigŭ ga yema togŭ ga duŭxŭgŭgawachigŭ nidexagŭ. ⁷ Rŭ yema na poraãcŭ naĭaixãchiãēgŭxŭcèx, rŭ nŭgŭmaã rŭ ñanagŭrŭgŭ: —¿Tama ěxna Gariréaanecŭãx yixŭgŭxŭ i guxŭ i ñaã duŭxŭgŭ i tagawa idexagŭxŭ? ⁸ —¿Rŭ ñuxãcŭ ěxna i nŭxŭ ĩxŭnŭxŭ i wŭxichigŭ i yixema i taga i nawa iyaexŭwa na yadexagŭxŭ? ⁹⁻¹¹ —Yixema tixŭgŭ i Pártiaanecŭãx, rŭ Médiaanecŭãx, rŭ Eraŭãanecŭãx, rŭ Mechopotãmiãanecŭãx, rŭ Yudéaanecŭãx, rŭ Capadochiaanecŭãx, rŭ Pôtuaneŭãx, rŭ Áchiaarŭ naãnecŭãx, rŭ Piriquiaanecŭãx, rŭ Paŭpíriaanecŭãx, rŭ Equitarŭ naãnecŭãx, rŭ Díbiaarŭ naãnecŭãx i Chirenecŭãx. Rŭ tatanŭwa nangēxma ta i duŭxŭgŭ i Crétaanewa rŭ Arábiiarŭ naãnewa ne ĩxŭ. Rŭ ñuxre i yixema rŭ Dumacŭãx i Yudiŭgu tixŭgŭ. Rŭ nuã tatanŭwa nangēxma ta i Dumacŭãx i tama Yudiŭgu ĩxŭgŭxŭ natŭrŭ tacŭmagu ĩxŭ. Rŭ guxŭma rŭ nŭxŭ taxŭnŭe na wŭxichigŭ i tagawachigŭ na yadexagŭxŭ i ñaã ngŭxŭgŭ. Rŭ tagawa tamaã nŭxŭ nixugŭe i ñuxãcŭ na namexēchixŭ ya Tupana —ñanagŭrŭgŭ. ¹² Rŭ guxŭma poraãcŭ naĭaixãchiãēgŭ, rŭ tama nŭxŭ nacuèxgŭ ga ñuxãcŭ na yŭxŭ ga yema. Rŭ nŭgŭna nacagŭe, rŭ ñanagŭrŭgŭ: —¿Tacŭchiga nixŭ i guxŭma i ñaã? —ñanagŭrŭgŭ. ¹³ Natŭrŭ ga togŭ rŭ nŭxŭ nacugŭecŭraxŭ, rŭ ñanagŭrŭgŭ: —Nangãxēmare rŭ ngēmacèx nixŭ i ngēmaãcŭ yadexagŭxŭ —ñanagŭrŭgŭ.

Pedruarŭ dexa

¹⁴ Rŭ yexguma inachi ga Pedru namaã ga yema 11 ga namŭcŭgŭ, rŭ tagaãcŭma ñanagŭrŭ: —Pa Yudiŭgŭ i nuxma Yerucharéŭgu naxŭãnecŭ rŭ Pa Nuãŭãxgŭx, rŭ dŭcax, meã iperŭxŭnŭe i ñaã tá pemaã nŭxŭ chixuxŭ! ¹⁵ —Rŭ ñaã chomŭcŭgŭ rŭ tama nangãxē i pema nagu perŭxŭnŭēxŭrŭŭ, erŭ pèxmamatama nixŭ rŭ ngexwacèx 9 arŭ orawa nangu. ¹⁶ —Natŭrŭ ñaã ñuxma nŭxŭ pedauxŭ nixŭ ga yema Tupanaarŭ orearŭ uruŭ ga Yoé marŭ nŭxŭ ixuchigaxŭ ga yexguma ñaxgux:

¹⁷ “Rŭ ñanagŭrŭ ya Tupana: ‘Ngēma nawa iyacuáxŭ i ngunexŭgŭgu rŭ guxŭ i duŭxŭgŭtanŭwa tá chanamu i Chauãē i Ūūnexŭ, rŭ penegŭ rŭ pexacŭgŭ rŭ tá chauchigagu nidexagŭ. Rŭ choma rŭ tá chayangoxetŭxēe i perŭ ngextŭxŭgŭ rŭ tá nŭxŭ nadaugŭ i ngēma tá nŭxŭ chawéxŭ. Rŭ perŭ yaguãxgŭmaã tá chidexa i

nanegūwa. ¹⁸ Rū chorū duūxūgūtanūwa tá chanamu i Chauãe i Üünexū i ngēma ngunexūgūgu, rü tá chauchigagu nidexagū. ¹⁹ Rū naãnetūwewa tá ichanawēx i mexūgū i taguma nüxū idauxū. Rū ñoma i naãnewa tá ichanawēx i cuēxruūgū i nagū, rü üxüema, rü taemaxū. ²⁰ Rū üexcū rü tá nixoema rü tauemacū rü tá nagūrū naduema naxūpa na wenaxârū núma naxūxū ya Cori. Rū ngēma ngunexū i nagu núma naxūxū, rü wūxi i ngunexū i mexēchixū tá nixī. ²¹ Rū guxāma ya yíxema Corina çaxe na tüxū nangūxēxūcèx, rü tá tamaxē’ ”,

ñanagūrū ga yema orewa. ²² Rū ñanagūrū ga Pedru: —Pa Duūxūgū Pa Yudūgūx, jiperūxīnūē i ñaã ore! Rū pema rü meāma nüxū pecuēx rü Ngechuchu ga Nacharētucūāx rü guma nixī ga wūxi ga yatū ga Tupana pepēxewa nüxū yaxucū na Nanexūchi yīxū. Rū yemacèx ga Tupana rü norū poramaã nüxū nanaxūxēē ga muxūma ga mexūgū rü cuēxruūgū ga noxri taguma nüxū idauxū. ²³ —Rü Tupana pexna nanamu ga guma Ngechuchu na pecaducèx nayuxūcèx yerū yemaäcū nanaxūxchaū ga Tupana, rü yemaäcū nagu narūxīnū ga noxri tauta naxūxgux ga naãne. Rū pema penamu ga yatūgū ga tama yaxōgūxū na yayauxgūāxūcèx rü curuchawa na yapotagūāxūcèx. Rū yemaäcū penayuxēē. ²⁴ —Rü woo nayuchirēx natūrū tama yexma nayacuèx, yerū Tupana wena nana-maxēē rü ínanadaxēē. Rū yemaäcū ga yema yu rü taxuacūma marū nüxū narūporamaēēcha. ²⁵ —Yerū ga āēxgacū ga Dabí rü Ngechuchuchigagu nidexa, rü ñanagūrū:

“Guxūguma nachauxūtagu ya Cori ya Tupana rü choxū narūngūxēē na taxucèxma chaxoegaāēxūcèx. ²⁶ Rū yemacèx marū chataãē rü taāēxū ga oremaã chidexa. Rū choma nüxū chacuèx na mexū tá choxū üpetūxū i ngēxguma chayuxgux. ²⁷ Erū cuma tāūtāma yuexūchicawa choxū cutèx, rü tāūtāma cunaxwèxe na yayixixū i chaxune i choma ya Cune ya Üünecū na chíxū. ²⁸ Marū choxū nüxū cucuèxēē i ñuxācū tá chanayaxu i maxū i taguma gūxū, rü tá poraäcū choxū cutaāēxēē, erū chomaã tá icurūxāūx”,

ñanagūrū ga Dabí. ²⁹ Rū ñanagūrū ga Pedru: —Pa Chaueneēgūx, rü aixcūma pemaã nüxū chixu na nayuxū ga nuxcūmaäcū ga tōrū āēxgacū ga Dabí, rü marū inatèx, rü ñuxma rü ta tatanūwa nangēxma i naxmaxū. ³⁰ —Natūrū núma ga Dabí rü wūxi ga Tupanaârū orearū uruū nixī. Rū yemacèx nüxū nacuèx rü wūxi ga nataa tá nixī i āēxgacū ya Cristuxū ingucuchicū, yerū ga Tupana rü yemaäcū namaã inaxuneta. ³¹ —Rü yemacèx nuxcūmaxūchima ga Dabí rü ñoma marū nüxū nadauxuchixūrū rü nüxū nixu rü Cristu rü tá yuwa ínarūda rü tāūtāma naxmaxūwa nangēxmaēcha rü tāūtāma niyixi i naxūne. ³² —Rü ñuxma ya Tupana rü marū wena nanamaxēē ga guma Ngechuchu, rü guxāma ga toma rü nüxū tadaagū na wena namaxūxū, rü ngēmacèx pemaã nüxū tixuchiga. ³³ —Rü Tupana rü daxūguxū ga naãnewa nanaga na norū tūgūnecūwawa yanatoxūcèx. Rū Tanatū ya Tupana rü marū nüxna nanamu ga Naãe i Üünexū ga nuxcūma nüxū yaxuxū rü tá nuã na namuāxū. Rū ñuxma ya yima Ngechuchu rü núma totanūwa nanamu i ngēma Naãe i Üünexū. Rū ngēma Naãe nuã üxū nixī i ñuxma nüxū pedauxū rü nüxū pexīnūēxū. ³⁴⁻³⁵ —Rü taguma daxūwa naxū ga Dabí, natūrū nūmatama rü ñanagūrū:

“Tupana rü chorū Cori ya Cristumaã nüxū nixu rü ñanagūrū: ‘jRü chorū

tügü necüwawa rüto ñuxmatáta cuxmëxwa chanangëxmagüxëë i curü uwanügü! ”

ñanagürü. ³⁶ Rü ñanagürü ga Pedru: —Name nixi i guxâma i pema i Yudiügü na nüxü pecuëxgüxü rü guma Ngechuchu ga curuchawa peyapotacü, rü Tupana rü marü perü Cori ya Cristuxü nayaxixëë —ñanagürü ga Pedru. ³⁷ Rü yexguma yemaxü naxinüëgu ga yema duüxügü ga yema yexmagüxü, rü poraäcü nanaxixächiaëgü. Rü Pedruna nacagüe, rü yema togü ga Pedrumücügüna rü ta nacagüe, rü ñanagürügü: —¿Rü tacü tá taxüexü i ñuxmax, Pa Toeneëgüx? —ñanagürügü. ³⁸ Rü Pedru nanangâxü, rü ñanagürü: —¡Nüxü perüxoe i pecüma i chixexü rü Tupanacëx pedaugüe rü Ngechuchuëgagu ípebaiü na pexü nüxü nangechaüxütcëx i perü pecadugü ya Tupana! Rü Tupana tá pexna nanamu i Naäë i Üünexü. ³⁹—Rü ñaã Tupanaärü uneta, rü pexcëx nixi, rü pexacügücëx, rü guxü i duüxügü i yaxüwa ngëxmagüxütcëx nixi. Erü guxü i duüxügü i tórü Cori ya Tupana nügüxütawa naxcëx çaxütcëx nixi i ngëma uneta —ñanagürü ga Pedru. ⁴⁰ Rü yema oremaã rü muxüma ga to ga oremaã nayaxucüxëgü ga Pedru, rü ñanagürü: —¡Nüxna pixigachi i ngëma duüxügü i chixexü ügüxü na pema rü ta tama chixexü pexügüxütcëx! —ñanagürü. ⁴¹ Rü yema duüxügü ga naga inüëxü ga yema ore ga Pedru namaã nüxü ixuxü, rü ínabaiü. Rü yema ngunexügu rü poraäcü nayexera ga na yamuxü ga yema yaxögüxü. Rü 3,000 ga duüxügü nixi ga Ngechuchuaxü yaxögüxü ga yexguma. ⁴² Rü yema yexwacëx yaxögüxü rü guxüguma inarüxünüë ga yema ngüexügü ga Ngechuchu imügüxüärü nguxëëtae. Rü meã nügümaã nangaugü ga norü yemaxügü. Rü guxüguma nayumüxëgüxü rü chibücëx nangutaquëxëgüxü.

Yema yaxögüxü rü aixcüma nügü nangechaxügü

⁴³ Rü yema ngüexügü ga Ngechuchu imügüxü rü nanaxügü ga muxüma ga mexügü ga Tupanaärü poramaã naxügüxü. Rü yexguma yemaxü nadaugügu ga togü ga duüxügü, rü poraäcü nabaixächiaëgü ga guxüma. ⁴⁴ Rü guxüma ga yema yaxögüxü, rü wüxigu narüxünüë. Rü meã nügümaã nangaugü ga norü yemaxügü. ⁴⁵ Rü namaã nataxëgüxü ga norü naänegü rü guxüma ga togü ga norü yemaxügü. Rü nügümaã ngixü nitoyëgüxü ga yema diëru yexgumarüü na ñuxre natümaxëxëxü ga norü ònatanü ga wüxichigü. ⁴⁶ Rü guxü ga ngunexügu tupauca ga taxünëwa nangutaquëxëgüxü, rü chibücëx nangutaquëxëgüxü ga napatagüwa, rü taäëäcüma nügümaã nachibüexü. ⁴⁷ Rü guxüguma Tupanaxü nicuëxüügüxü. Rü guxüma ga yema ñanecüäx rü nüxü nangechaügü ga yema yaxögüxü. Rü wüxichigü ga ngunexügu rü nimuëtanü ga duüxügü ga yaxögüxü, yerü nüma ga Cori ga Ngechuchu rü nüxü narüngüxëë na nayauxgüäxütcëx ga norü maxü i taguma güxü.

3

Naxcëx nitaane ga wüxi ga yatü ga chixeparacü

¹ Rü wüxi ga ngunexügu ga Pedru rü Cuáü rü tomaëxpüxarü oragu ga yáuanecü rü tupauca ga taxünëwa naxi, yerü yema nixi ga yumüxëärü ora. ² Rü yéma guma tupauca ga taxünëwa nayexma ga wüxi ga yatü ga norü bucümatama chixeparacü. Rü guxü ga ngunexügu rü natanüxügü rü guma tupauca ga taxünëärü íax ga Mexëchixügü äëgaxügu naya-mugüxü, na diërucëx ínacaüüxütcëx nüxna ga duüxügü ga guma tupauca

ga taxŭnegu chocuxŭxŭ. ³ Rŭ yexguma Pedru rŭ Cuáŭxŭ nadēuxgux ga tupauca ga taxŭnegu na nachocuxŭ, rŭ guma chixeparacŭ rŭ nŭxŭ nawémēx rŭ dīerucēx nŭxna naça. ⁴ Rŭ Pedru rŭ Cuáŭ meāma nŭxŭ narŭdaunŭ, rŭ Pedru rŭ űanagŭrŭ nŭxŭ: —ŭToxŭ nadawenŭ! —űanagŭrŭ. ⁵ Rŭ nŭma ga yatŭ rŭ nŭxŭ nadawenŭ, yerŭ nŭma nŭxŭ nacuēxgu rŭ chi űacŭ nŭxna naxāgŭ. ⁶ Natŭrŭ ga Pedru rŭ űanagŭrŭ nŭxŭ: —Choxŭ nataxuma i dīeru. Natŭrŭ ngēma choxŭ ngēxmaxŭ tá cuxna chaxā. Rŭ naegagu ya Ngechuchu ya Cristu ya Nacharētucŭűax cuxŭ chamu, rŭ űinachi rŭ ixŭ! —űanagŭrŭ. ⁷ Rŭ yema űaxguwena ga Pedru, rŭ norŭ tŭgŭnemēxēgu nayayauxāchi, rŭ inanachixēē, rŭ yexgumatama napora ga namēxtŭxŭgŭwa rŭ nacutŭgŭwa. ⁸ Rŭ nayuxnagŭ rŭ inachi, rŭ inanaxŭgŭ na iyaxŭxŭ. Rŭ nŭmatama iyaxŭācŭma Pedru rŭ Cuáŭwe tupauca ga taxŭnegu naxŭcu. Rŭ nanayuxnagŭane rŭ Tupanaxŭ nicuēxŭŭ. ⁹ Rŭ guxŭma ga duŭxŭgŭ nŭxŭ nadaugŭ ga na iyaxŭxŭ, rŭ Tupanaxŭ na yacuēxŭŭxŭ. ¹⁰ Rŭ poraācŭ naűaixāchiāēgŭ ga duŭxŭgŭ naxcēx ga yema nŭxŭ ngupetŭxŭ ga guma yatŭ. Yerŭ nŭxŭ nacuēxgŭ ga na guma yŭxŭ rŭ tupauca ga taxŭneārŭ űāx ga Mexēchixŭgu āegaxŭwa rŭtooxŭchirēcŭ rŭ yēma dīerucēx ícacŭ.

Tupaucacŭwawa yexmaxŭ ga chopetŭchica ga Charomŭűarŭ Ŭpetŭchicagu āēgaxŭwa nidexa ga Pedru

¹¹ Rŭ guma chixeparachirēcŭ ga marŭ naxcēx yataanećŭ, rŭ tama Pedru rŭ Cuáŭna nixŭgachichaŭ. Rŭ guma tupauca ga taxŭnecŭwawa nayexma ga wŭxi ga chopetŭchica ga “Charomŭűarŭ Ŭpetŭchicagu” āēgaxŭ. Rŭ yema chopetŭchicawa rŭ Pedru rŭ Cuáŭcēx naxŭtaquēxe ga guxŭma ga duŭxŭgŭ yerŭ poraācŭ naűaixāchiāēgŭ. ¹² Rŭ yexguma Pedru nŭxŭ dēuxgu ga yema duŭxŭgŭ ga yēma naxcēx űtaquēxegŭxŭ, rŭ űanagŭrŭ nŭxŭ: —Pa Chautanŭxŭgŭ i Yudŭgŭx, űTŭxcŭŭ peűaixāchie namaā i ngēma űaā yatŭmaā ngupetŭxŭ? űRŭ tŭxcŭŭ toxŭ perŭdaunŭ űoma torŭ poramaā rŭ torŭ mexŭmaā tanamexēēxŭrŭŭ? ¹³ —Nuxcŭmaŭgŭcŭ ga tŭrŭ oxigŭ ga Abrāŭ rŭ Ichaā rŭ Acobu rŭ togŭ ga tŭrŭ oxigŭ rŭ nŭxŭ nayaxŭgŭ ga Tupana. Rŭ yimatama Tupana nixŭ ya űŭxma Ngechuchuxŭ taxēēcŭ, na guxŭārŭ yexera yŭxŭcēx. Rŭ gumatama Ngechuchu ya Tupanaārŭ ngŭxēēruŭ ixŭcŭ nixŭ ga pema āēxgacŭ ga Piratuxŭtawa penagŭcŭ. Rŭ yexguma nŭxŭ yangēxchaŭgu ga Piratu, rŭ pema rŭ tama penaxwēxegŭ ga na yangēāxŭ. ¹⁴ —Pema rŭ tama penaxwēxe ga na űnanguxuchixŭ ga guma űŭnecŭ ga aixcŭma mecŭ ga Ngechuchu, natŭrŭ naxcēx ípeca na pexcēx űnanguxuchixēēāxŭcēx ga wŭxi ga máētaxŭ. ¹⁵ —Rŭ yemaācŭ pematama peyamēxgŭ ga guma Ngechuchu ya tŭxŭ maxēxēēcŭ. Natŭrŭ ga Tupana rŭ wena nanamaxēē. Rŭ toma nixŭ ga nŭxŭ tadaugŭxŭ ga wena na namaxŭxŭ. ¹⁶ —Rŭ űaā yatŭ ga chixeparachirēcŭ i pema nŭxŭ pedauxŭ rŭ nŭxŭ pecuāxŭ rŭ marŭ naxcēx nitaane erŭ Ngechuchuaxŭ nayaxŭ. Rŭ ngēma Ngechuchuaxŭ na yaxŭŭxŭcēx nixŭ i naxcēx yataanexŭ ngēma űŭxma guxāma i pema nŭxŭ pedauxŭrŭŭ. ¹⁷ —Rŭ dŭcax i űŭxma Pa Chaueneēgŭx, rŭ yexguma pema rŭ wŭxigu perŭ āēxgacŭgŭmaā peyamēxgŭgu ga Ngechuchu, rŭ tama nŭxŭ pecuēxgŭ ga űacŭ na pexŭexŭ. ¹⁸ —Natŭrŭ ga Tupana rŭ yemaācŭ nayanguxēē ga yema uneta ga nuxcŭma nŭmatama nŭxŭ yaxuxŭ nawa ga guxŭma ga norŭ orearŭ uruŭgŭ. Yerŭ yema norŭ ore ga űmatŭxŭwa rŭ űanagŭrŭ:

“Cristu rü tá ngúxŭ ninge”,

ñanagürü. ¹⁹⁻²⁰—Rü ngēmacèx, Pa Chaueneēgŭx, rü name nixī i nüxŭ perŭxoe i pecŭma i chixexŭ, rü Tupanacèx pedaugŭ, rü nüxŭ peyaxōgŭ na nŭma pexŭ ínapiāxŭcèx i perŭ pecadugŭ. Rü ngēxguma i nŭma rü tá pexŭ nataāēgŭxēē, rü tá nŭma nanamu ya Ngechuchu ga noxritama naāne ixŭgŭgu pexcèx nüxŭ naxunetacŭ na perŭ āēxgacŭ ya Cristu na yīxŭcèx.

²¹—Natürü i ñuxma rü Tupana nanaxwèxe i daxŭguxŭ i naānegu na naxāxŭxŭ ya Ngechuchu ñuxmatáta nŭma ya Tupana wena namexēēāgu i guxŭma i ñoma i naānewa ngēxmaxŭ. Yerü yemaācŭ nixī ga nüxŭ yaxuxŭ ga Tupana nawa ga nuxcŭmaŭgŭxŭ ga norŭ orearŭ uruŭgŭ ga ixŭünexŭ.

²²—Rü Moīché rü tórŭ oxigŭmaā nüxŭ nixu rü ñanagürü:

“Rü perŭ Cori ya Tupana rü petanŭwa tá nüxŭ naxuneta i wŭxi i norŭ orearŭ uruŭ i chauxrŭŭ ixīxŭ. Rü name nixī na naga pexīnŭēxŭ i guxŭma i ngēma pemaā nüxŭ yaxuxŭ. ²³Rü texé ya tatanŭwa tama naga ĩnŭxē i ngēma orearŭ uruŭ, rü tá tŭxŭ ínátexŭchi i tatanŭwa”,

ñanagürü ga Moīché. ²⁴—Rü Chamue rü guxŭma ga togŭ ga Tupanaārŭ orearŭ uruŭgŭ ga naweama ŭgŭxŭ rü ta nüxŭ nixugŭe ga tacŭ tá na ŭpetŭxŭ i ñomaŭcŭü. ²⁵—Rü nuxcŭmaxŭchima ga Tupana rü tórŭ oxī ga Abráŭmaā nüxŭ nixu rü ñanagürü:

“Rü wŭxi i cutaa tá nixī i nüxŭ rŭngŭxēēxŭ i guxŭma i duŭxŭgŭ i ñoma i naānecŭāx”,

ñanagürü. Rü yemaācŭ ta Tupana inaxuneta nawa ga nuxcŭmaŭgŭxŭ ga norŭ orearŭ uruŭgŭ. Rü pemaā nüxŭ chixu i ñuxma, rü pexcèx nixī ga yema unetagŭ ga nuxcŭmaŭgŭxŭ ga orearŭ uruŭgŭwa tórŭ oxigŭmaā nüxŭ yaxuxŭ ga Tupana. ²⁶—Rü pemaā nüxŭ chixu Pa Chautanŭxŭgŭ i Yudíugŭx, rü yexguma Tupana wena namaxēēgu ga Nane ga Ngechuchu rü petanŭwaxira nanamu na pexŭ nangŭxēēxŭcèx, erŭ nanaxwèxe i wŭxichigŭ i pema na nüxŭ perŭxoexŭ i pecŭmagŭ i chixexŭ —ñanagürü ga Pedru.

4

Āēxgacŭgŭpēxewa nayexmagŭ ga Pedru rü Cuáŭ

¹ Rü yexguma duŭxŭgŭmaā iyadexagŭgu ga Pedru rü Cuáŭ, rü yexgumayane yēma nangugŭ ga guma tupauca ga taxŭneārŭ purichíaarŭ āēxgacŭ, rü paigŭ, rü Chaduchéugŭ. ² Rü Pedru rü Cuáŭmaā nanuē ga paigŭ yerŭ duŭxŭgŭxŭ nangŭexēē ga na marŭ wena namaxŭxŭ ga Ngechuchu, rü naxrŭŭ tá ta wena namaxēxŭ i guxŭma i duŭxŭgŭ i marŭ yuexŭ. ³ Rü ĩnayauxŭ, rü poxcupataŭgu nanawocu ñuxmata moxŭācŭ, yerŭ marŭ nayáuane. ⁴ Natürü muxŭma ga yema duŭxŭgŭ ga nüxŭ ĩnŭēxŭ ga yema Tupanaārŭ ore rü nayaxōgŭ. Rü 5000 wa nangu ga yatŭxŭxica ixugŭgu. ⁵ Rü moxŭācŭ Yerucharéŭwa nangutaquēxegŭ ga Yudíugŭarŭ āēxgacŭgŭ namaā ga naerugŭ, rü ngŭxēēruŭgŭ ga ore ga mugŭwa nguxēētaegŭxŭ. ⁶ Rü yēma nayexma ta ga Aná ga paigŭeru ixīcŭ, rü Caipá, rü Cuáŭ, rü Areyáŭdru, rü guxŭma ga yema togŭ ga paigŭ ga paigŭerutanŭxŭ ixīgŭxŭ. ⁷ Rü nanamu na naxŭtawa nagagŭāxŭcèx ga Pedru rü Cuáŭ. Rü yexma norŭ ngāxŭtanŭgu nanachigŭxēē rü nüxna nacagŭ, rü ñanagürŭgŭ: —¿Texé pexŭ tamu, rü texé pexna tanaxā i pora na penamexēēxŭcèx i ñaā yatŭ? —ñanagürŭgŭ. ⁸⁻⁹ Rü Pedruwa nayexma ga Tupanaāē ga Ūünexŭ rü nanaporaxēē. Rü yemacèx ga Pedru rü nanangāxŭ, rü ñanagürü: —Pa ĩāneārŭ Āēxgacŭgŭx, rü Pa

Yudíugüarü Ǣxgacügüerugüx, rü ñuxma toxna naxcèx peca naxcèx ga norü mexêê i ñaã chixeparachiréxü erü nüxü pecuáxchaü ga ñuxacü na namexü. ¹⁰ —Rü ñuxma tá pemaã nüxü tixu na nüxü pecuáxüçèx i guxâma i pema rü nüxü nacuèxgüxüçèx i guxüma i tatanüxügü i Yudíugu. Rü ñaã yatü i ñuxma pepèxewa ngèxmaxü rü Ngechuchu ya Cristu ya Nacharétucüãx nixí ga namexêêcü. Rü guma nixí ga pema curuchawa peyapotacü rü peyuxêêcü. Natürü ga Tupana rü wena nanamaxêê. ¹¹ —Rü gumatama Ngechuchu nixí ga pema nüxü pexoecü. Natürü ga Tupana rü nayamucuchi na guxüarü ã̄gacü yixíxüçèx. ¹² —Rü yima Ngechuchuciatama nixí ya tórü maxèxêêruü, erü yixicatama nixí ga Tupana nüxü unetacü i ñoma i naanewa na tüxü namaxèxêêxüçèx —ñanagürü ga Pedru. ¹³ Rü yexguma yema ã̄xgacügü nüxü daugügu ga ñuxacü tama muüêãcüma na yadexagüxü ga Pedru rü Cuáü, rü nabaixãchiã̄gü, yerü nüxü nicuèxãchitanü ga tama meã poperaxü na yacuáxü rü puracütanüxümare yixíxüxü. Rü aixcüma nüxü nicuèxãchitanü ga Ngechuchuarü ngüexügu na yixíxüxü. ¹⁴ Rü ñuxüchi nüxü nadaugü ta ga guma yatü ga rümecü ga Pedru rü Cuáüxütagu na nachixü. Rü yemacèx ga yema ã̄xgacügü rü taxuacüma ñuxü ñanagürügüega nachiga ga yema ngupetüxü. ¹⁵ Rü yexguma ga yema ã̄xgacügü rü inanamuxü ga yema inangutaquèxegüxüwa, rü nüxícatama nügümaã nidexagü. ¹⁶ Rü ñanagürügü: —¿Tacü tá namaã ixüexü i ñaã yatügü? Erü guxüma i Yerucharéucüãx i duüxügü rü nüxü nacuèxgü i ngèma mexü i taxü i naxügüxü, rü taxuacüma itayacux. ¹⁷ —Natürü ngèma na tama yexeraãcü duüxügütanüwa nanguchigaxüçèx i ngèma ngupetüxü, jrü ngíxã tanamuüêê na ñuxmawena rü taxúemaãma ngèma Ngechuchuchigagu yadexagüxüçèx! —ñanagürügü. ¹⁸ Rü wenaxärü Pedru rü Cuáüçèx nacagü, rü nüxna naxãga na tama Ngechuchuchigamaã yadexagüxüçèx, rü bai i texéxü na nangüexêêxüçèx i nachiga. ¹⁹ Natürü ga Pedru rü Cuáü rü nanangãxügü, rü ñanagürügü: —¡Nagu perüxñüê i pematama! ¿Rü namexü i Tupanapèxewa na pega taxñüèxü rü êxna Tupanaga taxñüèxü? ²⁰ —Erü toma rü taxuacüma nüxü tarüxoe na nüxü tixuxü ga yema nüxü tadaugüxü rü nüxü taxñüèxü —ñanagürügü. ²¹ Rü yexguma ga yema ã̄xgacügü rü nayaxãxünegü rü yemaãcü inayamugü, yerü nataxuma ga tacüçèx na napoxcueãxü rü duüxügüxü namuüê, yerü guxüma ga duüxügü rü Tupanaxü nicuèxüügu naxcèx ga yema nüxü ngupetüxü ga guma yatü ga chixeparawa rümecü. ²² Rü guma yatü ga yemaãcü Tupanaärü poramaã naxcèx itaanecü, rü 40 arü yexera nixí ga norü taunecü.

Yema yaxõgüxü rü Tupanaarü ngüxêêçèx ínacagü

²³ Rü yexguma marü inamuxüãxgu, rü Pedru rü Cuáü rü namücügü iyexmagüxüwa naxí. Rü namaã nüxü nixugüe ga guxüma ga yema ore ga Yudíugüarü ã̄xgacügü rü paigüarü ã̄xgacügü namaã nüxü ixuxü. ²⁴ Rü yexguma Pedru rü Cuáüxü naxñüègu ga namücügü, rü guxüma wüxigu nayumüègü rü Tupanamaã nidexagü rü ñanagürügü: —Pa Corix, cuma cunaxü ga daxüguxü ga naãne rü ñoma ga naãne, rü taxü i taxtü, rü guxüma i tacü i nawa ngèxmaxü. ²⁵ —Rü cumatama nixí ga nuxcüma Cuãe i Üünexüxü cumuxü na curü ngüxêêruü ga Dabíwa yanadexaxüçèx rü ñaxüçèx:

“¿Tūxcūñ ĩnipuræ i ñoma i naānecūñax i duñxūgū i tama yaxōgūxñ?
 ¿Rū tūxcūñ ngēma natūcēxmamare ixīgūxūgu narūxñnūē i guxñ
 i nachiūñānecūñax? 26 —Nūmagū i nachiūñānegūarū āēxgacūgū
 rū Tupanaā nānuē, rū nūgūmaā nangutaquēxegū na wūxigu
 nūgūmaā nagu nanññūēxūcēx na ñuxācū tá nūxñ na nayexer-
 agūxūcēx ya Cori ya Tupana rū Nane ya nūxñ naxunetacū ya
 Cristu”,

ñanagūrū. 27 —Rū aixcūma nixī ga ñoma ga ĩānewa ga āēxgacūgū ga
 Erode rū Piratu ga nangutaquēxegūxñ namaā ga to ga nachiūñānegūcūñax
 rū totanūxñ ga Yudiūgū, na chixexñ naxūgūxūcēx namaā ya curū
 ngūxēēruñ ya üñecū ya Ngechuchu ya Cristuxñ nūxñ cuxunetacū.
 28 —Rū yemaācū ga nūmagū rū nayanguxēē ga guxñma ga yema
 cuma nuxcūmama nagu curūxññūxñ rū nūxñ cuxunetaxñ rū tá na yan-
 guxñ. 29 —¡Rū dūcax, Pa Corix, cuma nūxñ cucuēx na ñuxācū toxñ
 naxāxūnegūxñ! Toma nixī i curū ngūxēēruñgū rū tanaxwēxe na toxñ
 cuporaexēēxñ na tama tamuñēācūma nūxñ tixuxūcēx i curū ore. 30 —
 ¡Rū curū poramaā nameēxēē i duñxūgū i ĩdaawexēx! ¡Rū duñxūgūxñ
 nawēx i cuēxruñgū i curū poramaā cuxūxñ i naēgagu ya curū ngūxēēruñ
 ya üñecū ya Ngechuchu! —ñanagūrūgū. 31 Rū yexguma yumūxēwa nūxñ
 nachauegu, rū guma ĩpata ga nawa nangutaquēxegūne rū naxññaxāchi. Rū
 Tupanaāē i Üñexñ rū nūxna nangu ga guxñma. Rū tama namuñēācūma
 nūxñ nixugūe ga Tupanaārū ore.

Yema yaxōgūxñārū yemaxūgū rū guxñārū nixī

32 Rū namu ga yema yaxōgūxñ. Rū guxñma rū wūxigu narūxñnūē. Rū
 taxuñma nagu narūxññū ga noxrūxicatama na yññū ga norū yemaxūgū,
 natūrū guxñma ga namūcūgūmaā nangau. 33 Rū yema ngūexūgū ga
 Ngechuchu imugūxñ na Tupa-naārū puracū naxūgūxūcēx, rū Tupanaārū
 poramaā nūxñ nixugūe ga ñuxācū wena na namaxūxñ ga Cori ga
 Ngechuchu. Rū Tupana rū poraācū nūxñ narūngūxēē ga guxñma ga
 yema yaxōgūxñ. 34-35 Rū natanūwa rū nataxuma ga wūxi ga nūxñ
 nataxuxñ, yerū guxñma ga yema nūxñ yexmaxñ ga naānegū rū ēxna
 ĩpatagū, rū namaā nataxegū. Rū yema dñēru ga ngññū nayauxgūcū rū
 yēma ngññū nānegū, rū yema ngūexūgū ga Ngechuchu imugūxñna
 ngññū nayaxāgū. Rū ñuxūchi nūgū ngññū ninuññū ga ñuxrechigū nūxñ
 nataxuxñ ga wūxichigū. 36 Rū nayexma ga wūxi ga yatū ga Lebñtanūxñ
 ga Chiprecūñax ga Yūchegu āēgacū. Rū yema ngūexūgū ga Ngechuchu
 imugūxñ na Tupanaārū puracū naxūgūxūcēx rū Bernabēmaā nanaxugū.
 Rū ngēma naega, rū: “Taāēxēēruñ”, ñaxūchiga nixī. 37 Rū nūma ga
 Bernabē rū nūxñ nayexma ga wūxi ga naāne, rū namaā nataxe. Rū yema
 ngūexūgū ga Ngechuchu imugūxūxñtawā ngññū nana ga yema dñēru.

5

Ananñā rū Chacūraarū pecaduchiga

1 Rū nayexma ga wūxi ga yatū ga Ananñāgu āēgaxñ rū Chacūra ga
 namēx. Rū nūmagū rū namaā nataxegū ga wūxi ga norū naāne. 2 Natūrū
 nūma ga Ananñā rū namēxmaā wūxigu nagu narūxñnūē na nūgūxñ ngññe
 nayauxgūxñ ga ñuxre ga yema naānetanū. Rū ñuxūchi yema ngūexūgū ga
 Ngechuchu imugūxūxñtawā ngññū nānegū ga yema nūxñ ĩyaxūcū. 3 Rū
 yexguma ga Pedru rū ñanagūrū nūxñ: —Pa Ananñāx, ¿tūxcūñ ngoxo i

Chatanága cuxīnū rū Tupanaāē i Ūūnexūmaā quidora, rū cugūxū ngīxne cuyaxu i űuxre i ngēma curū naānetanū? ⁴—¿Ēxna yexguma tauta namaā cutaxegu, rū tama ēxna cuxrū yīxū ga yema naāne? ¿Rū yexguma namaā cutaxegu, tama ēxna cuxrū yīxū ga yema dīēru na ngīxū cuguxēēxūcēx i ngēma cuma cunaxwēxēxūācūma? ¿Tūxcūū i cunaxūxū i űāā? Tama yatūgūmaāxīca quidora, natūrū Tupanamaā rū ta nixī i quidoraxū — űanagūrū ga Pedru. ⁵ Rū yexguma yema orexū naxīnūgu ga Ananīā, rū yuxūma inyangū. Rū poraācūxūchima namuūē ga guxūma ga yema duūxūgū ga yexguma yemaxū nacuāchigagūgu. ⁶ Rū űuxre ga yēma yexmagūxū ga ngextūxūxūgū rū nanayauxgū ga naxūne, rū nananuquegū, rū inayatēxgū. ⁷ Rū tomaēxpūx ga ora ngupetūxgu rū īngu ga namēx. Rū yexma ixūcu natūrū tama nūxū icuēx ga űacū na ngupetūxū. ⁸ Rū Pedru ngīxna naca, rū űanagūrū: —¿Yema natanū ga ipexunetaxūgu yīxū ga namaā petaxegūxū ga perū naāne? —űanagūrū. Rū ngīma rū: —Ngū, ngēxgumaēxpūxgu nixī —ngīgūrūgū. ⁹ Rū Pedru rū űanagūrū ngīxū: —¿Tūxcūū pegūmaā ngēmaācū wūxigu perūxīnūē na namaā pido-raexūcēx i Tupanaāē i Ūūnexū? ¿Dūcēx, ngēma cutēxū iyatēxgūxū rū marū īnangugū, rū űuxma rū cuxū rū tá ta ngema nangegū! —űanagūrū. ¹⁰ Rū yexgumatama yūxcūma Pedrupēxegu iyangū. Rū yexguma nachocuxgu ga yema ngextūxūxūgū, rū yūxcūma ngīxū inyangaugū. Rū ngīxū nayauxgū, rū ngītēxūtagutama ngīxū nayatēxgū. ¹¹ Rū yexguma nūxū nacūxēgūga ga yema ngupetūxū, rū guxūma ga yema yaxōgūxū rū yema togū ga duūxūgū rū ta poraācūxūchima namuūē.

Tupanaārū poramaā nanaxūgū ga muxūma ga mexūgū

¹² Rū yema ngūxūgū ga Ngechuchu imugūxū, rū duūxūgūpēxewa nanaxūgū ga muxūma ga mexūgū ga Tupanaārū poramaā naxūgūxū. Rū inanawēxgū ga muxūma ga cuēxruūgū. Rū guxūma ga yema yaxōgūxū rū guxūguma naxītaquēxegūxū nagu ga yema tupauca ga taxūnēwa yemaxū ga chopetūchica ga Charomóūārū Ūpetūchicagu āegaxū. ¹³ Rū yema togū ga duūxūgū ga tama yaxōgūxū rū namuūē na yema yaxōgūxūtanūgu naxāgūxū, natūrū poraācū yema yaxōgūxūxū nangechaūgū. ¹⁴ Rū nimuētanūāma ga yema yaxōgūxū yerū muxūma ga duūxūgū ga yatūxūgū rū ngexūgū rū Coriaxū nayaxōgūetanū. ¹⁵ Rū nūma ga duūxūgū rū ītamūgūgu nayamugūxū ga idaaweexū naxchāpenūāmaā rū norū carūgūmaā na yexguma Pedru yēma ūpetūxgu, rū naxchipetamare nūxū na nachixūcēx. ¹⁶ Rū yexgumarūū ta rū yēma naxītaquēxegūxū ga muxūma ga duūxūgū ga Yerucharéūārū ngaicamana imugūne ga īānēwa ne īxū. Rū yēma naxcēx nanagagūxū ga yema idaaweexū rū yema ngoxoāxgūxū. Rū guxūma naxcēx nitanēgū.

Pedru rū Cuātūwe ningēxūtanū ga paigū

¹⁷ Rū yexguma ga guma paigūeru rū guxūma ga yema natanūxūgū ga Chaduchēugū rū poraācū nixāūxāchigū naxcēx ga yema mexūgū ga naxūgūxū ga yema ngūxūgū ga Ngechuchu imugūxū. ¹⁸ Rū yemacēx norū purichīagūxū namu na īnayauxūāxūcēx ga yema ngūxūgū. Rū īānēārū poxcupataūgu nanapoxcūe. ¹⁹ Natūrū Coriarū orearū ngerūū ga daxūcūāx naxcēx nayawāxna ga yema poxcupataūārū īāxgū ga chūtacū. Rū īnanamuxū, rū űanagūrū nūxū: ²⁰ —¿Ngema tupauca ya taxūnēwa pexī, rū guxū i duūxūgūmaā nūxū pixu na űuxācū Tupana inaxāxū i ngexwacaxūxū i maxū! —űanagūrū. ²¹ Rū yexguma ga yema ngūxūgū

ga Ngechuchu imugūxū rü naga naxīnūē ga yema ore. Rü moxūācū ga pēxmamaxūchi rü tupauca ga taxūnewa naxī, rü duūxūgūxū nangúexēē. Rü yoxni ga guma paigūeru rü natanūxūgū, rü nanangutaquēxexēē ga guxūma ga yema togū ga āēxgacūgū ga āēxgacūgūtūcumūwa ūgūxū. Rü poxcupataūwa nanamugū ga purichíagū na yagagūāxūcēx ga yema ngúexūgū ga Ngechuchu imugūxū. ²²⁻²³ Rü yexguma poxcupataūwa nangugūgu ga yema purichíagū, rü taxuxūxūma inayangaugū. Rü nayawoegu, rü nūxū nayarūxugūe, rü ñanagūrūgū: —Yima poxcupataū rü narūwāxta, rü meāma nataichirēx, rü purichíagū nūxna nadaugū i naāxwa. Natūrū ngēxguma tayawāxnagu, rü taxuxūxūma itayangaugū i aixepewa —ñanagūrūgū. ²⁴ Rü yexguma yema orexū naxīnūēgu ga yema paigūeru rü yema togū ga paigū ga āēxgacūgū ixīgūxū rü yema tupauca ga taxūneārū purichíagūarū āēxgacū rü guxūma nabaixāchiāēgū yerū tama nūxū nacuēxgū ga ngextá tá na nanguxū ga guxūma ga yema rü ñuxācū tá na iyanaxoxēēgūāxū. ²⁵ Rü yexguma yemagu inaxīnūēyane rü yēma nangu ga wūxi ga yatū, rü namaā nūxū nixu, rü ñanagūrū: —Ngēma yatūgū i pepoxcuechirēxū, rü tupauca ga taxūnewa nangēxmagū, rü ínanangúexēē i duūxūgū —ñanagūrū. ²⁶ Rü yēma naxī ga tupauca ga taxūneārū purichíagūarū āēxgacū wūxigu namaā ga norū purichíagū na yagagūāxūcēx. Natūrū namuē na duūxūgū nutamaā yamuxūtanūxū, rü yemacēx meāmare yema ngúexūgūxū nigagū. ²⁷ Rü yexguma namaā ínangugūgu, rü yema āēxgacūgūpēxewa nanagagū. Rü yema paigūeru rü namaā nidexa rü ñanagūrū nūxū: ²⁸ —Marū poraācū pexna tanachuxu na tama ngēma Ngechuchuégamaā penangúexēēxūcēx. Natūrū i pema rü guxūne ya Yerucharēūwa penangúexēē i duūxūgū, rü ñuxūchi toxna penaxuxchaū ga na togagu nayuxū ga yema Ngechuchu —ñanagūrū. ²⁹ Rü Pedru rü namūcūgūmaā nanangāxūgū, rü ñanagūrūgū: —Narūmemaē nixī na Tupana ga taxīnūēxū rü tama i yatūgūga. ³⁰ —Guma Tupana ga nuxcūmaūgūxū ga tórū oxigū nūxū yaxōgūcū, rü guma nixī ga wena namaxēēcū ga Ngechuchu ga pema peyamácū ga yexguma curuchawa peyapotagūgu. ³¹ —Natūrū Tupana rü nanataxēēāma, rü nūgūarū tūgūnecūwawa nanatoxēē. Rü tórū cuēxruū rü maxēēerū nayangucuchixēē na tatanūxūgū i Yudíugūxū nangūxēēxūcēx na nūxū naxoexūcēx i norū chixexūgū, rü Tupana nūxū nūxū nangechaūxūcēx i norū pepadugū. ³² —Rü toma nūxū tacuēx na aixcūma yīxū i guxūma i ngēma pemaā nūxū tixuxū erū tomatama nūxū tadaugū. Rü ngēxgumarū ta i Tupanaāē i Ūñexū i Tupana tūxna āxū ya yíxema naga ínūēxē, rü nūxū nacuēx na aixcūma yīxū —ñanagūrūgū. ³³ Rü yexguma yemaxū naxīnūēgu ga yema āēxgacūgū, rü poraācūxūchima nanuē, rü nanadaixchaū. ³⁴ Natūrū yema āēxgacūgūtānūwa nayexma ga wūxi ga Parichéu ga Gamarié ga naega. Rü nūma rü meāma nanangúexēē ga Tupanaārū mugū. Rü guxūma ga duūxūgū rü nūxū nangechaūgū. Rü nūma ga Gamarié inachi rü nanamu na paxaāchi ínamuxūāxūcēx ga yema ngúexūgū ga Ngechuchu imugūxū. ³⁵ Rü ñuxūchi namūcūgū ga āēxgacūgūmaā nūxū nixu rü ñanagūrū: —Pa Chautanūxū, ¡pexuāēgū na tacū tá namaā pexūexū i ñaā yatūgū! ³⁶ —Rü nūxna pecuēxāchie ga ūpa ga ñuxācū āēxgacūxū nūgū ningucuchixēēchaū ga Teudá. Rü nūgūtama nixu na wūxi ga tacū na yīxū. Rü maneca 400 naguxū ga yatūgū nawe narūxī. Natūrū churaragū nayamēxgū, rü nayu. Rü guxūma ga yema nawe rūxūxū rü nangīāchi, rü yexma nayarūxo ga guxūma. ³⁷ —

Rū yixcūra ínangu ga to ga yexguma tachiũãneârũ ãëxgacũ duũxũgũxũ ixugũgu, rũ yema nixĩ ga Yuda ga Gariréaanecũãx ga ãëxgacũxũ nũgũ ingucuchixéëchaũxũ. Rũ nayaxucuxëgũ ga duũxũgũ rũ nawe narũxĩ ga ñuxre. Natürũ yemaxũ rũ ta nímëxgũ rũ nayu. Rũ guxũma ga yema nawe rũxĩxũ rũ nangĩachi. ³⁸—Rũ ngëmacèx i ñuxma rũ pexũ chaxucuxë na peyangëxgũxũ i ñãã yatũgũ, rũ tama penapoxcuxũ. Erũ ngëxguma nagagutama yixĩgu i ngëma nũma naxũgũxũ, rũ tá inayarũxo. ³⁹—Natürũ ngëxguma Tupanaârũ yixĩgu i ñãã naxũgũxũ, rũ taxuacũma ipeyanaxoxëë. ¡Rũ pexuãëgũ na tama ngürũãchi Tupanamaã yĩxũ i penuëxũ! —ñanagürũ. Rũ guxũma ga yema ãëxgacũgũ rũ naga naxĩnũë ga yema norũ ucuxë. ⁴⁰ Rũ ñuxũchi nanachocuxëë ga yema ngúexũgũ ga Ngechuchu imugũxũ. Rũ nayacuaixgũ. Rũ nũxna naxãga na tama Ngechuchuchiga yadexagũxũcèx. Rũ yemawena rũ nayangëxgũ. ⁴¹ Rũ yema ãëxgacũgũna ínixĩ ga yema ngúexũgũ. Rũ nataãëgũ yerũ woetama Tupana nanaxwëxe ga yemaãcũ Ngechuchucèx ngũxũ na yangegũxũ. ⁴² Rũ guxũ ga ngunexũgu tupaucã ga taxũnewa rũ Ípatagũwa, rũ nanangúexëëãma, rũ nũxũ nixugüetanũ ga ore ga mexũ ga Ngechuchu ya Cristuchiga.

6

Yema ngúexũgũ ga Ngechuchu imugũxũ rũ nũxũ naxuneta ga 7 ga yatũgũ na nũxũ nangũxëëgũxũcèx ga Tupanaârũ puracũwa

¹ Rũ yexgumaãcũ rũ yexeraãcũ nimuchigũ ga yema duũxũgũ ga yaxõgũxũ. Rũ natanũwa nayexmagũ ga Yudiugũchirëx ga Griéguanewa ne ìxũ rũ Griégugawa idexagũxũ. Rũ nayexma ta ga yaxõgũxũ ga Yudiugũ ga Yerucharéũcũãx ga woetama nagawa idexagũxũ. Rũ yema yaxõgũxũ ga Griégugawa idexagũxũ rũ nidexagũëcha nachigagu ga yema yaxõgũxũ ga Yerucharéũcũãxgũ ixĩgũxũ, rũ ñanagürũgũ: —Totanũwa yutegũxe rũ tama meã õna tũxna naxãgũxũ i ngëxguma õna inaxãgũũxgu i wũxichigũ i ngunexũgu —ñanagürũgũ. ² Rũ yexguma ga yema 12 ga ngúexũgũ ga Ngechuchu imugũxũ rũ guxũma ga yema yaxõgũxũxũ nangutaquëxexëëgũ, rũ ñanagürũgũ nũxũ: —Tama name na Ítanangéxũ i Tupanaârũ orearũ uchiga i tomãx na õnamaã itacuáxũcèx. ³—Rũ ngëmacèx, Pa Tomücũgũx, rũ ¡Naxcèx pedëux i petanũwa ya 7 ya yatũgũ ya guxãma nũxũ ngechaũcũ, rũ meã naãëxũ cuácũ, rũ aixcũma Tupanaãë i Üünexũ nawa ngëxmacũ! Rũ toma tá nũxna tanaxã i ngëma puracũ na nũmagũ õnamaã inacuëxgũxũcèx. ⁴—Rũ ngëxguma i toma rũ yumũxëwa rũ Tupanaârũ orearũ uchigawaxicatama tá tapuracũë —ñanagürũgũ. ⁵ Rũ yexguma ga guxũma ga yema duũxũgũ rũ: —Ngũ —ñanagürũgũ naxcèx ga yema ore. Rũ nũxũ naxunetãgu ga Etëbaũ ga meã yaxõcũ rũ aixcũma Tupanaãë i Üünexũ nawa yexmacũ, rũ Piripi, rũ Pócoro, rũ Nicanúru, rũ Timú rũ Paruménu, rũ Nicuráchi ga Aũtíoquiacũãx ga tauta Ngechuchuaxũ yaxõõgu Yudiugũcũma yaxucũ. ⁶ Rũ yema ngúexũgũ ga Ngechuchu imugũxũxũtãwa nanagagũ. Rũ nũmagũ naxmëxmaã nũxũ yangõgũãcũma naxcèx nayumũxëgũ. ⁷ Rũ yema Tupanaârũ ore rũ yexeraãcũ nixũchigũ. Rũ porãcũ nimuëtanũ ga yema yaxõgũxũ ga Yerucharéũwa. Rũ woo muxũchixũma ga Yudiugũarũ paigũ rũ ta Ngechuchuaxũ nayaxõgũ.

Etëbaũxũ niyauuxgũ

⁸ Rū Etébaũ nixĩ ga wüxi ga yatü ga Tupana poraãcü nüxũ rüngüxêécü rü naporaxêécü na duũxügütanüwa naxüãxücèx ga mexügü ga taxügü rü cuèxruũgü ga Tupanaãrũ poramaã naxüxũ. ⁹ Rū nayexma ga wüxi ga ngutaquêxepataũ ga Yudiũgüarũ ga Ínguxũxũãrũ Ngutaquêxepataũgü äegane. Rū gumawa nangutaquêxegü ga duũxügü ga ũpaacü corigümêxêwa yexmagüxũ. Rū ñuxre ga guma ngutaquêxepataũcũãx rü wüxigu namaã ga ñuxre ga Chireneãnecũãx, rü Aleyãdriaanecũãx, rü Chirichiaanecũãx, rü Áchiaarũ naãnecũãx, rü inanaxügüe ga Etébaũmaã na iyaporagatanücüxũ. ¹⁰ Natürũ taxuacüma Etébaũxũ narüyexeragü, yerü nüma ga Etébaũ rü nidexa namaã ga yema cuèx ga Tupanaãe i Üünexũ nüxna ãxũ. ¹¹ Rū yexguma ga yema duũxügü rü togüaxũ nanaxütanügü na Etébaũchiga doraxũ yaxugüxücèx. Rū ñanagürügü ga yema idoraegüxũ: —Toma nüxũ taxĩnüegu, rü Moĩchéchiga rü Tupanachigamaã chixexũ ga ore nixugü ga Etébaũ —ñanagürügü. ¹² Rū yemaãcü nananuêxêe ga duũxügü rü Yudiũgüarũ äêxgacügüerugü rü ngüxêêruũgü ga ore ga mugüwa ngüxêêtaegüxũ. Rū yemacèx Etébaũcèx nibuxmü, rü nayayauxgü, rü äêxgacügüerugü íngutaquêxegüxũwa nanagagü. ¹³ Rū naxcèx nadaugü ta ga yatügü ga doraxũ ixugüemarexũ rü yema rü ñanagürügü: —Ñã yatü rü guxüguma chixexũmaã nidexa i nachigagu ya daa tupauca ya taxüne, rü nachigagu i Tupanaãrũ mugü. ¹⁴—Rü toma rü nüxũ taxĩnüe rü:

“Yima Ngechuchu ya Nacharétucũãx rü tá nanangutaũxêe ya daa tupauca, rü tá inanaxoxêe i nacümagü ga Moĩché tüxũ ngüxêêxũ”, —ñanagürügü. ¹⁵ Rū yexguma Etébaũxũ nadaunügu ga guxüma ga yema äêxgacügü ga yema rütogüxũ, rü nüxũ nadaugü ga nachametü rü wüxi ga daxũ—cũãx ga orearü ngeruũchametürü na yĩxũ.

7

Etébaũãrũ ore

¹ Rū nüma ga paigüeru, rü Etébaũna naca rü ñanagürü: —¿Aixcüma yĩxũ i ñã ore i nüxũ yaxugüexũ? —ñanagürü. ² Rū Etébaũ nanangãxũ, rü ñanagürü: —Pa Chautanüxũ Pa Äêxgacügüx, ¡Choxũ iperüxĩnüe! Guma Tupana ya mexêchicü, rü nuxcümaũcü ga tórü oxĩ ga Abráũcèx nangox ga yexguma Mechopotámiaãrũ naãnegu naxãchiũgu ga yexguma tauta Aráũãrũ naãnewa naxüxgu na yexma yaxãchiũxücèx. ³—Rü Tupana rü ñanagürü nüxũ:

“¡Nüxna ixũ i cuchĩũãne rü cutanüxũ, rü ngêma choma tá cuxũ nüxũ chadauxêêxũ i naãnewa naxũ!”

ñanagürü. ⁴—Rü yexguma ínaxũxũ ga Abráũ nawa ga yema Cadécũãxãrũ naãne ga ngextá noxri ínaxãchiũxũwa, rü Aráũãrũ naãnegu nayaxãchiũ. Rü yexguma nanatü yuxguwena, rü ñoma ga naãne i ñuxma nagu pexãchiũxũwa naxü, yerü yemaãcü Tupana nüma nanaga. ⁵—Natürũ yexguma rü ta taxuũma ga noxrüxüchi ga naãne nüxna naxã ga Tupana i ñoma i naãnewa, rü bai ga íraxũ ga noxrüxüchi ga naãne. Natürũ Abráũmaã inaxuneta ga yixcama tá nüxna na naxããxũ ga ñoma i naãne na noxrüxüchi yĩxücèx, rü yixcama marü nayuxguwena rü nanegüarũ na yĩxücèx. Rü yemaãcü Abráũmaã inaxuneta ga woo na nangexacüxũ ga yexguma. ⁶—Rü ñanagürü Abráũxũ ga Tupana:

“Rü yixcama i cutaagü rü tá to i nachĩũãne i tama noxrü ixĩxũwa nangêxmagü. Rü ngêma nachĩũãnecũãx i duũxügü rü norü

duŭxŭgŭxŭ tá nayaxŭgŭxēē. Rŭ 400 ya taunecŭ rŭ ngēma duŭxŭgŭ rŭ tá chixri namaã nachopetŭ i cutaagŭ. ⁷ Natŭrŭ choma tá chanapoxcue i ngēma nachiŭãnecŭŭãx i norŭ duŭxŭgŭxŭ yaxŭgŭxēēxŭ. Rŭ ngēmawena i cutaagŭ rŭ tá ñachoxŭ nawa i ngēma naãne, rŭ nuã ñãã i naãnewa tá choxŭ nicuèxŭŭgŭ”,

ñanagŭrŭ ga Tupana. ⁸—Rŭ yexguma Tupana rŭ Abráŭ rŭ nŭgŭmaã nanamexēē, rŭ ñanagŭrŭ ga Tupana:

“Choma rŭ tá cuxŭ charŭngŭxēē ega cuma rŭ guxŭma i cutanŭxŭgŭ ñpewiŭchēxmŭpēxechiraŭgu. Rŭ ngēma tá nixŭ i cuèxruŭ i yigŭmaã imexēēxŭ”,

ñanagŭrŭ ga Tupana. Rŭ nabu ga wŭxi ga nane ga Abráŭ, rŭ Ichaágu nanaxŭéga. Rŭ yexguma 8 ga norŭ ngunexŭwa nanguxgu ga Ichaá, rŭ nŭmatama ga Abráŭ rŭ ñanawiechēxmŭpēxechiraŭ. Rŭ yexguma marŭ nayèxgu ga Ichaá rŭ nabu ga nane ga Acobu, rŭ nŭmatama ga Ichaá rŭ ñanawiechēxmŭpēxechiraŭ. Rŭ yixcama marŭ nayèxgu ga Acobu rŭ nŭxŭ nayexma ga 12 ga nanegŭ. Rŭ nŭmatama ga Acobu rŭ ñanawiechēxmŭpēxechiraŭ ga guxŭma ga yema 12 ga nanegŭ. Rŭ yema 12 ga nanegŭ nixŭ ga yema 12 ga nuxcŭmaŭgŭxŭ ga tŭrŭ oxigŭ. ⁹⁻¹⁰—Rŭ yema 12 ga Acobu nanegŭ ga tŭrŭ oxigŭ ixŭgŭxŭtanŭwa rŭ wŭxi rŭ Yúche nixŭ ga naega. Natŭrŭ naēneēgŭ ga guma Yúche rŭ nixãŭxãchie, rŭ yemacèx Equituarŭ naãnewa ñxŭ ga taxetanŭxŭxŭ Yúchemaã nataxegŭ na Equituarŭ naãnewa nagagŭãxŭcèx. Natŭrŭ Tupana rŭ Yúchemaã nayexma, rŭ nŭxŭ narŭngŭxēē na tama pecadu naxŭxŭcèx ga yexguma guxchaxŭwa nayexmagu. Rŭ nŭxna nanaxã ga cuèx, rŭ Yúchexŭ narŭngŭxēē ga meã na nayauxãxŭcèx ga Equituaneãrŭ ãèxgacŭ ga Faraŭ. Rŭ yemacèx ga Faraŭ rŭ ãèxgacŭxŭ nayangucuchixēē. Rŭ nŭma ga Yúche nixŭ ga ãèxgacŭ ga Faraŭpatawa rŭ guxŭma ga yema nachiŭãnewa. Rŭ Faraŭxŭcatama nixŭ ga Yúchearŭ yexera na ãèxgacŭ yŭxŭ ga yema naãnewa. ¹¹—Rŭ yexgumaŭcŭŭ nayexma ga taiya ga guxŭ ga Equituarŭ naãnewa rŭ Canaããrŭ naãnewa. Rŭ poraãcŭ taiya nŭxŭ nangux ga duŭxŭgŭ. Rŭ yemacèx ga yema nuxcŭmaŭgŭxŭ ga tŭrŭ oxigŭ rŭ dŭxwa taxuacŭma nŭxŭ ñayangaugŭ ga nabŭ ga Canaããrŭ naãnewa. ¹²—Natŭrŭ yexguma nŭxŭ nacuáchigaxgu ga Acobu ga na nayexmaxŭ ga nabŭ ga Equituanewa, rŭ yema nanamugŭ ga nanegŭ ga guma tŭrŭ oxigŭ ixŭgŭcŭ. Rŭ yema nixŭ ga nawa ñaxŭgŭxŭ ga noxrima nabŭcèx Equituanewa na naxŭxŭ. ¹³—Rŭ yixcama marŭ naguxgu ga yema nabŭ rŭ wenaxãrŭ Equituanewa naxŭ nawa ga nabŭ. Rŭ yexguma wenaxãrŭ yema naxŭxgu ga naēneēgŭ, rŭ nŭgŭ nixu ga Yúche namaã. Rŭ yexguma nŭxŭ nacuèx ga Faraŭ ga ngextácŭŭãx na yŭxŭ ga Yúche. ¹⁴—Rŭ yixcamaxŭra ga Yúche rŭ tŭmacèx nangema ga nanatŭ rŭ guxŭma ga natanŭxŭ. Rŭ maneca 75wa nangu ga yema duŭxŭgŭ ga Yúchetanŭxŭ. ¹⁵—Rŭ yemaãcŭ Equituanewa naxŭ ga Acobu na yexma yaxãchiŭxŭcèx. Rŭ yexma nayu ga nŭmax. Rŭ yexma nayue ta ga nanegŭ ga tŭrŭ oxigŭ. ¹⁶—Rŭ yexguma nayuxgu ga Acobu, rŭ Chiquéŭwa nanangegŭ ga naxŭne na yexma yatèxgŭãxŭcèx nagu ga yema naxmaxŭ ga Abráŭ dŭerumaã naxcèx taxexŭ ga Amŭ nanegŭxŭtawaga Chiquéŭwa. ¹⁷—Rŭ dŭxwa nawa nangu na Equituanewa ñanguxŭxŭcèx ga tatanŭxŭ ga yexgumarŭŭ ga Tupana Abráŭmaã ñxu-netaxŭ. Rŭ yexguma rŭ marŭ poraãcŭ nimu ga tatanŭxŭ ga Equituanewa. ¹⁸—Rŭ yexguma ningucuchi ga to ga Equituaneãrŭ ãèxgacŭ ga tama Yúchechigaxŭ cuáxŭ. ¹⁹—Rŭ

yema ãëxgacü rü tatanüxüxü nawomüxëë rü chixri tümamaã naxüpetü ga guxema nuxcümaüğüxe ga tóru oxigü. Rü tüxü namu na yexwaca buxe ga tümaxácüğüxü ítawogüxü na tayuexüçëx. ²⁰—Rü yexgumaüçüü nabu ga Moïché, rü Tupanaãxü nangúchaü. Rü tomaëxpüx ga tauemacü nüxna tadaugü ga tümapatawa ga naë rü nanatü. ²¹—Rü yexguma düxwa ítanatëxgügu, rü Faraüxácü inayaxu, rü ngínexü inayaxëë. ²²—Rü yemaãcü Moïchéxü nanguxëëgü ga guxüma ga Equituanecüãxärü cuëx. Rü nüma ga Moïché rü wüxi ga ãëxgacü ga poracü nixi, rü norü dexawa rü ta napora. ²³—Rü yexguma 40 ga norü taunecüwa nanguxgu ga Moïché rü nagu narüxínü ga natanüxüğü ga Yudíugütanügu na naxüãneãxü. ²⁴—Rü nüxü nadau ga wüxi ga Equituanecüãx ga wüxi ga Yudíuxü na nacüaxixü. Rü yemacëx ga Moïché rü yema Yudíuétüwa inayuxu, rü yema Equituanecüãxü nimëx rü nanayuxëë. ²⁵—Rü nüma ga Moïché nagu rüxínügu rü chi natanüxüğü ga Yudíugü rü chi nüxü nacüëxgü na Tupana yéma namuxü na ínanguxüxëëãxüçëx. Natürü tama nüxü nacüëxgüéga ga yema natanüxüğü. ²⁶—Rü moxüãcü ga Moïché rü nüxü nadau ga to ga taxre ga Yudíugü ga nüğü yexma dëixü, rü nüxna nachogüchaü. Rü ñanagürü nüxü:

“Pema rü pegütanüxüğü pixíğü. ¿Rü tüxcüü pegü pedai i pemax?” ñanagürü. ²⁷—Rü yexguma ga yema namücüxü ícuaxixü rü Moïchéxü natëxnetä, rü ñanagürü nüxü:

“¿Texé cuxü tamu na toeru quiixüçëx rü tomaã icucuáxüçëx? ²⁸—¿Éxna choxü quimáxchaü ta, ga ñne quimáxü ga Equituanecüãxrüü?” ñanagürü. ²⁹—Rü yexguma yemaxü naxínügu ga Moïché, rü ñña ga yema naãnewa. Rü Madiáüãnewa naxü. Rü yema nachíüãne ga tama noxrü íxíxügu nayaxächíü. Rü yexma naxámëx rü nabu ga taxre ga nanegü. ³⁰—Rü 40 ga taunecüguwena ga dauxchitawa ga Chinaí ga mëxpúneärü ngaicamana, rü wüxi ga naixëtaxacü ga yéma iyauraxüwa Moïchéçëx nangox ga wüxi ga Tupanaärü orearü ngeruü ga daxüçüãx. ³¹—Rü nabáixächíãë ga Moïché ga yexguma nüxü nadëuxgu. Rü naxcëx nixü rü nüxna nangaicama na meã nüxü nadauxüçëx. Rü yexguma Moïchémaã nidexa ga Cori ga Tupana, rü ñanagürü nüxü:

³² “Choma nixi i curü oxigüarü Tupana chíixü rü Abráü rü Ichaá rü Acobuarü Tupana chíixü”, ñanagürü. Rü yexguma ga Moïché rü inanaxüğü ga norü muümaã na yaduruxü. Rü namuü ga yexma na nadawenüxü. ³³—Rü yexguma ga Cori ga Tupana rü ñanagürü nüxü:

“¡Ínacuaixü i curü chapatu erü ñaã naãne i nagu cuchixü rü naxüüne, erü chanuxma! ³⁴ Choma rü ngóxüwama nüxü chadau i ñuxácü poraãcü ngúxü na yangegüxü i chorü duüxüğü i Equituanewa. Rü nüxü chaxínü i na naxauxexü. Rü ngëmacëx núma chaxü na íchananguxüxëëxüçëx. ¡Nuã naxü na Equituanewa cuxü chamuxüçëx!”

ñanagürü. ³⁵—Rü woo ga noxri ga nümagü ga natanüxüğü rü guma Moïchéxü naxoe ga yexguma ñagügu:

“¿Rü texé cuxü tamu na toeru quiixüçëx rü tomaã icucuáxüçëx?” ñagügu, natürü ga Tupana rü yéma nanamuãma na yema duüxüğüxü ínanguxüxëëxüçëx rü norü ãëxgacü na yíxüçëx. Rü yemaãcü Moïchéxü namu ga Tupana ga yexguma naxütawa namuãxgu ga yema norü orearü

ngeruŭ ga yema naixētatacū ga iyauraxūwa naxcèx ngóxŭ. ³⁶ —Rü Moïché nixī ga Equituarū naānewa ínagaxūxŭ ga nuxcūmaũgūxŭ ga tórū oxigū. Rü Equituarū, rü Dauchiūxŭ ga Taxtūwa, rü dauxchitawa ga ngextá taxúema íxāpataxūwa inanawéx ga cuèxruũgŭ, rü nanaxū ga mexŭ ga taxũgŭ ga Tupanaārū poramaā naxūxŭ. Rü yemaācū 40 ga taunecū nūxŭ na rü-ngũxēē ga yema duũxũgŭ. ³⁷ —Rü nūmatama ga Moïché nixī ga tatanūxũgŭ ga Yudiũgūmaā ñaxŭ:

“Tupana rü yixcūra tá pexcèx nūxŭ naxuneta i petanūwa i wūxi i norū orearū uruŭ ga yexgumarūŭ ga choxŭ na naxunetaxūrūŭ”, ñanagürū. ³⁸ —Rü nūmatama ga Moïché nixī ga nuxcūmaũgūxŭ ga tórū oxigūmaā nangutaquèxexŭ ga yema naāne ga ngextá taxúema íxāpataxūwa. Rü tórū oxigūmaā nayexma ga Chinaī ga mèxpúnewa ga yexguma namaā yadeaxgu ga Tupanaārū orearū ngeruŭ ga daxūcũāx. Rü nūmatama ga Moïché nixī ga nayauxāxŭ ga Tupanaārū ore i maxèxēeruŭ na nūxī tūxna naxāaxŭcèx. ³⁹ —Natürū ga tórū oxigū rü tama naga naxīnūēchaŭ ga guma Moïché. Rü ínanatèxūchigūama, rü Equituaneguama narūxīnūāēgŭ. ⁴⁰ —Rü tórū oxigū rü Moïchéeneē ga Arāũxŭ ñanagürūgŭ: “¡Rü toxcèx naxŭ i tupanachicünèxāgŭ na nawe tarūxīxŭcèx! Erŭ tama nūxŭ tacuèxgŭ i tacŭ nūxŭ na ũpetūxŭ i ngēma Moïché ga Equituanewa tūxŭ yagagūxŭ”, ñanagürūgŭ. ⁴¹ —Rü yexguma nanaxũgŭ ga wūxi ga wocaxacūchicünèxā norū tupanaxŭ. Rü ñuxŭchi naxcèx nanadaŭ ga ñuxre ga carnerugŭ na yemamaā nūxŭ yacuèxũũgũxŭcèx. Rü wūxi ga peta naxcèx naxũgŭ ga yema wocaxacūchicünèxā ga nūmatama naxũgũxŭ. ⁴² —Rü yemacèx ga Tupana rü nūxna nixũgachi ga yema duũxũgŭ. Rü ínanawogŭ na woramacuri rü ũèxcŭ rü tauemacūmaā natupanaāxèēaxŭcèx. Yerŭ yemaācū Tupanaārū orearū uruũgārū poperagu naxūmatŭ, rü ñanagürū:

“Pema, Pa Yudiũgũx, ¿Chauxcèx yīxŭ ga penadèixŭ ga carnerugŭ ga yexguma 40 ga taunecū dauxchitawa ga ngextá taxúema íxāpataxūwa peyexmagũgu? ⁴³ Tama aixcūma chauxcèx nixī yerŭ ga pema rü ngextá ípexīxŭwa rü ípenangeexŭ ga napata ga perŭ tupananeta ga Moro rü ípenangeexŭ ga perŭ tupananeta ga Refāārū woramacurichicünèxā. Rü yemaācū pegūmaā ípenangeexŭ ga yema tupananetachicünèxāgŭ ga pematama pexũgũxŭ na nūxŭ picuèxũũgũxŭcèx. Rü ngēmacèx i ñuxma rü perŭ naānewa tá pexŭ íchawoxŭ rü yaxŭwa i Babiró-niāārū yexerawa tá pexŭ chamugŭ”, ñanagürū ga Tupana ga yema orewa. ⁴⁴ —Rü yema naāne ga ngextá taxúema íxāpataxūwa rü tórū oxigū nūxŭ nayexma ga wūxi ga ípata ga naxchirunaxcèx ga nagu namaā nanguxũgũne ga Tupanaārū mugŭ ga nutagu ũmatūxŭ. Rü guma ípata ga naxchirunaxcèx nixī ga nūxŭ nawēācūma Tupana Moïchéxŭ naxūxèxene. ⁴⁵ —Rü yexguma nayuxguwena ga Moïché, rü Yochué ningucuchi ga āèxgacŭ na yīxŭ. Rü tórū oxigū rü nuā tórū naānewa nanangegŭ ga guma ípata ga naxchirunaxcèx ga yexguma Yochuémaā napugũāgu ga ñāā naāne nūxna ga yema duũxũgŭ ga Tupana íwoxūxŭ napèxewa ga tórū oxigū. Rü nūma nayexma ga guma ípata rü ñuxmata Dabí ingucuchigu ga āèxgacŭ na yīxŭ. ⁴⁶ —Rü guma āèxgacŭ ga Dabí rü Tupana rü poraācū namaā nataāē, rü nūxŭ narũngũxèē. Rü nūma ga Dabí rü Tupanana naxcèx naca na naxūāxŭcèx ga wūxi ga tupauca ga taxũne ga nawa Tupanaxŭ na yacuèxũũgũxŭcèx ga tatanūxũgŭ ga Acobutaagŭ. ⁴⁷ —Natürū Dabí

nane ga Charumóu nixí ga naxücü ga guma tupauca ga Tupanacèx ixíxüne. ⁴⁸—Natürü ya Tupana ya tacüxüchima rü tama duüxügü üxüne ya tupaucagümaã naxâpata. Rü yemacèx ga Tupana rü nuxcümaücü ga norü orearü uruüwa rü ñanagürü:

⁴⁹⁻⁵⁰ “Choma nixí ya ãëxgacü ya tacüxüchima, rü daxüguxü i naãne nixí i chorü toxmaxwëxeruü ixíxü rü ñoma i naãne nixí i chorü chicutüruü ixíxü. ¿Rü ñuxücürüwa i nagu perüxínüëxü tá na penaxüxü ya wüxi ya tupauca ya chaugu mexüne?”

ñanagürü ga Cori ya Tupana. Rü ñanagürü ta ga Tupana:

“¿Tama ëxna choma yíxü ichanaxüxü ga guxüma i tacü i ngëxmaxü? ¿Rü ñuxäcü chi penaxüxü i wüxi i nachica i nagu charüngüxü?”

ñanagürü ga norü orewa. ⁵¹ Rü ñanagürü ga Etébaü: —Düçèx Pa ãëxgacügüx, pema rü guxüguma nüxü pexoe i Tupanaärü ore, rü tama iperüxínüëchaü. Rü peãëwa rü tama peyaxögüchaü. Rü pema rü guxüguma Tupanaãe i Üünexümaã penuëëcha. Yema nuxcümaügüxü ga perü oxigürüütama pixígü i pemax. ⁵² —Rü perü oxigü rü chixeäcüma namaã nachopetü ga guxüma ga Tupanaärü orearü uruügü. Rü nanadai ga yema orearü uruügü ga nüxü ixuchigagüxü ga na núma naxüxü tá ga guma mecü ya Ngechuchu. Rü yexguma ínanguxgu ga guma Ngechuchu rü pema Piratuna penamu rü penayuxëë. ⁵³ —Rü woo pema rü Tupanaärü orearü ngeruügü ga daxüçüãxütawa penayaxu ga Tupanaärü ore, natürü tama naga pexínüë —ñanagürü ga Etébaü.

Nayu ga Etébaü

⁵⁴ Rü yexguma nüxü naxínüëgu ga yema ore, rü nanuëxüchiamia ga yema duüxügü. Rü norü numaã Etébaüçèx nixüxchapütagü. ⁵⁵ Natürü ga Etébaü rü aixcüma Tupanaãe i Üünexü nawa nayexma. Rü daxü nadawenü, rü nüxü nadau na ñuxäcü namexëchixü ga Tupana. Rü nüxü nadau ga Ngechuchu ga Tupanaärü tügüneguama chicü. ⁵⁶ Rü yexguma rü ñanagürü: —Nüxü chadau i na yangoxnaächixü i naãnetüwe, rü nüxü chadau ya Cristu ya Tupana Nane ya duüxüxü ixíçü ya Tupanaärü tügüneguama chicü —ñanagürü ga Etébaü. ⁵⁷ Natürü nümagü rü nügü narütütamachixëgü, rü tagaäcü aixta naxüëäcüma nüxna nayuxgü. ⁵⁸ Rü ínanagaxüchigü ga íãnewa, rü nutagümaã ínamamuxüchigü. Rü yéma nayexma ga wüxi ga ngextüxüxü ga Chaurugu äegaxü. Rü yemaxü nanawotanü ga norü gáuxüchirugü ga ínacüxuchigüxü ga yema duüxügü ga Etébaüxü imëxgüxü. ⁵⁹ Rü yexguma nutamaã ínamuxüchigüäguyane, rü nayumüxë ga Etébaü rü ñanagürü: —Pa Cori Pa Ngechuchux, ¡Nayaxu i chauãe! —ñanagürü. ⁶⁰ Rü yemawena rü inacaxãpüxü, rü tagaäcü aixta naxü, rü ñanagürü: —Pa Cori Pa Tupanax, ¡Tãxü i ñaã pecaducèx cunapoxcuexü i ñaã duüxügü! —ñanagürü. Rü yexguma yema ñaxguwena rü nayu.

8

Chauru rü guxema yaxögüxewe ningëchigü na tüxü napoxcuexüçèx

¹ Rü Chauru rü norü me nixí ga Etébaüxü na yamëxgüxü. Rü yematama ngunexügu rü norü uwanügü rü inanaxügüe ga na poraäcü nawe yangëxütanüxü ga yema yaxögüxü ga Yerucharëüwa yexmagüxü. Rü düxwa ga guxüma rü Yudéaanegu rü Chamáriaanegu nügü nawoone. Rü yema ngüexügü ga Ngechuchu imugüxüxicatama ínayaxügü

ga Yerucharéŭwa. ² Rŭ ñuxre ga yatŭgŭ ga meāma Tupanaāxŭ yaxōgŭxŭ rŭ nanayauxgŭ ga Etébaŭxŭne, rŭ inanatèxgŭ rŭ poraācŭ naxcèx naxauxe. ³ R yexguma ga Chauru rŭ chixri tŭmamaā naxŭpetŭ ga guxema yaxōgŭxe. Rŭ tŭmapatagu nixŭcuchigŭ na tŭxŭ ñayauxŭxŭcèx. Rŭ yéma tŭxŭ ñatŭxŭ ga yatŭgŭ rŭ ngexegŭ, rŭ ñuxŭchi poxcupataŭgu tŭxŭ nawocu.

Chamáriawa nŭxŭ nixuchiga ga Tupanaārŭ ore i mexŭ

⁴ Rŭ yema yaxōgŭxŭ ga Chauruchaxwa ibuxmŭxŭ ga Yerucharéŭwa, rŭ guxŭwama ga ngextá ñaxŭtŭwa rŭ nŭxŭ nixuchigagŭ ga ñuxācŭ Ngechuchu tŭxŭ na maxèxèxŭ. ⁵ Rŭ Piripi nixŭ ga wŭxi ga yema orexŭ ixuchigacŭ. Rŭ nŭma rŭ ñāne ga Chamáriawa naxŭ, rŭ yéma inanaxŭgŭ ga Cristuchigaxŭ na yaxuxŭ. ⁶ Rŭ yema duŭxŭgŭ ga Chamáriacŭāx, rŭ Piripicèx nangutaquèxegŭ. Rŭ guxŭma meāma inarŭxŭnŭe ga yema ore ga namaā nŭxŭ yaxuxŭ, yerŭ nŭxŭ nadaugŭ ga yema mexŭgŭ ga taxŭgŭ ga Tupanaārŭ poramaā naxŭxŭ ga Piripi. ⁷ Rŭ muxēma ga duŭxègŭ ga ngoxogŭ tŭmawa yexmaxè rŭ tŭmacèx nitaanegŭ. Rŭ yema ngoxogŭ rŭ tagaācŭ aita naxŭeācŭma tŭmawa ñachoxŭ. Rŭ yexgumarŭŭ ta rŭ muxēma ga nawāixāchigŭxe rŭ chixeparagŭxe rŭ tŭmacèx nitaanegŭ. ⁸ Rŭ yemacèx poraācŭ nataāegŭ ga guxŭma ga duŭxŭgŭ ga guma ñāne ga Chamáriawa. ⁹ Natŭrŭ guma ñānewa nayexma ga wŭxi ga yatŭ ga Chimáŭgu āegaxŭ ga ñuxre ga taunecŭ norŭ yuŭmaā duŭxŭgŭxŭ womŭxèxŭ ga guma ñānewa. Rŭ nŭgŭ nixu ga na wŭxi ga ŭacŭxŭ cuāxŭ na yŭxŭ. ¹⁰ Rŭ guxŭma meāma nŭxŭ inarŭxŭnŭe woo ga buxŭgŭ rŭ yaxŭgŭ. Rŭ ñanagŭrŭgŭ: —Ñā yatŭ rŭ aixcŭma nŭxŭ nangèxma i Tupanaārŭ pora i taxŭ —ñanagŭrŭgŭ. ¹¹ Rŭ naga naxŭnŭe ga duŭxŭgŭ, yerŭ mucŭma ga taunecŭ rŭ norŭ yuŭmaā nanawomŭxèe. ¹² Rŭ Piripi rŭ yema duŭxŭgŭmaā nŭxŭ nixu ga ore ga mexŭ ga Ngechuchu ya Cristuchiga, rŭ ñuxācŭ na āèxgacŭ yŭxŭ ya Tupana. Rŭ yexguma yema ore yaxōgŭgu ga duŭxŭgŭ, rŭ Piripi ñanabaiŭxèe ga yatŭxŭ rŭ ngexŭgŭ. ¹³ Rŭ nŭmatama ga Chimáŭ rŭ ta nayaxō, rŭ ñnabaie. Rŭ inanaxŭgŭ ga Piripixŭ na naxŭmŭcŭxŭ. Rŭ yexguma nŭxŭ nadèuxgu ga yema cuèxruŭgŭ rŭ mexŭgŭ ga taxŭ ga Tupanaārŭ poramaā naxŭxŭ ga Piripi, rŭ poraācŭ nabaixāchiāe ga Chimáŭ. ¹⁴ Rŭ yema Ngechucharŭ ngŭxŭgŭ ga Yerucharéŭwa yexmagŭxŭ rŭ nŭxŭ naxŭnŭe chiga ga meā na nayauxgŭāxŭ ga Tupanaārŭ ore ga Chamáriawa. Rŭ yemacèx yéma nanamugŭ ga Pedru rŭ Cuáŭ. ¹⁵ Rŭ yexguma Chamáriawa nangugŭgu ga Pedru rŭ Cuáŭ, rŭ naxcèx nayumŭxègŭ ga yema yexwaca yaxōgŭxŭ ga duŭxŭgŭ, na nayauxgŭāxŭcèx ga Tupanaāe i Ūñexŭ. ¹⁶ Yerŭ yexguma noxri yaxōgŭāgu ga yema duŭxŭgŭ rŭ Piripi marŭ ñanabaiŭxèemare naegagu ga Cori ga Ngechuchu, natŭrŭ taxuxŭnata nangu ga Tupanaāe i Ūñexŭ. ¹⁷ Rŭ yemacèx ga Pedru rŭ Cuáŭ naxmèxmaā nŭxŭ ningōgŭgŭ ga yema yaxōgŭxŭ, rŭ yexguma nanayauxgŭ ga Tupanaāe i Ūñexŭ. ¹⁸⁻¹⁹ Rŭ nŭxŭ nadau ga Chimáŭ ga na duŭxŭgŭna nanguxŭ ga Tupanaāe i Ūñexŭ ga yexguma Pedru rŭ Cuáŭ naxmèxmaā yema duŭxŭgŭxŭ yangōgŭgŭgu. Rŭ yemacèx dŭeru Pedru rŭ Cuáŭna ngŭxŭ naxāxchaŭ ga Chimáŭ rŭ ñanagŭrŭ nŭxŭ: —jChoxna rŭ ta penaxā i ngēma pora, na yŭxema tŭxŭ chingōgŭxe rŭ ta tŭxna nanguxŭcèx i Tupanaāe i Ūñexŭ! —ñanagŭrŭ. ²⁰ Rŭ yexguma ga Pedru rŭ ñanagŭrŭ nŭxŭ: —jCuxrŭŭtama iyanataxŭx i curŭ dŭeru, erŭ ngŭmaā naxcèx cutaxechaŭ i Naāe i Ūñexŭ

i Tupana tūxna mumarexū! ²¹ Cuma rü taxucürüwama cunayaxu i ngēma pora, erü curü maxū rü tama name i Tupanapēxewa. ²² ¡Nūxū rüxo i ngēma curü chixexū, rü Tupanana naxcēx naca na cuxū nūxū nangechaūxūcēx! Rū bexmana tá cuxū nūxū nangecha i ngēma chixexū i cuāēwa nagu curūxīnūxū. ²³ Erü nūxū chacuēx rü poraācū cunuāēwēxe, rü ngēma curü chixexū rü cumaā inacuēx rü ñoma cupoxcuxūrū cuxū nixīxēē —ñanagürü. ²⁴ Rū Chimáū nanangāxū, rü ñanagürü: —¡Pema Tupanana chauxcēx peça na tama choxū nangupetūxūcēx i ngēma nūxū pixuxū! —ñanagürü. ²⁵ Rū Pedru rü Cuáū rü yema Chamáriaanecūāx ga duūxūgūmaā nūxū nixugūe ga Cori ga Ngechuchuchiga, rü namaā nūxū nixugūe ga Tupanaārü ore. Rū yemawena rü Yerucharéūcēx nawoegu. Rū namawa rü muxūne ga Chamáriaanewa yexmane ga ñānēxācūgūwa rü nūxū nixuetanū ga Tupanaārü ore i mexū.

Piripi rü namagu nūxū nangau ga wūxi ga āēxgacū ga Etiópiāanecūāx

²⁶ Rū yemawena, rü Tupanaārü orearü ngeruū ga daxūcūāx rü Piripimaā nūxū nixu, rü ñanagürü: —¡Rü paxa inaxūāchi rü ñāne ya Gachawaama naxū nawa i ngēma nama i Yerucharéūwa ne daxū rü Gachawa iyarūgoxū! —ñanagürü. Rū ngēma nixī i nama i dauxchitawa i ngextá taxúema íxāpataxūwa dapetūxū. ²⁷ Rū inaxūāchi ga Piripi rü yema namawa naxū. Rū yexma nūgū nangau namaā ga wūxi ga yatū ga Etiópiāanenguxū ga guxcūma ga yema āēxgacūarū dīeru. Rū ñēācū Yerucharéūwa naxū na Tupanaxū yanacuēxūxūcēx. ²⁸ Rū nachiūānecēx nataegu, rü norū autu ga cowaru itūchigūnēwa narūto. Rū nawa ningūchigū ga yema ore ga Tupanaārü orearü uruū ga Ichaxía ūmatūxū. ²⁹ Rū Tupanaāē i Ūñexū rü Piripixū ñanagürü: —¡Paxa naxcēx ixū i ngēma autu! —ñanagürü. ³⁰ Rū paxa yema autucēx niña ga Piripi. Rū yexguma naxūtawa nanguxgu rü nūxū naxīnū ga na Tupanaārü orearü uruū ga Ichaxía ūmatūxū ga orewa nangúxū ga yema āēxgacū. Rū yexguma ga Piripi rü nūxna naca rü ñanagürü nūxū: —¿Nūxū cucuáxū i űacūchiga na yīxū i ngēma nawa cungúxū? —ñanagürü. ³¹ Rū nūma ga āēxgacū ga Etiópiāanecūāx rü nanangāxū, rü ñanagürü: —¿Nūxūcürüwa i nūxū chacuáxū ega taxúema chomaā inanguxūxēēgux? —ñanagürü. Rū Piripicēx naca na naxīnagūxūcēx, rü naxūtawa na natoxūcēx. ³² Rū yema nawa yangūchigūxū ga Tupanaārü ore ga ūmatūxū, rü ñanagürü:

“Rü ñoma wūxi i carneru i norū mēxwa nagagūxūrūācū nayagagū.

Rü wūxi i carneruxacū i ngēma yayoxtēxagūxūpēxewa tama aita ūxūrū nāchianemare, rü taxu ñanagürü. ³³ Rū yexguma duūxūgū poraācū chixri namaā chopetūgu rü taxúema naētūwa tachogū. ¿Rü texé tá meā nachiga tīdexa ga yema duūxūgū ga yemaācū poraācūxūchima chixexū ūgūxū? Yerū nayamēxgū na nataxuxūcēx i norū maxū i ñoma i naānēwa”,

ñanagürü ga yema ore ga nawa nangúxū. ³⁴ Rū Piripina naca ga yema āēxgacū ga Etiópiāanecūāx, rü ñanagürü: —¡Chomaā nūxū ixu! ¿Rü texēchigagu nixī ga yadexaxū ga yema Tupanaārü orearü uruū? ¿Nūgūchigagutama rü ēxna toguechigagu? —ñanagürü. ³⁵ Rū yexguma nanangāxū ga Piripi. Rū yematama ore ga ūmatūxūmaā inanaxūgū na namaā nūxū yaxuxū ga ore i mexū ga Ngechuchuchiga. ³⁶ Rū yixcamaxūra ga yexguma inaxīyane, rü dexá íyexmaxūwa nangugū. Rū ñanagürü ga yema āēxgacū: —Nuā nangēxma i dexá. ¿Rü tama ēxna

inamexŭ na nuã choxŭ ícubaiaexêẽxŭ? —ñanagŭrŭ. ³⁷ Rŭ ñanagŭrŭ ga Piripi: —Ngêxguma aixcŭma meãma cuyaxôxgux, rŭ marŭ name i na cuxŭ íchabaiaexêẽxŭ —ñanagŭrŭ. Rŭ nanangãxŭ ga yema âêxgacŭ, rŭ ñanagŭrŭ: —Ngêmaãcŭ chayaxô na Ngechuchu ya Cristu yíxŭ ya Tupana Nane —ñanagŭrŭ. ³⁸ Rŭ yexguma inayachaxâchixêẽ ga norŭ autu, rŭ wŭxigu dexáchiüwa nachoŭ. Rŭ Piripi ínanabaiaexêẽ ga yema âêxgacŭ. ³⁹ Rŭ yexguma dexáwa ínachoõchigu, rŭ Tupanaãe i Üünexŭ rŭ Piripixŭ niga. Rŭ yema âêxgacŭ rŭ marŭ tama wena Piripixŭ nadau. Natŭrŭ taãêãcŭ namagu nixŭ. ⁴⁰ Natŭrŭ Achotowa nayangox ga Piripi. Rŭ yema íãnewa inaxŭãchi, rŭ nüxŭ nixuchigŭ ga ore i mexŭ ga guxŭma ga íãnewa ñuxmata Checharéaarŭ naãnewa nangu.

9

Ngechuchuaxŭ nayaxô ga Chauru

¹⁻² Rŭ yoxni ga Chauru rŭ daimaã nayaxãxŭnechigŭama ga yema duŭxŭgŭ ga Cori ga Ngechuchuaxŭ yaxôgŭxŭ. Rŭ yemacêx paigŭeruxŭtawa naxŭ, rŭ naxcêx nüxna naca ga popera ga nüxna âgaxŭ na Yudíugŭarŭ ngutaquêxepataŭgŭ ga Damacuwa yexmagŭnegu yaxŭcuchigŭxŭcêx rŭ yexma tŭmacêx nadauxŭcêx ga guxema yaxôgŭxe ga yatŭxe rŭ ngexegŭ na Yerucharéüwa tŭxŭ nagagŭxŭcêx rŭ yexma tŭxŭ yapoxcuxêxŭcêx. ³ Natŭrŭ yexguma marŭ Damacuxŭ yangaicagu, rŭ ngŭrŭãchi meãma nüxŭ nabáxi ga wŭxi ga omŭ ga poraxŭ ga daxŭwa íbáxixŭ. ⁴ Rŭ ñaxtŭanegu nayangu ga Chauru, rŭ nüxŭ naxŭnŭ ga wŭxi ga naga ga nüxna çagŭxŭ ga ñaxŭ: —Pa Chauru Pa Chaurux, ¿tŭxcŭŭ i chowe quingêchigŭxŭ? —ñaxŭ. ⁵ Rŭ Chauru nanangãxŭ, rŭ ñanagŭrŭ: —¿Rŭ texê quixŭ, Pa Corix? —ñanagŭrŭ. Rŭ nüma ga Cori rŭ nanangãxŭ rŭ ñanagŭrŭ: —Choma nixŭ i Ngechuchu, rŭ chorŭ duŭxŭgŭ nixŭ i ngêma nawe quingêchigŭxŭ. ⁶ ;Rŭ inachi, rŭ ngêma Damacuarŭ íãnewa naxŭ! Rŭ ngêma rŭ wŭxi ya yatŭ tá cumaã nüxŭ nixu na tacŭ tá cuxŭxŭ —ñanagŭrŭ. ⁷ Rŭ yema yatŭgŭ ga Chauruxŭ íxŭmŭcŭgŭxŭ, rŭ inayanguãêgŭ, yerŭ nüxŭ naxŭnŭe ga yema ore natŭrŭ taxŭexŭma nadaugŭ. ⁸ Rŭ ñuxŭchi inachi ga Chauru ga ñaxtŭanewa ga íyanguxŭwa, rŭ nidauchixetŭ, natŭrŭ taxuŭma nadau yerŭ nixoxetŭ. Rŭ yemacêx ga namŭcŭgŭ, rŭ nachacŭügu nayayauxãchi, rŭ yemaãcŭ Damacuwa nanagagŭ. ⁹ Rŭ tomaêxpŭx ga ngunexŭgu, rŭ nangexetŭ, rŭ tama nachibŭ, rŭ tama naxaxe. ¹⁰ Rŭ Damacuwa nayexma ga wŭxi ga yatŭ ga Ngechuchuaxŭ yaxôxŭ ga Ananíã ga naega. Rŭ Cori ya Ngechuchu naxcêx nangox, rŭ ñanagŭrŭ nüxŭ: —Pa Ananíãx —ñanagŭrŭ. Rŭ nüma ga Ananíã nanangãxŭ, rŭ ñanagŭrŭ: —¿Tacŭ? Pa Corix —ñanagŭrŭ. ¹¹⁻¹² Rŭ nüma ga Cori nanangãxŭ, rŭ ñanagŭrŭ: —¿Dŭcêx, ngêma ítamŭ i Meã i Wéxŭgu âegaxŭwa naxŭ! ;Rŭ ngêma Yudapatawa naxcêx ínaca i wŭxi i yatŭ i Tarsucŭãx i Chaurugu âegaxŭ! Rŭ nüma rŭ ngêma ínayumŭxê rŭ nangoxetŭ rŭ marŭ cuxŭ nadau, Pa Ananíãx, na ngêxma cuxŭcuxŭ rŭ naxêtŭgu quingôgŭxŭ na wena yadauchixŭcêx —ñanagŭrŭ ga Cori ga Tupana. ¹³ Rŭ yexguma yemaxŭ naxŭnŭgu ga Ananíã, rŭ ñanagŭrŭ: —Pa Corix, muxŭma i duŭxŭgŭ chomaã nüxŭ nixu i ngêma yatŭchiga na ñuxre i chixexŭ naxŭxŭ namaã i curŭ duŭxŭgŭ i Yerucharéüwa. ¹⁴ Rŭ ñuxma rŭ paigŭarŭ âêxgacŭgŭarŭ mumaã nüma naxŭ na ínayauxŭãxŭcêx i guxŭma i duŭxŭgŭ i cuégaгу yumŭxêgŭxŭ —ñanagŭrŭ. ¹⁵ Natŭrŭ nüma ga Cori rŭ ñanagŭrŭ nüxŭ: —¿Ngêma naxŭ! Erŭ choma chanayaxu i

ngēma yatū na choxū yaxuchigaxūcēx namaā i togū i nachiuānecūāxgū i duūxūgū rū norū āēxgacūgū, rū ngema Iraécūāxgū. ¹⁶ Rū choma tá nūxū nūxū chadauxēē i űuxre i ngūxū i tá yangexū i chauxcēx —ñanagūrū ga Cori. ¹⁷ Rū guma ĩpata ga Chauru nawa yexmanewa naxū ga Ananiā. Rū nagu naxūcu, rū nūxū ningōgū, rū ñanagūrū nūxū: —Pa Chaueneē Pa Chaurux, nūma ya Cori ya Ngechuchu ga guma namawa cuxcēx ngócū ga yexguma nūma cuxūxgu, rū nūma choxū namu na wenaxārū quidauchixūcēx, rū cuxna nanguxūcēx i Naāē i Ūūnexū —ñanagūrū. ¹⁸ Rū yexgumatama rū ñoma tacūchicutēxerūū naxētūwa ĩnayı, rū yexguma wenaxārū meā nidauchixetū. Rū yexguma inachi ga Chauru, rū Ananiā ĩnabaiaexēē. ¹⁹ Rū yemawena nachibū, rū wenaxārū napora. Rū űuxre ga ngunexūgu yexma Damacugu narūxāūx namaā ga yema yaxōgūxū ga yexma āchiūgūxū.

Chauru rū Damacuwa nūxū nixu ga Ngechuchuchiga

²⁰ Rū yexguma inanaxūgū ga Chauru ga ngutaquēxepataūgūwa nūxū na yaxuchigaxū na Ngechuchu yīxū ya Tupana Nane. ²¹ Rū guxūma ga yema nūxū ĩnūēxū rū poraācū nabaixāchiāēgū, rū ñanagūrūgū: —¿Tama ēxna ñaā yatū yīxū ga Yerucharēūwa ĩyayauxūgūxū ga guxūma ga duūxūgū ga Ngechuchuxū yaxōgūxū? ¿Rū tama ēxna ñaātama yīxū ga yema nūma ūxū na ĩnayauxūāxūcēx rū űuxūchi paigūarū āēxgacūxūtaawa nagagūāxūcēx i duūxūgū i yaxōgūxū? —ñanagūrūgū. ²² Natūrū ga Chauru rū guxū ga ngunexūgu yexeraācū tama namuūācūma nūxū nixuchigaama ga ore ga Ngechuchuchiga. Rū inayanangeēxgūxēē ga Yudiūgū ga Damacuwa yexmagūxū, yerū meāma nanangoxēē na Cristu yīxū ga Ngechuchu.

Chauru rū Yudiūgū- chaxwa niña

²³ Rū marū muxūma ga ngunexūgū ngupetūguwena rū yema Yudiūgū rū wūxigu nūgūmaā nagu narūxīnūē na Chauruxū yamēxgūxūcēx. ²⁴ Natūrū nūma ga Chauru rū nūxū nacuāchiga ga na yamēxgūchaūāxū. Rū yema Yudiūgū rū ngunecū rū chūtacū rū guma ĩāneārū poxeguxūārū ĩāxgūgu Chauruxū nanēxgūxū na yamēxgūāxūcēx. ²⁵ Natūrū ga Chauruarū ngūexūgū rū chūtacū rū wūxi ga pexchi ga tacūgu guma ĩāneārū poxeguxūtapūxētūwa ĩnanaçūxūetaūgūama, rū yemaācū niña ga Chauru.

Yerucharēūwa nayexma ga Chauru

²⁶ Rū yexguma Yerucharēūwa nanguxgu ga Chauru, rū yema yaxōgūxūmaā nangutaquēxechaū. Natūrū yema yaxōgūxū rū nūxū namuūē, yerū nūma nūxū nacuēxgūgu rū tama aixcūma Ngechuchuxū nayaxō. ²⁷ Natūrū Bernabé rū yema ngūexūgū ga Ngechuchu imugūxūtanūwa nanagaama. Rū yema ngūexūgūmaā nūxū nixu ga űuxācū Cori ya Ngechuchuxū na nadauxū ga Chauru ga namawa, rū űuxācū Cori namaā na idexaxū. Rū nūxū nixu ta ga űuxācū Damacuwa rū tama namuūācūma nūxū na yaxuxū ga Ngechuchuchiga. ²⁸ Rū yemaācū ga Chauru rū Yerucharēūgu narūxāūx. Rū yema ngūexūgū ga Tupana imugūxūtanūgu naxā. Rū tama namuūācūma Cori ya Ngechuchuchigaxū nixuchigū. ²⁹ Rū yema Yudiūgū ga Griégugawa idexagūxūmaā nidexaxū ga Chauru, rū Ngechuchuchigagu nūgūmaā nayaporaagaexū. Natūrū ga nūmagū rū naxcēx nadaugūama ga űuxācū tá na yamēxgūāxū. ³⁰ Rū yexguma nūxū yacuēxāchitanūgu ga yema togū ga yaxōgūxū, rū Checharéawa Chauruxū nagagū. Rū yexguma yéma

nangugūgu rü wūxi ga wapurugu nayamuēgū rü Tarsuwa naxū. ³¹ Rü yexguma rü meāma nüxū naxūpetū ga yema yaxōgūxū ga guxūma ga Yudéaanewa, rü Gariréaanewa rü Chamárianewa. Rü yexeraācū meā nayaxōgūetanū rü aixcūma Tupana naxwēxexūācūma meā namaxē. Rü Tupanaāē i Ūūnexūārū ngūxēēmaā nimuētanūāma ga yema yaxōgūxū.

Eneā rü narūme

³² Rü yexguma Pedru yema yaxōgūxūtanūgu ixūāgūchigūxgu, rü yema Didágu āchiūgūxū ga yaxōgūxūtanūwa rü ta nangu. ³³ Rü yexma nüxū nayangu ga wūxi ga yatū ga Eneā ga naega ga 8 ga taunecū norū pechicagu cacū, yerū nanawāixāchi. ³⁴ Rü Pedru ñanagūrū nüxū: — Pa Eneāx, Ngechuchu ya Cristu cuxū narūmexēē. ¡nachi rü namexēē i cuxchapenūxū! —ñanagūrū. Rü yexgumatama inachi. ³⁵ Rü guxūma ga yema Didácūāxgū rü Charunacūāxgū rü nüxū nadaugū ga na inachixū ga guma yatū, rü nüxū narūxoe ga nacūmagū ga chixexū, rü Cori ya Ngechuchuwe narūxī.

Wena imaxū ga Dorca

³⁶ Rü yexgumaūcūū ga iāne ga Yopewa rü iyexma ga wūxi ga Tupanaāxū yaxōxcū ga ngecū ga Tabita ga ngēega. Rü ngēma naega i Griégugawa rü Dorca ñaxūchiga nixī. Rü ngīma rü wūxi ga mecū iyixī ga ngīrū ūwa, rü guxūguma nüxū irūngūxēē ga yema duūxūgū ga tacū nüxū taxuxū. ³⁷ Rü yexgumaūcūū iyadaawe ga Dorca, rü iyu, rü ngīmūcūgū nanamexēē ga ngīxīne. Rü İpataarū daxūchiūwa yexmaxū ga ucapugu nanaxūgū ga ngīxīne. ³⁸ Rü Yopearū ngaicamana nayexma ga guma iāne ga Didá ga Pedru nawa yexmane. Rü yema yaxōgūxū ga Yopecūāx rü nüxū nacuēxgū ga Didáwa na nayexmaxū ga Pedru. Rü naxcēx yēma nanamugū ga taxre ga yatū ñaxūmaā: —¡Rü paxa toxcēx nuā naxū! —ñaxūmaā. ³⁹ Rü yexguma ga Pedru rü nawa narūxū. Rü yexguma inanguxgu, rü yema ucapu ga yema yueta nawa yexmaxūwa nanagagū. Rü guxūma ga yutegūxū rü Pedruxū Ínachomaēguāchi, rü nax-auxe, rü nüxū nayawégū ga yema naxchirugū ga Tabita nüxū íxūxūxū ga yexguma namaūxgu. ⁴⁰ Rü Pedru rü dūxētūwa nanamugū ga guxūma. Rü inacaxāpūxū, rü nayumūxē. Rü ñuxūchi ngīxcēx nadauegu ga yema yuxcū, rü ñanagūrū: —Pa Tabitax, ¡Írūda! —ñanagūrū. Rü yexguma rü iyadauchixetū, rü Pedruxū idau, rü írūto. ⁴¹ Rü yexguma ngīxmēxgu nayayauxāchi, rü ngīxū inachixēē. Rü ñuxūchi naxcēx naca ga yema yaxōgūxū rü yema yutegūxū, rü maxūxcū nüxū ngīxū nawēx. ⁴² Rü guxūma ga yema duūxūgū ga Yopewa yexmagūxū rü nüxū nacuāchigagū ga yema. Rü Cori ga Ngechuchuaxū nayaxōgū ga muxūma. ⁴³ Rü muxūma ga ngunexū Yopegu narūxāūx ga Pedru napatagu ga Chimāū ga naxchēxmūārū paxēēwa puracūxū.

10

Pedru rü Cornériuchiga

¹ Rü iāne ga Checharéawa nayexma ga wūxi ga yatū ga Cornériugu āegacū. Rü 100 ga Itárianecūāx ga churaragūarū capitāū nixī. ² Rü nūma nixī ga wūxi ga yatū ga meāma Tupanaāxū yaxōcū. Rü wūxigu namēxmaā rü naxācūgūmaā Tupanaxū nangechaūgū. Rü mucūma ga norū dferumaā nüxū narūngūxēē ga duūxūgū ga Yudiugū ga tacū nüxū taxuxū. Rü guxūguma nayumūxē rü Tupanamaā nidexa. ³ Rü wūxi ga

ngunexŭ ga yexguma tomaēxpūxarū orawa nanguxchaŭgu ga yáuanecŭ, rŭ nangoxetŭ. Rŭ meāma nŭxŭ nadau ga wŭxi ga Tupanaārŭ orearŭ ngeruŭ ga daxŭcŭāx ga yema ucapu ga nawa nayexmaxŭgu ũcuxŭ. Rŭ űanagŭrŭ nŭxŭ: —Pa Cornériux —űanagŭrŭ. ⁴ Natŭrŭ nŭma ga Cornériu rŭ meāma nŭxŭ nadawenŭ, rŭ poraācŭ namuűācŭma nŭxna naca, rŭ űanagŭrŭ: —¿Tacŭ cunaxwēxe, Pa Corix? —űanagŭrŭ. Rŭ nanangāxŭ ga yema orearŭ ngeruŭ ga daxŭcŭāx, rŭ űanagŭrŭ: —Curŭ yumŭxēgŭ rŭ Tupana marŭ cuxŭ nŭxŭ naxŭnŭ, rŭ cumaā nataāē na űuxācŭ nŭxŭ curŭngŭxēēxŭ i duŭxŭgŭ i űacŭ nŭxŭ taxuxŭ. ⁵ —jRŭ chanaxwēxe i Yopewa cunamugŭ i űuxre i yatŭgŭ na naxcēx yacagŭxŭcēx i wŭxi i yatŭ i Chimáu i Pedrugu āēgaxŭ! ⁶ —Rŭ to i Chimáu i naxchēxmŭārŭ paxēēwa puracŭxpatawa nangēxma rŭ ngēxma nape. Rŭ yima napata rŭ taxtŭ i taxŭcutŭwa nangēxma —űanagŭrŭ. ⁷ Rŭ yexguma nŭxna iyanatauxgu ga yema orearŭ ngeruŭ ga namaā yēma idexaxŭ, rŭ Cornériu rŭ naxcēx naca ga taxre ga norŭ puracŭtanŭxŭ rŭ wŭxi ga churara ga meā naga űnŭxŭ ga meā Tupanaāxŭ yaxŭxŭ. ⁸ Rŭ namaā nŭxŭ nixu ga guxŭma ga yema nŭxŭ nadauxŭ, rŭ űnŭxŭchi Yopewa nanamugŭ. ⁹ Rŭ moűācŭ ga yexguma namagu naxŭyane rŭ marŭ Yopexŭ yangaicagŭgu ga yema duŭxŭgŭ ga Cornériu yēma mugŭxŭ, rŭ Pedru rŭ daxŭ naxŭ ga űpataētŭwa na yēma nayumŭxēxŭcēx. Rŭ tocuchiarŭ oragu nixŭ ga yexguma. ¹⁰ Rŭ nataiye, rŭ nŭxŭ nachŭxéga ga na nachibŭxŭ. Rŭ yexguma norŭ űna űnaxŭgŭyane, rŭ nangoxetŭ ga Pedru. ¹¹ Rŭ nŭxŭ nadau ga na yangoxnaxŭ ga naānetŭwe, rŭ yēma űnarŭxŭ ga wŭxi ga naxchiru ga űnoma wŭxi ga taxŭ ga naxchāpenŭŭrŭŭ űxŭxŭ. Rŭ norŭ āgŭmŭcŭpēxewa naxātŭxŭ rŭ yemaācŭ űnarŭchŭxŭe űnŭxmata űnaxtŭanewa nangu. ¹² Rŭ yemagu űnarŭchŭxŭewetaxŭ ga nagŭxŭraŭxŭ ga naēxŭgŭ, rŭ āxtapegŭ, rŭ werigŭ. Rŭ yema naxchāpenŭŭwa nayexma ta ga űacŭ ga tama nangŭxŭgŭxŭ ga Yudŭgŭ. ¹³ Rŭ Pedru nŭxŭ naxŭnŭ ga Tupanaga ga nŭxŭ űnaxŭ: —Pa Pedrux jűnachi, rŭ ta imēx, rŭ nangŭx! —űnaxŭ. ¹⁴ Rŭ Pedru nanangāxŭ rŭ űanagŭrŭ: —Taxucŭrŭwa nixŭ, Pa Corix, erŭ taguma chanangŭx i űacŭ i toxcēx āŭāchixŭ —űanagŭrŭ. ¹⁵ Rŭ yexguma ga yema Tupanaga, rŭ wenaxārŭ űanagŭrŭ: —Ngēma choma chamexēēxŭ rŭ tama name i āŭāchi nŭxŭ cuwogŭ —űanagŭrŭ. ¹⁶ Rŭ tomaēxpŭxcŭna yemaācŭ nangupetŭ. Rŭ yexguma wenaxārŭ daxŭ nachŭxnagŭ ga yema naxchāpenŭŭ namaā ga guxŭma ga nawa yexmagŭxŭ. ¹⁷ Rŭ poraācŭ nagu narŭxŭnŭ ga Pedru ga űacŭchiga na yŭxŭ ga yema nŭxŭ nadauxŭ ga yexguma nangoxetŭgu. Rŭ yemagu űnaxŭnŭyane, rŭ guma űpataēxwa nangugŭ ga yema yatŭgŭ ga Cornériu yēma mugŭxŭ ga naxcēx űcaetanŭxŭ ga Chimáuŭpata. ¹⁸ Rŭ yēma naxcēx űnacagŭ rŭ aixcŭma yexma nape ga wŭxi ga yatŭ ga Chimáu ga Pedrugu āēgaxŭ. ¹⁹ Rŭ Pedru nagu űrŭxŭnŭyane ga yema nŭxŭ nadauxŭ ga yexguma nangoxetŭgu, rŭ Tupanaāē i Ŭnŭxŭ rŭ űanagŭrŭ nŭxŭ: —Ngēāgŭ nixŭ i tomaēxpŭx i yatŭgŭ i cuxcēx daugŭxŭ. ²⁰ —jűnachi, rŭ űrŭxŭ, rŭ tama cuxoegaēācŭma nawe rŭxŭ! Erŭ choma nixŭ i nŭma chanamugŭxŭ —űanagŭrŭ. ²¹ Rŭ yexguma naxcēx űnarŭxŭ ga Pedru, rŭ űanagŭrŭ nŭxŭ ga yema yatŭgŭ: —Choma nixŭ i chauxcēx pedaugŭxŭ. ¿Rŭ űacŭwa nuā pexŭ? —űanagŭrŭ. ²² Rŭ nŭmagŭ nanangāxŭgŭ, rŭ űanagŭrŭgŭ: —Capitáu ya Cornériuxŭtawa ne taxŭ rŭ nŭma nixŭ i nuā toxŭ namugŭxŭ. Rŭ wŭxi ya yatŭ ya mecŭ nixŭ, rŭ Tupanaxŭ nangechaŭ. Rŭ guxŭma i Yudŭgŭ nŭxŭ nangechaŭ i nŭmax. Rŭ wŭxi ga Tupanaārŭ orearŭ ngeruŭ ga daxŭcŭāx nanamu na cuxcēx toxŭ yacaxēēxŭcēx

ga Cornériu rü napatawa cuxūxūcèx rü nüxū na naxīnūxūcèx i curū ore —ñanagürügü. ²³ Rü yexguma nanachocuxèè ga Pedru, rü yexma nanapègūxèè ga yema chūtaxūgu. Rü moxūācū inaxīāchi rü nawe narūxū ga Pedru. Rü Inayaxūmūcūgū ga ñuxre ga Yopecūāx ga yaxōgūxū. ²⁴ Rü moxūācū Checharéawa nangugū ga ngextā Cornériu Inanguxèèxūwa namaā ga guxūma ga natanūxūgū rü namūcūgū ga nüxū nangechaūgūxū ga nüxna naxuxū. ²⁵ Rü yexguma Cornériupatawa nanguxgu ga Pedru, rü ñāxtūwa naxcèx naxū ga Cornériu, rü Pedrupèxegu nayacaxāpūxū, rü nüxū nicuèxū. ²⁶ Natürü ga Pedru rü inanachixèè rü ñanagürü: —¡Inachi! Rü choma rü ta cuxrūū duūxūmare chixī rü tama Tupana chixī —ñanagürü. ²⁷ Rü nūgūmaā yadexagūācūma wūxigu nichocu. Rü Pedru yéma namaā inayarūxū ga muxūma ga duūxūgū ga yexma ngutaquèxegūxū. ²⁸ Rü yexguma ga Pedru rü ñanagürü nüxū ga yema duūxūgū ga yexma ngutaquèxegūxū: —Pema nüxū pecuèx i toma i Yudūgūcèx rü nangèxma i torū mugū i toxna nachuxuxū na pemaā tangutaquèxegūxū, rü pepatagu na tachocuxū. Natürü Tupana choxū nangoxetūxèè rü choxū nüxū nadauxèè na tama namexū na ngēmaācū nagu na charūxīnūxū pemaā. ²⁹ Rü ngēmacèx tama chaxoōcūma nūma chaxū i ngèxguma chauxcèx pengemagu. Rü ñuxma rü chanaxwèxe i chomaā nüxū pixu na tacūcèx chauxcèx pengemaxū —ñanagürü. ³⁰ Rü Cornériu nanangāxū, rü ñanagürü: —Marū āgūmūcū i ngunexū nangupetū ga ñūxgumaācū ga tomaēxpūxarū oragu ga yáuanecū, rü nuā chopatawa chayumūxè erū guxūguma ngēmaācū chanaxū. Rü yexguma chayumūxègu rü changoxetū, rü chauxcèx nangox ga wūxi ga yatū ga iyaurachirucūūxū. ³¹ —Rü ñanagürü choxū:

“Pa Cornériux, Tupana marū nüxū naxīnū i curū yumūxè rü cumaā nataāè na ñuxācū nüxū curūngūxèèxū i duūxūgū i tacū nüxū taxuxū. ³² —¡Rü Yopewa namugū i ñuxre i yatūgū na naxcèx yacagūxūcèx i Chimáú i Pedrugu āegaxū! Rü to i Chimáú i naxchèxmūārū paxèèwa puracūxūpatagu pexū. Rü yima napata rü taxtū i taxūcutūwa nangèxma”, ñanagürü choxū. ³³ Rü yemacèx rü yexgumatama paxa cuxcèx yéma chanamugū, rü cuma rü mexū toxcèx cuxū erū nūma cuxū. Rü ñuxma i guxāma i toma rü Tupanapèxewa tangèxmagū. Rü nüxū taxīnūēchaū i gux-ūma i ngēma ore i Cori namaā nūma cuxū muxū na tomaā nüxū quixuxūcèx —ñanagürü ga Cornériu.

Pedru rü Cornériupatawa nüxū nixu ga Ngechuchuchiga

³⁴ Rü yexguma inanaxūgū ga Pedru ga na yadexaxū, rü ñanagürü: —Ñuxma waxi nixī i nüxū chacuáxū na Tupanacèx nawūxiguxū i guxūma i duūxūgū erū nūma rü aixcūma guxāxūma nangechaū. ³⁵ —Rü nūma rü wūxichigū i nachīñānewa nanade i ngēma duūxūgū i nüxū ngechaūgūxū rü mexū ūgūxū. ³⁶ —Rü nūma ga Tupana rü Yudūgūtanūwaxīra nanamu ga norū ore rü marū nüxū nixu na tūxū nüxū nangechaūxū i tórū pecadugū i ngèxguma Cristu ya guxāārū Cori ixīcūaxū yaxōgūgu. ³⁷ —Pema rü meāma nüxū pecuèx na tacū ngupetūxū ga guxūwama ga Yudūgūarū naānewa. Rü noxri ga Cuáú rü nüxū nixu na Tupana naxwèxexū na ínabaiūxū ga duūxūgū. Rü yemawena ga Ngechuchu rü Gariréanewa inanaxūgū ga duūxūgūmaā nüxū na yaxuxū ga ore i mexū. ³⁸ —Rü pema nüxū pecuèx ga ñuxācū Tupana na naporaxèèxū ga Ngechuchu ya Nacharétucūāx yerū nüxna nanaxā ga Naāè i

Üünexü. Rü nüma ga Ngechuchu rü mexü naxü ga yema íyaxügxüwa, rü nanameëxëë ga guxüma ga yema duüxügü ga ngoxoãgxüü. Rü yemaäcü nanaxü yerü Tupana nüxü narüngüxëë. ³⁹—Rü toma nixí ga nüxü tadaugüü rü nüxü tixuchigaxü i guxüma ga naxüü ga Ngechuchu ga Yudéaanewa rü Yerucharéüarü íánewa. Rü yemawena rü nayamèxgü rü curuchawa nayapotagü. ⁴⁰—Natürü ga Tupana rü tomaëxpüx ga ngunexü ngupetügu rü wena nanamaxëë rü toxcèx nanangoxëë. ⁴¹—Natürü tama guxü ga duüxügücèx nangox. Rü toxcèxicatama nangox ga toma ga üpamama Tupana toxü dexe na nüxü tixuxücèx i Ngechuchuchiga. Rü yexguma marü yuwa ínadaxguwena rü namaã tachibüe rü namaã taxaxegü. ⁴²—Rü nümatama ga Ngechuchu toxü nimugü na duüxügümaã nüxü tixuxücèx na Tupana marü äëxgacüxü yangucuchixëëxü na guxü i duüxügüarü ngugürü na yíxüçèx. Rü nüma ya Ngechuchu nixí i tórü maxüxü nangugüxü, rü nüma tá nixí i guxü i duüxügü i maxëxü rü yuexüxü yacagüxü naxcèx i norü maxüchiga. ⁴³—Rü üpamamatama guxüma ga Tupanaärü orearü uruügu rü Ngechuchuchiga nidexagü, rü ñanagürügü: “Rü nüma tá nüxü nüxü nangechaü i norü pecadugü i guxüma i duüxügü i nüxü yaxögüxü”, ñanagürügü.

Tupanaãë i Üünexü rü yema duüxügü ga tama Yudüguü ixügxütanüwa nangü

⁴⁴ Rü yexguma íyadexayane ga Pedru, rü Tupanaãë i Üünexü nüxna nangu ga guxüma ga yema yéma íruxüñüëxü ga yema ore. ⁴⁵ Rü yema yaxögüxü ga Yudüguü ga Pedrumaã yéma íxü, rü poraäcü nabaixächíäëgü yerü Tupanaãë i Üünexü rü nüxna rü ta nangu ga yema duüxügü ga tama Yudüguü ixügxü. ⁴⁶ Rü nüxü naxüñüë ga to ga nagawachigü na yadexagüxü, rü Tupanaxü na yacuèxüügxü. ⁴⁷ Rü yexguma ga Pedru rü ñanagürü: —¿Éxna nangëxmaxü i texé na nüxna nachuxuxü i na ínabaiüxü i ñaã duüxügü i marü taxrüü Tupanaãë i Üünexü nüxna nguxü? —ñanagürü. ⁴⁸ Rü nanamu na Ngechuchu ya Cristuégagu na ínabaiüxü ga yema duüxügü ga yexwaca yaxögüxü. Rü yexguma Pedruxü nacèxügü na yexma naxáüxücèx ga ñuxre ga ngunexü.

11

Pedru rü Yerucharéüwa yexmagüxü ga yaxögüxümaã nüxü nixu ga tacü na ngupetüxü ga Checharéawa

¹ Rü yema ngüexügü ga Ngechuchu imugüxü rü yema yaxögüxü ga Yudéagüxü, rü nüxü nacuáchigagü na yema tama Yudüguü ixügxü rü ta nayauxgüãxü ga Tupanaärü ore. ² Natürü yexguma Yerucharéüwa nanguxgu ga Pedru, rü ñuxre ga Yudüguü ga yaxögüxü rü Pedruxü nixugüe. ³ Rü ñanagürügü: —¿Rü tüxcüü natanüwa cuxü i ngëma tama Yudüguü ixügxü, rü namaã cuchibü? —ñanagürügü. ⁴ Rü Pedru meäma namaã nüxü nixu ga guxüma ga tacü na ngupetüxü, rü ñanagürü nüxü: ⁵—Choma rü Yopearü íánewa chayexma, rü yexguma íchayümüxëyane, rü changoxetü. Rü nüxü chadau ga wüxi ga naxchápenüüüü ixüxü ga norü ägümüçüpëxewa ätüxüxü ga írüçhüxüexü ñuxmata chauxütawa nguxü. ⁶—Rü meäma nüxü chadawenü na nüxü chadauxücèx na tacü yexmaxü ga aixepewa. Rü nüxü chadau ga naxümagü ga ixägümüçüparaxü rü

naëxŭgŭ ga idŭraexŭ, rŭ äxtapegŭ rŭ werigŭ. Rŭ yema naxchápenŭŭwa nayexma ta ga tacŭ ga tama ingōxŭ, erŭ taxcèx i yixema i Yudŭgŭ rŭ naxãŭachi. ⁷ —Rŭ nüxŭ chaxŭnŭ ta ga Tupanaga ga choxŭ ñaxŭ:

“¡Inachi! Pa Pedrux. ¡Rŭ ta imèx, rŭ nangōx!” ñaxŭ. ⁸ —Natŭrŭ choma chanangãxŭ, rŭ ñacharŭgŭ:

“Taxucŭrŭwa nixŭ, Pa Corix, erŭ taguma chanangōx i tacŭ i toxcèx ãŭãchixŭ”, ñacharŭgŭ. ⁹ —Rŭ yexguma wenaxãrŭ ñanagŭrŭ choxŭ ga yema Tupanaga ga daxŭwa inaxŭxŭ:

“Ngēma choma i Tupana chamexēxŭ, rŭ tama name i ãŭãchi nüxŭ cuwogŭ”, ñanagŭrŭ. ¹⁰ —Rŭ tomaëxpŭxcŭna yemaãcŭ nangupetŭ, rŭ yexguma wenaxãrŭ daxŭ nachŭxnagŭ ga yema naxchápenŭŭ namaã ga guxŭma ga nawa yexmagŭxŭ. ¹¹ —Rŭ yexgumatama guma ŭ ga nawa chayexmanewa nangugŭ ga tomaëxpŭx ga yatŭgŭ ga Checharéawa ne mugŭxŭ ga chauxcèx daugŭxŭ. ¹² —Rŭ Tupanaãe i Üünexŭ choxŭ namu na nawe charŭxŭxcèx woo tama Yudŭgŭ na yixŭgŭxŭ ga yema duŭxŭgŭ. Rŭ chomaã ta yéma naxŭ ga ñaã 6 ga yaxōgŭxŭ. Rŭ napatawa tangugŭ ga guma yatŭ ga Cornériu, rŭ yexma tachocu. ¹³ —Rŭ tomaã nüxŭ nixu ga ñuxãcŭ na napatawa nüxŭ nadauxŭ ga Tupanaãrŭ orearŭ ngeruŭ ga daxŭcŭãx ga yexma chixŭ ga ñaxŭ nüxŭ:

“¡Yopewa namugŭ i yatŭgŭ na naxcèx yacagŭxŭcèx i Chimáŭ i Pedrugu ãegaxŭ! ¹⁴ —Rŭ nüma tá cumaã nüxŭ nixu na ñuxãcŭ tá cuma rŭ guxŭ i cupatagugŭxŭmaã penayaxuxŭ i perŭ maxŭ i taguma gŭxŭ”, ñanagŭrŭ nüxŭ. ¹⁵ —Rŭ yexguma ichanaxŭgŭgu ga na chidexaxŭ, rŭ nüxna nangu ga Tupanaãe i Üünexŭ, yexgumarŭŭ ga noxri tŭxna nanguxgurŭŭ. ¹⁶ —Rŭ yexguma ga choma rŭ nüxna chacuèxãchi ga Cori ya Ngechucharŭ ore ga yexguma ñaxgu:

“Rŭ aixcŭma nixŭ ga Cuáŭ ga dexáwamare ínabaiŭxēēãxŭ, natŭrŭ i pema rŭ Tupanaãe i Üünexŭ tá pexna nangu”, ñaxgu. ¹⁷ —Rŭ pema nüxŭ pecuèx na ñuxãcŭ Tupana tŭxna nanguxēxŭ ga Naãe i Üünexŭ i yixema na Cori ya Ngechuchu ya Cristuaxŭ yaxōgŭxŭ. Rŭ ñuxma na taxrŭŭ Tupana yema duŭxŭgŭna nanguxēxŭ ga Naãe i Üünexŭ, ¿rŭ ñuxcŭrŭwa i choma i nüxŭ chaxoxŭ na naga chaxŭnŭxŭ ya Tupana? —ñanagŭrŭ ga Pedru. ¹⁸ Rŭ yexguma yema orexŭ naxŭnŭëgu ga yema yaxōgŭxŭ ga Yerucharéŭcŭãx, rŭ nachianegŭmare. Rŭ Tupanaxŭ nicuèxŭŭgŭ. Rŭ ñanagŭrŭgŭ: —Rŭ ngēmawa nüxŭ tacuèx na Tupana tŭxŭ dexŭ ya yixema woo tama Yudŭgŭ ixŭgŭxe. Rŭ ngëxguma nüxŭ tarŭxoegu i tŭmaãrŭ chixexŭ rŭ Tupanacèx tadaugŭgu, rŭ nüma tŭxna nanaxã i maxŭ i taguma gŭxŭ —ñanagŭrŭgŭ.

Yaxōgŭxŭ ga Aŭtioquíawa yexmagŭxŭchiga

¹⁹ Rŭ yexguma Etébaŭxŭ yamèxgŭguwena, rŭ norŭ uwanŭgŭ poraãcŭ nawe ningèxŭtanŭ ga yema yaxōgŭxŭ. Rŭ yemacèx nügŭ nawoone. Rŭ Peníchiawa, rŭ Chiprewa rŭ Aŭtioquíawa nabuxmŭ. Rŭ yéma nüxŭ nixugŭe ga ore ga mexŭ ga Ngechuchuchiga. Natŭrŭ Yudŭgŭmaãxŭcatama nüxŭ nixugŭe ga yema ore rŭ tama ga togŭmaã. ²⁰ Natŭrŭ yéma Aŭtioquíawa nangugŭ ta ga ñuxre ga togŭ ga yaxōgŭxŭ ga Chíperecŭãx, rŭ Chireneçŭãx. Rŭ nümagŭ rŭ yema tama Yudŭgŭ ixŭgŭxŭmaã rŭ ta nüxŭ nixugŭe ga ore i mexŭ i Cori ya Ngechuchuchiga. ²¹ Rŭ Tupana nüxŭ narŭngŭxēē, rŭ nanaporaexēē. Rŭ yemacèx muxŭma ga yema duŭxŭgŭ rŭ nüxŭ narŭxoe ga nuxcŭmaŭxŭ ga nacŭmagŭ, rŭ Cori ya Ngechuchuaxŭ

nayaxögü. ²² Rü yexguma yemaxü nacuáchigagügu ga yema yaxögüxü ga Yerucharéüwa yexmagüxü, rü Aütioquíawa nanamugü ga Bernabé. ²³ Rü yexguma yéma nanguxgu ga Bernabé, rü nüxü nadau ga ñuxácü Tupana nüxü na rüngüxéëxü ga yema yaxögüxü ga Aütioquíacüâx, rü poraäcü namaã nataãe. Rü nayaxucuxégü ga guxüma na meãma Cori ya Ngechuchuwe naxĩãmaxücèx, rü taguma nüxü naxoexücèx. ²⁴ Yerü nüma ga Bernabé rü wüxi ga yatü ga mecü nixĩ. Rü aixcüma Tupanaãe i Üünexü rü nawa nayexma, rü naporä ga norü ðwa. Rü yemacèx muxüchixüma ga duüxügü rü Cori ya Ngechuchucèx naxĩ rü nüxü nayaxögü. ²⁵ Rü yemawena ga Bernabé rü Tarsuwa naxü na Chaurucèx yadauxücèx. ²⁶ Rü yexguma nüxü iyangauxgu, rü Aütioquíawa nanaga. Rü wüxi ga taunecü wüxiwa yéma nayexmagü namaã ga yema yaxögüxü. Rü nanangüxéë ga muxüchixüma ga duüxügü. Rü Aütioquíawa nixĩ ga inaxügüxü ga duüxügü na Cristutanüxümaã na naxugüãxü ga yema yaxögüxü. ²⁷ Rü yexgumaücüü Yerucharéüwa ne naxĩ ga ñuxre ga Tupanaãrü orearü uruügü rü Aütioquíawa naxĩ. ²⁸ Rü natanüwa nayexma ga wüxi ga orearü uruü ga Agabu ga naega. Rü nanangutaquëxexéë ga yema yaxögüxü ga Aütioquíawa yexmagüxü. Rü yema ngutaquëxewa rü inachi ga Agabu rü Tupanaãe i Üünexü nanamu ga na yadexaxü, rü ñanagürü: —Wüxi i taiya i taxü tá ínangu i guxü i ñaã nachiiüanewa —ñanagürü. Rü aixcüma ínangu ga yema taiya ga yexguma Cádiu äëxgacü ixĩxgu. ²⁹ Rü yexguma ga yema yaxögüxü ga Aütioquíawa yexmagüxü, rü marü wüxigu nagu narüxĩnüë na yéma ngĩxü namugüxücèx ga dïëru na nüxü nangüxéëgüxücèx ga yema yaxögüxü ga Yudéaanegu ächiüügüxü. Rü wüxichigü ngĩxü inaxã ga dïëru yexgumarüü ga ñuxre ga nüxü yemacü. ³⁰ Rü yemaäcü nanaxügü, rü Bernabé rü Chaurumaã yéma ngĩxü namugü ga yema dïëru naxcèx ga yema yaxögüxüãrü äëxgacügü ga Yudéaanewa yexmagüxü.

12

Äëxgacü ga Erode rü Chaütiáguxü nimèx rü Pedruxü napoxcu

¹ Rü yexgumaücüü inanaxügü ga äëxgacü ga Erode ga na ínayauxüãxü ga ñuxre ga yaxögüxü ga Yerucharéücüâx na napoxcuexücèx. ² Rü norü churaragüxü namu na taramaã Chaütiágu ga Cuáüëneëxü yamèxgüxücèx. ³ Rü yexguma nüxü nadèuxgu ga Erode ga norü me na yĩxü ga Yudíugü ga yema na naxüxü, rü norü churaragüxü namu na Pedruxü rü ta yayauxgüxücèx. Rü yema nangupetü ga Yudíugüarü peta ga Üpetüchigagu ga yexguma päü ga ngearü puxéëruüãxü nangöxgügu. ⁴ Rü yexguma Pedruxü yayauxgügu, rü poxcupataügu nayatèxcuchi. Rü ñüxüchi ga Erode rü nanamu ga ägümücütücumü ga norü churaragü na nüxna nadaugüxücèx. Rü wüxitücumüwachigü rü nayexma ga ägümücü ga churaragü. Rü yemaäcü nanaxü ga Erode, yerü nagu narüxĩnü ga yema petawena guxü ga duüxügüpëxewa na nagaãxücèx na yamèxgüãxücèx. ⁵ Rü yemaäcü ga Pedru rü poxcupataüwa nayexma rü churaragü rü meãma nüxna nadaugü. Natürü ga yema yaxögüxü ga Yerucharéücüâx rü poraäcü nayumüxégü, rü Tupanana naxcèx nacagü.

Tupana rü Pedruxü ínanguxuchixéë ga poxcupataüwa

⁶ Rü yematama ga chütaxügu naxüpa ga yema ngunexü ga Erode duüxügüpëxewa nagaxchaüxü, rü taxre ga churaragüarü ngäxüwa nape

ga Pedru. Rū taxre ga cadenamaã ninēixgüchacüü. Rū togü ga churaragü ga dauxütaexü nüxna nadaugü ga poxcupataũärü iãx. ⁷ Rū ngürüachi yema poxcupataũwa nangox ga wüxi ga orearü ngeruü ga daxüçüãx ga Coriarü. Rū poraãcü nangóone ga guma poxcupataũwa. Rū yema orearü ngeruü Pedruxü nacuxagü, rü nanabaixãchixēē. Rū ñanagürü: — ¡Paxama írüda! —ñanagürü. Rū yexgumatama íniwēgü ga guma cadena ga Pedru namaã inēixgüchacüücü. ⁸ Rū Pedruxü ñanagürü ga yema orearü ngeruü: — ¡Rü icüxcuchichiru rü nacuaixcu i curü chapatu! — ñanagürü. Rū yemaãcü nanaxü ga Pedru. Rū ñanagürü ta: — ¡Rü icüxcuchi i curü gáuxüchiru, rü chowe rüxü! —ñanagürü. ⁹ Rū nawe narüxü ga Pedru. Rū tama nüxü nacuèx ga aixcüma na yïixü ga yema orearü ngeruü namaã üxü. Rū naxcèx rü nangoxetümare. ¹⁰ Rū nüxü nachopetü ga nüxíraüxü ga dauxütaexü, rü ñuxüchi ga yema to ga dauxütaexü. Rū yexguma nawa nangugüga ga yema iãx ga áchumenēxanaxcèx ga ítamüwaama üxü, rü nüéchama niwãxna. Rū ínachoxü. Rū yexguma marü wüxi ga ítamü inaxíxgu, rü nüxna inayarütaxu ga yema orearü ngeruü. ¹¹ Rū yexguma nüxü nicuèxãchi ga Pedru, rü nügümaã ñanagürü: —Ñuxma waxi i nüxü chacuáxü na aixcüma Cori ya Tupana núma namuxü i norü orearü ngeruü na Erodemēxēwa choxü napuxü, rü nawa choxü ínanguxuchixēēxü i guxüma i ngēma chomaã naxügüchaüxü i ngēma Yudügü i tama yaxögüxü —ñanagürü. ¹² Rū yexguma yemaxü yacuèxãchigu ga Pedru, rü ngípatawa naxü ga wüxi ga ngecü ga Maríagu äegacü. Rū ngíma iyixí ga Cuáü Marcu naē. Rū yéma nangutaquèxegü ga muxüma ga duüxügü ga yéma yumüxègüxü. ¹³ Rū iãxtüarü poxeguxüärü iãxwa, rü: —Tu tu tu —ñanagürü ga Pedru. Rū wüxi ga pacü ga Rode ga ngíega íyadau. ¹⁴ Rū yexguma nagawa nüxü nacuèxgu ga na Pedru yïixü, rü ngírü taãemaã rü íyañamare na nüxü yanaxuxü ga na Pedru yïixü ga iãxtüarü iãxgu chicü. Rū tama iyawãxna ga iãx. ¹⁵ Rū yema yexmagüxü rü: —Cungēãemare —ñanagürügü ngíxü. Natürü ngíma rü: —Aixcüma nixí —ngíürügü. Rū yexguma ñanagürügü: —Maneca tama núma nixí. Rü norü dauruü i daxüçüãxmare nixí —ñanagürügü. ¹⁶ Natürü ga Pedru rü yoxni iãxwa: —Tu tu tu —ñanagürüama. Rū yexguma naxcè x yawãxnaãgu rü nüxü nadaugüga ga Pedru na yïixü, rü nabaixãchiãegü. ¹⁷ Natürü núma naxunagümèxé, rü naxmèxmaã nayanachianexèëgü. Rū namaã nüxü nixu na ñuxãcü Cori ínanguxuchixēēxü ga poxcupataũwa. Rū ñanagürü ta: — ¡Chaütiágumaã rü ngēma togü i yaxögüxümaã nüxü pixu i ngēma ore! —ñanagürü. Rū yexguma inaxüãchi, rü toxnamana naxü. ¹⁸ Rū yexguma yangunegu, rü yema churaragü ga poxcupataũwa dauxütaegüxü rü poraãcü nanaxixãchiãegü yerü tama nüxü nacuèxgü ga facü na ngupetüxü namaã ga Pedru. ¹⁹ Rū yemacèx ga Erode rü yema churaragüxü namu na Pedrucèx yadaugüxüçèx. Rū yexguma taxuxüma iyangaugüga, rü Erode rü yema churaragügutama nananguxēē na nayuexüçèx. Rū yemawena ga Erode rü ínaxüxü ga Yudéaanewa, rü Checharéagu nayaxãchiü.

Nayu ga Erode

²⁰ Rū Erode rü namaã nanu ga Tirucüãxgü rü Chi-dãüçüãxgü. Natürü ga yema Tirucüãxgü rü Chidãüçüãxgü rü naxcèx nadaugü na ñuxãcü Erodexü nangüxmüxèëgüxü, yerü Erodexiüñanewa nixí ga nayauxgüãxü ga nabü. Rū yemacèx wüxi ga Erodarü duüxü ga äëxgacü ga Batumaã

naxāmücügü na nüxŭ nangŭxēēxŭcèx na Erodemaã yadexagŭxŭcèx.
 21 Rŭ Erode rŭ namaã inaxuneta ga wŭxi ga ngunexŭ na namaã yadex-
 axŭcèx. Rŭ yexguma yema ngunexŭ ga nagu inaxunetaxŭwa nan-
 guxgu, rŭ yema Tirucŭãx rŭ Chidãŭcŭãx rŭ Erodexŭtawa nangugŭ. Rŭ
 nicuxcuchi ga Erode ga norŭ ãëxgacŭchiru, rŭ norŭ tochicaxŭwa narŭto,
 rŭ duŭxŭgŭmaã nüxŭ nixu ga norŭ ore. 22 Rŭ yexguma ga guxŭma ga
 yema duŭxŭgŭ rŭ tagaãcŭ ñanagŭrŭgŭ: —Ñãã ãëxgacŭ rŭ tama duŭxŭãrŭ
 dexarŭŭ nixŭ i norŭ dexa, natŭrŭ ñoma Tupanaãrŭ dexarŭŭ nixŭ —
 ñanagŭrŭgŭ. 23 Rŭ Erode rŭ yema duŭxŭgŭarŭ oremaã nataãë, rŭ tama
 Tupanaxŭ nicuèxŭŭchaŭ ga ñuxãcŭ Tupana nüxŭ narŭngŭxŭcèxŭ. Rŭ
 yemacèx wŭxi ga Tupanaãrŭ orearŭ ngeruŭ ga daxŭcŭãx rŭ yexgu-
 matama Erodexŭ nidaawexëë. Rŭ õxmigŭ nanangŭõx, rŭ yemamaã nayu.
 24 Natŭrŭ yema yaxŭgŭxŭ rŭ yexeraãcŭ guxŭwama nüxŭ nixugŭe ga Cori
 ga Tupanaãrŭ ore. Rŭ muxŭchixŭ ga duŭxŭgŭ nüxŭ nayaxŭgŭ. 25 Rŭ
 yexguma marŭ yanguxëëãgu ga norŭ puracŭ ga Chauru rŭ Bernabé,
 rŭ ínachoxŭ ga Yerucharéŭwa, rŭ wenaxãrŭ Aŭtioquíacèx nawoegu. Rŭ
 nayagagŭ ga Cuãŭ Marcu.

13

*Bernabé rŭ Chauru rŭ inanaxŭgŭe ga to ga nachiŭãñewa na nangegŭãxŭ
 ga Tupanaãrŭ ore*

1 Rŭ yema yaxŭgŭxŭ ga Aŭtioquíawa yexmagŭxŭtanŭwa rŭ nayexma
 ga ñuxre ga yatŭgŭ ga Tupanaãrŭ orearŭ uruŭgŭ, rŭ ñuxre ga yatŭgŭ ga
 Tupanaãrŭ orewa nguxëëtaegŭxŭ. Rŭ yematanŭwa nayexma ga Bernabé,
 rŭ Chimáŭ ga Waxwegu ãegaxŭ, rŭ Dúchiu ga Chirenecŭãx, rŭ Manae
 ga wŭxigu ãëxgacŭ ga Erodemaã yaexŭ, rŭ Chauru. 2 Rŭ wŭxi ga
 ngunexŭ ga yexguma Coricèx ínangutaquëxegŭgu rŭ tama nachibŭeãcŭma
 ínayumŭxëgŭguyane, rŭ Tupanaãë i Ŭñexŭ rŭ ñanagŭrŭ nüxŭ: —¡Choxna
 penamugŭ i Chauru rŭ Bernabé na naxŭgŭãxŭcèx i ngëma puracŭ i
 choma nawa chanamugŭchaŭxŭ! —ñanagŭrŭ. 3 Rŭ yexguma nüxŭ
 nachauegu ga tama nachibŭeãcŭma na nayumŭxëgŭxŭ, rŭ Chauru
 rŭ Bernabéëtŭgu naxŭmëxgŭ ga yema yaxŭgŭxŭ, rŭ ñuxŭchi inana-
 muãchitanŭ na naxŭgŭãxŭcèx ga Tupanaãrŭ puracŭ.

Chiprewa naxŭ ga Bernabé rŭ Chauru

4-5 Rŭ Tupanaãë i Ŭñexŭ rŭ inanamuãchitanŭ ga Bernabé rŭ Chauru.
 Rŭ ñãne ga Cheúchiawa naxŭ, rŭ gumaãrŭ türewa inaxŭãchi, rŭ ca-
 paxŭ ga Chiprewa naxŭ. Rŭ Cuãŭ Marcu nawe narŭxŭ na nüxŭ
 nangŭxŭcèx. Rŭ yexguma Charamína ga ñãneãrŭ türewa nangugŭgu,
 rŭ inanaxŭgŭe ga nüxŭ na yaxugŭxŭ ga Tupanaãrŭ ore ga Yudŭgŭarŭ
 ngutaquëxepataŭgŭwa. 6 Rŭ guxŭgu nixŭãgŭtanŭ ga yema capaxŭwa
 ñuxmata Papu ga ñãnewa nangugŭ. Rŭ yema namaã inayarŭxŭ ga wŭxi ga
 Yudŭu ga yuŭxŭ ga Barechúgu ãegaxŭ. Rŭ nüma rŭ wŭxi ga idoratëxãxŭ
 nixŭ yerŭ nügŭ yaxuxgu rŭ aixcŭma Tupanaãrŭ orearŭ uruŭ nixŭ. 7 Rŭ
 nayexma ga yema capaxŭãrŭ ãëxgacŭ ga Chérquiŭ Paurugu ãegaxŭ. Rŭ
 nüma nixŭ ga wŭxi ga yatŭ ga meã naãexŭ cuacŭ. Rŭ yema yuŭxŭ rŭ guma
 ãëxgacŭarŭ ngŭxëëruŭ nixŭ. Rŭ nüma ga ãëxgacŭ rŭ norŭ duŭxŭgŭxŭ
 namu na Chauru rŭ Bernabécèx yacagŭxŭcèx, yerŭ nüxŭ naxŭnŭchaŭ ga
 Tupanaãrŭ ore. 8 Natŭrŭ yema yuŭxŭ ga Griégugawa Erimínugu ãegaxŭ,
 rŭ Chauru rŭ Bernabéna nayanuxŭ na Tupanaãrŭ orexŭ yaxugŭxŭ. Yerŭ

tama nanaxwèxe na yaxōōxŭ ga guma ãëxgacü. ⁹⁻¹⁰ Natürü ga Chauru ga Paurugu ta ãegaxŭ, rü aixcüma Tupanaãe i Üünexŭ nawa nayexma. Rü nüma ga Pauru rü meãma nüxŭ nadawenü ga yema yuüxŭ, rü ñanagürü nüxŭ: —Pa Idoratèxáxŭ Pa ngoxo Nanex, cuma rü chixexŭicatama cuxüxchaŭ, rü naxchi cuxai i guxŭma i mexŭ. ¿Ñuxgura tá ta i nüxŭ curüxoxŭ na ícuyatóxëëxŭ i Cori ya Tupanaãrü ore i aixcüma ixixŭ? ¹¹ —Ñuxmatátama cuxŭ napoxcu ya Cori ya Tupana. Rü tá cungexetü, rü ñuxre i ngunexügu rü tãütáma nüxŭ cudau ya üëxcü —ñanagürü. Rü yexgumatama naxcèx naxëãnexŭchi ga yema yuüxŭ, rü naxmëxmaã nadaugü na texé naxmëxgu yayauxãchixŭcèx rü namaã ítixŭxŭcèx. ¹² Rü yexguma yemaxŭ nadëuxgu ga yema capaxŭãrü ãëxgacü rü nayaxō ga Tupanaãrü ore, yerü namaã nabaixãchiãe ga yema Pauru rü Bernabé nüxŭ nguxëëxŭ ga Cori ya Tupanachiga.

Pauru rü Bernabé rü Pichídiaanewa yexmane ga ñãne ga Aütioquíawa nangugü

¹³ Rü Papuwa inaxíachi ga Pauru namücügümaã rü nixãŭ ga taxtŭ ga taxŭwa. Rü Pérupe ga ñãnewa nangugü ga Paüpiriaanewa. Natürü yéma nüxna naxo ga Cuáŭ Marcu, rü Yerucharéücèx nataegu. ¹⁴ Rü Pérupewa inaxíachi ga Pauru rü Bernabé rü ñãne ga Aütioquíawa nangugü ga Pichídiaanewa. Rü yéma rü ngüxchigaarü ngunexügu rü Yudiugüarü ngutaquëxepataŭgu nachocu, rü yéma narütogü natanüwa ga yema íngutaquëxegüxŭ. ¹⁵ Rü yema ngutaquëxewa rü nüxŭ nadaumatügu ga Tupanaãrü mugü ga Moíché ümatüxŭ rü yema ore ga Tupanaãrü orearü uruügu ümatüxŭ. Rü yemawena, rü guma ngutaquëxepataŭãrü ãëxgacügü, rü Bernabé rü Pauruna nacagü, rü ñanagürügü: —Pa Toeneëgüx, ngëxguma pexŭ nangëxmagu i perü ore i taãëxëëruü i toxcèx rü marü name i ñuxma tomaã nüxŭ pixu —ñanagürügü. ¹⁶ Rü yexguma inachi ga Pauru, rü naxunagümëxë na iyanachianexŭcèx ga duüxŭgü. Rü yexguma duüxŭgümaã nidexa, rü ñanagürü: —Pa Duüxŭgü Pa Chautanüxŭgüx rü Guxãma i Pema i To i Nachiüãnecŭãx Ixigüxex ya Tupanaxŭ Ngechaŭgüxe, rü jiperüxŭnë! ¹⁷ —Yima tórü Tupana i yixema i Yudiugü, rü tüxŭ nade ga nuxcümaŭgüxe ga tórü oxigü na tüxŭ nangüxëëxŭcèx. Rü poraãcü tüxŭ nimuxëë ga yexguma woo to ga nachiüãne ga Equituanewa tayexmagügu. Rü yemaãcü wüxi ga taxŭ ga nachiüãne tüxŭ nixigüxëë. Rü ñuxŭchi yemawena, rü norü poramaã tüxŭ ínagaxŭ ga yema naãnewa. ¹⁸ —Rü dauxchitawa ga ngextá taxúema íxãpataŭwa tüxŭ nagagü. Rü yéma 40 ga taunecü Tupana yaxna tümamaã naxŭnŭ ga guxema tórü oxigü. ¹⁹ —Rü Tupana nanadaí ga yema 7 ga ãëxgacügü ga Canaããnecŭãxgü guxŭma ga norü duüxŭgümaãchigü. Rü yemaãcü nanaxü na tórü oxigüna naxããxŭcèx ga yema naãne na tümãrügüxŭchi yixŭcèx. ²⁰ —Rü 450 ga taunecü rü yemaãcü tüxŭ narüngüxëë. Rü yemawena rü tüxna nanamu ga togü ga ãëxgacügü ga dauruügu ñuxmata Tupanaãrü orearü uruü ga Chamue ingucuchix. ²¹ —Rü yexguma ga duüxŭgü rü Tupanana naxcèx nacagü ga wüxi ga ãëxgacü ga rei na namaã inacuéxŭcèx. Rü Tupana rü nüxna nanamu ga Chaú ga Chiche nane ga Beyamítaa ixícü. Rü nüma nüxna nadau ga duüxŭgü ga 40 ga taunecügu. ²² Rü yemawena ga Tupana rü ínatèxŭchi ga Chaú, rü Dabixŭ naxuneta na guma norü ãëxgacü yixŭcèx. Rü Dabixŭ nixuchiga ga Tupana, rü ñanagürü:

“Nüxü chadau rü Dabí ya Ichaí nane rü wüxi ya yatü ya poraäcü choxü ngüchaücü nixí. Rü nüma tá nanaxü i guxüma i ngëma choma chanaxwëxëxü”,

ñanagürü ga Tupana. ²³ Rü nuxcüma ga Tupana rü marü inaxuneta rü wüxi i Dabítaa tá nixí i Cristu ixíxü, rü tá nanamaxëxëe i Yudiügü. Rü Ngechuchu nixí ga guma maxëxëeruü ga tóru oxigümaã nüxü yaxucü ga Tupana. ²⁴ Natürü naxüpa ga Ngechuchu na ínguxü, rü Cuáü ga baiüxëeruü rü guxüma ga Yudiügümaã nüxü nixuchiga ga ore i mexü rü ñanagürü:

“Rü name nixí i nüxü perüxoe i pecüma i chixexü, rü Tupanacëx pedaugü, rü ípebaiü”, ñanagürü. ²⁵ Rü yexguma marü yangaicaxgu ga tá na nayuxü ga Cuáü, rü ñanagürü:

“Rü tama choma nixí i ngëma pema nagu perüxñnüxü i Cristu chiixü. Natürü choweama ne naxü i nüma ya aixcüma Cristu ixícü. Rü choma rü napëxewa taxuwama chame, rü bai i norü chapatucunüärü wëgüwaxüra chame erü nüma rü wüxi i äëxgacü i tacüxüchima nixí”, ñanagürü ga Cuáü. ²⁶ Rü ñanagürü ga Pauru, —Pa Chautanüxügü i Abráütaagüx, rü Guxäma i Pema i To i Nachiüñecüäx i Tupanaxü Ngechaügüxex, rü pexcëx nixí i ñaã ore i tüxü maxëxëxü. ²⁷ —Rü aixcüma yema Yerucharéücüäxgü ga duüxügü rü yema norü äëxgacügü rü tama nüxü nacüxëgü ga Tupana Nane na yíixü ga Ngechuchu. Rü tama meã nüxü nacüxëgü ga tacüchiga na yíixü ga yema ore ga nuxcümaügüxü ga Tupanaärü orearü uruügü ümatüxü i ñuxma perü ngutaquëxepataüwa nüxü pedaumatügüxü i wüxichigü i ngüxchigaarü ngunexügu. Rü yemaäcü nümagütama ga yema duüxügü ga Ngechuchuxü imëxgüxü rü yexguma yamëxgüägu rü nayanguxëe ga yema ore ga nuxcüma ümatüxü. ²⁸ —Rü woo taxuüma ga tacü ga chixexü nawa inayangaugü na nayuxëëäxüçëx, natürü Piratuna naxcëx nacagü na yamáäxüçëx. ²⁹ —Rü ningu ga guxüma ga yema ore ga Tupanaärü orearü uruügü ümatüxü ga Ngechuchuchiga ga ñuxäcü tá na nayuxü. Rü yemawena rü nanayauxgü ga naxüne ga curuchawa, rü wüxi ga naxmaxügu nayanaxücuchigü. ³⁰ —Natürü ga Tupana rü wena nanamaxëe ga woo marü na nayuxü. ³¹ —Rü nüma ga Ngechuchu rü muxüma ga ngunexü naxcëx nangox ga yema duüxügü ga nawe rüixü ga yexguma Gariréaanewa ne naxüxgu rü Yerucharéüwa naxüxgu. Rü ngëma duüxügü nixí i ñuxma i guxü i duüxügümaã nüxü ixügüxü i nachiga. ³²⁻³³ Rü ngëmaäcü i toma rü núma tangugü na pemaã nüxü tixuxüçëx i ngëma ore i aixcüma mexü. Rü dücax, rü yema uneta ga nuxcümaügüxü ga tóru oxigümaã nüxü yaxuxü ga Tupana, rü taxcëx nayanguxëe ga yexguma Ngechuchuxü wena namaxëëgu. Rü wiyaegüpanewa i norü taxre i capituruwa rü ngëmachiga nüxü nixu i ngëxguma:

“Cuma nixí i Chaune, rü choma nixí i Cunatü chiixü”, ñaxgu. ³⁴ —Rü Tupana rü nuxcüma rü marü nüxü nixu ga wena tá na namaxëëxü ga Ngechuchu na tama yayixixüçëx ga naxüne. Rü norü orewa rü ñanagürü:

“Rü choma tá pexcëx chayanguxëe ga yema unetagü i üünegüxü i aixcüma ixíügüxü ga nuxcüma Dabímaã nüxü chixuxü”, ñanagürü. ³⁵ —Rü ngëmácëx toxnamana i Tupanaärü orewa rü ñanagürü ta:

“Tama cunaxwëxe na yayixixü i naxüne ya Cune ya üünecü,”

ñanagürü. ³⁶ —Rü yexguma namaŭxgu ga Dabí, rü nüxŭ narüngŭxĕē ga norü duŭxŭgŭ, yexgumarüŭ ga ñuxăcŭ Tupana namuxŭ. Natürü ñuxŭchi nayu, rü nanatŭ rü naĕxŭtagu natĕx ga naxŭne. ³⁷ —Natürü guma Tupana wena namaxĕĕcŭ ga Ngechuchu rü tama niyixi ga naxŭne. ³⁸ —Rü ñuxmax, Pa Chaueneĕgŭx, rü chanaxwĕxe i nüxŭ pecuĕx rü yimatama Ngechuchugagu Tupana tŭxŭ nüxŭ nangechaŭ i tŭrŭ pecadugŭ ngĕxgumarüŭ i pemaã nüxŭ tixuxŭrŭŭ. ³⁹ —Rü ñuxma ya guxăma ya yĭxema nüxŭ yaxŭgŭxe, rü Ngechuchugagu Tupana tŭxŭ nüxŭ nangechaŭ i guxŭma ga yema pecadugŭ ga noxri taxucŭrŭwa tŭxŭ nüxŭ nangechaŭxŭ ga yexguma nagu taxĭxgu ga yema mugŭ ga Moĭché ũmatŭxŭ. ⁴⁰ —Rü pexuăĕgŭ na tama pegu nanguxŭcĕx i ngĕma poxcu i Tupanaârŭ orearŭ uruŭgŭ nüxŭ ixuchigaxŭ ga yexguma ñagŭgu:

⁴¹ “Rü dücax, Pa Duŭxŭgŭ i Tupanaârŭ Orexŭ Cugŭexŭx, rü tá peĕaixăchie rü tá peyue erŭ pema pemaxĕyane rü tá chanaxŭ i tacŭ i taxŭ. Rü pema rü tăŭtăma peyaxŭgŭ i woo texĕ pemaã nüxŭ ixuxgu”,

ñanagürü. Rü yexma nayacuĕxĕē ga Pauru ga norü ore. ⁴² Rü yexguma guma ngutaquĕxepataŭwa ĩnachoxŭgu ga Pauru rü namŭcŭgŭ, rü yema duŭxŭgŭ ga tama Yudĭugŭ ixĭgŭxŭ rü nüxŭ nacĕĕxŭgŭ na to ga ngŭxchigaarŭ ngunexŭgu rü wenaxărŭ yematama orexŭ namaã yaxuxŭcĕx. ⁴³ Rü yexguma marŭ nüxŭ nachauegu ga na nangutaquĕxegŭxŭ, rü Pauru rü Bernabĕwe narŭxĭ ga muxŭma ga Yudĭugŭ rü muxŭma ga togŭ ga duŭxŭgŭ ga tama Yudĭugŭ ixĭgŭxŭ natürŭ Yudĭugŭrŭŭ yaxŭgŭxŭ. Rü Pauru rü Bernabĕ rü namaã nidexagŭ rü nayaxucuxĕgŭ na guxŭguma nagu naxĭnŭĕĕchaxŭcĕx ga ñuxăcŭ Tupana nüxŭ ngechaŭăcŭma na nadexŭ. ⁴⁴ Rü yema to ga ngŭxchigaarŭ ngunexŭgu, rü wixgutaĕx guxŭma ga yema ĩănecŭăx nangutaquĕxegŭ na ĩaxĭnŭĕxŭcĕx ga Tupanaârŭ ore. ⁴⁵ Natürŭ nayexma ga ñuxre ga Yudĭugŭ ga tama ngutaquĕxegu chocuxŭ. Rü yexguma nüxŭ nadaugŭgu ga na namuxŭchixŭ ga duŭxŭgŭ ga Paurucĕx ngutaquĕxegŭxŭ rü poraăcŭ nixăŭăchie. Rü ĩanaxŭgŭe ga na Pauruxŭ nachoxŭgagŭxŭ rü namaã naguxchigagŭxŭ. ⁴⁶ Natürŭ ga Pauru rü Bernabĕ rü tama namuŭĕăcŭma yema Yudĭugŭxŭ nangăxŭgŭ, rü ñanagŭrŭgŭ: —Tupana nanaxwĕxe na pemaăxĭra nüxŭ tixuxŭ i norŭ ore. Natürŭ ñuxma na nüxŭ pexoexŭ i ngĕma ore rü tama na penayauxgŭchaŭxŭ i maxŭ i taguma gŭxŭ, rü ngĕmacĕx i ñuxmax i toma rü tá ngĕma tama Yudĭugŭ ixĭgŭxŭtanŭwa taxĭ. ⁴⁷ —Yerŭ yemaăcŭ toxŭ namu ga Cori, rü ñanagŭrŭ:

“Duŭxŭgŭ i tama Yudĭugŭ ixĭgŭxŭârŭ ngŭonexĕĕruŭ marŭ cuxŭ chixĭxĕē, na guxŭwama i ñoma i naănewa cunangexŭcĕx i chorŭ ore i maxĕxĕĕruŭ”,

ñanagŭrŭ. ⁴⁸ Rü yexguma yema orexŭ naxĭnŭĕgu ga yema duŭxŭgŭ ga tama Yudĭugŭ ixĭgŭxŭ, rü nataăĕgŭ rü ñanagŭrŭgŭ: —Rü namexĕchi nixĭ i ñaă Cori ya Tupanaârŭ ore —ñanagŭrŭgŭ. Rü nayaxŭgŭ ga guxŭma ga yema duŭxŭgŭ ga Tupana marŭ nüxŭ unetaxŭ na nayauxgŭăxŭcĕx i maxŭ i taguma gŭxŭ. ⁴⁹ Rü yemaăcŭ guxŭwama ga yema naănewa nanguchigŭ ga Cori ya Tupanaârŭ ore. ⁵⁰ Natürŭ yema Yudĭugŭ ga tama Ngechuchuaxŭ yaxŭgŭchaŭxŭ, rü chixexŭmaă nayaxucuxĕgŭ ga ñuxre ga ngexŭgŭ ga mexŭgŭ ga Tupanaxŭ ngechaŭgŭxŭ rü guma ĩăneărŭăĕxgacŭgŭ na Pauru rü Bernabĕxŭ ĩawoxŭxŭcĕx. Rü yemacĕx ĩanawoxŭ ga yema naănewa. ⁵¹ Rü yexguma ga Pauru rü Bernabĕ rü ĩnapagŭcutŭ ga norŭ ŭxaxŭcutŭ na yemawa nüxŭ yacuĕăchitanŭxŭcĕx ga norŭ chixexŭ

ga yema ĩānecŭāxgŭ ga duŭxŭgŭ. Rŭ űuxŭchi ga Pauru rŭ Bernabé rŭ ĩāne ga Icŭniŭwa naxĭ. ⁵² Natŭrŭ yema yaxŭgŭxŭ ga guma ĩāne ga nawa ĩnachoŭŭnewa yexmagŭxŭ rŭ poraācŭ Tupanamaā nataāēgŭ, rŭ Naāē i Ūŭnexŭ rŭ aixcŭma nawa nayexma.

14

Pauru rŭ Bernabé rŭ ĩāne ga Icŭniŭwa nayexmagŭ

¹ Rŭ Icŭniŭwa rŭ wŭxigu Yudiŭgŭarŭ ngutaquēxepataŭgu nachocu ga Pauru rŭ Bernabé. Rŭ meāma nŭxŭ nixuchiga ga Tupanaārŭ ore rŭ yemaācŭ nayaxŭgŭ ga muxŭma ga duŭxŭgŭ ga Yudiŭgŭ rŭ yema tama Yudiŭgŭ ixĭgŭxŭ rŭ ta. ² Natŭrŭ yema Yudiŭgŭ ga tama Ngechuchuaxŭ yaxŭgŭxŭ, rŭ chixexŭmaā nayaxucuxēgŭ ga yema tama Yudiŭgŭ ixĭgŭxŭ na yema yaxŭgŭxŭchi naxaieŭcèx. ³ Rŭ yemacèx muxŭma ga ngunexŭ yexma narŭcho ga Pauru rŭ Bernabé, rŭ tama namuēēācŭma nŭxŭ nixuchiga ga Cori ya Tupanaārŭ ore. Rŭ yema duŭxŭgŭmaā nŭxŭ nixu na űuxācŭ Tupana poraācŭ tŭxŭ nangechaŭxŭ. Rŭ nŭma ga Cori rŭ yema duŭxŭgŭxŭ nŭxŭ nadauxēē na namaā nataāēxŭ ga yema ore. Rŭ yemacèx Pauru rŭ Bernabéxŭ narŭngŭxēē na inawēxgŭāxŭcèx ga cuēxruŭgŭ rŭ na naxŭgŭāxŭcèx ga mexŭgŭ ga Tupanaārŭ poramaā naxŭgŭxŭ. ⁴ Natŭrŭ ga guma ĩānecŭāx ga duŭxŭgŭ rŭ nitoye. Rŭ nŭmaxŭ rŭ yema Yudiŭgŭwaama naxŭgŭ rŭ togŭ rŭ Pauru rŭ Bernabéwaama naxŭgŭ. ⁵ Rŭ yexguma ga yema Yudiŭgŭ, rŭ yema duŭxŭgŭ ga tama Yudiŭgŭ ixĭgŭxŭ, rŭ guma ĩāneārŭ āēxgacŭgŭmaā wŭxigu nagu narŭxŭnŭē na Pauruxŭ rŭ Bernabéxŭ yayauxgŭxŭ na nutamaā ĩnamuxŭchigŭāxŭcèx. ⁶⁻⁷ Natŭrŭ yexguma nŭxŭ nacuāchigagŭga ga Pauru rŭ Bernabé, rŭ nibuxmŭ. Rŭ Dicŭniŭānewa yexmane ga ĩānegŭ ga Lистра rŭ Derbewa naxĭ. Rŭ guma ĩānegŭwa rŭ guxŭma ga yema naānewa ipeagŭxŭ ga duŭxŭgŭmaā rŭ ta nŭxŭ nixuchigagŭ ga ore i mexŭ.

Nutagŭmaā Pauruxŭ ĩnamuxŭchigŭ ga Listrawa

⁸⁻⁹ Rŭ yema Listrawa nayexma ga wŭxi ga yatŭ ga ĩnapogŭcutŭxŭ norŭ bucŭmatama. Rŭ yema narŭto rŭ ĩnarŭxŭnŭ ga yema Pauru nŭxŭ ixuxŭ ga ore. Rŭ Pauru rŭ meāma nŭxŭ nadawenŭ, rŭ nŭxŭ nadau ga na nŭxŭ nayexmaxŭ ga norŭ ō na naxcèx yataanexŭcèx. ¹⁰ Rŭ yexguma ga Pauru rŭ tagaācŭ űānagŭrŭ nŭxŭ: —ĭlnachi, rŭ meāma ĩnangacutŭ! — űānagŭrŭ. Rŭ yexguma inayuxnagŭ ga guma yatŭ, rŭ inanaxŭgŭ ga na iyaxŭxŭ. ¹¹ Rŭ yexguma yema muxŭma ga duŭxŭgŭ nŭxŭ daugŭga ga yema na naxŭxŭ ga Pauru, rŭ tagaācŭ yema Dicŭniŭgawa nidexagŭ, rŭ űānagŭrŭgŭ: —Tupanagŭ i naduŭxŭgŭraŭxŭ ĩnarŭxŭgŭ, rŭ tatanŭwa nangugŭ —űānagŭrŭgŭ. ¹² Rŭ Bernabé rŭ tupana ga Chéumaā nanaxŭégagŭ. Rŭ Pauru rŭ Ērememaā nanaxŭégagŭ yerŭ nŭma nixĭ ga yadexaxŭ. ¹³ Rŭ guma ĩāne ĩxŭcuxŭwa nayexma ga tupana ga Chéuarŭ tupauca ga taxŭne. Rŭ guma tupaucaarŭ pai rŭ yema nanagagŭ ga wocagŭ ga iyatŭxŭ ga putŭramaā ngèxāēgŭxŭ. Rŭ nŭma ga pai rŭ ga duŭxŭgŭ rŭ nanadaixchaŭ ga yema wocagŭ naxcèx ga Pauru rŭ Bernabé na yemamaā nŭxŭ yacuēxŭgŭxŭcèx. ¹⁴ Natŭrŭ yexguma nŭxŭ yacuēxāchitanŭga ga Bernabé rŭ Pauru, rŭ norŭ gáuxŭchirugu nagáugŭe na yema duŭxŭgŭ nŭxŭ cuēxgŭxŭcèx na tama namexŭ ga yema naxcèx naxŭechaŭxŭ. Rŭ yema muxŭma ga duŭxŭgŭtanŭwa nabuxmŭ, rŭ űaxŭmaā aita naxŭe: ¹⁵ —Pa Yatŭgŭx, ĩtŭxcŭŭ toxcèx penaxŭ i ngēma? Toma rŭ pexrŭŭ duŭxŭgŭmare

tixīgū. Rū nuã taxī na pemaã nüxū tayarūxuxūcèx na nüxū perūxoexūcèx i ngēma chixexūgū i taxuwama mexū rū naxcèx pedaugūxūcèx ya Tupana ya maxūcū ga naxūcū ga daxūguxū i naãne, rū ñoma i naãne, rū taxtū i taxū, rū guxūma i nawa ngēxmaxū. ¹⁶—Rū nuxcūmayerū nixī ga Tupana ga yaxna namaã naxīnūxū ga duūxūgū ga woo nūmagū nanaxwèxegūxū naxūgūgu. ¹⁷—Natürü nūma ga Tupana rū taguma nüxū narūchau na duūxūgūxū nangūxēēxū. Rū yemaãcū tūxū nüxū nacuèxēē na Tupana yīxū i nūmax. Rū nūmatama nixī i nūma namuãxū ya pucū rū meã pexū nayaexēēãxū i penetūgū. Rū nūma nixī i pexna naxããxū i pewemū na ngēmaãcū petaãegūxūcèx —ñanagürügū ga Pauru rū Bernabé. ¹⁸ Natürü woo yema orexū namaã na yaxugūxū rū poraãcū nüxū naguxcha ga Pauru rū Bernabé ga nüxna na nachogūxū ga duūxūgū ga tama naxcèx na nadaiãxūcèx ga yema wocagū na yemamaã nüxū yacuèxūūgūxūcèx. Rū dūxwa yemacèx tama naxcèx nanadaí. ¹⁹ Natürü yexgumayane rū ínangugū ga ñuxre ga Yudíugū ga Aütioquíawa rū Icúniūwa ne íxū. Rū chixexūmaã nayaxucūxégū ga yema muxūma ga duūxūgū na tama Pauru rū Bernabéga naxīnūēxūcèx, rū namaã nanuēxūcèx. Rū yemacèx ga yema duūxūgū rū nutamaã Pauruxū ínamuxūchigū, rū íãneárū íxpemawa nanatúchigūgū, yerū nūma nüxū nacuèxgūgu rū marū nayu. ²⁰ Natürü yexguma yema yaxōgūxū naxūtawa ngutaquēxegu, rū inachi ga Pauru, rū wenaxārū nagu naxūcu ga guma íãne. Rū moxūãcū inaxūãchi ga yéma, rū Bernabémaã Derbewa naxū. ²¹ Rū guma íãnewa nüxū nixugūe ga ore ga mexū. Rū nanangūexēē ga duūxūgū, rū muxūma Tupanaãxū nayaxōgū. Rū yemawena rū wenaxārū naxcèx nawoegu ga Listra, rū Icúniū, rū Aütioquía. ²² Rū guma íãnegūwa rū yema yaxōgūxūxū nixucūxégū, rū nüxū nanangūchaūxēēgū na guxūguma meã na yaxōgūãxūcèx. Rū namaã nüxū nixugūe, rū ñanagürügū: —Ngēma Tupana ãēxgacū íxīxūwa na ixūcūxūcèx, rū tanaxwèxe na muēxpūxcūna guxchaxūgūmaã yaxna ixīnūēxū i ñoma i naãnewa —ñanagürügū. ²³ Rū Pauru rū Bernabé rū wūxichigū ga íãnewa rū nüxū nixunetatanū ga ñuxre ga yatūgū na yaxōgūxūārū ãēxgacūgū yixīgūxūcèx. Rū tama nachibūeãcūma naxcèx nayumūxégū. Rū yemawena rū yima Cori ya Tupana ga nüxū yaxōgūãcūna nanaxuaxūgū na guxūguma namaã inaxūxūcèx rū meã nüxna nadauxūcèx ga yema yaxōgūxūārū ãēxgacūgū.

Pauru rū Bernabé rū naxcèx nawoegu ga Aütioquía ga Chíriaanewa yexmane

²⁴ Rū Pichídiaanewa nichopetū, rū Paūpíriaanewa nangugū. ²⁵ Rū Pérupe ga íãnewa nüxū nixugūe ga Tupanaārū ore, rū ñuxūchi Atária ga íãnewa naxī. ²⁶ Rū yéma rū wūxi ga wapurugu nichoū na Aütioquíacèx nawoeguxūcèx. Rū guma íãne ga Aütioquíawa nixī ga noxri duūxūgū Tupanana namugūxū ga Pauru rū Bernabé na naxūgūãxūcèx ga yema puracū ga ñuxma marū yanguxēēgūxū. ²⁷ Rū yexguma ínangugūgu ga Pauru rū Bernabé, rū nanangutaquēxexēē ga guxūma ga yema duūxūgū ga yaxōgūxū. Rū namaã nüxū nixugūgū ga guxūma ga ñuxãcū Tupana poraãcū nüxū na rüngūxēēxū. Rū yexgumarū ta rū namaã nüxū nixugūgū ga ñuxãcū na yaxōgūãxū ga yema duūxūgū ga tama Yudíugū íxīgūxū, yerū Tupana nüxū nanatauxchaxēē na yaxōgūãxūcèx. ²⁸ Rū muxūma ga ngunexūgu yema yaxōgūxūtanūwa nayexmagū ga Pauru rū Bernabé.

15

Yerucharéŭwa nangutaquēxegŭ

¹ Rŭ yexgumaŭcŭŭ rŭ nayexma ga ñuxre ga duŭxŭgŭ ga Yudéaanewa ne ĭxŭ ga Aŭtioquíawa ngugŭxŭ. Rŭ nŭmagŭ inanaxŭgŭe ga tŭxŭ na nangŭexēēxŭ ga guxema yaxŭgŭxe ga Aŭtioquíacŭŭāx, rŭ ñanagŭrŭgŭ: —Ngēxguma tama pegŭ ĩpewiŭchēxmŭpēxechiraŭgu yema Moĭché tŭxŭ muxŭrŭŭ rŭ taxuacŭma pexŭ nangēxma i maxŭ i taguma gŭxŭ — ñanagŭrŭgŭ. ² Natŭrŭ ga Pauru rŭ Bernabé rŭ tama norŭ me nixĭ ga yema, rŭ yemacēx poraācŭ nŭgŭ namaā nachoxŭgagŭ ga yema duŭxŭgŭ ga Yudéaanewa ne ĭxŭ. Rŭ dŭxwa Pauru rŭ Bernabé rŭ ñuxre ga togŭ ga Aŭtioquíacŭŭāx ga yaxŭgŭxŭxŭ naxunetagŭ na Yerucharéŭwa naxĭxŭcēx na yema ngŭexŭgŭ ga Ngechuchu imugŭxŭ rŭ yema yaxŭgŭxŭārŭ āēxgacŭgŭmaā yamexēēgŭāxŭcēx ga yemachiga. ³ Rŭ yemaācŭ ga yema yaxŭgŭxŭ ga Aŭtioquíacŭŭāx rŭ Yerucharéŭwa nanamugŭ ga yema yatŭgŭ na naxcēx íyacagŭxŭcēx rŭ yamexēēgŭāxŭcēx ga yema ore. Rŭ Peníchiaanewa rŭ Chamáriaanewa nachopetŭ ga Pauru rŭ Bernabé. Rŭ yéma rŭ duŭxŭgŭmaā nŭxŭ nixugŭe ga ñuxācŭ yema tama Yudíugŭ ixĭgŭxŭ rŭ nŭxŭ na naxoexŭ ga nuxcŭmaŭxŭ ga nacŭmagŭ na Tupanawe naxĭxŭcēx. Rŭ yema oremaā poraācŭ nanataāēxēēgŭ ga guŭma ga yema yaxŭgŭxŭ. ⁴ Rŭ Yerucharéŭwa nangugŭ ga Pauru rŭ Bernabé. Rŭ guxŭma ga yema yaxŭgŭxŭ rŭ yema ngŭexŭgŭ ga Ngechuchu imugŭxŭ rŭ yema yaxŭgŭxŭārŭ āēxgacŭgŭ rŭ meāma nanayauxgŭ. Rŭ Pauru rŭ Bernabé namaā nŭxŭ nixugŭgŭ ga guxŭma ga ñuxācŭ Tupana poraācŭ nŭxŭ na rŭngŭxēēxŭ na duŭxŭgŭmaā nŭxŭ yaxugŭxŭcēx ga ore i mexŭ. ⁵ Natŭrŭ ñuxre ga Parichéugŭ ga Ngechuchuaxŭ yaxŭgŭxŭ, rŭ inachigŭ, rŭ ñanagŭrŭgŭ: —Name nixĭ na nŭgŭ ĩnawiŭchēxmŭpēxechiraŭgŭxŭ i ngēma tama Yudíugŭ ixĭgŭxŭ i ngexwaca yaxŭgŭxŭ. Rŭ name nixĭ na naga naxĭnŭēxŭ i ngēma mugŭ ga Moĭché ŭmatŭxŭ —ñanagŭrŭgŭ. ⁶ Rŭ yexguma nangutaquēxegŭ ga yema ngŭexŭgŭ ga Ngechuchu imugŭxŭ rŭ yema yaxŭgŭxŭārŭ āēxgacŭgŭ na namexēēgŭāxŭcēx ga yema ore. ⁷ Rŭ yixcama marŭ ñuxgumama nŭgŭmaā yéma yaporagatanŭcŭŭgu, rŭ inachi ga Pedru, rŭ ñanagŭrŭ nŭxŭ: —Pa Chaueneēgŭx, pema nŭxŭ pecuēx ga na ŭpamama Tupana choxŭ yaxxŭ ga petanŭwa na yema duŭxŭgŭ i tama Yudíugŭ ixĭgŭxŭmaā nŭxŭ chixuxŭcēx i norŭ ore i mexŭ i maxēxēēruŭ, na nŭmagŭ rŭ ta Ngechuchuaxŭ yaxŭgŭāxŭcēx. ⁸ —Rŭ yima Tupana ya guxāāēxŭ cuácŭ rŭ tŭxŭ nŭxŭ nadauxēē na nadeāxŭ i ngēma duŭxŭgŭ i tama Yudíugŭ ixĭgŭxŭ, yerŭ nŭxna nanamu ga Naāē i Ūŭnexŭ yema tŭxna namuāxŭrŭŭ. ⁹ —Rŭ Tupanapēxewa rŭ yixema i Yudíugŭ rŭ namaā tawŭxigu i ngēma duŭxŭgŭ i tama Yudíugŭ ixĭgŭxŭ. Yerŭ nŭmagŭ rŭ ta Tupana nŭxŭ nŭxŭ nangechaŭ ga norŭ pecadugŭ ga yexguma nŭxŭ yaxŭgŭāgu. ¹⁰ —¿Rŭ tŭxcŭŭ tama namaā petaāē i ñuxma i ngēma Tupana ŭxŭ? ¿Rŭ tŭxcŭŭ ngēma ngexwacēx yaxŭgŭxŭxŭ penaxŭxēēchaŭ i ngēma Moĭchéarŭ mugŭ i guxchaxŭ ga tórŭ oxigŭ rŭ taxuacŭma naga taxĭnŭēxŭ rŭ woo yixemagŭ rŭ ta taxuacŭma ĩngŭxēēxŭ? ¹¹ —Rŭ tama ngēma mugŭ nixĭ i tŭxŭ maxēxēēxŭ. Natŭrŭ yixema rŭ tayaxŭgŭ na tórŭ Cori ya Ngechuchu tamaā mecŭmaxŭgagu yĭxŭ na tŭxna naxāmareāxŭ i maxŭ i taguma gŭxŭ. Rŭ ngēxgumarŭŭ ta nixĭ i naxcēx i nŭmagŭ i tama Yudíugŭ ixĭgŭxŭ —ñanagŭrŭ ga Pedru. ¹² Rŭ inanaxŭgŭ ga Bernabé rŭ Pauru na yadexagŭxŭ. Rŭ guxŭma ga yema duŭxŭgŭ rŭ inarŭchianegŭ

rū inarūxīnūēmare. Rū Bernabé rū Pauru rū namaã nüxū nixugüe ga ñuxãcū Tupana na nüxū rüngūxēēgūxū na naxügūãxūcèx ga mexū ga taxūgū ga Tupanaãrū poramaã naxügūxū natanūwa ga yema duūxūgū ga tama Yudíugū ixīgūxū. ¹³ Rū yexguma Bernabé rū Pauru igüegagūgu, rū nüxīãrū nidexa ga Chaŭtiágu, rū ñanagürü: —Pa Chaueneēgūx, jchoxūŭ iperūxīnūē! ¹⁴ —Pedru i Chimáú rū tamaã nüxū nixu na ñuxãcū Tupana inaxügūxū ga nüxū na nangūxēēxū ga yema duūxūgū i tama Yudíugū ixīgūxū. Rū tamaã nüxū nixu ta na ñuxãcū Tupana yema duūxūgūtanūwa nadeãxū ga ñuxre ga duūxūgū na noxrū yixīgūxūcèx. ¹⁵ —Rū ngēma Pedru nüxū ixuxū rū nawūxigu namaã ga yema ore ga nuxcūmaūgūxū ga orearū uruūgū ũmatūxū ga ñaxū:

¹⁶ “Rū ngēmawena rū tá chataegu, rū tá nüxū charüngūxēē i Dabítaagu i Yudíugū. Rū woo nawoonemare i ñuxmax, natürü wena táxarū wūxiwa chanaxīxēē, rū tá íchanadagūxēē na noxrirūŭ napo-raexūcèx. ¹⁷ Rū ngēmaãcū tá nüxū charüngūxēē na ngēma duūxūgū i tama Yudíugū ixīgūxū rū chauxcèx nadaugūxūcèx, wūxigu namaã i guxūma i chorū duūxūgū i Yudíugū i choma chadexū. ¹⁸ Rū yemaãcū nüxū nixu ga nūma ga Cori ya Tupana ga nuxcūmama tūxū nüxū cuēxēēcū ga yema”,

ñanagürü ga yema ore ga nuxcūma ũmatūxū. ¹⁹ Rū ñanagürü ga Chaŭtiágu: —Rū ngēmacèx, Pa Chaueneēgūx, rū chauxcèx rū tama name na guxū i Moïché ũmatūxū i mugūmaã nüxū ichixewexū i ngēma duūxūgū i tama Yudíugū ixīgūxū i nüxū rüxoexū i nuxcūmaūxū i nacūmagū na Tupanawe naxīxūcèx. ²⁰ —Rū narūmemaē nixī i naxcèx tanaxūmatū i popera, rū ngēmawa namaã nüxū tixu:

- (1) Rū tama name na nangōxgūãxū i ngēma naxūnagūmachi i togū norū tupanenetachicūnèxãgūcèx dèixū.
- (2) Rū tama name na naī i ngemaã rū ēxna naī ya yatūmaã inapexū.
- (3) Rū tama name na nangōxgūãxū i namachi i ngēma naēxū rū ēxna naxūna i wēxnaãxū rū ēxna natūgu nguxū.
- (4) Rū tama name na nangōxgūãxū ya nagū.

Rū ngēxīcatama nixī i inaxwèxexū na naxcèx naxūmatūxū. ²¹ —Erū guxūne ya ñānewa nangēxma ya Yudíugūarū ngutaquēxepataŭ i ngextá nuxcūmama guxū i ngūxchigaarū ngunexūgu nawa ínangúe rū nüxū nixuchigagū i guxūma i ngēma mugū ga Moïché ũmatūxū —ñanagürü ga Chaŭtiágu.

Popera ga yema duūxūgū ga tama Yudíugū ixīgūxūcèx ũmatūxū

²² Rū yema ore rū norū me nixī ga yema ngūexūgū ga Ngechuchu imugūxū, rū yema yaxōgūxūãrū ãēxgacūgū, rū guxūma ga yema yaxōgūxū. Rū nügūmaã ñanagürügū: —¡Ngīã tatanūwa tanade ya taxre ya yatūgū na Aŭtioquíawa namugūxūcèx namaã ya Pauru rū Bernabé! —ñanagürügū. Rū nüxū naxunetagū ga Yuda ga Barsabágu ãegaxū rū Chira. Rū nūmagū ga Yuda rū Chira rū ãēxgacūgū nixī ga natanūwa ga yema yaxōgūxū ga Yerucharéŭwa yexmagūxū. ²³ Rū namaã yéma nanamugū ga popera, rū ñāã nixī ga yema ore ga nagu naxūmatūgūxū:

“Pa Toeneēgū i Tama Yudíugū Ixīgūxe i Aŭtioquíagu rū Chíríaanegu rū Chiríchíaanegu Āchiŭgūxe, rū toma i peeneēgū i Ngechuchu toxū imugūxe rū toma i yaxōgūxūãrū ãēxgacūgū ixīgūxex, rū pexū tarūmoxēgū. ²⁴ Rū

nüxü tacuáchigagü rü ñuxre ga duüxügü ga núma ne íxü rü woo tama toma yéma tanamugü natürü nümagü rü yéma naxí rü Moíchéarü mugümaã pexü nachixewegü rü yemaãcü pexü inatüexêê. ²⁵ Rû yemacêx guxâma ga toma rü wüxigu nagu tarüxínüê na totanüwa nüxü taxunetaxü ga taxre ga taeneêgü na pexcêx ngema tanamugüxütcêx namaã i taeneêgü i nüxü ingechaügüxü i Bernabé rü Pauru. ²⁶ Rû nümagü i Bernabé rü Pauru nixí ga poraãcü ãücümáxüwa nayexmagüxü naxcêx ga tórü Cori ya Ngechuchu ya Cristu. ²⁷ Rû ñuxma rü pexcêx ngema tanamugü i Yuda rü Chira na nümagüxüchi pemaã nüxü yaxugüxütcêx rü pemaã nangoxêêgüãxütcêx i guxüma i torü ore. ²⁸⁻²⁹ Erü Tupanaãê i Üünexütcêx name, rü toxcêx rü ta name na tama muxüma i mugü pexna taxägüxü. Rû ñaã ägümücü i mugüxicatama nixí i pexü tamuxü:

- (1) Rû tama name na penangõxü i naxünagümachi i togü norü tupanenetachicünèxägücêx dèjxü.
- (2) Rû tama name na penangõxü i namachi i ngêma naxünagü i wêxnaãxü.
- (3) Rû tama name na penangõxü ya nagü.
- (4) Rû tama name na naí i ngemaã rü êxna naí ya yatümaã ipepexü.

Rû mexü tá pexügü ega penaxauregu i ngêma mugü. Rû nuãma pexna”, ñanagürü ga yema ore ga naxümatügüxü. ³⁰ Rû natanüxüxü namoxêgüguwena, rü inaxíãchi ga yema yéma mugüxü, rü Aütioquíawa naxí. Rû yexguma yéma nangugügu rü nanangutaquêxexêê ga guxüma ga yema yaxõgüxü ga duüxügü, rü nüxna nanaxägü ga yema popera. ³¹ Rû yexguma nüxü nadaumatügügu, rü poraãcü nataãêgü namaã ga yema ucuxêgü ga nüxna naxägüxü. ³² Rû Yuda rü Chira ga Tupanaãrü orearü uruügü na yixígüxü, rü muxüma ga oremaã nayaxucuxêgü ga yema yaxõgüxü, rü nüxü narüngüxêê na yexeraãcü yaxõgüãxütcêx. ³³ Rû marü ñuxre ga ngunexü yéma nayexmagüguwena, rü ínixí. Rû yema yaxõgüxü ga Aütioquíacüãx, rü taãêácüma Yuda rü Chiraxü narümoxêgü rü meãma inayamugü na naxcêx nawoeguxütcêx ga yema Yerucharéüçüãx ga noxri natanüwa namugüxü. ³⁴ Natürü ga Chira rü nagu narüxínü na yexma Aütioquíagu naxãüxü, rü yemacêx Yudaxicatama Yerucharéüçêx nataegu. ³⁵ Rû Pauru rü Bernabé rü ta yexma narücho. Rû wüxigu namaã ga muxüma ga togü, rü nanangüexêê ga duüxügü, rü namaã nüxü nixugügü ga Cori ya Tupanaãrü ore i mexü.

Pauru rü wenaxãrü inaxüãchi ga to ga nachüãnegüwa na nangeaxü ga Tupanaãrü ore

³⁶ Rû yexguma marü ñuxre ga ngunexü ngupetügu, rü ñanagürü ga Pauru Bernabéxü: —ñGíxã wenaxãrü natanügu tanaxíãne i ngêma yaxõgüxü i guxüne ya íãne ga ngextá nüxü íixuchigaxüwa ga Cori ya Tupanaãrü ore na nüxü idauxütcêx na ñuxãcü nüxü inangupetügüxü! —ñanagürü. ³⁷ Rû Bernabé rü nayagaxchaü ta ga Cuáü Marcu. ³⁸ Natürü ga Pauru rü tama nanaxwêxe ga na yagaãxü, yerü Paüpíriawa nüxna naxo ga noxri, rü tama inayaxümücü ga yema puracüwa. ³⁹ Rû poraãcü nügümaã niporagatanücüü naxcêx ga yema, rü düxwa nügüna nixígü. Rû Bernabé nayaga ga Marcu, rü Chiprearü capaxüwa naxü. ⁴⁰ Rû yoxni ga Pauru rü Chiraxü niga. Rû yema Aütioquíacüãx ga yaxõgüxü rü naxcêx nayumüxêgü na Tupana nüxü rüngüxêêgüxütcêx. Rû yexguma inaxíãchi.

41 Rŭ Chíríiaanewa rŭ Chíríchíiaanewa nachopetŭ, rŭ yéma Tupanaârŭ ore-maã nanataãêxêëgŭ ga yema yaxôgŭxŭ.

16

Pauru rŭ Chirawe narŭxŭ ga Timutéu

1 Rŭ Derbewa rŭ Listrawa nangugŭ ga Pauru rŭ Chira. Rŭ yéma nayexma ga wŭxi ga yaxôcü ga Timutéugu ãegacŭ. Rŭ naë rŭ wŭxi ga Yudíu ga yaxôxcŭ iyixí. Rŭ nanatŭ rŭ wŭxi ga Griégu tixí. 2 Rŭ guxŭma ga yema yaxôgŭxŭ ga Listracŭãxgŭ rŭ Icóniúcŭãxgŭ rŭ nŭxŭ nixugŭe na mea maxŭcü yixíxŭ ga nŭma ga Timutéu. 3 Rŭ Pauru rŭ nanaxwêxe na Timutéu íyaxŭmŭcŭxŭ. Natŭrŭ naxŭpa ga na yagaãxŭ rŭ ínanawiechêxmŭpêxechiraŭ, yerŭ yemaãcü nanaxwêxegŭ ga yema Yudíugŭ ga yema naãnewa yexmagŭxŭ. Yerŭ guxŭma nŭxŭ nacuèxgŭ ga na Griégu tíxŭ ga nanatŭ. 4 Rŭ guxŭnema ga guma íãnegŭ ga nawa nachopetŭnewa, rŭ duŭxŭgŭmaã nŭxŭ nixugŭetanŭ ga yema ucuxê ga yema Yerucharéucŭãx ga ngúexŭgŭ ga Ngechuchu imugŭxŭ rŭ yema yaxôgŭxŭârŭ ãêxgacŭgŭ nŭxŭ ixugŭxŭ. 5 Rŭ yemaãcü yexeraãcü meã nayaxôgŭ ga guxŭma ga yema yaxôgŭxŭ, rŭ guxŭ ga ngunexŭ rŭ yexeraãcü nimuêtanŭ ga yema yexwacêx yaxôgŭxŭ.

Pauru nangoxetŭ rŭ wŭxi ga yatŭ ga Machedóniãcŭãxŭ nadau

6 Rŭ Áchíiaanewa naxíxchaŭ na yéma nŭxŭ yaxugŭxŭcêx ga ore i mexŭ. Natŭrŭ Tupanaãë i Ūñexŭ rŭ nŭxna nanachŭxu ga yema. Rŭ yemacêx Piríquiaanewa rŭ Gárataanewaama nachopetŭ. 7 Rŭ Míchíaarŭ naãnewa nangugŭ, rŭ yéma nagu narŭxíñuê ga na Bitíniãârŭ naãnewa naxíxŭ. Natŭrŭ yéma rŭ ta Tupanaãë i Ūñexŭ nŭxna nanachŭxu ga na yéma naxíxŭ. 8 Rŭ yemacêx Míchíiaanewa nachopetŭmare rŭ íãne ga Tróawa nangugŭ. 9 Rŭ yema chŭtaxŭgu rŭ Pauru nangoxetŭ rŭ nŭxŭ nadau ga wŭxi ga yatŭ ga Machedóniãcŭãx ga napêxegu chicŭ. Rŭ nŭxŭ nacèxŭ, ñaxŭmaã: —¡Machedóniãwa naxŭ, rŭ toxŭ rŭngŭxêê! —ñaxŭmaã. 10 Rŭ yexguma yemaxŭ nadèuxgu ga Pauru, rŭ yexgumatama togŭ tamexêëgŭ na Machedóniãwa taxíxŭcêx. Yerŭ nŭxŭ tacuèxgŭ rŭ aixcŭmaxŭchi nixí ga Tupana toxcêx çaxŭ na yema duŭxŭgŭmaã nŭxŭ tixuxŭcêx ga ore i mexŭ.

Piripuwa nayexmagŭ ga Pauru ru Chira

11 Rŭ Tróaarŭ tŭrewa itaxíãchi, rŭ capaxŭ ga Chamotáchiucêx wêxgu taxí. Rŭ moxŭãcü Neãporiwa tangugŭ. 12 Rŭ yéma rŭ dauxchitagu taxí rŭ Piripuwa tangugŭ. Rŭ guma nixí ya Dumacŭãxgŭarŭ íãne ga Machedóniããnegu naxŭgŭne. Rŭ guma nixí ya guxŭne ya íãneârŭ tamaëne ga yéma. Rŭ yéma tayexmagŭ ga ñuxre ga ngunexŭgŭ. 13 Rŭ ngŭxchigaarŭ ngunexŭgu, rŭ guma íãne iyacuáxŭwa taxí ga natŭpechinŭwa, yerŭ nagu tarŭxíñuêgu rŭ yéma nayexma ga Yudíugŭarŭ yumŭxêchica. Rŭ yéma tarŭtogŭ, rŭ namaã tidexagŭ ga ñuxre ga ngexŭgŭ ga yéma ngutaquêxegŭxŭ, rŭ namaã nŭxŭ tixugŭ ga Tupanaârŭ ore. 14 Rŭ yéma iyexma ga wŭxi ga ngecü ga Díria ga ngíega ga Tupanaxŭ icuèxŭxŭcü. Rŭ Tiatira ga íãnecŭãx iyixí. Rŭ dauxracharaxŭ ga naxchirumaã itaxe yerŭ yema nixí ga ngírŭ puracŭ. Rŭ ngíma rŭ meãma yéma írŭxíñŭ, yerŭ nŭma ga Cori ya Tupana rŭ ngíxŭ nanangúchaŭxêë na meã íñaxíñŭxŭcêx ga yema ore ga Pauru nŭxŭ ixuxŭ. 15 Rŭ yemawena rŭ ñuxŭchi íbaie wŭxigu namaã ga guxŭma ga ngítanŭxŭgŭ. Rŭ yixcama rŭ toxŭ icèèxŭ ñaxŭmaã: —Ngêxguma pema choxŭ pedèuxgu na aixcŭma

nūxū chayaxōxū ya Cori ya Tupana, rü marü name ega chopatagu peyapegügu —ngīgürügü. Rü yéma toxū ixīxēē. ¹⁶ Rü wūxi ga ngunexūgu ga yexguma yumūxēwa taxīxgu ga tomax, rü yexma ngīxū tayangau ga wūxi ga pacü ga corīgūxūtaxū ixīcū ga ngoxoāxcū. Rü yema pacü rü wūxi ga tacūxū cuēxcū iyixī, rü duūxūgūmaā nūxū iyaxu ga tacū tá yixcūra na ngupetūxū. Rü yemacēx ga duūxūgü rü dīērumaā ngīxū nanaxūtanü na nūxū yaxuxūcēx na tacū tá na ngupetūxū. Rü yemaācū poraācū dīēruxū itū naxcēx ga ngīrū corīgü. ¹⁷ Rü ngīma towe ingē ga toma rü Pauru, rü tagaācū ngīgürügü: —Ñāā yatügü rü Tupana ya tacūxūchimaārū duūxūgü nixī, rü pemaā nūxū nixu na ñuxācū tá penayaxuxū i maxū i taguma gūxū —ngīgürügü. ¹⁸ Rü yemaācū iyixī ga muxūma ga ngunexūgu. Rü dūxwa nūxū nawēxtūmūxū ga Pauru, rü ngīxcēx nadauegu, rü ñanagürü nūxū ga yema ngoxo ga ngīwa yexmaxū: —Ngechuchu ya Cristuegagu cuxū chamu, na ngīwa ícuxūxūxūcēx —ñanagürü. Rü yexgumatama ngīwa ínaxūxū ga yema ngoxo. ¹⁹ Rü yexguma nūxū nadaugügu ga ngīrū corīgü ga marü tama ngīgagu dīēru ngīxū na nayauxgūxū, rü Pauru rü Chiraxū ínayauxū, rü āēxgacügüarū ngutaquēxechicawa nanagagü. ²⁰ Rü āēxgacügüna nanaxuaxū ga yema ngīrū corīgü, rü ñanagürügü: —Ñāā Yudīgü rü tórü íānewa nanachixeāēxēēgü i duūxūgü. ²¹ —Rü tūxū nangūxēē na naxaurexūcēx i nacūmagü i tūxna chuxuxū i yixema i Dumacūāxgü —ñanagürügü. ²² Rü yexguma ga guxūma ga yema íānecūāx, rü Pauru rü Chirana nayuxgü. Rü yema āēxgacügü nanamu na ínacūxūāxūcēx rü ngexchiruxūma nañxmenēxāmaā yaçuaixgūāxūcēx. ²³ Rü yexguma marü poraācū yaçuaixgūāguwena, rü poxcupataūgu nana-wocu. Rü nūxna naxāga ga yema poxcupataūārū dauruū na meāma nūxna nadauxūcēx. ²⁴ Rü yexguma yemaxū naxīnūgu ga yema dauruū, rü poxcupataūārū aixepexūchixū ga ucapugu nanawocu, rü meāma nayachotaparagü. ²⁵ Natürü ngāxūcūūgu rü nayumūxēgü ga Pauru rü Chira, rü nawiyaegü, rü Tupanaxū nicuēxūūgü. Rü yema togü ga poxcuexū rü nūxū naxīnūē. ²⁶ Rü ngürüāchi poraācū naxīāxāchiane, rü ínyangogütanūāchi ga guma poxcupataūārū caxtagü. Rü yexgumatama niwāxnagü ga guxūma ga íāxgü ga guma poxcupataū. Rü guxūma ga yema poxcuexūārū cadenaparagü rü niwēgü. ²⁷ Rü pewa nabaixāchi ga yema poxcupataūārū dauruū. Rü yexguma nūxū nadēuxgu ga na yawāxnagūxū ga íāxgü ga guma poxcupataū rü nanayaxu ga norü tara na nügü yamāxūcēx, yerü nūma nūxū nacuēxgu rü marü nibuxmü ga yema poxcuexū. ²⁸ Natürü tagaācū aixta naxū ga Pauru, rü ñanagürü nūxū: —¡Tāxū i cügü quimáxū! Rü guxāma i toma rü tanuxmagü —ñanagürü. ²⁹ Rü yexguma ga yema poxcupataūārū dauruū rü naxcēx ínaca ga wūxi ga omü, rü inañaāchiācūma yema duūxūgü ípoxcuexūgu nayangaxi, rü yaduruxācūma Pauru rü Chirapēxegu nayacaxāpūxū. ³⁰ Rü yexguma íāxtūwa Pauru rü Chiraxū nagagü, rü ñanagürü nūxū: —Pa Corīgüx, ¡Tacū tá chaxūxū i choma na choxū nangēxmaxūcēx i maxū i taguma gūxū? —ñanagürü. ³¹ Rü nūmagü rü nanangāxūgü rü ñanagürügü nūxū: —¡Nūxū yaxō ya Cori ya Ngechuchu, rü tá cuxū nangēxma i maxū i taguma gūxū i cuma rü guxū i cupatacūāx! —ñanagürügü. ³² Rü namaā rü guxūma ga yema napatacūāxgūmaā rü ta nūxū nixugüe ga Cori ya Tupanaārü ore. ³³ Rü yematama oragu ga chūtacü, rü nūma ga yema poxcupataūārū dauruū nayayauxgü ga norü oxrigü ga Pauru rü Chira. Rü yemawena rü ñuxūchi ínabaie ga nūma

wūxigu tūmamaã ga naxmèx rü naxacügü. ³⁴ Rū ñuxūchi ga nūma ga poxcupatañarü dauruñ rü napatawa Pauruxū rü Chiraxū nagagü. Rū òna nūxna naxã rü nataãe ga nūma rü guxūma ga napatacūãxgü ta, yerü Tupanaãxū nayaxögü. ³⁵ Rū moxūãcū pèxmama rü yema ñãneärü ãëxgacügü rü yema poxcupatañarü dauruñxütawa nanamugü ga purichíagü na namaã nüxü yanaxugüxücèx na Pauru rü Chiraxū ínamuxūxū. ³⁶ Rū yexguma ga yema poxcupatañarü dauruñ rü ñanagürü Pauruxū: — Rū ngēma ãëxgacügü rü nuã nanamugü i ore na pexū íchamuxūxücèx. ¡Rü ècū ípechoxū, rü meã ípixí! —ñanagürü. ³⁷ Natürü ga Pauru rü ñanagürü nüxü ga yema purichíagü: —Marü chixri tomaã nachopetü i toma i Dumacūãxüchigü na tixígüxū, rü tama toxna nacaxiraãcūma toxü niçuaixgü ga napèxewa ga guxūma ga duñxügü, rü ñuxūchi poxcupatañgu toxü nawocu. Rū ñuxma rü cúãcūma toxü ínamuxüchañ. Rū tãütama ngēmaãcū nixí. ¡Rü ècū nūmatama nūma naxí i ãëxgacügü na nūmatama toxü íyamuxūxücèx! —ñanagürü ga Pauru. ³⁸ Rū yexguma ga yema purichíagü rü ãëxgacügümaã nüxü nayarüxugüe ga yema ore. Rū poraãcū nabaixãchiãgü ga yema ãëxgacügü ga yexguma nüxü naxínüëgu ga na Dumacūãxüchí yixígüxū. ³⁹ Rū yéma naxí, rü Pauru rü Chirana nayacagü na nüxü nüxü nangechaügüxücèx naxcèx ga yema namaã naxügüxū. Rū ínamuxū, rü nüxü nacèxügü na nawa ínachoxūxücèx ga guma ñãne. ⁴⁰ Rū yexguma poxcupatañwa ínachoxügu ga Pauru rü Chira, rü Díriapatawa naxí. Rū yema yaxögüxūmaã nangutaquëxegü, rü nayaxucuxëgü, rü Tupanaärü oremaã nanataãëxëëgü. Rū ñuxūchi yemawena rü inaxíachi.

17

Pauru rü Chiramaã nanuë ga duñxügü ga Techarónicawa

¹ Rū ñãnegü ga Aũfípori rü Aporóniãwa nachopetü ga Pauru rü Chira, rü ñãne ga Techarónicawa nangugü. Rū yéma nayexma ga wūxi ga ngutaquëxepatañ ga Yudíugüarü. ² Rū guma ngutaquëxepatañwa naxūñxū ga Pauru, yerü woetama yema nixí ga nacūma. Rū tomaëxpüx ga ngüxchigaarü ngunexügu rü Tupanaärü ore ga ümatüxüchiga yema Yudíugümaã yéma nidexa. ³ Rū meãma naxcèx nanangoxëë ga yema ore, rü namaã nüxü nixu ga ñacücèx na nayuxü ga Cristu rü tüxcüñ wena na namaxūxū. Rū ñanagürü: —Rü yima Cristu rü Ngechuchu nixí, rü nachiga nixí i pemaã nüxü chixuxū —ñanagürü ga Pauru. ⁴ Rū ñuxre ga yéma yexmagüxū ga Yudíugü rü nayaxögü, rü Pauru rü Chiratanügu naxãgü. Rū yexgumarü ta Ngechuchuaxū nayaxögü ga muxūma ga Griégugü ga noxri Yudíugürüñ yaxögüxū. Rū muxūma ga ngexügü ga díeruãxgüxū rü ta nayaxögü. ⁵ Rū yemacèx ga yema Yudíugü ga tama yaxögüxū, rü nanuë rü nixãuxãchigü yerü muxūma ga duñxügü nüxü nayaxögü ga Pauru rü Chiraarü ore. Rū norü numaã nanaxítaquëxexëë ga ñuxre ga yatügü ga chixexügü ga taxuwama mexü. Rū yemaxü namugü na nanuëxëëãxū ga yema ñãneçūãx ga duñxügü. Rū Yachãñpatawa nabuxmü ga yema chixexü ga duñxügü na Pauru rü Chiracèx nadaugüxücèx, yerü yema muxūma ga duñxügüpèxewa nanagagüchañ. ⁶ Natürü yexguma tama yexma nüxü yangaugügu, rü Yachãññ niyauxgü, rü ñuxre ga yaxögüxūñ rü ta ínayauxū. Rü naya-gauxütanü, rü guma ñãneärü ãëxgacügüpèxewa nanagagü. Rü tagaãcū ñanagürügü: —Ngēma Pauru rü Chira i guxü i naãnewa duñxügüxū

chixexēgūxū, rü núma rü ta nangugü. ⁷—Rü Yachãu nixi ga nayaxuxū ga napatawa. Rü guxūma i nūmagü i ngēma yatügü rü tama naga naxĩnūechaũ i tóru ãexgacü ya Dumacũãxãrũ mugü, erü nüxũ nixugüe rü nangēxma i to i ãexgacü i Ngechuchu —ñanagürügü ga yema chixexũ ga duũxügü. ⁸ Rü yexguma nüxũ naxĩnūēgu ga yema ore gü, rü poraãcü nanuē ga yema muxūma ga duũxügü rü yema ãaneãrũ ãexgacügü ta. ⁹ Natürü ga Yachãu rü namücügü rü dīerumaã nügü naxütanügü, rü yemacēx nayangēxgü.

Pauru rü Chira rü Beréawa nayexmagü

¹⁰ Rü yematama ga chütaxügu rü yema yaxōgūxū ga Techarónicacũãx rü ãane ga Beréawa nanamugü ga Pauru rü Chira. Rü yexguma yéma nangugügu, rü Yudiügüarü ngutaquēxepataũwa naxĩ. ¹¹ Rü yema Yudiügü ga Beréacũãx, rü yema togü ga Yudiügü ga Techarónicawa yexmagūxũãrũ yexera narümemaēgü. Rü norü ngúchaũmaã meãma nanayauxgü ga yema ore. Rü guxū ga ngunexügu rü Tupanaãrũ ore ga ũmatüxũwa nangúe na meã nüxũ nacüexgüxücèx ngoxi aixcūma yĩxũ ga yema ore ga Pauru rü Chira namaã nüxũ ixuxũ. ¹² Rü muxūma ga yema Beréacũãx ga Yudiügü rü Ngechuchuauxũ nayaxōgü. Rü yexgumarüũ ta ga muxūma ga Griégügü ga Yatüxügü rü ngexügü ga ãexgacügü namèx ixīgüxũ, rü nayaxōgü. ¹³ Natürü yexguma yema Yudiügü ga Techarónicacũãx nüxũ cuáchigagügu ga na Beréawa rü ta nüxũ na yaxuxũ ga Tupanaãrũ ore ga Pauru, rü yéma naxĩ, rü nananuēxēē ga yema ãanecũãx ga duũxügü na Paurumaã chixri nachopetüxücèx. ¹⁴ Natürü yexguma yemaxũ nacüáchigagügu ga yema yaxōgūxũ, rü paxama Pauruxũ ínaxüxüxēēgü ga guma ãanewa. Rü ñuxre ga yema yaxōgūxũ rü Pauruxũ ínixümücügü. Rü dauxchitagu naxĩ rü ñuxmata taxtúpechinüwa nangugü. Natürü ga Chira rü Timutéu rü Beréaga narüchooma. ¹⁵ Rü yema duũxügü ga Pauruxũ íxümücügüxũ, rü wapurugu ínayaümücügü ñuxmata ãane ga Atenawa nangugü, rü ñuxũchi Beréacèx nawoegu. Rü Pauru rü yema duũxügüxũ yéma namuga na paxa naxütawa naxĩxücèx ga Chira rü Timutéu.

Atenawa nayexma ga Pauru

¹⁶ Rü yexguma Pauru rü Atenawa Chira rü Timutéuxũ nanguxēēgu, rü tama nataãécüraxũ yerü nüxũ nadau ga guma ãanewa ga na poraãcü naxchicünèxãmaãmare na natupanaãxgüxũ. ¹⁷ Rü yemacèx ga Pauru rü Yudiügüarü ngutaquēxepataũwa Cristuchigaxũ nixu namaã ga yema Yudiügü rü yema togü ga tama Yudiügü ixīgüxũ ga Tupanaxũ icüexüügüxũ. Rü guxũ ga ngunexügu ga ãaneãrũ plaza ga taxüwa rü ta Cristuchigaxũ nixu namaã ga yema duũxügü ga yéma ãmücüwa íxũ. ¹⁸ Rü nayexmagü ta ga ñuxre ga yatügü ga Epicúriugüarü nguxēētaewa ngúexũ, rü togü ga Etóicugüarü nguxēētaewa ngúexũ. Rü nūmagü rü inanaxügüe ga Paurumaã na yaporagatanücüxũ. Rü ñuxre ga nūmagü rü ñanagürügü: —¿Rü tacü nixi i nüxũ yaxuxũ i ñaã yatü i idexaechamarexũ? —ñanagürügü. Rü togü nanangãxügü, rü ñanagürügü: —Maneca wüxi i to i nachiũñanecũãxãrũ tupanagüarü orearü uruũ nixi —ñanagürügü. Rü yemaãcü nidexagü ga yema duũxügü, yerü Pauru rü nüxũ nixu ga ore ga mexũ ga Ngechuchuchiga ga nuxãcü wena na namaxũxũ. ¹⁹ Rü düxwa norü ãexgacügüarü ngutaquēxechica ga Areópagu ãegaxüwa nanagagü. Rü yéma nüxna nacagü, rü ñanagürügü nüxũ: —Toma nüxũ tacuáxchaũ na tacü rü nguxēētae i ngexwacaxũxũ yĩxũ i ngēma namaã

cunguxēētaexū. ²⁰ Erū toxçex rü wüxi i taguma nüxū taxīnūēxū nixī i ngēma ore, rü nüxū tacuáxchaū na tacūchiga yīixū i ngēma nüxū quixuxū —ñanagürügü. ²¹ Rü yemaácü nidexagü, yerü guxūma ga Atenacūāxgü rü yema to ga nachīñanecūāxgü ga yexma āchiūgūxū, rü woetama yexicagu narūxīnūē ga na nüxū yaxuxūçex rü nüxū naxīnūēxūçex ga yexwacaxūxū ga oregü. ²² Rü yemacèx ga Pauru rü inachi norü ngāxūtanūwa ga yema duūxūgü ga yema Areópaguwa ngutaquēxegūxū, rü ñanagürü: —Pa Atenacūāxgūx, nüxū chadau na poraácü perü tupanagügu perūxīnūēxū. ²³ —Erü ngēxguma perü ngutaquēxechicagüwa chixūpetūchigügu, rü nüxū chadau i naxchicūnēxāgü i nüxū picuēxūūgūxū. Rü wüxi i nachicawa namaā chayarūxū i wüxi i yumūxēchica, rü ngēxma naxūmatū i naega i ñaxū: “Tupana ya tama nüxū icuácü”, ñaxū. Rü yima Tupana ya tama nüxū pecuāácūma nüxū picuēxūūgücü nixī ya choma pemaā nüxū chixuchigacü. ²⁴ —Rü guma Tupana ga naxūcū ga guxūma ga naānegü rü guxūma i nawa ngēxmaxū, rü nüma nixī i norü yora yīixū i daxūguxū i naāne rü ñoma i naāne. Rü ngēmacèx nüma rü tama duūxūgü ūxūne ya tupaucagügu naxāchiū. ²⁵ —Rü nūmatama ya Tupana rü taxucèxma nanaxwēxe i duūxūgūarū ngūxēē na namaxūxūçex i nūmax, erü taxuūma nüxū nataxū. Rü nūmatama guxāna nanaxā i maxū, rü tūxna nanaxā ya buanecü ya namaā ingūātanūcūcū. Rü nūmatama tūxna nanaxā i guxūma. ²⁶ —Nüma rü wüxi ga duūxūwatama nanaxū ga guxūma ga duūxūgü na guxū i naānewa nangēxmagūxūçex. Rü nüma inaxuneta i ñuxgu tá na nabuxū i duūxūgü rü ngexta tá naxāchiūxū i wūxichigü. ²⁷⁻²⁸ —Rü yemaácü nanaxū na naxçex nadaugūxūçex ga duūxūgü rü ñoma ēānexūwa tacūcèx idaugūxūrūū nüxū iyangaugūxūçex. Natürü nüma ya Tupana rü woetama guxūguma tūxna nangaicamachirēx, erü nagagu nixī i imaxēxū rü ixīāxtanūcūxū rü ingēxmaxū, ngēxgumarūū i ñuxre i perü poperaarū ūmatūxūgü naxūmatūxūrūū, rü ñanagürügü:

“Rü Tupanaxācū tixīgü”, ñanagürügü. ²⁹ —Rü ñuxma na Tupanaxācügü ixīgūxū, rü tama name i nagu tarūxīnūē rü Tupana rü wüxi i naxchicūnēxā i uirumūwa rü ēxna dīerumūwa rü ēxna nutawa ixūxūrūū nixī. Erü guxūma i ngēma naxchicūnēxāgü rü nūmatama i duūxūgü nagu naxīnūēxūācūma nanaxūgü. ³⁰ —Rü nuxcūma ga duūxūgü rü naēchitamare ínatūe, natürü nüma ga Tupana rü namaā yaxna naxīnū. Natürü i ñuxma ya Tupana rü nanamu i duūxūgü i guxūwama na naxçex nadaugūxū rü nüxū naxoexū i nacūma i chixexūgü. ³¹ Yerü nüma ga Tupana rü marü nüxū naxuneta i wüxi i ngunexū i nagu tá aixcūma guxū i ñoma i naānecūāx i duūxūgūna naçaxū i norü maxūchiga. Rü marü nüxū naxuneta ya wüxi ya yatū ya Ngechuchu, rü yima tá nixī ya duūxūgūna çacū. Rü Tupana rü guxāxūma nüxū nacuēxēē ga yema ga yexguma Ngechuchuxū wena namaxēēgu —ñanagürü ga Pauru. ³² Rü yexguma yema wena na namaxēxūchigaxū naxīnūēgu ga duūxūgü, rü ñuxre ga nūmagü rü Pauruxū nacugūe. Natürü ga togü rü ñanagürügü: —Rü wenagu táxarū cuxū itarūxīnūē i ngēmachiga —ñanagürügü. ³³ Rü yexguma ga Pauru rü ínaxūxū ga natanūwa. ³⁴ Natürü ñuxre ga duūxūgü rü Pauruwe narūxī, rü Ngechuchuaxū nayaxōgü. Rü natanūwa nayexma ga Diuníchiu ga wüxi ga Areópaganūxū, rü wüxi ga ngeçü ga Dámari ga ngēga. Rü ñuxre ga togü rü ta nayaxōgü.

18

Corġtiuwa nayexma ga Pauru

¹ Rŭ yemawena rŭ inaxŭãchi ga Pauru ga Atenawa, rŭ ããne ga Corġtiuwa naxŭ. ² Rŭ yéma namaã inayarŭxŭ ga wŭxi ga yatŭ ga Aquiru ga Pŏtuanecŭãx ga yexwacèx Dumawa ga Itáriaanewa ne ŭxŭ namèx ga Prislamaãx. Rŭ yéma Corġtiuwa nayexma yerŭ Dumacŭãxgŭarŭ ãëxgacŭ ga Cãudiu nanamu ga na ãnachoxŭxŭcèx ga guxŭma ga Yudiugŭ ga Dumawa. Rŭ Pauru rŭ naxŭtagu nanaxŭãne. ³ Rŭ yexma nape rŭ naxchirunaxcèx ga dŭxenŭãrŭ ŭwa nŭgŭmaã napuracŭe yerŭ woetama yema nixŭ ga norŭ puracŭ ga Pauru rŭ Aquiru rŭ Prisila. ⁴ Rŭ guxŭ ga ngŭxchigaarŭ ngunexŭgu rŭ Yudiugŭarŭ ngutaquèxepataŭwa naxŭŭxŭ ga Pauru, rŭ duŭxŭgŭmaã nidexaxŭ, rŭ nayaxucŭxègŭxŭ. Rŭ yexgumarŭŭ ta nayaxucŭxègŭxŭ ga yema duŭxŭgŭ ga tama Yudiugŭ ixŭgŭxŭ. ⁵ Rŭ yixcamaxŭra ãnangugŭ ga Chira rŭ Timutéu ga Machedóniãwa ne ãxŭ. Rŭ yexguma inanaxŭgŭ ga Pauru ga aixcŭma poraãcŭ nŭxŭ na yaxuxŭ ga Tupanaãrŭ ore. Rŭ meãma Yudiugŭxŭ nangŭexèè na Ngechuchu rŭ Tupana Nane ya Cristu na yŭxŭ. ⁶ Natŭrŭ nŭmagŭ ga yema Yudiugŭ rŭ inanaxŭgŭe ga Paurumaã na nanuèxŭ, rŭ namaã naguxchigagŭxŭ. Rŭ yexguma inapamŭchiru ga Pauru, yerŭ yema nixŭ ga wŭxi ga cuèxruŭ naxcèx ga yema duŭxŭgŭ na yemawa nŭxŭ yacuèxãchitanŭxŭcèx ga norŭ chixexŭ. Rŭ ñanagŭrŭ nŭxŭ: —Pegagu tátama nixŭ i na ipeyarŭtauxexŭ, rŭ marŭ tama chaugagu tá nixŭ. Rŭ ñomaŭcŭŭ i choma rŭ tá ngèma tama Yudiugŭ ixŭgŭxŭtanŭwa chaxŭ —ñanagŭrŭ ga Pauru. ⁷ Rŭ ãnaxŭxŭ ga guma ngutaquèxepataŭwa. Rŭ yéma nayexma ga wŭxi ga yatŭ ga Tíchiu ga Yuchugu ãegaxŭ. Rŭ nŭma rŭ Tupanaxŭ nangechaŭ rŭ yexma ngutaquèxepataŭcŭwagu naxãpata. Rŭ yemaxŭtawa naxŭ ga Pauru, rŭ yexma nape. ⁸ Rŭ Cripu ga ngutaquèxepataŭãrŭ ãëxgacŭ rŭ namèx rŭ guxŭma ga naxãcŭgŭ rŭ Cori ya Ngechuchuaxŭ nayaxŭgŭ. Rŭ yexgumarŭŭ ta rŭ muxŭma ga Corġtiucŭãxgŭ rŭ nayaxŭgŭ ga yexguma nŭxŭ naxŭnègŭ ga yema ore, rŭ ñŭxŭchi Pauru ãnabaiŭxèè. ⁹ Rŭ wŭxi ga chŭtaxŭ rŭ nangoxetŭ ga Pauru. Rŭ Cori ya Tupana namaã nidexa, rŭ ñanagŭrŭ: —jRŭ tãxŭ i cumuŭxŭ! jRŭ nŭxŭ ãxuama i chorŭ ore! jRŭ tãxŭ i curŭchianexŭ! ¹⁰ —Erŭ choma rŭ chacuxŭtagu, rŭ taxŭetãma chixexŭ cumaã taxŭ. Erŭ daa ããnewa rŭ choxŭ nangèxma i muxŭma i chorŭ duŭxŭgŭ —ñanagŭrŭ ga Tupana. ¹¹ Rŭ wŭxi ga taunecŭarŭ ngãxŭ Corġtiuwa nayexma ga Pauru. Rŭ yéma yema duŭxŭgŭtanŭwa namaã nangŭexèètae ga Tupanaãrŭ ore. ¹² Natŭrŭ yexguma Acayaaneãrŭ ãëxgacŭ yixŭgu ga Gariðŭ, rŭ yema Yudiugŭ rŭ wŭxigu Pauruxŭ niyauxgŭ, rŭ ãëxgacŭpèxewa nanagagŭ. ¹³ Rŭ ñanagŭrŭgŭ nŭxŭ ga guma ãëxgacŭ: —Ñãã yatŭ rŭ duŭxŭgŭxŭ naxucŭxè na Tupanaxŭ yacuèxŭgŭxŭcèx rŭ tama naga na naxŭnèxŭcèx i tachiŭãneãrŭ mugŭ —ñanagŭrŭgŭ. ¹⁴ Rŭ Pauru marŭ nachonagŭchaŭ, natŭrŭ nŭma ga ãëxgacŭ ga Gariðŭ rŭ yema Yudiugŭxŭ nangãxŭ, rŭ ñanagŭrŭ: —Rŭ ngèxguma chi wŭxi i taxŭ i chixexŭ naxŭxgu, rŭ èxna namáètagu, rŭ ngèxguma chi nixŭ i choma i pexŭ ichaxŭnŭxŭ, Pa Yudiugŭx. ¹⁵ —Natŭrŭ ngèma pecŭmachiga rŭ perŭ mugŭchiga rŭ perŭ nguxèètaechiga na yŭxŭ, rŭ choma rŭ tama nŭxŭ chacuãchaŭ i ngèma. jRŭ pematama penamexèèx! Rŭ choma rŭ tama ngèmachigaarŭ ãëxgacŭ chixŭchaŭ —ñanagŭrŭ. ¹⁶ Rŭ yexguma ãnawoxŭ ga yéma. ¹⁷ Rŭ yexguma guxŭma ga yema duŭxŭgŭ rŭ Yudiugŭarŭ

ngutaquēxepatañārū ãëxgacū ga Chótenegu ãegaxūxū yexma niyauxgū. Rū yexmatama ãëxgacū ga Gariōūpēxegu nanaçuaixgū. Natūrū nūma ga Gariōū rū taxu ñanagūrūama.

Pauru rū Aūtioquíacèx nataegu, rū ñuxūchi wenaxārū inaxūāchi na norū tomaēxpūxcūna to ga nachiiñānegūwa nangeaxū ga Tupanaārū ore

¹⁸ Rū yemawena rū muxūma ga ngunexū yéma Corñtiyuwa nayexma ga Pauru. Rū yixcama nūxū narūmoxē ga yema yaxōgūxū rū nūxna inaxūāchi. Rū ñāne ga Chēcreawa naxū namaā ga Prisila rū Aquiru. Rū Chēcreawa nūgū nidūpūxūeru ga Pauru yerū marū nayanguxēē ga wūxi ga uneta ga Tupanamaā nūxū yaxuxū. [Rū woetama yema nixī ga nacūmagū ga Yudíugū ga yexguma yanguxēēgūāxgu ga wūxi ga uneta ga Tupanamaā nūxū yaxuxū.] Rū ñuxūchi Chēcreaarū tūrewa rū wūxi ga wapurugu nichoū na Chíríaanewa naxīxūcèx. ¹⁹ Rū yexguma Epéchiuwa nangugū, rū Pauru nūxna nixūgachi ga Prisila rū Aquiru, rū Yudíugūarū ngutaquēxepatañwa naxū. Rū yéma namaā nidexa ga yema Yudíugū ga guma ngutaquēxepatañwa ngutaquēxegūxūxū. ²⁰ Rū yema Yudíugū, rū muxūma ga ngunexūgū nūxū nacèxūgū ga yexma na naxāūxūcèx, natūrū ga nūma rū tama nanaxwèxe. ²¹ Rū yemacèx nūxū narūmoxēāma, rū ñanagūrū nūxū: —Rū ngēxguma Tupana naxwèxegu, rū wena táxarū pexcèx chataegu —ñanagūrū. Rū yemawena rū Epéchiuarū tūrewa nayarūxūe, rū inaxūāchi. ²² Rū Checharéaarū tūrewa nangu, rū yéma inaxūe. Rū ñuxūchi Yerucharéūwa naxū na nūxū yanamoxēxūcèx ga guxūma ga yema yaxōgūxū. Rū ñuxūchi Aūtioquíawa naxū. ²³ Rū yexguma marū ñuxre ga ngunexū yéma Aūtioquíawa nayexmagu, rū wenaxārū inaxūāchi ga Pauru na wūxichigū ga ñāne ga Gárataanewa rū Fríyíaanewa yexmagūnewa iyadauxūcèx rū yataāëxēēgūāxūcèx ga guxūma ga yema yaxōgūxū ga guma ñānegūwa yexmagūxū.

Aporu rū Epéchiuwa nūxū nixu ga Tupanaārū ore

²⁴ Rū yexgumañcūū rū Epéchiuwa nangu ga wūxi ga Yudíu ga Aporugu ãegaxū. Rū nūma rū ñāne ga Aleyādríacūāx nixī, rū nūxū natauxcha ga duūxūgūpēxewa na yadexaxū. Rū meāma nūxū nacuèx ga Tupanaārū ore i ūmatūxū. ²⁵ Rū nūma meā nūxū nacuèx ga Cuāū ga baiūxēēruñārū nguxēētae ga Cori ga Ngechuchuchiga, rū nūxū nacuèx na ñuxācū Cuāū duūxūgūxū íbaiūxēēxū. Natūrū yexicaxūtama nacuèx ga Ngechuchuchiga. Natūrū poraācū nataāēcūma nidexa rū aixcūma nanangūxēē ga duūxūgū. ²⁶ Rū nūma ga Aporu rū tama namuñācūma inanaxūgū ga na yadexaxū ga Yudíugūarū ngutaquēxepatañwa. Natūrū yexguma Aporuxū naxīnūēgu ga Prisila rū Aquiru, rū napatawa nana-gagū na yexeraācū namaā inanguxūxēēāxūcèx ga Ngechuchuchiga. ²⁷ Rū yexguma Acayaanewa naxūxchaūgu ga Aporu, rū yema yaxōgūxū ga Epéchiucūāx nūxū narūngūxēēgū. Rū popera yéma namugū naxcèx ga yema yaxōgūxū ga Acayacūāx na meā Aporuxū nayauxgūxūcèx. Rū yexguma Acayawa nanguxgu ga Aporu rū poraācū nūxū narūngūxēē ga yema duūxūgū ga Tupanaārū ngechaūgagu Ngechuchuaxū yaxōgūxū. ²⁸ Rū guxū ga duūxūgūpēxewa nūxū nūxū nacuèxēē ga poraācū na ínatūexū ga yema Yudíugū ga tama Ngechuchuxū cuāxchaūgūxū. Rū nūmagū ga Yudíugū rū taxucūrūwama ñuxū ñanagūrūgū, yerū ga Aporu rū Tupanaārū ore ga ūmatūxūwa meāma nūxū nanawēx ga na Ngechuchu rū aixcūma Tupana Nane ya Cristu na yīixū.

19

Epéchiuwa nayexma ga Pauru

¹ Rü yexguma Corñitiuwa nayexmayane ga Aporu, rü Pauru rü naxpüxanegu idaxü ga namawa nixüpetü, rü Epéchiuwa nangu. Rü yexma nüxü nayangau ga ñuxre ga yaxögüxü. ² Rü nüxna naca, rü ñanagürü nüxü: —¿Marü penayaxuxü i Tupanaãe i Üünexü ga yexguma peyaxögügu? —ñanagürü. Rü nümagü nanangäxü, rü ñanagürügü: —Tama. Taguma nüxü taxñnüéchiga na tacü yïxü i Tupanaãe i Üünexü —ñanagürügü. ³ Rü yexguma ga Pauru rü nüxna naca rü ñanagürü nüxü: —¿Texéaxü peyaxögüxü ga yexguma ípebaiügu? —ñanagürü. Rü nümagü nanangäxü, rü ñanagürügü: —Toma nüxü tayaxö ga yema Cuáü ga baiüxëerüüärü nguxëëtae —ñanagürügü. ⁴ Rü yexguma ga Pauru rü ñanagürü nüxü: —Cuáü ínanabaiüxëe ga yema duüxügü ga nüxü rüxoexü ga nacüma ga chixexü rü Tupanacëx daugüxü. Natürü yema duüxügümaã nüxü nixu ta na nüxü yaxögüäxücëx ga Ngechuchu ga naweama äcü —ñanagürü ga Pauru. ⁵ Rü yexguma yemaxü naxñnüegu ga yema duüxügü rü ínabaiü naegagu ga Cori ya Ngechuchu. ⁶ Rü yexguma Pauru rü yema yaxögüxüetügu naxümëxgu, rü nüxna nangu ga Tupanaãe i Üünexü, rü to ga nagawachigü nidexagü, rü nüxü nixugüe ga Tupanaärü ore. ⁷ Rü maneca 12 ga yatü nixügü ga yema duüxügü. ⁸ Rü tomaëxpüx ga tauemacü yéma nayexma ga Pauru. Rü Yudíugüarü ngutaquëxepataüwa naxüüxü rü tama namuüäcüma nüxü nixuuxü ga Tupanaärü ore. Rü nanangüexëe na ñuxäcü äëxgacü na yïxü ya Tupana, rü nüxü nanangüchaüxëe na Ngechuchuaxü yaxögüäxücëx. ⁹ Natürü nayexma ga ñuxre ga duüxügü ga tama nüxü cuëxgüchaüxü rü tama yaxögüchaüxü. Rü nümagü inanaxügüe ga na yema muxüma ga duüxügüpëxewa chixexü yaxugüexü nachigagu ga Cori ga Ngechuchu. Rü yemacëx nüxna nixügachi ga Pauru, rü toxnamana nanagagü ga yema yaxögüxü. Rü guxü ga ngunexügu namaã nüxü nixuchiga ga ore nawa ga wüxi ga ngutaquëxepataü ga Tiranuärü ngüepataü ga naega. ¹⁰ Rü yemaäcü nanaxü ga taxre ga tauncü, rü yemaäcü guxüma ga Ächiacüäxgü ga Yudíugü rü Griégugü rü nüxü naxñnüe ga Cori ya Tupanaärü ore. ¹¹ Rü Tupana Pauruxü narüngüxëe ga na naxüäxü ga taxügü ga mexügü ga Tupanaärü poramaã naxüxü. ¹² Rü èjxrüxü ga norü dechugü ga Pauru rü naxchirugü rü duüxügü rü yema idaaweexüxütawa nanangegü. Rü yexguma yema idaaweexü nüxü ingögügügu ga yema naxchiru rü ëxna dechu, rü naxcëx nitaanegü. Rü yema duüxügü ga ngoxoäxgüxü rü ta naxcëx nitaanegü. ¹³ Natürü nayexma ga ñuxre ga Yudíugü ga íänegüwachigü ixíetanüxü rü ngoxogüarü woxüwa puracüexü. Rü nüxü naxügü na Cori ya Ngechuchuégagu na ínawoxüäxü ga ngoxogü nawa ga yema duüxügü ga ngoxoäxgüxü. Rü ñanagürügü: —Ngechuchu ya Pauru nüxü ixuchigacüégagu pexü tamu na ípechoxüxücëx —ñanagürügü ga yema Yudíugü. ¹⁴ Rü yema 7 ga yema ügüxü, rü wüxi ga Yudíugüarü paigüarü äëxgacü ga Echebaga äegaxü nanegü nixígü. ¹⁵ Natürü wüxi ga ngunexügu ga yexguma wüxi ga ngoxoxü ínatëxüchigüchaügu, rü yema ngoxo nanangäxü, rü ñanagürü: —Nüxü chacuëx ya Ngechuchu, rü nüxü chacuëx ya Pauru na texé yïxü. ¿Natürü i pema rü texégü pixígü? —ñanagürü. ¹⁶ Rü yexguma ga yema yatü ga ngoxoäxü rü yema duüxügü ga inatëxüchigüchaüxüna nayuxu,

rū nūxū narūporamaē ga guxūma, rū ínanagáuūxūne. Rū yemaācū ngexchiruxūma rū napíexūma nibuxmū ga guma íwa. ¹⁷ Rū guxūma ga Yudíugū rū Griégugū ga Epéchiuwa yexmagūxū rū nūxū nacuáchiga ga yema. Rū poraācū namuūē ga guxūma. Rū yemaācū yexeraācū natachiga ga Cori ga Ngechuchu ga yéma. ¹⁸ Rū muxūma ga yema yaxōgūxū rū yéma ningugūetanū, rū guxū ga duūxūgūpēxewa nūxū nixugūechigū ga nūma rū ta na nayuūechiréxū, natūrū tá nūxū na naxoexū ga yema. ¹⁹ Rū muxūma ga yema iyuūechiréxū, rū yéma nanana ga norū poperagū ga yuūpane ga nawa nangúexū, rū guxāpēxewa ínanagu. Rū yexguma nangugūgūāgu ga natanū ga yema poperagū, rū maneca 50,000 tachinū ga dīeru ga tatanūxūwa nangu. ²⁰ Rū yemaācū ga Cori ya Tupanaārū ore, rū yexeraācū nixūchigū, rū yexeraācū duūxūgū nūxū nadau na űuxācū naporaxū ga yema ore. ²¹ Rū yemawena ga Pauru, rū nagu narūxīnū ga Machedóniāānewa rū Acayaanewaxíra na naxūxū, rū yéma űuxūchi Yerucharéūwa na naxūxū. Yerū yema űanagūrū: —Rū ngēma Yerucharéūwa tá chaxū, rū yixcama rū Dumawa rū tá ta chaxū —űanagūrū. ²² Rū yemacēx nūgūpēxegu Machedóniāānewa nanamugū ga taxre ga norū ngūxēeruū ga Timutéu rū Eratu. Natūrū nūma ga Pauru rū űuxre ga ngunexū Áchiagu narūxāūx.

Nanuē ga duūxūgū ga Epéchiuwa

²³ Rū yexgumaūcūū rū Epéchiuwa rū nanaxíxāchitanūāē ga duūxūgū, rū poraācū nanuē nachigagu ga Cori ya Tupanaārū ore. ²⁴ Rū yemaācū naxūpetū nagagu ga wūxi ga yatū ga dīerumūwa puracūxū ga Demétrigu āegaxū. Rū nūma rū ínanaxūxū ga norū tupana ga Atemíchaarū tupaucachicūnēxāgū ga dīerumūnaxcēx. Rū nayexma ga muxūma ga norū puracūtanūxū ga yemawa puracūexū. Rū guxūma poraācū meā nūxū naxātanū ga yema puracū. ²⁵ Rū nūma ga Demétriu rū nanangutaquēxexēē ga guxūma ga puracūtanūxū ga yemawa puracūexū, rū űanagūrū nūxū: —Pa Chomūcūgūx, meā nūxū pecuēxgū na űāā tórū dīerumūārū puracūgu na ngīxū iyaxuxū i tórū dīeru. ²⁶ Rū marū nūxū pedaugū i ngēma Pauru rū nūxū pexīnūē na űuxācū yaxucūxēgūāxū i duūxūgū, rū űuxācū namaā nūxū yaxuxū na tama aixcūma tupanagū yīīxū i ngēma tupanagū i yixema ixūgūxū. Rū ngēmaācū muxūma i duūxūgūxū nūxū narūxoexēē na tama tórū tupanagūaxū yaxōgūāxūcēx. Rū tama nūma Epéchiuwaxicatama ngēxū nawagū natūrū wixguxūchi taēx guxū i Áchiaanewa ngēmaācū chixri nayaxucūxēgū i duūxūgū. ²⁷ Rū pema nūxū pecuēx rū tórū puracūcēx rū naxāūcūma i ngēma. Rū wūxi i chixexū ta nixī i naxcēx i tórū tupana i Atemíchaarū tupaUCA ya taxūne. Rū űuxma rū muxūma i duūxūgū rū ngīxū nangechaū i Atemícha i guxū i Áchiaanewa rū guxū i naānewa. Natūrū ngēma Pauruarū ucūxēgagu rū dūxwa taxuxūtāma ngīxū nangechaū i duūxūgū, rū ngēmaācū dūxwa inaārūxo tá ta i tórū puracū —űanagūrū ga Demétriu. ²⁸ Rū yexguma yemaxū naxīnūēgu, rū poraācū nanuē, rū tagaācū űanagūrūgū: —¡Namaxū i Epéchiucūāxgūarū tupana i Atemícha! —űanagūrūgū. ²⁹ Rū guxūma ga yema íānecūāxgū rū poraācū yexma ínatūēāē. Rū ínanayauxū ga Gayu rū Aritárcu ga Machedóniāānecūāxgū ga Paurumūcūgū, rū guma í ga íānēārū ngutaquēxepataūwa nanagauxūtanū. ³⁰ Rū Pauru rū ta yexma naxūcuchaū na yema duūxūgūmaā yadexaxūcēx, natūrū yema yaxōgūxū nūxna nanachūxu ga yexma na naxūcuxū. ³¹ Rū yema

Áchiaaneārū āēxgacügütanūwa rü nayexma ga ñuxre ga Paurumücügü ixīgüxŭ. Rŭ nŭmagŭ rŭ ta Pauruxŭtawa namugagŭ na tama yema ngutaquēxechicagu naxŭcuxŭcēx. ³² Rŭ yoxni ga duŭxŭgŭ ga yema ínangutaquēxegŭxŭwa, rŭ nŭmaxŭ rŭ wŭxi ga oremaā aita naxŭe, rŭ togŭ ga to ga oremaā aita naxŭe. Yerŭ poraācŭ nanaxixāchiāēgŭ ga guxŭma ga yema duŭxŭgŭ ga yēma ngutaquēxegŭxŭ. ³³ Natŭrŭ yēma nayexma ga wŭxi ga Yudíu ga Areyáŭdrugu āegaxŭ. Rŭ yema togŭ ga Yudíugŭ rŭ namaā nŭxŭ nixu ga ŭacŭcēx na nangutaquēxexŭ. Rŭ duŭxŭgŭpēxewa nanamugŭ na yadexaxŭcēx rŭ naetŭwa nachogŭxŭcēx ga yema Yudíugŭ ga yēma yexmagŭxŭ. Rŭ nŭma ga Areyáŭdru rŭ naxunagŭmēxē na iyanachianegŭxŭcēx ga duŭxŭgŭ, na namaā yadexaxŭcēx. ³⁴ Natŭrŭ yexguma nŭxŭ yacuēxāchitanŭgu ga Aré rŭ Yudíu na yíixŭ, rŭ guxŭma ga yema duŭxŭgŭ rŭ wŭxigu tagaācŭ aita naxŭe. Rŭ taxre ga ora ninge ga na tagaācŭ ñagŭxŭ: —¡Namaxŭ i Epéchiucŭāxgŭarŭ tupana i Atemícha! —ñagŭxŭ. ³⁵ Rŭ dŭxwa yema íāneārŭ āēxgacŭ nanachiāchixēē ga yema muxŭma ga duŭxŭgŭ, rŭ ñanagŭrŭ nŭxŭ: —Pa Epéchiucŭāxgŭx, guxŭma i duŭxŭgŭ nŭxŭ nacuēx na Atemíchaarŭ tupauca ya taxŭneārŭ dauruŭ na ixīgŭxŭ. Rŭ guxŭma nŭxŭ nacuēx na nŭma tŭxŭ nangēxmaxŭ i Atemíchachicŭnēxā i daxŭwa rŭnguxŭ. ³⁶ —Rŭ ñuxma na guxŭma nŭxŭ na cuáxŭ na aixcŭma yíixŭ i ngēma, rŭ name nixŭ na pechiāchixŭ, rŭ taxuŭma i chixexŭ pexŭexŭ. ³⁷ —Erŭ ñāā yatŭgŭ i nuā pegagŭxŭ, rŭ taxuŭma i chixexŭ ngímaā naxŭgŭ i tŭrŭ tupana, rŭ tama chixexŭ nixugŭe ngŭchigagu. ³⁸ —Rŭ ngēxguma chi Demétriu rŭ ngēma namŭcŭgŭ i namaā napuracŭexŭ rŭ nŭxŭ nangēxmagu i ŭacŭ i tama norŭ me ixŭxŭ, rŭ nangēxma i ngutaquēxechicagŭ i ngextá āēxgacŭgŭ duŭxŭgŭxŭ íicagŭxŭwa. Rŭ name nixŭ na ngema āēxgacŭgŭpēxewa namexēēaxŭ i ŭacŭ i tama norŭ me ixŭxŭ. ³⁹ —Rŭ ngēxguma nangēxmagu i ŭacŭ i to i perŭ guxchaxŭgŭ, rŭ name nixŭ i íāneārŭ āēxgacŭgŭarŭ ngutaquēxewa penamexēē i ngēma. ⁴⁰ —Erŭ ñuxma rŭ taxāŭcŭmaxŭgugŭ rŭ ngŭrŭāchi āēxgacŭ ya tacŭ ya Dumawa ngēxmacŭ rŭ tŭxna tá naxcēx naca i ngēma ñuxma ngupetŭxŭ. Erŭ aixcŭma taxumaāma tanangāxŭega i āēxgacŭ, ega tŭxna nacaxgu naxcēx i ñāā ngutaquēxe i nawa pexāŭgatanŭxŭ —ñanagŭrŭ. ⁴¹ Rŭ yexguma marŭ yema ñaxguwena, rŭ ínayamugŭ ga yema duŭxŭgŭ.

20

Machedóniāñewa rŭ Griégugŭchiŭñewa naxŭ ga Pauru

¹ Rŭ yexguma marŭ nangupetŭgu ga yema na íyacuxcuxŭ ga duŭxŭgŭ, rŭ Pauru naxcēx nangema ga yema yaxŭgŭxŭ na yaxucuxēgŭāxŭcēx. Rŭ yexguma marŭ namaā nŭxŭ nachaugu, rŭ nŭxŭ narŭmoxē, rŭ inaxŭāchi ga Machedóniāñewa na naxŭxŭ. ² Rŭ yexguma yema naāñewa yaxŭpetŭgu, rŭ taāēxŭ ga oremaā nayaxucuxēgŭ ga yema yaxŭgŭxŭ ga wŭxichigŭ ga íāñewa yexmagŭxŭ. Rŭ yemaācŭ Griégugŭchiŭñewa nangu. ³ Rŭ yēma nayexma ga tomaēxpŭx ga tauemacŭ. Rŭ yexguma marŭ inaxŭāchichaŭgu ga Chíríaanewa na naxŭxŭ, rŭ tama wapurugu nixŭ yerŭ nŭxŭ nacuāchiga ga na ñuxre ga Yudíugŭ yamēxgŭchaŭxŭ. Rŭ yemacēx nagu narŭxŭnŭ ga dauxchitagu na nataeguxŭ, rŭ wenaxŭrŭ Machedóniāñewa na naxŭpetŭxŭ. ⁴ Rŭ ínayaxŭmŭcŭgŭ ga Chópate ga Beréacŭāx ga Píru nane, rŭ Aritárcu rŭ Segŭdu ga Techarónicacŭāxgŭ,

rū Gayu ga Derbecūāx, rū Timutéu, rū Tíquicu, rū Turuquínu ga Áchiaanecūāxgū. ⁵ Rū yema yatügū rū nūxīra topēxegu naxāgū, rū Tróawa toxū nayarūnguxēēgū. ⁶ Rū nawena ga yema Yudíugūarū peta ga ūpetūchiga ga pāū ga ngearū puxēēruūāxū nagu nangōxgūxū, rū wapurugu Piripuga itaxīāchi. Rū wūximēēxpūx ga ngunexū ngupetūgu, rū Tróagu nūxū tayangaugū ga yema topēxegu āgūxū. Rū yexma tarūcho ga 7 ga ngunexū.

Tróagu nanaxūāne ga Pauru

⁷ Rū yema yūxūarū ngunexūgu rū tangutaquēxegū namaā ga yema yaxōgūxū na tanangōxūcēx ga pāū ga būcuxū yema Ngechuchu toxū ngūxēēxūrū. Rū yema yaxōgūxūmaā nidexa ga Pauru. Rū nanamēxēē ga norū dexa űuxmata ngāxūcūwa nangu, yerū moxūācū inaxūāchichaū. ⁸⁻⁹ Rū daxūwa ga guma ĩpataarū tomaēxpūxchiūwa yexmaxū ga ucapuwa tangutaquēxegū. Rū namu ga omū ga yema naīgūxū. Rū nayexma ga wūxi ga ngextūxūcū ga Eutícugu āegacū. Rū yéma wūxi ga yema ucaputapūxarū ĩāxwa narūto. Natūrū ga Pauruarū dexa, rū poraācū namēx. Rū yemacēx ga guma ngextūxūcū rū poraācū nayaxta, rū dūxwa nipeāchi rū yema ĩāxwa narūngu, rū űaxtūanegu nangu. Rū yéma yucūma nanayauxgū. ¹⁰ Rū inarūxī ga Pauru, rū nayanawūxūchi ga guma ngextūxūcū, rū duūxūgūxū űanagūrū: —ĪTāxū i peĵaixāchiexū, erū namaxū nixī! —űanagūrū. ¹¹ Rū yexguma wenaxārū daxū naxī, rū inanabūcu ga yema pāū, rū nanangōx. Rū wenaxārū nidexa űuxmata yangune, rū yexguma inaxūāchi. ¹² Rū guma ngextūxūcū rū maxūcū napatawa nanagagū. Rū yemacēx poraācū nataāēgū ga guxūma ga nūmagū.

Tróawa inaxūāchi ga Pauru rū Miretuwa naxū

¹³ Rū yexguma ga Pauru rū űanagūrū: —Dauxchitagu tá chixū űuxmatáta ĩāne ya Achuwa changu na ngema pexū chixūexūcēx — űanagūrū. Rū yemacēx ga toma rū wapurugu tichoū rū yoxni napēxegu taxī űuxmata Achuwa tangugū. ¹⁴ Rū yexguma Achugu Paurumaā togū tayangauxgu, rū yéma toxū nixūe. Rū tachopetū ga yéma űuxmata Miterénewa tangugū. ¹⁵ Rū yéma itaxīāchi rū moxūācū Quíuarū toxmētawa tachopetū. Rū yemaārū moxūācū Chamowa tangugū. Rū yemaārū moxūācūama Miretuwa tangugū. ¹⁶ Rū yemaācū ĩtixī yerū ga Pauru rū tama Áchiaanegu nanuxcūchaū. Yerū nanaxwēxe ga paxa Yerucharēūwa na nanguxū naxcēx ga Pētecōstearū ngunexū. Rū yemacēx nagu narūxinū na tama Epéchiugu ĩyadauxū.

Yaxōgūxūārū āēxgacūgū ga Epéchiucūāxmaā nidexa ga Pauru

¹⁷ Natūrū yexguma Miretuwa tangugūgu rū Epéchiuwa naxcēx namuga ga Pauru na naxūtawa naxīxūcēx ga yema yaxōgūxūārū āēxgacūgū ga Epéchiucūāx. ¹⁸ Rū yexguma Pauruxūtawa nangugūgu, rū űanagūrū nūxū: —Pema meā nūxū pecuēxgū ga űuxācū pepēxewa na chamaxūxū ga guxūgu ga yexguma noxritama nuā Áchiaanewa chaxūxgu. ¹⁹ Rū guxūguma ga yexguma petanūwa chayexmagu, rū meāma chanaxū ga Cori ya Tupanaārū puracū, taguma chaugū chicuēxūūācūma. Rū woo muēxpūxcūna poraācū changechaūgu, nagagu ga yema chixexū ga chomaā naxūgūchaūxū ga Yudíugū, natūrū naetūwa chanaxūama ga yema puracū. ²⁰ Rū taguma íchayachaxāchi ga pemaā nūxū na

chixuxü ga guxüma ga yema ore ga perü mexüçex ixixü. Rü guxü ga duüxügüpëxewa, rü pepatagüwa rü ta pexü changüexëe ga yema ore. ²¹ Rü Yudiugümaã rü yema tama Yudiugü ixigüxümaã nüxü chixu na namexü ga na nüxü naxoexüçex ga norü chixexügü rü Tupanaga naxinüexüçex, rü nüxü na yaxögüäxüçex ga törü Cori ya Ngechuchu. ²² Rü ñuxma rü Yerucharëüwa chaxü erü Tupanaãe i Üünexü rü ngema choxü namu. Natürü tama nüxü chacuèx na tacü tá choxü üpetüxü i ngema. ²³ Rü ngëma nüxü chacuáxü nixi i duüxügü tá choxü napoxcu rü guxchaxügü tá choxü naxüpetü i Yerucharëüwa. Rü ngëxicatama nixi i chomaã nüxü yaxuxü i Tupanaãe i Üünexü i guxüne ya ñãne i ngextá íchixügüxüwa. ²⁴ Natürü tama ngëma äücümáxügu charüxünü erü nüçetama nixi ega woo chayuxgu. Natürü ngëma chanaxwëxexü nixi na taãëäcüma chapuracüamaxü na meã chayanguxëëxüçex i ngëma puracü ga törü Cori ya Ngechuchu choxna äxü rü nüxü chixuxüçex i norü ore i mexü na ñuxäcü Tupana tüxü ngechaüxü. ²⁵ Rü ñuxma rü marü nüxü chacuèx rü tagutáma wena choxü pedaügü i pema ga marü pemaã nüxü chixuxe na ñuxäcü äëxgacü na yiixü ya Tupana. ²⁶ Rü ngëmacëx i ñoma i ngunexügu rü pemaã nüxü chixu rü marü tama chaugagu nixi ega texé petanüwa iyarütauxgu. ²⁷ Erü marü meãma pemaã nüxü chixu i guxüma i ngëma Tupana pexü naxwëxexü, rü taxüma ichicux. ²⁸ Rü ngëmacëx i ñuxma rü penaxwëxe na pexuäëgüxü rü meã nüxna pedaügüxü i guxüma i yaxögüxü i petanüwa ngëxmagüxü. Erü ngëma nixi i Tupanaãxë i Üünexü nagu pexü mugüxü na nüxna pedaügüxüçex i ngëma Tupanaãrü duüxügü i yaxögüxü i Ngechuchu nagümaãtama naxcëx taxexü. ²⁹ Choma nüxü chacuèx rü ngëxguma íchixüxgu, rü chowena tá pexcëx nuã naxi i togü i duüxügü. Rü tá nanachixexëëchaü i ngëma yaxögüxü ñoma airugü i idüraexü i carnerugüxü ngiächixëëxürü. ³⁰ Rü woo petanüwatátama nangëxmagü i nümaxü i tá doramaremaã nangüexëëxü i ngëma yaxögüxü na nügüwe naxiëëäxüçex. ³¹ ¡Pegüna pedaügü, rü nüxna pecuëxächie na ñuxäcü tomaëxpüx ga tauncügu rü ngunecü rü chütacü rü taguma íchayachaxächixü ga pexcëx chaxauxäcüma na pexü chixucuxëgüxü ga wüxichigü! ³² Rü ñuxmax, Pa Chaueneëgüx, rü Tupanana pexü chamugü. Rü chanaxwëxe i naga pexinüë i norü ore i tüxü nüxü cuëxëëxü na ñuxäcü poraäcü tüxü nangechaüxü. Erü ngëma norü ore tá pexü naporaxëë na törü Coricëx pemaxëüçex rü pexü nangëxmaxüçex i pechica namaã i guxüma i duüxügü i Tupana dexü. ³³ Choma rü taxuguma chaügüçex chanaxwëxe ga texëarü díeru rü texëchiru. ³⁴ Rü pematama rü meã nüxü pecuèx ga ñuxäcü daa choxmëxmaã na chapuracüxü naxcëx ga yema choxü rü chomüçügüaxü taxuxü. ³⁵ Rü guxüguma meã pexü changüexëe na ngëmaäcü pepuracüexü na nüxü perüngüxëëxüçex i ngëma duüxügü i nüxü nataxuxü. Rü name nixi na nüxna pecuëxächixü i Cori ya Ngechucharü ore ga nümatama ñaxü:

“Rü narümemaë nixi i pema na toguena penaxäxü rü tama i tüma pexna tanaxäxü”, ñaxü. ³⁶ Rü yexguma yema ñaxguwena ga Pauru, rü inacaxäpüxü namaã ga guxüma, rü nayumüxë. ³⁷ Rü guxüma poraäcü naxauxe, rü Pauruna nanëixächigü, rü nüxü nachüxgü. ³⁸ Yerü poraäcü nangechaüë naxcëx ga yema ore ga namaã nüxü yaxuxü ga:

“Marü tagutáma wena choxü pedaügü” ñaxü. Rü nümagü ínayaxümücügü ñuxmata wapuruwa nangu.

21

Yerucharéŭwa naxū ga Pauru

¹ Rū yexguma nūxna itaxīāchi ga yema yaxōgūxū, rū wapurugu tichoŭ. Rū capaxū ga Coscèx noxtacūma tixaŭ. Rū moxūācū rū Rodawa taxī. Rū yéma itaxīāchi, rū Pátarawa tangugū. ² Rū yexma nūxū tayangau ga wūxi ga wapuru ga Peníchiawa ūxūne. Rū nagu tichoŭ, rū itaxīāchi. ³ Rū yixcamaxūra nūxū tadaugū ga Chipre. Rū torū ŭoxwecūwawaama naxū, rū nūxū tachopetū. Rū itīñaxwetaxū ñuxmata Chíríaanewa tangugū. Rū Tiruwa ítachoŭ, yerū yéma nixī ga ínanuŭācuxū ga guma wapuru. ⁴ Rū yexma nūxū tayangau ga yemacŭāx ga yaxōgūxū, rū 7 ga ngunexū yéma natanūwa tayexmagū. Rū Tupanaāē i Ūñexū nayadexagūxēē ga yema yaxōgūxū, rū Pauruxū ñanagūrūgū: —¡Tāxū i Yerucharéŭwa cuxūxū! —ñanagūrūgū. ⁵ Natūrū yexguma nangupetūgu ga yema 7 ga ngunexūgū, rū itaxīāchi. Rū yema yaxōgūxū rū towe narūxī. Rū naxmèxmaāchigū rū naxācūgūmaāchigū toxū ínixūmūcūgū ga guxūma ñuxmata guma íānechipenūwa tangugū. Rū yexma naxnūcūgu tacaxgūāpūxū, rū tayumūxēgū. ⁶ Rū yexguma ga toma rū nūxū tarūmoxēgū, rū tichoŭ ga wapuruwa. Rū nūmagū rū napatacèx nawoegu. ⁷ Rū toma rū Tiruwa itaxīāchi rū Turemáidawa tangugū. Rū yéma ítachoŭ, yerū yexma nayacuèx ga wapurugu na taxīxū. Rū nūxū tarūmoxēgū ga yema yaxōgūxū ga yéma yexmagūxū, rū wūxi ga ngunexū natanūgu tarūcho. ⁸ Rū moxūācū itaxīāchi ga yéma, rū Checharéawa tangugū. Rū Piripi ga Tupanaārū orearū uruŭpatawa taxī. Rū nūma rū yema 7 ga ngūxēruŭgū ga tupaucana daugūxūtanūxū nixī. Rū yexma naxūtagu tpegū. ⁹ Rū nūma nūxū iyexma ga āgūmūcū ga naxācūgū ga taguma íxātecū ga Tupanaārū orexū ixugūecū. ¹⁰ Rū yexguma marū ñuxre ga ngunexū yéma tayexmagūgu, rū Yudéaanewa ne naxū ga wūxi ga Tupanaārū orearū uruŭ ga Agabugu āegaxū. ¹¹ Rū yexguma toxūtawa nanguxgu ga Agabu, rū nanayaxu ga Pauruarū goyexū. Rū namaā nūgū ninēixgūcutū, rū nūgū nináímēx, rū ñanagūrū: —Tupanaāē i Ūñexū marū chomaā nidexa rū ñanagūrū:

“Rū ñaācū tá nayanēixgū i Yudíugū i Yerucharéŭwa i ñaā goyexūārū yora. Rū ngēma duŭxūgū i tama Yudíugū íxīgūxūna tá nanamugū”, ñanagūrū. ¹² Rū yexguma yema orexū taxīnūēgu, rū toma rū yema Checharéacŭāxgūmaā Pauruxū tacèèxūgū ga tama Yerucharéŭwa na naxūxūcèx. ¹³ Natūrū nūma ga Pauru rū toxū nangāxū rū ñanagūrū: —¿Tūxcūŭ pexauxe rū choxū pengechaŭxēē? Choma rū íchamemare na chináixū. Rū ngēxgumarūŭ ta rū marū íchame na Yerucharéŭgu chayuxū naxcèx ya Cori ya Ngechuchu —ñanagūrū. ¹⁴ Rū yexguma marū taxuacūma tanachuxugu, rū tachianemare, rū ñatarūgū: —¡Ēcū yangu i Cori ya Tupanaārū ngúchaŭ! —ñatarūgū. ¹⁵ Rū yemawena rū togū tamexēēgū, rū Yerucharéŭwa taxī. ¹⁶ Rū towe narūxī ga ñuxre ga yaxōgūxū ga Checharéacŭāxgū, rū Machōŭpatawa toxū nagagū. Rū nūma nixī ga wūxi ga Chíperecŭāx ga ŭpamama woetama yaxōxū. Rū naxūtagu tpegūxū.

Chaŭtiáguxūtagu nanaxūāne ga Pauru

¹⁷ Rū yexguma Yerucharéŭwa tangugūgu, rū yema yaxōgūxū rū taāēācūma toxū nayauxgū. ¹⁸ Rū moxūācū ga Pauru rū tomaā Chaŭtiáguxūtagu nanaxūāne. Rū yéma nangutaquēxegū ga guxūma ga

yaxögüxüärü äëxgacügü. ¹⁹ Rü nüxü narümoxë ga Pauru, rü ñuxüchi meäma namaã nüxü nixu ga guxüma ga yema Tupana üxü ga yexguma yema tama Yudíugü ixíguxümaã nüxü yaxuxgu ga Tupanaärü ore. ²⁰ Rü yexguma Pauruarü orexü naxínüëgu ga nümagü, rü Tupanaxü nicuëxüügü. Rü ñanagürügü Pauruxü: —Dücëx, Pa Toeneëx, cuma nüxü cucuëx rü nangëxma i muxüchixü i Yudíugü i yaxögüxü. Rü guxüma i nümagü rü nanaxwëxegü na nagu naxíxü i ngëma mugü ga Moíché ümatüxü. ²¹ Natürü ga togü ga tama yaxögüxü rü marü namaã nüxü nixugügü na cuma rü cunangüexëëxü i guxüma i Yudíugü i togü i nachíüänewa ngëxmagüxü, na tama naga naxínüëxücëx i ngëma mugü ga Moíché ümatüxü. Rü marü namaã nüxü nixugügü na cunangüexëëxü na tama tüxü ínawiüchëxmüpëxechiraüxüçëx ya nanegü, rü na tama naga naxínüëxüçëx i tacümagü ga Moíché tüxü muxü. ²² ¿Tacü tá ixüexü i ñuxmax? Erü ngëma Yudíugü i yaxögüxü rü aixcüma tá nüxü nacüëxgü na marü nuã cunguxü. ²³ ¡Rü ngëmacëx name nixí na cunaxüxü i ngëma tá cumaã nüxü tixuxü! Nuã totanüwa nangëxma i ägümücü i yatügü i yanguxëëchaüxü i wüxi i uneta i Tupanamaã nüxü yaxuxü. ²⁴ ¡Ngema tupauca ya taxünewa nagagü, rü wüxigu namaã yanguxëë i ngëma tacüma ga Moíché tüxna äxü, rü Tupanapëxewa pegü peyamexëëgü! ¡Rü nüxü naxütanü i ñuxregu nüxü naxätanü na yadüpüxüerugüxüçëx i ngëma yatügü na ngëmaäcü yanguxëëgüäxüçëx i norü unetagü! Rü ngëmawa rü guxüma i ngëma Yudíugü rü tá nüxü nacüëxgü na aixcüma cuma rü ta naga cuxínüxüxü i ngëma mugü ga Moíché ümatüxü rü tama aixcüma na yíxü ga yema ore ga cuchiga ga nüxü yaxugüexü. ²⁵ Rü ñuxüchi ngëma yaxögüxü i tama Yudíugü ixíguxü, rü marü naxcëx tanaxümatü ga torü ore na tama nangöxgüäxüçëx i tacü i namachi i marü togü norü tupananetachicünëxägüxü namaã icuëxüügüxü, rü tama na nangöxgüäxüçëx ya nagü, rü tama nangöxgüäxüçëx i naëxügü rü ëxna naxünagü i wëxnaäxü, rü tama naí i ngemaã rü ëxna naí ya yatümaã inapëxüçëx —ñanagürügü.

Tupauca ga taxünewa Pauruxü niyaxgü

²⁶ Rü yexguma ga Pauru rü yëma tupauca ga taxünewa nanagagü ga yema ägümücü ga yatügü. Rü moxüäcü rü Tupanapëxewa nügü namexëë ga Pauru wüxigu namaã ga yema yatügü. Rü ñuxüchi guma tupauca ga taxünewa namaã naxücu na paimaã nüxü yaxuxüçëx na 7 ga ngunexügu tá yíxü na yanguxëëgüäxü ga yema norü uneta ga Tupanamaã nüxü yaxugüxü, rü yemawena rü tá na inaxámaregüäxü ga norü ámaregü ga Tupanaxü namaã yacuëxüügüxü ga wüxichigü. ²⁷ Rü yexguma marü nagüxchaügu ga yema 7 ga ngunexü, rü ñuxre ga Yudíugü ga Áchiaanecüäxgü rü Pauruxü nadaugü ga tupauca ga taxünewa. Rü yema Yudíugü rü duüxügüxü nanuëxëë na Pauruxü yayauxgüxüçëx. Rü yemacëx Pauruna nayuxgü. ²⁸ Rü tagaäcü aita naxüë ñaxümaã: — Pa Tomücügü Pa Yudíugüx, ¡Paxa toxü perüngüxëëx! Ñaã nixí i ngëma yatü i guxüwama yangüexëëchigüxü i duüxügü na taxchi naxaieüçëx i yixema i Yudíugü, rü naxchi na naxaieüçëx i ngëma mugü ga Moíché ümatüxü rü daa tupauca ya taxünewa. Rü naetüwa i ñuxmax rü nuxa daa tupauca ya taxünewa nanamucu i ñuxre i duüxügü i tama tacümagu íxü, rü ngëmaäcü nanaxüxaxëë i ñaã nachica i üünexü —ñanagürügü. ²⁹ Rü yema ñanagürügü yerü üpaacü Yerucharëüwa Paurumaã nüxü

nadaugū ga Turuquínu ga wūxi ga Epéchiucūāx ga tama Yudíu ixīxū. Rū nūxū nacuēxgūgu rū Pauru marū yexma nanaxūcuxēē ga tupaucā ga taxūnegu. ³⁰ Rū guxūma ga yema ĩānecūāxgū rū porācū nanuē. Rū tupaucā ga taxūnecēx nibuxmū, rū Pauruxū niyaxūgū, rū tupaucāarū ĩāxtūwa nanatūchigūgū. Rū yexguma paxa nanawāxtagū ga guma tupaucā ga taxūnēārū ĩāxgū. ³¹ Rū yexguma Pauruxū yamēxgūchaūgu ga duūxūgū, rū Dumacūāx ga churaragūarū āēxgacūxūtawa nanguchiga ga ore na guxūwama ga Yerucharēūwa rū na nanuēxū ga duūxūgū. ³² Rū yexgumatama ga guma churaragūarū āēxgacū rū nanangutaquēxexēē ga yema norū capitāūgū namaā ga norū churaragū, rū paxa yema duūxūgū ĩyexmagūxūwa naxī. Rū yexguma guma āēxgacūxū rū yema churaragūxū nadaugūgu ga duūxūgū, rū ĩnayachaxāchigū ga na Pauruxū yamēxgūxū. ³³ Rū yexguma ga guma āēxgacū rū Paurucēx nixū rū nayayaxu. Rū nanamu na taxre ga cadenamaā na yanēīxgūāxūcēx. Rū nūxna naca na texé yīīxū, rū tacū naxūxū. ³⁴ Natūrū yema muxūma ga duūxūgū rū toxica ga oremaā aita naxūe ga wūxichigū. Rū yexguma taxuacūma meā nūxū nacuēxgu ga tacūcēx na nanuēxū, rū guma āēxgacū rū nanamu na churaragūpatawa Pauruxū nagagūxū. ³⁵⁻³⁶ Rū yexguma churaragūpataarū toxōnewa nanguxgu ga Pauru, rū churaragū nayange-taūgū naxchaxwa ga yema muxūma ga duūxūgū, yerū nanuēxūchi rū nawe nicaetanū rū űanagūrūgū: —īYamēxūchi! —űanagūrūgū.

Pauru rū duūxūgūpēxewa nūgūētūwa nidexa

³⁷ Rū yexguma marū churaragūpatagu yamucuchigūchaūāgu rū Pauru rū Griégugawa guma āēxgacūna naca rū űanagūrū: —īCuxū namexū na cumaā nūxū chixuxū i wūxi i ore? —űanagūrū. Rū nūma ga āēxgacū nanangāxū rū űanagūrū: —Ēxna nūxū cucuēx na Griégugawa quidexaxū. ³⁸ īTama ēxna cuma yīīxū i Equitucūāx ga űpaxūra rū duūxūgūxū cunuēxēēxū na āēxgacūmaā nūgū nadēīxūcēx rū daux-chitawa ga taxūema ĩxāpataxūwa cunagagūxū ga 4000 ga yatūgū ga máētaxūgū? —űanagūrū. ³⁹ Rū yexguma ga Pauru rū nanangāxū, rū űanagūrū: —Choma rū Yudíu chixī, rū Tarsucūāx chixī. Rū Chiríchiaanewa rū yima nixī ya wūxi ya ĩāne ya taxūchine. Rū ngēxguma curū me yixīgu, rū cuxna chaca na duūxūgūmaā chidexaxūcēx —űanagūrū. ⁴⁰ Rū yexguma ga guma āēxgacū rū: —Ngū —űanagūrū. Rū nūma ga Pauru, rū churaragūpataarū toxōnegu nachinagū, rū naxunagūmēxē na nachīāchixūcēx ga duūxūgū. Rū yexguma nachīāchiegu, rū Yudíugawa nidexa, rū űanagūrū nūxū:

22

¹ —Pa Chautanūxūgūx, ĩrū choxū ĩperūxīnūē i ngēma űuxma tá pemaā nūxū chixuxū na chaugūētūwa chidexaxūcēx! —űanagūrū. ² Rū yexguma nūxū naxīnūēgu ga na Yudíugawa namaā yadexaxū, rū yex-eraācū inayarūchianegū. Rū yexguma namaā yadexagu ga Pauru, rū űanagūrū: ³ —Choma rū Yudíu chixī, rū Chiríchiaaneārū ĩāne ga Tarsugu chabu. Natūrū doma ĩāne ya Yerucharēūwa chaya, rū Gamaniēu nixī ga chorū nguxēēruū. Rū meāma nawa changux ga guxūma ga mugū ga nuxcūmaūgūxū ga tórū oxīgū nagu ĩxū. Rū guxūguma naxcēx chadau na guxūma i chorū ngūchaūmaā Tupanaāxū chapuracūxū, ngēxgumarūū i guxāma i pema i űuxmax. ⁴ —Rū choma ga űpa rū porācū nawe chīngēchigū ga yema Ngechuchuaxū yaxōgūxū na chanadēīxūcēx. Rū

íchanayauxŭ, rŭ chanapoxcue ga muxŭma ga yema yaxōgŭxŭ ga yatŭxŭgŭ rŭ ngexŭgŭ. ⁵—Rŭ nŭma ya paigŭeru rŭ guxŭma i tupauca ya taxŭneārŭ āēxgacŭgŭerugŭ rŭ nŭxŭ nacuēxgŭ na aixcŭma yīxŭ i űnā chorŭ ore. Yerŭ nŭmagŭ rŭ choxna nanaxāgŭ ga popera na choxŭ nangŭxēēgŭxŭcēx ga tatanŭxŭgŭ ga Yudíugŭ ga Damacuwa yexmagŭxŭ. Rŭ yéma Damacuwa chaxŭ na naxcēx chayadauxŭ-cēx ga yema Ngechuchuaxŭ yaxōgŭxŭ, rŭ nuā Yerucharéŭwa na chanagagŭxŭcēx rŭ nuxā chayapoxcuexŭcēx.

Pauru nŭxŭ nixu na űnuxācŭ Ngechuchuaxŭ yaxōōxŭ

⁶—Natŭrŭ yexguma namagu chixŭyane rŭ marŭ chingaicaxgu ga Damacuwa na changuxŭ, rŭ meāma tocuchigu nixŭ ga yexguma. Rŭ ngŭrŭāchi wŭxi ga omŭ ga poraxŭ ga daxŭwa ne baxixŭ rŭ choxŭ nabaxi. ⁷—Rŭ űnaxtŭanegu chayangu, rŭ nŭxŭ chaxŭnŭ ga wŭxi ga naga ga űnaxŭ choxŭ:

“Pa Chaurux, űtŭxcŭi i chowe quingēchigŭxŭ?” űnaxŭ. ⁸—Rŭ yexguma ga choma rŭ chanangāxŭ, rŭ űnaxarŭgŭ:

“űRŭ texé quixŭ Pa Corix?” űnaxarŭgŭ. Rŭ nŭma ga yema naga rŭ choxŭ nangāxŭ, rŭ űnaxarŭrŭ:

“Choma nixŭ i Ngechuchu ya Nacharētucŭāx, rŭ chorŭ duŭxŭgŭ nixŭ i ngēma nawe quingēchigŭxŭ”, űnaxarŭrŭ choxŭ. ⁹—Rŭ yema chomŭcŭgŭ rŭ nŭxŭ nadaugŭ ga yema omŭ, rŭ naŭaixāchiāēgŭ, natŭrŭ tama nŭxŭ naxŭnŭē ga yema naga ga chomaā idexaxŭ. ¹⁰—Rŭ nŭxna chaca, rŭ űnaxarŭgŭ ga chomax:

“űRŭ űacŭ tá chaxŭxŭ, Pa Corix?” űnaxarŭgŭ. Rŭ yexguma űnaxarŭrŭ choxŭ ga Cori:

“űŭrŭda, rŭ inachi, rŭ Damacuwa naxŭ, rŭ ngema tá cumaā nŭxŭ nixu ya wŭxi ya yatŭ na űacŭ tá cuxŭxŭ!” űnaxarŭrŭ ga nŭma ga Cori. ¹¹—Rŭ yexguma ga choma rŭ chixoxetŭ yema omŭēmamaā, rŭ yemacēx ga yema chomŭcŭgŭ rŭ choxmēxgu yangŭgŭācŭma choxŭ nigagŭ, rŭ yemaācŭ Damacuwa changu. ¹²—Rŭ yéma nayexma ga wŭxi ga yatŭ ga Ananīagu āegacŭ. Rŭ nŭma nixŭ ga wŭxi ga yatŭ ga aixcŭma Tupanaga űnŭcŭ, rŭ nŭma rŭ meāma nayanguxēē ga yema mugŭ ga Moíché űmatŭxŭ. Rŭ guxŭma ga Yudíugŭ ga Damacuwa yexmagŭxŭ, rŭ meā nachiga nidexagŭ. ¹³—Rŭ nŭma ga Ananīā rŭ choxŭ űnayadau. Rŭ yexguma chauxŭtawa nanguxgu rŭ űnaxarŭrŭ choxŭ:

“Pa Chaueneē Pa Chaurux, űwenaxārŭ ingoxnaxētŭ!” űnaxarŭrŭ. Rŭ yexgumatama wenaxārŭ chingoxnaxētŭ rŭ meāma nŭxŭ chadau. ¹⁴—Rŭ yexguma űnaxarŭrŭ ta:

“Yima Tupana ya nuxcŭmaŭgŭxŭ ga tŭrŭ oxigŭarŭ Tupana cuxŭ nax-uneta na nŭxŭ cucuāxŭcēx i norŭ ngŭchaŭ, rŭ na nŭxŭ cudauxŭcēx ya yima Cristu ya mecŭ, rŭ naāxwatama nŭxŭ cuxŭnŭxŭcēx i naga. ¹⁵—Erŭ cuma tá nixŭ i guxŭ i duŭxŭgŭmaā nŭxŭ quixuchigaxŭ ga űnuxācŭ na Tupanaxŭ cudauxŭ rŭ cumaā yadexaxŭ. ¹⁶—űRŭ űuxma rŭ marŭ taxuŭma ícunanguxēē! űRŭ ŭrŭda rŭ űnabaie! űRŭ Cori ya Ngechuchuēgagu naxcēx űnaca na cuxŭ nŭxŭ nangechaŭxŭcēx i curŭ pecadugŭ!” űnaxarŭrŭ choxŭ.

Pauru nŭxŭ nixu na űnuxācŭ Tupana namuxŭ na yema tama Yudíugŭ ixŭgŭxŭtanŭwa naxŭxŭcēx

17-18 —Rū yexguma Yerucharéŭcèx chataeguxgu, rū tupauca ga taxŭnewa chaxū na yéma chayumŭxèxècèx. Rū changoxetŭ, rū nŭxŭ chadau ga Cori ya Tupana. Rū ñanagŭrŭ choxŭ:

“¡Naxaxaãe, rū inaxŭãchi i nuã Yerucharéŭwa, erŭ duŭxŭgŭ rū tãŭtãma naga naxŭnŭe i ngẽma ore i chauchiga nŭxŭ quixuxŭ!” ñanagŭrŭ. ¹⁹—Rū choma chanangãxŭ, rū ñacharŭgŭ:

“Pa Corix, nŭma i duŭxŭgŭ rū nŭxŭ nacuèxgŭ ga choma na yŭŭxŭ ga guxŭne ga ngutaquèxepataŭgŭwa chaxŭxŭ rū íchanayauxŭxŭ rū chanapoxcuexŭ rū chayaçuaixgŭxŭ ga yema cuxŭ yaxŭgŭxŭ. ²⁰—Rū yexguma yamèxgŭãgu ga guma curŭ duŭcŭ ga Etébaŭ ga curŭ ore-arŭ uruŭ, rū chomatama yéma chayexma, rū chorŭ me nixŭ ga na yamèxgŭãxŭ. Rū choma nixŭ ga nŭxna chadauxŭ ga naxchiru ga yema yamèxgŭxŭ”, ñacharŭgŭ nŭxŭ. ²¹—Natŭrŭ nŭma ga Cori rū ñanagŭrŭ choxŭ:

“¡Rū paxa cugŭ namexèe rū inaxŭãchi! Erŭ yaxŭguxŭ i nachiŭãnegŭwa i ngẽma duŭxŭgŭ i tama Yudŭgŭ ixŭgŭxŭtanŭwa tá cuxŭ chamu” —ñanagŭrŭ.

Churaragŭarŭ ãèxgacŭmèxèwa nayexma ga Pauru

²² Rū yexguma Pauru yema ñaxgu rū yexma nayacuèxèègŭ ga na meã nŭxŭ inaxŭnŭèxŭ ga yema duŭxŭgŭ. Rū yexguma aita naxŭeãcŭma ñanagŭrŭgŭ: —¡Noxtacŭma peyamá! Rū name nixŭ i na nayuxŭ rū ngèxma na yanaxoxŭ —ñanagŭrŭgŭ. ²³ Rū yexguma aita naxŭegu, rū norŭ gáuxŭchirumaã nibuatanŭcŭŭ, rū átèxeanexŭ daxŭ niwogŭtanŭcŭŭ. ²⁴ Rū yexguma yemaxŭ nadèuxgu ga churaragŭarŭ ãèxgacŭ, rū nanamu ga churaragŭpatagu na yamucuchigŭãxŭcèx ga Pauru. Rū nanamu na poraãcŭ naçuaixgŭãxŭcèx na yadexaxŭcèx na nŭxŭ nacuãxŭcèx ga tŭxcŭŭ yŭŭxŭ na yemaãcŭ nachigamaã aita naxŭexŭ ga duŭxŭgŭ. ²⁵ Rū yexguma marŭ yanèixgŭãgu na naçuaixgŭãxŭcèx, rū Pauru nŭxna naca ga yema capitãŭ ga yéma yexmaxŭ, rū ñanagŭrŭ: —¿Éxna pexmèxwa nangèxma na penaçuaixŭ i wŭxi i Dumacŭãx ega tama nŭxna pecaxiragu? —ñanagŭrŭ. ²⁶ Rū yexguma yemaxŭ naxŭnŭgu ga capitãŭ, rū guma churaragŭarŭ ãèxgacŭxŭtawana naxŭ, rū namaã nŭxŭ nixu, rū ñanagŭrŭ: —¿Tacŭ tá cuxŭ? Erŭ ñaã yatŭ rū Dumacŭãx nixŭ —ñanagŭrŭ. ²⁷ Rū yexguma ga guma churaragŭarŭ ãèxgacŭ, rū Paurucèx nixŭ, rū nŭxna naca rū ñanagŭrŭ nŭxŭ: —¿Aixcŭma yŭŭxŭ na Dumacŭãx quiŭxŭ i cumax? —ñanagŭrŭ. Rū nŭma ga Pauru nanangãxŭ, rū: —Ngŭ —ñanagŭrŭ. ²⁸ Rū yexguma ga guma churaragŭarŭ ãèxgacŭ rū nanangãxŭ, rū ñanagŭrŭ: —Choma rū poraãcŭ choxŭ naxãtanŭ na Dumacŭãx chaugŭ chixŭxèèxŭ —ñanagŭrŭ. Rū yexguma nachonagŭ ga Pauru, rū ñanagŭrŭ: —Natŭrŭ i choma rū woetama chorŭ bucŭma Dumacŭãx chixŭ —ñanagŭrŭ. ²⁹ Rū yexgumatama nŭxna nixŭgachi ga yema Pauruxŭ çuaixgŭchaŭxŭ. Rū nŭmatama ga yema churaragŭarŭ ãèxgacŭ rū ta namuŭ ga yexguma nŭxŭ nacuèxgu ga Dumacŭãx na yŭŭxŭ ga Pauru, yerŭ marŭ cadenamaã nayanèixchirèx.

Yudŭgŭarŭ ãèxgacŭgŭtŭcumŭpèxewa nayexma ga Pauru

³⁰ Rū yema churaragŭarŭ ãèxgacŭ meãma nŭxŭ nacuãxchaŭ ga tŭxcŭŭ na ínaxuaxŭgŭãxŭ ga yema Yudŭgŭ. Rū yemacèx ga moxŭãcŭ rū nanamu na nangutaquèxegŭxŭcèx ga paigŭarŭ ãèxgacŭgŭ rū guxŭma ga yema

ãëxgacügütücumü ga Yudíugüarü. Rü nayawëgü ga Pauruarü cadena rü yéma ãëxgacügüpëxewa nanagagü.

23

¹ Rü Pauru meãma nüxü nadawenü ga yema ãëxgacügü, rü ñanagürü nüxü: —Pa Chautanüxügüx, chomatama nüxü chachuëx rü guxüguma meã chamaxü ga Tupanapëxewa ñuxmata ñoma i ngunexüwa nangu —ñanagürü. ² Rü yexguma ga yema paigüeru ga Ananiã rü nanamu ga yema Pauruarü ngaicamana yexmagüxü na naãxwa tayamëxgüxüçëx. ³ Rü yexguma ga Pauru rü ñanagürü nüxü: —Tupana tá cuxü napéax, Pa ãëxgacüx. Cuma rü düxétüwaxica cume natürü aixepena rü nachixe i curü maxü. Rü ñuxma rü ngema curüto na Moïché ümatüxü i mugü nüxü ixuxüãcüma choxna cuçaxüçëx. Natürü wüxi i chixexü cuxü erü cumatama rü tama naga cuxínü i ngëma Tupana tüxü erü cunamu na choxü napéaxüçëx —ñanagürü ga Pauru. ⁴ Rü yexguma ga yema yexmagüxü rü ñanagürügü: —¿Tüxcüü i ngëmaãcü tacü namaã quixugüxü i paigüeru ya Tupana nüxü unetacü? —ñanagürügü. ⁵ Rü Pauru nanangãxü, rü ñanagürü: —Tama nüxü chachuëx, Pa Chautanüxügüx, na paigüeru yíixü. Erü Tupanaãrü ore i ümatüxüwa nüxü tadau rü ñanagürü: “¡Tama curü ãëxgacümaã chixexü quixugü!”

ñanagürü. ⁶ Rü yexguma nüxü nacüëxgu ga Pauru ga na Chaduchéugü yíixü ga togü, rü na Parichéugü yíixü ga togü, rü yema ãëxgacügüpëxewa tagaãcüma ñanagürü: —Pa Chautanüxügüx, choma rü Parichéu chixí, rü Parichéu nane chixí. Rü ngëmacëx choxna pecagü i ñuxmax, erü chayaxõ i wena tá na namaxëxü i yuexü —ñanagürü. ⁷ Rü yexguma yema ñaxgu ga Pauru, rü yema Parichéugü rü Chaduchéugü rü inanaxügüe ga nügümaã na iyaporagaexü, rü yexma nügü nitoye ga yema ngutaquëxewa. ⁸ Erü ngëma Chaduchéugü nagu rüxínüëgu rü tama wena namaxë i ngëma yuexü, rü nataxuma i orearü ngeruügü i daxüçüãx, rü nataxuma i naãëgü —ñanagürügü. Natürü ngëma Parichéugü rü nayaxõgü na nangëxmaxü i guxüma i ngëma. ⁹ Rü yemacëx guxüma aita naxüe. Rü ñuxüchi ñuxre ga ngüexëëruügü ga Moïchëarü mugüwa nguxëëtaegüxü ga Parichéugütücumüwa ügüxü rü inachigü, rü ñanagürügü: —Toxcëx rü taxuüma i chixexü naxü i ñaã yatü. Bexmana wüxi i tacü rü naãë namaã nidexa rü ëxna wüxi i orearü ngeruü i daxüçüãx —ñanagürügü. ¹⁰ Rü yexeraãcü norü numaã nanaxixãchiãëgü ga yema duüxügü. Rü yemacëx naxoegaãë ga guma churaragüarü ãëxgacü ga na Paurugu nagaugügüchaüxü. Rü norü churaragüxü namu na yéma duüxügütanüwa Pauruxü napugüxüçëx rü wena churaragüpatawa na nagagüãxüçëx. ¹¹ Rü moxüãcüarü chütaxügu Paurucëx nangox ga Cori ga Tupana, rü ñanagürü nüxü: —¡Rü nataãë! Rü ngëxgumarüü i núma Yerucharéüwa choxü na quixuchigaxü, rü ngëxgumarüü tá ta nixí i Dumawa na choxü quixuchigaxü —ñanagürü ga Tupana.

Yudíugü naxcëx nadaugü na ñuxãcü Pauruxü yamëxgüchaüxü

¹² Rü moxüãcü, rü ñuxre ga Yudíugü rü nügümaã inaxunetagü ga tãütama na nachibüexü rü naxaxegüxü ñuxmatáta Pauruxü yamëxgü. Rü ñanagürügü: —Tachixexügügü tá ega tacü ingõxgügu naxüpa na yamáxü i Pauru —ñanagürügü. ¹³ Rü 40 arü yexera ga yatügü nixí ga yema nügümaã ixunetagüxü. ¹⁴ Rü paigüarü ãëxgacügütanüwa rü Yudíugüarü ãëxgacügügütanüwa naxí, rü ñanagürügü nüxü: —Marü

togūmaã itaxuneta rü tachixexŭgugü tá ega tacü tangõxgügu naxŭpa na tayamáxŭ i Pauru. ¹⁵ Rü name nixĩ i pema rü ngēma togü i pexrŭũ ãëxgacŭgütŭcumŭwa ŭgŭxŭ, rü churaragŭarŭ ãëxgacŭna naxcèx pey-acagŭ i ñuxma na moxŭ wena pepèxewa nagagŭãxŭcèx i Pauru. ¡Rü namaã nüxŭ pixu na penaxwèxegŭnetaxŭ na meã nüxŭ pecuáxchaŭxŭ i nachiga! Rü toma rü tá marŭ ítamemare na namagu tayamáxŭcèx naxŭpa na ínanguxŭ —ñanagŭrŭgŭ. ¹⁶ Natŭrŭ ngĩne ga Paurueyèx rü nüxŭ nacuáchiga ga Pauruxŭ na yamèxgŭchaŭxŭ, rü yemacèx churaragŭpatawa naxŭ na Paurumaã nüxŭ yanaxuxŭcèx. ¹⁷ Rü Pauru naxcèx naca ga wŭxi ga capitáŭ, rü ñanagŭrŭ nüxŭ: —¡Curŭ ãëxgacŭxŭtawa naga i ñaã ngextŭxŭxŭ, erŭ nüxŭ nangèxma i ore i namaã nüxŭ yaxuxchaŭxŭ! —ñanagŭrŭ. ¹⁸ Rü yema capitáŭ rü ãëxgacŭxŭtawa nanaga ga yema ngextŭxŭxŭ. Rü ñanagŭrŭ nüxŭ: —Ngēma poxcuxŭ i Pauru rü chauxcèx naca, rü choxna naca na nuã cuxŭtawa chanagaxŭcèx i ñaã ngextŭxŭxŭ, erŭ nüxŭ nangèxma i ore i cumaã nüxŭ yaxuxchaŭxŭ —ñanagŭrŭ. ¹⁹ Rü naxmèxgu yayauxãchiãcŭma toxnamana nanaga ga ãëxgacŭ, rü yéma nüxna naca rü ñanagŭrŭ: —¿Tacü yŭxŭ i ngēma chomaã nüxŭ quixuxchaŭxŭ? —ñanagŭrŭ. ²⁰ Rü nüma ga ngextŭxŭxŭ nanangãxŭ, rü ñanagŭrŭ: —Ngēma Yudíugŭ, rü nügŭmaã inaxunetagŭ na cuxna naxcèx nacagŭxŭcèx na moxŭ Yudíugŭarŭ ãëxgacŭgütŭcumŭpèxewa na cunagaxŭcèx i Pauru. Rü tá cumaã nüxŭ nixugŭ na meã nüxŭ nacuèxgŭchaŭxŭ i nachiga. ²¹ —¡Natŭrŭ táŭtáma nüxŭ cuyaxõ! Erŭ 40 arŭ yexera i yatŭgŭ rü marŭ nügŭmaã inaxunetagŭ, rü ñanagŭrŭgŭ:

“Tachixexŭgugü tá ega tacü ingõxgügu rü éxna ixaxegügu naxŭpa na yamáxŭ i Pauru”, ñanagŭrŭgŭ. Rü ñuxma rü marŭ ínamemare, rü namagu nananèixgŭ, rü curŭ orexícatama nixĩ i ñuxma ínanguxèëgŭxŭ —ñanagŭrŭ. ²² Rü yexguma ga ãëxgacŭ rü ínayamu ga yema ngextŭxŭxŭ, rü nüxna naxãga na taxúemaã nüxŭ yaxuxŭcèx ga na namaã nüxŭ yaxuxŭ ga yemachiga.

Ãëxgacŭ ga Perixŭtawa Pauruxŭ namu

²³ Rü yexguma ga guma ãëxgacŭ rü taxre ga norŭ capitáŭcèx naca, rü ñanagŭrŭ nüxŭ: —¡Penamexèë i 200 i churaragŭ i nacutŭmaãmare ixŭxŭ, rü 70 i churaragŭ i cowarutagu íxŭ, rü 200 i churaragŭ i wocaxemaã ixãnxexŭ na 9 arŭ oragu i chŭtacü Checharéawa naxŭxŭcèx! ²⁴ —¡Rü ngèxgumarŭŭ ta penamexèë i ñuxre i cowarugŭ i Paurucèx na tórŭ ãëxgacŭ i Perixŭtawa naxŭxŭcèx rü na taxuŭma nüxŭ ŭpetŭxŭcèx i namawa! —ñanagŭrŭ. ²⁵ Rü yema capitáŭgŭmaã yéma nanamu ga wŭxi ga popera ga ñaxŭ:

²⁶ “Choma i Cláudiu Díchiu, rü cuxŭ charŭmoxè Pa ãëxgacŭ ya Mecŭxŭchi Pa Perix. ²⁷ Rü yima yatŭ ya cuxcèx ngema chanamucŭ, rü Yudíugŭ nayayauxgŭ rü wixguxŭchi taèx nayamèxgŭ. Natŭrŭ yexguma nüxŭ chacuáchigagu na Dumacŭñax na yŭxŭ, rü yéma chaxŭ chorŭ churaragŭmaã, rü nüxna chanapu. ²⁸ Rü nüxŭ chacuáxchaŭ ga tacü ga chixexŭmaã na ínaxuaxŭgŭãxŭ, rü yemacèx Yudíugŭarŭ ãëxgacŭgütŭcumŭpèxewa chanaga. ²⁹ Rü yexguma nüxŭ chacuèx ga na Yudíugŭarŭ muchigacèxmare na ínaxuaxŭgŭãxŭ. Natŭrŭ taxuŭma ga chixexŭ naxŭ na tŭxçŭŭ yamáxŭcèx rü napoxcuxŭcèx. ³⁰ Natŭrŭ yexguma nüxŭ chacuáchigagu ga na nügŭmaã inaxunetaxŭ ga Yudíugŭ ga na

yamēxgūāxūcēx, rü yexgumatama nagu charūxīnū na cuxūtawa chanamuxū. Rü yema ínaxuaxūgūxū, rü namaā tá nūxū chixu na cuxūtawa naxīxū rü cumaā nūxū na yanaxugūxūcēx na tacūcēx ínaxuaxūgūāxū”,

ñanagürü. ³¹ Rü yema chūtaxūgu inaxīāchi ga yema churaragū, yexgumarūū ga norū āēxgacū na namuxürüū. Rü Pauruxū nigagū ñuxmata Aūtípatiwa nangugū. ³² Rü moxūācū rü nawoegu ga yema churaragū ga nacutūmaāmare íxīxū rü naxpataūwa naxī. Rü yema churaragū ga cowarutagu íxū, rü Paurumaā inaxīāma. ³³ Rü yexguma Checharéawa nangugūgu, rü āēxgacū ga Perina nanaxā ga yema popera, rü Pauruxū rü ta inamugū. ³⁴ Rü yexguma nūxū nadaumatūgu ga popera ga āēxgacū ga Peri, rü Pauruna naca ga ngextácūāx na yīxū. Rü yexguma nūxū nacuēxgu ga na Chiríchiaanecūāx yīxū, rü ñanagürü nūxū: ³⁵ —Cuxū tá icharūxīnū i ngēxguma ínangugūgu i ngēma cuxū íxuaxūgūxū —ñanagürü. Rü yexguma nanamu ga churaragū na wūxi ga ucapu ga āēxgacū ga Erodepatawa yexmaxūwa nūxna na nadaugūxūcēx.

24

Pauru rü āēxgacū ga Peripēxewa nūgūétūwa nidexa

¹ Rü wūximēēxpūx ga ngunexū ngupetūgu, rü Yerucharéūwa ne naxū ga paigüeru ga Ananíā, namaā ga ñuxre ga Yudíugūarū āēxgacūgüerugū rü wūxi ga yatū ga meāma dexaxū cuáxū ga Téturu ga naega. Rü nūmagū rü āēxgacū ga Perixūtawa naxī na namaā nūxū yanaxugūxūcēx ga tūxcūū Pauruxū na ínaxuaxūgūxū. ² Rü yexguma Pauruxū yéma nagagūgu, rü inanaxūgū ga Téturu ga nūxū na yaxuxū, rü ñanagürü:

—Moxēxūchima i cuma Pa Āēxgacū Pa Perix, erü cugagu nixī i meāma toxū naxūpetūxū i nuā. Rü cugagu nixī i nuā i ñoma i nachiūānewa na toxū nangēxmaxū i muxūma i mexūgū. ³ Rü moxē cuxna taxā erü guxūwama rü guxūguma cuxūtawa tanayauxgū i guxūma i ngēma mexūgū Pa Āēxgacūxūchima, Pa Perix. ⁴ Natürü tama yexeraācū cuxū chachixewechaū. Rü ngēmacēx cuxna chaca na paxaāchi meā toxū icurūxīnūxū. ⁵ Rü ñuxma rü wūxi i orexū cumaā chixuxchaū. Rü marū nūxū tadau i ñaā yatū rü wūxi i daaweanerūū na yīxū, erü chixexūmaā nayaxucuxēgū i Yudíugū i guxū i naānewa na nūgū yatoyexūcēx. Rü nūma nixī i norū āēxgacū i ngēma duūxūgū i nūxū yaxōgūxū i Ngechuchu i Nacharétucūāx. ⁶ Rü toma tayayauxgū i ñaā yatū ga yexguma tupauca ga taxūne naxūxaxēēchaūgu. Rü torū mugū tomaā nūxū íxuxūācūma nūxna tacagūchaū. ⁷ Natürü ínangu ga churaragūarū āēxgacū ga Díchiu, rü muxūma ga norū churaragūmaā toxna nanapu. Rü toma i ínaxuaxūgūxe, rü toxū namu na cuxūtawa taxīxūcēx. ⁸ Rü ñuxma rü marū name i cumatama nūxna cuca i ngēma Pauru na nūxū cucuáxūcēx na aixcūma yīxū i guxūma i ngēma naxcēx ítanaxuaxūgūxū i tomax —ñanagürü. ⁹ Rü yema togū ga Yudíugū rü ta, rü ñanagürügū: —Rü aixcūma nixī i ngēma ore —ñanagürügū. ¹⁰ Rü yexguma ga guma āēxgacū ga Peri rü naxmēxmaā Pauruxū naxuneta na yadexaxūcēx. Rü yexguma ga Pauru, rü ñanagürü: —Chorū taāēmaā cupēxewa chaugūcēx chidexa, erü nūxū chacuēx na mucūma ga taunecū ñoma i nachiūāneārū āēxgacū quiīxū. ¹¹ Marū name i cumatama naxcēx ícuca, erü 12 i ngunexūxīcatama nangupetū rü na Yerucharéūwa changuxū na Tupanaxū chayarūcuēxūxūcēx. ¹² Rü bai ga tupauca ga taxūnewa, rü bai ga ngutaquēxepataūgūwa, rü bai ga

ngürüanewamare ga iānewa choxū nadaugū ga Yudíugū ga na texémaā íchíporagacūxū, rü na chananuēxēxū ga duūxūgū. ¹³ Rü ñuxma i ñāā duūxūgū i choxū íxuaxūgūxū, rü bai i wūxiwaxūra cuxcē nanangoxēēgū na aixcūma yīxū i ngēma naxcēx choxū ínaxuaxūgūxū. ¹⁴ Natürü cumaā nüxū chixu, rü nuxcūmaūgūxū ga chorū oxígūarū Tupanaāxū nixī i chapuracūxū ngēxgumarūū i choxū na nanaxwēxexū ya Ngechuchu ya Cristu ya nüxū chayaxōcū. Rü ngēma nixī i nümagū i Yudíugū naxugūāgu rü na:

“Tomare i ore”, ñagūxū. Rü aixcūma nüxū chayaxō i guxūma i Tupanaārū mugū ga Moiché ūmatūxū rü guxūma i Tupanaārū ore ga nuxcūmaūgūxū ga norū orearū uruūgū ūmatūgūxū. ¹⁵ Rü choma rü ta yema nuxcūmaūgūxūrūū Tupanaāxū chayaxō. Rü naxrūū chayaxō rü tá wena na namaxēxū i ngēma yuexū i mexūgū rü chixexūgū. ¹⁶ Rü ngēmacēx nixī i guxūguma meā chaugūna chadauxū na chauāēwatama nüxū chacuāxūcēx na chamexū i Tupanapēxewa rü duūxūgūpēxewa. ¹⁷ Rü dücax, Pa Āēxgacūx, rü ñuxre ga taunecū togū ga nachíūānegu chixūgū, rü düxwaxarū chauchiūānecēx wena chataegu na nuā chanangexūcēx ga dīeru ga namaā nüxū charūngūxēēchaūxū i chautanūxūgū i Yudíugū i nüxū nataxuxū, rü nuā Tupanana chanaxāxūcēx i chorū āmaregū. ¹⁸⁻¹⁹ Rü yema ngunexūgu rü tupauca ya taxūnewa Tupanana íchanaxā ga chorū āmaregū, nawena na chaugū chamexēēxū ga Tupanapēxewa. Rü tama muxū ga duūxūgūmaā chayexma, rü tama chananuēxēē ga duūxūgū ga yexguma ñuxre ga Yudíugū ga Áchiaanecūāx choxū daugūgu ga yēma tupauca ya taxūnewa. Rü ngēmagū chi nixī i ñuxma nuā íxū na choxū ínaxuaxūgūxūcēx ega tacū nüxū ngēxmagu i chauchiga. ²⁰ Rü ngēxguma tama tacū nüxū ngēxmagu ga yema tupauca ya taxūnewa choxū daugūxū, rü ēcū ñāā ñuxma nuxmagūxū cumaā nüxū ixugū na tacū ga chixexūxū chowa nadaugūxū ga yexguma Yudíugūarū āēxgacūgūtūcumūpēxewa chayexmagu! ²¹ Rü ñaxūxīcatama nixī ga chorū ore ga tagaācū namaā chachonagūxū ga yexguma yema āēxgacūgūpēxewa chayexmagu:

“Rü ñuxma rü choxna pecagū erū choma chayaxō i wena tá na namaxēxū i yuexū”, ñacharūgū ga yexguma —ñanagürü ga Pauru. ²² Natürü ga Peri rü meā nüxū nacuēx ga yema Cristuaxū yaxōchiga. Rü yemacēx ga yexguma Pauruaru orexū naxīnūgu, rü ínayachaxāchi ga na nüxna naçaxū, rü ñanagürü Yudíugūxū: —Ngēxguma churaragūarū āēxgacū ya Díchiu núma ūxgu, rü tá meāma nüxū chacuēx i ngēma naxcēx ípenaxuaxūxū —ñanagürü. ²³ Rü yexguma ga Peri rü norū capitáūxū namu ga na Pauruna nadauxūcēx. Natürü tama nanapoxcuxūchi, rü tama nanachuxu ga na naxūtagu naxīānēāxū ga namücūgū, rü nüxū na nangūxēēgūxū. ²⁴ Rü ñuxre ga ngunexū marū ngupetūgu rü wena yēma naxū ga Peri ngīmaā ga naxmēx ga Drusíla ga Yudíu íxícū. Rü Paurucēx nayacaxēē, rü nüxū naxīnū ga yema ore ga Pauru namaā nüxū ixuxū ga Cristuaxū na yaxōxūchiga. ²⁵ Natürü yexguma Pauru meāma namaā nüxū ixuxgu na ñuxācū Tupana naxwēxexū na meā imaxūxū rü ñuxācū nanaxwēxexū na tórū maxūmaā meā icuāxū rü ñuxācū tá tūxna naçaxū i tórū maxūchiga, rü poraācū nabaixāchiāē ga Peri. Rü düxwa ñanagürü nüxū: —¡Ēcū íxū i ñuxmax! Rü ngēxguma ñuxguacū icharūxāūxmaregu, rü wena táxarū cuxcēx changema —ñanagürü. ²⁶ Yerü Peri ínananguxēē na Pauru chí dīeru nüxna íxāxū na yangēāxūcēx, rü yemacēx muēxpūxcūna naxcēx

nangemaxü, rü namaã nidexaxü. ²⁷ Rü taxre ga taunecü yemaãcü nixü. Rü ínanguxuchi ga Peri ga na ãëxgacü yixü, rü nachicüü ningu-
cuchi ga Pórchiu ga Festu. Natürü nüma ga Peri, rü Yudíugümaã nügü
namecümáxëëchaü, rü yemacëx tama ínananguxuchixëë ga Pauru.

25

Ãëxgacü ga Festupëxewa nayexma ga Pauru

¹ Rü Checharéawa nangu ga Festu na yéma ãëxgacüxü yaxücuxüçëx.
Rü marü tomaëxpüx ga ngunexü yéma nayexmagu, rü wenaxârü in-
axüächi, rü Yerucharéüwa naxü. ² Rü yéma Yerucharéüwa rü yema
paigüarü ãëxgacügü rü Yudíugüarü ãëxgacügü rü Pauruxü ínaxuaxügü
Festupëxewa. ³ Rü naxcëx ínacagü ga Yerucharéüwa Pauruxü na na-
muxüçëx. Yerü nümagü rü nagu narüxñüë na namagu yacuxéügüãxü na
yexma yamëxgüãxüçëx. ⁴ Natürü ga Festu rü nanangãxü, rü ñanagürü: —
Checharéagu napoxcu i Pauru, rü choma rü tá paxa ngema Checharéawa
chaxü. ⁵ Rü ngëmacëx name nixí i perü ãëxgacügü rü chowe narüxí i
Checharéawa, rü ngëxguma tacü rü chixexü naxüxgu i ngëma yatü, rü
ngema tá nixí i chomaã nüxü pixugüxü —ñanagürü. ⁶ Rü maneca 8
rü êxna 10 ga ngunexü Yerucharéüwa nayexma ga Festu, rü ñuxüchi
Checharéacëx nataegu. Rü yexguma ínanguxguarü moxüãcü rü yema
nachica ga ngextá duüxügüna ínacaxüwa naxü, rü yéma nayarüto
norü tochicaxüwa. Rü Paurucëx nangema na yéma napëxewa na-
gagüãxüçëx. ⁷ Rü yexguma yexma yaxücuxgu ga Pauru, rü yema Yudíugü
ga Yerucharéüwa ne íxü, rü naxcëx naxí. Rü muxüma ga chixexügümaã
ínanaxuaxügü. Natürü taxuwama nüxü nüxü nadauxëë na aixcüma yixü
ga yema naxcëx ínaxuaxügüãxü. ⁸ Rü yexguma ga Pauru rü nanangãxü,
rü ñanagürü: —Pa ãëxgacüx, taxuüma ga chixexü namaã chixugü ga
yema mugü ga Moiché umatüxü, rü bai ga tupauca ya taxünemaã, rü
bai ga ãëxgacü ya Chécharumaã —ñanagürü. ⁹ Natürü nüma ga Festu
rü Yudíugümaã nügü namecümáxëëchaü, rü yemacëx Pauruna naca, rü
ñanagürü nüxü: —¿Cunaxwëxexü na Yerucharéüwa cuxüxü na ngema
cuxna chaçaxüçëx naxcëx i guxüma i ngëma naxcëx cuxü ínaxuaxügüxü?
—ñanagürü. ¹⁰ Rü yexguma ga Pauru rü nanangãxü, rü ñanagürü: —
Choma rü cupëxewa changëxma na choxna cuçaxüçëx, erü cuma nixí
i cuxü naxunetaxü i ãëxgacü ya tacü ya Chécharu na ãëxgacü quiixü i
núma. Rü ngëmacëx chanaxwëxe i nuã choxna cuca. Erü taxuüma i
chixexü chaxü i Yudíugümaã, ngëxgumarüü i cuma meãma nüxü cucuëx.
¹¹ Ngëxguma chí tacü i chixexü chaxüxgu rü marü name na naxcëx
choxü yamëxgüxü, rü marü name i na chayuxü. Natürü ngëxguma
nataxuxguma i tacü i aixcüma ixixü i ngëma naxcëx choxü ínaxuaxügüxü,
rü taxuacüma texé Yudíugüna choxü tamu. Rü naxcëx íchaca na nümatama
ya ãëxgacü ya tacü ya Chécharu choxna naçaxüçëx —ñanagürü ga Pauru.
¹² Rü yexguma ga Festu rü norü ucuxëruügü ga ãëxgacügümaã nidexa,
rü ñuxüchi ñanagürü Pauruxü: —Marü naxcëx ícuca na ãëxgacü ya tacü
ya Chécharu cuxna çaxüçëx. Êcü, ñuxma rü naxütawa tá cuxü chamu —
ñanagürü.

Ãëxgacü ga Agripapëxewa nayexma ga Pauru

¹³ Rü ñuxre ga ngunexü ngupetügu, rü Checharéawa nangugü ga
Yudíugüarü ãëxgacü ga Agripa rü naëyëx ga Bereníche, na Festuxü

yanamoxëgüxücëx. ¹⁴ Rū marū ñuxre ga ngunexü yéma nayexmagügu, rü Agripamaã nüxü nixu ga Festu ga Pauruchiga, rü ñanagürü: —Nuã nangëxma i wüxi i yatü i poxcuxü ga Peri tama ínguxuchixëëxü. ¹⁵ —Rü yexguma choma Yerucharéüwa chayexmagu, rü paigüarü äëxgacügü rü Yudíugüarü äëxgacügüerugü rü ínanaxuaxügu, rü naxcëx ínacagü na namaã chanaxueguxücëx rü na yamëxgüãxücëx. ¹⁶ —Rü choma chanangãxü, rü tama tocüma nixí i toma i Dumacüãxgü i na tayamáxü i wüxi i duüxü ega tama nügüétüwa yadexaxíragu napëxewa i ngëma ínaxuaxügüxü. ¹⁷ —Rü yemacëx ga yexguma núma nangugügu ga yema Yudíugü, rü yexgumaärü moxüãcü rü chorü tochicaxüwa chitocuchi na nüxna chaçaxücëx nachiga ga yema, rü yéma naxcëx changema ga yema yatü. ¹⁸ —Natürü ga yema Yudíugü ga ínaxuaxügüxü, rü taxuüma ga tacü ga chixexü ga choma íchananguxëëxüxü nixugü. ¹⁹ —Natürü norü Tupanachiga rü wüxi ga yatü ga Ngechuchuchiga nixí ga yema nagu yadexagüxü. Rü nüma ga Yudíugü nüxü nixugü ga na nayuxü ga yema Ngechuchu, natürü Pauru nüxü ixuxgu rü marü wena namaxü. ²⁰ —Rü yexguma ga choma ga tama na nüxü chacuáxü ga ñuxãcü tá chanamexëëxü ga yema guxchaxü, rü yemacëx nüxna chaca ga Pauru ngoxi nanaxwëxe ga Yerucharéüwa na naxüxü, na yéma nüxna chaçaxücëx. ²¹ —Natürü nüma ga Pauru naxcëx ínaca ga na äëxgacü ya tacü ya Chécharupëxewa naxüxü na nümatama ya Chécharu nüxna çaxücëx. Rü yemacëx chanamu na meã nüxna nadaugüxücëx ñuxmata choma äëxgacü ya Chécharuxütawa chanamux —ñanagürü. ²² Rü yexguma ga Agripa rü ñanagürü Festuxü: —Choma rü ta nüxü chaxínüchaü i norü ore i ngëma yatü —ñanagürü. Rü Festu nanangãxü rü ñanagürü: —Moxü tátama nüxü cuxínü —ñanagürü. ²³ Rü moxüãcü yema ucapu ga äëxgacügü íngutaquëxegüxüwa nangugü ga Agripa rü Bereníche rü poraãcü nangëxãëgü. Rü namaã ínangugü ta ga churaragüarü äëxgacügü rü yema íãnecüãxgü ga corrigüxüchi ixíngüxü. Rü ñuxüchi Paurucëx nangema ga Festu na yema äëxgacügüpëxewa nagagüãxücëx. ²⁴ Rü ñanagürü ga Festu: —Pa Äëxgacü Pa Agripax, rü Pa Guxãma i Pema ya Nuxmagüxe, ñaã nixí i ngëma yatü i nachigamaã yadexagüxü i guxüma i Yudíugü. Rü chopëxewa ínanaxuaxügu ga Yerucharéüwa rü núma rü ta. Rü guxüguma tagaãcüma choxna naxcëx nacagü na nayuxü. ²⁵ —Natürü i choma rü taxuüma i tacü i chixexü i naxüxü nawa chadau na naxcëx yamáxü. Natürü nüma ga Pauru rü naxcëx ínaca na äëxgacü ya tacü ya Chécharu nüxna çaxü, rü ngëmacëx nagu charüxínü na ngëma chanamuxü. ²⁶ —Natürü taxuüma i ore i aixcüma ixíxü i nachiga choxü nangëxma na chorü äëxgacü ya Chécharucëx chanaxümatüxücëx. Rü ngëmacëx chanamu na nuã pepëxewa nagagüãxücëx, rü cuxcëx türü nixí, Pa Äëxgacü Pa Agripax, na nüxna cuçaxücëx, na nüxü chacuáxücëx i tacü tá na chaxümatüxü naxcëx ya äëxgacü ya Chécharu. ²⁷ —Erü chauxcëx rü tama name na ngextá namuxü i wüxi i poxcuxü ega tama naxümatüxíragu nachiga na tacücëx ínaxuaxügüãxü.

26

Pauru rü äëxgacü ga Agripapëxewa nügüétüwa nidexa

¹ Rü yexguma ga Agripa rü ñanagürü Pauruxü: —Marü name i ñuxma i cugüétüwa quidexa —ñanagürü. Rü yexguma naxunagümëxë ga Pauru, rü ínanaxügü ga nügüétüwa na yadexaxü, rü ñanagürü: ² —Chataãe, Pa

Āēxgacū Pa Agripax, erū cupēxewa chidexa i ñuxma na chaugētūwa chachogūxūcēx i guxūma i ngēma choxū na ínaxuaxūgūxū i ngēma chautanūxū i Yudíugū. ³—Rū yexeraācū chataāē erū cuma nūxū cucuēx i guxūma i tocūma i toma i Yudíugū, rū guxūma i Moiché ūmatūxū i mugū i naxcēx yadexagūxū i chautanūxūgū. Rū ngēmacēx cuxna chaca na meā choxū icurūxīnūxūcēx.

Pauruarū maxū naxūpa ga Ngechuchuaxū na yaxōōxū

⁴—Rū guxūma i ngēma chautanūxūgū i Yudíugū rū nūxū nacuēxgū ga ñuxācū na chamaxūxū ga natanūwa ga chauchiūānēwa rū Yerucharēūwa ga yexguma changextūxūūragu. ⁵—Rū ngēxguma chauchigaxū yaxugūechaūgu, rū nūma nūxū nacuēxgū ga choma rū woetama Parichēu na chíxū. Rū toma i Yudíugū i Parichēugū na tixīgūxū, rū toma nixī i guxūma i totanūxū i Yudíugūarū yexera na poraācū tanaxaurexū i ngēma tocūma. ⁶—Rū ñuxma i ngēma chautanūxūgū i Yudíugū rū nuā pepēxewa choxū nagagū erū chayaxō na Cristugagu nangēxmaxū i maxū i taguma gūxū, yema Tupana nuxcūmaūgūxū ga torū oxigūmaā inaxunetaxūrū. ⁷—Rū guxūma i totanūxūgū i Yudíugū rū ínananguxēēgū na nūxū nadaugūxū rū tá na yanguxū i ngēma uneta. Rū ngēmacēx Tupanaxū nicuēxūgū rū guxūguma i ngunecū rū chūtacū rū Tupanaāxū napuracūe. Rū choma rū ta íchananguxēē na nūxū chadauxū rū tá na yanguxū i ngēma uneta, rū ngēmacēx nixī, Pa Āēxgacūx, i ñuxma i choxū ínaxuaxūgūxū i ngēma chautanūxūgū i Yudíugū. ⁸—¿Rū tūxcūī tama peyaxōgū na Tupana wena namaxēxēēxū i ngēma yuexū?

Pauru rū nūxū nixu ga ñuxācū yema yaxōgūxūwe na yangēchigūxū

⁹—Rū choma nagu charūxīnūgu ga noxri rū name ga muxūma ga chixexū namaā na chaxūxū ga yema Ngechuchu ya Nacharētucūāxāxū yaxōgūxū. ¹⁰—Rū yemacēx nawe chingēchigū ga Yerucharēūwa. Rū paigūarū āēxgacūgūxūtawa naxcēx íchaca ga popera na chanapoxcuexūcēx ga yema yaxōgūxū. Rū yexma chanapoxcue ga muxūma. Rū yexguma chautanūxū ga Yudíugū nadaixgu ga yema yaxōgūxū, rū choma rū chorū me nixī. ¹¹—Rū muēxpūxcūna rū chanapoxcuexū na nūxū naxoexūcēx ga yema na yaxōgūāxū. Rū yemaācū chanaxū ga guxūnema ga ngutaquēxepataūgūwa. Rū poraācū naxchi chaxaxichi ga yema yaxōgūxū, rū yemacēx nawe chingēchigū ñuxmata to ga nachiūānegune ga íānegūwa.

Pauru rū wenaxārū nūxū nixu ga ñuxācū na yaxōōxū ga noxrix

¹² Rū ñanagūrū ga Pauru: —Rū yema yaxōgūxūxū na chapoxcuexūcēx nixī ga Damacuwa chaxūxū. Rū yemacēx ga paigūarū āēxgacūgū rū choxū namugū rū choxna nanaxāgū ga popera ga nawa choxna naxāgagūxū na chanapoxcuexūcēx ga yema yaxōgūxū. ¹³—Rū yexguma namagu taxīyane, Pa Āēxgacūx, rū yexguma meāma tocuchiwa nanguxgu, rū nūxū chadau ga wūxi ga omū ga daxūwa ne ūxū ga uēxcūarū yexera ixīxū ga choxū baxixū rū yema chomūcūgūxū rū ta baxixū. ¹⁴—Rū guxāma ga toma rū ñaxtūanegu tayayi. Rū choma rū nūxū chaxīnū ga wūxi ga naga ga Yudíugawa choxū ñaxū:

“Pa Chauru Pa Chaurux, ¿tūxcūī i chowe quingēchigūxū? Poraācū cugūtama cuxixexēē ñoma wūxi i tacū i āmaguxūgu cucuxgūxūrū”, ñanagūrū choxū. ¹⁵—Rū choma chanangāxū, rū ñacharūgū:

“¿Texé quixī, Pa Corix?” ñacharūgū. Rū nūma ga Cori rū ñanagūrū choxū:

“Choma nixī i Ngechuchu rü chorü duũxũgü nixī i ngēma nawe quingēchigũxũ. ¹⁶ —¡Naturü írüda rü inachi! Rũ marü cuxcèx changox i ñuxmax, erü cuxũ chamuxchaũ na choxũ cupuracũxúcèx rü nüxũ quixchigaxũcèx i ngēma ñuxma na choxũ cudauxũ rü ngēma yixcũra tá chauxũtawa nüxũ cudauxũ. ¹⁷ —Rũ cuxna tá chadau i natanũwa i cutanũxũgü i Yudiũgü rü ngēma tama Yudiũgü ixĩgũxũ i ñuxma tá natanũwa cuxũ chamuxũ. ¹⁸ —Rũ ngēma cuxũ chamu na ngēma duũxũgũxũ choxũ cucuèxèèxũcèx rü nüxũ naxoexũcèx i nacũma i chixexũgü rü chauga naxĩnũèxũcèx. Rũ ngēma tá cuxũ na Chatanámèxèwa ícananguxũxèèxũcèx i ngēma duũxũgü na chowe naxĩxũcèx rü choxũ yaxõgũãxũcèx na choma rü nüxũ nüxũ changechaũxũcèx i norü pecadugü, rü nüxũ nangèxmaxũcèx i nachica namaã i guxũma i chorü duũxũgü i üünegũxũ”, ñanagürü choxũ ga Cori.

Pauru rü naga naxĩnũ ga yema Ngechuchu namaã nüxũ ixuxũ

¹⁹ —Rũ yemacèx ga chomax, Pa Æxgacü Pa Agripax, rü naga chaxĩnũ ga yema ore ga Ngechuchu chomaã nüxũ ixuxũ ga yexguma choxũ nabaxixgu ga yema omü ga daxũwa ne üxũ. ²⁰ —Naturü noxri rü Damacucũãxgũmaã nüxũ chixuchiga ga Tupanaãrũ ore. Rũ yixcama ga Yerucharéucũãxgũmaã, rü yemawena rü guxũ ga Yudéaanewa, rü ñuxũchi yema tama Yudiũgü ixĩgũxũmaã nüxũ chixu. Rũ ñacharũgü:

“¡Nüxũ perüxoe i pecũma i chixexũgü, rü Tupanacèx pedaugü, rü meã pemaxè na duũxũgü nüxũ daugũxũcèx na aixcũma peyaxõgũxũ!” ñacharũgü. ²¹ —Rũ yemacèxtama nixī ga tupauca ya taxũnegu choxũ yayauxgũxũ rü choxũ yamèxgũchaũxũ ga chautanũxũgü i Yudiũgü. ²²⁻²³ —Naturü Tupana choxũ narüngũxèè rü ngēmacèx taguma íchayachaxãchi na guxũma i duũxũgũmaã nüxũ chixuxũ rü woo buxũ rü yaxũ. Rũ namaã nüxũ chixu ga yema ore ga nuxcũmaũgũxũ ga Tupanaãrũ orearü uruũgü rü Moĩché nüxũ ixugũxũ na ñuxãcũ tá nüxũ nangupetũxũ ga Cristu rü ñuxãcũ tá na nayuxũ, natürü yemawena rü nüma tá yĩxũ ga nüĩra yuwa ínadaxũ. Rũ namaã nüxũ chixu ta ga yema nuxcũmaũgũxũãrũ ore ga ñaxũ:

“Rũ Cristu rü tatanũxũ i Yudiũgũmaã rü ngēma to i duũxũgü i tama Yudiũgü ixĩgũxũmaã tá naxunagũãxũ i ore i tüxũ maxèxèèxũ”, ñaxũ. Rũ yemachigaxũĩcatama nixī ga namaã chixuxũ —ñanagürü ga Pauru.

Pauru rü Agripaaxũ nanangũchaũxèè na yaxõðxũcèx

²⁴ Rũ yexguma yemaãcũ nügüétüwa yadeaxgu ga Pauru, rü ñanagürü ga Festu tagaãcũma: —Cungèãèmare Pa Paurux. Rũ ngēma na yeũcürü cungüechaũ, rü düxwa nawa cungèãè —ñanagürü. ²⁵ Naturü ga Pauru rü nanangãxũ, rü ñanagürü: —Tama changèãè Pa Æxgacũxũchi, Pa Festux. Erü ñaã ore i nüxũ chixuxũ, rü aixcũmaxũchima nixī. ²⁶ —Rũ daa ãèxgacü ya Agripa rü meãma nüxũ nacuèx i guxũma i ngēma pemaã nüxũ chixuxũ. Rũ ngēmacèx tama chamuũãcũma chorü taãemaã napèxewa nüxũ chixu, erü nüxũ chacuèx na nüma rü ta nüxũ nacuãxũ i ñacũchiga na yĩxũ i guxũma i ñaã ore. Erü tama ngextámare cúãcũ naxũpetü i ngēma. ²⁷ —¿Cuyaxõxũ, Pa Agripax, i ngēma Tupanaãrũ orearü uruũgü nüxũ ixuxũ? Choma nüxũ chacuèx rü cuyaxõ —ñanagürü ga Pauru.

²⁸ Rũ Pauruxũ nangãxũ ga Agripa, rü ñanagürü: —¿Éxna cuma nagu

curūxīnūgu rü ngēmaācū noxre i curū oremaā na choxū cuyaxōxēxū? — ñanagürü. ²⁹ Rū ñanagürü ga Pauru: —Woo noxre i oremaā rü woo muxū i oremaā rü Tupana nanaxwēxe na cuyaxōxū. Rū tama i cuxicatama, natürü guxūma i ñaā nuā choxū inūxū rü ta, rü Tupana nanaxwēxe na chauxrūü yixīgūxū, natürü tama chauxrūü daa cadenagūmaā na yanēixgūxū —ñanagürü ga Pauru. ³⁰ Rū yexguma inachigū ga Agripa, rü Festu, rü Bereniche, rü guxūma ga yema namaā yēma rütogūxū. ³¹ Rū yexguma ga nūmagū rü noxrūwama naxī na yēma nūgūmaā Pauruchiga yadexagūxūcēx. Rū ñanagürügū: —Rū ngēma yatū, rü taxuūma i chixexū naxū na naxcēx yamáxū rü ēxna naxcēx napoxcuxū —ñanagürügū. ³² Rū Festuxū ñanagürü ga Agripa: —Ngēxguma chi tama nūmatama naxcēx inacaxgu na Chécharu nūxna çaxūcēx, rü chi ítananguxuchixēē —ñanagürü.

27

Pauruxū Dumawa namugū

¹ Rū yema āēxgacūgū rü düxwa nagu narūxīnūē na norū āēxgacū ga Chécharu ga Itáriaanewa yexmacūxūtawa na toxū namugūxū. Rū norū churaragūarū capitāūna nanamu ga Pauru namaā ga ñuxre ga togū ga poxcuexū na Chécharuxūtawa nagagūāxūcēx. Rū guma capitāū rü Yúriu nixī ga naega, rü norū churaragūtūcumū rü Chécharuarū Dauruūgū nixī ga naega. ² Rū nagu tichoū ga wūxi ga wapuru ga buanecūmaā ixūxūne ga Adamíchiuwa ne ūxūne ga Áchiaarū iānegūwa ūxchaxūne. Rū towe ta nixūe ga Aritárcu ga Machedóniāānecūāx ga Techarónicawa ne ūxū. ³ Rū moxūācū rü Chidāūārū türewa tangugū. Rū Paurumaā namecūma ga capitāū ga Yúriu. Rū ínanaxūexēē na yēmacūāx ga namūcūgūxūtagu naxūāneāxūcēx ga Pauru, na nūmagū nūxū nangūxēēgūxūcēx. ⁴ Rū yēma itaxīāchi. Rū Chiprearū capaxūārū tocūwaguama taxī, naxchaxwa ga buanecū, yerū towaama nabu. ⁵ Rū yēma Chiprewa tixāū ga taxtū rü Chiríchiaanecutūwa tarūyicu. Rū yemacutūgu taxī, rü Paūpiriaanewa tachopetū rü ñuxmata Díchiaanewa yexmane ga iāne ga Mirawa tangugū. ⁶ Rū yema capitāū yexma nūxū nayangau ga wūxi ga wapuru ga Aleyādríawa ne ūxūne ga Itáriaanewa ūxūne. Rū gumagu toxū nichoūxēē, rü tomaā inaxūāchi. ⁷ Natürü írarūwatama itíñaxwetaxū ga muxūma ga ngunexūgu, rü guxchaācūma Guíduarū toxmēxtawa tangugū. Natürü towaama nabuema ga buanecū, rü yemacēx capaxū ga Chamonaārū toxmēxtawa tachopetū rü capaxū ga Crétaxū ítachoeguāchi. ⁸ Rū guxchaācūma nacutūgu taxī ga yema capaxū, rü wūxi ga nachica ga Mexū ga Türegu āegaxūwa tangugū. Rū iāne ga Dácheaarū ngaicamana nayexma. ⁹ Natürü marū poraācū namagu tanuxcū ga na itaxīxū, rü marū naxāūcūma ga na itaxīāmaxū yerū marū nawa nangu ga guma tauemacūgū ga nagu nagāuanecū. Rū yemacēx ga Pauru rü nayaxucūxē ga duūxūgū, rü ñanagürü: ¹⁰ —Pa Chomūcūgūx, nūxū chacuēx i ngēxguma chi ixīāmagu, rü tá naxāūcūma. Rū daa wapuru rü tá inayarūtaxu namaā i guxūma i naācu. Rū ngürūāchi i yixema rü tá ta tayue —ñanagürü. ¹¹ Natürü yema churaragūarū capitāū rü yexeraācū guma wapuruarū yoragaama naxīnū, rü marinerugūarū capitāūgaama naxīnū, rü tama aixcūma Pauruga naxīnū. ¹² Natürü yema türe rü tama name ga yēma na tanangupetūxēēxū ga gāuanexū. Rū yemacēx wixguxūchi guxūma ga duūxūgū nagu narūxīnūē rü narūmemaē nixī ga na itaxīāchixū ga yēma.

Rū nanaxwēxegū ga chi Cueníchewa na tangugūxū na yéma tanangu-petūxēxū ga gáuanexū, yerū yema nixī ga wūxi ga Crétaarū türe ga mexū ga tama poraācū buanecū ga taxū nawa nguxū.

Taxtūarū ngāxūtūga nūxū naxū ga buanecū ga tacū

¹³ Rū inanaxūgū ga na meāma topēxewaama nabuxū ga buanecū, rū yemacēx ga nūmagū ga marinerugū rū nūxū nacuēxgūgu rū chi meā ítangugū ga yema ítaxīxūwa. Rū yemacēx itaxīāchi, rū nacutūarū ngaicamagu taxī ga yema Crétaarū capaxū. ¹⁴⁻¹⁵ Rū natūrū ngūrūāchi yixcamaxūra rū wūxi ga buanecū ga taxūchicū ga capaxūārū tocūwawa ne ūxcū ngāxūtūwaama nanacue ga guma wapuru. Rū taxuacūma ítxūtāñ nawaama ga buanecū. Rū yemacēx dūxwa ítayachaxāchi ga na tana-tochinūxū, rū toxū ínicuetañ. ¹⁶ Rū wūxi ga capaxūxācū ga Caudagu āegaxūārū tocūwawaama tachopetū ga ngextá tama poraācū íyabuaxūwa. Rū yéma poraācū tapuracūe na guma wapurugu tanatūnagūxū ga norū ngue ga yatūchigūne. ¹⁷ Rū yexguma marū natūnagūgūāgu ga guma ngue, rū napanaxāgū ga tanūtaxūmaā nayanēixgūtūwe ga guma wapuru. Rū ñuxūchi nayawēgū ga yema naxchirutachinūgū ga namaā yacuetañxū ga noxrix, yerū namuñē ga na Chírutearū naxnūcūwa yanangaixtañgūxū. Rū yema buanecū toxū nicuetañmare. ¹⁸ Rū moxūācū ga buanecū rū tama nangupetūēga, rū yemacēx inanaxūgū ga na ínawoñācuāxū. ¹⁹ Rū norū tomaēxpūx ga ngunexūgu, rū naxmēxmaātama ínawoñā ga yema natūxūgū ga guma wapuru, rū guxūma ga to ga norū yemaxūgū. ²⁰ Rū muxūma ga ngunexūgu, rū tama nangox ga ūēxcū rū ēxtagū, rū tama nangupetūēga ga guma buanecū ga taxūchicū. Rū dūxwa nagu tarūxñnūē ga marū tāūtāma na tamaxēxū. ²¹ Rū yexguma marū muxūma ga ngunexū tingegūgu ga tama na tachibūxū, rū yexguma guxūma ga yema duñxūgūtanūwa inachi ga Pauru, rū ñanagūrū: —Narūmemaē chi nixī, Pa Chomūcūgūx, ga chauga na pexñnūēxū, rū tāñ chima na ixīāchixū ga Crétawa, rū tāñ chima ñuxmarūñ tūxū naxūpetū i ñāñ āñcūmaxū rū taxuxū chima i chixexū tūxū nangupetū. ²² —Natūrū ¡petaāēgū! erū wapuruxica tá inayarūtaxu, natūrū i yixema rū taxūetāma tayue. ²³ —Erū ngewēxarū chūtaxūgu ya Tupana ya nūxū chapuracūma ya chorū cori ixícū rū nūma nanamu i wūxi i norū orearū uruñ i daxūcūñax i chauxcēx ngóxū. ²⁴ —Rū ñanagūrū choxū:

“¡Tāxū i cumuñxū, Pa Paurux! Erū āēxgacū ya Chécharupēxewa tá cungu, rū cugagu tá Tupana nanamaxēxē i guxūma i ngēma cumūcūgū i cumañ ngēxma wapurugu íxū”, ñanagūrū choxū. ²⁵ —Rū ngēmacēx, Pa Chomūcūgūx, ¡rū petaāēgū! erū choma rū aixcūma Tupanañxū chayaxō, rū aixcūma tá nixī i ngēmaācū tá nangupetūxū ngēxgumarūñ i ngēma chomañ nūxū yaxuxū. ²⁶ —Natūrū wūxi i capaxūwa tá tayarūcūxcuchitañgū —ñanagūrū ga Pauru. ²⁷ Rū yexguma taxre ga yūxū tingexgu ga na itaxīxū, rū taxū ga taxtū ga Ariáticuwa tayexmagū, yerū ga buanecū rū nūxīca toxū nacuetañ. Rū ngāxūcūūgu nūxū nicuēxāchitanū ga yema marinerugū ga na dauxchitacutūwa tangugūchañxū. ²⁸ Rū ínanaaegū ga norū ngugūtamaxū rū 36 ga metru nixī ga norū mátama. Rū yexguma marū írarūwa yaxūguxūra itaxīxgu rū wenaxārū nanan-gugūtamagū, rū 27 ga metru nixī ga norū mátama ga yexgumax. ²⁹ Rū namuñē ga na nutamañ yanañatañgūxū ga naxānacūwa, rū yemacēx guma wapuruchinūwa ínawoñā ga āgūmūcū ga añclagū ga achugūnaxcēx ga

napanaxāmaā ixātūxūxū na yemaācū íyachaxāchigūxēēāxūcèx ga guma wapuru. Rū nayumūxēgū ga paxa na yangunexūcèx. ³⁰ Natürü ga yema marinerugū rü nibuxmūchañ ga guma wapuruwa, rü yemacèx nanawāixēgū ga guma wapuruarū ngue, rü ñanagürügü: —Ngēma wapurupēxearü aūclagü tá ítawoñ na nataixūcèx ya wapuru —ñanagürügüneta. ³¹ Natürü ga Pauru rü churaragüarü capitáñmaā rü norü churaragümaā nüxū nixu rü ñanagürü: —Ngēxguma ñañ marinerugū rü tātütama nuxā wapurugu nachoxgu, rü guxāma i pema rü tá peyue —ñanagürü. ³² Rū yexguma ga yema churaragü rü nayadaecunügü ga guma ngue, rü inananguxēēgü. ³³ Rū yexguma marü yangunechañgu, rü Pauru nayaxucuxēgü ga guxūma na nachibūexūcèx, rü ñanagürü: —Taxre i yūxū nixī i ñuxma na taguma aixrūgumarüñ pechibūexū, rü bai i tacü na pengōxū yerü poraācū pexoegaāēgü. ³⁴ Rū ñuxma rü pemaā nüxū chixu na pechibūexū na peporaexūcèx, rü taxuñma pexū üpetūxūcèx. Erü taxúetama itayarütaxu rü bai i wüxi i peyaexūra inayarütaxu —ñanagürü. ³⁵ Rū yexguma marü yema ñaxgu, rü nanayaxu ga wüxi ga pāñ, rü Tupanana moxē naxā napēxewa ga guxūma. Rü inanabūcu ga yema pāñ, rü inanaxügü ga na nangōxū. ³⁶ Rū yexguma nataāēgü ga guxūma, rü nūmagü rü ta nachibūe. ³⁷ Rū 276 tixīgü ga guxāma ga toma ga guma wapurugu íxē. ³⁸ Rū yexguma marü nangāxēgu, rü ínanawoñ ga yema trigu ga wapuru namaā āācuxū na nangūnagūāchixūraxūcèx ga guma wapuru.

Inangu ga guma wapuru

³⁹ Rū yexguma yangunegu, rü yema marinerugü tama nüxū nacuáane ga yéma. Natürü nüxū nadaugü ga wüxi ga axcuchixū ga naxnücūpechinūāxū, rü nagu narūxīnūē ga yéma na yanangaixēēgūāxū ga wapuru. ⁴⁰ Rū yexguma nanadañ ga norü ngaxūxū ga aūclagü, rü yéma nanawogü. Rū nayawēgü ga norü toxchinūxūñarü nēixruñgü, rü inananga ga yema napēxewa üxū ga naxchirutachinü ga namaā iticuetāñxū. Rū itanaxügü ga nüxū na tingaicaxū ga yema naxnücūpechinü. ⁴¹ Natürü wüxi ga naxnücūarü nuxtamaxūwa tayarūngaixtañ. Rü yéma naxnücūwa nayarüwápēxe ga guma wapuru rü marü tama yéma itaxīāchi. Rü yoxni ga nachinūwa, rü yuape nayapuxēē. ⁴² Rū yema churaragü rü nagu narūxīnūē ga na nadaiāxū ga yema poxcuexū na taxuñma íñaxūcèx ga yexguma naxānacūwa nangugügu. ⁴³⁻⁴⁴ Natürü yema norü capitáñ ga churaragü, rü Pauruxū namaxēēchañ, rü yemacèx tama nanaxwèxe ga na nadaiāxū ga yema poxcuexū. Natürü nanamu na yema ixāñxū rü nüxīra ínayuxgūxū na naxānacūwa nawēxgūxūcèx, rü yema togü rü mürapewagügu rü éxna yema wapurutūchigügu meā na ínachoñxūcèx. Rü yemaācū guxāma meāma naxānacūwa tangugü.

28

Capaxū ga Márta wa nayexma ga Pauru

¹ Rū yexguma meāma naxānacūwa tangugügu ga guxāma rü yexguma nüxū tacuèxgü na Márta na yīñxū ga naega ga yema capaxū. ² Rū yema yemacūāxgü ga duñxügü rü meāma toxū nayauxgü ga guxāma. Rü nanangixtagü ga wüxi ga üxū ga taxūne. Rü toxçèx nacagü ga guxāma na yéma togü tanaixūgūxūcèx, yerü napu rü nagáuane. ³ Rū Pauru nanadetaquēxe ga ñuxre ga nañchacūgü, rü üxūxetüwa nayawocu. Natürü

yexguma yéma yawocuãgu, rü üxüarü nañēmaxũchaxwa inayago ga wüxi ga äxtape. Rü Paurumēxēwa nayuxu, rü yéma nayarütuächi. ⁴Rü yexguma yema yēmacũāxgü nüxũ daugügu ga yema äxtape ga Paurumēxēwa na natuxũ, rü nügümaã ñanagürügü: —Ñaa yatü rü maneca wüxi i máētaxũ nixĩ. Rü woo taxtüwa yuwa na yañaxũ, natürü Tupana tama nanamaxēēchaũ —ñanagürügü. ⁵Natürü guma üxüxetügu nanamaxũ ga yema äxtape, rü taxuũma nüxũ naxüpetü ga Pauru. ⁶Natürü guxũma ga yema duũxügü rü ínananguxēēgü rü ngoxi tá nachamé rü ēxna nayux. Rü marü nuxcũxürama ga yema nüxũ na nadaunüxũ rü taxuũma nüxũ na üpetüxũ, rü düxwa togu narüxĩnñē rü inanaxügüe ga na ñagüxũ: —Maneca wüxi ya tupana nixĩ —ñagüxũ. ⁷Rü yema nachicaarü ngaicamana nayexma ga norü naãne ga yema capaxũarü äēxgacü ga Púbiru ga naega. Rü nüma meãma toxũ nayaxu, rü yexma toxũ napegüxēē ga tomaēxpüx ga ngunexũ. Rü tomaã namecũmaxũchi. ⁸Rü guxema Púbiru nanatü rü ngürücarewa tayexma, yerü tixaxüne rü taduũ. Rü yéma tümamaxũtawa nangu ga Pauru, rü tümamaã nayumüxē, rü tümætügu naxüxmēx, rü tüxũ narümexēē. ⁹Rü yexguma yemaxũ nadaugügu, rü Paurucèx yéma naxĩ ta ga guxũma ga togü ga idaaweexũ ga yema capaxüçũāx, rü narümeē. ¹⁰Rü nümagü rü muxũma toxna naxãmaregü. Rü yexguma itaxĩächigu, rü toxna nananagü ga guxũma ga tanaxwèxexũ ga torü namawaũ ga òna.

Dumawa nangu ga Pauru

¹¹Rü tomaēxpüx ga tauemacü yéma capaxüwa tayexmagü. Rü ñuxũchi nagu tichoũ ga wüxi ga wapuru ga yema capaxüwa gáuanexũ ngupetüxēxene. Rü Aleyádríacũāx nixĩ ga guma wapuru. Rü napēxeraũwa nayexmagü ga taxre ga norü tupanachicũnēxägü ga Catu rü Porugu äegagüxũ. ¹²Rü Chiracúchaarü türewa tangugü, rü tomaēxpüx ga ngunexũ yéma tayexmagü. ¹³Rü yéma itaxĩächi, rü nacutüarü ngaicamagu taxĩ ñuxmata Dequíuwa tangugü. Rü moxũäcü ínangu ga wüxi ga buanecü ga ítaxĩxüwaama bucü rü toxũ inicüetaũ. Rü yemaarü moxũäcüama rü Puteriwa tangugü. ¹⁴⁻¹⁵Rü yexma nüxũ tayangau ga ñuxre ga duũxügü ga yaxögüxũ. Rü toxna naxu na wüxi ga yüxü yexma naxũtagu tarüchoxüçex. Rü marü wüxi ga yüxü ngupetügu rü itaxĩächi na namagu Dumawa taxĩxüçex. Rü marü toxũ nacuáchigagü ga yema yaxögüxũ ga Dumagugüxũ. Rü yema nama ga Ápiugu äegaxũgu naxĩ na yexma toxũ yangaugüxüçex. Rü ñuxre rü yema nachica ga Tomaēxpüx ga Taxepataũgu äegaxüwa toxũ nayarünguxēēgü Rü togü rü nachopetü ñuxmata yema nachica ga Ápiuarü Ngüēchicagu äegaxüwa nangugü. Rü yexguma Pauru nüxũ dēuxgu ga yema yaxögüxũ, rü Tupanana moxē naxã rü poraãcü nataãē. Rü yemaãcü Dumawa tangugü. ¹⁶Rü yexguma Dumawa tangugügu rü wüxi ga ípatawa nananguxēēgü ga Pauru nüxĩca namaã ga wüxi ga churara ga nüxna dauxũ.

Dumawa nayexma ga Pauru

¹⁷Rü tomaēxpüx ga ngunexũ marü yéma nayexmagu, rü Pauru naxcèx nangema ga yema Yudiugüarü äēxgacügü ga Dumawa yexmagüxũ. Rü yexguma nangutaquēxegügu, rü ñanagürü ga Pauru nüxũ: —Choma, Pa Chaueneēgüx, rü taxuũma i chixexũ chaxũ namaã i tatanüxügü, rü bai i nuxcũmaũgüxũ i tórü oxigücũmagümaã. Natürü Yerucharēũgu choxũ niyaxgü ga tatanüxügü, rü Dumacũāx ga churagüna choxũ namugü. ¹⁸Rü yexguma marü choxna nacagüegu ga Dumacũāxgü, rü

choxü ningëxgüchaü, yerü taxuüma ga tacü ga chixexü chowa nadaugü na choxü yamëxgüxcëx. ¹⁹ Natürü yema tatanüxügü ga Yudíugü rü nayamuëtanü na tama choxü yangëxgüxcëx, rü yemacëx düxwa naxcëx íchaca na nûmatama ya âëxgacü ya Chécharu choxna çaxüxcëx. Natürü tama tatanüxügüxü na íchaxuaxüxcëx nixí ga yemacëx íchaçaxü. ²⁰ Rü ngëmacëx nixí i pexcëx nuã changemaxü na pexü chadauxüxcëx rü pemaã chidexaxüxcëx. Pema nüxü pecuëx rü yixema i Yudíugü rü ítananguxëë i na ínanguxü ya Cristu. Rü yima Cristucëx nixí i choma i ñuxma i daa cadenameã chináixü —ñanagürü. ²¹ Rü nûmagü nanangãxügü, rü ñanagürügü: —Toma rü taxuüma i popera i Yudéawa ne muxü i cuchigagu ümatüxü tayauxgü. Rü ngëma taeneëgü i ngema ne íxü rü núma ngugüxü rü bai i wüxi i nüxü ixuxü i tacü rü ore i chixexü i cuchiga. ²² Rü cuxütawa nüxü taxínüëchaü rü ¿ñuxü ñacuxü i cumax? Erü nüxü tacuëxgü rü guxüwama i Yudíugü rü chixri nachiga nidexagü i ngëma ore i ngexwacaxüxü i Ngechuchuchiga —ñanagürügü. ²³ Rü yexguma Paurumaã inaxunetagü ga wüxi ga ngunexü, rü napatawa naxí ga muxüma ga duüxügü. Rü Pauru namaã nüxü nixu ga Tupanaãrü ore ga ñuxácü âëxgacü na yíixü ya Tupana. Rü pëxmama inanaxügü, rü ñuxmata nachütaxü rü nüxü nanangüchaüxëë ga yema duüxügü na Ngechuchuxü yaxögüãxüxcëx. Rü yemacëx Moíché ümatüxü ga mugüwa rü nuxcümaüxügü ga Tupanaãrü orearü uruügü ümatüxü ga orewa namaã nüxü nixu ga Ngechuchuchiga. ²⁴ Rü nûmaxü rü nayaxögü ga yema Pauru namaã nüxü ixuxü natürü ga togü rü tama nayaxögü. ²⁵ Rü yexguma tama wüxigu naxínüëgu ga yema duüxügü, rü inanaxügü ga na íyaxíxü. Rü yemacëx ga Pauru rü ñanagürü nüxü: —Meã perü oxigümaã nidexa ga Tupanaãë i Üünexü ga yexguma Ichaxíaxü yadexaxëëgu rü ñaxgu:

²⁶ “¡Rü ngema naxü, rü ngëma duüxügümaã nüxü yarüxu rü ñacurügü tá nüxü: ‘Rü woo nüxü pexínüëgu rü tãütáma aixcüma nüxü pecuëxgü. Rü woo nüxü perüdaunügu rü tãütáma aixcüma peyaxögü. ²⁷ Rü ngëmaãcü pixígü i ñuxmax, erü tama choxü pecuáxchaü i pemax. Rü tama nüxü pexínüë i chorü ore erü tama nüxü pexínüëchaü. Rü tama nüxü peyaxögü i ngëma choma pexü nüxü chadauxëëxü erü tama nüxü peyaxögüchaü. Rü tama peãëwa chaugu perüxínüë erü tama nüxü perüxoechaü i pecüma i chixexügü rü tama chauxcëx pedaügüchaü na choma pexü chamaxëxëëxüxcëx!’ ”

ñanagürü ga Tupanaãë i Üünexü. ²⁸ Rü ñanagürü ta ga Pauru: —Rü name nixí i pema rü ta nüxü pecuëx rü ñuxma rü marü inaxügü na ngëma tama Yudíugü íxígüxütanüwa naxunagüxü i ñãã Tupanaãrü ore i tüxü maxëxëëxü. Rü nûmagü tá nixí i aixcüma inaxínüëxü —ñanagürü. ²⁹ Rü yexguma Pauru yema ñaxgu, rü ínixí ga yema Yudíugü, rü poraãcü nügümaã íniporagatanücüü. ³⁰ Rü taxre ga taunecü ga mecü yéma nayexma ga Pauru nawa ga guma í ga naxütanüne ga nagu na napexüxcëx. Rü yéma meãma nanayaxuxü ga guxüma ga duüxügü ga naxütawa íyadaügüxüxü. ³¹ Rü nüxü nixuchiga ga ñuxácü âëxgacü na yíixü ga Tupana. Rü taxüema nüxna tanachuxu na nangüxëëãxü ga Cori ya Ngechuchu ya Cristuchiga. Rü taxüema naxcëx tanachixewe.

POPERA GA DUMAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Dumaärü tãnewa yexmagŭxŭ

¹ Pa Chaueneēgŭx, choma i Pauru nixŭ i pexcèx chanaxŭmatŭxŭ i ñãã popera. Rü choma nixŭ i Ngechuchu ya Cristuarŭ duŭxŭ chiŭxŭ. Rü choma nixŭ ga Tupana choxŭ yaxuxŭ na choxŭ yamuxŭcèx na duŭxŭgŭmaã nüxŭ chixuxŭcèx i norŭ ore i mexŭ i tŭxŭ maxèxèèxŭ. ² Rü nuxcŭmaxŭchima Tupana nanamu ga norŭ orearŭ uruŭgŭ na naxŭmatŭgŭãxŭcèx ga norŭ ore i mexŭ. Rü yemaãcŭ tŭxŭ nüxŭ nacuèxèè ga ñãã ore i mexŭ. ³ Rü ñãã ore i mexŭ rü tórŭ Cori ya Ngechuchu ya Cristuchiga nixŭ. Rü nüma rü woo Tupana Nane na yŭxŭ, natŭrŭ duŭxŭgŭrŭrŭ nabu ga yexguma ñoma ga naãnewa nanguxgu. Rü nuxcŭmaŭcŭ ga ãèxgacŭ ga Dabítaa nixŭ. ⁴ Natŭrŭ nümatama ya Ngechuchu rü ũnecŭ nixŭ. Rü yexguma yuwa ínadxgu rü Tupana tŭxŭ nüxŭ nadauxèè na aixcŭma Nanexŭchi na yŭxŭ. Rü nüxna nanaxã ga guxŭma ga pora. ⁵ Rü Ngechuchu ga Cristugagu nixŭ ga chomaã namecŭmaxŭ rü choxŭ naxunetaxŭ ga Tupana na norŭ puracŭ chaxŭxŭcèx. Rü yemacèx Ngechuchuégagu choxŭ namu na guxŭ i nachiŭãnewa nüxŭ chixuxŭcèx i norŭ ore na yaxōgŭãxŭcèx i duŭxŭgŭ rü Tupanaga naxŭnŭèxŭcèx. ⁶⁻⁷ Rü pema rü ta, Pa Dumacŭãxgŭx, rü ngēma duŭxŭgŭtanŭwa pengèxmagŭ yerŭ Tupanaãxŭ peyaxōgŭ rü naga pexŭnŭè. Rü nüma rü pexŭ nangechaŭ rü marŭ pexŭ naxuneta na Ngechuchu ya Cristuarŭ duŭxŭgŭ pixŭgŭxŭcèx rü ngēma norŭ duŭxŭgŭtanŭxŭ na pexŭgŭxŭcèx. Rü ñuxmax, Pa Chaueneēgŭ i Dumacŭãxgŭx, rü chanaxwèxe i nüma ya Tanatŭ ya Tupana rü tórŭ Cori ya Ngechuchu ya Cristu pemaã namecŭmagŭ rü pexŭ narŭngŭxèègŭ na meã pexŭ naxŭpetŭxŭcèx rü aixcŭma petaãègŭxŭcèx.

Pauru rü nüxŭ nangúchaŭ na íyadauãxŭ ga yema yaxōgŭxŭ ga Dumawa yexmagŭxŭ

⁸ Rü ñuxma rü Ngechuchu ya Cristuégagu Tupanana moxè chaxã pexcèx, erŭ guxŭwama i guxŭ i naãnewa rü duŭxŭgŭ nüxŭ nixugŭgŭ na aixcŭma Cristuaxŭ peyaxōgŭxŭ rü Tupanacèx pemaxèxŭ. ⁹ Rü nüma ya Tupana choxŭ nadau rü nüxŭ nacuèx na aixcŭma guxŭguma pexcèx chayumŭxèxŭ. Rü yimaãxŭ nixŭ i guxŭma i chorŭ ngúchaŭmaã chapuracŭxŭ rü nüxŭ chixuxŭ i norŭ ore i mexŭ i Nanechiga. ¹⁰ Rü guxŭguma nüxna chaca na choxŭ ngēma namuxŭcèx rü ngēmaãcŭ dŭxwa pexŭ íchayadauxŭcèx ega norŭ ngúchaŭ yixŭgu. ¹¹ Erŭ aixcŭma choxŭ nangúchaŭ na pexŭ chadauxŭ na pemaã nüxŭ chixuxŭcèx i Tupanaärŭ ore na aixcŭma meã peyaxōgŭxŭcèx rü yexeraãcŭ peporaexŭcèx. ¹² Rü ngèxguma ngēmaãcŭ wŭxiwa ingèxmagŭgu, rü tá wŭxichigŭ yigŭ tataãègŭxèè rü yigŭaxŭ tanangúchaŭxèè. Erŭ choma rü tá nüxŭ chadau na ñuxãcŭ tórŭ Coriaxŭ peyaxōgŭxŭ rü pema rü tá ta nüxŭ pedau na ñuxãcŭ chayaxŭxŭ. ¹³ Pa Chaueneēgŭx, chanaxwèxe i nüxŭ pecuèx na muèxpŭxcŭna pexŭ íchayadauxŭxŭ, natŭrŭ ñuxmarŭta rü choxŭ naguxcha. Natŭrŭ ngēma petanŭwa chaxŭxchaŭ, erŭ chanaxwèxe na

pemaã nüxŭ chixuxŭ i Tupanaãrŭ ore yema toxnamana yexmagŭxŭ ga duŭxŭgŭmaã nüxŭ chixuxŭrŭrŭ. Erŭ chanaxwèxe i ngêma duŭxŭgŭrŭrŭ meã peyaxôgŭ na ngêmaãcŭ Cristuwe naxŭxcèx i ngêma petanŭxŭgŭ i ñuxma tama yaxôgŭxŭ. ¹⁴ Rŭ aixcŭma ngêma changuxchaŭ erŭ nŭmatama ya Tupana choxŭ namu na guxŭ i duŭxŭgŭmaã nüxŭ na chixuxŭcèx i norŭ ore. Rŭ nanaxwèxe i duŭxŭgŭ i meã poperaxŭ icuáxŭmaã nüxŭ na chixuxŭ rŭ duŭxŭgŭ i tama poperaxŭ icuáxŭmaã ta nüxŭ chixuxŭ i ngêma norŭ ore. Rŭ ngêxgumarŭrŭ ta nanaxwèxe na ngêma duŭxŭgŭ i cuèx nüxŭ ngêxmaxŭmaã nüxŭ na chixuxŭ rŭ ngêma duŭxŭgŭ i taxuguma rŭxŭnŭèxŭmaã nüxŭ na chixuxŭ. ¹⁵ Rŭ ngêmacèx, Pa Chaueneëgŭ i Dumagu Āchiŭgŭxŭ, rŭ choma rŭ marŭ íchamemare na petanŭwa na chaxŭxŭ, na pemaã rŭ ta nüxŭ chixuxŭcèx i Tupanaãrŭ ore i mexŭ.

Tupanaãrŭ ore rŭ naporã

¹⁶ Rŭ taxucèxma naxcèx chaxãne i ngêma ore i mexŭ. Erŭ ngêma ore rŭ naporã, rŭ ngêmamaã nixŭ i napuracŭxŭ ya Tupana na guxãma ya yixema Cristuaxŭ yaxôgŭxe rŭ tŭxŭ nangêxmaxŭcèx i maxŭ i taguma gŭxŭ. Rŭ ngêma maxŭ, rŭ Yudiŭgŭcèxirachirèx nixŭ, natŭrŭ i ñuxma rŭ guxŭma i ngêma tama Yudiŭgŭ ixŭgŭxŭcèx rŭ ta nixŭ. ¹⁷ Rŭ ngêma norŭ orewa nixŭ i tamaã nüxŭ yaxuxŭ ya Tupana na tórŭ ôgaguxicatama yŭxŭ na napèxewa imexŭ. Erŭ norŭ ore i ũmatŭxŭwa rŭ ñanagŭrŭ:

“Rŭ yŭxema tŭmaãrŭ ôgagu Tupanapèxewa mexê, rŭ tá tŭxŭ nangêxma i maxŭ i taguma gŭxŭ”,
ñanagŭrŭ.

Nagagutama nixŭ i duŭxŭgŭ inapoxcuexŭ

¹⁸ Rŭ nüxŭ tadaugŭ na Tupana daxŭguxŭ i naãnewa ne namuxŭ i norŭ poxcu i ãucŭmaxŭ naxcèx i guxŭma i ngêma duŭxŭgŭ i tama naga ñnŭèxŭ rŭ chixexŭ ŭgŭxŭ rŭ ngêma norŭ chixexŭmaã togŭaxŭ naguxchaxêëgŭxŭ na tama nüxŭ nacuèxgŭxŭcèx i ngêma ore i aixcŭma ixŭxŭ. ¹⁹ Rŭ ngêma duŭxŭgŭ i chixexŭ ŭgŭxŭ rŭ meã nüxŭ nacuèxgŭchirèx na ñuxãcŭ yŭxŭ ya Tupana yerŭ nŭmatama ga Tupana rŭ marŭ nüxŭ nüxŭ nadauxêë ga yema. ²⁰ Rŭ woo tama nüxŭ idaugŭgu ya Tupana, natŭrŭ guxŭma i tacŭ i naxŭxŭwa nixŭ i nüxŭ idaugŭxŭ. Rŭ yexguma noxri naãne naxŭxgumama nixŭ ga meãma duŭxŭgŭxŭ nüxŭ nadauxêëxŭ na aixcŭma Tupana na yŭxŭ rŭ guxŭguma na naporaxŭ. Rŭ ngêmacèx i ngêma duŭxŭgŭ i chixexŭ ŭgŭxŭ, rŭ taxucŭrŭwama tacŭmaã nŭgŭ inapoxŭgŭ i Tupanapèxewa. ²¹ Yerŭ woo nüxŭ nacuèxgŭchirèx na ñuxãcŭ yŭxŭ ga Tupana, natŭrŭ tama nanayauxgŭchaŭ na norŭ Tupana yŭxŭcèx, rŭ bai na moxê nüxna naxãgŭxŭ. Natŭrŭ yema ore ga taxuwama mexŭguama narŭxŭnŭè, rŭ yemaãcŭ naèchitamare namaxê rŭ yexeraãcŭ chixexŭgu narŭxŭnŭè. ²²⁻²³ Rŭ nŭgŭ yaxugŭegu rŭ duŭxŭgŭ i nüxŭ icuáxŭ nixŭgŭ natŭrŭ taxuguma narŭxŭnŭè. Yerŭ nüxna nixŭgachitanŭ ga Tanatŭ ya Tupana ya mexêchicŭ ya taguma yucŭ, na nawe naxŭxŭcèx ga norŭ naxchicŭnèxãgŭmare ga duŭxŭgŭ i yuxwèxexŭchicŭnèxãmare ixŭgŭxŭ rŭ werigŭchicŭnèxãmare ixŭgŭxŭ rŭ naèxŭgŭchicŭnèxãmare ixŭgŭxŭ rŭ ãxtapegŭchicŭnèxãmare ixŭgŭxŭ. ²⁴ Rŭ yemacèx ga Tupana rŭ dŭxwa yemawa nanawogŭ ga yema duŭxŭgŭ na naxŭgŭãxŭcèx ga guxŭma ga yema chixexŭ ga nüxŭ ngŭchaŭgŭxŭ rŭ nŭgŭmaã na naxŭgŭãxŭcèx ga naxŭneãrŭ ngŭchaŭgŭ i ãne tŭxna ãxŭ. ²⁵ Rŭ yemaãcŭ nüxna nixŭgachi ga

guma aixcūmaxŭchi Tupana ixīcū na nawe naxīxŭcèx ga norū tupanagū ga tama aixcūma ixīgūxŭ. Rū yema Tupana ūxŭpēxewa nayumŭxègū rŭ yemaxŭ nicuèxŭŭgū, natŭrŭ tama nŭxŭ nicuèxŭŭgū ga Tanatŭ ya Tupana ga naxŭcŭ rŭ inaxwèxecŭ na guxŭguma nŭxŭ icuèxŭŭgŭxŭ. Rŭ ngēmaācŭ yixŭ. ²⁶ Rŭ yemacèx ga Tupana rŭ dŭxwa yemawa nanawogŭ ga yema duŭxŭgŭ na naxŭgŭāxŭcèx ga naxŭneārŭ ngŭchaŭ i āne tŭxna āxŭ. Rŭ èjxrŭŭ ga ngexŭgŭ rŭ naxrŭŭ ngexŭgŭmaātama nangēāègŭ rŭ tama yatŭgŭmaā. ²⁷ Rŭ yexgumarŭŭ ta ga yatŭgŭ rŭ naxrŭŭ yatŭxŭmaātama nangēāègŭ, rŭ tama ngexŭgŭmaā. Rŭ yema naxŭneārŭ ngŭchaŭ ga chixexŭgŭ rŭ nŭxŭ napora na naxrŭŭ yatŭxŭmaā namaxèxŭ. Rŭ yemaācŭ ga yema yatŭgŭ rŭ nŭgŭmaā nanaxŭgŭ ga yema naxŭneārŭ ngŭchaŭ i āne tŭxna āxŭ, rŭ dŭxwa yemagagu nidaawee rŭ naturaxŭnegŭ. ²⁸ Rŭ yema na tama Tupanaxŭ nacuèxgŭchaŭxŭ, rŭ yemacèx ga nŭma ga Tupana rŭ dŭxwa yemawa nanawogŭ ga yema duŭxŭgŭ na norŭ chixexŭga na naxŭnŭèechaxŭcèx rŭ na naxŭgŭāxŭcèx ga yema chixexŭ. ²⁹ Rŭ dŭxwa ga yema duŭxŭgŭ rŭ guxŭraŭxŭ ga chixexŭ naxŭgŭ ga Tupanapēxewa. Rŭ tama aixcūma meā namxèmaā rŭ natemaā namaxè. Rŭ naxaŭ rŭ nŭgŭnaxŭcatama nananugŭchaŭ i guxŭta i ŭacŭ. Rŭ ŭoguāxŭ nachixexèègŭchaŭ. Rŭ nixāŭxāchixewèxegŭ, rŭ namāètagŭ, rŭ nanuèwèxe, rŭ nawomŭxèèwèxegŭ, rŭ naxŭneārŭ ngŭchaŭ nŭxŭ napora, rŭ naxoregŭtèèxgŭ. ³⁰ Rŭ chixexŭmaā ŭoguāxŭ nixugŭe, rŭ Tupanachi naxaie, rŭ ŭoguāxmaā naguxchigagŭ. Rŭ nŭgŭgu naxŭnŭègu rŭ togŭarŭ yexera nixŭgŭ, rŭ nŭgŭ nicuèxŭŭgŭ. Rŭ naxcèx nadaugŭ na yexera chixexŭ naxŭgŭxŭ. Rŭ tama nanatŭga rŭ naèga naxŭnŭèchaŭ. ³¹ Rŭ tama inarŭxŭnŭèchaŭ. Rŭ tama aixcūma nayanguxèè i ngēma nŭxŭ yaxugŭxŭ. Rŭ taxŭexŭma nangechaŭgŭ. Rŭ tama togŭaxŭ nŭxŭ nangechaŭ i ŭacŭ rŭ guxchaxŭ. Rŭ tama ŭoguāxŭ nŭxŭ tangechaŭtŭmŭŭgŭ. ³² Rŭ nŭmagŭ i ngēma duŭxŭgŭ rŭ meāma nŭxŭ nacuèxgŭchirèx rŭ Tupana rŭ marŭ namaā nanaxuegu na noxtacūma nayuexŭ i ngēma duŭxŭgŭ i ngēmaācŭ maxèxŭ. Natŭrŭ woo meāma nŭxŭ nacuèxgŭchirèx i guxŭma i ngēma, natŭrŭ nanaxŭgŭama i ngēma chixexŭ, rŭ nataāègŭ ega togŭ naxŭxgu.

2

Ngèxguma Tupana duŭxŭgŭxŭ poxcugu, rŭ tama chixexŭ naxŭ, erŭ ngēma duŭxŭgŭ rŭ norŭ chixexŭgagutama nanapoxcue

¹ Rŭ ngēmacèx, Pa Duŭxŭx, rŭ woo texé quixŭgu rŭ taxuacūma Tupanapēxewa cugŭétŭwa cuchogŭ, ega togŭxŭ quixuechagu. Erŭ ngèxguma togŭxŭ quixuechagu na nachixexŭ rŭ cugŭtama cupoxcu, erŭ cuma na cumŭcŭxŭ quixuechaxŭ rŭ cuma rŭ ta cunaxŭ i ngēma chixexŭ i cumŭcŭxŭ naxcèx quixuechaxŭ. ² Rŭ nŭxŭ tacuèx rŭ Tupana tá nanapoxcue i ngēma duŭxŭgŭ i namŭcŭgŭxŭ ixugŭechaxŭ. Rŭ ngèxguma napoxcueāgu, rŭ tama chixexŭ naxŭ ya Tupana, erŭ ngēma duŭxŭgŭ rŭ norŭ chixexŭgagutama nixŭ i napoxcueāxŭ. ³ Rŭ dŭcax, Pa Duŭxŭx, rŭ ngèxguma togŭxŭ quixuechagu, natŭrŭ cuma rŭ ta cunaxŭxgu i ngēmatama chixexŭ i nŭma naxŭxŭ, ¿rŭ ñuxŭcŭrŭwa tá i nagu curŭxŭnŭxŭ na Tupanachaxwa iguicŭxŭ na tama cuxŭ napoxcuxŭcèx? ⁴ ¿Rŭ tŭxcŭŭ tama nagu curŭxŭnŭ i ngēma mexŭ i Tupana cuxcèx ŭxŭ? Nŭma rŭ poraācŭxŭchi cumaā namecūma rŭ yaxna cumaā naxŭnŭ rŭ tama paxa curŭ chixexŭcèx cuxŭ napoxcuchaŭ. ¿Rŭ ñuxma rŭ tŭxcŭŭ nŭxŭ cuxo? ¿Tama èxna nŭxŭ cucuèx na Tupana ngēmaācŭ cumaā mecūmaxŭ na

nūxŭ curūxoxŭcèx i curū chixexŭ rŭ naxcèx na cumaxŭxŭcèx ya Tupana? ⁵ Natŭrŭ cuma rŭ tama Tupanaxŭ cucuáxchaŭ rŭ tama nūxŭ curūxoxchaŭ i curū chixexŭ. Rŭ ngēmaācŭ cugŭcèxtama cunayexeraxēē i curū poxcu i tá cuyaxuxŭ i ngēma ngunexŭ i nagu Tupana napoxcuexŭ i ngēma chixexŭ ŭgŭxŭ. Rŭ ngēma ngunexŭgu rŭ Tupana tá aixcŭma ngēma duŭxŭgŭmaā nanaxuegu na űuxācŭ tá na napoxcueāxŭ. ⁶ Rŭ ngēxguma tá nixŭ i Tupana nūxŭ yaxŭgŭtanŭxŭ i wŭxichigŭ i duŭxŭ naxcèx i ngēma naxŭgŭxŭ. ⁷ Rŭ maxŭ i taguma gŭxŭmaā Tupana tá tŭxŭ nanaxŭtanŭ ya yŭxema guxŭguma mexŭ taxŭgŭācŭma naxcèx daugŭxe na Tupana tŭmamaā taāxŭ rŭ naxcèx daugŭxe na aixcŭma Tupanaxŭtawata tangugŭxŭ. ⁸ Natŭrŭ Tupana tá tŭmamaā nanu rŭ tá tŭxŭ napoxcu ya yŭxema tŭgŭguxicatama rŭxŭnŭēxē rŭ tama naga űnŭēchaŭxē i ore i aixcŭma ixŭxŭ rŭ naxcèx daugŭxe na ngēma chixexŭ taxŭgŭxŭ. ⁹ Rŭ guxŭma i ngēma duŭxŭgŭ i chixexŭ ŭgŭxŭ rŭ tá ngŭxŭ ningegŭ rŭ poraācŭ tá chixexŭ nūxŭ naxŭpetŭ. Rŭ ngēma Yudŭgŭ i chixexŭ ŭgŭxŭxŭra tá nixŭ i Tupana inapoxcuexŭ. Rŭ ngēmawena rŭ tá nanapoxcŭe i guxŭma i ngēma togŭ i duŭxŭgŭ i chixexŭ ŭgŭxŭ. ¹⁰ Natŭrŭ ngēma duŭxŭgŭ i mexŭ ŭgŭxŭ, rŭ Tupana tá namaā nataāē, rŭ tá nanatachigaxēē, rŭ tá nanataāēxēē. Rŭ ngēma Yudŭgŭ i mexŭ ŭgŭxŭcèxira tá nixŭ i ngēma. Rŭ ngēxgumarŭ i guxŭma i togŭ i duŭxŭgŭ i mexŭ ŭgŭxŭcèx rŭ tá ta nixŭ. ¹¹ Erŭ Tupanapēxewa rŭ nawŭxigu i ngēma duŭxŭgŭ i Yudŭgŭ ixŭgŭxŭ rŭ ngēma togŭ i duŭxŭgŭ i tama Yudŭgŭ ixŭgŭxŭ. Rŭ guxāma ya texé ya chixexŭ ŭgŭxe rŭ tá tanayaxu i tŭmaārŭ poxcu, natŭrŭ guxāma ya texé ya mexŭ ŭgŭxe rŭ tá Tupana tŭmamaā nataāē. ¹² Rŭ guxŭma i duŭxŭgŭ i pecadu ŭgŭxŭ i tama nūxŭ cuèxgŭxŭ i ngēma mugŭ ga Moŭché ŭmatŭxŭ, rŭ tá inayarŭtauxe. Rŭ ngēxgumarŭ ta i guxŭma i ngēma pecaduāxgŭxŭ i nūxŭ cuèxgŭxŭ i ngēma mugŭ ga Moŭché ŭmatŭxŭ, rŭ ngēma mugŭ nūxŭ ixŭxŭācŭma Tupana tá nanapoxcŭe. ¹³ Erŭ Tupanapēxewa rŭ taxuwama name i ngēma duŭxŭgŭ i nūxŭ űnŭēmarexŭ natŭrŭ tama nagu maxēxŭ i norŭ mugŭ. Natŭrŭ ngēma duŭxŭgŭ i Tupanaārŭ mugŭga űnŭēxŭ nixŭ i aixcŭma Tupanapēxewa imexŭ. ¹⁴ Dŭcèx, i ngēma duŭxŭgŭ i tama Yudŭgŭ ixŭgŭxŭ. Nŭmagŭ rŭ tama nūxŭ nacuèxgŭ i Tupanaārŭ mugŭ. Natŭrŭ ngēxguma nŭēchamatama naxŭgŭmareāgu i ngēma Tupana tŭxŭ muxŭ, rŭ tŭxŭ nūxŭ nadauxēē na nūxŭ nacuèxgŭxŭ i űacŭ na yŭxŭ i mexŭ rŭ űacŭ na yŭxŭ i chixexŭ, woo tama nūxŭ na nacuèxgŭchiréxŭ i Tupanaārŭ mugŭ. ¹⁵ Erŭ nacŭmagŭwatama nixŭ i tŭxŭ nūxŭ nadauxēēxŭ na nūxŭ nacuèxgŭxŭ na űacŭ yŭxŭ i mexŭ rŭ űacŭ na yŭxŭ i chixexŭ. Rŭ ngēma duŭxŭgŭ rŭ ngēxguma chixexŭ naxŭgŭgu, rŭ naāēwatama nixŭ i nūxŭ nacuèxgŭxŭ na nachixexŭ i ngēma naxŭgŭxŭ. Rŭ ngēxgumarŭ ta i ngēxguma mexŭ naxŭgŭgu, rŭ naāēwatama nixŭ i nūxŭ nacuèxgŭxŭ na namexŭ i ngēma naxŭgŭxŭ. ¹⁶ Rŭ ngēma ngunexŭ i nagu Tupana Cristuxŭ namuxŭ na guxŭ i duŭxŭgŭxŭ yacagŭxŭcèx i norŭ maxŭchiga, rŭ ngēma duŭxŭgŭ i tama Tupanaārŭ mugŭxŭ cuèxgŭxŭ rŭ naāēwa tátama nixŭ i nūxŭ nacuèxgŭxŭ na chixexŭ naxŭgŭxŭ rŭ ēxna mexŭ naxŭgŭxŭ. Rŭ ngēxguma tá nixŭ i nangóxŭ i guxŭma i ngēma chixexŭ i cúācŭma naxŭgŭxŭ i duŭxŭgŭ, rŭ ngēma chixexŭ i nŭxŭcatama nagu naxŭnŭēxŭ. Rŭ Tupanaārŭ ore i pemaā nūxŭ chixuxŭ nixŭ i tŭxŭ nūxŭ cuèxēēxŭ i ngēma.

Yudŭgŭchiga rŭ mugŭ ga Moŭché ŭmatŭxŭchiga

¹⁷ Natŭrŭ pema Pa Chaueneēgŭ i Yudŭgŭx, rŭ űaperŭgŭgŭ:

“Toma rü Yudíugü tixígü rü meāma nüxŭ tacuèx i Tupanaārü mugü ga Moiché ūmatüxŭ”, ñaperügügü. Rü ngēmaācü nagu perüxīnūē na Tupanapēxewa pimexŭ erü meāma nüxŭ pecuèx i ngēma Tupanaārü mugü ga Moiché ūmatüxŭ. Rü ngēmaācü Tupanamaā pegü picuèxüügü erü nagu perüxīnūē na Tupana pexŭ nangechaŭxŭ erü Yudíugü pixígü. ¹⁸ Rü nüxŭ pixu na meāma nüxŭ pecuáxŭ i tacü nixī i Tupanaārü ngúchaŭ rü tacü nixī i mexŭ rü tacü nixī i chixexŭ. Rü Tupanaārü mugüwa naxcèx pengúe na naxcèx pedauxŭ i ngēma aixcüma mexŭ ixīxŭ. ¹⁹ Rü pema rü ñaperügügü:

“Toma rü meāma nüxŭ tacuèx na tanaxucuxèxŭ i ngēma togü i duüxügü i tama Tupanaxŭ cuèxgüxŭ. Rü meāma nüxŭ tacuèx na itayanawèxächixèèxŭ i ngēma togü i chixexŭwa ngèxmägüxŭ”, ñaperügügü. ²⁰ Rü pema nagu perüxīnūēgu rü nüxŭ pecuèx na ñuxācü penaxucuxèxŭ i ngēma togü i duüxügü i tama Tupanaxŭ cuèxgüxŭ rü ñuxācü penangúexèèxŭ i ngēma duüxügü i ngexwacèx yaxōgüxŭ. Rü ngēmaācü nagu perüxīnūē na togüarü ucuxèruügü pixígüxŭ, erü Tupanaārü mugüwa pengúe rü ngēmacèx meāma nüxŭ pecuèx i tacü nixī i mexŭ rü tacü nixī i ore i aixcüma ixīxŭ. ²¹ Rü dücax, Pa Chaueneègü i Yudíugüx, pema na togüxŭ pengúexèèxŭ, ¿rü tüxcüü tama pegütama pengúexèè? Pema nüxŭ pixu na tama namexŭ na ingīxŭ, ¿rü tüxcüü i pema ipengfèxŭ? ²² Rü pema nüxŭ pixu na tama namexŭ na naī i ngēmaā ipexŭ, ¿rü tüxcüü i pema i ngēmaācü pemaxèxŭ? Rü pema na naxchi pexaiexŭ i togüarü tupanagünetachicünèxāgü, ¿rü tüxcüü i naxcèx pengfèxŭ i norü tupaucagüarü ngēmaxügü? ²³ Pema nüxŭ pixu na namexŭ i Tupanaārü mugü i ūmatüxŭ, rü petaāe erü meā nüxŭ pecuèxgü i ngēma mugü. Natürü Tupanamaā chixexŭ pexüe, erü tama naga pexīnūē i ngēma pexŭ namuxŭ i norü mugüwa. ²⁴ Rü ngēmacèx i Tupanaārü ore i ūmatüxŭwa rü ñanagürü:

“Rü pegagu nixī na chixri Tupanachiga yadexagüxŭ i ngēma duüxügü i tama Yudíugü ixīgüxŭ”, ñanagürü. ²⁵ Pema rü pegü ípewiechèxmüpèxechiraügü na Tupanaārü duüxügü pixígüxŭcèx. Rü name nixī na penaxüxŭ i ngēma, ega aixcüma naga pexīnūēgu i Tupanaārü mugü. Natürü ngèxguma chi tama naga pexīnūēgu i Tupanaārü mugü, rü woo Yudíugü pixígügu, natürü Tupanapēxewa rü taxuwama pexŭ name i ngēma na pegü ípewiechèxmüpèxechiraügüxŭ. ²⁶ Rü ngēma togü i duüxügü i tama nügü íwiechèxmüpèxechiraügüxŭ, rü woo tama ngēma naxügügu, natürü Tupanaārü duüxügü tá nixígü ega naga naxīnūēgu i norü mugü. ²⁷ Rü dücax, Pa Chaueneègü i Yudíugüx, rü ngēma duüxügü i tama íwiechèxmüpèxechiraügüxŭ natürü naga ñnūèxŭ i Tupanaārü mugü, rü ngēma duüxŭ rü tá Tupana-pēxewa pexŭ nixu na ñuxācü pechixexŭ. Rü ngēmaācü tá pexŭ naxüpetü erü tama naga pexīnūē i Tupanaārü mugü i woochirèx na nüxŭ pecuáxŭ i ngēma mugü, rü woochirèx na ípewiechèxmüpèxechiraügüxŭ. ²⁸ Rü dücax, rü tama ngēma na Yudíuxacügü pixígüxŭcèx nixī na aixcüma Tupanaxācügü pixígüxŭ. Rü tama ngēma na ípewiechèxmüpèxechiraügüxŭcèx nixī na Tupanaārü duüxügü pixígüxŭ. ²⁹ Erü yíxema aixcüma tümaārü maxūnēwa Tupanaga ñnūè tixī ya aixcüma Tupanaxācü ixīxè. Rü ngèxguma aixcüma taāēwa yaxōxgu nixī i aixcüma Tupanaārü ixīxŭ. Rü Tupanaāe i Üünexŭ nixī i tüxŭ rüngüxèèxŭ na yaxōxŭcèx, rü tama ngēma mugü ga Moiché

ūmatūxūgagu nixī. Rū yixema aixcūma Tupanaārū ixīxē, rū Tupana rū tūmamaā nataāē woo duūxūgū tama tūmamaā taāēgūgu.

3

¹ ¿Rū ñuxma rū tacūwa tūxū namexū na Yudiūgū ixīgūxū? ¿Rū tacūwa namexū na íwiewhèxmüpēxechiraūgūxū? ² Rū poraācūxūchima tūxū name na Yudiūgū ixīgūxū. Yerū nūma ga Tupana rū tūxnaxūchi nixī ga naxāāxū ga norū mugū i ūmatūxū. ³ ¿Rū tacū tá ngupetūxū i ñuxma ega ñuxre i tatanūxū i Yudiūgū rū tama meā yanguxēēgūāgu i ngēma Tupana tūxū muxū? ¿Rū pexcèx rū ngēmacèx tāūtāma yanguxēēāxū ya Tupana i ngēma tamaā inaxunetaxū? ⁴ Rū tama ngēmaācū nixī. Erū woo guxū i duūxūgū rū yadoratèēxgūgu, natūrū Tupana rū taguma nidora rū guxūguma nayanguxēē i ngēma nūma tamaā inaxunetaxū. Rū yemacèx norū ore ga Dabí ūmatūxūwa rū ñanagūrū:

“Cumax, Pa Tupanax, rū aixcūma nixī i curū ore i nūxū quixuxū.

Rū ngēxguma cuxū tangugūgūgu rū nūxū tadaugū na aixcūma cumexū”,

ñanagūrū. ⁵ Natūrū duūxūgū rū ínatūe erū ñanagūrūgū:

“Rū nūetama nixī na chixexū ixīgūxū erū ngēmaācū yexeraācū nangox na namecūmaxū ya Tupana”, ñanagūrūgū. Rū ñanagūrūgū ta:

“Rū ngēxguma chi tórū chixexūgagu yexeraācū nangoxgu na aixcūma namecūmaxū ya Tupana, rū maneca tama name ega tórū chixexūcèx tūxū napoxcuegu”, ñanagūrūgū. ⁶ Natūrū ngēma ñaxūgu na naxīnūēxū i duūxūgū rū poraācū ínatūe, erū tama ngēmaācū nixī. Erū ngēxguma chi tama namexgu ya Tupana, ¿rū ñuxācū chi i meā duūxūgūxū yacagūxū i naāneārū guxgu? ⁷ Natūrū i duūxūgū rū ñanagūrūgū:

“Rū ngēxguma chi chorū chixexūgagu yexeraācū nangoxgu na ñuxācū aixcūma namexū ya Tupana, ¿rū tūxcūū yīxū i choxna naçaxū naxcèx i chorū chixexū rū choxū napoxcuxū naxcèx i ngēma?” ñanagūrūgū.

⁸ Natūrū ngēma ñaxūgu na naxīnūēxū i duūxūgū rū poraācū ínatūe. Erū ngēxguma chi aixcūma yixīgu i ngēma nagu naxīnūēxū i duūxūgū, rū chi narūmemaē nixī na yexeraācū chixexū naxūgūxū na yexeraācū mexū na ínguxuchixūcèx. Rū dūcax, Pa Chaueneēgūx, nangēxma i chixexū i duūxūgū i choxū ūgagūmarexū i nūxū ixugūexū na ngēma yīxū i chorū nguxēētae i duūxūgūxū namaā changūexēēxū. Natūrū ngēma duūxūgū i ngēma ñagūxū rū nagagu tátama napoxcue.

Guxāma i yixema rū taxūetūxūgū

⁹ ¿Rū ñuxācū nixī i ñuxmax? ¿Pexcèx rū yixema i Yudiūgū rū togū i duūxūgūarū yexera Tupanapēxewa imexū? Pemaā nūxū chixu rū tama ngēmaācū nixī. Erū guxūma i duūxūgū i Yudiūgū ixīgūxū rū guxūma i duūxūgū i tama Yudiūgū ixīgūxū, rū naxūetūxūgū. ¹⁰ Erū Tupanaārū ore i ūmatūxūwa rū ñanagūrū:

“Rū tataxuma ya texé ya aixcūma Tupanapēxewa mexē, rū bai ya wūxie.

¹¹ Rū tataxuma ya texé ya aixcūma nūxū cuāxe i Tupanaārū ore na ñuxācū nanaxwēxexū na naxcèx imaxēxū. Rū tataxuma ya texé ya aixcūma Tupanacèx dauxe. ¹² Rū guxāma ítatūe, rū guxāma itayarūtauxe rū chixexū taxūgū i Tupanapēxewa. Rū tataxuma ya texé ya aixcūma mexū ūchaxe, rū bai ya wūxie. ¹³ Rū tūmaāx rū wūxi i yuetamaxū i ingenaxūrūū nixī erū ngēma ítanaxūxūēē

i nagúxúrauxū i dexa i chixexū. Rū tūmaārū conūmaā rū poraācū tidorae. Rū ngēma tūmaārū dexa rū ñoma āxtapegucharūū nixī erū togūxū nachixexēē. ¹⁴ Rū chixexū i ore i duūxūgūāēwa ngūxūmaāxīcatama tidexagū. ¹⁵ Rū ítamemare na duūxēxū timáxū. ¹⁶ Rū ngextá ítaxīxūwa rū togūxū tachixexēē rū tanangechauxēē rū chixexūgu tanayixēē. ¹⁷ Rū tama nūxū tacuèx na ñuxācū togū i duūxūgūxū tangechaūgūxū rū meā natanūwa tamaxēxū. ¹⁸ Rū tama nūxū tacuáxchaū na Tupanaxū tamuūēxū”, ñanagūrū i ngēma ore i ūmatūxūwa. ¹⁹ Rū nūxū tacuèx rū ngema poxcu i Tupanaarū mugūwa nūxū yaxuxū rū naxcèx nixī i ngema Yudíugū ga natanūwa nanguxū ga yema mugū. Rū woo ngema tama Yudíugū ixīgūxū i duūxūgūcèx rū ta nixī i ngema poxcu. Erū taxúema aixcūma naga taxīnū i ngēma mugū. Rū ngēmacèx taxucūrūwa texé Tupanapewa tūgū ítapoxū i ngēxguma Tupana tūxū icagūgu i tūmaārū pecaduchiga. ²⁰ Rū ñuxma na taxúema aixcūma naga ínūēxū i ngēma mugū, rū ngēmacèx taxucūrūwama texé tūgū tixu na ngēma mugū taxaurexūgagu Tupanapēxewa tamexū. Erū ngēma mugū tūxū nūxū cuēxēēxū nixī na poraācū ipecaduāxgūxū.

Tórū ōgagu nixī i Tupana tūxna naxāxū i māxū

²¹⁻²² Rū ñuxma na taxucūrūwama Tupanapēxewa tūxū yamexēēxū i ngēma mugū, rū ngēmacèx ya Tupana rū tūxū nūxū nacuèxēē na ñuxācū yīxū i tūxū yamexēēxū na napēxewa imexūcèx. Rū pemaā nūxū chixu rū Ngechuchu ya Cristuaxū na yaxōgūxūgagu nixī i tūxū yamexēēxū ya Tupana na aixcūma napēxewa imexūcèx. Rū yema mugū ga Moiché ūmatūxū rū yema ore ga nuxcūmaūgūxū ga orearū uruūgū ūmatūxū rū tūxū nūxū nacuèxēē i ngēma. Rū yema mexū ga Tupana taxcèx ūxū ga yexguma núma namuāgu ga Nane na tórū pecadu naxūtanūxūcèx, rū guxū i duūxūgū i yaxōgūxūcèx nixī, erū Tupanapēxewa rū nawūxigu i guxūma i ngēma duūxūgū. ²³ Rū guxāma tipecaduāxgū rū nūxna tayaxūgugū ya Tupana ya tūxū maxēxēēcū. ²⁴ Natūrū ga Tupana rū poraācū tamaā namecūma rū yemacèx tūxū nangetanūācūma tūxū nimexēēgū na napēxewa imexūcèx. Rū ñuxma rū tūxū nangēxma i māxū i taguma gūxū, yerū Ngechuchu ya Cristu rū marū tūxū nanaxūtanū ga tórū pecadugū. ²⁵⁻²⁶ Rū Tupana rū aixcūma núma nanamu ga Cristu na yaxūxūcèx rū yemaācū tórū pecadu naxūtanūxūcèx na Tupana tūxū nūxū rūngūmaxūcèx i ngēxguma aixcūma Cristuaxū yaxōgūgu. Rū yemaācū nanaxū ga Tupana na tūxū nūxū nadauxēēxūcèx na ñuxācū nūma nūgūcèx tūxū yamexēēxū na aixcūma napēxewa imexūcèx. Rū nuxcūma ga Tupana rū yaxna namaā naxīnū ga duūxūgū ga yexguma chixexū naxūegu, rū tama paxa nanapoxcue. Rū ñuxma rū ta tūxū nanawēx na ñuxācū aixcūma namexū i ngēma nūma naxūxū erū tūxū ínanapi i tórū pecadugū. Rū ngēmaācū tūxū nūxū nadauxēē na ñuxma rū ta aixcūmacū yīxū i ngēxguma tūxū yaxuxgu na napēxewa marū timexū ya guxāma ya yīxema Ngechuchuaxū yaxōgūxe. ²⁷ Rū ngēmacèx i ñuxma rū taxucūrūwama yīgū ticuèxūūgū rū nūxū tixu na yixematama yīgū imexēēgūxū i napēxewa. Erū taxucūrūwama texé tūgū tamexēē i Tupanapēxewa. Rū tama ngēma na naxaurexūcèx i ngēma mugū nixī i imexū, rū tama ngēma na mexū ixūgūxūcèx nixī i imexū. Natūrū Tupanapēxewa time i ñuxma, erū Cristuaxū yaxōgū. ²⁸ Rū yixema nūxū tacuèx rū ngēxguma Cristuaxū yaxōgūgu nixī i Tupanapēxewa imexū, rū

tama ngēma mugū na ixauregūxūcēx nixī i napēxewa imexū. ²⁹ ¿Éxna pexcēx rü Tupana rü Yudíugūarū Tupanaxīcatama yīixū? ¿Rü tama éxna i ngēma togū i duūxūgūarū Tupana rü ta yīixū? Ngēmaācūx, ngēma togū i duūxūgū i tama Yudíugū ixīgūxūārū Tupana ta nixī. ³⁰ Rü nüxū tacuēxgū na nangēxmaxū ya wūxitama ya Tanatū ya Tupana. Rü guxūma i duūxūgū i Cristuaxū yaxōgūxū, rü nūma ya Tupana rü nayamexēē na napēxewa yamexūcēx. Rü ngēmaācū i nūma ya Tupana rü Yudíugūxū nimexēē i ngēxguma yaxōgūāgu. Rü ngēxgumarūū ta nayamexēē i guxūma i togū i duūxūgū i ngēxguma Cristuaxū yaxōgūāgu. ³¹ Rü ñuxma na Cristuaxū yaxōgūxū, rü bexmana nagu perūxīnūē na ngēmaācū iyanaxoxēēxū i ngēma mugū. Natūrū tama ngēmaācū nixī. Erū ñuxma na Cristuaxū yaxōgūxū rü aixcūma tayanguxēē i ngēma Tupana tūxū muxū.

4

Abrāū rü Tupanaāxū nayaxō rü yemacēx Tupana nüxū nixu na namexū

¹ ¿Rü ñuxma rü ñuxū ñagūxū tá i nachiga ga nuxcūmaūcū ga tórū oxi ga Abrāū? ¿Rü ñuxācū nixī ga nüxū naxūpetūxū ga Tupanapēxewa? ¿Rü tūxcūū yīixū ga Tupana nüxū ixuxū ga Abrāū rü mecū na yīixū? ²⁻³ Rü dücax, yexguma chí wūxi ga norū puracū ga mexūcēx Tupanapēxewa namexgu ga Abrāū, rü yexguma chí waxi nixī ga nüxū nayexmaxū ga tacūcēx nūgū na yacuēxūxū. Natūrū taxucēxma Tupanapēxewa nūgū nicuēxūū ga Abrāū, erū Tupanaārū ore i ūmatūxūwa rü ñanagūrū:

“Abrāū rü Tupanaāxū nayaxō, rü yemacēx Tupana nanayaxu rü nüxū nixu na namexū”,

ñanagūrū i ngēma ore. ⁴ Rü ngēxguma texé wūxi i puracū ūxgu rü tūxū naxūtanūgu rü woetama tūmaārū natanū nixī rü tama āmare nixī i ngēma. ⁵ Natūrū tama ngēmaācū nixī i ngēxguma Tupanaāxū yaxōxgu. Erū ngēxguma yaxōxgu, rü tama tacū rü puracū i mexūcēx nixī i Tupanapēxewa imexū, natūrū Tupanapēxewa time erū tayaxō. Rü ngēmaācū Tupana tūxū nayaxu ya yīxema yaxōxē woo taxuūma i tacū rü puracū i mexū taxūxgu na ngēmacēx Tupana tūxū rüngūxēēxū. ⁶ Rü nuxcūmaūcū ga āēxgacū ga Dabí rü ta tūmachiga nidexa ga guxema duūxē ga yaxōxē. Rü nüxū nixu ga na tataāēxū ga guxema duūxē yerū Tupanapēxewa tame, woo tama tacū rü mexū taxūxgu na yemaācū Tupanapēxewa tamexūcēx. ⁷ Rü nūma ga Dabí rü ñanagūrū:

“Rü tataāēgū ya yīxema duūxēgū ya Tupana tūmaārū chixexūgūxū ngechaūxē rü tūmaārū pecadugūxū iyanangūmaxē. ⁸ Rü tataāē ya yīxema duūxē ya Tupana tama tūxū nagu naxīnūxē i tūmaārū pecadu”,

ñanagūrū ga Dabí. ⁹ Rü dücax, ¿pexcēx rü ngēma taāē rü ngēma duūxūgū i Yudíugū ixīgūxūcēxīcatama yīixū, rü éxna ngēma togū i duūxūgūcēx ta yīixū? Dücēx, rü marū pemaā nüxū tixu rü Tupanapēxewa name ga Abrāū yerū nayaxō. Rü yemacēx Tupana nanayaxu. ¹⁰ ¿Natūrū ñuxgu nixī ga nayauxāxū? ¿Éxna marū ínawiechēxmūpēxechiraūguwena, rü éxna naxūpa ga na ínawiechēxmūpēxechiraūxū? Rü pemaā nüxū chixu rü naxūpa nixī ga na Tupana nayaxuxū ga Abrāū. ¹¹ Rü Tupana nayaxuxguwena nixī ga ínawiechēxmūpēxechiraūxū ga Abrāū. Rü yema nixī ga norū cuēxruū ga nawa nüxū nacuāxū na aixcūma Tupana marū nayaxuxū rü nüxū nadauxū na namexū yerū nüxū nayaxō. Rü ngēmacēx i ñuxma ya Abrāū rü tūmanatū yīixū ya guxāma ya yīxema yaxōgūxe woo

tama ítwiechèxmüpêxechiraũgũgu. Rũ ngêmaãcü ya Tupana rũ tũxũ nayaxu ya guxâma ya yíxema yaxôgũxe, rũ tũxũ nadau na timexũ erũ tayaxôgũ. ¹² Rũ ngêxgumarũ ta ya Abráũ rũ tũmanatũ nixĩ ya guxâma ya yíxema íwíechèxmüpêxechiraũgũxe rũ Abráũrũ yaxôgũxe. Natürũ tama ngêma na tũgũ ítwiechèxmüpêxechiraũgũxcèx nixĩ i tũmanatũ yíixũ. Natürũ tũmanatũ nixĩ erũ tayaxôgũ yexgumarũ ga na yaxôoxũ ga nũma ga tanatũ ga Abráũ naxũpa ga na ínawíechèxmüpêxechiraũxũ.

Abráũ rũ Tupanaãxũ nayaxô rũ yemacèx Tupana nayanguxêê ga norũ uneta ga Abráũmaã nũxũ yaxuxũ

¹³ Rũ Tupana rũ Abráũmaã inaxuneta na nũma ya Abráũ rũ guxũma i naxrũ yaxôgũxũ rũ tá na nayauxgũãxũ i ñoma i naãne na noxrũ yíixũcèx. Natürũ tama yema na mugũ naxaurexũcèx nixĩ ga Tupana yemaãcü Abráũmaã ixunetaxũ. Natürũ yemaãcü namaã inaxuneta yerũ Abráũ nayaxô, rũ yemacèx Tupanapêxewa name. ¹⁴ Natürũ ngêxguma chi ngêma duũxũgũ i mugũ auregũxũcèxicatama yixĩgu i ngêma Tupanaãrũ uneta, rũ natũcèxmamare chi nixĩ i ngêma na yaxôgũxũ, rũ chi ngêma Tupanaãrũ uneta rũ taxuwama name. ¹⁵ Nũxũ tacuèx rũ ngêma mugũ ga Moíché ũmatũxũ rũ poxcuwa tũxũ naga erũ taxúema aixcũma meã tayanguxêê. Natürũ yexguma chi natauxguma ga yema mugũ rũ tataxu chima na texé chixri yanguxêêxũ. ¹⁶ Rũ yexguma Tupana Abráũmaã ixunetagu na nũxũ tá nangũxêêxũ, rũ Abráũãrũ ôgagu nixĩ ga namaã inaxunetaxũ. Rũ ngêmacèx i guxâma i yixema na Abráũrũ yaxôgũxũ rũ taxcèx ta nixĩ ga yema Tupanaãrũ uneta ga Abráũmaã nũxũ yaxuxũ. Rũ ngêmawa nũxũ tacuèx rũ tama yíxema mugũ auregũxecèxicatama nixĩ i ngêma Tupanaãrũ uneta, natürũ guxâma ya yíxema Abráũrũ Tupanaãxũ yaxôgũxecèx ta nixĩ. Rũ ñuxma rũ guxâma i yixema na Abráũrũ meã yaxôgũxũ rũ Abráũãcũgũ tixĩgũ rũ nũma rũ tanatũ nixĩ i Tupanapêxewa yerũ nũxĩra nayaxô. ¹⁷ Rũ Tupanaãrũ ore i ũmatũxũwa rũ Abráũchigaxũ nixu rũ ñanagũrũ:

“Rũ muxũma i duũxũgũnatũ tá cuxũ chixĩxêê”,

ñanagũrũ. Rũ Abráũ rũ Tupanaãxũ nayaxô, rũ yemacèx Tupana nayanguxêê ga norũ uneta ga namaã nũxũ yaxuxũ. Rũ yima Tupana nixĩ ya wena namaxêxêcü i yuexũ. Rũ yimatama nixĩ ya naxücũ i ngêma woo ñuxma taxuxũ. ¹⁸ Rũ nũma ga Abráũ rũ aixcũma nayaxô ga yexguma Tupana nũxũ ñaxgu:

“Rũ tá namuxũchi i cutaagũ”,

ñaxgu. Rũ woo ga Abráũ ga marũ yaguãxũchichirêx na yíixũ rũ na nangexacũxũ, natürũ nayaxôõma ga yema Tupanaãrũ uneta rũ meã ínananguxêê na wũxi ga nane tá nũxũ yexmaxũ. Rũ yemaãcü ningu na muxũma i duũxũgũnatũ yíixũ, yema Tupana namaã nũxũ ixuxũrũ. ¹⁹ Rũ Abráũ rũ wixguxuchi 100 ga taunecũ nũxũ nayexma ga yexguma. Natürũ tama inayarũmaãchi ga na yaxôoxũ woo nũxũ na nacuáxũ ga paxa tá na nayuexũ ga nũma rũ namèx ga Chara rũ marũ poraãcü nangupetũarũ taunecũãxgũxũ ga na naxããcũgũxũcèx. ²⁰ Rũ yemaãcü ga Abráũ rũ nayaxôõma na nũxũ tá nayexmaxũ ga wũxi ga nane yema Tupana namaã ixunetaxũrũ. Rũ tama nagu narũxĩnũ na Tupana ngũrũachi nawomũxêêxũ. Natürũ yexeraãcü Tupanaãxũ nayaxôõma, rũ nũxũ nicuèxũ. ²¹ Rũ aixcũmaxũchi nayaxô na naporaxũ ya Tupana na yanguxêêãxũcèx i guxũma i ngêma norũ uneta. ²² Rũ yemacèx ga Tupana rũ nũxũ nixu na napêxewa namexũ ga Abráũ. Yerũ Tupana nũxũ nadau

ga ñuxácü aixcüma nüxü na yaxōōxü. ²³ Rū tama Abráūchigaxicatama nixī ga naxūmatüxü ga Tupanaärü ore ga ñaxü:

“Rū Tupana rü nüxü nixu na napēxewa namexü ga Abráū, yerü nüxü nadau ga ñuxácü aixcüma nüxü na yaxōōxü”,

ñaxü. ²⁴ Natürü guxāma i yixema na yaxōgüxūchiga ta nixī i ngēma ore. Erü Tupana rü törü ōgagu tüxü nade na napēxewa imexü i yixema i nüxü na yaxōgüxü ya yima yuwa törü Cori ya Ngechuchuxü írüdaxēēcü. ²⁵ Rū Ngechuchuxü nixī ga namuxü ga Tupana na törü pecaducèx nayuxücèx. Rū ñuxūchi nüma ga Tupana rü wenaxärü Ngechuchuxü ínarüdaxēē na nagagu imexücèx i Tupanapēxewa.

5

Ñuxma rü Tupanapēxewa tame erü Cristuaxü tayaxōgü

¹ Rū ñuxma rü Tupanapēxewa time erü tayaxōgü. Rū ngēmacèx marü tama Tupanamaā taxuwanüāxgü i ñuxmax, erü törü Cori ya Ngechuchu ya Cristu rü marü tamaā nanangüxmüxēē ya Tupana. ² Rū Cristugagu nixī na tamaā namecūmaxü ya Tupana i ñuxmax erü tayaxōgü. Rū nüxü tacuèx rü guxügutāma tamaā namecūma. Rū tataāēgü erü nüxü tacuèx na tüxü tá nangēxmaxü i tachica i mexü i Tupanaxütawa. ³ Rū ngēxgumarüü ta tataāēgü i woo ngúxü ingegügu. Erü nüxü tacuèx rü ngēma ngúxü rü tüxü narüngüxēē na yexeraácü iporaexü rü yaxna namaā ixīnūēxücèx. ⁴ Rū ngēxguma yaxna namaā ixīnūēgu rü Tupana rü tamaā nataāē. Rū ngēma na tamaā nataāēxü rü ngēmacèx meā ítananguxēē na tüxü tá nangēxmaxü i tachica i mexü i Tupanaxütawa. ⁵ Rū ñuxma na ínanguxēēxü na tüxü tá nangēxmaxü i tachica i tachica i Tupanaxütawa, rü ngēmacèx taxucèxma tangechaügu. Erü Tupana rü poraácü tüxü nangechaü. Rū ngēma Naāē i Üünexü i tüxna namuxü nixī i tüxü nüxü cuèxēēxü i ngēma. ⁶ Rū yexguma taxucürüwama yigütama imaxēxēēgu, rü nawa nangu na Tupana yanguxēēxü ga yema norü uneta. Rū yexguma nixī ga ñoma ga naānewa namuāxü ga Cristu na pecaduāxgüxücèx nayuxücèx. ⁷ Rū tama natauxcha na wüxie rü to i duüxücèx tayuxü, woo wüxi i duüxü i mexücèx yixīgu. Rū woo tangēxmagu ya texé ya naxcèx yuchaüchiréxe i wüxi i duüxü i aixcüma mexēchixü, natürü tama tüxü natauxcha i ngēma. ⁸ Natürü Tupana tüxü nüxü nadauxēē na ñuxácü tüxü nangechaüxü yerü yexguma ipecaduāxgügu nixī ga taxcèx nayuxü ga Cristu. ⁹ Rū ñuxma rü Tupanapewa time yerü taxcèx nayu ga Cristu. Rū ngēmacèx meāma nüxü tacuèx rü nüma rü aixcüma tá tüxü ínanguxüxēē na tama tüxü napoxcuexücèx ya Tupana. ¹⁰ Rū yexguma norü uwanügü ixīgügu, rü nūmatama ga Tupana rü nügümaā tüxü narüngüxmüēxēē ga yexguma nayuxgu ga Nane. Rū ñuxma na marü namaā írüngüxmüēxü, rü yexeraácü nüxü tacuèx na tüxü nangēxmaxü i maxü i taguma gúxü nagagu na namaxüxü i nümax. ¹¹ Rū tama ngēxīcatama nixī. Natürü i ñuxma rü törü Cori ya Ngechuchu ya Cristugagu rü Tupanamaā tataāēgü, yerü Cristugagu nixī ga Tupana ga tamaā nangüxmüxü.

Adáūchiga rü Cristuchiga

¹² Rū nüxiraxücü ga yatü ga Adáūgagu nixī ga guxüma ga duüxügüwa nanguxü ga pecadu. Rū pecadugagu ínangu i yu. Rū yemaácü guxüma ga duüxügüwa naxüe na nayuxü, yerü guxüma nipecaduāx. ¹³ Rū naxüpa na Tupana Moíchéna naxāxü ga yema mugü ga naxūmatüxü,

rū duūxūgū rū chixexū naxūgüecha, rū yemacèx nayue. Natürü yema mugū rū tauta nayexma ga yexguma, rū yemacèx taxucürüwa texé nüxū tixu ga yema duūxūgū ga na chixri naga naxīnūēxū ga yema mugū. ¹⁴ Rū yema duūxūgū ga Adáūwena buexū rū tama Adáūrūū nanangōx ga yema orix ga Tupana nüxna chuxuxū. Natürü chixexū naxūgū, rū yemacèx nayue. Rū yemaäcū nixī ñuxmata Tupana Moīchéna naxā ga yema mugū ga naxūmatūxū. Rū Adáūwa inaxūgū na nayuxexū ga duūxūgū, natürü Cristuwa inaxūgū na nayaxuxū i maxū i taguma gūxū. ¹⁵ Natürü yema chixexū ga Adáū ūxū rū taxuacū naga tanangu i ngēma āmare ga Tupana tūxna āxū, erü tama namaā nawūxigu. Rū aixcūma nixī ga wūxi ga yatūarū chixexūgagu na nayuxexū i guxūma i duūxūgū. Natürü tama yemaäcū tamaā nanaxū ga Tupana. Yerü nūma rū tūxū nangetanūācūma nūma nanamu ga Nane ya Ngechuchu ya Cristu na tórū pecaducèx nayuxūcèx. Rū yemaäcū guma Cristugagu Tupana nanamaxēxēē i muxūma i duūxūgū. ¹⁶ Rū yema pecadu ga Adáū ūxū rū taxuacūma naga tanangu ga yema āmare ga Tupana tūxna āxū. Yerü wūxitama ga Adáūrūū pecadugagu, rū Tupana nüxū nixu rū tá nayu naxcèx ga yema. Natürü Ngechuchu ya Cristugagu rū Tupana nüxū nixu na napēxewa imexū rū nüxna ínguxūxū i guxūma i tórū pecadugū. ¹⁷ Rū guxūma i duūxūgū nayue yerü wūxitama ga yatū ga Adáū rū pecadu naxū. Natürü tama yemaäcū tamaā nanaxū ga Tupana, yerü ga nūma rū poraäcū tamaā namecūma rū tūxū nangetanūācūma tūxū narūngūxēē. Rū ngēmacèx i ñuxma rū guxūma i ngēma duūxūgū i Tupana nüxū ixuxū na napēxewa yamexū, rū nūmatama ya Tupana rū Nane ya Ngechuchu ya Cristugagu nanamaxēxēē na namaā wūxigu āēxgacūgū yixīgūxūcèx. ¹⁸ Rū yema Adáūrūū chixexū rū poxcuwa nanagagū ga guxūma ga duūxūgū. Natürü yema mexū ga Ngechuchu ya Cristu ūxū rū pecaduwa ínananguxūxēē i guxūma i duūxūgū i yaxōgūxū, rū nüxna nanaxā i maxū i taguma gūxū. ¹⁹ Rū guma nüxīraūcū ga yatū ga Adáū rū tama Tupanaga naxīnū. Rū yemaäcū wūxitama ga yatūgagu rū muxūma ga duūxūgū rū nipecaduāx. Natürü ínangu ga guma yatū ga Ngechuchu, rū meā Tupanaga naxīnū. Rū gumagagu rū muxūma i duūxūgū rū tá nime i Tupanapēxewa. ²⁰ Rū Tupana rū Moīchéna nanaxā ga norū mugū na duūxūgūxū nüxū nacuēxēēxūcèx na ñuxācū poraäcū pecadu naxūgūxū. Natürü yexguma yexeraäcū pecadu naxūgūgu ga duūxūgū, rū yexeraäcū Tupanaāxū nangechaūttümūgū. ²¹ Rū ñuxma woo pecadugagu na iyuxū, natürü Tupanaāxū tangechaūttümūgū i guxūguma. Rū ngēmaäcū pecaduwa tūxū ínanguxūxēē na napēxewa imexūcèx rū tórū Cori ya Ngechuchu ya Cristugagu tūxū nangēxmaxūcèx i maxū i taguma gūxū.

6

Ñuxma rū tama pecadu ixūgūxūcèx nixī i imaxēxū, natürü Cristucèx nixī i imaxēxū

¹ Rū ñuxma na Tupanaāxū ingechaūttümūgūxū, ¿rū ñuxācū tá imaxēxū i ñuxmax? ¿Rū pexcèx rū namexū na pecadu ixūgüechaxū na yexeraäcū Tupanaāxū ingechaūttümūgūxūcèx? ² Rū dūcax, tama ngēmaäcū nixī. Erü ñuxma pecaduchaxwa rū ñoma iyuxūrūū tixīgū, erü marū tama naga taxīnūē. Rū ngēmacèx tama name i yeūcürü pecadu taxūgüecha. ³ ¿Tama ēxna nüxū pecuèx na facūcèx yīxū na

íibaiūxū? Rū ítabaiū na ngēmaācū duūxūgūxū nawéxūcèx na aixcūma Ngechuchu ya Cristuarū duūxūgū na ixīgūxū. Rū yexguma íibaiūgu, rū nūma nayuxūrū yexma nayu ga tacūma ga nuxcūmaūxū. ⁴ Rū yexguma íibaiūgu, rū Cristu yuxūrū yexma nayu ga tacūma ga nuxcūmaūxū, rū Cristu itáxūrū inatèx ga yema tacūma ga nuxcūmaūxū. Rū yemaācū naxūpetū na wena imaxèxūcèx rū tūxū nangēxmaxūcèx i maxū i ngexwacaxūxū, yexgumarū ga Ngechuchu na yuwa írūdaxū rū wena namaxūxū ga yexguma Nanatū ga Tupana norū poramaā ínadaxēēgu. ⁵ Rū ñuxma na Cristumaā wūxigu nayuxū ga tacūma ga nuxcūmaūxū, rū nūxū tacuèx na aixcūma Cristumaā tūxū nangēxmaxū i maxū i ngexwacaxūxū. ⁶ Rū nūxū tacuèx rū yema tórū maxū ga nuxcūmaūxū rū Cristumaā wūxigu curuchagu nayu na yexma yanaxoxūcèx ga yema tacūma ga chixexū. Rū ñuxma rū tama pecadutūūwa tangēxmagū, rū ngēmacèx marū tama naga taxīnūē. ⁷ Erū yíxema yúxe rū marū tama pecadutūūwa tangēxma na yeūcūrū pecadu taxūechaxūcèx. ⁸ Rū ñuxma na Cristumaā nayuxū ga tórū maxū ga nuxcūmaūxū, rū nūxū tacuèx na Cristurū tūxū nangēxmaxū i maxū i ngexwacaxūxū. ⁹ Rū nūxū tacuèx rū ñuxma na yuwa ínadaxū ya Cristu, rū tagutāma wena nayu. Yerū nūma rū marū yuxū narūyexera. ¹⁰ Rū yexguma nayuxgu ga Cristu rū pecaducèx nixī ga nayuxū, rū noxtacūma yexma wūxicana ningutanū ga guxūma ga duūxūgūarū pecadugū. Natūrū ñuxma na namaxūxū, rū Tupanacèx nixī i namaxūxū na Tupanaārū ngúchaū naxūxūcèx. ¹¹ Rū ngēxgumarū ta i pema rū name nixī i pegūgu perūxīnūē na marū peyuxū pecaduchaxwa rū Tupanacèx pemaxūxū, erū Ngechuchu ya Cristuarū duūxūgū pixīgū. ¹² Rū ngēmacèx rū tama name i pecadutūūwa pegū pengēxmagūxēē na pemaā inacuáxūcèx. Rū tama name i penaxūchica i pecadu na pexeneārū ngúchaūgū i chixexū pexū naxūxēēxūcèx. ¹³ Rū tama name i pecaduna penaxāgū i pexene na ngēmamaā chixexū pexūgūxūcèx. Rū name nixī i Tupanana pegū pexāgū, erū ñoma duūxūgū i yuexū rū wena maxēxūrū pixīgū. Rū ngēmacèx name nixī i Tupanana penaxāgū i pexene na ngēmamaā mexū pexūgūxūcèx. ¹⁴ Rū ñuxma rū tāūtāma pecadutūūwa pengēxmagū na pemaā inacuáxūcèx. Rū yexguma yema mugū ga Moiché ūmatūxūwe perūxīxgu, rū pemaā inacuèx ga pecadu. Natūrū i ñuxma rū Cristugagu Tupana pemaā namecūma, rū nūma nixī i pemaā inacuáxū i ñuxmax.

Ngēxguma wūxi i corimēxēwa yigū ingēxmagūxēēgu, rū ngēmaga nixī i ixīnūēxū

¹⁵ Rū ñuxma na tama yema Moiché ūmatūxū ga mugūtūūwa ingēxmagūxū, rū ñuxma na Tupana rū Cristugagu tamaā mecūmaxū, ¿rū ñuxācū tá imaxēxū? ¿Rū pexcèx namexū na yeūcūrū pecadu ixūgūechaxū? Rū dūcax, tama name na ngēmaācū imaxēxū. ¹⁶ Rū pema nūxū pecuèx rū ngēxguma wūxi i corimēxēwa pegū pengēxmagūxēēgu na naga pexīnūēxūcèx rū ngēma tá nixī i perū cori ixīxū, rū pema rū norū duūxūgū tá pixīgū i ngēma cori i naga pexīnūēxū. Rū ñuxma rū pema tá nūxū pedaugū ngoxi ngēxūrūxū perū me yixī na ngēmaga pexīnūēxūcèx. Rū ngēxguma pecadu i yuwa tūxū gagūxū perū me yixīgu, rū ngēma tá nixī i pemaā icuáxū. Rū ngēxguma perū me yixīgu na Tupanaga na pexīnūēxū, rū yimaga tá pexīnūē na napēxewa pimexūcèx. ¹⁷ Natūrū Tupanana moxē chaxā, yerū woo pecaduga na pexīnūēchirēxū, natūrū i ñuxma rū aixcūma naga pexīnūē i ngēma ngūxēētae i marū peyaxuxū i Cristuchiga.

18 Rū ñuxma rü Tupanaärü duüxügü pixīgü erü nüma rü chixexüna pexü ínanguxüxëë na tama pecadu pexügüechaxüçèx. Rū ngëmaäcü pexü narüngüxëë na napëxewa pimexüçèx rü meã naxcèx pemaxëxüçèx. 19 Rū ñoma i naãnecüāx i duüxügümaã chidexarüü nixi i tauxchaxü i oremaã pemaã chidexaxü i ñuxmax, erü pema rü woetama taguma nüxü pexínüë i ñaã ore, rü ngürüāchi tãütáma nüxü pecuèx i tacüchiga na yīxü i ngëma pemaã nüxü chixuxü. Rū dücax, rü nuxcüma rü ipenaxã ga pexene na namaã penaxügüxüçèx ga nagúxüraüxü ga chixexü. Natürü i ñuxma rü name nixi i Tupanana pegü pexã na aixcüma napëxewa pexüünegüxüçèx rü naxcëxicatama pemaxëxüçèx. 20 Rü yexguma pecadutüüwa peyexmagügu, rü taxucürüwama Tupanapëxewa mexü pexügü ga yexguma. 21 ¿Natürü tacüwa pexü namexü ga yema chixexü i ñuxma rü wüxi i āne pexna āxü? Yerü yema chixexü rü yuwamare pexü nagagü, rü tama i maxüwa. 22 Natürü marü tama pecadutüüwa pengëxmagü i ñuxmax, erü marü nüxna ípengüü rü marü Tupanaärü duüxügü pixīgü. Rū ngëma waxi nixi i poraäcü pexü mexü erü ngëmagagu penayaxu i maxü i Tupanapëxewa üünexü rü ngëmawena tá penayaxu i maxü i taguma gúxü. 23 Rū ngëma natanü na pecadu íxüxü, rü yu nixi. Natürü yixema törü Cori ya Ngechuchuaxü yaxögüxe, rü Tupana tüxna nanaxãmare i maxü i taguma gúxü.

7

Wüxi i ngecü rü ngëxguma nayutegu rü marü tama ngïtemëxëwa ingëxma. Rü ñuxma na taxcèx nayuxü ya Cristu, rü marü tama yema Moïché ümatüxü ga mugütüüwa tangëxmagü

1 Pa Chaueneëgüx, rü pema na nagu pexixü i ngëma mugü, rü nüxü pecuèx rü ngëxguma tamaüxgüxicatama nixi na ngëma mugütüüwa tangëxmaxü ya wüxichigü ya duüxë. 2 Rü dücax, rü wüxi i ngecü i ätecü rü ngïtemëxëwa ingëxma ega namaxyane ya ngïte, erü ngëma ñanagürü i ore i mugü. Natürü ngëxguma nayuxgu ya ngïte, rü marü tama ngïtemëxëwa ingëxma. Rü yema mugü ga ngïtemëxëwa ngixü yexmaxëëxü ga noxri rü marü tama ngïmaã inacuèx. 3 Rü ngëmaäcü i ngëxguma namaxyane ya ngïte rü to i yatümaã inapexgu, rü pecadu íxü. Natürü ngëxguma marü nayuxgu ya ngïte, rü marü nüxna ínguxuchi i ngëma mugü ga ngïtemëxëwa ngixü yexmaxëëxü ga noxrix. Rü ngëxguma wenaxärü naxãtegu rü taxüma i chixexü íxü. 4 Rü ngëxgumarüü ta i pemax, Pa Chaueneëgüx, rü marü tama yema Moïché ümatüxü ga mugütüüwa pengëxmagü yerü nüma ga Cristu rü pexcèx nayu. Rü ngëmacèx i ñuxma rü Cristu ga yuwa írudacüarü pixīgü. Rü ngëmaäcü nanaxü ya Tupana na naxcèx imaxëxüçèx, rü norü ngúchaü íxügüxüçèx. 5 Rü yexguma nuxcümaüxü ga tacümawe rüxixgu rü poraäcü tanaxü ga taxüneärü ngúchaügü woo yema mugü tüxna na nachuxuxü ga yema. Natürü yexguma nüxü icuèxgu na nachuxuxü ga yema pecadu ga íxüxü, rü yexeraäcü tanaxüxchaü. Rü yemaäcü ga yema törü pecadugü rü yuwa tüxü nagagü. 6 Natürü i ñuxma rü marü tama ngëma mugütüüwa tangëxmagü, erü Tupana rü marü nüxna tüxü ínanguxüxëë. Rü ngëmacèx i ñuxma rü ñoma duüxügü i iyuexürüü tixīgü i napëxewa i ngëma mugü, erü marü tama tamaã inacuèx. Rü ngëmacèx tama nagu taxí i ngëma nuxcüma ümatüxü ga mugü, erü marü nüxna ítanguxü na Tupanaärü ngúchaü íxügüxüçèx rü

naxcèx na imaxèxùcèx namaã i tórü maxŭ i ngexwacaxŭxŭ i Naãe i Üünexŭ tüxna äxŭ.

Ngēma pecadu i chowa ngēxmaxŭ rü chomaã inacuéx

⁷ ¿Rü ñuxŭ ñagŭxŭ tá i ñuxmax? ¿Rü pexcèx rü yema mugü yïxŭ ga tüxŭ pecaduãxèèxŭ? ¿Rü dücax, tama name i ngēmaãcü nagu tarŭxïñüé! Natürü yexguma chi yema mugü rü tama choxŭ nüxŭ nacuéxèègu, rü tãu chima nüxŭ chacuèx na pecadutüüwa chayexmaxŭ. Rü dücax, rü yexguma chi yema mugü rü tãu chima choxŭ nüxŭ cuèxèègu na wüxi i pecadu yïxŭ na toguãxârü ngēmaxŭcèx chiauxächixŭ, rü tãu chima nüxŭ chacuèx na pecadu yïxŭ i ngēma. ⁸ Natürü yexguma yema mugü choxŭ nguxèègu na nachixexŭ na toguãxârü ngēmaxŭ choxŭ ngüchaŭxŭ, rü yexguma ga pecadu rü nayoxnië na yexeraãcü choxŭ na nangüchaŭxèèãxŭ. Rü ngēmaãcü nüxŭ tadau rü ngēxguma chi natauxgu i ngēma mugü, rü tãu chima nüxŭ tacuéxgü na ñuxãcü wüxi i chixexüchixŭ na yïxŭ i ngēma pecadu. ⁹⁻¹⁰ Rü noxri tauta yema mugüxŭ chacuèxgu, rü choma nagu charŭxïñügu rü chame. Natürü yexguma yema mugüxŭ chacuèxgu, rü nüxŭ chicuèxächi na chixexŭ chaxŭxŭ rü ngēma chixexŭcèx rü tá na chayuxŭ. Rü yemaãcü ga yema mugü ga Tupana Moïchéna äxŭ na duŭxŭgŭxŭ namaxèxèèxŭcèx, rü choxŭ nayuxèèãma. ¹¹ Rü nüma ga pecadu rü nayoxnië namaã ga yema mugü. Yerü yexguma yema mugü choxŭ nguxèègu na ñuxãcü nachixexŭ ga yema pecadu, rü yexeraãcü choxŭ nangüchaŭ ga yema pecadu. Rü yemaãcü ga yema pecadu rü choxŭ nawomüxèè rü nayoxnië namaã ga yema mugü rü yuwa choxŭ naga. ¹² Natürü yema mugü rü aixcüma naxüüne i Tupanapèxewa. Rü guxŭma i ngēma Tupana tamaã nüxŭ ixuxŭ rü naxüüne rü aixcüma name rü tüxŭ narüngŭxèè. ¹³ ¿Natürü ñuxãcü nixŭ i ngēma i ñuxmax? ¿Éxna pexcèx rü yema mugü yïxŭ ga yuwa choxŭ gaxŭ? Rü dücax, rü tama ngēmaãcü nixŭ. Erü ngēma pecadu nixŭ i Tupanaârü mugümaã yoxnièxŭ na yuwa choxŭ nagaxŭcèx. Rü ngēmaãcü nüxŭ tacuéx na ñuxãcü poraãcü nachixexŭ i pecadu. Rü yexguma yema mugü choxŭ nguxèègu na ñuxãcü poraãcü nachixexŭ ga yema pecadu, rü yexeraãcü choxŭ nangüchaŭ ga yema chixexŭ rü yexeraãcü chanaxüama ga pecadu. ¹⁴ Nüxŭ tacuéx i ngēma mugü rü Tupanaãe i Üünexŭwa ne naxŭ. Natürü choma rü duŭxŭmare chixŭ, rü ngēmacèx nixŭ i chomaã inacuíxŭ i ngēma pecadu i chaxŭxŭ. ¹⁵ Rü tama nüxŭ chacuèx na tacü choxŭ üpetŭxŭ erü tama chanaxü i ngēma mexŭ i chanaxwèxexŭ na chaxŭxŭ, natürü ngēma chixexŭ i tama chanaxwèxexŭ na chaxŭxŭ rü ngēmaãma nixŭ i chaxŭxŭ. ¹⁶ Natürü i ñuxma na chanaxŭxŭ i ngēma tama chanaxwèxechirèxŭ na chaxŭxŭ, rü ngēmawa nüxŭ chicuèxächi na namexŭ i ngēma mugü. ¹⁷ Rü ngēmacèx i ñuxma rü tama chauechama nixŭ i chanaxŭxŭ i ngēma chixexŭ. Natürü ngēma pecadu i chowa ngēxmaxŭ nixŭ i chomaã icuíxŭ, rü ngēma nixŭ i chixexŭ choxŭ üxèèxŭ. ¹⁸ Rü choma nüxŭ chacuèx rü wüxi i pecaduãxŭ i duŭxŭmare chixŭ, rü ngēmacèx chowa rü nataxuma i tacü i mexŭ. Erü woo chanaxwèxe na mexŭ chaxŭxŭ, natürü tama chomaã nanguxŭ na chanaxŭxŭ. ¹⁹ Erü ngēma mexŭ i chanaxwèxexŭ na chaxŭxŭ, rü tama chanaxŭ. Natürü chanaxüama i ngēma chixexŭ i tama chanaxwèxexŭ na chanaxŭxŭ. ²⁰ Rü ngēxguma chi chanaxüamagu i ngēma chixexŭ i tama chanaxwèxexŭ na chaxŭxŭ, rü meãma nangox na tama chauechama

chanaxūxū. Natürü ngēma pecadu i chowa ngēxmaxū nixī i chomaā icuáxū rü chixexū choxū üxēēxū. ²¹ Rü ngēmaācü nüxū chadau i ñuxācü na chiixū. Rü ngēxguma mexū chaxūxchaūgu rü choxū natauxcha na chixexūāma chaxūxū. ²² Choma rü chauāewa rü chorü me nixī i Tupanaärü mugü, rü naga chaxīnūchaū. ²³ Natürü ñaā chaxune i ñoma i naānecūāx ixixūwa, rü nangēxma i tacü i tama naxūxchaūxū i ngēma chauāē naxwēxexū. Rü ngēma pecadu i chowa ngēxmaxū nixī i chomaā icuáxū rü chixexū choxū üxēēxū. ²⁴⁻²⁵ Rü ngēmaācü i choma rü chauāēwa chayanguxēēchaū i Tupanaärü mugü, natürü ñoma i naānecūāx i chaxune rü nanaxūxchaū i ngēma nanaxwēxexū i pecadu. Rü taxucēxma chataāē i chomax. ¿Rü texē tá nüxna choxū ítanguxuchixēē i ñaā pecadu i chowa ngēxmaxū rü yuwa choxū gaxchaūxū? Rü Tupanana moxē chaxā erü törü Cori ya Ngechuchu ya Cristu rü tá choxū nüxna ínganguxuchixēē.

8

Tupanaāē i Üünexū naxwēxexūācüma tamaxē

¹ Rü ñuxma ya Tupana rü marü taxucēxma nanapoxcue i ngēma duūxügü i Ngechuchu ya Cristuarü duūxügü ixīgūxū. ² Erü Tupanaāē i Üünexū i Ngechuchu ya Cristugagu tüxū maxēxēēxū, rü nüxna tüxū ínganguxūxēē i pecadu na tama yuwa tüxū nagagūxücēx. ³ Rü yema taxūneärü ngúchaūgü rü marü nüxū narüyexera ga yema mugü ga Moiché umatüxū. Rü yemacēx ga yema mugü rü taxucürüwa mexū tüxū naxūxēē. Natürü nüma ga Tupana rü marü nanaxū ga yema taxucürüwa naxūxū ga yema mugü. Yerü ga Tupana rü ñoma ga naānema nanamu ga Nanexūchi. Rü woo taxūne i pecaduāxürüü nixī ga naxūne, natürü nüma ga Nane rü taguma napecaduāx. Rü nüma ga Nane rü törü pecaducēx nayu, rü yemaācü inayanaxoxēē ga norü pora ga yema pecadu ga taxūnewa yexmaxū. ⁴ Rü yemaācü nanaxū ga Tupana na tüxū na natauxchaxūcēx na yanguxēēxū i ngēma tüxū namuxū i ngēma mugü. Erü ñuxma rü tama ñoma i taxūne naxwēxexūācüma tamaxē, natürü Tupanaāē i Üünexū naxwēxexūācüma nixī i imaxēxū. ⁵ Rü yixema tümaxūne naxwēxexūācüma maxēxē, rü naxcēx tadaugü i ngēma ñoma i naānecūāx naxwēxexū. Natürü yixema Tupanaāē i Üünexū naxwēxexūācüma maxēxē, rü ngēma Tupanaāē i Üünexū naxwēxexū nixī i naxcēx tadaugūxū. ⁶ Rü yixema Tupanaāē i Üünexū naxwēxexūcēx daugūxe rü tataāēgü, rü tá tüxū nangēxma i tümäärü maxū i taguma gūxū. Natürü yixema tümaxūne naxwēxexūcēx daugūxe rü ngēma rü tá yuwa tüxū nagagü. ⁷ Rü yixema tümaxūne naxwēxexūcēx daugūxe rü Tupanamaā tarūxuwantügü. Rü tama Tupanaga taxīnūēchaū erü taxucürüwama naga taxīnūē. ⁸ Rü ngēmacēx ya yixema tümaxūneärü ngúchaūwe rüixē, rü taxucürüwa Tupanaärü ngúchaū taxügü. ⁹ Natürü ngēxguma aixcüma pewa nangēxmagu i Tupanaāē i Üünexū rü tama pexeneärü ngúchaū pexü, natürü Naāē i Üünexūärü ngúchaū nixī i pexūxū. Rü yixema tama tüxū nangēxmaxē i Tupanaāē i Üünexū i Cristu tüxna āxū, rü tama Cristuarü duūxū tixī. ¹⁰ Natürü ngēxguma pewa namaxūxgu ya Cristu, rü peāxē rü namaxū erü Cristugagu Tupana pexū nüxū inayarüngüma i perü pecadugu. Rü woo i pexene rü pecadugagu tá nayuama, natürü peāxē rü Cristugagu tá namaxū, erü Tupana pexū nadau na pimexū. ¹¹ Rü ngēxguma pewa namaūxgu i Naāē ya yima Tupana ga Ngechuchu ya Cristuxū írüdaxēēcü,

rū nūmatátama ya yima Cristuxŭ írūdaxēēcū tá wena nanamaxēē i pexene i yuxwēxexŭ, rū Naāē i Ūūnexŭ i pewa maxŭxŭ tá nixī i naxŭxŭ i ngēma. ¹² Rū ngēmacēx, Pa Chaueneēgŭx, rū tanaxwēxe i Tupanaārŭ ngúchaŭ taxŭ, rū tama tanaxwēxe i taxŭne i pecaduāxŭārŭ ngúchaŭ taxŭ. ¹³ Erŭ ngēxguma chi pexeneārŭ ngúchaŭ pexŭxgu rū tá ipeyarŭtauxe. Natŭrŭ ngēxguma Tupanaāē i Ūūnexŭārŭ ngŭxēēmaā ipeyanaxoxēēgu i ngēma pexene ūxchaŭxŭ, rū aixcŭma tá pexŭ nangēxma i maxŭ i taguma gŭxŭ. ¹⁴ Erŭ guxāma ya yixema Tupanaāē i Ūūnexŭ tŭmamaā icuāxe, rū aixcŭma Tupanaxācŭgŭ tixīgŭ. ¹⁵ Yerŭ tama penayauxgŭ ga wŭxi ga naāxē ga pecaduwa pexŭ gagŭxŭ rū ngemagagu wenaxarŭ Tupanaarŭ poxcucēx pemuŭē. Natŭrŭ yema Naāxē ga peyauxgŭxŭ rū Tupanaāxē i Ūūnexŭ i naxacŭgŭ pexŭ ixīgŭxēēxŭ nixī. Rū ngēmatama Naāē i Ūūnexŭ nixī i tŭxŭ rŭngŭxēēxŭ na tama imuŭēxŭcēx na Tupanana ingaicamagŭxŭ rŭ:

“Pa Chaunatŭx”, ñagŭxŭ nŭxŭ. ¹⁶ Rū ngēmatama Naāē i Ūūnexŭ nixī i aixcŭma tŭxŭ nŭxŭ cuēxēēxŭ na Tupanaxācŭgŭ na ixīgŭxŭ. ¹⁷ Rū ñŭxma na Tupanaxācŭgŭ ixīgŭxŭ i yixema, rū nŭxŭ tacuēx rū daxŭgŭxŭ i naānewa tá tanayaxu i ngēma mexŭgŭ i Tupana tŭxna āxchaŭxŭ. Rū ngēmaācŭ Cristumaā tá tŭxŭ nangēxma i tachica i mexŭ i Tupanaxŭtawa, erŭ Cristurŭ ngŭxŭ tingegŭ na yixcŭra wŭxigu namaā mexŭwa ingēxmagŭxŭcēx.

Ngēma mexŭ i yixcŭra tá nŭxŭ idauxŭchiga

¹⁸ Rū dŭcax, choma nagu charŭxŭnŭ rū ngēma ngŭxŭ i ñŭxma ñoma i naānewa ingegŭxŭ, rū taxuŭma nixī i ngēxguma nagu nanguxgu i ngēma mexŭ i yixcŭra tá nŭxŭ idauxŭ i ngēxguma Cristumaā ingēxmagŭgu i daxŭgŭxŭ i naānewa. ¹⁹ Rū ñŭxma rū guxŭma i ŭacŭ i Tupana ūxŭ rū taxŭ i norŭ ngúchaŭmaā ínananguxēēgŭ i ngēma ngunexŭ i nagu tá nataeguxŭ ya Cristu na Tupana guxŭpēxewa naxācŭgŭxŭ iwéxŭ. ²⁰ Rū nŭxŭ tacuēxgŭ rū yexguma pecadu naxŭxgu ga guma nŭxŭraŭcŭ ga yatŭ rū yexguma nixī ga nachixexŭ ga guxŭma ga yema Tupana ūxŭ. Rū tama yema Tupana ūxŭārŭ ngúchaŭ nixī ga yema, natŭrŭ yemaācŭ nŭxŭ naxŭpetŭ yerŭ ga Tupana rū yemaācŭ inaxuneta ga yexguma pecadu naxŭxgu ga guma yatŭ. Natŭrŭ i ñŭxma rū guxŭma ga yema Tupana ūxŭ rū ínananguxēē na ngēma chixexŭwa ínanguxŭxŭcēx. ²¹ Erŭ ngēma ngunexŭ i Tupana tá nagu nadexŭ i naxācŭgŭ na naxŭtawa nangēxmagŭxŭcēx, rū ngēxguma tá ta nixī i chixexŭwa ínanguxŭxēēxŭ i guxŭma ga yema nūmatama naxŭxŭ. Rū ngēmaācŭ wenaxārŭ noxrirŭ tá name i guxŭma. ²² Rū nŭxŭ tacuēx rū ñaa naane rū guxŭma i nawa ngexmaxŭ rū ñoma wŭxi i nge i ixraxacŭchaxŭcŭrŭxŭ poraācŭ ngŭxŭ ninge ñŭxmatáta nawa nangu i ngema ngunexŭ i nagu Tupana wena nangexwacaxŭxēēxŭ i guxŭma. ²³ Rū tama ñaa naanexīcatama nixī i ngŭxŭ ingexŭ i ñŭxma, natŭrŭ yixema i tŭxŭ ngexmaxŭ i Tupanaāxē i Ūūnexŭ rū ta ngŭxŭ tingegŭ ñŭxmatáta nawa nangu na Tanatŭ tŭxŭ dexŭ rū ngexwacaŭxŭ i taxŭnegŭ tŭxna āxŭ. Rū woo tŭxŭ nangexma i Naāxē i Ūūnexŭ ya Tupana tŭxna muxŭ na norŭ ŭgŭ yixŭxŭcēx i ngema mexŭgŭ i Tupana tá tŭxna naxāxŭ i dauxŭgŭxŭ i naanewa, natŭrŭ tanaxwēxe na ngemaxŭchi ingugŭxŭ. ²⁴ Cristu tŭxna nanaxā i maxŭ i taguma gŭxŭ, natŭrŭ ítananguxēēgŭmare na naxŭ-tawa ingugŭxŭ na yayauxgŭxŭcēx i ngēma maxŭ. Natŭrŭ nŭxŭ tacuēx rū ngēxguma chi marŭ nŭxŭ

idaugūgu i ngēma írūnguxēēgūxū, rū taxucèxma tūxcūū ítananguxēēgū. Erū ngēma marū nūxū idauxū, rū taxucèxma ítananguxēē. ²⁵ Natürū ngēxguma tauta nūxū idaugūgu i ngēma írūnguxēēgūxū, rū tanaxwēxe i meā ítananguxēēgūecha ñuxmatáta nūxū idaugū. Rū ngēmaācū nixī i Cristuxū írūnguxēēgūxū. ²⁶ Rū Tupanaāē rū tūxū narūngūxēē ta na iporaexūcèx i ngēxguma ituraegu i tórū ōwa. Rū yixema rū tama nūxū tacuèx na ñuxācū Tupanamaā idexagūxū rū tacūcèx iyumūxēgūxū. Natürū Naāē i Üünexū rū naxauxācūma ore i tama nūxū icuáxūmaā Tupanamaā nidexa rū taxcèx nayumūxē. ²⁷ Rū Tupana ya meā tūxū cuácū rū nūxū nacuèx na ñuxū ñaxūchiga yīxū i ngēma Naāē i Üünexū nūxū ixuxū. Erū ngēma Naāē i Üünexū rū Tupana naxwēxexūācūma Tupanaxū nacèèxū tūmacèx ya yíxema Tupanaārū duūxūgū ixīgūxe.

Cristu rū tūxū naporaexēēāma na taxuūma i guxchaxūgū tūxū narūyexeraxūcèx

²⁸ Rū nūxū tacuèx rū tūmaārū mexūcèx nixī i Tupana ínanguxēēxū i guxūma i ngēma tūxū ūpetūxū ya yíxema nūxū ngechaūgūxe ga nūma nanaxwēxexūācūma tūxū nadexe. ²⁹ Rū woetama nuxcūmama ga Tupana rū marū tūxū nacuèx na texégū tá tixīgūxū ya yíxema noxrū ixīgūxe. Rū noxritama naāne ixūgūgumama tūxū nade na Nanerūū timexū i napēxewa, rū yima Nane rū tūmamaā nayaxūcèx rū tūmamaā inacuáxūcèx ya guxāma ya yíxema naēneēgū ixīgūxe. ³⁰ Rū guxema noxri naāne ixūgūgumama Tupana tūxū dexe, rū tūmacèx naca na noxrū tixīgūxūcèx. Rū guxema tūmacèx naçaxe, rū nūgūcèx tūxū nimexēēgū. Rū guxema nūgūcèx tūxū yamexēēgūxe, rū daxūwa tá tūxū nagagū na guxūgutáma naxūtawa tangēxmagūxūcèx. ³¹ ¿Rū ñuxū ñagūxū tá i ñuxma i ngēmachiga? Rū ngēxguma Tupana taétūwa chogūgu, ¿rū texé tá tūxū rüyexeraxū? ³² Yerū nūma ga Tupana rū tama tūxna nayanuxū ga Nanexūchi. Natürū taxcèx inanamu ga Nane na taxcèx nayuxūcèx i guxāma i yixema. Rū ñuxma na yemaācū taxcèx inamuāxū ga Nane, ¿rū taux ēxna tūxna naxāāxū i guxūma i tacū i inaxwēxexū na naxcèx imaxēxūcèx? ³³ Rū Tupana tūxū nade rū tūxū nixu na napēxewa imexū. Rū ngēmacèx ¿rū texé tá napēxewa tūxū tixugū na ichixexū? Erū Tupanatama nixī ya tūxū ixucū na tūxū nataxuūma i chixexū. ³⁴ ¿Rū texé tá poxcuwa tūxū tamugū i ñuxmax? ¿Pexcèx rū Cristu tá yīxū? Dūcèx, taxucūrūwama ngēmaācū nixī yerū Cristu nixī ga taxcèx yucū na tūxū namaxēēxūcèx. Rū tama ngēxīcatama taxcèx naxū, natürū wenaxārū ínarūda. Rū ñuxma rū Tupanaxūtawa nangēxma rū ngēma āexgacū nixī. Rū ngēma taétūwa nachogū rū Tupanaxū taxcèx nacèèxū. ³⁵ ¿Rū ñuxma rū tacū tá Cristuna tūxū ixīgachixēēxū na tama tūxū nangechaūxūcèx? Rū woo ngūxū ingegūgu, rū ēxna guxchaxūgū tūxū ngēxmagu, rū ēxna duūxūgū Cristugagu taxchi aiegu, rū ēxna itaiyaegu, rū ēxna ingexchirugūgu, rū ēxna āucūmaxūwa ingēxmagūgu, rū ēxna duūxūgū tūxū daixchaūgu, natürū woo guxūma i ngēma tūxū ūpetūgu, natürū ya Cristu rū tāūtáma nūxū narūchau na tūxū nangechaūxū. ³⁶ Natürū guxūguma āucūmaxūwa tangēxmagū, ngēma Tupanaārū ore i ūmatūxū nūxū ixuxūrū. Erū ngēma ore rū ñanagūrū:

“Rū cugagu duūxūgū toxū nadaixchaū rū duūxūgūpēxewa rū ñoma carnerugū i daiwa íxūrū tixīgū”,

ñanagürü i ngēma ore. ³⁷ Natürü woo guxūma i ngēma tūxū na ngu-petūxū, rü Ngechuchu ya Cristu ya tūxū ngechaücü, rü tūxū naporaexēēama na taxuūma i guxchaxūgü tūxū narüyexeraxūcèx, rü bai i tacü. ³⁸⁻³⁹ Rü ngēmacèx aixcūma chayaxō na taxucürüwama tacü Tupanana tūxū ixīgachixēēxū na ngēmaācü tama tūxū nangechaüxūcèx. Rü woo iyuxgu rü woo imaxēgu, natürü Tupana tá tūxū nangechaüēcha. Rü taxucürüwama Tupanana tūxū nixīgachixēē i tacü i norü orearü ngeruūgü, rü ēxna tacü rü ngoxogü rü ēxna tacü i to i poraxū. Rü bai i tacü i ñuxma tūxū üpetūxū, rü bai i tacü i yixcūra tá ngēxmaxū, rü bai i tacü i daxūwa ngēxmaxū, rü bai i tacü i naānetüūwa ngēxmaxū, rü bai i tacü i to i Tupana üxū, rü taxucürüwama Tupanana tūxū nixīgachixēē na tama tūxū nangechaüxūcèx. Rü ngēmaācü nixī i tūxū nangechaüxū ya Tupana nagagu ya tórü Cori ya Ngechuchu ya Cristu.

9

Tupana rü nanade i Yudíugü na norü duūxūgü na yixīgüxūcèx

¹ Dücèx, Pa Chaueneēgüx, rü pemaā tá nüxū chixu i wüxi i ore. Rü ngēma ore i pemaā tá nüxū chixuxū rü aixcūma nixī erü Cristuarü duūxū chixī. Rü tama chidora. Rü chauāēwatama nüxū chacuèx na aixcūma na yīxū i ngēma ore erü Tupanaāē i Üünexū nixī i chauāēmaā icuáxū. ² Rü poraācü changechaü, rü choxū nangúecha i chauāēwa, erü tama nayaxōgü i chautanūxūgü i Yudíugü. ³ Rü aixcūma pemaā nüxū chixu rü guxūguma ngēma chautanūxūgu charūxīnū, rü poraācü chanaxwèxe na Cristuaxū yaxōgüāxū. Rü choma rü aixcūma íchamemare na poxcuwa choxū namuxū ya Tupana rü Cristuna choxū yaxūgachixēēxū ega ngēmaācü chi nüxū chayaxōgüxēēgu rü chanamaxēxēēgu i ngēma chautanūxūgü i Yudíugü. ⁴ Rü nūmagü rü chauxrūü Yudíugü nixīgü. Rü Tupana rü nuxcūmaxūchima namaā inaxuneta na naxācügü yixīgüxūcèx. Rü norü oxigü rü nüxū nadaugü na ñuxācü namexēchixū ga Tupana ga yexguma naxcèx nangoxgux. Rü Tupana rü norü oxigümaā inaxuneta rü ñanagürü nüxū:

“Rü ngēxguma chauga pexīnūēgu rü tá pexū charüngūxēē”, ñanagürü nüxū. Rü Tupana rü nüxna nanaxā ga yema mugü ga Moiché umatūxū. Rü nanangúexēē na ñuxācü nüxū yacuèxüūgüxūcèx. Rü meāma namaā inaxuneta na Cristu rü naxcèx nūma tá namuāxū na namaxēxēēaxūcèx rü nüxna na naxāxūcèx i maxū i taguma gúxū. ⁵ Rü yema nuxcūmaūgüxū ga tórü oxigütaa nixīgü i ngēma Yudíugü, rü ngēmacèx naxcèx ta nixī ga yema uneta ga tórü oxigümaā nüxū yaxuxū ga Tupana. Rü ngēma Yudíugütanūxūwatama nixī ga nabuxū ga Cristu ya Tupanaxūchi ixīcü ya guxūētüwa ngēxmacü. Rü tanaxwèxe i guxūguma nüxū ticuèxüūgü. Rü ngēmaācü yīl. ⁶ Rü ñuxma rü woo tama guxū i Yudíugü na yaxōgüxū, natürü taxucürüwama texé nüxū tixu na Tupana rü tama yanguxēēāxū i ngēma norü uneta. Erü ngēma Yudíugü rü tama aixcūma guxūma Tupanaārü duūxūgü nixīgü. ⁷ Rü tama guxūma i duūxūgü i Abráūtaagü ixīgüxū, rü aixcūma Abráūtanūxū nixīgü i Tupanapēxewa. Yerü ga Tupana rü Abráūmaā nüxū nixu, rü ñanagürü:

“Rü cune ya Ichaátanūxūgü tá nixī i aixcūma cutanūxūgü ixīgüxū i chopēxewa”, ñanagürü. Rü yemaācü namaā inaxuneta woo na nayexmaxū ga togü ga Abráūxācügü. ⁸ Rü ngēmawa meāma nüxū tacuèx rü tama ngēma

na Abráŭtaa tixīgüxcèx nixī i Tupanaxācügü tixīgüxŭ. Natürü yixema aixcūma Tupanaārü uneta nüxŭ ixuxŭrŭŭācūma yaxōgŭxe waxi tixī ya aixcūma Abráŭtaa ixīgŭxe i Tupanapēxewa. ⁹ Yerü naxŭpa ga na nabuxŭ ga Abráŭ nane, rŭ yema Tupanaārü uneta ga Abráŭmaa nüxŭ yaxuxŭ, rŭ ñanagŭrŭ:

“Rŭ naī ya taunecŭarŭ ñŭxgumaācŭ tá wena nuā chaxŭ, rŭ cuxmèx i Chara rŭ tá ixāxācŭ i ngēxguma”,

ñanagŭrŭ. ¹⁰ Natürü tama Abráŭmaaāxīcatama nixī ga yemaācŭ yadexaxŭ ga Tupana. Yerü tórŭ oxī ga Ichaá namèx ga Rebecamaā rŭ ta nidexa ga Tupana. Rŭ ngīma rŭ ngīteaxŭ ixāxācŭ rŭ nataxreēxpŭx ga ngīne. ¹¹⁻¹³ Natürü yexguma tauta nabuegu rŭ taxuŭma ga mexŭ rŭ ēxna chixexŭ naxŭegu ga yema ngīnegŭ, rŭ Rebecamaā nidexa ga Tupana, rŭ ñanagŭrŭ:

“Rŭ ngēma nüxīra buxŭ i cune, rŭ ngēma wixweama buxŭārŭ duŭxŭ tá nixī”,

ñanagŭrŭ ngīxŭ. Rŭ yema dexa rŭ namaā nawŭxigu i Tupanaārŭ ore i ũmatŭxŭ i ñaxŭ:

“Marŭ chanayaxu ya Acobu, natürü nüxŭ chaxo ya Echaŭ”,

ñaxŭ. Rŭ yemaācŭ ga Tupana rŭ ngīmaa nanangoxēē na namèxwa nangēxmaxŭ na tŭxŭ nayaxuxŭ ya yixema woetama nüxŭ ngŭchaŭxē na tŭmacèx naçaxŭ tama nagu naxīnŭācūma i tacŭ rŭ mexŭ rŭ ēxna tacŭ rŭ chixexŭ na taxŭxŭ. ¹⁴ ¿Rŭ ñuxŭ ñagŭxŭ i ñuxmax? ¿Pexcèx rŭ Tupana rŭ chixexŭ naxŭxŭ ga yexguma tama Acobuxŭ nangechaŭxŭrŭrŭ nüxŭ na nangechaŭgu ga Echaŭ? Rŭ dücax, tama chixexŭ naxŭ. ¹⁵ Yerü norŭ orewa rŭ Tupana rŭ Moīchéxŭ ñanagŭrŭ:

“Rŭ ngēxguma chi texémaā chamecŭmachaŭgu, rŭ tŭmamaā tá chamecūma. Rŭ choxŭ tá tangechaŭtŭmŭŭ ya yixema choxŭ ngechaŭtŭmŭŭchaŭxē”,

ñanagŭrŭ. ¹⁶ Rŭ ngēmaācŭ tama ngēma tŭmatama tanaxwèxexŭgagu rŭ ēxna ngēma taxŭxŭgagu nixī i Tupana tŭxŭ yaxuxŭ ya texé. Natürü tŭxŭ nayaxu erŭ nüxŭ tangechaŭtŭmŭŭ. ¹⁷ Rŭ yexgumarŭŭ ta ga Tupana rŭ norŭ ore i ũmatŭxŭwa rŭ ñanagŭrŭ nüxŭ ga Equituaneārŭ āēxgacŭ:

“Rŭ āēxgacŭxŭ cuxŭ chingucuchixēē na cuwa duŭxŭgŭxŭ nüxŭ chadauxēēxŭcèx i ñuxācŭ na chaporaxŭ. Rŭ ngēmaācŭ chanaxŭ na guxŭ i duŭxŭgŭ i guxŭ i nañewa ngēxmagŭxŭ, nüxŭ na cuáxŭcèx i chauchiga”,

ñanagŭrŭ. ¹⁸ Rŭ ngēmaācŭ ya Tupana rŭ nüxŭ tangechaŭtŭmŭŭ ya yixema nüxŭ ngechaŭtŭmŭŭchaŭxē. Rŭ ngēxguma tŭxŭ nataiāchiarŭ maxŭāxēēchaŭgu rŭ tŭxŭ nanataiāchiarŭ maxŭāxēē ya yixema tama nüxŭ cuáxchaŭxē. ¹⁹ Natürü bexmana tá ñacurŭgŭ choxŭ:

“Rŭ ngēxguma chi ngēmaācŭ yixīgu ya Tupana, ¿rŭ tŭxcŭŭ nüxŭ nixu na tagagu yīxŭ na chixexŭ ixŭgŭxŭ rŭ tama naga ixīnŭēxŭ? ¿Rŭ texé tabora na itayanaxoxēēxŭcèx i Tupanaārŭ ngŭchaŭ?” ñacurŭgŭ tá. ²⁰ Natürü Pa Duŭxŭx, ¿texé quixī i cuma rŭ ngēmacèx ngēmaācŭ Tupanaxŭ cuyaxŭgaxŭ? ¿Cuxcèx rŭ ēxna wŭxi i tŭxŭ i waixŭmŭwa ũxŭ rŭ namexŭ i ngēma norŭ ũruŭmaa na ñaxŭ?

“¿Rŭ tŭxcŭŭ ngēmaācŭ choxŭ cuxŭ na ngēmaācŭ chixīxŭcèx i ñuxmax?” ñaxŭ. ²¹ Rŭ ngēma tŭxŭārŭ ũruŭ rŭ waixŭmŭwa nanaxŭ i tacŭ i nŭma naxŭxchaŭxŭ. Rŭ ngēxguma nanaxwèxegu, rŭ ngēma waixŭmŭwa nanaxŭ i wŭxi i tŭxŭ na norŭ meruŭ yīxŭcèx. Rŭ ngēxguma nanaxwèxegu, rŭ

ngēmatama waixūmwā nanaxū i wūxi i tūxū na norū guxchirechixū yīxūcēx. ²² Rū ngēxgumarūūtama nixī i naxūāxū ya Tupana. Erū tūxū nanawéxchaŭ na űuxācū naporaxū i nūma rū űuxācū napoxcuaeāxū i ngēma duŭxūgū i chixexū űgūxū, natūrū poraācū yaxna namaā naxīnū i ngēma duŭxūgū, rū tama paxa nanapoxcue i ngēma ímemaregūxū na napoxcuxū. ²³ Natūrū ga Tupana rū inanawéxchaŭ na űuxācū poraācū tamaā namecūmaxū i yixema na yaxōgūxū. Rū ngēmacēx nixī i nūxū ingechaŭtūmwūgūxū, rū nuxcūmamata tūxū nadexū na naxūtawa ingēxmagūxūcēx i daxūgūxū i naānewa i ngextá ínamexēchixūwa. ²⁴ Rū ngēmaācū i yixema na Yudíugū ixīgūxū, rū tatanūwa Tupana tūxū nidexechi ya űuxre na norū duŭxūgū tixīgūxūcēx. Rū ngēxgumarūū ta i ngēma tama Yudíugū ixīgūxūtanūwa rū nayadexechi i togū. ²⁵ Rū ngēmacēx rū Tupanaārū ore ga Ochéa űmatūxūwa rū űanagūrū:

“Rū ngēma duŭxūgū i tama chorū duŭxūgūchirēx ixīgūxū, rū: ‘Pema rū chorū duŭxūgū pixīgū i űuxmax’, űacharūgū tá nūxū. Rū ngēma duŭxūgū i tama Yudíugūrū nūxū changechaŭchirēxū, rū: ‘Pexū changechaŭ i űuxmax’, űacharūgū tá nūxū. ²⁶ Rū noxri ga Tupana rū yema duŭxūgū ga tama Yudíugū ixīgūxūmaā nūxū nixu, rū űanagūrū nūxū: ‘Pema rū tama chorū duŭxūgū pixīgū’, űanagūrū nūxū. Natūrū yematama nachica ga ngextá nūxū íyemañaxūwa, rū wenaxārū yema duŭxūgū ga tama Yudíugū ixīgūxūmaā nidexa ga Tupana ya Maxēxēerū, rū űanagūrū nūxū: ‘Pema rū chauxacūgū tá pixīgū’, űanagūrū nūxū”.

Rū yema nixī ga Tupanaārū ore ga Ochéa űmatūxū. ²⁷⁻²⁸ Rū Yudíugūchiga rū ta nidexa i Tupanaārū ore, yerū nuxcūmaācū ga norū orearū urūŭ ga Ichaxía rū űanagūrū:

“Rū woo namuxūchichirēx i Yudíugū yima naxnūcū ya taxtūpechinūwa yimacūrū, natūrū noxre tátama nixī i aixcūma nayauxgūxū i maxū i taguma gūxū. Rū paxa tá ínangu ya tórū Cori na napoxcuaeāxūcēx i guxūma i ngēma tama noxrū ixīgūxū”,

űanagūrū ga Ichaxía. ²⁹ Rū nūmatama ga Ichaxía, rū űanagūrū ga űpa:

“Rū ngēxguma chi nūma ya tórū Cori ya guxū i naāneārū yora rū tāū chima íyaxūgūxēēāgu i űuxre i tatanūxūgū i Yudíugū, rū chi itayarūxoxochi, yexgumarūŭ ga na iyanaxogūxū ga guma íānegū ga Chodoma rū Gomora namaā ga guxūma ga yema duŭxūgū ga yéma yexmagūxū”,

űanagūrū ga Ichaxía.

Yudíugū rū tama nayaxōgūchaŭ i ore i mexī i Cristuchiga

³⁰ ¿Rū űuxū űagūxū i űuxmax? Rū pemaā nūxū chixu rū ngēma duŭxūgū i tama Yudíugū ixīgūxū ga tama Tupanacēx daugūxū ga noxrix, rū ngēmatama duŭxūgū nixī i űuxma Tupanapēxewa imexū yerū nayaxōgū. ³¹ Natūrū yema Yudíugū ga nagu íxchaŭxū ga yema Moíchéarū mugū na Tupanapēxewa yamexūcēx, rū ínatūe. ³² ¿Rū űuxācū ínatūe? Dūcēx, ínatūe yerū yema mugūguama naxī na Tupanapēxewa yamexūcēx, rū tama Ngechuchuxaŭ nayaxōgūchaŭ. Rū yemaācū ga Ngechuchu rū yema duŭxūgūcēx rū wūxi ga guxchaxū nixī. ³³ Rū ngēmachiga nixī i Tupanaārū ore i űmatūxū i űaxū:

“Choma rū Yudíugūtanūwa chanamu ya Cristu. Rū nūma rū ngēma Yudíugūcēx rū wūxi i guxchaxū tá nixī erū ngēxguma tama nūxū

yaxōgūāgu rü tá inayarūtauxe. Natürü ngēma duūxūgü i nüxū yaxōgūxū, rü aixcūma tá namaxē”,
ñanagürü.

10

¹ Pa Chaueneēgūx, rü ngēma poraācū chanaxwēxexū rü chorū yumūxēwa Tupanana naxcēx chaçaxū, rü ngēma nixī na guxūma i chautanūxūgü i Yudiūgü na yaxōgūxū rü ngēmaācū aixcūma Tupanaārū na yixīgūxūcēx. ² Rü aixcūma pemaā nüxū chixu, rü nūmagü i Yudiūgü rü aixcūma poraācū Tupanagu narūxīnūē rü nanaxūgūchaū i Tupanaārū ngūchaū. Natürü inatūe erü tama Cristuaxū nayaxōgūchaū na ngēmaācū Tupanapēxewa yamexūcēx. ³ Rü woo Tupana ñoma ga naānewa nanamu ga Cristu na gumagagu Tupanapēxewa yamexūcēx i duūxūgü, natürü nūmagü i Yudiūgü rü tama nüxū nacuēxgūchaū i ngēma. Rü nūgūtama nimexēēgūchaū, rü ngēmacēx nagu naxīāma i ngēma mugü ga Moiché ūmatūxū rü tama Cristuaxū nayaxōgūchaū na nagagu Tupanapēxewa yamexūcēx. ⁴ Natürü nūma ga Cristu rü nayanguxēē ga yema mugü rü yemaācū inayanaxoxēē na tama tamaā inacuaūxūcēx i ngēma mugü. Rü yemaācū nanaxū ga Cristu na guxūma i duūxūgü i nüxū yaxōgūxū rü aixcūma Tupanapēxewa yamexūcēx. ⁵ Rü Moiché nanaxūmatū nachiga na ñuxācū Tupanapēxewa tamexū ya wūxie ega naga taxīnūgu i ngēma mugü, rü ñanagürü:

“Tupana pexū namu na guxūgutāma meā peyanguxēēxū i guxūma i ngēma mugü erü ngēxguma naga pexīnūēgu i guxūma i ngēma mugü rü tá pemaxē. Natürü ngēxguma tama naga pexīnūēgu i wūxitama i ngēma mugü, rü tāūtāma pemaxē”,
ñanagürü. ⁶ Natürü ñuxma rü Tupanapēxewa time ega Cristuaxū yaxōgūgu. Rü ngēmacēx taxucēxma i cuāēwa rü ñacurūgü:

“¿Texé tá daxūgūxū i naānewa taxū na Cristucēx tayaçaxū na nuā naxūxūcēx rü tūxū yanangūxēēxūcēx na imexūcēx i Tupanapēxewa?”
ñacurūgü. ⁷ Rü taxucēxma cuāēwa ñacurūgü:

“¿Rü texé tá yuexūtanūwa taxū na ngēxma Cristucēx tayadauxūcēx na nuā tanagaxūcēx?” ñacurūgü. ⁸ Erü tama ngēmaācū nixī i Cristucēx idauxū, yerü yema ore ga Moiché ūmatūxū rü ñanagürü:

“Rü marü cuxūtawa nangēxma i Tupanaārū ore. Rü cuēxwa nangēxma na nüxū quixuxūcēx. Rü cuāēwa nangēxma na nagu curūxīnūxūcēx”,
ñanagürü. Rü ñuxma Pa Chaueneēgūx, rü pemaā nüxū chixu rü ngēmatama ore nixī i guxūwama duūxūgūmaā nüxū tixuxū. Rü ngēma ore nixī i pexū nüxū cuēxēēxū na ñuxācū pexū nangēxmaxū i maxū ega aixcūma peyaxōgūgu. ⁹ Erü ngēxguma cuēxmaā nüxū quixuxgu na curü Cori yīxū ya Ngechuchu, rü ngēxguma cuāēwa cuyaxōxgu na yuwa Tupana inadxēēxū, rü tá cuxū nangēxma i maxū i taguma gūxū. ¹⁰ Erü taāēwa tayaxōgü na ngēmaācū Tupanapēxewa imexū. Rü taēxmaā nüxū tixu na Ngechuchu rü tórü Cori yīxū, rü ngēmaācū tanayaxu i maxū i taguma gūxū. ¹¹ Rü Tupanaārū ore i ūmatūxūwa rü ñanagürü:

“Rü guxāma ya yīxema ya Ngechuchuaxū yaxōxē, rü nūma ya Ngechuchu rü taxūtāma tūxū narūmaāchiixēē erü tá nayanguxēē i guxūma i ngema tūmamaā inaxunetaxū”,

ñanagürü. ¹² Rū Tupanapēxewa rū guxūma i duūxūgū rū nawūxigu. Rū woo Yudíugū yixígu rū éxna woo tama Yudíugū yixígu, natürü Tupanapēxewa rū nawūxigu i guxūma i duūxūgū. Erü nūma ya tórü Cori, rū guxāārü Cori nixí. Rū nūma rū aixcūma tūxū namaxēxēē ya guxāma ya texé ya nūxna caxe na tūxū namaxēxēēxūcèx. ¹³ Erü Tupanaārü ore i ūmatūxūwa rū ñanagürü:

“Rū guxāma ya texé ya tórü Corina caxe na tūxna naxāāxūcèx i maxū, rū tá tanayaxu i tūmaārü maxū i taguma gúxū”,

ñanagürü. ¹⁴ ¿Natürü ñuxācū tá tórü Corina naxcèx tacagū, ega tama nūxū tayaxōgūgu? ¿Rū ñuxācū tá nūxū tayaxōgū, ega taguma nūxū taxīnūēgu i nachiga? ¿Rū ñuxācū tá nūxū taxīnūē i norü ore, ega taguma texé tūmamaā nūxū ixuxgu? ¹⁵ ¿Rū ñuxācū tá texé nūxū tixu i Cristuchiga ega taxūema tūxū nūxū yarūxuxēēgu? Rū ngēmacèx nixí i Tupanaārü ore i ūmatūxū i ñaxū:

“Rū wūxi i taāē nixí na ínangugūxū i Tupanaārü orearü uruūgū na duūxūgūmaā nūxū yaxugūxūcèx i Tanatüarü ore i mexū i Cristuchiga”,

ñaxū. ¹⁶ Natürü tama guxūma i duūxūgū naga naxīnūē i ngēma ore i mexū. Rū Ichaxía nūxū ixuxürü nixí. Yerü ga nūma rū ñanagürü:

“Pa Corix, noxretama nixí i ngēma duūxūgū i toxū yaxōgūxū i ngēma ore i nūxū tixuxū”,

ñanagürü. ¹⁷ Rū dücax, rū ngēma na Cristuchigaxū naxīnūēxūwa nixí i ne naxūxū na yaxōgūāxū i duūxūgū. Rū ngēma nūxū naxīnūēxū, rū ore i mexū i Cristuchiga nixí. ¹⁸ Natürü i ñuxma rū pexna chaca, ¿éxna pexcèx rū ngēma Yudíugū rū taguma nūxū naxīnūē i ngēma ore i mexū i Cristuchiga? Dücèx, ngēmaācū marü nūxū naxīnūē. Erü Tupanaārü ore i ūmatūxūwa rū ñanagürü:

“Rū ngēma Tupanaārü orearü uruūgū, rū guxūwama i ñoma i naānewa rū nūxū nixugūe i norü ore. Rū ngextá ínangēxmagūxūwa i Yudíugū, rū ngēma rū ta nūxū nixugūgū”,

ñanagürü i ngēma ore. ¹⁹ Natürü wena pexna chaca, ¿rū ngēma Yudíugū rū tama éxna nūxū nicuēxāchitanü na Cristugagu yīxū na Tupana nadexū i duūxūgū i ñuxmax? Rū ngēmaācū nūxū nacuēxgū. Yerü Tupanaārü ore ga Moiché ūmatūxūwa rū ñanagürü:

“Dücèx, Pa Yudíugūx, choma rū tá chanamaxēxēē i ngēma duūxūgū i tama Yudíugū ixīgūxū, rū ngēmacèx i pema rū tá pixāūxāchigū. Rū ngēxguma chanamaxēxēēgu i ngēma togū i duūxūgū i tama choxū cuēxgūchiréxū, rū pema i Yudíugū rū tá penuē erü nūxū charūngūxēē i ngēma togū”,

ñanagürü. ²⁰ Rū yemawena ga Ichaxía, rū tama namuū ga yema Yudíugūmaā nūxū na yaxuxū ga yema Tupanaārü ore ga ñaxū:

“Rū ngēma duūxūgū i tama Yudíugū ixīgūxū i tama chauxcèx daugūxū, rū choxū tá inayangaugū. Rū choma rū tá chaugū changōxēē naxcèx i ngēma duūxūgū i tama chauxcèx ícagūchiréxū”,

ñaxū. ²¹ Rū Tupana rū Ichaxíawa Yudíugūchiga nidexa rū ñanagürü:

“Rū guxū i ngunexūgu rū nūxna chaxuecha i ngēma duūxūgū i tama chauga ínūēchaūxū rū chomaā nuēxū. Natürü tama choxū inarūxīnūēchaū”,
ñanagürü.

11

Nangēxma i űuxre i Yudiugü i Tupana dexü na aixcüma noxrü yixigüxcēx

¹ űuxma pexna chaca rü, ¿pexcēx ēxna ya Tupana rü marü nüxü naxo i norü duüxügu i Yudiugü? Tama nixi i nüxü naxoxü. Erü choma i Pauru rü Yudiü chixi. Rü Abráűtanüxü chixi, rü Abráűtaa ya Beyamítanüxü chixi. ² Rü nuxcümamata Tupana Yudiugümaã inaxuneta na norü duüxügu yixigüxcēx, rü űuxma rü tama Yudiugüxü naxo. ¿Tama ēxna nüxü pecuēx na űuxü űaxü ga Tupanaärü orearü uruü ga Ería? Rü Tupanaärü orewa nüxü tadaugü rü Ería rü Tupanapēxewa poraãcü yema Yudiugüxü nixugü. ³ Rü űanagürü ga Ería:

“Pa Corix, ngēma Yudiugü rü marü nanadai i curü orearü uruügu. Rü nagu napogüe i ngēma nachicagü i ngextá duüxügu cuxü űicuēxüügüxüwa. Rü chaxicatama íchayaxüächi. Rü choxü rü ta nimēxgüchaü”,

űanagürü ga Ería. ⁴ Natürü Tupana nanangãxü, rü űanagürü:

“Dücēx, choma rü marü choxü nangēxma i 7000 i yatügu i chaugüxü chidexechixü. Rü nümagü rü taguma nüxü nicuēxüügü i ngēma tupanetachicünēxã i Baá”,

űanagürü. ⁵ Rü ngēxgumarüü ta nixi i űuxmax. Rü woo muxüma i Yudiugü tama nayaxögü, natürü nangēxma i űuxre i Tupana namaã mecümaxügagu dexü. ⁶ Rü űuxma na Tupana tüxü ngechaüxügagu tüxü nadexü, rü taxucürüwama texé nüxü tixu na űacü rü mexü na ixügüxügagu na yixixü. Erü ngēxguma chi űacü rü mexü ixügüxügagu yixgu na tüxü nadexü, rü natücxmamare chi nixi na nüxü ingechaütümüxügüxü. ⁷ ¿Rü űuxãcü yixü i űuxmax? Rü ngēma rümumaēxü i Yudiugü rü tama nüxü inayangaugü i ngēma maxü i naxcēx nadaugüxü. Natürü ngēma noxretama i Yudiugü i Tupana dexü, rü ngemagü nixi i nüxü iyangaugüxü. Rü guxüma ga yema togü ga Yudiugü rü Tupana ínanawogü yerü tama naga naxñüe. ⁸ Rü ngēmachiga nixi i Tupanaärü ore i ümatüxü i űaxü:

“Tupanatama ngēma duüxügüaxü nanaguxchaxēē. Rü ngēmacēx woo nüxü nadaugügu i ngēma ore i aixcüma ixixü, rü tama nüxü nacuēxgüēga. Rü woo nüxü naxñüēgu i ngēma ore, rü tama nayaxögü. Rü űuxma rü ta ngēmaãcü nixi”,

űanagürü. ⁹ Rü Dabí rü ta rü űanagürü:

“Rü ngēma duüxügu rü norü petacēx naxügüxü i õnagügagu rü norü muxüma i ngēmaxügügagu rü chixexügu tá nayi rü ngēmacēx tá napoxcue. ¹⁰ Rü naãēwa rü täütáma nüxü nacuēxgü, rü guxchaxügü tá nüxü nangēxma. Rü űoma wüxi i duüxü i űacü i yaxü ípaxixürüü tá nixigü namaã i norü guxchaxügü”,

űanagürü.

Tupana nanamaxēxēē i ngēma tama Yudiugü ixigüxü

¹¹ Rü pexna chaca, rü űuxma na Cristüxü naxoexü i ngēma Yudiugü, ¿rü pexcēx ēxna rü ngēmacēx ya Tupana rü tá nüxü naxoxochixü? Tama nüxü naxo. Natürü űuxma na tama Cristuaxü yaxögüãxü i ngēma Yudiugü, rü ngēmacēx ya Tupana rü nüxü narüngüxēē rü nana-maxēxēē i ngēma tama Yudiugü ixigüxü. Rü ngēmaãcü nanaxü ya Tupana na yaxäüxächieücēx i ngēma Yudiugü, rü Cristuaxü na yaxögüãxücēx. ¹² Rü yema na ínatüexü ga yema Yudiugü, rü yemagagu muxüma ga

togü ga duïxügü nanayauxgü ga Tupanaârü ngüxêê i taxü. Rü yema na noxretama ga Yudíugü nayaxögüxü, rü yemagagu Tupana nanamaxêê ga yema tama Yudíugü ixíguxü. Natürü ngëxguma tá Tupanacèx nawoeguxgu i guxüma i Yudíugü, rü Tupana rü tá yexeraâcü nüxü narüngüxêê i guxüma i ngëma duïxügü i tama Yudíugü ixíguxü. ¹³⁻¹⁴ Rü ñuxma Pa Duïxügü i Tama Yudíugü Ixíguxüx, rü choxü nangëxma i wüxi i ore i pemaã nüxü chixuxchaüxü. Rü dücax, petanüwa nixí i choxü namuxü ya Tupana na pemaã nüxü chixuxçèx i norü ore. Rü ñuxma rü aixcüma meã chayanguxêê i ngëma puracü, erü chanaxwèxe na pexü nadaugüxü i ngëma chautanüxü i Yudíugü na ñuxâcü Tupana pexü na rüngüxêêxü. Rü ngëmaâcü tá nixâüxâchie i ñuxre i nümagü, rü tá Cristuaxü nayaxögü, rü ngëmaâcü tá nanayauxgü i maxü i taguma gúxü. ¹⁵ Nüxü tacuèx rü ngëma Yudíugü rü tama Cristuaxü nayaxögüchaü i ñuxmax. Rü ngëmacèx ya Tupana rü nanade i ngëma togü i duïxügü i tama Yudíugü ixíguxü. Natürü ñuxma na ngëmaâcü yíxü, çrü ñuxâcü tá nixí i ngëxguma Cristuaxü yaxögüâgu i ngëma Yudíugü, rü wena Tupana nadexgu? Rü wüxi i mexèchixü tá nixí naxcèx i ngëma Yudíugü. Erü ñoma wüxi i duïxü i yuxü rü wenaxârü maxüxürüü tá nixígu. ¹⁶ Rü Tupana rü wena tá nanade i ngëma Yudíugü i ngëxguma yaxögüâgu. Rü ngë-maâcü tá nixí, yerü nuxcümaücü ga nanatü ga Abráü rü Tupanaârü duïxü nixí. Rü ngëmacèx i nataagü i Yudíugü rü Tupanaârü duïxügü ta nixígu. Rü ñoma wüxi i pãü i Tupanana ixâxürüü tá nixí. Erü ngëxguma ngëma pãüwa íraxü Tupanaârü yixígu, rü ngëmawa nüxü tacuèx na guxüma i ngëma pãü rü noxrü na yíxü. Rü ngëma wüxi i nanetü i Tupanana ixâxürüü tá nixí. Rü ngëxguma ngëma nanetüchumèxã rü Tupanaârü yixígu, rü ngëmawa nüxü tacuèx na guxüma i ngëma nanetü rü noxrü na yíxü. Rü ngëmaâcü tá nixí i ngëma Yudíugümaã nangupetüxü, erü wüxi i ngunexügu rü guxüma i nümagü rü Tupanacèx tá nawoegu. ¹⁷ Tupana nüxü naxo ga yema Yudíugü ga tama yaxögüchaüxü. Rü ñoma wüxi i oríxchacüü i idaexürüü nixí ga yema Yudíugüxü naxoxü. Natürü nachicüü Tupana pexü nade woo tama Yudíugü na pixíguxü. Rü wüxi i naixnecüüâx i oríxchacüü rü oríx i toxüwa yarüñaxcuchixürüü pixígu. Rü ñuxma i pema rü ta pexü nangëxma i pechica i natanüwa i ngëma duïxügü i Tupanaârü ixíguxü. Rü Tupana rü pexü narüngüxêê rü pexü rü ta namaxêêê. ¹⁸ Natürü pema i tama Yudíugü na pixíguxü, rü tama name i pegü picuèxüü rü nüxü pixu na ngëma Yudíugüarü yexera pixíguxü. Rü ngëxguma chi ngëmaâcü pegü picuèxüügüchaügu, rü name nixí i nüxna pecuèxâchie na tama petanüwa ne naxüxü ga Cristu ya pexü maxêêêcü, natürü Yudíugütanüwa nixí ga ne naxüxü. Rü ngëma Yudíugügagu nixí i Tupana pexü dexü rü pexü namaxêêêxü i ñuxmax. ¹⁹ Natürü bexmana tá ñaperügügu:

“Tupana rü marü nüxü naxo ga yema Yudíugü rü yemacèx nachicüü tükü nade”, ñaperügügu tá. ²⁰ Ngëmaâcü aixcüma nixí ga Tupana nüxü oxü ga yema Yudíugü yerü tama nayaxögü. Rü ngëma na peyaxögüxüçèxicatama nixí i nachicüü Tupana pexü dexü i ñuxmax. Rü ngëmacèx tama name i pegü picuèxüügu. ¡Natürü pexuãëgü na tama yema Yudíugüxü üpetüxürüü pexü üpetüxüçèx! ²¹ Yerü yema Yudíugü ga noxri Tupanaârü ixíguxü, rü Tupana nüxü naxo yerü tama nayaxögü. Rü yexguma yemaâcü Tupana nüxü oxgu ga yema duïxügü rü pexü rü tá ta naxo ega täütama peyaxögüechagu. ²² Dücèx, na ñuxâcü namecümaxü ya Tupana. Natürü tükü napoxcu ta ega tama

aixcūma yaxōgūgu. Rū nanapoxcue ga yema duūxūgū ga chixexūgu yixū, natürü pemaã rü namecūma. Natürü penaxwēxe i guxūguma nūma nanaxwēxexūācūma pemaxē rü peyaxōgū na guxūguma pemaã namecūmaēchaxūcēx. Erü ngēxguma tama nūma nanaxwēxexūācūma pemaxēgu rü tama peyaxōgūechagu, rü tātūtāma pemaã namecūma. Rū pexū rü tá ta naxo, rü tá pexū ínawogū. ²³ Natürü ngēxguma yaxōgūāgu i ngēma Yudíugū i ñuxma maxēxū, rü woo Tupana na nūxū oxū ga noxrix, natürü wena táxarū nanade erü nūxū nangēxma i pora na wenaxārū nadeāxūcēx ega aixcūma yaxōgūāgu. ²⁴ Rū pema na tama Yudíugū na pixīgūxū, rü tama Tupanaārū duūxūgū pixīgū ga noxrix. Natürü Tupana pexū nade na noxrū pixīgūxūcēx. Rū ñuxma na yemaācū Tupana pexū dexū, rü ngēxguma yaxōgūāgu i ngēma Yudíugū, rü Tupana rü pexū nadexūārū yexera tá nūxū natauxcha na nadeāxū i ngēma Yudíugū, yerü woetama norü duūxūgūchirēx nixīgū ga noxrix.

Wūxi i ngunexū rü guxūma i Yudíugū tá nanayauxgū i maxū i taguma gúxū

²⁵ Pa Chaueneēgū i Yaxōgūxūx, nangēxma i wūxi i ore ga noxri tama duūxūgūxū nūxū nacuēxēēxū ga Tupana. Natürü chanaxwēxe i nūxū pecuēx i ngēma ore na tama nagu perūxīnūēxūcēx na duūxūgū i nūxū cuēxūchixū pixīgūxū, rü pexicatama Tupana pexū dexū. Rū dūcax, noxretama nixī i ngēma Yudíugū i aixcūma yaxōgūxū. Rū ngēmaācū tá nixī ñuxmatáta yaxōgūā i guxūma i ngēma togū i duūxūgū i Tupana dexū. ²⁶ Natürü ngēmawena rü guxūtāma i Yudíugū rü tá ta nayaxōgū, rü tá nanayauxgū i maxū i taguma gúxū. Erü Tupanaārū ore i ūmatūxūwa rü ñanagūrū:

“Yima Cristu ya ínanguxūxēēcū, rü Yudíugūtanūwatama ne naxū. Rū nūma rü tá Yudíugūxū chixexūwa ínanguxūxēē. ²⁷ Rū aixcūma norü pecaduwa tá íchananguxūxēē i ngēma Yudíugū. Rū ngēxguma tá nixī na aixcūma chayanguxēēxū i ngēma chorū uneta ga ūpaxūchima Abráūmaā nūxū chixuxū”,

ñanagūrū ga Tupana. ²⁸ Natürü i ñuxma ya Tupana rü Yudíugūxū nadau na norü uwanūgū yīxū erü tama nayaxōgū i ngēma ore i mexū. Natürü ngēmaācū naxūpetū na pexū natauxchaxūcēx na peyaxōgūxū i pema i tama Yudíugū na pixīgūxū. Natürü nūma ya Tupana rü ñuxma rü ta ngēma Yudíugūxū nangechaū yerü nuxcūmaūgūxū ga norü oxīgūmaā inaxuneta na nūxū tá nangūxēēxū. ²⁹ Rū ngēxguma Tupana rü ūcū i mexūmaā inaxunetagu, rü aixcūma nayanguxēē i ngēma, rü taguma nūxū inayarūngūma. Rū ngēxgumarū ta i ngēxguma texécēx nacaxgu, rü taguma nūxū inayarūngūma i ngēma. ³⁰ Rū pema na tama Yudíugū pixīgūxū, rü ūpa rü tama Tupanaga pexīnūē. Natürü ñuxma na tama naga naxīnūēxū i Yudíugū, rü ngēmacēx Tupanaāxū pengechaūtūmūgū erü peyaxōgū i pemax. ³¹ Rū ngēma pexū ngu-petūxūrū nixī i ngēma Yudíugūxū nangupetūxū. Nūmagū rü tama Tupanaga naxīnūē i ñuxmax, natürü ngēmaācū nūxū nangupetū na Tupanaāxū pengechaūtūmūgūxūcēx, rü nūmagū rü ta Tupanaāxū nangechaūtūmūgūxūcēx i ñuxmax. ³² Yerü nūma ga Tupana rü guxūma ga duūxūgūmaā nanaxuegu na chixexūwa nangēxmagūxū nagagu ga norü pecadugū. Natürü yemaācū namaā nanaxuegu ga Tupana na nūxū nangechaūtūmūgūxūcēx i guxūma i duūxūgū. ³³ Rū namexēchi ya tórū Tupana, rü poraācūxūchima tūxū narūngūxēē. Rū nūma rü nūxū

nacuèxüchi erü guxüxüma nacuèx. Rü yixema rü taxucürüwama nüxü tacuèx i tüxcüü yïxü i tüxü nadexü, rü taxucürüwama nüxü tacuèx i guxüma i ngëma naxüxü i nümax. ³⁴ ¿Erü texé i tatanüwa nüxü tacuèx i guxüma i ngëma tórü Cori nagu rüxüxü? ¿Rü texé nüxü tacuèx na tórü Corixü taxucüxüxü? ³⁵ ¿Rü texé tüxira tacü rü ämare tórü Corina taxä, na yixcama nüxü tacümaä tüxü nataeguxëëxüxcèx? ³⁶ Erü guxüma i tacü ingëmaxü rü Tupanaxütawa ne naxï. Rü nüma nixï ga naxüäxü ga guxüma na noxrü yïxüxcèx. Rü name nixï i guxüguma nüxü ticuèxüügü rü tanataxëë. Rü ngëmaäcü yï.

12

Pexü chacèèxü na pegütama Tupanana pexägüxü na wüxi i ämare i maxüxü na pixïgüxüxcèx

¹ Rü dücax, Pa Chaueneëgüx, ñuxäcü Tupana poraäcüxüchima tamaä namecüma. Rü ngëmacèx pexü chacèèxü na pegütama Tupanana pexägüxü na wüxi i ämare i maxüxü na pixïgüxüxcèx. Rü ngëma ämare nixï i aixcüma napëxewa ünexü rü namaä nataäexü. Rü ngëmaäcü nixï ya Tupana i nanaxwëxexü na nüxü picuèxüügüxü. ² Rü tama name i ñoma i naänecüäx i duïxügücümagu pexï. Natürü name nixï i Tupanana pegü pexägü na nüma pexü naxüchicüüxüxcèx rü ngexwacaxüxü i peäë pexü ngëmaxüxcèx rü ngëmaäcü naxcèxicatama pemaxëxüxcèx. Rü ngëmaäcü tá nüxü pecuèx i tacü nixï i Tupana pexü naxwëxexü na penaxüxü, rü tacü nixï i aixcüma mexü i napëxewa, rü tacü nixï i namaä nataäexü. ³ Rü Tupana ya chomaä mecümacü, rü choxü namu na pemaä nüxü chixüxcèx i guxäma i pema na tama namexü na texé i petanüwa tügü írütaxü rü tügügu tarüxüxü na togüarü yexera tïxü. Natürü name nixï na wüxichigü meä tügü ngugüarü maxüäxü rü tügügu rüxüxü na ñuxäcü Tupana tüxna naxäxü i tümaärü cuèx wüxigu namaä i tümaärü ö. ⁴ Rü dücax, rü taxünewa nangëxma i taeru rü tachacüügü rü taparagü rü muxüma i to i taxüneärü ngëmaxügü. Rü wüxichigü i ngëma taxüneärü ngëmaxügü rü nüxü nangëxma i noxrütama puracü. ⁵ Rü ngëxgumarü ta i yixema na yaxögüxü, rü woo na imuxü natürü wüxitama i duïxügü tixïgü, erü Cristuarü duïxügü tixïgü. Rü ngëmacèx i guxäma i yixema rü yigümücügü tixïgü, erü woetama wüxitama i duïxügü tixïgü. ⁶ Rü wüxichigü i yixema, rü Tupana tüxna nanaxä i tórü cuèx i nüma nanaxwëxexü na tüxü nangëmaxü. Rü tanaxwëxe i meäma nagu taxï i ngëma cuèx i Tupana tüxna äxü. Rü ngëxguma tüxna naxäägu i tórü cuèx na norü orearü uruü ixïgüxcèx, rü name nixï i ngëma ö i tüxü ngëmaxümaä tanaxü i ngëma puracü. ⁷ Rü ngëxguma tüxna naxäägu i tórü cuèx na togüxü rüngüxëëgüxüxcèx, rü name nixï i meäma tanaxü i ngëma. Rü ngëxguma texéna naxäägu i tümaärü cuèx na togüxü tangüxëëxüxcèx, rü name nixï i meäma tanaxü i ngëma. ⁸ Rü yixema nüxü cuäxe na Tupanaärü oremaä togüxü tataäxëëxü, rü name nixï i meäma tanaxü i ngëma. Rü yixema nüxü cuäxe na togümaä tangauxü i tümaärü ngëmaxü, rü name nixï i tümaärü ngüchaümaä tanaxü i ngëma. Rü yixema äëxgacü ixïxë rü name nixï i meäma tayanguxëë i ngëma puracü. Rü yixema nüxü cuäxe na togü tüxü ngechaütümüügüxü, rü name nixï i taäëäcüma tanaxü i ngëma.

Ñuxäcü nanaxwëxe na namaxëxü i duïxügü i Cristuaxü yaxögüxü

⁹ Rū name nixī i aixcūma meāma pegū pengechaūgū i wūxichigū. ;Rū nūxū pexo i guxūma i tacū i chixexū ixīxū! ;Rū nagu pexī i ngēma aixcūma mexū ixīxū! ¹⁰ Rū name nixī i wūxichigū pegū pengechaūgū, űoma pegūeneūchixū pengechaūxūrū. Rū name nixī i naxcēx pedaugū na űuxācū peeneēgūxū petaxēēxū rū űuxācū pegū perūngūxēēxū. ¹¹ Rū tama name i cuxo ega tacū rū puracū cuxū namuxgu ya tōrū Cori. Natūrū name nixī i curū ngūchaūmaā cunaxū i norū puracū. ¹² Rū name nixī i petaāēgū erū ipenanguxēē na Tupanaxūtawa pengugūxū. Rū ngēxguma tacū rū ngūxū pexū ngupetūgu, rū name nixī i yaxna namaā pexīnūē. ;Rū tama name i nūxū perūchaue na peyumūxēgūxū! ¹³ Rū ngēxguma nūxū pedēuxgu na tacū nūxū taxuxū i ngēma togū i yaxōgūxū, rū name nixī i nūxū perūngūxēē. ;Rū meā penayaxu i ngēma duūxūgū i pexūtagu naxīānexū! ¹⁴ Rū ngēxguma chi texē chixri pemaā űpetūgu, rū name nixī i tūmacēx peyumūxēgū na meā tūxū naxūpetūxūcēx. Rū ngēmaācū name nixī i Tupanana tūmacēx peca na tūxū nangūxēēxūcēx rū tama tūxū napoxcuxūcēx. ¹⁵ ;Rū wūxigu tūmamaā petaāēgū ya yīxema taāēgūxel! ;Rū wūxigu tūmamaā pexauxe ya yīxema ngechaūgūxe rū auxexe! ¹⁶ ;Rū meā pegū pengechaūgū i wūxichigū! ;Rū tama pegū picūxūūgū! ;Rū namaā pegū pewūxiguxēē i ngema tama nūgū icūxūūgūxū! ;Rū tama pegūgu perūxīnūē na togūarū yexera nūxū cuēxūchigūxū na pixīgūxū! ¹⁷ Rū ngēxguma texē chixexū pemaā űxgux, ;rū tāūtāma chixexūmaā pexūtanū! Natūrū name nixī i naxcēx pedau na mexū pexūxū i guxū i duūxūgūpēxewa. ¹⁸ ;Rū naxcēx pedau na guxūma i duūxūgūmaā meā pemaxēxū rū namaā na iperūngūxmūxūcēx i guxūguma! ¹⁹ Pa Chaueneēgū ya Pexū Changechaūgūxe, tama name i pegūtama pexūtanū ega texē tacū rū chixexū pemaā űxgu. Natūrū name nixī i Tupanamēxēgu penaxū i ngēma na nūma napoxcūāxūcēx. Erū Tupanaārū ore i űmatūxūwa rū űnagūrū:

“Rū choxmēxwa nangēxma na duūxūgūxū chapoxcuxū i norū chixexūcēx. Rū choma tá nūxū chanaxūtanū i ngēma duūxū i chixexū űxū”,

űnagūrū ya tōrū Cori. ²⁰ Rū ngēxguma tacū rū chixexū cumaā naxūxgu i togū, rū tama name i chixexūmaā cunataeguxēē. Natūrū name nixī i nagu quixū i Tupanaārū ore i űaxū,

“Rū ngēxguma curū uwanū taiyēxgu, ;rū nachibūxēē! Rū ngēxguma yatawaxgu, ;rū naxaxexēē! Erū ngēxguma ngēmaācū cunaxūxgu, rū poraācū tá cunaxānexēē”,

űaxū. ²¹ Rū ngēxguma togū chixexū cumaā űxgux, rū name nixī i cuxuāē na tama chixexūgu cunguxūcēx. Rū name nixī na mexū cuxūxū namaā i ngēma duūxū. Rū ngēmaācū tá icuyanaxoxēē i ngēma chixexū i cumaā naxūxchaūxū.

13

¹ Rū name nixī i guxūma i duūxūgū rū meā nōrū āēxgacūga naxīnūē. Erū Tupana nixī ya nūxū unetacū i guxūma i āēxgacūgū. Erū nataxuma i āēxgacū i tama Tupana ingucuchixēēxū. ² Rū ngēmacēx, texē ya tama tūmaārū āēxgacūga űnūchaūxē, rū Tupanaga nixī i tama taxīnūxū. Rū yīxema tama naga űnūēchaūxē, rū tá tapoxcue. ³ Erū ngēma āēxgacūgū rū tama ngēma mexū űgūxūārū poxcuruū nixī, natūrū ngēma chixexū űgūxūārū poxcuruū nixī. Rū ngēxguma cunaxwēxgu na tama nūxū

cumuūxū i wūxi i āēxgacū, rū name nixī i meā cumaxū. Rū nūma i āēxgacū rū tá cumaā nataāē. ⁴ Erū nūma i āēxgacū rū Tupanaārū ngūxēēruū nixī rū ngēmacēx nanamu na cuxū nangūxēēxūcēx. Natūrū ngēxguma chixri cumaūxgu, rū ngēxguma tá waxi nixī i nūxū cumuūxū. Erū nūma i āēxgacū rū tama natūcēxma nixī na nūxū nangēxmaxū i pora na cuxū napoxcuxū. Erū woetama Tupana nanamu na napoxcuāxūcēx i ngēma duūxū i chixri maxūxū. ⁵ Rū ngēmacēx name nixī i naga cuxīnū i curū āēxgacūgū. Rū tama ngēma poxcuxū na cumuūxūcēxicatama nixī i namexū na naga cuxīnūxū, natūrū name nixī i naga cuxīnū erū marū nūxū cucuēx na namexū i ngēma. ⁶ Rū ngēmacēx name nixī i meā nūxū penaxūtanū i ngēma dīēru i perū āēxgacūgūcēx ixīxū i ngēma nūmagū nagu naxunetaxūēxpūx na nūxū penaxūtanūxūcēx. Erū ngēma āēxgacūgū rū Tupanaāxū nixī i napuracūexū i ngēxguma naxūāgu i ngēma puracū na pemaā inacuāxū. ⁷ Rū wūxichigū i ngēma āēxgacūgū, rū name nixī i nūxna penaxā i ngēma nūxna ūxū. ¡Rū nūxū penaxūtanū i ngēma dīēru i perū āēxgacūgū nagu unetaxūēxpūx na nūxū penaxūtanūxū! ¡Rū penaxūx i ngēma īāneārū puracū i perū āēxgacūgū pexū muxū na penaxūxūcēx! ¡Rū nūxū pengechaūgū rū naga pexīnūē i ngēma perū āēxgacūgū! Erū ngēmaācū nixī i namexū na penaxūxū. ⁸ Rū tama name i texéaxū ꜜacū pengetanū. Natūrū nangēxma i wūxitama i ngetanū i taguma tūxū ingutanūxū. Rū ngēma nixī na yigū ingechaūgūxū. Rū ngēmacēx ya yīxema aixcūma tūmamūcūxū ngechaūxē rū marū tayanguxēē i guxūma i ngēma Tupana tūxū muxū. ⁹ Rū űanagūrū i Tupanaārū mugū:

“¡Rū tāūtāma naī i ngemaā icupe! ¡Rū tāūtāma cumāēta! ¡Rū tāūtāma cungīx! ¡Rū tāūtāma toguāxārū ngēmaxū cuxū nangūchaū!”

űanagūrū. Natūrū ngēma mugū rū guxūma i togū i Tupanaārū mugūmaā rū wūxigu nanu nagu i norū ore i űaxū:

“¡Rū nūxū nangechaū i cumūcū na cugūtama cungechaūxūrū!”

űaxū. ¹⁰ Rū yīxema tūmamūcūxū ngechaūxē, rū taxuūma i chixexū namaā taxū. Rū ngēmacēx i ngēxguma tamūcūxū ingechaūgu, rū aixcūma tayanguxēē i Tupanaārū mugū. ¹¹ Rū name nixī i tanaxū i guxūma i ngēma, erū űomaūcūū rū nangēxma i muxūma i guxchaxūgū. Rū name nixī i pegū īpemexēē rū paxa penaxū i tórū Coriarū puracū. Erū űuxma rū noxri yaxōgūguarū yexera űingaicamachigū i ngēma ngunexū i naga tá taxcēx nataeguxū ya tórū Cori. ¹² Rū woo na naporaxū i Chatana i űoma i naānewa i űuxmax, natūrū paxa tá nagux i ngēma, rū paxa tá ínangu ya Cristu na nūgūxūtawa tūxū nagagūxūcēx. Rū ngēmacēx name nixī i nūxū tarūxoe i guxūma i chixexū ixūgūxū. Rū űuxma na nūxū icuāxū i Tupanaārū ore, ¡rū ngīxā yigūna tadaugū na tama nagu iyixūcēx i ꜜacū rū chixexūgū! ¡Rū ngīxā meā tamaxē na ngēmaācū nūxū rüyexeragūxūcēx i guxūma i chixexū! ¹³ ¡Rū ngīxā mexū taxūgū rū meā tamaxē! Erū aixcūma Cristuarū duūxūgū tixīgū, rū tanaxwēxe i nūma nanaxwēxexūācūma tamaxē. Rū tama name na ingāxēxū rū na naxūgūxū i petagū i chixexū i duūxūgū nawa āūgatanūxū. Rū tama name i tingēāēmare rū ēxna to i chixexū taxūgū, rū bai na yigū ichoxūgagūxū, rū bai i togūchi ixaiexū naxcēx i norū ngēmaxūgū. ¹⁴ Natūrū name nixī i nacūmagu pexī ya tórū Cori ya Ngechuchu ya Cristu, rū nūxna naxcēx peca na pexū nangūxēēxūcēx na meā naxcēx pemaxēxūcēx. Rū tama name i naxcēx pedaugū na űuxācū pexeneārū ngūchaū na pexūgūxū.

14

Tama name i nüxü quixu i cueneē i yaxōxü

¹ Rū ngēxguma petanūgu naxāxchaūgu i wūxi i peeneē i tama perūū meā Tupanaārū orexū cuáxū, rū name nixī i meā penayaxu. Natürū tama name i namaā pegü pechoxūga naxcèx i nacūmagü i nagu yaxūxū i Tupanapēxewa. ² Rū dücax, nangēxma i ñuxre i taeneēgü i nagu rüxīnūēxū na namexū na guxūraūxū i ōna nangōxgūxū. Natürū nangēxma i togü i taeneēgü i tama aixcūma meā Tupanaārū orexū cuēxgūxū i tama namachi ngōxgūchaūxū. Rū nūmagü nüxū nacuēxgūgu rū Tupanapēxewa nachuxu na ſacü rū namachi nangōxgūxū, rū ngēmacèx nixī i nabü rū orixgūxicatama nangōxgūxū. ³ Rū ngēxguma tangēxmagu ya texé ya namachi ngōxē, rū tama name i nüxū taxoox i ngēma togü i duūxūgü i tama namachi ngōxgūxū. Rū ngēxgumarūū ta ya yixema tama namachi ngōxē, rū tama name na nüxū tixuxū i ngēma duūxūgü i namachi ngōxgūxū, erü nūmagü rū ta Tupanaārū duūxūgü nixīgü. ⁴ ¿Rū texé quixī i cuma rū ngēmacèx nüxū quixu i to i coriarū duūxūgü? Rū dücax, pemaā nüxū chixu rū ngēma norü cori tá nixī i nangugūxū rū ngoxi mexū naxūx i ngēma norü duūxū, rū ēxna tama. Rū ngēma duūxū rū Tupanapēxewa rū tá name, erü nūma ya tórü Cori ya Cristu rū nüxū nangēxma i pora na nügücèx namexēēāxū i ngēma duūxū. ⁵ Rū dücax, nangēxma i ñuxre i duūxūgü i nagu rüxīnūēxū na ngūxchigaarü ngunexū rū togü i ngunexūārū yexera namexū na nagu Tupanaxū yacuēxūūgūxū. Rū nangēxma i togü i duūxūgü i nagu rüxīnūēxū na guxūma i ngunexūgü rū nawūxiguxū i Tupanapēxewa. Natürū wūxichigü i yixema rū tanaxwēxe i meā taāēwa nüxū tacuèx na aixcūma Tupanapēxewa namexū i ngēma taxūxū rū tixōxū. ⁶ Rū yixema duūxē ya ſacü rū ngunexū Tupanacèx íxūxūchixe, rū ngēmaācū tanaxū na ngēma ngunexūgu tórü Corixū ticuèxūūxūcèx. Rū yixema namachi ngōxē, rū ngēmaācū tanangōx na tórü Corixū ticuèxūūxūcèx, rū Tupanana moxē taxā naxcèx i ngēma tangōxū. Rū yixema tama namachi ngōxē, rū ngēmaācū tanaxū na tórü Corixū ticuèxūūxūcèx, rū tūma rū ta Tupanana moxē taxā naxcèx i ngēma nabü i tangōxū. ⁷ Rū ñuxma na ñoma i naānewa imaxēxū, rū taxūema tūgücèxtama tamaxū rū ēxna tūgücèxtama tayu. ⁸ Erü ñuxma na imaxēxū, rū tórü Coriarū ngūchaū na ixūgūxūcèx nixī i imaxēxū. Rū ngēxguma iyuegu, rū ngēma rū ta tórü Corimēxēwa nangēxma. Rū ngēmaācū nüxū tadau rū woo imaxēgu rū ēxna woo iyuegu, rū tórü Coriarū duūxūgü tixīgü, rū namēxwa tangēxmagü. ⁹ Rū yemacèx nixī ga nayuxū ga Cristu rū wenaxārū namaxūxū na tūmaārū Cori yīxūcèx ga guxāma ga guxema yaxōgūxe ga marü yuexe rū guxāma ya yixema yaxōgūxe ya ñuxma rū ta maxēxē. ¹⁰ Rū ngēmacèx Pa Chaueneēx, ¿rū tūxcūū i nüxū quixuxū i cueneē i yaxōxū? Rū cumax, Pa To i Chaueneēx, ¿rū tūxcūū i nüxū cuxoxū i cueneē? Erü guxātāma i yixema rū Tupanapēxewa tá tangugü na nūma tūxū nangugūxūcèx rū ngoxi ime rū ēxna tama. ¹¹ Erü Tupanaārū ore i ūmatūxūwa rū ñanagürü ya tórü Cori:

“Ngēma aixcūma na chamaxūxürüū tá ta nixī i aixcūma guxūtāma i duūxūgü chopēxegu caxāpūxūgūxū, rū guxūtāma choxū icuèxūūgūxū”,

ñanagürü. ¹² Rū ngēmaācū nüxū tacuèx na wūxichigü i yixema rū aixcūma tá Tupanapēxewa na ingugūxū na namaā nüxū ixuxūcèx na ñuxācū imaxēxū rū ſacü na ixūxū.

Tama name i chixexūgu cunanguxēē i cueneē i yaxōxū

¹³ Rū ngēmacèx nixī, Pa Chaueneēgūx, i tama namexū na tamüçügūxū ixuechaū. Natürü narümemaē nixī i nüxū perüxoe i guxūma i řacü i peeneēgūxū pecadugu yixēēxū rü ēxna norü õxū chixexēēxū. ¹⁴ Choma nüxū chacuèx rü nataxuma i õna i Tupanapēxewa chixexū. Rü aixcūmaxūchi nüxū chacuèx i ngēma erü tórü Cori ya Ngechuchu ya Cristuarü duūxū chixī, rü nūma choxū nüxū nacuèxēē i ngēma. Natürü ngēxguma chi texé nagu rüxīnūgu na tama Tupanapēxewa namexū i řacü rü õna na tangōxū, rü name nixī i noxtacūma tama na tanangōxū ega nagu tarūxīnūgu na tama namexū i ngēma. ¹⁵ Rū ngēxguma ngēma cungōxūcèx tūmaāewa cunanguxēēgu ya cueneē, rü cumaā nüxū chixu rü tama aixcūma tūxū cungechaū. Rü tama name i ngēma cungōxūgagu chixexūgu tūxū cunguxēē rü tūxū icuyarūtauxēē ya yixema cueneē ya Cristu tūmacèx yuxe. ¹⁶ Rū ngēmacèx, woo cuxcèx namexgu i ngēma cuxūxū, natürü tama name na cunaxūamaxū ega ngēmacèx togü tá cuxū ixuxgu na pecadu yīxū i ngēma cuxūxū. ¹⁷ Rū ngēma Tupanapēxewa na imexūcèx rü tama řacü rü õna na ingōxū rü ēxna řacü rü axexū na ixaxūxūgagu nixī. Natürü napēxewa na imexūcèx rü tanaxwèxe i Naāē i Ūñexūārü ngūxēēmaā meā tayanguxēē i ngēma Tupana naxwèxexū rü yigūmaā itarūngūxmūē rü aixcūma tataāēgū napēxewa ya Tupana. ¹⁸ Rū yixema ngēmaācū Cristucèx maxūxē, rü Tupana rü tūmamaā nataāē, rü guxūma i duūxūgū rü ta tūmamaā nataāēgū. ¹⁹ Rū ngēmacèx, jngīxā naxcèx tadaugū i guxūma i nacūma i mexū i yigūmaā tūxū rüngūxmūēxēēxū! jRü ngīxā yigū tarūngūxēē na yexeraācū iyaexūcèx i tórü õwa rü Tupanaārü orewa! ²⁰ Rū tama name i řacü rü õna na cungōxūgagu icuyanax-oxēē i Tupanaārü puracü i cueneēārü maxūwa. Rü aixcūma nixī i guxūma i õnagū i namexū i Tupanapēxewa. Natürü wūxi i chixexū nixī ega ngēma õna i ingōxūgagu chixexūgu nayixēēgu i taeneēgū. ²¹ Rū ngēmacèx tama name i cunangōx i namachi, rü ēxna cuyaxaxū ya binu, rü ēxna cunaxū i řacü i to, ega ngēmagagu chixexūgu cunanguxēēgu i cueneē i yaxōxū. ²² Rū ngēxguma cuma nagu curūxīnūgu na namexū na cunangōxū i ngēxūrūūxūmare i õna, rü Tupanapēxewa rü name nixī i cuxicatama nüxū cucuèx i ngēma. Rü tataāē ya yixema tūmaāewa nüxū cuāxe na Tupanapēxewa namexū i ngēma taxūxū. ²³ Natürü ngēxguma wūxie nagu rüxīnūgu na tama namexū i Tupanapēxewa na řacü rü õna na tangōxū, rü pemaā nüxū chixu rü chixexū taxū ega tanangōxomagū, erü tūmaāewa nagu tarūxīnū na tama aixcūma namexū i ngēma taxūxū. Rü guxūma i ngēma tūmaāewa nagu tarūxīnūxū na nachixexū rü aixcūma pecadu taxū ega tanaxūamagu.

15

Name nixī i cumüçüxū cutaāxēxēē

¹ Rū yixema na iporaexū i tórü õwa, rü name nixī i nüxū tarūngūxēē i ngēma tamüçügū i turaexū i norü õwa. Rü tama name i yigūguxicatama tarūxīnūē rü tóxrūcèxicatama tadaugū. ² Natürü wūxichigū i yixema rü name nixī i taeneēāxū tanangūchaūxēē na ngēmaācū nüxū rüngūxēēxūcèx na yexeraācū yaxōōxūcèx. ³ Yerü woo ga Cristu rü tama noxrūtama ngūchaū naxū. Natürü nayanguxēē ga yema Tupanaārü ore ga ñaxū:

“Pa Chaunatūx, rü ngēma duūxūgū i cumaã guxchigagūxū, rü chomaã nixī i naguxchigagūxū”,

ñaxū. ⁴ Rū guxūma ga yema nuxcūma ūmatūxū ga Tupanaārū orewa, rü naxūmatū na tūxū nanguxēēxūcēx na taguma nūxū rūxoexū ega woo tacū rü guxchaxū tūxū ūpetūgu. Rū yema Tupanaārū ore rü naxūmatū na tūxū nataāēēxūcēx rü tūxū nūxū nacuēxēēxūcēx na aixcūma Tupanaārū ixīgūxū. ⁵ Rū Tupana nixī ya tūxū rūngūxēēcū na yaxna namaã ixīnūēxūcēx i guxūma i guxchaxūgū. Rū nūma nixī i tūxū nataāēēxūcēx. Rū chanaxwae i nūma ya Tupana pexū narūngūxēē na aixcūma ngēma Cristu pexū naxwaexūācūma pemaxēxū. ⁶ Rū chanaxwēxe na ngēmaācū pemaxēxū na guxāma i pema rü wūxigu nūxū picuēxūūgūxūcēx ya Tupana ya Nanatū ya tōrū Cori ya Ngechuchu ya Cristu.

Duūxūgū i tama Yudiūgū ixīgūxūmaã nūxū nixu i ore i mexū

⁷ Rū ngēmacēx, yema Cristu pexū na dexūrū rü name nixī i wūxichigū meã pegū peyaxu na ngēmaācū Tupanaxū yacuēxūūgūxūcēx i duūxūgū. ⁸ Rū pemaã nūxū chixu rü Cristu nūma naxū na Yudiūgūxū yanangūxēēxūcēx, na yemaācū yanguxēēāxūcēx ga yema uneta ga nuxcūmaūgūxū ga tōrū oxigūmaã nūxū yaxuxū ga Tupana. Rū yemaācū ga Cristu rü tūxū nūxū nadauxēē na aixcūmacū na yīxū ya Tupana rü aixcūma yanguxēēāxū i ngēma norū uneta. ⁹ Rū yexgumarūū ta ga Cristu rü nūma naxū naxcēx i ngēma duūxūgū i tama Yudiūgū ixīgūxū na nūmagū rü ta Tupanaxū yacuēxūūgūxūcēx naxcēx na poraācū Tupanaāxū nangechaūtūmūūgūxū. Rū yemachiga nixī ga yema Tupanaārū ore ga Dabī ūmatūxū ga ñaxū:

“Rū ngēmacēx guxū i nachīūānecūāx i duūxūgūpēxewa tá cuxū chīcuēxū. Rū tá chorū wīyaewa cuxū chataxēē”,

ñaxū. ¹⁰ Rū toxnamana i Tupanaārū ore i ūmatūxūwa rü ñanagūrū:

“Pa Duūxūgū i Tama Yudiūgū Ixīgūxū, rü name nixī i pema rü wūxigu chorū duūxūgū i Yudiūgūmaã petaāēgū”,

ñanagūrū. ¹¹ Rū toxnamana, rü ñanagūrū ta:

“Pa Duūxūgū i Tama Yudiūgū Ixīgūxū, rü name nixī i nūxū picuēxūūgū ya tōrū Cori. Rū Pa Guxūma i Nachīūānecūāx i Duūxūgūx, rü name nixī i penataxēē”,

ñanagūrū. ¹² Rū Ichaxīa rü ta nanaxūmatū rü ñanagūrū:

“Rū Dabī nanatū ya Ichaīwa tá ne naxū i wūxi i nataa i tá Cristu ixīxū. Rū nūma tá nixī i norū āēxgacū yīxū i guxūma i ngēma duūxūgū i tama Yudiūgū ixīgūxū. Rū ngēma duūxūgū rü tá aixcūma nūxū nayaxōgū rü tá ínananguxēēgū na yimagagu Tupana nūxū rūngūxēēgūxū”,

ñanagūrū. ¹³ Rū ñuxma i pema na nūxū peyaxōgūxū rü chanaxwēxe i poraācū pexū nataāēxēē ya yima Tupana ya pexū rūngūxēēcū na meã Cristuxū ípenanguxēēgūxūcēx. Rū ngēmaācū i Tupanaāē i Ūūnexū rü tá pexū naporaexēē na yexeraācū Cristuxū ípenanguxēēgūxūcēx.

¹⁴ Pa Chaueneēgūx, meāma nūxū chacuēx na guxū i duūxūgūmaã pemecūmaxū, rü aixcūma Tupanaxū na pecuāxū, rü aixcūma meāma pegū pixucuxēgūxū. ¹⁵ Natūrū ñaã poperawa rü meāma pexcēx chanaxūmatū i ñuxre i Tupanaārū ucuxēgū, erū tama chanaxwēxe i nūxū ipeyarūngūmaē. Rū tama chamuū na pexcēx chanaxūmatū i ngēmachiga yerū Tupana nixī ga choxū mucū na pemaã nūxū chixuxcēx.

¹⁶ Rū nūma nixī ga choxū namuxū na Ngechuchu ya Cristuarū puracū chaxūxūcēx i natanūwa i ngēma duūxūgū i tama Yudiūgū ixīgūxū. Rū

ngēma puracū ga nawa choxū namuxū nixī na ngēma duūxūgūmaā nūxū chixuxū i ore i mexū na Tupanaxūtawa chanagagūxūcèx, na wūxi i āmare i Tupana namaā taāēxū i ngēma duūxūgū i Naāē i Ūūnexū imexēēgūxū. ¹⁷ Rū űuxma na Ngechuchu ya Cristuarū duūxū na chīxū, rū ngēmacèx chataāē namaā i ngēma puracū i Tupanaāxū chaxūxū. ¹⁸⁻¹⁹ Rū űuxma rū yema Cristu chorū maxūwa ūxūchigaxūxīcatama nixī i chixuxū. Rū nūma nixī ga choxū nangūxēēxū na Tupanaxūtawa chanagagūxūcèx ga yema duūxūgū i tama Yudiūgū ixīgūxū, na nūmagū rū ta Tupanaga naxīnūēxūcèx. Rū yemaācū chorū oremaā, rū chorū puracūmaā, rū cuēxruūgū ga taxū ga Tupana ūxūmaā, rū Naāē i Ūūnexūārū poramaā Tupanaxūtawa chanagagū ga yema duūxūgū. Rū yemaācū Yerucharēūwa rū guxūwama űuxmata Ilīricuarū naānewa meāma chayanguxēē na nūxū chixuxū ga yema ore i tūxū maxēxēēxū i Cristuchiga. ²⁰ Rū yemaācū chapuracū na nūxū chixuxūcèx ga Tupanaārū ore i mexū ga ngextá taguma űuxgu Cristuchigaxū ínaxīnūēxūwa ga duūxūgū. Yerū tama chanaxwèxe ga marū togū nūxū íxuxūwa rū duūxūgū marū nūxū ícuáxūwa nūxū na chixuxū ga yema ore. ²¹ Rū yemachiga nixī ga Tupanaārū ore ga Ichaxía ūmatūxū ga űaxū:

“Rū yíxema taguma Cristuchigaxū cuèxgūxe, rū taguma nachigaxū ínūēxē, rū tá nūxū tacuèxgū i nachiga”,
 űaxū.

Pauru rū Dumawa naxūxchaū

²² Rū yema toxnamana na chapuracūxūcèx nixī ga taxucūrwā petanūwa chaxūxū woo muēxpūxcūnachirēx yēma chaxūxchaū. ²³ Natūrū űuxma na marū chanaguxēēxū i ngēma puracū i toxnamana, rū nagu charūxīnū na petanūwa chaxūxū. Yerū űuxgumamatama nixī ga nagu charūxīnūēchaxū na petanūwa chaxūxchaūxū. ²⁴ Rū ngēxguma Españawa chaxūxgu, rū nagu charūxīnū na woe pexūtagu íchidauxū. Rū nagu charūxīnū na űuxre i ngunexū ngēxma petanūgu charūxāūxū. Rū wūxi i chorū taāē tá nixī i ngēma. Rū ngēmawena rū chanaxwèxe i choxū perūngūxēē na Españawa chaxūxūcèx. ²⁵ Natūrū i űuxma rū Yerucharēūwa tá chaxū, na ngema chanangexūcèx i űuxre i dīēru naxcèx i taeneēgū i ngēma ngēxmagūxū. ²⁶ Erū ngēma taeneēgū i yaxōgūxū i Machedóniāānewa rū Acayaanewa ngēxmagūxū, rū norū ngūchaūmaā nagu narūxīnūē na ngīxū nanutaquēxegūxū i űuxre i dīēru na ngēmaācū nūxū nangūxēēgūxūcèx i taeneēgū i nūxū nataxuxū i Yerucharēūwa ngēxmagūxū. ²⁷ Rū ngēma taeneēgū i Machedóniācūāx rū Acayacūāx rū norū me nixī na ngēmaācū naxūgūāxū. Rū ngēma duūxūgū rū aixcūma nūxū nangēxma i norū ngetanū i taeneēgū i Yudiūgūtanūwa. Erū ngēma taeneēgū i Yudiūgūgagu nixī i ngēma togū i duūxūgūtanūwa nanguxū i Tupanaārū ore. Rū űuxma rū name nixī i ngēma togū i duūxūgū rū norū ngēmaxūmaā taeneēgū i Yudiūgū i yaxōgūxūxū narūngūxēēgū. ²⁸ Rū ngēxguma chanaguxēēgu i ngēma puracū, rū ngēxguma taeneēgū i Yudiūgūna marū ngīxū chaxāxgu i ngēma dīēru, rū Españawa tá chaxū. Rū ngēxguma ngēma chaxūxgu, rū tá woe pexūtagu íchidau. ²⁹ Rū nūxū chacuèx rū ngēxguma petanūwa changuxgu, rū wūxigu tá tataāēgū, erū nūma ya Cristu tá tūxū nataāēxēē i ngēxguma ngēmaācū wūxiwa ingēxmagūgu. ³⁰ Pa Chaueneēgūx, tórū Cori ya Ngechuchu ya Cristuégagu, rū ngēma na Naāēārū ngūxēēmaā choxū pengechaxūgagu pexū chacēēxū na Tupanana chauxcèx pecaxū i perū yumūxēwa. Rū

ngēmaācū tá choxū perüngūxēē nawa i ñaā puracū i Tupana choxna āxū. ³¹ ¡Rū Tupanana peça na choxū ínapoxūxúcèx nūxna i ngēma Yudiugū i Yudéaanewa ngēxmagūxū i tama yaxōgūxū! ¡Rū nūxna peça naxcèx i ngēma taeneēgū i yaxōgūxū i Yerucharéūwa ngēxmagūxū, na taāēācūma nayauxgūāxūcèx i ngēma dīeru i ngēma naxcèx changexū! ³² Rū ngēmaācū ngēxguma Tupana naxwèxegu, rú taāēācūma petanūwa tá changu, na wūxigu pemaā chataāēxūcèx. ³³ Rū chanaxwèxe na pemaā inaxūxū ya Tupana ya tūxū taāēxēcū. Rū ngēmaācū yī.

16

Pauru rú nūxū narūmoxē ga yema duūxūgū ga yaxōgūxū ga Dumawa yexmagūxū

¹ Rū ñuxma na petanūwa naxūxchaūxū i taeyèx i Febe, rú pemaā ngīxū chixu rú wūxi i taeyèx i mecū iyixī. Erū ngīma rú nūxū irüngūxēē i ngēma yaxōgūxū i Chēcréaarū ñānēwa ngēxmagūxū. ² Rū chanaxwèxe i meā ngīxū peyaxu, naegagu ya tórū Cori ya Ngechuchu, erū ngēma nixī i mexū na penaxūxū namaā i guxūma i yaxōgūxū. Rū chanaxwèxe i guxūma i tacū i ngīxū taxuxūwa rú ngīxū perüngūxēē, erū ngīma rú poraācū togūxū irüngūxēē, rú choxū rú ta irüngūxēē. ³ ¡Rū nūxū perūmoxēgū i Prisila rú Aquiru! Rū nūmagū rú chomūcūgū nixīgū i Ngechuchu ya Cristuarū puracūwa. ⁴ Rū nūmagū rú āūcūmaxūwa nichocu na chauétūwa nachogūexūcèx, na tama chayuxūcèx ga chomax. Rū ngēmacèx moxē nūxna chaxā. Rū tama chaxicatama moxē naxcèx nūxna chaxā, natūrū moxē nūxna naxāgū ta i guxūma i taeneēgū i yaxōgūxū i tama Yudiugū ixīgūxū. ⁵ ¡Rū nūxū perūmoxēgū ta i guxūma i taeneēgū i Aquirupatawa ngutaquēxegūūxū! ¡Rū ngēxgumarū ta nūxū perūmoxēgū ya chomūcū ya nūxū changechaūcū ya Epenétu! Rū nūma nixī ga nūxīra Cristuaxū yaxōōxū ga Áchiaanewa. ⁶ ¡Rū ngīxū perūmoxēgū i María ga poraācū petanūwa Tupanaāxū puracūcū! ⁷ ¡Rū nūxū perūmoxēgū i chautanūxūgū i Aūdrrūnicu rú Yūniā ga wūxigu chomaā poxcuexū! Rū nūmagū nixī i yatūgū i aixcūma Tupana imugūxū i guxūma i yaxōgūxū nūxū ngechaūgūxū. Rū nūmagū rú nūxīra chauxūpa Cristuaxū nayaxōgū. ⁸ ¡Rū nūxū perūmoxēgū ya Aūpriātu ya chomūcū ya nūxū changechaūcū ya chauxrū tórū Coriaxū yaxōcū! ⁹ ¡Rū nūxū perūmoxēgū ya Urubánu ya tomūcū ixīcū i Cristuarū puracūwa! ¡Rū ngēxgumarū ta nūxū perūmoxēgū ya Estaqui ya nūxū changechaūcū! ¹⁰ ¡Rū nūxū perūmoxēgū ya Apere ya aixcūma tūxū nūxū dauxēcū na ñuxācū Cristuaxū yaxōōxū! ¡Rū ngēxgumarū ta nūxū perūmoxēgū i Aritūburutanūxūgū! ¹¹ ¡Rū nūxū perūmoxēgū i chautanūxū i Erudiū! ¡Rū ngēxgumarū ta nūxū perūmoxēgū i Narsíchutanūxū i tórū Coriaxū yaxōgūxū! ¹² ¡Rū ngīxū perūmoxēgū i Trifena rú Trifocha! Rū ngīmagū rú tórū Coriaxū ipuracūe. ¡Rū ngēxgumarū ta ngīxū perūmoxēgū i taeyèx i Péchida i ngīxū ingechaūgūcū! Rū ngīma rú marū poraācū tórū Coriaxū ipuracū. ¹³ ¡Rū nūxū perūmoxēgū ya Rufu ya aixcūma meā tórū Coriaxū yaxōcū! ¡Rū ngēxgumarū ta ngīxū perūmoxēgū i naē ga chauerū chomaā ixīcū! ¹⁴ ¡Rū nūxū perūmoxēgū i Achícritu, rú Peregúte, rú Erme, rú Patroba, rú Erma, rú guxūma i togū i taeneēgū i natanūwa ngēxmagūxū! ¹⁵ ¡Rū nūxū perūmoxēgū ta i Firóru, rú Yúria, rú Neréu, rú naēyèx, rú Oripa, rú guxūma i togū i taeneēgū i yaxōgūxū

i natanūwa ngēxmagūxū! ¹⁶ Rū chanaxwèxe i pegū pengechaūgūācūma pegū perūmoxēgū i wūxichigū. Rū guxūma i ngēma yaxōgūxū i toxnamana ngēxmagūxū, rū pexū narūmoxēgū. ¹⁷ Pa Chaueneēgūx, pexū chacēēxū na pegūna pedaugūxūcēx nūxna i ngēma duūxūgū i pexū itoyechaūxū rū chixexūgu pexū yixēēgūchaūxū. Erū ngēma duūxūgūarū nguxēētae rū tama namaā nawūxigu i ngēma nguxēētae ga noxri peyaxgūxū ga yexguma noxri peyaxōgūgu. Rū name nixī i noxtacūma nūxna pixīgachi i ngēma duūxūgū rū tama natanūgu pexāgū. ¹⁸ Erū ngēma duūxūgū rū tama tōrū Cori ya Ngechuchu ya Cristuarū ngūchaū naxūgū, natūrū noxrūtama ngūchaū nixī i naxūgūxū. Rū ore i tauxchaxūgūmaā nayaxucūxēgū i duūxūgū, rū ngēmaācū nanawomūxēēgū i ngēma duūxūgū i tama meā nūxū cuēxgūxū. ¹⁹ Rū guxūma i duūxūgū nūxū nacuēxgū na aixcūma meā Tupanaga pexīnūēxū i pemax. Rū ngēmacēx pemaā chataāē i chomax. Rū chanaxwèxe na meā nūxū pecuāxū i ſacū nixī i mexū i Tupanapēxewa na penaxūxūcēx i ngēma. Natūrū ngēma Tupanapēxewa chixexū, rū ſnūxna pixīgachi na tama nagu peyixūcēx! ²⁰ Rū ngēxguma ngēmaācū meā pemaxēgu rū nūma ya Tanatū ya Tupana ya tūxū taāēxēēcū rū tá pexū naporaexēē na aixcūma nūxū perūyexeraxūcēx i Chataná. Rū chanaxwèxe i tōrū Cori ya Ngechuchu ya Cristu pemaā inarūxāūx rū pexū narūngūxēē. ²¹ Rū pexū narūmoxē ya Timutéu ya chomūcū ixīcū i Tupanaārū puracūwa. Rū ngēxgumarūū ta pexū narūmoxēgū i chautanūxūgū i Dūchiu, rū Yachóū rū Sochípatru. ²² Rū choma i Téchiu na chanaxūmatūxū i ſnaā popera, rū choma rū ta pexū charūmoxē naegagu ya tōrū Cori. ²³ Rū pexū narūmoxē ta ya Gayu ya napatawa changēxmacū. Rū nūma rū inanaxā ya daa napata na nawa nangutaquēxegūxūcēx i guxūma i yaxōgūxū. Rū ngēxgumarūū ta pexū narūmoxēgū i Eratu i daa ſāneārū dīēruarū dauruū ixīxū, rū taeneē i Cuartu. ²⁴ Rū chanaxwèxe i tōrū Cori ya Ngechuchu ya Cristu pexū narūngūxēē i guxāma i pemax. Rū ngēmaācū yīī.

Pauru rū Tupanaxū yacuēxūūācūma nanagūxēē i norū popera

²⁵⁻²⁶ ¶Rū ſūxmax, rū ngīxā nūxū ticuēxūūgū ya Tanatū ya Tupana! Rū nūma nūxū nangēxma i pora na pexū naporaexēēxūcēx na meā peyaxōgūamaxūcēx i ngēma norū ore i tūxū maxēxēēxū tamaā nūxū ixuxūrūū. Rū ngēma nixī i ore i guxūwama nūxū chixuxū rū namaā changūxēētaexū i Ngechuchu ya Cristuchiga. Rū ngēmatama ore i Cristuchiga rū taxchaxwa naxēxūgu ga noxrix, natūrū i ſūxma ya Tupana rū marū tūxū nūxū nacuēxēē i ngēma. Rū nuxcūma tauta naāne ſūxgu rū Tupanaxīcatama nūxū nacuēx ga yema, natūrū i ſūxma rū norū orearū uruūgū ſumatūxū ga orewa taxcēx nanangoxēē. Rū ngēma ore rū namaā nawūxigu ga yema ore ga nuxcūma nūxū yaxuxū ga Tupana ya guxūguma maxēchacū. Rū ſūxma ya Tupana rū guxūwama nanamugū i norū orearū uruūgū na guxū i duūxūgūmaā nūxū na yaxugūxūcēx i ngēma ore i Cristuchiga na nūxū yaxōgūāxūcēx rū naga na naxīnūēxūcēx. ²⁷ Rū nūma ya Tupana rū nūxīcatama nixī i Tupana yīīxū, rū nūxīcatama nixī i guxūxū nacuāxū. ¶Rū ſūxmax, rū ngīxā guxūguma nūxū ticuēxūūgū, erū Nane ya Ngechuchu ya Cristu rū poraācū tūxū narūngūxēē! Rū ngēmaācū yīī.

Rū nuāma pexna,
Pauru

NŪXĪRAŪXŪ GA POPERA GA CORÍTIUCŪĀX GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxê ga yema yaxôgŭxŭ ga Corĩtiuarü ïānewa yexmagŭxŭ

¹⁻² Pa Chaueneëgŭ i CorĩtiucŭĀxgŭx, choma i Pauru nixĩ i Tupana yaxuxŭ norŭ ngŭchaxŭmaā na Ngechuchu ya Cristu norŭ puracŭwa choxŭ namuxŭcèx. Rü choma rü namaā i taeneë i Chótene nixĩ i pexŭ tarŭmôxëgŭxŭ rü pexcèx tanaxŭmatŭxŭ i ñaā popera. Pa Chaueneëgŭ ya Tupanaārŭ Ixĭgŭxex, pema rü marŭ Tupanapëxewa pixüüne yerŭ Ngechuchu ya Cristu marŭ pexŭ nixŭünexëë. Rü Tupana rü marŭ pexŭ nade na norŭ duŭxŭgŭ pixĭgŭxŭcèx wŭxigu namaā i guxŭma i ngëma duŭxŭgŭ i guxŭwama tórŭ Cori ya Ngechuchu ya Cristuxŭ icuèxŭtŭgŭxŭ. Rü nüma ya Ngechuchu ya tórŭ Cori ixĭcŭ, rü ngëma duŭxŭgŭarŭ Cori ta nixĩ. ³Rü chanaxwèxe ya Tanatŭ ya Tupana rü tórŭ Cori ya Ngechuchu ya Cristu norŭ ngechaxŭgagu poraäcŭ pexŭ narŭngŭxëë rü pexŭ nataāëxëë.

Tupana tŭxŭ narŭngŭxëë erŭ Cristuarŭ duŭxŭgŭ tixĭgŭ

⁴Rü taguma nüxŭ charŭchau na Tupanana moxê pexcèx chaxăxŭ. Rü moxê nüxna chaxă naxcèx i ngema ngŭxëë i Ngechuchu ya Cristugagu Tupana pexna āmarexŭ. ⁵Yerŭ Cristugagu Tupana pexna nanamu ga Naăxê i Üünexŭ na pemaxă inaxăŭxŭcèx. Rü pexna nanaxă ga norŭ ore, rü naétŭ pexŭ nanatauxchaxëë na nüxŭ pecuăxŭcèx na ñuxŭ ñaxŭchiga yixŭxŭ. ⁶Rü yemaäcŭ yexguma nüxŭ pexŭnŭëgu ga yema ore ga Cristuchiga rü aixcŭma peyaxôgŭ. ⁷Rü ngëmacèx i ñuxma na ípenanguxëëxŭ na wena táxarŭ núma naxŭxŭ ya tórŭ Cori ya Ngechuchu ya Cristu, rü Tupana pexna nanaxă i taxŭ i cuèx na taxuŭma pexŭ taxŭxŭcèx na naxcèx pemaxëxŭ. ⁸Rü ngëmaäcŭ tá pexna nadau ya Tupana ñuxmatáta nagŭ i naăne, rü guxŭgutăma pexŭ naporaexëë na aixcŭma peyaxôgŭamaxŭcèx rü naxcèx pemaxëxŭcèx, na taxŭema chixexŭmaā pexŭ ixugŭxŭcèx i ngëxguma wenaxărŭ núma naxŭxgu ya tórŭ Cori ya Ngechuchu ya Cristu. ⁹Rü Tupana rü guxŭguma nayanguxëë i norŭ uneta. Rü nüma nixĩ ga pexŭ nadexŭ na aixcŭma Nane ya tórŭ Cori ya Ngechuchu ya Cristumŭcŭgŭ pixĭgŭxŭcèx.

Nŭgŭ nitoye ga yema yaxôgŭxŭ

¹⁰Pa Chaueneëgŭx, tórŭ Cori ya Ngechuchu ya Cristuégagu pexŭ chacèèxŭ na wŭxigu pegŭmaā perŭxŭnŭëxŭ rü tama pegŭ pitoyexŭcèx. Rü name nixĩ i aixcŭma pegŭ pengechaŭgŭ rü aixcŭma wŭxigutama perŭxŭnŭë i peăëwa. ¹¹Pa Chaueneëgŭx, pemaā nüxŭ chixu i ngëma ore, yerŭ Croétanŭxŭtanŭwa nüxŭ chacuăchiga ga pegŭmaā na penuëxŭ, rü tama aixcŭma wŭxigu na perŭxŭnŭëxŭ. ¹²Rü pemaā nüxŭ chixu i ngëma erŭ ñuxre i pema rü ñaperŭgŭgŭ:

“Choma rü Pauruwe charŭxŭ”, ñaperŭgŭgŭ. Rü togue rü:

“Choma rü Aporuwe charŭxŭ”, ñaperŭgŭgŭ. Rü togue rü:

“Choma rü Pedruwe charŭxŭ”, ñaperŭgŭgŭ. Rü togue rü:

“Choma rü Cristuwe charŭxŭ”, ñaperŭgŭgŭ. ¹³¿Rü ñuxăcŭ nixĩ i ngëma?

¿Pexcèx rü Cristu rü marŭ niyauxye? ¿Éxna pema nüxŭ pecuèxgu rü

choma i Pauru chiixũ ga curuchawa pexcèx chipotaxũ rü chayuxũ? ¿Rü éxna pema nüxũ pecuèxgu rü chauégagu yiixũ ga ípèbaiũxũ? ¹⁴ Rü Tupanana moxè chaxã, yerü taxúema pexũ íchabaiũxèè ga pemax. Rü Crispu rü Gayuxicatama nixĩ ga íchabaiũxèèxũ. ¹⁵ Rü ngèmacèx taxucürüwa texè tügü tixu na chauégagu ítabaixũ. ¹⁶ Rü yemaácü aixcüma íchanabaiũxèè ga Estéfanatanüxügü ta, natürü chauxcèx rü taxúema ga togue tüxũ íchabaiũxèè. ¹⁷ Yerü nüma ga Cristu rü tama choxũ namu ga duixügüxũ na íchabaiũxèèxücèx, natürü choxũ namu na duixügümaã nüxũ chixuxücèx i norü ore i mexũ i tüxũ maxèxèèxũ. Rü nanaxwèxe i tauxchaxũ i oremaã nüxũ chixu i ngèma ore. Erü ngèxguma chi ñoma nüxũ cuèxüchixürü nüxũ chixuxgu i ngèma ore, rü ngürüãchi i duixügü rü tá chauguama narüxĩnüè rü tá nüxũ inayarüngümaè na Cristu yiixũ ga tüxũ maxèxèècü ga yexguma curuchagu nayuxgux.

Cristuwa nixĩ ga Tupana inawéxũ ga norü pora rü norü cuèx

¹⁸ Rü ngèma ore na ñuxácü tórü pecaducèx curuchagu nayuxũ ga Cristu, rü wüxi i natücèxmamare nixĩ naxcèx i ngèma duixügü i poxcuwa íxũ. Natürü yixema na Tupana tüxũ maxèxèèxũ, rü nüxũ tacuèx na ngèma ore rü Tupanaärü pora yiixũ. ¹⁹ Erü norü ore i ümatüxüwa rü ñanagürü ga Tupana:

“Rü tá ichayanaxoxèè i guxüma i norü cuèx i ngèma duixügü i nüxũ cuèxüchigüxũ. Rü tá nüxũ chaxo i ngèma duixügüarü cuèx”, ñanagürü. ²⁰ Rü ñuxmax, Pa Chaueneégüx, ¿Tupanapèxewa rü tacüwa namexũ i ngèma duixügü i poraácü nüxũ cuèxüchixũ? ¿Rü tacüwa namexũ i ngèma duixügü i Moíché ümatüxũ i mugüwa nguxèètaegüxũ? ¿Rü tacüwa namexũ i ngèma duixügü i meã nüxũ cuèxgüxũ i ñoma i naãneärü cuáchigagu na yadexagüxũ? Erü guxüma i ngèma cuèx i duixügü nagu rüxĩnüèxũ rü Tupanacèx rü taxuwama name. ²¹ Natürü nüma ya Tupana ya guxüxüma cuácü, rü tama nanaxwèxe na ñoma i naãnecüãx i duixügüarü cuágagu na yiixũ i naxütawa nangugüxũ i nümagü. Natürü nanaxwèxe na ngèma norü ore i mexügagu na yiixũ i namaxèxèèãxũ i ngèma duixügü i yaxögüxũ woo togücèx rü natücèxmamare yixügu i ngèma ore. ²² Ngèma Yudíugü rü nüxũ nadaugüchaũ i cuèxruügü i Tupanaärü poramaã üxũ. Rü ngèma Griégugü rü naxcèx nadaugü i ñoma i naãneärü cuèx. ²³ Natürü ngèma ore i toma nüxũ tixuxũ, rü Cristu ga curuchawa ipotacüchiga nixĩ. Rü ngèma ore rü naãewa nangux i ngema Yudíugü. Rü ngèma duixügü i tama Yudíugü ixígüxücèx rü wüxi i natücèxmamare nixĩ. ²⁴ Natürü ngèma duixügü i Tupana dexũ i Yudíugü rü éxna tama Yudíugü ixígüxũ rü ngèma duixügücèx Tupana inanawéx i norü pora rü norü cuèx ga yexguma pecaducèx nayuxgu ga Cristu. ²⁵ Rü yema Tupana üxũ ga yexguma nayuxgu ga Cristu rü muxüma i duixügücèx rü wüxi i ngèãemare nixĩ. Natürü ngèma Tupana nagu rüxĩnüxũ rü guxüma i ñoma i naãnecüãx i duixügüarü cuèxarü yexera nixĩ. Rü yexguma curuchagu nayuxgu ga Cristu rü muxüma ga duixügücèx rü natura ga Tupana ga yexguma. Natürü yexguma nixĩ ga inawéãxũ ga ñuxácü guxũ i duixügüarü yexera na naporaxüchixũ. ²⁶ Pa Chaueneégüx, name nixĩ i nagu perüxĩnüè na ñuxácü Tupana pexũ dexũ na norü duixügü pixígüxücèx. Rü noxretama pixígü na nüxũ pecuèxüchixũ ega duixügü pexũ ngugügu, rü noxretama pixígü na ãèxgacügü pixígüxũ, rü noxretama pixígü i ngèma itaarü dièruãxütanüxũ pixígüxũ. Natürü woo ngèma na pixígügu rü Tupana rü pexũ nade na

norū duūxūgū pixīgūxūcèx. ²⁷ Rū Tupana nanade ga yema duūxūgū ga togū ga duūxūgū nūxū ixuxgu rū taxuūma icuáxū. Rū yemaācū nanaxū ga Tupana na naxāneēxēēāxūcèx i ngēma duūxūgū i nūxū icuèxūchixū. Rū Tupana nanade ga yema duūxūgū ga togū nūxū ixuxgu rū turaexū. Rū yemaācū nanaxū ga Tupana na naxāneēxēēāxūcèx i ngēma duūxūgū i poraexū. ²⁸ Rū Tupana nanade ga yema duūxūgū ga togū nūxū oexū, rū ñoma i naānewa taxuūma ixīgūxū. Rū yemaācū Tupana nanaxāneexēē i ngēma duūxūgū i ñoma i naanewa norū ngemaxūgūmaā nūgū icuèxūūgūxū. ²⁹ Rū ngēmacèx taxucūrūwama texé tūgū ticuèxūū i Tupanapēxewa. ³⁰ Rū nūmatama ga Tupana nixī ga Ngechuchu ya Cristuarū duūxūgūxū pexū yaxīgūxēēxū. Rū tatanūwa nanamu ga Cristu na nūma tūxna naxāāxūcèx i cuèx i aixcūma ixīxū, rū pecaduwa tūxū ínguxūxēēxūcèx. Rū nūma ya Cristu nixī i tūxū namaxēxēēxū rū tūxū yamexēēgūxū na aixcūma ixūūnexūcèx napēxewa ya Tupana. ³¹ Rū ngēmacèx i Tupanaārū ore i ūmatūxūwa rū ñanagūrū: “Rū ngēxguma texé tūgū icuèxūūchaūgu rū name nixī i tórū Corixū ticuèxūū”, ñanagūrū.

2

Cristu ga curuchawa ipotacūchiga

¹ Pa Chaueneēgūx, yexguma noxri petanūwa chaxūxgu na pemaā nūxū chixuxūcèx ga Tupanaārū ore i aixcūma ixīxū i Cristuchiga, rū tama ñoma nūxū cuèxūchixūrūūācūma pemaā chidexa, rū tama ore ga guxchaxūmaā nixī ga pemaā nūxū chixuxū. ² Yerū yexguma petanūwa chayexmagu, rū Cristuchigaxūxīcatama nixī ga pemaā chixuxū. Rū taxuūma ga ſacū ga togu charūxīnū. Rū yemaācū Ngechuchu ya Cristu ga curuchawa ipotacūguxīcatama nixī ga charūxīnūxū. ³ Rū yexguma petanūwa changuxgu rū nūxū chadau ga taxū ga guxchaxūgū ga petanūwa, rū yemacèx poraācū chaxoegaāē rū Tupanapewa chorū muūmaā chīdurux. ⁴ Rū yexguma pemaā chideaxgu rū pemaā nūxū chixuxgu ga Tupanaārū ore, rū tama ñoma nūxū cuèxūchixūrūūācūma pemaā nūxū chixu na yemaācū pexū chanangūchaūxēēxū na peyaxōgūxūcèx. Natūrū Tupanaāē i Ūūnexūārū ngūxēēmaā rū Tupanaārū poramaā nixī ga pexū chanangūchaūxēēxū. ⁵ Rū yemaācū Tupanaārū poramaā pemaā nūxū chixu ga yema ore na Tupanagagu yīxū na nūxū peyaxōgūxū, rū tama ñoma i naānecūāx i duūxūgūarū cuágagu na yīxū.

Tupana rū Naāē i Ūūnexūwa nūgū tūxū nacuèxēē

⁶ Natūrū pemaā nūxū chixu, rū ngēxguma natanūwa changēxmagu i ngēma duūxūgū i marū meāma yaxōgūxū, rū ngēxguma nixī i chanangūxēēxū i ngēma aixcūma Tupanaārū cuèx i ūūnexū. Natūrū ngēma cuèx rū tama ñoma i naānewa ne naxū, rū bai i ñoma i naāneārū āēxgacūgū i paxa tá iyarūxoxūwa ne naxū. ⁷ Natūrū ngēma cuèx rū Tupanawa nixī i ne naxūxū. Rū ngēma cuèx nixī ga noxri tauta naāne ūxgu Tupanaxīcatama nūxū cuáxū ga na ñuxācū tá tūxna naxāāxū i maxū i taguma gūxū. ⁸ Natūrū yema Tupana nagu rūxīnūxū, rū taxuūma ga ñoma ga naānecūāx ga āēxgacū nūxū nacuèx. Yerū yexguma chī aixcūma nūxū nacuèxgūga ga yema Tupana nagu rūxīnūxū rū tāū chima

curuchawa nayapotagü ga guma mecü ya tórü Cori. ⁹ Rü ngemachiga nixi i Tupanaärü ore i ümatüxüwa i ñaxü:

“Rü ngëma duüxügü i Tupanaxü ngechaügüxücèx, rü nüma nanamexëë i ñacü i taxüema nüxü dauxü, rü taguma texé nüxü ñnuxü, rü bai i texé nagu rüxñnuxü”,

ñaxü. ¹⁰ Rü ngëma Tupana mexëëxü naxcèx i ngëma duüxügü i nüxü ngechaügüxü, rü ñuxma rü tüxü nüxü nacuèxëë i ngëma, yerü núma nanamu ga Naãe i Üünexü na taxcèx nangoxëëãxücèx. Rü ngëma Naãe i Üünexü rü guxüxüma nacuèx, rü èjxrüxü i ngëma Tupanaxicatama nüxü cuáxü rü ta nüxü nacuèx.

¹¹ Rü duüxügütanüwa rü ¿texé nüxü tacuèx na ñacügu naxñnuxü i wüxi ya yatü? Rü naãëxicatama nixi i nüxü cuáxü i ngëma nagu naxñnuxü i ngëma yatü. Rü ngëxgumarüü ta Tupanaãe i Üünexüxicatama nixi i nüxü cuáxü na ñacügu naxñnuxü ya Tupana. ¹² Rü yixema rü tama ñoma i naãnecüãx i naãe nixi ga iyauxgüxü. Natürü tanayauxgü i ngema Naãe i Üünexü ga Tupana taxcèx núma muxü na aixcüma nüxü icuáxücèx i guxüma i ngëma mexügü ga Tupana norü ngechaümaã tüxna ãmarexü.

¹³ Rü ñuxma na pemaã nüxü tixuxü i ngëmachiga, rü Tupanaãe i Üünexü toxna äxü i oremaã nixi i pemaã nüxü tixuxü. Rü tama ore i torü cuèxwa tayaxuxümaã nixi i pemaã nüxü tixuxü. Rü ngëmaãcü nüxü tixu i Tupanaãe i Üünexüãrü ore namaã i ngëma duüxügü i aixcüma Tupanaãe nawa ngëxmagüxü.

¹⁴ Rü texé ya tama Tupanaãe i Üünexü tümawa ngëxmaxë, rü taxucürüwa tanayaxu i ngëma Tupanaãe i Üünexü tüxü nguxëëxü, erü tümacèx ya yixema duüxë rü natücèxmamare nixi. Rü tama nüxü tacuèxéga erü yixema Tupanaãe i Üünexü tümawa ngëxmaxëxicatama tixi ya nüxü cuáxe na tanangugüxü na ñuxü ñaxüchiga yïxü i ngëma Tupanaãe i Üünexü tüxü nguxëëxü.

¹⁵ Rü yixema duüxë ya Tupanaãe i Üünexü tümawa ngëxmaxë, rü meã tanangugü i guxüma. Natürü ngëma togü i duüxügü i tama Tupanaxü cuèxgüxü, rü taxucürüwama tümäärü maxüxü nangugü ya yixema duüxë ya aixcüma Tupanaãe tümawa ngëxmaxë. ¹⁶ Erü Tupanaärü ore i ümatüxüwa rü ñanagürü:

“¿Texé nüxü tacuèx na ñacügu naxñnuxü ya tórü Cori? ¿Rü texé nüxü tacuèx na Tupanaxü taxucüxëxü?”

ñanagürü. Natürü yixema nixi i aixcüma nüxü icuáxü i ngëma Cristu nagu rüxñnuxü.

3

Pauru rü Aporu rü wüxiqü Tupanaãxü napuracüe

¹ Pa Chaueneëgüx, yexguma noxri petanüwa changuxgu, rü taxucürüwa ngëma duüxügü i Tupanaãe nawa ngëxmaxümaã chidexaxürüüãcü pemaã chidexa. Natürü ñoma i naãnecüãx i tama Tupanaxü cuèxgüxümaã chideaxgurüü nixi ga pemaã chidexaxü. Yerü pema rü yexwacèx, peyaxögü ga yexguma, rü yemacèx yexwacèx yaxögüxümaã chideaxürüüãcü pemaã nüxü chixu ga Cristuchiga. ²⁻³ Rü tauxchaxü ga oremaã pexü changüxëë, ngëxgumarüü i wüxi i õxchana ega noxri nabuxgu rü naëgünenixü ya tauxchaãcü yaxaxüne nüxna taxã. Rü yemaãcü tauxchaxü ga oremaã pemaã nüxü chixu ga Tupanaärü ore ga noxrix, yerü taxucürüwa nüxü pecuèxéga ga Tupanaärü ore ga guxchaxü. Rü ñuxma rü ta tama nüxü pecuèxéga i Tupanaärü ore i

guxchaxŭ, erŭ ñoma tama yaxōgŭxŭ i duŭxŭgŭrŭŭtama pemaxē. Rŭ dŭcax, ngēxguma ñuxma rŭ ta pixāŭxāchuwēxegu rŭ pegŭmaā penuēgu, rŭ ngēmawa nangox na ngēma tama yaxōgŭxŭrŭŭācŭtama nagu perŭxŭnŭēxŭ rŭ ñoma i naānecŭŭxŭrŭŭācŭtama na pemaxēxŭ. ⁴ Rŭ ngēxguma petanŭwa wŭxie ñāgŭgu rŭ:

“Choma rŭ Pauruwe charŭxŭ”, ñāgŭgu, rŭ toge rŭ:

“Choma rŭ Aporuwe charŭxŭ”, ñāgŭgu, rŭ ngēmawa nŭxŭ tacuēx na ngēma duŭxŭgŭ i tama yaxōgŭxŭrŭŭācŭma na pemaxēxŭ. ⁵ Rŭ ngēxguma meā nagu rŭxŭnŭēgu, ŭrŭ ŭacŭ chixŭ i choma i Paurux? rŭ ŭacŭ nixŭ i nŭma i Aporux? Toma rŭ Tupanaārŭ duŭxŭgŭmare tixŭgŭ, rŭ togagu nixŭ ga nŭxŭ peyaxōgŭxŭ ga tōrŭ Cori ya Ngechuchu. Rŭ wŭxichigŭ ga toma rŭ tanaxŭ ga yema puracŭ ga tōrŭ Cori toxna āxŭ. ⁶ Rŭ chauxŭtawa nixŭ ga nŭxŭ pexŭnŭēxŭ rŭ peyaxōgŭxŭ ga Tupanaārŭ ore ga noxrix. Rŭ Aporu nixŭ ga pexŭ rŭngŭxēēcŭ na yexeraācŭ meā peyaxōgŭxŭ ga yema ore. Natŭrŭ Tupana nixŭ ga pexŭ maxēxēēcŭ. ⁷ Rŭ ngēmacēx woo yixema tŭxira duŭxŭgŭmaā nŭxŭ ixuxe i Tupanaārŭ ore rŭ woo yixema wixwena yexeraācŭ duŭxŭgŭxŭ ngŭexēxē, rŭ taxuŭma tixŭgŭ. Natŭrŭ Tupana nixŭ ya guxŭma ŭcŭ, erŭ nŭma nixŭ i duŭxŭgŭxŭ namaxēxēēxŭ. ⁸ Rŭ ngēmaācŭ ya yixema tŭxira duŭxŭgŭmaā nŭxŭ ixuxe i Tupanaārŭ ore, rŭ yixema wixwena yexeraācŭ duŭxŭgŭxŭ ngŭexēxē rŭ tawŭxigumare i ngēma puracŭwa. Natŭrŭ Tupana rŭ tá tŭxŭ nanaxŭtanŭ i tŭmaārŭ puracŭ ya wŭxichigŭ ngēxgumarŭŭ na ñuxācŭ tanaxŭxŭ i ngema puracŭ. ⁹ Rŭ ngēmaācŭ i toma rŭ wŭxigu Tupanaāxŭ tapuracŭe. Rŭ ngēmaācŭ nixŭ i perŭ maxŭwa napuracŭxŭ ya Tupana na nŭma nanaxwēxexŭācŭma pixŭgŭxŭcēx. ¹⁰ Rŭ choma nixŭ ga Tupana choxŭ muxŭ na chaxira pemaā nŭxŭ chixuxŭcēx ga Cristuchiga. Rŭ togŭ nixŭ ga chowena yexeraācŭ pexŭ ngŭexēēxŭ. Natŭrŭ guxāma ya texē ya naxŭxe i ñāā puracŭ rŭ name nixŭ i taxuāē na meā tanaxŭxŭcēx. ¹¹ Rŭ ñāā puracŭ rŭ Ngechuchu ya Cristuwa nixŭ ga inaxŭgŭxŭ, rŭ ngēmacēx taxacŭrŭwama texē tayangucuchixēē i to i tŭxŭ maxēxēēxŭ. ¹² Rŭ ñuxma na norŭ puracŭ ixŭxŭ i wŭxichigŭ i yixema, rŭ tanaxwēxe i taxuāē na aixcŭma meā naxŭxŭ i ngēma. Erŭ yixema aixcŭma meā naxŭxe i norŭ puracŭ, rŭ ñoma wŭxi i ŭpataarŭ ŭruŭ i uirumŭ rŭ dŭŭerumŭ rŭ nuta i mexēchixŭmaā ŭpataxŭrŭŭ tixŭ. Natŭrŭ yixema tama aixcŭma meā naxŭxe i ngēma Cristuarŭ puracŭ rŭ ñoma ŭpataarŭ ŭruŭ i chixexŭ i naŭ rŭ naŭxātŭ rŭ dexnemenēxāmaremaā ŭpataxŭrŭŭ tixŭ. ¹³ Natŭrŭ ngēxguma naguxgu i naāne, rŭ tá nangox na ñuxācŭ naxŭāxŭ i Tupanaārŭ puracŭ i wŭxichigŭ i duŭxŭ. Erŭ ngēma ngunexŭgu rŭ tá nangēxma ya ŭxŭ ya taxŭchine. Rŭ ñoma ŭacŭ ŭxŭwa iguxŭrŭŭ tá nixŭ i Tupana nŭxŭ na ŭxŭ i wŭxichigŭ i duŭxŭārŭ puracŭ na nŭxŭ nacuāxŭcēx ngoxi aixcŭma name rŭ ēxna tama. ¹⁴ Rŭ yixema aixcŭma meā naxŭxe i Cristuarŭ puracŭ, rŭ yima ŭpata ya taixŭne ya tama ŭxŭmaā ixaxŭnerŭŭ tá nixŭ i ngēma tŭmaārŭ puracŭ. Rŭ tá Tupanaxŭtawa tanayaxu i tŭmaārŭ natanŭ naxcēx i ngēma taxŭxŭ. ¹⁵ Natŭrŭ yixema tama aixcŭma meā naxŭxe i ngēma puracŭ, rŭ yima ŭpata ya tama taixŭne ya ŭxŭmaā ixaxŭnerŭŭ tá nixŭ i ngēma tŭmaārŭ puracŭ. Rŭ tá ngēxma inayarŭxomare i guxŭma i ngēma taxŭxŭ. Rŭ tŭxicatama tāŭtama tixa ñoma wŭxi i duŭxŭ i ŭxŭemawa iyagoxŭrŭŭ. ¹⁶ ŭTama ēxna nŭxŭ pecuēx i pema rŭ Tupanapata na pixŭgŭxŭ, rŭ ngema Naāē ya Tupana rŭ pewa na namaxŭxŭ? ¹⁷ Rŭ ngēxguma texē pexŭ chixetanŭxēēgu,

rū Tupana tá tūxŭ napoxcu, erŭ Tupanapata ya nawa namaxŭne rū naxŭŭne. Rŭ pematama nixŭ i yima Tupanapata na pixŭgŭxŭ. ¹⁸ Tama name i texé tŭgŭtama tawomŭxĕĕ. Rŭ ngĕxguma petanŭwa texé tŭgŭgu rŭxŭnŭgu na wŭxi i duŭxŭ i nŭxŭ cuáxe na tŭxŭ i űoma i naānewa, rŭ name nixŭ i űoma taxuŭma tacuáxŭrŭŭ tŭgŭ tixŭxĕĕ. Rŭ ngĕxguma tá nixŭ i wŭxi i duŭxŭ i aixcŭma nŭxŭ cuáxe tá tŭxŭ. ¹⁹ Erŭ űoma i naāneārŭ cuèx rŭ wŭxi i ngĕāĕmare nixŭ i Tupanacèx. Erŭ Tupanaārŭ ore i ũmatŭxŭwa rŭ űanagŭrŭ:

“Rŭ ngĕma duŭxŭgŭ i nŭgŭgu rŭxŭnŭxŭ na nŭxŭ cuèxŭchigŭxŭ yŭxŭ, rŭ norŭ cuèxgutama ĩnanatŭxĕĕ ya Tupana”,

űanagŭrŭ. ²⁰ Rŭ toxnamana i Tupanaarŭ orewa rŭ űanagŭrŭ ta:

“Tŕrŭ Cori ya Tupana rŭ nŭxŭ nacuèx na taxuwama namexŭ i ngĕma norŭ ĩnŭ i ngĕma duŭxŭgŭ i űoma i naanewa cuèxwa ngugŭxŭ”,

űanagŭrŭ. ²¹ Rŭ ngĕmacèx tama name i texé tŭgŭ ticuèxŭxŭ ega duŭxŭgŭarŭ cuèxwamare tarŭxŭxgu. Erŭ Tupana rŭ marŭ pexna nanaxā i guxŭma na pexrŭ yŭxŭcèx. ²² Rŭ ngĕmacèx i choma i Pauru, rŭ taeneĕ ya Aporu, rŭ taeneĕ ya Pedru, rŭ űoma i naāne, rŭ torŭ maxŭ, rŭ torŭ yu, rŭ űomatama i ngunexŭ, rŭ moxŭārŭ ngunexŭ, rŭ guxŭma i ngĕma rŭ pexrŭ nixŭ. ²³ Rŭ pematama rŭ Cristuarŭ pixŭgŭ. Rŭ Cristu rŭ Tupanaārŭ nixŭ.

4

Yema ngŭexŭgŭ ga Ngechuchu imugŭxŭārŭ puracŭchiga

¹ Rŭ ngĕmacèx tanaxwĕxe i tomaā nagu perŭxŭnŭĕ na Cristuarŭ puracŭtanŭxŭmare na tixŭgŭxŭ. Rŭ nŭma nixŭ i toxŭ namuxŭ na pexŭ tangŭexĕĕxŭcèx ga yema ore ga noxri Tupanaxŭcatama nŭxŭ cuáxŭ.

² Rŭ ngĕxguma texé űacŭ rŭ puracŭ tŭxna āxgu, rŭ name nixŭ i aixcŭma tayanguxĕĕ i ngĕma puracŭ i tŭxna taxāxŭ na ngĕmaācŭ itanawĕxŭcèx na aixcŭma wŭxi i duŭxŭ i mexŭ tixŭxŭ. ³ Rŭ ngĕmacèx i űuxma na meā chayanguxĕĕchaŭxŭ i ngĕma puracŭ i Tupana choxna āxŭ, rŭ taxucèxma chaugŭcèx chaxoegaāĕ ega woo choxna pecagu rŭ ĕxna űacŭ rŭ āĕxgacŭgŭ choxna caxgu naxcèx i ngĕma puracŭ i chaxŭxŭ. Rŭ woo

i chomatama rŭ taxuxŭcèxma ĩchicuèx na ngextā chixri chanaxŭxŭ i ngĕma puracŭ. ⁴ Natŭrŭ űuxma na chomatama nagu charŭxŭnŭxŭ na nataxŭma i chorŭ chixexŭ i Tupanapĕxewa, rŭ tama ngĕmacèx Tupana choxŭ nadau na changearŭ pecaduāxŭ. Erŭ nŭmatama ya tŕrŭ Cori ya Tupana nixŭ i aixcŭma choxŭ nacuāarŭ maxŭāxŭ. ⁵ Rŭ ngĕmacèx

tama name na toxŭ pengugŭarŭ maxŭāxŭ naxŭpa na nŭma naxŭxŭ ya tŕrŭ Cori. Natŭrŭ name nixŭ i nŭxŭ ĩpenanguxĕĕ, erŭ nŭma tá nixŭ i nangoxĕĕāxŭ i guxŭma i ngĕma űuxma icŭxŭ rŭ guxŭma i ngĕma duŭxŭgŭ naāĕwa nagu rŭxŭnŭxŭ. Rŭ ngĕxguma tá nixŭ ya Tupana i tŭmamaā nataāĕxŭ ya wŭxichigŭ ya yŭxema aixcŭma mexŭ ŭgŭxe. ⁶ Pa Chaueneĕgŭx, perŭ mexŭcèx nixŭ i pemaā nŭxŭ tixuxŭ i ngĕma ore na ngema Tupana naxwĕxexŭācŭma pemaxĕxŭ. Rŭ choma rŭ Aporu nixŭ

i perŭ cuèxrŭŭgŭ tixŭgŭxŭ na towa pengŭexŭ na Tupanaārŭ ore pemaā nŭxŭ ixuxŭrŭŭācŭ penaxŭxŭ. Rŭ ngĕmacèx tama name na wŭxi i perŭ nguxĕĕtaexŭmaā petaāĕgŭxŭ rŭ to rŭ nŭxŭ pexoexŭ. ⁷ Rŭ űuxma rŭ pexna chaca, űrŭ texé tixŭ ya yŭxema pemaā nŭxŭ ixuxe na togŭarŭ yexera pexŭ ixŭĕxĕ?

űErŭ guxŭma i ngema cuèx i pexŭ ngĕmaxŭ rŭ Tupana pexna nanaxā? Rŭ űuxma na nŭma pexna naxāāxŭ i ngĕma cuèx

Ķrū tūxcūū pegū picuèxūūgū ñoma pematama perū poramaā penayax-
 uxūrūū? ⁸ Rū pegūgu perūxīnūēgu rū aixcūma marū meāma Tupanaxū
 picuèxūchi rū marū pexū nangēxma i guxūma i ſacū i penaxwèxexū na
 naxūtawa pengugūxūcèx. Rū pegūgu perūxīnūēgu rū ñoma āēxgacūgū
 i taxūrūū pixīgū rū taxuūma toxūtawa penaxwèxe i ñuxmax. ĶChierū
 aixcūma Tupanapēxewa āēxgacūgū pixīgūgu na toma rū ta wūxigu pemaā
 āēxgacūgū na tixīgūxūcèx! ⁹ Rū toma na Ngechuchu toxū imugūxū,
 rū chauxcèx rū wixwe toxū nawogū ya Tupana. Rū ñoma poxcuexū i
 yuewa īxūrūū tixīgū. Rū ñoma wūxi i ſacū i nūxū nacugūexūrūū tixīgū
 i napēxewa i Tupanaārū orearū ngeruūgū i daxūcūāx, rū napēxewa i
 ñoma i naānecūāx i duūxūgū, rū napēxewa i guxūma i ſacū i Tupana ūxū.
¹⁰ Rū ñuxma na Cristuwe tarūxīxū, rū ngēmacèx taxuūma icuáxū toxū
 nawogū i duūxūgū, natūrū i pema rū pegūgu perūxīnūēgu rū guxūxūma
 pecuèx i Cristuchiga. Toma nūxū tacuèx na duūxūgūpēxewa taturaexū,
 natūrū i pema rū pegūgu perūxīnūē na aixcūma peporaexū. Rū duūxūgū
 toxū naxo, natūrū pexū nangechaūgū. ¹¹ Rū ñuxma rū ta tama inayacuèx
 na ngūxū tingegūxū, erū ñuxma rū ta taiya toxū nangux, rū tīṭawae,
 rū tangexchiru. Rū duūxūgū rū chixri tomaā nachopetū, rū tangepata.
¹² Rū tīpae na yeūcūrū toxmēxmaā tapuracūeechaxū. Rū duūxūgū rū
 ſacū tomaā nixugūe, natūrū i toma rū mexū i oremaā tanangāxūgū. Rū
 towe ningēxūtanū, natūrū yaxna namaā taxīnūē. ¹³ Rū chixri tochiga
 nidexagū, natūrū i toma rū meā nachiga tidexagū. Rū ñoma guxchirexū
 nadaugūxūrūū tomaā nixīgū, rū ñoma duūxūgū i taxuwama mexūācū
 toxū nixīxēē. Rū ñuxma rū ta ngemagutama tomaā naarūxīnūe. ¹⁴ Tama
 pexcèx chanaxūmatū i ñāā popera na pexū chaxāneēxēēxūcèx. Natūrū
 pexcèx chanaxūmatū na pexū chixucūxēgūxūcèx chauxacūgūxūchirūū,
 erū pexū changechaū. ¹⁵ Erū woo nangēxmagu i muxūma i perū
 nguxēēruūgū i Cristuchiga pexū ngūexēēxū, natūrū chaxicatama nixī i
 penatū chiīxū ga Cristuxū na peyaxuxūwa. Yerū chauxūtawa nixī ga
 noxri ga penayaxuxū ga Ngechuchu ya Cristuarū ore i tūxū maxēxēēxū.
 Rū ngēmacèx chaxicatama nixī i penatū chiīxū i perū ōwa. ¹⁶ Rū ngēmacèx
 pexū chacèxū na chauxrūxū meā pemaxēxū. ¹⁷ Rū ngēmacèx pexūtawa
 chanamu ya Timutéu ya poraācū nūxū changechaūcū ya chaune ixīcū
 i tórū Coriarū orewa. Rū nūma rū aixcūma meā nayanguxēē i guxūma
 i ngēma nagu chanamuxū. Rū nūma tá pexna nūxū nacuèxāchixēē
 na ñuxācū Ngechuchu ya Cristu naxwèxexūācūma meā chamaxūxū rū
 chanangūexēēxū ga yema yaxōgūxū ga natanūgu chixūgūxū. ¹⁸ Rū ñuxre i
 pemagū rū pegū picuèxūūgū, erū nagu perūxīnūē na tagutāma pexūtawa
 íchayadauxū. ¹⁹ Natūrū ngēxguma nanaxwèxegu ya tórū Cori, rū paxa tá
 ngēma chaxū na pexū íchayadauxūcèx. Rū ngēxguma rū tá chomaxūchi
 nūxū chadau ngoxi ngēma duūxūgū i nūgū icuèxūūgūxū nūxū nangēxma
 i Tupanaārū pora rū ēxna yadoragūmare. ²⁰ Erū Tupanaarū pora rū
 tama nūxū tixumare, natūrū nagu ítamaxē i ngema pora. ²¹ ĶRū ñuxma
 rū ſacū ēxna nixī i penaxwèxexū i pema? ĶPenaxwèxe na pexū chin-
 gagūxū i ngēxguma ngēma changuxgu, rū ēxna penaxwèxe na pexū
 changechaūācūma rū pemaā chamecūmaācūma pexū na íchayadauxū?

5

Duūxūgū i chixri maxēxūchiga

¹ Rū duūxūgū nūxū nixugūgū rū wūxi i yatū i petanūwa rū naērūcūmaātama naxāmèx. Rū ngēma nixī i pecadū i poraācū chixexūchixū, erū woo ngēma duūxūgū i tama yaxōgūxūtanūwa rū tama ngēmaācū naxūpetū. ² ¿Rū űuxācū i pema i ngēxguma i pegū picuèxūūgūamaxū? Rū narūmemaē chi nixī na poraācū pengechaūgūxū. Rū ngēma yatū i ngēma chixexū ūxū rū name nixī na ípenamuxūchixū i petanūwa. ³ Rū woo tama petanūwa changēxmagu i chomax, natūrū guxūguma pegu charūxīnū. Rū űoma pexūtawa changēxmaxūrū rū tórū Cori ya Ngechuchu ya Cristuégagu pemaā nūxū chixu na űacū tá namaā pexūxū i ngēma duūxū. ⁴ Rū name nixī i tórū Cori ya Ngechuchu ya Cristuégagu pengutaquēxegū. Rū nūma ya tórū Cori ya Ngechuchu rū tá napetanūgu na pexū naporaexēēxūcèx. Rū choma rū tá pexna chacuèxāchi i chorū yumūxēwa. ⁵ Rū ngēma norū poxcu i tá nūxna pexāxū i ngēma yatū, rū ngēma tá nixī na ípenamuxūchixū i petanūwa na Chataná ngūxū nūxū ingexēēxūcèx. Rū ngēmaācū tá inayarūxo i naxūneārū ngūchaū i chixexū, natūrū naāē rū tá namaxū i ngēxguma wena nūma naxūxgu ya tórū Cori ya Ngechuchu. ⁶ ¿Rū tama name i pema rū pegū picuèxūū naxcèx i ngēma pexūxū! ¿Tama ēxna nūxū pecuèx i ngēma ore i űaxū:

“Wūxi i íraxū i pāūārū puxēēruū rū taxūma i pāūchara nipuxēē”, űaxū?
⁷ Rū ngēmacèx name nixī i nūxū perūxoe i guxūma i nuxcūmaūxū i pecūma i pexū chixexēēxū. Rū ngēxguma ngēmaācū penaxūxgu, rū űoma ngexwacaxūxū i pāū i ngearū puxēēruūāxū i Ūpetūchigaarū petawa ingōxūrūū tá pime. Rū űuxma i pema rū aixcūma ngexwacaxūxū i duūxūgū pixīgū, yerū Cristu rū űoma wūxi i carnerurūū marū tachicūū tórū pecaducèx nayu. ⁸ Rū ngēmacèx name nixī i nūxū tarūxoe i nuxcūmaūxū i tacūma i chixexūgū rū aixcūma Tupanagu tarūxīnūē rū meā naxcèx tamaxē, erū ngexwacaxūxū i norū duūxūgū tixīgū. ⁹ Nūxīraūxū ga chorū poperawa rū pemaā nūxū chixu na tama natanūgu pexāgūxū i ngēma duūxūgū i naī i ngemaā naxūneārū ngūchaū ūgūxū. ¹⁰ Natūrū yexguma yema űachagu pexū, rū tama pemaā nūxū chixu na nūxna pixīgachitanūxūchixū i ngēma duūxūgū i tama yaxōgūxū i naī i ngemaā maxēmarexū, rū ēxna ngēma duūxūgū i guxūma i űacū nūgūna nugūchaūgūxū, rū ēxna ngītèèxgūxū, rū ēxna ngēma duūxūgū i tupananetachicūnèxāxū icuèxūūgūxū. Erū ngēxguma chi naxchaxwa ípechoūxgu i ngēma duūxūgū, rū chi taxucūrūwa i űoma i naānewa pengēxmagū. ¹¹ Natūrū yexguma pemaā nūxū chixuxgu na tama natanūgu pexāgūxū i ngēma duūxūgū i chixri maxēxū, rū nachiga chidexa i ngēma duūxūgū i nūgū ixugūxū na peeneēgū i yaxōgūxū na yixīgūxū natūrū naī i ngemaā maxēxū, rū ēxna aūexū, rū ēxna tupananetachicūnèxāxū icuèxūūgūxū, rū ēxna oregūtèèxgūxū, rū ēxna ngāxewèxegūxū, rū ēxna ngītèèxgūxū. Rū ngēma duūxūgū nixī i pemaā nūxū chixuxū na tama namexū na natanūgu pexāgūxū rū bai i namaā na pechibūexū. ¹²⁻¹³ Erū tama choxmēxwa nangēxma na nūxna chaçaxū i ngēma duūxūgū i tama Tupanaāxū yaxōgūxū. Rū Tupana tá nixī ya nūxna çacū i ngēma duūxūgū. Natūrū i pema rū pemēxwa nangēxma na nūxna peçaxū i ngēma peeneēgū i yaxōgūxū i tama meā maxēxū. Rū name nixī i petanūwa ípenamuxūchi i ngēma duūxū i chixri maxūxū.

Ngëxguma tacü rü guxchaxü tüxü ngëxmagu taeneëmaã, rü tama name i ãëxgacügü i tama yaxögüxüpëxewa tayamexëe i ngëma

¹ Rü ngëxguma wüxie i pema pexü nangëxmagu i tacü rü guxchaxü i wüxi i peeneë i yaxöxümaã, ¿rü tüxcüü wüxi i ãëxgacü i tama yaxöxüãrü ngüxëcëx ípeyaca na nüma pexü namexëëãxücëx i ngëma perü guxchaxügü? ¿Rü tama ëxna inamexü i ngëma peeneëgü i yaxögüxü na namexëëgüxü i ngëma perü guxchaxügü? ² ¿Tama ëxna nüxü pecuëx na yixema na yaxögüxü tá yíixü i naãneãrü guxgu nüxna icagüxü i guxüma i ñoma i naãneçüãx i duüxügü? Rü ñuxma na pema tá yíixü i ñoma i naãneçüãx i duüxügüxü picagüxü, ¿rü tüxcüü taxucürüwa i pematama penamexëe i ngëma perü guxchaxügü i írachirëxü? ³ ¿Tama ëxna nüxü pecuëx rü woo ngëma daxüçüãx i Tupanaãrü orearü ngeruügü, rü yixema tá yíixü i nüxü icagüxü? Rü ngëmacëx nixí i yexeraãcü pemëxwa nangëxmaxü na ñuxãcü penamexëëxü i ngëma guxchaxügü i ñoma i naãnewa pexü ngëxmagüxü. ⁴ Rü ngëmacëx, ngëxguma tacü rü guxchaxü pexü ngëxmagu i ñoma i naãnewa, ¿rü tüxcüü i ngëma ãëxgacügü i tama yaxögüxüxütawa pegü ípeyaxuaxügüxü na pexü namexëëgüãxücëx i ngëma? ⁵ Rü pemaã nüxü chixu i ngëma ore na pexãneëxücëx. ¿ëxna tataxuma i petanüwa ya wüxie ya nüxü cuáxe na tanamexëëxü i ngëma guxchaxügü i petanüwa ngëxmaxü? ⁶ Rü tama pegümaã penuëxícatama, natürü naetü rü ãëxgacügü i tama yaxögüxüxütawa pexí na penamexëëxücëx i ngëma perü guxchaxügü. ⁷ Rü ngëma na pegümaã penuëxü, rü ngëma rü poraãcü chixexü nixí. ¿Rü tüxcüü tama yaxna namaã pexínüe i ngëma guxchaxügü i peeneë pemaã üxü? ¿Rü tüxcüü tama namaã peporae ega texé perü tacüçëx ngíxgux? ⁸ Natürü i pema rü poraãcü chixexü pexüe, erü woo peeneëgü i yaxögüxüãxü rü ta pengix.. ⁹⁻¹⁰ ¿Tama ëxna nüxü pecuëx na ngëma duüxügü i chixexü ügüxü rü nataxuxütáma i nachica i ngextá Tupana ãëxgacü íyíixüwa? ¿Rü tama name i pegütama pewomüxëëgü! Erü ngextá Tupana ãëxgacü íyíixüwa rü nataxütáma i nachica i ngëma duüxügü i naí i ngemaã ípexü, rü ngëma duüxügü i tupananetachicünëãxü icuëxüügüxü, rü ngëma duüxügü i naxmëxëchita rü ëxna nateechita ngëãëxü, rü ngëma yatügü i naxrüü yatüxümaã ngëãëxü, rü ngëma ngítëexgüxü, rü ngëma duüxügü i nügünaxica nanuxüchixü i norü ngëmaxügü, rü ngëma duüxügü i ngãxëwëxegüxü, rü ngëma duüxügü i oregütëexgüxü, rü ngëma duüxügü i womüxëëwëxegüxü. Rü guxüma i ngëmagü rü nataxütáma i nachica i ngextá Tupana ãëxgacü íyíixüwa. ¹¹ Rü yexgumarüütama pixíçü ga ñuxre ga pema ga üpax. Natürü i ñuxma ya Tupana rü marü pexü ínanapi i perü chixexü na noxrüxícatama pixíçüxüçëx. Rü ñuxma rü aixcüma napëxewa pime yerü Naãë i Üünexü rü tóru Cori ya Ngechuchu ya Cristuégagu marü perü pepaduna pexü ínanguxüxëe.

Ñuxãcü naxüüne i taxüne

¹² Rü ñuxre i pema rü ñaperügügü:

“Rü marü name na chanaxüxü i ngëma chanaxwëxexü”, ñaperügügü. Rü aixcüma nixí i ngëma, natürü tama guxü i ngëma ixügüxü rü tüxü name. Rü aixcüma nixí i Tupana choxü ínguxuchixëëxü na chanaxüxüçëx i ngëma chanaxwëxexü, natürü tama name na tacü rü chixexügu chaugü changuxëëxü na chomaã inacuáxüçëx. ¹³ Rü ngëxgumarüü ta rü ñuxre i duüxügü rü ñanagürügü:

“Rū ōna rū taxūnecèx nixī, rū taxūne rū ōnacèx nixī”, ñanagürügü. Rū aixcūma ngēmaācū nixī, natürü ya Tupana rū tá inayanaxoxēē i guxūma i ngēma. Rū taxūne rū tama na i ngemaā namaā na ingēāemarexūcèx nixī. Erü taxūnemaā nixī i naxūxū i tórü Coriarü ngúchaŭ. Rū tórü Cori nixī ya taxūnexū maxēēcū. ¹⁴ Rū yema Tupana wena namaxēēxürüŭ ga tórü Cori ya Ngechuchu, rū ngēxgumarūŭ tá ta norü poramaā wena tūxū namaxēēxēē. ¹⁵ ¿Rū tama ēxna nūxū pecuèx na ngēma pexene rū Cristuarü na yīxū? ¿Rū ñuxācū i ngēma chaxune i Cristuarü ixīxū rū ngexū i ngēāēxūmaā inapexū? Taxucürüwama ngēmaācū nixī. ¹⁶ ¿Rū ēxna tama nūxū pecuèx ega wūxi i ngexū i ngēāēxūmaā inapexgu ya wūxi ya yatü rū ngēma taxre i naxūne rū wūxitama i naxūne yīxū? Erü Tupanaārü ore i ümatūxūwa rū ñanagürü:

“Ngēma taxre i naxūne rū wūxitama i naxūne tá nixī”, ñanagürü. ¹⁷ Natürü ngēxguma wūxi i duūxū rū tórü Cori ya Cristuaxū yaxōōxgu, rū ngēma naāē i ngēma duūxū rū Cristuāēmaā wūxigutama narūxīnūē. ¹⁸ Rū ngēmacèx name nixī na nūxū perūxoexū i pexeneārü ngúchaŭ na pexūxū. Rū guxūma i togü i pecadu i wūxi i duūxū ūxū rū tama naxūnexū nachixexēē. Natürü ngēma na na i ngemaā nangēāēxū rū ngēma waxi nixī i naxūnexū chixexēēxū. ¹⁹ ¿Tama ēxna nūxū pecuèx i pexene rū Tupanaāē i Üünexūpata na yīxū? Rū pegu nixī i naxāchiūxū i ngēma Naāē i Üünexū i Tupana pexna muxū. Rū ngēmacèx i pema rū tama pegüarü yoratama pixīgü. ²⁰ Erü Tupana rū marü pexcèx nataxe rū poraācū nūxū petatanü. Rū ngēmacèx penaxwèxe i ngēma pexenemaā meā Tupanacèx pemaxē na ngēmaācū namaā penataxēēxū ya Tupana.

7

Ucuxēgü i āmèxchiga

¹ Rū ñuxma rū tá pexū changāxū ga yema āmèxchiga ga choxna naxcèx peçaxū ga perü poperawa. Rū narümemaē chi nixī i noxtacūma tama naxāmax ya yatü. ² Natürü ngēma na naxūneārü ngúchaŭ na naxügūmarexū i duūxūgü, rū narümemaē nixī i wūxichigü ya yatü rū na naxāmaxū, rū wūxichigü i nge rū na naxātexū. ³ Rū yima yatü ya āmacü rū taxucürüwama naxmèxna nügü ninuxū. Rū ngēma nge i ātecü rū taxucürüwama ngītena ngīgü iyanuxū. ⁴ Erü ngēma nge i ātecü rū tama ngīgüxūneārü yoratama iyixī, erü ngīte nixī ya ngīxīneārü yora ixīcū. Rū ngēxgumarūŭ ya ngīte rū tama nügüxūneārü yora nixī, erü naxmèx iyixī i naxūneārü yora ixīcū. ⁵ Rū tama name i wūxi ya yatü rū namèxna nügü ninuxū, rū ēxna wūxi i ngecū rū ngītena ngīgü iyanuxū, ega tama nügūmaā namexēēāgu na ñuxre i ngunexū tama nügūmaā namaxēxū naxcèx na nayumūxégūxū. Rū ngēmawena rū name nixī na w-naxārü noxrirūŭ nügūmaā namaxēxū na tama Chataná nūxna Inūxūcèx na chixexūgu nayixēēāxūcèx. ⁶ Rū guxūma i ñāā ore i pemaā nūxū chixuxū i āmèxchiga rū ātechiga rū tama wūxi i mu nixī i ngēma. Natürü pemaā nūxū chixumare na nūxū pecuáxūcèx na namexū i ngēmaācū na penaxūxū. ⁷ Rū chomatama nagu charūxīnū rū chierü name nixī ega choma chamaxūxürüŭ namaxēgu i guxūma i duūxūgü. Natürü Tupana rū wūxichigü i duūxūna nanaxā i nacūma na ñuxācū namaxēxūcèx rū ñuxācū nagu naxīnūxūcèx. Rū ngēmacèx tama guxāma tawūxigu. ⁸ Rū ngēma ngemèxgūxū rū ngetegūxū rū yutegūxū rū namaā nūxū chixu rū

narūmemaē nixī i chauxrūū tama naxāmèx rü tama naxāte. ⁹ Natürü ngēxguma wūxi i duūxū taxucürüwa naxūneārü ngúchaūmaā naporagu, rü name nixī na naxāmaxū rü ēxna naxātexū. Erü narūmemaē nixī i noxtacūma naxāmèx rü ēxna naxāte na tama ngema norü ngúchaūgagu düxwa chixexūgu nanguxūcèx. ¹⁰ Natürü yixema marü āmaxē rü ātexe, rü tūmamaā nüxū chixu na tama namexū na tūmatexū na ítatáxū. Rū ngēma mu rü tórü Coriarü mu nixī, rü tama choxrü nixī. ¹¹ Natürü ngēxguma chi ngürüāchi wūxi i ngexū natexū ítèxgu, rü name nixī i noxtacūma nangete rü ēxna wena natecèx nataegu. Rū ngēxgumarūū ta ya yatü rü tama name i namèxū ínatèx. ¹² Rū ñuxma rü choxū nangēxma i wūxi i ore i tūmacèx ya yixema āmaxē ngīmaā i wūxi i nge i tama yaxōxcü. Rū ngēma ore rü choxrütama nixī rü tama tórü Coriarü nixī. Rū ngēxguma wūxi ya yatü ya öcürü ngīmaā āmaxgu i wūxi i nge i tama yaxōxcü, rü tama name i ngīxū ínatèx, ega ngīma rü aixcūma namaā naxātechaūgu. ¹³ Rū ngēxguma wūxi i nge i yaxōxcü ātegu namaā ya wūxi ya yatü ya tama yaxōcü, rü tama name i ínatèx ya yima ngīte ega nūma ya yima yatü rü aixcūma ngīmaā naxāmèxchaūgu. ¹⁴ Rū yima yatü ya tama yaxōcü, rü namèx i yaxōxcügagu Tupana nüxū nacuèx. Rū ngēma ngecü i tama yaxōxcü, rü ngīte ya yaxōcügagu Tupana ngīxū nacuèx. Erü ngēxguma chi tama ngēmaācü yixīgu, rü chi ngēma naxācügü rü duūxūgü i tama yaxōgüxūācügürüū tá nixīgü. Natürü i ñuxma ya naxācügü rü marü Tupana tüxū nacuèx. ¹⁵ Natürü ngēxguma yima yatü ya tama yaxōcü rü namèxū ínatáxchaūgu rü jnoxtacūma ngīxū ínatá! Rū ngēxgumarūū ega ngēma ngecü i tama yaxōcü rü ngítexū ínatáxchaūgu, rü jnoxtacūma ngítexū ínatá! Rū ngēxguma ya yima yatü ya yaxōcü rü marü name ega wena naxāmèxgu. Rū ngēma ngecü i yaxōcü rü marü name ega wena naxātegu. Erü Tupana pexū nade na pegü pengechaūgüxūcèx. ¹⁶ Rū ngēmacèx, Pa Ngecü i Tupanaāxū Yaxōxcüx, rü ngēxguma cute i tama yaxōxū cuxū ítáxchaūgu, namē nixī i tama cunachuxu, erü tama nüxū cucuèx ngoxi tá nüxū cuyaxōxēē i ngēma cute rü ēxna tama. Rū cumax, Pa Yatü ya Yaxōxcüx, rü ngēxguma cuxmèx i tama yaxōxū cuxū ítáxchaūgu, rü name nixī i tama cunachuxu, erü tama nüxū cucuèx ngoxi tá ngixū cuyaxōxēē i ngēma cuxmèx rü ēxna tama. ¹⁷ Rū ñuxma rü pemaā nüxū chixu rü nūma ga Tupana rü wūxichigü ga duūxēna nanaxā ga tūmaārü cuèx na tūmaārü maxūmaā itacuáxūcèx rü meā tanaxūxūcèx i ngēma puracü ga noxri tüxū yexmaxū ga tauta Tupana tūmacèx caxgu. Rū ngēma nguxēētae nixī i namaā chanangüxēēxū i guxūma i yaxōgüxū i wūxichigü ya tupaucawa ngēxmagüxū. ¹⁸ Rū ngēxguma Tupana naxcèx caxgu i wūxi i duūxū i marü Yudiugürüū íwiechēxmüpēxechiraūxū, rü nüētama nixī ega ngēmaācütaama yixīgu. Rū ngēxguma Tupana nayauxgu i wūxi i duūxū i tama íwiechēxmüpēxechiraūxū, rü nüētama nixī ega ngēmaācütaama yixīgu. ¹⁹ Erü Tupanapēxewa rü nüētama nixī ega wūxi i duūxū rü ínawiechēxmüpēxechiraūgu rü ēxna tama. Erü ngēma Tupana aixcūma naxwèxexū nixī na naga naxīnūxū i wūxichigü i duūxū. ²⁰ Rū wūxichigü i duūxū rü name nixī i nawatama napuracü ga yema puracü ga nüxū yexmaxū ga yexguma Tupana noxri naxcèx caxgu. ²¹ Rū yexguma wūxi ga coriarü duūxū quixīyane Tupana cuxcèx caxgu, rü tama name i ngēmacèx cuxoegaāē. Natürü ngēxguma cuxū natauxchagu na nüxna ícunguxuchixū i ngēma cori, rü marü name na ícunguxuchixū. ²² Rū cuma ga na cucoriāxyane cuxcèx naçaxū ga Tupana, rü name

nixī i nūxna cucuèxāchi na Cori ya Cristu pecaduwa cuxū ínguxuchixēēxū. Rū cuma ga na cungearū coriāxyane cuxcèx naçaxū ga Tupana, rū name nixī i nūxna cucuèxāchi na tórū Cori ya Cristuarū duūxū quiūxū i ñuxma na nūxū cupuracūxūcèx. ²³ Tupana rū marū pexcèx nataxe rū poraācū nūxū petatanū. ;Rū ngēmacèx i ñuxma rū tāūtáma naga pexīnūē i ngēma duūxūgū i wenaxārū ñoma i naāneārū chixexūwa pexū gagūchaūxū! ²⁴ Rū name nixī, Pa Chaueneēgūx, i wūxichigū i pema rū meā Tupanapēxewa penaxūama ga yema puracū ga noxri pexū yexmaxū ga yexguma Tupana pexcèx caxgu. ²⁵ Rū ñuxma rū tá pemaā nūxū chixu i nachiga i ngēma duūxūgū i ngemèxgūxū rū ngetegūxū. Rū tórū Cori ya Ngechuchu rū taxuūma i mu choxna naxā i ngēmachiga. Natūrū tá pemaā nūxū chixu i ñuxācū nagu charūxīnū i ngēmachiga. Rū ngēma chorū ore rū aixcūma nixī erū choma nixī i wūxi i duūxū ga nūxū changechaūtümūūācūma choxū nayaxuxū ga tórū Cori. ²⁶ Natūrū ngema ñuxma nūxū idauxū i guxchaxūgūgagu rū chauxcèx rū chi name i tama nixāmèx i ngēma yatūgū i ngemèxgūxū. ²⁷ Rū ngēxguma marū cuxāmèxgu rū tama name i ngīxū ícutèx. Natūrū ngēxguma cungemèxgu rū name i tama cuxāmèx. ²⁸ Natūrū ngēxguma cuxāmèxgu rū tama pecadu nixī i ngēma. Rū ngēxguma wūxi i paxū ātegu rū tama pecadu nixī i ngēma. Natūrū ngēma ixāmèxgūxū rū ixātegūxū rū tá nayexera i norū guxchaxūgū i ñoma i naānewa, rū ngēma nixī i tama chanaxwèxexū na nūxū nangupetūxū. ²⁹ Pa Chaueneēgūx, pemaā nūxū chixu rū tama muxū i ngunexū tūxū nangēxma na naxūxūcèx i Tupanaārū puracū. Rū ngēmacèx ya yixema ixāmèxgūxe rū name nixī i meā tanaxūgū i Tupanaārū puracū ñoma tangemèxgūxūrū. ³⁰ Rū yixema ngezwaca yutanūgūxe rū yixema peta ūgūxe rū yixema itaxegūxe, rū tama name i ngēmacèx Tupanaārū puracū na ítangēxgūxū. ³¹ Rū yixema tūxū nangēxmaxē i tūmaārū ngēmaxūgū i ñoma i naānewa, rū tama name i ngēmacèx Tupanaārū puracū na ítangēxgūxū. Erū ñoma i naāne i ñuxma nūxū idauxū rū paxa tá nagux. ³² Rū tama chanaxwèxe na íacūcèx pexoegaāēgūxū. Rū ngēxguma wūxi i yatū ngemèxgu, rū Tupanaārū puracūgu narūxīnū rū nagu narūxīnū na ñuxācū Tupanaārū ngūchaū naxūxū. ³³⁻³⁴ Natūrū ngēxguma naxāmèxgu ya wūxi ya yatū, rū ñoma i naāneārū ngēmaxūgu narūxīnū rū nagu narūxīnū na ñuxācū namèxū nataāēxēēxū. Rū ngēmaācū muxūgu narūxīnū. Rū ngēxgumarū ta nixī i ngexūgū. Rū ngēma ngexū i ngetexū rū Tupanaārū puracūgu narūxīnū, erū marū Tupanana nūgū naxā rū guxū i naxūnemaā rū naāēmaā naxcèx namaxū. Natūrū ngēma ngexū i ātexū rū ñoma i naāneārū ngēmaxūgu narūxīnū, rū nagu narūxīnū na ñuxācū natexū nataāēxēēxū. ³⁵ Rū perū mexūcèx nixī i pemaā nūxū chixuxū i ngēma, rū tama pexna na chanachuxuxūcèx nixī. Natūrū ngēma ñacharūgū na meā pemaxēxūcèx rū aixcūma penaxūxūcèx i tórū Coriarū puracū. ³⁶ Rū ngēxguma texé nagu rūxīnūgu na tūmaxācū rū marū na napaxū, rū tūmacèx namexgu na naxātexū, rū marū name i ngīxū taxūte ega aixcūma tūmacèx namexgu. Rū ngēma na naxātexū i tūmaxācū rū tama pecadu nixī. ³⁷ Natūrū ngēxguma wūxi i yatū nūxū nangēxmagu i norū pacū rū tama nanaxwèxegu na ngīxū naxūtexū, rū ngēma rū ta marū name. Erū naxmēxwa ingēxma rū taxucèxma texé tanachixewe na ngīxū naxūtexūcèx. ³⁸ Rū ngēmawa nūxū tadau rū ngēma yatū i naxācū ngīxū ūtexū rū mexū naxū. Rū ngēma yatū i tama naxācū ngīxū ūtexū rū

yexeraxū i mexū naxū. ³⁹ Rū wūxi i nge i ātecū rū ngītemēxēwa ingēxma i ngēxguma namaūxgu ya ngīte. Natūrū ngēxguma nayuxgu ya ngīte, rū marū name ega to i yatū i ngīma ngīxū ngūchaūxūmaā naxātegu. Natūrū inaxwēxe na wūxi ya yatū ya yaxōcūmaā naxātexū. ⁴⁰ Natūrū chauxcēx rū yexeraācū chi itaē i ngēxguma chi tāū chima wena naxātegu. Rū ngēma ore rū choxrūtama nixī, natūrū nagu charūxīnū rū Tupanaāē i Ūūnexūārū īnū ta nixī.

8

Tupananetachicūnēxāgūna naxuaxūgūxū ga ōnachiga

¹ Nūxma rū tá pemaā nūxū chixu i nachiga i ngēma ōnagū i ngēma duūxūgū i tama Ngechuchuaxū yaxōgūxū norū tupananetachicūnēxāgūna uaxūgūxū. Rū aixcūma nixī i wūxichigū i yixema i meāma nūxū icuáxū i ngēmachiga. Natūrū ngēma nūxū na icuáxūgagu rū űuxguacū rū yigū namaā ticuēxūxū. Natūrū ngēma na yigū ingechaūxū rū tūxū narūngūxēē na yexeraācū meā yaxōgūchigūxū. ² Rū ngēxguma chi texé nagu rūxīnūgu na űacūxū tacuáxū, rū name nixī i nūxna tacuēxāchi na ngēxguma rū ta tama aixcūma nūxū tacuáxū i guxūma i ngēma cuēx i aixcūma ixīxū. ³ Natūrū ngēxguma texé aixcūma Tupanaxū ngechaūgu, rū Tupana rū tūxū nacuēx ya yīxema. ⁴ Rū ngēma na nangōxū i ngēma ōnagū i tupananetachicūnēxāgūna naxuaxūgūxū i duūxūgū, rū meāma nūxū tacuēx na taxuwama namexū i ngēma tupananetachicūnēxāgū erū tama aixcūma Tupanaxūchi nixīgū. Erū wūxixicatama nixī ya aixcūma Tupana ixīcū, rū nataxuma ya nāī. ⁵ Rū woo duūxūgū nagu narūxīnūe rū nangexma i muxūma i tupanagū i űoma i naanewa rū dauxūguxū i naanewa, natūrū taxcēx rū tama ngemaācū nixī. ⁶ Erū yixema nūxū tacuēx na wūxitama yixīxū ya Tupana ya Tanatū ixīcū. Rū nūma ya Tanatū nixī i naxūāxū i guxūma i űacū i ngēxmaxū, rū naxcēx nixī i imaxēxū i yixemax. Rū ngēxgumarūū ta nangēxma i wūxitama ya tōrū Cori ya Ngechuchu ya Cristu. Rū yimagagu nixī na nangēxmaxū i guxūma, rū yimagagu nixī i tūxū nangēxmaxū i maxū. ⁷ Natūrū tama guxūma i yaxōgūxū nūxū nacuēx na nangēxmaxū ya wūxitama ya Tupana rū wūxitama ya tōrū Cori. Rū űuxre i nūmagū ga ūpa rū nūxū nayapue na nūxū yaxōgūāxū i ngēma tupananetachicūnēxāgū, rū űuxma rū ta tama aixcūma nūxū nacuēxgū i ngēma mexū i Tupana nūxū naxwēxexū. Rū ngēmacēx nixī i űuxma i nagu naxīnūēxū na chixexū naxūgūxū i ngēxguma nangōxgūāgu i ngēma naxūnamachi i togū i duūxūgū norū tupananetachicūnēxāgūna uaxūgūxū na nūxū namaā yacuēxūūgūxūcēx. ⁸ Rū yixema nūxū tacuēx na tama űacū rū namachi na ingōxūgagu yīxū na Tupana tūxū dexū. Rū tāūtāma yexera time i napēxewa ega nangōxgūgu i ngēma namachi. Rū tāūtāma yexera tichixe i napēxewa ega tama nangōxgūgu. ⁹ Natūrū i pema i nūxū na pecuáxū na tama pecadu yīxū na nangōxū i ngēma namachi, rū pexuāēgū erū ngūrūāchi ngēma na pengōxūgagu chixexūgu tá penayixēē i ngēma peeneēgū i tauta aixcūma meā nūxū cuēxgūxū na űacū yīxū i Tupana nūxū naxwēxexū! ¹⁰ Erū cuma na meā Tupanaxū cucuáxū, rū ngēxguma chi cunangōxgu i ngēma namachi i ngextā tupananetachicūnēxāgūxū īyacuēxūūgūxūwa, rū ngūrūāchi wūxi i cueneē i tauta meā Tupanaxū cuáxū tá cuxū nadau. Rū ngūrūāchi nūma rū tá ta nanangōx i ngēma namachi woo naāēwa nagu naxīnūgu na wūxi i chixexū yīxū na nangōxū i ngēma namachi.

11 Rū ngēmaācū i cuma na meā Tupanaxū cucuáxū, rú tá icuyanatauxēē i ngēma cueneē i Cristu naxcēx yuxū i tauta meā Tupanaxū cuáxū. 12 Rū ngēmacēx i ngēxguma chixexūgu cunanguxēēxgu i ngēma cueneē i tauta meā Tupanaxū cuáxū, rú Cristumaā rú ta chixexū cuxū. 13 Rū ngēmacēx i ngēxguma ngēma namachi i changōxūgagu chixexūgu chananguxēēxgu i chaueneē, rú narūmemaē nixī i noxtacūma taguma namachi changōx na tama pecadugu chananguxēēxūcēx i ngēma chaueneē.

9

Yixema Cristu tūxū muxē na nūxū tapuracūxūcēx, rú tūxna naxū i tūmaārū natanū

1 Rū pemaā nūxū chixu rú tórū Coritama nixī ya choxū yaxucū rú choxū mucū na norū puracū chaxūxūcēx, rú ngēmacēx taxuūma i duūxūgūmēxēwa changēxma i űuxmax. Rū chomatama chauzetūmaā tórū Cori ya Ngechuchuxū chadau, rú ngēma puracū i nūxū chaxūxūgagu nixī i peyaxōgūxū i pemax. 2 Rū woo togū i duūxūgū tama choxū cuēxgūchaūgu na tórū Cori choxū muxū, natūrū i pema rú meāma nūxū pecuēx na nūma yīxū ga choxū namuxū. Yerū chauxūtawa nixī ga tórū Coriaxū peyaxōgūxū, rú ngēmawa nūxū pecuēx na aixcūma yīxū na nūma choxū namuxū. 3-4 Rū űaā nixī i chorū dexa i namaā chanangāxūxū i ngēma duūxūgū i chauchiga idexagūxū:

“¿Éxna tama name na duūxūgū choxna naxāxū i chorū ōna rú chorū axexū naxcēx i chorū puracū? 5 ¿Éxna tama inamexū ta na wūxi i ngexū i yaxōxūmaā na chaxāmaxū na chayagaxūcēx ngēxgumarūū na naxāmaxū i Pedru, rú naēneēgū ya tórū Cori, rú ngēma togū i yatūgū i Tupana imugūxū? 6 ¿Rū ēxna pema nagu perūxīnūēgu rú choma rú Bernabéxicatama i tama namexū na toxū perūngūxēēgūxū ngēma togū i orearū uruūgūxū na perūngūxēēgūxūrūū? 7 ¿Tacū rú duūxū i churarawa ūxū i nūgūxūtama naxūtanūxū i norū ōna? ¿Rū tacū rú duūxū i orix itoxū i tama namūxū i norū o? ¿Rū tacū rú duūxū i carnerugūna dauxū i tama nagūnenixū ne ixaxūxū?” Ngēma űacharūgū nūxū i ngēma duūxūgū i chauchiga idexagūxū. 8 ¿Rū űuxma rú tāūtāma nagu perūxīnūē na chorū orexicatama yīxū i űaā nūxū chixuxū! Erū Tupanaārū ore ga Moiché ūmatūxūwa rú ta ngēma űanagūrū. 9 Erū ngēma ore rú űanagūrū:

“¡Rū ngēma woca i aruchuarū putēxewa puracūxū, rú tāūtāma cu-nawēxnagu na tama yima aruchuwa nachibūxūcēx!”

űanagūrū i ngēma ore. Rū nūxū tacuēx na tama wocagūgu naxīnūxū ga Tupana ga yexguma yema űaxgu. 10 Natūrū pemaā nūxū chixu rú tagu nixī ga naxīnūxū ga yexguma yema űaxgu ga Tupana. Rū tachiga nixī ga naxūmatūxū ga yema ore. Erū yixema aruchunecū ūxe rú yixema norū oarū pūxwa puracūxe, rú ngēxguma tapuracūeyane rú tanaxwēxegū na itananguxēēgūxū i ngēma norū o i tūxna ūxū. 11 Rū toma rú wūxi ya nanetūchire ya itatoxūnerūū tixīgū ga yexguma pemaā nūxū tixuxgu ga Tupanaārū ore. ¿Rū űuxma rú tama ēxna i pexcēx namexū na toxna penaxāxū i tacū i toxū taxuxū? 12 Rū ngēxguma ngēma togū i orearū uruūgū petanūwa nayauxgūgu i ngēma nūxū taxuxū, rú maneca toma rú yexera name nixī i petanūwa tanayaxu i ngēma toxū taxuxū. Natūrū i toma rú tama ngēmaācū tanaxū. Erū toma rú guxū i guxchaxūmaā taporae na tama pexū tanaguxchaxēēxūcēx na Cristuaxū peyaxōgūxū.

13 Pema nüxū pecuèx rü guxūma i duūxūgü i tupauca ya taxūnewa puracūexū, rü ngēma ōna ya yima tupaucawa ngēxmaxūtama nangōxgü. Rū ngēma duūxūgü i tupaucagu Tupanacēx naxūnagü dēixū, rü nanade i ñuxre i ngēma namachi norū ngōxruū. ¹⁴ Rū ngēxgumarūū ta ya yixema nüxū ixugūxe i ore i tüxū maxēxēēxū, rü tōrū Cori nüxū nixu rü name nixī i tanayauxtanū i ngema tūmaarū puracū.. ¹⁵ Natürü i choma rü taguma ngēmaācū chanaxū. Rū ñuxma na pexcèx chanaxūmatūxū i ñaā popera, rü tama tacū choxna pexāxūcèx nixī. Erü ngēma na taguma texēxūtawa tacūcèx íchaçaxū, rü wūxi i chorū taāē nixī. Rū narūmemaē chierū nixī na chayuxū naxūpa na texē choxna nayaxuxū i ñaā taāē i choxū ngēxmaxū. ¹⁶ Rū ñuxma na nüxū chixuxū i ngēma ore i tüxū maxēxēēxū, rü taguma ngēmacèx chaugū chicuèxū. Erü woetama ngēma nixī i chorū puracū ga Tupana choxna āxū, rü ngēmacèx taxucürūwama chanangexrū. Erü poraācū chi chachixexūgu i ngēxguma tāū chima nüxū chixuxgu. ¹⁷ Rū ngēxguma chi chaugagu chitama chanaxūxgu i ngēma puracū, rü nagu chi charūxīnū na choxū naxātanūxū. Natürü ngēxguma Tupana choxū muxūācūma chanaxūxgu, rü chanaxūama erü woetama ngēma nixī i chorū puracū ga Tupana choxna āxū. ¹⁸ Rū ñuxma rü tacū tá nixī i chorū natanū naxcèx i ngēma puracū i chaxūxū? Rū dücax, rü chorū natanū nixī i ngēma taāē i chayaxuxū i ngēxguma nge-tanūācūma nüxū chixuxgu i ngēma ore i tüxū maxēxēēxū. Rū ngēmaācū woo Tupanapēxewa name na petanūwa chanayaxuxū i chorū natanū na ngēmamaā chamaxūxūcèx, natürü taguma texena naxcèx chaca.. ¹⁹ Rū woo taxūxemēxēwa changēxma i chomax, natürü guxāmēxēwa chaugū changēxmaxēē, na ngēmaācū yexeraācū muxūma i duūxūgü üxū charūngūxēēxūcèx na Cristuaxū yaxōgūāxūcèx. ²⁰ Rū ngēxguma chautanūxū i Yudiugūtanūwa changēxmagu, rü namaā chaugū chawūxiguēē na ngēmaācū nüxū charūngūxēēxūcèx na Cristuaxū yaxōgūāxūcèx. Rū woo tama yema Moiché ūmatūxū ga mugūtūūwa changēxmagu, natürü chayanguxēēāma i ngēma mugū na ngēmaācū Cristuxūtawa chana-gagūxū i ngēma duūxūgü i ñuxma rü ta nagu íxū i ngēma mugū ga Moiché ūmatūxū. ²¹ Rū ngēxguma natanūwa changēxmagu i ngēma duūxūgü i tama Yudiugū ixīgūxū, rü ngēma duūxūgūmaā chaugū chawūxiguxēē na ngēmaācū nüxū charūngūxēēxūcèx na Cristuaxū yaxōgūāxūcèx. Natürü taguma íchanangēx i Tupanaārū mugū erü guxūguma Cristuarū mugūtūūwa changēxma. ²² Rū ngēxguma natanūwa changēxmagu i ngēma duūxūgü i tama poraācū Cristuchigaxū cuèxgūxū, rü choma rü ta ngēma duūxūgūmaā chaugū chawūxiguxēē, na ngēmaācū nüxū charūngūxēēxūcèx na Cristuaxū yaxōgūāxūcèx. Rū ngēmaācū guxūma i duūxūgürūū chaugū chixīxēē, rü nagūxūraūācūma naxcèx chadau na ngēmaācū düxwa Tupanaxūtawa chanagagūxūcèx i ñuxre i nūmagū. ²³ Rū ngēmaācū nixī i chapuracūxū na guxūwama nanguxūcèx i ngēma ore i tüxū maxēxēēxū. Erü chanaxwēxe na choma rü ta choxū nangēxmaxū i ngēma maxū i taguma gūxū, naxrūū i guxūma i ngēma duūxūgü i nüxū yaxōgūxū. ²⁴ Pema rü meāma nüxū pecuèx i wūxi i inūca i nawa iñaāchixū rü muxūma inaxūāchi, natürü wūxixicatama nixī i ngēma nüxīra ínguxū rü nayaxuxū i norū āmare. Rū name nixī i pegūna pedau na Tupana pexna naxāxūcèx i ngēma perū āmare. ²⁵ Guxūma i ngēma duūxūgü i nūgū ngūexēēxū naxcèx i wūxi i inūca na toguegūxū napo-ramaexūcèx, rü meā nūgūna nadaugū na ngēmaācū nayauxgūāxūcèx i

norū āmare i paxaāchiruū ixīxū. Natürü yixema na yaxōgūxū rü yigūna tadaugū na meā naxūgūxūcèx rü meā imaxēxūcèx na nayauxgūxūcèx i tórü āmare i taguma gúxū. ²⁶ Rū ngēmacèx i choma rü tama ñoma chaeचितामारे चिफ़ाखूरुū chixī, rü tama ñoma ñacu i nūgū ðeixū i ngürüanegumare idagūxūrūū chixī. ²⁷ Rū ngēmacèx meā chaugūmaā ichacuèx na taxuūma i chaxuneārü ngúchaū chaxūxūcèx. Erü tama chanaxwèxe i mexūmaā togūxū changuxēēchirēxācūma chixexū chaxū rü ngemagagu tama chanayaxu i chorū āmare.

10

Nayaxucuxēgū na tama nūxū yacuèxūūgūxūcèx i tupanane-tachicūnèxāgū

¹ Pa Chaueneēgūx, chanaxwèxe i nūxna pecuèxāchie ga ñacu nūxū na ngupetūxū ga yema nuxcūmaūgūxū ga tórü oxigū ga Moīchéwe rüxīxū. Rū pema nūxū pecuèx rü yexguma nawe naxīxgu rü wūxi ga caixanexū napēxegu nixū rü nayadūxū. Rū guxūma ga yema duūxūgū rü wūxigu Moīchémaā natūūgu nixīxūtanū. Rū yexgumarūū ta Moīchémaā nawa nichoū ga yema Taxtū ga Dauchiūxū. ² Rū guxūma ga yema duūxūgū rü yexguma wūxigu Moīchémaā yema caixanexūpechitatūūgu yaxīxūtanūgu rü yema Taxtū ga Dauchiūxūwa yachoūgu, rü yemaācū nūgū nangoxēēgū na Moīchéweama naxīxū. ³ Rū yexgumarūū ta ga guxūma ga yema duūxūgū nanangōxgū ga yema pāū ga daxūwa rüyixū. ⁴ Rū guxūma ga yema duūxūgū nayaxaxgū ga yema dexá ga Cristu nūxna āxū. Yerü Cristu rü yema duūxūgūxū inixūmūcū ga yema inaxīxūwa, rü nūxna nanaxā ga yema dexá ga yaxaxgūxū. ⁵ Natürü narūmumaē ga yema duūxūgū ga tama Tupanaārü ngúchaū ūgūxū. Rū yemacèx ga yema duūxūgū rü yexma nayue rü yéma nawogū ga naxūnegū ga dauxchitawa ga taxūema íxāpataxūwa. ⁶ Rū guxūma ga yema nangupetū na tórü cuèxruū yīixūcè rü tama tórü oxigürūxū chixexūcèxama idaugūxūcèx. ⁷ Rū ngēmacèx tama name i nūxū picuèxūūgū i ñacu rü tupanenetachicūnèxāgū, yexgumarūū ga ñuxre ga nūmagū naxūgūxūrūū. Erü Tupanaārü ore i ūmatūxūwa rü tórü oxigūchigaxū nixu rü ñanagürü: “Rū duūxūgū inarūtogū na nachibūexūcèx rü na naxaxegūxūcèx, rü ngēmawena rü inachigū na íyayūxexūcèx”,

ñanagürü i ngēma ore. ⁸ Rū tama name i yixema rü naī i ngemaā itape yexgumarūū ga ñuxre ga nūmagū naxūgūxūrūū. Rū yemacèx wūxitama ga ngunexūgu rü nayue ga 23,000. ⁹ Rū tama name i nūxū taxū ya tórü Cori na ñuxācū yaxna tamaā naxīnūxū yexgumarūū ga ñuxre ga nūmagū naxūgūxūrūū. Rū yemacèx nixī ga yema duūxūgūxū nangōxcuxū ga āxtapegū rü nayuexū. ¹⁰ Rū tama name i chixexū Tupanamaā pixugū yema ñuxre ga nuxcūmaūgūxū ga tórü oxigürūū. Rū yemacèx ga Tupanaārü orearū ngeruū ga daxūcūāx rü nanadaí. ¹¹ Rū guxūma ga yema nuxcūmaxūgūxū ga duūxūgūxū ngupetūxū, rü ñomaxūcūū rü tórü cuèxruū nixī. Rū naxūmatū na ngēmawa nūxū icuáxūcèx na ñuxācū Tupana naxwèxexū na imaxēxū i yixema i ñomaūcūū. ¹² Rū ngēmacèx ya yixema tūgūgu rüxīnūxē na taporaxū i Tupanapēxewa, rü name nixī na meā tūgūna tadauxū na tama chixexūgu tanguxūcèx. ¹³ Rū ñuxma rü ta taguma pexcèx inangu i ngúchaxū i chixexū i taxucürūwama namaā yaxna pexīnūexū. Rū name nixī i Tupana perūyoū erü nūma rü aixcūma nayanguxēē i ngema tamaā inaxunetaxū rü taxūtáma nawa

pexŭ nawogŭ i ngŭchaxŭgŭ i taxucŭrŭwama yaxna namaã pexŭnŭexŭ. Natŭrŭ ngexguma tã ngŭchaxŭgŭ i chixexŭ pexcèx ínguxgu rŭ nŭma rŭ tã pexŭ ínapoxŭ na tama nagu peyixŭcèx. ¹⁴ Rŭ ngēmacèx, Pa Chaueneēgŭ ya Pexŭ Changechaŭgŭxex, jrŭ nŭxŭ perŭxoe i ngema nacŭmagŭ i tupananetachicŭnèxãgŭcèx naxŭgŭxŭ i ngema duŭxŭgŭ i tama yaxŭgŭxŭ! ¹⁵ Pemaã nŭxŭ chixu i ngēma ore, erŭ chauxcèx rŭ duŭxŭgŭ i nŭxŭ cuãxŭ pixŭgŭ. Rŭ pema tãtama nagu perŭxŭnŭe i ngēma pemaã nŭxŭ chixuxŭ. ¹⁶ Rŭ ngēxguma òna i ũnŭexŭcèx ingutaquèxegŭgu, rŭ yaxaxgŭgu ya yima binu ya ũnecŭ rŭ moxè naxcèx ixãgŭgu, rŭ ngēmaãcŭ yigŭ tangoxèè na Cristu ya taxcèx nagŭ ibacŭwe rŭxŭxŭ. Rŭ ngēxguma nangŭxgŭgu i ngēma pãu i ibŭcuxŭ, rŭ ngēmaãcŭ yigŭ tangoxèè na Cristu ya taxcèx naxŭne ixãcŭwe rŭxŭxŭ. ¹⁷ Rŭ woo na imuxŭ i yixema, natŭrŭ wŭxitama i pãu tangŭxgŭ. Rŭ ngēmaãcŭ nixŭ i wŭxitama ixŭgŭxŭ erŭ wŭxiwetama tarŭxŭ. ¹⁸ jrŭ dŭcax i ngēma Yudŭgŭ i nangŭxgŭxŭ i ngēma naxŭnamachi i Tupanacèx nadèixŭ! Rŭ ngēxguma wŭxigu nŭgŭmaã nangŭxgŭãgu, rŭ guxŭma i ngēma nangŭxgŭxŭ rŭ ngēmaãcŭ nŭgŭ nangoxèè na wŭxigu Tupanawe naxŭxŭ. ¹⁹ Rŭ ñuxma na ngēma ñachaxŭ, rŭ tama chanaxwèxe i nagu perŭxŭnŭe na naxŭnŭexŭ i ngēma namachi i ngēma duŭxŭgŭ i tama yaxŭgŭxŭ norŭ tupananetachicŭnèxãcèx dèixŭ. Rŭ tama chanaxwèxe i nagu perŭxŭnŭe na ñacŭwa namexŭ i ngēma norŭ tupananetachicŭnèxãgŭ, erŭ nangearŭ maxŭãx. ²⁰ Natŭrŭ pemaã nŭxŭ chixu rŭ ngēxguma ngēma duŭxŭgŭ i tama Tupanaxŭ cuèxgŭxŭ, norŭ tupananetachicŭnèxãcèx nadaiãgu i ñacŭ rŭ naxŭna, rŭ tama Tupanacèx nixŭ i nadaiãxŭ, natŭrŭ ngoxogŭcèx nixŭ i nadaiãxŭ. Rŭ tama chanaxwèxe i ngoxogŭtanŭxŭxŭ pegŭ pixŭgŭxŭe. ²¹ Rŭ pema na peyaxaxgŭxŭ ya yima binu ya tŭrŭ Corixŭ namaã picuèxŭgŭcŭ rŭ taxucŭrŭwama namaã pexãmŭcŭ i ngēma duŭxŭgŭ i Chatanáwe rŭxŭxŭ. Rŭ pema na tŭrŭ Coriarŭ mechawa penangŭxŭ i ngēma òna i nŭxŭ namaã picuèxŭgŭxŭ rŭ taxucŭrŭwama ngēma duŭxŭgŭ i Chatanáwe rŭxŭxŭãrŭ mechawa peyachibŭe. ²² jrŭ ñuxŭ ñapegŭxŭ i ñuxmax? ¿Éxna penanuxèèchaŭ ya tŭrŭ Cori? ¿Éxna pexcèx rŭ nŭxŭ tarŭporamaēgŭ i yixemax?

Name nixŭ i taeneãrŭ mexŭc èx tadaugŭ rŭ tama i tŭxrŭtama

²³ Pema rŭ ñaperŭgŭgŭ:

“Marŭ name na tanaxŭxŭ i ñacŭ i tanaxwèxegŭxŭ”, ñaperŭgŭgŭ. Rŭ aixcŭma nixŭ i ngēma, natŭrŭ tama tŭxŭ name i guxŭma i ngēma ixŭxchaŭxŭ. Rŭ ngēmaãcŭ Cristu tŭxŭ ínguxŭxŭe na naxŭxŭcèx i ngēma inaxwèxexŭ, natŭrŭ tama guxŭma i ngēma ixŭxŭ tŭxŭ narŭngŭxŭe na yexeraãcŭ meã yaxŭgŭamachigŭxŭcèx. ²⁴ Rŭ tama name nixŭ i tŭxrŭtama mexŭcèx tadaugŭ, natŭrŭ name nixŭ i togŭarŭ mexŭcèx tadaugŭ. ²⁵ Rŭ marŭ name i penangŭx i nagŭxŭraŭxŭ i namachi i namaã nataxegŭxŭ, natŭrŭ taxucèxma tŭxcŭŭ naxcèx ípeca ngoxi marŭ tupananetagŭxŭ namaã yacuèxŭxŭgŭxŭ i namachi yixŭ. ²⁶ Erŭ ñoma i naãne rŭ guxŭma i nawa ngēxmaxŭ, rŭ tŭrŭ Cori ya Tupanaarŭ nixŭ. ²⁷ Rŭ ngēxguma chi wŭxi i duŭxŭ i tama yaxŭxŭ pexna uxgu na naxŭtawa peyachibŭexŭcèx, rŭ chi ngema pexŭxgu, rŭ marŭ name i penangŭx i guxŭma i òna i pepèxegu yaxŭxchixŭ. Rŭ taxucèxma tŭxcŭŭ naxcèx pexoegaãè rŭ nŭxna peca na ngextã ne naxŭxŭ i ngēma namachi i pemaã nangŭxŭ. ²⁸ Natŭrŭ ngŭrŭãchi wŭxie tã pemaã nŭxŭ tixu rŭ ñatarŭgŭ:

“Ŋāā namachi rŭ tupananetachicŭnĕxĕcĕx yamĕxgŭxŭ i naxŭnawa ne ŭxŭ nixŭ”, ņatarŭgŭ. Rŭ ngĕxguma i pema rŭ tama name na penangŏxŭ i ngĕma namachi na tama chixexŭgu tŭxŭ penguxĕĕxŭcĕx ya yŭxema pemaā nŭxŭ ixuxe, rŭ tama ngĕmacĕx taxoegaāĕxŭcĕx i tŭmax. ²⁹ Rŭ tama pechiga nixŭ i chidexaxŭ i ngĕxguma:

“Na tama taxoegaāĕxŭcĕx”, ņachagu. Natŭrŭ yŭxema pemaā nŭxŭ ixuchechiga nixŭ i chidexaxŭ. Natŭrŭ bexmana ngŭrŭāchi wŭxi i yaxŏxŭ tá cuxna naca rŭ ņanagŭrŭ tá cuxŭ:

“¿Tŭxcŭŭ i togŭ naxcĕx oegaāĕxŭgagu choxna cunachŭxu na tama chanaxŭxŭ i ŭacŭ i chanaxwĕxexŭ? ³⁰ Rŭ ngĕxguma chi Tupanana moxĕ chaxāxgu naxcĕx i ngĕma ōna i changŏxŭ, ŭrŭ tŭxcŭŭ i ngĕma ōnacĕx choxŭ quixu?” ņanagŭrŭ. ³¹ Dŭcĕx, pemaā nŭxŭ chixu rŭ name nixŭ i guxŭma i ngĕma pexŭŭmaā Tupanaxŭ picuĕxŭxŭgŭ. Rŭ ngĕxguma ŭacŭ pengoxgŭgu rŭ exna ŭacŭ pixaxgŭgu rŭ ĕxna ŭacŭ i to pexŭgŭgu, rŭ name nixŭ i ngĕmamaā Tupanaxŭ picuĕxŭxŭgŭ. ³² Rŭ tama name i penaxŭ i ŭacŭ i togŭxŭ chixexŭgu yixĕĕxŭ, rŭ woo Yudŭgŭ yixŭgŭgu rŭ ĕxna tama Yudŭgŭ yixŭgŭgu, rŭ ĕxna yaxŏgŭxŭ yixŭgŭgu. ³³ Rŭ choma rŭ guxŭwama guxŭŭma chataāĕxĕchaxŭ. Rŭ ngemacĕx tama chanaxŭ i ngema chomatama namaā chataāĕxĕchaxŭ, natŭrŭ chanaxŭ i ngema togŭ namaā taāxĕxŭ na ngemaācŭ nŭmagŭ rŭ ta nuxŭ nangŭchaxŭ na yaxŏgŭāxŭ rŭ nayauxgŭāxŭ i maxŭ i taguma gŭxŭ.

11

¹ Rŭ name nixŭ i nagu pexŭ i chaucŭma ngĕxgumarŭŭ i choma na Cristucŭmagu chixŭxŭrŭŭ.

Name nixŭ i ngexŭgŭ rŭ mexŭ i nacŭmagu naxŭ

² Pa Chaueneĕgŭx, pemaā chataāĕ erŭ guxŭguma chaugu perŭxŭnŭĕ rŭ nagu pexŭ ga yema ngxĕĕtae ga pexŭ changŭxĕĕxŭ. ³ Natŭrŭ chanaxwĕxe i nŭxŭ pecuĕx na Cristu rŭ wŭxichigŭ i yatŭeru na yŭxŭ. Rŭ yatŭxŭgŭ rŭ naxmĕxĕru nixŭgŭ ngĕxgumarŭŭ ya Tupana rŭ Cristueru na yŭxŭ. ⁴ Rŭ ngĕmacĕx i ngĕxguma wŭxi ya yatŭ ngutaquĕxewa yumŭxĕgu rŭ ĕxna Tupanaārŭ orexŭ yaxuxgu, rŭ tama ŭnangĕxŭchipatĕxegu, rŭ ngĕma rŭ wŭxi i chixexŭ nixŭ i Cristupĕxewa naxŭxŭ. ⁵ Natŭrŭ ngĕxguma chi wŭxi i ngecŭ ngutaquĕxewa yumŭxĕgu rŭ ĕxna Tupanaārŭ orexŭ yaxuxgu, rŭ chi tama ngŭgŭ natŭerugu, rŭ ngĕma rŭ wŭxi i chixexŭ nixŭ i ngŭtepĕxewa naxŭxŭ. Rŭ ņoma ngŭgŭ yadŭeruxŭrŭŭ iyixŭ. ⁶ Erŭ ngĕxguma chi tama ngŭgŭ natŭeruchaŭgu, rŭ narŭmemaĕ nixŭ i noxtacŭma ngŭgŭ ibĕxeru. Natŭrŭ ngĕxguma chi wŭxi i ngŭrŭ āne yixŭgu i ngĕma na ngŭgŭ nabĕxeruxŭ rŭ ĕxna ngŭgŭ yadŭeruxŭ, rŭ narŭmemaĕ nixŭ i ngŭgŭ itŭeru. ⁷ Natŭrŭ yatŭgŭ rŭ tama name na nŭgŭ natŭerugŭxŭ. Yerŭ ga Tupana rŭ nŭgŭraŭācŭ nanaxŭ ga yatŭ rŭ Tupanachipeta nixŭ. Rŭ yima yatŭwa nixŭ i nangŏxŭ na ņuxācŭ namexĕchixŭ ya Tupana. Rŭ ngĕma ngecŭwa nixŭ i nangŏxŭ na ņuxācŭ namexŭ ya yatŭ. ⁸ Yerŭ yexguma noxri Tupana naxŭxgu ga yatŭ, rŭ tama ngecŭwa nixŭ ga naxŭāxŭ. Rŭ ngŭma waxŭ nixŭ ga yatŭwa ngŭxŭ naxŭxŭ. ⁹ Rŭ yatŭcĕx nixŭ ga Tupana ngŭxŭ ŭxŭ ga ngecŭ, rŭ tama ngecŭcĕx nixŭ ga Tupana naxŭxŭ ga yatŭ. ¹⁰ Rŭ ngĕmacĕx name nixŭ i ngŭgŭ itŭeru na duŭxŭgŭpĕxewa rŭ Tupanaārŭ orearŭ ngeruŭgŭ i daxŭcŭāxgŭpĕxewa nangŏxŭcĕx na ngŭtemĕxĕwa nangĕxmaxŭ. ¹¹ Natŭrŭ Tupanapĕxewa rŭ taxuŭma nixŭ ya yatŭ ega natauxgu i ngecŭ. Rŭ ngĕxgumarŭŭ ta i ngecŭ rŭ taxuŭma iyixŭ ega natauxguma ya yatŭ.

12 Yerü yexguma noxri Tupana ngīxū ūxgu ga ngecū, rü yatüwa nixī ga ngīxū naxūxū. Rü ngēxgumarūū ta ya yatü rü ngecūwa nixī i nabuxū. Natürü Tupana nixī ya naxūcū i guxūma i duūxūgū. 13 Rü pematama tá penangugū rü ngoxi name na wūxi i ngecū rü tama ngīgū natüeruācūma nayumūxēxū. 14 Rü woetama tórü bucūma nixī i nūxū na icuáxū na wūxi i āne yiīxū na nūgū namēxyaexēēxū i wūxi i yatūxū. 15 Natürü ngecūcēx rü wūxi i mexēchixū nixī na namēxyaexū. Erü Tupana rü ngīxna nanaxā i ngīyae na ngēmamaā ngīgū natüeruxūcēx. 16 Natürü ngēxguma chi texē ngēmachiga tūgū choxūgagūgu, rü name nixī i nūxū tacuēx na ngēmatama yiīxū i tacūma rü nacūma i guxūma i yaxōgūxū i guxūnema ya tupaucagūwa.

Duūxūgū rü chixri namaā inacuēxgū ga Coriarü ðna i üünexū

17 Rü ñuxma i ñāā popera i pexcēx chaxūmatūxūwa rü pemaā nūxū chixu rü nangēxma i wūxi i pecūma i chixexū i tama namaā chataāēxū. Erü chauxcēx i ngēma perü ngutaquēxegū rü pexū nachixexēē, rü tama aixcūma perü meruūgū nixī. 18 Erü duūxūgū chomaā nūxū nixugūgū rü ngēxguma tórü Coricēx pengutaquēxegūūxgu rü pegū pitoye. Rü ngāxūgu chayaxō na aixcūma yiīxū i ngēma nūxū yaxugūgūxū. 19 Choma rü nūxū chacuēx na aixcūma woe tátama yiīxū i pegū pitoyexū na ngēmawa nūxū icuáxūcēx na texégū tīīxū ya yīxema aixcūma Cristuarü duūxūgū ixīgūxe. 20 Rü ngēma pegū na pitoyexūgagu nixī na tama aixcūma tórü Corixū picuēxūūgūācūma yiīxū i penangōxū i tórü Coriarü ðna i Üünexū i ngēxguma pengutaquēxegūūxgu. 21 Erü ngēxguma penangōxgu i ngēma ðna i Üünexū rü wūxichigū rü peñuxāēgū na pexira na penayaxuxūcēx i ngēma ðna. Rü yoxni i ngēma togū rü ngēxma nataiyae, rü togū rü nayaxaxgū ya binu ñuxmata nangāxē. 22 ¿Éxna pengechiūgū ecēx tama ngēma pechibūexū rü pexaxegūxū? ¿Tūxcūū nūxū pexoe i ngēma togū i yaxōgūxū rü penaxāneēxēē i ngēma yaxōgūxū i ngearü ngēmamaxūāxgūxū? ¿Rü tacūxū tá pemaā chixu i ñuxmax? ¿Pexcēx rü tá pemaā chataāēxū? Dücēx, pemaā nūxū chixu rü tama pemaā chataāē naxcēx i ngēma pexūgūxū.

Tórü Coriarü ðna i üünexūchiga

23 Rü ngema ngxūēētae i pemaā nūxū chixuxū rü tórü Corixūtatwatama chanayaxu. Rü yexguma tórü Cori ga Ngechuchuxū ínaxuaxūgu, rü yematama chūtaxūgu rü nūma rü nanayaxu ga wūxi ga pāū. 24 Rü Tupanana moxē naxā, rü yemawena rü inanabūcu, rü ñanagürü:

“Ñāā nixī i chaxune i pexcēx ichaxāxūchiga. ¡Rü penangō i ñāā pāū na ngēmaācū peāēwa choxna pecuēxāchiexūcēx!” ñanagürü. 25 Rü yexgumarūū ta ga chibūwena rü Ngechuchu nanayaxu ga wūxi ga pochiyu ga binuchiūmaā āācuxū, rü ñanagürü:

“Rü daa binu rü wūxi i cuēxruū nixī na ngexwacēx Tupana duūxūgūmaā ixunetaxū i maxū i taguma gūxūchiga. Rü chaugū ya pexcēx ibacūmaā nixī i Tupana pexū nūxū cuēxēēxū i ngēmachiga. Rü ngēxguma ñuxguacū daa binu pixaxgūgu rü ñuxma choma na chanaxūxūrūū tá penaxū na peāēwa choxna pecuēxāchiexūcēx”, ñanagürü ga Ngechuchu. 26 Rü guxūguma i ngēxguma penangōxgu i ñāā pāū rü peyaxaxgūgu ya daa binu rü ngēmawa tá duūxūgūxū nūxū

picuèxēē na ñuxācū tórū pecaducèx nayuxū ga tórū Cori. Rū ngēmaācū tá penaxū ñuxmatáta wena nataegu i nūmax.

Texegücèx nixī i tórū Coriarū òna i üünexū

²⁷ Natürü ngēxguma chi texe tama tūgū tamexēēarū maxūxācūma nangōxgu i Coriarū pāū i üünexū rü tayaxaxūxgu ya yima binu ya üünecū, rü pecadu taxū napewa ya tórū Cori ya taxcèx yucū rü nagū ibacū. ²⁸ Rū ngēmacèx naxūpa na tanangōxū i ngēma pāū rü na tayaxaxūxū ya yima binu, rü name nixī i wūxichigū meā tūmaarū maxūgu tarūxīnū ngoxi nataxuma i tacū rü chixexū i tūmaārū maxūwa. ²⁹ Erū ngēxguma tama tūgū tamaxēēarū maxūācūma tanangōxgu rü tayaxaxūxgu, rü tūgūtama poxcuwa taga. Erū tama aixcūma tayaxō na tórū Corichiga yixīxū i ngema pāū rü yima binu. ³⁰ Rū ngēmacèx nixī i muxūchixe i petanūwa rü piḍaaweexū rü peturaexū, rü ñuxre i togū rü marū nayuexū. ³¹ Natürü ngēxguma chi tórūtama maxūgu rūxīnūegu naxūpa na nangōxū i ngēma Coriarū òna, rü nūma rü taxucèx tūxū napoxcue. ³² Natürü ngēxguma tórū Cori ñoma i tórū maxūwa tūxū poxcugu, rü ngēmaācū tūxū inayarūwēxāchixēē na tama yixcūra naāneārū guxgu tūxū napoxcuxūcèx wūxigu namaā i ngēma duūxūgū i tama yaxōgūxū. ³³ Rū ngēmacèx, Pa Chaueneēgūx, ngēxguma pengutaquēxegūgu na penangōxūcèx i ngēma òna i üünexū, name nixī i pegū ipenanguxēē na guxāma wūxigu meā penangōxūcèx. ³⁴ Rū ngēxguma chi texé taiyèxgu, rü name nixī i tūmapatawatama tachibū na tama Tupana pexū poxcuexūcèx naxcèx na chixexū pexūexū i perū ngutaquēxegūwa. Rū ngēma to i guxchaxūgū i pexū ngēxmaxū, rü choma tá chanamexēē i ngēxguma petanūwa chaxūxgu.

12

Ngēma cuèx i Tupanaāē i Üünexū tūxna āxūchiga

¹ Pa Chaueneēgūx, chanaxwèxe i nūxū pecuèx na ñuxācū yīxū i ngēma cuèx rü ñuxacū na yixīxū i ngema tauxcha i Tupanaāē i Üünexū tūxna āxū. Rū ngēmachiga nixī i pemaā nūxū chixuxchaūxū i ñuxmax. ² Rū pema meāma nūxū pecuèx ga yexguma tauta Cristuaxū peyaxōgūgu, rü pegū nūxna pexāgū ga tupananetachicūnèxāgū ga tama idexaxū. ³ Rū ngēmacèx i ñuxma rü chanaxwèxe i meā nūxū pecuèx rü taxucūrūwama texe ya Tupanaāē i Üünexū tūmawa ngexmaxe rü chixri Ngechuchuchuga tidexa. Rū ngexgumarūxū ta rü taxucūrūwama texe ngūrūmare tūechama rü:

“Ngechuchu rü tórū Cori nixī”, ñatarūgū ega tama Tupanaāē i Üünexū tūxū muxgu na ngēmaācū tidexaxūcèx. ⁴ Rū nūma ya Tupana rü duūxūgūna nanaxā i naguxūraū i tauchagū. Natürü ngema Naāxē i Üünexū i nawa ne naxīxū i ngema tauchagū rü wūxitama nixī. ⁵ Nangēxma i nagūxūraūxū i Tupanaarū puracū, natürü yima tórū Cori ya tūxna naxācū i ngema puracūgū rü wūxitama nixī. ⁶ Rū Tupanaārū pora rü nagūxūraūācū nangox. Natürü wūxitama nixī ya yima Tanatū ya tawa gūxūraūācū nangoxēēcū i ngema norū puracū. ⁷ Rū ngema Naāē i Üünexū wūxixewachigū nanangoxēē i Tupanaarū pora i norū duūxūgūtanūwa na ngemaācū guxāarū ngūxēēruū yixīxūcèx. ⁸ Rū Naāē i Üünexū rü tūmāxena rü nanaxā i tauxcha na ucuēxū tacuáxūcèx. Rū ngēmatama Naāē i Üünexū rü toguēāxū rü nanatauxchaxēē na nūxū tacuáxū na mea tangūexēētaexū

i Tupanaarü ore. ⁹ Rü togue rü ngēmatama Naãē i Üünexŭ tŭxŭ nanatauxchaxēē na Tupanaana tarŭyoexŭcèx. Rü togue rü tŭxna nanaxã i pora na ngēmamaã naxcèx tayataanegŭxēēxŭcèx i ngēma idaaaweexŭ. ¹⁰ Rü togue rü tŭxna nanaxã i pora na tanaxŭxŭcèx i mexŭgŭ i Tupanaarü poramaã ŭxŭ. Rü togue rü tŭxŭ nanatauxchaēē na nüxŭ tixuxŭcèx i Tupanaarü ore. Rü togue rü tŭxna nanaxã i cuèx na nüxŭ tacuáxŭcèx i ŭacŭ yŭixŭ i ngoxogŭarŭ ixŭxŭ rü ŭacŭ yŭixŭ i Tupanaãē i Üünexŭarŭ ixŭxŭ. Rü togue rü tŭxna nanaxã i tauxcha na ngēma tama nüxŭ tacuáxŭ i nagawa tidexaxŭcèx. Rü togue rü tŭxna nanaxã i cuèx na tanangoxēēxŭcèx na ŭacŭchiga yŭixŭ na tidexaxŭ ya yŭxema to i nagawa idexáxe. ¹¹ Rü guxŭma i ngēma rü Tupanaãē i Üünexŭtama nixŭ i naxŭxŭ. Rü nüma nixŭ i wŭxichigŭ i duŭxŭna naxãaxŭ i ngēma cuèx i nüma nanaxwèxexŭ na nüxna naxãaxŭ.

Guxãma i yaxŭgŭxŭ rü wŭxitama i naxŭnewa naxŭgŭ

¹² Rü duŭxŭxŭne rü woo muxŭgu nixŭye, natŭrŭ wŭxitama i naxŭne nixŭ. Rü ngexgumarŭxŭ ta i ngema Cristuãxŭ yaxŭgŭxŭ rü woo namu, natŭrŭ wŭxitama i naxŭnewa naxŭgŭ. ¹³ Rü yexguma íbaiŭgu rü Tupanaãē i Üünexŭ rü wŭxitama i naxŭne tŭxŭ nixŭgŭxŭkēē. Rü woo Yudŭgŭ na ixŭgŭxŭ, rü ēxna tama Yudŭgŭ na ixŭgŭxŭ, rü woo togŭmēxēwa ingexmagŭxŭ rü ēxna taxŭxemēxēwa ingēxmagŭxŭ, natŭrŭ wŭxitama i naxŭne tŭxŭ nixŭgŭxŭkēē i nüma i Naãē i Üünexŭ i nüxicatama ixŭxŭ. Rü guxãma i yŭxema rü marŭ tŭxna nangu i ngēma Naãē i Üünexŭ. ¹⁴ Wŭxi i naxŭne rü tama naxãmenãxamare, natŭrŭ muxŭgu nixŭye. ¹⁵ Rü ngēxguma chi yima nacutŭ ñaxgu:

“Rü ñŭxma na tama naxmēx chiŭxŭ, rü ngēmacèx tama ngēma naxŭnewa changēxma”, ñaxgu, rü tama ngēmacèx nüxŭ narŭxo na ngema naxŭnewa nangexmaxŭ. ¹⁶ Rü ngēxguma chi yima naxpaxchinŭ ñaxgu:

“Rü ñŭxma na tama naxētŭ chiŭxŭ, rü ngēmacèx tama naxŭnewa changēxma”, ñaxgu, rü tama ngēmacèx nüxŭ narŭxo na ngema naxŭnewa nangexmaxŭ. ¹⁷ Rü ngēxguma chi guxŭma i naxŭne rü naxētŭ yixŭgu, ¿rŭ ŭacŭmaã chi i nüxŭ naxŭnŭxŭ i ngema naxŭne? Rü ngēxguma chi guxŭma i naxŭne rü naxmachixē yixŭgu, ¿rŭ ŭacŭmaã chi i nüxŭ nawãixŭ?

¹⁸ Natŭrŭ Tupana ga naxŭcŭ ga taxŭne, rü ngexta nüma ínanaxwèxexŭwa nanangexmaxēē i taeru rü tachacŭgŭ rü taparagŭ. ¹⁹ Rü ngēxguma chi nataxŭxgu i norŭ ŭyechigŭ i taxŭne rü chi naxãmenēxãmare. ²⁰ Rü ngema naxŭne rü woo muxŭgu nixŭye, natŭrŭ wŭxitama i naxŭne nixŭ. ²¹ Rü taxetŭ rü taxucŭrŭwa taxmēxŭ ñanagŭrŭ:

“Choma rü tama chacuxwèxe”, ñanagŭrŭ. Rü ngēxgumarŭtŭ ta i taeru rü taxucŭrŭwa tacutŭgŭxŭ ñanagŭrŭ:

“Choma rü tama chapexwèxe”, ñanagŭrŭ. ²² Natŭrŭ ngēma yexeraãcŭ ãucŭmaxŭ i taxŭnewa, rü ngēma nixŭ i yexera nanaxwèxexŭ i taxŭne.

²³ Rü ngēma taxŭnewa yexeraãcŭ naxcèx ixãnexŭ, rü ngēma nixŭ i yexera meã ixŭxchiruxŭ. Rü ngēma taxŭnewa ngēxmaxŭ i tama inaxwèxexŭ na nangóxŭ, rü ngēma nixŭ i yexera meã idŭxŭxŭ. ²⁴ Natŭrŭ tama ngēmaãcŭ tanaxŭ namaã i ngēma taxŭnewa ngēxmaxŭ i guxãxŭma iwéxŭ. Rü ngēmaãcŭ Tupana nanaxŭ i taxŭne, na yexeraãcŭ nüxna idauxŭcèx i ngēma yexera naxcèx ixãnexŭ. ²⁵ Rü ngēmaãcŭ Tupana nanaxŭ i taxŭne na wŭxichigŭ i norŭ ŭye nügŭgu naxŭnŭexŭcèx rü nügŭ nangŭxēēgŭxŭcèx.

²⁶ Rü ngēxguma chi wŭxi i ngēma taxŭnearŭye rü nüxŭ nguxgux, rü guxŭma i ngēma togŭ i natanŭxŭgŭ rü ta nüxŭ nangux. Rü ngēxguma chi wŭxi

i ngēma taxūnearū ūye taāēxgu, rū guxūma i ngēma togū i natanūxūgū rū ta nataāēgū. ²⁷ Rū űuxma i wūxichigū i pema rū Cristuxūnearū ūye pixīgū, rū ngema naxūnewa pexūgū. ²⁸ Rū ngēmacēx ya Tupana rū nanaxwae na űaacū nūgū inanuxū i norū duūxūgū: Rū yīxema tūxira tūxū naxunetagusē tixī ya norū puracūwa tūxū namugūxe. Rū tūxū naxuneta ya togegū na nūxū tixugūxūcēx i norū ore. Rū tūxū naxuneta ya togegū na duūxūgūxū tangūxēēxūcēx i norū ore, rū togegū na tanaxūgūxūcēx i mexūgū i Tupanaārū poramaā taxūgūxū. Rū togegū rū tūxū nanatauxchaxēē na tanameexēēxūcēx i idaaweexū, rū togegū na nūxū tarūngūxēēgūxūcēx i ngema űacū nūxū taxuxū, rū togegū yaxōgūxūārū āēxgacūgū na tixīgūxūcēx. Rū tūxū nanatauchaxēē ya togegū na ngēma naga i tama nūxū tacuáxūwa tidexagūxūcēx. ²⁹ Rū tama guxāma Tupana tūxū imugūxe tixīgū, rū tama guxāma Tupanaārū orearū uruū tixīgū. Rū tama guxāma norū orewa nguxēētaegūxe tixīgū, rū tama guxāma nūxū tacuēx na tanaxūxū i mexūgū i taxūgū i Tupanaārū poramaā ūxū. ³⁰ Rū tama guxāma nūxū tacuēx na tanameēxēēxū i duūxūgū i idaaweexū. Rū tama guxāma nūxū tacuēx na nawa tidexagūxū i wūxi i naga i tama nūxū tacuáxū. Rū tama guxāma nūxū tacuēx na tanangoxēēxū na űacūchiga yadexaxū i ngēma duūxūgū i tama nūxū nacuáxū i nagawa idexaxū. ³¹ Rū name nixī inaxcēx pedēux na Tupana pexna naxāxūcēx i ngēma cuēx rū taxuchagū i rūmemaegūxū.

Yigū na ingechaūgūxūchiga

Natūrū i űuxma rū tá pexū changūxēē i űacū nixī i guxūma i ngēma pemaā nūxū chixuxūārū yexera rūmemaēxū.

13

¹ Rū woo togū i nagawa chideaxgu, rū woo Tupanaārū orearū ngeruūgū i daxūcūāxgawa chideaxgu, natūrū űoma wūxi i űacū i āgaxūrūūmare chixī ega tama guxāxū changechaūgu. ² Rū woo nūxū chacuēxgu na meā duūxūgūmaā nūxū chixuxū i Tupanaārū ore, rū woo nūxū chacuēxgu i guxūma i űacū i ēxūguxū i Tupanachiga, rū woo choxū natauxchagu na chorū ōmaā chayaxīgachixēēxū ya mēxpūnegū, natūrū taxuwama chame ega tama guxāxū changechaūgu. ³ Rū woo ngēma duūxūgū i ngearū diēruāxgūxūxū chayanuxgu i guxūma i űacū i choxū ngēxmaxū, rū woo Tupanaārū orexēx chaugū ichaxāxgu na ūxūwa choxū yagugūxūcēx, rū taxuwama choxū name i ngēma ega tama guxāxū changechaūgu. ⁴ Rū yīxema guxāxū ngechaūxē, rū yaxna namaā taxīnū, rū namaā tamedūma. Rū tama tixāūxāchiwēxe, rū tama togūxū tūgū tarūyexera rū tama tūgū ticuēxū. ⁵ Rū yīxema aixcūma guxāxū ngechaūxē, rū tama taguxchigawēxe, rū tama tūgūguxicatama tarūxīnū, rū tama tanuxwēxe, rū tama nagu tarūxīnūēcha ega texē chixexū tūmamaā ūxgu. ⁶ Rū tama namaā tataāē i chixexūgū, natūrū namaā tataāē i ngēma ore i aixcūma ixīxū. ⁷ Rū yīxema aixcūma guxāxū ngechaūxē, rū yaxna namaā taxīnū, rū guxūguma nūxū tayaxō, rū guxūguma mexūgu namaā tarūxīnū, rū taguma naxchi taxai woo űacū tūmamaā naxūxgu i togū. ⁸ Rū ngēma yigū na ingechaūxū rū tagutāma inayacuēx. Natūrū ngēma na nūxū ixuxū i Tupanaārū ore rū wūxi i ngunexūgu tā inayacuēx. Rū ngēma tama nūxū icuáxū i nagawa na idexaxū, rū tá ta inayacuēx. Rū ngēma űuxma nūxū icuáxū rū wūxi i ngunexūgu rū marū taxuwatāma tūxū name. ⁹ Erū ngēma tórū cuēx i

ñuxma tūxū ngēxmaxū, rü Tupanapēxewa rü naxíra. Rü ngēxgumarūū ta i ngēma norū orexū na ixuxū, rü wūxi i íramarexūtama nixī. ¹⁰ Rü guxūma i ngēma rü tá inayarūxo i ngēxguma Tupanapēxewa ingugūgu rü nūma tá guxūxūma tūxū nacuèxēēgu. ¹¹ Yexguma chabuxgu ga chomax, rü wūxi ga buxūrūū chidexa, rü buxū nagu rüxñnūxūgu charūxñnū, rü tama meā chauāēxū chacuèx. Natürü yexguma marū chayèxgu, rü nūxū charūxo ga guxūma ga yema chorū bucūma. ¹² Rü ngēma ñuxma nūxū idauxū i Tupanachiga, rü ñoma wūxi i worua ya üxachametūxewa yigū idauxūrūū nixī na taxcèx naxēxū. Natürü yixcūra rü tá aixcūma meā nūxūxūchi tadau ya Tupana. Rü ñuxma rü írarūwatama nūxū chacuèx i Tupanachiga. Natürü wūxi i ngunexūgu rü tá meā nūxū chacuèx i guxūma i nachiga, ngēma na Tupana meāma choxū cuáxūrūū. ¹³ Rü ñuxma rü nangēxma i tomaēxpūx i nacūmagū i guxūgutáma ngexmaxū. Rü ñaāgū nixī:

1 Rü Tupanaāxū tayaxōgū

2 Rü nūxū ítananguxēē na nataeguxū ya Cristu

3 Rü nūxū tacuèx na tamücūxū ingechaūxū.

Natürü ngēma tomaēxpūxtanūwa rü ngēma rümemaexū nixī na guxāxū ingechaūxū.

14

Ngēma tama nūxū icuáxū i nagawa na idexaxūchiga

¹ ¡Rü naxcèx pedèux na guxāxū pengechaūxū! Rü ngēxgumarūū ta name nixī i naxcèx pedau i ngema tauxchagū rü ngema cuèx i Naāē i Üünexūwa ne íxū. Rü ngēma cuèx i yexeraācū penaxwæxū nixī na pexū natauxchaxū na nūxū pixuxū i Tupanaarū ore. ² Yíxema duūxē ya tama nūxū tacuáxū i nagawa idexaxe, rü Tupanamaā nixī i tidexaxū rü tama i duūxūgūmaā, erū taxúema nūxū tacuèx na ñuxū ñaxūchiga yíixū. Rü Tupanaāē i Üünexū nixī i tūxū idexaxēēxū, natürü ngēma ore i nūxū tixuxū rü ēxūguxū nixī. ³ Naturü yíxema nūxū ixuxe i Tupanaarū ore rü ngema yaxōgūxūārū ngūxēērixū tixī, erū yexeraācū cuèxwa tanangugūxēē rü nūxū tanangúchaxūxēē i ngema ore rü tanataāēxēē i ngema yaxōgūxū i ngexguma guxchaxū nūxū üpetūgu. ⁴ Rü yíxema duūxē ya tama nūxū tacuáxū i nagawa idexaxe, rü tümacèxtama nixī i ngema na yexeraācū mea Tupanaāxū tayaxōxūcèx. Natürü yíxema nūxū ixuxe i Tupanaarū ore rü nūxū tixu na yexeraācū Tupanaāxū yaxōgūāxūcèx i guxūma i yaxōgūxū. ⁵ Choma chierü chanaxwèxe na guxāma i pema rü ngēma tama nūxū pecuáxū i nagawa na pidexagūxū. Natürü yexeraācū chanaxwèxe na duūxūgūmaā nūxū pixuxū i Tupanaarū ore. Erū ngēma to i nagawa na pidexagūxūārū yexera narümemaē na togūmaā nūxū pixuxū i Tupanaarū ore. Natürü ngēma to i nagawa na idexaxū, rü name ega ngēma yaxōgūxūmaā nūxū ixuxgu na tacūchiga yíixū i ngēma dexa, na nūmagū rü ta yexeraācū meā Tupanaāxū yaxōgūāxūcèx. ⁶ Rü ngēmacèx, Pa Chaueneēgūx, rü ngēxguma chi pexūtawa chaxūxgu, rü chi to i nagawa chideaxgu, ¿rū tacūwa chi pexū namexū i ngēma? Natürü ngēxguma chi pemaā nūxū chixuxgu i ngēma Tupana tūxū nūxū cuèxēēxū, rü ēxna ngēma chomatama nūxū chacuáxū na aixcūma yíixū, rü ēxna ngēma ēxūguxū i ñuxma Tupana tūxū nūxū cuèxēēxū, rü ēxna tacū rü to i nguxēētae i Tupanachiga, rü ngēma waxi nixī i pexū mexū. ⁷ ¡Rü dücax ngēma paxetarūū i quena rü ēxna arpa! Rü ngēxguma tāū chima texē meā napaūxgu, rü tāū chima nūxū tacuèx na tacūgu

tanapaxūxū. ⁸ Rū ngēma churaragū, rū ngēxguma norū uwanūgūmaā nūgū nadaixchaūgu, ĵrū űuxācū tá nūgū namexēē na nūgū nadēixūcēx ega tama meā nangōgagu ya yima corneta ya dēixcēx naxcēx çaxūne? ⁹ Rū ngēxgumarūū ta pexū nangupetū. Rū ngēxguma chi perū conūmaā nūxū pixuxgu i dexa i taxúema nūxū cuáxū, ĵrū űuxācū tá nūxū tacuēx na űuxū űaxūchiga yīixū i ngēma nūxū pixuxū? Rū űoma ngūrūanewa pidexagūxūrūū tá pixīgū. ¹⁰ Rū aixcūma nixī i namuxū i nagagū i űoma i naānēwa. Rū guxūma i ngēma nagagū rū name naxcēx i ngēma duūxūgū i nawa idexagūxū. ¹¹ Natūrū ngēxguma chi tama nūxū chacuēxgu i ngēma naga i to i duūxū chomaā nawa idexaxū, rū ngēma duūxūcēx rū űoma to i nachiūānecūāxrūū chixī, rū chauxcēx rū űoma to i nachiūānecūāx i duūxūrūū nixī i nūmax. ¹² Choma nūxū chacuēx rū pema rū pexū nangúchaū na pexū nangēxmaxū i ngēma nacūmagū i Tupanaāē i Üūnexū tūxna āxū. Natūrū name nixī i naxcēx pedau na guxūārū yexera pexna naxāāxū i ngēma nacūmagū i namaā nūxū perūngūxēēxū i guxūma i yaxōgūxū na yexeraācū meā Tupanaāxū yaxōgūāxūcēx. ¹³ Rū ngēmacēx yīxema duūxē ya taxúema nūxū cuáxū i nagawa idexaxe, rū name nixī i Tupanana naxcēx taca na tūxna naxāāxūcēx i cuēx na togūmaā nūxū tixuxūcēx na űuxū űaxūchiga yīixū i ngēma nūxū tixuxū. ¹⁴ Rū ngēxguma chi taxúema nūxū cuáxū i nagawa chayumūxēgu, rū chauāē nixī i ngēma yumūxēxū. Natūrū chomatama rū taxuūma chacuēx na űacuēchiga yīixū i ngēma. ¹⁵ ĵRū űuxācū tá chayumūxēxū i űuxmax? Rū marū name nixī ega taxúema nūxū cuáxū i nagawa chayumūxēgu, natūrū chanaxwēxe i guxāma nūxū cuáxū i nagawa rū ta chayumūxē. Rū marū name nixī ega taxúema nūxū cuáxū i nagawa chawiyae, natūrū chanaxwēxe i guxāma nūxū cuáxū i nagawa rū ta chawiyae. ¹⁶ Erū ngēxguma chi taxúema nūxū cuáxū i nagawa Tupanaxū quicuēxūūgu, rū yīxema duūxēgū ya ngēma irūxīnūēxē, rū taxucūrūwa cumaā wūxigu Tupanaxū ticuēxūūgū, erū tama nūxū tacuēx na űuxū űaxūchiga yīixū i ngēma nūxū quixuxū. ¹⁷ Rū woo ngēma curū yumūxē rū namexēchixgu, natūrū yīxema duūxēgū ya ngēma irūxīnūēxē rū taxuūma i mexū nawa tayaxu ega to i nagawa quideaxgu. ¹⁸ Tupanana moxē chaxā, erū perū yexera taxúema nūxū cuáxū i nagawa chidexa. ¹⁹ Natūrū woo muxūma i ore i taxúema nūxū cuáxū i nagawa na chidexaxū, natūrū ngēma yaxōgūxūārū ngutaquēxegūwa rū chauxcēx rū narūmemaē chi nixī ega woo noxre i ore i meāma nūxū icuáxūwa namaā nūxū chixuxgu i Tupanaārū ore na ngēmaācū ngēmamaā meā chanangúexēēxūcēx. ²⁰ Pa Chaueneēgūx, tama name i űoma buxūgūrūū chixri nagu perūxīnūe i ngēma ore i pemaā nūxū chixuxū. Rū narūmemaē nixī i űoma buxūgūrūxū pegū pixīgūxēē naxchēxwa i ngēma chixexū, natūrū ngēma peru īnūwa rū penaxwēxe i duūxūgū i marū yaxūrūū mea nagu perūxīnūe rū nagu pexī i ngēma ore i pemaā nūxū chixuxū. ²¹ Tupanaārū ore ga nuxcūmaūxū ga norū orearū urūū űmatūxū rū űanagūrū:

“Rū nuā tá chanamugū i to i nachiūānecūāx i duūxūgū na to i nagawa yadexagūxūcēx namaā i űaā Yudīgū i tama yaxōgūxū. Natūrū woo ngēmaācū chanaxūxgu, rū tāūtāma chauga naxīnūe i ngēma Yudīgū i tama irūxīnūēchaūxū”,

űanagūrū ga Tupana. ²² Rū ngēmacēx ngēma na taxúema nūxū cuáxū i nagawa idexaxū, rū wūxi i cuēxruū nixī naxcēx i ngēma duūxūgū i tama irūxīnūēchaūxū. Rū tama duūxūgū i marū yaxōgūxūcēx nixī i

ngēma. Natürü ngēma Tupanaārü orexū na ixuxū, rü duūxūgū i marū yaxōgūxūcēx nixī na yexeraācū meā Tupanaāxū yaxōgūāxūcēx. Rū tama duūxūgū i tama irūxīnūēchaūxūcēx nixī i ngēma. ²³ Rū ngēxguma chi pema i yaxōgūxe pengutaquēxegūgu, rü guxā chima to i nagawa pidexagūgu, žrū ņuxū ņaxū tá ega petanūgu naxūcuxgu i wūxi i duūxū i ngēma iyarūxīnūxū rü ēxna wūxi i duūxū i tauta yaxōxū? ¿Taux ēxna i naga tá naxīnūxū na pexāūāēgūxū i pemax? ²⁴ Natürü ngēxguma chi guxāma i pema nūxū pixuxgu i Tupanaārü ore, rü chi petanūgu naxūcuxgu i wūxi i duūxū i tama yaxōxū rü ēxna wūxi i duūxū i ngēma iyarūxīnūxū, rü tá nūxū naxīnū i ngēma Tupanaārü ore i nūxū pixuxū. Rū ngēmaācū tá nūxū nacuēx na nūma rü wūxi i pecaduāxū na yīixū. Rū nūgūgu tátama ínarūxīnū i ngēxguma nūxū naxīnūgu i ngēma nūxū pixugūexū. ²⁵ Rū ngēma chixexū i nūxīcatama nūxū ņacuāxū rü tá naxcēx ínicuēx. Rū nūma rü ngēxma tá nacaxāpūxū, rü tá Tupanaxū nicuēxū. Rū tá nūxū nixu na aixcūma Tupana petanūwa nangēxmaxū.

Tama name i penaxīxāchiāxēgū i perū ngutaquewa, rü name i meamare penaxū

²⁶ Dūcēx, Pa Chaueneēgūx, ņuxma tá pemaā nūxū chixu na ņuxācū tá penaxūxū ega ngēxguma pengutaquēxegūgu. Rū ņuxre i pema rü marū name na Tupanaārü wiyaeugu pewiyaeugūxū, rü togue rü tanguxēetaegūxū, rü togue rü nūxū tixuxū i ngēma ore i Tupana tūxū nūxū cuēxēēxū, rü togue rü nawa tidexagūxū i naga i tama nūxū tacuēxgūxū, rü togue rü tanangoxēēgūxū i ngēma dexa i to i nagawa nūxū yaxugūxū. Natürü guxūma i ngēma rü tanaxwēxe i yaxōgūxūārū ngūxēēcēx na yīixū, na yexeraācū yaxōgūāxūcēx rü meā Tupanacēx namaxēxūcēx. ²⁷ Rū ngēxguma to i naga i pema tama nūxū pecuāxūwa pidexagūgu, rü name nixī i taxre rü ēxna tomaēxpūxicatama tidexagū. Rū tanaxwēxe i wūxiexira tidexa i noxri rü yīxcama ya togue. Rū ngēxguma chi texé to i nagawa ideaxgu, rü name nixī na tangēxmaxū ya wūxie ya nūxū ixuchigūxe na ņacūchiga yīixū i ngēma ore i to i nagawa nūxū yaxuxū. ²⁸ Natürü ngēxguma chi tatauxgu na texé nūxū ixuchigūxū na ņacūchiga yīixū i ngēma ore i to i nagawa nūxū yaxuxū, rü narūmemaē nixī na noxtacūma tama to i nagawa pidexagū i perū ngutaquēxewa. Rū narūmemaē i wūxichigū tūxica Tupanamaāxīcatama bexma tidexa. ²⁹ Rū ngēxgumarūū ta ngēxguma pengutaquēxegūgu, rü name nixī i taxre rü ēxna tomaēxpūxicatama nūxū tixu i Tupanaārü ore. Rū ngēma togū i ngutaquēxetanūxū rü name nixī na meā nangugūgūāxū i ngēma ore. ³⁰ Natürü ngēxguma chi íyadexayane i wūxi i duūxū, rü Tupana tūmamaā ideaxgu ya togue ya ngēma rūtōxe, rü name nixī na iyanachianexū i ngēma nūxīra idexaxū na tidexaxūcēx ya yīxema duūxē ya Tupana tūmamaā idexaxe. ³¹ Rū ngēmaācū guxāma i pema na Tupana pemaā idexaxū, rü name nixī i wūxichigū ípenanguxēē na pewa nanguxū na pidexagūxū i Tupanaārü ore. Rū ngēmaācū i ngēma togū i ngutaquēxetanūxūgū rü tá Tupanachiga meā nangūe rü tá nataāēgū. ³² Rū ngēmaācū tanaxwēxe i meāma tūmaāēmaā itacuēx ya wūxichigū ya yīxema Tupanaārü orexū ixuxe. ³³⁻³⁴ Erū perū ngutaquēxegūwa rü Tupana nanaxwēxe na meā penaxūxū i guxūma, rü tama nanaxwēxe na ngēma pexāūgatanūxū rü pegū ípetūexēēxū. Rū guxūma i togū i yaxōgūxūārū ngutaquēxegūwa rü marū nūxū nayapue na tama yadexagūxū i ngexūgū. Rū name nixī i pema rü ta ngēmaācū penaxū, erū

nachuxu na yadexagūxū i ngexūgū i ngutaquēxegūwa. Rū name nixī na yatūgūga naxīnūēxū i ngexūgū, ngēma Tupanaārū ore tūxū muxūrūū. ³⁵ Rū ngēxguma chi tacūxū nacuáxchaūgu i wūxi i ngexū, rū name nixī i nachīuwatama natena naca i nachiga i ngēma. Erū wūxi i āne nixī ega ngutaquēxewa yadeaxgu i wūxi i ngexū. ³⁶ Pa Corítiucūāxgūx, name nixī na nūxna pecuēxāchiexū na tama pewaxira ne naxūxū i Tupanaārū ore. Rū tama pexicatama nixī i penayauxgūxū i ngēma. ³⁷ Rū ngēxguma chi texé tūgūgu rūxīnūgu na Tupanaārū orearū uruū tīxū rū ēxna tūgūgu tarūxīnūgu na Tupanaāē i Ūūnexū tūxna naxāxū i tacū rū cuēx, rū name nixī i nūxna tacuēxāchi na tórū Coriarū ore yīxū i űāā ore i pexcēx chaxūmatūxū. ³⁸ Natūrū ngēxguma chi texé tama nūxū cuáxchaūgu i ngēma pemaā nūxū chixuxū, rū name nixī i tama tūxū pecuáxchaū. ³⁹ Rū ngēmacēx, Pa Chaueneēgūx, rū Tupanana naxcēx peca i cuēx na meāma nūxū pixuxūcēx i norū ore! Rū tama penachuxu na to i nagawa yadexagūxū i duūxūgū! ⁴⁰ Rū perū ngutaquēxegūwa, rū name nixī na meā penaxūxū i guxūma. Rū tama name i ngēma pexāūgatanū rū pegū ípetūexēē.

15

Cristu na yuwa írūdaxūchiga

¹ Rū űuxmax, Pa Chaueneēgūx, rū chanaxwēxe i nūxna pecuēxāchie i ngēma Tupanaārū ore i tūxū maxēxēēxū ga pemaā nūxū chixuxū. Rū yematama ore nixī ga pema peyauxgūxū. Rū űuxma rū ngēmatama ore-gagu nixī i meā peyaxōgūxū. ² Rū ngēma oregagu nixī i pexū nangēxmaxū i maxū i taguma gūxū, ega aixcūma guxūguma peyaxōgūmagu. Natūrū ngēxguma tama guxūguma peyaxōgūgu, rū natūcēxmamare nixī i ngēma perū ō. ³ Rū yexguma noxri petanūwa changuxgu, rū yema nūxira pexū changūxēēxū nixī ga yema chaxira togū choxū nguxēēxū na Cristu rū tórū pecaducēx nayuxū, ngēma Tupanaārū ore i ūmatūxūwa nūxū yaxuxūrūū. ⁴ Rū yexgumarūū ta pexū changūxēēē na űuxācū inatēxgūāxū, rū űuxācū norū tomaēxpūx ga ngunexūgu rū wena na namaxūxū, ngēma Tupanaārū ore i ūmatūxūwa nūxū yaxuxūrūū. ⁵ Rū yexgumarūū ta pexū changūxēē ga űuxācū Pedrucēx na nangóxū ga Cristu, rū űuxācū yixcūra rū norū ngūexūgū ga yamugūxūcēx na nangóxū. ⁶ Rū yemawena ga Cristu rū noxtacūma 500 arū yexera ga yaxōgūxūcēx nangox. Rū muxūma i ngēma duūxūgū rū űuxma rū ta namaxē, natūrū nūmaxū rū marū nayue. ⁷ Rū yemawena rū Chaūtiágucēx nangox, rū yixcama guxūma ga yema togū ga ngūexūgūcēx nangox. ⁸ Rū dūxwa chowa inayacuēx ga chauxcēx rū ta na nangóxū, woo ngūrūāchimare nixī ga yema, ngēxgumarūū i wūxi i buxū i tautama norū ngunexūwa nanguyane buxūrūū. ⁹ Rū choma rū guxūma i ngēma togū i Tupana imugūxūtūūwa chaxū. Rū ngemacēx tama name i Tupana imuxūmaā choxū naxugūxū i duūxūgū, yerū nawe chingēchigū ga Tupanaārū duūxūgū rū porācū chixexū chaxū. ¹⁰ Natūrū ga Tupana rū chomaā namecūma, rū ngēmacēx i űuxma rū choxū pedau na tacū chiīxū rū űuxācū na chiīxū. Rū yema chomaā na namecūmaxū rū tama natūcēxma nixī. Yerū choma rū guxū ga togū ga yamugūxūārū yexera chanaxū ga Tupanaārū puracū. Natūrū tama chauchama chanaxū ga yema puracū, natūrū Tupana ga chomaā mecūmacū rū chomaā puracūcū nixī ga naxūcū ga yema puracū na nūxū chixuxūcēx ga norū ore. ¹¹ Natūrū i űuxma rū nūētama nixī ega

woo choma chixīgu rü ěxna togü yixīgu ga pemaã nüxŭ ixuxŭ ga yema ore. Yerü yema ore ga pemaã nüxŭ tixuxŭ, rü Tupanaãrŭ ore i tüxŭ maxĕxĕxŭ nixī, rü yema nixī ga pixōgŭxŭ.

Ñuxãcü wena tá namaxĕ i duŭxŭgŭ i yuexŭ

¹² Marü pemaã nüxŭ tixu na Cristu rü yuwa ínadxŭ. ¿Rü tüxcŭü ñuxre i pema rü ñaperügŭgŭ:

“Yuexŭ rü tagutáma wena namaxĕ”, ñaperügŭgŭ? ¹³ Rü ngĕxguma chi ngĕma yuexŭ rü tagu chima wena namaxĕgu rü yima Cristu rü tãu chima wena namaxŭ. ¹⁴ Rü yexguma chi Cristu tama wena maŭxgu, rü ngĕma ore i nüxŭ tixuxŭ i nachiga rü taxuwa chima name, rü natŭcĕxmamare chi nixī i perü õ. ¹⁵ Rü ngĕxguma chi ngĕmaãcü yixīgu, rü toma i Tupanaãrŭ orearŭ uruŭgŭ rü doratĕĕxgŭxŭ tixīgŭ. Erü nüxŭ tixu na Tupana Cristuxŭ wena maxĕĕxŭ. Rü ngĕxguma chi tama aixcŭma yixīgu na wena namaxĕxŭ i yuexŭ, rü chi wŭxi i doramare nixī na Tupana Cristuxŭ wena maxĕĕxŭ. ¹⁶ Rü ngĕxguma chi ngĕma yuexŭ rü tagu chima wena namaxĕgu, rü ga Cristu rü chi ta tãu chima wena namaxŭ. ¹⁷ Rü yexguma chi Cristu tama wena maŭxgu, rü natŭcĕxmamare chi nixī i peyaxōgŭxŭ, rü ñuxma rü chi ta perü pecadugagu ipeyarŭtauxe. ¹⁸ Rü chi ngĕmaãcü yixīgu rü ngĕma duŭxŭgŭ i Cristuaxŭ yaxōgŭxŭ i marŭ yuexŭ, rü chi ta tãu chima nüxŭ nangĕxma i maxŭ i taguma gŭxŭ. ¹⁹ Rü ngĕxguma chi ñoma i maxŭcĕxicatama yixīgu na Cristuaxŭ yaxōgŭxŭ, rü chi guxŭ i togü i duŭxŭgŭarŭ yexera tangechaŭtŭmŭgŭ. ²⁰ Natŭrŭ aixcŭmaxŭchi nixī ga Cristu ga yuwa na ínadxŭ. Natanŭwa i guxŭma i ngĕma yuexŭ i yixcŭra tá írŭdagŭxŭ, rü Cristu nixī ga namaã inaxŭgŭcŭ na ínadxŭ, yerü nüma nixī ga nüxŭra wena namaxŭxŭ. ²¹ Rü yexgumarŭü wŭxi ga yatŭgagu na nayuexŭ ga duŭxŭgŭ, rü ngĕxgumarŭü tá ta nixī na wŭxi i yatŭgagu wena namaxĕxŭ i ngĕma marŭ yuexŭ. ²² Rü ngema na Adáŭgagu guxãma na yuexŭ, rü ngĕxgumarŭü ta Cristugagu tá namaxĕxŭ i guxŭma i duŭxŭgŭ i nüxŭ yaxōgŭxŭ. ²³ Natŭrŭ wŭxichigŭ tá tŭmawa nangu na wena tamaxŭxŭ. Rü Cristu nixī ga nüxŭra maxŭcŭ. Rü ngĕxguma wena nüma naxŭxgu i nümax, rü ngĕxguma tá nixī i wena namaxĕxŭ i ngĕma duŭxŭgŭ i noxrŭ ixīgŭxŭ. ²⁴ Rü ngĕmawena tá nixī i nagŭxŭ i naãne. Rü ngĕxguma tá nixī ya Cristu i nüxŭ naporamaĕxŭ i guxŭma i norŭ uwanŭgŭ. Rü ngĕxguma tá nixī i Nanatŭ ya Tupanana naxãaxŭ i guxŭma na nüma namaã inacuáxŭcĕx. ²⁵ Erü nüma ya Cristu rü ãĕxgacŭ tá nixī ñuxmatáta nüxŭ naporamaĕ i guxŭma i norŭ uwanŭgŭ. ²⁶ Rü ngĕma nawa iyacuáxŭ i norŭ uwanŭ i tá nüxŭ naporamaĕxŭ, rü yu nixī. ²⁷ Yerü Tupana rü marŭ Cristumĕxĕwa nanayexmagŭxĕĕ ga guxŭma. Natŭrŭ woo Tupanaãrŭ ore nüxŭ ixuxgu na Cristumĕxĕwa nangĕxmagŭxŭ i guxŭma, natŭrŭ nümatama ya Tupana rü tama Cristumĕxĕwa nangĕxma. Yerü nüma ga Tupana nixī ga Cristumĕxĕwa nayexmagŭxĕĕãxŭ ga guxŭma. ²⁸ Rü ngĕxguma guxŭma Cristumĕxĕwa ngĕxmagŭgu, rü ñuxŭchi nümatama ya Cristu ya Tupana Nane rü tá Nanatŭmĕxĕwa nügŭ nangĕxmaxĕĕ. Yerü nüma ga Tupana nixī ga Cristumĕxĕwa nayexmagŭxĕĕãxŭ ga guxŭma. Rü ngĕmaãcü ya Tupana rü guxŭmaã tá inacuĕx. ²⁹ Rü nangĕxma i ñuxre i duŭxŭgŭ i petanŭwa i Tupanaegagu yuexŭchicŭü íbaiŭxŭ. ¿Rü tüxcŭü ngĕma naxŭgŭ? Rü ngĕxguma chi tama wena namaxĕgu i duŭxŭgŭ i yuexŭ, ¿rü tüxcŭü ngĕma yuexŭchicŭü ínabaiŭ? ³⁰ ¿Rü tüxcŭü i toma rü guxŭguma ãücŭmaxŭwa tangĕxmagŭ? ³¹ Pemaã nüxŭ chixu, Pa

Chaueneēgūx, rü guxū i ngunexūgu rü āñcūmaxūwa changēxma, rü tama nūxū chachuēx i tacū rü ngunexūgu Tupanaārū oregagu tá na chayuxū. Rū ngēma rü aixcūmaxūchi nixī, ngēxgumarūū na aixcūma yīxū na choxū nangēxmaxū i wūxi i taāē i taxū i ñuxma na tórū Cori ya Ngechuchu ya Cristuaxū peyaxōgūxū. ³² Choma rü nuā Epéchiuwa rü Tupanaārū orechigagu chorū uwanūmaā poraācū togū tachoxūgagū. Rū ñoma naēxū i idūraexūmaā togū tadēixūrūū tixīgū. ¿Natürū tacūwa choxū namexū ga yema ega chorū maxū i ñoma i naānewa choxū ngēxmaxūcēxicatama yixīgu? Rū ngēxguma chi aixcūma yixīgu na tama wena namaxēxū i yuexū, rü marū name i ñatarūgūgū:

“¡Ngīxā tachibūe rü taxaxegū, erū paxa tá tayue!” ñatarūgūgū. ³³ ¡Natürū tāūtāma nawe perūxī i ngēma duūxūgū i ngēmaācū chixri idexagūxū! Erū aixcūma nixī i ngēma ore i ñaxū:

“Rü texé ya chixexū i duūxūmaā āmücūxe, rü tūxū inayanaxoxēē i tūmacūmagū i mexū”, ñaxū. ³⁴ Rū name nixī i meā pegūāēgu perūxīnūē rü nūxū perūxoe i ngēma perū chixexūgū. Rū wūxi i perū āne nixī na pemaā nūxū chixuxū rü ñuxre i pema rü tama aixcūma Cristuarū duūxūgū pixīgūxū rü tama aixcūma Tupanaxū pecuēxgūxū.

Ñuxācū wena namaxē i yuexūgū

³⁵ Natürū ngürūāchi tá texe pexna taca rü ñatarūgū pexū:

“¿Ñuxācū tá wena namaxēxū i yuexū? ¿Rü nañuxraūxū i naxūnemaā tá ínadagūxū?” ñatarūgū tá pexū. ³⁶ Pa Duūxū i Ngēāēmarexūx jrū dūcax! Rū ngēxguma wūxi ya nanetūchire itoxgu, rü nūma ya yima naxchire rü nayu na ngemaācū naxūxūcēx i ngēma nanetū. ³⁷ Rū ngēma waixūmūgu itoxū, rü tama marū nanetū ixīxū nixī, natürū naxchire nixī ya yima itoxūne woo triguchire rü ēxna ngexūrūxūmare i to i nanetūchire yixīgu. ³⁸ Rū ngēxguma marū inatoxguwena, rü Tupana nixī i yanaxūxēēcū ya yima nachire na nūma nanaxwēxēñācūma yīxūcēx i ngēma nanetū. ³⁹ Rū tama guxū i naxūnegū nawūxigu. Rū duūxēxūne rü nanatoraxū, rü naēxūgūxūne rü to nixī, rü werīgūxūne rü to nixī, rü choxnīgūxūne rü to nixī. ⁴⁰ Rū ngēxgumarūū ta nangēxma i naxūnegū i daxūgūxū i naānecūāx, rü nangēxma i naxūnegū i ñoma i naānecūāx. Rū ngēma daxūgūxū i naānecūāx i naxūnegū rü nūxū nangēxma i noxrūtama mexū, rü ngēma ñoma i naānecūāx i naxūnegū rü ta nūxū nangēxma i noxrūtama mexū. Natürū tama nawūxigu i ngēma norū mewa. ⁴¹ Rū uēxcūarū yauracūū rü tama namaā nawūxigu i tauemacūarū yauracūū. Rū woramacurīgūarū yauracūū rü to nixī. Rū nūgūtanūwa ya woramacurīgū, rü tama nawūxigu i norū yauracūūwa. ⁴² Rū ngēxgumarūū tá ta naxūpetū namaā i naxūnegū i ngēma duūxūgū i yuexū. Erū ngēma naxūne i noxri nūxū ngēxmaxū rü iyarūxoxwēxexū nixī. Natürū ngēma naxūne i tá nūxū ngēxmaxū i ngēxguma wena namaxēgu, rü ngēma rü tagutāma inayarūxo. ⁴³ Rū ngēma naxūne i yuxū rü taxuwama name i ngēxguma inatēxgux. Natürū ngēxguma wena namaūxgu rü tá namexēchi. Rū ngēma naxūne i ñuxma turaxū rü ngēxguma wena namaūxgu rü tá napora. ⁴⁴ Rū itanatēx i ngēma naxūne i ñoma i naānecūāx ixīxū. Natürū ngēxguma ínadxgu, rü daxūcūāx i naxūne tá nixī. Rū ñuxma na nangēxmaxū i naxūne i ñoma i naānecūāx rü ngēmawa nūxū tacuēx na nangēxmaxū ta i naxūne i daxūcūāx. ⁴⁵ Tupanaārū ore i ūmatūxūwa rü ñanagūrū:

“Guma nūxīraūcū ga yatū ga Adáū rū nūxū nayexma ga ñoma ga naānecūāx ga naxūne ga paxaāchi maxūxū”, ñanagūrū. Natūrū ya Cristu rū daxūcūāx nixī. Rū nūma nixī i tūxna naxāāxū i maxū i taguma gūxū. ⁴⁶ Noxri rū tūxū nangēxma i ñoma i naānecūāx i taxūne. Natūrū yixcama rū Tupana tá tūxna nanaxā i to i taxūne i daxūcūāx ixīxū. ⁴⁷ Guma nūxīraūcū ga yatū ga waixūmūwa ūcū, rū ñoma ga naānecūāx nixī. Natūrū tórū Cori ya Cristu rū daxūguxū i naānecūāx nixī. ⁴⁸ Rū ngēma taxūnegū i ñoma i naānewa tūxū ngēxmaxū, rū guma Adáūxūne ga waixūmūwa ūcūrū nixīgū. Natūrū ngēma naxūnegū i daxūwa nūxū ngēxmaxū i duūxūgū, rū Cristuxūnerū nixīgū. ⁴⁹ Rū ñgexgumarū na Adáū ga waixūmūwa ūcūrū na yīxū i taxūne, rū ngēxgumarū tá ta Cristu ya daxūwa ngēxmacūrū nixī i taxūne i yixcūra. ⁵⁰ Rū dūcax, Pa Chaueneēgūx, pemaā nūxū chixu rū ñāā taxūne i namachinaxcèx rū naxchinèxānaxcèx, rū taxucūrūwa Tupana āēxgacū íyīxūwa nangu. Erū ngēma iyarūxoxū, rū taxucūrūwama Tupanaxūtawa i ngextá taxūma íyarūxoxūwa nixūcu. ⁵¹ Natūrū chanaxwēxe na nūxū pecuāxū i wūxi i ore i ēxūguxū ga noxri Tupanaxīcatama nūxū cuāxū. Rū dūcax, tāūtama guxā tayue, natūrū guxāxūne rū tá naxūchicūū. ⁵² Rū ngūrūāchimare wūxi i peāxētūgu tá nixī i ngēma na naxūchicūxū i taxūne i ngēxguma naāneārū guxgux naxāgagu ya corneta. Rū tá naxāga ya yima corneta, rū ngēxguma i ngēma duūxūgū i yuexū rū tá ínarūdagu na tagutáma wena nayuexūcèx. Rū yixema na imaxèxū rū tá naxūchicūū i taxūnegū. ⁵³ Erū ngēma taxūne i yuxwèxexū rū woetama tama taixū rū tá naxūchicūū. Rū wūxi i ngexwacaxūxū i naxūne i aixcūma taixū rū tagutáma yuxū tá nixī. ⁵⁴ Rū ngēxguma ngēmaācū naxūchicūūgu i taxūne i yuxwèxexū, rū tūxū nangēxmagu i taxūne i ngexwacaxūxū i taguma yuxū, rū ngēxguma tá nixī i yanguxū i Tupanaārū ore i ūmatūxū i ñaxū: “Marū inayarūxo na nayuexū i duūxūgū. Rū Tupana rū marū yuxū narūyexera. ⁵⁵ Rū dūcax, Pa Yux, ¿ngēxū i curū pora i namaā toxū curūyexeraxū? ¿Rū ngēxū i ngēma cuxne i namaā toxū cudeixū?” ñanagūrū i ngēma Tupanaārū ore. ⁵⁶ Rū ngēma naxne i yu, rū pecadu nixī. Erū ngēma pecadu nixī i naporaxēēxū i ngēma yu na tūxū nadēixūcèx. Rū ngēma mugū ga Moīché ūmatūxū nixī i naporaxēēxū i pecadu, erū woo namexgu i ngēma mugū, natūrū taxucūrūwama texé aixcūma tayanguxēē. ⁵⁷ Natūrū name nixī i Tupanana moxē taxā yerū nūma nanamu ga tórū Cori ya Ngechuchu ya Cristu na ngēma yuxū tūxū naporamaēxēēxūcèx. ⁵⁸ Rū ngēmacèx, Pa Chaueneēgū ya Pexū Changechaūgūxex, rū name nixī i meā peyaxōgūama rū taguma ípenatèx i Tupanaārū ore. Rū name nixī i guxūguma meā penaxū i tórū Coriarū puracū, erū pema nūxū pecuèx rū ngēma puracū i nūxū pexūxū, rū tama natūcèxma nixī.

16

Togū i yaxōgūxūlcèx inanutaque ga dīeru

¹ Rū ñuxma tá pemaā nūxū chixu i nachiga i ngēma dīeru i penu-taquèxexū na namaā nūxū perūngūxēēgūxūcèx i taeneēgū i yaxōgūxū i Yudéaanewa ngēxmagūxū. Rū ngēma yaxōgūxū i Gárataanewa ngēxmagūxū rū marū namaā nūxū chixu na ngīxū nanutaquèxegūxū i ngēma dīeru. Rū chanaxwēxe i pema rū ta ngēxgumarū penaxū. ² Rū ngema dīeru i perū puracūwa ngixū peyaxucūwa rū guxcū i yūxūarū ngunexūgu rū tá ngixū pexā i ngēma dīeru i Tupanaarū ixīcū. Rū ngīmaā tá penguxū

na tama ngēxguma ngema changuxguama ngīxū na pedexūcèx. ³ Rū ngēxguma petanūwa changuxgu, rū tá chanaxūmatū i ñuxre i poperagū naxcèx i taeneēgū i Yerucharēūwa ngēxmagūxū. Rū ñuxūchi ngēma poperamaā tá Yerucharēūwa chanamugū i ngēma duūxūgū i pema nūxū pexunetaxū na ngēma ngīxū nangegūxūcèx i ngēma dīeru i taeneēgūcèx ngīxū penutaquēxecū. ⁴ Rū ngēxguma chi choxū natauxchagu na ngēma Yerucharēūwa chaxūxū, rū nūmagū rū tá wūxigu chomaā ngema naxī.

Pauru nāgu narūxīnū na Corītiuwa naxūxū

⁵ Choma rū Machedóniānēwa tá chaxūpetū na íchayadauxūcèx i taeneēgū i ngema ngēxmagūxū. Rū ngēmawena rū tá petanūwa changu na pexū íchayadauxūcèx. ⁶ Rū ngūrūāchi tá ñuxre i ngunexūgū ngēxma petanūgu charūxāūx, rū bexmana ngūrūāchi ngēma petanūwa tá chanangupetūxēē ya mucū. Rū ngēxguma rū tá pexū natauxcha na choxū perūngūxēēgūxū na ngēma íchaxūxchaūxūwa chaxūxūcèx. ⁷ Erū tama chanaxwēxe i paxaāchimare pexū chadau. Natūrū petanūgu charūxāūxchaū i ñuxre i ngunexū ega chi norū ngūchaxū yixīxgu ya tórū Cori. ⁸ Natūrū nuā Epéchiuarū iānēwa tá changēxma ñuxmatáta Pētecóstearū ngunexūwa nangu. ⁹ Erū nuā rū tórū Cori poraācū choxū nanatauxchaxēē na nūxū chapuracūxūcèx rū nūxū yaxōgūāxūcèx i muxūma i duūxūgū woo namu i ngēma tama naxwēxegūxū na nuā chapuracūxū. ¹⁰ Rū ngēxguma chi Timutéu petanūwa nguxgu, rū chanaxwēxe i meāma penayaxu na petanūwa nataāēxūcèx. Erū nūma rū ta chauxrū tórū Coriarū puracūwa napuracū. ¹¹ Rū ngēmacèx tama chanaxwēxe i texé petanūwa nūxū taxoe. Natūrū chanaxwēxe i nūxū perūngūxēē na taāēācūma nuā naxūxū na choxū íyadauxūcèx. Erū poraācū íchananguxēē na nuā nanguxūcèx namaā i ngēma togū i taeneēgū. ¹² Rū ngēma taeneē i Aporu rū poraācū nūxū chacēxū na petanūwa íyadauxūcèx namaā i ngēma togū i taeneēgū. Natūrū tama ngēma naxūxchaū i ñuxmax. Natūrū ngēxguma naxāchicagu rū tá ngema naxū.

Pauru nūxū narūmoxē ga yema yaxōgūxū

¹³ ¡Rū pexuāēgū na taxūma i chixexūgu peyixūcèx! ¡Rū meāma peyaxōgūama woo tacū pexū ūpetūgu! Rū name nixī i peporaēama rū taxucèxma pemuē. ¹⁴ Rū guxūma i ngēma pexūxū, rū name nixī i pegū pengechaūgūācūma penaxū. ¹⁵ Rū dūcax, Pa Chaueneēgūx, pema nūxū pecuèx na Estéfanatanūxūgū yīxū ga nūxīra yaxōgūxū ga Acayaanēwa. Rū meāma nūxū pecuèxgū na ñuxācū poraācū taeneēgū i yaxōgūxūxū na nangūxēēgūxū. ¹⁶ Rū chanaxwēxe i naga pexīnūē i ngēma duūxūgū i Estéfanatanūxūgūrū i xīgūxū. Rū ngēxgumarū ta chanaxwēxe i naga pexīnūē i guxūma i ngēma duūxūgū i ñaā Tanatūarū puracūwa puracūexū rū ngūxēētaegūxū. ¹⁷⁻¹⁸ Rū ñuxma na taxucūrūwama chauxūtawa pengēxmagūxū, rū wūxi ga chorū taāē nixī na nūma naxīxū ga taeneēgū ga Estéfana rū Fortunátu rū Acáicu. Rū yema taeneēgū ga nūma íxū rū pexū nixuchigagū rū yemaācū choxū nataāēxēēgū ga yema pexū na nataāēxēēgūxūrū. Rū tanaxwēxe i naga pexīnūē rū nūxū pengechaū i ngēma duūxūgū i ngēmagūrū i xīgūxū. ¹⁹ Rū guxūma i taeneēgū i yaxōgūxū i Áchiaaneārū iānegūwa ngēxmagūxū, rū moxē pexcèx ngema namugū. Rū Aquiru rū Prisila rū guxūma i ngēma yaxōgūxū i Aquirupatawa ngutaquēxegūxū, rū moxē pexcèx ngema namugū naegagu ya tórū Cori.

²⁰ Rū guxūma i taeneēgū i núma ngēxmagūxū rū moxē pexcèx ngema namu. Rū chanaxwèxe i wūxichigū i pema rū pegū pengechaūgūācūma pegū perūmoxēgū. ²¹ Choma i Pauru rū choxmēxmaātama pexcèx chanaxūmatū i ñāā chorū moxē. ²² Rū ngēxguma chi texé tama tórū Cori ya Ngechuchu ya Cristuxū ngechaūgu, rū Tupana tá tūxū napoxcu. Rū paxa tá ínangu ya tórū Cori. ²³ Rū chanaxwèxe i tórū Cori ya Ngechuchu ya Cristu poraācū pexū narüngūxēē. ²⁴ Rū guxāma i pema, rū poraācū pexū changechaūācūma pexū charūmoxē naegagu ya tórū Cori ya Ngechuchu ya Cristu.

Rū nuāma pexna,
Pauru

NORŪ TAXRE GA POPERA GA CORĪTIUCŪĀX GA YAXŌGŪXŪTANŪWA NAMUXŪ GA PAURU

Pauru rŭ nŭxŭ narŭmoxē ga yema yaxŏgŭxŭ ga Corŕtiuwa yexmagŭxŭ

¹ Pa Chaueneēgŭ i CorŕtiucŭĀxgŭ i Tupanaāxŭ yaxŏgŭxŭ, rŭ Pa Chaueneēgŭ i Guxŭma i Acayaanewa Ngēxmagŭxŭ, choma i Pauru nixī i pexcēx chanaxŭmatŭxŭ i ņaā popera wŭxigu namaā i taeneē i Timutēu. Rŭ choma nixī i Tupana choxŭ yaxuxŭ na Ngechuchu ya Cristu choxŭ muxŭ na nŭxŭ chixuxŭcēx i norŭ ore. ² Rŭ tanaxwēxe na Tanatŭ ya Tupana rŭ tŏrŭ Cori ya Ngechuchu ya Cristu pexna nanaxā i norŭ ngechaxŭ rŭ norŭ taāēxŭ.

Pauru rŭ ngŭxŭ ninge

³ Rŭ toma rŭ nŭxŭ ticuēxŭŭgŭ ya Tupana ya Nanatŭ ya tŏrŭ Cori ya Ngechuchu ya Cristu. Erŭ nŭma nixī ya Tanatŭ ya nŭxŭ ingechaŭtŭmŭŭgŭcŭ rŭ tŏrŭ Tupana ya guxŭguma tŭxŭ taāēxēēcŭ. ⁴ Rŭ nŭma ya Tupana rŭ toxŭ nataāēxēē i ngēxguma ngŭxŭ tingexgu, na toma rŭ ta tanataāēxēēgŭxŭcēx i ngēma togŭ i duŭxŭgŭ i ngŭxŭ ingegŭxŭ. Rŭ ngēmaācŭ ngēma Tupana toxŭ na taāēxēēxŭrŭŭ toma rŭ ta tanataāēxēēgŭ i ngēma togŭ i duŭxŭgŭ. ⁵ Rŭ ņŭxma na Cristurŭŭ poraācŭ ngŭxŭ tingegŭxŭ, rŭ ngēxgumarŭŭ nŭmatama poraācŭ toxŭ nataāēxēē. ⁶ Rŭ ngēmācēx, ngēxguma toma ngŭxŭ tingegŭgŭ, rŭ ngēmaācŭ toxŭ nangupetŭ na pema rŭ pexŭ nangēxmaxŭcēx i perŭ taāē rŭ perŭ maxŭ i taguma gŭxŭ. Rŭ ngēxguma Tupana toxŭ taāēxēēgŭ, rŭ ngēmaācŭ tomaā nanaxŭ na pema rŭ ta pexŭ nangēxmaxŭcēx i perŭ taāē rŭ yaxna namaā pexŭnŭēxŭcēx i ngēxguma ngēmāmatama ngŭxŭ i toma tingegŭxŭ pexŭ ngēxmagu. ⁷ Toma rŭ aixcŭma tayaxŏgŭ na pema rŭ tagutāma ŭpenatāxŭ i Tupanaārŭ ore. Erŭ nŭxŭ tacuēx rŭ ngēma na toxrŭŭ ngŭxŭ pingegŭxŭ, rŭ ngēxgumarŭŭ tā ta toxrŭŭ pexŭ nangēxma i ngēma taāē i Tupanawa ne ŭxŭ. ⁸ Pa Chaueneēgŭx, tanaxwēxe i nŭxŭ pecuēx na ņuxre ga guxchaxŭgŭ toxŭ ngupetŭxŭ ga Áchiaanewa. Rŭ yema na poraācŭ toxŭ naguxchaxŭ, rŭ dŭxwa marŭ tama namaā taporae, rŭ nagu tarŭxŭnŭē na marŭ tāŭtāma tamaxēxŭ. ⁹ Rŭ nagu tarŭxŭnŭē rŭ ņoma yuwa taxŭxŭrŭŭ tixŭgŭ. Natŭrŭ yemaācŭ toxŭ naxŭpetŭ, erŭ Tupana ya yuexŭxŭ ŭrŭdagŭxēēcŭ toxŭ nangŭxēēchaŭ na nŭxŭcatama nŭxŭ nangēxmaxŭ i pora na yuwa toxŭ ŭnanguxŭxēēxŭcēx, rŭ taxucŭrŭwama togŭtama na ŭtanguxŭxēēxŭ. ¹⁰ Rŭ Tupana rŭ toxŭ ŭnanguxŭxēē nawa ga yema guxchaxŭ ga yuwa toxŭ gagŭchaŭxŭ. Rŭ ngēxgumarŭŭ tā ta toxŭ ŭnanguxŭxēē nawa i ņaā taxŭ i guxchaxŭ i ņŭxma toxŭ ngēxmaxŭ. Rŭ aixcŭma tayaxŏgŭ na nŭma rŭ guxŭgutāma ngēmaācŭ toxŭ nangŭxēēxŭ. ¹¹ Natŭrŭ tanaxwēxe i pema rŭ perŭ yumŭxēmaā toxŭ perŭngŭxēē. Rŭ ngēxguma chi ngēmaācŭ penaxŭxgux, rŭ muxŭma i duŭxŭgŭ rŭ tā Tupanana moxē naxāgŭ naxcēx i ngēma na ņŭxācŭ toxŭ nangŭxēēxŭ.

Tŭxcŭŭ tama Corŕtiuwa naxŭ ga Pauru

¹² Nangēxma i tacŭ i toxŭ taāēxēēxŭ. Rŭ ngēma nixī na toŏēwa nŭxŭ tacuāxŭ na ņoma i naānewa rŭ aixcŭma Tupana naxwēxexŭācŭma

meā tamaxēxū. Rū pepēxewa nixī ga guxūārū yexera yemaācū tamaxēxū. Natürü tama togagu nixī ga yema, yerü Tupana ya tomaā mecūmacū nixī ga toxū rüngūxēēcū na yemaācū pepēxewa tamaxēxūcēx. ¹³⁻¹⁴ Rū yema poperagū ga pexcēx taxūmatūwa, rü nataxuma ga tacū ga icūxū. Natürü yema toma tamaxēxūācūma nixī ga pexcēx tanaxūmatūxū na yemawa meā nüxū pecuáxūcēx na ñuxācū tixīgūxū. Rū woo i ñuxma rü tama aixcūma meā toxū na pecuáxū, natürü chanaxwēxe i wūxi i ngunexūgu rü aixcūma meā toxū pecuēx. Rū ngēxguma meā toxū pecuēxgu rü pema rü tá tomaā petaāēgū i ngēxguma Inanguxgu ya tórü Cori ya Ngechuchu, rü ngēxgumarūü i toma rü tá ta pemaā tataāēgū. ¹⁵⁻¹⁶ Rū yemagu charūxīnūxūcēx nixī ga noxri ga pexūtawa na chaxūxchaūxū na pexū íchayadauxūcēx rü yemaācū pexū na charūngūxēēxūcēx. Rū nagu charūxīnū ga Machedóniāānewa chaxūxgu na pexūtagu íchidauxū, rü yexguma Machedóniāānewa ne chaxūxgu rü wenaxārū pexūtagu íchidauxū. Rū yemaācū chanaxūxchaū, yerü nagu charūxīnū na yemawena choxū perūngūxēēxū na Yudéaanewa chaxūxūcēx. ¹⁷ Bexmana pema nagu perūxīnūēgu rü tama aixcūma chayanguxēēgaācūma nagu charūxīnū ga yema pexūtawa na chaxūegaxū. ¿Éxna pema nagu perūxīnūēgu rü ñoma wūxi i duūxū i tama Tupanaāxū yaxōxūrūūācūma chamaxū, rü “Ngū” ñacharūgūchirēx woo tama chayanguxēēgagu i ngēma nüxū chixuxū? ¹⁸ Natürü Tupana toxū nacuēx na aixcūma yīxū i ngēma torū ore ega pemaā itaxunetagu. ¹⁹ Erü yima Ngechuchu ya Cristu ya Tupana Nane ga guma Chiribánu rü Timutéu rü choma pemaā nüxū tixuchigacū, rü ore i aixcūma ixīxūxūxicatama nixu. Rū nūma rü aixcūma nayanguxēē i ngēma nüxū yaxuxū. ²⁰ Rū Cristu nixī ya yima yanguxēēcū ga guxūma ga yema unetagū ga Tupana nuxcūmaxūchi nüxū ixuxū. Rū ngēmacēx ngēxguma Ngechuchuégagu Tupanaxū icuēxūūgūgu, rü ñatarūgūgū:

“Rū aixcūma nixī i ngēma”, ñatarūgūgū. ²¹ Rū ñuxma na Cristuarū duūxūgū ixīgūxū, rü Tupana nixī ya toxū poraexēēcū rü pexū po-raexēēcū na taguma Cristuna ixīgachixūcēx. Rū nūmatama nixī ga tūxū nadexū na noxrū ixīgūxūcēx. ²² Rū nūma ya Tupana rü naēga tagu naxū erü tórü yora nixī. Rū nūma rü tūxna nanamu i Naāē i Ūñexū na wūxi i tórü cuēxruū yīxūcēx, rü ngēmawa nüxū icuáxūcēx na yīxcūra tá tūxna naxāāxū i muxūma i to i mexūgū. ²³ Pema nüxū pecuēx ga noxri rü Corítuwa chaxūxchaū, natürü tama yema petanūwa chaxū yerü tama chanaxwēxe na pexū changechaūgūxēēxū. Rū yemacēx tama pexūtawa íchayadau, yerü tama pexū chingagūchaū. Rū Tupana nüxū nacuēx na aixcūma na yīxū ga yema. ²⁴ Rū tama tanaxwēxe na pexū tamuxū na ñuxācū tá Tupanaāxū peyaxōgūxū. Erü pema rü marū aixcūma meāma peyaxōgū. Natürü ngēma tanaxwēxexū nixī na pexū tarūngūxēēgūxū na yexeraācū petaāēgūxūcēx.

2

¹ Rū yemacēx nixī ga tama wena pexūtawa chaxūxū, yerü tama chanaxwēxe ga pexū na changechaūxēēxū. ² Erü ngēxguma chí pexū changechaūxēēgu, ¿rū texé tá choxū tataāēxēē? ¿Rū ñuxācū tá choxū petaāēxēē, ega pexū changechaūxēēgu? ³ Rū yemacēx nixī ga yemaācū pexcēx popera chaxūmatūxū na penamexēēgūxūcēx i perū guxchaxūgū naxūpa na pexūtawa chaxūxū. Yerü tama chanaxwēxe

ga yexguma chi yéma chaxūxgu na choxū pengechaūxēēxū. Erū pema nixī i chanaxwēxexū na choxū petaāēxēēgūxū. Rū aixcūma nagu charūxīnū rū ngēxguma choma chataāēxgu rū pema rū tá ta petaāēgū. ⁴ Rū yexguma pexcèx chanaxūmatūga ya yema popera, rū poraācū chanaxīxāchiāē, rū dūxwa yema chorū ngechaūmaā chaxaxu. Natūrū tama pexcèx chanaxūmatū na pexū changechaūxēēxūcèx, natūrū pexcèx chanaxūmatū na nūxū pecuáxūcèx na ñuxācū poraācū pexū changechaūxū.

Pauru rū nūxū nūxū nangechaū ga yema duūxū ga chixexū namaā iūxū

⁵ Rū yema yatū ga choxū ngechaūxēēxū, rū tama choxūxīcatama nixī ga nangechaūxēēxū, natūrū pexū rū ta nangechaūxēē. Natūrū tama chanangupetūxēēchaxū na pexna chacaxū i ngemachiga.. ⁶ Rū yema poxcu ga nūxna pexāxū ga yema duūxū ga yexguma pengutaquēxegūgu, rū chauxcèx rū marū name na ngēxīcatama na yīxū. ⁷ Rū ngēmacèx i ñuxma rū chanaxwēxe i nūxū nūxū pengechaū i norū chixexū rū nūxū perūngūxēē na tama yexeraxū i chixexūwa nagaāxūcèx i ngēma norū ngechaū. ⁸ Rū ngēmacèx chanaxwēxe i wenaxārū noxrirū nūxū nūxū pedauxēē na aixcūma nūxū pengechaūxū. ⁹ Rū yemacèx nixī ga yemachiga marū pexcèx chanaxūmatūxū, yerū pexū chaxūxchaū, rū nūxū chacuáxchaū ngoxi marū aixcūma chauga pexīnūē. ¹⁰ Rū ñuxma pemaā nūxū chixu rū yixema pema tūxū nūxū pengechaūxē i tūmaārū chixexū, rū choma rū tá ta tūxū nūxū changechaū. Rū ngēxguma chi tacū rū chixexūxū tūxū changechaūgu, rū pegagu nixī i Cristupēxewa tūxū nūxū changechaūxū i ngēma. ¹¹ Rū ngēmaācū chanaxū na tama nayoxniēxūcèx i Chataná na chixexūgu tūxū nayixēēxūcèx. Erū yixema rū meāma nūxū tacuèx i nacūma i Chataná na ñuxācū chixexūgu tūxū nayixēēchaūxū.

Tróaarū iānewa rū nanaxīxāchiāē ga Pauru

¹² Rū yexguma Tróaarū iānewa changuxgu na nūxū chixuxūcèx ga Cristuarū ore, rū poraācū choxū natauxcha na yéma tórū Coriaxū chapuracūxū. ¹³ Natūrū tama aixcūma chataāē ga yéma, yerū tama yexma nūxū chayangau ga taeneē ga Titu. Rū yemacèx nūxū charūmoxē ga yemacūāx ga duūxūgū, rū ichaxūāchi, rū Machedóniānewa chaxū.

Cristu rū Paurumaā napora

¹⁴ Rū Tupanana moxē taxāgū erū norū duūxūgūxū toxū nixīgūxēē. Rū ñuxma na Cristuarū duūxūgū tixīgūxū, rū nūma ya Tupana rū guxūguma tomaā nanaxūpēxe. Rū nūma nixī i toxū namuxū na duūxūgūxū nūxū tacuèxēēxūcèx i norū ore. Rū ngēma norū ore rū guxūwama nangu rū guxūguma nipuema ñoma wūxi i pumara i yixichixūrū. ¹⁵ Rū ñuxma i toma i Cristugagu Tupanapēxewa na timexū, rū guxūwama tanguchigagū natanūwa i ngema yaxōgūxū rū ngema tama yaxōgūxū.. ¹⁶ Rū ngēma duūxūgū i tama yaxōgūxū rū nūxū nawēxtūmūxū i tochiga, erū ngema ore i nūxū tixuxū rū norū poxcuchigaxū namaā nixu. Natūrū ngēma yaxōgūxū rū namaā nataxēgū i tochiga erū ngema ore i nūxū tixuxū rū ore i namaxēēxū nixī. Rū ngēmacèx ztexēāxū natauxcha i ñāa puracū na nūxū tixuxū i ngēma ore? ¹⁷ Rū yixema toxrū i xīgūxēxīcatama tixī ya tūxū natauxchaxe. Rū toma rū tama Tupanaārū oregu dīeru ngīxū tayaxu ngēma togū naxūgūxūrū. Natūrū Tupanapēxewa rū aixcūma

meā nūxŭ tixu i ngēma norū ore, erū nūma toxŭ nimugū rŭ Cristuarŭ tixĭgŭ.

3

Tupanaārŭ uneta i ngexwacaxŭxŭchiga

¹ Rŭ ñuxma na pemaā nūxŭ tixuxŭ na aixcŭma Tupana yĭxŭ ga toxŭ mucŭ, rŭ hexmana tá nagu perŭxĭnŭē na wenaxārŭ togŭētŭwa tidex-agŭxŭ. ¿Ēxna penaxwēxe na wŭxi i carta i cuēxruŭ pexŭ tawéxŭ na nawa nūxŭ pecuáxŭcēx na aixcŭma Tupanaārŭ orearŭ uruŭgŭ tixĭgŭxŭ, rŭ ēxna penaxwēxe na pexŭtawa naxcēx ítaçaxŭ i cartagŭ na ngēmawa duŭxŭgŭ toxŭ cuáxŭcēx naxrŭxŭ i ngema togŭ? ² Rŭ pemaā nūxŭ tixu rŭ tama tanaxwēxe i ñacŭ rŭ carta na duŭxŭgŭ toxŭ cuáxŭcēx, erŭ pematama nixĭ i ngēma cartarŭŭ pixĭgŭxŭ, rŭ pewa nixĭ i nangóxŭ na aixcŭma Tupana yĭxŭ ga toxŭ mucŭ. Rŭ meāma tođēwa nūxŭ tacuēx i ngēma. Rŭ yema na naxŭchicŭxŭ ga perŭ maxŭ, rŭ ngēmawa guxŭma i duŭxŭgŭ nūxŭ nadau na aixcŭma wŭxi ga mexŭ ga puracŭ taxŭxŭ ga petanŭwa. ³ Rŭ ñuxma rŭ meāma nangox na pema rŭ ñoma wŭxi i carta i Cristutama ũmatŭxŭrŭŭ na pixĭgŭxŭ. Rŭ torŭ puracŭgagu nixĭ i ngēma. Natŭrŭ tama wŭxi i carta i ñacŭ rŭ ũmatŭxŭmaā ũmatŭxŭ pixĭgŭ, natŭrŭ pema nixĭ i carta i Tupana ya Maxŭcŭāē i Ũñexŭ ũmatŭxŭ. Rŭ ngēma carta rŭ tama popera rŭ ēxna nutawa iwŭcuchixŭ nixĭ, natŭrŭ perŭ maxŭwa nixĭ i nangóxŭ i ngēma. ⁴ Rŭ ngēmacēx tama tamuŭē na ngēmaācŭ togŭcēxtama tidexagŭxŭ, erŭ tayaxōgŭ na Cristugagu Tupana toxŭ dauxŭ na timexŭ. ⁵ Rŭ tama toxrŭtama cuēxmaā nixĭ i tanaxŭxŭ i ñacŭ rŭ mexŭ. Natŭrŭ guxŭma i ngēma taxŭxŭ rŭ Tupanaārŭ ngŭxēēmaā nixĭ i tanaxŭxŭ. ⁶ Rŭ Tupana rŭ toxŭ narŭngŭxēē na duŭxŭgŭmaā nūxŭ tixuxŭ i ngēma ngexwacaxŭxŭ i norŭ uneta na ñuxācŭ Cristugagu tá tŭxna naxāāxŭ i maxŭ i taguma gŭxŭ. Rŭ ngēma maxŭ rŭ tama yema mugŭ ga Moĭché ũmatŭxŭgagu tanayaxu, natŭrŭ tanayaxu erŭ Tupanaāē i Ũñexŭ tŭxna nanaxā. Rŭ yema mugŭ ga Moĭché ũmatŭxŭ rŭ yuwa tŭxŭ nagagŭ, natŭrŭ Tupanaāē i Ũñexŭ rŭ tŭxna nanaxā i maxŭ i taguma gŭxŭ. ⁷ Rŭ yema mugŭ ga Moĭchéna naxāxŭ ga Tupana, rŭ nutagu nixĭ ga naxŭmatŭxŭ. Rŭ yexguma Moĭché nayaxŭgu ga yema mugŭ, rŭ poraācŭ niyaurachiwecŭxŭ. Rŭ yemacēx ga duŭxŭgŭ rŭ taxucŭrŭwama Moĭchéchiwegu narŭdaunŭ. Natŭrŭ yema norŭ yaurachiwecŭŭ rŭ nixochigŭ. Natŭrŭ ga yema mugŭ ga Moĭché tŭxna āxŭ i yuwa tŭxŭ gagŭxŭ, rŭ taxŭ ga yauracŭxŭmaā ínangu. Rŭ yemaācŭ namexēchi ga yexguma ínanguxgu. ⁸ Natŭrŭ yexeraācŭ namexēchi nixĭ i ngēma uneta i ngexwacaxŭxŭ i Tupanaāē i Ũñexŭ taxcēx ngoxēēxŭ. ⁹ Rŭ yemaācŭ woo namexēchi ga yema mugŭ ga yuwa tŭxŭ gagŭxŭ, natŭrŭ yexeraācŭ namexēchi i ngēma uneta i ngexwacaxŭxŭ i Tupanapēxewa tŭxŭ mexēēxŭ. ¹⁰ Rŭ yema mugŭ ga noxri mexēchixŭ, rŭ ñuxma rŭ taxuwama name, ega namaā nŭgŭ nangugŭgu i ngēma Tupanaārŭ uneta i ngexwacaxŭxŭ i yexeraācŭ mexēchixŭ. ¹¹ Rŭ yemaācŭ woo namexēchi ga yema mugŭ ga paxaāchi ixĭxŭ, natŭrŭ yexeraācŭ namexēchi i ngēma uneta i ngexwacaxŭxŭ i guxŭgutáma ixĭxŭ. ¹² Rŭ toma aixcŭma nūxŭ tacuēx na guxŭgutáma yĭxŭ i ngēma Tupanaārŭ uneta i ngexwacaxŭxŭ i mexēchixŭ, rŭ ngēmacēx tama cúācŭma duŭxŭgŭmaā nūxŭ tixu. ¹³ Rŭ ngēmacēx tama duŭxŭgŭchaxwa iticŭxgŭ yema Moĭché ũxŭrŭŭ. Yerŭ

ga Moiché rü nügü nidüxchiwe na tama nüxü nadaugüxüçèx ga yema Yudíugü ga ñuxácü na yaxochigüxü ga norü yaurachiwecüü. ¹⁴ Natürü ga yema duüxügü ga Moichéxü íixümücügüxü rü ñoma yadüxgüchiwexürüü nixígü yerü tama nüxü nacuèxgüéga ga tacüchiga na yíixü ga yema megu. Rü ñuxma rü ta i ngēma Yudíugü rü tama nüxü nacuèxgüéga i ngēxguma nawa nangúegu i ngēma megu. Erü nangēxma i tacü i ñoma yadüxgüchiwexürüü nüxü naguxchaxēēxü na tama nüxü nacuèxgüxüçèx. Rü ñuxma rü ta tama nüxna ínanguéga i ngēma nacüma erü Cristuxicatama nixí ya yima nüxna ínanguxēēcü. ¹⁵ Rü ñuxma rü ta i ngēma Yudíugü, rü ngēxguma nawa nangúegu i ngēma ore ga Moiché tüxna äxü, rü nangēxma i tacü i ñoma yadüxgüchiwexürüü nüxü naguxchaxēēxü na tama nüxü nacuèxgüégaüçèx na tacüchiga yíixü i ngēma ore. ¹⁶ Natürü ngēxguma wüxi i duüxü nüxü rüxoxgu i nacüma i chixexü, rü tórü Coriaxü yaxōōgu, rü ngēxguma nixí i nüxna ínanguxü i ngēma nüxü naguxchaxēēxü. ¹⁷ Erü nüma ya tórü Cori rü Naãe i Üünexü rü wüxitama nixí rü ngextá ínangēxmaxüwa i tórü Coriãe i Üünexü, rü tüxü nanatauxchaxēē na Tupanana ingaicamagüxü. ¹⁸ Rü ngēmacèx guxãma i yixema na Cristuaxü yaxōgüxü rü ñoma wüxi i woruarüü tawa nangóchipeta na ñuxácü namexēchixü ya tórü Cori erü nataxuma i tacü i tüxü idüxüxü naxchaxwa. Rü nüma ya tórü Cori i Naãe i Üünexü ixícü, rü guxüguma yexeraácü tüxü nimexēēchigü na naxrüü aixcüma imexüçèx.

4

¹ Rü ngēmacèx taguma nüxü tarüchau i ñaã puracü, erü Tupana ya nüxü tangechaütümüçü nixí ga toxü mucü na tanaxüxüçèx i ñaã puracü na duüxügümaã nüxü tixuxüçèx i norü ore. ² Rü yemacèx nüxü tarüxoe ga guxüma ga tacü ga chixexü i ãne tüxna äxü i cúácü üxü. Rü tama tanawomüxēēäcüma nixí i namaã nüxü tixuxü i ore rü tama tanaxüchicüü i ngēma ore. Natürü ngēma ore i aixcüma íxíxüçicatama nixí i nüxü tixuxü. Rü ngēmaäcü Tupanapēxewa tamaxē rü duüxügüpēxewa togü itawēx na nüxü nacuèxgüxüçèx na ñuxácü tixígüxü i tomax. ³ Rü ngēxguma chi texèçèx naguxchagu i ngēma ore i mexü i nüxü tixuxü, rü ngēma duüxügü i iyarütauxexüçèxicatama nixí i naguxchaxü. ⁴ Erü nümagü rü tama nayaxōgü. Rü ngēmacèx i ñoma i naãneärü äēxgacü i Chataná rü nüxü nanaguxchaxēē na tama nüxü nacuèxgüxüçèx na ñuxácü namexēchixü i norü ore ya Cristu ya Üünecü. Rü Cristuwa nixí i nangóxü na ñuxácü na yíixü ya Tupana. ⁵ Rü ngēxguma duüxügümaã nüxü tixuxgu i ngēma ore, rü tama tohigaxütama tixugü. Natürü nüxü tixu na Ngechuchu ya Cristu rü tórü Cori yíixü, rü nüma tüxü na nangechaüxügagu perü ngüxēēruügü na tixígüxü. ⁶ Erü nümatama ya Tupana ga noxri naãne naxüxgux rü éänexüwa nangoxēēcü ga ngóonexü, rü nümatama nixí i ñuxma i tüxü yangoxnaãēxēēgüxü na ngēmawa nüxü icuáxüçèx na ñuxácü namexēchixü i nümax. Rü ngēma norü mexü rü Ngechuchu ya Cristuchiwewa nixí i nüxü idauxü.

Tayaxōgüama ega woo ngüxü ingegügu

⁷ Rü ngēma nüxü na icuáxü na ñuxácü namexēchixü ya Tupana, rü ngēma cuèx rü wüxi i mexēchixü nixí. Natürü ngēma cuèx i mexēchixü rü taxüne i maíraxünaxcèxwa nangēxma, na nangóxüçèx na Tupanawa ne naxüxü i guxüma i pora rü tama i tawatama. ⁸ Rü guxüwama toxü nangēxma i guxchaxügü, natürü taguma nüxü tarüchau i ñaã puracü. Rü

woo poraācū taxoegaāēgūgu, natūrū taguma ítanangēx. ⁹ Rū woo togū towe ingēxūtanūgu, natūrū ya Tupana rū taguma toxū ínawogū. Rū woo duūxūgū toxū napíexēēgu, natūrū tama ngēxma tayacuēxēē i ñāā puracū. ¹⁰ Rū guxūwama i ngextá ítaxíxūwa rū ācūmaxūwa tangēxmagū, yexgumarūū ga Ngechuchu na ācūmaxūwa nayexmaxūrūū. Natūrū ngēmaācū toxū naxūpetū na duūxūgū nūxū daugūxūcēx na ñuxācū towa namaxūxū ya Ngechuchu. ¹¹ Rū ñuxma na tamaxēxū, rū guxū i ngunexūgu rū Ngechuchugagu ācūmaxūwa tangēxmagū. Natūrū ngēmaācū toxū naxūpetū na Ngechuchu inawéxūcēx i norū pora nawa i ñāā toxone i yuxwēxexū. ¹² Rū ngēmaācū Tupanaārū orecēx ācūmaxūwa tangēxmagū, natūrū ngēmaācū toxū naxūpetū na pema rū pexū nangēxmaxūcēx i maxū i taguma gúxū. ¹³ Tupanaārū ore i ūmatūxūwa rū ñanagūrū:

“Nūxū chayaxō rū yemacēx Tupanachiga chidexa”,
ñanagūrū. Rū ngēxgumarūūtama tixīgū i toma na tayaxōgūxū rū Tupanachiga tidexagūxū. ¹⁴ Erū nūxū tacuēxgū rū Tupana ga yuwa ínadaxēēcū ga Ngechuchu ya tórū Cori, rū yimatama Tupana tá nixī ya toxū írūdagūxēēcū, erū Ngechuchuarū duūxūgū tixīgū. Rū ngēmaācū wūxigu pemaā nūgūxūtawa tá toxū nagagū. ¹⁵ Rū guxūma ga yema toxū ngupetūxū rū perū mexūcēx nixī na yexeraācū yamuētanūxūcēx i ngēma duūxūgū i Tupana nūxū rüngūxēēgūxū. Rū ngēmaācū tá dūxwa namuxūchi i ngēma duūxūgū i moxē Tupanana āgūxū rū nūxū icuēxūūgūxū. ¹⁶ Rū ngēmacēx taguma nūxū tarūxoe na nūxū tixuxū i ngēma ore. Rū woo yayachigūgu rū yaturachigūgu i toxone, natūrū toōēwa rū guxū i ngunexūgu rū yexeraācū tiporaetanū. ¹⁷ Erū ngēma ngūxū i toxū ūpetūxū i ñāā torū maxūwa, rū ngēma rū wūxi i paxaāchimare nixī rū paxa tá nangupetū. Natūrū ngēmaācū tá tanayaxu i wūxi i maxū i mexēchixū i tagutáma gúxū i ñoma i naānecūāx i maxūārū yexeraxūchi íxīxū. ¹⁸ Rū tama ngēma ñuxma nūxū idauxūgu nixī itarūxīnūēxū, natūrū nagu tarūxīnūē i ngēma ñuxma tama nūxū idauxū. Erū ngēma ñuxma nūxū idauxū rū tama natai, natūrū ngēma ñuxma tama nūxū idauxū, rū guxūgutáma nangēxmaēcha.

5

¹ Rū nūxū tacuēxgū ega ngēxguma iyanaxoxgu i ñāā toxone i paxaāchi ñuxma toxū ngēxmaxū, rū daxūguxū i naānewa tá tanayaxu i wūxi i toxone i tagutáma iyarūxoxū i Tupanatama toxcēx mexēēxū rū tama i duūxūgū. ² Rū ngēmacēx i ñuxma i ñāā toxonewa tamaxēyane, rū tama aixcūma tataāēgū. Erū tanaxwēxe na paxa toxū nangēxmaxū i ngēma toxone i daxūguxū i naānewa ngēxmaxū. ³ Rū ngēma toxone i daxūguxū i naānewa tá toxū ngēxmaxū rū ñoma wūxi i naxchirurūū tá toxū nidūxū, na ngēmaācū naxāxūnexūcēx i toōē. ⁴ Rū ñāā toxone i ñuxma toxū ngēxmaxūwa tamaxēyane, rū tanaxixāchiāēgū rū tama aixcūma tataāēgū. Rū tama aixcūma ítanatáxchaū i toxone i ñoma i naānewa toxū ngēxmaxū, natūrū tanaxwēxegū na tanayaxuxū i toxone i ngexwacaxūxū na ngēmaācū ngēma maxū i ngexwacaxūxū iyanaxoxēēxūcēx i toxone i ñuxma toxū ngēxmaxū. ⁵ Rū Tupana nixī ya toxū imexēēcū naxcēx i ngēma ngexwacaxūxū i maxū rū ngēma ngexwacaxūxū i toxone. Rū toxna nanamu ga Naāē i Ūnēxū na ngēmawa nūxū tacuāxūcēx na aixcūma tá tanayaxuxū i ngēma. ⁶ Rū ngēmacēx taxucēxma taxoegaāēgū. Erū nūxū tacuēx rū ñuxma ñāā toxonewa tamaxēyane, rū taxucūrūwama tórū Corixūtawa

tangēxmagü i daxūguxū i naānewa. ⁷ Rū woo tama nūxū tadaugūgu ya yima tōrū Cori i űuxmax, natūrū tayaxōgū na wūxi i ngunexū rü tá nūxū tadaugūxū. Rū ngēma nixī i toxū poraxēēxū i űaā torū maxūwa. ⁸ Rū ngēmacēx taxucēxma taxoegaāēgū ega tayuegu. Erū toxcēx rü narūmemaē nixī na nūxna ítachoxūxū i űaā toxone, na tōrū Corixūtawa tayangēxmagūxūcēx. ⁹ Rū ngēmacēx, woo űoma i toxonewa tangēxmagūgu rü ēxna tama nawa tangēxmagūgu, rü tanaxwēxe na guxūguma tōrū Coriarū ngūchaū na taxūxū. Rū ngēmacēx naxcēx tadaugū na tanaxūxū i ngēma nanaxwēxexū i nūmax. ¹⁰ Erū guxātama i yixema rü Cristupēxewa tá tangugū na wūxichigū nayaxuxūcēx i ngēma tūxna űxū. Rū nūma tá wūxichigūxū nangugūarū maxūāx. Rū ngēxgumarūū na űuxācū meā imaxēxū rü ēxna chixri imaxēxū ga yexguma űoma ga taxūnewa iyexmagūgu, rü ngēmaācū tá tūxna nanaxā ya wūxichigū.

Cristu rü taxcēx Tupanaxū narūngūxmūxēē

¹¹ Rū ngēmacēx Tupanaārū orearū uwa tapuracūe rü tayaxucuxēgū i duūxūgū na yaxōgūāxūcēx. Erū toma rü aixcūma torū Corixū tamuūē. Rū Tupana toxū nacuēx na űuxācū yīxū i tōrū maxū, rü chierūna pema rü chi ta toxū pecuēxgux. ¹² Rū tama tanaxwēxe i wenaxārū togūētūwa tidexagū, natūrū pexū tarūngūxēēchaū na pexū nangēxmaxūcēx na űacūcēx tomaā petaāēgūxū na nūxū pecuāxūcēx na űuxācū penangāxūxū i ngēma duūxūgū i pepēxewa nūgū írūmegūnetaxū natūrū norū maxūwa rü tama ixaixcūmagūxū. ¹³ Rū woo duūxūgū toxū daugūgu na Tupanagu taxāūāēgūxū, rü nūetama nixī i ngēma erū nūmatama ya Tupana rü meāma toxū nacuēx. Natūrū i pema rü meāma toxū pecuēx na meāma toōēxū tacuāācūma pemaā nūxū tixuxū ga norū ore. ¹⁴ Rū Cristu ya poraācū toxū ngechaūcū nixī ya űuxma tomaā icuācū, erū tayaxō na nūma rü guxāārū pecaducēx nayuxū na yexma yanaxoxūcēx ga guxāārū chixexūgū. ¹⁵ Rū yemaācū guxūma ga duūxūgūcēx nayu ga Cristu, na ngēma duūxūgū i űuxma maxēxū, rü tama nūmatama nāgu naxīnūēxūgu namaxēxūcēx, natūrū naxcēx na namaxēxūcēx ya yima naxcēx yucū rü wena írūdacū. ¹⁶ Rū ngēmacēx i toma rü tama űoma i naānecūāx i duūxūgū nāgu rūxīnūēxūrūū texēxū tangugūarū maxūāx. Rū woo ga űpa rü űoma ga naānecūāx ga duūxūgū nāgu rūxīnūēxūrūū Cristuxū tangugū, natūrū i űuxma rü tama ngēmaācū namaā nāgu tarūxīnūē. ¹⁷ Rū ngēxguma texē Cristuxū yaxōxgu, rü ngexwacaxūxū i duūxū tixī. Rū nuxcūmaūxū ga tūmacūma rü marū tūxna inayarūxo, rü ngexwacaxūxū i maxū tūxū nangēxma. ¹⁸ Rū guxūma i ngēma rü Tupana nixī ya naxūcū. Rū nūma nixī ga Cristugagu tamaā inangūxmūxū. Rū űuxma rü toxū namu na duūxūgūmaā nūxū tixuxū na namaā inangūxmūēxūcēx. ¹⁹ Yerū Tupana rü Cristugagu duūxūgūmaā nūgū narūngūxmūxēē. Rū tama duūxūgūarū pecadugu naxīnūācūma nanaxū ga yema. Rū űuxma rü toxū namu na ngēmachigaxū duūxūgūmaā tixuxū. ²⁰ Rū ngēmaācū Cristuarū orearū ngeruūgū tixīgū, rü towa nixī i Tupana pexū cēēxūxū na namaā iperūngūxmūēxūcēx. Rū ngēmacēx Cristuégagu pexū tacēēxūgū na Tupanamaā iperūngūxmūēxūcēx. ²¹ Cristu rü taguma pecadu naxū. Natūrū tagagu nixī ga Tupana ga űoma pecaduāxūrūūācūma namaā naxūāxū na yemaācū nagagu tūxū inanguxūxēēxūcēx nawa i tōrū chixexū na aixcūma napēxewa imexūcēx.

6

¹ Rū ñuxma na Tupanaãrū ngũẽẽruũ tixĩgũxũ, rü pexũ tacèèxũ na tama nüxũ pexoexũcèx ga yema pemaã na namecũmaxũ ga yexguma nayuxgu ga Nane. ² Erũ Tupana rü norũ ore i ümatũxũwa, rü ñanagürü: “Rü yema ngunexũ ga nagu namexũgu na choxũ peyaxuxũ, rü yexguma nixĩ ga pexũ chaxĩnũxũ. Rü yexguma pexna chanaxuãxũgu ga maxũ i taguma gũxũ, rü yexguma nixĩ ga pexũ charũngũxẽẽxũ”, ñanagürü. Rü ñuxma nixĩ i ngẽma ngunexũ i nagu namexũ na Tupanaxũ peyaxuxũ, rü ñuxma nixĩ i ngẽma ngunexũ i pexna naxuaxũãxũ i maxũ i taguma gũxũ. ³ Rü toma rü guxũguma naxcèx tadau na guxãpèxewa meã tamaxẽxũ na taxucèxma texé chixri torũ puracũchiga idexaxũcèx. ⁴⁻⁵ Rü guxũwama duũxũgũxũ nüxũ tadauxẽẽchaũ na aixcũma Tupanaãrũ duũxũgũ tixĩgũxũ. Rü ngẽmacèx yaxna namaã taxĩnũe i ngẽxguma woo ngũxũ toxũ ngupetũgu, rü èxna ñacũ toxũ tauxgu, rü èxna ñacũ rü guxchaxũ toxũ ngẽxmagu, rü èxna toxũ yaçuaixgũgu, rü èxna toxũ napoxcuegu, rü èxna naxixãchiãetanũgu rü tomaã nanuẽgu. Rü poraãcũxũchima tapuracũe, rü ñuxguacũ rü tama tapee, rü ñuxguacũ rü taiya toxũ nangux. Natürü yaxna namaã taxĩnũe i guxũma i ngẽma. ⁶ Rü ngexgumarũxũ ta duũxũgũxũ nüxũ tadauxẽẽ na aixcũma namexũ i torũ maxũ, erũ aixcũma Tupanapèxewa meã tamaxẽ, rü meã Tupanaxũ tacuèx, rü yaxna duũxũgũmaã taxĩnũe, rü namaã tamecũma. Rü nüxũ nüxũ tadauxẽẽ na towa nangẽxmaxũ i Tupanaãe i Üñexũ rü aixcũma guxũ i duũxũgũxũ tangechaũxũ. ⁷ Rü duũxũgũxũ nüxũ tadauxẽẽ na aixcũma namexũ i torũ maxũ, erũ namaã nüxũ tixu i ngẽma ore i aixcũma ixĩxũ, rü itanawèx i Tupanaãrũ pora i towa ngẽxmaxũ. Rü ngẽma toxne ixĩxũ rü ngẽma nixĩ i torũ maxũ i aixcũma mexũ i Tupanapèxewa. Rü ngẽmamaã nixĩ i togũ itapoxũxũ i torũ uwanũgüpèxewa. ⁸ Rü ñuxguacũ i duũxũgũ rü toxũ nicuèxũũgũ, rü ñuxguacũ rü ñacũ tomaã nixugũe. Rü ñuxguacũ rü meã tohiga nidexagũ, rü ñuxguacũ rü chixri tohiga nidexagũ. Rü woo aixcũmachirèx yixĩgu i ngẽma ore i nüxũ tixuxũ, natürü doratèèx toxũ nawogũe. ⁹ Rü woo meã toxũ nacuèxgũchirèxgu, natürü ñoma tama toxũ nacuãxũrũũ tomaã nixĩgũ i duũxũgũ. Rü ñuxguacũ rü wixgutaèx tayue, natürü naetũwa tamaxẽãma. Rü toxũ napoxcue, natürü tama toxũ nadaixichi. ¹⁰ Rü woo tangechaũgũgu, natürü guxũguma tataãẽgũama. Rü woo ñoma i naãnewa tama tamuãrũ ngẽmaxũãxgũgu, natürü muxũma i duũxũna tanaxã i taxũ i mexũ erũ togagu nanayaxu i maxũ i taguma gũxũ. Rü woo taxuũma toxũ ngẽxmèxgu i ñoma i naãnewa, natürü daxũ-guxũ i naãnewa rü toxũ nangẽxma i guxũma. ¹¹ Pa Chaueneẽgũ i CorĩtiucũĀx, dũcax aixcũma pemaã nüxũ tixu rü guxũ i torũ maxũnemaã pexũ tangechaũgũxũchi. ¹² Rü toma rü tama pexũ taxoe, natürü pema waxi nixĩ i tama petoxwèxexũ. ¹³ Rü dũcax, Pa Chaueneẽgũx, rü ñoma wũxi i papá naxãcũgũxũ cèèxũxũrũũ pexũ chacèèxũ na choxũ pengechaũgũxũcèx ngẽma choma pexũ changechaũxũrũũ.

Tupana ya maxũcũpata tixĩgũ

¹⁴ Rũ tãũtãma namaã pexãmücũ i ngẽma duũxũgũ i tama yaxõgũxũ! Erũ ngẽxguma chi ngẽmaãcũ penaxũxgu rü tãũtãma guxã wũxigu perũxĩnũe. ¿Rũ ñuxãcũ nawũxiguxũ i ngẽma mexũ namaã i ngẽma chixexũ? ¿Rũ ñuxãcũ nawũxigu i ngõonexũ namaã i èãnexũ? ¹⁵ ¿Rũ ñuxãcũ nawũxiguxũ ya Cristu namaã i Chataná? ¿Rũ ñuxãcũ nawũxiguxũ i wũxi i duũxũ i yaxõxũ namaã i wũxi i duũxũ i tama yaxõxũ? ¹⁶ ¿Rũ

ñuxácü Tupanapatawa nangēxmaxũ i tupananetachicünèxāgũ? Erũ yixema rü Tupana ya maxücüpata tixīgũ, rü tawa namaxũ i nūmax. Rũ Tupana rü pechiga nidexa ga yexguma ñaxgu:

“Rũ ngēma duũxũgũwa tá chamaxũ, rü natanũgu tá chayarũxũũxũ. Rũ norũ Tupana tá chixĩ, rü nūmagũ rü tá chorũ duũxũgũ nixīgũ”, ñaxgu. ¹⁷ Rũ yemacèx ñanagürũ ta ga tórũ Cori:

“¡Rũ Ípechoxũ i natanũwa i ngēma duũxũgũ i tama chorũ duũxũgũ ixīgũxũ! ¡Rũ tãxũ i nũxũ pingõgũxũ i ngēma chopèxewa chixexũ! Rũ choma rü tá pexũ chayaxu. ¹⁸ Rũ choma rü Penatũ tá chixĩ, rü pemagũ rü tá chaunegũ rü chauxacũgũ pixīgũ”,

ñanagürũ ya tórũ Cori ya Tupana ya guxũarũ yexera poraxũchicũ.

7

¹ Rũ dũcax, Pa Chaueneēgũ ya Pexũ Changechaũgũxex, rü ngēma Tupanaarũ unetagũ i pemaã nũxũ chixuxũ, rü taxcèx nixīgũ. Rũ ngēmacèx tanaxwèxe na yigũna idagũxũ na tama taxũnemaã rü ěxna taãemaã naxũxúcèx i ngēma Tupanapèxewa tama mexũ. Rũ tanaxwèxe i aixcũma Tupanaxũ imuũēãcũma nũxna yigũ taxāgũ rü naxcèxicatama tamaxē.

Pauru rü ngema Corĩtiucũāxgũmaã nataãxē

² Rũ tanaxwèxe i toxũ pengechaũgũ. Rũ dũcax ga toma rü taxũxemaãma chixexũ taxũgũ. Rũ taxũxexũma chixexũgu tanguxēē. Rũ taxũxexũma tawomũxēēgũ. ³ Rũ tama pexũ chixuxúcèx nixĩ i pemaã nũxũ chixuxũ i ngēma. Yerũ marũ pemaã nũxũ chixu na ñuxácü guxũ ga chorũ maxũmaã pexũ changechaũxũ. Rũ ngema pexũ na changechaũxũgagu rü íchamemare na petanũwa chamaxũxũ rü ěxna wũxigu pemaã chayuxũ. ⁴ Rũ ñuxma rü taxucèxma pexũ chaxãneãcũma pemaã chidexa erũ poraãcũ pemaã chataãē. Rũ woo ngũxũ na tingegũxũ, natürũ aixcũma choxũ penangũchaũxēē rü choxũ petaãēxēē. ⁵ Rũ yexguma Machedóniãanewa tangugũgucürũwa rü taguma itarũngũgũ. Yerũ guxũwama ga ngexta itaxĩxũwa rü nũxũ itayangau ga guxchaxũgũ. Rũ duũxũgũ rü toxũ nanaguxchaxēē na tanaxũxũ i Tupanaarũ puracũ rü yemacèx poraãcũ taxoegaãxēgũ. ⁶ Natürũ ya Tupana ya tũxũ taãxēēcũ ya yixema ngechaũgũxe, rü toxũ rü ta nataãēxēē ga yexguma toxũtawa nanguxgu ga taeneē ga Titu. ⁷ Rũ tama yema toxũtawa na nanguxúcèxicatama tataãēgũ, natürũ tataãēgũ ta yerũ ga pema rü poraãcũ nũxũ penangũchaũxēē rü penataãēxēē ga guma taeneē ga Titu. Rũ nũma ga Titu rü tomaã nũxũ nixu na ñuxácü poraãcũ penaxwèxexũ na toxũ pedauxũ. Rũ tomaã nũxũ nixu na ñuxácü naxcèx pengechaũgũxũ ga yema chomaã pexũxũ, rü na ñuxácü chauxcèx pexoegaãēgũxũ. Rũ guxũma ga yema oremaã rü yexeraãcũ chataãē. ⁸ Choma nũxũ chacuèx rü yema popera ga pexcèx chaxũmatũxũ rü pexũ nangechaũgũxēē, natürũ ñuxma rü marũ tama naxcèx changechaũ na chanaxũmatũxũ ga yema popera. Rũ noxri rü yemáãcũ naxcèx changechaũ ga yexguma nũxũ chacuèxgu ga na pexũ nangechaũgũxēēxũ ga yema popera ga yexguma penayauxgu. ⁹ Natürũ i ñuxma rü chataãē na pexcèx chanaxũmatũxũ ga yema popera. Rũ tama yema na pengechaũgũxúcèx chataãē, natürũ chataãē yerũ yema perũ ngechaũgagu Tupanana pecuèxãchie rü penaxũchicũũ ga perũ maxũ. Rũ pema rü aixcũma Tupanana pecuèxãchieãcũma namaã peporae ga yema ngechaũ, rü yemaãcũ taxuũma ga chixexũ pemaã taxũ ga

yexguma pexcēx tanaxūmatūgu ga yema popera. ¹⁰ Rū ngēma ngechaū i Tupana naxwēxexūācūma namaā iporaexū, rū name nixī, erū ngēma ngechaūgagu naxūchicūi i tōrū maxū rū ngēmagagu tanayaxu i maxū i taguma gūxū. Rū ngēmacēx taxucēxma naxcēx pixāūxāchie i ngēma ngechaū. Natūrū ngēma ngechaū i ñoma i naānecūāx i duūxūgū nūxū ngēxmaxū rū taxuwama name erū yuwa nanaga. ¹¹ Rū yexguma yema poperamaā pexū changechaūxēēgu, rū Tupana naxwēxexūācūma nixī ga namaā peporaexū ga yema ngechaū. ¡Rū dūcax i ñuxma i tacū Tupana pemaā ūxū i ngēma perū ngechaūgagu! Yerū yema perū ngechaūgagu rū aixcūma nagu perūxīnūē ga yema chixexū ga petanūwa ūpetūxū, rū meāma chomaā nūxū pixu ga yema. Rū yema perū ngechaūgagu rū peāēwa nangux ga yema chixexū, rū poraācū Tupanaxū pemuē. Rū yemacēx penaxwēxe na yēma chaxūxū na pexū chayarūngūxēēxūcēx yerū penamexēēgūchaū ga yema chixexū. Rū yema perū ngechaūgagu rū aixcūma penaxucūxē ga yema duūxū ga chixexū ūxū. Rū guxū ga yemawa rū ipenawēx na tama pegagu yīixū ga yema chixexū ga ngupetūxū. ¹² Rū yemacēx, yexguma pexcēx chanaxūmatūgu ga yema popera, rū tama yema duūxū ga chixexū ūxūgu charūxīnūācūma chanaxūmatū, rū tama yema duūxū ga namaā chixexū naxūxūgu charūxīnūācūma chanaxūmatū. Natūrū chanaxūmatū ga yema popera na yemawa Tupanapēxewa nūxna pecuēxāchiexūcēx na ñuxācū aixcūma toxū pengechaūgūxū. ¹³ Rū yema na toxū pengechaūgūxū, rū wūxi ga taāē nixī ga toxcēx. Natūrū yema taāēārū yexera nixī ga yema taāē ga toxū yexmaxū ga yexguma nūxū tadēuxgu ga Titu ga ñuxācū taxū ga taāē petanūwa na nayaxuxū. Rū aixcūma guxāma ga pema nixī ga wenaxārū poraācū nūxū penangūchaūxēēxū. ¹⁴ Rū noxri tauta yēma naxūxgu ga Titu, rū namaā nūxū chixu na mexū i duūxūgū na pixīgūxū. Rū ñuxma rū taxucēxma chaxāne, erū guxūma ga yema Titumaā nūxū chixuxū ga pechiga rū aixcūma ngēmaācū nixī, yexgumarū na aixcūma yīixū ga guxūma ga yema Tupanaārū ore ga pemaā nūxū tixuxū. ¹⁵ Rū ñuxma i Titu rū yexeraācū pexū nangechaū i ngēxguma nūxna nacuēxāchigu na ñuxācū meā naga pexīnūēxū rū ñuxācū nūxū pengechaūācūma meā penayaxuxū. ¹⁶ Rū choma rū ta poraācū pemaā chataāēxūchi, erū nūxū chacuēx na aixcūma peyanguxēēxū ga guxūma ga yema pemaā nūxū chixuxū.

8

Yema yaxōgūxū rū woo tama na namuārū dīeruāxgūxū, natūrū yema nūxū yexmacū ga dīerumaā meā togūxū narūngūxēēgū

¹ Rū ñuxmax, Pa Chaueneēgūx, rū pemaā nūxū tixuxchaū na ñuxācū Tupana namaā mecūmaxū i ngēma yaxōgūxū i Machedōniāāneārū iānegūwa ngēxmagūxū. ² Rū woo taxū ga guxchaxūgū nūxū na ūpetūgūxū, natūrū nataāēgūama. Rū woo tama na namuārū dīeruāxgūxū, natūrū yema nūxū yexmacū ga dīerumaā meā togūxū narūngūxēēgū. ³ Rū choma nūxū chadau rū pemaā nūxū chixu rū nūmagū rū taāēācūma ngīxū inaxāgū ga guxcūma ga dīeru ga nūxū tauxchacū na ngīxū inaxāgūxū. Rū ngīetū yemaārū yexera taāēācūma ngīxū inaxāgū. ⁴ Rū poraācū toxū nacēēxūgū na tama nūxna tanachūxuxūcēx na yemaācū yema togū ga taeneēgūxū nangūxēēgūxūcēx. ⁵ Rū yema nagu tarūxīnūēxūārū yexera ngīxū inaxāgū ga yema yaxōgūxū ga Machedōniāānecūāx. Yerū

Tupananaxīra nūgū naxāgū rū yemawena toxna nūgū naxuaxūgū na toga naxīnūēxūcēx, yema Tupana naxwēxexūrū. ⁶ Rū yemacēx Tituxū tacēxū na wena petanūwa naxūxūcēx na ngīxū pinguxēēxūcēx ga yema dīeru ga marū pemaā ngīxū inaxūgūcū na ngīxū penutaquēxexū naxcēx i ngēma togū i taeneēgū i nūxū nataxuxū. ⁷ Pema rū guxūwama meā ipexī erū meā peyaxōgū, rū pexū natauxcha na meā nūxū pixuxū i Tupanaārū ore erū meā nūxū pecuēx na ſacūchiga yīxū. Rū aixcūma togūxū perūngūxēēchaū, rū yema pexū tangūxēēxūācūma pegū pengechaūgū. Rū űuxma rū ngēxgumarū ſ ta penaxwēxe na aixcūma meā ipexīxū nawa i ngēma mexū i nacūma na dīeru ngīxū ipexāxū naxcēx i ngēma taeneēgū i nūxū nataxuxū. ⁸ Tama wūxi i mu nixī i ngēma pemaā nūxū chixuxū. Natūrū chanaxwēxemare na nūxū pecuāxū na űuxācū taāēācūma ngīxū inaxāgūxū ga togū ga yaxōgūxū. Rū pemaā nūxū chixu i ngēma na pema rū ta ngīxū ipexāgūxūcēx i ngēma dīeru i togū i taeneēgūarū ngūxēēcēx ixīcū, na ngēmaācū ipenawēxūcēx na aixcūma nūxū pengechaūgūxū. ⁹ Erū pema rū marū nūxū pecuēx na űuxācū tamaā namecūmaxū ga tōrū Cori ya Ngechuchu ya Cristu. Rū woo nūxū nayexma ga guxūma, natūrū űoma wūxi ga ngearū yemaxūāxūrū pexcēx nūgū nixīxēē na ngēmaācū pexū nangēxmaxūcēx i muxūma i mexūgū. ¹⁰ Rū űuxma rū perū mexūcēx nixī i pemaā nūxū chixuxū i ngēma dīeruarū nutaquēxechiga. Rū taunecū ga ngupetūcūgutama nixī ga ipenaxūgūxū ga ngīxū na penutaquēxexū. Rū yema rū aixcūma perū ngūchaūmaā nixī ga penaxūxū. ¹¹ Rū űuxma rū yema noxri na meā ipenaxūgūxūrū, rū name nixī i taāēācūma rū perū ngūchaūmaā peyanguxēē rū ngēma dīeru i pexū ngēxmacūwa ngīxū ipexā naxcēx i ngēma peeneēgū i nūxū nataxuxū. ¹² Erū ngēxguma aixcūma wūxi ya duūxē tūmaārū ngūchaūmaā ngēma dīeru i tūxū ngēxmēxcūwa tūmaēneēcēx ngīxū itaxāxgu, rū Tupana rū taāēācūma ngīxū nayaxu. Erū nūma ya Tupana rū taguma tūxna ngīxcēx naca i ngēma tūxū tauxcū. ¹³ Rū ngēmacēx tama chanaxwēxe i ngēma togūxū na perūngūxēēxūgagu pexū nataxu i pema. ¹⁴ Natūrū chanaxwēxe i guxāma tūxū nangēxma i ſacū i tanaxwēxexū, erū tama name na texēaxū nataxuxū i ſacū. Rū űuxma na pexū nangēxmaxū i perū dīeru, rū name nixī i nūxū perūngūxēēgū i ngēma taeneēgū i nūxū nataxuxū. Rū ngūrūāchi to i ngunexūgu i pema pexū natauxgu, rū nūmagū rū tá nūxī nūxū nangēxma na pexū nangūxēēgūxūcēx. Rū ngēmaācū tá guxātama tawūxigu. ¹⁵ Rū Tupanaārū ore i űumatūwūwa rū űanagūrū:

“Guxema muxūma tūxū yexmaxē rū taxūma tūxū īnayaxū. Rū guxema noxretama tūxū yexmaxē rū tama tūxū inayataxu”,
 űanagūrū.

Titu rū namūcūgūchiga

¹⁶ Natūrū Tupanana moxē chaxā, erū nūma rū Tituxū nagu narūxīnūxēē na aixcūma pexū nangūxēēxūcēx, ngēma choma pegu charūxīnūxūrū. ¹⁷ Rū nūma ga Titu rū: “Ngū” űanagūrū na wena petanūwa chanamuxū. Yerū nūma rū woetama poraācū pegu narūxīnū. Rū ngēmacēx i űuxma rū wena petanūwa naxū, erū nūxū nangūchaū. ¹⁸ Rū Titumaā ngēma tanamu i wūxi i taeneē i guxūma i yaxōgūxū nūxū ngechaūgūxū erū nūma rū aixcūma meā nūxū nixu i Tupanaārū ore i tūxū maxēxēēxū. ¹⁹ Rū tama ngēmacēxicatama nixī. Erū guxūma i ngēma yaxōgūxū rū ngēma taeneēxū naxunetagu na toxū iyaxūmūcūxūcēx rū toxū nangūxēēxūcēx i ngēxguma Yerucharēūwa ngīxū tangēxgu i ngēma

dīēru, na ngēmaācū nūxū ticuēxūūgūxūcēx ya tórū Cori, rū na guxāma nūxū dauxūcēx na űuxācū taāēācūma yigū rüngūxēēgūxū. ²⁰ Rū itayaga i ngēma taeneē, erū tama tanaxwēxe i texé toxū tixu i yixcama ngīxcēx i ngēma tacū i dīēru i taeneēgūcēx ngīxū inutaquēxegūcū. ²¹ Erū tama Tupanapēxewaxicatama tanaxwēxe na meā tanaxūxū, natūrū guxū i duūxūgūpēxewa rū ta tanaxwēxe na meā tanaxūxū. ²² Rū Titumaā rū ngēma to i taeneēmaā petanūwa tanamu i wūxi i to i taeneē i toxū nūxū dauxēēxū na aixcūma nūxū nangūchaū na naxūāxū i Tupanaārū puracū. Rū űuxma rū yexeraācū petanūwa naxūxchaū i nūmax, erū nūxū nacuēx na űuxācū pema rū taāēācūma togūxū na perüngūxēēgūchaūxū. ²³ Rū ngēxguma texé pexna caxgu na texe yīxū ya Titu, jrū tūmamaā nūxū pixu na nūma rū chomūcū ya wūxiwa chomaā pexcēx puracūcū na yīxū! Rū ngēma taxre i togū i namūcūgū, rū ngēma nixī i yatūgū i guxūma i yaxōgūxū nūxū unetagūxū na Cristuarū puracū naxūgūxūcēx. Rū nūmagū rū aixcūma norū maxūmaā Cristuxū nicuēxūūgū. ²⁴ Rū ngēmacēx chanaxwēxe i ngēma taeneēgūxū nūxū pedauxēē na aixcūma nūxū pengechaūgūxū, na guxūma i yaxōgūxū nūxū cuēxgūxūcēx i ngēmachiga. Rū ngēmaācū guxūma i ngēma yaxōgūxū tá nūxū nacuēxgū na aixcūma yīxū i ngēma mexū i ore i pechiga namaā nūxū tixuxū.

9

Yema dīēru ga yema togū ga yaxōgūxūcēx ngīxū inutaquēxecūchiga

¹ Rū taxucēxma tūxcūū pexcēx chanaxūmatū ngīchiga i ngēma dīēru i ngīxū penutaquēxegūcū naxcēx i ngēma taeneēgū i yaxōgūxū i Yudéaanewa ngēxmagūxū. ² Erū marū nūxū chacuēx rū perū ngūchaūmaā ipenaxā i ngēma dīēru. Rū guxūguma taāēācūma ngēma yaxōgūxū i Machedóniāānewa ngēxmagūxūmaā nūxū chixu na űuxācū i pema i Acayaanewa ngēxmagūxe rū naī ya taunecūgutama marū ípememarexū na ngīxū ipexāgūxū i ngēma dīēru. Rū yema rümumaēxū ga yaxōgūxū ga Machedóniāānecūūāx, rū yexguma nūxū naxīnūēgu na űuxācū taāēācūma togūcēx ngīxū na ipexāgūxū i perū dīēru, rū nūmagū rū ta inanaxūgū na ngīxū inaxāgūxū. ³ Natūrū i űuxma rū ngēma petanūwa chanamugū i ngēma taeneēgū na nūxū nadaugūxūcēx, na aixcūma yīxū i ngēma nūxū chixuxū i pechiga. Rū chanaxwēxe na aixcūma ípememarexū na ngīxū ipexāxū i ngēma dīēru, ngēma taeneēgūmaā nūxū chixuxūrūū. ⁴ Erū ngēxguma chi űuxre i taeneēgū i Machedóniāānecūūāx rū ngūrūāchi chomaā petanūwa naxīxgu, rū tama chanaxwēxe na pexū na iyangauxū na tama aixcūma ípememarexū na ngīxū ipexāxū i ngēma dīēru. Rū toxū rū chi wūxi i ānexūchi nixī, erū marūchirēx namaā nūxū tixu na űuxācū aixcūma ípememarexū na ngīxū ipexāxū i ngēma dīēru. Rū maneca pexū rū chi ta wūxi i ānexūchi nixī. ⁵ Rū ngēmacēx nixī i chauxcēx namexū na naxcēx íchaçaxū i ngēma taeneēgū na nūxīra petanūwa naxīxūcēx rū nūmatama pexū yanangūxēēgūxūcēx na ngīxū penutaquēxegūxūcēx i ngēma dīēru ga űpamama ngīxū pixucū. Rū ngēmaācū aixcūma tá ímemare i ngēma dīēru i ngēxguma ngēma changuxgu. Rū togū tá nūxū nadaugū na aixcūma perū ngūchaūmaā yīxū na ngīxū ipexāgūxū rū tama aūācūma na yīxū. ⁶ jrū nūxna pecuēxāchie i ngēma dexa i űaxū:

“Rū yīxema noxretama i nanetūchire itoxe, rū noxretama i norū o tayaxu. Natūrū yīxema muxū i nanetūchire itoxe, rū muxūma i norū o tayaxu”,

ñaxũ! ⁷ Rũ wũxichigũ tanaxwẽxe na ngĩxũ itaxãxũ i ngẽma ngĩgu tarũxĩnũcũ na ñuxre ngĩxũ itaxãxchaũxũ. Rũ tama name i aũãcũma ngĩxũ itaxã rũ ẽxna texẽ tũxũ muãcũma ngĩxũ itaxã. Erũ Tupana rũ nũxũ nangechaũ i ngẽma duũxũ i taãẽãcũma ngĩxũ ixãxũ. ⁸ Rũ Tupanamẽxẽwa nangẽxma na poraãcũ pexna naxããxũcèx i guxũma i mexũ i pexũ taxuxũ, na guxũguma pexũ nangẽxmaxũcèx i ngẽma penaxwèxexũ rũ naetũ na pexũ íyaxũxũcèx na togũxũ namaã perũngũxẽẽgũxũcèx. ⁹ Tupanaãrũ ore i ũmatũxũwa rũ ñanagũrũ:

“Yima yatũ ya mecũ rũ norũ ngũchaũmaã meã inanaxã nũxna i ngẽma duũxũgũ i taxuũma nũxũ ngẽxmaxũ. Rũ Tupana rũ tá guxũgu nũxna nacuèxãchi na ñuxãcũ namecũmaxũ i nũmax”,

ñanagũrũ. ¹⁰ Tupana nixĩ ya tũxna naxãcũ ya nanetũchire na inatoxũcèx, rũ tũxna naxãcũ i õna na nangõxũcèx. Rũ nũma tá nixĩ i pexna naxããxũ ya guxũnema ya nanetũchire ya penaxwèxene na ipenatoxũcèx. Rũ nũma tá nanaxũxẽẽ rũ nanayaxẽẽ ya yima nanetũchire. Rũ tá nana-muxẽẽ i norũ o, na muxũchixũ nawa peyaxuxũcèx na ngẽmamaã togũxũ perũngũxẽẽgũxũcèx. ¹¹ Rũ ngẽmaãcũ i pema rũ tá pexũ nangẽxma i guxũma i mexũ na tauxchaãcũma nũxũ perũngũxẽẽgũxũcèx i togũ. Rũ ngẽxguma ngẽma togũ i taeneẽgũxũtawã ngĩxũ tangegũgu i ngẽma dũeru i naxcèx ngĩxũ ipexãcũ, rũ nũmagũ rũ tá poraãcũ Tupanana moxẽ naxãgũ ngxicèx. ¹² Erũ ngẽxguma nũxna ngĩxũ taxãxgu i ngẽma dũeru i nũxũ ngĩmaã perũngũxẽẽgũcũ i ngẽma taeneẽgũ, rũ tama tacũ i nũxũ taxuxũcèxicatama ta nixĩ, natũrũ naetũ i nũmagũ i taeneẽgũ rũ perũ ãmaregagu tá poraãcũ Tupanana moxẽ naxãgũ. ¹³ Rũ nũmagũ i ngẽma taeneẽgũ rũ tá Tupanaxũ nicuèxũtũgũ, erũ ngẽma perũ ãmaremaã tá nũxũ nũxũ pedauxẽẽ na aixcũma naga pexĩnũẽxũ i Cristuarũ ore i mexũ. Rũ nũmagũ rũ tá Tupanana moxẽ naxãgũ naxcèx i ngẽma perũ ãmare i perũ ngũchaũmaã nũxna rũ guxũma i yaxõgũxũna pexãgũxũ. ¹⁴ Rũ ngẽxgumarũ i ngẽma taeneẽgũ rũ tá poraãcũ pexcèx nayumũxègũ, erũ pexũ nangechaũgũ. Rũ tá Tupanana moxẽ naxãgũ naxcèx na ñuxãcũ nũma ya Tupana poraãcũ pexũ nangũxèxũ na yemaãcũ pexũ natauxchaxũcèx na nũxũ perũngũxẽẽgũxũ. ¹⁵ Rũ ngẽmacèx i ñuxma rũ Tupanana moxẽ taxã, yerũ tũxna nanamu ga Nane na tórũ ãmare yĩxũcèx. Rũ nataxuma i ore i nagu mexũ na nũxũ ixuxũcèx na ñuxãcũ namaã itaãẽgũxũchixũ i ngẽma ãmare.

10

Pauruarũ ore rũ aixcũma nixĩ yerũ Tupana nixĩ ga nũxna ãgacũ

¹ Rũ ñuxma rũ yema Cristu yaxna tamaã naxĩnũxũrũ rũ tamaã namecũmaxũrũ, rũ choma rũ ta pemaã yaxna chaxĩnũãcũma rũ pemaã chamecũmaãcũma pexũ chacèxũ na chauga pexĩnũẽxũcèx. Erũ nũmaxũ i duũxũgũ rũ nũxũ nixugũ na pexũ chamuũxũ ega pexũtawã changẽxmagu natũrũ ngẽxguma pexna chayaxũgu rũ tama pexũ chamuũ.

² Natũrũ ngẽxguma ngẽma petanũwa chaxũxgu, rũ chierũ natauxguma na tacũcèx namaã chaporagaxũ rũ na chanaxucuxèxũ i ngẽma duũxũgũ i petanũwa toxũ ixuxũ na ñoma tama yaxõgũxũrũ na tamaxèxũ. Erũ choma rũ íchamemare na namaãxũchi na chidexaxũ. ³ Rũ aixcũma woo duũxũgũ tixĩgũ natũrũ tama ñoma i naanecũãxrxũ togũ tada i ngexguma itanapoxũgu i Tupanaarũ ore. ⁴⁻⁵ Erũ ngẽma toxne i namaã itanapoxũxũ i Tupanaãrũ ore rũ tama ñoma i naãnecũãx namaã ãnxexũ nixĩ. Erũ toma rũ toxũ nangẽxma i Tupanaãrũ pora na ngẽmamaã

itayanaxoxēēxūcēx i Chatanáārū pora. Rū ngēmaācū itayanaxoxēē i guxūma i chixexū i ore i Tupanaxū namaā yaxugūgūxū i duūxūgū. Rū ngēmaācū itayanaxoxēē i guxūma i Tupanaārū uwanūgūarū ore i nūgū namaā yacuēxūūgūācūma duūxūgūmaā nūxū yaxugūgūxū na tama Tupanaāxū yaxōgūāxūcēx. Rū guxūma i tacū i nagu naxīnūēxū i ngēma duūxūgū i chixexū, rū Cristuna tanaxuaxū na nūma namaā inacuāxūcēx. ⁶ Rū wūxicana marū meā Cristuga pexīnūēgu, rū toma rū ítamemare na tūxū tapoxcuexū ya guxāma ya texé ya tama naga īnūēxē i Cristuarū ore. ⁷ Pema rū norū dūxētūxūnewaxicatama nixī i penangugūxū i wūxi i duūxū. Natūrū ngēxguma texé tūgū cuēxgu na Cristuarū duūxū tīxū, rū name nixī i nūxū tacuēx na toma rū ta tūmarūū Cristuarū duūxūgū tixīgūxū. ⁸ Rū woo írarūwa chanangupetūxēē na chaugū chicuēxūūxū namaā i ngēma na Tupana toxū muxū, natūrū taxucēxma naxcēx chaxāne. Erū aixcūma Cori nixī ya toxū mucū na pexū tarūngūxēēgūxūcēx na yexeraācū meā peyaxōgūxūcēx. Rū tama tacū rū chixexūgu pexū na tayixēēxūcēx nixī i toxū namuxū. ⁹ Rū tama chanaxwēxe i nagu perūxīnūē na pexū íchabajgūchaūxū namaā i ngēma poperagu i pexcēx chaxūmatūxū. ¹⁰ Erū nūmaxū i duūxūgū rū nūxū nixugū na chorū poperawaxicatama pexū íchabajgūxū, natūrū chomaxūchi pexūtawa changexmagu rū tama aixcūma nūxū chacuēx na űnūcū mea chidexaxū na ngemaācū chauga pexū chaxīnūēxēēxūcēx, űnaxūmaā choxū nixugūe. ¹¹ Natūrū texe ya ngemaācū idexáxe rū tanaxwēxe i nagu tarūxīnū rū ngēma pexna tayaxūguācūma torū poperawa pemaā nūxū tixuxūrūū tátama tixīgū i ngēxguma petanūwa tangēxmagūgu. ¹² Toma rū tama tanaxwēxe i namaā togū tawūxīguxēē rū ēxna nagu togū tangugū i ngēma duūxūgū i nūgūtama icuēxūūgūxū. Nūmagū rū nūgūtama nawomūxēēgū, erū nūgūmaā nūgū nawūxīguxēē rū nūgūgutama nūgū nangugū. ¹³ Natūrū toma rū tama togū namaā ticuēxūūgū i ngēma yaxōgūxū i tama Tupana toxmēxwa ngēxmagūxēēxū. Yerū Tupana nixī ga tomaā nūxū ixucū na ngextá nanaxwēxexū na tapuracūexū. Rū nūma nixī ga noxri Corītiuwa ga petanūwa toxū nangugūxēēxū na pemaā nūxū tixuxūcēx ga norū ore. ¹⁴ Rū yemaācū toxira nixī ga noxri petanūwa tangugūxū na pemaā nūxū tixuxūcēx ga yema Cristuarū ore. Rū ngēmacēx i űnuxma na petanūwa taxīxū, rū tama tanangupetūxēē ga yema Tupana tomaā nūxū ixuxū, yerū nūma nixī ga toxū namuxū na pexū tarūngūxēēgūxūcēx. ¹⁵ Rū ngemacēx tama togūarū puracūmaāmare nixī i togū ticuēxūūgūxū. Rū tama nūxū tachopetūchaū i ngēma Tupana tomaā nūxū ixuxū na pexū tangūxēēxū. Natūrū ngema pexū tanaxwaexū nixī na yexeraācū nūxū pecuāxū i Tupanaarū ore na ngemaācū yexera peyaxōgūxūcēx. ¹⁶ Rū ngēxguma marū petanūwa tangugūguwena rū tanaxwēxe i ngēma duūxūgū i perū yéamaxūra ngēxmagūxū i ngextá taguma texé nūxū íixuxūwa taxī na ngēmamaā rū ta nūxū tixuxūcēx i ore i mexū. Erū tama tanaxwēxe i togūarū puracūmaā togū ticuēxūūgū. ¹⁷ Erū Tupanaarū ore i űmatūxūwa rū űnanagūrū:

“Rū ngēxguma texé tūgū icuēxūūchaūgu, rū name nixī i tórū Corixū ticuēxūū, erū nūma nixī i tūxū nangūxēēxū”,
 űnanagūrū i ngēma ore. ¹⁸ Erū ngēma yatū i aixcūma Tupanapēxewa mexū rū tama nūgūtama nicuēxūū. Natūrū ngēma yatū i tórū Cori nūxū icuēxūūxū nixī i aixcūma Tupanapēxewa mexū.

11

Pauru rü nüxü nixuchiga ga yema orearü uruüġüneta ga tama Tupana imugüxü

¹ Rü ñuxma i ngēma tá pemaã nüxü chixuxü, rü bexmana pexcèx rü wüxi i ngēãmare nixi, natürü chanaxwèxe i choxü iperüxñüemare rü yaxna chomaã pexñüë. ² Erü Tupana pexü inuxüxürüü pexü chinuxü. Erü chaugagu nixi i Cristuaxü peyaxögüxü, rü marü Cristuna pexü chaxuaxü na noxrüxícátama pixigüxücèx. Rü ngēmacèx chanaxwèxe i ngearü chixexüãe Cristuxü pexü chawèx ñoma wüxi i pacü i taguma yatüxü cuèxcürüü. ³ Natürü chaxoegaãe rü yema äxtape norü doramaã Ebaxü na womüxèèxürüü, ngürüãchi tá ta texé pexü tawomüxèè, na nüxü perüxoexücèx na Cristugu perüxñüëxü rü naxcèxícátama na pemaxèxü. ⁴ Erü pema rü tauxchaãcü nixi na pexü nawomüxèègüxü. Rü ngèxguma ñangugügu i duüxügü i pemaã nüxü ixuxü i to i Ngechuchuchiga ya tama yima toma nüxü tixuchigacü, rü pema rü nüxü peyaxögü i ngēma duüxügü. Rü pema rü taãèãcüma penayaxu i to i naãe i tama Tupanaãe i Üünexü ga marü peyaxuxü ixixü. Rü peyaxögü i to i ore i tama Tupanaärü ore i mexü ga noxri peyaxuxü ixixü. ⁵ Dücèx, rü woo nawe perüxixgu i ngēma togü i orearü uruüġüneta, natürü chauxcèx rü taxuwama choxü narüyexeragü. ⁶ Rü woo tama choxü nangèxmagu i tauxcha na duüxügüpèxewa chidexaxü, natürü aixcüma meã nüxü chacuèx i ngēma nachiga chidexaxü. Rü ngēma rü guxüma i torü puracüwa marü pexü nüxü tadauxèè i guxüguma. ⁷ ¿Pexcèx rü chixexü pemaã chaxü ga yexguma chaugü ícharüxíragu na pexü chataxèèxücèx rü choxmèxmaã chapuracügu na ngetanüãcüma pemaã nüxü chixuxü ga Tupanaärü ore i tüxü maxèxèèxü? ⁸ Rü aixcüma yema togü ga yaxögüxü choxna ngixü ägücü ga dïeru ngixü chayaxu na yemamaã petanüwa chapuracüxücèx rü pexü charüngüxèèxücèx. ⁹ Rü yexguma petanüwa chayexmagu rü aixcüma choxü itaxu ga dïeru, natürü taguma texéna ngixcèx chaca. Rü taeneègü ga Machedóniãñewa ne íxü rü choxna ngixü naxägü ga yema choxü tauxcü. Rü yemaãcü tama pexütawa ngixcèx íchaca ga yexguma. Rü ñuxma rü ta tagutáma ñacücèx pexna chaca. ¹⁰ Rü Cristu ya chowa ngexmacüégagu pemaã nüxü chixu i ngema na aixcüma ngetanüãcüma petanüwa chapuracüxü. Rü ngema rü chorü taãxè nixi. Rü taxucürüwa texe i guxü i Acáyaanewa choxna tanayaxu i ngema taãxè. ¹¹ ¿Rü ñacücèx yíixü i ngēmaãcü chidexaxü? ¿Éxna pexcèx rü tama pexü changechaüxücèx yíixü i ngēmaãcü chidexaxü? Dücèx, pemaã nüxü chixu rü Tupana nüxü nacuèx na ñuxãcü aixcüma pexü changechaüxü. ¹² Natürü ngēma na ngetanüãcüma pemaã nüxü chixuxü i ngēma ore, rü ngēmaãcü tá chanaxüecha na taxucürüwa chixri chauchiga yadexagüxücèx i ngēma togü i orearü uruüġüneta i nügü ixuxü na toxrüü naxügüãxü i Tupanaärü puracü. ¹³ Nümagü rü aixcüma orearü uruüġüneta nixigü, rü duüxügüxü nawomüxèègü. Rü nümagü rü togu nügü nicuxgü, rü nügü nixugü na Cristu yamugüxü. ¹⁴ Rü ngēma rü taxucèxma namaã pebaixãchiãègü. Erü woo i Chataná rü ta rü Tupanaärü orearü ngeruügü i daxüdüãx i yauracüxürüüãcü nügü nangoxèè. ¹⁵ Rü ngēmacèx woetama ngēmaãcü nixigü i ngēma duüxügü i Chatanáãxü puracüexü. Rü nümagü rü duüxügü i mexü ügüxügu nügü nicuxgü.

Natürü ngēma ngēmaācū ixīgūxū, rü Tupana tá nanapoxcue naxcèx i ngēma chixexū i naxügūxū.

Pauru rü yema puracū ga Ngechuchu nawa namuxūwa ngūxū ninge

¹⁶ Rü wena pemaā nūxū chixu rü tama chanaxwèxe i nagu perūxīnūē na wūxi i āūāēxū chīxū. Natürü ngēxguma chi ngēmaācū chomaā nagu perūxīnūēgu, rü tama chanaxwèxe i choxna penachuxu na ñoma wūxi i āūāēxūrū chaugūētūwa chidexaxū, na ngēmaācū choma rü ta írarūwa chaugūtama chicuèxūxūcèx. ¹⁷ Rü ñuxma na chaugūētūwa chidexaxū rü ngēma rü tama tórü Coriarü mu nixī. Natürü ñoma wūxi i āūāēxū nügū icuèxūxūrū nixī i chidexaxū. ¹⁸ Rü ñuxma na nangēxmaxū i muxūchixū i duūxūgū i ñoma i naānewa nügū icuèxūxūgūxū, rü choma rü tá ta írarūwa chaugū chicuèxū. ¹⁹ Pema rü nagu perūxīnūē rü nūxū cuèxūchigūxū pixīgū. Natürü taāēācūma yaxna namaā pexīnūē i ngēma duūxūgū i tama naāēxū icuáxū. ²⁰ Rü yaxna namaā pexīnūē i ngēma duūxūgū i nügūxū pexū puracūexēēxū, rü ngēma ngetanūācūma pexū puracūexēēmarexū, rü ngēma pexū womūxēēgūxū, rü ngēma chixri pexū yaxgūxū, rü ngēma pemaā guxchigagūxū. ²¹ Rü woo wūxi i ānēxūchi nixī na pemaā nūxū chixuxū, natürü chauxcèx rü tama aixcūma pexū nūxū tadauxēē ga torü pora ga yexguma petanūwa tayexmagūgu. Natürü ñuxma na tama namuūēxū na nügū yacuèxūxūgūxū i ngēma togū i duūxūgū, rü choma rü ta taxucèxma chamuū na chaugūētūwa chidexaxū woo pexcèx rü taxuwama namexgu i ngēma nūxū chixuxū. ²² Nūmagū rü nügū yaxugūgu rü Yudíugū nixīgū. Natürü choma rü ta Yudíu chixī. Rü nūmagū nügū yaxugūgu rü Iraétanūxūgū nixīgū. Natürü choma rü ta rü Iraétanūxū chixī. Rü nūmagū rü nügū yaxugūgu rü Abráūtanūxū nixīgū. Natürü choma rü ta Abráūtanūxū chixī. ²³ Nūmagū rü nügū yaxugūgu rü Cristuaxū napuracūe. Natürü choma rü norü yexera Cristuaxū chapuracū. Rü ngēma ñachagürü pexū woo pema nagu perūxīnūēgu na ñoma wūxi i āūāēxūrū chidexaxū. Rü ngēma duūxūgūarü yexera poraācū Tupanaāxū chapuracū. Rü norü yexera chapoxcu, rü norü yexera choxū naçuaixgū ga duūxūgū. Rü muēxpūxcūna rü āūcūmaxūchixūwa chayexma rü wixguxūchi taèx choxū nimèxgū. ²⁴ Rü 5 ēxpūxcūna nixī ga 39 ga çuaximaā choxū napoxcu-gūxū ga chautanūxūgū ga Yudíugū. ²⁵ Rü tomaēxpūxcūna nixī ga naīmaā choxū naçuaixgūxū, rü wūxicana ga nutamaā choxū ínamuxūchigūxū. Rü tomaēxpūxcūna nixī ga guma wapuru ga nagu chixūxūne rü chomaā inanguxū. Rü wūxicana ga yexguma chomaā inanguxgu ga wapuru rü wūxi ga chūtaxū rü wūxi ga ngunexū chinge na taxū ga taxtūarü ngāxūtūgu mūrāpewaétūgu chatunagūācūma chiwēxēxū. ²⁶ Rü poraācū nu ne chanaxū, rü poraācū āūcūmaxūwa chayexma yerü natūgū ga āūcūmaxūgu chixūgū, rü ngītēèxgūxū rü chixexū chomaā naxūgūchaū. Rü woo chautanūxūgū ga Yudíugūtanūwa, rü woo yema duūxūgū ga tama Yudíugū ixīgūxūtanūwa, rü woo íānegūwa, rü woo namagūwa, rü woo taxtū i taxūwa rü āūcūmaxūwa chayexma. Rü yema duūxūgū ga chomūcūgūneta ixīgūxūtanūwa rü ta āūcūmaxūwa chayexma. ²⁷ Rü poraācū chataarü puracūāx, rü muxūchixū ga guxchaxūgū choxū nangupetū. Rü muēxpūxcūna rü tama chape, rü chataiya, rü chiṭawa. Rü muēxpūxcūna rü tama chachibū, rü choxū nanadeyu, rü choxū nataxu ga chauxchiru. ²⁸ Rü naētūwa i guxūma i ngēma, rü guxū i ngunexūgu rü chaxoegaāē naxcèx i guxūma i ngēma

yaxōgūxū i guxū i ĩānewa ngēxmagūxū. ²⁹ Rū ngēxguma chi texé tama poragu, rū choxū rū ta nangux. Rū ngēxguma chi wūxie texéxū pepadugu nguxēēgu, rū chauāēwa nangux i ngēma. ³⁰ Natürü ngēxguma chi chaugū chicuèxūūchaūgu, rū tá chaugū chicuèxūū naxcèx na duūxūgū choxū dauxū na taxuwama chamexū. ³¹ Rū Tupana ya tórü Cori ya Ngechuchu ya Cristunatū ya mecū na guxūguma nūxū icuèxūūgūxū, rū nūxū nacuèx na aixcūma yīxū i ngēma nūxū chixuxū. ³² Rū yexguma Damacuwa chayexmagu, rū guma ĩāneārū āēxgacū ga Aretaarū ngūxēēruū, rū norū churaragūxū namu na nūxna nadaugūxūcèx ga guma ĩāneārū poxeguxūārū ĩāxgū na choxū yayauxgūxūcèx ga yexguma chi yéma ĩchaxūūxgu. ³³ Natürü yema ĩāneārū poxeguxūārū ĩāxācūwa rū wūxi ga pexchigu choxū ĩnarūchūxūetaūgū ga chomūcūgū. Rū yemaācū chiña naxchaxwa ga yema āēxgacū.

12

Tórü Cori rū Pauruxū nangoxetūxēē rū nūxū nūxū nacuèxēē ga tacū ga ēxūguxū

¹ Taxuwama name na texé tūgū icuèxūūxū. Natürü tá pemaā nūxū chixuama na ñuxācū tórü Cori choxū nangoxetūxēēxū rū ñuxācū choxū nūxū na nacuèxēēxū ga tacū ga ēxūguxū. ² Rū 14 ga taunecū marū nangupetū ga na Tupana daxūguxū ga naānewa ga nūma ĩnayexmaxūwa choxū nagaxū. Natürü tama nūxū chacuèx rū chauāēwaxicatama nixī ga yéma choxū nagaxū, rū ēxna guxū ga chaxunemaā yīxū ga yéma choxū nagaxū. Rū Tupanaxīcatama nūxū nacuèx i ngēma. ³⁻⁴ Rū aixcūma meāma nūxū chacuèx na daxūguxū ga naānewa choxū nagaxū ga Tupana, natürü tama nūxū chacuèx rū guxū ga chaxunemaā yéma choxū naga rū ēxna tama. Rū Tupanaxīcatama nixī ya nūxū cuácū i ngēma. Rū yéma nūxū chaxīnū ga ore ga ēxūguxū i guxūma i duūxūgūna chuxuxū na nūxū yaxugūxū. ⁵ Rū choma rū chi name na chaugū naxcèx chicuèxūūxū i ngēma, natürü tāūtāma ngēmaācū chanaxū. Erū ngēma ngūxū na chingexūmaāxīcatama tá nixī i chaugū chicuèxūūxū. ⁶ Natürü ngēxguma chi chaugū chicuèxūūchaūgu, rū tāū chima wūxi i ngēāēmare nixī i ngēma, erū aixcūma nixī i ngēma ore i nūxū chixuxū i chauchiga. Natürü tama chaugū chicuèxūū na taxūema nagu rūxīnūxūcèx na ngēma chowa nūxū naxīnūxū rū nūxū nadaugūxūārū yexera chiixū. ⁷ Natürü tórü Cori rū tama nanaxwēxe i porācūxūchima chaugū namaā chicuèxūūxū ga yema ēxūguxū ga mexēchixū ga choxū nūxū nacuèxēēxū. Rū yemacèx chaxunewa nananguxēē ga wūxi ga choxū ngūxū ñoma wūxi ya tuxu chaxunewa ingaxixūrūū. Rū yema rū ñoma wūxi ga Chatanāārū ore-arū ngeruūrūū chauxūtawa nangu na choxū nachixewexūcèx na tama chaugū chicuèxūūxūcèx. ⁸ Rū tomaēxpūxcūna tórü Corina chaca na choxū iyanaxoxēēāxūcèx ga yema choxū ngūxū. ⁹ Natürü nūma ya tórü Cori rū ñanagürü choxū:

“Rū cuma nūxū cucuèx na guxūguma cuxū changechaū, rū ngēxīcatama nixī i cunaxwèxexū. Rū ngēma duūxūgū i tama poraexūwa nixī i aixcūma chanangoxēēxū i ñuxācū na chaporaxū”, ñanagürü choxū. Rū ngēmacèx chataāē ega tama chaporagu. Erū ngēxguma tama chaporagu rū ngēxguma nixī i chowa inawéāxū i norū pora ya Cristu. ¹⁰ Rū ngēma na Cristuxū na changechaūxūgagu nixī i yaxna namaā chaxīnūxū ega woo chaturagu rū woo tacū chomaā yaxugūegu i

duūxūgū. Rū woo choxū natauxgu i chorū ngēmaxūgū, rū woo duūxūgū rū chowe yangēxūtanūgu, rū woo guxchaxūgū choxū ngēxmagu rū Cristucēx rū yaxna namaā chaxīnū i guxūma i ngēma. Erū ngēxguma chaturagu, rū ngēxguma nixī i yexeraācū Cristu choxū poraxēēxū.

Pauru rū naxcēx naxoegaāē ga yema yaxōgūxū ga Corĭtiuwa yexmagūxū

¹¹ Maneca ñoma wūxi i āūāēxūrūū chidexa, erū ngēmaācū chaugū chicuēxūū. Natūrū pegagutama nixī i dūxwa ngēmaācū chaugūētūwa chidexaxū, yerū pema chi nixī ga choxū picuēxūūgūxū, rū tama i chomax. Rū woo taxuwama chame i chomax, natūrū taxuwama choxū narūyexeragū i ngēma orearū uruūgūneta i nawe perūixū. ¹² Rū yexguma petanūwa chayexmagu, rū yaxna pemaā chaxīnūācūma pexū nūxū chadauxēē na aixcūma Cristu choxū muxū na nūxū chixuxūcēx ga norū ore. Rū cuēxruūgūmaā pexū nūxū chacuēxēē ga yema. Rū pexū nūxū chadauxēē ga taxū ga mexūgū ga Tupanaārū poramaā ūxū. ¹³ Rū yexguma petanūwa chayexmagu rū pemaā chamecūma yema guxūma ga togū ga yaxōgūxūmaā na chamecūmaxūrūūtama. Natūrū wūxiwaxicatama nixī ga íchatūxū yerū ga petanūwa rū tama ngīxū chayaxu ga dīeru yema togū ga yaxōgūxūtanūwa ngīxū chayaxuxūrūū. Rū chanaxwēxe i choxū nūxū pengechaū i ngēma. ¹⁴ Rū ñuxma rū marū íchamemare na norū tomaēxpūxcūna pexū íchayadauxū. Rū tāūtāma tacūcēx pexna chayaca. Erū tama perū ngēmaxūgūcēx petanūwa chaxū, natūrū pexcēxūchi nixī i ngēma chaxūxū. Pema rū chauxacūgū pixīgū i Tupanaārū orewa. Rū ngēma papā rū mamāārū puracū nixī na naxācūgūna naxāāxū i ngēma nūxū taxuxū. Rū tama naxācūgūarū puracū nixī na nanatūna rū naēna naxāgūāxū. ¹⁵ Rū choma rū íchamemare na chorū ngūchaūmaā pexcēx ichanaxāxū i guxūma i tacū i choxū ngēxmaxū rū woo chaugūtama rū ta na ichaxāxū na aixcūma meā peyaxōgūxūcēx. Natūrū chauxcēx rū ngēxguma yexeraācū pexū changechaūgu, rū pema rū yexeraācū nūxū perūxoetanū na choxū pengechaūxū. ¹⁶ Rū nūmaxū i duūxūgū i petanūwa, rū woo nūxū nacuēxgū na taguma tacūcēx pexūtawa íchaçaxū, natūrū nūmagū rū nūxū nixugūama na pexū chawomūxēēācūma perū dīeru ngīxū chayaxuxū. ¹⁷ ¿Éxna pema nagu perūxīnūēgu rū yema duūxūgū ga petanūwa chamugūxūwa pexū chawomūxēē? ¹⁸ Rū Titumaā nūxū chixu na petanūwa íyadauxūcēx. Rū namaā yēma chanamu ga yema to ga taeneē. ¿Éxna pema nagu perūxīnūēgu ga Titu rū pexū yēma nayawomūxēē? ¿Tama ēxna aixcūma yīixū na chauxrūū meā na namaxūxū rū chauxrūū mexūgu naxīnūxū ga Titux? ¹⁹ Bexmana pema tá nagu perūxīnūē rū ngēmaācū tidexagū, erū togūētūwatama tachogūchaū. Natūrū, Pa Chaueneēgū ya Pexū Tangechaūgūex, rū Tupanapēxewa rū Cristuégagu nixī i tidexagūxū na yexeraācū meā Tupanaāxū peyaxōgūxūcēx rū yexeraācū meā na pemaxēxūcēx. ²⁰ Erū chaxoegaāē rū ngēxguma wena pexū íchayadēuxgu, rū ngūrūāchi tama choma chanaxwēxexūācūma ípemaxē, rū ngēmacēx i pema rū tāūtāma chomaā petaāēgū. Rū chaxoegaāē erū ngūrūāchi tá pexū ichayangau na pegūchi ípexaixū, rū pegūarū ngēmaxūcēx pixāūxāchigūxū, rū pegūmaā penuēxū, rū pegūguxicatama íperūxīnūēxū, rū pexoregūtēēxgūxū, rū toguāxū pixuxū, rū pegū picuēxūūgūxū, rū chixexū ípexūexū rū ngēmaācū chixri ípemaxēxū. ²¹ Rū chaxoegaāē rū

ngēxguma wena petanūwa chaxūxgu, rü ngürüāchi Tupana rü pegagu tá choxū naxānexēē. Rū ngürüāchi ngechaū tá choxna pexā, erū muxēma i petanūwa rü marū ñuxgumama pecadu taxūgūecha, rü tama nūxū tarūxoechaū na Tupanapēxewa chixexū taxūgūxū rü nai i ngemaāmare na tamaxēxū rü guxūma i togū i chixexū na taxūgūxū.

13

Pauru nayaxucuxē ga yema yaxōgūxū ga Corītiucūāx rü ñuxūchi nūxū narūmoxē

¹ Ñuxma rü norū tomaēxpūxcūna tá nixī na petanūwa chaxūxū. Rū Tupanaārū ore rü tamaā nūxū nixu rü ngēxguma texé chixexū ūxgu rü taxre rü ēxna tomaēxpūx i duūxūgū nūxū daugūgu rü nūxū yaxugūgu na aixcūma yīxū, rü aixcūma tá poxcu tūmamaā taxuegu ya yīxema chixexū ūxe. ² Rū ngēmacēx i pema i ūpamamatama pecadu ūgūechaxe rü guxāma i pema ya chixri maxēxē, rü ñuxma na woo pexna chayaxūguxū rü wenaxārū pexna nūxū chacuēxāchixēē rü ngēxguma tá ngēma chaxūxgu rü aixcūma tá chanamexēē i guxūma i ngēma chixexū i petanūwa ngēxmaxū, rü tāūtāma chanangupetūxēēmare i ngēma. ³ Rū pema na naxcēx iperūdaunūxū na Cristu chowa idexaxū, rü ngēxguma ngēma chaxūxgu, rü ngēxguma tá nixī i nūxū pedauxū na aixcūma chowa na yadexaxū ya Cristu. Rū nūma ya Cristu rü chowa tá pexū nūxū nadauxēē na tama naturaxū natūrū aixcūma yanguxēēāxū i norū ore rü tūxū napoxcuexū ya yīxema chixexū ūgūxe. ⁴ Rū aixcūma nixī ga Cristu ga ñoma wūxi ga duūxū i turaxūrū nūgū yaxīxēēxū ga yexguma curuchawa yapotagu. Natūrū i ñuxma rü Tupanaārū poragagu namaxū. Rū ngēxgumarū i toma na norū duūxūgū tixīgūxū, rü taturae i toxonewa. Natūrū ngēma na norū duūxūgū tixīgūxū, rü Tupanaārū poragagu tá tamaxē na pexū tarūngūxēēgūxūcēx. ⁵ Rū name nixī i pegūtama pengugū na nūxū pecuāxūcēx ngoxi aixcūma meā peyaxōgū. Rū name nixī i pegū pengugūarū maxūāx rü ngoxi Tupanapēxewa pime. ¿Tama ēxna nūxna pecuēxāchie na Ngechuchu ya Cristu rü pewa nangēxmaxū ega aixcūma peyaxōgūgu? ⁶ Rū chierūna nūxū pecuēxgu na toma rü tama orearū uruūgūnetamare na tixīgūxū. ⁷ Rū Tupanana naxcēx taca na taxūma i chixexū na pexūgūxūcēx. Rū tama duūxūgūpēxewa togū itarūtagūxūcēx nixī na ngēmaācū tayumūxēgūxū. Natūrū Tupanana naxcēx taca i ngēma na aixcūma meā naxcēx pemaxēxūcēx woo duūxūgū nagu rüxīnūēgu na toma rü itatūemarexū. ⁸ Toma rü taxucūrūwama chixri nachiga tidexagū i Tupanaārū ore i aixcūma ixīxū, erū toma rü naētūwa tachogū i ngēma ore. ⁹ Rū tá tataāēgū ega aixcūma peporaegu i perū maxūwa rü ngēmacēx natauxgu i tacūcēx pemaā na taporagaexū. Rū Tupanana tá naxcēx tacaama na pexū naporaexēēxūcēx i perū maxūwa na dūxwa aixcūma mexū i norū duūxūgū na pixīgūxūcēx. ¹⁰ Rū naxūpa na pexū na íchayadauxū nixī i pexcēx chanaxūmatūxū i ñaā popera, na ngēxguma ngēma changuxgu rü nataxuxūcēx i tacūcēx pemaā na chaporagaxū. Erū tórū Cori choxū namu na pexū charūngūxēēxūcēx na yexeraācū meā peyaxōgūxūcēx, rü tama chixexū pemaā na chaxūxūcēx nixī i choxū namuxū. ¹¹ Rū ñuxma na ichayacuēxēēxū i ñaā popera, Pa Chaueneēgūx, rü chanaxwēxe i meā pexū naxūpetū rü naxcēx pedau na ñuxācū aixcūma meā Tupanacēx pemaxēxū. Rū name nixī i pegū petaāēxēēgū rü wūxigu perūxīnūē rü meā yaxna pegūmaā pexīnūē rü

aixcūma pegū pengechaŭgū. Rū nūma ya Tupana ya tūxŭ ngechaŭcū rū tūxŭ rūngŭxmüēxēēcū, rū guxŭgutáma pemaã inarŭxãŭx. ¹² Rū chanaxwèxe i wŭxichigü i pema rū pegū pengechaŭgüãcūma pegū perümoxēgü. ¹³ Rū guxŭma i togü i taeneēgü i yaxōgŭxŭ rū pexŭ narümoxēgü. ¹⁴ Rū ñuxma rū chanaxwèxe i tórü Cori ya Ngechuchu ya Cristu pexŭ narŭngŭxēē, rū Tanatü ya Tupana rū pexŭ nangechaŭ, rū Naãe i Üünexŭ rū guxŭguma pemaã inarŭxãŭx.

Rū nuãma pexna,
Pauru

POPERA GA GÁRATAANEWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxe ga yema yaxögüxü ga Gárataaneärü ñänegüwa yexmagüxü

¹⁻² Pa Toeneëgü i Yaxögüxü i Gárataaneärü ñänegüwa Ngëxmagüxü, choma i Pauru rü namaã i guxüma i taeneëgü i nuã chauxütawa ngëxmagüxü nixi i pexcèx tanaxümatüxü i ñaã popera. Rü choxü nixi ga namugüxü ga Ngechuchu ya Cristu rü Tanatü ya Tupana. Rü aixcüma tama duüxügü nixi ga choxü unetagüxü na chanaxüxcèx i ñaã Tupanaärü puracü. Natürü Tanatü ya Tupana ga Ngechuchuxü írüdaxëécü rü nümatam ya Ngechuchu ya Cristu nixi ga choxü naxunetagüxü. ³ Rü chanaxwèxe i Tanatü ya Tupana rü tórü Cori ya Ngechuchu ya Cristu poraäcü pexü narüngüxëë rü pexü nataäëxëë. ⁴ Rü nüma ga tórü Cori ya Ngechuchu rü nügü inaxã na tórü pecaducèx nayuxüxcèx na nüxna tüxü inanguxüxcèx i guxüma i ñoma i naãneärü chixexü. Rü yemaäcü nanaxü, yerü yema nixi ga Tanatü ya Tupanaärü ngúchaü. ⁵ ¡Namexëchi ya Tupana i guxüguma! Rü ngëmaäcü yü.

Nataxuma i to i ore i tüxü maxëxëëxü

⁶ Rü yema na Cristuaxü pengechaütümüügüxcèx nixi ga pexna naxuxü ya Tupana na penayaxuxüxcèx i maxü i taguma güxü. Rü ñuxma rü poraäcü chañaxiãe, erü paxaxüchi ipenaxügü na Tupanana pixigachixü, na nawe perüxüxcèx i to i ngüxëëtae i nagu perüxüñëgu rü pexü maxëxëëxü. ⁷ Natürü tama aixcüma nangëxma i to i ngüxëëtae i nawa nayaxuxü i maxü i taguma güxü. Natürü nangëxma i ñuxre i duüxügü i pexü naguxchaxëëchaüxü, rü nanaxüchicüügüchaü i ngëma ngüxëëtae i mexü ga pemaã nüxü chixuxü ga Cristuchiga. ⁸ Rü toma rü marü pexna tanaxã ga yema ngüxëëtae i aixcüma ixixü i Ngechuchuchiga. Rü ngëxguma chi texé pexü ngüexëëgu i to i ngüxëëtae, rü name nixi i noxtacüma Tupana tüxü napoxcu. Rü woo choma chixigu, rü éxna tacü rü Tupanaärü orearü ngeruü i daxüçüax yixigu i pexü ngüxëëxü i to i ngüxëëtae, rü name nixi i noxtacüma Tupana tüxü napoxcu. ⁹ Rü ñuxma rü wena pemaã nüxü chixu ga yema noxri pemaã nüxü chixuxü. Rü ngëxguma chi texé pexü ngüexëëgu i wüxi i to i ngüxëëtae i tama yema noxri peyaxuxürüü ixixü, rü name nixi i noxtacüma Tupana tüxü napoxcu. ¹⁰ Rü tama chomaã na petaãëgüxcèx nixi i ngëma ñachaxü. Erü tama naxcèx chadau na duüxügü chomaã taäëgüxü, natürü Tupana chomaã taäëxüxcèx nixi i chadauxü. Erü ngëxguma chi duüxügüxüxicatama chataäëxëëchaügu, rü tãu chima Cristuarü puracütanüxü chixi.

Ñuxäcü Pauruxü nayaxu ga Tupana na norü puracüwa namuãxüxcèx

¹¹ Natürü, Pa Chaueneëgüx, chanaxwèxe i nüxü pecuèx na ñaã ore i mexü i nüxü chixuxü, rü tama duüxügüãëwa yixü na ne naxüxü. ¹² Yerü tama wüxi ga duüxüxütawa naxcèx changux. Natürü Ngechuchu ya Cristutama nixi ga choxü nüxü cuëxëécü. ¹³ Pema rü marü nüxü pexüñëchiga na ñuxäcü chamaxüxü ga üpa ga yexguma Yudiügücümagu chixüxgu. Rü nüxü pexüñëchiga na ñuxäcü poraäcü nawe chingëchigüxü

ga guxūma ga Tupanaārū duūxūgū ga yaxōgūxū rū űuxācū chixri namaā na chaxūpetūxū na yemaācū nūxū nūxū charūxoxēēxūcēx ga yema na Ngechuchuxū yaxōgūāxū. ¹⁴ Rū muxūma ga chautanūxūgū ga Yudiūgū ga choru nayaāxgūraūxūārū yexera nagu chixū ga yema Yudiūgūcūma. Yerū norū yexera meāma chayanguxēē ga nacūmagū ga nuxcūmaūgūxū ga chorū oxigū nagu īxū. ¹⁵⁻¹⁶ Natūrū yexguma tautama chabuxgu, rū woetama Tupana choxū naxuneta na choxū namuxūcēx na chanaxūxūcēx i norū puracū. Rū nūma rū chauxcēx naca na noxrū chixūxūcēx yerū poraācū choxū nangechaū. Rū yexguma Tupana naxwēxegu, rū choxū nūxū nacūxēē ga Nane ya Cristu. Rū yemaācū nanaxū na ngēma duūxūgū i tama Yudiūgū ixīgūxūmaā nūxū chixūxūcēx na űuxācū Ngechuchugagu tūxū nangēxmaxū i maxū i taguma gūxū. Rū yexguma yemaācū Tupana choxū nūxū cuēxēēgu ga Nane, rū taxūenama chayaca. ¹⁷ Rū bai ga Yerucharēūwa na chaxūxū na nūxna chayaçaxūcēx ga yema togū ga ngūxūgū ga nūxīra Tupana imugūxū. Natūrū ga choma rū yexgumatama Arábianaewa chaxū. Rū yemawena, rū Damacuarū īānecēx chataegu. ¹⁸ Rū tomaēxpūx ga taunecūgwena rū dūxwa Yerucharēūwa chaxū na Pedruxū chacūāxūcēx. Rū 15 ga ngunexūtama naxūtawa chayexma. ¹⁹ Rū yēma nūxū chadau ta ga Chaūtiāgu ga tōrū Cori naēneē. Natūrū taxūma ga togū ga ngūxūgū ga tōrū Cori imugūxūxū chadau. ²⁰ Rū Tupana choxū nadau na aixcūma yīxū i ngēma ore i űuxma pexcēx chaxūmatūxū. ²¹ Rū yemawena, rū Chírīaanaewa rū Chirīchiaanaewa chaxū. ²² Natūrū yema taeneēgū ga Cristuaxū yaxōgūxū ga Yudēaanaewa yexmagūxū, rū taguma choxūxūchi nadaugū. ²³ Rū yema nūxū naxīnūxū ga chauchiga rū űaāxīcatama nixī: “Rū ngēma Pauru ga űpa tawe ingēchīgūxū, rū űuxma rū duūxūgūmaā nūxū nixu i Tupanaārū ore i mexū, rū namaā nayaxucuxē na Cristuaxū yaxōgūāxūcēx. Rū ngēmaācū nanaxū i űuxma rū woo ga noxri rū inayanaxoxēēchaū ga yema ore”, űaxū. Rū yexīcatama nixī ga chauchiga ga nūxū naxīnūxū. ²⁴ Rū yexguma ga yema duūxūgū rū Tupanaxū nicūxūūgū nagagu ga yema Tupana chomaā űū.

2

Yema togū ga ngūxūgū ga Tupana imugūxū rū meā Pauruxū nayauxgū

¹ Rū 14 ga taunecūgwena rū wenaxārū Yerucharēūwa chaxū namaā ga Bernabé. Rū Titu rū ta ichayaga. ² Rū yēma chaxū yerū Tupana choxū nūxū nacūxēē ga na nanaxwēxexū na yēma chaxūxū. Rū yēma Yerucharēūwa, rū yema yaxōgūxūārū āēxgacūgūmaāxīcatama changutaquēxe. Rū meāma namaā nūxū chixu ga nachiga ga yema Tupanaārū ore i mexū ga nūxna chaxāxū ga yema duūxūgū i tama Yudiūgū ixīgūxū. Rū yemaācū meāma namaā nūxū chixu na űuxācū na yīxū ga chorū ngūxēētae, yerū tama chanaxwēxe na yīxcūra rū choxū nūxū naxoexū rū ngēmaācū natūcēxmamare na yīxū i ngēma puracū i chaxūxū. ³ Rū yema yaxōgūxū, rū nūmagū rū ta norū me nixī ga yema chorū ngūxēētae. Rū yemacēx rū woo tama Yudiū na yīxū ga Titu rū taguma na ínawiechēxmūpēxechiraūxū, natūrū yema āēxgacūgū rū tama nanamu na ínawiechēxmūpēxechiraūxūcēx. ⁴ Natūrū aixcūma nixī ga űuxre ga taeneēgūneta ixīgūxū ga bexmamare tatanūgu nachocuxū. Rū yemagū nixī ga naxwēxegūxū na inawīchēxmūpēxechiraūxū i ngēma yaxōgūxū i tama Yudiūgū ixīgūxū. Rū űuxma na Ngechuchu ya Cristuarū

duūxūgū ixīgūxū, rü yema taeneēgūneta rü bexma tatanūgu nachocu na tūxū nangugūgūxūcēx na ñuxācū Cristu nūxna tūxū ínguxūxēēxū ga yema mugū ga Moīché ūmatūxū. Yerü nūmagū nanaxwēxegū na wenaxārū nagu ixīxū ga yema mugū ga guxchaxū ga Moīché ūmatūxū. ⁵ Natürü bai ga írarūwa naga na taxīnūēxū ga yema duūxūgū. Yerü tama tanaxwēxegū na texé pexū naxūchicūūxū i ngēma ore i mexū i aixcūma ixīxū i tamaā nūxū ixuxū i ñuxācū tūxū na nangēxmaxū i maxū i taguma gūxū ega Cristuaxū yaxōgūgu. ⁶ Natürü yexguma yema yaxōgūxūārū āēxgacūgū ga Yerucharēūwa yexmagūxū nūxū ñnūēgu ga ñuxācū na yīīxū ga chorū nguxēētae, rü namaā nataāēgū rü taxuūma ga řacu ga togū ga mugū choxna naxāgū na namaā changūexēētaexūcēx. Natürü tama yema na āēxgacūgū yixīgūxūgu charūxīnū, erü nūxū chacuēx na Tupanapēxewa rü guxāma na wūxigūxū. ⁷ Natürü nūmagū ga yema āēxgacūgū, rü nūxū nicuēxāchigū na choxū yīīxū ga namuxū ga Tupana na yema duūxūgū ga tama Yudíugū ixīgūxūmaā nūxū chixuxūcēx ga norū ore i mexū, yexgumarūū ga Pedruxū na namuxūrūū ga Tupana na Yudíugūmaā nūxū yaxuxūcēx ga yema ore. ⁸ Rū gumatama Tupana ga Pedruxū mucū na Yudíugūmaā nūxū na yaxuxū ga ore i mexū, rü gumatama Tupana nixī ga choxū mucū na yema duūxūgū ga tama Yudíugū ixīgūxūmaā nūxū chixuxūcēx ga yema ore. ⁹ Rū yemacēx ga Chaūtiágu rü Pedru rü Cuáū ga yaxōgūxūārū āēxgacūgū, rü nūxū nicuēxāchigū na choxū naxunetaxū ga Tupana na chanaxūxūcēx i ngēma puracū. Rū yemacēx ga yema āēxgacūgū, rü tomēx niyauxāchigū ga choma rü Bernabé na toxū nūxū nadauxēēgūxūcēx na aixcūma namūcūgū tixīgūxū i ngēma puracūwa. Rū nūmagū rü ta norū me nixī na ngēma duūxūgū i tama Yudíugū ixīgūxūtanūwa na tanaxūxū i Tupanaārū puracū rü nūmagū i Yudíugūtanūwa. ¹⁰ Rū toxna naxcēx naca na nūxū tarūngūxēēgūxūcēx ga yema yaxōgūxū ga ngearū díēruāxgūxū. Rū yexicatama nixī ga toxna nūxū nacuēxāchixēēxū. Rū choma rü ta ngēmatama nixī i guxūguma woetama meāma chaxūxū.

Pauru rü Aūtioquíawa Pedruxū naxucuxē

¹¹ Natürü yixcūra ga yexguma Aūtioquíawa naxūxgu ga Pedru, rü noxtacūma nūxū nūxū chaxīnūxēē, yerü tama aixcūma name ga yema naxūxū namaā ga yema yaxōgūxū ga tama Yudíugū ixīgūxū. ¹² Yerü noxri rü yema duūxūgū ga tama Yudíugū ixīgūxūmaā nachibū ga Pedru. Natürü yexguma yéma nangugūgu ga ñuxre ga Yudíugū ga yaxōgūxū ga Chaūtiágu yéma mugūxū, rü Pedru rü marū tama yema duūxūgū ga tama Yudíugū ga yéma ngugūxū ga nagu íxū ga yema nacūma na Tupanacēx ínawiechēxmūpēxechiraūgūxū. ¹³ Rū yema togū ga Yudíugū ga yaxōgūxū, rü yexguma nūxū nadaugūgu ga yema Pedru ūxū, rü nūmagū rü ta nanaxūgū ga yema chixexū rü naxcēx nawoeguchaū ga yema nuxcūmaūgūxū ga nacūmagū. Rū dūxwa ga Bernabé rü ta natanūgu naxā ga yema chixexū ūgūxū. ¹⁴ Natürü yexguma nūxū chadēuxgu na tama Tupanaārū ore i mexū tūxū nguxēēxūācūma na namaxēxū ga yema yatūgū, rü guxū ga yaxōgūxūpēxewa Pedruxū nūxū chaxīnūxēē. Rū ñacharūgū nūxū:

“Rū dūcax i cuma na Yudíuchirēx quiīxū, cuma rü tama aixcūma Yudíugūcūmagu quixū. ¿Rū ñuxācū i ñuxma i cunamuxū na Yudíugūcūmagu naxīxū i ngēma duūxūgū i tama Yudíugū ixīgūxū?” ñacharūgū nūxū.

Yudíugü rü woo ngēma duñxügü i tama Yudíugü ixíngüxü rü norü ògagu nixí i nayauxgüãxü i maxü i taguma gúxü

¹⁵ Rü pemaã nüxü chixu rü toma rü aixcüma torü bucümatama Yudíugü tixígü rü Tupanaxü tacuèxgü. Rü ngēmaãcü tama duñxügü i tama Tupanaxü cuèxgüxü tixígü. ¹⁶ Rü nüxü tacuèxgü rü yema nuxcümañgüxü ga mugü ga Moiché ùmatüxü rü tama tüxü nimexêê i Tupanapêxewa, erü taxucürüwama texé aixcüma naga taxĩnüê i ngēma mugü. Natürü i ñuxma rü Tupana tüxü nadau na imexü ega Ngechuchu ya Cristuaxü yaxògügu. Rü yemacèx ga toma rü ta Ngechuchu ya Cristuaxü tayaxògü na torü ògagu Tupana toxü nadauxü na timexü. Erü nüxü tacuèxgü rü tama ngēma mugügagu nixí na Tupanapêxewa tamexü ya wüxie, erü taxucürüwama texé aixcüma naga taxĩnü i ngēma mugü na ngēmaãcü Tupanapêxewa tamexücèx. ¹⁷ Rü ñuxma i yixema rü Cristuaxü tayaxògü, rü ngēmacèx nixí i Tupanapêxewa imexü. Natürü ngèxguma chi wüxi i ngunexügu rü yixema nagu rüxĩnüêgu rü mugügu na ixíxügagu yixígu na Tupanapêxewa imexü, rü maneca tá nagu tarüxĩnüê na Cristu tüxü pecaduãxèxü. Natürü dücax, rü tama ngēmaãcü nixí erü Cristu rü tagutáma texèxü napecaduãxèê. ¹⁸ Choma rü marü nüxü charüxo na naga charüxĩnüxü na mugügu chixüxügagu Tupanapêxewa chamexü. Natürü ngèxguma chi wenaxârü naxcèx chataegugu i ngēma nuxcümañgüxü i mugü rü chi nüxü charüxoxgu na Cristuaxü chayaxòxü, rü chi aixcüma wüxi i pecaduãxü chixí. ¹⁹ Yerü yexguma yema mugüwa changuxgu, rü düxwa nüxü chicuèxãchi na tama yanguxü ga yema mugü na choxü namexèêxü Tupanapêxewa. Yerü taxucürüwama aixcüma naga chaxĩnü ga guxüma ga yema mugü. Rü ngēmacèx i ñuxma rü Cristuaxü chayaxò na Tupanapêxewa chamexücèx rü naxcèxicatama chamaxüxücèx. Rü Cristu rü curuchagu nayu na iyanaxoxücèx ga nuxcümañxü ga chorü maxü ga choxü yexmaxü ga yexguma yema mugügu chixüxgu. ²⁰ Rü ñuxma rü marü tama chaugümaãtama ichacuèx, natürü Cristu nixí ya chomaã icuácü erü chowa namaxü. Rü ñuxma rü Tupana Nane ya Cristuaxü chayaxòcüma nixí i chamaxüxü i ñoma i naãnewa. Rü nüma nixí ga choxü nangechañxü, rü nügü inaxãxü na chauxcèx nayuxücèx. ²¹ Rü tama nüxü chaxoxchañ i ngēma mexü ga Tupana taxcèx üxü ga yexguma nayuxgu ga Cristu. Yerü yexguma chi yema mugügu ixíxügagu Tupanapêxewa imexgu, rü natücèxmamare chi nixí ga na nayuxü ga Cristu.

3

Ñuxma rü tama ngēma mugügu taxí erü marü Cristuaxü tayaxògü

¹ Pa Chaueneëgü i Gárataneccüãx, pema rü pengèãëgümare. Rü yexguma petanüwa tayexmagügu rü meãma guxãpêxewa pemaã nüxü tixu rü pexcèx tanangoxèê na ñuxácü curuchagu taxcèx nayuxü ga Ngechuchu ya Cristu. ¿Rü texé pexü tawomüxèê i ñuxma na tama naga pexĩnüèxücèx i ngēma ore i aixcüma ixíxü ga pemaã nüxü tixuxü? ² Rü wüxi i oreccèx pexna chaca, rü ¿ñuxácü yíxü ga penayaxuxü ga Tupanaãê i Üünexü? ¿Éxna pexcèx rü yema mugü na pinguxèëgüxügagu yíxü ga penayaxuxü, rü éxna ngēma ore i mexü ga nüxü pexĩnüèxü rü pixògüxügagu yíxü? ³ Pema rü pengèãëgümare rü poraãcü ípetüe. Noxri rü Cristuaxü peyaxògü yerü Tupanaãê i Üünexü pewa napuracü. ¿Rü

ñuxãcü i ñuxma i nagu perũxĩnũẽxũ na wenaxarũ naxcèx pewoeguxũ i ngema nuxcũmaxũxũ i mugũ i taguma maxũ pexna ãxũ? ⁴ Pema rũ poraãcü Tupana pexũ narũngũxẽẽ. Rũ chierũ tama natũcèxmamare yixĩgu ga yema, erũ taxucũrũwama natũcèxmamare nixĩ. ⁵ Rũ yexguma Tupana pexna namuxgu ga Naãẽ i Üünexũ rũ petanũwama naxũãgu ga taxũ ga mexũgũ ga norũ poramaã naxũxũ, rũ Ꞥtacũgagu nixĩ ga naxũãxũ ga yema? ꞤPexcèx rũ mugũ na pinguxẽẽxũgagu yĩxũ ga Tupana naxũxũ ga yema? Tama yemagagu nixĩ. Tupana rũ petanũwama nanaxũ ga yema taxũ ga mexũgũ yerũ nũxũ peyaxogũ ga norũ ore ga nũxũ pexĩnũẽxũ. ⁶ Rũ dücax, pemaã nũxũ chixu rũ name nixĩ i nuxcũmaũcü ga torũ oxĩ ga Abráũrũxũ pixĩgũ. Yerũ Abráũ rũ Tupanaãxũ nayaxõ, rũ yemacèx Tupana nũxũ nadau ga na namexũ. ⁷ Rũ ngẽmawa nũxũ pedau rũ ngẽma duũxũgũ i Tupanaãxũ yaxõgũxũ nixĩ i aixcũma Abráũtanũxũ ixĩgũxũ i Tupanapèxewa. ⁸ Rũ Tupanaãrũ ore i ümatũxũwama rũ nũxũ nixu na ñuxãcü Tupanapèxewa tá na yamexũ i ngẽma duũxũgũ i yaxõgũxũ i woo tama Yudiũgũ ixĩgũxũ. Rũ yemaãcü nũxũ nixu naxũpa ga na nangupetũxũ. Yerũ Tupana rũ nuxcũmamataama Abráũmaã nũxũ nixu ga ñaã ore i mexũ i ñaxũ:

“Rũ cugagu tá nũxũ charũngũxẽẽ i guxũma i nachĩũãnecũãx i duũxũgũ”, ñaxũ. Rũ yemaãcü nũxũ tacuèx rũ Cristu rũ Abráũtaama na yĩxũ. ⁹ Rũ ngẽmacèx i ñuxma rũ Tupana nanayaxu i guxũma i duũxũgũ i yaxõgũxũ, yexgumarũxũ ga Abráũ ga yaxõcũxũ na nayaxuxũrũxũ. ¹⁰ Natũrũ chixexũwama nangẽxmagũ i guxũma i ngẽma duũxũgũ i nagu rũxĩnũẽxũ na mugũ yanguxẽẽgũxũgagu Tupanapèxewa yamexũ. Erũ Tupanaãrũ ore i ümatũxũwama rũ ñanagũrũ:

“Rũ guxũma i duũxũgũ i tama aixcũma yanguxẽẽgũxũ i guxũma i ngẽma mugũ i ümatũxũ, rũ chixexũwama nangẽxmagũ”, ñanagũrũ. Erũ nũxũ tacuèxgũ na taxucũrũwama aixcũma texé yanguxẽẽxũ i guxũma i ngẽma mugũ. ¹¹ Rũ ngẽmaãcü meãma nangox na tama ngẽma mugũ tinguxẽẽxũcèx yĩxũ na texé Tupanapèxewa mexũ. Erũ Tupanaãrũ ore i ümatũxũwama rũ ñanagũrũ:

“Rũ yixema tũmaãrũ õgagu Tupanapèxewa mexẽ, rũ yixema tá tixĩ ya aixcũma tũxũ nangẽxmaxẽ i maxũ i taguma gũxũ”, ñanagũrũ. ¹² Natũrũ ngẽxguma nagu rũxĩnũẽgu na mugũ inguxẽẽxũcèx yĩxũ na Tupanapèxewa imexũ, rũ taxucèx chima tũxcũũ tayaxõgũ. Erũ Tupanaãrũ orewama rũ ngẽmachiga naxũmatũ, rũ ñanagũrũ:

“Rũ yixema aixcũma meãma yanguxẽẽxẽ i guxũma i mugũ, rũ ngẽmagagu tá tũxũ nangẽxma i tũmaãrũ maxũ”, ñanagũrũ. Natũrũ ngẽma mugũ rũ düxwama chixexũwama tũxũ naga erũ taxucũrũwama texé aixcũma meã tayanguxẽẽ. ¹³ Natũrũ ga Cristu rũ nawa tũxũ ñanguxũxẽẽ ga yema mugũ ga chixexũwama tũxũ yexmagũxẽẽxũ. Rũ taxcèx nixĩ ga chixexũwama nayexmaxũ ga yexguma curuchagu nayuxgu. Erũ Tupanaãrũ ore i ümatũxũwama, rũ ñanagũrũ:

“Rũ guxãma ya yixema wũxi i naĩwama tũxũ natuxẽẽgũãcüma yũxe, rũ chixexũwama tangẽxma”, ñanagũrũ. ¹⁴ Rũ yemaãcü curuchagu nayu ga Ngechuchu ya Cristu na nũxũ nangũxẽẽxũcèx i guxũma i ngẽma duũxũgũ i tama Yudiũgũ ixĩgũxũ, yema Tupana Abráũmaã ixunetaxũrũxũ. Rũ taxcèx rũ ta nayu ga Cristu na yixema rũ ta nũxũ yaxõgũxũcèx rũ nayauxgũxũcèx i Tupanaãẽ i Üünexũ i tamaã inaxunetaxũ.

Tupanaārū uneta rū ngēma mugūarū yexera name

¹⁵ Pa Chaueneēgūx, ñuxma rū tá pemaā nūxū chixu i wūxi i cuèxruū na ñuxācū duūxūgū tacū nūgūmaā mexēēxū. Rū dūcax, ngēxguma chi wūxi ya yatū rū texēmaā tacūcēx inaxunetagu rū chi wūxi i poperagu meā naxūmatūāgu i ngēma, rū taxucūruwa texé itayanaxoxēē rū ēxna tanaxūchicūū i ngēma norū uneta. ¹⁶ Rū dūcax, rū yexgumarūūtama nixī ga nangupetūxū ga yexguma Tupana rū Abráūmaā rū Abráūtaamaā inaxunetagu. Rū Tupanaārū ore i ūmatūxūwa rū tama “Abráūtaagū” ñanagūrū, yerū tama muxūma ga duūxūgūchiga nidexa. Natūrū yema ore rū “Abráūtaa” ñanagūrūmare, yerū wūxitama ga duūxūchiga nixī ga yadexaxū. Rū yema rū Cristuchiga nixī. ¹⁷ Rū ngēmaācū pemaā chanangoxēē na Tupana rū Abráūmaā namexēēāxū rū namaā inaxunetaxū na Cristugagu tá yīxū i duūxūgūxū nangūxēēxū. Rū ngēmacēx i ñuxma rū yema Moīché ūmatūxū ga mugū ga 430 ga taunecū yema unetawena ínguxū, rū taxucūruwama inayanaxoxēē ga yema Tupanaārū uneta ga nūxīra Abráūmaā nūxū yaxuxū. Rū ngēmacēx i ñuxma rū ta naporā i ngēma uneta. ¹⁸ Rū ngēxguma chi mugū ínguxēēgūyūgagu yixīgu na Tupana tūxū rūngūxēēxū, rū natūcēxmamare chi nixī ga yema Tupanaārū uneta ga nūxīra Abráūmaā nūxū yaxuxū. Natūrū aixcūma nixī na ngetanūācūma Abráūxū nangūxēēxū ga Tupana, yerū yemaācū marū namaā inaxuneta. ¹⁹ Rū ñuxma rū ꞑtacūwa namexū ga yema mugū ga Moīché ūmatūxū? Rū dūcax, Tupana rū marū Abráūmaā inaxunetaguwena nixī ga duūxūgūna naxāāxū ga yema mugū, na yemaācū duūxūgūxū nūxū nadauxēēxūcēx na ñuxācū porāācū pecadu naxūexū. Rū yemaācū nixī ñuxmata ínangu ga guma Abráūtaa ya Cristu. Rū gumachiga nixī ga Abráūmaā inaxunetaxū ga Tupana ga noxrix. Rū yexguma ínanguxgu ga yema mugū, rū Tupana rū daxūcūāx ga norū orearū ngeruūgūmaāxīra nūxū nixu. Rū yemagū nixī ga nūxī Moīchémaā nūxū ixugūxū, rū nūma ga Moīché rū duūxūgūmaā nūxū nixu. ²⁰ Natūrū yexguma Tupana Abráūmaā ixunetagu, rū nūmaxūchima ga Tupana nixī ga Abráūmaā nūxū yaxuxū ga yema norū uneta. Rū tama togūmaāxīra nūxū nixu na yemagū nūxī Abráūmaā nūxū ixugūexūcēx.

Tacūcēx duūxūgūna nanaxā ga Tupana ga yema mugū

²¹ ꞑRū ñuxū ñapegūxū i ñuxmax? ꞑPexcēx ēxna rū yema Moīché ūmatūxū ga mugū rū inayanaxoxēē i Tupanaārū unetagu? Rū dūcax, tama ngēmaācū nixī. Yerū yexguma chi naporagu ga yema mugū na tūxna naxāāxū i maxū i taguma gūxū, rū chi Tupanapēxewa time i ngēxguma meāma yanguxēēgu. ²² Natūrū tama ngēmaācū nixī. Erū Tupanaārū ore i ūmatūxūwa nūxū tadau na guxūma i duūxūgū rū pecadutūūwa nangēxmagūxū. Rū ngēmacēx i ñuxma rū yīxema Ngechuchu ya Cristuaxū yaxōgūxexicatama tixī ya nayauxgūxe i ngēma maxū i aixcūma mexū i Tupana tamaā ixunetaxū. ²³ Rū yexguma tauta ínanguxgu ga Cristu na nūxū yaxōgūxūcēx, rū mugūtūūwa tayexmagū rū tamaā inacuēx. Rū yemaācū tixīgū rū ñuxmata Tupana taxcēx nangoxēē ga Ngechuchu ya Cristu na nūxū yaxōgūxūcēx. ²⁴ Rū yemaācū ga yema mugū rū tamaā inacuēx ñuxmata Cristuxūtawa tūxū nagagū na nūxū yaxōgūxūcēx rū ngēmaācū Tupanapēxewa imexūcēx. ²⁵ Natūrū i ñuxma na marū nūma nanguxū ya Cristu na nūxū yaxōgūxūcēx, rū marū tama ngēma mugūtūūwa tangēxmagū. Rū ñuxma rū marū taxucēxma tūxcūū tamaā inacuēx i ngēma mugū. ²⁶ Rū ñuxma na Ngechuchu ya Cristuaxū peyaxōgūxū, rū

Tupanaxācūgū pixīgū i guxāma i pemax. ²⁷ Rū ñuxma na Cristuégagu ípebaiūxū, rú Cristuarū pixīgū rú nūma rú pemaā inacuèx na naxrūū pixīgūxūcèx. ²⁸ Rū ñuxma rú Tupanapēxewa rú nūetama nixī ega woo Yudiūgū pixīgūgu rú ēxna tama. Rū nūetama ega woo wūxi i coriarū duūxūgū pixīgūgu rú ēxna taxúxearū duūxūgū pixīgūgu. Rū nūetama ega woo piyatūgu rú ēxna pingexgu. Erū ñuxma na Ngechuchu ya Cristuarū duūxūgū na pixīgūxū, rú wūxitama i duūxū pixīgū i guxāma i pemax. ²⁹ Rū ñuxma na Cristuarū pixīgūxū, rú ngēmacèx waxi nixī na aixcūma Abráūtaagū pixīgūxū. Rū ngēmacèx i pema rú tá ta penayaxu i guxūma ga yema Abráūmaā inaxunetaxū ga Tupana.

4

¹ Rū dūcax, ngēxguma wūxi i buxū yunatūgu, rú ngēma buxū rú tama ngēxgumatama nanayaxu i nanatūarū ngēmaxūgū. Rū woo guxūma i nanatūarū ngēmaxūārū yora yixīgu, natūrū ngēxūrūūxū i nanatūarū puracūtanūxūrūūmare nixī ñuxmata nayèx. ² Rū ngēmacèx nangēxma i ngēma buxūārū dauruū i namaā icuáxū rú nūxū nūxna dauxū i ngēma nanatūarū ngēmaxūgū ñuxmata nawa nangu ya yima taunecū ya noxri nanatū nagu unetacū na ngēma buxū rú nūgūmaā inacuáxūcèx. ³ Rū yexgumarūū nixī ga tamaā nangupetūxū ga noxrix. Yerū yexguma tauta Cristuxū icuèxgu, rú natūūwa tayexmagū ga yema naāēgū i chixexūgū i ñoma i naānemaā icuèxgūxū. ⁴ Natūrū yexguma nawa nanguxgu ga yema ngunexū ga inaxunetaxū ga Tupana, rú nūma nanamu ga Nane. Rū duūxūgūrūū wūxi ga ngewa nabu ga guma Nane. Rū yema Moīché ūmatūxū ga mugūtūūwa nayexma ga yexguma nabuxgu. ⁵ Rū yemaācū nūma nangu ga Tupana Nane na tūxū ínanguxūxēēxūcèx i guxāma i yixema ga noxri mugūtūūwa na iyexmagūxū. Rū yemaācū tūxū narūngūxēē ga nūma ga Tupana Nane na Nanatū ya Tupanamaā tūxū yaxuxūcèx na aixcūma naxācūgūxūchi ixīgūxū. ⁶ Rū Tupana pexna nanamu ga Naāē i Ūūnexū na pexū nūxū nadauxēēxūcèx na aixcūma naxācūgūxūchi pixīgūxū. Rū ngēmacèx i ñuxma rú marū name i “Pa Chaunatūx”, ñaperūgū nūxū ya Tupana. ⁷ Rū ngēmacèx i ñuxma rú Tupanaxācūxūchi quixī, rú tama wūxi i norū duūxūmare quixī. Rū ñuxma na naxācūxūchi quixū, rú norū ngúchaū nixī na cuxna naxāāxū i guxūma i Ꞥacū i noxrū ixīxū.

Pauru rú yema yaxōgūxūcèx naxoegaāē

⁸ Rū ūpa ga yexguma tauta Tupanaxū pecuèxgu, rú perū tupanane-tagūtūūwa peyexmagū rú nūxū picuèxūūgū ga yema tama aixcūma Tupana ixīgūxū. ⁹ Natūrū i ñuxma na Tupanaxū pecuáxū rú nūma rú na pexū nacuáxū, rú Ꞥtūxcūū wena naxcèx pewoeguchaū i ngēma naāēgū i chixexūgū i ñoma i naānemaā icuèxgūxū? ꞤRū tūxcūū penaxwèxe na wena natūūwa pegū pengēxmagūxūxū i ngēma naāēgū i tama aixcūma poraxū i natūcèxmamare ixīgūxū? ¹⁰ Rū dūcax i pemax, rú ñuxma rú ta ngēma nuxcūmaūgūxū i Yudiūgūcūmagu pexīāma woo Cristuaxū na peyaxōgūxū. Erū penaxaure i ñuxre i ngunexūgū rú ñuxre ya tauemacūgū rú ñuxre ya taunecūgū rú ñuxre i petagū, erū nagu perūxīnūē na ngēmaācū Tupanapēxewa tá pimexū. ¹¹ Rū ngēmacèx poraācū chaxoegaāē, erū ngūrūachi natūcèxmamare tá nixī ga yema puracū ga petanūwa chaxūxū. ¹² Pa Bauneneēgūx, pexū chacèèxū na chauxrūū nūxū perūxoexū na nagu pexīxū i ngēma Yudiūgūarū mugū. Erū ñuxma na Cristuwe charūxūxū

rū marū nūxū charūxo na nagu chixūxū ga yema mugū ga ūpa tama naga pexīxū. Rū dūcax, yexguma noxri petanūwa chayexmagu rū tama choxū pexo, rū ngēmacēx chanaxwēxe i űuxma rū ta chauga pexīnūē. ¹³ Rū pema rū marū nūxū pecuēx rū yexguma noxri pemaā nūxū chixuxgu ga Tupanaārū ore i mexū, rū yema na chidaawexūgagu nixī ga petanūgu charūxāūxū rū pemaā nūxū chixuxū ga Tupanaārū ore. ¹⁴ Rū yema daawe ga choxū yexmaxū, rū woo pexcēx rū wūxi ga wēxtūmūū nixī, natūrū tama choxū pexo rū tama choxū ipetēxūchi. Natūrū meāma choxū peyaxgū űoma wūxi ga Tupanaārū orearū ngeruū i daxūcūāx chiīxūrūū. Rū űoma Ngechuchu ya Cristu chiīxūrūū, meāma choxū peyaxgū. ¹⁵ ¿Natūrū tacū ēxna nangupetū namaā ga yema perū taāē ga noxri pexū yexmaxū? Erū pemaā nūxū chixu rū noxri petanūwa chayexmagu rū poraācū chomaā petaāēgū. Rū yexguma chi pexū natauxchagu, rū pemaā nanguxūgu, rū chi pexetū peyaxu na choxna penaxāxūcēx, yerū yemaācū poraācū chomaā petaāēgū ga yexguma. ¹⁶ ¿Natūrū tacū pexū naxūpetū i űuxmax? ¿Pexcēx rū ēxna perū uwanū chixī yerū pemaā nūxū chixu ga Tupanaārū ore i aixcūma ixīxū? ¹⁷ Rū ngēma duūxūgū i pexū ngūxēēxū na Yudūgūcūmagu na pexīxūcēx, rū pegu narūxīnūēneta, tama aixcūma tacū rū mexūcēx nadaugū. Erū nūmagū rū toxna pexū nixīgachixēēchaū na ngēmaācū naga pexīnūēxūcēx. ¹⁸ Rū ngēma togū rū marū name na pegu naxīnūēxū, natūrū nanaxwēxe na perū mexūcēx nadaugūxū i guxūguma. Rū tama name na petanūwa changēxmaguxicatama perū mexūcēx na nadaugūxū i ngēma togū. ¹⁹ Pa Chauxacūgūx, wenaxārū űoma wūxi i mama ngīxācūmaā nguxnecacūrūū poraācū pexcēx ngūxū chinge na aixcūma meā Cristuaxū peyaxōgūxūcēx rū aixcūma naxcēx na pemaxēxūcēx. Rū ngēmaācū tá chixī űuxmatáta Cristu naxwēxexūrūū pixīgū i perū maxūwa. ²⁰ Rū chierū űuxmatama pexūtawa changēxmagu na pemaā chidexaxūchixūcēx, rū tama űuxmarūū pexcēx chanaxūmatūmarexūcēx. Erū űuxma rū tama nūxū chacuēx na tacūgu pemaā charūxīnūxū.

Ore i cuēxruū i Abráūxūtaxū ga Agáchiga rū namēxūchi ga Charachiga

²¹ Rū pema na ngēma Moiché ūmatūxū i mugūtūūwa pegū pengēxmagūxēēchaūxū, rū chanaxwēxe i chomaā nūxū pixu ngoxi aixcūma nūxū pecuá na űuxū űaxū i ngēma mugū. ²² Erū ngēma mugūwa nūxū tadau rū Abráū rū nūxū nayexma ga taxre ga nane. Rū wūxi ga nane rū naxūtaxū ga Agáwa nūxū nayexma, rū naī ga nane rū namēxūchi ga Charawa nūxū nayexma. ²³ Rū guma nane ga naxūtaxūwa nūxū yexmacū, rū nabu yerū yema nixī ga norū ngūchaū ga Abráū. Natūrū guma nane ga namēxūchiwa nūxū yexmacū, rū nabu yerū yemaācū inaxuneta ga Tupana. ²⁴⁻²⁵ Rū pemaā nūxū chixu i ngēma ore erū ngēmawa nangēxma i tacū i aixcūma ixīxū i pexcēx changōxēēchaūxū. Rū yema taxre ga ngexūgū rū taxre i cuēxruūgū nixīgū na ngēmawa nūxū icuáxūcēx na űuxācū Tupana duūxūgūxū rūngūxēēxū na naxūtawa nangugūxūcēx. Rū yema nūxīraūxū ga norū ngūxēē nixī ga yexguma Chinafārū mēxpūnēwa Moichéna naxāāgu ga norū mugū na naga naxīnūēxūcēx ga duūxūgū. Rū yema mugū ga Moichéna naxāxū ga Chinafāwa rū Agá iyixī ga norū cuēxruū. Rū yema nge ga Agá rū naxūtaxū iyixī ga Abráū rū yemacēx ga ngīxācūgū rū ngīxruūtama togūtūūwa nayexmagū rū tama ínanguxū. Rū yemaācū ga yema nge rū wūxi i

cuèxruŭ iyixĩ nachiga i ngēma Yudiŭgü i ñuxma maxèxü rü ngēma mugüwe rüixü. Erü nūmagü rü ñuxma rü ta natüŭwa nangèxmagü i ngēma mugü ga Moiché yaxuxü ga mèxpüne ga Chinaĩ ya Arábiaanewa ngèxmanewa. Rü ñuxma rü ta ngēma mugüga naxĩ rü tama nüxü narüxoe.²⁶⁻²⁸ Natürü yema nge ga Abráŭ namèxüchi rü tama Agárüŭ iyixĩ. Rü ngēne ga Ichaá rü nabu yerü Tupanaãxü nayaxõ ga Abráŭ ga yexguma Tupana namaã nüxü ixuxgu rü tá na nüxü nayexmaxü ga wüxi ga nane. Rü ñuxma Pa Chaueneëgüx, yixema rü ta tayaxõ i ngēma Tupana tamaã ixunetaxü. Rü ngēmacèx i ñuxma rü tama ngēma nuxcūmaŭgüxü i mugütüŭwa tangèxmagü. Rü ngēmaãcü Abráŭ namèxüchixacügürüŭ tixĩgü. Rü ngēmaãcü nüxü tadau na aixcūma Tupana yanguxèèxü i norü ore ga Abráŭ namèxüchichiga ũmatüxü i ñaxü:

“¡Nataãe, Pa Ngecü i Ngexacücü! ¡Rü curü taãemaã rüxáixnaxü woo tagumachirèx na cuxãxãcüxü! Erü tá cuxãxãcü, rü ngēma ngexü i cuxütaxü i cuteaxü äxãcüxüârü yexera tá cuxü nangèxma i cuxacügü”,

ñaxü.²⁹ Natürü guma Abráŭ nane ga naxütaxüwa nüxü yexmacü, rü chixri namaxü namaã ga guma Abráŭ nane ga Tupanaârü unetagagu bucü. Rü ngèxgumarüŭ ta i ñuxma rü yixema i Tupanaãe i Üünexügagu tüxü na nangèxmaxü i maxü, rü chixri tamaã nachopetü i ngēma Yudiŭgü i naxwèxegüxü na nagu ixixü i ngēma mugü ga Moiché ũmatüxü.³⁰ ¿Natürü ñuxü ñaxü i Tupanaârü ore i ũmatüxüwa? Rü dücax, ngēmawa Abráŭmaã nüxü nixu ga na ngixü ínataxüçèx ga naxütaxü ngīnemaã, yerü taxucürüwama yema ngīnemaã nayayauxye ga norü yemaxü ga namèxwaxüchixücü ga naneârü tá ixixü.³¹ Rü ngēmaãcü, Pa Chaueneëgüx, rü nüxü tadau rü tama Abráŭ naxütaxüxãcügürüŭ tixĩgü, erü tama ngēma mugütüŭwa tangèxmagü. Natürü Abráŭ namèxüchixacügürüŭ tixĩgü, erü Tupanaârü unetagagu tüxü nangèxma i törü maxü.

5

Meã pegüna pedaugü na tama wena ngēma mugütüŭwa pengèxmagüxüçèx

¹ Rü ñuxma ya Cristu rü marü tüxü ínanguxüxèè na tama ngēma mugütüŭwa ingèxmagüxüçèx. Rü ngēmacèx name nixĩ i pegüna pedaugü na tama wena natüŭwa pegü pengèxmagüxüçèx i ngēma mugü.² ¡Rü choxü iperüxĩnè! Rü choma i Pauru rü pemaã nüxü chixu, rü ngèxguma chi nagu pexĩxgu na pegü ipewiechèxmüpèxechiraüxü na ngēmaãcü penayaxuxüçèx i perü maxü, rü ngèxguma ya Cristu rü chi taxuwama pexü name.³ Rü wena pemaã nüxü chixu rü ngèxürüŭ i yatü i nügü íwiechèxmüpèxechiraüchaüxü na ngēmaãcü Tupanapèxewa namexüçèx, rü name nixĩ i nüxna nacuèxãchi na taxucürüwa ngēmaãcü na nayauxãxü i norü maxü ega tama aixcūma naga naxĩnügü i guxüma i togü i mugü.⁴ Rü guxãma i pema i nagu rüxĩnüèxè na Tupanapèxewa pimexü ega nagu pexĩxgu i ngēma mugü, rü pemaã nüxü chixu rü marü Cristuna pixĩgachi i ngèxgumax. Rü ngèxgumarüŭ ta pegü nüxna peyaxüxèè i ngēma ngechaü ga noxri Tupana namaã pexü ngechaüxü.⁵ Natürü Tupanaãe i Üünexü nixĩ i tüxü rüngüxèèxü na yaxõgüxüçèx. Rü ngēmacèx nixĩ i ínanguxèèxü na Cristugagu Tupanapèxewa imexü.⁶ Rü ngēmacèx i ñuxma na Ngechuchu ya Cristuarü duüxügü ixĩgüxü, rü nüetama

nixī ega woo íwíechèxmüpèxechiraũgu rü éxna tama, erü tama ngēma nixī i Tupanapèxewa tũxũ mexèèxũ. Rũ ngēma Tupana naxwèxexũ i ñuxma nixī na aixcũma yaxõgũxũ rü ngēmaãcü yigü na ingechaũgũxũ. ⁷ Pema rü meãma ipenaxũgü na Cristuwe perũxĩxũ. ¿Rũ texé éxna pexũ nüxũ taxoox na tama naga pexĩnüèxũcèx i norü ore i aixcũma ixĩxũ? ⁸ Rũ pemaã nüxũ chixu, rü tama Tupana ga noxri pexcèx çacü nixī ya yima pexũ nüxũ oócü. ⁹ Rũ name nixī i nüxna pecuèxãchie rü wüxitama i duũxũ i chixexũ üxũ, rü nanachixexèè i guxũma i togü i natanũxũgü, ñoma wüxi i íraxũ i pãũãrũ puxèèruũ rü wüxi i taxũ i pãũchara ipuxèèxũrũ nixī. ¹⁰ Choma rü chayaxõ na tórü Cori tá pexũ rüngũxèèxũ na choma nagu charũxĩnũxũrũ nagu perũxĩnüèxũcèx. Natürü Tupana tá nanapoxcu i ngēma duũxũ i pexũ chixèãèxèèxũ, rü nüetama nixī ega woo texé tixĩgu. ¹¹ Rũ nümaxũ i duũxũgü rü chauchiga nidexagü, rü nüxũ nixugüe na choma rü duũxũgũxũ changúexèèxũ na nügü ínawĩchèxmüpèxechiraũxũcèx rü mugü na yanguxèègũxũcèx na ngēmaãcü nüxũ nangèxmaxũcèx i maxũ i taguma gũxũ. Natürü, Pa Chaueneègũx, rü ngèxguma chi ngēmaãcü duũxũgũxũ changúexèègü, rü tãu chima chowe ningèxũtanü i Yudiũgü, erü tãu chima naãewa nangux i ngēma ore i nüxũ chixuxũ nachiga ya Cristu ga curuchagu taxcèx yucü. ¹² Natürü ngēma duũxũgü i pexũ chixèãègũxũ rü pexũ ucũxègũxũ na pegü ípewĩchèxmüpèxechiraũxũcèx, rü ¿tüxcüũ éxna i nümagü i tãu noxtacũma nügü yacaugüpũxũcharexegũxũ ta? ¹³ Natürü pemax, Pa Chaueneègũx, rü Tupana pexcèx naca na ngēma mugüna ípenguxũxũcèx. Natürü ñuxma na nüxna ípenguxũxũ, rü tama name i ngēmacèx pexeneãrũ ngúchaũ pexũgü. Natürü name nixī na pegü pengechaũgũxũ rü ngēmaãcü pegü perüngũxèègũxũ i wüxichigü. ¹⁴ Erü guxũma i Tupanaãrũ mugü rü wüxi i muwatama nangox rü ñanagürü: “¿Rũ nüxũ nangechaũ i cumücü na cugütama cungechaũxũrũ!” ñanagürü. ¹⁵ Natürü name nixī i pexuãègü erü ngèxguma chi pegümaã penuègu rü pegüchi pexaiegu, rü ngürüãchi tá pegü pewoone rü tá ípeyanaxoxèè i Tupanaãrũ ore i pewa ngèxmaxũ.

Ngēma taxũneãrũ ngúchaũ rü tama Tupanaãè i Üünexũãrũ ngúchaũmaã nawũxigu

¹⁶ Pemaã nüxũ chixu, rü name nixī i Tupanaãè i Üünexũ naxwèxexũãcũma pemaxè. Rũ ngèxguma ngēmaãcü pemaxègu, rü tãütama pexeneãrũ ngúchaũ pexũgü. ¹⁷ Erü ngēma taxũneãrũ ngúchaũ rü tama Tupanaãè i Üünexũãrũ ngúchaũmaã nawũxigu. Rũ ngēma Tupanaãxè i Üünexũãrũ ngúchaũ rü tama taxũneãrũ ngúchaũmaã nawũxigu. Erü ngēma taxre i ngúchaũgü, rü nügüchi naxaie erü wüxichigü i ngēma rü tamaã inacuãxchaũ. Rũ ngēmacèx i pema rü taxucürüwa penaxü i ngēma pematama penaxwèxexũ. ¹⁸ Natürü ngèxguma Tupanaãè i Üünexũ pemaã icuèxgux, rü marü tama ngēma nuxcũmaũgũxũ i mugütũtwa pengèxmagü. ¹⁹ Rũ meãma nangox na ñuxãcü namaxèxũ i ngēma duũxũgü i naxũneãrũ ngúchaũ ügũxũ, rü naĩ i ngemaã maxèxũ, rü airugürũmare ixĩgũxũ. Rũ tama naxãneè na çacü rü chixexũ naxũgũxũ. ²⁰ Rũ tupanenetachicünèxãgũxũ nicuèxũũgü, rü nayuue rü nangõxwèxegü, rü aigu narũxĩnüè, rü nachoxũgawèxegü, rü togüchi naxaie norü ngèmaxũgücèx, rü nanuxwèxegü, rü duũxũgũxũ naxucuxègü na to i nguxèètaegu naxĩxũcèx, rü ngēmaãcü nayatoye i duũxũgü na tama

wūxigu naxīnūēxūcèx. ²¹ Rū togūarū ngēmāxūgūcèx nixāūxāchigū, rū nangāxēwèxegū, rū peta naxūgūecha, rū nanaxūgū i muxūma i togū i chixexūgū i ngēxgumarūū ixīxū. Rū ngēmācèx, wena pemaā nūxū chixu rū guxūma i ngēma duūxūgū i ngēmaācū maxèxū, rū nataxūtāma i nachica i ngextá Tupana āēxgacū iyīxūtwa. ²² Natūrū ngēxguma Tupanaāē i Ūūnexū tamaā icuèxgu, rū nūma nixī i tūxū nangūxēēxū na yigū ingechaūgūxūcèx, rū itaāēgūxūcèx, rū meā yigūmaā imaxèxūcèx, rū yaxna namaā ixīnūēxūcèx i togū, rū togūmaā imecūmagūxūcèx, rū togūxū rüngūxēēgūxūcèx, rū aixcūma yanguxēēxūcèx i ngēma nūxū ixuxū. ²³ Rū ngēxgumarūū ta Naāē i Ūūnexū tūxū narüngūxēē na tama chixexūmaā nataeguxēēxūcèx ega togū chixexū tamaā ūxgux. Rū tūxū narüngūxēē na meāma yigūnatama idauxūcèx na tama chixexūgu iyixūcèx. Rū nataxuma i mugū i nachuxuxū na naxūxū i ngēma mexūgū. ²⁴ Rū ngēma duūxūgū i aixcūma Ngechuchu ya Cristuarū duūxūgū ixīgūxū, rū marū nūxū narūxoe ga yema nuxcūmaūxū ga norū maxū ga chixexū, rū yema naxūneārū ngūchaūgū ga chixexū, rū guxūma ga ūacū ga to ga ngūchaū ga tama mexū. ²⁵ Rū űuxma na Tupanaāē i Ūūnexū tūxna naxāxū i tórū maxū, rū name nixī i nūma tórū maxūmaā na inacuaūxū. ²⁶ Rū tama name i yigū itarūta rū togūmaā tanuaē, rū bai na ūacūcèx ixāūxāchixū.

6

Name nixī i guxāma i pema rū pegū perüngūxēēgū i wūxichigū

¹ Pa Chaueneēgūx, ngēxguma chi texéxū pedèuxgu na ūacū rū chixexūgu tanguxū, rū pema na Tupanaāē i Ūūnexū naxwèxexūācūma na pemaxèxū, rū name nixī i tūxū pengechaūācūma tūxū perüngūxēē na itayarūwèxāchixūcèx. ¡Natūrū pexuaēgū i wūxichigū, na tama pema rū ta nāgu peyixūcèx i ngēma chixexū! ² ¡Rū pegū perüngūxēēgū i ngēxguma texé petanūwa guxchaxūgū tūxū ngēxmagu! Erū ngēxguma ngēmaācū pegū perüngūxēēgū, rū ngēmaācū tá peyanguxēē i ngēma Cristu pexū muxū. ³ Rū ngēxguma texé nāgu rūxīnūgu na wūxi i ūacū tixīxū, rū tūgūtama tawomūxēē, erū Tupanapēxewa rū taxuūmachirēx tixī. ⁴ Rū ngēmācèx i wūxichigū, rū name nixī i tūgūarū maxūtama tangugū. Rū ngēxguma namexgu i tūmaārū maxū, rū tūgūmaā tátama tataāē, rū taxucèxma tūxcūū togūarū maxūwa tūgū tangugūarū maxūāx. ⁵ Erū tanaxwèxe ya wūxichigū na tūmaārū maxūnatama tadauxū i Tupanapēxewa. ⁶ Rū yíxema nayaxuxe i nguxēētae i Tupanaārū orewa rū name nixī na tūmaārū nguxēēruūmaā tangauxū i gúxū i tūmaārū ngēmāxūgū. ⁷ ¡Rū pexuaēgū na tama ípetūexūcèx i perū maxūwa! Erū taxucūrūwa texé Tupanaxū tawomūxēē. Rū yíxema chixexū ūxe, rū chixexū tá tayaxu. Rū yíxema mexū ūxe, rū mexū tá nixī i tayaxuxū. ⁸ Rū yíxema tūmaxūneārū ngūchaū ūxe, rū ngēma tūmaxūneārū ngūchaū rū tá yuwa tūxū nāga. Natūrū yíxema Tupanaāē i Ūūnexūārū ngūchaū ūxe, rū ngēma Tupanaāē i Ūūnexūwa tá tanayaxu i maxū i taguma gúxū. ⁹ Rū ngēmācèx tama name na nūxū rüchauexū na mexū ixūexū. Erū ngēxguma chi tama nūxū rüchaeugu, rū dūxwa mexū tá tayaxu i Tupanaxūtawa. ¹⁰ Rū ngēmācèx ngēxguma tūxū nangēxmagu na ūacūmaā togūxū rüngūxēēxū, rū name nixī i guxāxūma tarüngūxēē. Natūrū yexera tanaxwèxegū na nūxū rüngūxēēgūxū i ngēma taeneēgū rū taeyèxgū i yaxōgūxū.

Pauru rü nüxü narümoxē ga yema yaxōgüxü, rü nayaxucuxēgü

¹¹ Rü nuã tá ichanaxügü na chomaxüchima choxmēxmaã pexcèx chanaxümatüxü i ñaã popera. ¡Rü dücax, nüxü pedèux i ngēma choma chaxümatüxü na ñuxácü natamatüxü! ¹² Rü ngēma Yudiügü i pexü ngüexèxü na pegü ípewiechèxmüpèxechiraügüxcèx, rü ngēmaãcü pexü namu erü nanataãxègüchaü i ngēma togü i Yudiügü na tama naxchi naxaixüxcèx nagagu na Ngechuchu ya Cristu ga curuchagu yucüaxü na yaxōgüãxü. ¹³ Erü woo i nümagü na ínawiüchèxmüpèxechiraüxü, rü tama nayanguxèē i guxüma i mugü. Natürü nümagü rü nanaxwèxegü na pegü ípewiüchèxmüpèxechiraüxü, na yixcama nügü yacuèxüügüxcèx rü togü i Yudiügümaã nüxü na yaxuxüxcèx na pema rü ta naxrüü nagu pexüxü i ngēma nuxcümaügüxü i mugü. ¹⁴ Natürü i choma rü chaugü chicuèxüü erü nüxü chayaxō ya tórü Cori ya Ngechuchu ya Cristu ga curuchagu yucü. Rü ngēmacèxicatama nixí i chaugü chicuèxüüxü. Rü ñuxma na Cristu ga curuchagu yucüaxü chayaxōxü, rü marü tama nagu charüxinü i ñoma i naãne rü norü ngēmaxügü. Rü ngēxgumarüü ta i ñoma i naãne rü marü tama choxü nacuáxchaü. ¹⁵ Erü ngēxguma Ngechuchu ya Cristuarü duüxügü ixigügu, rü Tupanapèxewa rü taxuüma nixí i ngēma na íwiechèxmüpèxechiraüxü rü èxna tama. Natürü ngēma aixcüma napèxewa mexü nixí na naxüchicüüxü i tórü maxü na ngexwacaxüxü i duüxügü ixigüxcèx. ¹⁶ Rü Tupanana naxcèx chaca na pexü nataãxègüxcèx rü nüxü pengechaütümüügüxcèx i guxāma i pema i aixcüma yanguxègüxe i ngēma pemaã nüxü chixuxü, rü guxāma ya yíxema aixcüma Tupanaärü duüxügü ixigüxe. ¹⁷ Rü ñuxmawena rü tama chanaxwèxe na texé tacü rü guxchaxügü choxna äxü. Erü choma rü aixcüma tórü Cori ya Ngechucharü duüxü chixí. Rü ngēma chorü oxrigüchica i chowa ngēxmagüxüwa nüxü pecuèx na aixcüma yíxü i ngēma. ¹⁸ Pa Chaueneëgüx, chanaxwèxe i tórü Cori ya Ngechuchu ya Cristu pexü narüngüxèē i guxāma i pemax. Rü ngēmaãcü yíi.

Rü nuãma pexna,
Pauru

POPERA GA EPÉČIUWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxë ga yema yaxögüxü ga Epéchiuarü ñānewa yexmagüxü

¹ Pa Chaueneëgü ya Epéchiuwa Ngëxmagüxe, choma i Pauru nixi i pexcëx chanaxümatüxü i ñāā popera. Rü choma i Pauru chixi i Tupana choxü yaxuxü na Ngechuchu ya Cristu choxü muxüçëx na duüxügümaā nüxü chixuxüçëx i norü ore. Rü pexcëx chanaxümatü i guxāma i pema ya Epéchiuarü ñānewa ngëxmagüxe rü Tupanaārü duüxügü ixīgüxe rü Ngechuchu ya Cristuaxü yaxögüxe. ² Rü chanaxwëxe i pexü narüngüxëë rü pexü nataāxëë ya Tanatü ya Tupana rü tórü Cori ya Ngechuchu ya Cristu.

Tupana rü poraäcü tüxü narüngüxëë erü Cristuarü duüxügü tixigü

³ Rü name nixi i nüxü ticüxüügü ya Tanatü ya Tupana ya tórü Cori ya Ngechuchu ya Cristunatü ixïcü. Erü nüma ya Tupana rü Cristugagu tüxna nanaxā i naguxüraüxü i ngüxëëgü i üünexü i dauxüguxü i naanewa taxcëx ne namugüxü. ⁴⁻⁵ Rü tautama naāne üxgu, rü Cristugagu Tupana tüxü nade na napëxewa ixüünegüxüçëx rü na nataxüçëx i tórü chixexü i napëxewa. Rü Tupana rü poraäcü tüxü nangechaü. Rü yemacëx nuxcümamatama tüxü naxuneta na naxäcügüxü tüxü nadexüçëx Ngechuchugagu. Rü yemaäcü nanaxü yerü yema nixi ga norü ngüchaü. ⁶ Rü ngëmacëx name nixi i guxüguma nüxü ticüxüügü ya Tupana. Erü nüma rü poraäcüxüchima tamaā namecüma rü poraäcü tüxü narüngüxëë ga yexguma taxcëx núma namuāxgu ga Nane ya nüxü nangechaüxüchicü. ⁷ Rü Tupana rü poraäcü tüxü nangechaü, rü yemacëx nanamu ga Nane na taxcëx nayuxü rü nagü inabaxü na yemaäcü tüxü inanguxüxëëçëx rü tüxü nüxü nangechaüxüçëx ga tórü pecadugü. ⁸ Rü Tupana tüxü nüxü nadauxëë na ñuxäcü poraäcü tüxü nangechaüxü ga yexguma tüxna naxāāxgu ga guxüma ga tórü cuëx na taāxëxü icuāxüçëx rü tüxü natauxchaxüçëx i norü ore. ⁹ Rü tüxü nüxü nacüxëë ga norü ngüchaü ga noxri nüxicatama nüxü nacuāxü. Rü yema norü ngüchaü ga nuxcümamaxüchima Cristumaā nagu naxinüxü ga Tupana, rü yema nixi ga ñoma ga naānewa na namuāxü na tüxü yamaxëxëxüçëx. ¹⁰ Rü yema nagu naxinüxü nixi na Cristumëxëwa nangëxmaxëëāxü i guxüma i daxüguxü i naānewa ngëxmaxü rü guxüma i ñoma i naānewa ngëxmaxü. Rü ngëmaäcü tá nanaxü ya Tupana i ngëxguma nawa nanguxgu na yanguxëëāxü. ¹¹ Yerü naxüpa ga ñoma ga naane naxüxü ga Tupana, rü woetama tomaā nanaxuegu na Cristugagu tanayauxgüxüçëx i ngëma maxü i taguma gúxü i nüma toxna naxāxchaüxü na aixcüma naxcëx tamaxëxüçëx. Rü aixcüma yemaäcü nanaxü yerü yema nixi ga norü ngüchaü ga Tupana ya guxüma ücü, ngëma nüma nagu naxinüxüäcüma. ¹² Rü yemaäcü Tupana tomaā nanaxuegu na toma i toxira Cristuaxü yaxögüxe naxcëx tamaxëxüçëx rü nüxü ticüxüügüxüçëx naxcëx i norü pora i üünexü. ¹³ Rü yexgumarü ta ga pema i Epéchiuüāxgü, rü yexguma nüxü pexinüëgu ga yema ore i aixcüma ixixü i tüxü maxëxëxü, rü yexguma Cristuaxü peyaxögügu,

rü namücügü pixĩgü. Rü Tupana ga tamaã ixunetacü na tüxna namuãxücèx i Naãe i Üünexũ, rü marü pexna nanamu i ngẽma Naãe na nüxũ pecuáxücèx na aixcüma norü duũxũgü pixĩgũxũ. ¹⁴ Rü ngema Naãe i Üünexũ ga Tupana tüxna muxũ, rü ngemaawa nixĩ i nüxũ icuáxũ na aixcüma Tupana tá tüxna naxãxũ i guxũma i ngema tamaã inaxunetaxũ. Rü ngẽxguma wena núma naxũxgu ya Cristu na nügũxũtawa tüxũ nagagũxũcèx rü aixcüma tá tanayaxu i guxũma i ngema Tupana tomaã nüxũ ixuxü. Rü ngẽmacèx name nixĩ na nüxũ icuèxũtũgũxũ ya Tanatü ya Tupana ya üxü necü.

Pauru rü yaxõgũxũcèx nayumüxẽ.

¹⁵⁻¹⁶ Rü ngẽmacèx, ñuxma na nüxũ chacuáxũ na aixcüma tórü Cori ya Ngechuchuxũ peyaxõgũxũ rü na aixcüma nüxũ pengechaũgũxũ i guxũma i ngẽma togü i Tupanaãrũ ixĩgũxũ, rü ngẽmacèx taguma nüxũ charũchau na pexcèx moxè nüxna chaxãxũ rü pexna chacuèxãchixũ i chorü yumüxẽwa. ¹⁷ Rü ngẽxguma namaã chideaxgu ya Tanatü ya Tupana ya mexèchicü ya Nanatü ya tórü Cori ya Ngechuchu ya Cristu, rü naxcèx nüxna chaca na pexna naxããxücèx i ngẽma cuèx i Naãe i Üünexũwa ne üxũ. Rü ngẽma Naãe i Üünexũ tá nixĩ i pexcèx nangoxèẽxũ i Tupanaãrũ ore i mexũ na yexeraãcü nüxũ pecuáxücèx ya Tupana. ¹⁸ Rü Tupanana naxcèx chaca na nümatama pexũ yangoxnaãèxèxũcèx, na nüxũ pecuáxücèx na tacü yĩxũ i ngẽma ipenanguxèẽxũ i naxcèx pexũ nadexũ. Rü nüxna naxcèx chaca na pexũ nüxũ nacuèxèẽxũcèx na ñuxãcü namexèchixũ i ngẽma maxũ i taguma gúxũ i nüma norü duũxũgücèx namexèẽxũ i daxũguxũ i naãnewa. ¹⁹⁻²⁰ Rü ngẽxgumarũ ta rü nüxna naxcèx chaca na pexũ nüxũ nacuèxèẽxũcèx na ñuxãcü nataxũchixũ i norü pora i tawa ngẽxmaxũ rü namaã tüxũ nangũxèẽxũ i yixema na yaxõgũxũ. Rü ngẽmatama pora i taxũmaã nixĩ ga napuracũxũ ga Tupana ga yexguma yuwa Cristuxũ inadxèẽgu rü daxũguxũ ga naãnewa nagaãxgu rü nügũaru tügü necüwawa yanatoxèẽãgu na guxããrũ ãẽxgacü yĩixũcèx. ²¹ Rü yemaãcü guxũtũwama nanayexmaxèẽ. Rü ngẽmacèx i ñuxma rü Cristumèxèwã nangèxmagü i guxũma i daxũguxũ i naãnecũãx i ãẽxgacügü rü guxũma i ñoma i naãnecũãx i ãẽxgacügü. Rü ngẽmaãcü naxmèxwã nangèxmagü i guxũma i pora i ñuxma ngẽxmagũxũ rü guxũma i pora i tá ngẽxmagũxũ. Rü ngẽmaãcü i nüma rü guxũ i ãẽxgacügũarũ ãẽxgacü tá nixĩ i guxũguma. ²² Rü yemaãcü ga Tupana rü marü Cristumèxèwã nanayexmagũxèẽ ga guxũma. Rü yexgumarũ ta Cristuxũ ningucuchixèẽ na guxũma i yaxõgũxũẽru na yĩixũcèx. ²³ Rü ñuxma rü guxũma i yaxõgũxũ rü wũxigu Cristuarũ nixĩgü. Rü nüma nixĩ i tawa nangèxmaxũ i guxãma i yixema i nüxũ na yaxõgũxũ. Rü ngẽxgumarũ ta nüma nixĩ i nangèxmaxèẽãxũ i guxũma i tacü i ngẽxmaxũ i guxũwama.

2

Tamaxè erü Tupana tüxũ nangechaũ

¹ Rü ũpa ga pema rü perü pecadugagu rü perü chixexũgagu ñoma peyuexũrũ pixĩgü. ² Yerü ga pema rü nagu pexĩ ga yema chixexũ i ñoma i naãnecũãx i duũxũgü nagu ixũ. Rü pema rü naga pexĩnũẽ ga Chataná i ngoxogũarũ ãẽxgacü ixĩxũ. Rü nüma nixĩ i nüxũ nangũchaũxèẽãxũ na chixexũ naxũgũxũcèx i guxũma i ngẽma duũxũgü i tama Tupanaga ñnũèxũ. ³ Rü guxãma ga yixema rü yemaãcü chixri tamaxè ga ũpa. Rü

tanaxü ga tóxrütama ngúchaŭ, rü nagu taxĩ ga yema taxüne naxwèxexü rü yema taã naxwèxexü. Rü yemagagu yema togü ga duüxügü ga chixexü ügüxürüü nawa taxügü i ngëma poxcu i äücümaxüchixü i Tupana mexëëxü. ⁴ Natürü ga Tupana rü poraäcü nüxü tangechaütümüügü rü poraäcü tüxü nangechaŭ. ⁵ Rü yemacèx, woo tórü pepadugagu ñoma iyuexürüü tixīgü, natürü ga Tupana rü tüxna nanaxã ga maxü ga yexguma Cristuxü ínadaxëëgu. Rü ñuxma rü pexü nangëxma i maxü i taguma gúxü, erü Tupana pemaã namecüma. ⁶ Rü yema na Ngechuchu ya Cristuxü wena namaxëëxürüü rü tüxü rü ta namaxëxëë ga Tupana. Rü yemaäcü nanaxü na yixema rü ta Cristumücügü ixīgüxücèx, rü namaã äëxgacügü ixīgüxücèx i daxügüxü i nañewa. ⁷ Rü yemaäcü nanaxü ga Tupana na guxügutáma duüxügüxü nawéaxüçèx na ñuxäcü Cristugagu poraäcü tüxü nangechaŭxü rü tamaã namecümaxü. ⁸ Rü yemaäcü pemaã namecüma ga Tupana. Rü yemacèx penayaxu ga maxü i taguma gúxü yerü peyaxögü. Rü ngëma maxü rü taxucürüwama pegünatama penaxã, natürü Tupana nixĩ ga pexna naxãmarecü ga yema. ⁹ Rü tama ñacü i mexü i pexüxügagu nixĩ i pexü nangëxmaxü i ngëma maxü, natürü Tupana nixĩ ya pexna naxãmarecü na ngëmaäcü taxüema tügü icuèxüxücèx. ¹⁰ Rü Tupana nixĩ ga tüxü maxëxëëcü. Rü ñuxma rü tüxü nangëxma i ngëma maxü yerü Ngechuchu ya Cristu tórü pepaducèx nayu. Rü Tupana tüxna nanaxã i ngëma maxü na meã imaxëxücèx rü mexü ixügüxücèx. Rü yemaäcü tüxü narüngüxëë ga Tupana yerü woetama nuxcümaxüchima marü yemagu narüxnü.

Cristu nixĩ ya yigümaã tüxü rüngüxmüëxëëcü

¹¹⁻¹² Rü ngëmacèx i pema na tama Yudíugü pixīgüxü, rü name nixĩ i nüxna pecuèxãchie na tama toxrüü na pixīgüxü ga noxri rü tama Tupanaxü na pecuèxgüxü. Rü yema na tama toxrüü pixīgüxü rü yemacèx ga toma ga Yudíugü i togü na ítawiechëxmüpëxechiraügüxü, rü nüxü tixugüe na pema rü tama Tupanapëxewa na pimexü yerü tama toxrüü pegü ípewiechëxmüpëxechiraügü. Rü yexguma ga pema rü tama Cristuxü pecuèxgü, yerü tama Tupanaärü duüxügü i Yudíugütanüxü pixīgü. Rü tama nüxü pecuèxgü ga Tupana núma na namuxü ga Nane na duüxügüarü pepaducèx nayuxücèx na nüxna naxãxücèx i maxü i taguma gúxü. Rü woo ga yema mexügü ga Yudíugümaã inaxunetaxü ga Tupana, rü taxucürüwa penayaxu. Yerü ñoma ga nañewa rü pemaxëmare, rü tama nüxü pecuèx ga ñacü chi pexü na üpetüxü ga yexguma chi peyuegu yerü tama Tupanaxü pecuèx. ¹³ Natürü woo ga noxri rü tama Tupanaxü na pecuáxü, natürü i ñuxma rü nügüxütawa pexü nagagü. Rü Ngechuchu ya Cristuarü duüxügü pixīgü yerü pexcèx nayu rü nagü inanaba. ¹⁴⁻¹⁵ Rü ñuxma rü Cristu nixĩ ya tüxü rüngüxmüëxëëcü. Rü noxri ga toma ga Yudíugü rü pexchi taxaie yerü tama toxrüü Yudíugü pixīgü. Natürü i ñuxma rü Cristu marü yigümaã tüxü narüngüxmüëxëë. Rü yemaäcü wüxitama i duüxügüxü tüxü nixīgüxëë rü inayanaxoxëë na yigüarü uwanü ixīgüxü. Rü yexguma nayuxgu ga Cristu rü tüxü ínangüxüxëë na tama natüüwa iyexmagüxücèx ga yema nuxcümaügüxü ga mugü ga toma ga Yudíugü nagu taxĩxü. Rü wüxitama i duüxügü i ngexwacaxüxü tüxü nixīgüxëë i toma i Yudíugü na tixīgüxü rü pema i tama Yudíugü na pixīgüxü. Rü yemaäcü nanaxü na guxãma i yixema rü norü duüxügü na ixīgüxücèx. Rü yemaäcü yigümaã tüxü

inarüngüxmüëxëë. ¹⁶ Rū yexguma curuchagu nayuxgu ga Cristu, rū in-ayanaxoxëë ga yigüchi na ixaieñü. Rū yemaäcü ga Cristu rū Tupanamaã tüxü inarüngüx-müëxëë, rū wüxitama i duñxügüxü tüxü nixigüxëë. ¹⁷ Rū yexguma Cristu nūma ũxgu, rū taxcëx nūma nanange ga ore ga mexü ga marü yigümaã rū Tupanamaã na rüngüxmüëxü. Rū yema ore rū toxcëx nixi i toma i Yudíugü ga toxira Tupanaxü na tacuáxü. Rū yema ore rū pexcëx rū ta nixi ga woo tama Tupanaxü na pecuëxgüxü ga noxrix. ¹⁸ Rū ñuxma rū guxāma i yixema rū Cristugagu tüxü natauxcha na Tanatü ya Tupanana ingaicamagüxü. Rū ngëmatama Naãë i Üünexü nixi i tüxü rüngüxëëxü na nuxna ingaicamagüxücëx ya Tanatü ya Tupana. ¹⁹ Rū ngëmacëx i pema rū woo tama Tupanaxü pecuëxgü ga noxrix, rū woo tama norü duñxügü pixigü ga yexguma, natürü tama ngëmaäcü pixigü i ñuxmax. Erü ñuxma rū natanüxü pixigü i guxüma i ngëma duñxügü i Tupanaärü ixigüxü. Rū aixcüma Tupanaxäcügüxüchi pixigü i ñuxmax. ²⁰⁻²² Guxāma i pema rū wüxi ya İpata ya mexüne ya Tupana nawa maxüne pixigü. Rū ngëma cementu i ladriyu naetügu nugüxü, rū ngëma rū Tupanaärü ngüexügü ga imugüxü rū norü orearü uruügü nixi. Rū yima ladriyu ya nuxirama cementuëtüwa ixücuchicü rū Cristu nixi. Rū ngema inanaxügü na naxüäxü ya guxünema ya yima i. Rū düxwa ningü na wüxi ya tupauca ya taxüne ya Cristugagu üünene na yiñxü. Rū ngëmaäcü i pema na Cristuarü pixigüxü rū wüxigu tomaã peyanguxëë ya wüxi ya tupauca ya taxüne i ngextá Tupanaãë i Üünexü ímaxüñüwa.

3

Tupana rū Pauruxü namu na ore i mexüxü yaxuxü namaã ga yema duñxügü ga tama Yudíugü ixigüxü

¹ Rū ñuxma na yemaäcü Tupana pexü rüngüxëëxü, rū choma i Pauru rū pexcëx chayumüxë. Rū pemaã nüxü chixu rū nūma poxcupatañüwa changëxma erü Ngechuchu ya Cristuarü duñxü chixi. Rū nuxma chapoxcu erü guxüwama nüxü chixuchiga na pema rū ta pexü nangëxmaxü i pechica i Tupanaxütawa woo na tama Yudíugü pixigüxü. ² Rū maneca marü nüxü pecuáchiga na ñuxäcü Tupana choxü nangechañücūma choxü muxü na pexü charüngüxëëxücëx rū pemaã nüxü chixuxücëx i norü ore i mexü. ³ Rū Tupana chomaã nanangoxëë rū choxü nüxü nacuëxëë ga yema ore ga pechiga ga noxri nüxícataama nüxü nacuáxü. Rū yemachiga nixi ga írarüwa marü pexcëx chanaxümatüxü ga noxrix. ⁴ Rū yexguma pexcëx chanaxümatügu rū pemaã nüxü chixu ga yema noxri ëñügüxü ga ore i ñuxäcü Tupana rū Cristugagu duñxügüxü namaxëxëëxü. Rū ngëxguma meã nawa pengüegu i ngëma popera rū tá nüxü pecuëx na aixcüma yiñxü ga yema ore ga noxri ëñügüxü ga nachiga pexcëx chaxümatüxü. ⁵ Rū yema nixi ga ore ga ëñügüxü ga Tupana taxüexüma meã nüxü nacuëxëëxü ga noxrix. Natürü i ñuxma rū ngëma Naãë i Üünexü rū marü nanangoxëë i ngëma ore naxcëx i Tupanaärü duñxügü i üünexü i yamugüxü rū norü orearü uruügü. ⁶ Rū ñuxma rū tá pemaã nüxü chixu i ñuxäcü na yiñxü i ngëma ore ga noxri ëñügüxü. Rū dücax, woo tama Yudíugü pixigü natürü i ñuxma rū pexcëx rū ta nixi i ngëma maxü i taguma güxü ga noxri Tupana tomaã ixunetaxü. Rū ñuxma i pema rū ta norü duñxügü pixigü. Rū pexcëx nixi i guxüma i ngëma Tupanaärü unetagu ga noxri tomaã nüxü yaxuxü. Rū ngëmaäcü

i ñuxma rü Ngechuchu ya Cristugagu pexũ nangẽxma i guxũma i ngẽma mexũgũ erũ peyaxõgũ i norũ ore i tũxũ maxẽxẽẽxũ. ⁷ Rü woo taxuwama chame na chanaxũxũcẽx i norũ puracũ, natũrũ ya Tupana rü choxũ namuãma rü choxũ naporaxẽẽ na nüxũ chixuxũcẽx i ngẽma norũ ore i mexũ. ⁸ Rü chaugũcẽx i Tupanapẽxewa rü choma nixĩ i guxũ i norũ duũxũgũarũ ñaxtũwaama chaxũxũ. Rü woo ngẽmaãcũ chixĩ, natũrũ Tupana choxũ nangechaũ rü choxna nanaxã i ngẽma puracũ i mexũ na ngẽma tama Yudĩugũ ixĩgũxũmaã nüxũ na chixuxũcẽx i norũ ore i mexũ na ñuxãcũ namexẽchixũ rü taguma iyagũxũ ga yema taxcẽx naxũxũ ga Cristu. ⁹ Rü nüma ga Tupana ya guxũãrũ ũruũ ixĩcũ, rü choxũ namu na guxũ i duũxũgũxũ nüxũ chacuẽxẽẽxũcẽx na ñuxãcũ yĩixũ i ngẽma norũ ngũchaũ ga nuxcũma õxũguxũ ga noxri nüxĩcatama nüxũ nacuáxũ. Rü ngẽma norũ ngũchaũ nixĩ i Cristugagu tũxũ na namaxẽxẽẽxũ. ¹⁰ Rü yemaãcũ choxũ namu ga Tupana na ngẽma duũxũgũ i tama Yudĩugũ ixĩgũxũmaã nüxũ chixuxũcẽx i ore i mexũ na yaxõgũãxũcẽx. Rü nüma ya Tupana nanaxwẽxe na yaxõgũãxũ na ngẽmaãcũ guxũma i ãẽxgacũgũ i daxũcũãx nüxũ nadaugũxũcẽx na ñuxãcũ nüxũ nacuẽxũchixũ ga Tupana ga yexguma duũxũgũaxũ natauxchaxẽẽãgu na naxũtawa nangugũxũcẽx. ¹¹ Rü yemaãcũ nüxũ nanatauxchaxẽẽ ga Tupana yerũ woetama nuxcũmaxũchima guxũguma nagu narũxĩnũ na tórũ Cori ya Ngechuchu ya Cristugagu tá na namaxẽxẽẽãxũ i duũxũgũ. Rü yemaãcũ nayanguxẽẽ. ¹² Rü ñuxma na Cristuarũ duũxũgũ ixĩgũxũ rü nüxũ na yaxõgũxũ, rü tũxũ natauxcha na Tupanana ingaicamagũxũ rü taxucẽxma nüxũ na imuũẽxũ. ¹³ Rü ngẽmacẽx i ñuxma na pexcẽx ngũxũ chingexũ rü pexũ chacèẽxũ na tama chauxcẽx pexoegaãẽgũxũcẽx. Erũ ngẽma ngũxũ na chingexũ i ñuxma rü perũ merũ nixĩ i ngẽma.

Cristu rü poraãcũ tũxũ nangechaũ

¹⁴ Rü ngẽmacẽx, ngẽxguma nagu charũxĩnũgu na ñuxãcũ Tanatũ ya Tupana taxcẽx namexẽẽxũ na naxãcũgũ ixĩgũxũcẽx, rü napẽxegu chaxãpũxũ na nüxũ chicuẽxũxũcẽx. ¹⁵ Rü nüma nixĩ i Nanatũ yĩixũ i guxũma i norũ duũxũgũ i ñoma i naãnewa rü daxũguxũ i naãnewa ngẽxmagũxũ. ¹⁶ Rü Tanatũ ya guxũguma poraãcũ tamaã mecũmacũna chaca na Naãe i Üunexũãrũ ngũxẽẽmaã pexũ naporaexẽẽxũcẽx na aixcũma peporaexũcẽx i perũ maxũwa. ¹⁷⁻¹⁸ Rü ngẽxgumarũũ ta nüxna naxcẽx chaca na perũ õgagu pewa namaxũxũcẽx ya Cristu. Rü ngẽxguma ngẽmaãcũ perũ maxũwa peporaegu rü pexũ nangẽxmagu i ngẽma ngechaũ i aixcũma ixĩxũ, rü tá wũxigu guxũma i yaxõgũxũmaã nüxũ pecuẽx na ñuxãcũ nataxũchixũ i norũ ngechaũ i namaã tũxũ nangechaũxũ ya Cristu. ¹⁹ Rü woo tama yanguxgu i tórũ cuẽx na nüxũ icuáxũcẽx na nañuxraũxũ i ngẽma ngechaũ i namaã Cristu tũxũ ngechaũxũ, natũrũ Tupanana naxcẽx chaca na pexcẽx nangõxẽẽãxũcẽx na ñuxãcũ na yĩixũ i ngẽma ngechaũ na aixcũma pewa nangẽxmaxũ i guxũma i Tupanacũmagũ. ²⁰ Rü ñuxma rü name nixĩ i guxãma i yixema rü nüxũ ticuẽxũgũ ya Tupana. Erũ nüma rü nüxũ nangẽxma i pora na naxũãxũ i guxũma i ngẽma naxcẽx ícaxũ rü õxna nagu rũxĩnũẽxũãrũ yexeraxũchi. Rü ngẽma norũ pora i tawa ngẽxmaxũmaã nixĩ i naxũãxũ i guxũma i ngẽma. ²¹ Rü ñuxma rü name nixĩ i guxũma i norũ duũxũgũ i yaxõgũxũ rü guxũgutãma Tupanaxũ nicuẽxũgũ naxcẽx i ngẽma Ngechuchu ya Cristu ũxũ. Rü ngẽmaãcũ yĩi.

4

Tupanaãe i Üünexũ rü wüxigutama tüxũ narüxnüexêe

¹ Rü ñuxma na ngêmaãcü Tupana tüxũ rüngüxêexũ, rü choma i Cristu-gagu na chapoxcuxũ, rü pexũ chacèexũ na Tupana naxwèxexũãcúma meã pemaxêxũ. Rü name nixĩ i ngêmaãcü pemaxê erü pexũ nixĩ ga nadexũ ga Tupana, rü norü duüxügü pixĩgü i ñuxmax. ² Rü tama name i pegü picuèxüxügü. Rü name nixĩ i guxüguma pemecümagü rü yaxna namaã pexĩnüe i togü rü nüxũ pengechaügü. ³ Rü chanaxwae i wüxigu perüxnüe rü ñoma wüxitama i duüxürüü pixĩgü erü pewa nangêxma i Tupanaãe i Üünexũ. Rü name nixĩ i naxcèx pedau na guxüguma pegü pengechaügüxũ rü ngêmaãcü taguma ñacücèx pegü pitoyexũ. ⁴ Erü yixema na Cristuarü duüxügü ixĩgüxũ, rü ñoma wüxitama i duüxürüü tixĩgü. Rü ngêxgumarüü ta wüxitama nixĩ i Naãe i Üünexũ i guxãwama maxüxũ. Rü ngêxgumarüü ta Tupana pexũ nade na guxãma ipenanguxêëgüxüxcèx i wüxitama i maxũ i taguma gúxũ. ⁵ Rü wüxitama nixĩ ya tórü Cori, rü wüxiãxütama nixĩ i yaxögüxũ rü wüxicèxicatama nixĩ ga íbaiüxũ ga guxãma. ⁶ Rü wüxitama nixĩ ya Tupana ya guxãnatü ixĩcü. Rü nüma rü guxãetüwama nangêxma rü guxãwama namaxũ. Rü nüma rü guxãxũ narüngüxêe na tanaxüxüxcèx i norü puracü. ⁷ Natürü wüxichigü i yixema rü tanayaxu i ngêma nacüma rü ngêma cuèx i Cristu tüxna ñmarechaüxũ na naxügüxüxcèx i norü puracü. ⁸ Rü ngêmacèx i Tupanaãrü ore i ümatüxüwa rü ñanagürü:

“Rü yexguma daxügüxũ ga naãnewa naxüxgu, rü yéma tüxũ nagagü ga guxema marü tüxũ ínanguxüxêe nawa ga túmaarü chixexũ. Rü norü duüxügüna nanaxã ga cuèx na ngemamaã Tupanaarü puracü naxügüxüxcèx”,

ñanagürü i ngêma ore. ⁹ Rü ñuxma Pa Chaueneëgüx, rü pexna chaca, rü çtacüchiga nixĩ i ngêma ore i ñaxũ, “Daxüwa naxũ”, ñaxũ? Rü dücac, ngêmwawa nüxũ tacuèx ga noxri rü ñoma ga naãnegu na ínaxĩxũ ga nümax. ¹⁰ Rü gumatama Cristu ga ñoma ga naãnegu íruxĩcü, rü gumatama nixĩ ga daxügüxũ i naãne i Tupana íngêxmaxüwa üxcü na guxãetüwa nangêxmaxüxcèx rü guxüwama nangêxmaxüxcèx. ¹¹ Rü nümatama nixĩ ga guxema norü duüxêgüna naxãaxũ ga túmaarü cuèx rü túmaarü puracü. Rü tüxũ naxuneta ga ñuxre na toxnamana norü orexũ tayarüxügüxüxcèx. Rü toguegü rü tüxna nanaxã ga cuèx na duüxügümaã nüxũ tixuxüxcèx i ngema norü ore i tüxũ nüxũ nacuèxêexũ. Rü toguegü rü tüxna nanaxã ga cuèx na duüxügüaxũ tanangüchaüxêexũ i Tupanaarü ore na yaxögüãxüxcèx. Rü toguegü rü tüxna nanaxã ga cuèx na ngema yaxögüxüarü dauruxügü tixĩgüxüxcèx. Rü toguegü rü tüxna nanaxã ga cuèx na norü oremaã tangüxêëtaegüxüxcèx. ¹² Rü yemaãcü norü duüxêgüna nanaxã ga túmaarü puracü rü túmamaã ínananguxüxêe na ngêma yaxögüxüxũ tarüngüxêëgüxüxcèx na ngêmaãcü guxüma i ngêma yaxögüxũ rü yexeraãcü nüxũ yacuáetanüxüxcèx i norü ore. ¹³ Rü Cristu nanaxwêxe na ngêma norü orewa iyaetanüxũ i guxãma i yixema ñuxmatáta wüxigu aixcüma meã yaxögü rü meã nüxũ icuèxgü ya Tupana Nane. Rü ngêmaãcü tá düxwa nawa tangugü na aixcüma Tupana naxwèxexũãcúma ixĩgüxũ, rü tá tiyaetanü i norü orewa ñuxmatáta ñoma Cristu ya aixcüma mexêchicürüü ixĩgü. ¹⁴ Rü táütama ñoma buxügürüü tixĩgü i tórü maxüwa. Erü ngêma buxügü rü tauxchaãcü toguama

narūxīnūē. Rū ngēxguma tacū rū to i nguxēētaexū naxīnūēgu rū ngēmawe narūxī űuxmata naga naxīnūē i ngēma duūxūgū i chixexū i norū doramaā nawomūxēēgūxū rū nachixexēēgūchaūxū. Natūrū i yixema rū tama name na ngēxgumarūū ixīgūxū. ¹⁵ Rū name nixī i yigū ingechaūgūācūma nagu taxī i ngēma ore i aixcūma ixīxū, na ngēmaācū yexeraācū naxrūū ixīgūxūcēx ya Cristu ya guxūma i yaxōgūxūāārū āēxgacū ixīcū. ¹⁶ Rū taeru ya Cristuwa nixī i ne naxūxū i tōrū pora na naxcēx imaxēxūcēx. Rū guxāma i yixema rū wūxigu naxmēxwa tangēxmagū. Rū ngēxguma Cristu-gagu meā wūxigu ipuracūegu rū yigū rūngūxēēgu rū guxūma meāma inixū. Rū ngēmaācū yigū ingechaūgūācūma norū orewa tiyaetanū na dūxwa nūma nanaxwēxexūācūma ixīgūxūcēx.

Maxū i ngexwacaxūxū i Cristugagu tūxū ngēxmaxū

¹⁷ Rū űuxma rū Cristuēgagu pexū chaxucuxē na tama nagu pexīxū i ngēma chixexū ga noxri nagu pexīxū ga yexguma tauta Cristuaxū peyaxōgūgu. Rū tama name i nagu pexī i nacūmagū i ngēma duūxūgū i tama Tupanaxū cuēxgūxū i naēchitamare maxēxū. ¹⁸ Erū Chataná rū nanatoōēgū i ngēma duūxūgū, rū ngēmacēx chixexūguxicatama narūxīnūē. Rū nagagugūtama nūxū nataxuma i maxū i taguma gūxū i Tupanawa ne űūxū, erū tama nūxū nacūxēgūchaū. ¹⁹ Rū tama naxānē na tacū rū chixexū na naxūgūxū, rū ngēmacēx nagu naxī rū nūxū namepua i guxūraūxū i chixexūgū na naxūgūxū. ²⁰ Natūrū i pema rū tama ngēmaācū na pemaxēxūcēx nixī i Cristuaxū peyaxōgūxū. ²¹ Yerū pema rū marū meā nūxū pexīnūē ga Cristuchiga. Rū toxūtawa naxcēx pengūē, rū nūxū pecūēx i norū ore i aixcūma ixīxū na űuxācū Ngechuchu naxwēxexūācūma na pemaxēxū. ²² Rū ngēmacēx name nixī i nūxū perūxoe i ngēma nuxcūmaūxū i pecūmagū ga űpa nagu pexīxū. Yerū yema nuxcūmaūxū ga perū maxū rū nachixexūchi. Rū pexū napora rū pexū nawomūxēēgū na nagu pexīxūcēx ga yema pexeneārū ngūchaūgū i tama mexū. Natūrū i űuxma rū name nixī i nūxū perūxoe i guxūma i ngēma. ²³ Rū ngēmacēx i űuxma na Cristuarū duūxūgū pixīgūxū rū name nixī na Tupanaguxicatama perūxīnūēxū. Rū name nixī i Tupanana pegū pexāgū na Naāē i Ūūnexū pewa puracūxūcēx rū na nangexwacaxūxēāxūcēx i peāē. ²⁴ Rū name nixī i penayaxu i ngexwacaxūxū i pecūma i Tupana norū ngūchaūmaā pexcēx mexēēxū. Rū ngēma nacūma i ngexwacaxūxū rū perū maxū i mexūwa tá nangox i ngēxguma nagu pexīxgu i ngēma ore i aixcūma ixīxū rū tama nawe perūxīxgu i pexeneārū ngūchaū. ²⁵ Rū ngēmacēx i űuxma na Cristuarū pixīgūxū rū tama name na pido-ratēēxgūxū. Natūrū name nixī i wūxichigū rū tūmamūcūmaā aixcūmaxū tixu. Erū guxāma i yixema rū yigūtanūxū i yaxōgūxū tixīgū. ²⁶ Rū ngēxguma texē tacū peāēwa nguxēēgu rū ꝑpegūna pedaugū na tama pecadu pexūxūcēx! Rū tama name i nagu perūxīnūēēcha natūrū name nixī i paxa ngēmatama i ngunexūgu nūxū ipeyarūngūma i ngēma naxūpa na yanaxūcuxū ya űēxcū. ²⁷ Rū pegūna pedaugū na tama penaxūchicaxūcēx i Chataná na ngēmaācū nayoxniēxūcēx rū pemaā inacūāxūcēx. ²⁸ Rū ngēxguma texē petanūwa ngītēēxgu ga űpa, rū name nixī i nūxū tarūxo i ngēma. Rū name nixī i tūmamēxēmaā meā tapuracū na ngēmaācū tūxū nangēxmaxūcēx i tūmaārū ngēmaxū na toguāx ya tūxū nataxūemaā tangaxūcēx. ²⁹ Rū tama name i chixexū i oremaā pidexagū. Rū name nixī i ore i mexūmaā pidexagū na ngēmaācū ngēma duūxūgū i pexū

ĩnũxũxũ perũngũxẽgũxũcèx na yexeraãcũ Tupanaga naxĩnũxũcèx rũ nataãgũxũcèx. ³⁰ ĵRũ pexuãgũ na tama penangechaũxẽxũcèx i Tupanaãe i Ūũnexũ! Erũ ngẽma Naãe i Ūũnexũ nixĩ i Tupana pexna muxũ na nũxũ pecuáxũcèx na aixcũma norũ duũxũgũ pixĩgũxũ ñuxmatáta ngẽma ngunexũ i nagu pexcèx nũma naxũxũ ya Cristu. ³¹ ĵRũ nũxũ perũxoe na nagu perũxĩnũẽchaxũ ega texé tacũ rũ chixexũ pemaã ũxgux! Rũ ngẽxgumarũũ ta name nixĩ na nũxũ perũxoexũ na aigu perũxĩnũẽxũ, rũ ěxna penuẽxũ, rũ ěxna pegũ na pengaexũ, rũ ěxna peguxchigawèxegũxũ. Rũ ngẽmaãcũ name nixĩ na nũxũ perũxoexũ i guxũma i ngẽma chixexũ i dexagũ. ³² Rũ name nixĩ i pegũ perũngũxẽgũ rũ pegũmaã pemecũmagũ, rũ pegũxũ pengechaũtũmũũgũ i wũxichigũ. Rũ ngẽxguma petanũwa texé tacũ rũ chixexũ pemaã ũxgux, rũ name nixĩ i pegũxũ nũxũ pengechaũgũ i wũxichigũ yema na Cristugagu Tupana pexũ nũxũ nangechaũxũrũ.

5

Name nixĩ i meã namaxẽ i Tupanaxãcũgũ

¹ Rũ ñuxma rũ Tupanaxãcũgũ ya pexũ nangechaũgũxe pixĩgũ. Rũ ngẽmacèx name nixĩ i naxcèx pedau na naxrũũ meã pemaxẽxũ rũ naxrũũ pimexũ. ² Rũ name nixĩ i pegũ pengechaũgũ yema Cristu tũxũ na ngechaũxũrũ. Rũ nũma rũ taxcèx nũgũ inaxã rũ taxcèx nayu. Rũ yemaãcũ Tupanaxũ nataãxẽẽ yerũ yemaãcũ tũxũ namaxẽxẽ. ³ Rũ ñuxma rũ Tupanaãrũ duũxũgũ pixĩgũ. Rũ ngẽmacèx tama name i naĩ i ngemaã rũ ěxna naĩ ya yatũmaã na ipepexũ. Rũ tama name na pexeneãrũ ngũchaũwe perũxĩxũ rũ ěxna pegũna penanugũchaũxũ i tacũ i ngẽmaxũgũ. Rũ ngẽmacèx name nixĩ i nũxũ perũxoe i guxũma i ngẽma chixexũgũ, rũ bai i nachiga na pidexagũmarexũ. ⁴ Rũ tama name i tacũ rũ ore i ãũãchixũxũ pixu, rũ bai i tacũ rũ ngeãẽxũmare pixu, rũ bai i texéxũ pecugũcũraxũ. Erũ ngẽma ore i chixexũgũ rũ taxuwama name. Rũ narũmemaẽ nixĩ i Tupanana moxẽ pexãgũ. ⁵ Rũ aixcũma pemaã nũxũ chixu rũ ngẽxguma texé naĩ i ngemaã rũ ěxna naĩ ya yatũmaã ipexgu, rũ ěxna tũmaxũneãrũ ngũchaũ taxũxgu, rũ taxucũrũwama taxãchica i ngextá tórũ Cori ya Cristu rũ Tanatũ ya Tupana ãẽxgacũ íixĩxũwa. Rũ ngẽxgumarũũ ta taxucũrũwama texé ngẽma taxãchica ega tũgũna tananugũchaũxgu i tacũ rũ ngẽmaxũgũ. Erũ yixema ngẽma nacũma tũxũ ngẽxmaxẽ rũ dũxwa namaã tatupanaãx i ngẽma nacũma i chixexũ. ⁶ ĵRũ tama naga pexĩnũe ega texé tacũ rũ ore i ngẽãẽmarexũmaã pexũ womũxẽẽchaũgu na penaxũxũcèx i ngẽma chixexũgũ! Erũ ngẽma chixexũgũgagu nixĩ i Tupana tá poraãcũ napoxcuexũ i ngẽma duũxũgũ i tama naga ĩnũexũ. ⁷ Rũ ngẽmacèx tama name i ngẽma duũxũgũmaã pexãmũcũgũ na pema rũ ta tama penaxũxũcèx i ngẽma chixexũgũ. ⁸ Rũ ũpa ga pema rũ ěãnexũwa peyexmagũ, yerũ tama Tupanaxũ pecuèx rũ chixrĩ pemaxẽ. Natũrũ i ñuxma na Tupanaxũ pecuáxũ rũ tórũ Coriarũ duũxũgũ na pixĩgũxũ, rũ ngóonexũwa pengẽxmagũ. Rũ ngẽmacèx name nixĩ i duũxũgũ i ngóonexũwa ngẽxmagũxũrũũ meã na pemaxẽxũ. ⁹ Erũ ngẽxguma ngóonexũwa ingẽxmagu, rũ mexũ taxũgũ, rũ nagu taxĩ i ore i aixcũma íixĩxũ, rũ meã tamaxẽ. ¹⁰ Rũ ngẽmacèx name nixĩ i naxcèx pedau na nagu pexĩxũ i ngẽma maxũ i tórũ Cori namaã taãxũ. ¹¹ Rũ tama name i pema rũ ta penaxũ i ngẽma chixexũgũ i taxuwama mexũ i ngẽma togũ i duũxũgũ i ěãnexũwa ngẽxmagũxũ ũgũxũ. Natũrũ narũmemaẽ nixĩ

i penangoxēē na nachixexŭ i ngēma naxŭgŭxŭ. ¹² Erŭ ngēma chixexŭ i cúācŭma naxŭgŭxŭ i ngēma yatŭgŭ rŭ ngexŭgŭ, rŭ woo nachiga idex-agŭmaregu rŭ wŭxi i ānexŭchi nixī. ¹³ Natŭrŭ ngēxguma ngóonexŭ nagu baxigu i ŭacŭ rŭ chixexŭgŭ rŭ meā tá nangox na űuxācŭ nachixexŭ. ¹⁴ Erŭ guxŭma i ŭacŭ i ngēxmaxŭ, rŭ ngēxguma ngóonexŭwa nangēxmagu, rŭ meāma nangox na űuxācŭ yīxŭ. Rŭ ngēmacēx i Tupanaārŭ orewa rŭ űanagŭrŭ:

“¡Nabaixāchi i cuma na cupexŭ! ¡Rŭ írŭda i cuma na icuyarŭtaxuxŭ!
¡Rŭ nagu rŭxīnŭ na űuxācŭ nachixexŭ i ngēma curŭ pecadugŭ!
Rŭ Cristu tá cuxcēx nanangóonexēē rŭ tá cuxŭ narŭngŭxēē na
Tupanaxŭ cucuáxŭcēx”,

űanagŭrŭ i ngēma ore. ¹⁵ Rŭ ngēmacēx name nixī i pexuāēgŭ rŭ meā pemaxē. Rŭ tama name i ngēma duŭxŭgŭ i tama Tupanaārŭ orexŭ cuēxgŭxŭrŭŭācŭma na pemaxēxŭ, natŭrŭ name na duŭxŭgŭ i meā Tupanaga űnēxŭrŭŭ meā na pemaxēxŭ. ¹⁶ Rŭ űuxma na Tupana pexŭ yatauxchaāchixēēxŭ rŭ ¡pepaxaāēgŭ na nŭxŭ pepuracŭexŭ rŭ penaxŭxŭ i ngēma nŭma nanaxwēxexŭ! Erŭ űomaŭcŭŭ i duŭxŭgŭ rŭ poraācŭ chixexŭ naxŭgŭ. ¹⁷ Rŭ űuxma na ngēmaācŭ namaxēxŭ i togŭ i duŭxŭgŭ, rŭ tama name na naxrŭŭ pixīgŭxŭ. Rŭ tama name i duŭxŭgŭ i ngēāēmarexŭrŭŭ pixīgŭ. Natŭrŭ name nixī i Tupanaārŭ orewa pengŭe na nŭxŭ pecuáxŭcēx i ŭacŭ na yīxŭ i tórŭ Cori pexŭ naxwēxexŭ na penaxŭxŭ. ¹⁸ Rŭ tama name i ŭacŭ rŭ axexŭ i ngŭchixáxŭmaā pengāxē, erŭ ngēma rŭ chixexŭ tŭxŭ naxŭxēē i ngēxguma ngēmaācŭ imaxēgu. Natŭrŭ name nixī i Tupanaāē i Ūŭnexŭna pegŭ pexāgŭ na pewa nangēxmaxŭcēx rŭ pemaā inacuáxŭcēx. ¹⁹ Rŭ name nixī i Tupanaārŭ orechigagu rŭ norŭ wiyægŭgu pegŭmaā pidexagŭ rŭ pegŭmaā nŭxŭ pixu. Rŭ name nixī i nagŭxŭraŭxŭ i norŭ wiyægŭgu pewiyægŭ, na ngēmaācŭ guxŭne ya perŭ maxŭnemaā tórŭ Corixŭ picuēxŭtŭgŭxŭcēx. ²⁰ Rŭ name nixī i guxŭguma tórŭ Cori ya Ngechuchu ya Cristuégagu moxē nŭxna pexāgŭ ya Tanatŭ ya Tupana naxcēx i guxŭma.

űuxācŭ meā nŭgŭmaā namaxē i wŭxi ya ¡patacŭāx i Cristuaxŭ yaxŭgŭxŭ

²¹ Rŭ űuxma na Cristumēxēwa pengēxmagŭxŭ, rŭ name nixī i pegŭga pexīnŭē i wŭxichigŭ, erŭ Cristuxŭ pengechaŭgŭ rŭ naga pexīnŭē. ²² Rŭ pemax, Pa Ngexŭgŭx, rŭ ngēma tórŭ Cori naxwēxexŭrŭŭ rŭ name nixī na petega pexīnŭēxŭ. ²³ Erŭ nŭma ya yatŭ rŭ namēxēru nixī, ngēxgumarŭtŭ ya Cristu na guxŭma i yaxŭgŭxŭēru na yīxŭ. Rŭ nŭmagŭ i yaxŭgŭxŭ rŭ Cristuxŭne nixīgŭ rŭ nŭma ya Cristu nixī i norŭ maxēxēēruŭ yīxŭ. ²⁴ Rŭ ngēxgumarŭtŭ na Cristuga naxīnŭēxŭ i ngēma yaxŭgŭxŭ, rŭ ngēxgumarŭtŭ ta i ngexŭgŭ rŭ name nixī na guxŭguma natega naxīnŭēxŭ. ²⁵ Rŭ name nixī i namēxŭ nangechaŭ ya yatŭ, yema Cristu guxāma ga yaxŭgŭxexŭ na nangechaŭxŭrŭŭ. Rŭ yema na tŭxŭ nangechaŭxŭcēx nixī ga nayuxŭ ga Cristu. ²⁶ Rŭ yemaācŭ nanaxŭ ga Cristu na nŭgŭxŭ tŭxŭ nadexŭcēx rŭ tŭxŭ yaxŭnēxēxŭcēx i guxāma i yixema na yaxŭgŭxŭ. Rŭ norŭ oremaā rŭ ngēma dexá i nawa íbaiŭxŭmaā tŭxŭ nimexēē na aixcŭma napēxewa imexŭcēx. ²⁷ Rŭ yemaācŭ tŭxŭ nimexēē na nŭgŭtama tŭxŭ nawéxŭcēx na aixcŭma guxŭwama imexŭ rŭ na nataxuxŭma i ŭacŭ i tórŭ chixexŭ rŭ bai i írarŭwa i ngēxguma napēxewa ingugŭgu. Erŭ tŭxŭ nade na ixŭnēgŭxŭcēx rŭ guxŭwama imexŭcēx i napēxewa. ²⁸ Rŭ yema Cristu tŭxŭ na ngechaŭxŭrŭŭ, rŭ wŭxichigŭ ya yatŭ rŭ nanaxwēxe na namēxŭ

nangechaũxũ ñoma nũgũxũnexũ na nangechaũxũrũũtama. Rũ yixema tũmamèxũ ngechaũxẽ rũ tũgũtama nixĩ i tangechaũxũ. ²⁹ Erũ tataxuma ya texé ya tũmaxũnechitama aixe, natũrũ tanaxũwemũ rũ meãma nũxna tatau ngẽma Cristu guxũma i yaxõgũxũna dauxũrũũ. ³⁰ Rũ guxãma i yixema na yaxõgũxũ rũ Cristutanũxũ tixĩgũ rũ ngẽmaãcũ wũxigu namũcũgũ tixĩgũ. Rũ nũma nixĩ i tũxna nadauxũ. ³¹ Rũ ngẽmacèx i Tupanaãrũ ore i ũmatũxũwa rũ ñanagũrũ:

“Rũ wũxichigũ ya yatũ rũ nanatũna rũ naẽna tá nixũgachi na namèxmaã inaxãũxũcèx. Rũ ngẽma taxre rũ wũxi tátama nixĩgũ”, ñanagũrũ i ngẽma ore. ³² Rũ ngẽma ore i yatũchiga rũ namèxchiga rũ wũxi i ore i aixcũma mexũ nixĩ. Natũrũ ñũxma na pemaã nũxũ chixuxũ i ngẽma rũ Cristuchiga rũ yaxõgũxũchiga nixĩ i chidexaxũ. ³³ Natũrũ ngẽma ore rũ pechiga ta nixĩ. Rũ ngẽmacèx i wũxichigũ i pema i yatũgũ rũ name nixĩ i pemèxũ na pengechaũxũ ngẽma pegũtama na pengechaũxũrũũ. Rũ ngẽxgumarũũ ta i pema i ngexũgũ rũ penaxwèxe i petega pexĩnũẽ.

6

¹ Pa Buxũgũx, ñũxma na Cristuarũ pixĩgũxũ, rũ name nixĩ i penatũga rũ peega pexĩnũẽ, erũ ngẽma nixĩ i aixcũma mexũ. ²⁻³ Yerũ yema mugũ ga Tupana Moĩchena ãxũtanũwa rũ yema mu ga nũxĩra wũxi ga unetamaã Tupana nũxũ ixuxũ, rũ ñanagũrũ:

“¡Rũ tũxũ nangechaũ rũ tũxũ rũngũxẽẽ ya cunatũ rũ cue na aixcũma cutaãèxũcèx rũ namáxũcèx i curũ maxũ i ñoma i naãnewa!” ñanagũrũ. ⁴ Rũ pemax, Pa Papágũ rũ Pa Mamágũx, rũ tama name i penangamare rũ penanuèxẽẽ i pexacũgũ. Rũ name nixĩ i meã penayaexẽẽ, rũ peyaxucuxègũ rũ penanguèxẽẽ na meã tórũ Coriaxũ yaxõgũãxũcèx. ⁵ Rũ pemagũ, Pa Duũxũgũ ya Ixããrũ Coriãxgũe, rũ name nixĩ i meã naga pexĩnũẽ i perũ corigũ i ñoma i naãnewa. Rũ penaxwèxe i nũxũ pengechaũgũãcũma rũ nũxũ pemuũèãcũma meã naga pexĩnũẽ ñoma Cristuaxũ pepuracũexũrũũ. ⁶ Rũ tama name ega perũ corigũ pexũ dawenũguxicatama meã nũxũ pepuracũe na ngẽmaãcũ pemaã nataãèxũcèx. Natũrũ ñũxma na Cristuarũ duũxũgũ pixĩgũxũ, rũ name nixĩ i guxũma i perũ ngũchaũmaã penaxũ i ngẽma Tupana pexũ naxwèxexũ. ⁷ Rũ ngẽma puracũ i perũ cori pexna ãxũ, rũ name nixĩ i petaãèãcũma penaxũ, ñoma tórũ Cori ya Ngechuchuaxũ pepuracũexũrũũ. Erũ aixcũma nũxũ nixĩ i pepuracũexũ rũ tama i duũxũgũaxũ. ⁸ Rũ name nixĩ i ngẽmaãcũ meã pepuracũe, erũ nũxũ pecuèx rũ wũxichigũ i duũxũ rũ woo wũxi i coriarũ duũxũ yixĩgu rũ èxna taxũxearũ yixĩgu, natũrũ tórũ Cori ya Ngechuchu tá nũxũ nanaxũtanũ naxcèx i ngẽma mexũ i naxũũ. ⁹ Rũ pemax, Pa Corigũx, rũ name nixĩ i ngẽxgumarũũ ta meã namaã pemaxè i perũ duũxũgũ. Rũ tama name i ñacũ rũ chixexũmaã penaxãũxũne. Rũ nũxna pecuèxãchie na pema rũ ta perũ duũxũgũrũũ tórũ Cori ya daxũgucũmèxèwa na pengèxmagũxũ. Rũ aixcũma guxãma i yixema rũ tawũxigu i napèxewa ya tórũ Cori ya Cristu.

Cristuarũ duũxũgũarũ poxũruũ i Tupana nũxna ãxũ na nũgũ namaã ñapoxũgũxũcèx naxchaxwa i Chataná

¹⁰ Rũ ñũxma na tórũ Corimũcũgũ pixĩgũxũ, Pa Chaueneègũx, rũ name nixĩ i pegũ peporaexẽẽ na penayaxuxũcèx i ngema pora i nawa ne ũxũ. Erũ nũma rũ naporaxũchi. ¹¹ ¡Rũ pegũ panaxũ i guxũma i ngema poxũruũgũ i Tupana pexna ãxũ na ngẽmamaã pegũ ñepoxũxũcèx

i ngēxguma Chataná pexŭ womŭxēēchaŭgu! ¹² Erŭ tama duŭxŭgŭ i taxrŭŭ āmachixŭ rŭ āxchinaxāxŭmaā nixī i yigŭ idaixŭ. Natŭrŭ ngēma namaā yigŭ idaixŭ nixī i Chatanaārŭ duŭxŭgŭ i ngoxogŭ i chixexŭgŭ i poraexŭ. Rŭ nŭmagŭ rŭ namaxŭchi rŭ tŭxŭ narŭporamaēgŭchaŭ. Rŭ tama nŭxŭ tadaugŭ erŭ naāēgŭ nixī, natŭrŭ guxŭwama nangēxmagŭ i űoma i naānewa. Rŭ namaā inacuēx i űoma i naāne i chixexŭ. ¹³ Rŭ ngēmacēx name nixī i penayauxgŭ i guxŭma i ngēma poxŭruŭgŭ i Tupana pexna āxŭ, na ngēmaācŭ pegŭ ĩpepoxŭxŭcēx i ngēxguma ngēma naāēgŭ pexŭ nachixexeēchaŭgu. Rŭ ngēmaācŭ tāŭtāma nŭxŭ penguxŭ i ngēma naāēgŭ i chixexŭ rŭ tá nŭxŭ perŭporamaegŭ. ¹⁴ Rŭ ngemacēx name nixī i mea pegŭna pedaugŭ na tama perŭ uwanŭmēxēgu peyixŭcēx. Rŭ penaxwae na pixaixcŭmagŭxŭ na taxuwama nachixexŭcēx i perŭ maxŭ. ¹⁵ Rŭ name nixī i guxŭguma ĩpememaregŭ na nŭxŭ peyarŭxugŭexŭcēx i ngema ore i ngŭxmŭxēēruxŭ. ¹⁶ Rŭ ngema guxŭarŭ yexera ixīxŭ nixī na aixcŭma Cristuaxŭ peyaxōgŭxŭ na ngēmaācŭ pegŭ ĩpepoxŭxŭcēx nŭxna i Chatanáne i āŭcŭmaxŭ i namaā tŭxŭ nachixexeēchaŭxŭ. ¹⁷ Rŭ name nixī i penayaxu i ngema maxŭ i taguma gŭxŭ na ngemamaā pegŭ ĩpepoxŭxŭcēx űoma wŭxi i churara i napatēxemaā nŭgŭ ĩpoxŭxŭrŭxŭ. Rŭ ngema Tupanaarŭ Ore i Naāē i Ūŭnexŭ pexna āxŭ, rŭ ngema nixī i pexne ixīxŭ. ¹⁸ Rŭ tama name i nŭxŭ perŭchaue na peyumŭxēgŭxŭ. Natŭrŭ name nixī i guxŭguma Tupanaāē i Ūŭnexŭārŭ ngŭxēēmaā Tupanaxŭ pecēēxŭ. Rŭ penaxwae i pexuāē na taguma nŭxŭ perŭxoexŭcēx. Rŭ ngemaācŭ name nixī i naxcēx peyumŭxēgŭ i guxŭma i Tupanaarŭ duŭxŭgŭ. ¹⁹ Rŭ ngēxgumarŭŭ ta chanaxwēxe i chauxcēx peyumŭxēgŭ na Tupana choxŭ rŭngŭxŭxēēxŭcēx rŭ choxna naxāāxŭcēx i ngēma ore i nŭma nanaxwēxexŭ na nŭxŭ chixuxŭ. Rŭ chanaxwēxe i Tupanana naxcēx peca na choxŭ naporaxēēxŭcēx na tama chamuŭācŭma nŭxŭ chixuxŭcēx rŭ mea chanangoxēēxŭcēx i ngema norŭ ore i Cristuchiga ga noxri exŭguxŭ i űŭxma maxŭ tŭxna āxŭ. ²⁰ Rŭ ngēma orexŭ na chixuxŭcēx nixī ga Tupana nŭgŭchicŭŭ choxŭ inamuxŭ. Rŭ ngēmagagu nixī i chapoxcuxŭ i űŭxmax. Rŭ chanaxwēxe i chauxcēx peyumŭxēgŭ na tama chamuŭācŭma meāma nŭma nanaxwēxexŭācŭma nŭxŭ chixuxŭcēx i ngēma norŭ ore.

Pauru nanaguxēē ga norŭ popera rŭ wenaxārŭ yema duŭxŭgŭxŭ narŭmoxē

²¹ Rŭ taeneē ya nŭxŭ ingechaŭcŭ ya Tíquicu, rŭ chauxrŭŭ aixcŭma meāma napuracŭ i tŭrŭ Coriarŭ puracŭwa. Rŭ nŭma tá pemaā nŭxŭ nixu i guxŭma i chauchiga na űuxācŭ choxŭ naxŭpetŭxŭ i nuā. ²² Rŭ ngēmacēx nixī i pexŭtawa chanamuxŭ, na pemaā nŭxŭ yaxuxŭcēx na űuxācŭ toxŭ naxŭpetŭxŭ, na ngēmaācŭ pexŭ nataāēxēēxŭcēx. ²³ Pa Toeneēgŭ i Yaxōgŭxŭx, chanaxwēxe i Tanatŭ ya Tupana rŭ tŭrŭ Cori ya Ngechuchu ya Cristu pexŭ narŭ-ngŭxēēgŭ i guxŭma i pema na meā pegŭmaā pe-maxēxŭcēx, rŭ aixcŭma petaāēgŭxŭcēx, rŭ pegŭ pengechaŭgŭxŭcēx rŭ meā peyaxōgŭxŭcēx. ²⁴ Rŭ chanaxwēxe i Tanatŭ ya Tupana nŭxŭ narŭngŭxŭxēē i guxŭma i ngēma duŭxŭgŭ i aixcŭmaxŭchi tŭrŭ Cori ya Ngechuchu ya Cristuxŭ ngechaŭgŭxŭ. Rŭ ngēmaācŭ yī.

Rŭ nuāma pexna,
Pauru

POPERA GA PIRIPUWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxü narümoxë ga yema yaxŏgŭxŭ ga Piripuwa yexmagŭxŭ

¹ Pa Toeneëgü ya Piripuwa Ngëxmagŭxex, choma i Pauru rü namaã i taeneë i Timutéu nixi i pexcëx tanaxümatŭxŭ i ñaã popera. Rü toma rü Ngechuchu ya Cristuarü puracütanŭxŭ tixigü. Rü pexcëx tanaxümatŭ i pema i yaxŏgŭxŭârü äëxgacügü na pixigŭxŭ, rü pema i tupaucawa ngŭxëtaeruŭgü na pixigŭxŭ, rü guxâma i pema i Ngechuchu ya Cristuaxŭ yaxŏgŭxe. ² Rü chanaxwëxe i Tanatŭ ya Tupana rü tŏrŭ Cori ya Ngechuchu ya Cristu poraãcü pexŭ narŭngŭxëë rü pexŭ nataãëxëë.

Pauru rü yema yaxŏgŭxŭcëx nayumŭxë

³ Rü guxŭguma i ngëxguma pexna chacuëxächigu rü Tupanana moxë chaxâ i pexcëx. ⁴ Rü ngëxguma chayumŭxëgux, rü guxŭguma chataãëcŭma pexcëx chayumŭxë i guxâma i pemax. ⁵ Erü pema rü noxritama Tupanaârü orexŭ pexinŭëgumama rü poraãcü choxŭ perŭngŭxëë na nüxŭ chixuxŭcëx i norü ore i mexŭ. Rü ñuxma rü ta choxŭ perŭngŭxëëgüecha. ⁶ Rü Tupana rü marü inanaxŭgü i wüxi i mexŭ i puracü i perü maxŭwa. Rü nüxŭ chacuëx rü nüma rü guxŭgutâma nanaxüecha i ngëma puracü ñuxmatâta yanguxëëã i ngëxguma ínanguxgu ya Ngechuchu ya Cristu. ⁷ Rü aixcŭma name na ngëmaãcü pemaã nagu charŭinŭxŭ, erü poraãcü pexŭ changechaŭ rü aixcŭma Tupana wüxigu tŭxŭ narŭngŭxëë i guxâma i yixema. Rü woo ñuxma na chapoxcuxŭ rü ëxna ega äëxgacügŭpëxewa choxŭ nagagügu, rü Tupana choxŭ narŭngŭxëë i ngëxguma norü ore i mexŭetŭwa chideaxgu rü namaã nüxŭ chixuxgu i äëxgacügü na aixcŭma yŭixŭ i ngëma orewa nüxŭ iyarŭngauxŭ i tŏrŭ maxŭ i taguma gŭxŭ. Rü nüxŭ chacuëx rü ngëma choxŭ nangŭxëëxŭãcŭma, rü pexŭ rü ta narŭngŭxëë. ⁸ Rü Tupana nüxŭ nacuëx na ñuxãcü poraãcü pexŭ chadauxchaŭxŭ rü pexŭ na changechaŭxŭ i guxâma i pemax, ngëma Ngechuchu ya Cristu pexŭ na ngechaŭxŭrŭü. ⁹ Rü chorü yumŭxëwa naxcëx íchaca na yexeraãcü pegü pengechaŭgŭxŭcëx rü Tupanaxŭ pengechaŭgŭxŭcëx. Rü naxcëx íchaca na yexeraãcü nüxŭ pecuáxŭcëx i guxŭma i Tupanachiga rü yexeraãcü nüxŭ pecuáxŭcëx na ñuxãcü nanaxwëxexŭ na naxcëx pemaxëxŭ. ¹⁰ Rü ngëmaãcü pexcëx chayumŭxë erü chanaxwëxe na meã penangugŭxŭ i ñacŭ nixi i aixcŭma mexŭ i Tupanapëxewa na penaxŭxŭcëx i ngëma. Rü chanaxwëxe na aixcŭma namexŭ i perü maxŭ na taxucëxma ñacŭcëx Tupana pexna çaxŭcëx i ngëxguma ínanguxgu ya Cristu. ¹¹ Rü naxcëx íchaca na Ngechuchu ya Cristu pexŭ narŭngŭxëëxŭ na aixcŭma namexŭcëx i perü maxŭ rü aixcŭma penaxŭxŭcëx i ngëma Tupanapëxewa mexŭ na ngëmaãcü meã pemaxëãcŭma Tupanaxŭ picuëxŭŭgŭxŭcëx.

Chauxcëx rü Cristuarü ngúchaŭ na chaxŭxŭcëx nixi i chamaxŭxŭ

¹² Pa Chaueneëgŭx, rü chanaxwëxe i nüxŭ pecuëx rü guxŭma i ngëma choxŭ üpetŭxŭ, rü aixcŭma ngëmaãcü choxŭ naxŭpetŭ na yexeraãcü natachigaxŭcëx i Tupanaârü ore i mexŭ. ¹³ Rü ñuxma i núma rü guxŭma i churaragü i äëxgacŭpataarü dauruŭgü rü guxŭma i togü rü

ta nūxŭ nacuèxgŭ na chapoxcuxŭ naxcèx na Cristuarŭ duŭxŭ chiŭxŭ. ¹⁴ Rŭ ñuxma na chapoxcuxŭ rŭ muxŭma i taeneègŭ i yaxògŭxŭ rŭ tama namuŭèacŭma nūxŭ nangúchaŭ na nūxŭ yaxugŭexŭ i Tupanaârŭ ore i mexŭ. Rŭ yexeraacŭ tórŭ Coriaxŭ nayaxògŭ. ¹⁵ Rŭ aixcŭma nixŭ i ñuxre i duŭxŭgŭ rŭ togŭxŭ na yaxăŭxăchixêêxŭcèxmare nūxŭ nixugŭexŭ i Cristuchiga, erŭ togŭxŭ narŭyexerachaŭ. Natŭrŭ nangèxma i togŭ i duŭxŭgŭ i aixcŭma mexŭgu naxŭnŭèacŭma meă nūxŭ ixugŭexŭ i ngèma ore. ¹⁶ Rŭ ñuxre i duŭxŭgŭ rŭ Cristuchigaxŭ nixugŭe erŭ choxŭ nangechaŭgŭ rŭ nūxŭ nacuèxgŭ na Tupana nuxma choxŭ muxŭ na íchanapoxŭxŭcèx i norŭ ore i mexŭ. ¹⁷ Natŭrŭ nangèxma i togŭ i noxrŭtama ngúchaŭcèx daugŭxŭ rŭ ngèmacèx nūxŭ ixugŭexŭ i ngèma ore. Rŭ nŭmagŭ rŭ tama mexŭgu narŭxŭnŭè, natŭrŭ naxcèx nadaugŭ na yexeraacŭ choxŭ naguxchaxêègŭăxŭ i ñuxma na chapoxcuxŭ. ¹⁸⁻¹⁹ Natŭrŭ nŭetama nixŭ ega woo ngèmaacŭ yixŭgu. Erŭ woo mexŭ i norŭ ngúchaŭmaă yixŭgu rŭ êxna tama, natŭrŭ Cristuchigaxŭ nixugŭe. Rŭ ngèma rŭ wŭxi i taăe nixŭ i chauxcèx. Rŭ guxŭgutáma chataêècha erŭ nūxŭ chacuèx rŭ guxŭma i ngèma rŭ chorŭ mexŭcèx tá nixŭ erŭ chauxcèx peyumŭxègŭ rŭ choxŭ narŭngŭxêè i Tupanaê i Ūŭnexŭ i Ngechuchu ya Cristuxŭ rŭngŭxêèxŭ. ²⁰ Rŭ ngèma poraăcŭ chanaxwèxexŭ nixŭ na taguma ŭacŭ rŭ chixexŭ chaxŭxŭ na taxucèxma chaugŭcèx chaxănexŭcèx. Rŭ chanaxwèxe i guxŭguma íchamemare na guxăpèxewa tama chamuŭăcŭma Cristuchigaxŭ chixuxŭ. Rŭ ñuxma na chamaxŭxŭ rŭ woo chayuxgu rŭ chanaxwae i guxŭguma aixrŭgumarŭŭtama chaugagu Cristuxŭ nicuèxŭŭgŭ i duŭxŭgŭ. ²¹ Erŭ chauxcèx rŭ Cristuarŭ ngúchaŭ na chaxŭxŭcèx nixŭ i na chamaxŭxŭ. Natŭrŭ ngèxguma chayuxgux rŭ ngèma rŭ ta name, erŭ Cristuxŭtawa tá changèxma i ngèxguma. ²² Natŭrŭ tama nūxŭ chacuèx i ŭacŭ nixŭ i rŭmemaèxŭ i chauxcèx, ngèma na chayuxŭ rŭ êxna na chamaxŭxŭ. Erŭ ñuxma na chamaxŭxŭ rŭ choxŭ natauxcha na chanaxŭxŭ i tórŭ Coriarŭ puracŭ. ²³ Rŭ ngèmacèx tama nūxŭ chacuèx na ŭacŭ yŭxŭ i chauxcèx rŭmemaèxŭ i ngèma taxrewa. Erŭ ñuxguacŭ rŭ chanaxwèxe na chayuxŭ na Cristuxŭtawa changèxmaxŭcèx. Rŭ ngèma nixŭ i aixcŭma yexera rŭmemaèxŭ i chauxcèx. ²⁴ Natŭrŭ i pexcèx rŭ nagu charŭxŭnŭ rŭ narŭmemaè nixŭ na ñoma i chaxunemaătama na chamaxŭxŭ na ngèmaacŭ pexŭ charŭngŭxêèxŭcèx. ²⁵ Rŭ ñuxma na aixcŭma meă nūxŭ chacuăxŭ na pechoxwèxexŭ, rŭ ngèmawa nūxŭ chacuèx na tăŭtáma paxa chayuxŭ. Rŭ ngèmaacŭ tá chamaxăma na pexŭ charŭngŭxêèxŭcèx na yexeraacŭ Cristucèx pemaxèxŭcèx rŭ yexeraacŭ taăèacŭma nūxŭ peyaxògŭxŭcèx. ²⁶ Rŭ ngèmaacŭ wena táxarŭ petanŭwa changèxma. Rŭ ngèxguma wena choxŭ pedaugŭgu rŭ aixcŭma tá petaăègŭ erŭ tá pexŭ nangèxma na ŭacŭcèx Ngechuchu ya Cristuxŭ picuèxŭŭgŭxŭ. ²⁷ Rŭ ngèma guxŭârŭ yexera rŭmemaèxŭ nixŭ na naxcèx pedauxŭ na meă pemaxèxŭ, ngèma Cristuarŭ ore pemaă nūxŭ ixuxŭrŭŭ. Rŭ ngèxguma petanŭwa chaxŭxgu rŭ êxna woo tama ngema chaxŭxgu, natŭrŭ nūxŭ chaxŭnŭchaŭ na guxăma wŭxigu pegŭ peporaexêèxŭ na taguma nūxŭ perŭchaxŭcèx na aixcŭma peyaxògŭxŭ, rŭ ngèmaacŭ Tupanaăxŭ pepuracŭexŭ na yexeraacŭ yaxŭchigŭxŭcèx i norŭ ore i mexŭ. ²⁸ Rŭ ngèmacèx penaxwèxe i tama texéxŭ pemuŭèacŭma nūxŭ pixugŭama i ngèma ore. Rŭ ngèma na tama nūxŭ pemuŭèxŭ rŭ ngèma rŭ wŭxi i cuèxruŭ tá nixŭ nūxŭ i perŭ uwanŭgŭ. Rŭ ngèmawa tá nūxŭ nacuèxgŭ na poxcuwa tá naxŭxŭ i

nūmagū natürü pema rü tá maxūwa na pexīxū. Rū Tupana tá nixī ya pexū rüngūxēēcū na tama nūxū pemuūēxūcēcex i ngēma perū uwanūgū. ²⁹ Rū Tupanaga nixī na Cristuaxū peyaxōgūxū. Rū ngēxgumarūū ta naga nixī na Cristucēcex ngūxū pingēgūxū. Rū ngēma rü wūxi i ngūxēē nixī i pexna naxāxū ya Tupana. ³⁰ Pema rü choma rü wūxigu Tupanaārū puracūwa tangēxmagū, rü tanaxūama i ngēma puracū ega woo texé tūxū naguxchaxēēgux. Rū ūpa rü marū choxū pedau na űuxācū meā chanaxūxū i ngēma puracū, rü űuxma rü ta nūxū picuáchiga na űuxācū chanaxūamaxū woo namu i chorū guxchaxūgū.

2

Cristu rü űoma taxuūma yīxūrūū nūgū nixīxēē rü yemacēcex ga Tupana rü guxūārū āēxgacūxū nayaxīxēē

¹ Rū dücax, Pa Chaueneēgūx, rü űuxma na Cristuarū duūxūgū pixīgūxū, ¿rū aixcūma yīxū i nūma pexū nataāēxēēxū? ¿Rū aixcūma yīxū i petaāēgūxū erū nūma pexū nangechaū? ¿Rū aixcūma yīxū i Tupanaāē i Ūūnexū pexūtawa ngēxmaxū? ¿Rū aixcūma yīxū i pegū pengechaūgūxū rü pegūxū pengechaūtūmūūgūxū? ² Rū ngēxguma chi ngēmaācū yixīgu, rü chanaxwēxe i guxāma wūxigu perūxīnūē, rü aixcūma guxāma pegū pengechaūgū, rü aixcūma guxāma űoma wūxitama pīxūrūū na yīxū i peāē, rü guxāma wūxitama i ngūchaūcēcex pedau. Rū ngēxguma ngēmaācū pemaxēgu rü wūxi i chorū taāē tá nixī. ³ Rū tama name na togūarū yexera pegū pixīgūxēēxū rü pegū picuēxūxūgūxū. Natürü narūmemae nixī i naga perūxīnūēxū na ngema togū rü perū yexera nūxū nacuēgūxū. ⁴ Rū tama pegūguxicatama perūxīnūē, natürü pegū peporaexēē na togūxū perūngūxēēgūxūcēcex! ⁵ Rū name nixī ga yema Ngechuchu ya Cristu naga rūxīnūxūgu na perūxīnūēxū i pemax. ⁶ Yerū nūma rü woo ga Tupanaxūchi na yīxū, natürü tama nūgū nicuēxūxū na Tupana yixīxū. ⁷⁻⁸ Rū yemacēcex yēma nanatēcex ga norū mexūgū ga daxūgūxū ga naānewa. Rū wūxi i duūxū i togūaxū puracūxūrūū nūgū nixīxēē. Rū űoma wūxi i duūxūrūū űoma ga naānegu nabu. Rū yexguma marū duūxū yixīgu ga nūmax, rü űoma taxuūma yīxūrūū nūgū nixīxēē. Rū Tupanaga naxīnū, rü yemaācū curuchagu nayu woo wūxi ga ānexūchi na yīxū ga yema. ⁹ Rū yemacēcex ga Tupana rü guxūētūwa nanangexmaxēē rü nayangucuchixēē na guxūma i āēxgacūgūētūwa nangēxmaxūcēcex. ¹⁰ Rū yemaācū nanaxū ga Tupana na Ngechuchupēxegu tacaxāpūxūgūxūcēcex rü nūxū ticuēxūūgūxūcēcex ya guxāma ya texé ya daxūgūxū i naānewa ngēxmagūxe, rü guxāma i űoma i naānewa ngēxmagūxe, rü guxāma ya texé ya marū yuexe. ¹¹ Rū yemaācū Tupana āēxgacūxū nayaxīxēē na guxāma nūxū ixuxūcēcex na tórū Cori yīxū ya Ngechuchu ya Cristu rü ngēmaācū nūxū icuēxūūgūxūcēcex ya Tanatū ya Tupana.

Cristuarū duūxūgū rü űoma omūgūrūū nixīgū i natanūwa i ngēma duūxūgū i tama yaxōgūxū

¹² Rū űuxma na nūxū pecuáxū na űuxācū Nanatūga naxīnūxū ga Cristu, rü chanaxwēxe i chauga pexīnūē, Pa Chaueneēgū ya Pexū Changechaūgūxe. Rū yēma petanūwa chayexmagu chauga na pexīnūēxūārū yexera chanaxwēxe i chauga pexīnūē i űuxma na tama petanūwa changēxmaxū. Rū chanaxwēxe i Tupanaxū pemuūēācūma naxcēcex pedaugūama i perū maxū i taguma gūxū. ¹³ Erū Tupana nixī

ya perü maxüwa puracücu na mexügu perüxĩnüexüçex. Rü nüma nixĩ i pexü nangüxëexü na naga pexĩnüexüçex rü peyanguxëexüçex i ngema norü ngüchaxü. ¹⁴ ;Rü guxüma i ngema Tupanacëx pexüxüwa rü tama name i odcü penaxü rü pegü naxcëx pechoxügagü! ¹⁵⁻¹⁶ Rü name i ngëmaäcü meã pemaxë na taxúema tacü rü chixexüxü pewa iyangauxüçex. Rü penaxwëxe i mexü i Tupanaxäcügü pixígü i natanüwa i ngëma duüxügü i chixexü rü chixeãëgümarexü. Rü ngëxguma ngëma duüxügümaã nüxü pixugüyane i ngëma ore i mexü i tüxü maxëxëexü, rü yoxni natanüwa rü ñoma woramacurigü ya ëänexüwa ibáixgücürüü tá pixígü. Rü ngëmaäcü i ngëxguma wena núma naxüxgu ya Cristu rü poraäcü tá pemaã chataãe erü tá nüxü chadau na tama natüçëxmamare yüxü ga yema puracü ga petanüwa chaxüxü. ¹⁷ Rü ngëma ñuxma na meã peyaxögüxü, rü ngëma nixĩ i perü ãmare i Tupanana pexãxü. Rü ngëma na meã yanguxüçex i ngëma perü ãmare i Tupanapëxewa, rü choma rü íchamemare na Tupanacëx ichanaxãxü i chorü maxü rü chayuxü. Rü ngëmacëx woo chayuxgu rü wüxi i taãe tá nixĩ i chaucëx. Rü chanaxwëxe i pemagü rü ta ngëmacëx wüxigu chomaã petaãëgü. ¹⁸ Rü ngëmacëx ega ngëma ore i mexüçex chayuxgux, rü tama name na pengechaügüxü natürü chanaxwëxe na wüxigu chomaã petaãëgüxü.

Timutéu rü Epaporu- dítuchiga

¹⁹ Rü ngëxguma tórü Cori ya Ngechuchu naxwëxegu rü paxa petanüwa chanamuëga ya taeneë ya Timutéu na pexü na íyadauxüçex rü chataãëxüçex i ngëxguma núma nangeãgu i pechiga. ²⁰ Rü aixcüma nataxuma i to i chorü ngüxëeruü i choma nagu charüxĩnüxügu rüxĩnüxü, rü Timutéuxicatama nixĩ. Rü nataxuma i to i naxrüü aixcüma pegu rüxĩnüxü rü pexü rüngüxëëchaüxü. ²¹ Erü guxüma i togü rü naxcëx nadaugü i noxrütama ngüchaügü, rü tama aixcüma nagu narüxĩnüë i ngëma Ngechuchu ya Cristuarü ngüchaü. ²² Natürü i pema rü marü nüxü pecuëx na ñuxäcü meã namaxüxü i Timutéu, rü ñuxäcü choxü nangüxëexü i Tupanaärü orearü uchigawa, ñoma wüxi i buxü i nanatüxü rüngüxëëxürüü. ²³ Rü ngëmacëx i ngëxguma nüxü chacuëxgu na ñuxäcü tá choxü na naxüpetüxü i núma, rü ñuxüchi ngema petanüwa chanamuxchaü i Timutéu na pexü íyadauxüçex. ²⁴ Rü ngëxgumarüü ta nagu charüxĩnü rü tórü Cori rü aixcüma tá choxü narüngüxëë na chomatama ngema petanüwa íchayadauxüçex. ²⁵ Rü ngëxgumarüü ta chaucëx name nixĩ i ngema petanüwa chanamuxü i taeneë i Epaporudítu. Rü nüma nixĩ ga pematama chaucëx núma penamuxü na choxü nangüxëexüçex. Rü nüma rü chomücü nixĩ i Tupanaärü puracüwa, rü poraäcü choxü narüngüxëë i Tupanaärü orearü uwa. ²⁶ Rü poraäcü nüxü nangüchaü na pexü íyadauxü i guxãma i pemax. Rü poraäcü naxoegaãe, yerü pema rü nüxü pecuáchiga ga na yaðaawexü ga númax. ²⁷ Rü aixcüma nixĩ ga na yaðaawexü, rü wixguxüchi taëx nayu. Natürü Tupanaãxü nangechaütümüü rü choma rü ta nüxü changechaütümüü, rü yemacëx naxcëx nayataanexëë na tama yexeraäcü changechaüxüçex. ²⁸ Rü ngëmacëx rü yexeraäcü chanaxwëxe na paxa petanüwa chanamuxü i Epaporudítu, na pema rü petaãëgüxüçex i ngëxguma wena nüxü pedaügügu. Rü ngëxguma i choma rü tá ta chataãe i ngëxguma nüxü chacuëxgu na petanüwa nangëxmaxü na pexü nangüxëexüçex. ²⁹ Rü chanaxwëxe i tórü Coriéagü petaãëgüäcüma meã penayaxu erü peeneë

nixī. Rū name nixī i nüxŭ pengechaŭgü i guxŭma i ngēma duŭxŭgü i Eparatorudíturŭŭ ixīgŭxŭ. ³⁰ Yerü nüma ga Eparatorudítu rü yema na poraâcü nawa napuracŭxŭ ga Cristuarü puracü, rü yemacêx wixguxŭchi taêx nayu. Rŭ âücŭmaxŭwa nügü nayexmaxêê na pechicüü choxŭ nangŭxêêxŭcèx.

3

Ngēma na Cristuxŭ icuáxŭ rü ngēma nixī i guxŭârŭ yexera rŭmemaêxŭ

¹ Rŭ ñuxma Pa Chaueneêgŭx, rü chanaxwêxe i petaâêgŭ erü tórŭ Coriarŭ duŭxŭgŭ pixīgŭ. Rŭ yema ore ga noxri pexcêx chaxŭmatŭxŭ rŭ tama choxŭ nawêxtŭmŭŭŭ na wena pexcêx chanaxŭmatŭxŭ erü aixcŭma pexŭ name i ngēma ore. ² ¡Rŭ pegŭna pedêux nüxna i ngēma duŭxŭgŭ i chixri maxêxŭ rŭ chixexŭmaâ pexŭ ixucŭxêgŭxŭ! Rŭ nümagŭ nixī i nüxŭ yaxugŭexŭ rŭ ngêxguma tama yigŭ íwiechêxmŭpêxechiraŭgu, rŭ taxucŭrŭwama Tupanapêxewa time. ³ Natŭrŭ yixema aixcŭma Tupanapêxewa imexê, rŭ yixema tixīgŭ. Rŭ Tupanaxŭ ticuêxŭŭgŭ i Naâê i Ūünexŭârŭ ngŭxêêmaâ. Rŭ tataâêgŭ erü Ngechuchu ya Cristuarŭ duŭxŭgŭ tixīgŭ. Rŭ tama tayaxôgŭ na ngēma yigŭ íwiechêxmŭpêxechiraŭxŭcêx Tupanapêxewa imexŭ. ⁴ Rŭ choma chi waxi nixī i guxŭ i togŭarŭ yexera chayaxôxŭ i ngēma wiechêxmŭpêxechiraŭchiga. Rŭ tataxu chima ya togue ya texê chauxrŭŭ yaxôxê i ngêmachiga. ⁵ Yerü yexguma 8 ga ngunexŭ chauétŭ yixīgu ga na chabuxŭ, rŭ choxŭ ínawiechêxmŭpêxechiraŭgŭ, erü Yudíu chixī. Rŭ Beyamítanŭxŭ chixī. Rŭ chaunatŭ rŭ chauê rŭ Yudíugŭ tixīgŭ, rŭ ngêmacêx i choma rŭ Yudíuxŭchi chixī. Rŭ choma rŭ Parichéuchirêx chixī, rŭ pema nüxŭ pecuêx rŭ ngēma Parichéugŭ rŭ meâma nanaxaure i Tupanaârŭ mugŭ ga Moíchê ũmatŭxŭ. ⁶ Rŭ yema na meâ chayanguxêêchaŭxŭcèx ga yema mugŭ ga Moíchê ũmatŭxŭ, rŭ yemacêx nawe chingêchigŭ ga yema duŭxŭgŭ ga Ngechuchuaxŭ yaxôgŭxŭ. Rŭ yema na aixcŭma meâ chanaxaurexŭcèx ga yema mugŭ ga Moíchê ũmatŭxŭ, rŭ yemacêx taxucŭrŭwama texê chauchigaxŭ tixu ga tama na chaxaurexŭ. ⁷ Natŭrŭ guxŭma ga yema ũpa chauxcêx mexŭ, rŭ ñuxma rŭ taxuwama choxŭ name erü marŭ íchanatêx na Cristuaxŭxŭcatama chayaxôxŭcèx. ⁸ Rŭ ñuxma na Ngechuchu ya Cristu ya chorŭ Corixŭ na chacuáxŭ, rŭ chauxcêx rŭ guxŭma ga yema ũpa nagu chixŭxŭ rŭ taxuwama name, erü ngēma na Cristuxŭ na chacuáxŭ rŭ guxŭârŭ yexera narŭmemaê. Rŭ guxŭma ga yema mugŭ ga noxri nagu chixŭxŭ rŭ marŭ nüxŭ charŭxo na Cristuwe charŭxŭxŭcêx. Rŭ chauxcêx rŭ ñoma guxchirerŭŭ nixī ga yema ũpa nagu chixŭxŭ ega Cristumaâ nügŭ chananguxgu. ⁹ Rŭ yemaâcü nüxŭ charŭxo ga guxŭma nagagu ga yema na Cristuarŭ duŭxŭ na chiŭxŭcèx. Rŭ ñuxma rŭ Tupanapêxewa chame erü Cristuaxŭ chayaxô. Rŭ tama ngēma na chamecŭmaxŭcèx rŭ êxna mugŭ chaxaurexŭcèx nixī na chamexŭ i napêxewa. Natŭrŭ ngēma na Cristuaxŭ chayaxôxŭcèx nixī i nügŭcèx choxŭ namexêêxŭ ya Tupana. ¹⁰⁻¹¹ Rŭ ngēma ñuxma chanaxwêxexŭ nixī na aixcŭma Cristuxŭ chacuáxŭ rŭ chowa na nangêxmaxŭ i ngēma pora ga wena Cristuxŭ írudaxêêxŭ i ñuxma nüxŭ ngêxmaxŭ. Rŭ yema ngŭxŭ na yangexŭ ga nüma rŭ na nayuxŭ rŭ ngêxgumarŭŭtama chanaxwêxe i íchamemare na naxcêx ngŭxŭ chingexŭ rŭ naxcêx chayuxŭ na yixcama choma rŭ ta yuwa ícharŭdaxŭcèx.

Pauru naxcèx nadau na Cristucèx namaxũxũ ñũxmatáta Tupanaxũtawana nangu

¹² Rũ ñũxma na ngẽma ñachaxũ pemaã rũ tama chanaxwẽxe i nagu perũxĩnũe na guxũxũ chacuáxũ i Cristuchiga, rũ ěxna guxũwama na chamexũ. Natũrũ guxũ i ngunexũgu rũ naxcèx chadauama na Ngechuchu ya Cristuarũ ngũchaũ na chaxũxũcèx, yerũ yemacèx nixĩ ga nũma ga chauxcèx nadauxũ ga noxrix. ¹³ Pa Chaueneẽgũx, pemaã nũxũ chixu rũ chomatama meãma nũxũ chacuèx rũ ñũxma rũ ta tautama nawa changu i ngẽma naxcèx chadauxũ. Natũrũ i ñũxma rũ marũ nũxũ icharũngũma i guxũma ga yema noxri nagu chixũxũ. Rũ ñũxma rũ chaugũ chaporaxẽe na aixcũma Cristucèx na chamaxũxũ na nawa changuxũcèx i ngẽma maxũ i chopẽxewaama ngẽxmaxũ. ¹⁴ Rũ ngẽmacèx i ñũxma rũ naxcèx chadau na aixcũma Cristucèx chamaxũxũ ñũxmatáta Tupanaxũtawana changu. Erũ chanayauxchaũ i ngẽma amare i nũma daxũguxũ i naãnewa naxcèx taxcèx nangemaxũ i yixema na Ngechuchu ya Cristuarũ duũxũgũ ixĩgũxũ. ¹⁵ Rũ guxãma i yixema na aixcũma Cristuaxũ yaxõgũxũ, rũ name nixĩ i ngẽmaãcũ nagu tarũxĩnũe. Natũrũ ngẽxguma chi texé i petanũwa toguama tarũxĩnũgu, rũ Tupana tá tũxũ nũxũ nacuèxẽe i ngẽma nũma nanaxwèxexũ na nũxũ tacuáxũ. ¹⁶ Rũ ngẽma inaxwèxexũ nixĩ na aixcũma naga ixĩnũeẽchaxũ rũ meãma nagu ixĩxũ i ngẽma ore i marũ nũxũ icuáxũ. ¹⁷ Pa Chaueneẽgũx, chanaxwẽxe i chauxrũũ nagu pexĩ i ngẽma pexũ nũxũ chadauxẽexũ na namexũ. ¡Rũ penangugũ na ñuxãcũ meã namaxèxũ i ngẽma togũ i duũxũgũ i toma tamaxèxũãcũma maxèxũ! ¹⁸ Rũ marũ muẽxpũxcũna pemaã nũxũ chixu, rũ ñũxma rũ changechaũãcũma rũ chaxauxãcũma wena pemaã nũxũ chixu rũ nangẽxma i muxũma i duũxũgũ i Cristuarũ uwanũrũũãcũma maxèxũ. Rũ nũmagũ rũ tama nũxũ nacuèxgũchaũ na Cristu curuchagu naxcèx yuxũ. ¹⁹ Natũrũ ngẽma duũxũgũ rũ tá dũxwa Tupana nanapoxcue. Rũ ngẽma naxũneãrũ ngũchaũ nixĩ i namaã natupanaãxũ. Rũ woo nũxũ nacuèxchirèx na wũxi i ane na yĩxũ i ngẽma chixexũ natũrũ namaã nataãegũama. Rũ ñoma i naãneãrũ ngẽmaxũguxicatama narũxĩnũe. ²⁰ Natũrũ i yixema rũ daxũguxũ i naãnewa tũxũ nangẽxma i tachica. Rũ itananguxẽe na daxũguxũ i naãnewa taxcèx ne naxũxũ ya tórũ Cori ya Ngechuchu ya Cristu ya tórũ Maxèxẽeruũ. ²¹ Rũ ñaã taxũne i yuxwèxexũ rũ nũma ya Cristu tá nanaxũchicũũ na naxũne i mexèchixũrũũ yĩxũcèx. Rũ ngẽma norũ pora i namaã guxũetũwa nangẽxmaxũ, rũ ngẽmamaãtama tá nanaxũchicũũ i taxũne na noxrũrũũ yĩxũcèx.

4

Ñũxma na tórũ Coriarũ ixĩgũxũ rũ name nixĩ na guxũguma namaã itaãegũxũ

¹ Pa Chaueneẽgũx, rũ pexũ changechaxũ rũ poraãcũ pexũ íchayadauxchaxũ. Rũ ngẽma pemaã nũxũ chixuxũrũũ chanaxwẽxe i meã tórũ Coricèx pemaxẽ erũ pema nixĩ i chorũ taãe rũ chorũ amare i Tupana choxna axũ pixĩgũxũ. ² Rũ nũxũ chacèxũ i taeyèxgũ i Ebódia rũ Chitique na nũgũmaã nangũxmũexũcèx, erũ nũmagũ rũ tórũ Corixacũgũ nixĩgũ. ³ Rũ cumax, Pa Chomũcũ ya Mecũ i Wũxigu Tupanaãrũ Puracũwa Chomaã Puracũcũx, rũ cuxna naxcèx chaca na nũxũ curũngũxẽexũcèx i ngẽma taxre i taeyèxgũ, erũ nũmagũ rũ wũxigu chomaã rũ Cremetemaã rũ ngẽma togũ i chomũcũgũ i Tupanaãrũ poperawa marũ ngoxègagũxũmaã

napuracüe i Tupanaârü orearü uwa. ⁴ Rû ñuxma na tórü Coriarü pixîgüxü, Pa Chaueneëgüx, rü name nixî i guxüguma namaã petaãëgü. Rû wena pemaã nüxü chixu, rü ¡petaãëgü! ⁵ Rû chanaxwëxe i meã pemaxë na guxüma i duüxügü pexü nacüëxgüxücëx na aixcüma mexü i duüxügü na pixîgüxü. ¡Rü nüxna pecuëxâchie na tórü Cori rü paxa tá nataeguxü na núma naxüxü! ⁶ ¡Rü taxucëxma penaxixâchiãëgü! ¡Rü Tupanamaã nüxü pixu i perü yumüxëwa i guxüma i tacü i pexü ngupetüxü! ¡Rü naxcëx ípeca rü moxë nüxna pexã! ⁷ Rû ngëmaäcü i nüma ya Tupana rü tá pexü nataãëxëë namaã i wüxi i taãë i mexëchixü i guxüma i taãë i nüxü icuáxüârü yexera mexëchixü. Rû ñuxma na Ngechuchu ya Cristuarü duüxügü pixîgüxü, rü ngëma taãë i Tupana pexna äxü rü tá nüxna pexü ínapoxü i ngëma chixexü i nagu perüxîñüëchaxü.

Name nixî i nagu tarüxîñüë i guxüma i tacü i aixcüma mexü ixîxü

⁸ Rû ñuxma Pa Chaueneëgüx, rü name nixî i nagu perüxîñüë i guxüma i ngëma ore i aixcüma ixîxü, rü guxüma i ngëma nacüma i taxucürüwama texë chixri nachiga idexaxü. Rû name nixî i nagu perüxîñüë i guxüma i ngëma ore i aixcüma meã iwéxü rü guxüma i ngëma Tupanapëxewa mexü, rü guxüma i ngëma mexü i duüxügü namaã taãëxü, rü guxüma i ngëma mexü i Tupanaxü naxcëx icuëxüüxügüxü. Rû name nixî i ngëmagu perüxîñüë. ⁹ Rû chanaxwëxe i aixcüma penaxü i ngëma pexü changüexëëxü, rü ngëma pexü namaã chixucuxëgüxü, rü ngëma chauxütawa nüxü pexîñüëxü, rü ngëma chauxütawa nüxü pedauxü na chanaxüxü. Rû ngëxguma ngëmaäcü pemaxëgu rü pemaã tá inarüxãüx ya Tupana ya tamaã irüngüxmücü rü tüxü taãëxëëcü.

Yema PiripucüĀx ga yaxögüxü rü dīerumaã Pauruxü narüngüxëëgü

¹⁰ Rû ñuxma na chorü Coriarü chíxü, rü poraäcü chataãë erü w-naxârü choxna pecuëxâchie rü choxü perüngüxëë. Rû choma nüxü chacuëx rü pema rü guxüguma choxü perüngüxëëchaü, natürü taguma pexü natauxcha ga na penaxüxü ga yema. ¹¹ Rû tama ngëma na tacü choxü taxuxücëx nixî i pemaã nüxü chixuxü i ngëmachiga. Erü choma rü marü chomaã nixü na namaã chataãëxü i ngëma choxü ngëxmaxü. ¹² Rû nüxü chacuëx na ñuxäcü na yîixü ega guxü choxü tauxgux, rü nüxü chacuëx na ñuxäcü na yîixü ega choxü namuxüchixgu. Rû marü chomaã nixü na namaã chataãëxü i ngëma choxü ngëxmaxü woo changaxpütüwegu, rü éxna woo chataiyaxgu, rü éxna woo choxü namuxüchixgu rü éxna woo choxü natauxguma. ¹³ Rû Cristu nixî ya choxü poraxëëcü, rü ngëmacëx chomaã nanguxü na chanaxüxü i guxüma i ngëma Tupana naxwëxexü na chanaxüxü. ¹⁴ Natürü ga pema rü wüxi ga mexü choxü pexügü ga yexguma guxchaxüwa chayexmagu rü choxü perüngüxëë. ¹⁵ Rû pema, Pa Yaxögüxü i PiripucüĀx, rü meãma nüxü pecuëx rü yexguma noxri Machedóniãñewa nüxü chixuxgu ga Tupanaârü ore, rü yexguma yëma íchaxüxügu, rü pexicatama nixî ga ãmare choxna pexãxü naxcëx ga yema ngüxëë ga chauxütawa peyaxuxü. ¹⁶ Rû yexguma Techarónicaarü ññewa chayexmayane, rü pema rü yëma chauxcëx penamugü ga perü ãmare na choxü perüngüxëëgüxücëx. Rû tama nixî ga yexgumaríca choxü perüngüxëëxü. ¹⁷ Rû woo perü ãmaremaã chataãë, natürü yexeraäcü chataãë erü ngëma choxü na perüngüxëëgüxücëx rü Tupana tá ãmare pexna naxã. ¹⁸ Rû ñuxma rü marü choxü nangëxma i guxüma i tacü i chanaxwëxexü, rü aixcüma

ngēmaārū yexera choxũ nangēxma. Rū ñuxma na Eporudítu núma nangexũ i perũ āmare, rú taxuũma choxũ nataxu. Rú ngēma perũ āmare i chauxcèx núma pemuxũ, rú Tupanapēxewa rú ñoma wúxi i pumara i yixixũrũxũ nixĩ, rú núma rú poraãcũ namaã nataãe. ¹⁹ Rú ngēmacèx ya chorũ Tupana rú norũ ngēmaxũgũ i mexēchixũtwa tá pexna nanaxã i guxũma i tacũ i pexũ taxuxũ. Rú ngēmaãcũ tá nanaxũ erũ Ngechuchu ya Cristuarũ duũxũgũ pixĩgũ. ²⁰ Rú name nixĩ i guxũguma nüxũ ticuèxũgũ ya Tanatũ ya Tupana. Rú ngēmaãcũ yĩ.

Pauru nanaguxēẽ ga norũ popera rú wenaxãrũ yema duũxũgũxũ narũmoxẽ

²¹ Rú chanaxwèxe i chauégagu nüxũ perũmoxēgũ i guxũma i taeneēgũ i Ngechuchu ya Cristuaxũ yaxõgũxũ. Rú ngēxgumarũũ ta pexũ narũmoxēgũ i ngēma taeneēgũ i chauxũtawa ngēxmagũxũ. ²² Rú ngēxgumarũũ ta pexũ narũmoxēgũ i guxũma i taeneēgũ i núma Dumawa ngēxmagũxũ. Rú ngēma yexera pexũ rũmoxēgũxũ rú ngēma nixĩ i taeneēgũ i Dumaãrũ ãēxgacũ ya tacũxũ-tawa puracũexũ. ²³ Rú chanaxwèxe i tórũ Cori ya Ngechuchu ya Cristu pexũ narũngũxēẽ i guxãma i pemax. Rú ngēmaãcũ yĩ.

Rú nuãma pexna,
Pauru

POPERA GA COROCHAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxü narümoxē ga yema yaxōgūxū ga Corochawa yexmagūxū

¹⁻² Pa Chaueneēgū ya Corochaarū Īñewa Ngēxmagūxex, choma i Pauru rü wūxigu namaā i taeneē i Timutéu nixī i pexcēx tanaxūmatūxū i ñāā popera. Rü choxū nixī ga Tupana ga inamuāchixū na guxūwama nüxū chixuchigūxūcēx i Ngechuchu ya Cristuarū ore. Rü pexcēx chanaxūmatū i guxāma i pema ya chaueneēgū ya aixcūma Tupanaārū duūxūgū ixīgūxe ya Cristuaxū yaxōgūxe. Rü chanaxwēxe i Tanatū ya Tupana pexū narūngūxēē na meā pegūmaā pemaxēxūcēx rü petaēēgūxūcēx.

Pauru rü yema yaxōgūxūcēx nayumūxē

³ Rü guxūguma i ngēxguma pexcēx tayumūxēgūgu, rü moxē nüxna taxā ya Tupana ya Nanatū ya tórū Cori ya Ngechuchu ya Cristu. ⁴ Rü ngēmaācū tanaxū erū marū nüxū tacuāchiga na ñuxācū aixcūma meā Ngechuchu ya Cristuaxū peyaxōgūxū, rü aixcūma nüxū pengechaūgūxū i guxūma i ngēma duūxūgū i Tupanaārū ixīgūxū. ⁵ Rü nüxū tacuēxgū na ngēmaācū meā Tupanapēxewa pemaxēxū erū penayauxgūchaū i ngēma mexūgū i Tupana pexū namaā nguxūxū i daxūguxū i naānewa. Rü ñuxma rü meā ípenanguxēē na penayauxgūxūcēx i ngēma mexūgū yerū marū nüxū pexīnūē ga Tupanaārū ore i mexū i aixcūma ixīxū. ⁶ Rü ngēmatama ore i mexū ga pexūtawa nguxū, rü guxūwama nangu i ñuxmax. Rü guxūwama ningūchigū rü duūxūgūarū maxūxū naxūchicūū, yema perū maxūxū na naxūchicūūxūrūū ga yexguma nüxū pexīnūēgu rü nüxū pecuēxgūgu na ñuxācū Tupana aixcūma pexū na ngechaūxū rü pexū rūngūxēēchaūxū. ⁷ Rü ngēma ore i mexū nixī ga pexū nangūxēēxū ga Epáparu ya tomūcū ya nüxū tangechaūgūcū ya wūxigu tomaā Tupanaārū orewa puracūcū. Nūma rü Cristuarū puracūtanūxū ya mecū nixī, rü nūma nixī i tochicūū pexū nangūxēēxū. ⁸ Rü nūma ya Epáparu nixī i tomaā nüxū yaxuxū i pechiga na ñuxācū Tupanaāē i Üünexūārū ngūxēēmaā choxū pengechaūgūxū. ⁹ Rü ngēmacēx i toma ga noxritama pexū tacuāchigagu, rü taguma nüxū itayarūngūmaē na pexcēx tayumūxēgūxū. Rü guxūguma Tupanana naxcēx tacagū na meā pexū nüxū nacuēxēēxūcēx i ngēma nūma nanaxwēxexū na penaxūxū. Rü nüxna naxcēx tacagū na pexna naxāāxūcēx i nagūxūraūxū i cuēx i Naāē i Üünexūwa ne ūxū. ¹⁰ Rü nüxna naxcēx tacagū na meā tórū Cori naxwēxexūācūma na pemaxēxūcēx rü guxūguma penaxūxūcēx i ngēma nūma nanaxwēxexū. Rü nüxna naxcēx tacagū na pexū natauxchaxēēāxūcēx na togūxū perūngūxēēgūxūcēx rü guxū i ngunexūgu yexeraācū Tupanaxū pecuāxūcēx. ¹¹ Rü nüxna naxcēx tacagū na norū pora i mexēchixūmaā pexū naporaexēēxūcēx, na namaā peporaexūcēx i guxūma i guxchaxūgū rü yaxna namaā pexīnūēxūcēx. ¹² Rü ñuxūchi tanaxwēxe i taāēācūma Tanatū ya Tupanana moxē pexā, erū nūma pexū nimexēēgū na pema rü ta penayauxgūxūcēx i ngēma mexūgū i naxūtawa ngēxmagūxū i nūma tá nüxna naxāxū i ngēma duūxūgū i noxru ixīgūxū. ¹³ Yerū nūma ga Tupana rü marū Chatanámēxēwa tūxū ínanguxūxēē rü Nane ya nüxū nangechaūcūmēxēwa

tüxü nangëxmagüxëë. ¹⁴ Rü guma Nanegagu nixi ga tüxü namaxëxëëxü rü tüxü nüxü nangechaüxü ga törü pecadugü.

Rü yexguma pecaducëx nayuxgu ga Cristu rü Tupana nügümaã nanangüxmüëxëë ga duïxügü

¹⁵ Taguma texé Tupanaxü tadau, natürü nüma rü núma nanamu ga Nane na duïxügü nüxü daugüxüçëx rü nüxü nacuëxgüxüçëx na ñuxácü na yïxü i nüma ya Tupana. Rü naxüpa ga guxüma ga tacü i ñuxma ngëxmaxü, rü nüxïra marü nayexma ga Tupana Nane. ¹⁶ Rü Nanexü nixi ga namuxü ga Tupana na naxüaxüçëx ga guxüma i tacü i ñuxma ngëxmaxü i daxüguxü i naãnewa rü ñoma i naãnewa, rü guxüma i ngëma nüxü idauxü rü ngëma tama nüxü idauxü. Rü yemaäcü nanaxü ga guxüma ga norü orearü ngeruügü i daxüçüãxârü äëxgacügü rü guxüma ga ngoxogüarü äëxgacügü. Rü yemaäcü nanaxü ga guxüma na nüxü yacuëxüügüxüçëx. ¹⁷ Rü naxüpa i guxüma i tacü i ñuxma ngëxmaxü, rü Cristu rü marü nüxïra nayexma. Rü nagagu nixi i meã inanuxü i guxüma erü nüma nixi i namaã inacuáxü. ¹⁸ Rü nüma ya Cristu rü naëru nixi i guxüma i ngëma yaxögüxü. Rü nüma nixi ga naxüaxü rü nüxna naxäaxü ga maxü. Rü nüma nixi ga nüxïra yuwa ínadaxü na guxüarü äëxgacü yïxüçëx. ¹⁹ Rü Cristu rü Tupanaxüchi nixi, yerü yemaäcü nanaxwëxe ga Tupana. ²⁰ Rü Tupana rü ñoma ga naãnewa nanamu ga Cristu na curuchagu pecaducëx nayuxüçëx. Rü yemaäcü nixi ga Tupana nügümaã nangüxmüëxëëxü ga guxüma i ñoma i naãnewa ngëxmaxü rü guxüma i daxüguxü i naãnewa ngëxmaxü. Rü yemaäcü nanaxü ga Tupana yerü yemaäcü nanaxwëxe. ²¹ Rü pema ga üpa rü tama Tupanamüçügü pixigü yerü naxchi pexaie nagagu ga perü chixexü ga nagu perüxïnëxü rü pexüxü. ²² Natürü i ñuxma ya Tupana rü nügümaã pexü narüngüxmüëxëë na namüçügü i mexü pixigüxüçëx. Rü yemaäcü nanaxü ga Tupana ga yexguma Cristu duïxüxü ixixgu rü curuchawa ngüxü yangexgu rü yexma nayuxgu. Rü yemaäcü nayu ga Cristu na nügüxütawa pexü nagagüxüçëx rü napëxewa pimexüçëx rü nataxuxüçëx i perü chixexü. ²³ Natürü ngëma na pengugüxüçëx, rü penaxwëxe na guxüguma mea peyaxögüxü rü meã naga pexïnëxü rü taguma nüxü perüxoexü i ngëma norü ore i mexü ga marü nüxü pexïnëxü. Rü ngematama ore nixi i ñuxma nüxü yaxugüexü i güxü i naanewa.

Tupana rü Pauruxü namu na guxüma ga yaxögüxüxü nangüxëëxüçëx

²⁴ Rü ñuxma na woo pexcëx ngüxü chingexü rü chataãë erü nüxü chacuëx rü ñaã chaxunemaã choma rü ta chayanguxëë ga yema ngüxü ga Cristu ingexü naxcëx i norü duïxügü i yaxögüxü. ²⁵ Rü ñuxma ya Tupana rü choxü namu na nüxü charüngüxëëxüçëx i guxüma i ngëma norü duïxügü i yaxögüxü. Rü perü mexüçëx nixi i choxü namuxü na guxüwama meã nüxü chixuxüçëx i norü ore. ²⁶⁻²⁷ Rü ngëma Tupanaärü ore rü ñanagürü:

“Rü Cristu rü pewa nangëxma i ñuxmax, rü nagaguxicatama nixi i pexü nangëxmaxü i pechica i daxüguxü i naãnewa i ngextá ínamexëchixüwa”,

ñanagürü. Rü yema nuxcümaügüxü ga duïxügü rü tama nüxü nacuëxgü ga yemachiga, natürü ñuxma ya Tupana rü norü duïxügüxü nüxü nacuëxëë. Erü nüma ya Tupana rü norü duïxügüxü nüxü nadauxëëchaü na ñuxácü poraäcü pexü nangechaüxü rü pexü nangüxëëxü i guxüma i

pema i tama Yudiŕgü ixĩgũxe. Rũ ñuxma i pema na woo tama Yudiŕgü pixĩgũxũ, natũrũ pema rũ ta pexũ nangẽxma i pechica i daxũgũxũ i naãnewa erũ Cristuaxũ peyaxõgũ. ²⁸ Rũ ñuxma i toma rũ Cristuchigaxũ nixĩ i tixuxũ. Rũ ngema ore i Tupanaarũ cuèx nawa ngexmaxũmaã nixĩ i guxũma i duũxũgũxũ tixucuxẽgũxũ rũ tanangũexẽẽxũ na ngemaãcũ ngearũ chixexũãxũ Cristuxũtawa tagagũxũ. ²⁹ Rũ ngẽmatama puracũ nixĩ i nawa poraãcũxũchima chapuracũamaxũ woo tacũ rũ guxchaxũ chauxcèx ínguxgu. Rũ guxũma i ngẽma pora i Cristu choxna ãxũ i chowa ngẽxmaxũ nixĩ i choxũ poraxẽẽxũ na chanaxũamaxũcèx i ngẽma puracũ.

2

¹ Pa Chaueneẽgũx, chanaxwèxe i nũxũ pecuèx na ñuxãcũ poraãcũ pexcèx chapuracũxũ. Rũ ngẽxgumarũ ta chanaxwèxe i nũxũ pecuèx na ñuxãcũ poraãcũ chapuracũxũ naxcèx i ngẽma taeneẽgũ i Laodichéaarũ íãnewa ngẽxmagũxũ rũ guxũma i petanũxũgũ i taguma choxĩ daugũxũ. ² Rũ ngẽmaãcũ poraãcũxũchima chapuracũ na nũxũ rũ ta chanangũchaũxẽẽxũcèx. Erũ chanaxwèxe i guxũma aixcũma nũgũ nangechaũgũ rũ nũxũ nangẽxma i ngẽma mexũ i cuèx i aixcũma ixĩxũ. Rũ ngẽmaãcũ tá meãma nũxũ nacuèxgũ ga yema noxri Tupanaxĩcatama nũxũ cuáxũ. Rũ yima rũ Cristutama nixĩ. ³ Rũ nũma nixĩ i nũxũ nangẽxmaxũ i guxũma i cuèx i aixcũma mexũ. Rũ nũma nixĩ i taxcèx nangoxẽẽãxũ i Tupanachiga. ⁴ Rũ pemaã nũxũ chixu i ngẽma ore erũ tama chanaxwèxe na texé pexũ womũxẽẽgũxũ namaã i tacũ rũ ore i chixexũwa pexũ gagũxũ. ⁵ Rũ woo na tama ngema petanũwa changẽxmaxũ, natũrũ chauãẽwa rũ poraãcũ pegu charũxĩnũ. Rũ wũxi i chorũ taãẽ nixĩ na nũxũ chacuáxũ na ñuxãcũ meã pegũ ipinuxũ na meã pegũmaã ipecuáxũcèx rũ ñuxãcũ tama nũxũ perũxoexũ na Cristuaxũ peyaxõgũxũ.

Ñuxma na Cristuarũ ixĩgũxũ rũ ngexwacaxũxũ i maxũ tũxũ nangẽxma

⁶ Rũ pema ga noxri rũ meãma tórũ Cori ya Ngechuchu ya Cristuxũ peyauxgũ. Rũ ñuxma rũ yema noxri meãma na penayauxgũxũrũ rũ name nixĩ i guxũguma nũxna penaxã i perũ maxũ na nũma pexũ namaã inacuáxũcèx. ⁷ Rũ wũxi i nanetũ nanaxwèxe i naxchũmèxã na nataixũcèx rũ na namaxũxũcèx. Rũ ngẽxgumarũ ta i pema rũ penaxwèxe na meã Cristuna peyaxũxgũxũ na meã nawa piyaetanũxũcèx rũ meã naxcèx pemaxẽxũcèx rũ meã nũxũ peyaxõgũamaxũcèx yema noxri Epáparu pexũ ngũexẽẽgurũ. Rũ name nixĩ i guxũguma Tupanaana moxẽ pexã. ⁸⁻⁹ ¡Rũ naxcèx pexuãẽgũ i ngẽma duũxũgũ i pexũ womũxẽẽgũchaũxũ! Rũ tama name i nũxũ iperũxĩnũẽ i ngẽma norũ ore i tama aixcũma ixĩxũ rũ taxuwama mexũ. Erũ ngẽma duũxũgũ rũ pexũ nangũexẽẽchaũ na nagu pexĩxũcèx i ngẽma nacũmagũ ga nuxcũmaũgũxũ ga duũxũgũ nagu íxũ. Rũ ñoma i naãneãrũ nguxẽẽtaegũ nixĩ i inaxĩnũẽxũ. Rũ tama aixcũma Cristuchiga nixĩ i ngẽma pexũ nangũexẽẽxũ. Rũ name nixĩ i nũxna pixĩgachi i guxũma i ngẽma nguxẽẽtaerũgũ i chixexũgũ rũ Cristuwe perũxĩ. Erũ Cristu rũ Tupanaxũchi nixĩ rũ guxũma i Tupanaãrũ pora rũ Cristuwa nangẽxma. ¹⁰ Rũ ñuxmax, rũ Tupanaãrũ maxũ rũ norũ pora rũ aixcũma pewa nangẽxma erũ namẽxwa pengẽxmagũ ya Cristu ya namaã icuácũ i guxũma i daxũcũãxãrũ ãẽxgacũgũ rũ guxũma i ngoxogũarũ ãẽxgacũgũ. ¹¹ Rũ ngẽma Yudiŕgü rũ nũgũ ínawiechẽxmũpẽxechiraũgũ na Tupanapẽxewa yamexũcèx. Natũrũ ngẽxguma Cristuaxũ yaxõgũgu rũ tama ngẽmaãcũ tamaã nanaxũ ya Cristu na imexũcèx. Erũ nũma ya

Cristu rü tórü maxŭwa napuracü rü tüxŭ ínanguxŭxêê nawa i taxŭneârü ngúchaŭgü. Rü ngêmaâcü nixî i tüxŭ yamexêêxŭ na Tupanapêxewa imexŭcêx. ¹² Rü yexguma ípebaiŭgu, rü Cristu na itáxŭrŭŭ yexma natêx ga yema nuxcŭmaŭxŭ ga perü maxŭ. Rü yema Cristu na írŭdaxŭrŭŭ rü pema rü ta penayaxu i maxŭ i ngexwacaxŭxŭ, yerü peyaxôgü na Tupana norü poramaã Cristuxŭ írŭdaxêêxŭ. ¹³ Rü ŭpa ga pema rü tama aixcŭma pexŭ nayexma ga maxŭ i taguma gúxŭ yerü pepecaduâxgü rü pexeneârü ngúchaŭ pexŭgü. Natürü i ñuxma rü Cristuxŭ namaxêêxŭrŭŭ pexŭ namaxêêê ya Tupana erü Cristuarü duŭxŭgü pixŭgü. Rü Tupana rü marü Cristugagu tüxŭ nüxŭ nangechaŭ ga guxŭma ga tórü pecadugü. ¹⁴ Rü noxri rü tachixe yerü tama aixcŭma naga taxŭnŭê ga yema mugü ga Moŭché tüxna âxŭ, rü tórü pecadugü rü yuwa tüxŭ nagagü. Natürü ga Cristu rü curuchagu tórü pecaducêx nayu, rü yemaâcü Tupana tüxŭ nayangutanŭxêê ga yema tórü pecadugü. ¹⁵ Rü yexguma curuchagu nayuxgu ga Cristu, rü yexguma nixî ga Chatanáxŭ naporamaêxŭ ga Tupana. Rü yexguma nixî ga guxŭ ga duŭxŭgŭpêxewa Chatanáxŭ naxânexêêxŭ ñoma wŭxi i churaragŭarü âêxgacü i norü uwanü i nüxŭ naporamaêxŭxŭ naxânexêêxŭrŭŭ.

Name nixî i naxcêx tadaugü i ngêma mexŭgü i daxŭguxŭ i naânewa ngêmagŭxŭ

¹⁶ Rü ñuxma rü taxucêxma tüxcŭŭ pexŭ nixu i ngêma Yudíugü ega woo tama naxrŭŭ penaxŭxgux. Nŭmagü rü ñuxre i ônagŭxicatama nangôxgü, rü ñuxre i axeŭxŭcatama nixaxgü, rü ñuxre i petaarü ngunexŭgü naxauregü na ngêmaâcü Tupanaxŭ yacuêxŭŭgŭxŭcêx. Rü nangêxma i norü peta i gucü ya taunecŭgu Tupanacêx naxauregŭxŭ rü togü i petagü i gucü ya tauemacŭgu naxauregŭxŭ. Rü nüxŭ nangêxma i nacŭmagü na ñuxâcü ngŭxchigaarü ngunexŭgü naxauregŭxŭ. ¹⁷ Rü aixcŭma yema nuxcŭmaŭgŭxŭ ga Yudíugü rü nanaxauregü ga yema nacŭmagü yerü ga Cristu rü tauta ínangu ga yexguma. Natürü i ñuxma rü marü ínangu ya Cristu rü tórü pecaducêx nayu. Rü ñuxma rü name nixî na naga ixŭnŭêxŭ rü tama nagu ixŭxŭ i ngêma nuxcŭmaŭgŭxŭ i nacŭmagü. ¹⁸ ¡Rü tãútama naga pexŭnŭê i ngêma duŭxŭgü i nüxŭ ixugŭxŭ na ipeyarŭtauxexŭ ega tama daxŭcŭâx i orearü ngeruŭgŭxŭ picuêxŭŭgŭgu! Nŭmagü rü tama nŭgü nicuêxŭŭgŭneta rü nŭgü nixugü na yangoxetŭgŭxŭ. Rü noxrŭtama cuêxmaâmare nŭgü nicuêxŭŭgŭ. ¹⁹ Natürü i nŭmagü rü tama aixcŭma naga naxŭnŭê ya yima taeru ixŭcü ya Cristu ya tüxŭ poraexêêcü rü tüxŭ iyaetanŭxêêcü i tórü ôwa i guxâma i yixema i norü duŭxŭgü ixŭgŭxe. Rü nüma ya Cristu nixî i wŭxigu tüxŭ naxŭnŭêxêêxŭ i wŭxichigü i yixema ngêma Tupana naxwêxexŭrŭŭ. ²⁰ Rü yexguma nayuxgu ga Cristu rü yexma nayu ga nuxcŭmaŭxŭ ga perü maxŭ, rü yexma nayarŭxo ga guxŭma ga nuxcŭmaŭgŭxŭ ga pecŭmagü i ñoma i naânecŭâx i duŭxŭgü nagu rŭxŭnŭêxŭ. Rü ngêmacêx i ñuxmax çrŭ tüxcŭŭ nixî i ñoma i naânecŭâx maxêxŭrŭŭ nagu pemaxêxŭ i pemax, rü tüxcŭŭ nixî i ngêma Yudíugŭcŭmagu pexŭxŭ? ²¹ Rü nŭmagü i Yudíugü rü nüxŭ nixugŭe rü ñanagŭrŭgü:

“Tama name i nüxŭ quingôgü i ngêã, rü tama name i cunangôx i yea, rü tama name i cunayaxu i ngêma”, ñanagŭrŭgü. ²² Natürü guxŭma i ngêma nacŭmagü rü paxa tá inayarŭxo erü duŭxŭgŭarü nixŭgü. Rü ngêma pexŭ namuxŭ rü duŭxŭgŭarü mugŭmare nixî. Rü ngêma pexŭ nangŭexêêxŭ rü duŭxŭgŭarü ngŭxêêtaemare nixî. ²³ Rü guxŭma i ngêma pexŭ namuxŭ

rū pexcèx namexcüraxŭ erū pexŭ naxucuxègŭ na tacŭ pexauregŭxŭcèx, rū tama pegŭ picuèxŭŭgŭxŭcèx, rū meã pexenemaã ipecuèxgŭxŭcèx. Natürŭ guxŭma i ngèma mugŭ rū tama aixcŭma pexŭ narŭngŭxŭèè na nŭxŭ perŭxoexŭcèx i pexeneärŭ ngúchaŭgŭ.

3

¹ Rŭ ñuxma i pemax, rū Cristu wena maxŭxŭrŭŭ rū pexŭ nangèxma i maxŭ i ngexwacaxŭxŭ. Rŭ ngèmacèx name nixŭ i naxcèx pedau i ngèma mexŭgŭ i daxŭguxŭ i naãnewa ngèxmaxŭ i ngextá Cristu rū Tupanaärŭ tŭgŭnecŭwawa írŭtoxŭwa rū namaã ãèxgacŭ íyŭxŭwa. ² Rŭ name nixŭ i guxŭguma nagu perŭxŭnŭè i ngèma daxŭguxŭ i naãnewa ngèxmaxŭ i ngemaxŭgŭ rū tama i ngèma ñoma i naãnewa ngèxmaxŭ. ³ Yerŭ yexguma nayuxgu ga Cristu rū yexma nayu ta ga nuxcŭmaŭxŭ ga perŭ maxŭ. Rŭ ñuxma rū pexŭ nangèxma i perŭ maxŭ i ngexwacaxŭxŭ erŭ Cristutanŭxŭ pixŭgŭ rū Tupanamèxèwa pengèxmagŭ. ⁴ Rŭ nŭmatama ya Cristu nixŭ i pexŭ namaxèxèxŭ. Rŭ ngèxguma wena nŭma nangoxgu, rū namaã tá pengóe, rū naxrŭŭ tá pimexèchi.

Marŭ nŭxŭ tarŭxo i nuxcŭmaŭxŭ i tacŭma i chixexŭgŭ rū tanayaxu i ngexwacaxŭxŭ i tórŭ maxŭ

⁵ Rŭ ñuxma rū name nixŭ i nŭxŭ perŭxoe i guxŭma i ñoma i naãneärŭ chixexŭ i pewa ngèxmaxŭ. Rŭ tama name i pemèxna naŭ i ngemaã pemaxè, rū tama name i petena naŭ ya yatŭmaã pemaxè. Rŭ tama name i penaxŭ i pexeneärŭ ngúchaŭ rū bai i nagu perŭxŭnŭèmare. Rŭ tama name i pexŭ nangúchaŭ i tacŭ rū to i chixexŭgŭ. Rŭ tama name i pegŭnaxŭcatama penanuxuchigŭchaŭ i guxŭma i ngèmaxŭgŭ, erŭ yŭxema ngèma nacŭma tŭxŭ ngèxmaxè rū dŭxwa namaã tatupanaãx. ⁶ Rŭ guxŭma i ngèma chixexŭgŭcèx tá nixŭ i Tupana napoxcuexŭ i ngèma duŭxŭgŭ i ngèmaãcŭ maxèxŭ rū tama naga ñnŭèchaŭxŭ. ⁷ Rŭ pema ga ŭpa rū penaxŭ ga yema chixexŭgŭ, rū yemaãcŭ pemaxè. ⁸ Natürŭ i ñuxma rū name nixŭ i nŭxŭ perŭxoe i guxŭma i ngèma na pegŭchi pexaixŭ, rū pegŭmaã penuèxŭ, rū chixri pemaxèxŭ, rū pegŭmaã peguxchigagŭxŭ, rū guxŭma i ngèma chixexŭ i dexa i nŭxŭ pixuxŭ. ⁹ Rŭ tama name i pegŭmaã pidorae, erŭ marŭ ípenatèx ga nuxcŭmaŭxŭ ga pecŭma rū guxŭma ga yema chixexŭgŭ ga ŭpa pexŭgŭxŭ. ¹⁰ Rŭ ñuxma rū marŭ penayaxu i ngexwacaxŭxŭ i perŭ maxŭ rū ngexwacaxŭxŭ i duŭxŭgŭ pixŭgŭ. Rŭ guxŭ i ngunexŭgu rū Tupana pexŭ ningexwacaxŭxŭèchigŭ na yexeraãcŭ pimexŭcèx naxrŭŭ rū yexeraãcŭ nŭxŭ na pecuèxgŭxŭcèx ya Tanatŭ ya Tupana ya maxŭ tŭxna ãcŭ. ¹¹ Rŭ ñuxma rū Tupanacèx rū nŭetama nixŭ ega Yudŭ quixŭgu rū èxna tama. Rŭ nŭetama nixŭ ega ícuwiechèx-mŭpèxechiraŭgu rū èxna tama. Rŭ nŭetama nixŭ ega tacŭ rū nachŭãnecŭãx i duŭxŭ quixŭgu, rū èxna tacŭ rū duŭxŭ quixŭgu. Rŭ nŭetama nixŭ ega wŭxi i coriarŭ duŭxŭ quixŭgu, rū èxna taxŭxearŭma duŭxŭ quixŭgu. Erŭ ñuxma rū ngèma guxŭärŭ yexera aixcŭma tŭxŭ mexŭ nixŭ na Cristu rū guxŭärŭ ãèxgacŭ yŭxŭ rū guxãwama nangèxmaxŭ. ¹² Rŭ ñuxma ya Tupana rū pexŭ nangechaŭ i pema rū pexŭ nadei na noxrŭ pixŭgŭxŭcèx. Rŭ ngèmacèx name nixŭ i guxŭguma pexŭ nangechaŭtŭmŭŭgŭ i togŭ, rū namaã pemecŭmagŭ, rū tauxchaãcŭma nŭxna penaxã, rū taguma napèxewa pegŭ picuèxŭxŭgŭ. Rŭ ngèxguma woo tacŭ pemaã naxŭxgux rū name nixŭ i yaxna namaã pexŭnŭè. ¹³ Rŭ name nixŭ i wŭxichigŭ i pema na pegŭmaã yaxna pexŭnŭèxŭ. Rŭ ngèxguma

chi texé tacū pemaã üxgux, rü name nixĩ i pegüxũ nüxũ pengechaũgü i ngẽma. Rü yexgumarũũ ga tórü Cori na pexũ nüxũ ngechaũxũrũũ, rü name nixĩ i togüaxũ nüxũ pengechaũgü. ¹⁴ Rü guxũãrũ yexera mexũ nixĩ na pegü pengechaũgüxũ. Erü ngẽxguma aixcũma pegü pengechaũgügu rü aixcũma wüxigu tá perüxĩnũe, rü meã pegümaã tá pemaxẽ. ¹⁵ Rü name nixĩ na pemaã inacuáxũ i ngẽma taãẽ i Cristu pexna ãxũ na ngẽmaãcü aixcũma pegü pengechaũgüxũcèx. Yerü yemacèx nixĩ ga Tupana pexũ dexũ na wüxitama i duũxũgü pixĩgüxũcèx rü meã wüxigu perüxĩnũe xũcèx. Rü name nixĩ i moxẽ nüxna pexãgü ya Tupana. ¹⁶ Rü name nixĩ i guxũguma peãewa nangẽxma i Cristuarü ore rü taãẽãcüma naga pexĩnũe. Rü name nixĩ i meã peãexũ pecuããcüma namaã pegü pengüexẽẽ rü pegü pixucuxẽgü na ngẽmaãcü pegüaxũ penangúchaũxẽxũcèx. Rü name nixĩ i aixcũma Tupanana moxẽ pexãgüãcüma naga pewiyaegü i nagüxũraũxũ i norü wiyaegü. ¹⁷ Rü guxũma i ngẽma pexũxũ rü nüxũ pixuxũ rü name nixĩ i tórü Cori ya Ngechuchuégagu penaxũ. Rü name nixĩ i ngẽmaãcü Ngechuchuégagu Tanatü ya Tupanana moxẽ pexãgü.

Tupana nanaxwèxe na meã namaxẽxũ i duũxũgü i Cristuaxũ yaxõgüxũ

¹⁸ Pa Ngexũgü i Ātegüxũx, rü name nixĩ i petega pexĩnũe. Erü woetama ngẽma nixĩ i mexũ na penaxũxũ erü tórü Cori ya Cristuarü duũxũgü pixĩgü. ¹⁹ Pa Yatügu i Āmaxgüxũx, rü name nixĩ i ngĩxũ pengechaũgü i pemèxgü. Rü tama name na ngĩmaã pechixecümagüxũ. ²⁰ Pa Buxũgüx, rü name nixĩ i guxũwama penatü rü peega pexĩnũe, erü ngẽma nixĩ i namaã nataãẽxũ ya tórü Cori. ²¹ Pa Papágüx, rü tama name i penanuẽxẽe i pexacügu. Erü ngẽxguma ngẽmaãcü penaxũxgux rü ngürüãchi tá nüxũ nawèxtümüũ i ngẽma namaã nüxũ pixuxũ. ²² Pa Duũxũgüx i Ixããrũ Coriãxgüxũx, rü name nixĩ i guxũwama naga pexĩnũe i perü corigü i ñoma i naãnewa pemaã icuèxgüxũ. Rü tama name i pexũ nadaugüguxicatama meã pepuracüe na ngẽmaãcü penataãẽxẽxũcèx. Natürü name nixĩ i mexũ i perü ngúchaũmaã guxũguma meã pepuracüe erü tórü Corixũ pemuũe. ²³ Rü guxũma i ngẽma perü puracü i pexũxüwa rü name nixĩ i perü ngúchaũmaã penaxũ ñoma tórü Cori ya Cristuaxũ pepuracüexũrũũ rü tama i duũxũgüaxũ. ²⁴ Rü marü nüxũ pecuèx rü daxũgüxũ i naãnewa rü tórü Cori ya Cristu tá pexna nanaxã i perü ãmare i maxũ i taguma gúxũ. Erü yima Cristu ya aixcũma perü Cori ixĩcüaxũ nixĩ i pepuracüexũ. ²⁵ Natürü yixema chixexũ üxe rü tá ta tanayaxu i tümaãrũ natanü naxcèx i ngẽma chixexũ i taxũxũ, rü aixcũma Tupana tá tüxũ napoxcu. Erü Tupanapèxewa rü guxũma i duũxũgü rü nawüxigu, rü taxucürüwama texé Tupanachèxwa tiña ega chixexũ taxũxgux.

4

¹ Rü pemax, Pa Corigüx, rü name nixĩ i perü duũxũgümaã pemecümagüxũ, rü tama penawomüxẽẽxũ. ¡Rü nüxna pecuèxãchie na pema rü ta pexũ nangẽxmaxũ ya perü Cori ya daxũgucü! ² ¡Rü guxũguma peyumüxègü, rü pexuãẽgü na tama chixexũgu peyixũcèx! ¡Rü Tupanana moxẽ pexãgü! ³ ¡Rü toxcèx rü ta peyumüxègü na Tupana toxũ natauxchaxèẽxũcèx na nüxũ tixuxũcèx i norü ore i mexũ, rü meãma duũxũgümaã nüxũ tixuxũcèx i ngẽma ore ga noxri tama nüxũ nacuèxgüxũ i Cristuxiga! Rü ngẽma oreçèx nixĩ i ñuxma ichapoxcuxũ. ⁴ Rü chanaxwèxe i chauxcèx peyumüxègü na meã duũxũgücèx

chanangoxēēxŭ i ngēma ore, erŭ ngēma nixī i mexŭ na chanaxŭxŭ. ⁵ ;Rŭ meā pemaxē napēxewa i ngēma duŭxŭgŭ i tama yaxōgŭxŭ! ;Rŭ ñŭxma na pexŭ natauxchaxŭ, rŭ yoxni paxa penaxŭx i Tupanaārŭ puracŭ! ;Rŭ taxŭ i perŭchomarexŭ! ⁶ Rŭ ngexguma togŭ i duŭxŭgŭmaā pidexagŭgu, rŭ name nixī i penataāēxēē namaā i ngema dexa i namaā nŭxŭ pixuxŭ. ;Rŭ ngemaācŭ mea penangaxŭ i ngema pexna cēxŭ nachiga i perŭ ō!

Pauru nanaguxēē ga norŭ popera rŭ wenaxārŭ yema duŭxŭgŭxŭ narŭmoxē

⁷ Rŭ nŭma ya taeneē ya Tíquicu ya nŭxŭ ingechaŭgŭcŭ rŭ aixcŭma choxŭ narŭngŭxēē rŭ wŭxigu chomaā Cori ya Tupanacēx napuracŭ. Rŭ nŭma tá pemaā nŭxŭ nixu i chauchiga. ⁸ Rŭ ñŭxma rŭ petanŭwa chanamu na pexŭ nataāēxēēxŭcēx rŭ pemaā nŭxŭ yaxuxŭcēx na ñuxācŭ toxŭ nangupetŭxŭ i tomax. ⁹ Rŭ Tíquicumaā petanŭwa chanamu i Onéchimu ya taeneē ya nŭxŭ ingechaŭgŭcŭ ya aixcŭma meā Tupanaārŭ puracŭ ŭcŭ. Rŭ nŭma rŭ petanŭxŭ nixī. Rŭ nŭmagŭ tá nixī i pemaā nŭxŭ yaxugŭxŭ na tacŭ ngupetŭxŭ i núma. ¹⁰ Rŭ pexŭ narŭmoxē i Aritácŭ i wŭxigu chomaā poxcuxŭ. Rŭ ngēxgumarŭŭ ta pexŭ narŭmoxē i Marcu i Bernabéeneē ixīxŭ. Rŭ marŭ pemaā nŭxŭ chixu i Marcuchiga na meā penayauxgŭxŭcēx i ngēxguma petanŭwa nanguxgu. ¹¹ Rŭ ngēxgumarŭŭ ta pexŭ narŭmoxē ya taeneē ya Ngechuchu ya Ixaixcŭmacŭgu āegacŭ. Rŭ ngēma tomaēxpŭx i yatŭgŭ rŭ ngēxcatama nixī i Yudŭgŭ i yaxōgŭxŭ i wŭxigu chomaā puracŭexŭ i Tupanaārŭ puracŭwa. Rŭ nŭmagŭ rŭ poraācŭ choxŭ nataāēxēēgŭ. ¹² Rŭ ngēxgumarŭŭ ta pexŭ narŭmoxē i Epáparu. Rŭ nŭma rŭ petanŭxŭ nixī, rŭ aixcŭma nanaxŭ i Cristuarŭ puracŭ. Rŭ nŭma rŭ norŭ yumŭxēwa rŭ guxŭguma Tupanaxŭ nacēēxŭ pexcēx na aixcŭma meā pemaxēxŭcēx rŭ peyaxōgŭamaxŭcēx rŭ aixcŭma penaxŭxŭcēx i ngēma Tupana naxwēxexŭ. ¹³ Rŭ choma rŭ marŭ nŭxŭ chadau rŭ pemaā nŭxŭ chixu i ñuxācŭ Epáparu poraācŭ pexcēx napuracŭ rŭ naxcēx napuracŭ i ngēma taeneēgŭ i Laodichéaarŭ ĩānewa rŭ Iráporiarŭ ĩānewa ngēxmagŭxŭ. ¹⁴ Rŭ Luca ya duturu ixīcŭ ya nŭxŭ ingechaŭgŭcŭ, rŭ pexŭ narŭmoxē. Rŭ ngēxgumarŭŭ ta pexŭ narŭmoxē i Dema. ¹⁵ ;Rŭ chauégagu nŭxŭ perŭmoxēgŭ i taeneēgŭ i Laodichéawa ngēxmagŭxŭ! ;Rŭ ngēxgumarŭŭ ta nŭxŭ perŭmoxēgŭ i Nifa rŭ guxŭma i taeneēgŭ i yaxōgŭxŭ i napatawa ngutaquēxegŭxŭ! ¹⁶ Rŭ ngēxguma marŭ nŭxŭ pedamatŭguwena i ñāā popera, rŭ chanaxwēxe i Laodichéawa penamu na ngemacŭñax i taeneēgŭ rŭ ta nŭxŭ nadaumatŭgŭxŭcēx. Rŭ ngēxgumarŭŭ ta i ngēma popera i Laodichéawa chamuxŭ, rŭ ngēxguma pexŭtawa nanguxgu rŭ chanaxwēxe i nŭxŭ pedamatŭgŭ. ¹⁷ Rŭ chanaxwēxe i Ariquípumaā nŭxŭ pixu, rŭ ñapegŭgŭ nŭxŭ:

“;Rŭ meā napuracŭ rŭ yanguxēē i ngēma puracŭ i tórŭ Cori cuxna āxŭ!” ñapegŭgŭ nŭxŭ. ¹⁸ Choma i Pauru rŭ choxmēxmaātama pexcēx chanaxŭmatŭ i ñāā chorŭ moxē. ;Rŭ nŭxna pecuēxāchie na chapoxcuxŭ! Rŭ chanaxwēxe i Tupana pexŭ narŭngŭxēē.

Rŭ nuāma pexna,
Pauru

NŪXĪRAŪXŪ GA POPERA GA TECHARÓNICAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxe ga yema yaxŏgŭxŭ ga Techarónicawa yexmagŭxŭ

¹ Pa Toeneëgŭ i Techarónicawa Ngëxmagŭxŭ i Tanatŭ ya Tupana rŭ Tŏrŭ Cori ya Ngechuchu ya Cristuarŭ Duŭxŭgŭ Ixŭgŭxŭ, choma i Pauru rŭ namaã i taeneë i Chiribánu rŭ Timutéu nixŭ i pexcèx tanaxŭmatŭxŭ i ñaã popera. Rŭ tanaxwèxe i Tanatŭ ya Tupana rŭ tŏrŭ Cori ya Ngechuchu ya Cristu pexŭ narŭngŭxèë rŭ pexŭ nataãèxèë.

Meãma nayaxŏgŭ ga yema Techarónicawa yexmagŭxŭ rŭ yemaãcü wŭxi ga cuèxruŭ ga mexŭ nixŭgŭ

² Rŭ torŭ yumŭxèwa rŭ guxŭguma pexna tacuèächigŭ, rŭ pexcèx Tupana moxè taxã. ³ Rŭ guxŭguma i ngëxguma Tanatŭ ya Tupana meã tidexagŭgu, rŭ taguma nüxŭ itayarŭngŭmaë na ñuxãcü meã peyaxŏgŭãcüma penaxŭxŭ i Tupanaãrŭ puracŭ, rŭ ñuxãcü nüxŭ pengechaŭgŭãcüma togŭxŭ perŭngŭxèëxŭ. Rŭ taguma nüxŭ itayarŭngŭmaë na ñuxãcü aixcüma meã ípenanguxèëxŭ ya tŏrŭ Cori ya Ngechuchu ya Cristu rŭ ngëmacèx yaxna namaã pexŭnŭë i ngëma ngúxŭ i ñuxma pingexŭ. ⁴ Pa Chaueneëgŭx, Tupana pexŭ nangechaŭ, rŭ nüxŭ tacuèx rŭ nŭmatama nixŭ ga pexŭ nadexŭ. ⁵ Rŭ yexguma pemaã nüxŭ tixuxgu ga Tupanaãrŭ ore i tŭxŭ maxèxèëxŭ, rŭ tama toechama tidexagŭmare, yerŭ Tupanaãë i Ūñexŭ toxŭ narŭngŭxèë na norŭ poramaã pemaã nüxŭ tixuxŭ. Rŭ meã nüxŭ tacuããcüma pemaã nüxŭ tixu ga yema ore yerŭ toðèwatama nüxŭ tacuèx na aixcüma yŭxŭ. Rŭ pematama nüxŭ pecuèx ga ñuxãcü meã pepèxewa na tamaxèxŭ ga yexguma na yemaãcü pexŭ tarŭngŭxèëgŭxŭcèx. ⁶ Rŭ pema rŭ meãma penaxŭgŭ ga yema pexŭ tangŭxèëxŭ rŭ yema tŭxŭ nangŭxèëxŭ ga tŏrŭ Cori ya Ngechuchu. Rŭ Tupanaãë i Ūñexŭ pexŭ taãèxèëcüma penayauxgŭ ga yema ore ga woo yemacèx poraãcü ngúxŭ na pingegŭxŭ. ⁷ Rŭ yemaãcü ga pema rŭ wŭxi ga cuèxruŭ ga mexŭ pixŭgŭ naxcèx ga guxŭma ga yema yaxŏgŭxŭ ga Machedóniãñewa rŭ Acayaanewa yexmagŭxŭ. ⁸ Rŭ yema na peyaxŏgŭxŭgagu rŭ tŏrŭ Cori ya Ngechucharŭ ore rŭ guxŭwama ninguchigŭ. Rŭ ngëmacèx i ñuxma rŭ Machedóniãñewa rŭ Acayaanewa rŭ guxŭwama nüxŭ nacuèxgŭ na ñuxãcü meã Tupanaãxŭ peyaxŏgŭxŭ. Rŭ ngëmacèx marŭ taxucèxma tŭxcŭŭ i toma rŭ namaã nüxŭ tixu i ngëma ore i mexŭ i pechiga. ⁹ Erŭ nŭmagŭtama i ngëma duŭxŭgŭ rŭ marŭ nüxŭ nixugŭgŭ ga ñuxãcü ga pema rŭ meã toxŭ na peyauxgŭxŭ ga yexguma petanŭwa taxŭxgu. Rŭ nüxŭ nixugŭgŭ ta ga ñuxãcü nüxŭ na perŭxoexŭ ga perŭ tupanetachicŭnèxãgŭ na Tupanaxŭchi ya maxŭcü rŭ ixaixcŭmacŭwe perŭxŭcèx rŭ nüxŭ pepuracŭxŭcèx. ¹⁰ Rŭ nüxŭ nixugŭgŭ ta na ñuxãcü aixcüma ípenanguxèëxŭ na wenaxãrŭ daxŭwa ne naxŭxŭ ya Ngechuchu ya Tupana Nane ga yuwa ínadaxèëcü. Rŭ yima Ngechuchu nixŭ ya tŭxŭ ínguxŭxèëcü nüxna i ngëma poxcu i ãücŭmaxŭ tá ínguxŭ.

2

Pauruarū puracū ga Techarónicawa

¹ Pa Chaueneēgūx, rū pematama nūxū pecuèx rū tama natucèxmamare nixī na pexūtawa taxīxū. ² Rū pema nūxū pecuèx rū naxūpa ga pexūtawa na tangugūxū rū chixri tomaā nachopetū ga Pirīpucūāxgū rū tomaā naguxchigagū. Natürü Tupana toxū narüngūxēē na pemaā nūxū tixuxūcèx ga norū ore i tūxū maxēxēēxū. Rū yemacèx tama tamuñēācūma pemaā nūxū tixu ga yema ore woo ga torū uwanūgū rū poraācū toxū na naguxchaxēēgūāxū. ³ Rū yexguma pemaā nūxū tixuxgu ga yema ore, rū tama itatūēācūma pemaā nūxū tixu. Rū tama chixexū pemaā taxūgūchañācūma rū tama pexū tawomūxēēgūchañācūma pemaā nūxū tixu ga yema ore. ⁴ Yerū Tupana nixī ga toxū unetacū rū toxū mucū na pemaā nūxū tixuxūcèx ga norū ore i mexū i tūxū maxēxēēxū. Rū yemacèx Tupana naxwèxexūācūma pemaā nūxū tixu ga yema ore. Rū tama duñūgūxūmare na tataāēxēēgūxūcèx pemaā nūxū tixu, natürü nūxū tixu na Tupanaxū tataāēxēēgūxūcèx. Rū nūma ya Tupana nixī i tūxū nacuáxū rū tūxū nadauxū rū nangugūāxū i ngēma nagu rūññūēxū. ⁵ Rū pema nūxū pecuèx rū taguma pepēxewa pexū ticuèxūgū na toga pexīñūēxūcèx, rū taguma pexū tawomūxēēgū na ngīxū tayauxgūxūcèx ga perū dīēru. Rū Tupana nixī ya toxū daucū na taguma yemaācū na tanaxūxū. ⁶ Rū taguma naxcèx tadaugū na duñūgū toxū icuèxūgūxūcèx, rū woo i pema rū bai i togū i duñūgū. ⁷ Rū woo Cristutama toxū namu na yaxōgūxūārū āēxgacūgū na tixīgūxū natürü tama ñoma wūxi ga āēxgacūrūū pepewa tixīgū. Natürü meāmare pemaā itacuèx, ñoma wūxi i mamá i ngīxācūgūna meā dèuxcūrūū pemaā tixīgū. ⁸ Rū poraācū pexū tangechañ, rū yemacèx pemaā nūxū tixu ga Tupanaārū ore. Rū tama yemaxicatama pexna taxāxchañ ga yexguma. Natürü marū itamemare ta ga pexcèx na tayuexū, yerū poraācū pexū tangechañgū. ⁹ Pa Chaueneēgūx, pema nūxū pecuèx ga ñuxācū poraācū na tapuracūexū na torū ònacèx tataxegūxūcèx. Rū ngunecū rū woo chūtacū tapuracūe na taxūeaxūma wūxi ga guxchaxū tixīgūxūcèx ga yexguma petanūwa tayexmagūgu rū pemaā nūxū tixuxgu ga Tupanaārū ore. ¹⁰ Pa Duñūgū i Tupanaāxū Yaxōgūxū, pema nixī ga toxū pedaugūxū rū Tupana rū ta toxū nadau ga ñuxācū meā na tamaxēxū ga petanūwa, rū ñuxācū taxuūma ga chixexū na taxūxū ga yexguma. ¹¹ Rū pema nūxū pecuèx ta ga ñuxācū pexū na tanangūchañxēēxū. Rū yexguma pengechañgūgu, rū pexū tataāēxēēgū ñoma wūxi i papá i naxācūgūxū taāēxēēgūxūrūū. ¹² Rū ñuxma na Tupanaārū pixīgūxū, rū pexū taxucūxēgū na meā naxcèx pemaxēxū. Rū nūma nixī i pexcèx nange-maxū na ngextá āēxgacū īyīñūwa pengugūxūcèx na ngēma mexūwa pengēxmagūxūcèx. ¹³ Rū ngēmacèx guxūguma pexcèx Tupanana moxē taxā, yerū yexguma noxri nūxū pexīñūēgu ga yema norū ore ga pemaā nūxū tixuxū, rū meā penayauxgū, yerū nūxū pecuèxgū rū aixcūma Tupanaārū ore nixī rū tama duñūgūarū oremare nixī. Rū yema ore nixī ga naxūchicūxū ga perū maxū ga yexguma peyaxōgūgu. ¹⁴ Pa Chaueneēgūx, nūxū tacuèx na ñuxācū ngūxū pingegūxū yerū petanūxūgūtama pexchi naxaie rū chixri pemaā nachopetū. Natürü yemaācūtama nūxū nangupetū ga Tupanaārū duñūgū ga Ngechuchu ya Cristuaxū yaxōgūxū ga Yudēaanewa yexmagūxū. Yerū natanūxūgūtama ga Yudīgū rū chixri namaā nachopetū. ¹⁵ Rū yema Yudiūgū nixī ga

tórü Cori ga Ngechuchuxü imèxgüxü, yexgumarüü ga norü oxigü rü nuxcúmaüügüxü ga Tupanaârü orearü uruügüxü na nadèjxürüü. Rü yema Yudíugü nixí ga towe ingèxütanüxü. Rü Tupanaaã rü guxü i duüxügümaã narüxuwanügü. ¹⁶ Rü ngèxguma ngëma duüxügü i tama Yudíugü ixígüxümaã nüxü tixuxchaügu i Tupanaârü ore na nümagü rü ta nüxü nangèxmagüxüçèx i maxü, rü ngëma Yudíugü rü toxna nanachuxu. Rü ngëmaãcü i ngëma Yudíugü rü poraãcüxüchima chixexü naxügü. Rü ngëmacèx i ñuxma rü düxwa marü nüxna nangu i ngëma Tupanaârü poxçu i ãücúmaxüchixü.

Pauru rü nüxü nangúchaü na wenaxârü natanüwa naxüxü ga yema yaxögüxü ga Techarónicawa

yexmagüxü

¹⁷ Pa Chaueneëgüx, yexguma pexna ítxíxguwena, rü woo tama pexütawa na tayexmagüechaxü, natürü guxüguma pegu tarüxínüë, rü poraãcü toxü nangúchaü na pexütawa taxixü na wenaxârü pexü ítayadaugüxüçèx. ¹⁸ Rü aixcüma ngema taxíxchaü. Rü chomatama i muëxpüxcüna rü chanaxwëxe na ngema pexütawa taëx chaxüüxüegaxü natürü ngoxo i Chataná rü guxüguma toxü nanaguxchaxëë na tama ngema taxíxüçèx. ¹⁹ Natürü pexü ítayadaugüchaüãma erü ngèxguma wenaxârü núma naxüxgu ya tórü Cori ya Ngechuchu ya Cristu rü çtècücèx tá nixí i Tupanapëxewa tataãëgüxü i tomax? Rü aixcüma pewa tá nixí i ítanangüëxü na tomaã nataãëxü ya Tupana. Rü pema tá nixí i torü taãë pixígüxü. Rü pegagu tá nixí i aixcüma togümaãtama tataãëgüxü i napëxewa. ²⁰ Rü ngëmaãcü pegagu nixí i togümaãtama tataãëgüxü, rü pema nixí i torü taãë pixígüxü.

3

¹ Rü yema na taxuacüma ñuxãcü wenaxârü petanüwa na chaxüxü, rü düxwa nagu charüxínü na Atenagutama na charüxáüxü. ²⁻³ Rü pexütawa chanamu ga taeneë ga Timutéu na pexü íyadauxüçèx. Erü nüma nixí i Tupanaârü puracütanüxü i wüxigu namaã tapuracüexü na tanaxunagüxüçèx i ngëma ore i mexü i Cristuchiga. Rü ngema petanüwa chanamu na pexü nangüxëëxüçèx na yexeraãcü peyaxögüxüçèx rü aixcüma petaãëgüxüçèx rü ngëmaãcü taguma texé i petanüwa nüxü rüxoxüçèx ega tacü rü guxchaxü pexü ngèxmagu. Erü pematama marü nüxü pecuëx na guxãma i yixema na yaxögüxü rü ngüxü tá tingegü. ⁴ Rü yexguma petanüwa tayexmagügu rü marü pemaã nüxü tixu na ngüxü tá pexü üpetüxü. Rü pema marü nüxü pecuëx na aixcüma yemaãcü pexü nangupetüxü. ⁵ Rü yemacèx ga yexguma marü tama namaã chaporagu ga yema tama paxa pechigaxü na chacuáxü, rü yemacèx düxwa Timutéuxü yéma petanüwa chamu na pexna yaçaxüçèx ngoxi meã ípeyaxögüama i Tupanaârü ore. Yerü chaxoegaãë rü bexmana ngoxo i Chataná rü chixexügu pexü nayixëë, rü chí ngëmaãcü yixígu, rü natüçèxmamare chi nixí ga pemaã nüxü tixuxü ga Tupanaârü ore. ⁶ Natürü ñuxma na ínangüxü i Timutéu na petanüwa ne naxüxü, rü mexü i ore i pechiga ngema ne nange. Rü tomaã nüxü nixu na ñuxãcü meã peyaxögüxü, rü ñuxãcü guxãma meã pegü pengechaügüxü. Rü tomaã nüxü nixu ta na ñuxãcü guxüguma toxü pengechaügüãcüma togu perüxínüëxü, rü ñuxãcü poraãcü wena toxü pedaugüchaüxü rü ngexgumarüxü ta i toma rü toxü nangúchaü na wena pexü tadaugüchaüxü.

7 Rū ngēmacèx, Pa Chaueneēgūx, rū woo guxchaxū toxū na ngēxmaxū rū ngúxū na tingegūxū, rū poraācū toxū nataāēxēē i ngēma pexū na tacuāchigaxū na meā ípemaxēxū rū meā peyaxōgūamaxū. 8 Rū ñuxma na nūxū tacuāchigaxū na aixcūma meā tórū Coriaxū peyaxōgūamaxū, rū poraācū tataāēgū. 9 ;Rū ñuxācū tá Tupanana moxē taxā naxcèx i ngēma taāē i taxū i toxna pexāxū? Erū aixcūma pegagu nixī i toxū nangēxmaxū i wūxi i taāē i taxū i napēxewa. 10 Rū ngunecū rū chūtacū rū tayumūxēgū, rū Tupanana naxcèx tacagū na petanūwa toxū nawoeguxēēxūcèx na wena pexū tadaugūxūcèx rū pexū tarūngūxēēgūxūcèx na yexeraācū nūxū peyaxōgūxūcèx. 11 Rū poraācū tanaxwēxegū na Tanatū ya Tupana rū tórū Cori ya Ngechuchu ya Cristu toxū natauxchaxēēxū na wena petanūwa ítayadaugūxūcèx. 12 Rū tanaxwēxegū na tórū Cori ya Ngechuchu pexū rūngūxēēxū na yexeraācū pegū pengechaūgūxūcèx rū guxū i duūxūgūxū na pengechaūgūxūcèx, ngēxgumarūū i toma rū poraācū pexū na tangechaūgūxūrūū. 13 Rū tanaxwēxegū na tórū Cori ya Ngechuchu pexū rūngūxēēxū na peāēwa rū aixcūma meā peyaxōgūxūcèx rū norū duūxūgū i aixcūma mexūgū na pixīgūxūcèx rū na nataxuxūcèx i perū decadugū i napēxewa ya Tanatū ya Tupana i ngēxguma wena nūma naxūxgu ya tórū Cori ya Ngechuchu ya Cristu namaā i guxūma i norū duūxūgū. Rū tanaxwēxe na ngēmaācū yīixū.

4

Maxū i Tupanaxū taāēxēēxūchiga

1 Rū ñuxma Pa Chaueneēgūx, rū tórū Cori ya Ngechuchuēgagu pexū tacēēxū rū pexū tamu na guxūguma Tupanacèx meā pemaxēxū yema pexū tangúexēēxūrūū rū ñuxma marū penaxūxūrūū. 2 Pema rū marū nūxū pecuèx ga yema torū ucuxēgū ga tórū Cori ya Ngechuchu toxū muxū na pexū tangúexēēxūcèx. 3 Rū Tupana nanaxwēxe na aixcūma namexū i perū maxū rū naxcèxicatama na pemaxēxū. Rū tama name i chixri pemaxē i napēxewa rū to i ngexūgūmaā pengēāēgūmare. 4 Rū wūxichigū tanaxwēxe na aixcūma tūmamèxū tangechaūxū, rū ngīmaāxīcatama na tamaxūxū. 5 Rū tama name i ngīxū na pecuāxchaūmarexūcèx ngīmaā pexāmèx i wūxi i nge erū ngēmaācū namaxē i ngēma duūxūgū i tama Tupanaāxū yaxōgūxū. 6 Rū tama name i texé ngīmaā tamaxū i naxmèx ya tūmaēneē. Erū yexgumarūū ga marū pemaā nūxū tixuxūrūū, rū Tupana tá poraācū tūxū napoxcu ya guxāma ya yīxema ngēmaācū maxēxē. 7 Erū Tupana tūxū nade na meā imaxēxūcèx rū tama chixexū ixūgūxūcèx. 8 Rū ngēmacèx ega texé tama naga ñnūgu i ñaā ngxūēētaegū, rū pemaā nūxū chixu rū tama wūxi i duūxūga nixī i ngēma nūxū taxoxū, natūrū Tupanagatama nixī i nūxū taxoxū. Rū guma nixī ga pexna namucū ga Naāē i Ūūnexū. 9 Rū ngēma na pegū pengechaūgūxūchiga, rū taxucèxma pexcèx chanaxūmatū i poperawa. Yerū Tupanatama marū pexū nangúexēē i ngēma na ñuxācū aixcūma pegū pengechaūgūxū. 10 Rū aixcūma nixī i guxūguma meā nūxū pengechaūgūxū i guxūma i taeneēgū i Machedóniāānewa ngēxmagūxū. Natūrū, Pa Toeneēgūx, pexū tacēēxūgū na yexeraācū meā nūxū pengechaūgūxūcèx. 11 ;Rū meā pegū pengechaūgū, rū pexrūtama maxūgu perūxñūē, rū tama i togūarū maxūgu! ;Rū pematama naxcèx pepuracūe i perū ngēmaxūgū yema marū pemaā nūxū tixuxūrūū! 12 Rū

ngëxguma ngëmaäcü pemaxëgu, rü ngëma duüxügü i tama yaxögüxü rü tá pexü nangechaügü, rü taxuütáma pexü nataxu.

Nüxäcü tá nixi i ngëxguma nataegugu ya tórü Cori

¹³ Pa Chaueneëgüx, rü ñuxma rü tá pexü nüxü chacuëxëe i ngexta tá naxixü i ngema yaxögüxü i yuexü na ngemaäcü tama pengechaügüxcëx naxruxü i ngema tama nüxü cuëxgüxü na wena tá namaxëxü i ngema yuexü. ¹⁴ Erü yixema na yaxögüxü na nayuxü rü wena namaxüxü ga Ngechuchu, rü ngëxgumarüü ta tayaxögü na Tupana tá inadagüxëëxü i guxüma i ngëma Ngechuchuauxü yaxögüäcüma yuexü. ¹⁵ Rü ngëmacëx pemaä nüxü tixu i ngëma ore ga tórü Cori ya Ngechuchu namaä nguxëëtaexü. Rü ngëxguma wena núma naxüxgu ya tórü Cori ya Ngechuchu rü yixema na imaxëxü i ñoma i naänewa rü täütáma yixira napëxe taxí i ngëma yuexü. ¹⁶ Erü nümatama ya Cori ya Ngechuchu rü daxüwa tá inarüxí, rü tá nangëxma i wüxi i naga i taxü i daxüwa inaxüxü i tüxü muxü, rü tá nüxü taxínüe i Tupanaärü orearü ngeruügüarü äëxgacü i tagaäcü daxüwa icagüxü, rü tá yacuegüxü ya Tupanaärü corneta. Rü ngëxguma i ngëma yuexü i Cristuaxü yaxögüxü rü tá inarüdagü. ¹⁷ Rü ngëmawena i yixema na imaxëxü rü Tupana tá wüxigu caixanexügu tüxü nigagü namaä i ngëma duüxügü i yuwa írüdagüxü. Rü ngëmaäcü tá daxügu tórü Cori ya Ngechuchuxü tayangaugü na guxügutáma naxütawa ingëxmagüxcëx. ¹⁸ Rü ngëmacëx chanaxwëxe i ñaä oremaä pegü petaäëxëëgü.

5

¹ Natürü, Pa Chaueneëgüx, rü ngëma norü ngunexü rü taunecü i tá nagu nangupetüxü i ngëma pemaä nüxü chixuxü, rü taxucëxma pexcëx chanaxümatü i ngëmachiga. ² Erü pematama meä nüxü pecuëx rü ngëma ngunexü i taxüema nagu inanguxëëxügu tá nixi i inanguxü ya tórü Cori ya Ngechuchu. Rü ñoma wüxi i ngítëxáxü i ngürüächi chütacü inguxürüü tá nixi. ³ Rü ngëxguma duüxügü nagu írúxñüëgu na guxüma na mexü rü taxuüma na nüxü üpetüxü, rü ngëma ngunexügügu rü tá ngürüächi nagux i guxüma. Rü ñoma wüxi i ngecü i äxäcücü rü ngürüächi ngixäcümaä nguxnecacürüü tá nixi na taxüema naxchaxwa iñaxü i ngëma. ⁴ Natürü pemax, Pa Chaueneëgüx, rü marü meäma nüxü pecuëx i Cristuarü nguchiga. Rü ngëmacëx taxucëxma ngürüächi pexü inayabaixgü ya Cori ya Ngechuchu ñoma wüxi i ngítëxáxü tüxü ibaixgüxürüü. ⁵ Erü guxäma i pema rü Tupanaärü duüxügü pixígü, rü ngëmacëx ngóonexüwa pengëxmagü rü meäma nüxü pecuëx na ñuxäcü meä pemaxëxü. Rü yixema rü tama Chatanáärü duüxügü tixígü, rü ngëmacëx tama eänexüwa tangëxmagü rü tama tanaxü i ngëma chixexü i eänexüwa üxü. ⁶ Rü ngëmacëx tama name i taechita tamaxëmare naxrüü i ngëma duüxügü i tama yaxögüxü. Rü name nixi i taxuäëgü, rü meä taëgu tarüxñüë. ⁷ Erü ngëma duüxügü i naëchitamare maxëxü rü ñoma duüxügü i chütacü peexürüü nixígü. Rü ngëma duüxügü i axegüxü rü chütacü nixi i nügü nangäxëxëëxü. ⁸ Natürü i yixema rü ngóonexüwa tangëxmagü, rü ngëmacëx tanaxwëxe i guxüguma taxuäëgü. Rü name nixi i aixcüma meä Tupanaäxü tayaxögü, rü yigü tangechaügü, rü meä itananguxëë na Tupana tüxna naxäxücëx i ngëma maxü i taguma gúxü. Rü ngëxguma ngëmaäcü imaxëgu, rü ngëmaäcü tá yigü itapoxü i ngëxguma Chataná chixexügu tüxü yixëëchaügü. ⁹ Erü Tupana rü tama

tūxŭ nade na tūxŭ napoxcuexŭcèx, natürŭ tūxŭ nade na tórŭ Cori ya Ngechuchu ya Cristugagu nayauxgŭxŭcèx i maxŭ i taguma gŭxŭ. ¹⁰ Rŭ Ngechuchu ya Cristu rŭ taxcèx nayu na wŭxigu namaã imaxèxŭcèx i daxŭguxŭ i naãnewa. Rŭ nüetama ega woo marŭ iyuyane ínanguxgu rŭ éxna imaxèyane ínanguxgu, erŭ daxŭguxŭ i naãnewa rŭ wŭxiwa tá namaã tamaxè. ¹¹ Rŭ ngèmacèx, Pa Chaueneégŭx, rŭ name nixŭ i wŭxichigŭ pegŭ petaãèxèégŭ rŭ pegŭ peporaexèè i perŭ òwa ngèxgumarŭ i ñuxma na marŭ ípenaxŭgŭxŭ.

Pauru rŭ nayaxucŭxègŭ ga yema yaxògŭxŭ

¹² Pa Chaueneégŭx, pexŭ tacèxŭgŭ na nüxŭ pengechaŭgŭxŭcèx i ngèma taeneégŭ i petanüwa puracŭexŭ rŭ pemaã icuèxgŭxŭ rŭ pexŭ ngúexèèxŭ i Cori ya Ngechucharŭ ore. ¹³ Rŭ name nixŭ i namaã petaãégŭ rŭ aixcŭma meã nüxŭ pengechaŭgŭ i ngèma taeneégŭ, erŭ nŭmagŭ nixŭ i pexŭ nangŭxèégŭxŭ. Rŭ name nixŭ i pegŭ pengechaŭgŭãcŭma pemaxè. ¹⁴ Rŭ pemaã nüxŭ tixu ta na penaxucŭxègŭxŭ i ngèma duŭxŭgŭ i oexŭ i tama pura-cŭechaŭxŭ. ¡Rŭ nüxŭ penangŭchaŭxèégŭ i ngèma duŭxŭgŭ i marŭ nüxŭ rŭxoechaŭxŭ na yaxògŭãxŭ! ¡Rŭ nüxŭ perŭngŭxèégŭ i ngèma duŭxŭgŭ i turaexŭ i norŭ òwa! ¡Rŭ name nixŭ i yaxna namaã pexŭnŭè i guxŭma i ngèma taeneégŭ! ¹⁵ Rŭ ngèxguma texé chixexŭ pemaã ũxgu, rŭ tama name i chixexŭmaã penataeguxèè. ¡Natürŭ name nixŭ i naxcèx pedau na guxŭguma mexŭ pexŭgŭxŭ i pegŭtanüwa rŭ ngema togŭtanüwa rŭ ta! ¹⁶ Rŭ name nixŭ i guxŭguma petaãégŭ. ¹⁷ ¡Rŭ guxŭguma peyumŭxèégŭ! ¹⁸ ¡Rŭ woo tacŭ pexŭ ngupetŭgu, rŭ Tupanana moxè pexágŭ! Erŭ ngèmaãcŭ nanaxwèxe ya Tupana na pemaxèxŭ i pema i Ngechuchu ya Cristuarŭ duŭxŭgŭ na pixŭgŭxŭ. ¹⁹ Rŭ tama name i nüxŭ pexoe i Tupanaãè i Üünexŭ. ²⁰ Rŭ tama name i nüxŭ pexoe i Tupanaãrŭ ore ega texéwa pemaã yadeaxgu ya Tupana. ²¹ Natürŭ name nixŭ i meãma penangugŭ i guxŭma i oregŭ na nüxŭ pecuáxŭcèx rŭ ngoxi aixcŭma yŭxŭ i ngèma ore rŭ éxna tama. ¡Rŭ ngèma ore i aixcŭma mexŭxŭcatama pixògŭ! ²² ¡Rŭ nüxna pixŭgachi i nagŭxŭraŭxŭ i chixexŭgŭ! ²³ Rŭ chanaxwèxe i nŭmatama ya Tupana ya tŭxŭ taãèxèècŭ pexŭ imexèè na aixcŭma napèxewa pimexŭcèx. Rŭ chanaxwèxe i guxŭwama pexna nadau i peãewa rŭ pexenewa na nataxuxŭcèx i tacŭ i perŭ chixexŭ i ngèxguma wenaxärŭ nŭma naxŭxgu ya tórŭ Cori ya Ngechuchu ya Cristu. ²⁴ Rŭ nŭma ya Tupana ya pexŭ decŭ rŭ nixaixcŭma na yanguxèèãxŭ i guxŭma i ngèma tamaã inaxunetaxŭ.

Pauru rŭ wenaxärŭ yema duŭxŭgŭxŭ narŭmoxè rŭ naxcèx ínaca na Cori ya Ngechuchu ya Cristu meã nüxŭ rŭngŭxèèxŭ ga

yema yaxògŭxŭ

²⁵ Pa Chaueneégŭx, ¡Toxcèx peyumŭxèégŭ! ²⁶ Rŭ chanaxwèxe i chauégagu nüxŭ perŭmoxègŭ i guxŭma i taeneégŭ. ²⁷ Rŭ Cori ya Ngechuchuégagu pexŭ chamu na guxŭ i taeneégŭpèxewa na nüxŭ pedau-matŭxŭ i ñãã popera i pexcèx ngema chamuxŭ. ²⁸ Rŭ chanaxwèxe i tórŭ Cori ya Ngechuchu ya Cristu pexŭ narŭngŭxèè i guxŭma i pemax.

Rŭ nuãma pexna,
Pauru

NORŪ TAXRE GA POPERA GA TECHARÓNICAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rŭ nŭxŭ narŭmoxē ga yema yaxŏgŭxŭ ga Techarónicawa yexmagŭxŭ

¹ Pa Techarónicawa Ngēxmagŭxŭ i Toeneēgŭ i Yaxŏgŭxŭ i Tanatŭ ya Tupana rŭ tŏrŭ Cori ya Ngechuchu ya Cristuarŭ Duŭxŭgŭ Ixŭgŭxŭ, choma i Pauru rŭ taeneē i Chiribánu rŭ Timutéu nixŭ i pexcèx tanaxŭmatŭxŭ i űaã popera. ² Rŭ tanaxwèxe i Tanatŭ ya Tupana rŭ tŏrŭ Cori ya Ngechuchu ya Cristu pexŭ narŭngŭxē rŭ pexŭ nataãēxē.

Ngēma chixexŭ ŭgŭxŭ rŭ Tupana tá nanapoxcue i ngēxguma wenaxārŭ nŭma naxŭxgu ya Cristu

³ Pa Toeneēgŭx, rŭ guxŭguma pexcèx Tupanana moxē taxā, erŭ name nixŭ na ngēmaãcŭ tanaxŭxŭ. Erŭ guxŭguma yexeraãcŭ peyaxŏgŭetanŭ rŭ yexeraãcŭ pegŭ pingechaŭgŭetanŭ. ⁴ Rŭ ngēmacèx tomatama taãēãcŭma pechigaxŭ tixu natanŭwachigŭ i ngēma duŭxŭgŭ i Tupanaãxŭ yaxŏgŭxŭ. Rŭ namaã nŭxŭ tixu na űuxãcŭ meã peyaxŏgŭxŭ, rŭ űuxãcŭ namaã peporaexŭ i guxŭma i ngēma guxchaxŭgŭ rŭ ngŭxŭgŭ i pexŭ ngupetŭxŭ. ⁵ Rŭ ngēma guxchaxŭgŭ i pexŭ ngupetŭxŭwa nŭxŭ tacuèx na aixcŭmacŭ yŭxŭ ya Tupana, erŭ pexŭ nangugŭ na aixcŭma pimexŭ na pichocuxŭcèx i ngextá nŭma ãēxgacŭ űyŭxŭwa. Rŭ ngema na pichocuxŭcèx nixŭ i ngŭxŭ pingegŭxŭ i űuxmax. ⁶ Rŭ aixcŭma name nixŭ na Tupana napoxcuexŭ i ngēma duŭxŭgŭ i ngŭxŭ pexŭ ingegŭxēxŭ. ⁷ Natŭrŭ i pema i űuxma ngŭxŭ ingegŭxe rŭ name nixŭ i wŭxigu tomaã pexŭ inarŭngŭēxē ya Tupana. Rŭ ngēma rŭ tá nanaxŭ ya Tupana i ngēxguma ŭxŭemagu daxŭwa ne naxŭxgu ya tŏrŭ Cori ya Ngechuchu ya Cristu wŭxigu namaã i norŭ orearŭ ngeruŭgŭ i poraexŭ. ⁸ Rŭ aixcŭma nŭma tá naxŭ i nŭma ya tŏrŭ Cori ya Ngechuchu na napoxcueãxŭcèx i ngēma duŭxŭgŭ i tama Tupanaxŭ cuáxchaŭgŭxŭ rŭ tama naga űnŭxŭ i ngēma ore i mexŭ i tŏrŭ Cori ya Ngechuchu ya Cristuchiga. ⁹ Rŭ ngēma duŭxŭgŭ rŭ wŭxi i poxcu i taguma gŭxŭgu tá napoxcue erŭ tŏrŭ Cori ya Ngechuchuarŭ yaxŭwa tá nawogŭ. Rŭ ngema rŭ tagutáma nŭxŭ nadaugŭ na űuxãcŭ namexēchixŭ rŭ naporaxŭ ya tŏrŭ Cori ya Ngechuchu. ¹⁰ Rŭ ngēmaãcŭ tá ngēma duŭxŭgŭmaã nangupetŭ i ngēxguma tŏrŭ Cori ya Ngechuchu nŭma ŭxgu. Rŭ nŭma tá nangu na nŏrŭ duŭxŭgŭ nŭxŭ icuèxŭgŭxŭcèx, rŭ tá nabaixãchiãēgŭ rŭ nataãēgŭ erŭ tá nŭxŭ nadaugŭ na űuxãcŭ namexēchixŭ i nŭmax. Rŭ pema rŭ tá ta wŭxigu namaã pengēxmagŭ, yerŭ peyaxŏgŭ ga yema Tupanaãrŭ ore ga pemaã nŭxŭ tixuxŭ. ¹¹ Rŭ ngēmacèx guxŭguma pexcèx tayumŭxēgŭ. Rŭ Tupanana taca na nŭma pexŭ nadauxŭ na aixcŭma mexŭ i norŭ duŭxŭgŭ pixŭgŭxŭ i űuxma na pexŭ nadexŭ. Rŭ ngēxgumarŭ ta nŭxna taca na nŭmatama norŭ poramaã yanguxēãxŭcèx i guxŭma i ngēma mexŭ i peãēwa nagu perŭxŭnŭxŭ rŭ guxŭma i ngēma puracŭgŭ i mexŭ i perŭ ŏgagu pexŭxŭ. ¹² Rŭ ngēxguma Tupana ngēmaãcŭ pexŭ rŭngŭxŭēgŭ, rŭ perŭ maxŭ i mexŭgagu rŭ guxŭma i duŭxŭgŭ tá nŭxŭ nicuèxŭgŭ ya tŏrŭ Cori ya Ngechuchu ya

Cristu. Rū nūmatama ya tórū Cori rú tá pemaã nataãẽ erū nūma rú wūxigu Tanatū ya Tupanamaã pexū nangechaũgū.

2

Pauru rú nanangoxẽẽ i ñuxãcū tá na yīixū i ngẽxguma ínanguxgu ya Cori ya Ngechuchu

¹⁻² Rū ñuxma Pa Chaueneẽgūx, rú pemaã nūxū chixuxchaũ i nachiga na ñuxãcū tá na yīixū i ngẽxguma tórū Cori ya Ngechuchu ya Cristu wena nūma ũxgu rú tūxū nangutaquẽxexẽẽgūgu na wūxiwa namaã ingẽxmagūxūcèx. Rū pemaã nūxū tixu na tama ngürüãchi togumare perūxĩnũxū rú paxa peyaxōgūxū i tacū rú ore i tama toma pemaã nūxū tixuxū. Erū tama tanaxwẽxe na pełaixãchiãẽgūxū ega texé pemaã idoraegu rú pemaã nūxū ixuxgu na marū ínanguxū ya tórū Cori ya Ngechuchu. Rū ngẽxguma texé pemaã nūxū ixuxgu na nagu taxãnegūxū na Cristu rú marū ínanguxū, rú tama name i tūmaga pexĩnũẽ. Rū woo pemaã nūxū tixugūgūgu na tanayauxgūxū i wūxi i torū popera i nūxū ixuxū na marū ínanguxū ya tórū Cori ya Ngechuchu, jrū tãutãma tūxū peyaxōgū! ³ ;Rū tãutãma naga pexĩnũẽ i ngẽma duũxūgū i ngẽmaãcū pexū womūxẽẽgūchaũxū! Erū naxūpa na Ngechuchu nūma ũxū rú tá ínangu i ngẽma yatū i Tupanaãrū uwanū ixixū, rú tá nananuẽxẽẽ i muxūma i duũxūgū i yaxōgūchiréxū. Natürü ngẽma yatū rú Tupana marū namaã nanaxuegu rú tá napoxcu. ⁴ Rū ngẽma Tupanaãrū uwanū rú tá Tupanamaã rú guxūma i ngẽma Tupanaãrū ixixūmaã narūxuwãnū. Rú tá naxchi naxai i guxūma i tacū i mexū i duũxūgū Tupanaxū namaã icuẽxūgūxū. Rū Tupanaãrū tupaucu ya taxūnewa tá nayarũto ñoma Tupana yīixūrū. Rú tá nūgū nixu na Tupana yīixū. ⁵ ;Tama ěxna nūxna pecuẽãchie ga yexguma petanūwa chayexmagu rú marū meãma pemaã nūxū chixu nachiga ga yema? ⁶ Rū pema marū nūxū pecuẽx na tūxcūũ yīixū i tauta nūma naxūxū i ngẽma Tupanaãrū uwanū. Tauta nūma naxū, erū tauta nawa nangu i ngema ngunexū i nagu nua naxūxū. ⁷ Rū ngẽma chixexū i Tupanaãrū uwanū ũxū, rú marū cúãcū inaxūgū. Natürü nūmatama i Tupanaãrū uwanū rú tãutãma nangox ñuxmatãta ngẽma norū chogürũ nūxū ingé. ⁸ Rū ngẽxguma tá nixi i ínanguxū i ngẽma Tupanaãrū uwanū. Natürü nūma ya tórū Cori ya Ngechuchu rú wūxi i “cue” ñaxūmaã tá nayamèx. Rū ngẽxguma ínanguxgu ya tórū Cori ya Ngechuchu rú ngẽma norū yaxracūũxūmaã tá inayanaxoxẽẽ i ngẽma norū uwanū. ⁹ Rū ngẽma Tupanamaã ruxuwãũãxū, rú ngẽxguma ínanguxgu rú tá nūxū nangẽxma i Chatanaãrū pora rú ngẽmacèx tá naporaxūchi. Rú tá nanaxū i nagúxũraũxū i cuẽxruũgū i Chatanaãrū poramaã naxūxū i namaã duũxūgūxū nawomūxẽẽxū. ¹⁰ Rū nagúxũraũxū i chixexū tá naxū na nawomūxẽẽãxūcèx i ngẽma duũxūgū i Tupana tá poxcuexū. Rū ngẽmaãcū tá nūxū naxūpetū i ngẽma duũxūgū, yerū tama nanayauxgūchaũ rú tama nūxū nangechaũ i ngẽma Tupanaãrū ore i aixcūma ixixū i tūxū maxẽxẽẽxū. ¹¹ Rū ngẽmacèx ya Tupana rú nanangexrū i ngẽma duũxūgū na poraãcū ínatũxūcèx rú yaxōgūãxūcèx i ngẽma ore i doramare ixixū. ¹² Rū ngẽmacèx dūxwa Tupana tá namaã nanaxuegu na napoxcuexū i guxūma i ngema duũxūgū i tama yaxōgūchaũxū i norū ore rú namaã taãẽgūxū i ngẽma chixexū na naxūgūxū.

Tupana tūxū nade na tūxū nangẽxmaxūcèx i maxū i taguma gúxū

13 Natürü, Pa Chaueneëgũx i Tórü Cori ya Ngechuchu Pexũ Ngechaũgũxex, rü guxũguma Tupanana moxë pexcèx taxã yerü nüma ga Tupana rü noxritama naãne ixũgũgumama pexũ nade na pexira penayauxgũxũcèx i maxũ i taguma gũxũ ga yexguma pexũ nangũxëëgu ga Naãe i pexũ üunexëëxũ rü peyaxõgũgu ga yema ore i aixcũma ixĩxũ. 14 Rũ yemacèx Tupana pexcèx naca ga yexguma pemaã nüxũ tixuxgu ga norü ore i mexũ i tũxũ maxëxëëxũ. Erü nüma nanaxwèxe na pexũ nangëxmaxũcèx i pechica i tórü Cori ya Ngechuchu ya Cristuxõtawa i ngextã ínamexëchixũwa. 15 Rũ ngëmacèx, Pa Chaueneëgũx, rü chanaxwèxe i meã peyaxõgũama rü tama nüxũ ipeyarũngũmaë ga yema ore ga tomatama pexũ tangũxëëxũ rü yema ore ga poperagu pexcèx taxũmatũxũ. 16-17 Rũ chanaxwèxe i tórü Cori ya Ngechuchu ya Cristu rü Tanatü ya Tupana pexũ nataãëxëëgũ rü pexũ narũngũxëë na guxũguma mexũ i oremaã pidexagũxũcèx rü mexũ pexũgũxũcèx. Rũ yima Tanatü ya Tupana nixĩ ya tamaã namecũmaãcũma tũxũ ngechaũcũ rü guxũguma tũxũ taãëxëëcũ rü tamaã ixunetacũ na wũxi i ngunexũ tá naxũtawa ingëxmagũxũ.

3

Pauru naxcèx ínaca na naxcèx nayumũxëgũxũ

1 Rũ ñũxma Pa Chaueneëgũx, rü chanaxwèxe na toxcèx peyumũxëgũxũ na paxa guxũwama nanguxũcèx i tórü Cori ya Ngechuchuarü ore i mexũ, rü duũxũgũ norü ngũchaũmaã na nayauxgũxũcèx ga yema pema na penayauxgũxũrũ. 2 ¡Rũ toxcèx peyumũxëgũ ta na tama ñacũ rü chixexũ tomaã naxũgũxũcèx i ngëma duũxũgũ i chixexũgũ! Erü tama guxũma i duũxũgũ nayaxõgũ. 3 Natürü tórü Cori ya Ngechuchu rü aixcũma nayanguxëë i ngëma tamaã inaxunetaxũ. Rũ nüma tá pexũ naporaexëë rü pexna nadau na tama chixexũgu peyixũcèx. 4 Rũ tórü Cori ya Ngechuchu toxũ nüxũ nacuxëë na aixcũma penaxũxũ i ngëma pexũ tamuxũ rü tagutãma nüxũ perũxoexũ na ngëmaãcũ penaxũxũ. 5 Rũ tanaxwèxe i tórü Cori ya Ngechuchu pexũ narũngũxëë na aixcũma pegũ pengechaũgũxũcèx, ngëma Tupana tũxũ ngechaũxũrũ. Rũ naxcèx íaca na pexũ naporaexëëxũcèx na Cristurũ namaã peporaexũcèx i ngëma ngũxũgũ i ngëxguma pexcèx ínanguxgu.

Name nixĩ na ipuracũxũ i wũxichigũ

6 Pa Chaueneëgũx, tórü Cori ya Ngechuchu ya Cristuégagu pexũ tamu na tama namaã pixãmũcũgũxũcèx i ñacũ i taeneë i tama puracũchaũxũ rü tama ngëma pexũ tangũxëëãcũma maxũxũ. 7 Erü pema rü marü nüxũ pecuèx na ñuxãcũ tá pemaxëxũ na toxrũ penaxũxũcèx. Yerü toma ga yexguma petanũwa tayexmagũgu rü torü õnacèx tapuracũe, rü tama yexma tarũchomare. 8 Rũ toma rü taguma texéarũ õna ngetanũãcũma tangõx. Natürü ngunecũ rü chũtacũ rü torü õnacèx tapuracũe na tama wũxi ga guxchaxũ pexũ tixĩgũxũcèx. 9 Rũ woochirëx Tupanapëxewa rü name nixĩ ga perü ngũxëëcèx na ítaçaxũ, natürü tama yemaãcũ tanaxũ. Rũ torü õnacèx tapuracũe yerü pexũ nüxũ tadauxëëchaũ na ñuxãcũ meã imaxũxũ. 10 Yerü yexguma petanũwa tayexmagũgu, rü pemaã nüxũ tixu rü yixema tama puracũchaũxë, rü noxtacũma ngexrũma nixĩ na tachibũxũ. 11 Rũ pexcèx tanaxũmatũ i ngëmachiga, erü marü nüxũ taxĩnüë na petanũwa nangëxmaxũ i ñuxre i duũxũgũ i oexũ rü

tama puracüechaŭxŭ rŭ toguechigagumare rŭxĩnŭëxŭ. ¹² Rŭ tórŭ Cori ya Ngechuchu ya Cristuégagu tanamu na meãmare ínapuracüexŭcèx i ngẽma duŭxŭgŭ na nŭmatama norŭ ònacèx nataxegŭxŭcèx. ¹³ Pa Chaueneëgŭx, j̄tama nŭxŭ perŭchau na mexŭ pexŭexŭ! ¹⁴ Rŭ ngẽxguma texé tama naga ĩnŭgu i ñãã ore i poperawa pemaã nŭxŭ tixuxŭ j̄rŭ marŭ tŭxŭ pecuèx na texé tĩxŭ! Rŭ tama name i tŭmamaã pexãmŭcŭ na taxãnexŭcèx i tŭmax. ¹⁵ j̄Natŭrŭ tãŭtãma namaã perŭxuwã! Rŭ name nixĩ i ñoma peeneëxŭ pexucŭxèxŭãcŭma meã tŭxŭ pexucŭxèmare.

Pauru rŭ naxcèx ínaca na Cori ya Ngechuchu nŭxŭ rŭngŭxèëxŭ ga yema yaxõgŭxŭ

¹⁶ Rŭ chanaxwèxe i nŭmatama ya tórŭ Cori ya taãearŭ yora pexŭ narŭngŭxèë na guxŭguma i guxŭwama petaãëgŭxŭcèx. Rŭ chanaxwèxe na nŭma rŭ petanŭwa na nangèxmaxŭ i guxãma i pemax. ¹⁷ Choma i Pauru rŭ choxmèxmaãtama pexcèx chanaxŭmatŭ i ñãã chorŭ moxè. Rŭ ngẽmaãcŭ nixĩ i chaugŭ nagu chawüégaxŭ i guxŭma i chorŭ popera. Rŭ ngẽmaãcŭ nixĩ i chanaxŭmatŭxŭ. ¹⁸ j̄Rŭ nŭma ya tórŭ Cori ya Ngechuchu ya Cristu rŭ pexna naxãã i ngema norŭ ngechaxŭ i guxãma i pemax!

Rŭ nuãma pexna,
Pauru

NÜXĪRAÜXÜ GA POPERA GA TIMUTÉUCA_X NAXÜMATÜXÜ GA PAURU

Timutéuxü narümoxē ga Pauru

¹⁻² Pa Timutéux, choma i Pauru nixī i cuxcèx chanaxümatüxü i ñaã popera. Rü choxü nixī ga yamuxü ga Ngechuchu ya Cristu na norü puracü chaxüxcèx, yerü yemaãcü nanaxwèxe ga Tupana ya tüxü maxēxēcü rü tórü Cori ya Ngechuchu ya Cristu ya ínguxēēgücü. Rü cuma Pa Timutéux, rü chaune quixī i Tupanaärü orewa yerü chauxütawa nixī ga cunayaxuxü ga Tupanaärü ore ga noxrix. Rü chanaxwèxe ya Tanatü ya Tupana rü tórü Cori ya Ngechuchu ya Cristu rü cuxna nanaxā i norü ngechaxü rü norü mecüma rü norü taãe.

Timutéuxü naxucüxē ga Pauru nachiga ga yema ngüxēētaegü ga tama aixcüma ixüü

³ Yexguma cuxna ichaxüächigu na Machedóniãñewa na chaxüxcèx rü cuma nüxü chixu na Epéchiuarü íãnegu na curüxãüxü na ícuyachaxächigüxēēxücèx i ngema duüxügü i doramaãmare ngéma ngüxēētaegüxü. ⁴ Rü chanaxwèxe i ngéma duüxügümaã nüxü quixu na nüxü naxoexücèx na namaã nangüxēēãxü i ngéma nacümagü ga nuxcümaügüxü ga duüxügü nagu íxü. Erü guxüma i ngéma oregü rü doramare nixī, rü ngëmagagu düxwa nügümaã nanuē i duüxügü. Rü ngéma oregü rü tama aixcüma nüxü narüngüxēē i duüxügü na meã Tupanaãxü yaxögüãxücèx. ⁵ Natürü Tupana nanaxwèxe i tórü maxüñewa na ingearü pecaduãxgüxü, rü na mexügu rüxñüxü, rü aixcüma meã na yaxögüxü. Rü nüma tüxü namu na ngémaãcü imaxēãcüma yigü na ingechaügüxü. ⁶ Natürü ñuxre i duüxügü rü marü nüxna nixīgachi i Tupanaärü ore na nawe naxixücèx i ngéma ore i taxuwama mexü i nuëwa nagagümarexü. ⁷ Erü nümagü tüxü nangüxēēchaü i ngéma mugü ga Moiché tüxna ãxü, natürü tama nüxü nacüxgü i tacüchiga na yixü i ngéma tamaã nüxü yaxugüxü rü tüxü nangüxēēxü woo nüma nagu naxñüëgu rü meãma nüxü nacüxgü. ⁸ Rü nüxü tacuèx rü ngéma mugü ga Moiché tüxna ãxü rü tüxü name ega Tupana naxwèxexüãcüma naga ixñüëgu. ⁹⁻¹⁰ Natürü nüxü tacuèxgü rü guxüma i ngema mugü rü duüxügü i chixexü ügüxcèx nixī. Rü ngéma nixī i ngéma duüxügü i tama irüxñüëchaüxü, rü ngéma tama norü ãëxgacüga ññüxü, rü ngéma chixexü ügüxü, rü ngéma pecaduãxgüxü, rü ngéma tama Tupanaga ññüxü, rü ngéma nanatüxü rü naëxü imëxgüxü, rü guxüma i ngéma máëtagüxü, rü ngéma naxüñeärü ngüchaüwe rüxixü, rü ngéma yatügü rü ngëxügü i naxrüü yatüxü rü ngëxümaã ngëãëgüxü, rü ngéma duüxëgümaã taxegüxü, rü ngéma idoratëëxgüxü, rü ngéma ãëxgacügümaã idoragüxü, rü guxüma i ngéma naxügüxü i tacü rü chixexü i yatoxyepexü i ngema ngüxēëtae i mexü. ¹¹ Rü ngéma ngüxēëtae i mexü rü Tupanaärü orewa nangexma, rü ngemagu nixī i nüxü iyarüngauxü i ngema maxü i taguma güxü. Rü ngemaarü uruxü nixī ya Tupana ya mecümaxüchicü i choxü namuxü.

Pauru rü Tupanana moxē naxā yerü nüxü nüxü nangechaü ga norü chixexügü

12 Rū moxē nüxna chaxã ya Ngechuchu ya Cristu ya tórü Cori erü nüma choxü naporaxēē rü choxü nangugü na wüxi i mexü i norü duüxü chixixü. Rū ngēmacēx choxü naxuneta na nüxü chapuracüxü. 13 Üpa ga choma rü chixri nachiga chidexa ga Cristu, rü naxchi chaxai ga yema duüxügü ga nüxü yaxögüxü. Rū nawe chingechigü rü namaã chixexü chixugü. Natürü woo yemaãcü na chamaxüxü, rü Tupanaãxü changechaütümüxü yerü tama aixcüma nüxü chacuèx ga tacü na chaxüxü, yerü tauta Cristuaxü chayaxō. 14 Rū yemaãcü ga tórü Cori ya Ngechuchu rü poraãcüxüchima chomaã namecüma yerü choxü narüngüxēē na nüxü chayaxōxüçèx rü nagagu nüxü changechaüxüçèx i guxüma i duüxügü. 15 Rū pemaã nüxü chixuxchaü i wüxi i ore i aixcümaxüchi ixixü i inaxwèxegüxü na guxãma nüxü cuáxü. Rū Ngechuchu ya Cristu rü ñoma ga naãnewa nangu na namaxēxēãxüçèx i pecaduãxgüxü. Rū natanüwa rü choma nixi ga guxüãrü yexera na chixexü chaxüxü. 16 Natürü Tupana choxü nüxü nangechaü ga yema chorü chixexü na chowa duüxügüxü nüxü nadauxēēxüçèx ga ñuxãcü nüma ga Ngechuchu ya Cristu yaxna chomaã na naxinüxü ga woo guxü ga pecaduãxgüxüãrü yexera chixecü na chiixü. Rū ngēmaãcü wüxi i cuèxruü chixi naxcèx i guxüma i duüxügü na nümagü rü ta nüxü nangēxmaxüçèx i maxü i taguma gúxü. 17 Rū ñuxma tanaxwèxe i guxügutáma nüxü ticuèxüügü rü tanataxēēgü ya yima nüxicatama Tupana ixicü. Rū woo tama nüxü tadaugü i ñuxma natürü guxüguma tórü Æxgacü nixi rü tagutáma nayu. Rū ngēmaãcü yi. 18-19 Pa Chaune, Pa Timutéux, ñaã nixi i chorü ore i cumaã nüxü chixuxü. Rū üpa ga yexguma Tupana yadexaxēēgü ga ñuxre ga taeneēgü, rü nüxü nixugügü na cuma rü tá mexü i Tupanaãrü orearü uruü quiixü. Rū ñuxma chanaxwèxe i yemagü nüxü ixuxrüü meã cuyanguxēē i ngēma puracü i mexü i Tupana nawa cuxü muxü. Rū chanaxwèxe na aixcüma cuyaxōxü rü cuãewa cumatama nüxü cucuáxü na aixcüma namexü i ngēma puracü i icuxüxü. Ñuxre i duüxügü rü nüxü nacuèxgüchirēx i tacü nixi i mexü na naxügüãxü, natürü chixexüãma naxügü. Rū ngēmacēx düxwa nüxü narüxoe na Cristuaxü yaxögüãxü. 20 Rū yemaãcü nüxü naxüpetü ga Imenéü rü Areyáüdrü. Rū düxwa choma Chatanána chanawogü ga yema taxre na Chataná ngüxü nüxü ingexēēgüxüçèx na ngēmawa nüxü nacuèxgüxüçèx na tama namexü na chixri Tupanachiga yadexagüxü.

2

Name nixi i guxüma i duüxügüçèx tayumüxēgü

1 Rū ñuxma rü tá pemaã nüxü chixu na ñuxãcü namexü na peyumüxēgüxü. Rū pexü chamu na guxüma i duüxügüçèxira peyumüxēgüxü. ¡Rü Tupanana naxcèx peca na nüxü nangüxēēxüçèx rü nüxü nüxü nangechaüxüçèx i norü pecadugü! ¡Rü moxē nüxna pexã ya Tupana naxcèx i guxüma i norü ngüxēē i guxü i duüxügüna naxãxü! 2 Rū ngēxgumarüü ta name nixi i naxcèx peyumüxē i guxüma i nachiuãnegüarü ãxgacügü i tacügü rü guxüma i ngēmatüüwa ngēxmagüxü i ãxgacügü na ngēmaãcü itaãgüxüçèx rü tüxü nangēxmaxüçèx i wüxi i maxü i mexü i Tupanapēxewa rü guxü i duüxügüpēxewa. 3 Rū ngēma nixi i namaã nataãxü ya yima Tupana ya tüxü maxēxēcü. 4 Erü nüma nanaxwèxe na guxãma tüxü nangēxmaxü i maxü i taguma gúxü rü guxãma nüxü cuáxü i ngēma ore i aixcüma

ixĩxũ. ⁵ Rũ nũma ya Tupana rũ wũxitama nixĩ. Rũ ngẽxgumarũũ ta wũxitama nixĩ i taetũwa chogũxũ na Tupanaxũtawa tũxũ nangugũxũcèx. Rũ nũma nixĩ ya Ngechuchu ya Cristu ya Tupana Nane ga duũxũxũ ixĩcũ. ⁶ Rũ nũma ga Ngechuchu rũ nũgũ inaxã rũ nayu na guxũ i duũxũgũaxũ naxũtanũãxũcèx na Tupanaxũtawa nangugũxũcèx. Rũ yexguma Ngechuchu yuxgu nixĩ ga Tupana yanguxẽẽxũ ga yema ũpaacũ duũxũgũmaã nũxũ yaxuxũ na ñuxãcũ tá namaxẽxẽẽãxũ. ⁷ Rũ Tupana choxũ naxuneta na norũ orearũ ngeruũ chiĩxũcèx. Rũ choxũ namu na chanangũxẽẽxũcèx i ngẽma duũxũgũ i tama Yudũgũ ixĩgũxũ na nũmagũ rũ ta yaxõgũãxũcèx rũ nũxũ nacuẽxgũxũcèx i ngẽma ore i aixcũma ixĩxũ. Rũ ngẽma pemaã nũxũ chixuxũ, rũ aixcũma nixĩ, rũ tama chidora. ⁸ Rũ ñuxma chanaxwèxe i guxũtwama nayumũxẽgũ i yatũgũ. Rũ chanaxwèxe i ngearũ pecaduãxãcũma naxugũmẽxẽ rũ ngẽmaãcũ tama texémaã nanuẽãcũma rũ tama tacũchiga nũgũ nachoxũgagũãcũma nayumũxẽgũ. ⁹ Rũ chanaxwèxe i ngexũgũ rũ meamare ũxũ i naxchirugu nicuxgũ, rũ meamare nũgũ namexẽẽyaegũ, rũ tama poraãcũ nũgũ nangẽãgũ uirumaã rũ meruxũgũmaã rũ naxchiru i tatanũxũmaã. ¹⁰ Natũrũ narũmemaẽ nixĩ i meãmare Tupanacèx namaxẽ, rũ mexũ i puracũ naxũgũ, erũ ngẽmaãcũ nanaxwèxegũ na namaxẽxũ i ngẽma ngexũgũ i aixcũma Tupanaaxũ yaxõgũxũ. ¹¹ Rũ chanaxwèxe i ngexũgũ rũ meã inaxĩnũẽ i ucuxẽgũ. Rũ tama name na nachoxũgawèxegũxũ. ¹² Erũ ngexũgũna rũ chanachuxu na yatũgũxũ nangũxẽẽxũ, rũ yatũarũ ãẽxgacũ na yĩĩxũ. Rũ name nixĩ i inarũxĩnũẽmare i perũ ngutaquẽxegũwa. ¹³ Yerũ Tupana rũ Adãũxũĩra naxũ rũ yixcama ga Ebaxũ. ¹⁴ Rũ Chataná rũ tama Adãũxũ nawomũxẽẽ, natũrũ yema ngecũxũ nixĩ ga nawomũxẽẽxũ. Rũ yemaãcũ pecadugu ingu ga yema ngecũ. ¹⁵ Rũ yemacèx Tupana nũxũ nixu rũ tá poraãcũ nũxũ nangux i ngẽma ngexũgũ i ngẽxguma naxĩraxacũgũgu. Natũrũ ngĩma i ngecũ rũ tá inayaxu i maxũ i taguma gũxũ ega meã ngĩxãcũgũmaã inacuẽxgu, rũ mexũgu naxĩnũãcũma yaxõõgu, rũ guxũguma duũxũgũxũ nangechaũgu rũ meã Tupanapẽxewa namaxẽgu.

3

Yaxõgũxũãrũ ãẽxgacũgũchiga

¹ Rũ pemaã nũxũ chixuxchaũ i wũxi i ore i aixcũma ixĩxũ. Rũ ngẽxguma chi texé naxwèxegu na yaxõgũxũãrũ ãẽxgacũ tĩĩxũ, rũ mexũ i puracũ nixĩ i naxcèx tadauxũ. ² Rũ yixema yaxõgũxũãrũ ãẽxgacũ rũ tanaxwèxe na aixcũma mecũ tĩĩxũ na taxũema tũmachiga chixri idexaxũcèx. Rũ tanaxwèxe i wũxixicatama tixĩ ya tũmamèx, rũ aixcũma meã tamaxũ rũ mexũguxicatama tarũxĩnũ na guxũ i duũxũgũ tũxũ ngechaũgũxũcèx. Rũ tanaxwèxe i guxũguma meã duũxũgũxũ tayaxu i tũmapatawa, rũ mexũ i ngũxẽẽruũ tixĩ. ³ Rũ tama name i wũxi i ngãxwèxexũ rũ nuwèxexũ tĩĩxũ, rũ tama name i tũmaãrũ dĩẽruguama rũxĩnũxẽ tĩĩxũ. Natũrũ name nixĩ i guxũ i duũxũgũmaã yaxna taxĩnũ rũ namaã tamecũma. ⁴ Rũ tanaxwèxe i meãma tũmachiũmaã itacuèx, rũ tũmaxãcũgũ rũ meã tũmaga naxĩnũẽ, rũ tũxũ nangechaũgũ. ⁵ Erũ ngẽxguma chi tama tũmachiũmaã meã itacuẽxgu rũ ñuxãcũ i guxũma i Tupanaãxũ yaxõgũxũmaã meã itacuãxũ? ⁶ Rũ yixema ngema yaxõgũxũmaã icuãixẽ rũ tama name na ngexwacèx yaxõxẽ tĩĩxũ, erũ ngũrũãchi tá tũgũ ticuèxũ. Rũ ngẽmagagu dũxwa nagu tangu i ngẽma poxcu i Chatanáxũ namaã napoxcuxũ ya

Tupana. ⁷ Rü tanaxwèxe i woo i ngêma duñxügü i tama yaxögüxü rü tüxü nangechaügü na taxúema chixri tümachiga idexagüxücèx rü tama Chataná chixexügu tüxü na nguxêèxücèx.

Yatügü i diáacunügü i tupaucawa ngüxêètaegüxüchiga

⁸ Rü ngëxgumarüü ta i ngêma yatügü i tupaucawa ngüxêètaegüxü ixigüxü rü nanaxwèxe i mexüguxicatama rüxñnüèxü nixigü. Rü nanaxwèxe i aixcüma nayanguxêëgü i ngêma nüxü yaxugüexü. Rü tama nanaxwèxe i ngäxêèchagüxü nixigü rü êxna norü dîeruguama rüxñnüèxü nixigü. ⁹ Rü name nixi i meâma nüxü nacuèxgü i guxüma i Tupanaârü ore, na nüxü nacuèxgüxücèx na tacücèx na yaxögüâxü. Rü nanaxwèxe i nügüâewatama nüxü nacuèxgü na norü maxü rü aixcüma yamexü i Tupanapëxewa. ¹⁰ Rü tanaxwèxe i to i puracüwa nüxü taxügüxira i noxrix. Rü ngëxguma marü taguma chixexü naxügügu, rü marü name i tupaucawaarü ngüxêëruü tayaxigüxêë. ¹¹ Rü ngêma yatügü i tupaucawa ngüxêètaegüxü ixigüxü rü tanaxwèxe i naxmèxgü rü ta mexüguxicatama narüxñnüè. Rü tama name i oregütèèxgüxü nixigü, natürü tanaxwèxe i meâ namaxê rü aixcüma nayanguxêëgü i ngêma nüxü yaxugüxü. ¹² Rü ngêma yatügü i tupaucawa ngüxêètaegüxü ixigüxü rü tanaxwèxe i wüxixicatama tixi ya naxmèx. Rü tanaxwèxe i meâma napatacüâxgümaâ inacüèx, rü naxâcügü rü meâ naga naxñnüè. ¹³ Rü ngêma yatügü i tupaucawa ngüxêètaegüxü, rü ngëxguma meâma naxügüâgu i norü puracü i tupaucawa rü guxüma i duñxügü tá nüxü nangechaügü. Rü ñuxüchi i nümagütama i ngêma yatügü rü tá yexeraâcü nüxü natauxcha na nüxü yaxugüexü i ñuxâcü Tupana nanaxwèxexü i Ngechuchu ya Cristuaxü na yaxögüâxü i duñxügü.

Aixcüma nixi i ngêma ore i Tupana tüxü nüxü cuèxêèxü i Cristuchiga

¹⁴⁻¹⁵ Rü choma chanaxwèxe i paxa ngema chaxü na cuxü íchayadauxücèx. Natürü ngürüâchi tama paxa ngema chaxü, rü ngêmacèx cuxcèx chanaxümatü i ñaâ popera na nüxü cucuáxücèx i ñuxâcü tá cugümaâ icucuáxü napewa i ngema duñxgü i Tupanaxü yaxögüxü. Erü nümagü nixi i Tupana ya maxücüarü duñxügü yixigüxü rü nüxü yaxugügüxü rü ínapoxügüaxü i norü ore i aixcüma ixixü.. ¹⁶ Rü yixema nüxü tacuèx rü aixcüma namexêchi i ngêma ore ga noxri êxügüxü i ñuxma Tupana tüxü nüxü cuèxêèxü i Cristuchiga. Rü nüma ga Cristu rü duñxügüxü nügü nawêx ga yexguma ñoma ga naânewa nayexmagu. Rü Naâê i Üünexü nüxü nixu na mecü yixü. Rü Tupanaârü orearü ngeruügü i daxücüâx nüxü nadaugü. Rü guxü i nachüñânegüwa rü duñxügü nüxü nixugüè i nachiga, rü guxüwama duñxügü nüxü nayaxögü. Rü Nanatü rü wenaxârü daxügüxü i naânewa nanaga i ngextá ínamexêchixüwa.

4

Duñxügü i nüxü rüxoexü na yaxögüâxüchiga

¹ Tupanaâê i Üünexü rü nüxü nixu rü ngëxguma yangaicagu na nagüxchaüxü i naâne rü nümaxü i duñxügü rü tá nüxü narüxoe na yaxögüâxü i Tupanaârü ore i mexü. Rü tá nawe narüxi i duñxügü i dora-mare i orexü ixügüxü i Chatanáârü nguxêètae nangüxêèxü. ² Rü ngêma yaxögüxü rü tá nüxü inarüxñnüè i ngêma duñxügü i meâ maxênetaxü rü idoratèèxgüxü. Rü ngêma duñxügü rü yeücürü nanaxügü i ngêma chixexü rü düxwa namaâ nixü na chixexüguxicatama naxñnüèxü. ³ Rü

ngēma duūxūgū rü nanachuxu na iyangīgūxū i duūxūgū. Rü nanachuxu na duūxūgū nangōxgūxū i ñuxre i ònagū rü woochiréx Tupana nanaxū i guxūma i ònagū na moxé naxcèx inaxāgūācūma nangōxgūāxūcèx i norū duūxūgū i yaxōgūxū rü nüxū cuèxgūxū i norū ore i aixcūma ixīxū. ⁴⁻⁵ Natürü guxūma i Tupana üxū rü name. Rü taxuacūma nüxū taxo ega Tupanana moxé naxcèx ixāxiraācūma nayauuxgu. Erü Tupanaārü ore rü ngēma yumüxé rü nanaxūünexēē i ngēma òna i Tupanapēxewa, rü ngēmacèx name nixī na nangōxū.

Wüxi i mexū i Ngechuchu ya Cristuarü ngüxēēruū rü mexūmañ nanguxēētae

⁶ Rü ngēxguma ngēma cumaã nüxū chixuxū i oremaã cunangüexēēgu i taeneē i yaxōgūxū, rü ngēxguma nawa cunagüechagu i ngēma ore i marū quixōxū, rü ngēxguma nagu quixūēchagu i ngēma mexū i nguxēētae i marū nagu quixūxū, rü ngēxguma tá nixī i wüxi i mexū i Ngechuchu ya Cristuarü ngüxēēruū quiixū. ⁷ Rü tama name na naga cuxīnūxū i ñoma i naānecūāxārū dexagūmare i tama aixcūma ixīxū. Natürü name nixī i guxūguma cugū cuporaxēē na yexeraācū Tupanaxū cungechaūxūcèx rü nawe curūxūxūcèx rü naxcèx cumaxūxūcèx. ⁸ Rü wüxi i mexū nixī na naporaxēēxū rü yaxīāxcūxēēxū i taxūne na aixcūma naporaxūcèx. Natürü ngēmaārü yexera narūmemaē nixī na yigū iporaxēēxū na Tupanaxū ingechaūxūcèx erü ngēma rü guxūwama tūxū name i ñoma i naānewa rü daxūguxū i naānewa rü ta. ⁹ Rü aixcūma nixī i ngēma ore i cumaã nüxū chixuxū, rü name nixī i guxāma tayaxōgū. ¹⁰ Rü ngēmacèx nixī i ipuracūexū rü yigū iporaexēēxū na nüxū ixuxūcèx i ngēma ore i mexū, erü nüxū tayaxōgū ya tórü Tupana ya maxūcū ya guxāārū maxēxēēruū ixīcū. Erü nūma nixī i namaxēxēēāxū i ngēma duūxūgū i nüxū yaxōgūxū. ¹¹ Rü chanaxwèxe i cunangüexēē i ngēma ore rü duūxūgūxū cumu na naga naxīnūexūcèx. ¹² ¡Meã cugūna nadau na taxúema cuxū naxoxūcèx naxcèx i ngēma na cunxextūxūxū! Rü name nixī i wüxi i mexū i cuèxruū quixī naxcèx i guxūma i ngēma yaxōgūxū. Rü ngēmacèx cunaxwèxe i mexū i oremaã quidexa, rü meã duūxūgūpēxewa cumaxū, rü aixcūma nüxū cungechaū i guxūma i duūxūgū, rü meã Tupanaāxū cuyaxō, rü napēxewa meã cumaxū. ¹³ Rü chanaxwèxe i ngutaquēxewa rü guxū i duūxūgūpēxewa nüxū cudaumatū i Tupanaārü ore, rü duūxūgūmaã nüxū quixu na ñuxū ñaxūchiga yiixū. Rü chanaxwèxe i ngēmaācū cunangüexēē rü nüxū cunangüchaūxēē i ngēma taeneēgū ñuxmatáta ngema changu i chomax. ¹⁴ Rü ngēmacèx name nixī i aixcūma namaã cupuracū i ngēma cuèx ga Tupana cuxna āxū ga yexguma norū puracūcèx cuxū naxunetagu rü yema yaxōgūxūārū āēxgacūgū cuxū yangōgūācūma cumaã nüxū yaxuxgu na cuxna naxāāxū ga yema cuèx. ¹⁵ ¡Meã naxū i guxūma i ngēma cumaã nüxū chixuxū, na ngēmaācū guxū i duūxūgū nüxū daugūxūcèx na ñuxācū guxū i ngunexūgu yexeraācū meã Tupanacèx na cumaxūxū! ¹⁶ ¡Inaxuāē na ñuxācū meã cugūna cudauxū rü ñuxācū meã cunangüexēēxū i ngēma togū! Erü ngēxguma meã cunaxūxgu i guxūma, rü tá cunayaxu i maxū i taguma gūxū rü ngēma togū i cuxū irūxīnūēxū rü tá ta nüxū curüngüxēē na nūmagū rü ta nayauxgūāxūcèx i ngēma maxū.

5

Ñuxācū nixī i namexū na nüxū ingechaūxū i ngēma yaxōgūxū

1 Taguma name i cunanga i wüxi i yatü i cuxü rüyamaëxü. Rü narümemae nixi i meäma cunaxucuxë ñoma cunatürüü. Rü ngëma ngextüxcügü rü name nixi i meäma namaã quidexa ñoma cueneëgüxüchirüü. 2 Rü yixema yaguãxgü ya ngexegü rü name nixi i meäma tümamaã quidexa cuexüchirüü. Rü ngëxgumarüü ta i paxügü rü name nixi i meäma namaã quidexamare wüxi i cueyëxüchirüü, rü tama name i chixexügu namaã curüxñü. 3 ¡Tüxü rüngüxëë ya yixema yutegüxe ega aixcüma tacü tüxü tauxgu! 4 Natürü ngëxguma chi wüxi i yutecü ngixü nangëxmagu i ngixácügü rü ëxna ngítaagü, rü name nixi i nümagü ngixü narüngüxëëgü rü ngixna nanaxã i tacü i ngixü taxuxü. Erü Tupana nanaxwëxe na ngitanüxüira ngixna daugüxü na ngëmaäcü yangutanüxëëgüãxüçex ga yema naë na nayaexëëxü. 5 Natürü yixema yutexe ya tüxica irüxãüxë rü tüxü nataxüxe i tümatanüxü, rü Tupanaxütawaxicatama itananguxëë i tümäärü ngüxëë rü guxüguma woo chütacü rü ngunecü rü tayumüxë na tüxü nangüxëëxüçex ya Tupana. 6 Natürü yixema yutexe ya tümäärü ngüchaüguxicatama rüxñüxë, rü Tupanapëxewa rü ñoma tayuxürüü tixi. 7 Rü ngëma nixi i ore i tá cunangüxëëxü i ngëma yaxögüxü na nügüna nadaugüxüçex na taxuüma i chixexü naxügüxüçex rü taxüema nachiga chixri idexagüxüçex. 8 Erü ngëxguma chi wüxie rü tama meã nüxna tadëuxgu i tümapatacüãxgü rü tümäë rü tümangatü, rü maneca tama aixcüma meã Tupanaãxü tayaxö. Rü wüxi i tama yaxöxüärü yexera chixecü tixi. 9 Rü ngëxguma chi wüxi i ngexü i yutexü naxçex icaxgu na ngëma yaxögüxü ngixü rüngüxëëgüxüçex rü tanaxwëxe i 60 ya taunecüärü yexera ngixü nangëxma rü wüxitama nixi ga ngite ga ngixü yexmacü ga noxrix. 10 Rü tanaxwëxe i guxüma i duüxügü ngixü nacuëxgü na wüxi i mexü üxcü na yiixü. Rü name i meã ngixácüxü yaexëëcü iyixi, rü meã ngipatawa duüxügüxü yaxucü iyixi, rü yaxögüxüärü ngüxëëruü iyixi, rü ðaaweexüärü ngüxëëruü iyixi. Rü ngëmaäcü tanaxwëxe i guxüraüxü i mexü na naxüxü. 11 Natürü tama tanaxwëxe i yaxögüxüärü puracü nixi i ngixna na nadaugüxü i wüxi i yutecü ega tama 60 wa nanguxgu ya ngirü taunecü. Erü wüxi i yutecü i pacü, rü ngëxguma ngirü ngüchaü Cristuna ngixü ixügachixëëgu, rü tá inaxwëxe na wena naxätexü. 12 Rü duüxügü tá chixri ngichiga nidexagü, erü tama aixcüma iyanguxëë ga yema Cristumaã inaxunetaxü ga noxrix. 13 Rü ngima rü düxwa ngextá iyaxächigümare, rü ná ya i rü nagu iyarüxãüx, rü düxwa tama ipuracüchaü. Rü tama ngëmaxicatama ixü, natürü düxwa ixoregütëex, rü iyangëxmachigü nawa i ngëma dexe i tama mexü i togüchiga, rü guxüwama nüxü iyaxu i ngëma ore i tama mexü. 14 Rü ngëmacëx chanaxwëxe i ngëma yutegüxü i paxügü na wenaxärü naxätëgüxü, rü naxãacügüxü, rü mexü i napataarü dauruügü na yixigüxü. Rü ngëmaäcü i ngëma duüxügü i ngixchi aiexü, rü taxucürüwa chixri ngichiga nidexagü. 15 Cumaã nüxü chixu i ñaã ore, erü ñuxre i yutecü rü marü nüxü irüxoe i ore i mexü rü Chatanáwe irüxi. 16 Rü ngëxguma chi wüxi i ngecü i yaxöxcü rü ngixü nangëxmagu i ngitanüxü i yutecü, rü name nixi i ngixü irüngüxëë. Rü ngëmaäcü täütáma togü i yaxögüxüärü puracü tá nixi na ngixna na nadaugüxü. Rü ngëxguma tá nüxü natauxcha i ngëma togü i yaxögüxü na ngixü nangüxëëgüxü i ngëma yutecü i aixcüma ngixü natauxcüma i ngitanüxügü i ngixü rüngüxëëgüxü. 17 Rü ngëma yaxögüxüärü äëxgacügü i aixcüma meäma ngëma yaxögüxümaã icuáxü,

rü name nixî i ngêma yaxôgüxü aixcüma nüxü nangechaügu rü namaã nataãëgü. Rü guxüärü yexera tanaxwêxe i nüxü nangechaügu rü nüxü narüngüxëëgü i ngema Tupanaarü orexü ixugüxü rü nangüxëëëxü.

¹⁸ Erü Tupanaarü orewa rü ñanagürü:

“Tama name i nüxna taxaü i ngêma taxaüna i puracüxü”,

ñanagürü. Rü ñanagürü ta:

“Wüxi i puracütanüxü rü tanaxwêxe i nüxü na naxütanüxü i norü puracü”,

ñanagürü i ngêma Tupanaarü orewa. ¹⁹ Rü ngëxguma chi texé nüxü ixuxgu na chixexü naxüxü i wüxi i yaxôgüxüärü äëxgacü, rü täütáma tüxü icuxînú ega natauxguma i taxre rü êxna tomaëxpüx i togü i duüxügü i nüxü daugüxü na aixcüma chixexü naxüxü. ²⁰ Natürü ngêma yaxôgüxüärü äëxgacügü i aixcüma pecadugu maxëxü, rü name nixî i guxü i yaxôgüxüpëxewa cunaxucuxë, na guxüma i ngêma togü i yaxôgüxüärü äëxgacügü rü ta namuüëxüçëx na naxügüäxü i tacü rü chixexü. ²¹ Rü ñuxma Tupanapëxewa rü tórü Cori ya Ngechuchu ya Cristupëxewa rü ngêma daxüçüäx i orearü ngeruügu i Tupana nüxü ngechaügüxüpëxewa, rü cuxü chamu na naga cuxînúxü i ñaã ore i cumaã nüxü chixuxü. Rü chanaxwêxe i ngêma cumaã nüxü chixuxürüü meã cunaxucuxë i guxüma i ngêma yaxôgüxü rü nüetama ega woo texé tixîgu.

²² Rü ngëxguma texexü quingucuchixëëchaügu na ngema yaxôgüxüärü äëxgacü tixîxüçëx, jrü taxü i cuñuxäëxü na namaã cuyumuëxü i wüxi i duüxü i tama nüxü cucuáxü i norü maxü! Natürü name nixî i noxri rü meã nagu curüxînú i ngêma erü ngürüächî tá wüxi i duüxü i pecadu üechaxü quingucuchixëë, rü cugagu tá nixî erü tama icuxuãë. jrü meã cügüna nadau na tama pecadugu cunguxüçëx! ²³ Rü ngêma na cunguxnecaüxü i ñuxguacü, rü name nixî i írarüwa binune cuyaxaxü, rü tama i dexáxicatama. ²⁴ Rü nangëxma i duüxügüarü pecadugü i noxtacüma ngóxü naxüpa na Tupana nüxna çaxü. Natürü nangëxma i to i pecadugü i duüxügüarü rü täütáma nangox ñuxmatáta naãneärü guxwa nanguxgu rü Tupana tüxna icagügu. ²⁵ Rü ngëxgumarüü ta nangëxma i duüxügüarü puracügü i mexü i Tupanacëx naxügüxü i ñuxma marü nüxü idauxü. Rü nangëxma ta i puracügü i mexü i ñuxma tama nüxü idauxü natürü yixcüra tá nüxü idaugüamaxü.

6

¹ Guxáma ya yíxema yaxôgüxe rü ixãärü coriáxë, rü tanaxwêxe i tümaärü corixü tangechaü na ngêmaäcü taxucürüwa texé Tupanachiga rü tórü nguxëëtaechiga chixri idexaxüçëx. ² Rü ngëxguma chi wüxi i duüxë ya Tupanaãxü yaxôxë rü wüxi i cori i tümarüü yaxôxümaã tacoriãxgu, rü tama tanaxwêxe i ngêma na tümaëneë yíxüçëx nüxü tarüxo na nüxü tangechaüxü i tümaärü cori. Natürü tanaxwêxe i yexeraäcü meã nüxü tapuracü erü tümaärü cori i nüxü tarüngüxëëxü i tümarüü yaxôxü nixî rü tümaëneë i Tupana nüxü ngechaüxü nixî. Pa Timutéux, chanaxwêxe i meãma cunangüxëë i ngêma ore i cumaã nüxü chixuxü, rü guxüma i yaxôgüxüpëxewa nüxü quixu.

Tupanaarü ore rü aixcüma tüxü name

³ Rü cumaã nüxü chixu rü nangëxma i duüxügü i namaã nguxëëtaegüxü i ngêma nguxëëtae i tama namaã wüxiguxü i tórü nguxëëtae, rü tama namaã wüxiguxü i tórü Cori ya Ngechuchu ya Cristuarü nguxëëtae i

mexũ, rü tama namaã wüxiguxũ i ngẽma nguxẽẽtae i Tupanaãrũ orewa ngóxũ. ⁴ Rü cumaã nüxũ chixu rü yixema ngẽmaãcü nguxẽẽtaexe rü tũgũ ticuèxũ rü taxuũma tacuèx. Rü ngẽmacèx ngẽxũrũüxũmare i dexa rü naxcèx tachoxũgawèxe, rü tama texéga taxĩnũchaũ, rü düxwa ñoma tidaawexũrũ tixĩ namaã i ngẽma tũmacũma. Rü ngẽmagagu rü taxãxãchiwèxe, rü tanuxwèxe, rü togũmaã taguxchiga, rü taxúxeaxũma tayaxõ. ⁵ Rü ngẽmaãcü i ngẽma duũxũgũ i chixeãègũxũ, rü nũgũmaã nanuèècha, rü tama nüxũ nacuèxgũ i ngẽma ore i aixcũma ixĩxũ, rü nagu narũxĩnũè rü Tupanaãrũ orewa nixĩ i dĩeru ngĩxũ nayauxgũxũ. ⁶ Rü aixcũma nixĩ i Tupanaãrũ orewa nüxũ iyarũngauxũ i taxũma i mexũ, natürũ ngẽma mexũ rü tũmacèxicatama nixĩ ya yixema namaã taãègũxe i ngẽma marũ tüxũ ngẽxmaxũ. ⁷ Rü yixema rü yexguma noxri ixĩraegu, rü ngearũ yemaxũãxẽmaã tabue i ñoma i naãnewa. Rü ngẽxguma iyuxgu rü taxucürũwa tayange i tórũ ngẽmaxũgũ. ⁸ Natürũ ngẽxguma tüxũ nangẽxmagu i taxchiru rü tórũ õna rü name nixĩ i ngẽmamaãtama tataãègũ. ⁹ Natürũ ngẽma duũxũgũ i dĩeruãxgũchaũxũ, rü tama yaxna namaã naxĩnũè i ngẽxguma ngẽma dĩeruarũ ngũchaũ nüxũ poragu. Rü ngẽmacèx nagu nayi i muxũma i ngũchaũgũ i taxuwama mexũ i chixexũwa nagagũxũ, rü ngẽmacèx düxwa i ngẽma duũxũgũ rü poraãcü nachixe rü norũ guxũmaãma inayarũtauxe. ¹⁰ Erũ ngẽma na dĩeruguama rüxĩnũxũ rü ngẽma nixĩ i guxũma i chixexũgũarũ ügũ. Rü nangẽxma i ñuxre i duũxũgũ i dĩeruguama rüxĩnũèxũ rü ngemacèx Tupanana nixĩgachi. Rü ngemaãcü nũgũnatama guxchaxũ naxãgũ rü nũgũxũtama ngechaũ nanguxẽègũ..

Tupanaãxũ yaxõgũamaxũchiga

¹¹ Natürũ cumax, Pa Timutéux, rü wüxi ya yatü ya Tupanaxũ yaxõcü quixĩ. ¡Rü ngẽmacèx nüxna ixũgachi i guxũma i ngẽma chixexũ! ¡Rü meã Tupanapèxewa namaxũ, rü norũ ngũchaũ naxü, rü meã nüxũ yaxõ, rü nüxũ nangechaũ i duũxũgũ, rü yaxna namaã naxĩnũ! Rü tama name i cugũ quicuèxũxũ. ¹² ¡Cugũ naporaxèè na meã cuyaxõõmaxũcèx rü cunaxũamaxũcèx i Tupanaãrũ puracü ega woo tacü rü guxchaxũ cuxũ üpetügux! ¡Rü cugũna nadau na ngemaãcü taguma cuxna iyanaxoxũcèx i ngema maxũ i taguma gũxũ! Yerü yema maxũcèx nixĩ ga noxri Tupana cuxũ yaxuxũ ga yexguma muxũma ga duũxũgũpèxewa nüxũ quixuxgu na ñuxãcü Ngechuchu ya Cristuaxũ na cuyaxõxũ. ¹³⁻¹⁴ Rü ñuxma Pa Timutéux, rü napèxewa ya Tupana ya guxãxũma maxèxèècü, rü napèxewa ya Ngechuchu ya Cristu ga àèxgacü ga Piratumaã nüxũ ixucü ga ñuxãcü Nanatü ya Tupanaãxũ na yaxõõxũ, rü cuxũ chamu na naga cuxĩnũxũ i ngẽma ore i cumaã nüxũ chixuxũ. Rü tama chanaxwèxe i cunaxũchicüü i ngẽma ore, na taxúema texé tacücèx cuxũ oregũxũcèx rü chixri cuchiga idexaxũcèx. Rü chanaxwèxe i ngẽmaãcü meã cunaxü ñuxmatáta ínangu ya tórũ Cori ya Ngechuchu ya Cristu. ¹⁵ Erũ ngẽma ngunexũ i Tupana nagu naxwèxexũgu rü tá Cristuxũ nangoxèè. Erũ nüxĩcatama Tupana nixĩ, rü nüma nixĩ i aixcũma mecü yĩixũ rü guxũètũwama nangẽxmaxũ. Rü guxũ i àèxgacügũarũ Àèxgacü yĩixũ, rü guxũ i corigũarũ Cori yĩixũ. ¹⁶ Rü nüxĩcatama nixĩ na taguma nayuxũ. Rü nüma rü poraãcü inangõonexũwa namaxũ, rü taxucürũwa texé ngẽma ngõonexũna tangaicama. Taguma wüxi i duũxũ nüxũ nadau, rü taxuacũma texé nüxũ tadau. Nüma rü guxũguma naporaxũchi rü taguma inayarũxo na Àèxgacü yĩixũ. Rü ngẽmacèx tanaxwèxe i

guxāma nūxū ticuèxūŭgüecha. Rū ngēmaācū yīi. ¹⁷ Rū yíxema muarū dīeruáxe i ñoma i naānewa, jrū tūmamaā nūxū pixu na tama ngēmamaā tūgū ticuèxūŭgūxūcèx rū tama nagu tarūxīnūèxūcèx na ngēma tūmaārū dīeruwa nūxū itayangaugūxū i tūmaārū maxū! Erū ngēma dīeru rū paxa tá nagux. Natürū narūmemaē nixī i Tupanaga taxīnū, erū yimawa nixī i nūxū itayangaugūxū i tūmaārū maxū. Rū nūma nixī i poraācū tūxna naxāāxū i guxūma i tacū i inaxwèxexū na itaāègūxūcèx. ¹⁸ Rū namaā nūxū ixu i ngēma muārū dīeruāxgūxū, rū name na ngēmamaā mexū naxūgūxū rū togū i duūxūgūxū nangūxēègūxū! Rū ngēmaācū tá namu i ngema mexūgū i naxūgūxū i Tupanapēxewa. Rū tanaxwèxe i nūmagū i muārū dīeruāxgūxū rū na ínamemaregūxū na togūna naxāāxū rū namaā nangauxū i ngēma norū ngēmaxūgū. ¹⁹ Rū ngēmaācū tá nūxū nangēxma i norū mexūgū i daxūguxū i naānewa, rū tá nanayauxgū i ngēma maxū i aixcūma ixīxū.

Pauru rū Timutéuxū namu, rū yemaācū inayacuèxēē ga norū popera

²⁰ Pa Timutéux, jmeā namaā nangúexēētae i guxūma i ngēma ore i cuxū chamuxū! Rū tama name na icurūxīnūxū i ñoma i naānecūāxārū dexagūmare i taxuwama mexū rū ngēma ore i doramare ixīxū i duūxūgū nūxū ixugūgūnetaxū na ore i nawa nūxū icuáxū yīixū. ²¹ Erū ñuxre i nūmagū i ngēma noxrūtama cuèxgu īxū, rū dūxwa ngēmagagu Tupanana nixīgachi. Rū chanaxwèxe i Tupana meā pexū narūngūxēē.

Rū nuāma pexna,
Pauru

NORÜ TAXRE GA POPERA GA TIMUTÉUCA_X NAXÜMATÜXÜ GA PAURU

Timutéuxü narümoxë ga Pauru

¹ Pa Timutéux, choma i Pauru nixí i cuxcèx chanaxümatüxü i ñaã popera. Rü choxü nixí ga namuxü ga Ngechuchu ya Cristu, yerü yemaãcü nanaxwèxe ga Tupana. Rü nüma choxü namu na nüxü chixuxüçèx na ñuxãcü tüxü nangëxmaxü i maxü i taguma gúxü, ega aixcüma Ngechuchu ya Cristuaxü yaxõgügu. ² Cuxü changechaü, Pa Chaune, Pa Timutéux. Rü chanaxwèxe ya Tanatü ya Tupana rü Ngechuchu ya Cristu ya tórü Cori na cuxü nangüxëëgüxü rü nüxü cungechaütümüügüxü rü cuxü nataãxëëgüxü.

Tama name i taxãne na Cristuchigaxü ixuxü

³ Guxügguma i chütacü rü ngunecü rü cuxna chacuèxãchixü i chorü yumüxëwa, rü poraãcü cuxcèx moxë Tupanana chaxã. Rü nüxü nixí i chapuracüxü i mexü i chauãëmaã, yexgumarüü ga nuxcümaügüxü ga chorü oxigü naxügüxürüü. ⁴ Choma rü nüxna chacuèxãchi na ñuxãcü poraãcü chauxcèx cungechaüxü rü chauxcèx cuxaxuxü ga yexguma cuxna íchixüxgu. Rü wenaxãrü cuxü chadauxchaü na aixcüma chataãëxüçèx. ⁵ Erü nüxna chacuèxãchi na ñuxãcü aixcüma Tupanaãxü cuyaxõxü. Rü curü noxë ga Loída rü cue ga Euníchia rü túma rü woetama tüxira Tupanaãxü tayaxõgü rü nüxü chacuèx i ñuxma rü cuma rü ta aixcüma cuyaxõxü. ⁶ Rü ngëmacèx cumaã nüxü chixu na cugü cuporaxëëxü na yexeraãcü cunaxüamaxüçèx i ngëma Tupanaãrü puracü ga naxcèx cuxna naxããxü ga cuèx ga yexguma noxri cuxü chingõgüãcüma cumaã chayumüxëgu. ⁷ Yerü Tupana rü tama tüxna nanamu ga naãë i tüxü muüëëxü. Natürü tüxna nanamu ga Naãë i Üünexü na tüxü naporaxëëxüçèx na aixcüma duüxügüxü ingechaügüxüçèx rü meã yigümaã icuáxüçèx. ⁸ Rü tama chanaxwèxe na cuxãnexü na nüxü quixuxü i nachiga ya tórü Cori. Rü ngëxgumarüü ta tama chanaxwèxe i chauxcèx cuxãne i ngëma na chapoxcuxü naxcèx i Tupanaãrü ore. Rü name nixí i yaxna namaã cuxínü i ngëma ngúxü i cuxcèx ínguxü nagagu i ngëma ore i mexü i nüxü quixuxü. Rü Tupana tá cuxü naporaxëë. ⁹⁻¹⁰ Rü Tupana tüxü namaxëëë rü tüxü nade na naxcëxícataã imaxëxüçèx. Natürü tama facü rü mexü na ixüxügügu nixí ga yemaãcü tamaã namecümamaxü ga Tupana. Natürü yemaãcü tüxü narüngüxëë yerü woetama yema nixí ga nanaxwèxexü yerü Ngechuchu ya Cristugagu tüxü nangechaü. Rü nüma ya Tupana ga tautama naãne üxgumama tüxü ngechaüçü, rü yexguma ínguxgu ga tórü maxëxëëruü ga Ngechuchu ya Cristu, rü yexguma nixí ga Tupana tüxü nüxü dauxëëxü na ñuxãcü poraãcü tüxü nangechaüxü. Rü nüma ga Cristu nixí ga iyanaxoxëëãxü na iyuxuchixü yerü nüma rü yuwa ínarüda rü wena namaxü. Rü norü orewa tüxü nüxü nacuèxëë na yixema rü ta tüxü nangëxmaxü i ngëma maxü i taguma gúxü ega nüxü yaxõxgu. ¹¹ Rü Tupana choxü ningucuchixëë na nüxü chixuxüçèx i ngëma norü ore i mexü. Rü choxü namu na ngëma oremaã chanangüxëëxüçèx i duüxügü i guxüwama. ¹² Rü ngëmacèx nixí i poraãcü ngúxü chingexü rü chapoxcuxü i ñuxmax. Natürü tama

naxcèx chaxâne i ngêma, erü choma nüxü chacuèx na texéaxü chayaxõxü. Rü nüxü chacuèx na naporaxü i nüma na nüxna nadauxüçèx i ngêma puracü i choxna naxâxü rü namaã inacuáxüçèx i chauãe i guxügutáma ñuxmatáta ngêma ngunexü i nagu wena nüma naxüxü. ¹³ Rü chanaxwêxe i meãma nagu quixü i ngêma nguxêëtae i mexü ga chauxütawa naxcèx cungúxü. Rü name nixi i meã nüxü cuyaxõõma ya Ngechuchu ya Cristu rü meã nüxü cungechaü i guxüma i duüxügü, erü Cristuarü duüxü quixi. ¹⁴ Rü name nixi i Tupanaãe i Üünexü i tawa maxüxüärü ngüxêëmaã ícunapoxü i ngêma nguxêëtae i mexü i Tupana cuxna äxü. ¹⁵ Cuma marü nüxü cucuèx rü guxüma ga yema yaxõgüxü ga Áchiaarü naãnewa ne íxü rü marü choxna naxigü. Rü yematanüwa nayexma ga Figueru rü Ermóquene. ¹⁶ Onesíferu rü muëxpüxcüna choxü nataãexêë, rü tama chauxcèx naxâne i ngêma na chapoxcuxü. Rü ngêmacèx chanaxwêxe i tórü Coriaxü nangechaütümüügü i guxüma i natanüxügü. ¹⁷ Rü yexguma noxritama Dumawa nanguxgu ga nümax, rü chauxcèx nadauecha rü ñuxmata choxü iyangau. ¹⁸ Cuma meãma nüxü cucuèx ga ñuxäcü tüxü na nangüxêëxü ga Onesíferu ga Epéchiuarü ñãnewa. Rü ngêmacèx chorü yumüxêwa naxcèx íchaca na Tupanaãxü nangechaütümüüxüçèx i ngëxguma wena ñoma i naãnewa naxüxgu ya tórü Cori ya Ngechuchu.

2

Ngechuchu ya Cristuarü puracütanüxü i mexüchiga

¹ Rü ñuxma, Pa Chaune, Pa Timutéux, jrü cugü naporaxêë namaã i ngêma pora i Ngechuchu ya Cristu cuxna äxü! ² Yema ore ga chauxütawa nüxü cuxinüxü ga yexguma muxüma ga duüxügüpëxewa nüxü chixuxgu, rü chanaxwêxe i ñuxma cuxi ngêma oremaã cunangüexêë i togü i yatügü i meã naãexü cuëxgüxü na nüxü togüxü nangüexêëxüçèx namaã i ngêma ore. ³ Rü tama name i naxcèx cumuü na Ngechuchu ya Cristuarü oregagu ngúxü quingexü. Natürü name i namaã cupora ñoma wüxi i mexü i norü churararü. ⁴ Rü wüxi i duüxü i churarawa ngëxmaxü, rü taxucürüwama to i puracü i tama churaraarü ixixügu narüxínü. Natürü ngêma norü äëxgacü nagu namuxü i puracügu nixi i naxinüxü na ngêmaäcü norü äëxgacüxü nataãexêëxüçèx. ⁵ Rü ngëxgumarüü ta wüxi i duüxü i wüxi i ñücawa nügü ingucuchixêëxü, rü taxuacüma nanayaxu i norü ãmare ega chixri naxinüçèxwëxegu rü tama ngêma ñücaarü äëxgacüga naxinügu. ⁶ Rü texé ya naãnewa puracüxe rü name nixi i tüxira tanayaxu i tümanetüarü o. ⁷ jrü guxüguma nagu rüxínü i ñãã ore i cumaã nüxü chixuxü! Rü nüma ya Cori ya Ngechuchu tá cumaã inanangüxüxêë i guxüma na nüma nanaxwëxexüäcüma cunaxüxüçèx i ngêma puracü. ⁸ jrü nüxna nacuèxächi ya Ngechuchu ya Cristu ya Dabítanüxü ga guma yuwa írudacü! Rü yimachiga nixi i ngêma ore i mexü i duüxügümaã nüxü chixuxü. ⁹ Rü ngêma oregagu nixi i ngúxü na chingexü rü ñoma wüxi i máëtaxürüü nüma poxcupataüwa cadenamaã chichotaxü. Natürü Tupanaärü ore i mexü, rü guxüwama nanguama rü taxucürüwama texé tayachota. ¹⁰ Rü ngêmacèx yaxna namaã chaxínü i ngêma ngúxü i chingexü naxcèx i ngêma duüxügü i Tupana dexü. Erü chanaxwêxe i nümagü rü ta Ngechuchu ya Cristuaxü nayaxõgü, rü ngêmaäcü na nayauxgüäxüçèx i maxü i mexü i taguma gúxü. ¹¹ Rü pemaã nüxü chixuxchaü i wüxi i ore i aixcüma ixixü. Rü ngëxguma Cristu

yuxürüü norü orecèx iyuegu, rü naxrürü tá ta wena tamaxê na nüma íngêxmagüxücèx. ¹² Rü ngêxguma ñoma i naãnewa yaxna namaã íxñüëgu ega ngúxü ingexgu, rü daxüguxü i naãnewa rü wüxigu namaã äëxgacü tá tixígü. Rü ngêxguma tama Cristuxü icuáxchaügu i ñoma i naãnewa, rü nüma rü tãütáma tuxü nacuáxchaü i daxüguxü i naãnewa. ¹³ Natürü woo ñuxguacü i yixema rü tama aixcüma naxüxgu i ngêma Tupanamaã ixunetaxü, natürü nüma ya Tupana rü guxüguma nayanguxêë i ngêma tamaã inaxunetaxü, erü taxuacüma nügütama nawomüxêë.

Wüxi i mexü i puracütanüxü i Tupana namaã taãëxüchiga

¹⁴ Rü ngêma yaxögüxü i cuxütawa ngêxmagüxü, rü name nixí i Tupanaegagu nüxna nüxü cucuèxächixêë na tama nuxcümaügüxü i ore i taxuwama mexücèx nügümaã na yaporagatanücüxücèx. Erü ngêma rü wüxi i chixexü nixí, rü nanachixeãëxêë i ngêma duüxügü i nüxü íñüëxü. ¹⁵ ¡Rü cügü naporaxêë na meã cunaxüxü i Tupanaärü puracü na cumaã nataãëxücèx i ngêxguma napêxewa cunguxgux rü ngemaãcü taxucèxma cuxânexücèx i ngêxguma nüma cuxna nacaxgu naxcèx i curü puracüchiga! ¡Rü ngêmacèx name i aixcüma meã namaã cungüexêëtae i ngêma ore i mexü i aixcüma íxíxü! ¹⁶ ¡Rü nüxü rüxo i ñoma i naãnecüãxãrü dexagümare i taxuwama mexü! Erü ngêma duüxügü i ngêma dexagümaregu íxü, rü guxüguma yexeraãcü chixexügu nayi. ¹⁷ Rü ngêma norü nguxêëtae i ngêma duüxügü, rü ñoma wüxi i ñaaweane i tuxü íyimachixêëxürüü nixí. Rü yema nixí ga nüxü ngupetüxü ga Imenü rü Firetu. ¹⁸ Yerü nidoragümare ga nüxü na yaxugüxü rü marü na nangupetüxü i yuetaarü dachiga. Rü yemaãcü nanawomüxêëgü ga ñuxre ga duüxügü na tama noxrürüü yaxögüãxücèx i Tupanaärü ore. ¹⁹ Natürü Tupanaärü ore rü taguma inayarüxo rü taguma naxüchicüü. Rü ngêma norü orewa rü ñanagürü:

“Tóru Cori ya Tupana nüxü nacuèx i texé tixí ya norü duüxügü íxígüxe.

Rü guxâma ya yixema nüxü ixuxe na Ngechuchu ya Cristu rü túmaärü Cori yíxü, rü name nixí i nüxna tixígachi i guxüma i chixexü”,

ñanagürü i ngêma norü orewa. ²⁰ Wüxi i duüxü i díeruãxüchixü rü napatawa nangêxma i poratu i uirunaxcèx rü díerumünaxcèx. Rü nangêxma ta i poratu i nañnaxcèx rü waixümünaxcèx. Rü ngêma poratu i uirunaxcèx rü díerumünaxcèx rü mexü i norü ñnacèx nixí. Natürü ngêma poratu i nañnaxcèx rü waixümünaxcèx rü guxchirechixü nixí. ²¹ Rü ngêxguma wüxi i yaxõxü naxwèxegu na aixcüma mexü i Tupanaärü puracütanüxü na yíxü, rü name nixí i nüxna nixügachi i guxüma i chixexü. Rü ngêxguma tá nixí i Tupanapêxewa aixcüma naxüünexü na naxüãxücèx i nagúxüraüxü i puracü i Tupana namaã nüxü ixuxü. ²² ¡Nüxü rüxo i guxüma i ngêma chixexü i ngextüxücügü nagu rüxñüëxü! ¡Rü meã Tupanapêxewa namaxü rü aixcüma nüxü yaxõ! ¡Rü nüxü nangechaü i guxüma i duüxügü, rü tãxü i namaã cunuxü! ¡Rü ngêmaãcü namaxü wüxigu namaã i guxüma i ngêma duüxügü i aixcüma Tupanacèx maxêxü rü ngemaãcü yumüxêgüxü! ²³ Rü tama name i naxcèx icurüxñü i ngêma dexagü i taxuwama mexü. Erü ngêma dexagügagu rü düxwa nügüchi naxaie i duüxügü. ²⁴ Rü wüxi i Tupanaärü puracütanüxü rü tama name na texemaã núcèx nadauxü. Rü narümemae nixí na guxâma namecümaxü.. Rü nanaxwèxe i yaxna namaã naxñüãcüma meã duüxügüxü nangüxêë i Tupanaärü ore. ²⁵⁻²⁶ Rü wüxi i Tupanaärü puracütanüxü rü name na

yaxna namaã naxĩnũcũma meã nayaxucuxẽgũãxũ i ngẽma duũxũgũ i tama irũxĩnũechaũxũ. Rũ name i ngẽmaãcũ ínananguxẽẽ na Tupana nũxũ rũngũxẽẽxũ i ngẽma duũxũgũ na nũxũ naxoexũcẽx i norũ chixexũ rũ nũxũ nacuẽxgũxũcẽx i ngẽma ore i aixcũma ixĩxũ. Erũ Tupana nanaxwẽxe na naxuãẽgũxũ i ngẽma duũxũgũ rũ nawa ínanguxũxũ i ngẽma chixexũ i ngoxo i Chataná nagu nayixẽẽxũ na noxrũtama ngũchaũ namaã naxũxũcẽx.

3

Nuxãcũ tá nixĩ i duũxũgũcũma i ngẽxguma nagũxchaũgu i naãne

¹ Rũ chanaxwẽxe i nũxũ cucuẽx rũ ngẽxguma nagũxchaũgu i naãne rũ tá nangẽxma i ãcũmaxũgũ rũ guxchaxũgũ naxcẽx i duũxũgũ. ² Rũ duũxũgũ rũ tá nũgũguxicatama narũxĩnũẽ, rũ norũ dĩeruquama tá narũxĩnũẽ. Rũ tá nũgũ nicuẽxũxũgũ, rũ ngẽmaãcũ tãũtãma nũxũ nacuẽxgũchaũ i togũ i duũxũgũ i tama naxrũũ taarũ dĩeruãxgũxũ. Rũ chixri Tupanachiga tá nidexagũ, rũ tãũtãma nanatũga rũ naẽga naxĩnũechaũ. Rũ tãũtãma moxẽ inaxã i ngẽxguma Tupana nũxũ rũngũxẽẽgu, rũ ngẽmaãcũ tãũtãma nũxũ nacuẽxgũchaũ i Tupanaãrũ ore. ³ Rũ tãũtãma nagu narũxĩnũẽ i togũ i duũxũgũxũ na nangechaũgũxũ, rũ tãũtãma nũxũ nangechaũtũmũũgũ. Rũ tá naxoregũtẽxgũ, rũ tãũtãma nũgũ naporaexẽẽ na yaxna namaã naxĩnũexũcẽx i naxũneãrũ ngũchaũgũ. Rũ tá nichixecũma, rũ tá naxchi naxaie i guxũma i ngema mexũ. ⁴ Rũ duũxũgũechitawẽxgũxũ tá nixĩgũ, rũ nuẽwẽxexũ tá nixĩgũ, rũ nũgũ icuẽxũũgũxũ tá nixĩgũ. Rũ tá norũ ngũchaũcẽxama nadaugũ, rũ tãũtãma Tupanaxũ nacuẽxgũchaũ. ⁵ Rũ tá nũgũ nayaxõgũxũchinetaxẽẽ natũrũ ngẽma norũ chixexũ i naxũgũxũwa tá nangoxoma na tama aixcũma yaxõgũãxũ i ngẽma ore i mexũ. Rũ ngẽma duũxũgũ i ngẽmaãcũ maxẽxũ, rũ tama name na namaã cuxãmũcũxũ rũ natanũgu cuxãxũ. ⁶⁻⁷ Erũ ngẽma duũxũgũtanũwa nangẽxmagũ i nũmaxũ i ípatagu ichocuetanũxũ. Rũ norũ nguxẽẽtaemaã nayawomũxẽẽgũ i ngẽma ngexũgũ i ngema ngẽxmagũxũ i tama naãexũ icuãxũ rũ chixri maxẽxũ. Rũ ngẽma ngexũgũ, rũ norũ ngũchaũgũtama chixexũwa nana-gagũ, rũ ngẽmacẽx woo guxũguma nangũe natũrũ taguma aixcũma nũxũ nacuẽxgũ i ngẽma ore i aixcũma ixĩxũ. ⁸ Rũ ngẽma duũxũgũ i chixexũmaã nguxẽẽtaegũxũ, rũ chixexũguxicatama narũxĩnũẽ, rũ tama aixcũma nayaxõgũ i Tupanaãrũ ore. Rũ naxchi naxaie i ngẽma ore i aixcũma ixĩxũ, naxrũũ ga yema yuũxũgũ ga Yane rũ Yãũbre ga tama Moĩchẽga ínũechaũxũ. ⁹ Natũrũ tãũtãma muxũ i duũxũgũ nũxũ nayaxõgũ. Erũ guxũwama i duũxũgũ rũ tá nũxũ nicuẽxãchitanũ na wũxi i duũxũgũ i chixexũgu rũxĩnũexũ rũ ngeãẽmarexũ yixĩgũxũ naxrũxũ ga yema taxre ga tama Moĩchẽga ínũechaũxũ.

Ucuxẽmaã inyacuẽxẽẽ ga Pauru na Timutéumaã yadexaxũ

¹⁰⁻¹¹ Natũrũ cumax, Pa Timutéux, marũ nũxũ cucuẽx ga ñuxãcũ meã na chanangũxẽẽxũ ga duũxũgũ, rũ ñuxãcũ meã chamaxũxũ, rũ ñuxãcũ nagu charũxĩnũxũ rũ meã chayaxõxũ, rũ ñuxãcũ yaxna namaã chaxĩnũxũ ga duũxũgũ rũ nũxũ changechaũxũ. Rũ cuma nũxũ cucuẽx ga ñuxãcũ na chaugũ chaporaxẽẽxũ na yaxna namaã chaxĩnũxũ i guxchaxũgũ. Yerũ ga duũxũgũ rũ chowe ningexũtanũ na choxũ yamẽxgũxũcẽx. Rũ cuma rũ nũxũ cucuẽx ga íacũ choxũ na ùpetũxũ ga Aũtiouãawa rũ Icũniũwa rũ Listrawa, rũ ñuxãcũ chowe na yangexũtanũxũ rũ poraãcũ ngũxũ chingexũ. Natũrũ tórũ Cori ya

Tupana choxü ínapoxü na tama choxü yamèxgüxcèx. ¹² Rü aixcüma cumaã nüxü chixu rü guxâma ya yíxema naxwèxegüe na Ngechuchu ya Cristucèx tamaxèxü, rü togü tá tùmachi naxaie rü chixri tá tùmamaã nachopetü. ¹³ Natürü ngëma duüxügü i chixecümagüxü rü ngëma duüxügü i idoratèxgüxü rü yexeraxü i chixexügu tá nayi. Erü Chataná marü nayawomüxèëgü, rü ngëmacèx nüxü togüxü nawomüxèëgü. ¹⁴ Natürü i cuma rü name nixü i guxüguma meã nagu quixü i guxüma i ngëma ore i marü cungüxü. Erü cumatama rü nüxü cucuèx na aixcüma yíxü i ngëma ore, rü nüxü cucuèx na texégü tixígüxü ga guxema namaã cuxü nguxèëgüxe. ¹⁵ Rü cuma nüxü cucuèx rü cubuxgumamatama nawa cungux i ngëma Tupanaârü ore i üünexü. Rü ngëmawa cunayaxu i cuèx na nüxü cucuáxcèx i ñuxâcü tüxü na nangëxmaxü i maxü i taguma gúxü ega Ngechuchu ya Cristuaxü yaxôgügu. ¹⁶ Rü guxüma i Tupanaârü ore i ümatüxü rü nügüãewatama nanayaxu ga Tupana. Rü ngëma ore rü name na duüxügüxü namaã ingüxèëxü, rü namaã yaxucuxègüxü rü namaã iyanawèxâchixèëgüxü, rü namaã nangüxèëxü na meã Tupanapèxewa namaxèxcèx. ¹⁷ Rü ngëmaãcü i ngëma ore rü tüxü narüngüxèë ya yíxema Tupanaârü íxixè, na meã nüxü tacuáxcèx i ngëma Tupana naxwèxèü rü ítamemarexü na tanaxüxü i nagúxüraüxü i puracü i Tupana tùmamaã nüxü íxuxü.

4

¹⁻² Rü nüma ya Ngechuchu ya Cristu ya núma tá ücü na nüxü yacagüxcèx i ngëma duüxügü i maxèxü rü ngëma marü yuechirèxü, rü yimapèxewa rü Tupanapèxewa cuxü chamu na nüxü quixuxèxcèx i ngëma ore i mexü. Rü ngëxguma cuxü yatauxchaâchigu rü woo cuxü naguxchagu, rü chanaxwèxe i nüxü quixuama i ngëma ore. Rü ngëmaãcü chanaxwèxe na icuyanawèxâchixèëgüxü rü meã cuyaxucuxègüxü rü nüxü cunangüchaüxèëxü i duüxügü. Rü name nixü i yaxna namaã cuxüñüãcüma meã cunangüxèë. ³ Erü yixcüra i duüxügü rü täütáma nüxü naxüñüëchaü i ngëma nguxèëtae i mexü. Erü ngëma duüxügü rü nichixecüma. Rü ngëmacèx naxcèx nadaugü i norü ngüxèëruügu i nüma nanaxwèxegüxüãcüma nangüxèëxü. ⁴ Rü täütáma nüxü naxüñüëchaü i Tupanaârü ore i aixcüma íxixü. Erü ngëma ore i doramare íxixüguama tá narüxüñüë. ⁵ ¡Natürü cuma rü meã cugüna nadau, rü ínaxuãë, rü namaã napora ega ngüxü cuxü üpetügu! ¡Rü nüxü íxuama i ore i mexü i tüxü maxèxèëxü, rü meã yanguxèë i ngëma puracü i Tupana cuxna äxü! ⁶ Täütáma muxü i ngunexü ñoma i naãnewa changèxma erü marü choxü ningaica na Tupanaârü puracü chaxüxügagu chayuxü rü choxü na yamèxgüxü i duüxügü. ⁷ Rü choma rü marü chayanguxèë i ngema puracü i Tupana choxna äxü. Rü ñuxma na nagüxü i ngema puracü rü taguma nüxü charüxo na chayaxôxü. ⁸ Rü ñuxma rü marü Tupana choxü namaã nanguxü i ngëma ämare i mexèchixü ya tórü Cori ya Ngechuchu ya äëxgacü ya mecü tá choxna äxü i ngëxguma wenaxârü ñoma i naãnewa naxüxgu. Rü täütáma chaxica choxna nanaxã i ngëma ämare, natürü tá tüxna nanaxã ya guxâma ya yíxema tumaârü ngüchaümaã ínanguxèëgüxe na wenaxârü núma naxüxü.

Timutéuxü naxucuxè ga Pauru

⁹ Cumaã nüxü chixu rü chanaxwèxe i paxa nuã cuxü, rü choxü ícuyadau.

¹⁰ Dema rü ñoma i naãneârü ngëmaxügu naxüñüxügagu choxna nixü rü

ĩãne ga Techarónicawa naxũ. Rũ Crechéũte rũ Gárataanewa naxũ, rũ Titu i Darumáchiaanewa. ¹¹ Rũ Lucaxicatama nixĩ i ñuxma chauxũtawa ngẽxmaxũ. Rũ chanaxwẽxe i naxcẽx cudau i Marcu na nuã cunagaxũcẽx. Erũ nüma rũ chauxcẽx name na choxũ na nangũxẽẽxũ i ñaã puracũwa. ¹² Rũ Tíquicu rũ ããne ya Epéchiuwa chanamu. ¹³ ¡Ngẽxguma nuã cuxũxgu rũ nuã nange i chorũ gáuxũchiru ga ããne i Tróawa ngẽxmaxũ ga Carpupatawa chatáxũ! Rũ chanaxwẽxe i nuã cunana i chorũ poperagũ. Rũ guxũãrũ yexera chanaxwẽxe na nua cunanaxũ i chorũ poperagũ i idixgũpútaxũ. ¹⁴ Areyáũdru i cobrenaxcẽx i buetarearũ üwa puracũxũ rũ poraãcü chixri chomaã naxũpetũ. Natürũ Tupana nüxũ nacuẽx i ñuxãcü tá na napox-cuãxũ naxcẽx ga yema chixexũ ga chomaã naxũxũ. ¹⁵ ¡Meã cugũna nadau na tama chixexũ cumaã naxũxũcẽx! Erũ poraãcüxũchima naxchi naxai i Tupanaãrũ ore i mexũ. ¹⁶ Yexguma noxrixũchima ãẽxgacũgũpẽxewa chaugüétüwa chideaxgu rũ taxúema choxũ tarüngũxẽẽ. Guxũma choxna nibuxmũ. Natürũ tama chanaxwẽxe ya Tupana rũ nagu narũxĩnũ i ngẽma. ¹⁷ Natürũ tórũ Cori choxũ naporaxẽẽ rũ choxũ narüngũxẽẽ na choxũ natauxchaxũcẽx na nüxũ chixuxũcẽx ga norũ ore i mexũ i tüxũ maxẽxẽẽxũ. Rũ yemaãcü guxũma ga yema duũxũgũ ga tama yaxõgũxũ ga yéma yexmagũxũ rũ nüxũ naxĩnũẽ ga yema ore. Rũ yemaãcü tórũ Cori ya Ngechuchu choxũ ínguxuchixẽẽ ga yexguma taxũ ga ãũcũmaxũwa chayexmagu. ¹⁸ Rũ nüma ya tórũ Cori tá choxũ ínguxuchixẽẽ nawa i guxũma i chixexũgũ. Rũ tá choxna nadau na ngextá ãẽxgacũ íyĩxũwa choxũ nagaxũcẽx. Rũ name i guxũguma nüxũ ticuẽxũũgũ. Rũ ngẽmaãcü yĩ.

Pauru rũ wenaxãrũ Timutéuxũ narümoxẽ rũ naxcẽx ínaca na Cori ya Ngechuchu ya Cristu nüxũ rüngũxẽẽxũ

¹⁹ Chanaxwẽxe i chauégagu nüxũ curümoxẽ i Prisila, rũ Aquiru, rũ Onechéperutanũxũgũ. ²⁰ Eratu rũ ããne i Corĩtiugu narũxãũx. Rũ Turuquínu rũ idaawexũma ããne i Miretuwa chanatẽx. ²¹ Rũ naxũpa i gáuanexũ rũ chanaxwẽxe i nuã cuxũ. Rũ cuxũ narümoxẽgũ i Eubúru, rũ Prudẽte, rũ Linu, rũ Cúdia, rũ guxũma i taeneẽgũ i yaxõgũxũ. ²² Rũ chanaxwẽxe i tórũ Cori ya Ngechuchu ya Cristu cumaã nangẽxma, rũ Tupana pexũ narüngũxẽẽ ya guxãma i pemax.

Rũ nuãma pexna,
Pauru

POPERA GA TITUCAX NAXÜMATÜXÜ GA PAURU

Tituxü narümoxe ga Pauru

¹⁻² Pa Titux, choma i Pauru i Tupanaärü puracütanüxü nixi i cuxcèx chanaxümatüxü i ñaã popera. Rü Ngechuchu ya Cristu nixi ga choxü mucü na ngëma duüxügü i Tupana dexümaã nüxü chixuxüçèx i norü ore na Tupanaãxü yaxögüãxüçèx rü nüxü nacüexgüxüçèx i ngëma norü ore i aixcüma ixixü i tüxü rüngüxëxü na naxcèx imaxëxüçèx. Rü ngëmaãcü Tupanaãxü tayaxögü rü naxcèx tamaxëchaü erü tanayauxgüchaü i ngëma maxü i taguma gúxü. Rü ngëma maxü i taguma gúxü nixi ga nuxcümaxüchima ga yexguma tauta naãne üxgu Tupana ya taguma idoracü nüxü ixuxü. ³ Rü ñuxma rü marü nawa nangu na Tupana tüxü nüxü cuèxëxü i ngëma norü ore i mexü i tüxü maxëxëxü. Rü ngëmacèx nümatama ya Tupana ya tórü maxëxëerü choxü namu na nüxü chixuxüçèx i ngëma norü ore. ⁴ Pa Titux, cuma rü chaune quixi i Tupanaärü orewa yerü chauxütawa cunayaxu ga Tupanaärü ore ga noxri rü ñuxma rü chauxrü cuyaxõ. Rü chanaxwëxe i cuxü narüngüxëegü rü cuxü nataãxëegü ya Tanatü ya Tupana rü Ngechuchu ya Cristu ya tórü maxëxëerü.

Tituarü puracü ga yexguma Crétawa nayexmagu

⁵ Rü yexguma Crétaarü capaxügu cuxü chamuxgux, rü cumaã nüxü chixu na yema yaxögüxütanüwa cunaxüxü ga yema puracü ga tama chinguxëxü ga yexguma cuxna yéma chataegugu. Rü yemacèx cumaã nüxü chixu na wüxichigü ya ñanewa rü nüxü cuxunetaxü i tupaucaarü äëxgacügü na ngëma yaxögüxümaã inacüexgüxüçèx, yema cuxü chamuxürü. ⁶ Rü wüxi i äëxgacü i yaxögüxüärü, rü name i meã namaxü na taxüema chixri nachiga idexagüxüçèx. Rü name i wüxitama tixi ya namëx. Rü naxäcügü rü name na yaxögüãxü rü meã namaxëxü na taxüema nüxü ixuxüçèx na chixri namaxëxü rü tama nanatüga naxinüëxü. ⁷ Erü yixema yaxögüxüärü äëxgacü ixixë, rü Tupanaärü puracü nixi i taxüxü. Rü ngëmacèx tanaxwëxe i aixcüma meã tamaxü. Rü tama name i wüxi i yatü i chixecümaxü tixi rü chixexügu rüxünüxü tixi. Rü tama name na tangäxüxü, rü nucèx tadauxü, rü togü i duüxügüxü tawomüxëxü norü dërucèx. ⁸ Natürü narümemae na guxüguma meã duüxügüxü tayaxuxü i tümapatawa, rü aixcüma nüxü tangechaü i ngëma duüxügü i meã maxëxü. Rü tanaxwëxe i wüxi i yatü i aixcüma tümääxü cuáxe tixi, rü guxüguma duüxügümaã mecümaxë tixi, rü aixcüma Tupanacèx maxüxë tixi, rü guxüguma meã tügümaã icuáxe tixi. ⁹ Rü yixema yaxögüxüärü äëxgacü ixixë rü name i nagu tixü i ngëma ore i aixcüma ixixü ga tümamaã nüxü ixuxü na tümä rü ta togüxü tangüexëxüçèx i ngëma ore i mexü, na ngëmaãcü nüxü tanangüchaüxëxüçèx rü nüxü tayaxögüxëxüçèx i ngëma duüxügü i noxri tama yaxögüchaüxü. ¹⁰ Erü nangëxma i muxüma i yaxögüchirëxü i tama aixcüma irüxünëchaüxü. Rü ngëma guxüärü yexera tama irüxünëchaüxü nixi i ngëma Yudiügu i yaxögüchirëxü i ñuxma naxwëxegüxü na nuxcümaügüxü i nacümaawe naxixü i ngëma yaxögüxü. Rü nümagü rü ore i taxuwama mexüxü nixugügü, rü ngëmaãcü

duũxũgũxũ nawomũxẽẽgũ. ¹¹ Natürü ngẽma duũxũgũ i ngẽmaãcũ chixri nguxẽẽtaegũxũ, rü chanaxwẽxe i noxtacũma icuyanangeẽxgũxẽẽ. Erü muxũma i duũxũgũxũ nachixexẽẽgũ rü ñuxmata ñuxre ya ñpatawachigü rü nanachixexẽẽ i guxũma i duũxũgũ na tama aixcũma Tupanaãxũ yaxõgũãxũcèx. Rũ ngẽma ore i taxuwama mexũmaã duũxũgũxũ nangũexẽẽ na ngẽmaãcũ tũxũ nawomũxẽẽgũãcũma ngĩxũ nayauxgũxũcèx i dĩeru. ¹² Rũ wũxi ga yematama capaxũcũãx ga norü tupanaãrũ orearü uruũ nixĩ ga natanũxũgũxũtama ixuxũ rü ñaxũ:

“Rũ ñaã Cretacũãx i duũxũgũ rü guxũguma doratèexgũxũ nixĩgũ, rü ñoma naẽxũgürũũ nidürae, rü nitaanü, rü nixoxochi”, ñaxũ. ¹³⁻¹⁴ Rũ aixcũma nixĩ ga yema ore ga nüxũ yaxuxũ ga yema yatü. Rũ ngẽmacèx chanaxwẽxe i poraãcũ cuyaxucũxẽgũ i ngẽma yaxõgũxũ na aixcũma meã yaxõgũãxũcèx, rü tama nagu naxĩxũcèx i ngẽma Yudĩugũcũma. Rũ chanaxwẽxe i namaã nüxũ quixu na tama naga naxĩnũxũcèx ega ñacũ namuãxgu i ngẽma duũxũgũ i tama nüxũ cuèxgũchaũxũ i ore i aixcũma ixĩxũ. ¹⁵ Rũ yĩxema aixcũma Tupanapẽxewa mexẽ rü guxũwama tame. Natürü yĩxema tama aixcũma Tupanapẽxewa mexẽ, rü taxucũruwa ñacũ rü nacũma i nagu tixũxũmaã tũgũ tamexẽẽ. Rũ woo tũmaãẽwa nagu tarũxĩnũxũwa rü tachixe erü ngẽma nacũma i nagu tixũxũmaã Tupanapẽxewa tũgũ tamexẽẽchaũ. ¹⁶ Rũ ngẽma duũxũgũ i ngẽmagu rüxĩnũxũ rü nügũ yaxugũgũgu rü Tupanaxũ nacuèx, natürü ngẽma nümagü naxũgũxũwa nüxũ tacuèx na tama aixcũma yĩxũ na Tupanaxũ nacuèxgũxũ. Rũ nümagü rü Tupanapẽxewa nichixe, rü tama naga naxĩnũẽ, rü taxuwama nime na ñacũ rü mexũ naxũgũxũ.

2

Nguxẽẽtae i aixcũma mexũ

¹ Natürü i cuma, Pa Titux, rü name i guxũgutãma ngẽma mexũ i nguxẽẽtaemaã cunangũexẽẽ rü taguma nüxna quixũgachi. ² ¡Rü meã yaxucũxẽgũ i ngẽma yatũgũ i yaguãxgũ na aixcũma meã naãẽxũ nacuaãcũma namaxẽxũcèx, rü taguma nadauxcũraxũwèxegũxũcèx, rü guxũguma meã nagu na naxĩnũxũcèx! ¡Rü nangũexẽẽ na aixcũma meã Tupanaãxũ yaxõgũãxũcèx, rü guxũ i duũxũgũxũ nangechaũgũxũcèx, rü yaxna namaã naxĩnũxũcèx ega woo ñacũ rü guxchaxũ nüxũ ñpetũgux! ³ Rũ ngẽxgumarũũ ta chanaxwẽxe i meã cuyaxucũxẽgũ i ngẽma ngexũgũ i yaguãxgũ na meã Tupanapẽxewa namaxẽxũcèx. Rũ tama name na yaxoregütèexgũxũ, rü nangãxewèxegũxũ. Rũ name nixĩ i guxũ i duũxũgũpẽxewa rü meã namaxẽ. ⁴⁻⁵ Rũ ngẽma ngexũgũ i yaguãxgũ rü name nixĩ i meã na nangũexẽẽãxũ i ngẽma ngexũgũ i paxũgũ na aixcũma natexũ rü naxãcũgũxũ nangechaũgũxũcèx, rü meã naãẽxũ nacuèxgũxũcèx, rü mexũguxicatama na naxĩnũxũcèx, rü meã napatana nadaugũxũcèx, rü guxũ i duũxũgũmaã namecũmagũxũcèx, rü aixcũma natega naxĩnũxũcèx na taxũema chixri Tupanaãrũ orchiga idexagũxũcèx. ⁶ ¡Rü ngẽxgumarũũ ta meãma yaxucũxẽgũ i ngẽma ngextũxũcũgũ na aixcũma meã naãẽxũ nacuaãcũma namaxẽxũcèx rü tama nadauxcũraxũwèxegũxũcèx! ⁷ ¡Rü cumatama rü name nixĩ i meã napẽxewa cumaxũ i guxũwama na ngẽmaãcũ wũxi i norü cuèxruũ i mexũ quĩxũcèx! Rũ ngẽxguma cunangũexẽẽgũ, rü cunaxwẽxe i mexũgu curũxĩnũãcũma cunangũexẽẽ rü tama ñnũcaãcũma namaã nüxũ quixu i ngẽma ore. ⁸ Rũ ngẽxguma ngẽmaãcũ meã cunangũexẽẽgu i ngẽma

ore i mexŭ, rŭ taxŭetáma texé chixri nachiga tidexa. Rŭ ngēmaācŭ ya yixema chixri tachiga idexagŭchaŭxē rŭ tá taxāneē erŭ taxucŭrŭwa ŭacŭ rŭ chixexŭxŭ tixugŭ i tachiga. ⁹ ¡Rŭ meāma yaxucŭxēgŭ i ngēma duŭxŭgŭ i coriāxgŭxŭ! ¡Rŭ namaā nŭxŭ ixu na guxŭguma meā norŭ coriga naxŭnŭxŭcŭcŭx, rŭ norŭ corimaā namecŭmagŭxŭcŭcŭx, rŭ taguma norŭ corixŭ nachoxŭgagŭxŭcŭcŭx! ¹⁰ Rŭ tama name i norŭ coriaxŭ nangŭxgŭ, natŭrŭ nanaxwēxe i aixcŭma meāma norŭ corimaā namaxē rŭ taguma nanawomŭxēēgŭ. Rŭ ngēxguma ngēmaācŭ namaxēgu, rŭ guxŭma i togŭ i duŭxŭgŭ tá nŭxŭ nadaugŭ na űuxācŭ aixcŭma namexēchixŭ i ngēma ore i duŭxŭgŭxŭ namaā ingŭxēēxŭ nachiga ya Tupana ya tŭrŭ maxēxēruŭ. ¹¹ Tupana rŭ poraācŭxŭchima tamaā namecŭma, rŭ yemacŭx nŭma nanamu ga Nane na guxŭma i duŭxŭgŭaxŭ nangēxmaxŭcŭcŭx i maxŭ i taguma gŭxŭ ega nŭxŭ yaxŭgŭāgu. ¹² Rŭ ngēma na Tupana tamaā mecŭmaxŭwa nŭxŭ tacuēx na namexŭ na nŭxŭ rŭxoexŭ i űoma i naānecŭāxārŭ ngŭchaŭgŭ rŭ guxŭma i to i chixexŭgŭ i napēxewa ixŭxŭ. Rŭ ngēma Tupana taxcŭx ŭxŭ tŭxŭ nanguxēē na meā yigŭmaā icuēxgŭācŭma togŭ i duŭxŭgŭpēxewa rŭ Tupanapēxewa meā imaxēxŭ i űoma i naānewa. ¹³ Rŭ tŭxŭ nanguxēē ta na guxŭguma meā ínanguxēēgŭxŭcŭcŭx na nataeguxŭ ya Ngechuchu ya Cristu ya tŭrŭ maxēxēruŭ ya tŭrŭ Tupana ya tacŭ ixŭcŭ. Erŭ Tanatŭ ya Tupana rŭ tamaā inaxuneta na wena tá nataeguxŭ ya Ngechuchu, rŭ wŭxi i taāē tá nixŭ i ngēxguma ínanguxgu. ¹⁴ Rŭ nŭma ga Ngechuchu rŭ taxcŭx nayu na tŭxŭ ínanguxŭxēēxŭcŭcŭx nawa i guxŭma i chixexŭ, rŭ tŭxŭ yamexēēgŭxŭcŭcŭx na aixcŭma norŭ duŭxŭgŭ i mexŭ ixŭgŭxŭcŭcŭx rŭ aixcŭma naxcŭx idaugŭxŭcŭcŭx na guxŭguma mexŭ ixŭgŭxŭcŭcŭx. ¹⁵ Rŭ ngēma ore tá nixŭ i duŭxŭgŭxŭ namaā cungŭxēēxŭ rŭ nŭxŭ cunangŭchaŭxēēxŭ na Tupanacŭx namaxēxŭcŭcŭx. Rŭ ngēma oremaā tá aixcŭma cuyaxucŭxēgŭ i duŭxŭgŭ erŭ Tupanatama nixŭ ya cuxŭ mucŭ na ngēmaācŭ cunaxŭxŭ. Rŭ tama name na texé cuxŭ oxŭ.

3

űuxācŭ name na namaxēxŭ i ngēma yaxŭgŭxŭ

¹ Rŭ ngēma yaxŭgŭxŭ i duŭxŭgŭ, ¡rŭ namaā nŭxŭ ixu na nachixŭānearŭ āēxgacŭgŭga naxŭnŭxŭcŭcŭx rŭ guxŭma i ngema togŭ i āēxgacŭgŭga naxŭnŭxŭcŭcŭx! ¡Rŭ yaxucŭxēgŭ na ínamemaregŭxŭcŭcŭx na naxŭgŭāxŭcŭcŭx i guxŭma i mexŭ i puracŭgŭ i āēxgacŭgŭ unagŭxŭ! ² Rŭ tama name i texēchiga chixri nidexagŭ rŭ texēmaā nanuē. Natŭrŭ name nixŭ i guxŭ i duŭxŭgŭmaā namecŭmagŭ rŭ aixcŭma guxŭ i duŭxŭgŭxŭ nangechaŭgŭ rŭ tama nŭgŭ nicuēxŭxŭgŭ. ³ Rŭ name nixŭ i yaxna namaā taxŭnŭē i ngēma tama yaxŭgŭxŭ, yerŭ yixema rŭ ta ga űpa rŭ chixri tamaxē, rŭ tama Tupanaga taxŭnŭē. Rŭ itayarŭtauxe rŭ tŭrŭ ngŭchaŭ tŭxŭ napora. Rŭ chixexŭgu rŭxŭnŭēācŭma tamaxē rŭ taxāŭxāchiwēxegŭ. Rŭ naxchi taxaie ga togŭ, rŭ nŭma rŭ ta taxchi naxaie. ⁴ Natŭrŭ yexguma Tupana ya tŭrŭ maxēxēruŭ tŭxŭ nŭxŭ dauxēēgu i norŭ ngechaxŭ naxcŭx i guxŭma i duŭxŭgŭ, rŭ nŭma rŭ tŭxŭ namaxēxē. ⁵ Rŭ yema na tŭxŭ namaxēxēxŭ rŭ tama ŭacŭ rŭ mexŭ na ixŭgŭxŭgagu nixŭ, natŭrŭ tŭxŭ namaxēxē yerŭ nŭxŭ tangechaŭtŭmŭŭgŭ. Rŭ Naāē i űŭnexŭ i tŭxŭ ngexwacaxŭxēēxŭārŭ poramaā Tupana tŭxŭ inayanoxēē ga tŭrŭ pecadu na ngexwacaxŭxŭ i duŭxŭgŭ ixŭgŭxŭcŭcŭx. ⁶ Rŭ Ngechuchu ya Cristu ya tŭrŭ Maxēxēruŭgagu nixŭ ga Tupana ga guxŭma ga norŭ

ngúchaŭmaã tüxna namuãxŭ ga Naãẽ i Ũünexŭ. ⁷ Rŭ yemaãcŭ tamaã namecŭma rŭ tüxŭ narüngŭxëẽ ga Tupana na aixcŭma imexŭcèx i napèxewa, rŭ na nayauxgŭxŭcèx i ngẽma írünguxëẽgŭxŭ i maxŭ i taguma gŭxŭ. ⁸ Rŭ guxŭma i ngẽma marŭ cumaã nüxŭ chixuxŭ rŭ aixcŭma nixŭ. Rŭ ngẽmacèx chanaxwèxe i guxŭguma nüxŭ quixu i ngẽma ore na aixcŭma mexŭ naxŭgŭxŭcèx i ngẽma duŭxŭgŭ i Tupanaãxŭ yaxŭgŭxŭ. Erŭ ngẽma ore rŭ guxŭwama name i guxãcèx. ⁹ ¡Natŭrŭ nüxna ixŭgachi i ngẽma dexagŭ i taxuwama mexŭ i duŭxŭgŭ nawa nügŭ choxŭgagŭxŭ rŭ ngẽma oregŭ i nuxcŭmaŭgŭxŭ i duŭxŭgŭchigamare ixŭgŭxŭ! ¡Rŭ nüxna ixŭgachi i ngẽma nügŭ ngaexŭ! ¡Rŭ tama name na natanŭgu cuxãxŭ i ngẽma duŭxŭgŭ i nügŭmaã nüxŭ rŭnuẽtanŭcŭüxŭ nachiga i ngẽma mugŭ ga Moïché ũmatŭxŭ! Erŭ guxŭma i ngẽma na nüxŭ rŭnuẽtanŭcŭüxŭ rŭ taxuwama name, rŭ natŭcèxmamare nixŭ. ¹⁰ Rŭ ngẽxguma chi wŭxie i petanŭwa rŭ chixexŭ i nguxëẽtaemaã ngẽma yaxŭgŭxŭxŭ titoyegu, rŭ name nixŭ i tŭmamaã nüxŭ quixu na tama ngexŭ tawagŭxŭcèx. Rŭ ngẽxguma tanaxŭamagu, rŭ name nixŭ na wena tŭmamaã nüxŭ quixuxŭ. Rŭ ngẽxguma tama cuga taxŭnŭchaŭgu rŭ tanaxŭamagu i ngẽma chixexŭ rŭ name nixŭ i noxtacŭma tüxŭ ícumuxŭchi natanŭwa i ngẽma yaxŭgŭxŭ. ¹¹ Erŭ ngẽma chixri na tamaxŭxŭwa rŭ tá nangox na tachixeãexŭ ya yíxema duŭxë rŭ tŭmaãrŭ pecadugagu tá nixŭ na tapoxcuxŭ.

Tituxŭ naxucŭxë ga Pauru

¹² Rŭ ngẽxguma cuxŭtawa chanamuxgu i Artema rŭ êxna Tíquicu, rŭ chanaxwèxe i paxa Nicaporíchiuwa cuxŭ na choxŭ ícuyadauxŭcèx. Erŭ ngema tá nixŭ i chanangupetŭxëẽxŭ ya yima tauemacŭgŭ ya nagu nagáuanecŭ. ¹³ Rŭ guxŭma i cuxŭ taxchaxŭmaã chanaxwèxe i nüxŭ curüngŭxëẽ i ãëxgacŭ i Chena i Dumacŭãxgŭarŭ mugŭxŭ cuãxŭ rŭ Aporu na paxa núma naxŭxŭcèx. Rŭ chanaxwèxe i nüxna cunaxã i ngẽma nanaxwèxexŭ i norŭ namawaŭ na taxuŭma nüxŭ taxuxŭcèx. ¹⁴ Rŭ ngẽma taeneëgŭ i yaxŭgŭxŭ, rŭ name nixŭ i naxcèx nangŭe na mexŭ naxŭgŭxŭ rŭ togŭxŭ nangŭxëẽgŭxŭ ega ŭacŭ nüxŭ taxŭgux. Rŭ ngẽmaãcŭ i ngẽma togŭ rŭ tá nayaxŭgŭ.

Pauru rŭ wenaxãrŭ Tituxŭ narŭmoxë rŭ naxcèx ínaca na Tupana nüxŭ rŭngŭxëẽxŭcèx

¹⁵ Rŭ guxŭma i taeneëgŭ i nuã chauxŭtawa ngẽxmagŭxŭ rŭ cuxŭ narŭmoxëgŭ. Rŭ ngẽxgumarŭŭ ta i choma rŭ chanaxwèxe i nüxŭ curŭmoxë i taeneëgŭ i yaxŭgŭxŭ i cuxŭtawa ngẽxmagŭxŭ. Rŭ chanaxwèxe i Tupana pexŭ narüngŭxëẽ i guxãma i pemax.

Rŭ nuãma cuxna,
Pauru

POPERA GA FILEMÚŮCAX NAXŮMATŮXŮ GA PAURŮ

Pauru rŮ nŮxŮ narŮmoxŮ ga FilemúŮ

¹ Pa ToeneŮ i FilemúŮ i ToxrŮxŮ TupanaarŮ PuracŮwa PuracŮxex, choma i Pauru rŮ taeneŮ i TimutŮumaã cuxcèx tanaxŮmatŮ i ñaã popera. RŮ choma rŮ nuxa chapoxcu nagagu na nŮxŮ chixuxŮ i Ngechuchu ya CristuarŮ ore. ² RŮ ñaã popera i cuxcèx taxŮmatŮxŮ, rŮ naxcèx ta nixŮ i ngŮma taeneŮgŮ i cupatawa ngutaquŮxegŮxŮ rŮ ngixcèx ta nixŮ i taeyèx i Ápia rŮ naxcèx ta nixŮ i taeneŮ i Ariquípu i taxrŮxŮ TupanaarŮ puracŮwa puracŮxŮ. ³ RŮ chanaxwèxe i TanatŮ ya Tupana rŮ tórŮ Cori ya Ngechuchu ya Cristu pexŮ narŮngŮxŮ rŮ pexŮ nataãxŮ.

FilemúŮ rŮ aixcŮma NgechuchuaxŮ nayaxŮ rŮ yema yaxŮgŮxŮ nangechaŮ

⁴ RŮ guxŮguma i ngŮxguma cuxna chacuèxãchigu i chorŮ yumŮxŮwa, rŮ Tupanana moxŮ chaxã cuxcèx. ⁵ ErŮ nŮxŮ chacuáchiga na ñuxãcŮ nŮxŮ cuyaxŮxŮ ya tórŮ Cori ya Ngechuchu rŮ ñuxãcŮ nŮxŮ na cungechaŮxŮ i guxŮma i duŮxŮgŮ i TupanaarŮ ixŮgŮxŮ. ⁶ RŮ Tupanana naxcèx chaca na cuxŮ nangŮxŮcèx na duŮxŮgumaã nŮxŮ quixuxŮcèx na ñuxãcŮ CristuaxŮ yaxŮgŮxŮ i yixemax, erŮ chanaxwèxe na meã nŮxŮ cucuáxŮ na ñuxãcŮ Ngechuchu ya Cristugagu poraãcŮ tŮxŮ nangŮxŮcèx ya Tupana. ⁷ RŮ choma rŮ poraãcŮ chataãxŮchi na ñuxãcŮ nŮxŮ cungechaŮxŮ i ngŮma yaxŮgŮxŮ. ErŮ cugagu nixŮ, Pa ChaueneŮx, na nataãgŮxŮ i ngŮma togŮ i yaxŮgŮxŮ.

Pauru rŮ FilemúŮna naca na mea OnéchimuxŮ nayaxuxŮcèx

⁸⁻⁹ RŮ ngŮmacèx nangŮxma i wŮxi i ngŮxŮe i cuxŮtawa naxcèx íchacaxchaŮxŮ. RŮ dŮcax, Cristu nixŮ ya choxŮ mucŮ rŮ ngŮmacèx choxŮ nangŮxma i pora na cuxŮ chamuxŮ na cunaxŮxŮcèx i ngŮma ngŮxŮe i mexŮ i tá cumaã nŮxŮ chixuxŮ. NatŮrŮ tama ngŮmaãcŮ cuxŮ chamuxchaŮ erŮ cuxŮ changechaŮ, rŮ ngŮmacèx chauxcèx narŮmemaŮ nixŮ na cuxŮ chacèxŮmarexŮ naxcèx i ngŮma. RŮ choma i Pauru rŮ marŮ chaya rŮ ñuxma rŮ chapoxcu Ngechuchu ya Cristucèx. ¹⁰ RŮ ngŮmacèx cuxna naxcèx chacaxchaŮ i wŮxi i ngŮxŮe naxcèx i OnéchimŮ i nuã poxcupataŮwa chauxŮtawa CristuxŮ yaxuxŮ. RŮ ngŮmacèx i ñuxma rŮ TupanaarŮ orewa rŮ chaune nixŮ. ¹¹ RŮ Ůpa ga OnéchimŮ rŮ wŮxi ga curŮ duŮxŮ ga taxuwama cuxŮ mexŮ nixŮ. NatŮrŮ i ñuxma rŮ cuxŮ rŮ choxŮ rŮ ta name. ¹² RŮ ñuxma rŮ cuxcèx chanataeguxŮe i nŮma i OnéchimŮ. RŮ chanaxwèxe i meã cunayaxu, ñoma choxŮ cuyaxuxŮrŮ. ¹³ ChierŮ chanaxwèxe na nuxma chauxŮtagu naxãxŮ, rŮ na cuchicŮ choxŮ nangŮxŮcèx i ñuxma na chapoxcuxŮ naxcèx i TupanaarŮ ore i mexŮ. ¹⁴ NatŮrŮ tama chanaxŮchaŮ i ñacŮ i tauta “NgŮ” ñacuxŮ choxŮ. ErŮ ngŮma ngŮxŮe i cuxna naxcèx chaçaxŮ, rŮ chanaxwèxe na curŮ ngŮchaŮtama yŮxŮ i ngŮma rŮ tama i chorŮ mugagu na yŮxŮ. ¹⁵ RŮ bexmana Tupana nanaxwèxe na paxaãchi cuxna yaxŮxŮ ga OnéchimŮ na yixcama rŮ wenaxãrŮ cuxcèx nataeguxŮcèx rŮ ngŮmaãcŮ guxŮgutama cuxŮtawa nangŮxmaŮcèx. ¹⁶ NatŮrŮ i ñuxma rŮ tama ngŮxŮrŮxŮmare i curŮ duŮxŮrŮ nixŮ, erŮ wŮxi i curŮ duŮxŮãrŮ yexera nixŮ i ñuxmax, erŮ

taeneē i nūxŭ ingechaŭxŭ nixī. Rŭ aixcŭma poraãcŭ nūxŭ changechaŭ i chomax, natŭrŭ chanawae i cuma rŭ yexeraãcŭ nūxŭ cungechaŭ. Erŭ ñuxma rŭ tama wŭxi i curŭ dŭŭxŭmare nixī, natŭrŭ wŭxi i cueneē i tŭrŭ Coriaxŭ yaxŭxŭ nixī i ñuxmax. ¹⁷ Rŭ ngēmacèx, rŭ ngēxguma choxŭ cudèuxgu na aixcŭma cueneē chíixŭ, rŭ chanaxwèxe i meã cunayaxu i Onéchimu, ñoma choxŭ cuyaxuxŭrŭ. ¹⁸ Rŭ ngēxguma tacŭ rŭ chixexŭ cumaã naxŭxgu rŭ éxna tacŭ cuxŭ nangetanŭgu, rŭ chanaxwèxe i chomaã nūxŭ quixu na ñuxre yīxŭ, na cuxŭ chanaxŭtanŭxŭcèx. ¹⁹ Rŭ chomatama i Pauru rŭ choxmēxmaãxŭchi chanaxŭmatŭ i ñaã popera. Rŭ aixcŭma chomatama tá cuxŭ chanaxŭtanŭ. Rŭ tãŭtama cuxna nūxŭ chacuèxãchixēē na ñuxãcŭ choxŭ cunangetanŭxŭ i curŭ maxŭ i taguma gŭxŭ i chaugagu Tupanaxŭtawa cuyaxuxŭ. ²⁰ Rŭ ngēmaãcŭ, Pa Chaueneēx, rŭ chanaxwèxe i tŭrŭ Corigagu chauxcèx cunaxŭ i ngēma ngŭxēē. Rŭ chanaxwèxe i choxŭ cutaãxēē, erŭ chaueneē i Cristuaxŭ yaxŭxŭ quixī. ²¹ Rŭ cuxcèx chanaxŭmatŭ i ñaã popera erŭ nūxŭ chacuèx na aixcŭma chauga cuxŭnŭxŭ rŭ tá cunaxŭxŭ i ngēma cuxna naxcèx chaçaxŭãrŭ yexera. ²² Rŭ ngēxgumarŭŭ ta chanaxwèxe na chauxcèx cunamexēēxŭ i wŭxi i nachica i ngextá tá nawa changuxŭ. Erŭ íchananguxēē na Tupana tá nangãxŭxŭ i perŭ yumŭxégŭ, rŭ tá choxŭ nangŭxēēxŭ na pexŭ íchayadauxŭcèx.

Pauru rŭ wenaxãrŭ Filemúŭxŭ narŭmoxē rŭ naxcèx ínaca na Cori ya Ngechuchu ya Cristu nūxŭ rŭngŭxēēxŭ

²³ Rŭ moxē cuxcèx ngēma namu i Epáparu. Rŭ nŭma rŭ wŭxigu chomaã napoxcu naxcèx ya Ngechuchu ya Cristu. ²⁴ Rŭ ngēxgumarŭŭ ta moxē cuxcèx ngēma namugŭ i Marcu, rŭ Aritárcu, rŭ Dema rŭ Luca. Rŭ nŭmagŭ rŭ chomŭcŭgŭ nixŭgŭ i Tupanaãrŭ puracŭwa. ²⁵ Rŭ chanaxwèxe i tŭrŭ Cori ya Ngechuchu ya Cristu pexŭ narŭngŭxēē i guxãma i pemax.

Rŭ nuãma cuxna,
Pauru

POPERA GA YUDÍUGÜ GA YAXŌGÜXÜCA_X ÜMATÜXÜ

Tupana rü Nanewa tamaã nidexa

¹ Nuxcüma ga Tupana rü muëxpüxcüna rü nagúxüraüxüãcüma norü orearü uruüğüwa tórü oxigümaã nidexa, rü namaã nüxü nixu ga tacü nüxü na nanaxwëxexü. ² Natürü i ñomaücüü ya Tupana rü Nanewatama nixi i tamaã yadexaxü rü tüxü nüxü nacuëxëëxü na ñuxäcü tüxü nangüxëëchaüxü. Rü gumaxü nixi ga namuxü na naxüãxüçex ga ñoma ga naãne rü daxüguxü ga naãne rü üëxcü rü tauemacü rü woramacurigü rü ëxtagü. Rü ñuxüchi guma Nanena nanana ga guxüma ga yema na noxrü yixüçex. ³ Rü Nanewa nixi i nüxü idauxü na ñuxäcü namexëchixü i nüma ya Tupana. Rü nüma ya Nane rü Nanatü ya Tupanarüütama nixi. Rü ñuxma na guxüärü äëxgacü yixü ya Nane, rü guxümaãma inacüex rü norü ore i poraxümaã nanamu i guxüma na nüma nanaxwëxexüãcüma na yixüçex. Rü nüma ya Nane nixi ga taxcëx nayuxü na nüxü rüxoëxüçex ga tórü pecadugü. Rü yemawena rü Nanatüxütawa naxü i daxüguxü i naãnewa. Rü yéma Nanatüarü tügü necüwawa nayarüto erü guxüärü äëxgacü nixi i ñuxmax.

Tupana Nane rü guxüma i orearü ngeruüğü i daxü- cüãxétüwa nangëxma

⁴ Rü ñuxma i nüma ya Nane rü guxüma i Tupanaärü orearü ngeruüğü i daxücüãxärü yexera nixi rü naëtüwa nangëxma yerü yemaãcü nanaxuegu ga Nanatü. ⁵ Rü ngëmaãcü nixi i ñuxma yerü ga Tupana rü taguma wüxi ga norü orearü ngeruüxü ñanagürü:

“Cuma nixi i Chaune. Rü ñuxma chanangoxëë na aixcüma Chaune quixü”,

ñanagürü. Rü taguma wüxi ga norü orearü ngeruüchiga ñanagürü:

“Choma nixi i Nanatü chixü rü nüma rü Chaune nixi”,

ñanagürü. ⁶ Natürü yexguma ñoma ga naãnewa namuãgu ga Nane ya guxüëtüwa ngëxmacü, rü ñanagürü ga Tupana:

“Chanaxwëxe i guxüma i chorü orearü ngeruüğü i daxücüãx rü nüxü nicuëxüüğü ya Chaune”,

ñanagürü. ⁷ Rü yexguma norü orearü ngeruüğü ga daxücüãxchiga yadeaxgu ga Tupana, rü ñanagürü:

“Choma chanaxwëxexüãcüma chanamu i ngëma chorü orearü ngeruüğü i chorü ngüxëëruüğü ixigüxü. Rü ngëxguma chanaxwëxegu rü ñoma buanecü rü ñoma üxüemarüü chayaxigüxëë, rü chanaporaëxëë na naxügüãxüçex i chorü ngüchaü”,

ñanagürü. ⁸ Natürü yexguma Nanechiga yadeaxgu ga Tupana rü ñanagürü:

“Cuma rü chauxrüü Tupana quixi. Rü guxügutáma äëxgacü quixi. Rü aixcüma meã guxümaã icuëx erü aixcümacü quixi. ⁹ Rü nüxü cungechaü i guxüma i ngëma nacüma i mexü natürü naxchi cuxai i guxüma i ngëma nacüma i chixexü. Rü ngëmacëx i choma na Cunatü ya Tupana chixü rü guxüëtüwa cuxü changëxmaxëë rü guxüärü yexera cuxü chataãëxëë”,

ñanagürü. ¹⁰ Rü yexgumarüü ta Nanexü ñanagürü ga Tupana:

“Cuma rü guxüärü Cori quixí. Rü noxriarü ügügumama ga yexguma natauxgutama ga ñoma ga naâne, rü cuma nixí ga cunaxüxü. Rü cumatama nixí ga cunaxüxü ga üexcü rü tauemacü rü guxüma ga êtagü. ¹¹ Rü guxüma i ngêma rü tá nagux, natürü i cuma rü guxügutáma cungêxmaêcha. Rü guxüma i ngêma rü ñoma naxchirurüü tá nangaue. ¹² Rü ñoma wüxi i naxchiru i ngauxü i ngema itèxmarexürüü tá ícunawogü i ñoma i naâne rü guxüma i daxüwa nüxü idauxü. Rü to i ngexwacaxüxümaã tá cunaxüchicüü, ñoma wüxi i naxchiru i ngauxü i ngexwacaxüxümaã ixüchicüüxürüü. Natürü i cuma rü tá cunaxèixrügumaraxüêcha rü tagutáma cuyu”,

ñanagürü ga Tupana. ¹³ Rü Tupana rü ñanagürü nüxü:

“¡Nuã chauxütawa rüto ñuxmatáta nüxü cuxü charüporamaêxêê i guxüma i curü uwanügü!”

ñanagürü. Natürü ga Tupana rü taguma yema ñanagürü nüxü ga ngêxürüüxü ga norü orearü ngeruügü ga daxüçüâx. ¹⁴ Rü guxüma i Tupanaärü orearü ngeruügü i daxüçüâx rü naãegü i Tupanaãxü puracüexü nixígü. Rü nüma ya Tupana rü nüma nanamugü na nüxü yanangüxêégüxüçèx i guxüma i ngêma duüxügü i Tupana naxwèxexü na nayauxgüãxü i maxü i taguma gúxü.

2

Tama name i nüxü taxoe i ngêma maxü i Tupana tüxna uaxüxü

¹ Rü ñuxma na nüxü icuáxü na guxüma i Tupanaärü orearü ngeruügü i daxüçüâxärü yexera yíixü ya Nane, rü ngêmacèx name na yexeraäcü meã naga ixínüêxü i ngêma ore i nachiga ixíxü. Erü tama tanaxwèxe na nüxü rüxoexü na yaxôgüxü. ² Rü yexguma tauta Nane ya Cristuxü núma namuxgu ga Tupana, rü norü orearü ngeruügü ga daxüçüâxgüwa duüxügümaã nüxü nixu ga norü mugü na naga naxínüêxüçèx. Rü yema mugü rü aixcüma napura yerü guxüma ga yema duüxügü ga tama naga ñnüêxü, rü yema mugü nüxü ixuxüâcüma Tupana nanapoxcue. ³ Rü yexguma yemaäcü napoxcueägu ga yema duüxügü ga tama naga ñnüêxü, çrü ñuxücürüwa i yixema i naxchaxwa ibuxmüxü na tama tüxü napoxcuexüçèx ega nüxü ixoegu i ngêma maxü i mexêchixü i ñuxma Cristugagu tüxna naxuaxüxü? Rü dücax, nümatama ya tórü Cori nixí ga nüxíra naxunagüãxü ga yema maxü, rü ñuxüchi yixcama nixí ga yema nüxü ñnüêxü ga nüxí meã tüxü nüxü nacuèxêêxü na aixcüma yíixü i tüxü nangêxmaxü i ngêma maxü ega nüxü yaxôgügu ya Cristu. ⁴ Rü nümatama ga Tupana rü ta taxcèx nanangoxêê na aixcüma yíixü i Cristugagu tüxü nangêxmaxü i ngêma maxü. Yerü nüma ga Tupana rü Naãe i Ünexüwa tüxü nanawèx ga naguxüraxüxü ga taxü ga mexügü rü cuèxruuxügü ga norü poramaã naxüxü yema nüma nanaxwèxexüâcüma. Rü yemaäcü nixí ga wenaxärü tüxü nüxü nadauxêêxü na aixcüma yíixü na Cristugagu tüxü nangêxmaxü i ngêma maxü.

Tupana rü ñoma ga naãnewa nanamu ga Ngechuchu ya Cristu na taxrüü duüxüxü yíixüçèx

⁵ Rü ñuxma rü guxüma i ngêma mexügü i Cristugagu tüxü ngêxmaxü i pemaã nüxü tixuchigaxü, rü Tupana rü taguma daxüçüâx ga norü orearü ngeruügüna naxäga na namaã inacuèxgüxüçèx. Natürü duüxügüxü

nixī ga namuxū na namaā inacuèxgūxūcèx ga guxūma ga yema mexūgū.
 6 Erū Tupanaārū ore i ūmatūxūwa rū ñanagūrū:

“Pa Tupanax, ¿rū tacū nixī i duūxūgū rū ngēmacèx nagu curūxīnūxū?
 ¿Rū tacūwa name rū ngēmacèx nūxū cungechaūxū? 7 Rū paxaāchi
 curū orearū ngeruū ga daxūcūāxgūtūūwa cunayexmagūxēē ga
 duūxūgū, natūrū i ñuxma rū aixcūma namaā cutaāē rū nūxū
 quicuèxūxū. 8 Rū naxmēxwa cunangēxmaxēē i guxūma ga yema
 cuxūxū”,

ñanagūrū i ngēma orewa. Rū yemaācū nixī ga Tupana ga duūxūgūmēxēwa
 nayexmagūxēēāxū i guxūma i ñoma i naānewa ngēxmaxū. Rū nataxuma
 i tacū i ñoma i naānewa i tama naxmēxwa nangēxmaxēēxū. Natūrū woo
 na ngēmaācū yīxū, rū ñuxma rū ta tauta nūxū tadau na duūxūgūmēxēwa
 nangēxmaxū i guxūma i ñoma i naānewa ngēxmaxū. 9 Natūrū nūxū
 tadau ya Ngechuchu ya aixcūma guxūmaāma icuācū. Rū yexguma
 Tupana ñoma ga naānewa namuxgu rū paxaāchi norū orearū ngeruū
 ga daxūcūāxgūarū ñaxtūwaama nanaxūxēē. Natūrū i ñuxma ya Tupana
 rū poraācū Ngechuchuxū nataxēē rū āēxgacū ya tacū nayaxīxēē yerū
 ngūxū ninge rū guxūma ga duūxūgūcèx nayu yerū yemaācū nanaxwēxe
 ga Tupana yerū tūxū nangechaū rū tūxū narūngūxēēchaū. 10 Yerū ga
 Tupana rū nanaxwēxe na guxūma i naxācūgū nūxū nangēxmaxūcèx i
 nachica i mexū i naxūtawa. Rū yemacèx ñoma ga naānewa nanamu
 ga Ngechuchu ya Cristu na ngūxū yangexūcèx rū taxcèx nayuxūcèx na
 aixcūmaxūchi tūxū nangēxmaxūcèx i maxū i taguma gūxū. Rū name
 nixī na yemaācū naxūāxū ga Tupana yerū nūmatama nixī ga naxūāxū ga
 guxūma rū namēxwa nangēxma na nūma nanaxwēxexūācūma namaā in-
 acuāxūcèx. 11 Rū Ngechuchu nixī ya tūxū imexēēgūcū na Tupanapēxewa
 ixūūnegūxūcèx. Rū ñuxma i nūma ya Ngechuchu ya tūxū imexēēgūcū rū
 guxāma i yixema na tūxū yaxūūnexēēgūxū rū wūxitama nixī ya Tanatū.
 Rū ngēmacèx nixī i nūma ya Ngechuchu ya Tupana Nane, rū tama
 taxcèx naxānexū na naēneēgūmaā tūxū naxuxū. 12 Erū Tupanaārū ore i
 ūmatūxūwa rū ñanagūrū ga Nane:

“Rū chaueneēgūxū tá nūxū chacuèxēē i cuchiga, Pa Chaunatūx. Rū
 norū ngutaquēxegūwa rū tá cuxcèx chawiyae na ngēmaācū cuxū
 chicuèxūxūcèx”,

ñanagūrū. 13 Rū toxnamana i Tupanaārū ore i ūmatūxūwa rū ñanagūrū ta
 ga Nane:

“Cuxū chayaxō, Pa Chaunatūx, erū nūxū chacuèx rū tá choxū
 curūngūxēē”,

ñanagūrū. Rū ñanagūrū ta:

“Rū daxe chixī, Pa Chaunatūx, namaā i cuxacūgū i chaueneēgū i choxna
 cumugūxū”,

ñanagūrū. 14 Rū nūma ga Ngechuchu rū woo Tupana na yixīxū natūrū
 duūxūrūxūācū ñoma ga naanewa naxū na taxrūxū naxāmachixūcèx rū
 naxāgūxūcèx na tachicūū nayuxūcèx rū yemaācū yanaxoxēēāxūcèx ga
 Chatanāarū pora ga namaā tūxū iyanatauxēēxchaūxū. 15 Rū yemaācū
 nanaxū ga Ngechuchu na Chatanāmēxēwa tūxū ínanguxūxēēxūcèx ya
 guxāma ya yixema noxri naxcèx muūxē ga na tayuexū. 16 Rū
 yemacèx ñoma ga naānewa nangu ga Ngechuchu na taxcèx nayuxūcèx
 i guxāma i yixema na Abrāūrūū yaxōgūxū. Rū tama daxūcūāx i
 orearū ngeruūgūcèx nayu, natūrū taxcèx nixī ga nūma naxūxū rū

nayuxũ. ¹⁷ Rũ nũma ga Ngechuchu rũ nanaxwèxe na yixema i naèneëgũ ixĩgũxũrũtama nũgũ na yaxĩxèèxũ na yemaãcũ aixcũma mecũmacũ ya nũxũ ingechaũtũmũũgũcũ ya tórũ chogũruũ yĩxũcèx i Tupanapèxewa. Rũ yemacèx nixĩ ga nũgũ inaxãxũ rũ nayuxũ na yemaãcũ Tupana duũxũgũaxũ nũxũ ngechaũxũcèx i norũ pecadugũ. ¹⁸ Rũ yema nũmatama ngũxũ na yangexũ ga yexguma Chataná nũxna ãnũgu, rũ ngẽmacèx i ñuxma rũ nũxũ natauxcha na tũxũ nangũxèèxũ ya yixema Chataná tũxna ãnũxè.

3

Ngechuchu rũ Moĩchéxũ narũyexera

¹ Rũ ñuxma Pa Chaueneëgũ ya Tupanapèxewa Üünegũxe, rũ pexũ nixĩ ya Tupana inadexũ na norũ duũxũgũ pixĩgũxũcèx. Rũ ngẽmacèx name nixĩ i aixcũma meã nagu perũxĩnũè ya Ngechuchu ya Cristu ya Tupana nũma namucũ. Rũ nũma ya Ngechuchu nixĩ i tórũ chogũruũ i Tupanapèxewa tũxũ ixũünexèècũ. Rũ yimaãxũ nixĩ i yaxõgũxũ. ² Rũ Tupana rũ marũ Ngechuchuxũ naxuneta na naxũãxũcèx ga yema puracũ ga Tupana nũxna ãxũ. Rũ nũma ga Ngechuchu rũ aixcũma Nanatũga naxĩnũ rũ nayanguxèè ga yema puracũ yexgumarũũ ga Moĩché meãma na naxũxũ ga yema puracũ ga Tupana nũxna ãxũ na nũxna nadauxũcèx ga Tupanaãrũ duũxũgũ ga Yudĩugũ. ³ Rũ woo ga noxri rũ Moĩchéxũ nitaégacũxũèè ga Tupana, natũrũ i ñuxma rũ Moĩchéarũ yexera Ngechuchuxũ nixĩ i yataégacũxũèèxũ. Rũ wũxi ya ãpata ya ngexwacèx ixũxũnerũũ nixĩ, erũ woo ngẽma ãpatamaã tataãè, natũrũ ngẽma yexeraãcũ nũxũ icuèxũũxũ nixĩ i ngẽma ãpataarũ ũruũ. ⁴ Rũ guxũnema ya ã rũ nũxũ nangẽxma i norũ ũruũ. Natũrũ guxũma i ãacũ i ngẽxmaxũ, rũ Tupana nixĩ ya naxũcũ. ⁵ Rũ Moĩché rũ wũxi ga Tupanaãrũ duũxũ ga aixcũma mexũ nixĩ yerũ meã nũxna nadau ga Tupanaãrũ duũxũgũ ga Yudĩugũ, yema Tupana namaã nũxũ ixuxũrũũ. Rũ nũma ga Moĩché nixĩ ga yema duũxũgũmaã nũxũ yaxuxũ ga ñuxãcũ Tupana tá yixcũra nũxũ na rũngũxèèxũ. ⁶ Natũrũ nũma ya Ngechuchu rũ Moĩchéarũ yexera nixĩ erũ Tupana Nanexũchi nixĩ. Rũ nũma nixĩ i nũxna nadauxũ i guxũma i ngẽma Tupanaãrũ duũxũgũ ixĩgũxũ. Rũ yixema rũ ta Tupanaãrũ duũxũgũ tixĩgũ ega aixcũma Ngechuchuxũ yaxõgũgu rũ taguma nũxũ rũxoegu. Rũ Tupana nanaxwèxe na guxũguma Ngechuchumaã itaãègũxũ erũ nũxũ tacuèx na wũxi i ngunexũ rũ tá taxcèx nataeguxũ na wũxiwa namaã ingẽxmagũxũcèx.

Tupanaãrũ duũxũgũ rũ tá inarũngũè

⁷⁻⁸ Rũ ngẽmacèx i Tupanaãrũ ore i ũmatũxũwa rũ ñanagũrũ i Naãè i Üünexũ:

“Rũ ñuxma na nũxũ pexĩnũèxũ i ngẽma Tupana pemaã nũxũ ixuxũ, rũ tama name na nũxũ pexoexũ, yexgumarũũ ga na naxũgũãxũ ga yema duũxũgũ ga Tupanaxũ ũgũxũ rũ tama naga ãnũèxũ ga yexguma Moĩchéwe naxĩxgu ga yema naãne ga ngextá taxũema ããpataxũwa”.

⁹ Rũ yemacèx ga Tupana rũ ñanagũrũ:

“Rũ yema nixĩ ga chixexũ naxũgũxũ ga nuxcũmaũgũxũ ga perũ oxigũ yerũ choxũ naxũgũ yerũ tama choxũ nayaxõgũchaũ. Rũ yemaãcũ nanaxũgũ woo 40 ga taunecũgu nũxũ na nadaugũxũ ga yema mexũgũ ga ũünexũ ga napèxewa chaxũxũ. ¹⁰ Rũ yemacèx

namaã chanu ga yema duũxũgũ, rü ñacharũgũ nüxũ: ‘Pema rü guxũguma chixexũguxicatama perũxĩnüẽcha, rü taguma penaxũchaũ i ngẽma chanaxwẽxexũ na penaxũxũ’, ñacharũgũ nüxũ. 11 Rũ yemacẽx nixĩ ga namaã chanuxũ ga yema duũxũgũ, rü aixcũmaxũchi namaã nüxũ chixu na tãütãma yema naãne ga noxri namaã ichaxunetaxũwa nangugũxũ na ngẽxma nangũẽxũcẽx”, ñanagũrũ ga Tupana. 12 Rũ ñuxma Pa Chaueneẽgũx, rü name nixĩ i pegũna pedaugũ na tama ngũrũãchi pechixearũ maxũãxũcẽx, rü ngẽmagagu na nüxũ perũxoexũ na Tupana ya maxũcũaxũ na peyaxõgũxũ. 13 Natürũ ñuxma pexũ natauxchagu, rü name nixĩ na wũxichigũ pegũaxũ penangũchaũẽẽxũ i guxũ i ngunexũgu na taxũema i petanũwa Tupanaxũ taxoxũcẽx nagagu i ngẽma pecadu i pexũ womũxẽẽchaũxũ. 14 Rũ ngema na Cristuxũtawã nayauxgũxũcẽx i maxũ i taguma gũxũ, rü tanaxwãe na guxũguma aixcũma yaxõgũechaxũ. Rũ ngẽxguma noxrirũõtama guxũguma meã nüxũ yaxõgũechagu rü tama nüxũ rüxoegu, rü tá namaã tũxũ nangẽxma i tachica i daxũguxũ i naãnewa. 15 Natürũ ñuxma nixĩ i namexũ na meãma yaxõgũxũ. Rũ ngẽmacẽx i Tupanaãrũ ore i ñumatũxũwa rü ñanagũrũ:

“Rũ ñuxma na nüxũ pexĩnüẽxũ i ngẽma Tupana pemaã nüxũ ixuxũ, rü tama name na nüxũ pexoexũ, yexgumarũũ ga yema duũxũgũ ga tama Tupanaga ñnüẽxũ ga yexguma Moĩchẽwe naxĩxgu ga yema naãne ga ngextã taxũema íxãpataxũwa”, ñanagũrũ. 16 ¿Rũ texégũ tixĩ ga guxema nüxũ ñnüẽxẽ ga yema Tupana tũmamaã nüxũ ixuxũ, rü ñuxũchi tama Tupanaga ñnüẽxẽ? Rũ pemaã nüxũ chixu rü yemagũ nixĩ ga yema duũxũgũ ga Moĩchẽ Equituanewa ínguxũxẽẽxũ. 17 ¿Rũ texémaã nixĩ ga nanuxũ ga Tupana ga 40 ga taunecũgu? Rũ pemaã nüxũ chixu rü namaã nanu ga yema duũxũgũ ga chixexũ ügũxũ. Rũ yemacẽx yema nachica ga ngextã taxũema íxãpataxũgu nayue. 18 ¿Rũ texégũmaã nixĩ ga aixcũmaxũchi inaxunetaxũ ga Tupana na tãütãma yema naãnewa nangugũxũ na yexma nangũẽxũcẽx? Rũ pemaã nüxũ chixu, rü yemagũ nixĩ ga yema duũxũgũ ga tama naga ñnüẽxũ. 19 Rũ ngẽmawa nüxũ tacuẽx na taxucürũwama yema naãne ga noxri Tupana namaã ixunetaxũwa nangugũxũ ga yema duũxũgũ, yerũ tama nüxũ nayaxõgũ.

4

1 Rũ ngẽmacẽx i ñuxma na Tupana tamaã ixunetaxũ na nügũxũtawã tá tũxũ yachocuxẽẽxũ na ngẽxma rüngũẽxũcẽx, rü tanaxwẽxe i taxuãẽgũ, na tama ngũrũãchi wũxie i tatanũwa tama ngẽxma taxũcuxũ. 2 Erũ ñuxma i yixema rü marũ nüxũ taxĩnüẽ i Tupanaãrũ ore i mexũ, yexgumarũũ ga yema nuxcũmaũgũxũ ga duũxũgũ nüxũ na naxĩnüẽxũ. Natürũ nümagũ ga yema duũxũgũ rü taxuwama nüxũ name ga nüxũ na naxĩnüẽxũ ga yema ore yerũ tama yema naga ñnüẽxũrũũ aixcũma nüxũ nayaxõgũ. 3-4 Natürũ i yixema na yaxõgũxũ, rü tá aixcũma Tupanaxũtawã tichocu na ngẽxma rüngũẽxũcẽx. Rũ wũxiwa i Tupanaãrũ ore i ñumatũxũwa rü ngũxchigaarũ ngunexũchigaxũ nixu, rü ñanagũrũ:

“Rũ 6 ga ngunexũgu nixĩ ga naguxẽẽãxũ ga norũ puracũ ga Tupana. Rũ yexguma norũ 7 ga ngunexũwa nanguxgu rü guxũma ga norũ puracũna narũngũ”,

ñanagürü. Rū nuxcūma ga Tupana rū nanaxwèxe na nangüëxü ta ga yema nuxcūmaügüxü ga tórü oxigü ga Moïchéwe rüxixü. Natürü ga nūmagü rü tama nūxü nayaxögüchaü rü tama naga naxīnūë. Rū yemacèx ga Tupana rü norü ore i ümatüxüwa rü ñanagürü:

“Yema duüxügü rü tama choxü nayaxögü rü yemacèx namaã chanu rü aixcūmaxüchi namaã nūxü chixu na täütáma yema naãne ga namaã ichaxunetaxüwa nangugüxü na ngëxma nangüëxüçèx”, ñanagürü. ⁵⁻⁶ Rū yemaäcü ga yema duüxügü ga nūxira nūxü ñnūëxü ga Tupanaärü ore i mexü, rü tama nawa nichocu ga yema nachica ga Tupana namaã nūxü ixuxü, yerü tama naga naxīnūë. Rū ngëmacèx nixī i Tupanaärü ore i ümatüxüwa i ñaxü:

“Ngëma duüxügü i tama chauga ñnūëxü rü täütáma ngëma nachica i namaã ichaxunetaxüwa nichocu na ngëxma nangüëxüçèx”, ñaxü. Natürü ñuxma rü ta nangëxma i nachica i tümacèx ya yixema ngëxma Tupanaxütagu chocuchaüxë na ngëxma tarüngüëxüçèx. ⁷⁻⁸ Rū ngëma nachica i ngextá nagu nangüëxü i duüxügü rü tama yema naãne ga nuxcūmaügüxü ga tórü oxigüxacügü tümäärü äëxgacü ga Yochuémaã tayauxgüxü nixī. Yerü yexguma chi yema naãne yixigu, rü Tupana rü täü chima wenaxärü nūxü naxuneta ga to ga ngunexü na nagu naxütawa yachocuxüçèx na ngëxma nangüëxüçèx i duüxügü. Rū yemacèx ga Tupana rü wenaxärü nūxü naxuneta i wüxi i to i ngunexü na naxütawa yachocuxüçèx i duüxügü na ngëxma nangüëxüçèx. Rū ngëma ngunexü rü ñuxma nixī. Rū yemacèx ga Tupana rü mucūma ga taunecü ga Moïchéwena rü Dabímaã nūxü nixu ga yema norü ore ga ümatüxü i ñaxü: “Rü ñuxma na nūxü pexīnūëxü i ngëma Tupana pemaã nūxü ixuxü, rü tama name na nūxü pexoexü”,

ñaxü. Rū yematama nixī ga ore ga marüchirëx pemaã nūxü chixuxü. ⁹ Rū ngëmacèx i ñuxma rü ta nangëxma i wüxi i nachica i üünexü i nagu tá aixcūma nangüëxü i ngëma Tupanaärü duüxügü ixigüxü. ¹⁰ Rū yixema Tupanaxütawa ichocuxe na ngëxma tarüngüëxüçèx, rü nüxna tarüngüë i guxüma i tümäärü puracügü yexgumarüü ga Tupana rü nüxna na nangüxü ga norü puracügü ga yexguma naãne naxüxguwena. ¹¹ Rū ngëmacèx name na meã yaxögüxü rü naga ixīnūëxü na ichocuxüçèx i ngextá Tupana tüxü írüngüëxëxüwa. Erü tama tanaxwèxe na texé ngürüächi yema nuxcūmaügüxü ga duüxügü ga tama Tupanaga ñnūëxürüü norü orexü na taxoxü. ¹² Erü Tupanaärü ore rü namaxü rü naporaxüchi. Rū wüxi i tara i guxüçüwawa meã waixmaguxüärü yexera nixī na natéxü. Erü ngëma ore rü tawa nixücu ñuxmata taãewa nangu, rü ñuxmata nawa nangu i ngëma wüxichigü nagu rüxīnūxü. Rū ngëmaäcü meãma nanangoxëëãma i guxüma i ngëma yixicatama nagu rüxīnūxü rü tüxü ngüchaüxü. ¹³ Rū nataxütáma i çacü i Tupana üxü i tá naxchaxwa nügü icüxü erü napëxewa rü guxüma meã nangox. Rū guxüxü nadau rü guxüxü nacuëx ya yima tá tüxna çacü na namaã nūxü ixuxüçèx i tórü maxüchiga.

Ngechuchu rü mecüxüchi ya tórü ngüxëëruü nixī i Tupanapëxewa

¹⁴ Ngechuchu ya Tupana Nane rü mecüxüchi ya tórü ngüxëëruü nixī i Nanatüpëxewa. Rū ñuxma rü daxügüxü i naãnewa i Nanatüxütawa nangëxma na ngëma taëtüwa nachogüxüçèx. Rū ngëmacèx tanaxwèxe i guxüguma nūxü tayaxögüecha rü taguma nūxü tarüxoe. ¹⁵ Rū nüma ya Ngechuchu rü aixcūma nūxü nacuëx na tüxü nangüëxüçèx erü nūxü

nacuèx na ñuxácü tüxü naguxchaxü i ngëxguma Chataná tüxna ñnügu rü pepadugu tüxü nanguxëëchaügu, yerü nüxna rü ta naxînü ga Chataná, ngëma tüxna na naxînüxürüü. Natürü nüma ga Ngechuchu rü taguma chixexü naxü. ¹⁶ Rü ñuxma na tüxü nangëxmaxü ya tórü ngüxëëruü ya Ngechuchu, rü name nixî i tama imuüëäcüma nüxna tangaicam-agü ya tórü äëxgacü ya Tupana ya tüxü ngechaücü. Rü tanaxwëxe na ngëmaäcü nüxna ingaicamagüxü na nüxü ingechaütümüügüxüçèx rü tüxü nangechaüäcüma tüxü nangüxëëxüçèx i ngëxguma guxchaxügü tüxna ngaicamagu.

5

¹ Nuxcüma ga Tupana rü Moïchémaã nüxü nixu na Aräü yïxüçèx ga Yudiügarü paigüeru ixîcü na guma duüxügüétüwa chogüxüçèx ga Tupanapëxewa. Rü guxüma ga yema Aräüwena ügüxü ga paigüeru rü duüxügütanüwa nüxü naxunetagu na yema duüxügüarü ngüxëëruü yïxüçèx ga Tupanapëxewa rü Tupanana naxäaxüçèx ga ämaregü rü Tupanacèx nadaiäxüçèx ga naxünagu na yemaäcü nüxü nüxü nangechaüxüçèx ga norü pepadugü. ² Natürü ngëma paigüeru rü guxüma i duüxügürütama nixî na pepadugu nanguxü. Rü ngëmacèx nüxü nacuèx na ñuxácü yaxna namaã naxînüxü i duüxügü i ngëxguma naëchitamare pepadu naxüegu rü tama aixcüma Tupanawe naxîxgu. ³ Rü ngëma paigüeru rü tama ngëma duüxügüarü pepaducèxicatama nixî i nadaiäxü i naxünagu, natürü nanaxwëxe i noxrütama pepaducèx rü ta na nadaiäxü i naxünagu na ngëmaäcü Tupana nüxü nüxü nangechaüxüçèx i ngëma pepadugü. ⁴ Rü taxüema tügütama tingucuchixëë na paigüeru tiixüçèx. Natürü Tupana nixî ya tüxü unetacü rü tüxna naxäcü i ngëma puracü na paigüarü äëxgacü tiixüçèx, yexgumarüü ga Tupana rü Aräüxü na yangucuchixëëxürüü na paigüeru yïxüçèx. ⁵ Rü yexgumarüü ga Ngechuchu rü tama nügütama ningucuchixëë na Tupanapëxewa tórü ngüxëëruü i paigüeru yïxüçèx. Natürü Tupana nixî ga yangucuchixëëcü. Yerü Tupanatama nixî ga nüxü ñacü:

“Cuma nixî i Chaune. Rü ñuxma chanangoxëë na Chaune quiixü”, ñacü. ⁶ Rü toxnamana i Tupanaärü ore i ümatüxüwa rü ñanagürü ta:

“Cuma nixî i guxügutáma duüxügüarü ngüxëëruü i paigüeru quiixü, guma pai ga Melquisedérü”,

ñanagürü. ⁷ Rü yexguma Cristu ñoma ga naänewa maüxgu, rü poraacü nayümüxë rü tagaäcü rü naxauxäcü Tupanana naca na nüxü nangüxëëxüçèx na naga naxînüxüçèx. Rü yemaäcü nanaxü ga Cristu, yerü Tupana rü natora na nüxü nangüxëëxüçèx na tama yuxü namüxüçèx. Rü Tupana rü Cristuxü naxînü yerü nüma ga Cristu rü aixcüma Tupanaga naxînü. ⁸ Rü nüma ga Cristu rü woo Tupana Nane na yïxü, natürü ngüxü ninge naxcèx na Tupanaga naxînüxü. ⁹ Rü yemaäcü nügü inaxä rü curuchagu nayu na tümaärü maxëxëëruü yïxüçèx ya guxäma ya yixema naga ñnüxë. ¹⁰ Rü Nanexü nixî ga naxunetaxü ga Tupana na guxügutáma nügüpëxewa tórü ngüxëëruü i paigüeru yïxüçèx yexgumarüü ga pai ga Melquisedé ga norü yumüxëwa nuxcümaücü ga tórü oxî ga Abräüçèx Tupanana çacü na guma Abräüxü nangüxëëxüçèx ga Tupana.

Wüxi i äücümaxüchixü nixî na nüxü rüxoexü na yaxögüxü

11 Rū ñuxma rü toxŭ nangēxma i muxŭchixŭma i ore i Cristuchiga ixŭxŭ i pemaã nüxŭ tixuxchaŭxŭ. Natürŭ naguxchaxŭchi na meãma pemaã tanangoxēēxŭ i ngēma, erü pema rü tama pexŭ natauxcha na nüxŭ pecuáxŭ. 12 Rū marŭ ñuxgumama nüxŭ na pecuáxŭ i Tupanaärŭ orechiga, rü pema rü chi marŭ namaã pengüexēētae. Natürŭ i pema rü ñuxma rü ta penaxwēxe na wena pemaã tanangoxēēxŭ i ngēma Tupanaärŭ ore i tauxchaxŭ i nawa inaxügŭxŭ na Tupanachigaxŭ icuáxŭ. Rŭ ngēmaäcŭ i pema, rü ñoma õxchana i naēgünenixŭwa maixŭrŭütama pixŭgŭ. Erü tama nüxŭ pecuēxgüéga i guxŭma i ngēma Tupanaärŭ ore i yexeraäcŭ tamaã nüxŭ ixuxŭ i Cristuchiga na ñuxäcŭ Tupana naxwēxexŭ na naga pexŭnŭexŭ. 13 Rŭ yŭxema yaxōxē ya tama nüxŭ cuēxégaxe na ñuxäcŭ Tupanacèx tamaxŭxŭ, rü wŭxi i õxchana i maixŭrŭüt tixŭ. Rŭ ngēmaäcŭ pixŭgŭ i pemax. 14 Natürŭ yŭxema yaxōxē ya tümamaã yaxŭxe na tanangugŭxŭ na ŭacŭ yŭixŭ i nguxēētae i mexŭ rü ēxna chixexŭ, rü aixcŭma nüxŭ tacuèx na ñuxäcŭ Tupanacèx tamaxŭxŭ. Rŭ yŭxema rü ñoma wŭxi i duŭxŭ i yaxŭ i namachimaã äwemŭxŭrŭüt tixŭ. Natürŭ i pema rü tama ngēmaäcŭ pixŭgŭ.

6

1 Rŭ ngēmacèx name nixŭ i yexeraäcŭ tingúeetanŭ na aixcŭma meã nüxŭ icuáxŭcèx i Cristuchiga. Rŭ tanaxwēxe na nüxŭ ichopetŭxŭ ga yema ore ga nawa inaxügŭxŭ na Cristuchigaxŭ icuáxŭ. Rŭ tãütama yeŭcŭrŭ yema ore ga nawa inaxügŭxŭchiga tidexagüecha. Rŭ taxucèxma tŭxcŭtŭ wena pemaã nüxŭ tixu na nüxŭ perŭxoexŭcèx na nagu pexŭxŭ i ngēma mugŭ ga Moŭché ŭmatŭxŭ i tama tŭxŭ maxēxēēxŭ. Rŭ ngēxgumarŭtŭ ta taxucèxma tŭxcŭtŭ wena pemaã nüxŭ tixu i nachiga na ñuxäcŭ Tupanaãxŭ yaxōgŭxŭ. 2 Rŭ ngēxgumarŭtŭ ta taxucèxma tŭxcŭtŭ wena pexŭ tangüexēē na ñuxäcŭ Tupanacèx íbãixŭ rü ñuxäcŭ duŭxŭgŭxŭ ingōgüäcŭma namaã iyumŭxexŭ. Rŭ ngēxgumarŭtŭ ta taxucèxma tŭxcŭtŭ wena pexŭ tangüexēē na ñuxäcŭ tá wena namaxēxŭ i duŭxŭgŭ i yuexŭ rü ñuxäcŭ naãneärŭ guxgu rü Tupana tá wŭxichigŭ i duŭxŭgŭna çaxŭ na ñuxäcŭ namaxēxŭ i ñoma i naãnewa. 3 Rŭ ngēmacèx i ñuxma rü ngēxguma Tupana tama tŭxna nachuxgu rü tanaxwēxe i yexeraäcŭ tingúeetanŭ na aixcŭma guxŭma i Cristuchigaxŭ icuáxŭcèx rü nüxŭ na icuáxŭcèx na aixcŭma ngēma nŭma nanaxwēxexŭäcŭma meã naxcèx na imaxēxŭ. 4-5 Natürŭ ngēxguma chi wŭxie Cristuxŭ yaxŭxgu, rü chi meãma Tupanaxŭ tacuèxgu, rü chi Naãe i Üünexŭxŭ tayaxŭxgu, rü chi nüxŭ tacuèxgu na ñuxäcŭ namexŭ i Tupanaärŭ ore rü ñuxäcŭ na namexŭ i daxŭguxŭ i naãne, rü name nixŭ i taxuãe. 6 Erü ngēxguma chi ngēmaäcŭ meã tayaxōxgu i noxrix rü ñuxŭchi Cristuxŭ ítatēxŭchixgu, rü marŭ taxucŭrŭwama texé wenaxärŭ Tupanacèx tŭxŭ tataeguxē. Erü ngēxguma ngēmaäcŭ ítanatēxŭchixgu ya Tupana Nane, rü ñoma wena curuchawa tayapotaxŭrŭüt tayaxŭxē, erü guxŭ i duŭxŭgŭpēxewa äne nüxŭ tingexēē. 7 Rŭ dücax, wŭxi i naãne i pucŭ nagu nguxŭ rü meãma nanetŭ nawa nayae tümacèx ya yŭxema nagu üanexē, rü Tupanaärŭ ngŭxēēgagu nixŭ i ngema. 8 Natürŭ ngēxguma ngēma naãne rü tuxu rü natüanegŭ i chixexŭ nawa yaegu, rü Tupana rü tá chixexŭ namaã naxuegu rü üxŭwa tá nŭgu i guxŭma i nawa yaexŭ. Rŭ ngēxgumarŭtŭ tá tixŭ ya yŭxema Cristuxŭ ítãxe.

Ítananguxēē na nayauxgŭxŭ i maxŭ i taguma gŭxŭ rü ngēmacèx tama nüxŭ tarŭxoe na yaxōgŭixŭ

⁹ Natürü, Pa Chaueneēgü ya Pexü Tangechaügüxe, rü woo ngēmaācü pemaā tidexagügu, natürü aixcüma nüxü tacuèx na tama ngēma duūxügü i nüxü rüxoexürüü pixīgüxü. Erü pema rü pexü nangēxma i maxü i taguma gúxü, rü Tupana rü tá aixcüma poraācü pexü narüngüxēē na naxcèx pemaxēxücèx. ¹⁰ Erü nüma ya Tupana rü aixcümacü nixi. Rü nüma rü tãütama nüxü inayarüngüma ga yema mexü ga pexüxü rü ñuxācü taeneēgü i yaxōgüxüxü na pengechaügüxü ga yexguma nüxü perüngüxēēgügu, ngēma ñuxma ípenaxüxürütama. ¹¹ Rü ñuxma rü tanaxwèxe i wüxichigü i pema rü ngēmaācü noxrirüü mexü i perü ngüchaümaā nüxü perüngüxēēgüecha i taeneēgü ñuxmatáta wena núma naxü ya Cristu. Rü tanaxwèxe na ngēmaācü pemaxēxü na düxwa aixcüma Cristuxütawa pengugüxü ngēma ípenangüxēēxürüü. ¹² Rü tama tanaxwèxe na nüxü perüxoetanücüxü na Cristuwe perüxixü. Natürü tanaxwèxe i naxrüü pixīgü i ngēma duūxügü i guxüguma meā yaxōgüācüma Cristuwe rüxīāmaxü rü nayauxgüxü i guxüma i ngēma mexügü ga Tupana namaā ixunetaxü. ¹³ Rü dücax, yexguma tórü oxi ga Abráümaā inaxunetagu ga Tupana rü nügüégagutama inaxuneta, yerü tataxuma ga texé ga norü yexera ixixē na tumaegagu inaxunetaxücèx. ¹⁴ Rü yemacèx ga Tupana rü Abráüxü ñanagürü: “Rü aixcümaxüchi tá poraācü cuxü charüngüxēē. Rü tá cuxü nangēxma i muxüchixütama i cutaagü”, ñanagürü. ¹⁵ Rü Abráü rü meāma ínanangüxēē ga guma nane ga Tupana namaā ixunetacü. Rü yemacèx nabu ga guma nane ga Ichaá ga Tupana namaā nüxü ixücü. ¹⁶ Rü ngēxguma duūxügü tacücèx ixunetagügu, rü to i norü yexera ixixēgagu inaxunetagü. Rü wüxicana tacücèx ngēmaācü inaxunetagügu, rü nüxü tacuèx rü aixcüma tá nanaxügü i ngēma naxcèx inaxunetagüxü, rü marü taxucürüwama yeüürü nachiga nidexagüecha. ¹⁷ Rü yemacèx ga Tupana rü yexguma inaxunetagu namaā ga yema duūxügü ga nayauxgüxü tá ga yema ngüxēē ga Tupana nüxna äxchaüxü, rü nügüégagutama inaxuneta, yerü nanaxwèxe na meāma nüxü nacüéxgüxü na aixcüma tá yangüxēēxü rü tagütama naxüchicüüäxü ga yema namaā inaxunetaxü. ¹⁸ Rü nüxü tacuèx rü ngēxguma tacücèx nügüégagu inaxunetagu ya Tupana, rü taxucürüwama tüxü nawomüxēē rü nanaxüchicüü i ngēma. Rü ñuxma i guxāma i yixema na Tupanacèx ibuxmüxü na tüxü nangüxēēxücèx rü tüxü namaxēēxücèx, rü nüma ya Tupana rü nügüégagu tamaā inaxuneta na ngēmaācü tá tüxü nangüxēēxü. Rü ngēmaācü tüxü nanangüchaüxēē rü tüxü narüngüxēē na nüxü icuáxücèx na aixcüma tá nayauxgüxü i ngēma maxü i taguma gúxü i tamaā inaxunetaxü. ¹⁹ Rü ñuxma na ínangüxēēxü na aixcüma tá nayaxuxü i ngēma maxü i taguma gúxü, rü taxucèxma taxoegaāgü, erü nüxü tacuèx na aixcüma daxügüxü i naānewa i Tupana íngēmaxüwa tá ingügüxü. ²⁰ Rü ngēma nangēxma ya Ngechuchu i ñuxma yerü nüxira yexma naxücu na Tupanapēxewa taétüwa nachogüxücèx. Rü ngēmaācü guxüguma tórü ngüxēēruü i paigüeru nixi, guma Melquisedé ga Tupanapēxewa Abráüetüwa chogücürüü.

7

Ngechuchu rü guma nuxcümaācü ga pai ga Melquisederütama nixi

¹ Rü guma Melquisedé rü íane ga Charēüärü äëxgacü nixi ga yexguma namaüxgu ga Abráü. Rü nüma ga Melquisedé, rü duūxügüarü pai

nixī ga Tupanapēxewa. Rū yexguma Abráũ rū to ga nachiuāneārū āēxgacūgūmaā nūgū nadaixgu rū nūxū nayexeragu, rū Melquisedē rū namawa Abráũpēxegu nayangu ga yexguma Abráũ napatacēx taegugu. Rū nūma ga Melquisedē rū Tupanaégagu Abráũmaā mexū naxuegu. ² Rū Abráũ rū nūxū nayexma ga guxūma ga yemaxūgū ga yema āēxgacūgū ga namaā nūgū nadēixūna napuxūxū. Rū yemawa ínanaxūxūchi ga yema Tupanana ūxū, rū Melquisedéna nanaxā. Rū ngēma naega i Melquisedé rū Āēxgacū ya Ixaixcūmacū ñaxūchiga nixī. Rū norū íāne ga Charéũ rū Taāēxēēruũ ñaxūchiga nixī. Rū ngēmacēx i naega i Melquisedé rū Āēxgacū ya Taāēxēēruũ ñaxūchiga ta nixī. ³ Rū Tupanaārū ore ga nuxcūma ūmatūxūwa rū tama nūxū nixu na texé tīxū ga nanatū rū naē rū norū oxigū ga Melquisedé. Rū ngēxgumarūũ ta tama nūxū nixu i norū buxchiga rū norū yuxchiga. Rū ngēmacēx Tupana Nanerūũ guxūguma duūxūgūarū ngūxēēruũ ya pai nixī i Tupanapēxewa. ⁴ Rū ñuxma rū name nixī i nagu perūxīnūē na ñuxācū aixcūma āēxgacū ya tacū yīixū ga Melquisedé. Yerū nuxcūmaūcū ga tórū oxī ga Abráũ rū Melquisedéna nanaxā ga yema Tupanana ūxū ga natanūwa ga yema yemaxūgū ga togū ga āēxgacūgūna napuxūxū. Rū ngēmawa nūxū tacuēx na Tupanapēxewa tórū oxī ga Abráũarū yexeracū yīixū ga Melquisedé. ⁵ Rū ñuxma i Yudíugū, rū guxūma i norū ngēmaxūwa ínanaxūxūchigū i ngēma Tupanana ūxū, rū ñuxūchi norū paigūna nanaxā yerū yemaācū nixī ga namuāxū ga yema mugū ga Moīché ūmatūxū. Natūrū guxūma i ngēma paigū rū Lebítaagū nixīgū. Rū nūma ga Lebí rū guxūma i Yudíugūrūũ Abráũtaa nixī. Rū ngēmaācū i ngēma Yudíugū rū norū paigūna nanaxā i ngēma Tupanana ūxū, woo natanūxūgū i Yudíugū na yīixū i ngēma paigū. ⁶ Natūrū ga Melquisedé rū woo tama Lebítaa nixī, natūrū Abráũmēxēwa nanayaxu ga yema Tupanana ūxū. Rū nūxū tacuēx na Abráũ yīixū ga noxri nayaxucū ga Tupanaārū uneta. Rū Melquisedé rū Tupanana naca na Abráũmaā mexū naxueguxūcēx. ⁷ Rū guxāma meāma nūxū tacuēx rū ngēxguma texé toguēcēx Tupanana caxgu na tūxū nangūxēēxūcēx, rū Tupanapēxewa rū yixema nūxna çaxe rū ngēma togū i naxcēx ítaçaxūārū yexera tixī. Rū ngēmaācū nūxū tacuēx na Abráũarū yexera yīixū ga Melquisedé i Tupanapēxewa. ⁸ Rū ñuxma i nuā tatanūwa rū ngēma paigū i ngīxū yauxgūxū i ngēma dīēru i Tupanana ūcū, rū duūxūgūmare nixīgū rū tá nayue. Natūrū ngēxguma Melquisedéchiga yadexagu i Tupanaārū ore, rū ñoma namaxūxūrūũ nixī i nachiga yadexaxū. Rū ngēmawa nūxū tacuēx na Cristu ya guxūguma maxūcūrūũ na yīixū ga Melquisedé. ⁹⁻¹⁰ Rū Abráũtaa ga Lebí, rū guxūma i paigū i Lebítaagū ixīgūxū i ñuxma ngīxū yauxgūxū i ngēma dīēru i Tupanana ūcū, rū nūmagū rū ta Abráũmaā Melquisedéna nanaxāgū ga yema Tupanana ūxū. Yerū nūma ga Lebí rū guxūma ga nataagū i ñuxma Yudíugūarū paigū ixīgūxū, rū woo ga na tauta nabuexū ga yexguma, natūrū marū Abráũxūnewa nayexmagū ga yexguma Melquisedé namawa Abráũpēxegu yanguxgu. Rū ngēmawa nūxū tacuēx na guxūma i ngēma paigūarū yexera yīixū ya Melquisedé. ¹¹ Rū nuxcūmaūgūxū ga tórū oxigū ga Yudíugū, rū Lebítaagū ga paigūmēxēwa nixī ga nayauxgūāxū ga Tupanaārū mugū. Natūrū pemaā nūxū chixu rū yexguma chí yema paigū aixcūma yema Yudíugūxū imexēēgūgu ga Tupanapēxewa, rū taxucēx chima Tupana nūxū naxuneta ga naī ga pai ga Melquisedérūũ ixīcū ga tama Lebítaa ga Arāūrūũ ixīcū. Rū yemacēx ga Tupana rū nūxū naxuneta ga Nane ga Ngechuchu

na tórū chogürũ ya pai yĩxũcèx. ¹² Rũ yemacèx ga Tupana rũ yema Yudũgũarũ paigũchicũxũ nayangucuchixèè ga Cristu. Rũ nũma nixĩ i ñuxma i aixcũma Tupanapèxewa tũxũ yamexèègũxũ. Rũ guxũma ga Lebítaa rũ paigũ nixĩgũ yerũ yemaãcũ nixĩ ga naxuegũxũ nawa ga yema mugũ ga Moĩché ũmatũxũ. Natürũ nũma ga Cristu rũ marũ nanaxũchicũũ ga guxũma ga yema. ¹³⁻¹⁴ Erũ meãma nũxũ tacuèx rũ nũma ya tórũ Cori ya Ngechuchu ya yima nachiga idexagũcũ rũ tama Lebítaa nixĩ erũ nũma rũ Yudátaa nixĩ. Rũ nũxũ tacuèx rũ taxuũma ga Yudátaa rũ pai nixĩ, yerũ ga Moĩché rũ yexguma yema paigũchiga yadeaxgu rũ taxuũma ga Yudátaaxũ naxuneta na pai yĩxũcèx. ¹⁵ Rũ ngẽmaãcũ meã nangox na Tupana iyanaxoxèèxũ ga guxũma ga yema mugũ ga Moĩché ũmatũxũ ga paigũchiga. Yerũ nũma ga Tupana rũ nũxũ naxuneta ga wũxi ga pai ga yexwacaxũcũ ga tama Lebítaa ixĩcũ. Rũ nũma nixĩ i tórũ Cori yĩxũ ya Melquisederũ ixĩcũ, erũ guxũma i ngẽma togũ i paigũarũ yexera nixĩ. ¹⁶ Rũ guxũma ga yema togũ ga paigũ rũ nangucu yerũ Lebítaa nixĩgũ. Natürũ nũma ga Cristu rũ paixũ ningucuchi yerũ poramaã yuwa ínaruũda rũ guxũguma namaxècha na tũxũ nangũxèèxũcèx. ¹⁷ Rũ ngẽmacèx i Tupanaãrũ ore i ũmatũxũtwa rũ tórũ Corichiga ñanagürũ:

“Cuma rũ guxũgutáma duũxũgũarũ ngũxèèrũ ya pai quixĩ Melquisederũ”,

ñanagürũ. ¹⁸⁻¹⁹ Rũ yemacèx ga Tupana rũ ñoma ga naãnewa nanamu ga Nane, yerũ yema mugũ ga paigũchiga naxũmatũxũ ga Moĩché rũ tama poraãcũ tũxũ narũngũxèè yerũ tama aixcũma tũxũ nimexèègũ ga Tupanapèxewa. Rũ yemacèx Nanexũ namu ga Tupana na tórũ pecaducèx nayuxũcèx na ngẽmaãcũ tũxũ nangẽxmaxũcèx i maxũ i taguma gũxũ rũ aixcũma Tupanamũcũgũ ixĩgũxũcèx. ²⁰⁻²¹ Rũ yexguma Tupana yema togũ ga paigũxũ ngucuxèègu, rũ nanangucuxèèmare. Natürũ yexguma Cristuxũ yangucuchixèègu na tórũ ngũxèèrũ ya pai yĩxũcèx, rũ nũgũégagutama inaxuneta. Rũ yemacèx ga yexguma Cristuxũ yangucuchixèègu rũ ñanagürũ:

“Choma i Cori ya Tupana rũ marũ cuxũ chaxuneta na guxũgutáma duũxũgũarũ ngũxèèrũ ya pai quixũcèx. Rũ ngẽma rũ tagutáma chanaxũchicũũ erũ chaugũégagu ichaxuneta”,

ñanagürũ. ²² Rũ ñuxma na yemaãcũ nũgũégagutama inaxunetaxũ ga Tupana, rũ nũxũ tacuèx na aixcũmaxũchima yema paigũarũ yexera na yĩxũ ya Cristu erũ guxũgutáma Tupanapèxewa tũxũ narũngũxèè. ²³ Rũ yema togũ ga paigũ rũ namuxũchi, yerũ niyuetanũ. Rũ yemacèx taxucürwama guxũguma paigũ nixĩgũ. ²⁴ Natürũ ñuxma na tórũ ngũxèèrũ ya paixũ yangucuchixũ ya Ngechuchu, rũ ngẽmacèx marũ taxucèxma texé ya togue tingucuchi, erũ nũma ya Ngechuchu rũ tagutáma nayu. ²⁵ Rũ ngẽmacèx nixĩ i ñuxma i nũxũ natauxchaxũ na aixcũma tũxũ namaxèxèèxũ ya guxãma ya yixema norũ ngũxèèmaã Tupanaxũtawa ngugũxe. Erũ nũma ya Ngechuchu rũ guxũguma namaxècha na tũmaetũwa nachogũxũcèx. ²⁶ Rũ ngẽmaãcũ ya Ngechuchu, rũ nũxĩcatama nixĩ i pai ya tórũ ngũxèèrũ yĩxũ i Tupanapèxewa. Erũ nũma rũ aixcũma naxũũne, rũ nataxuma i chixexũ i nawa, rũ nangearũ pecaduãx yerũ taguma taxrũ pecadu naxũ. Rũ ñuxma rũ guxũtũwa nangẽxma i daxũgũxũ i naãnewa i Tupana íngẽxmaxũtwa. ²⁷ Rũ Ngechuchu rũ tama ngẽma togũ i paigũerurũ nixĩ. Erũ nũmagũ rũ nanaxwèxe na guxũ i ngunexũgu Tupanacèx naxũnagũ nadèixũ na ngẽmaãcũ Tupana

nūxŭ nūxŭ ngechaŭxŭcèx i noxrŭtama pecadugŭ rŭ guxŭ i duŭxŭgŭarŭ pecadugŭ ta. Natŭrŭ nŭma ga Ngechuchu rŭ yexguma nŭgŭ inaxāxgu, rŭ wŭxicanatama pecaducèx nayu. Rŭ ngēma rŭ guxŭgutama name i Tupanapēxewa. ²⁸ Rŭ yema mugŭ ga Moïché ūmatŭxŭ, rŭ duŭxŭgŭmarexŭ naxuneta na paigŭerugŭ yixŭgŭxŭcèx. Natŭrŭ nŭmagŭ rŭ ta nipecaduāxgŭ. Natŭrŭ yemawena ga Tupana rŭ nŭgŭégagu Nanexŭ naxuneta na tŭrŭ ngŭxēerŭ ūyŭxŭcèx. Rŭ yima Nane rŭ guxŭguma mecŭxŭchi ya tŭrŭ Maxēxēerŭ nixŭ. Rŭ nŭma rŭ guxŭguma tŭxŭ narŭngŭxēē i Tupanapēxewa.

8

Ngechuchu nixŭ ya tŭrŭ ngŭxēerŭ i Tupanapēxewa

¹ Rŭ ngēma pemaā nūxŭ tixuxchaŭxŭ i űuxma nixŭ na tŭxŭ nangēxmaxŭ ya tŭrŭ ngŭxēerŭ ya mexēchicŭ i Tupanaxŭtawā. Rŭ nŭma rŭ Tupana Nane ya Cristu nixŭ. Rŭ daxŭguxŭ i naānewa i Tupanaārŭ tŭgŭnecŭwawa narŭto erŭ guxŭārŭ āēxgacŭ nixŭ. ² Rŭ ngēma daxŭguxŭ i naānewa i ngēma nachica i ūnēxŭ ga Tupana ūxŭwa nixŭ i taxcèx inaçaxŭ. Rŭ tama ngēma Yudiŭgŭarŭ paigŭrŭ wŭxi ya ĩpata ya duŭxŭgŭ ūxŭnewa Tupanana taxcèx ĩnaca. ³ Rŭ guxŭma i ngēma Yudiŭgŭarŭ paigŭerŭ rŭ nangucu na Tupanana naxāgŭāxŭcèx i āmaregŭ rŭ naxcèx nadaiāxŭcèx i naxŭnagŭ na Tupana nūxŭ nūxŭ ngechaŭxŭcèx i duŭxŭgŭarŭ pecadugŭ. Rŭ yemacèx ga Ngechuchu rŭ Tupanana nŭgŭ naxāmare na duŭxŭgŭarŭ pecaducèx nayuxŭcèx. ⁴ Rŭ űuxma i nŭma ya Ngechuchu rŭ daxŭguxŭ i naānewa nangēxma na ngēma tŭrŭ ngŭxēerŭ ya pai yŭxŭcèx i Tupanapēxewa. Rŭ ngēmacèx tama űoma i naānewa nixŭ i pai yŭxŭ. Natŭrŭ ngēxguma chi űoma i naānewa nangēxmagu rŭ tāŭ chima pai nixŭ erŭ űoma i naānewa nangēxmagŭ i ngēma Yudiŭgŭarŭ paigŭ i Tupanana āmare āgŭxŭ yema Moïchéarŭ mugŭ nūxŭ ixuxŭrŭ. ⁵ Natŭrŭ ngēma puracŭ i űoma i naānewa naxŭgŭxŭ i ngēma Yudiŭgŭarŭ paigŭ, rŭ naxcèx nadauxŭtaegŭmare i ngēma Ngechuchu daxŭguxŭ i naānewa ūxŭ. Rŭ ngēma nachica i nawa Tupanacèx napuracŭexŭ i ngēma paigŭ, rŭ nanaxŭchicŭnēxāgŭmare i ngēma nachica i Ngechuchu nawa ngēxmaxŭ. Rŭ meāma nūxŭ tacuēx i ngēma, yerŭ yexguma Moïché naxŭxchaŭgu ga Tupanapata, rŭ Tupana rŭ űanagŭrŭ nūxŭ:

“ĭDŭcèx, meā nangugŭ i ngēma cuèxruŭ ga cuxŭ chawéxŭ ga mèxpŭne ga Chinaŭwa! Rŭ chanaxwèxe i ngēmaācŭ na cunaxŭxŭ”,

űanagŭrŭ. ⁶ Natŭrŭ nŭma ya tŭrŭ ngŭxēerŭ ya Cristu rŭ daxŭguxŭ i naānewa nangēxma, rŭ ngēma aixcŭmaxŭchi Tupanapēxewa taétŭwa nachogŭ. Rŭ ngēma Yudiŭgŭarŭ paigŭ rŭ nagu naxŭāma ga yema nuxcŭmaŭxŭ ga uneta ga Moïché ūmatŭxŭ. Natŭrŭ nŭma ya Tupana rŭ marŭ tŭxna nanaxā i wŭxi i ngexwacaxŭxŭ i uneta erŭ tamaā nūxŭ nixu na Cristu yŭxŭ ya aixcŭma tŭrŭ ngŭxēerŭ ixŭcŭ. Rŭ nŭma rŭ nayu na Tupanapēxewa tŭxŭ yamexēēxŭcèx, rŭ ngēma Tupanaxŭtawā nangēxma i űuxma na taétŭwa nachogŭxŭcèx. Rŭ ngēmaācŭ nūxŭ tadau na Tupanaārŭ uneta i ngexwacaxŭxŭ rŭ yema nuxcŭmaŭxŭ ga unetaarŭ yexera yŭxŭ na namexŭ. ⁷ Yerŭ yexguma chi yema nŭxŭraŭxŭ ga uneta ga Moïché ūmatŭxŭ rŭ aixcŭma namexgu na duŭxŭgŭxŭ na maxēxēxŭcèx, rŭ marŭ taxucèx chima tanaxwèxe i to i ngexwacaxŭxŭ i Tupanaārŭ uneta. ⁸ Natŭrŭ nŭma ga Tupana rŭ nūxŭ nadau na tama

aixcūma napēxewa duūxūgūxū yamexēēxū ga yema nūxīraūxū ga uneta ga Moīchéna naxāxū. Rū yemacēx ga Tupana rū ñanagūrū:

“Wūxi i ngunexū rū wena táxarū guxūma i chorū duūxūgūmaā ichax-uneta. ⁹ Natūrū ngēma chorū uneta i ngexwacaxūxū, rū tāūtāma namaā nawūxigu ga yema nūxīraūxū ga chorū uneta ga nuxcūmaūgūxū ga perū oxigūmaā nūxū chixuxū ga yexguma nūxū charūngūxēēgu na ínachoxūxūcēx ga Equituarū naānewa. Yerū nūmagū ga yema duūxūgū rū tama chauga naxīnūē rū tama nayanguxēē ga yema nūxīraūxū ga chorū uneta, rū yemacēx íchanawogū. ¹⁰ Natūrū ngēxguma nawa nanguxgu na wena namaā ichaxunetaxū, rū ñaācū tá nixī i guxūma i Yudíugūmaā ichaxunetaxū: ‘Rū tá meāma ngēma duūxūgūxū nūxū chacuēxēē i chorū mugū na aixcūma naāēwa nangēxmagūxūcēx. Rū choma rū tá norū Tupana chixī, rū nūmagū rū tá chorū duūxūgū nixīgū’. ¹¹ Rū guxūma i ngēma duūxūgū i choxū yaxōgūxū, rū aixcūma tá choxū nacuēxgū. Rū ngēmacēx taxucētāma tūxcūū nūgūmaā nūxū nixugūgū i chauchiga na ngēmaācū choxū nacuēxgūxūcēx. Erū guxūma i chorū duūxūgū rū aixcūma tá meā choxū nacuēxgū woo buxū rū ēxna yaxū. ¹² Rū tá nūxū nūxū changechaū i norū chixexūgū, rū tá nūxū ichayarūngūmaxūchi i norū pepadugū”, ñanagūrū ga Tupana. ¹³ Rū dūcax, ñuxma na Tupana ngexwacaxūxū i unetachiga idexaxū, rū ngēmawa nūxū tacuēx na yema nūxīraūxū ga uneta rū marū nangupetūchaūxū. Rū nūxū tacuēx rū guxūma i ngēma marū ngupetūchaūxū, rū paxa tá inayarūxo. Rū ngēmaācū i ngēma Yudíugūarū paigū, rū marū inayarūxoxchaū na Tupanapēxewa duūxūgūxū nangūxēēxū. Erū nūma ya Tupana rū marū Cristuxū ningucuchixēē na tórū ngūxēēruū yīxūcēx i napēxewa.

9

Tupanapata ga duūxūgū ūxūnechiga rū Tupanapata ya daxūguxū i naānewa ngēxmanechiga

¹ Rū yexguma nuxcūma Moīchémaā yadeaxgu rū nūxna naxāāgu ga yema nūxīraūxū ga uneta, rū Tupana namaā nūxū nixu na ñuxācū nanaxwēxexū na nūxū yacuēxūūgūxū. Rū yexgumarūū ta namaā nūxū nixu na ñuxācū nanaxwēxexū na naxcēx naxūāxū ga wūxi ga ĩpata ga naxchirunaxcēx na yēma nūxū yacuēxūūgūxūcēx ga paigū. ² Rū guma ĩpata ga naxchirunaxcēx rū nitūyemachīā. Rū yema naxmachīā ga nūxīra nawa ixūcuxū, rū “Nachica i Ūūnexū” nixī ga naega. Rū yēma nayexma ga werachica rū mecha ga pāū ga ūūnexū nagu nuxū. ³ Rū yema to ga naxmachīā ga yema tūyemachīāxūcēxwena ūxū rū “Nachica i Ūūnexūchixū” nixī ga naega. ⁴ Rū yēma nayexma ga yema mecha ga uirunaxcēx ga ngextā nawa yagugūāxū ga pumara ga yixixū ga yexguma yaguxgu. Rū yēma nayexma ta ga yema baū ga Tupanaārū mugū nagu namaā nanguxūgūxū. Rū yema baū rū guxūwama uirumaā natūxūne. Rū yematama baūarū aixepewa nayexma ga wūxi ga tūxūxācū ga uirunaxcēx ga yema pāū ga daxūwa rūyixūmaā āācuxū. Rū yexgumarūū ta yema baūarū aixepewa nayexma ga Arāūarū caxūruū ga rūxūxūne, rū guma nutagū ga Tupanaārū mugū nagu ūmatūgūcū. ⁵ Rū yema baūētūwa nayexmagū ga yema taxre ga daxūcūāxchicūnēxāgū ga ixāxpēxatūxū.

Rū naxpēxatūgūmaā nayadūxētūgū ga yema baúātaū. Rū yema daxūcūāxchicūnēxāgūarū ngāxūwa nixī ga nūgū nangoxēēxūxū ga Tupana. Natūrū taxucēxma tūxcūū yexeraācū nūxū tixu i ngēmachiga. ⁶ Rū wūxicana yemaācū na namexēēgūāxū ga guxūma ga yema, rū űuxūchi ga paigū rū guxūguma yema nūxīraūxū ga naxmachīāgu nachocuxū na yéma Tupana namaā nūxū ixuxūācūma nūxū yacuēxūūgūxūcēx. ⁷ Natūrū yema to ga naxmachīāwa rū yema paigūarū āēxgacūxicatama nixī ga yexma űcuxū. Rū tama guxūguma yexma naxūcu, natūrū wūxicanatama yexma naxūcu ga wūxichigū ga taunecūgu. Rū yexguma yexma naxūcuxgu rū yéma nanange ga naxūnagū rū guma nagūmaā yema baúxū namaxcuētū. Rū yemaācū ga yema paigūarū āēxgacū rū inanaxā ga guma nagū na noxrūtama pecadu rū guxūma ga duūxūgūarū pecaduxū iyanangūmaxūcēx ga Tupana. ⁸ Natūrū yema paigūarū āēxgacūxicatama nixī ga yema Nachica ga Ūūnēxūchixūgu űcuxū ga Tupana íyexmaxūwa. Rū ngēmaācū Tupanaāē i Ūūnēxū tūxū nūxū nacuēxēē na taxucūrūwama yexma Tupana íyexmaxūgu nachocuxū ga guxūma ga duūxūgū yerū yexguma nagu naxīxgu ga yema mugū ga Moíché űmatūxū rū nachūxu ga yema. ⁹ Rū guxūma i ngēma pemaā nūxū chixuchigaxū, rū wūxi i cuēxruū nixī i taxcēx i yixema na űuxma imaxēxū. Rū ngēmawa nūxū tadau rū yema āmaregū ga Tupanana naxāgūxū rū yema naxūnagū ga Tupanacēx nadēixū rū taxucūrūwama yema duūxūgūxū nimexēē na aixcūma Tupanapēxewa yamexūcēx. ¹⁰ Rū yema nuxcūmaūgūxū ga mugū ga ōnagūchiga rū axeūgūchiga rū nacūmagūchiga ixīxū, rū yema duūxūgūarū dūxētūxūnecēxicatama nixīgū. Rū yemacēx tama yema duūxūgūxū nimexēē na aixcūma Tupanapēxewa yamexūcēx. Rū woo natora ga yema mugū ga noxrix, natūrū yexguma ínanguxgu ga Cristu rū marū yexma nayacuēx na duūxūgūmaā naporaxū. ¹¹ Natūrū i űuxma rū marū ínangu ya Cristu. Rū nūma nixī i aixcūma tórū ngūxēēruū yīixū i Tupanapēxewa, rū nagagu nixī i nangēxmaxū i maxū i taguma gūxū. Rū ngēma nachica i ngextá taētūwa ínachogūxūwa rū aixcūma naxūūne erū tama guma ípata ga naxchirunaxcēx ga duūxūgūmare űxūnerūū nixī erū daxūgūxū i naānewa nangēxma. ¹² Rū Cristu rū marū daxūgūxū i naānegu naxūcu i ngextá Tupana íngēxmaxūwa. Rū taxucēxma tūxcūū wūxichigū ya taunecūgu ngēxma naxūcu, erū marū guxūguma ngema nangēxmaēcha. Rū yexguma yexma naxūcuxgu, rū tama yéma nanange ga chibugūgū rū wocaxacūgūgū na Tupanana naxāāxūcēx. Natūrū nūma ga Cristu rū nagūtama inaxā na yemaācū naxūtanūāxūcēx ga tórū pecadugū rū tūxū nangēxmaxūcēx i maxū i taguma gūxū. ¹³ Rū yema mugū ga Moíché űmatūxū rū űnanagūrū:

“Ngēxguma texē yuetaxū íngōgūgu, rū taxucūrūwama Tupanapata ya naxchirunaxcēxgu taxūcu”,

űnanagūrū. Rū yemacēx ga yema Yudiūgū, rū yexguma wūxi ga yuetaxū yangōgūgūgu rū nanaxwēxegū ga na norū paixūtawa nagaāxū ga wūxi ga woca na yema pai Tupanacēx yamáxūcēx rū na yaguāxūcēx na yemaācū ga guma tanimaca rū dexágu nagūāxūcēx na yema duūxūgūxū namaā namaxcuxūcēx na yemaācū nūxna ínayixūcēx ga norū chixexū. Natūrū yema rū duūxūgūarū dūxētūxūnewaxicatama nanamexēē rū tama norū maxūxū namexēē. ¹⁴ Natūrū nagū ya Cristu rū yema naxūnagūgūarū yexera name erū tórū maxū namexēē na aixcūma Tupanapēxewa ímexūcēx. Rū Cristu rū woo Tupana Nane na yīixū rū na nataxuxū

ga norū chixexū, natūrū Tupanana nūgū naxā rū tórū pecaducèx nayu yerū Naãē i Üünexū nanaporaxēē. Rū yemaãcū curuchagu nanabaxēē ga nagū. Rū ñuxma ya yima nagū rū ningu na tūxū namexēēxūcèx i Tupanapēxewa. Rū ngēmacèx taxucèxma tanaxwèxe na nagu ixiū ga yema mugū ga Moiché ūmatūxū ga tama tūxna naxāxū i maxū i taguma gūxū. Rū ñuxma na Cristugagu Tupanapēxewa imexū, rū nūma ya Cristu rū tūxū narūngūxēē na naxūxūcèx i ngēma Tupana ya maxūcū tūxū naxwèxexū. ¹⁵ Rū ñuxma na tórū pecaducèx nayuxū ga Ngechuchu ya Cristu, rū nūma nixī i tórū ngūxēēruū i Tupanapēxewa, ngēma Tupanaārū uneta i ngexwacaxūxū nūxū ixuxūrū. Rū ñuxma i yixema na Tupana tūxū dexū, rū tūxū nangēxma i maxū i taguma gūxū ega yima Naneāxū yaxōgūgu. Rū ngēxgumarūū ta i guxūma i Tupanaārū duūxūgū ga nuxcūma yaxōgūxū, rū nūxū nangēxma i maxū i taguma gūxū yerū Cristu nayu na norū pecaduna ínangūxūxēēāxūcèx. ¹⁶ Rū ngēxguma nayuxchaūgu i wūxi i duūxū, rū wūxi i poperagu nanaxūmatū na texé tá nayaxuxū i norū ngēmaxūgū. Natūrū ngēxguma namaūxgu i ngēma duūxū, rū taxucūrūwama texé tanayaxu i norū ngēmaxūgū. ¹⁷ Rū ngēmacèx i ngēma popera rū tama napora i ngēxguma namaūxgu i ngēma duūxū. Rū ngēxguma nayuxguxicatama nixī i naporaxū. ¹⁸ Rū nūma ga Cristu rū norū yumaã nixī ga Tupanapēxewa tūxū yamexēēgūxū. Yerū ga Moiché rū nūxū nixu rū yexguma texé pecaduāxgu rū tanaxwèxe na tūmaārū paixūtawa tanagaxū ga wūxi ga naxūna na tūmaegagu nayuxēēāxūcèx rū inabaāxūcèx ga nagū na Tupana tūxū nūxū ngechaūxūcèx ga tūmaārū pecadu. ¹⁹ Rū Moiché rū guxūma ga duūxūgūpēxewa nūxū nixu ga guxūma ga Tupanaārū mugū. Rū yemawena nanayaxu ga wocaxacūgūgū rū chibuxacūgūgū, rū dexāmaã nanaxūēū. Rū ñuxūchi nanayaxu ga wūxi ga naixchacūūxacū rū ñuxre ga tūèxmū ga dauxūne, rū yema naixchacūūgu nanabagūmū. Rū yemamaã guma nagūwa nanacūe rū ñuxūchi nanamaxcūétū ga yema popera ga Tupanaārū mugū nawa yexmaxū. Rū yexgumarūū ta nayamaxcutanū ga guxūma ga duūxūgū. ²⁰ Rū ñuxūchi ga Moiché rū ñanagūrū nūxū ga duūxūgū:

“Tupana rū marū inaxuneta na pexū tá nangūxēēxū. Rū daa nagūmaã pexū chimaxcutanū i ñuxma erū ngēmaãcū nixī i choxū namuxū na ngēmawa nūxū pecuáxūcèx na aixcūma tá pexū nangūxēēxū”, ñanagūrū. ²¹ Rū ñuxūchi ga Moiché rū guma nagūmaã nanamaxcūétū ga guma ĩpata ga naxchirunaxcèx ga nawa Tupanaxū yacuèxūūgūne. Rū yexgumarūū ta nayamaxcutanū ga guxūma ga yemaxūgū ga namaã Tupanaxū yacuèxūūgūxū ga guma ĩpataarū aixepewa yexmagūxū. ²² Rū nūxū tacuèx rū yema duūxūgū ga yexguma pecadu naxūgūgu rū Tupanapēxewa nūgū yamexēēgūchaūgu, rū norū paigūxūtawa nanaga ga wūxi ga naxūna na nūxū yamáāxūcèx rū inabagūxēēāxūcèx na Tupana tama napoxcuxūcèx. Natūrū ñuxma ya Tupana rū tūxū nūxū nangechaū i tórū chixexū yerū tórū pecaducèx nayu ga Ngechuchu rū nagū inanaba. Rū yexguma chi tāū chima nayuxgu rū nagū inabaāgu, rū taxucūrūwa chima Tupana tūxū nūxū nangechaū i tórū pecadugū.

Cristu rū nayu na iyanaxoxēēāxūcèx i pecadu

²³ Rū yemacèx ga Tupana rū nuxcūmaxūchima Moichémaã nūxū nixu na paigū duūxūgūarū pecaducèx nadēixū ga naxūnagū rū inabaāxū ga nagū na yemaãcū Tupana tama napoxcuxūcèx ga duūxūgū. Natūrū

i ñuxma i yixema na Tupana tuxũ dexũ, rü tuxũ nangẽxma i tachica i daxũguxũ i naãnewa yerü Nane ya Cristutama tórü pecaducẽx nayu rü inanaba ga nagü. Rü yima nagü rü Tupanapẽxewa rü poraãcü ngẽma naxũnagũgüarü yexera narüporamaẽ. ²⁴ Rü ngẽmacẽx i ñuxma rü taxucẽxma tũxcüũ guma ñpata ga naxchirunaxcẽx ga duũxũgü üxũnegu naxücu ya Cristu na ngẽma taétüwa nachogũxũcẽx. Erü nüma ya Cristu rü marü Tupanaxũtawaxüchi nangu i daxũguxũ i naãnewa. Rü ngẽma Nanatüpẽxewa nangẽxma i ñuxma na ngẽma taétüwa nachogũxũcẽx. ²⁵ Rü ngẽmacẽx i ñuxma rü taxucẽxma tũxcüũ guxũguma Nanatüna nügü naxãẽcha na ngẽmaãcü taxcẽx nayuuuxũcẽx. Rü yema Yudũgüarü paigüarü ãẽxgacügü rü gúcü ga taunecügügu guma ñpata ga üñenegu nachocuxũ na yẽma Tupanana naxãgüãxũcẽx ga guma naxũnagũgü. ²⁶ Natürü ya Cristu, rü taxucẽxma tũxcüũ gúcü ya taunecügügu Tupanana nügü naxãẽcha, erü ngẽxguma chi ngẽmaãcü yixĩgu rü chi noxri naãne ixũgũgumama rü chi marü muẽxpũxcüna taxcẽx nayu. Natürü ñomaũcüü ga Cristu rü marü ñoma ga naãnewa nangu na wüxicanatama nügü inaxãxũcẽx rü pecaducẽx nayuxũcẽx. ²⁷⁻²⁸ Rü ngẽma na wüxicanatama nayuxẽ i duũxũgü naxüpa na Tupanapẽxewa nangugũxũ, rü yexgumarüütama ga Cristu rü wüxicanatama nügü inaxã rü nayu na iyanaxoxẽãxũcẽx i muxũma i duũxũgüarü pecadugü. Natürü wena taxarü núma naxũ. Rü ngẽxguma wena núma naxũxgu rü tama pecaduarü oxẽewa tá núma naxũ. Natürü tá núma naxũ na namaxẽxẽãxũcẽx i guxũma i ngẽma duũxũgü i aixcũma ñanguxẽẽgũxũ.

10

¹ Rü yema mugü ga Moĩché umatũxũ rü Írarüwatama yema duũxũgücẽx nanangoxẽẽ ga ñacü tá na naxũxũ ga Cristu. Natürü ga yema mugü rü tama aixcũma Cristurüũ napora, yerü taxucürüwama Tupanapẽxewa nayamexẽẽ ga yema duũxũgü woo gúcü ga taunecügügu Tupanacẽx nanadaiixũ ga naxũnagü na yemaãcü Tupanana nangaicamagũxũcẽx. Rü yemaãcü ga yema mugü rü taxucürüwama Cristurüũ nanamaxẽxẽẽ ga yema duũxũgü. ² Rü yexguma chi yema mugü aixcũma yema duũxũgũxũ imexẽẽgu ga Tupanapẽxewa, rü tãũ chima nagu narüxĩnũẽẽcha na yapecaduãxũ, rü chi nüxũ narüxoe na naxũnagü Tupanacẽx nadẽixũ. ³ Natürü woo gúcü ga taunecügügu Tupanacẽx naxũnagü nadẽixũ ga duũxũgü, rü tama norü pecadu ñayarüxoxẽẽ. Rü yema rü norü pecaduarü cuẽxãchixẽẽrũmare nixĩ. ⁴ Yerü guma nagü ga yema wocagü rü chibugü rü tama napora na iyanaxoxẽẽãxũcẽx ga pecadugü. ⁵ Rü yemacẽx ga Cristu ga yexguma ñoma ga naãnewa naxũxchaũgu, rü Nanatũxũ ñanagürü:

“Tama cunaxwẽxe na naxũnagü cuxcẽx nadẽixũ i duũxũgü na naxũtanügüãxũcẽx i norü pecadugü. Natürü cunamexẽẽ i ñaã chaxune na ngẽmamaã chanaxũtanũxũcẽx i pecadu. ⁶ Rü tama namaã cutaãẽ i ngẽma naxũnagü i cuxna naxãmaregũxũ rü cuxcẽx nadẽixũ rü yagugũxũ na naxũtanügüãxũcẽx i norü pecadugü. ⁷ Rü yemacẽx rü ñacharügü: ‘Dücẽx, Pa Chaunatũx, daxe chixĩ, rü nuã cupẽxewa changẽxma na chanaxũxũcẽx i curü ngúchaũ rü na chayuxũcẽx, ngẽma curü orewa chauchiga naxũmatũxũrũũ’, ñacharügü”.

⁸ Rū yemaãcü ga Cristu rü nüxü nixu na Tupana rü tama aixcüma namaã nataãexü ga yema na naxcèx nadaiãxü ga naxünagü rü naxcèx yagugüãxü na naxütanügüãxüçèx ga norü pecadugü woo yema mugü ga Moiché ùmatüxüwa rü duüxügüxü namu na naxügüãxü ga guxüma ga yema. ⁹ Rū yemawena ga Cristu, rü ñanagürü ta:

“Dücèx, Pa Chaunatüx, daxe chixí, rü nuã cupèxewa changèxma na chanaxüxüçèx i curü ngúchaü rü duüxügüarü pecaducèx na chayuxüçèx”,

ñanagürü. Rū yemawa nüxü tacuèx na Tupana rü marü iyanaxoxèãxü na naxünagü naxcèx nadejxü, yerü Nanexü ningucuchixèë na pecaducèx nayuxü. ¹⁰ Rū ñuxma na Ngechuchu ya Cristu naxüxü ga yema Tupanaärü ngúchaü, rü ngèmacèx nixí i ñuxma i Tupanapèxewa ixüünexü i yixema. Yerü nüma ga Cristu rü Tupanana nügü naxã na wüxicanatama guxãärü pecaducèx nayuxü. ¹¹ Rū guxüma i Yudiügüarü paigü rü wüxichigü i ngunexügu rü tupaucawa nangèxmagüxü na Tupanana naxãgüãxüçèx i naxünagü i naxcèx nadaiixü. Rū guxüguma yemaãcü nanaxügüxü natürü taguma aixcüma inayarüxo ga norü pecadugü woo yemaãcü na naxügüxüãxü. ¹² Natürü nüma ga Ngechuchu ya Cristu rü wüxicanatama Tupanana nügü naxã na guxãärü pecaducèx nayuxüçèx. Rū yemawena rü ñuxüchi daxüwa naxü rü Tupanaärü tügüncèwawa nayarüto, erü guxãärü ãèxgacü nixí i ñuxmax. ¹³ Rū ngèma nixí i nangèxmaxü ñuxmatáta ya Tupana rü guxüma i norü uwanügüxü nüxü nayexeraxèë. ¹⁴ Rū nüma ga Ngechuchu ya Cristu rü wüxicanatama Tupanana nügü naxã rü nayu na guxüguma Tupanapèxewa timexüçèx ya yixema Tupanacèx tüxü yaxüünexèëgüxe. Rū ngèmacèx i ñuxma rü taxucèxma tüxcüü wena nügü inaxã rü nayu, yerü wüxicanatama guxüma ningutanüxèë. ¹⁵⁻¹⁶ Rū Tupanaãë i Üünexü rü tüxü nüxü nacuèxèë na aixcüma yíixü i ngèma, yerü nüma ga Tupana rü ñanagürü:

“Ngèxguma nawa nanguxgu na wena ngèma Yudiügümaã ichaxunetaxü, rü wüxi i ngexwacaxüxü i uneta tá nüxna chaxã. Rū tá meã ngèma duüxügüxü nüxü chacuèxèë i chorü mugü na aixcüma naãëwa nangèxmagüxüçèx rü guxüguma naga naxünüèxüçèx. ¹⁷ Rū tá nüxü ichayarüngümaxüchi i ngèma duüxügüarü pecadugü rü ngèma chixexü i naxügüxü. Rū tagutáma wena nüxna chacuèxãchi”,

ñanagürü. ¹⁸ Rū ngèmaãcü nüxü tacuèx rü ngèxguma Tupana duüxügüaxü nüxü ngechaügu i norü pecadugü, rü marü taxucèxma tüxcüü nanaxwèxe na wena tacü i naxünagü nüxna naxãgüxü naxcèx i pecadu.

Name nixí i Tupanana tangaicamagü

¹⁹⁻²⁰ Rū ngèmacèx i ñuxma, Pa Chaueneëgü, rü taxucèxma tüxcüü tamuüë na Tupana íngèxmaxüwa ichocuxü na namaãxüchi idexagüxüçèx. Rū nuxcümaxüchima rü paigüarü ãèxgacüxicatama yexma naxücu nagu ga guma ípata ga naxchirunaxcèx ga Tupana nawa yexmane. Rū taxucürüwama ngexerüxüxemare yexma taxücu. Natürü nüma ga Ngechuchu ya Cristu rü marü inayanaxoxèë ga guxüma ga yema ga yexguma curuchagu nayuxgu rü nagü inabaãgu na Tupana íngèxmaxüwa tüxü yachocuxèèxüçèx rü namaãxüchi idexagüxüçèx. Rū woo taxucürüwama Tupanana tangaicamagü ga noxrix, natürü nüma ga Cristu rü nayu na tüxü namaxèxèèxüçèx. Rū nagagu nixí i ñuxma i Tupanaxütawa ingugüxü. ²¹ Rū nüma nixí i Tupanapèxewa

tūxū nangūxēēxū i guxāma i yixema i Tupanaārū duūxūgū ixīgūxe.
 22 Rū űuxma na tūxū nangēxmaxū ya tórū ngūxēēruū i Tupanapēxewa,
 rū tanaxwēxe i ngearū chixexūācūma Tupana tangaicamagū na
 namaāxūchi idexagūxūcēx. Rū tanaxwēxe i aixcūma tayaxōgū na
 nūma rū tá meā tūxū nayaxuxū yerū Cristu rū taxcēx nayu na tūxū
 iyanaxoxēēxūcēx i tórū chixexū rū yemacēx marū naegagu ítabaiū.
 23 Rū tanaxwēxe i aixcūma meā Cristuaxū tayaxōgūecha yerū nagūmaā
 tūxū inayanaxoxēē ga tórū chixexū. Rū ngēmacēx ítananguxēē na
 wena taxarū nūma naxūxū na Nanatūxūtawa tūxū nagagūxū. Rū
 taguma tanaxwēxe na nūxū rūxoexū na yaxōgūxū, rū bai i írarūwa.
 Erū Tupana ga tamaā ixunetacū na tūxū nangūxēēxū, rū aixcūmaxūchi
 tá nayanguxēē i guxūma ga yema tamaā nūxū yaxuxū. 24 Rū űuxma na
 ngēmaācū tūxū nangūxēēxū ya Tupana, rū name nixī i guxūguma naxcēx
 tadaugū na űuxācū wūxichigū yigū rūngūxēēgūxū na yexeraācū yigū
 ingechaūgūxūcēx rū mexū ixūgūxūcēx. 25 Rū name nixī i guxūguma tórū
 ngutaquēxegūwa na íngugūūxū. Erū nūmaxū rū marū nūxū narūxoe na
 ngutaquēxewa naxīxū, rū tama tanaxwēxe na ngēxgumarūū ixīgūxū. Rū
 ngēmacēx name nixī i yigūaxū tanangūchaūxēē na ingutaquēxegūxū. Rū
 űuxma na nūxū icuáxū na marū yangaicaxū ya tórū Corí, rū yexeraācū
 tanaxwēxe na yigūaxū nangūchaūxēēxū. 26 Natūrū ngēxguma chi texé
 Cristuaxū yaxōchirēxgu ga noxrix rū űuxūchi noxtacūma nūxū tarūxoxgu,
 rū marū nataxuma na űuxācū namexēēxū i ngēma tūmaārū pecadu i
 Tupanapēxewa. 27 Erū ngēxguma chi ngēmaācū noxtacūma Cristuxū
 tarūxoxgu, rū aixcūmaxūchi tá tanayaxu i ngēma poxcu i ācūmaxū i
 Tupana tá tūxū namaā poxcuxū rū yima ūxū ya iyaurane ya nawa tá
 ínaguxūne i ngēma Tupanamaā rūxuwanūgūxū. Rū ngēxīcatama nixī i tūxū
 ínanguxēēxū ya yixema Cristuxū rūxoxe. 28 Rū nūxū tacuēx rū yexguma
 texé tama Moīchéarū mugūga ínūgu rū nayexmagu ga taxre rū éxna
 tomaēxpūx ga duūxūgū ga tūxū daugūxū rū tūxū ixugūexū na aixcūma
 tama naga taxīnūxū, rū āēxgacūgū rū noxtacūma tūxū nimēxgū rū tama
 nūxū tangechaūtūmūūgū. 29 Natūrū Tupana rū aixcūma yexeraācū tá
 nanapoxcue i ngēma duūxūgū i tama Nanega ínūexū rū yima nagū
 ya pecaduarū pirūūxū oexū rū Naāē i Ūūnexū i nūxū ngechaūxūmaā
 guxchigagūxū. 30 Rū meāma nūxū tacuēx rū Tupana rū tama natūcēxma
 űanagūrū:

“Choma tá nixī i namaā nūxū chacuáxū na tacū tá namaā chaxūxū i
 guxūma i ngēma chixexū ūgūxū. Rū aixcūma tá chanapoxcu”,
 űanagūrū. Rū yexgumarūū ta űanagūrū:

“Choma tátama nixī i nūxna chaçaxū i wūxichigū i chorū duūxūgū i norū
 maxūchiga”,

űanagūrū. 31 Rū dūcax, rū aixcūma namaxū ya Tupana, rū ngēmacēx ega
 tama naga ixīnūēgu rū wūxi i ācūmaxūchixū nixī na namēxgu inguxū
 na tūxū napoxcuxūcēx. 32 Rū dūcax, name nixī i nūxna pecuēxāchie ga
 űuxācū na yīxū ga yexguma noxri Cristuxū peyauxgu. Rū yexguma
 ga pema rū yema na peyaxōgūxūgagu rū poraācū guxchaxūgū pexū
 nangupetū, natūrū tama Cristuxū perūxoe rū bai ga írarūwa. 33 Rū
 űuxre ga pema rū duūxūgū pemaā naguxchigagū rū guxāpēxewa pexū
 niçuaixgū. Rū toguāx ga pema rū pegū ipeyaxāgū na yema pemūcūgūrūū
 ngūxū pingēgūxūcēx. 34 Rū pema rū pexū nangechaūtūmūūgū ga yema
 petanūxūgū ga yaxōgūxū ga poxcupataūwa yexmagūxū. Rū taāēacūma

yaxna namaã pexĩnũe ga yema tama yaxõgũxũ ga pexna napuxũxũ ga perũ yemaxũgũ. Rũ tama naxcẽx pexoegaãe, yerũ meãma nũxũ pecuẽx rũ daxũguxũ i naãnewa pexũ nangẽxma i ngẽma perũ ngẽmaxũgũarũ yexera ixĩxũ, erũ tagutãma nagux. ³⁵ Rũ ngẽmacẽx i ñuxmax, rũ tama name na nũxũ perũxoexũ na Cristuaxũ peyaxõgũxũ woo tacũ pexũ ùpetũgu. Erũ marũ nũxũ pecuẽx rũ Tupana rũ aixcũmaxũchi tá pexna nanaxã i perũ ãmare i maxũ i taguma gũxũ, erũ Cristuaxũ peyaxõgũ. ³⁶ Rũ ngẽma guxchaxũgũ i pexũ ngupetũxũ, rũ name nixĩ i yaxna namaã pexĩnũe na penaxũxũcẽx i Tupanaãrũ ngũchaũ rũ penayaxuxũcẽx i ngẽma ãmare i pemaã inaxunetaxũ. ³⁷ Erũ Tupanaãrũ ore i ùmatũxũwa rũ ñanagũrũ: “Paxaxũchi tá wenaxãrũ nũma naxũ ya Cristu. Rũ aixcũma tãutãma nuxcũ ñangu. ³⁸ Natũrũ yĩxema tũmaãrũ õgagu chopẽxewa mexẽ, rũ name nixĩ i guxũguma tayaxõcũma chauxcẽx tamaxũ. Natũrũ ngẽxguma nũxũ tarũxoxgu na tayaxõxũ, rũ choma rũ tãutãma tũmamaã chataãe”, ñanagũrũ. ³⁹ Natũrũ i yixema rũ tama ngẽma duũxũgũ i nũxũ rũxoexũ i Tupana tá poxcuexũrũ tixĩgũ. Erũ yixema rũ ngẽma yaxõgũxũtanũxũ tixĩgũ, rũ ngẽmacẽx tũxũ nangẽxma i maxũ i taguma gũxũ.

11

Tórũ õchiga

¹ Rũ ñuxma rũ tórũ õgagu nixĩ i nũxũ icuáxũ na aixcũma tá nayauxgũxũ i guxũma i ngẽma irũnguxẽẽgũxũ ga Tupana tamaã ixunetaxũ. Rũ ngẽma tórũ õgagu nixĩ i nũxũ icuáxũ na aixcũma Tupana tá yanguxẽẽxũ i ngẽma norũ uneta i ñuxma tauta nũxũ idauxũ. ² Rũ ñuxre ga nuxcũmaũgũxũ ga tórũ õxigũ rũ Tupanaãxũ nayaxõgũ, rũ yemacẽx ga Tupana rũ namaã nataãe. ³ Rũ ngẽma tórũ õgagu nixĩ i nũxũ icuáxũ na aixcũma yĩxũ na Tupana rũ norũ oremaãmare nangoxẽẽãxũ ga ñoma ga naãne rũ ùexcũ rũ tauemacũ rũ woramacurigũ rũ ãxtagũ. Rũ yemaãcũ ga Tupana, rũ ngũrũwa nanangoxẽẽmare ga guxũma i ngẽma ñuxma nũxũ idauxũ. ⁴ Rũ guma nuxcũmaũcũ ga Abé rũ Tupanaãxũ nayaxõ. Rũ yemacẽx Tupanaga naxĩnũ rũ nũxna nanaxã ga wũxi ga naxũna ga Tupanacẽx yamáxũ. Natũrũ ga naẽneẽ ga Caĩ rũ tama Tupanaga naxĩnũ rũ tama nũxna nanaxã ga yema ãmare ga Tupana nũxũ naxwẽxexũ. Rũ yemacẽx ga Tupana rũ woo tama Caĩmaã nataãe, natũrũ Abémaã nataãe rũ nũxũ nixu na mecũ yĩxũ yerũ nayaxõ rũ naga naxĩnũ. Rũ ngẽmacẽx i ñuxmax na woo nayuxũ ga Abé, natũrũ wũxi i tórũ cuẽxruũ nixĩ. Erũ nawa nixĩ i nũxũ icuáxũ na Tupana naxwẽxexũ na yaxõgũxũ rũ naga ixĩnũexũ. ⁵ Rũ Enó rũ ta Tupanaãxũ nayaxõ rũ naga naxĩnũ. Rũ yemacẽx nixĩ ga namaxãcũtama yagaãxũ na tama nayuxũcẽx. Rũ namũcũgũ rũ taguma nũxũ inayangaugũ, yerũ Tupana nayaga. Rũ Tupanaãrũ ore i ùmatũxũwa nũxũ nixu rũ yexguma tauta yagaãgu, ga Enó rũ nanaxũ ga yema Tupana naxwẽxexũ. ⁶ Natũrũ taxuacũma Tupana tamaã nataãe ega tama nũxũ yaxõgũgũ. Rũ yĩxema namaã ãmũcũchaũxẽ, rũ tanaxwẽxe na tayaxõxũ na aixcũmaxũchi nangẽxmaxũ i nũma rũ aixcũma tũxũ nangũxẽẽxũ ya yĩxema naxcẽx daugũxe rũ naga ñnũẽxẽ. ⁷ Rũ yexguma Noemaã yadeaxgu ga Tupana, rũ nũma ga Noe rũ nayaxõ rũ naga naxĩnũ. Rũ Tupana rũ namaã nũxũ nixu rũ tá na ñanguxẽẽãxũ ga mucũ ga taxũchicũ ga taguma duũxũgũ nũxũ daucũ rũ tá guxũwama inanguanexẽẽcũ. Rũ namaã nũxũ nixu ga na naxũãxũcẽx ga wũxi ga wapuru ga taxũne na tama

nayuexūcèx ga nūma rü namèx rü nanegü rü naneãxgü. Rü Tupanaga naxīnū ga Noe, rü nanaxū ga guma wapuru, rü yemaãcū tama nayue ga nūma rü napatacūãx. Rü yemaãcū Tupanaãxū nayaxō. Natürü yema togü ga duūxūgü rü tama nayaxōgü, rü yemacèx Tupana nanapoxcye. Natürü nūma ga Tupana rü Noexū nixu na napèxewa namexū, yerü nūxū nayaxō. ⁸ Rü guma tórü oxī ga Abráū, rü Tupanaãxū nayaxō. Rü yemacèx nixī ga naga naxīnūxū rü nūxna yaxūxū ga nanatūchiūãne na nawa naxūxūcèx ga yema naãne ga Tupana tá nūxna ãxū na noxrūxūchi yīxūcèx. Rü yemaãcū nanaxū ga yexguma Tupana namuxgu. Rü nanatūchiūãnewa inaxūãchi ga Abráū woo tama nūxū na nacuáxū ga ngextá tá na naxūxū. ⁹ Rü yexguma nawa nanguxgu ga yema naãne ga Tupana namaã ixunetaxū, rü ñoma yexma naxūãneãxūrūūmare ĩpata ga naxchirunaxcèxmaãmare naxãchiū. Rü yexgumarūūtama nixīgü ga nane ga Ichaá rü nataa ga Acobu, yerü yexguma nayaegu rü Abráūrūū ñoma yexma naxīãneãxūrūūmare nixīgü ga yema naãnewa. Rü yemaãcū nixīgü ga guxūma ga nūmagü ga na woo Tupana rü namaã inaxunetaxū ga na noxrūxūchi yīxūcèx ga yema naãne. ¹⁰ Rü yemaãcū ga Abráū, rü woo ñoma yexma naxūãneãxūrūūmare yéma nayexma, natürü Tupanaãxū nayaxōchigüama, yerü nūxū nacuèx na Tupana tá daxūguxū i naãnewa na nagaxū nawa ya yima ĩãne ya nūmatama naxūxūne ya tagutáma iyarūxoxūne. ¹¹ Rü yexgumarūūtama iyixī ga Abráū namèx ga Chara. Rü woo ga na taguma naxãxãcūchirèxū yerü marū iyaxūchi, natürü ixãxãcū yerü iyaxōoma na Tupana rü aixcūma tá yanguxèèãxū ga yema norü uneta ga tá na naxãxãcūxū. ¹² Rü yemaãcū ga Abráū rü woo marü yaguãxūchi na yīxū, natürü dūxwa nūxū nayexma ga wūxi ga nane, rü gumawa ne naxī ga muxūma ga nataagü. Rü ñuxma rü ñoma èxtagürūū namuxūchi, rü ñoma naxnūcū ya taxuacūma yaxugücürūū nixīgü, yerü yemaãcū Abráūmaã inaxuneta ga Tupana. ¹³ Natürü nūmagü ga Abráū rü Ichaá rü Acobu rü nayue, rü yemacèx tama nūxū nadaugü ga guxūma ga nataagü i ñuxma ngèxmagūxū, rü tama namaã inacuèxgü ga yema naãne ga noxri Abráūmaã nūxū yaxuxū ga Tupana. Natürü Tupanaãxū nayaxōgüama, rü yemacèx nūxū nacuèxgü rü Tupana rü tá aixcūma na yanguxèèãxū ga yema norü uneta ga namaã nūxū yaxuxū. Rü nataãègü yerü nūxū nacuèxgü na tãütáma guxūguma ñoma ga naãnewa na nayexmagüechaxū, rü yemacèx nūxū nixugüe na to i nachiūãnecūãxūrūūmare yixīgūxū ga ñoma ga naãnewa. ¹⁴ Rü nūmagü rü yema oremaã meãma tūxū nūxū nacuèxèè na tama ñoma ga naãneguxicatama naxīnūèxū natürü ĩnanguxèègüãxū i to i nachica i daxūguxū i naãnewa ngèxmaxū. ¹⁵ Rü nūmagü rü yexguma chi nanaxwèxegüga ga naxcèx na nawoeguxū ga yema naãne ga noxri nawa ne naxīxū, rü tãū chima nūxū naguxcha rü chi naxcèx nawoegu. ¹⁶ Natürü ga nūmagü rü nūxū nangúchaūgü i ngëma naãne i mexèchixū i daxūwa ngèxmaxū i Tupanaxūtawa. Rü yemacèx nixī ga Tupana ga tama naxãnèxū na nügü yaxuxū na norü Tupana yīxū. Yerü nūma ga Tupana rü naxcèx nanamexèè ga wūxi ga ĩãne ya daxūguxū i naãnewa ngèxmane. ¹⁷⁻¹⁸ Rü Tupana ga noxri rü Abráūmaã nūxū nixu rü ñanagürü:

“Cune ya Ichaáwa tá cuxū nangèxma i muxūchixūtama i cutaagü”, ñanagürü. Rü Abráū rü nayaxō na Tupana rü aixcūmaxūchi tá na yanguxèèãxū ga yema namaã inaxunetaxū. Rü yemacèx ga yexguma Tupana nūxū ũxgu rü Ichaácèx nūxna nacaxgu na naxcèx yamáãxūcèx,

rū nūma ga Abráũ rū tama nanachuxu. Rū ínamemare na Tupanacèx yamáãxũ ga guma nane ga nügümaã wüxicacü. ¹⁹ Yerü nūma ga Abráũ rū nayaxõ na Tupanaãxũ natauxchaxũ na wena namaxèxèèãxũ i yuexũ. Rū yemacèx ga Abráũ rū ínamemare na Tupanacèx nanexũ yamáxũ yerü nayaxõ na Tupana rū wena tá namaxèèãxũ. Rū aixcūmaxũchi yemaãcü Abráũcèx nanaxü ga Tupana, yerü woo ñoma marü nayuxürüü nixĩ ga nane, natürü ga Tupana rū maxũcü nüxna nanamu. Rū yema rū wüxi ga tórü cuèxruũ nixĩ na ñuxãcü aixcūma yaxõõxũ ga Abráũ. ²⁰ Rū guma Ichaá rū ta Tupanaãxũ nayaxõ. Rū yemacèx ga yexguma marü nayèxgu, rū nayumüxè rū Tupanana naca na nanegü ga Acobu rū Echaũxũ nangüxèèxũcèx. Rū yemaãcü nayumüxè yerü aixcūma nayaxõ na Tupana tá yanguxèèxũ ga yema nüxna naxcèx nacaxũ. ²¹ Rū guma Acobu rū ta Tupanaãxũ nayaxõ. Rū yemacèx ga yexguma marü nayèxgu rū nayuxchaũgu, rū norü caxũxümaã nügü inachixèè rū Tupanaxũ nicuèxũ. Rū nayumüxè rū Tupanana naca na nataagü ga Yúche nanegüxũ nangüxèèxũcèx. Rū yemaãcü nayumüxè yerü aixcūma nayaxõ na Tupana tá yanguxèèxũ ga yema Abráũmaã inaxunetaxũ. ²² Rū guma Yúche rū ta Tupanaãxũ nayaxõ. Rū yemacèx ga yexguma nayuxchaũgu, rū natanüxũgümaã nüxũ nixu rū ñanagürü:

“Tataagü rū yixcūra rū tá ínachoxũ i nuã Equituanewa na nawa naxĩxũcèx i ngẽma naãne ga Tupana tórü õxi ga Abráũmaã nüxũ ixuxũ. Rū ngẽxguma ngẽma naxĩxgu, rū chanaxwèxe ya chauxchinèxãgü rū ta ngẽma nanana na ngẽxma yatèxgüãxũcèx”,

ñanagürü. ²³ Rū yemawena rū mucūma ga taunecügü rū nimu ga yema duũxũgü ga Equituanewa. Rū yema nachiuãneärü ãèxgacü, rū tama nanaxwèxe na yexeraãcü yamuètanüxũ, rū yemacèx nanamu na tüxũ nadèixũcèx ga guxãma ga buxe ga iyatũxe ga yexwacèx ibuetanüxè. Natürü nanatü rū naè ga guma tórü õxi ga Moïché, rū aixcūma Tupanaãxũ tayaxõgü. Rū yemacèx ga yexguma noxri nabuxgu ga Moïché, rū tomaèxpüx ga tauemacügu itayacuxgü, yerü nüxũ tadaugü na namexèchixũ rū tama naxcèx tamuüè ga yema Equituaneärü ãèxgacüarü ore ga woo na naxunagüãxũ ga na buxe tüxũ nadèixũ. ²⁴⁻²⁵ Rū Moïché rū ta Tupanaãxũ nayaxõ. Rū yemacèx ga yexguma marü nayèxgu rū tama nanaxwèxe na nügü yaxuxũ na Equituaneärü ãèxgacüxacü ngĩne na yĩxũ, yerü naxcèx rū narümemaè na natanüxũgü ga Yudíugümaã wüxigu ngúxũ yangexũ. Rū tama nanaxwèxe na tacü ga ñoma ga naãneärü chixexũmaã nügü na nataãèxèèxũ, yerü nüxũ nacuèx rū yema taãè rū paxaãchiruũmare nixĩ. ²⁶ Rū yexgumarüü na daxüguxũ ga naãnena na yaxũxũ ga Cristu na ngúxũ yangexũcèx, rū yexgumarüü ta nixĩ ga Moïché ga ãèxgacüpatana na yaxũxũ, yerü naxcèx rū narümemaè na natanüxũgü ga Yudíugümaã wüxigu ngúxũ yangexũ. Natürü taxucèxma yema ngúxũgu narüxinü, yerü nüxũ nacuèx rū tá wüxi i ngunexũgu Tupanaxütawa na nayauxãxũ i norü natanü. ²⁷⁻²⁸ Rū yema na yaxõõxũcèx nixĩ ga Tupanaga naxĩnũxũ ga Moïché. Rū yemacèx ga yexguma Tupana namuxgu ga na naxüãxũ ga üpetüchiga, rū nayanguxèè ga yema Tupana namuxũ. Rū nūma ga Moïché rū guxüma ga natanüxũgü ga Yudíugüxũ namu na wüxichigü ga İpatawa yamáãxũcèx ga wüxi ga carneruxacü na yemagümaã namaxcuãxũcèx ga naãxpatagü. Rū ñanagürü nüxũ:

“Ñoma i chütaxũgu rū tá Tupana núma Equituanewa nanamu i wüxi i norü orearü ngeruũ i daxüçũãx rū tá nanadai ya yima nüxira

bucü ya Eqüitanecüãxgü nane i wüxichigü ya İpatawa. Natürü ngëxguma yima nagümaã penamaxcuxgu i perü İãxpata, rü tãütama pechiñgu naxücu”,

ñanagürü. Rü yemaãcü ga Moïché rü Tupanaga naxĩnü yerü nüxü nayaxõ. Rü yemacèx ga yema orearü ngeruü ga daxüçüãx rü taxuüma ga Yudüügünexü nimèx. Rü yema na yaxõõxücèx nixĩ ga İnaxüxüxü ga Equituarü naãnewa, rü tama naxcèx namuüxü na guma Equituaneãrü ãëxgacü tá namaã nanuxü. Rü taguma nüxü narüxo ga Tupanawe na naxüxü, yerü Tupana ya ëxügücuarü ngüchañ naxü. ²⁹ Rü yema duüxügü ga Moïchéwe rüxixü rü ta nayaxõgü. Rü yemacèx ga yexguma yema Taxtü ga Dauchiüxüwa nangugügu, rü yema dexá rü nügüna nixĩgachi, rü nipaaneãchi, rü yéma nichoü. Natürü yexguma yema Equituanecüãx ga churaragü ga nawe ngëgüxü nawe ichoügu, rü yexma nayiama, yerü wenaxãrü nügüna naxĩ ga yema dexá. ³⁰ Rü yexguma guma İãne ga Yericüwa nangugügu ga yema duüxügü, rü taxucürüwama nichocu, yerü guxüwama naxãxtapüx. Natürü Tupanaãxü nayaxõgü, rü yemacèx Tupanaga naxĩnüë rü 7 ga ngunexü nüxü İnichoeguãchitanücüü, yema Tupana namaã nüxü ixuxürüü. Natürü yexguma norü 7 ga ngunexüwa nanguxgu, rü nüëchama niwëxgütapüx, rü yemaãcü nichocu. ³¹ Natürü yema nge ga Yericüçüãx ga Raá, rü woo chixri imaxü ga noxrix, natürü yexguma yéma nangugügu ga yema taxre ga Yudüügü ga bexma ngügütaewa yéma İxü, rü ngüma iyixĩ ga nüxü nangüxëëxü. Rü yemacèx tama yema togü ga Yericüçüãx ga tama Tupanaga İnüëürüü iyu, yerü Tupanaãxü iyaxõ. ³² ¿Rü ñuxma rü tacü i togü i duüxügüchigaxü tá pemaã chixuxü? Rü changechica na pemaã nüxü chixuxücèx i nachiga ga yema nuxcümaügüxü ga ãëxgacügü ga Yedeü rü Bará rü Chaüchóü rü Yeté rü Dabí rü Chamue, rü guxüma ga nuxcümaügüxü ga Tupanaãrü orearü uruügü. ³³ Rü yema na yaxõgüãxücèx nixĩ ga Tupana nüxü rüngüxëëxü. Rü yemaãcü to ga nachiüñanegüarü ãëxgacügüxü narüporamaëgü, rü meãma norü duüxügümaã inacuèxgü rü aixcüma nanayauxgü ga yema Tupana namaã ixunetaxü. Rü yemacèx ga yexguma woo aitanügu yatëxcuchigüãgu, rü taxuüma namaã naxü ga aigü yerü Tupana nüxna nadau. ³⁴ Rü yexguma norü uwanügü üxüxetüwa yawocuxgu, rü taxuüma nüxü naxüpetü rü tama nixae, yerü Tupanaãxü nayaxõgü rü nüma rü nüxna nadau. Rü yexguma togü taramaã nadaixchaügu, rü Tupana nüxü narüngüxëë na taxuüma nüxü üpetüxücèx. Rü yexguma naturaegu rü norü uwanügü nadaixchaügu, rü Tupana nanaporaexëë. Rü yexguma to ga nachiüñanëãrü churaragümaã nügü nadaixgu, rü yema togü ga churaragüxü narüyexeragü. ³⁵ Rü nayexma ga ngexügü ga yuexacüxü, natürü yema naxãcügü rü wenaxãrü İnarüdagü yerü Tupanaãxü nayaxõgü. Natürü nayexma ga togü ga poraãcü ngüxü ingegüxü yerü norü uwanügü yemaãcü namaã nachopetü na Tupanaxü İnatëxgüxücèx. Natürü ga nümagü rü tama Tupanaxü İnatëxgü rü yemacèx nayue, yerü naxcèx rü narümemae nixĩ na wena namaxëxü rü nayauxgüãxü i ngëma maxü i taguma gúxü. ³⁶ Rü nayexma ta ga ñuxre ga togü ga yaxõgüxü ga duüxügü nüxü cügüexü, rü yaçuaixgüxü, rü cadenamaã yanëixgüxü, rü poxcupataügu nawocuxü. ³⁷ Rü ñuxre ga nümagü rü nutamaã İnanamuxüchigü rü yemaãcü nanadai. Rü togü rü nayawãixyegü rü nayue. Rü ñuxre ga togü rü ngüxü nüxü ningexëëgü na Tupanaxü İnatëxgüxücèx. Rü togü rü taramaã nanadai. Rü ñuxre ga nümagü rü nu ne nanaxĩmare

rū carneruchèxmüü rū chibuchèxmüümaãmare nixãxchiru. Rū taxuüma nūxū nayexma, rū nanaxīxāchiāégū yerū norū uwanūgū rū chixri namaã nachopetū. ³⁸ Rū ñoma ga naãneçūāx rū naxchi naxaie, natürū Tupana rū nūxū nangechaū. Rū ñoma ga naãnewa rū norū uwanūgūchaxwa nu ne nanaxīmare ga taxúema íxāpataxūwa. Rū ngürüanegu nipexütanūmare yerū nangepatagū. ³⁹ Rū guxūma ga yema nuxcūmaūgūxū ga duūxūgū woo norū ōgagu Tupana namaã na taãëxū, natürū taxuüma ga yema duūxūgū rū nūxū nadau ga yema mexūgū ga Tupana namaã nūxū ixuxū. ⁴⁰ Rū yemaãcū namaã nangupetū ga yema duūxūgū, yerū ga Tupana rū tagu narūxīnū rū tama nanaxwèxe na nūxīra nūxīca yamexēégūāxū, natürū nanaxwèxe na tamaã wūxigu yamexēégūāxū. Rū ñuxma i yixema na yaxōgūxū, rū yema nuxcūmaūgūxū ga duūxūgürüü Tupanaārū duūxūgū tixīgū, yerū Nane ya Ngechuchu rū guxācèxma nayu. Rū wūxi i ngunexū rū tá taxcèx nūma naxū na nūgūxūtawa tūxū nagagūxūcèx na ngēma ingèxmagūechaxūcèx.

12

Name nixī i Ngechuchucūmagu taxī

¹ Rū ñuxma na nūxū icuáxū na ñuxācū aixcūma Tupanaāxū yaxōgūāxū ga guxūma ga yema nuxcūmaūgūxū ga duūxūgū, rū ngēma rū wūxi i tórū cuèxruū nixī na ñuxācū Tupana naxwèxexū na naxcèx imaxèxū. Rū ngēmācèx i ñuxmax, jrū ngīxā nūxū tarūxoe i guxūma i ngēma pecadu i tūxū ítūexēèxū rū tūxū naguxchaxèèxū na meā yaxōgūxū! ¡Rū ngīxā paxa naxcèx tadaugū na meā Tupanacèx imaxèxū rū guxūguma aixcūma naxūxū i ngēma tūxū nanaxwèxexū! ² Rū name nixī i tanangugū na ñuxācū namaxūxū ga Ngechuchu rū nagu taxī i nacūma. Yerū nūma nixī ga nuxcūma nagu naxīnūxū na ñuxācū tórū ōgagu tá tūxū namaxèxèèxū rū nūma nixī i tūxū nangūxèèxū na aixcūma meā yaxōgūechaxūcèx na ngēmaãcū naxūtawa ingugūxūcèx. Rū nūma rū tama nūgū nachuxu na curuchawa ngúxū yangexū, rū tama nagu narūxīnū ga yema āne na yangexū, natürū nataāèxūchi yerū nūxū nacuèx na yemawena rū tá muxūma i duūxūgū nayauxgūxū i maxū i taguma gúxū. Rū ñuxma rū Tupanaārū tūgūnecūwawa narūto na ngēma guxāārū āēxgacū yīxūcèx. ³ Rū name nixī i penangugū rū nagu perūxīnūè na ñuxācū ga Ngechuchu rū yaxna namaã naxīnūxū ga yema ngúxū ga nūxū yangexèégūxū ga yema duūxūgū ga pecaduāxgūxū. Rū nūma ga Ngechuchu rū yemaãcū yema ngúxūmaã yaxna naxīnū na pema rū tama nūxū perūçauxūcèx rū tama nūxū perūxoexūcèx na nūxū peyaxōgūxū. ⁴ Rū ñuxma i pema na peyaxōgūxū, rū ngúxū pingegū erū pecaduxū perūxoe. Natürū taxúema ga petanūwa rū yemacèx Cristurūü yuwa tangu. ⁵ Rū name nixī i nūxna pecuèxāchie i norū ore ya Tupana i namaã pexū yaxucūxègūxū i ñuxma na naxācūgū pixīgūxū. Erū ngēma norū ore i ūmatūxūwa rū ñanagürü: “Pa Chaunex, jtāxū i nūxū cuxoxū i ngèxguma cuxū icharūwèxāchixèégū! ¡Rū tāxū i cuyarūmaxāchixū i ngèxguma cuxū chaxucūxègu! ⁶ Erū nūma ya Cori ya Tupana rū tūxū inayarūwèxāchixèè ya yīxema tūxū nangechaūxè. Rū tūxna nanaçuaixca ya yīxema naxācūxū tūxū nayaxūxe, na ngēmaãcū tūxū nanguxèèxūcèx na ñuxācū nanaxwèxexū na naxcèx tamaxūxū”, ñanagürü. ⁷ Rū ngēmācèx i pemax, rū name nixī na yaxna namaã pexīnūèxū i ngèxguma Tupana pexna naçuaixcagu. Erū ngèxguma

ngēmaācū pemaā yixīgu, rü pexū nüxū nacuèxēē na aixcūma naxācūgū pixīgūxū. Erü guxūma i papá rü inayanawēxāchixēē i ngēma aixcūma naxācūgū ixīgūxū. ⁸ Natürü ngēxguma chi Tupana tama pexū iyarüwēxāchixēēgu, naxācūgūxū iyanawēxāchixēēxūrūū, rü ngēmawa tá nüxū pecuèx na tama aixcūma naxācūgū pixīgūxū, rü ngenatūxū pixīgūxū. ⁹ Rü wüxichigū i yixema ga yexguma ibuegu, rü tanatūgū rü tüxū taxucūxēgū, rü yixema rü tūmaga taxīnūē rü tüxū tangechaūgū. Rü ngēmacèx i ñuxma rü yexeraācū tanaxwèxe na naga ixīnūēxū ya Tanatū ya daxūgucū na ngēmaācū nayaxuxūcèx i maxū i taguma gūxū. ¹⁰ Rü tanatūgū rü wūxi i paxaāchicèxmare tüxū taxucūxēgū na tūma tanaxwèxegūxūācūma imaxēxūcèx. Natürü ya Tupana rü aixcūma tórü mexūcèx nixī i tüxū iyanawēxāchixēēxū na naxrūū ixūūnegūxūcèx. ¹¹ Rü aixcūma tama tataāēgū i ngēxguma Tupana tüxū iyarüwēxāchixēēgu, erü tüxū nangux. Natürü ngēmawena i ngēxguma naga ixīnūēgu rü yanguxēēgu i ngēma tamaā nüxū yaxuxū, rü aixcūma tataāēgū.

Naxācūma na tama Tupanaga ixīnūēxū

¹² Rü ngēmacèx i ñuxma na ngūxū pingegūxū rü pipaexū na Tupanawe perūixū, rü name nixī i pegū peporaexēēāma na noxrirūūtama meā peyaxōgūxūcèx. ¹³ Rü name nixī i naxcèx pedaugū na Tupana pexū naxwèxexūācūma aixcūma meā pemaxēxū, na yixema ñuxma tama meā yaxōgūxe rü meā tayaxōgūxūcèx. ¹⁴ ¡Rü naxcèx pedēux na guxū i duūxūgūmaā pemecūmaxū! Rü ngēxgumarūū ta name nixī i naxcèx pedau na Tupanapēxewa naxūūnexū i perū maxū. Erü yixema tama Tupanapēxewa ūūnexē rü tāūtāma tórü Corixū tadau. ¹⁵ ¡Rü pegūna pedaugū na taxūema nüxū oxūcèx i ngēma ngūxēē i Tupana tüxū nangechaūācūma tüxna āxū! Erü tama tanaxwèxe na texé petanūwa Cristuchi aixū rü ngēmaācū togūxū chixexūmaā taxucūxēxū na Cristuna tixūgachixūcèx. ¹⁶ Rü tama name i texé i petanūwa rü naī i ngemaā na itapexū. Rü tama name na texé tūmaārū ngēmaxūcèx Tupanaxū na oxū. Rü yemaācū nanaxū ga guma nuxcūmaūcū ga Acobueneē ga Echaū. Yerü yexguma nataiyagu rü wūxi ga ònacèx nüxū naxo ga guxūma ga yema nüxna ūxū ga nanatū chi nüxna āxū. ¹⁷ Rü pema nüxū pecuèx rü yemawena ga yexguma nayauxchaūāgu ga yema noxri nüxna ūxū, rü marū taxucūrūwama nanayaxu, yerü marū naēneē ga rübumaēcūna tanaxā ga nanatū. Rü nūma ga Echaū rü woo poraācū naxaxu, natürü marū taxucūrūwama ñuxācū nanayaxu. Rü ngēmawa nüxū tacuèx na ñuxācū naxācūmaxū na tórü ngēmaxūcèx Tupanaxū ixoxū. ¹⁸⁻²¹ Rü nuxcūma ga tórü oxīgū ga Moīchéwe rüxīxū, rü nüxū naxīnūē ga Tupanaga ga yexguma nüxū yangaicagūgu ga guma mēxpūne ga Chinaīgu āegane. Rü nüxū nadaugū ga na yayauraxū ga guma mēxpūne rü poraācū naxēānexū rü poraācū buanecū ixūxū rü yabēixbēxanexū rü yaduranexū. Rü poraācū namuē ga yema duūxūgū, yerü nüxū naxīnūē ga wūxi ga corneta ga tagane rü Tupana ga tagaācū yēma ñacū:

“Ngēxguma chi wūxie i petanūwa daa mēxpūnewa ūxgu ¡rü noxtacūma nutamaā tüxū ípemuxūchiācūma tüxū pimá! Rü woo wūxi i pexūna yixīgu ¡rü ngēxgumarūū ta ípenamuxūchiācūma peyamá!”

ñanagürü. Rü yexguma yadeaxgu ga Tupana, rü poraācū namuē ga yema duūxūgū. Rü norū muūmaā Tupanaxū nacèxūgū na iyachaxāchixūcèx ga namaā na yadexaxū. Rü yema na poraācū

naxãũcũmaxũchixũ ga yema nüxũ nadaugũxũ, rü yemacèx nixĩ ga nümatama ga Moĩché ga ñaxũ:

“Chorũ muũmaã chidurux i ñuxmax”,

ñaxũ. Rü yemaãcü nixĩ ga namaã nangupetũxũ ga yema duũxũgũ ga Moĩchémaã nayauxgũxũ ga yema nüxĩraũxũ ga Tupanaãrũ mugũ. Natürũ i pemax, Pa Chaueneẽgũx, rü tama yemaãcü pexũ naxũpetũ ga yexguma penayauxgũgu ga Tupanaãrũ ore i ngexwacaxũxũ i Cristuchiga ixĩxũ. ²² Rü ñuxma i pema rü taxucèxma pemuũẽ, yerũ ga Cristu rü taxcèx nayu na Tupana ya guxũguma maxũcũxũtawa tũxũ

nagagũxũcèx, na guxũguma norũ iãne ya daxũgune ya Yerucharẽũgu ãeganewa ingẽxmagũxũcèx. Rü ngẽma tá tangutaquẽxegũ namaã i ngẽma muxũchixũma i norũ orearũ ngeruũgũ i daxũcũãx na wũxigu namaã Tupanaxũ icuèxũũgũxũcèx. ²³ Rü ñuxma i pemax, rü marũ natanũxũgũ pixĩgũ i guxũma i ngẽma togũ i duũxũgũ i Tupanaãrũ poperawa ngoxégagũxũ. Rü marũ naxcèx pexĩ ya Tupana ya yima guxãnatãma cacũ. Rü marũ natanũwaama pexũgũ i guxũma ga yema duũxũgũ ga mecũmagũxũ ga yexũ ga Tupana imexẽegũxũ. ²⁴ Rü marũ naxcèx pexĩ ya Ngechuchu ga taxcèx yucũ na tũxũ namaxẽxẽxũcèx, ngẽma

Tupanaãrũ uneta i ngexwacaxũxũ tamaã nüxũ ixuxũrũũ. Rü nagũmaã pexũ iyanaxoxẽẽ ga perũ chixexũgũ na aixcũma Tupanapẽxewa pimexũcèx. Rü yexguma nüxcũmaxũcü ga Abégũ inabaxẽẽ ga naeneẽ rü Tupana rü poxcu naxuegu. Natürũ yexguma Cristugũ ibaxgu rü Tupana rü duũxũgũmaã nanaxuegu i maxũ i taguma gũxũ. ²⁵ Rü ngẽmacèx name nixĩ i pexuãẽgũ na tama nüxũ pexoexũcèx ya yima

Tupana ya ñuxma tamaã idexacũ. Rü dücax yema nuxcũmaũgũxũ ga tórũ oxigũ ga Moĩchéwe rũxĩxũ rü taxucürũwa Tupanachaxwa nibuxmũ na tama napoxcueãxũcèx ga yexguma Tupanaxũ naxoegu rü tama naga naxĩnũẽgu ga yexguma Moĩchéwa Tupana yaxucuxẽgũgu. Rü yema na taxucürũwa Tupanachaxwa yabuxmũxũ ga nũmagũ, rü yexeraãcü tũxũ naguxcha i yixema na naxchaxwa ibuxmũxũ ega tama naga ixĩnũẽgu i ñuxma na Cristuwa tũxũ yaxucuxẽgũxũ i nũma ya Tupana i daxũgũxũ i naãnewa ngẽxmacũ. ²⁶ Rü yexguma Moĩchéwe naxĩxgu ga tórũ oxigũ, rü Tupana rü nagamaã nayaduruxanexẽẽ. Natürũ i ñuxma rü ñanagürũ:

“Wena táxarũ chayaduruxanexẽẽ. Natürũ ngẽxguma ngẽmaãcü

chanaxũxgu rü tãütãma ñoma i naãnexĩca chiduruxẽẽ, natürũ

ũèxcũ rü woramacurigũ rü ãtagũ rü tá ta chayaduruxgũxẽẽ”,

ñanagürũ. ²⁷ Rü yema na:

“Wena táxarũ chayaduruxanexẽẽ”, ñaxũ, rü ngẽmawa nüxũ tacuèx rü guxũma ga yema naxũxũ i tama guxũgucèx ixĩxũ, rü Tupana tá inayanaxoxẽẽ na ngẽma guxũgucèx ixĩxũxĩcatama na íyaxũgũxũcèx. ²⁸ Rü ngẽma na tórũ ãẽxgacũ na yĩxũ ya Tupana, rü guxũgucèx nixĩ, rü tagutãma inayarũxo na noxrũ ixĩgũxũ. Rü ngẽmacèx name nixĩ na Tupanana moxẽ ixãgũxũ, rü nüxũ ingechaũgũãcũma rü nüxũ imuũẽãcũma nüxũ icuèxũũgũxũ, ngẽma nũma nanaxwèxexũrũũ. ²⁹ Erũ tórũ Tupana, rü ñoma wũxi ya üxürũũ aixcũma inayanaxoxẽẽ i guxũma i tórũ chixexũ.

13

Ñuxãcü Tupanaxũ tataãẽxẽẽ

¹ Rü ñuxma rü tama name na nüxũ perũçhauexũ na wũxichigũ pegũ pengechaũgũxũ ñoma peeneẽxũ pengechaũxũrũũ. ² Tama name na nüxũ

ipeyarüngümaëxũ na meãma penayaxuxũ i ngẽma duũxũgũ i pepatawa ngugũxũ. Erũ nüxũ tacuèx rü nümaxũ ga yemaãcü naxũgũxũ rü ñuxguacũ rü tama nüxũ nacuaãcüma bexma Tupanaãrũ orearũ ngeruũgũ i daxũcũãxũ meã nayauxgũ. ³ Rũ name nixĩ i nüxna pecuèxãchie i ngẽma duũxũgũ i poxcuexũ, ñoma pema rü ta naxrũũ pepoxcuexũrũ. Rũ ngẽxgumarũũ ta name nixĩ nüxna pecuèxãchie i ngẽma duũxũgũ i togũ ngũxũ nüxũ ingexẽëgũxũ, erũ ngürũãchi tá ta ngẽmaãcü pexũ nangupetũ. ⁴ Rũ ngẽma yatũgũ i ãmaxũ rü name nixĩ i meã naxmẽxmaã namaxẽ rü tũxũ nangechaũgũ. Rũ ngẽxgumarũũ ta i ngexũgũ, rü name nixĩ i meã natemaã namaxẽ rü nüxũ nangechaũgũ. Erũ Tupana rü aixcüma tá nüxna naca rü tá nanapoxcue i ngẽma duũxũgũ i naĩ i ngemaã rü êxna naĩ ya yatũmaã ipexũ. Rũ ngẽxgumarũũ tá ta tũxũ napoxcue ya guxãma ya yixema ngemẽxãcüma rü ngeteãcüma tũgũmaã maxẽmarexe. ⁵ Rũ tama name na dïerugama perũĩnũëxũ. Rũ name nixĩ i namaã petaãëgũ i ngẽma marũ pexũ ngẽxmaxũ. Yerũ Tupana rü ñanagürũ:

“Tagutãma cuxna chixũ, rü tagutãma cuxũ íchatèx”, ñanagürũ. ⁶ Rũ ñuxma na nüxũ icuáxũ na ngẽmaãcü tamaã inaxãũxũ, rü ngẽmacèx tama taxãne na ñagũxũ:

“Nũma ya Cori nixĩ ya choxũ rüngũxẽëcü. Rũ ngẽmacèx taxucèxma chamuũ. Erũ taxucürũwama texé tacũ rü chixexũ chomaã taxũ”, ñagũxũ. ⁷ Rũ name nixĩ i nüxna pecuèxãchie ga yema perũ dau-rũgũ ga noxri pemaã icuáxũ rü pemaã nüxũ ixugũxũ ga Tupanaãrũ ore. Rũ name nixĩ i nagu perũĩnũë ga na ñuxãcü meã namaxẽxũ pepẽxewa rü ñuxãcü meã yaxõgũãcüma nayuexũ. Rũ name nixĩ ga nüma yaxõgũãxũrũũ meã peyaxõgũ i pemax. ⁸ Rũ nüma ya Ngechuchu ya Cristu rü guxũguma nayanguxẽë i ngẽma tamaã nüxũ yaxuxũ. Rũ nuxcüma rü nayanguxẽë ga norũ ore, rü ñuxma rü ta nayanguxẽë. Rũ guxũgutãma ngẽmaãcü nixĩ. Rũ ngẽmacèx tanaxwẽxe na aixcüma nüxũ yaxõgũxũ. ⁹ Rũ tama name i peyaxõgũ i ngẽma nguxẽëtaegũ i tama toma pexũ namaã tangũxẽëxũ i tama Tupanaãrũ ixĩgũxũ. Rũ nuxcüma rü nagu taxĩ ga yema mugũ ga Moíché umatũxũ ga tũxna nachuxuxũ na tacũ ixũxũ rü tacũ ingõxũ. Natürũ yema mugũ rü taguma tũxũ naporaexẽë ga na Tupanacèx imaxẽxũ. Rũ ngẽmacèx tanaxwẽxe na Tupana ya tũxũ ngechaũcüwa nayaxuxũ i tóru pora na aixcüma naxcèx imaxẽxũcèx. ¹⁰ Rũ ngẽma duũxũgũ i Moíchearũ mugũgu Ìxũ, rü Tupanacèx naxũna nadai na tama napoxcueãxũcèx naxcèx i norũ pecadu. Natürũ tama nüxũ nayaxõgũ ya Cristu ga tóru pecaducèx yucũ. Rũ ngẽmacèx taxucürũwama taxrũũ nanayauxgũ i ngẽma ngũxẽë i Cristu nüxna uaxũxũ. ¹¹ Rũ ngẽma duũxũgũarũ paigũarũ ãëxgacũ, rü tupaucawa nanange ya nagũ i naxũnagũ na Tupanana naxããxũcèx na tama Tupana napoxcuexũcèx i ngẽma duũxũgũ. Natürũ naxũnegũ i ngẽma naxũnagũ, rü ñãneãrũ Ìxpemawa nayanagugũ. ¹² Rũ yexgumarũũ ta ga Ngechuchu rü ñãneãrũ Ìxpemawa ngũxũ ninge rü nayu na nagũmaãtama Tupanacèx yaxũünegũxẽëãxũcèx i duũxũgũ. ¹³ Rũ ngẽmacèx i yixema, rü name nixĩ i nüxna tixĩgachi i ngẽma mugũ ga Moíché umatũxũ, rü name nixĩ i Ngechuchucèx taxĩ. Rũ woo duũxũgũ tũxũ cugũegu, yema Ngechuchuxũ na nacugũexũrũũ, rü name nixĩ i naxrũũ yaxna namaã taxĩnũë. ¹⁴ Erũ yixema na yaxõgũxũ, rü tãutãma ñoma i naãne i paxa tá gũxũwa tangẽxmagũecha. Erũ daxũguxũ i naãnewa tũxũ nangẽxma i tachica. Rũ ngema tá nixĩ i ingugũxũ na guxũgutãma Tu-

panamaã ingëxmagüechaxüçèx. ¹⁵ Rû ngëmacèx tanaxwèxe i Ngechuchu ya Cristuégagu guxüguma Tupanaxü ticuèxüügü. Rû ngëma na taèxmaã nüxü icuèxüügüxü, rû ngëma nixĩ i âmare i mexü i nüxna ixãxü. ¹⁶ ¡Rû tâxü i nüxü ipeyarüngümaèxü na togüxü perüngüxëèxü rû namaã pengauxü i perü ngëmaxügü! Erü ngëma nixĩ i âmare i Tupanana pexãxü i aixcüma namaã nataãèxü. ¹⁷ ¡Rû naga pexĩnüè i ngëma perü dauruügü i pemaã icuèxgüxü, rû penaxüx i ngëma pemaã nüxü yaxuxü! Erü nümagü rû Tupanapëxewa pexna nadaugü na meã pemaxëxüçèx erü nüxü nacuèxgü na Tupana tá nüxna çaxü i nachiga na ñuxãcü pexna nadaugüxü. Rû name nixĩ i meã namaã pemaxë i ngëma perü dauruügü na wüxi i taãè na yïixüçèx i ngëma norü puracü rû tama wüxi i norü guxchaxü na yïixüçèx. Erü ngëxguma chi wüxi i norü guxchaxü yixïgu i ngëma norü puracü na pexna nadauxü, rû pema rû chi taxuüma i mexü nawa peyaxu i ngëma norü puracü. ¹⁸ Rû name i toxcèx peyumüxëgü. Erü toðëwa nüxü tacuèx na aixcüma meã tayanguxëèxü i ngëma puracü i Tupana toxna äxü rû tanaxwèxe na guxüguma ngëmaãcü tanaxüxü. ¹⁹ Rû ngëma guxüârü yexera pexna naxcèx chaçaxü nixĩ na peyumüxëgüxü na Tupana paxa pexcèx choxü taeguxëèxüçèx.

Yema duüxügüxü narümoxë rû naxcèx ínaca na Tupana nüxü rüngüxëèxü

²⁰⁻²¹ Rû ñuxma chanaxwèxe i poraãcü pexü narüngüxëè ya Tupana ya tórü taãèxëèruü rû tórü ngüxmüxëèruü ixïcü. Rû nüma nixĩ ga yawa ínadxëèãxü ga tórü Cori ya Ngechuchu ya Cristu ya guxüma i yaxögüxüârü dauruü ya guxüârü yexera ixïcü. Rû ñuxma na curuchagu taxcèx nabaãxü ga guma nagü ga tüxü nüxü cuèxëècü na ñuxãcü guxüguma tüxü nangechaüxü ya Tupana, rû chanaxwèxe na nüma ya Tupana pexü yamexëègüxü rû pexü nangüxëèxü na aixcüma guxüma i perü maxüwa pimexüçèx. Rû ngëxgumarüü ta chanaxwèxe na Ngechuchu ya Cristuwa tüxü nangüxëèxüçèx ya Tupana na nüma nanaxwèxexüãcüma ixügüxüçèx. Rû ñuxma tanaxwèxe i guxüguma yima Cristuxü ticuèxüügü. Rû ngëmaãcü yï. ²² Pa Chaueneëgüx, pexü chacèèxü na yaxna namaã pexĩnüèxü i ñaã noxretama i ore i pexü namaã chataãèxëèxü rû pexü namaã chaxucüxëxü. ²³ Rû chanaxwèxe na nüxü pecuáxü rû taeneë ya Timutéu rû marü ínanguxuchi ga na napoxcuxü. Rû ngëxguma paxa nuã chauxütawa nanguxgu, rû tá ngëma petanüwa chanaga i ngëxguma pexü íchayadëuxgu. ²⁴ ¡Rû nüxü perümoxëgü i guxüma i ngëma perü dauruügü i pemaã icuáxü! ¡Rû ngëxgumarüü ta nüxü perümoxëgü i guxüma i togü i taeneëgü i yaxögüxü! Rû taeneëgü i Itáriaanewa ngëxmagüxü rû ta pexü narümoxëgü. ²⁵ ¡Rû Tupana poraãcü pexü rüngüxëèx i guxãma i pemax! Rû ngëmaãcü yï.

Rû nuãma pexna.

TUPANAARŪ ORE GA CHAŪTIÁGU ÜMATÜXŪ

Chaŭtiágu nüxŭ narümoxë ga natanüxüğü ga Yudíugü ga yaxöğüxŭ

¹ Pa Chautanüxüğü i Yudíugü i Ngechuchuaxŭ Yaxöğüxŭ i Guxŭ i Naãnewa Ngëxmagüxŭx, choma i Chaŭtiágu pexŭ charümoxë. Rŭ choma nixŭ i Tanatŭ ya Tupana rŭ tórŭ Cori ya Ngechuchu ya Cristuaxŭ chapuracüxŭ.

Ngëma cuèx i aixcüma Tupanawa ne üxŭchiga

² Pa Chaueneëgü i Yaxöğüxŭx, name nixŭ na petaãëgüxŭ i ngëxguma nagüxŭraüxŭ i guxchaxüğü pexcèx ínguxgu. ³ Erŭ pema nüxŭ pecuèx rŭ ngëxguma meã peyaxöğüamagu ega woo ñacü rŭ guxchaxŭ pexŭ üpetügu rŭ wüxi i mexŭ i nixŭ i ngëma. Erŭ ngëmaãcü meã nüxŭ peyaxöğüxŭcèx. ⁴ Rŭ name nixŭ na peporaexŭ na aixcüma Tupanapëxewa pimexŭcèx, rŭ naxcèxicatama pemaxëxŭcèx, rŭ taxuwama nachixexŭcèx i perü maxŭ. ⁵ Ngëxguma chi wüxie i petanüwa tama meã nüxŭ cuèxgu na ñacü tüxŭ nanaxwèxexŭ ya Tupana, rŭ name nixŭ i nüxna naxcèx taca i cuèx, rŭ nüma tá guxŭma i norü ngüchaŭmaã tüxna nanaxã. Erŭ Tupana meãma guxŭ i duŭxŭgüna nanaxã i cuèx, rŭ tama nayanuxŭ, rŭ taxüxŭma nanga. ⁶ Natürŭ ngëxguma naxcèx ítacaxgu rŭ tanaxwèxe na aixcüma tayaxöxŭ rŭ tá na tanayaxuxŭ i ngëma naxcèx ítacaxŭ. Rŭ tama name na nagu tarüxŭnŭxŭ rŭ tãütãma tanayaxuxŭ. Erŭ yíxema tama meã yaxöxë, rŭ ñoma taxtŭarŭ yuape i buanecümaã guxŭwama cuexŭrŭü tixŭ i tümaärŭ maxŭwa. ⁷⁻⁸ Rŭ yíxema duŭxë ya ñuxma meã yaxöxë rŭ moxŭ rŭ tama meã yaxöxë, rŭ taxucŭrŭwama nagu tarüxŭnŭ na ñacü Tupanaxŭtawa tayaxuxŭ. Erŭ yíxema duŭxë ya ngëmaãcü yaxöxë, rŭ tümaärŭ maxŭwa rŭ tama aixcüma wüxigutama tarüxŭnŭ. ⁹ Rŭ yíxema yaxöxë ya tama muärŭ dŭeruãxë, rŭ name nixŭ i tataãë erŭ Tupanaxãcü tixŭ rŭ tümamaã nataãë. ¹⁰ Rŭ yíxema yaxöxë ya muärŭ dŭeruãxë rŭ name nixŭ i tataãëãma ega woo wüxi i ngunexŭ tüxŭ natauxgu i tümaärŭ dŭeru. Erŭ ngëma dŭeruãxŭ i duŭxŭgü, rŭ ñoma putŭrachacurŭŭ tama natai. ¹¹ Rŭ ngëxguma nangunagügu ya üexcŭ rŭ poraãcü nanguxetügu, rŭ narüñexë i ngëma putŭra rŭ narüngu i nachacu, rŭ ngëxma nagux na namexŭ. Rŭ ngëxgumarŭŭ tá ta nayu i ngëma dŭeruãxŭchixŭ rŭ ngëxma tá nayarüxo i norü guxŭma.

Tupana tüxŭ naxŭ, natürŭ tama chixexŭgu tüxŭ nanguxëxŭcèx

¹² Rŭ nataãë ya yima yatŭ ya meãma yaxöðmacü i ngëxguma Tupana nüxŭ üxgu. Erŭ ngëxguma ngëmaãcü yaxna namaã naxŭnŭãmagu, rŭ Tupana tá namaã nataãë rŭ tá nüxna nanaxã i norü ãmare i mexŭ i taguma güxŭ. Rŭ ngëma nixŭ i ãmare i Tupana tümamaã ixunetaxŭ ya yíxema nüxŭ ngechaŭgüxe. ¹³ Natürŭ ngëxguma texe ñnŭ i chixexŭ tümacèx ínguxgu na chixexŭ taxŭxŭcèx rŭ tama name i nagu narüxŭnŭ na Tupana tümaãëwa ínanguxëxŭ i ngëma ñnŭ i chixexŭ. Erŭ ya Tupana rŭ taguma naãëwa nangu na chixexŭ naxŭxŭ, rŭ ngëxgumarŭxŭ ta taguma chixexŭ i ñnŭ texeãëwa nanguxëë na chixexŭ taxŭxŭcèx. ¹⁴ Natürŭ ngëma chixexŭ i tümatama nagu tarüxŭnŭxŭ nixŭ i chixexŭgu tüxŭ nguxëxŭ. ¹⁵ Rŭ ngëma chixexŭ i tümatama nagu tarüxŭnŭxŭ nixŭ i tüxŭ pecaduãxëxŭ. Rŭ ngëma pecadugagu tá nixŭ i düxwa itayarŭtaxuxŭ. ¹⁶ Pa Chaueneëgü ya

Pexü Changechaüğüxex, tama name i pegütama pewomüxëëgü. ¹⁷ Erü guxüma i ngëma aixcüma mexü i tüxü ngëxmaxü, rü naxütawa ne naxü ya Tupana ya daxügucü ga naxücü ga üexcü rü tauemacü rü woramacurigü rü éxtagü. Rü nüma rü guxüguma nanaxëixrügumaraxü rü taguma naxüchicüü. ¹⁸ Rü nüma nixi ga tüxna naxããxü ga norü ore i aixcüma ixixü na ngëmaäcü tüxü nangëxmaxüçèx i maxü i taguma gúxü. Rü yemaäcü nanaxü yerü nanaxwëxe na yixira nüxü na yaxögüxü, rü yixcama i togü.

Nüxäcü aixcüma Tupanaãxü tayaxö

¹⁹ Pa Chaueneëgü ya Pexü Changechaüğüxex, rü ngëxguma texé pemaã nüxü ixuxgu i Tupanaärü ore, rü name nixi i meã iperüxñnüë. Rü tama name i tüxü pechoxüggü. ²⁰ Erü ngëxguma nanuxgu i wüxi i duüxü, rü tama Tupanaärü ngüchaü naxü. ²¹ Rü ngëmacèx name nixi i nüxü perüxoe i guxüma i ngëma chixexügü i guxüwama ngëxmagüxü. ¡Rü meã penayaxu i ngëma ore i Tupana pexna äxü! Erü ngëmawa pexü nangëxma i maxü i taguma gúxü. ²² Rü tama name i iperüxñnüëmare i ngëma ore, natürü name nixi i penaxü i ngëma pemaã nüxü yaxuxü. Erü ngëxguma iperüxñnüëmaregu rü tama penaxüxgu, rü pegütama pewomüxëëgümare. ²³ Erü yixema irüxñnümarexe i Tupanaärü ore natürü tama naxüxe i ngëma nüxü yaxuxü, rü wüxi i yatü i daucüwa nügü dauchametüxürüü tixi. ²⁴ Erü nügü nadauchametü, natürü ngëxguma yaxügachigu rü marü nüxü inayarüngüma na nañuxchametüraüxü i noxrix. ²⁵ Natürü yixema guxüguma meã nüxü daumatüxe rü naga ñnüxë i ngëma ore i aixcüma ixixü i pecaduwa tüxü ñnguxuchixëëxü, rü Tupana rü tá aixcüma guxüwama tüxü narüngüxëë. Erü tama ngëma orexü taxñnümare, natürü tanaxü i ngëma tümamaã nüxü yaxuxü. ²⁶ Rü ngëxguma chi wüxie nagu rüxñnügu na meãma Tupanaxü tacuáxü natürü tama nüxna tadëuxgu ya tümaärü conü i tümaärü orewa, rü tügütama tawomüxëë, rü tama aixcüma Tupanaãxü tayaxö. ²⁷ Natürü ngëma nacüma i Tanatü ya Tupanapëxewa aixcüma üünexü, rü ngëma nixi na nüxü tarüngüxëëxü i tacutagü rü yutegüxü rü tügüna tadauxü na tama ñoma i naãneärü chixexügu taxücuxü.

2

Name nixi i guxü i duüxügüxü tangechaü

¹ Pa Chaueneëgüx, pema rü nüxü peyaxögü ya törü Cori ya Ngechuchu ya Cristu ya mexëchicü. Rü ngëmacèx tama name na chixriäcü penayaxuxü i ñuxre i duüxügü rü meã penayaxuxü i togü. ² Rü ngëxguma chi perü ngutaquëxegu naxücuxgu i wüxi i yatü i uirumaã aneraãxü rü mexchiruxü, rü ngëxgumarüü chi ta ngëxma naxücuxgu i wüxi i yatü i ngearü dñëruãxü rü wëxachiruxü, rü name nixi i guxüxüma wüxigu meã peyaxu. ³ Natürü tama name ega meã penayauxgu i ngëma mexchiruxü rü:

“¡Nuã mexü i naxmëxwëxewa rüto!” ñapegüxü nüxü, natürü ngëma wëxachiruxüxü rü:

“¡Cuma rü ngëxmatama nachi, rü éxna yea ñatüanewa rüto!” ñapegüxü nüxü. ⁴ Rü ngëxguma tama wüxigu meã penayauxgu i ngëma taxre, rü pewatama nangox na tama aixcüma guxãxü pengechaügüxü rü chixexü i duüxügü pixigüxü ega ngëmaäcü chixri penayauxgu i duüxügü. ⁵ Pa Chaueneëgü ya Pexü Changechaüğüxex, ¡iperüxñnüë i ñãã ore! Tupana

tüxü nade ya yíxema ngearü díëruãxgüxe i ñoma i naãnewa na meã nüxü tayaxögüxcèx. Erü nanaxwèxe i tanayauxgü i ngëma maxü i taguma güxü i tümamaã inaxunetaxü ya yíxema nüxü ngechaüügüxe. ⁶ Natürü pema rü chixri penayaxu i ngëma duüxügü i ngearü díëruãxgüxü rü meã penayaxu i ngëma duüxügü i díëruãxgüxü. ¿Taux éxna ngëma díëruãxgüxü yíixü i ngëma chixri pemaã maxëxü rü äëxgacügüxütawa pexü íyaxuaxügüxü? ⁷ Rü ngëma díëruãxgüxü nixí i chixexü namaã ixügüexü ya Cristu ya perü Cori ya mexëchicü. ⁸ Tupanaärü orewa nangëxma i norü mu i guxü i mugüarü yexeraxü i ñaxü:

“¡Nüxü nangechaü i cumücü ngëma na cugütama cungechaüxürüü!”

ñaxü. Rü ngëxguma aixcüma naga pexínüëgu i ngëma mu, rü mexü nixí i pexüxü. ⁹ Natürü ngëxguma meã penayauxgu i wüxi i yatü i mexchiruxü rü chixri penayauxgu i ngëma wexachiruxü, rü pecadu pexü. Rü Tupanapëxewa pechixexügu erü tama naga pexínüë i ngëma pexü namuxü. ¹⁰ Erü ngëxguma chi texé naga ñnügu i guxüma i Tupanaärü mugü natürü chi wüxiwatama ítatüxgu na tama naga taxínüxü, rü chi ñoma guxüma i Tupanaärü mugüga tama taxínüxürüü tachixexügu. ¹¹ Erü nümatama ya Tupana ga ñacü:

“¡Tãütáma naí i nge i ätecümaã cungeãë!” ñacü, rü ñanagürü ta:

“¡Tãütáma cumáëta!”

ñanagürü. Rü ngëxguma chi tama naí i nge i ätecümaã cungeãëxgu, natürü cumáëtagu, rü tama aixcüma meã naga cuxínü i ngëma Tupana tüxü muxü. ¹² Rü ngëmacèx name nixí na meã pidexagüxü rü meã pemaxëxü. Erü Tupana tá pexna naca i perü maxüchiga ngoxi Cristu pexü muxüãcüma pemaxë rü éxna tama. Rü ngëma Cristu tüxü muxü nixí na yigü ingechaüügüxü. ¹³ Erü guxäma ya yíxema tama tümamücügü tüxü ngechaütümüügüxe, rü Tupana rü täütáma nüxü tangechaütümüügüãcüma tüxna naca i tümäärü maxüchiga. Natürü yíxema tümamücügü tüxü ngechaütümüügüxe, rü täütáma tamuüë i ngëxguma Tupana tüxna caxgu, erü nüxü tangechaütümüügüãcüma tá tüxna naca.

Ega aixcüma yaxögügu, rü tanaxwèxe i mexü taxügü rü nüxü tarüngüxëë i togü

¹⁴ Pa Chaueneëgüx, ¿Tacüwa namexü ega wüxie:

“Choma rü Tupanaãxü chayaxõ”, ñagügu, natürü tama mexü taxüxgu? ¿Pexcèx rü Tupana tá tüxü maxëëxü ega ngëmaãcü tayaxõxgux? ¹⁵⁻¹⁶ Rü ngëxguma chi wüxi i taeneë rü éxna taeyèx i yaxõxü rü nangexchirugu rü nangewemügu, rü chi wüxie i pema rü ñapegügu:

“¡Mexü cuxü üpetü, rü icüxcuchi na tama cuxü nadeyuxüxcèx, rü meã nachibü!” ñapegügu, rü ¿tacüwa name i ngëma ega tama nüxna penaxãxgu i ngëma nüxü taxuxü? ¹⁷ Rü ngëxguma yaxõmaregu natürü tama mexü ixüxgu, rü tama togüxü rüngüxëëgu, rü ¿tacüwa namexü i ngëmaãcü na yaxõxü? ¹⁸ Erü ngëxguma cuyaxõmaregu natürü tama mexü cuxüxgu, rü ngürüãchi tá wüxie ñatarügü cuxü:

“Cuma rü cuyaxõmare natürü taxuxüma i mexü cuxü Natürü choma rü chayõ rü naétü mexü chaxü. ¿Rü ñuxãcü tá nüxü chacuáxü na cuyaxõxü ega tama mexü cuxüxgu? Natürü choma rü chorü ü i mexümaã tá cuxü chanawë na aixcüma chayaxõxü”, ñatarügü tá cuxü. ¹⁹ Cuma cuyaxõ na nangëxmaxü ya wüxitama ya Tupana. Marü name. Natürü ngoxogü rü

ta ngēmaācū nayaxōgū, rü poraācū niduxruxe erü Tupanaxū namuñē.
²⁰ Pa Yatü ya tama Meā Nagu Rūxīnūcūx, cuma rü tama nüxū cucuèx i
 ngēxguma cuyaxōmaregu rü tama mexū cuxūxgu, rü taxuwama name i
 ngēmaācū na cuyaxōxū. ²¹ Tupana nüxū ixuxgu rü nuxcūmañcū ga tōrū
 oxi ga Abráū rü wūxi ga yatü ga mecū nixī. Yerü mexū naxū rü Tupanaga
 naxīnū ga yexguma namaā nüxū yaxuxgu na naxcèx yamáāxūcèx ga
 nane ga Ichaá. ²² Rü ngēmawa nüxū tacuèx rü tama nayaxōmare ga
 Abráū, natürü mexū naxū ta. Rü yema naxūxūwa tüxū nüxū nacuèxēē
 na aixcūma Tupanaāxū yaxōōxū. ²³ Rü yemaācū ningu ga yema ore ga
 ūmatūxū ga ñaxū:

“Abráū rü Tupanaāxū nayaxō rü yemacèx Tupana nüxū nixu na mecū
 yīxū yerü nüxū nayaxō. Rü nüxū nixu ta na namūcū yīxū ga
 Abráū”.

²⁴ Rü ngēmawa nüxū tadau na Tupana namaā taāèxū ya yima yatü ya
 mexū ūcū rü tama yaxōmarecū. ²⁵ Rü yemaācū ta ngīmaā nangupetü ga
 nuxcūma ga Raá. Rü Tupana ngīmaā nataāē yerü mexū ixū ga yexguma
 meā nayauxāgu ga ngīpatawa ga yema orearü ngeruūgū ga Yudūigū. Rü
 ngīgagu namaxē ga yema orearü ngeruūgū yerü to ga namagu iyamugū
 ga yexguma norū uwanūgū nadaixchaūgu. Rü woo ga ngīma rü chixri na
 namaxūxū ga noxrix, natürü mexū ixū yerü iyaxō, rü yemacèx Tupana
 ngīmaā nataāē. ²⁶ Rü wūxi i naxūne rü taxuwama name rü nayumare
 ega natauxguma i naāē. Rü ngēxgumarūū ta nixī na taxuwama namexū
 na yaxōmarexū ega taxuūma i mexū ixūxgux.

3

Tórū conūchiga

¹ Pa Chaueneēgūx, tama name i muxēma i pema rü nguxēētaexūgū
 pegū pixīgūxēēchaū. Erü pema nüxū pecuèx na yixema i nguxēētaexūgū
 na ixīgūxū, rü guxū i duūxūgūarū yexera tá tüxna naca ya Tupana tórū
 maxūchiga rü tórū puracūchiga. ² Guxāma i yixema rü muēxpūxcūna
 chixexū taxūe. Yima yatü ya taguma chixexūxū ixucū rü aixcūma mecū
 nixī, erü nüxū nacuèx na ñuxācū guxūwama nūgūna nadauxū na tama
 chixexū naxūxūcèx. ³ Rü ngēma na taga naxīnūxūcèx i wūxi i cowaru, rü
 tanaxwèxe na naxūtūxūnāguxū na ngēmaācū yixema inaxwèxexūācūma
 meā iyaxūxūcèx. ⁴ ¡Dūcèx nagu perūxīnūē ya wapurugū ya buanecūarū
 poramaā ixūxūne! Rü woo nitaxūchi rü buanecū ya taxūchicūmaā in-
 icuegū, natürü íracū ya quiyamaā nanatoxchinū i norū toxpèxerūū, rü
 ngextá nūma ínanaxwèxexūwa nanaxūxēē. ⁵⁻⁶ Rü ngēxgumarūū ta nixī
 ya tórū conū rü woo na naxírachiréxū, natürü namuxūchi i norū ore.
 Rü wūxitama i ūxūarū yauraxū i íraxūwa inaxūgū na yaxaxū i taxūma i
 naāne. Rü tórū conū rü ñoma wūxi ya ūxūrūū nixī. Rü taxūnewa rü wūxi
 i taxū i chixexū nixī ya yima tórū conū erü nanachixexēē i guxūma i
 tórū maxū. Rü ngēma Tupana ngoxogūxū ípoxcuexūgune ya ūxūemawa
 ne naxū i ngēma chixexū i namaā yadexaxū ya tórū conū. Rü ngēma
 chixexūmaā nanachixexēē i guxūma i tórū maxū. ⁷ Duūxūgū rü nüxū
 nacuèx na íyapuxēēāxū rü nüxna nachogūxū i nagūxūraūxū i naēxūgū i
 idūraexū, rü werigū, rü āxtapegū, rü choxnigū. ⁸ Natürü taxūema nüxū
 tacuèx na nüxna tachogūxū ya tūmaārū conū. Erü wūxi i chixexū i taxū
 i taxucūrūwama texé iyarūxoxēēxū nixī. Rü ngēma norū dexa rü ūūrūū
 tüxū nayuxēē. ⁹ Rü yima tórū conūmaā nüxū ticuèxūū ya Tanatū ya

Tupana, rü yimamaãtama chixexũ namaã tixugüe ta i duũxũgü i Tupana nügüãcü üxũ. ¹⁰ Rü ngëma taëxmaã, rü meã duũxũgüchiga tidexagü, natürü ngëmatama taëxmaã rü namaã taguxchigagü ta. Pa Chaueneëgüx, tama name na ngëmaãcü yĩxũ. ¹¹ Wüxi i dexáarü chuxchuxüwatama rü taxuacüma ínaxũxü i dexá i mexũ rü dexá i chixexũ. ¹² Pa Chaueneëgüx, wüxi i iguera rü taxuacüma oríbuarü omaã naxo, rü wüxi i uba rü taxuacüma igueraarü omaã naxo. Rü ngëxgumarüũ ta wüxi i dexáarü chuxchuxü i yucürachiüxüwa, rü taxuacüma ínaxũxü i dexá i mexũ.

Ngëma cuèx i aixcüma ixĩxũ

¹³ Ngëxguma chi petanüwa nangëxmagu i wüxi i duũxũ i nüxũ cuáxũ rü meã naãëxũ cuáxũ, rü name nixĩ na meã namaxũxũ rü mexũ na naxũxũ rü tama nügü yacuëxüüxũ na ngëmaãcü pexũ nüxũ nadauxëëxüçëx na aixcüma wüxi i duũxũ i nüxũ cuáxũ yĩxũ. ¹⁴ Natürü ngëxguma chi pixãũxãchiwëxegügu rü togüchi pexaiegu rü norü yexera pegü pixĩxëëchaũgu, rü taxuacüma pegügu perüxĩnũë na mexügu rü nüxũ cuëxgüxũ pixĩgüxũ. Rü wüxi i dora i taxũ nixĩ i ngëma ega ngëmaãcü pixĩgügu. ¹⁵ Erü ngëma na ixãũxãchiwëxegüxũ rü duũxũgüchi na ixaiexũ rü norü yexera yigü na ixĩgüxëëchaũxũ, rü tama Tupanawa ne naxũ, natürü ñoma i naãneçũãxwa rü ngoxo i Chatanáwa nixĩ i ne naxũxũ. ¹⁶ Erü ngextá ãũxãchi ítaxüwa rü duũxũgü nügü írüyexeraxëëchaũxüwa, rü ngema rü taxuüma meã inixü rü nagúxũraũxũ i chixexũ nangëxma. ¹⁷ Natürü guxãma ya yíxema aixcüma tüxũ nangëxmaxë i ngëma cuèx i Tupanawa ne üxũ, rü aixcüma meã tamaxë rü guxãmaã tameçümagü, rü meã duũxëxũ tayauxgü i tümapatawa, rü meã itarüxĩnũë i tümamüçüarü ucuxë, rü guxũ i duũxũgü tüxũ nangechaütümüügü, rü guxãmaãma tügü tawüxiguxëëgü, rü tixaixçümagü, rü mexũ taxügu. ¹⁸ Rü yíxema naxçëx daugüxe na duũxũgü nügümaã írüngüxmüëxũ, rü wüxi i mexũ taxügu. Erü ngëmawa tá nüxũ tadaugü na aixcüma meã Tupanacëx namaxëxũ i ngëma duũxũgü.

4

Duũxũgü i ñoma i naãneärü ngüchaũcëx daugüxũchiga

¹ ¿Tüxcüũ pegümaã penuë rü pegü pedai? Pegümaã penuë erü pexũ nangëxma i ngëma perü ngüchaũgü i chixexũgü. ² Pema pexũ nangüchaũ i ngëma pexũ taxuxũ natürü taxuacüma pexũ nanguxũ, rü ngëmacëx peyamëx i togü. Rü norü ngëmaxüçëx pixãũxãchie natürü taxuacüma pexũ nanguxüëga, rü ngëmacëx pegümaã penuë, rü pegü pedai. Rü tama penayauxgü i ngëma penaxwëxexũ erü tama Tupanana naxçëx peca. ³ Rü ngëxguma naxçëx ípecaxgu, rü tama penayaxu, erü naxçëx ípeca i ngëma tama Tupana pexũ naxwëxexũ. Rü ngëma pematama penaxwëxexũ nixĩ i naxçëx ípeçaxũ na namaã pegütama petaãëxëëmarexüçëx. ⁴ Pa Duũxũgü i Chixri Maxëxũx, ¿Tama êxna nüxũ pecuëx rü ngëxguma ñoma i naãnexũ pengechaũgu rü Tupanamaã perüxuwaxũxũ? Erü texé ya ñoma i naãnexũ ngechaũxë rü Tupanamaã tarüxuwaxũ. ⁵ Rü tama natüçëxma nixĩ i ngëma Tupanaärü ore i ñaxũ:

“Ngëma Naãë i Üünexũ i Tupana tüxna muxũ rü tüxũ ninuxũ erü noxrü tixĩ rü tüxũ nangechaũ”,

ñaxũ. ⁶ Natürü Tupana rü tüxũ narüngũxëe na namaã iporaexúcex i guxũma i ñoma i naãneärü ngúchaũ i chixexũ. Rü ngëmacèx norü orewa rü ñanagürü:

“Tupana rü tümamaã nanu ya yíxema tügü icuèxũxũgũxe, natürü tüxũ narüngũxëe ya yíxema tama tügü icuèxũxũgũxe”,

ñanagürü. ⁷ Pa Chaueneëgũx, ¡Meã Tupanaga pexĩnũe! ¡Rü nüxũ pexoó i ngoxo i Chataná! Rü nüma rü tá pexna niña. ⁸ ¡Tupanana pengaicamagũ! Rü nüma rü tá ta pexna nangaicama. Rü pemax, Pa Pecaduãxgũxũx, ¡nüxũ perüxoe i pecũma i chixexũ! Rü pemax, i Tupanawe rüxĩxchaũxë natürü ñoma i naãnewe rü ta rüxĩxchaũxë, ¡penamexëẽx i perü maxũ na Tupanacèxicatama pemaxëxúcex! ⁹ ¡Pegũmaã pengechaũgũ rü pexauxe erü pipecaduãx! Rü texé ya ñoma i naãneärü taãewa cugũxe, rü name nixĩ i tügũmaã taxauxe. Rü texé ya tümacũma i chixexũmaã taãxexë, rü name nixĩ i Tupanapëxewa tügũmaã tangechaũ. ¹⁰ Rü name nixĩ i Cori ya Tupanapëxegu pecaxãpũxũgũ rü namaã nüxũ pixu na taxuwama pimexũ. Rü ngëxguma i nüma rü tá pexũ nicuèxũü rü pexũ nataxëe.

Tama name i chixexũgu cueneẽmaã curũxĩnũ

¹¹ Pa Chaueneëgũx, ¡Tãxũ i chixexũmaã pegü pixugũxũ! Erü yíxema chixexũmaã tümãeneẽchigagu idexáxe rü éxna chixexũmaã nüxũ dawenũxë, rü chixe nüxũ tawogũ ta i Tupanaärü ore. Rü ngëxguma chixexũgu Tupanaärü oremaã curũxĩnũgu, rü Tupanaärü orearü yexera cugũ quixĩxëẽchaũ erü tama aixcũma naga cuxĩnũ. ¹² Tupanaxĩcatama nixĩ ya tüxna naxãcü i norü mugũ rü ñũxũchi tá tüxna çacü rü ngoxi naga ixĩnũe i ngëma norü ore. Rü nümatama nixĩ i nüxũ nangëxmaxũ i pora na tüxũ namaxëxëẽxũ rü éxna tüxũ nayuexëẽxũ. ¿Natürü texé quĩxũ i cumax rü ngëmacèx cunangugũxũ na ñuxãcü namaxũxũ i cumücü?

Taxúema nüxũ tacuèx na çacü tá tüxũ ngupetũxũ i moxũärü ngunexũgu

¹³ ¡Choxũ iperũxĩnũe i pema na ñapegũgũxũ:

“Ñũxma rü éxna moxũ tá náí ya ñãnewa taxĩ, rü wũxi ya taunecü tá ngëxma tayayaxu, rü tá ngema tataxegü na mucü i dñeru ngĩxũ iyaxuxúcèx”, ñaperũgũgũ! ¹⁴ Pema rü tama nüxũ pecuèx na çacü tá pexũ üpetũxũ i moxũ. ¿Çacü nixĩ i perü maxũ? Perü maxũ rü ñoma wũxi i cherena i paxaãchi nüxũ idauxũ rü ngëxgumatama ngupetũxũrũü tá inayarũxo. ¹⁵ Rü narümemaẽ nixĩ na ñapegũxũ:

“Ngëxguma chi nanaxwëxegu ya Cori ya Tupana na imaxëxũ, rü chi tanaxũ i ñãã puracü i nagu rüxĩnũxũ”, ñapegũxũ. ¹⁶ Natürü i pema rü pegü picuèxũügũchaũ. Rü guxũma i ngëma rü tama name. ¹⁷ Yíxema nüxũ cuáxe na ñuxãcü Tupanapëxewa meã tamaxũxũ, natürü tama naxũxe, rü pecadu taxũ.

5

Ucuxë i dñeruãxgũxũcèx

¹ Pa Duũxũgũ i Dñeruãxgũxũx, ¡Iperũxĩnũe i ñãã ore! ¡Pexauxe rü aita pexüe erü chixexũ tá pexũ naxüpetü! ² Perü ngëmaxũgũ rü marü nangaue, rü ngëma pexchiru i mexëchixũ rü nawe nanangõmü. ³ Perü uiru rü perü dñeru rü ngëxma naxãũtanü rü ngëxma nangaue. Rü ngëma norü ãũtanü rü wũxi i perü cuèxruũ tá nixĩ na pema rü tá ta ipeyarũtauxexũ ñoma çacü üxũwa ixaxũrũü. Tupana ngĩxũ nadau i perü dñeru i ngĩmaã penguũxcü, rü ngëmacèx tá pexũ napoxcu i naãneärü guxgu. ⁴ Rü yema

perü puracütanüxü ga tama meã nüxü penaxütanüxü, rü ñuxma rü ngíxcèx nidexagü ga yema diëru ga tama nüxna ngíxü pexácü. Rü Tupana ya guxäärü Cori rü ngëma duüxügüxü naxínü na ngíxcèx yadexagüxü ga yema diëru ga nüxü ngíxü pengetanücü ga peanewa na napuracüexüxcèx. ⁵ Rü ñoma i naãnewa rü pegü pengèxãëgü rü pemepata rü pemuärü ngëmaxüãxgü rü petaãëgü rü meã pechibüe. Natürü nawa tá nangu na ngëmacèx Tupana tá pexü poxcuexü. ⁶ Rü pema penapoxcue rü penadai i ngëma duüxügü i taxuüma i chixexü pemaã üchiréxü. Rü nümagü rü pexü narüturamaëgü, rü taxuacüma nügü ínapoxügü.

Tanaxwëxe i tayumüxë rü meã ítananguxëë ya Cori ya Tupana

⁷ Rü ñuxma Pa Chaueneëgüx, rü name nixí i meã ípenanguxëë ñuxmatata ínangu ya Cori ya Tupana. Rü dücax, yíxema naãnewa puracüxe rü meã ítananguxëë ya pucü na naxügüxüxcèx i tümanetü. Rü ñuxüchi ñuxre ya tauemacü ítananguxëë na nayaxü i tümanetüarü o, rü ngëxguma rü tá tayabuxgü. ⁸ Rü pema rü ta penaxwëxe na meã ípenanguxëëxü na ínanguxü ya Cori ya Tupana. ¡Rü petaãëgü, rü tãxü i nüxü perüchauexü na ípenanguxëëxü! Erü marü ningaica na ínanguxü ya tórü Cori. ⁹ Pa Chaueneëgüx, name nixí i nüxü perüxoe na pegüchigaxü pixuechaü na tama ngëmacèx pexna naçaxüxcèx ya Tupana. Erü marü ningaica na ínanguxü na duüxügüxü yacagüxüxcèx i norü maxüchiga. ¹⁰ Pa Chaueneëgüx, name nixí i nüxna pecuëxãchie ga yema nuxcümaügüxü ga Tupanaärü orearü uruügü ga na ñuxácü yaxna namaã naxínüëxü ga yexguma ngúxü yangegügu. Rü name nixí i pema rü ta ngëxgumarüü yaxna namaã pexínüëãma rü Tupanacèx pemaxëãma ega ngúxü pingegügu. ¹¹ Rü yixema nüxü tacuèx na nataãëgüxü ga yema duüxügü ga meã Tupanacèx maxëãmaxü ga yexguma ngúxü nüxü üpetügu. Rü pema nüxü pecuèx ga ñuxácü meã namaxama ga guma Yox ga yexguma ngúxü nüxü üpetügu. Rü nüxü pecuèx ga yixcama ga na ñuxácü tórü Cori ya Tupana poraãcü nüxü rüngüxëëxü. Erü nüma ya tórü Cori ya Tupana rü namecümamaxüchi rü poraãcü nüxü tangechaütümüügü. ¹² Rü guxüärü yexera, Pa Chaueneëgüx, rü ngëxguma tacüxcèx ipexunetagu, rü tama name i Tupanaegagu ipexuneta, rü ëxna ñoma i naãnegagu ipexuneta, rü ëxna tacü i to i naegagu ipexuneta. Natürü ngëxguma aixcüma yixígu i wüxi i ore ¡rü noxtacüma: “Ngü” ñapegü! Rü ngëxguma tama aixcüma yixígu i wüxi i ore ¡rü noxtacüma: “Tama” ñapegü! Rü ngëxguma ya Tupana rü tãütãma pexü napoxcue naxcèx i ngëma perü uneta. ¹³ Rü ngëxguma wüxie i petanüwa naxíxãchiãëgu, rü name nixí na tayumüxëxü. Rü ngëxguma wüxie taãëgu, rü name nixí na tawiyaxü rü Tupanaxü ticuëxüüxü. ¹⁴ Rü ngëxguma wüxie i petanüwa ídaawexgu, rü name nixí i naxcèx peyaca i yaxögüxüärü äëxgacügü na tümacèx nayumüxëgüxüxcèx rü Cori ya Tupanaegagu chixümaã tüxü yangögügüxüxcèx. ¹⁵ Rü ngëxguma aixcüma Tupanaãxü yaxögüãcüma nayumüxëgügu, rü tá tümacèx nitaane, rü nüma ya Cori ya Tupana tá tüxü ínarüdaxëë nawa i tümaärü daawe. Rü ngëxguma chi tacü rü pecadu taxüxgu, rü Tupana tá tüxü nüxü nangechaü. ¹⁶ Rü ngëmacèx name nixí i pegümaã nüxü pixu i perü pecadugü rü pegüxcèx peyumüxëgü i wüxiechigü na pexcèx yataanegüxüxcèx. Rü yima mecü ya yatüarü yumüxë rü aixcüma napora erü Tupana nanangãxü. ¹⁷ Tupanaärü orearü uruü ga Ería nixí ga wüxi ga yatü ga taxrüü ixcü. Natürü

yexguma nūma guxŭ ga norŭ ngúchaŭmaã nayumŭxēgu na tama napuxŭcèx, rŭ tomaēxpŭx ga taunecŭarŭ ngāxŭgu rŭ tama napu ga yema naãnewa. ¹⁸ Natŭrŭ yemawena rŭ wenaxārŭ nayumŭxē ga Eria rŭ pucŭcèx ínaca. Rŭ wenaxārŭ napu. Rŭ narŭxŭ ga guxŭma ga nanetŭgŭ. ¹⁹ Pa Chaueneēgŭx, ngēxguma chi texé petanŭwa Tupanana ixŭgachigu, rŭ tangēxmagu ya wŭxie ya tŭxŭ taeguxēxē na wenaxārŭ Tupanawe tarŭxŭxŭcèx, rŭ mexŭ taxŭ. ²⁰ Erŭ ngēxguma texé Tupanacèx nataeguxēēgu i wŭxi i duŭxŭ nŭxna i norŭ chixexŭ, rŭ tŭmagagu Tupana tá nanamaxēē i ngēma duŭxŭ, rŭ tá nŭxŭ nŭxŭ nangechaŭ i norŭ pecadugŭ.

Rŭ nuãma pexna,
Chaŭtiágu

NÜXĨRAÜXÜ GA POPERA GA PEDRU ÜMATÜXÜ

Pedru nüxü narümoxë ga yema yaxõgüxü ga to ga nachiuãnegu woonexü

¹ Pa Chaueneëgüx, choma i Pedru nixi i pexcëx chanaxümatüxü i ñaã popera. Rü choma nixi i Ngechuchu ya Cristu choxü muxü na duüxügümaã nüxü chixuxüçëx i norü ore. Rü pexcëx chanaxümatü i pema na perü naãnena to i nachiuãnegügu penawoonexü i Põtuanewa rü Gárataanewa rü Capadochíaanewa rü Áchiaanewa rü Bitíniãanewa ngëxmagüxe. ² Rü pexü nixi ga nadexü ga Tanatü ya Tupana, yerü woetama yema nixi ga nuxcümáxüchima nagu naxĩnüxü. Rü nanamu ga Naãe i Üünexü na pexü yamexëëgüxüçëx na aixcüma napëxewa pixüünegüxüçëx rü Ngechuchu ya Cristuga na pexĩnüexüçëx rü nagümaã na piyaxgüxüçëx na nataxuxüçëx i perü chixexügü. Rü chanaxwëxe i Tanatü ya Tupana poraãcü pexü narüngüxëë rü pexü nataãëxëë.

Ítananguxëë na wena tá imaxëxü

³ Rü ngĩxã nüxü ticuëxüügü ya Tupana ya tórü Cori ya Ngechuchu ya Cristu Nanatü! Yerü yexguma Ngechuchu ya Cristuxü wena namaxëëgu, rü tũxna nanaxã ga maxü ga yexwacaxüxü, yerü poraãcü nüxü tangechaütümüügü. Rü ngëmacëx i ñuxma i yixema rü ta ítananguxëë na wena tá imaxëxü. ⁴ Rü pema rü wüxi i ngunexügu rü aixcüma tá penayauxgü i guxüma i ngëma mexügü i Tupana tá pexna ãxü i ñuxma daxügüxü i naãnegu pexü namaã nanguxüxü. Rü ngëma tá pexna naxãxü rü tagutáma inayarüxo, rü tagutáma naxãüãchi, rü tagutáma nangau. ⁵ Rü ñuxma na Tupanaãxü peyaxõgüxü rü nüma rü norü poramaã tá pexna nadau ñuxmatáta aixcüma penayauxgü i ngëma maxü i taguma gúxü i tá pexna naxãxü i ngëxguma naguxgu i naãne. ⁶ Rü ngëmacëx name nixi i poraãcü petaãëgü, rü nüëtama nixi ega woo ñuxma ñaã perü maxüwa rü paxaxãchi muxüma i guxchaxügü pexü üpetügu. ⁷ Erü ngëmaãcü nixi i pexü naxüxü ya Tupana na nüxü nacuáxüçëx rü ngoxi aixcüma peyaxõgü rü éxna tama. Rü ngëxguma peyaxõgüamagu ega woo guxchaxügü pexcëx ínguxgu, rü ngëma perü õ rü wüxi i uiruarü yexera nixi na namexü erü ngëma uiru rü woo namexëchi natürü düxwa nangau. Rü ngëma uiru rü üxümaã nüxü taxü na nüxü icuáxüçëx rü ngoxi aixcüma uiruxüchi yĩxü. Rü ngëxgumarüü ta nixi i perü õ na guxchaxügümaã Tupana nüxü üxü na nüxü nacuáxüçëx rü ngoxi aixcüma nüxü peyaxõgü na yixcama pexü yacuëxüxüçëx rü mexü i pechica pexna naxãxüçëx rü pemaã nataãëxüçëx i ngëxguma wena núma naxüxgu ya Ngechuchu ya Cristu. ⁸⁻⁹ Pema rü Ngechuchu ya Cristuxü pengechaügü woo taguma nüxü na pedaugüxü. Rü ñuxma rü ta woo tama nüxü pedaugü, natürü nüxü peyaxõgü, rü poraãcü petaãëgü. Rü ngëma perü taãëmaã rü taxuacüma nüxü pixuéga na ñuxãcü petaãëgüxüchixü, erü marü penayauxgü i perü maxü i taguma gúxü. Rü ngëmacëx nixi i nüxü peyaxõgüxü. ¹⁰ Rü nuxcümáxüchima ga Tupanaãrü orearü uruügü, rü nüxü nixugüe ga na ñuxãcü tá Tupana pexü narüngüxëëxü. Rü nümagü rü poraãcü nangüe rü naxcëx nadaugü i ngëma maxü i taguma gúxü. ¹¹ Rü nümagü ga yema orearü uruügü rü Tupanaãrü poperawa nangüe na nüxü

nacuèxgùxùcèx na ñuxácü tá na yíixü rü ñuxguacü tá na nangóxü ga guma Maxèxèèruü ga Cristu. Rü Cristuãe i Üünexü ga yema orearü uruügüwa yexmaxü, rü nüxü nüxü nacuèxèè ga na Cristu rü tá ngúxü yangexü rü tá nayuxü rü yixcama rü wena tá na namaxüxü rü ñuxüchi daxügüxü i naãnewa tá na naxüxü na guxüãrü àëxgacü yíixücèx. ¹² Natürü Tupana rü yema nuxcúmaügüxü ga orearü uruügüxü nüxü nacuèxèè na tãütáma nümagü nüxü nadaugüxü ga guma Maxèxèèruü ga naxcèx nadaugücü, natürü pema tá yíixü na nüxü pedaugüxü. Rü dücax, Pa Chaueneëgüx, gumatama Maxèxèèruüchiga nixí ga perü orearü uruügü pemaã nüxü ixugügüxü ga yexguma Tupanaãe i Üünexü ga daxüwa ne muxü yadexagüxèëgu. Rü guxüma i ngëma ore i yima Maxèxèèruüchiga, rü woo Tupanaãrü orearü ngeruügü i daxücüãx rü nüxü nangüchaügü na yexeraãcü nüxü nacuèxgüxü.

Tupana rü taxcèx naca na napëxewa naxüünexücèx i tórü maxü

¹³ Rü ñuxma na Cristuarü duüxügü pixígüxü, rü penaxwèxe na pexuãëgüxü rü ípememarexü na penaxüxü i norü ngúchaü. Rü name nixí i aixcüma meã ípenanguxèè i guxüma i ngëma mexügü i Tupana tá pexna áxü i ngëxguma Ngechuchu ya Cristu núma üxgu. ¹⁴ Rü ñuxma na Tupanaxácügü pixígüxü, rü penaxwèxe na aixcüma naga pexínüèxü. Rü tama name i nagu pexí ga yema nuxcúmaüxü ga perü ngúchaü ga üpa nagu pexíxü ga yexguma tauta Tupanaxü pecuèxgu. ¹⁵ Natürü penaxwèxe i aixcüma meã pemaxë na Tupanapëxewa naxüünexücèx i perü maxü. Erü núma ya Tupana ya pexü decü, rü naxüüne. ¹⁶ Rü norü ore i ümatüxüwa rü ñanagürü:

“Chanaxwèxe i chauxrüü pixüüne, erü choma rü chaxüüne”, ñanagürü. ¹⁷ Rü pema na “Pa Tonatüx” ñapegüxü nüxü ya Tupana, rü ñuxma na ñoma i naãnewa pemaxèxü rü name nixí i guxüguma nüxü pemuüë. Erü núma rü aixcümaxüchi nanangugü i wüxichigü i duüxügüarü maxü na ñuxácü yíixü. Rü tüxü napoxcu ya guxãma ya texé ya chixexü ügüxe, rü nüëtama nixí ega woo texé tixígu, erü napëxewa rü nawüxigumare i guxüma i duüxügü. ¹⁸⁻¹⁹ Rü Tupana rü marü pexü ínanguxüxèè nawa ga yema nuxcúmaüxü ga perü maxü ga taxuwama mexü ga perü oxígüxütawa peyaxuxü. Rü yema na nawa pexü ínanguxüxèèxü rü pexna naxãaxücèx i maxü i ngexwacaxüxü, rü poraãcü nüxü naxãtanü. Yerü tama uiru rü éxna díeru i ngauxwèxexümaã nanaxütanü, natürü Cristugü ya mexëchicúmaã nixí ga naxütanüãxü. Yerü núma ga Cristu rü ñoma wüxi i carneru i taxuwama nañuxraüxü i Tupanacèx imáxürüü pexcèx nayu na pexü naxütanüxücèx. ²⁰ Rü núma ga Tupana rü woetama nuxcümaxüchima tauta naãne ixügügu, rü marü Cristuxü naxuneta na pexcèx nayuxücèx. Natürü ñomaücüü nixí ga nangóxü ga guma Cristu na pexü nangüxèèxücèx. ²¹ Rü ñuxma rü Cristugagu nixí i nüxü peyaxögüxü ya Tupana ga yuwa Cristuxü írüdaxèècü rü daxüwa nagacü. Rü ngëmacèx nixí i ñuxma i Tupanaãxü peyaxögüxü rü ípenanguxèègüxü na daxüwa pexü nagagüxücèx. ²² Rü ñuxma na naga pexínüèxü i Tupanaãrü ore i aixcüma íxíxü rü pexü natauxcha na pegü pengechaügüxü erü Tupana rü marü pexü inayanaxoxèè i perü chixexügü. Rü ngëmacèx penaxwèxe i aixcüma guxü i perü ngúchaümaã pegü pengechaügü. ²³ Rü ñuxma i pema rü marü penayauxgü i ngexwacaxüxü i perü maxü. Rü ngëmacèx ñoma ngexwacèx pebuxüürüü pixígü.

Natürü ngēma maxũ rü tama penatũ rü pee ya yuewèxéxewa nixĩ i penayaxuxũ. Natürü Tupanaãrũ ore i maxũxũ i taguma iyarũxoxũwa nixĩ i penayaxuxũ. ²⁴ Erũ Tupanaãrũ ore i ümatũxũwa rü ñanagürũ:

“Guxũma i duũxũgũ rü ñoma wüxi i natüanerũümare nixĩ. Rũ guxũma i norũ mexũ, rü wüxi i nanetüchacurũümare nixĩ. Rũ ngēma natüane rü nayu, rü nachacu rü narũngu. Rũ ngēxgumarũü ta nixĩ i duũxũgũ na tama nataixũ i norũ maxũ i ñoma i naãnewa. ²⁵ Natürü tórũ Coriarũ ore rü taguma inayarũxo”,

ñanagürũ i Tupanaãrũ orewa. Rũ ngēma Tupanaãrũ ore i mexũ nixĩ ga pemaã nüxũ yaxugũxũ.

2

¹ Rũ ngēmacèx name nixĩ i nüxũ perũxoe i guxũma i chixexũgũ, rü ngēma na pidoratèexgũxũ, rü ngēma na togüpèxewa meã na pemaxēnetaxũ rü ngēma na pixãüxãchiwèxegũxũ, rü ngēma na pexoregütèèxgũxũ. ²⁻³ Rũ ngēxguma chi aixcũma nüxũ picuèxãchitanũgu na ñuxãcü namecũmaxũchixũ ya tórũ Cori, rü ñoma wüxi i õxchana i ngexwacèx buxũ i naëgünenixũ nüxũ ngúchaũxürũü penaxwèxe i poraãcü pexũ nangúchaũ i norũ ore na ngēmawa peporaexũcèx rü meã peyaexũcèx i perũ õwa na ngēmaãcü guxũwama namexũcèx i perũ maxũ i taguma gũxũ.

Cristu nixĩ ya nuta ya maxũcü

⁴ Rũ ñuxma rü name nixĩ i tórũ Corina pengaicamagũ. Erũ nüma ya tórũ Cori nixĩ ya yima nuta ya maxũcü ya Tupana nayaxucü na namaã inaxũgũãxũcèx ya napata. Rũ woo duũxũgũ nüxũ oexũ, natürü yima nixĩ ya Tupana nayaxucü erũ naxcèx rü namexèchi. ⁵ Rũ ngēxgumarũü ta i pemax, rü Tupana pexũ nade na napataarũ nutagũ ya maxècü pixĩgũxũcèx. Rũ pema nixĩ i Tupanaãrũ ngũxèèruũgũ i üünexũ i Ngechuchu ya Cristuégagu Tupanana ãmare pexãgũxũ. Rũ ngēma ãmare i nüxna pexãgũxũ i namaã nataãxũ rü ngema nixĩ i perũ maxũ i mexũ i napèxewa. ⁶ Rũ Tupana rü norũ ore i ümatũxũwa rü Cristuchigaxũ nixu rü ñanagürũ:

“Ñuxma na ichanaxũgũxũ ya chopata, rü yima nuta ya nüxĩra chayaxũcuchicü, rü yima nixĩ ya nuta ya mexèchicü ya chomatama chanayaxucü na chopata namaã ichaxũgũxũcèx. Rũ yima nuta rü chaunechiga nixĩ. Rũ yixema nüxũ yaxõxè, rü aixcũma tá tanayaxu i ngēma maxũ i taguma gũxũ i tümamaã ichaxunetaxũ”,

ñanagürũ. ⁷ Rũ pema na nüxũ peyaxõgũxũ, rü Cristu rü pexcèx rü guxũwama name rü naporaxũchi. Natürü ngēma tama yaxõgũxũcèx, rü taxuwama name. Rũ ngēmacèx ya Tupana rü norũ ore i ümatũxũwa rü ñanagürũ:

“Yima nuta ya ñpataarũ üruũgũ nüxũ ocü, rü chauxcèx rü gucü ya nutaarũ yexera namexèchi. Rũ ngēmacèx yimaetüwa nixĩ ichanaxũgũxũ ya chopata”,

ñanagürũ. ⁸ Rũ Tupanaãrũ ore rü ñanagürũ ta:

“Guxũma i ngēma tama yaxõgũxũ rü tama irũxĩnüèchaũxũ rü yima nutagu tá nayarũpucutũgũ”,

ñanagürũ. Rũ ngēmaãcü i guxũma i ngēma tama yaxõgũxũ rü tá chixexũgu nayi erũ tama Tupanaga naxĩnüèchaũ rü tama Cristuaxũ nayaxõgũchaũ. Rũ ngēmacèx Tupana tá nanapoxcue yema nüma nüxũ yaxuxürũü.

⁹ Natürü pema nixí i duũxügü i tórü ãëxgacü ya Tupana pexü dexü na norü ngüxëeruügü pixíğüxücëx. Rü pema nixí i duũxügü i napëxewa ixüünexü erü nümata ya Tupana rü norü duũxügüxü pexü nixíğüxëë na nüxü pixuxücëx i norü ore i aixcüma mexëchixü. Rü nümata ya Tupana nixí ga chixëwä pexü ínanguxüxëëxü na norü ngóonexü i mexëchixügu pechocuxücëx. ¹⁰ Rü üpa ga pema rü tama Tupanaärü duũxügü pixíğü, natürü i ñuxma rü aixcüma norü duũxügü pixíğü. Rü üpa rü taxúeaxüma pengechaütümüügü, natürü i ñuxma rü Tupanaãxü pengechaütümüügü.

Ñuxma na Tupanaärü duũxügü pixíğüxü, rü name nixí i meã naxcëx pemaxë

¹¹ Pa Chaueneëgü ya Pexü Changechaügüxex, rü ñuxma na Tupanaärü duũxügü pixíğüxü, rü tama ñoma i naãnecüãx pixíğü. Rü ngëmacëx pexü chacëëxü na nüxü perüxoexücëx i guxüma i ngëma ngúchaügü i chixexü i ñoma i naãnecüãx nagu íxü. Erü ngëma ngúchaügü i chixexü rü taãëxü chixexügu nanguxëëchaü. ¹² Rü name nixí i meã pemaxë napëxewa i ngëma duũxügü i tama Tupanaxü cuëxgüxü. Rü ngëxguma woo poraãcü chixri pechiga yadexagügu i nümagü, rü tá nüxü nadaugü na ñuxãcü mexü pexüğüxü, rü tá Tupanaxü nicuëxüügü i ngëxguma Cristu wena núma üxgu. ¹³ Rü name nixí na tórü Cori ya Ngechuchugagu tümaga pexĩnüëxü ya guxãma ya yíxema perü ãëxgacügu ixíğüxe. Rü ngëmaãcü name nixí i meã naga pexĩnüë ya ãëxgacü ya tacü ya Dumawa ngëxmacü, erü núma nixí i guxü i togü i ãëxgacüguëtüwa nangëxmaxü. ¹⁴ Rü ngëxgumarü ta name nixí i naga pexĩnüë i ngëma togü i ãëxgacügu i petanüwa namugüxü ya yima ãëxgacü ya tacü na napoxcúeãxücëx i ngëma chixexü ügüxü rü namaã nataãëgüxücëx i ngëma mexü ügüxü. ¹⁵ Erü Tupana nanaxwëxe na mexü pexüğüxü na ngëmaãcü ipëyanangeëxgüxëëxücëx i ngëma duũxügü i tama Tupanaärü orexü cuáxchaügüxü rü chixri ngëma orchiga idexagüxü. ¹⁶ Rü ñuxma na Cristu pexü ínguxüxëëxü, rü name nixí i duũxügü i aixcüma ínguxüxürüãcü meã pemaxë. Natürü ñuxma na ípenguxüxü rü tama name na ngëmamaã pegü ípëpoxüxü na tacü rü chixexü pexüğüxücëx. Erü ñuxma na Tupanaärü duũxügü pixíğüxü, rü name nixí i norü ngúchaüxícata pexügu. ¹⁷ Rü name nixí i meã penayauxgü i guxüma i duũxügü. ¡Rü nüxü pengechaü i taeneëgü i yaxôgüxü! ¡Rü nüxü pemuëë ya Tupana! ¡Rü naga pexĩnüë ya ãëxgacü ya tacü ya Dumacüãx!

Tanaxwëxe i Cristurüü yaxna namaã taxĩnüë i ngëxguma ngüxü ingëgügu

¹⁸ Pa Duũxügü i Coriãxgüxüx, ¡rü nüxü pengechaügü rü naga pexĩnüë i perü corigü! Rü tama name i ngëma perü corigü i pemaã mecümaxüxícata pengechaügü, natürü name nixí i nüxü pengechaügü ta i ngëma perü corigü i chixecümaxü. ¹⁹ Erü Tupana rü pemaã nataãë ega nüxü na pengechaügüxücëx yaxna namaã pexĩnüëgu i ngëxguma texé natücëxmamare chixexü pemaã üxgu rü ngüxü pexü tingexëëgu. ²⁰ Natürü ¿tacüwa pexü namexü ega yaxna namaã pexĩnüëgu i ngëxguma wüxi i perü chixexücëx pepoxcúegu? Natürü ngëxguma tacü rü mexü i pexüügügu ngüxü pingëgügu rü yaxna namaã pexĩnüëgu, rü ngëma waxi nixí i Tupanapëxewa mexü. ²¹ Rü ngëma na mexü pexüügügu ngüxü pingëgüxücëx nixí i Tupana pexü dexü. Yerü ga Cristu rü ta pexcëx ngüxü ninge. Rü yemaãcü pexü nüxü nadauxëë

na ñuxácü nüma nanaxwèxexü na naxrüü yaxna namaã pexĩnüëxü i ngêma ngúxü. ²² Nüma ga Cristu rü taguma pecadu naxü, rü taguma texéxü nawomüxêê. ²³ Rü yexguma duüxügü chixexü namaã ixugüegu, rü nüma rü taxuüma ga chixexümaã nanangãxü. Rü yexguma ngúxü nüxü yangexêêgügu, rü nüma rü tama tacü rü chixexümaã nanaxãüxüne. Natürü Tupanamaã nüxü nixu na nüma namaã namexêêãxücèx ga yema duüxügü ga chixri namaã chopetüxü. Yerü nüxü nacuèx rü Tupana rü aixcüma meã nanangugü i guxüma i duüxügüarü maxü. ²⁴ Rü nümatama ga Cristu rü nügüxünegu nayange ga tórü pecadugü ga yexguma curuchagu nayuxgu. Rü yemaãcü nanaxü na nüxü rüxoexücèx i tórü chixexü na naxcèxicatama imaxêxücèx. Nüma rü pexcèx nanapix na yemaãcü pexü nameêxêêxücèx. ²⁵ Rü pema ga üpa rü ñoma carnerugü i nu ne naxĩmarexürüü pixĩgü. Natürü i ñuxma rü marü Cristucèx pewoegu. Rü nüma nixĩ i perü dauruü yĩxü, rü nüma nixĩ i pexna nadauxü.

3

Ñuxácü Tupana nanaxwèxe na namaxêxü i ngêma ixãmaxü rü ixãtexü

¹⁻² Rü pemax, Pa Ngexügüx, rü name nixĩ i petega pexĩnüë na ngêma pete i tama yaxõxü nüxü dauxücèx i perü maxü i mexü i Tupanapêxewa rü duüxügüpêxewa rü ngêmacèx na yaxõõxücèx woo taxuüma i Tupanaärü orexü namaã pixugu. ³ Rü ngêma na aixcüma pimexücèx, rü tama name i nagu perüxĩnüë na ñuxácü pegü pemexêêyaexüchixü, rü êxna uirunaxcèx i ngêxãeruümaã pengêxãêgüxü, rü êxna tatanüxüchixü i naxchirugu na picuxgüxü. ⁴ Natürü name nixĩ i perü maxüwa pegü pimexêêgü rü guxüma i duüxügümaã pimecümagü rü taguma texémaã penuaêgü, erü ngêma nixĩ i perü mexü i taguma iyarüxoxü i aixcüma mexü i Tupanapêxewa. ⁵ Rü yemaãcü norü maxü i mexümaã nixĩ ga nügü yangêxãêgüxü ga yema nuxcümaügüxü ga ngexügü ga Tupanapêxewa ixüünexü. Rü nümagü rü Tupanaãxü nayaxõgü rü natega naxĩnüë. ⁶ Rü yemaãcü ta iyixĩ ga Chara ga ngĩte ga Abrãüga na naxĩnüxü, rü ngĩrü corimaã naxuaxü. Rü pemagü rü tá ta ngĩrüü pixĩgü ega mexü pexügügu. Rü ñuxüchi taxucèxtãma tüxcüü petecèx pemuüê. ⁷ Rü ngêxgumarüü ta i pemax, Pa Yatügüx, rü name nixĩ i meã pemèxü pengechaügü rü aixcüma yaxna ngĩmaã pexĩnüë, erü ngĩma rü irüturamaê. Rü name nixĩ i ngĩmaã petaãêgü erü Tupana rü pexna naxããxürüü ngĩxna nanaxã i ngêma maxü i taguma gúxü. Rü name nixĩ i ngêmaãcü meã ngĩmaã pemaxê na Tupana nüxü ñnüxücèx i perü yumüxêgü.

Yixema mexü ügüxe ya ngúxü ingegüxechiga

⁸ Rü ngêmaãcü chanaxwèxe i guxãma i pema rü pegüxü pengechaütümüügü rü wüxigu perüxĩnüë, rü aixcüma nüxü pengechaügü i guxüma i taeneêgü i yaxõgüxü. Rü chanaxwèxe i aixcüma pimecümagü rü guxãmaã pegü pewüxiguxêê. ⁹ Rü ngêxguma texé chixexü pemaã üxgu, rü tama name i pema rü ta chixexü tümamaã pexü. Rü ngêxguma texé pemaã guxchigagu, rü tama name i pema rü ta tümamaã peguxchiga. Natürü narümemaê nixĩ i mexü i oremaã tüxü pengãxüga rü tüxü perüngüxêê, erü Tupana pexü nadei na pexü nangüxêêxücèx. ¹⁰ Erü Tupanaärü ore i ümatüxüwa rü ñanagürü:

“Ngêxguma texé taãêcüma maxchaügu, rü name nixĩ i nüxna tadau ya tümäärü conü na tama chixexü i oremaã yadeaxücèx. Rü

ngëxgumarüü ta name nixĩ i nüxna tadau i tümaãx na tama doraxü yaxuxüçex. ¹¹ Rü name nixĩ i nüxna tayaxü i guxüma i chixexügü, rü mexü taxü. Rü ngëxgumarüü ta name nixĩ i guxüguma naxçex tadau na togümaã tataãexü. ¹² Erü törü Cori rü tüxna nadau ya yixema aixcüma imexê, rü nüxü naxĩnü i tümaãrü yumüxê. Natürü tümamaã nanu ya yixema chixexü ügüxe”, ñanagürü i ngëma Tupanaãrü ore. ¹³ ¿Rü texé tá chixexü pemaã üxü ega pema rü aixcüma guxüguma mexü pexügügu? ¹⁴ Natürü ngëxguma chi ngëma mexü na pexügüxüçex ngüxü pingegügu, rü name nixĩ i petaãegü. ¿Rü taxucëxma texéxü pemuüê, rü taxucëxma ÷acüçex pexoegaãegü! ¹⁵ Rü name nixĩ i perü Corixü peyaxixêê ya Cristu rü aixcüma naga pexĩnüê, rü guxüguma ípememare na meã penangãxüxüçex i guxüma i duüxügü i pexna çaxü na tüxcüü Cristuaxü peyaxögüxü. ¹⁶ Natürü name nixĩ i nüxü pengechaüãcüma penangãxü rü tama pegügu perüxĩnüêãcüma na norü yexera pixigüxü. Rü name nixĩ i meã pemaxê na taxucëxma pexoegaãexüçex. Rü ngëxguma ngëmaãcü pemaxêgu rü tá naxãneê i ngëma duüxügü i chixri pechiga idexagüxü na ñuxãcü Cristucëx pemaxêxü. ¹⁷ Yixema rü ngüxü tingegü ega chixexü ixügügu. Natürü narümemã nixĩ na mexü ixügüxüçex ngüxü na ingegüxü, ega ngëmaãcü Tupana naxwëxegu. ¹⁸ Yerü nümatama ga Cristu rü ngüxü ninge, rü wüxicanatama guxããrü pecaducëx nayu. Rü woo na mecü yixü rü taxçex nayu i yixema i chixexü i duüxügü ixigüxü. Rü yemaãcü nanaxü na Tupanaxütawa tüxü nagagüxüçex. Rü woo nayu ga naxüne, natürü ga naãê rü tama nayu. ¹⁹ Rü yexguma naxüne yuxgu rü naãê rü natanüwa naxü ga yema naãegü ga Tupana poxcuexü, rü orexü namaã nayarüxu. ²⁰ Rü yema naãegü ga yexma poxcuexü, rü yema nixĩ ga naãegü ga yema duüxügü ga Noë maxügu tama ixĩnüêchaüxü woo Tupana yaxna namaã naxĩnü ga yexguma Noë naxüyane ga guma wapuru. Rü 8 ga duüxügüxicatama nixĩ ga guma wapurugu ichoüxü, rü yema nixĩ ga guma mucü ga taxüchicüarü dexáétüwa maxêxü. ²¹ Rü yema dexá rü wüxi ga cuèxruü nixĩ. Erü ngëxguma dexáwa íbaiegu, rü duüxügüxü nüxü tacuèxêê na Ngechuchu ya Cristu wena maxüxügagu yixü i tüxü nangëxmaxü i maxü i taguma gúxü. Rü tama taxüneãrü düxétüwa na imexüçex nixĩ i íbaieüxü, natürü ítabaie yerü marü Tupanana naxçex taca na tüxü iyanaxoxêêãxüçex ga törü pecadugü na aixcüma napëxewa imexüçex rü aixcüma mexügu rüxĩnüexüçex. ²² Rü nüma ga Ngechuchu ya Cristu, rü daxügüxü i naãnewa naxü, rü ñuxma rü Tupanaãrü tügü necüwawa nangëxma. Rü ñuxma rü namëxwa nangëxmagü i guxüma i Tupanaãrü orearü ngerüügü i daxüçüãx rü guxüma i ãëxgacügü i daxüçüãx.

4

Tanaxwëxe i ngëma cuèx i Tupana tüxna ãxümaã nüxü tarüngüxêê i taeneëgü

¹⁻² Rü ngëmacëx name nixĩ na ípememarexü na ngüxü pingegüxü yexgumarüü ga Cristu na ngüxü yangexü. Erü yixema ngüxü ingexe rü marü nüxü tarüxo i tümaãrü pecadu na guxüguma meã Tupana naxwëxexüãcüma tamaxüxüçex, rü tama i tümaxüne naxwëxexüãcüma na tamaxüxüçex. ³ Üpa ga pemax, rü mucüma ga taunecü penaxüecha i ngëma chixexü i ñuxma i ngëma duüxügü i tama Tupanaxü cuèxgüxü

ügüxü. Rü yexguma ga pema rü pecadu pexügüäcüma pemaxê, rü penaxü ga pexeneärü ngúchaü, rü pengâxê, rü peta ga nawa pexâügatanüxü pexügü, rü tacü i nguchiëxgüxü poraäcü pixaxcugü, rü tupanane-tachicünëxâgüxü picuëxüügü i woo Tupana na pexna nachuxuxü i ngêma. ⁴ Rü yema duüxügü ga namaâ pexâmücügüxü ga yexguma chixri pemaxêgu, rü ñuxma rü poraäcü nagu narüxîñüë na tacücèx tama natanügu pexâgüxü rü tama nawe perüxîxü i ngëxguma norü chixexü naxügügu. Rü ngêmacèx nixî i ñuxma i chixri pechiga yadexagüxü. ⁵ Natürü nümagü rü tá ta Cristupêxewa nangugü na namaâ nüxü yaxugüxüçèx na ñuxäcü namaxêxü. Rü nüma ya Cristu rü ínamemare na nüxna yacachigüxüçèx i guxüma i duüxügü i maxêxü rü yuexü. ⁶ Rü ngêmacèx ya Tupana rü naxüpa na nayuexü i duüxügü rü marü nüxna nanaxuaxü i maxü i taguma gúxü. Erü nanaxwèxe na naxrüü guxüguma mexüwa namaxêëchaxü ega woo ñoma i naânëwa nayuegu i naxüñegü. ⁷ Rü marü ningaica na nagúxü i ñoma i naâne rü guxüma i tacü i nawa ngêxmaxü. Rü ngêmacèx name nixî na ípexuäëxü rü meâ peäë ta ipexügüxü rü guxüguma peyumüxêgüxü. ⁸ Rü guxüärü yexera i ngêma pexü chanaxwèxexü nixî na aixcüma pegü pengechaügüxü i wüxichigü. Erü ngëxguma aixcüma yigü ingechaügügu rü ngêmaäcü inayarüxo i muxüma i pecadugü. ⁹ ¡Rü meâ pegü peyauxgü i wüxichigü i pechiüwa! Rü tama name i tümamaâ penuäëäcüma tüxü peyaxu. ¹⁰ Rü wüxichigü i pemax, rü Tupana pexna nanaxâ i perü cuèx. Rü ngêma perü cuèxmaâ rü name nixî i wüxichigü pegü perüngüxêëgü, na aixcüma Tupanaärü ngüxêëruü i mexü na pixîgüxüçèx rü meâ namaâ pepuracüexüçèx i guxüma i ngêma cuèx i Tupana pexna äxü. ¹¹ Rü ngëxguma texé nüxü ixuxgu i ore, rü name nixî i aixcüma Tupanaärü orexü tixu. Rü ngëxguma texé togüxü rüngüxêëgu, rü name nixî i Tupana tüxna äxü i poramaâ tanaxü. Rü guxüma i ngêma pexüxü rü name nixî i meâma penaxü na ngêmaäcü Ngechuchu ya Cristugagu Tupanaxü picuëxüügüxüçèx. Erü nüma ya Tupana rü guxüguma namexêchi rü naporaxüchi. Rü ngêmaäcü yîi.

Ngëxguma Cristuaxü yaxôxgu rü ngúxü tinge

¹² Pa Chaueneëgü ya Pexü Changechaügüxex, ñuxma na taxü i guxchaxügü i perü nguxêëruü pexcèx ínguxü, ¡rü tâxü i pebaixâchiäëgüxü, ñoma tacü i taguma nüxü pedauxü ngupetüxürüü! ¹³ Natürü narümemaë nixî na petaäëgüamaxü, yerü yema Cristu ngúxü na ingexürüü nixî i ngúxü na pingegüxü i ñuxmax na petaäëgüxüçèx i ngëxguma wena núma naxüxgu i nümax. ¹⁴ Rü ngëxguma Cristuaxü na peyaxôgüxügagu texé pemaâ guxchigagu, rü wüxi i perü taäë nixî i ngêma. Erü ngêmaäcü nüxü pecuèx na Tupanaäë i Üünexü rü pewa na nangêxmaxü. ¹⁵ Rü ngëxguma chi ngúxü pingegügu, rü name nixî na wüxi i mexü na pexügüxügagu na yîixü rü tama wüxi i chixexügagu na yîixü, ngëxgumarüü i máëta rü êxna ngítèex rü êxna togüarü guxchaxüwa na pegü pengëxmagüxêëxü. ¹⁶ Natürü ngëxguma texé Cristuaxü tayaxôxügagu ngúxü tingexgu, rü taxucèxma tüxcüü ngêmacèx taxâne. Rü name i ngêmacèx Tupanaxü ticuëxüü. ¹⁷ Rü ñuxma rü marü nawa nangu na Tupana ngúxü tüxü ingexêëxü na ngêmaäcü tüxü iyanawêxâchixêëxüçèx i yixema na naxâcügü ixîgüxü. Rü ngëxguma ngêmaäcü tamaâ inaxügüägu, rü çñuxäcü tá nüxü

naxüpetü i ngëma duüxügü i tama Tupanaärü ore i mexüga ñnüëchaüxü?
 18 Erü Tupanaärü ore i ümatüxüwa rü ñnanagürü:

“Ngëma duüxügü i mexü ügüxü rü guxchaäcüma nanayauxgü i maxü
 i taguma gúxü. Rü ñuxma na ngëmaäcü yüxü, çrü ñuxäcü
 tá nüxü nangüpetüxü i ngëma duüxügü i chixexü ügüxü rü
 pecaduäxgüxü?”

ñnanagürü. 19 Rü ngëmacëx ya yixema Tupana naxwëxexüäcüma ngúxü
 ingegüxe, rü name nixü na mexü taxügüechaxü rü Tupana ya tüxü
 ücümëxëgu na tanaxüxü i tümaäë na nüxna tüxü nadauxücëx. Erü nüma
 ya Tupana rü mecü nixü rü taguma texéxü nawomüxëë.

5

Ucuxëgü naxcëx i ngëmayaxögüxü

1 Rü ñuxmax, Pa Yaxögüxüärü Äëxgacügüx, rü pexna chanaxäxchaü
 i wüxi i ucuxë i mexü, erü choma rü ta pexrüü yaxögüxüärü äëxgacü
 chixü. Rü chomaxüchima nixü ga nüxü chadauxü ga ñuxäcü ngúxü
 na yangexü ga Cristu. Rü choma rü tá ta pexrüü choxü nangëxma i
 chauchica i mexü i ngëxguma wena nüma naxüxgu. 2 Rü chanaxwëxe
 i nüxna pedau rü nüxü perüngüxëë i guxüma i Tupanaärü duüxügü i
 pemëxwa ngëxmagüxü. Rü name i mexü i perü ngüchaümaä Tupana
 naxwëxexüäcüma penaxü i ngëma puracü, rü tama texé pexü muxguxica
 penaxü rü ëxna dïerucëx penaxü. 3 Rü tama name i namaä penuëäcüma
 rü penangaäcüma penamu i ngëma duüxügü. Natürü chanaxwëxe i mexü
 i perü maxü nüxü pewëx na ñuxäcü Tupana naxwëxexü na namaxëxü.
 4 Rü ngëxguma wena nüma naxüxgu ya tórü Daurüxüchi ya Cristu, rü
 pema rü tá penayauxgü i wüxi i perü ämare i ngëxcuerüü i mexëchixü i
 taguma ngauxü. 5 Rü ngëxgumarüü ta i pemax, Pa Ngextüxücügüx, rü
 name nixü i naga pexüñüë i ngëma perü äëxgacügü i Tupanaärü puracüwa
 puracüexü. Rü guxäma i pema i yaxögüxü, rü name nixü i wüxichigü
 pegü perüngüxëë rü taguma pegügu perüxüñüë na pemücügüarü yexera
 pixügüxü. Erü Tupanaärü ore i ümatüxüwa rü ñnanagürü:

“Tupana rü tama norü me nixü i ngëma duüxügü i nügü icuëxüxügüxü.
 Natürü nüxü narüngüxëë rü namaä namecüma i ngëma duüxügü i
 tama nügü icuëxüxügüxü”,

ñnanagürü i ngëma ore. 6 Rü ngëmacëx tama name i pegü picuëxüxü. Rü
 narümemae i Tupanamëxë ya poranetüxüwa pegü pengëxmagüxëë na
 nüma pexü yacuëxüxügüxüçëx i ngëxguma nawa nanguxgu na ngëmaäcü
 pemaä naxüäxü. 7 Rü name nixü i Tupanamëxëgu penaxü i guxüma i
 perü oegaäëgü, erü nüma ya Tupana rü guxüguma pegu narüxüñü rü
 aixcüma pexna nadau. 8 Rü name nixü i guxüguma pegüna pedaugü
 rü ipexuäëgü, erü perü uwanü i Chataná rü doma wüxi ya ai ya
 idüraxüchicürüü nanañaäne rü tümacëx nadau na texéxü tá nachix-
 exëëxü. 9 ¡Rü peporaeamëx rü peyaxögüamëx i ngëxguma tacü rü chix-
 exü pemaä naxüxchaügu! Erü nüxü pecuëx rü guxüma i taeneëgü i
 guxüwama ngëxmagüxü rü pexrüü ngëmatama ngúxü ningegü. 10 Natürü
 ngëxguma paxaxächi ñoma i naänewa ngúxü pingegüwena, rü Tupana
 rü tá pexü nimexëë na aixcüma napëxewa pimexüçëx, rü tá pexü
 narüngüxëë na taguma nüxü perüxoexüçëx, rü tá pexü naporaexëë na
 aixcüma perü maxüwa peporaexüçëx. Rü daatama Tupana nixü ya tüxna
 naxäcü i guxüma i mexü i tüxü ngëxmaxü, rü tüxü deicü na naxütawa

tüxü nangëxmaxüçèx i tachica i mexü i taguma gúxü, erü Ngechuchu ya Cristuarü duüxügü tixīgü. ¹¹ Rü name nixi i guxüguma nüxü ticuèxüügü ya Tupana, erü nüma nixi i guxüärü äëxgacü yixü i guxüguma. Rü ngëmaäcü yii.

Pedru rü yema yaxögüxüxü narümoxë

¹² Taeneë ya Chiribánu ya meã yaxöcümaã petanüwa chanamu i ñaã nuxmarexü i popera na pexü chixucuxëgüxüçèx rü pemaã nüxü chixuxüçèx na ngëma pexü nangechaüxügagu yixü ya Tupana i aixcüma pexü nangüxëèxü. Rü ñuxma na ngëmaäcü pexü nangechaüxü, rü name nixi i guxüguma naxçèx pemaxë. ¹³ Rü pexü narümoxëgü i guxüma i taeneëgü i yaxögüxü i pexrüü Tupana dexü i núma Dumawa ngëxmagüxü. Rü ngëxgumarüü ta pexü narümoxë i chorü ngüxëëruü i Marcu ya chaunerüü ixïcü. ¹⁴ Rü chanaxwëxe i wüxichigü i pema rü pegü pengechaügüäcüma pegü perümoxëgü. Rü ngëxgumarüü ta chanaxwëxe na aixcüma petaäëgüxü i guxâma i pema na Ngechuchu ya Cristuarü duüxügü pixīgüxü. Rü ngëmaäcü yii.

Rü nuãma pexna,
Pedru

NORÜ TAXRE GA POPERA GA PEDRU ÜMATÜXÜ

Pedru nüxü narümoxë ga yema yaxögüxü

¹ Pa Chaueneëgüx, choma i Chimáü i Pedru nixi i pexcëx chanaxümatüxü i ñaã popera. Rü choma rü Ngechuchu ya Cristuarü ngüxëëruü chixi, rü nüma nixi ga choxü namuxü na nüxü chixuxüçëx i norü ore. Rü pexcëx chanaxümatü i pema na toxrüü aixcüma peyaxögüxü, erü törü Tupana rü törü Maxëxëëruü ya Ngechuchu ya Cristu rü aixcüma nimexëchi. ² Rü ñuxma na Tanatü ya Tupanaxü pecuáxü rü törü Cori ya Ngechuchuxü pecuáxü, rü chanaxwëxe i nümagü aixcüma pemaã namecüma rü aixcüma pexü nataãxëë.

Yaxögüxüçümağüchiga

³ Rü Tupana rü noxrütama poramaã marü tüxna nanaxã ga guxüma i ngëma nacüma i mexü i inaxwëxexü na aixcüma meã naxcëx imaxëxüçëx. Rü yemaãcü nanaxü ga yexguma tüxü nüxü nacüxëëgu ga guma törü Cori ya mexëchicü ga norü poramaã tüxü decü. ⁴ Rü yematama norü poramaã tüxna nanaxã ga guxüma ga norü ngüxëë i mexëchixü ga inaxunetaxü na naxrüü pimexüçëx rü nüxna pixigachixüçëx i guxüma i chixexüğü i duüxüğüarü ngüchaü i chixexügagu ñoma i naãnewa ngëxmaxü. ⁵ Rü ngëmacëx penaxwëxegü na pegü peporaexëëxü na yexeracü peyaxögüxü rü meã togüpëxewa pemaxëxü. Rü ñuxuchi name na meãma nüxü pecuáxü na tacü yiixü i Tupana pexü naxwëxexü. ⁶ Rü ngëxgumarüü ta penaxwëxegü na meã pegümaã ipecuáxü na tama chixexüğü peyixüçëx. Rü ñuxüchi name na yaxna pegümaã pexinüxü. Rü ngëxgumarüü ta name na aixcüma Tupanaxü pengechaügüxü. ⁷ Rü ñuxüchi penaxwëxegü na pegü pengechaügüxü ya guxãma i pemax. Rü ngëxgumarüü ta name na guxüma i duüxüğüxü pengechaügüxü. ⁸ Rü ngëxguma aixcüma ngëma pexü chaxucuxëxüãcüma pemaxëgu, rü täütáma natüçëxma nixi i perü maxü, rü täütáma natüçëxma nixi na nüxü pecuáxü ya törü Cori ya Ngechuchu ya Cristu. ⁹ Natürü yixema tama ngëma pexü chaxucuxëxüãcüma maxüxë, rü ñoma tangexetüxürrüü tixi. Rü ñoma wüxi i duüxü i tama nagu rüxünüxü i ngëma yixcüra tá nüxü ngupetüxürrüü tixi, erü nüxü itayarüngüma na ñuxãcü Tupana tüxü nüxü ngechaüxü ga tümaãrü pecadugü. ¹⁰ Rü ngëmacëx, Pa Chaueneëgüx, name nixi na yexeraãcü meã Tupanacëx pemaxëxü na ngëmaãcü ipenawëxüçëx na aixcüma Tupanaãrü duüxüğü ya pexcëx naçaxe rü pexü dexe na pixigüxü. Rü ngëxguma ngëmaãcü pemaxëgu rü tagutáma chixexüğü peyi rü tagutáma Tupanaxü ipetëx. ¹¹ Rü ngëmaãcü ya Tupana, rü tá meã pexcëx nayawãxna i ñãx na tauxchaãcü pichocuxüçëx i ngextá guxügutáma ãëxgacü íyixüwa ya törü Cori ya Ngechuchu ya Cristu ya törü Maxëxëëruü. ¹² Rü ngëmacëx woo marü nüxü na pecuáxü rü nagu na pexixü i ngëma ore i aixcüma ixixü, natürü guxügutáma pexna nüxü chaxucuxëxëëcha ga yema pexü namaã chaxucuxëxü. ¹³ Erü ñuxma na chamaxüxü i chomax, rü nagu charüxünü na namexü na pexna nüxü chaxucuxëxëëxü i ngëma ore i namaã pexü chixucuxëgüxü, na ngëmaãcü pexü changüxchaüxëxüçëx na meã Tupanacëx pemaxëxü.

14 Rū pemaã nūxū chixu i ngēma, erū tórū Cori ya Ngechuchu ya Cristu choxū nūxū nacuèxēē na paxa tá chayuxū. 15 Rū ñoma rú ta na chamaxūxū, rú meã pexū chixucuxēgū na ngēxguma chayuxguwena rú guxūguma nūxna pecuèxāchixūcēx i ngēma chorū ucuxēgū na ñuxācū Tupana naxwèxexū na pemaxēxū.

Pedru rú namücügü rú aixcüma Cristuxū nadaugü ga na ñuxācü namexēchixū

16 Rū yexguma pexū tangúexēēgu na ñuxācü naporaxū ya tórū Cori ya Ngechuchu ya Cristu rú ñuxācü tá wena na nataeguxū, rú tama tomatama togüāewa tayaxuxū i ore nixī. Yerū tomatama toxetūmaã nūxū tadau na ñuxācü namexēchixū i nūma ya tórū Cori. 17 Rū nūxū tadau ga yexguma Tanatū ya Tupana nūxū icuèxūūgu. Rū nūxū taxīnūē ga yexguma gumatama Tanatū ya Tupana ya Mexēchicū ñaxgu:

“Daa nixī ya Chaune ya nūxū changechaūxūchicū. Rū choma rú poraācü namaã chataāēxūchi”,

ñaxgu. 18 Rū aixcüma tomaxūchima nūxū taxīnūē ga yema Tupanaga ga daxūguxū ga nañewa inaxūxū, yerū tomatama rú tórū Corimaã tayexmagū nawa ga guma mēxpúne ga üünene ga yexguma yema ngupetūgu. 19 Rū yemaācü nūxū tadau na aixcüma yīxū ga yema ore ga nuxcümaūgūxū ga Tupanaārū orearū uruūgū nūxū ixugūgūxū. Yerū yema nūxū yaxugūgūxūrūütama nixī ga nūxū tadauxū. Rū name nixī i pema rú ta aixcüma meã nagu perūxīnūē i ngēma ore, erū wūxi i omū i íraxetūxū i ēānexūwa ibaxixūrūū nixī. Rū ngēma ore rú tá pexū nūxū nacuèxēē i Tupanachiga ñuxmatáta ínangu ya tórū Cori ya Ngechuchu ya Cristu ya yima woramacuri ya ngunetūxū ngócürūū ixīcū. Rū ngēxguma ínanguxgu i nūma rú aixcüma tá meã pexū nūxū nacuèxēē i guxūma i nachiga. 20 Natürü chanaxwèxe na guxūārū yexera nūxū pecuáxū i ñaã ore i tá pemaã nūxū chixuxū. Rū dücax, taxúema tüechamatama nūxū tacuèx i íacūchiga na yīxū i Tupanaārū ore i ümatūxū, ega Tupanaāē i Üünexū tama tūxū rüngūxēēgu. 21 Yerū taxuūma ga Tupanaārū orearū uruū rú nüechamatama nügüāewa nanayaxu ga yema ore ga nūxū yaxugūgūxū. Natürü yexguma yema orexū yaxugūgūgu, rú Naã i Üünexū nixī ga yadexagūxēēxū.

2

Doramaã duūxūgūxū ngúexēēxūchiga

1 Natürü nuxcüma rú nayexma ta ga Tupanaārū orearū uruūgūneta ixīgūxū ga Yudiugūtanūwa. Rū ngēxgumarūū tá ta petanūwa nangēxma i duūxūgū i nguxēēruūgūneta ixīgūxū. Rū nūmagū rú tá doramaã nanaxūchicū i Tupanaārū ore, rú ngēmaācü tá pexū nangúexēē i ore i dora ixīxū na pexū nawomūxēēgūxūcēx. Rū nūmagū rú tātūama naga naxīnūēchaū ya yima tórū Cori ya Ngechuchu ya Cristu ya norū Maxēxēēruūchirēx ixīcū. Rū ngēmagagu ya Tupana rú ngürūāchi tá nanapoxcue i ngēma duūxūgū i ngēmaācü maxēxū, rú tá inayanaxoxēē. 2 Rū nūmagū rú tá nūxū nixugū na tama wūxi i chixexū yīxū ega woo taxúneārū ngúchaū ixūxgu. Rū muxūma i togū i duūxūgū rú tá nawe narūxī i ngēma chixexū i naxūgūxūwa. Rū ngēma chixri pexū ngúexēēxūgagu rú muxūma i togū i duūxūgū rú tá chixri nachiga nidexagū i Tupanaārū ore i mexū i aixcüma ixīxū. 3 Rū nūmagū i

ngēma duǎxǔgü i chixexǔ rü tá nügüna nananugüchaǔ i guxǔma. Rü ngēmacèx tá pemaǎ nüxǔ nixu i ore i chixexǔ ixǔxǔ na ngēmaäcü pexǔ nawomüxèègüxcèx rü pexǔ ngǔxǔ nayauxgüxcèx i perü dǐeru. Natürü tá napoxcue i ngēma duǎxǔgü, rü täütáma nibuxmǔ. Erü Tupana rü woetama nuxcümama nanamexèè i ngēma poxcu. ⁴ Yerü ga Tupana rü tama nüxǔ nüxǔ nangechaǔ ga norü orearü ngeruǔgü ga daxǔcǔǎx ga pecadu ügǔxǔ. Rü yemacèx inaxèǎnexǔwa i ngoxogǔxǔ inapoxcuexǔwa nanawogü. Rü cadenamaǎ nayanèǔgü na ngēma nangèxmagǔxcèx ñuxmatáta nawa nangu i ngēma ngunexǔ i nagu Tupana nüxna çaxǔ i guxǔma i duǎxǔgü. ⁵ Rü yexgumarǔ ta ga Tupana rü tama nüxǔ nüxǔ nangechaǔ ga yema nuxcümaǔgǔxǔ ga duǎxǔgü ga chixexǔ ügǔxǔ. Rü yemacèx mucü ga taxüchicü naxcèx yéma nanamu na gumamaǎ nadaiǎxcèx ga yema duǎxǔgü ga chixexǔ ügǔxǔ. Natürü ga Tupana rü Noexǔ nadau ga na meǎma duǎxǔgǔxǔ yaxucǔxègǔxǔ na nüxǔ naxoexǔcèx ga norü chixexǔgü. Rü yemacèx ga Tupana rü Noexǔ namaxèè namaǎ ga 7 ga natanǔxǔgü. Natürü nanadai ga guxǔma ga yema togü ga duǎxǔgü. ⁶ Rü Tupana rü yexgumarǔ ta inayanaxoxèè ga guma ñānegü ga Chodoma rü Gomora ga poraäcü chixri duǎxǔgü nawa maxēne. Rü inanagu ga guma ñānegü ñuxmata norü tanimacaxicatama íyaxǔ. Rü yemaäcü nanaxü na guma ñānegü rü wüxi ga cuèxruǔ na yǐixǔcèx nüxǔ ga yema duǎxǔgü ga chixexǔ ga yemawena maxèxǔ. ⁷ Natürü ga Chodomawa rü Tupana nanamaxèè ga Lox ga wüxi ga yatü ga mecü ixǔcü ga poraäcü ngechaǔcü ga yexguma nüxǔ nadèuxgu ga ñuxäcü chixri na namaxèxǔ ga yema duǎxǔgü ga natanüwa nayexmaxǔ. ⁸ Rü guxǔ ga ngunexǔgu rü nüma ga Lox ga meǎ maxǔcü rü poraäcü naǎèwa nangux ga yexguma nüxǔ nadèuxgu rü nüxǔ naxǐnǔgu ga yema chixexǔgü ga naxǔgǔxǔ ga yema duǎxǔgü ga natanüwa nayexmaxǔ. ⁹ Rü yema Loxǔ na namaxèèxǔrǔ ga Tupana, rü nüxǔ natauxcha na tüxǔ inangǔxǔxèèxǔ i ngèxguma Chataná tüxna ñnǔgu ya yǐxema meǎ maxèxè. Rü ngèxgumarǔ ta ya yǐxema chixexǔ ügǔxe, rü nüxǔ natauxcha na poxcuwa tüxǔ nangèxmagǔxcèxǔ ñuxmatáta nawa nangu i ngēma ngunexǔ i nagu guxǔma i duǎxǔgǔxǔ yacagǔxǔ. ¹⁰⁻¹¹ Rü Tupana rü aixcüma tá nanapoxcue i ngēma duǎxǔgü i naxǔneǎrǔ ngüchaǔgu íxǔ i tama naga ñnüèchaǔxǔ ya tórü Cori. Rü ngēma duǎxǔgü rü taxúegama naxǐnüèchaǔ, rü nadauxcǔraxǔwèxegü rü nügügucicatama narǔxǐnüè. Rü tama namuǔè na namaǎ naguxchigagǔxǔ i ngēma äèxgacǔgü i daxǔcǔǎx i Tupanatǔüwa ngèxmagǔxǔ. Rü ngēmaäcü namaxè i ngēma duǎxǔgü. Natürü woo Tupanaǎrǔ orearü ngeruǔgü i daxǔcǔǎx i ngēma duǎxǔgǔxǔ rüyexeraxǔchichiréxǔ, rü namuǔè na ngēmaäcü namaǎ naguxchigagǔxǔ i ngēma äèxgacǔgü i daxǔcǔǎx i Tupanatǔüwa ngèxmagǔxǔ. ¹²⁻¹³ Rü ngēma nguxèèruǔgǔneta, rü ñoma naèxǔgǔrǔ nixǔgü, rü naèxǔgǔrǔ taxǔma nacuèxgü. Rü ngēma naxǔnegü naxwèxèxǔ nixǔ i naxǔgǔxǔ. Rü nabue na ñoma naèxǔgü i yayauxgǔxǔ rü nadèixǔrǔ yixǔgǔxcèx. Rü chixri nachiga nidexagü i ngēma tama nüxǔ nacuèxgǔxǔ. Natürü ngēma chixexǔ i naxǔgǔxǔgagu tá inayarütaxe, rü ngēmaäcü ngǔxǔ tá ningegü nagagu i ngēma ngǔxǔ i toguǎxǔ yangexèègǔxǔ. Rü nümagü rü namaǎ nataāègü i ngēma chixexǔ i ngunecütama naxǔgǔxǔ. Rü ngèxguma pemaǎ nachibüegu, rü wüxi i chixexǔchixǔ rü ānexǔchi nixǔgü erü ngēma rü ta nanaxǔgü i norü chixexǔgü i namaǎ pexǔ nawomüxèègüchaǔxǔ. ¹⁴ Rü ngēma duǎxǔgü rü taxuacüma wüxi ya ngeǎxǔ nadaugǔmare,

erü naãêwa rü nagu narüxĩnũe na nüxũ tangúchaũxũ. Rü tama nüxũ ninguéga na pecadu naxügüechaxũ. Rü naxcèx nadaugü na ñuxácü chixexügu tüxũ nayixêêxũ ya yíxema duũxégü ya turaearü maxũãxgüxe. Rü nüxũ nicuèxüchi na ñuxácü tacü nügüna nanugüexũ. Natürü Tupana rü marü namaã nanaxuegu na napoxcueãxũ. ¹⁵ Rü ngêma duũxügü rü tama nagu naxĩ i ngêma Tupana nüxũ naxwèxexũ, rü ngêmacèx inayarütauxe. Rü nagu naxĩ ga yema chixexũ ga nagu yaxũxũ ga nuxcúmaũxũ ga Tupanaãrü orearü uruũ ga Baráũ ga Beú nane ga chixexũ üxũ na yemaãcü dïeru ngĩxũ nayaxuxüçèx. ¹⁶ Rü noxrütama buru ga woo taguma idexachirëxcü, rü wüxi ga duũxürüũ namaã iyadexa rü inanga naxcèx ga yema chixexũ ga naxüxchaũxũ. Rü yemaãcü Baráxũ íyachaxãchixêe na tama naxüãxüçèx ga yema chixexũ ga naxüxchaũxũ. ¹⁷ Rü ngêma duũxügü rü taxuwama nime ñoma wüxi i puchu i ngearü dexáãxürüũ. Rü ñoma wüxi i caixanexũ i buanecü icuexürüũmare nixĩ na taxuwama yamexũ. Natürü Tupana rü marü nanamexêe i wüxi i nachica i êanexüchixũ i ngextá guxügutáma ínapoxcueãxüwa i ngêma duũxügü. ¹⁸ Rü ngêmaãcü tá nanapoxcue i ngêma duũxügü, erü nügü yacuèxüũgüãcüma chixri nidexagü i ore i taxuwama mexümaã. Rü tüxũ nixucuxégü na tümãxüneãrü ngúchaũgu na taxĩxüçèx ya yíxema marü ngexwacèx ngêmaxũ rüxoechiréxe. ¹⁹ Rü tümamaã nüxũ nixu rü ngêxguma nawe tarüxĩxgu rü tá tüxũ ínanguxüxêe na taxuũmèxéwa tangêxmagüxüçèx rü tümã tanaxwèxexüãcüma tamaxèxüçèx. Natürü ngêma duũxügü i ngêmaãcü chixri idexagüxũ, rü nümagütama rü norü chixexütüüwa nangêxmagü. Erü guxüma i duũxügü, rü ngêma nüxũ rüyexeramaèxütüüwa nügü nangêxmagüxêe. ²⁰ Rü guxãma ya yíxema marü tórü Cori ya Ngechuchu ya Cristu ya tórü Maxêxêeruũxũ cuèxgüxe, rü marü nawa ítanguxũ i ñoma i naãneãrü chixexügü. Natürü ngêxguma chi wenaxãrü naxcèx tawoegugu i ngêma chixexũ i nawa ítanguxüchiréxũ, rü tümãrü me yixígu na wena ngêma chixexütüüwa tangêxmagüxũ, rü aixcüma noxriarü yexera tichixe. ²¹ Erü ngêxguma chi nüxũ tacuèxgüguwena nüxũ tarüxoegu i ngêma ore i mexü ga noxri tayauxgüxũ, rü narümemãe chi nixĩ ga noxtacüma táũ chima nüxũ na tacuèxgüxũ i ngêma maxũ i aixcüma mexü. ²² Tupanaãrü ore i ümatüxüwa rü ñanagürü:

“Ngêma airu i nügü oxgüxũ, rü wenaxãrü naxcèx nataegu i norü oxü na yaweaxüçèx. Rü ngêma cuchi i norü yora meãma aiyachiréxũ, rü ngêxgumatama wenaxãrü norü aiyancèx nataegu”, ñanagürü i ngêma orewa. Rü ngêxgumarüũ nixĩ i ngêma duũxügü i marü Tupanaãrü orexü cuèxgüchiréxũ rü ñuxüchi wenaxãrü naxcèx woeguxũ i norü chixexügü ga noxri nawa ínanguxüchiréxũ.

3

Tórü Coriarü taeguchiga

¹ Pa Chaueneégü ya Pexü Changechaũgüxex, ñãã nixĩ i ngêma norü taxre i popera i pexcèx chaxümatüxũ. Rü yema nüxĩraũxũ ga poperawa pemaã nüxũ chixuxürüũ, rü wena pexü chixucuxégü rü pexna nüxũ chacuèxãchixêe na aixcüma meã Tupanaãrü oregu perüxĩnũèxüçèx. ² Rü chanaxwèxe i nüxna pecuèxãchie i ngêma ore ga nuxcúmaũgüxũ ga Tupanaãrü orearü uruũgü ga ixüünexũ nüxũ ixugügüxũ. Rü ngêxgumarüũ ta chanaxwèxe i nüxna pecuèxãchie i ngêma tórü Cori ya Ngechuchu ya

tórü Maxêxêëruñârü mugü ga pexü nangúexêëxü ga norü orearü uruüğü ga nûma pexütawa namugüxü. ³⁻⁴ Natürü chanaxwêxe i guxüârü yexera nagu perüxîñüê i ñaã ore i pemaã tá nüxü chixuxü. Rû dücax, rû ngêxguma nagüxchaügu i ñoma i naãne, rû tá ínangugü i duüxüğü i chixexü i nagu íxü i naxüñeârü ngúchaüğü. Rû nûmagü rû tá nacugüêácüma ñanagürüğü:

“Dücêx, Cristu inaxuneta na wena núma naxüegaxü. ¿Rû tacü namaã nangupetü i ñuxma na tama ínanguxü? Rû marü düxwa nayue ga tórü oxigü ga yaxôgüxü, natürü noxri naãne üxgumama rû nanangêxgumaraüêchatama i guxüma”, ñanagürüğü tá. ⁵⁻⁶ Natürü ngêma duüxüğü i ngêmaácü idexagüxü rû tama nüxü nacüêxgüchaü ga yema ngupetüxü ga yexguma Tupana ñoma ga naãnewa namuãgu ga guma mucü ga tacü ga iyanaxoxêêcü ga guxüma ga tacü ga ñoma ga naãnewa yexmaxü. Rû nuxcümáxüchima naxüpa ga guma mucü rû woetama nayexma ga ñoma ga naãne rû guxüma i daxüwa nüxü idauxü ga Tupana ngoxêëxü ga yexguma namuãgu na nangóxcêx. Rû yemaácü dexáchiüwa nangox ga ñoma ga naãne rû dexáarü ngáxütüchiüwa nayexma, yerü yemaácü nanamu ga Tupana. ⁷ Natürü ngêma ñuxma ngêxmaxü i daxüwa nüxü idauxü rû ñoma i naãne rû Tupana namaã nanguxü na yixcama üxüwa yaxaxücêx, yerü yemaácü namaã nanaxuegu. Rû ngêma ñoma i naãne rû ngêma daxüwa nüxü idauxü, rû yima üxü ya Tupana nüxü ixuxüñewa tá nixí i aixcüma ínaguãxü i ngêma ngunexü i nagu naxunetaxügu na napoxcúeãxü rû chixexüwa nawogüãxü i ngêma duüxüğü i tama naga íñüêchaüxü. ⁸ Rû ñuxmax, Pa Chaueneëgü ya Pexü Changechaügüxex, tama chanaxwêxe i nüxü ipeyarüngümaê na wüxitama i ngunexü rû tórü Coricêx rû 1000 ya taunecürüü yíxü. Rû ngêxgumarüü ta, 1000 ya taunecü rû tórü Coricêx rû wüxitama i ngunexürüü yíxü. ⁹ Rû ñuxre i duüxüğü rû nagu narüxîñüê na táütáma paxa ínanguxü ya tórü Cori yema tamaã inaxunetaxürüü. Natürü nûma ya tórü Cori rû tama nanuxcüãê na yanguxêêãxü i ngêma norü uneta, natürü nûma rû tamaã yaxna naxîñümare. Erü nûma rû tama nanaxwêxe na texé iyarütaxuxü, natürü nanaxwêxe na guxãma nüxü rüxoexü i tümacüma i chixexü. ¹⁰ Natürü ngêma ngunexü i tórü Cori nagu ínguxü, rû taxúema nagu ínanguxêëxügu tá nixí. Erü ngürüächimare tá ínangu ñoma wüxi i ngítêxáxü ínguxürüü. Rû ñuxüchi guxüma i tacü i daxüguxü i naãnewa ngêxmagüxü rû tá tagaácü niwãixgü rû ngêmaácü tá inayarütauxe. Rû yima üêxcü rû tauemacü rû woramacurigü rû êhtagü rû tá nixae rû ngêxma tá nayarüxogü. Rû ngêxgumarüü tá ta i ñoma i naãne rû tá nixa namaã i guxüma i tacü i nawa ngêxmagüxü. ¹¹ Rû ñuxma na ngêmaácü tá namaã nangupetüxü i guxüma i tacü i ngêxmaxü, rû yexeraácü penaxwêxe na aixcüma Tupanapêxewa pixüñexü rû nûma nanaxwêxexüácüma na pemaxêxü. ¹² Rû name nixí i meã ípenanguxêê i ngêma ngunexü i nagu tá ínanguxü ya tórü Cori ya Tupana. ¡Rû paxa guxüwama nüxü pixu i norü ore rû aixcüma naxcêx pemaxê na ngêmaácü ípenanguxêëxücêx! Rû ngêma ngunexügu rû guxüma i daxüwa nüxü idauxü rû tá nixa rû tá inachaxichigü. Rû ñoma i naãne rû üêxcü rû tauemacü rû êhtagü rû yima üxümaã tá inachaxichigü. ¹³ Natürü yixema na yaxôgüxü rû ítananguxêê i ngêma ngexwacaxüxü i daxüguxü i naãne rû ngexwacaxüxü i ñoma i naãne ga Tupana tamaã ixunetaxü. Rû ngema rû guxütáma name, rû yixema rû tá ta aixcüma time. ¹⁴ Rû ngêmacêx, Pa Chaueneëgü ya Pexü Changechaügüxex, rû ñuxma na ípenanguxêëxü i ngêma, rû name nixí

i aixcūma meã pemaxē rü aixcūma pegü pengechaügü na taxuwama nachixexücèx i perü maxü rü aixcūma petaãëgüxcèx i ngëxguma wena núma naxüxgu. ¹⁵ Rü name nixĩ i nüxna pecuëxãchie na yaxna tamaã naxĩnüxü ya tórü Cori, erü nanaxwèxe na tüxü nangëxmaxü i tórü maxü i taguma gúxü. Rü ngëmatama pexcèx chanaxümatüxürüü ta nixĩ ga pexcèx naxümatüãxü ga taeneë ya nüxü ingechaügücü ya Pauru ga yexguma Tupana naporaxëëãcūma pexcèx naxümatüãgu. ¹⁶ Rü guxüma ga norü poperawa rü ñãã pexcèx chaxümatüxüchiga nanaxümatü ga Pauru. Natürü yema pexcèx naxümatüxüwa rü nangëxma i ñuxre i ore i guxchaxü na nüxü icuáxü na tacüchiga yĩixü. Rü ngëma duüxügü i tama aixcūma Tupanaxü cuëxgüxü rü tama aixcūma yaxögüxü, rü nanaxüchicüügü i ngëma ore ngëxgumarüü na guxüma i Tupanaãrü ore i ümatüxü naxüchicüügüxürüü. Natürü ngëma chixexü na naxügüxügagu rü nügü tátama inayarütauxexëë. ¹⁷ Rü ngëmacèx, Pa Chaueneëgü ya Pexü Changechaügüxex, rü ñuxma na nüxü pecuáxü i tacü tá na ngupetüxü, rü name nixĩ i pexuãëgü na tama pexü nawomüxëëgüxcèx i ngëma chixexü i duüxügü rü tama nüxü perüxoëxücèx na meã peyaxögüxü. ¹⁸ Rü ngëmacèx, Pa Chaueneëgüx, penaxwèxe na pegü peporaexëëxü na wüxichigü i ngunexü yexeraãcü tórü Cori ya Ngechuchu ya Cristu ya tórü Maxëxëëruüxü pecuáxücèx rü yexeraãcü nüxü picuáetanüxücèx na ñuxãcü aixcūma pexü nangechaüxü. ¡Rü ngëmacèx rü guxügutáma rü ngĩxã nüxü ticuëxüügü! Rü ngëmaãcü yĩi.

Rü nuãma pexna,
Pedru

NŨXĨRAŨXŨ GA POPERA GA CUÁŨ ŨMATŨXŨ

Ore i tixŭ maxēēxŭchiga

¹ Pexcèx tanaxŭmatŭ nachiga ya Tupana Nane ya Cristu ya yima woetama marŭ nŭxĩra yexmacŭ ga yexguma noxritama tauta naãne ũxgu. Rŭ nŭma rŭ Ore i Maxēēēruŭ nixĩ i naega erŭ nŭma nixĩ i tamaã nŭxŭ yaxuxŭ i Tupanachiga rŭ tŭxŭ namaxēēēxŭ. Rŭ toma ga norŭ ngŭexŭgŭ na tixĩgŭxŭ, rŭ nŭxŭ taxĩnŭē rŭ toxetŭmaã nŭxŭ tadaugŭ rŭ tomēxmaã nŭxŭ tingŭgŭgŭ. ² Rŭ yima Maxēēēruŭ ya Cristu rŭ toxŭ nŭgŭ nawēx. Rŭ nŭxŭ tadaugŭ rŭ duŭxŭgŭmaã nŭxŭ tixu na ñuxãcŭ yĩxŭ. Rŭ ñuxma rŭ pemaã rŭ ta nŭxŭ tixuchiga ya yima Cristu ya tŭxna naxãcŭ i maxŭ i taguma gŭxŭ. Rŭ noxri rŭ Nanatŭxŭtawa nayexma, natŭrŭ ñoma ga naãnewa nangu rŭ toxcèx nangox. ³ Rŭ yema toma nŭxŭ tadaugŭxŭ rŭ nŭxŭ taxĩnŭēxŭ rŭ pemaã nŭxŭ tixu na tomŭcŭgŭ pixĩgŭxŭcèx, ngēxgumarŭŭ i toma na Tanatŭ ya Tupana rŭ Nane ya Ngechuchu ya Cristumŭcŭgŭ tixĩgŭxŭrŭŭ. ⁴ Rŭ ngēmacèx pexcèx tanaxŭmatŭ i ñaã ore na wŭxigu aixcŭmaxŭchi itaãēgŭxŭcèx.

Ñoma ngŭonexŭrŭŭ name ya Tupana

⁵ Rŭ ñaã nixĩ ga ore ga tomaã nŭxŭ yaxuxŭ ga Ngechuchu ya Cristu. Rŭ pemaã nŭxŭ tixu na ñoma ngŭonexŭrŭŭ namexŭ ya Tupana, rŭ nawa rŭ nataxuma i chixexŭ i ñoma ēanexŭrŭŭ ixĩxŭ, rŭ bai i íraxŭ. ⁶ Rŭ ngēxguma chi:

“Tanatŭ ya Tupanamŭcŭgŭ tixĩgŭ”, ñagŭgu, natŭrŭ chixri imaxēgu, rŭ tidoraemare erŭ tama aixcŭma meã tamaxē. ⁷ Rŭ ngēxguma chi Tupanarŭŭ ngŭonexŭwa imaxēgu, rŭ yigŭmŭcŭgŭ tixĩgŭ i yixema, rŭ Tupana Nane ya Ngechuchu rŭ nagŭmaã tŭxŭ inayanatauxēē i guxŭma i tŭrŭ chixexŭ. ⁸ Ngēxguma chi nŭxŭ ixuxgu rŭ:

“Changearŭ pecaduãx”, ñagŭgu, rŭ yigŭtama tawomŭxēē, rŭ tidoraemare. ⁹ Natŭrŭ ngēxguma chi Tupanamaã nŭxŭ ixuxgu i tŭrŭ pecadugŭ, rŭ nŭma tŭxŭ nŭxŭ nangechaŭ rŭ tŭxŭ inayanatauxēē i guxŭma i tŭrŭ chixexŭ, erŭ nŭma rŭ mecŭ nixĩ rŭ taguma tŭxŭ nawomŭxēē. ¹⁰ Natŭrŭ ngēxguma chi:

“Tangearŭ pecaduãxgŭ”, ñagŭgu, rŭ doratèèx nŭxŭ tawogŭ ya Tupana rŭ tama aixcŭma tawa nangēxma i norŭ ore.

2

Cristu rŭ tŭrŭ chogŭruŭ nixĩ

¹ Pa Chauxacŭgŭx, pexcèx chanaxŭmatŭ i ñaã ore na tama chixexŭ pexŭgŭxŭcèx. Natŭrŭ ngēxguma chi wŭxie chixexŭ ũxgu, rŭ nangēxma ya tŭmaētŭwa chogŭcŭ nŭxna ya Tanatŭ ya Tupana na tama tŭxŭ napoxcuxŭcèx. Rŭ yima nixĩ ya Ngechuchu ya Cristu ya aixcŭma mecŭ ixĩcŭ. ² Rŭ guma Ngechuchu ya Cristu rŭ nŭgŭ inaxã rŭ nayu na naxŭtanŭãxŭcèx ga tŭrŭ pecadugŭ. Rŭ tama tŭrŭ pecadugŭxicatama naxŭtanŭ, natŭrŭ guxŭma i duŭxŭgŭarŭ pecadugŭ ta naxŭtanŭ. ³ Rŭ ngēxguma chi naga ixĩnŭēgu i ngēma tŭxŭ namuxŭ ya Tupana, rŭ nŭxŭ tacuèx na aixcŭma nŭxŭ icuáxŭ. ⁴ Rŭ ngēxguma chi wŭxie:

“Choma rü Tupanaxũ chacuèx”, ñagũgu, natürü tama naga taxĩnũgu i ngẽma tüxũ namuxũ ya Tupana, rü wüxi i doratèxáxũ tixĩ. ⁵ Natürü yixema naga ñnũxè i ngẽma tüxũ namuxũ ya Tupana, rü aixcũmaxũchi Tupanaxũ tangechaũ. Rü ngẽmawa nüxũ tacuèxgũ na aixcũma Tupanaãrũ duũxũgũ ixĩgũxũ. ⁶ Rü yixema:

“Tupanaãrũ duũxũ chixĩ”, ñagũxe, rü name nixĩ na meã tamaxũxũ yema Ngechuchu ya Cristu meã maxũxũrũũ.

Tupanaãrũ mu i ngexwacaxũxũchiga

⁷ Pa Chaueneẽgũx, tama wüxi i ngexwacaxũxũ i Tupanaãrũ mu nixĩ i pexcèx chaxũmatũxũ. Natürü ñaãtama noxriarũ ügũgumama pexũ yexmaxũ ga mu nixĩ. Rü ñaãtama nixĩ i Tupanaãrũ mu ga nuxcũmaũxũ ga marũ nüxũ pexĩnũxũ. ⁸ Natürü ñaã Tupanaãrũ mu i pexcèx chaxũmatũxũ rü guxũguma nangexwacaxũ. Rü ngẽxguma naga pexĩnũẽgu i ñaã Tupanaãrũ mu na pegũ pengechaũgũxũ, rü tama èãnexũwatama pemaxè, natürü Cristurũü ngẽma ngóonexũ i aixcũma ixĩxũwa pengẽxmagũ. ⁹ Rü ngẽxguma chi wüxie:

“Choma rü ngẽma ngóonexũwa changẽxma”, ñagũgu, natürü tũmaẽneẽchi taxaixgu, rü èãnexũwatama tangẽxma. ¹⁰ Yixema tũmaẽneẽxũ ngechaũxè rü ngóonexũwa tamaxũ, rü taxucèxma tüxcũũ pecadu taxũ. ¹¹ Natürü yixema tũmaẽneẽchi aixe, rü èãnexũwatama tamaxũ, rü èãnexũgu tixũ. Rü tama nüxũ tacuèx na ngextá taxũxũ, erü tũmacèx naxèãne. ¹² Pa Chauacũgũx, pexcèx chanaxũmatũ erü Cristugagu Tupana marũ pexũ nüxũ nangechaũ i perũ pecadugũ. ¹³ Pa Papágũx, pexcèx chanaxũmatũ i ñaã ore erü nüxũ pecuèxgũ ya Tanatũ ya Tupana ga noxriarũ ügũgumama yexmacũ. Pa Ngextũxũcũgũx, pexcèx chanaxũmatũ erü marũ nüxũ perüyexera i ngẽma ngoxo i Chataná i chixexũãrũ üruũ. ¹⁴ Pa Buxũgũx, pexcèx chanaxũmatũ erü marũ nüxũ pecuèxgũ ya Tanatũ ya Tupana. Pa Papágũx, pexcèx chanaxũmatũ erü marũ nüxũ pecuèxgũ ya Tanatũ ya Tupana ga noxriarũ ügũgumama yexmacũ. Pa Ngextũxũcũgũx, pexcèx chanaxũmatũ erü peporae, rü guxũguma peãẽwa nangẽxma i Tupanaãrũ ore, rü marũ nüxũ perüyexera i ngẽma ngoxo i Chataná i chixexũãrũ üruũ. ¹⁵ ¡Tãxũ i pexũ nangũchaũxũ i ñoma i naãne rü norũ ngẽmaxũgũ! Ngẽxguma chi texéaxũ nangũchaũgu i ñoma i naãne rü tama Tanatũ ya Tupanaxũ tangechaũ. ¹⁶ Erü guxũma i ngũchaũgũ i ñoma i naãnewa ngẽxmaxũ rü ñoma i naãneãrũtama nixĩ rü tama Tupanaãrũ nixĩ. Rü ngẽma ngũchaũgũ rü ngẽma nixĩ i taxũneãrũ ngũchaũgũ, rü taxetũarũ ngũchaũgũ, rü yigũ na icuèxũügũxũ tóru ngẽmaxũgũmaã. ¹⁷ Natürü ñoma i naãne rü guxũma i ngũchaũgũ i nawa ngẽxmaxũ rü tá nagux. Natürü yixema Tupanaga ñnũxè rü guxũgutáma tamaxũ.

Ore i aixcũma ixĩxũchiga rü ore i dora ixĩxũchiga

¹⁸ Pa Chauacũgũx, paxa tá nagux i ñoma i naãne. Pema rü marũ nüxũ pexĩnũchiga rü tá ñnangu i wüxi i Cristuarũ uwanũ, natürü marũ ñnangugũ i muxũma. Rü ngẽmawa nüxũ tacuèx na marũ nagũxchaũxũ i ñoma i naãne. ¹⁹ Rü ngẽma Cristuarũ uwanũgũ rü tatanũwatama nangẽxmagũchirèx, natürü tama aixcũma tatanũxũ nixĩgũ, erü ngẽxguma chi tatanũxũ yixĩgũgu rü tatanũgu chitama narũcho. Natürü marũ tatanũwa ñnaxoxũ na meãma nüxũ icuáxũcèx na tama aixcũma tatanũxũ yixĩgũxũ. ²⁰ Natürü pema rü Cristu marũ pexna nanamu i Naãe i Üünexũ,

rü ngēmacèx meāma nūxũ pecuèx i Tupanaārũ ore. ²¹ Rü ñuxma rü tama nixĩ na tama nūxũ pecuáxũcèx na pexcèx chaxũmatũxũ. Natürũ pexcèx chanaxũmatũ erũ marũ meāma nūxũ pecuèx i ngēma ore i aixcũma ixĩxũ. Rü nūxũ pecuèx rü ngēma ore i aixcũma ixĩxũwa rü nataxuma i dora. ²² ¿Texé tiixũ ya yĩxema idoratèxáxe? Yĩxema:

“Ngechuchu rü tama aixcũma Cristu ya Tupana Nane nixĩ”, ñagũxe, tixĩ ya idoratèxáxe. Yĩxema tixĩ ya Cristuarũ uwanũ, erũ tama nūxũ tacuáxchaũ ya Tanatũ ya Tupana rü Nane ya Ngechuchu. ²³ Guxāma ya yĩxema tama nūxũ cuáxchaũxẽ ya Tupana Nane ya Ngechuchu, rü tama nūxũ tacuáxchaũ ta ya Tanatũ ya Tupana. Natürũ yĩxema Ngechuchuaxũ yaxõxẽ, rü Tanatũ ya Tupanaāxũ rü ta tayaxõ. ²⁴ Rü ngēmacèx name nixĩ i peyaxõgũama i ngēma ore ga noxri nūxũ pexĩnũèxũ. Rü ngēxguma peyaxõgũamagu i ngēma ore ga noxri nūxũ pexĩnũèxũ, rü aixcũma norũ duũxũgũ pixĩgũ ya Tanatũ ya Tupana rü Nane ya Ngechuchu. ²⁵ Rü nũmatama ya Ngechuchu ya Cristu nixĩ i tamaã inaxunetaxũ na tũxna naxāxũcèx i maxũ i taguma gũxũ. ²⁶ Nangēxma i duũxũgũ i chixexũwa pexũ gagũchaũxũ. Rü ngēmachiga nixĩ i pexcèx chanaxũmatũxũ i ñaã ore. ²⁷ Natürũ pema rü marũ Cristu pexna nanamu i Naãẽ i Üñexũ, rü guxũguma pewa nangēxma. Rü ngēmacèx tama penaxwèxe i to i perũ ngũexèèxũ erũ nũmatama i Naãẽ i Üñexũ rü pexũ nangũexèè i guxũma. Rü norũ ngũxèètae rü aixcũma nixĩ rü tama dora nixĩ. Rü ngēmacèx name nixĩ na guxũguma Cristuaxũ peyaxõgũxũ, ngēma Naãẽ i Üñexũ pexũ ngũexèèxũācũma. ²⁸ Rü ñuxmax, Pa Chauxacũgũx, rü name nixĩ na meāma Cristuaxũ peyaxõgũxũ na tama nūxũ imuũèxũcèx, rü tama ixānèèxũcèx napèxewa i ngēxguma wena nuã naxũxgu. ²⁹ Pema nūxũ pecuèx na Cristu rü aixcũma mecũ yĩxũ. Rü ngēxgumarũũ ta name nixĩ na nūxũ pecuáxũ na guxũma i duũxũgũ i mexũ ügũxũ rü Tupanaxācũgũ na yixĩgũxũ.

3

Tupanaxācũgũchiga

¹ ¡Dúcèx, Pa Chaueneègũx, ñuxācũ poraācũ tũxũ nangechaũ ya Tanatũ ya Tupana! Rü ngēmacèx nixĩ i naxācũgũmaã tũxũ naxuxũ i nũmax. Rü aixcũma naxācũgũ tixĩgũ. Rü ngēmacèx ñoma i nañecũāx i duũxũgũ rü tama tũxũ nacuáxchaũ erũ Tupanaxũ rü ta tama nacuáxchaũgũ. ² Pa Chaueneègũ ya Pexũ Changechaũgũxe, ñuxma rü marũ Tupanaxācũgũ tixĩgũ woo tama tũxũ nūxũ nacuèxèè na ñuxācũ tá ixĩgũxũ i yixcũra. Natürũ nūxũ tacuèxgũ na Ngechuchurũũ tá ixĩgũxũ i ngēxguma nangõxgu, erũ tá nūxũ tadaugũ na ñuxācũ yĩxũ i nũmax. ³ Rü guxāma ya yĩxema yaxõxẽ na Ngechuchurũũ tá tiixũ, rü tũgũna tadau na Ngechuchu ya Cristurũũ aixcũma Tupanapèxewa tamexũ. ⁴ Natürũ guxāma ya yĩxema pecadu üxe, rü Tupanamaã chixexũ taxũ. Erũ ngēxguma tama Tupanaga taxĩnũgu, rü tapecaduāx. ⁵ Pema nūxũ pecuèx rü Ngechuchu ya Cristu rü ñoma ga nañewa naxũ na iyanaxoxèèāxũcèx i tórũ pecadugũ. Rü nũma rü taguma pecadu naxũ. ⁶ Rü ngēmacèx guxāma ya yĩxema aixcũma nūxũ yaxõgũxe, rü tama pecadu taxũgũecha. Natürũ guxāma ya yĩxema pecadu üechaxe, rü ngēmaācũ tamaxè erũ taguma Cristuxũ tadau, rü taguma nūxũ tacuèx. ⁷ Pa Chauxacũgũx, ¡tāxũ i naga pexĩnũèxũ i ngēma duũxũgũ i pexũ iyarũtauxexèèchaũxũ! Yĩxema mexũ üxe rü aixcũma mecũ

tixĩ, ngẽxgumarũũ ya Cristu na aixcũma mecũ yĩĩxũrũũ. ⁸ Natũrũ yĩxema pecadu uechaxe rũ ngẽmawa tũxũ tacuèx na Chatanáãrũ duũxũ tĩĩxũ, erũ nũma i Chataná rũ noxriarũ ũgũgumama pecadu naxũecha. Rũ yemacẽx ga Tupana Nane rũ ñoma ga naãnewa naxũ na iyanaxoxẽẽãxũcẽx ga yema Chataná ũxũ. ⁹ Rũ yĩxema Tupanaxãcũ ixĩxẽ rũ tama pecadu taxũecha, erũ naxãcũxũchi tixĩ. Rũ taxuacũma pecadu taxũecha erũ Tupana nixĩ ya tũmanatũ. ¹⁰ Yĩxema chixexũ ũxe rũ tũmaẽneẽchi aixe, rũ tama Tupanaxãcũ tixĩ. Rũ ngẽmawa nũxũ tacuèx na texe tixĩgũxũ ya Tupanaxãcũgũ rũ texe tixĩgũxũ ya Chatanáãcũgũ.

Name nixĩ na yigũ ingechaũgũxũ

¹¹ Rũ yexguma noxritama pexũ tangũexẽẽgu, rũ pemaã nũxũ tixu na guxãma yigũ ingechaxũgũxũ. ¹² Rũ tama tanaxwẽxe na Caĩrũũ ngoxo i Chatanáãcũ ixĩgũxũ. Yerũ nũma rũ naẽneẽxũ nimèx. ¿Rũ tacũcèx nixĩ ga yamáãxũ? Nayamèx yerũ yema nũma naxũxũ rũ tama name, rũ yema naẽneẽ ũxũ rũ name. ¹³ Pa Chaueneẽgũx, jĩãxũ i pebaixãchiãẽgũxũ ega pexchi naxaiegu i ñoma i naãnecũãx i duũxũgũ! ¹⁴ Yixema rũ marũ nũxna ítangũxũ i ngẽma yu rũ ñũxma rũ marũ maxũwaama tangẽxmagũ. Nũxũ tacuèxgũ i ngẽma erũ nũxũ tangechaũgũ i taeneẽgũ. Yĩxema tama tũmaẽneẽxũ ngechaũxẽ rũ yuwatama tangẽxma. ¹⁵ Rũ yĩxema tũmaẽneẽchi aixe rũ wũxi i máetaxũrũũ tixĩ. Rũ pema nũxũ pecuèxgũ i wũxi i máetaxũ rũ nũxũ nataxuma i norũ maxũ i taguma gũxũ. ¹⁶ Rũ Ngechuchu ya Cristu rũ tórũ pecaducèx nayu, rũ yemaãcũ tũxũ nũxũ nadauxẽẽ i ngẽma ngechaũ i aixcũma ixĩxũ. Rũ ngẽxgumarũũ ta i yixema, rũ tanaxwẽxe na ímemarexũ na nũxũ rũngũxẽẽxũ i taeneẽgũ woo ngemagu iyũxgu. ¹⁷ Natũrũ ngẽxguma chi wũxi i yatũãxũ nangẽxmagu i muxũma i norũ ngẽmaxũgũ, rũ chi nũxũ nadẽuxgu i namũcũ na nũxũ nataxuxũ, rũ taxuacũma:

“Choma rũ Tupanaxũ changechaũ”, ñanagũrũ, ega tama nũxũ nangũxẽẽgu i namũcũ. ¹⁸ Pa Chauxacũgũx, tama name i taèxmaã rũ tórũ oremaãxĩcatama nũxũ tangechaũ i taeneẽ. Natũrũ tanaxwẽxe i tórũ maxũmaã rũ tórũ ũ i mexũmaã nũxũ tangechaũ.

Tama taxãneẽ na Tupanana ingaicamagũxũ

¹⁹⁻²⁰ Rũ ngẽxguma aixcũma yigũ ingechaũgũgũ, rũ nũxũ tacuèx na aixcũma naga ixĩnũèxũ i ngẽma ore i aixcũma ixĩxũ, rũ Tupanapẽxewa rũ aixcũma naxãcũgũ ixĩgũxũ, woo ngẽxguma taãẽwa nagu rũxĩnũgu rũ:

“Tama Tupanaxãcũ chixĩ”, ñagũgu. Erũ nũxũ tacuèx rũ Tupana nixĩ i taãẽãrũ yexera, rũ nũma nũxũ nacuèx i guxũma. ²¹ Pa Chaueneẽgũ ya Pexũ Changechaũgũxex, ngẽxguma taãẽwa nũxũ icuèxgu na Tupanaxãcũxũchi ixĩgũxũ, rũ tama taxãneẽ na nũxna ingaicamagũxũ ya Tanatũ ya Tupana. ²² Rũ nũma tá tũxna nanaxã i guxũma i tacũ i naxcèx íçaxũ erũ naga taxĩnũẽ i ngẽma tũxũ namuxũ rũ tanaxũ i ngẽma nũma namaã nataãèxũ. ²³ Rũ nũma tũxũ namu na Nane ya Ngechuchu ya Cristuaxũ yaxõgũxũ rũ yigũ ingechaũgũxũ, yema nũma tũxũ namuxũãcũ. ²⁴ Rũ yĩxema naga Ìnũèxẽ i ngẽma Tupana tũxũ muxũ, rũ aixcũma Tupanaãrũ duũxũgũ tixĩgũ rũ nũma ya Tupana rũ aixcũma tũmawa namaxũ. Rũ ñũxma rũ nũxũ tacuèx na aixcũma Tupanaãrũ duũxũgũ ixĩgũxũ rũ tawa namaxũxũ, erũ Naãẽ i Ûnèxũ ga tũxna namuxũ tũxũ nũxũ nacuèxèẽ.

4

Yíxema tüxũ nangẽxmaxẽ i Tupanaãẽ i Üünexũ rü yíxema tüxũ nangẽxmaxẽ i Cristuarü uwanüãẽ

¹ Pa Chaueneëgü ya Pexũ Changechaũgüxex, jTãxũ i nüxũ peyaxõgüxũ i guxũma i orearü uruũgü i nügü ixugügüxũ na aixcüma Tupanaãrũ orearü uruũgü yixĩgüxũ! Natürü name nixĩ i penangugü i norü ore na nüxũ pecuáxcèx ngoxita aixcüma Tupanaãẽ yĩxũ i nawa idexaxũ rü êxna tama. Erü ñoma i naãnewa rü guxũwama nangẽxma i muxũma i idoratèèxgüxũ i nügü ixugüxũ na Tupanaãrũ orearü uruũgü yixĩgüxũ. ² Rü tá pemaã nüxũ chixu na ñuxãcü tá nüxũ pecuáxũ na texé tĩxũ ya yíxema aixcüma Tupanaãẽ tümawa ngẽxmaxẽ. Rü dücax, guxũma i orearü uruũgü i nüxũ ixugüxũ na Tupana duũxũxũ yaxĩxèèxũ ya Ngechuchu ya Cristu, rü ngẽma nixĩ i aixcüma Tupanaãẽ nawa idexaxũ. ³ Natürü guxũma i ngẽma orearü uruũgü i tama nüxũ ixugüxũ na Tupana duũxũxũ yaxĩxèèxũ ga Ngechuchu, rü ngẽma rü tama nüxũ nangẽxma i Tupanaãẽ i Üünexũ. Natürü Cristuarü uwanüãẽ nixĩ i nawa ngẽxmaxũ. Marü nüxũ pexĩnũe na Ínanguxchaũxũ i Cristuarü uwanü, natürü ñuxma rü marü ñoma i naãnewa nangẽxma. ⁴ Pa Chauacügüx, pema rü Tupanaxãcügü pixĩgü. Rü marü nüxũ perüyexera i ngẽma tama aixcüma Tupanaãrũ orearü uruũgü ixĩgüxũ. Erü ngẽma Tupanaãẽ i Üünexũ i peãewa ngẽxmaxũ rü nüxũ narüyexera i ngẽma Cristuarü uwanüãẽ i ñoma i naãnecũãxgüwa ngẽxmaxũ. ⁵ Rü nüma i Cristuarü uwanüãrũ duũxũgü rü ñoma i naãnecũãxgü nixĩ. Rü ngẽmacèx ñoma i naãnechigagu nidexagü. Rü ñoma i naãnecũãx i duũxũgü rü nüxũ inarũxĩnũe. ⁶ Natürü i yíxema rü Tupanaxãcügü tixĩgü. Rü yíxema Tupanaxũ cuáxe rü tũxũ itarũxĩnũ. Natürü yíxema tama Tupanaxũ cuáxe rü tama tũxũ itarũxĩnũ. Rü ngẽmawa nüxũ tacuèxgü na texé tixĩgüxũ ya aixcüma Tupanaãrũ duũxũgü ixĩgüxe rü texé tixĩgüxũ ya Cristuarü uwanüãrũ duũxũgü ixĩgüxe.

Tupana tüxũ nangechaũ

⁷ Pa Chaueneëgü ya Pexũ Changechaũgüxex, name nixĩ na yigü ingechaũgüxũ, erü Tupana nixĩ ya tũxũ ngüxèècü na yigü ingechaũgüxũ. Rü guxũma ya yíxema tümãeneèxũ ngechaũxè rü Tupanaxãcü tixĩgü rü Tupanaxũ tacuèx. ⁸ Yíxema tama tümãeneèxũ ngechaũxè rü tama Tupanaxũ tacuèx, erü Tupana nixĩ ya tũxũ ngüxèècü na yigü ingechaũgüxũ. ⁹ Tupana rü ñoma ga naãnewa nanamu ga Nane ya nügümaã wüxicacü na yimagagu tũxũ nangẽxmaxũcèx i maxũ i taguma gúxũ. Rü yemawa Tupana tũxũ nüxũ nadauxèè na ñuxãcü tũxũ nangechaũxũ. ¹⁰ Rü woo Tupanaxũ tangechaũgü, natürü ngẽma ngechaũ i guxũãrũ yexera ixĩxũ nixĩ na nüma tũxũ nangechaũxũ rü ñoma ga naãnewa na namuãxũ ga Nane na taxcèx nayuxũcèx rü naxũtanüãxũcèx ga tóru pecadugü. ¹¹ Pa Chaueneëgü ya Pexũ Changechaũgüxex, yexguma yemaãcü tũxũ nangechaũgu ga Tupana, rü ngẽmacèx name nixĩ i yíxema rü ta yigü tangechaũgü. ¹² Taguma texé Tupanaxũ tadau. Natürü ngẽxguma aixcüma yigü ingechaũgügu, rü Tupana rü tawa namaxũ rü norü ngechaũ rü aixcümaxũchi tóru maxũwa nangox. ¹³ Rü nüma rü marü tũxna nanamu ga Naãẽ i Üünexũ. Rü ngẽmawa nüxũ tacuèx na aixcüma norü duũxũgü ixĩgüxũ rü nüma rü tawa na namaxũxũ. ¹⁴ Rü tomatama nüxũ tadaugü rü nüxũ tixuchigagü na Tanatü ya Tupana núma namuxũ ga Nane na guxũma i duũxũgüxũ namaxèxèèxũcèx. ¹⁵ Rü

yíxema yaxōxē rü nüxü ixuchigaxe na Tupana Nane yíixü ya Ngechuchu, rü aixcüma Tupanaärü duüxü tixí, rü Tupana rü tümawa namaxü. ¹⁶ Rü yíxema nüxü tacuèxgü rü tayaxōgü na Tupana rü poraäcü tüxü nangechaüxü, erü nüma nixí i aixcüma guxāxü nangechaüxü. Rü yíxema aixcüma tümäeneëxü ngechaüxē, rü Tupanaärü duüxü tixí, rü nüma ya Tupana rü aixcüma tümawa namaxü. ¹⁷ Rü ngëxguma aixcüma Tupanaxü ingechaügügu, rü tórü maxüwa nangox i ngëma, rü täütáma nüxü tamuüē i ngëma ngunexü i nagu tüxü yacagüxügu naxcèx i tórü maxü. Erü woo ñoma i naãnewa tangëxmagü, natürü napëxewa rü Cristurüü tixígü. ¹⁸ Rü ngëxguma aixcüma Tupanaxü ingechaügügu, rü nüxü tacuèx na täütáma tüxü napoxcuexü, rü ngëmacèx taxucèxma nüxü tamuüē. Natürü ngëxguma chi nüxü imuüēgu, rü nüxü tacuèx na tama aixcüma nüxü ingechaügüxü. ¹⁹ Rü yíxema rü Tupanaxü tangechaügü, yerü nüxíra tüxü nangechaü ga nümax. ²⁰ Ngëxguma chi texé:

“Choma rü Tupanaxü changechaü”, ñagügu, natürü tümäeneëchi tax-aixgu, rü tidora. Erü ngëxguma tama nüxü tangechaügu i tümäeneē i nüxü tadauxü ¿rü ñuxücürüwa tá nüxü tangechaü ya Tupana ya tama nüxü tadaucü? ²¹ Rü Ngechuchu ya Cristu tüxü namu rü ñanagürü:

“Yíxema Tupanaxü ngechaüxē, rü name nixí na tümäeneëxü rü ta tangechaüxü”, ñanagürü.

5

Nüxü tarüyexera i ñoma i naãneärü ngüchaügi

¹ Ngechuchu rü Tupana Nane ya Cristu nixí. Rü guxāma ya yíxema nüxü yaxōxē, rü Tupanaxäcü tixígü. Rü yíxema Tanatü ya Tupanaxü ngechaüxē, rü nüxü tangechaü ta i guxüma i naxäcügü. ² Rü ngëxguma Tupanaxü ingechaügügu rü naxüxgu i ngëma nüma tüxü namuxü, rü nüxü tacuèx na aixcüma nüxü ingechaügüxü i ngëma naxäcügü ixígüxü. ³ Rü ngëxguma aixcüma Tupanaxü ingechaügügu rü naga taxínüē i ngëma tüxü namuxü. Rü ngëma tüxü namuxü rü tama naguxcha na naga ixínüëxü. ⁴ Erü guxāma ya aixcüma Tupanaxäcü ixíxē, rü tama ñoma i naãneärü ngüchaü i chixexügu tarüxínü. Rü yíxema rü tayaxōgü, rü ngëmacèx tama name i ñoma i naãneärü ngüchaü i chixexügu tarüxínüē. ⁵ Rü yíxema yaxōxē na Tupana Nane yíixü ya Ngechuchu, rü yíxema tixí ya tama ñoma i naãneärü ngüchaü i chixexügu rüxínüxē.

Ore i Tupana Nanechiga

⁶ Rü nüxü tacuèx na aixcüma Tupana Nane yíixü ya Ngechuchu. Yerü yexguma ñoma ga naãnewa nayexmagu rü dexáwa ínabaiegu, rü nümatama ga Tupana nüxü nixu na Nanexüchi yíixü. Rü yexguma curuchagu nayuxgu rü nagü inabaägu ga Ngechuchu, rü Tupana rü wenaxärü inanawéx na aixcüma Nane na yíixü. Rü ngëxgumarüü ta i ngëma Naãē i Üünexü i taguma idoraxü, rü tüxü nüxü nacuëxēē na aixcümaxüchi Tupana Nane na yíixü. ⁷ Rü ngëmaäcü tüxü nangëxma i tomaëxpüx i cuèxruügi i tüxü nüxü cuèxēēxü na aixcüma Tupana Nane yíixü ya Ngechuchu. ⁸ Rü ngëma norü wüxi nixí i Naãē i Üünexü, rü ngëma norü taxre nixí ga yema Tupanaga ga yexguma Ngechuchu dexáwa íbaiegu, rü ngëma norü tomaëxpüx nixí ga yema Tupana üxü ga yexguma curuchagu nagü inabaägu ga Ngechuchu. Rü guxüma i ngëma tomaëxpüx, rü

wüxigu nüxü nixu na aixcüma Tupana Nane yïxü ya Ngechuchu. ⁹ Nüxü tayaxögü i duüxügü ega tacüxü tamaã yaxugügu. Natürü Tupanaärü ore nixi i yexeraacü aixcümaxüchi ixixü. Rü Tupana nixi ya tamaã nüxü ixucü na Ngechuchu rü Nane yïxü. ¹⁰ Rü yixema nüxü yaxõxë ya Tupana Nane rü nüxü tacuèx na aixcüma yïxü i ngëma ore i Tupana nüxü ixuxü i Nanechiga. Natürü yixema tama Tupanaãxü yaxõxë rü doratèex nüxü tawogü ya Tupana erü tama tayaxõ i ngëma ore i Tupana nüxü ixuxü i Nanechiga. ¹¹ Rü ñaã nixi i norü ore ya Tupana i tamaã nüxü yaxuxü, rü ñanagürü:

“Chomatama marü pexna chanaxã i maxü i taguma gúxü. Rü ñaã maxü rü Chaunegagu pexü nangëxma”,
ñanagürü. ¹² Yixema nüxü yaxõxë ya Tupana Nane rü tüxü nangëxma i ngëma maxü i taguma gúxü. Natürü yixema tama nüxü yaxõxë ya yima Tupana Nane rü tama tüxü nangëxma i ngëma maxü.

Cuáŭ rü ñuxre ga norü ucuxëmaã inayacuèxëẽ ga norü popera

¹³ Pa Chaueneëgüx ya Tupana Naneãxü Yaxögüxex, pexcèx chanaxümatü i ñaã ore na nüxü pecuáxücèx na pexü nangëxmaxü i ngëma maxü i taguma gúxü. ¹⁴ Rü ngëmacèx tama taxãneë na nüxna ingaicamagüxü ya Tupana. Rü nüxü tacuèxgü ega tacüçèx nüxna icaxgu, rü nüma tüxü naxïnü i ngëxguma norü ngüchaü yixïgu i ngëma naxcèx nüxna icaxü. ¹⁵ Rü ngëxguma nüxü icuèxgu na nüma tüxü naxïnü i ngëxguma tacüçèx nüxna icaxgu, rü nüxü tacuèx ta na tüxna naxããxü i ngëma naxcèx nüxna icaxü. ¹⁶ Rü ngëxguma chi texè nüxü dèuxgu i tümaëneë na pecadu naxüxü, rü name nixi na naxcèx tayumüxexü ega tama pecadu i iyanatauxëèxü yixïgu. Rü Tupana tá nanamaxëë i ngëma tümaëneë ega tama pecadu i iyanatauxëèxü yixïgu. Nangëxma i pecadu i tüxü iyarütauxëèxü. Rü ngëxguma ngëma pecaduwe naxüãmagu i wüxi i peeneë, rü tama pemaã nüxü chixu na naxcèx peyumüxëgüxü. ¹⁷ Guxüma i chixexü i ixüxü, rü pecadu nixi. Natürü nangëxma i pecadu i tama tüxü iyarütauxëèxü. ¹⁸ Rü nüxü tacuèx, rü yixema Tupanaxãcü ixixë, rü tama pecadu taxüecha, erü nüma ya Tupana Nane rü tüxna nadau. Rü taxuacüma tüxna nangaicama i ngoxo i Chataná i tüxü pecaduãxëèchaüxü. ¹⁹ Nüxü tacuèxgü na Tupanaxãcügü ixïgüxü, natürü guxüma i ñoma i naãnecüãx rü ngoxo i Chatanámxëwa nangëxmagü. ²⁰ Rü nüxü tacuèx ta na ñoma ga naãnewa nanguxü ga Tupana Nane, rü tüxna nanaxã ga cuèx na nüxü icuèxgüxücèx ya yima aixcümaxüchi Tupana ixïcü. Rü norü duüxügü tixïgu ya yima aixcümaxüchi Tupana ixïcü, erü Nane ya Ngechuchu ya Cristuarü duüxügü tixïgu. Rü nüma ya Tupana Nane nixi i aixcümaxüchi Tupana yïxü rü tüxna naxããxü i maxü i taguma gúxü. ²¹ Pa Chauzacügüx, ¡Pegüna pedaugü na tama nüxü peyaxögüxücèx i tupanachicügü! Rü ngëxicatama nixi i chorü ore i pemaã nüxü chixuxü.

Rü nuãma pexna,
Cuáŭ

NORŨ TAXRE GA POPERA GA CUÁŨ ŨMATŨXŨ

Cuáŭãrũ moxẽ

¹ Pa Chaueneẽgũ i Yaxõgũxe ya Tupana Pexũ Dexex, pexcex chanaxũmatũ i choma i Cuáŭ i yaxõgũxũãrũ ãẽxgacũ na chiĩxũ. Choma rũ aixcũma pexũ changechaũ. Rũ tama i chaxica, natũrũ guxũma i ngẽma nũxũ cuẽxgũxũ i Tupanaãrũ ore i aixcũma ixĩxũ, rũ ngẽxgumarũũ ta pexũ nangechaũgũ. ² Pexũ tangechaũ erũ toxrũũ nũxũ pecuẽxgũ i ngẽma ore i aixcũma ixĩxũ i guxũgutãma tawa ngẽxmaxũ. ³ Rũ nũma ya Tanatũ ya Tupana rũ Nane ya Ngechuchu ya Cristu rũ poraãcũ tá pexũ narũngũxẽẽgũ rũ nũxũ pengechaũtũmũũgũ rũ pexũ nataãẽxẽẽgũ, erũ nũxũ pecuẽx i ngẽma ore i aixcũma ixĩxũ rũ pegũ pengechaũgũ. ⁴ Rũ poraãcũ chataãẽ ga yexguma nũxũ chadẽuxgu na ñuxãcũ ñuxre i petanũxũgũ rũ aixcũma meã naga na naxĩnũẽxũ i ngẽma ore i aixcũma ixĩxũ, yema Tanatũ ya Tupana tũxũ muxũrũũ. ⁵ Rũ ñuxmax, Pa Chaueneẽgũ ya Pexũ Changechaũgũxex, rũ pexna nũxũ chacuẽxãchixẽẽ na namexũ na yigũ ingechaũgũxũ. Rũ ngẽma rũ tama wũxi i ngexwacaxũxũ i Tupanaãrũ mu nixĩ. Natũrũ yematama nixĩ ga mu ga noxriarũ ügũgumama Tupana tũxna ãxũ. ⁶ Ngẽxguma Tupanaxũ ingechaũgũgu, rũ tanaxũ i guxũma i ngẽma tũxũ namuxũ. Erũ nũma rũ noxriarũ ügũgumama tamaã nũxũ nixu na yigũ ingechaũgũxũcex i wũxichigũ.

Orearũ uruũgũ i womũxẽẽruũchiga

⁷ Guxũwama i ñoma i naãnewa rũ nanaxĩãne i muxũma i womũxẽẽruũgũ ixĩgũxũ. Rũ nũxũ nixuchigagũ na tama Tupana duũxũxũ yaxĩxẽẽxũ ga Ngechuchu ya Cristu. Rũ ngẽma ngẽmaãcũ idexaxũ, rũ wũxi i womũxẽẽruũ nixĩ, rũ Cristuarũ uwanũ nixĩ. ⁸ ¡Ipxuãẽgũ na taxũema pexũ womũxẽẽgũxũcex rũ na tama natũcexma yũxũcex i tũrũ puracũ! ¡Natũrũ meã peyaxõgũama na aixcũma penayaxuxũcex i guxũma i ngẽma Tupana pexna ãxchaũxũ! ⁹ Rũ yĩxema nangupetũxẽẽxẽ ga yema Cristu tũxũ ngũexẽẽxũ, rũ tama aixcũma Tupanaxũ tacuẽx. Natũrũ yĩxema tama nũxna íchoxũxẽ ga yema Cristu tũxũ ngũexẽẽxũ, rũ aixcũma nũxũ tacuẽx ya Tanatũ ya Tupana rũ Nane ya Ngechuchu. ¹⁰ Rũ ngẽxguma chi wũxi i duũxũ petanũwa nguxgu rũ tama yema Cristu tũxũ ngũexẽẽxũmaã pexũ nangũexẽẽgu, rũ ¡tãũtãma penayaxu i pechiũwa rũ bai i nũxũ perũmoxẽgũ! ¹¹ Erũ ngẽxguma wũxie tũmachiũwa nayauxgu, rũ tananaãẽraxũ rũ natanũxũ tũgũ tixĩxẽẽ nawa i ngẽma norũ chixexũ.

Cuáŭãrũ ore ga nawa iyacuáxũ

¹² Choxũ nangẽxma i muxũma i to i ore i pemaã nũxũ chixuxchaũxũ. Natũrũ tama chanaxwexe na ñaã poperawa pemaã nũxũ chixuxũ, erũ paxa tá petanũwa íchayadauxchaũ na chomatama pemaãxũchi nũxũ chixuxũcex na ngẽmaãcũ wũxigu aixcũma itaãẽgũxũcex. ¹³ Rũ ngẽma nuã natanũwa changẽxmaxũ i yaxõgũxũ i peeneẽgũ ixĩgũxũ i Tupana dexũ, rũ pexũ narũmoxẽgũ. Rũ ngẽxĩcatama nixĩ i chorũ ore i pemaã nũxũ chixuxũ.

Rũ nuãma pexna,
Cuáŭ

NORŨ TOMAĒXPŨX GA POPERA GA CUÁŨ ŨMATŨXŨ

Cuáŭ rŭ Gayumaã nataãẽ

¹ Pa Chaueneẽ, Pa Gayu i Aixcũma Cuxũ Changechaũxẽx, rŭ cuxcèx chanaxumatũ i choma i Cuáŭ i yaxõgũxũãrũ ãẽxgacũ na chĩxũ. ² Pa Chaueneẽx, Tupana chaca na meã cuxna nadauxũcèx i curũ maxũwa rũ cuxnewa, ngẽma curũ õwa cuxna na nadauxũrũũ. ³ Rũ poraãcũ chataãẽ ga yexguma núma naxĩxgu ga ñuxre ga taeneẽgũ, rũ chomaã nüxũ yaxugũgu ga cuchiga na ñuxãcũ meã cuyaxõxũ i Tupanaãrũ ore i aixcũma ixĩxũ, rũ guxũguma meã naga na cuxĩnũxũ. ⁴ Rũ guxũguma chataãẽxũchi i ngẽxguma nüxũ chaxĩnũgu na ñuxãcũ Tupanaãrũ ore nüxũ ixuxũãcũma meã namaxẽxũ i chauxacũgũ. Rũ aixcũma nataxuma i to i taãẽ i ngẽmaãrũ yexera ixĩxũ. ⁵ Pa Chaueneẽ i Cuxũ Changechaũxẽx, mexũ cuxũ erũ nüxũ curũngũxẽẽ i ngẽma togũ i taeneẽgũ i toxna-mana ne ìxũ i cuxũtawa ngugũxũ. ⁶ Rũ nümagũ rũ nuã nangugũ, rũ torũ ngutaquẽxepataũwa nüxũ nixugũe na ñuxãcũ nüxũ cungechaũxũ rũ namaã cumecũmaxũ. Rũ chanaxwèxe i nüxũ curũngũxẽẽ i ngẽma taeneẽgũ i ngẽxguma wena cuxũtawa nangugũgu. Rũ ngẽxguma cuxna iyaxĩxgu rũ jnũxna naxã i tacũ i nüxũ taxuxũ i norũ namawaũ! Erũ Tupanaãrũ me nixĩ na ngẽmaãcũ nüxũ rũngũxẽẽxũ i norũ orearũ uruũgũ. ⁷⁻⁸ Rũ nümagũ, rũ Ngechuchu ya Cristuarũ puracũ nixĩ i naxũgũxũ, rũ ngẽmacèx norũ oremaã nanaxĩãne. Natũrũ tama nanayauxgũ i ngẽma tama yaxõgũxũãrũ ngũxẽẽ, rũ ngẽmacèx name nixĩ i yixema na nüxũ rũngũxẽẽgũxũ na ngẽmaãcũ yixema rũ ta wũxigu namaã naxũgũxũcèx i Tupanaãrũ puracũ.

Diótepe rŭ chixexũ naxũ natũrũ Demétriu rŭ mexũ naxũ

⁹ Choma rũ marũ chanaxumatũ i wũxi i popera naxcèx i ngẽma tupaucatanũxũgũ i curũ ãñewa ngẽxmagũxũ. Natũrũ nüma i Diótepe rũ tama naga naxĩnũchaũ i ngẽma nüxũ tixuxũ, erũ nanaxwèxe na nümatama namuãxũ i ngẽma tupaucatanũxũ. ¹⁰ Rũ ngẽxguma ngema chaxũxgu rũ tá nüxũ chaxoregũ erũ tochiga i chixexũmaã inayarũdexanexũ. Rũ woo tomaã na ngexũ nawagũxũ, rũ naetũwa to i chixexũ naxũ, erũ tama nanayauxchaũ i ngẽma taeneẽgũ i ngema ngugũxũ. Rũ nanachũxu na texé nayaxuxũ i ngẽma taeneẽgũ. Rũ yixema nayauxchaũxẽ, rũ ngutaquẽxepataũwa tũxũ ínawoxũ. ¹¹ Pa Chaueneẽ i Cuxũ Changechaũxẽx, jTãxũ i nüxũ cuyadauxũxũ i ngẽma togũ i chixexũ ũgũxũ! Natũrũ name nixĩ i nüxũ cuyadauxũ i ngẽma mexũ ũgũxũ. Erũ yixema guxũguma mexũ úxe rũ Tupanaxãcũ tixĩ. Natũrũ yixema chixexũ ũechaxe rũ tama Tupanaxũ tacuèx. ¹² Guxũma i duũxũgũ nüxũ ixuxgu i Demétriu rũ wũxi ya mecũ nixĩ. Rũ toma rũ ta nüxũ tacuèx na meã naga naxĩnũxũ i Tupanaãrũ ore i aixcũma ixĩxũ. Rũ ngẽmacèx toma rũ ta nüxũ tixu na aixcũma mecũ yĩxũ. Rũ cuma nüxũ cucuèx na aixcũma na yĩxũ i ngẽma nüxũ tixuxũ.

Cuáũãrũ ore ga nawa iyacuáxũ

13 Choma choxŭ nangěxmachirěx i muxŭma i chorü ore i cumaã nüxŭ chixuxchaŭxŭ, natürü tama ñãã poperagu cuxcèx chanaxümatüchaŭ. 14 Erü choma rü paxa ngema chaxŭchaŭ, rü ngěxguma rü meã tá yigümaã tidexagü. 15 ¡Meã cuxŭ naxüpetü rü tãxŭ i cuxoegaãěxŭ! Tamüçügü i númacŭãx rü moxě cuxcèx ngema namugü. Rŭ chanaxwèxe i nüxŭ curümoxě i wüxichigü i tamüçügü i ngema ngěxmagüxŭ. Rŭ ngěxĩcatama nixĩ i chorü ore i cumaã nüxŭ chixuxŭ.

Rŭ nuãma cuxna,
Cuáŭ

POPERA GA YUDA ÜMATÜXÜ

Yema yaxõgüxü narümoxë ga Yuda

¹ Pa Yaxõgüxü i Guxüwama Ngëxmagüxüx, choma i Yuda nixi i pexcëx chanaxümatüxü i ñaã popera. Rü choma nixi i Chaütiágueneë chiüxü, rü Ngechuchu ya Cristuarü duüxü chixi. Rü pexcëx chanaxümatü i pema na Tanatü ya Tupana pexü dexü rü pexü ngechaüxü rü Ngechuchu ya Cristu pexna dauxü. ² Rü pexcëx chayümüxë na guxüguma Tupanaãxü pengechaütümüügüxücëx, rü pexü nataãëxëëgüxücëx, rü pexü nangechaüxücëx.

Duüxügü i doramaã ngüexëëtaegüxüchiga

³ Pa Chaueneëgü ya Pexü Changechaügüxex, noxri rü poraãcü choxü nangüchaü na pexcëx chanaxümatüxü nachiga i ngëma maxü i taguma güxü i tüxü ngëxmaxü. Natürü ñuxma na petanügu nachocuxü i ñuxre i duüxügü i íyatoxëëgüchaüxü i Tupanaãrü ore, rü ngëmacëx chanaxwëxe na pexcëx chanaxümatüxü na pexü chaxucuxëxücëx rü ípenapoxüxücëx i ngëma ore i aixcüma ixixü ga nuxcüma wüxicanatama Tupana norü duüxügüna äxü. ⁴ Rü ngëma duüxügü i pexü nawomüxëëäcüma petanügu chocuxü nixi i pexü ngüexëëxü rü ñaxü:

“Tupana rü namecümaxüchi rü ngëmacëx täütáma pexü napoxcue ega woo chixri pemaxëgu”, ñaxü. Rü ngëxgumarüü ta tama nüxü nacüxëgüchaü ya tórü Cori ya Ngechuchu ya Cristu ya tórü yora ixicü. Natürü ngëma duüxügü i ngëmaãcü maxëxü, rü woetama nuxcümmama Tupanaãrü ore i ümatüxüwa rü marü nüxü nixu na Tupana tá napoxcuxü. ⁵ Rü woo na marü nüxü pecuáxü natürü pexna nüxü chacuëxächixëëchaü na ñuxäcü namaã nangupetüxü ga yema nuxcümaügüxü ga Yudiügü ga Moïchéwe rüxixü. Rü tórü Cori ya Tupana rü poraãcü nüxü narüngüxëë na Equitanewa ínangüxüxücëx, natürü yixcama rü nanadai ga yema tama naga ñnüëchaüxü. ⁶ Rü ngëxgumarüü ta pexna nüxü chacuëxächixëë na ñuxäcü namaã nangupetüxü ga yema daxücüäx ga orearü ngeruügü ga noxri ixüünechirëxü natürü yixcama nagagutama pecadu ügüxü. Rü yemacëx ga Tupana rü ëänexüwa nanawogü, rü ngëxma nanapoxcue ñuxmatáta nawa nangu i ngëma ngunexü i nagu tüxü yacagüxü. ⁷ Rü yexgumarüü ta nüxü nangupetü ga guma ñänegü ga Chodoma rü Gomora rü guma ñänegü ga norü ngaicamagugüne. Yerü guma ñänecüäxgü, rü poraãcü chixri nügümaã namaxë, rü yemacëx ga Tupana rü üxümaã ínanagu. Rü yemaãcü inayanaxoxëë ga guma ñänegü na yemawa tüxü nüxü nacüxëëxücëx na nangëxmaxü i wüxi i poxcu naxcëx i guxüma i ngëma chixexü ügüxü. ⁸ Natürü woo ngëmaxü na nacüxëgüxü i ngëma idoraexü i petanügu chocuxü, natürü norü chixexügu narüxñüëäma. Rü poraãcü chixri nügümaã namaxë, rü tama tórü Cori ya Tupanaga naxñüëchaü, rü chixri Tupanaãrü orearü ngeruügü i daxücüäxchigagu nidexagü. ⁹ Rü ngëma duüxügü rü naëchitamare nidexagü rü tama Tupanaãrü orearü ngeruü ga Miguérerüü nügüna nadau i norü orewa. Rü guma Miguére rü woo guxü i Tupanaãrü orearü ngeruügü i daxücüäxärü äëxgacü na yixü, natürü tama ngoxo ga Chatanaãma naguxchiga ga yexguma Moïchéxüncëx yéma nügümaã yaporagatanücüüxgu, na nüxü

nacuëxgüxcèx na texéarü tá yïixü ga Moïchéxüne. Natürü nüma ga Miguére rü ñanagürümare:

“Cori ya Tupana tá cuxü nanga”,

ñanagürümare. ¹⁰ Natürü ngëma duüxügü i doramaã i petanügu chocuxü, rü tama Tupanaxü nacuëxgüäcüma chixri nachiga nidexagü, rü chixri norü orearü ngeruügu i daxüçüäxchiga nidexagü. Rü ñoma naëxügürüü naxüneärü ngúchaüwemare narüxï, rü ngëmaäcü namaxë. Natürü ngëma chixexü i naxügüxcèx, rü Tupana tá nanapoxcue. ¹¹ Rü wüxi i ngechaüxüchi nixï naxcèx i ngëma duüxügü erü ngëmaäcü namaxë. Rü Caï ga naëneëxü imáxürüü nixïgü. Rü äëxgacü ga Baráürüü dïërucèx chixexü naxügü. Rü Corérüü tama Tupanaga naxïnüëchaü, rü ngëmacèx Tupana tá nanapoxcue. ¹² Rü ngëxguma tupaucawa tórü Coriarü ðnacèx pengutaquëxegügu, rü wüxi i änexüchi nixïgü. Erü narücutanüxü, rü poraäcü nachibüe rü naxaxegü, rü nügüguxicatama narüxïnüë. Rü ñoma caixanexü i ngearü pucüäxü i paanexüëtüwa üpetüxü natürü tama nanetüxü ixaiyagüxürüü taxuwama nime. Rü ngëma nanetügü i ngëxguma norü owa nanguxgu rü tama ixoxürüü nixïgü. Rü ñoma naïgü i guxüma i naxchümëxãmaã napuxü rü yuxuchixürüü taxuwama nime i ngëma duüxügü. ¹³ Rü ñoma yuape i taxü i norü chixixü i äüächixü naxãnacüwa yataxürüü nixïgü, erü poraäcü chixexü naxügü. Rü ñoma woramacurigü ya nu ne naxïmarecürüü nixïgü. Natürü Tupana rü marü namaã nanaxuegu na ngëma waanexüchixüwa guxügutáma nawogüäxü. ¹⁴⁻¹⁵ Rü nuxcümaücü ga Enó ga Adáütaa ixïcü rü ngëma duüxügüchiga nidexa ga yexguma Tupana yadexaxëëgu, rü ñanagürü:

“Rü nüxü chadau ya Cori ya Tupana na muxüchixü i norü orearü ngeruügu i daxüçüäxmaã nüma ücü na duüxügüna naçaxüxcèx i norü maxüchiga rü napoxcueäxüxcèx i guxüma i ngëma duüxügü i chixexü ügüxü rü namaã guxchigagüxü”,

ñanagürü. ¹⁶ Rü ngëma duüxügü rü ñacüxcèx idexagüwëxexüchixü nixïgü, rü toguäxü ixuxwëxegüxüchixü nixïgü. Rü noxrütama ngúchaüxcèx daugüxü nixïgü. Rü nügü icuëxüügüxü nixïgü. Rü nümaxü meã tûmachiga nidexagünetä ya duüxëgü, na tûmaxütawa ñacü na nayauxgüxcëxmare.

Yuda nayaxucuxëgü ga yema yaxögüxü

¹⁷ Pa Chaueneëgü ya Pexü Changechaügüxex, jñüxna pecuëxächie ga yema ore ga pemaã nüxü yaxugügüxü ga tórü Cori ya Ngechuchu ya Cristuarü ngüexügü ga imugüxü! ¹⁸ Rü nümagü rü ñanagürügü pexü:

“Ngëxguma nagüxchaügu i naäne rü tá nangëxma i duüxügü i tá nüxü cügüexü i Tupanaärü ore rü noxrütama ngúchaü i chixexügumare maxëxü”,

ñanagürügü pexü. ¹⁹ Rü ngëma duüxügü nixï i pexü itoyexü na tama wüxigu perüxïnüëxüxcèx rü tama meã peyaxögüxüxcèx. Rü nümagü rü naxüneärü ngúchaüwe narüxï, rü tama nawa nangëxma i Tupanaãe i Üünexü. ²⁰ Natürü pemax, Pa Chaueneëgü ya Pexü Changechaügüxex, jrü pegü perüngüxëëx na guxüguma yexeraäcü nagu pexïxü rü peyaxögüxü i ngëma ore i üünexü i marü peyauxgüxü! jRü guxüguma Tupanaãe i Üünexüärü ngüxëëmaã peyumüxëgü! ²¹ jRü guxüguma nagu pexï i ngema Tupanaärü ngechaxü! jRü meã ipenangüxëëx i ngëma ngunexü i nagu tá nüma naxüxü ya tórü Cori ya Ngechuchu ya Cristu na nüxü ingechaütümüügüäcüma tûxna naxãäxüxcèx i maxü i taguma gúxü!

22 ;Rü pexũ nangechaũtũmũũgũ i ngẽma tama aixcũma yaxõgũxũ, rü nüxũ perũngũxẽẽgũ na meã yaxõgũãxũcèx! 23 Rü togũ, ;rü paxa norũ pecaduwa ípenayaxuchi na namaxẽxũcèx rü tama yima üxũ ya Tupana mexẽnegu yanatauxexũcèx! Rü woo ngẽma tama yaxõgũchaũxũ, ;rü pexũ nangechaũtũmũũgũ! ;Natũrũ pegũna pedaugũ na tama norũ chixexũgu peyixũcèx! Rü ngẽma norũ chixexũ i pexcèx mexcũraxũxũ, ;rü nüxũ pexo!

Tupanaxũ yacuèxũũãcũma inayacuèxẽẽ ga norũ popera

24-25 Rü yima wũxitama ya Tupana ya tórũ Maxẽxẽruũ ixĩcũ, rü nüxũ nangẽxma i pora na pexna nadauxũcèx na tama pecadugu peyixũcèx. Rü nüxũ nangẽxma i pora na iyanaxoxẽẽãxũcèx i guxũma i perũ chixexũgũ na petaãẽgũãcũma nügũpẽxewa pexũ nagagũxũcèx i ngextá ãẽxgacũ íyĩxũwa. Rü ngẽmacèx tanaxwexe i tórũ Cori ya Ngechuchu ya Cristuégagu Tupanaxũ ticuèxũũgũ, erũ nüma rü guxũãrũ yexera name rü napora, rü guxũetũwa nangẽxma, rü guxũmaã inacuèx. Rü yemaãcũ nixĩ ga nuxcũmaxũchima, rü ngẽmaãcũ nixĩ i ñuxmax, rü guxũgutáma ngẽmaãcũ yĩ.

Rü nuãma pexna,
Yuda

YEMA CUÁÜ NÜXÜ DAUXÜ I YIXCÜRA TÁ NGUPETÜXÜCHIGA

Ore ga Cuáüxü nüxü nacuèxêxü ga Ngechuchu ga Cristu

¹ Ñaã nixí i ngêma ore ga Tupana Ngechuchu ya Cristuxü nüxü cuèxêxü na nüxí norü duüxügüxü nüxü nacuèxêxüçèx i ngêma paxa tá ngupetüxü. Rü nüma ga Ngechuchu ya Cristu nixí ga norü orearü ngerüü ga daxüçüãxü namuxü na norü duüçü ga Cuáümaã nüxü na yaxuxüçèx. ² Rü choma i Cuáü chixí ga aixcüma meãma nüxü chadauxü rü chanaxümatüxü ga guxüma ga yema Tupanaãrü ore ga Ngechuchu chauxcèx ngoxêxü. ³ Rü tataãê ya yíxema duüxügüpêxewa nawa ngúxe i ñaã Tupanaãrü ore, rü ngêxgumarüü ta tataãêgü ya yíxema nüxü ñnüxê rü naga ñnüxê i ñaã ore i ümatüxü, erü paxa tá ningü i ngêma nüxü yaxuxü.

Cuáü nanaxümatü naxcèx ga yema 7 tücumü ga yaxögüxü ga Áchiaanewa yexmagüxü

⁴ Rü choma i Cuáü rü chanaxümatü i ñaã ore pexcèx i yaxögüxe ya yima 7 ya ñãne ya Áchiaarü naãnewa ngêxmagünewa ngêxmagüxe. Rü chanaxwèxe i pexü narüngüxêê rü pexü nataãêxêê ya yima Tupana ya woetama ngêxmaêchacü. Rü ngêxgumarüü ta chanaxwèxe i pexü narüngüxêê rü pexü nataãêxêê i ngêma Naãê i Üünexü i naxütawa ne üxü i perü dauruü ixíxü i pema i yaxögüxe ya yima 7 ya ñãnewa na pengêxmagüxü. ⁵ Rü ngêxgumarüü ta chanaxwèxe na pexü nangüxêêxü rü pexü nataãêxêêxü ya Ngechuchu ya Cristu ga aixcüma meãma nüxü ixücü ga Tupanaãrü ore ga ñoma ga naãnewa. Rü nüma nixí ga nüxíra yuwa ñadaxü. Rü nüma rü guxüma i ñoma i naãnewa ngêxmagüxü i nachüüãneãrü ãêxgacügüarü ãêxgacü nixí. Rü nüma rü tüxü nangechaü, rü nagümaã tüxü ñayanaxoxêê i tórü pecadugü. ⁶ Rü ñüxma na guxüãrü ãêxgacü yíxü i nümax, rü tüxü naxüchica i ngextá nüma ãêxgacü íyíxüwa. Rü paigüxü tüxü nixígüxêê na Nanatü ya Tupanaãxü ipuracüexüçèx rü nüxü icuèxüügüxüçèx. Rü name nixí i guxügutáma Cristuxü ticuèxüügü, erü nüma rü guxügutáma guxüãrü ãêxgacü nixí. Rü ngêmaãcü yí. ⁷ Rü dücax, marü ningaica na caixanexügu ñanguxü ya Cristu! Rü guxütáma i duüxügü nüxü nadau, rü woo ga yema nacanapacütüügüxü rü tá ta nüxü nadaugü. Rü guxü i duüxügü i guxü i nachüüãnecüãx i tama yaxögüxü rü norü muümaã rü norü ngechaümaã tá naxauxe i ngêxguma ñanguxgu i nümax. Rü aixcüma ngêmaãcü tá nixí. ⁸ Rü nüma ya tórü Cori ya Tupana ya guxüãrü ãêxgacü ixíçü ya woetama ngêxmaêchacü, rü ñanagürü:

“Chowa nixí ga ñaxügüxü ga guxüma, rü nataxuma i tacü i chorü yexera ngêxmaêchaxü”, ñanagürü.

Cuáüçèx nangox ga Cristu ya mexêchicü

⁹ Rü choma i Cuáü na pexcèx chanaxümatüxü i ñaã popera, rü peeneê chixí. Rü ngêma na Ngechuchuna na chaxüxü rü chaxächica i ngextá nüma ãêxgacü íyíxüwa. Rü Ngechuchucèx pexrüü ngúxü chinge, natürü nüma pexü naporaexêêxürüü choxü naporaxêê na yaxna namaã chaxíñüxçèx i guxüma i ngêma ngúxü i choxü üpetüxü. Rü choma rü capaxü ga Pátmugu chapoxcu naxcèx na nüxü chixuxü ga Tupanaãrü ore

ga Ngechuchuchiga. 10-11 Rû wûxi ga yûxûarû ngunexûgu rû Tupanaãê i Ûûnexû chomaã inacuêx, rû changoxetû rû choweama nûxû chaxînu ga wûxi ga naga ga tagaxû ga ñoma cornetagarû ixiû ga ñaxû choxû:

“Chowa nixî ga inaxûgûxû ga guxûma, rû nataxuma i ñacû i chorû yexera ngêxmaêchaxû. Rû ñuxma chanaxwêxe na wûxi i poperagu cunaxûmatûxû i ngêma nûxû cudauxû. Rû ñuxûchi chanaxwêxe i ngêma yaxôgûxû ya yima 7 ya îâne ya Áchiaarû naãnewa ngêxmagûnewa ngêxmagûxûtanûwa cunamu. Rû yima 7 ya îâne nixî ya Epéchiu rû Esmira rû Pérgamu, rû Tiatíra rû Chardi rû Firadérfia rû Laodichéa”, ñanagûrû. 12 Rû chaugû íchidau na nûxû chacuáxûcêx na ñacû yîxû ga yema chomaã idexaxû. Rû yexguma chaugû íchidêuxgu rû nûxû chadau ga 7 ga werarû úruûgû ga uirunaxcêx ixîgûxû. 13 Rû yema 7 ga werarû úruûgûarû ngâxûtanûwa nûxû chadau ga wûxi ga duûxû ga chauxcêx nangechuchu ga duûxûxû ixîcûraûxû. Rû wûxi ga naxchiru ga máxûmaã naxâxchiru. Rû wûxi ga goyexû ga uirunaxcêxmaã nigoyeremû. 14 Rû nayae rû nachoxochi ñoma ñacû i choxochixûrû. Rû naxêtu rû ñoma úxûemarû niyauracû. 15 Rû nacutû rû ta niyauracû ñoma cobrexûchi i meãma ípixûrû. Rû yexguma yadexagu rû natagaxûchi ñoma taxû i dexá i chuxchuxû ágaxûrû. 16 Rû norû tûgûnemêxêwa nûxû nayexma ga 7 ga woramacurigû. Rû naãxwa nayexma ga wûxi ga tara ga guxûcûwawa téxû. Rû nachiwe rû ñoma úêxcû poraãcû nguxetûgurû nixî. 17 Rû yexguma nûxû chadêuxgu, rû napêxegu chayangu ñoma chayuxûrû. Natûrû ga nûma rû norû tûgûnemêxêmaã choxû ningôgû, rû ñanagûrû choxû:

“¡Tâxû i cumuûxû! Choma nixî i chaxira chayexmaxû rû guxûgutâma changêxmaêchaxû. 18 Rû choma nixî i yuwa ícharûdaxû rû ñuxma rû chamaxû. Rû úpa rû chayû, natûrû i ñuxma rû marû guxûgutâma chamaxêcha. Rû choxmêxwa nangêxma na ñuxgu tá nayuxû i wûxichigû i duûxû. Rû ngêxgumarû ta choma nixî i namaã ichacuáxû i ngêma nachica i ngextá ínangêxmagûxûwa i guxûma i duûxûgû i yuexû. 19 Rû ñuxma rû chanaxwêxe i cunaxûmatû i ngêma nûxû cudauxû. Rû ngêma nixî i ñuxma ngêma yaxôgûxûmaã ngupetûxû, rû ngêma yixcûra tá ngu-petûxû. 20 Rû ñuxma rû tá cuxcêx chanangoxêê i ngêma êxûguxû i ngêma 7 i woramacurigû i chorû tûgûnemêxêwa nûxû cudauxûchiga rû ngêma 7 i werarû úruûgû i uirunaxcêxchiga. Rû ngêma 7 i woramacurigû i nûxû cudauxû, rû ngêma âêxgacûgû i ngêma 7 tûcumû i yaxôgûxûetûwa ngêxmagûxûchiga nixî. Rû ngêma 7 i werarû úruûgû rû ngêma 7 tûcumû i yaxôgûxû i yima 7 ya îanewa ngêxmagûxûchiga nixî”.

2

Ore ga yema 7 tûcumû ga yaxôgûxûcêx ûmatûxû Ore ga yema yaxôgûxû ga Epéchiuarû îanewa yexmagûxûcêx ûmatûxû

¹ “Rû ñuxma chanaxwêxe i ngêma Epéchiuwa ngêxmagûxû i yaxôgûxûârû âêxgacûcêx cunaxûmatû, rû ñacurûgû nûxû: ‘Ñaa nixî i norû ore ya yima ngêma yaxôgûxûtanûgu yarûxûûcû rû norû tûgûnemêxêmaã nûxna daucû i ngêma yaxôgûxûârû âêxgacûgû’. ² Rû ñanagûrû i nûmax:

‘Choma nûxû chacuêx i guxûma i ngêma cuxûxû. Rû nûxû chacuêx na ñuxâcû poraãcû choxû cupuracûxû rû ñuxâcû cunaxûamaxû i ngêma puracû woo ngêmacêx muxûma i guxchaxûgû cuxcêx ínguxgu. Rû nûxû

chacuèx na tama curü me yîixü i ngêma duüxügü i chixexü ügüxü. Rü ngêxgumarüü ta nüxü chacuèx na meã cunangugüarü maxüãxü i ngêma duüxügü i nügü ixugüxü na Tupana imugüxü yixîgüxü natürü tama aixcûma ixîgüxü na Tupana yamugüxü. Rü cuma rü nüxü cucuèxama na idoratèèxmaregüxü yixîgüxü. ³ Rü woo naguxcha i ngêma puracü i chauxcèx cuxüxü, natürü cunaxüama. Rü woo chaugagu poraãcü ngúxü na quingexü, natürü yaxna namaã cuxînü, rü tama nüxü curüchau. ⁴ Natürü nangêxma i wüxi i cuxüxü i tama chorü me ixîxü. Rü ngêma nixî na tama noxrirüü choxü cungechaüxü i ñuxmax. ⁵ Rü ngêmacèx i ñuxma na ngêma chixexügu cunguxü, rü name nixî i nüxna cucuèxâchi na ñuxâcü choxü cungechaüxü ga noxrix. Rü name nixî i nüxü curüxo i curü chixexü rü noxrirüü choxü cungechaüãcüma mexü cuxü. Natürü ngêxguma chi tama nüxü curüxoxgu i curü chixexü, rü paxa tá cuxü íchayadau, rü tá cuxü chaxo na tama ngêma togü i yaxôgüxütanüwa cuxâchicaxüçèx. ⁶ Natürü nangêxma i wüxi i cuxüxü i chorü me ixîxü. Rü ngêma nixî na naxchi cuxaixü i ngêma chixexü i naxügüxü i ngêma Nicoraítagu. Rü choma rü ta naxchi chaxai i ngêma chixexü i naxügüxü'. ⁷ Rü yîxema âchixèxè rü name nixî i naga taxînü i ngêma Tupanaãe i Üünexü nüxü ixuxü namaã i ngêma yaxôgüxütücumügü". Rü ñanagürü:

"Yîxema nüxü rüporamaèxè i chixexü rü tá tüxü nüxü chamuxnetaxèè i norü o i ngêma orix i tüxü maxèxèèxü i Tupanaärü orixnecüwa ngêxmaxü", ñanagürü i Naãe i Üünexü.

Ore ga yema yaxôgüxü ga Esmiraarü ñanewa yexmagüxüçèx ümatüxü

⁸ Rü yema chomaã idexaxü rü ñanagürü ta:

"Chanaxwèxe i Esmirawa ngêxmagüxü i yaxôgüxüãrü âëxgacüçèx cunaxümatü, rü ñacurügü tá: 'Ñaa nixî i norü ore ya yima nüxîra yexmacü rü guxüguma ngêxmaèchacü ga paxaãchi yucü rü wenaxarü maxüçü'. ⁹ Rü ñanagürü i nümax:

'Choma nüxü chacuèx i guxüma i ngêma cuxüxü. Rü nüxü chacuèx na ñuxâcü ngúxü quingexü. Rü nüxü chacuèx na cungearü dîëruãxü i ñoma i naãnewa, natürü daxügüxü i naãnewa cuxü nangêxma i ngêma taguma gúxü. Rü nüxü chacuèx na ñuxâcü chixri cuchiga yadexagüxü i ngêma duüxügü i nügü ixugüxü na Yudíugü yixîgüxü. Natürü i nümagü rü aixcûma Chatanáärü duüxügümare nixîgü. ¹⁰ ¡Rü tâxü i cumuüxü naxcèx i ngêma ngúxü i tá quingexü! Rü ngoxo i Chataná rü tá norü duüxügüxü namu na poxcupataügu pexü napoxcuexüçèx i ñuxre i pema na ngêmaãcü pexü naxüxüçèx. Rü ñuxre i ngunexü tá ngúxü pingegü. Natürü woo ngêmaãcü ngúxü pingegügu rü chanaxwèxe i choxü cuyaxôöma ñuxmatáta cuyux. Rü choma rü tá cuxna chanaxâ i curü âmare i maxü i taguma gúxü'. ¹¹ Rü yîxema âchixèxè rü name nixî i naga taxînü i ngêma Tupanaãe i Üünexü nüxü ixuxü namaã i ngêma yaxôgüxütücumügü". Rü ñanagürü:

"Yîxema ñoma i naãnewa nüxü rüporamaèxè i chixexü, rü täütáma Tupana ngoxogüxü ípoxcuexüwa tüxü nawogü", ñanagürü i Naãe i Üünexü.

Ore ga yema yaxôgüxü ga Pérgamuärü ñanewa yexmagüxüçèx ümatüxü

¹² Rü yema chomaã idexaxü rü ñanagürü ta:

“Chanaxwèxe i Pérgamuwa ngêxmagüxü i yaxôgüxüârü âêxgacücèx cunaxümatü, rü ñacurügü tá: ‘Ñaa nixí i norü ore ya yima nüxü nangêxmacü i ngêma tara i guxücüwawa téxü’. ¹³ Rü ñanagürü i nümax:

‘Choma nüxü chacuèx na yima îâne ya Chataná poraâcü namaâ ícuáxünewa na cumaxüxü. Natürü woo ngêxma na cuxâchiüxü, rü tama choxü ícutèx. Rü woo yexguma chorü orearü uruü ga mecü ga Atípaxü yamèxgügu nagu ga guma îâne ga nawa Chataná duüxügümaâ ícuáxüne, rü tama nüxü curüxo na choxü cuyaxôomaxü. ¹⁴ Natürü nangêxma i ñuxre i tacü i cuxüxü i tama chorü me ixíxü. Rü ngêma nixí na cugüxütawa cunangêxmagüxëèxü i ñuxre i curü duüxügü i tama nüxü rüxoechaüxü i ngêma nguxêètae ga nuxcüma Baráü Yudíugüarü âêxgacü ga Baráxü namaâ ucuxèxü na chixexügu Yudíugüxü nayixèèxücèx. Rü yema Yudíugü rü yema ucuxègagu nawa naxí ga yema petagü ga togü ügüxü naxcèx ga norü tupananetachicünèxägü. Rü yexgumarüü ta yema ucuxègagu nixí ga naí ga ngemaâ namaxèxü ga Yudíugü. Rü ñuxma i ñuxre i curü duüxügü i Pérgamuwa ngêxmagüxü rü nagu naxí ga yema nuxcümaüxü ga nguxêètae ga chixexü, rü tama nüxü narüxoechaü. ¹⁵ Rü ngêxgumarüü ta ngema cunangêxmagüxëè i ñuxre i duüxügü i tama nüxü rüxoechaüxü i ngêma Nicoraitagüarü nguxêètae i Baráüârü nguxêètaeruü chixexü. ¹⁶ Rü ngêmacèx chanaxwèxe i nüxü curüxo i ngêma chixexü. Rü ngêxguma chi tama nüxü curüxoxgu, rü paxa tá ngema cuxütawa chaxü rü ngêma tara i chauèxwa ngêxmaxümaâ tá ngema duüxügüxü chadai’. ¹⁷ Rü yíxema âchixexè rü name nixí i naga taxínü i ngêma Tupanaâe i Üünexü nüxü ixuxü namaâ i ngêma yaxôgüxütücümügü”. Rü ñanagürü:

“Yíxema nüxü rüporamaèxè i chixexü rü tá tüxna chanaxâ i pâü i daxücüâx. Rü tá tüxna chanaxâ ya wüxi ya nuta ya chócü i wüxi i naega i ngexwacaxüxü nagu ümatüxü. Rü yíxema nayaxuxexicatama tixí ya nüxü cuáxe i ngema naéga”, ñanagürü i Naâe i Üünexü.

Ore ga yema yaxôgüxü ga Tiatíraarü îānewa yexmagüxücèx ümatüxü

¹⁸ Rü yema chomaâ idexaxü rü ñanagürü ta:

“Chanaxwèxe i Tiatírawa ngêxmagüxü i yaxôgüxüârü âêxgacücèx cunaxümatü, rü ñacurügü tá: ‘Ñaa nixí i norü ore ya yima Tupana Nane ya ñoma üxüemarüü iyauraxetücüücü rü nacutügü rü ñoma cobre i meâma ípixürüü ixíxüne’. ¹⁹ Rü ñanagürü i nümax:

‘Choma nüxü chacuèx i guxüma i ngêma mexü i cuxüxü. Rü nüxü chacuèx na ñuxâcü cumücügüxü cungechaüxü, rü ñuxâcü meâma choxü na cuyaxôxü, rü ñuxâcü nüxü na curüngüxëèxü i ngêma togü i yaxôgüxü, rü ñuxâcü yaxna namaâ cuxínüxü i guxchaxügü. Rü nüxü chacuèx i ñuxma na noxriarü yexera cunaxüxü i ngêma cuxü chanaxwèxexü. ²⁰ Natürü nangêxma i wüxi i cuxüxü i tama chorü me ixíxü. Rü ngêma nixí na ngema cunangêxmaxëèèchaxü i ngêma ngexü i Yechabé i nügü ixuxü na Tupanaârü orearü uruü na yíxü, natürü norü nguxêètaemaâ chorü duüxügüxü ngema womüxëèxü na chixri namaxèxücèx, rü naí i ngemaâ inapegüxücèx, rü nangôxgüâxücèx i ngêma ônagü i togü norü tupananetachicünèxägücèx dèjü na ngemamaâ nüxü yacuèxüügüxücèx. ²¹ Rü choma rü marü ngíxü íchananguxëè rü yaxna ngímaâ chaxínü na nüxü naxoxücèx i ngêma ngícüma i chixexü, natürü tama inaxwèxe na nüxü naxoxü rü inatáâxü i ngêma ngírü chixexü i naxüxü. ²² Rü ñuxma i ngêma nge rü tá ngíxü chidaawexëè na ngírü ngürücarewa ngúxü

yangexüçèx, rü ngêma duüxüğü i ngîmaã ipexü i ngêma nge rü nümagü rü tá ta ngúxü na yangegüxüçèx ega tama nüxü naxoegu i ngêma chixexü i ngîmaã naxüğüxü. ²³ Rü tá chanadai i ngîxácüğü i ngêma nge. Rü ngêmawa tá nüxü nacüxèğü i guxüma i yaxögüxü na aixcüma nüxü chacuáxü i ngêma naãêwa nagu naxînxü i wüxichigü i duüxü. Rü wüxichigü i pemax rü tá pexü chanaxütanü ngêma na ñuxácü pemaxêxüãcüma rü ñuxácü penaxüxüãcüma. ²⁴⁻²⁵ Natürü pemagü i Tiatíracüãx i tama nagu íxê i ngêma ngexüârü nguxêêtae i chixexü rü taguma nawa ngúexe i ngêma ore i togü naxugügu rü Chatanáârü ore i êxüguxü ixîxü, rü pemaã nüxü chixu rü ngêma pexü chanaxwêxexü nixî na meã namaã penguxüğüxü rü naga pexînxüxü i ngêma chorü ore ñuxmatáta íchangu i chomax. Rü ngêxícatama nixî i pexü chanaxwêxexü. ²⁶ Rü yíxema nüxü rüporamaêgüxe i ngêma chixexü rü naxüğüamaxê i ngêma tüxü chanaxwêxexü ñuxmatáta tayuemare, rü tá chaugüxütawa tüxü chaxüchica na wüxigu chomaã guxüârü ãêxgacü tixîgüxüçèx. ²⁷ Rü yema Chaunatü ãêxgacüxü choxü na ixîxêxürrü tá tüxna chanaxã i pora na guxü i nachüãnegümaã taporaexüçèx. Rü ngêxguma ñoma i naãnecüãx i duüxüğü tama tümaga ñnûegu rü ñoma wüxi i tüxü ngîxü ipuxêêxürrü tá namaã tixîgü rü poraãcü tá tanapoxcue. ²⁸ Rü tá tüxna chanaxã ya yima woramacuri ya pèxmama nüxü idaucü'. ²⁹ Rü yíxema áchixèxê rü name nixî i naga taxînú i ngêma Tupanaãe i Üünexü nüxü ixuxü namaã i ngêma yaxögüxütücumüğü" ñanagürü.

3

Ore ga yema yaxögüxü ga Chardiarü ñãnewa yexmagüxüçèx ümatüxü

¹ Rü yema chomaã idexaxü rü ñanagürü ta:

"Chanaxwêxe i Chardiwa ngêxmagüxü i yaxögüxüârü ãêxgacüçèx cunaxümatü, rü ñacurüğü tá: 'Ñaa nixî i norü ore ya Tupana Nane ya Naãe i Üünexü nawa ngêxmacü ya yima 7 ya woramacuri nüxü ngêxmacü'. Rü ñanagürü i nümax: 'Choma nüxü chacuèx i guxüma i ngêma cuxüxü. Rü nüxü chacuèx ta rü woo guxüwama duüxüğü nüxü ixugügu na Tupanacèx namaxèxü i ngêma yaxögüxü i cuxütawa ngêxmagüxü natürü tama aixcüma nixî i ngêma, erü ngêma yaxögüxü rü tama aixcüma choxü nayaxögü rü tama aixcüma chaucèx namaxê. ² Rü name nixî i cubaixáchi rü cügü íquicüèx rü cuyangüxêê i ngêma íraxü i mexü i cuxü iyaxüxü i marü iyarüxoxchaüxü. Erü nüxü chadau rü ngêma cuxüxü rü tama Tupanapêxewa name. ³ ;Rü nüxna nacüèxáchi ga yema nguxêêtae ga mexü ga noxri nüxü cuxînxü rü cuyaxuxü, rü nagu ixü! ;Rü nüxü rüxo i ngêma chixexü i cuxüxü! Natürü ngêxguma tama nüxü curüxoxgu i curü chixexü, rü ñoma wüxi i ngítèxáxü i ngürüáchi ínguxürrü tá cuxütawa chaxü. Rü tãütáma nüxü cucüèx na ñuxguacü yîxü. ⁴ Natürü ngêma Chardiwa cuxü nangêxma i ñuxre i duüxüğü i mexü i tama ñoma i naãnêârü chixexümaã nügü áüãchiarü maxüãxgüxü. Rü nümagü rü tá cómüxümaã nixãxchiru rü ngêmaãcü tá chomaã inaxî, erü nümagü rü duüxüğü i mexü i chaucèx maxèxü nixîgü. ⁵ Rü yíxema nüxü rüporamaêgüxe i chixexü, rü tá cómüxümaã tixãxchiru. Rü tãütáma nawa tüxü íchapiéga i ngêma chorü popera i nagu chayawüğüxü i ngêma duüxüğü i nüxü nangêxmaxü i maxü i taguma güxü. Rü Chaunatüpêxewa rü guxüma i norü orearü ngerüğü i daxüçüãxgüpêxewa tá tüxü chixu na chorü duüxüğü tixîgüxü'. ⁶ Rü yíxema áchixèxê rü name nixî i

naga taxīnū i ngēma Tupanaāē i Ūūnexū nūxū ixuxū namaā i ngēma yaxōgūxūtūcumūgū”.

Ore ga yema yaxōgūxū ga Firadérfiarū īānēwa yexmagūxūcēx ūmatūxū

7 Rū yema chomaā idexaxū rū űanagūrū ta:

“Chanaxwēxe i Firedérfiawa ngēxmagūxū i yaxōgūxūārū āēxgacūcēx cunaxūmatū rū űacurūgū tá: ‘Naā nixī i norū ore ya yima Ūūnecū ya aixcūma Cristu ixīcū ya Dabírūū āēxgacū ya tacū ixīcū ya nūxū nangēxmacū i pora na yawāxnaāxūcēx rū nawāxtaāxūcēx i daxūguxū i naāne. Rū ngēxguma texécēx yawāxnaāgu, rū taxucūrūwama texé tūmachēxwa tanawāxta. Rū ngēxguma texéchēxwa nawāxtaāgu, rū taxucūrūwa texé tūmacēx tayawāxna’. 8 Rū űanagūrū i nūmax:

‘Choma nūxū chacuēx i guxūma i ngēma cuxūxū. Rū dūcax, cuxū chanatauxchaxēē na togūmaā nūxū quixuxūcēx i chorū ore, rū taxucūrūwa texé cuxna tanachūxu na cunaxūxūcēx i ngēma puracū. Rū choma nūxū chacuēx na tama aixcūma cuporaxūchixū, erū noxretama nixī i ngēma yaxōgūxū i cuxūtawa ngēxmagūxū. Natūrū cuma rū naga cuxīnū i chorū ore, rū tama icuyacux na chorū duūxū quiīxū. 9 Rū ngēmacēx i ngēma duūxūgū i Chatanāarū ixīgūxū i nūgū ixugūxū na chorū duūxūgū yixīgūxū natūrū tama aixcūma choxrū ixīgūxū, rū tá chanamu na cupēxegu nacaxāpūxūgūxūcēx na nūxū nacuēxgūxūcēx na aixcūma cuxū changechaūxū. 10 Cuma rū meāma cuyanguxēē i ngēma cuxū chamuxū na aixcūma cuyaxōōmaxū naētūwa i ngēma guxchaxūgū i cuxū ngupetūxū. Rū ngēmacēx tá cuxū íchapoxū na tama cuxna nanguxūcēx i ngēma guxchaxū i taxū i űoma i naānēwa tá ínguxū na guxūma i űoma i naānecūāx i duūxūgūxū naxūxūcēx. 11 Rū paxa tá ngēma cuxūtawa chaxū. Rū chanaxwēxe i űuxma meā cumaxūxūrūū meā cumaxecha, na taxūema cuxna napuxūcēx i ngēma curū āmare. 12 Rū yīxēma nūxū rūporamaēgūxe i guxūma i chixexū, rū Chaunatū ya Tupanaxūtawa tá tūxū changēxmagūxūēē na tagutāma ngēma ítachoxūxūcēx. Rū tūmagu tá chanaxūmatū i naega ya Chaunatū ya Tupana. Rū ngēxgumarūū tá ta tūmagu chanaxūmatū i naega ya Tupanaārū īāne ya Yerucharēū ya ngexwacaxūne ya Tupanaxūtawa i daxūguxū i naānēwa írūxīxūne. Rū ngēxgumarūū tá ta tūmagu chanaxūmatū i chauéga i ngexwacaxūxū’. 13 Rū yīxēma āchixēxē rū name nixī i naga taxīnū i ngēma Tupanaāē i Ūūnexū nūxū ixuxū namaā i ngēma yaxōgūxūtūcumūgū”.

Ore ga yema yaxōgūxū ga Laodichéawa yexmagūxūcēx ūmatūxū

14 Rū yema chomaā idexaxū rū űanagūrū ta:

“Chanaxwēxe i Laodichéawa ngēxmagūxū i yaxōgūxūārū āēxgacūcēx cunaxūmatū rū űacurūgū tá: ‘Naā nixī i norū ore ya yima aixcūma ixīcū ya aixcūma yanguxēēcū i ngēma nūxū yaxuxū rū ore i aixcūma ixīxūxūxicatama ixucū. Rū nūma nixī ga inaxūgūāxū ga guxūma ga yema Tupana ūxū’. 15 Rū űanagūrū i nūmax:

‘Choma nūxū chacuēx i guxūma i ngēma cuxūxū. Rū nūxū chacuēx na tama wūxi i duūxū i chauxchi aixū quiīxū, natūrū tama wūxi i duūxū i aixcūma choxū ngechaūxū quixī. Rū chierū noxtacūma wūxi i duūxū i chauxchi aixū quixīgu rū ēxna noxtacūma wūxi i duūxū i aixcūma choxū ngechaūxū quixīgu. 16 Natūrū űuxma na írarūwatama choxū cungechaūxū, rū ngēmacēx tá cuxū íchatēx. Erū tama noxtacūma wūxi i duūxū i chauxchi aixū quixī rū tama noxtacūma wūxi i duūxū i

aixcūma choxū ngechaũxū quixĩ. ¹⁷ Rū cuma cugū quixuxgu rū cumuārū dīeruāx, rū cumuārū ngēmaxūāx, rū meāma cuxū naxūpetū, rū taxuūma cuxū nataxu. Natūrū i cuma rū tama nūxna cucuēxāchi na chopēxewa rū wūxi i taxuwama mexū quiixū, rū wūxi i ngechaũxūchi quiixū, rū wūxi i taxuūma cuxū ngēxmaxē quiixū, rū ñoma wūxi i ngexetūxūrūū quiixū, rū ñoma wūxi i ngexchiruxūrūū quiixū. ¹⁸ Rū ñuxma rū cuxū chaxucuxē na chauxūtawa naxcēx cutaxexūcēx i uiru i marū ūxūwa iguxū i nūxīcatama ixīxū. Rū ngēmaācū tá aixcūma cuxū nangēxma i curū ngēmaxū. Rū ngēxgumarūū ta cuxū chaxucuxē na chauxūtawa naxcēx cutaxexūcēx i cuxchiru i cómuxū na ngēmagu quicūxūcēx na taxúema cuxū dauxūcēx na cunxexchiruxū. Rū ngēxgumarūū ta cuxū chaxucuxē na chauxūtawa naxcēx cutaxexūcēx i curū mēixētūxū na curūmexētūxūcēx na wena quidauchixūcēx. ¹⁹ Choma rū tūxū chaxucuxē rū tūxū ichayarūwēxāchixēē ya guxāma ya yīxema tūxū changechaũxē. Rū ngēmacēx name nixī i nūxū curūxo i cucūma i chixexū, rū aixcūma choxū cunxechaũ rū cunaxū i ngēma cuxū chanaxwēxexū. ²⁰ Rū dūcax, choma rū iāxwa tūmacēx chacagūecha. Rū ngēxguma chi texé choxū ñnūgu rū chauxcēx tayawāxnagu, rū tá tūmaxūtagu chaxūcu. Rū tūmamaā tá chachibū rū tūma i chomaā. ²¹ Rū yīxema nūxū rūporamaēgūxe i chixexū, rū tá chaugūxūtawa tūxū charūtogūxēē na chomaā āēxgacū tixīgūxūcēx, yexgumarūū ga choma rū nūxū na charūporamaēxū ga chixexū, rū ñuxūchi Chaunatūxūtawa na chayarūtoxūrūū na namaā āēxgacū chíixūcēx'. ²² Rū yīxema āchixexē rū name nixī i naga taxīnū i ngēma Tupanaāē i Üünexū nūxū ixuxū namaā i ngēma yaxōgūxūtūcumūgū”, ñanagūrū ga yema chomaā idexaxū.

4

Tupanaxū nataxēēgū i daxūguxū i naānewa

¹ Rū yemawena ga choma ga Cuáū rū nūxū chadau ga wūxi ga iāx ga iwāxnaxū ga daxūguxū ga naānewa. Rū yema naga ga nacornetagaraūxū ga noxri nūxū chaxīnūxū ga chomaā idexaxū, rū ñanagūrū choxū:

“¡Nuxā naxīnagū! Rū tá cuxū nūxū chadauxēē i ngēma yixcūra tá ngupetūxū”, ñanagūrū. ² Rū yexgumatama ga choma rū Tupanaāē i Üünexū rū chauāēmaā inacuēx, rū daxūwa nanaga. Rū yēma daxūguxū ga naānewa nūxū chadau ga wūxi ga tochicaxū ga mexēchixū ga yēma Tupana nawa rūtoxū. ³ Rū guma yema tochicaxūwa rūtocū, rū ñoma nuta ya mexēchicū ya yasperūū nixī na namexū rū ñoma nuta ya cornalīnarūū nixī na namexū. Rū yema tochicaxūētūwa nayexma ga wūxi ga chirapa ga ñoma nuta ga esmerádarūū mexēchicū. ⁴ Rū yema tochicaxūcūwawa nayexmagū ga 24 ga togū ga tochicaxūgū ga nūxū inumaēguāchixū. Rū yema tochicaxūgūwa narūtogū ga 24 ga āēxgacūgū ga yaxōgūxūārū ixīgūxū. Rū cómuxūmaā nixāxchiru rū uirunaxcēx nixī ga norū ngēxcueruūgū. ⁵ Rū yema nachica ga Tupana írūtoxūwa inaxūxū ga bēixbēxanexū rū duruanexū rū nagagū. Rū yema tochicaxūpēxewa nayexma ga 7 ga omūgū ga yēma naīgūxū. Rū yema omūgū nixī ga Tupanaāē i Üünexū ga yema 7 ga yaxōgūxūtūcumūmaā icuáxū. ⁶ Rū yema Tupanaārū tochicaxūpēxewa rū ñoma dexaētūwarūū ixīxūmaā nachaxu rū nichipetū woruarūū. Rū yema tochicaxūxū inachomaēguāchi ga āgūmūcū ga daxūcūāx ga maxēxū ga guxūwama āxētūxū nawexma rū napēxewa. ⁷ Rū wūxi ga yema daxūcūāx ga maxēxū rū nanaxairaxū. Rū yema to rū nanawocaraxū.

Rü yema norü tomaëxpüx rü nanaduüxüchiweraxü. Rü yema norü ägümücü rü nanaxiyü i gonagüxüraaxü. ⁸ Rü yema ägümücü ga daxüçüâx ga maxëxü, rü wüxichigü nüxü nayexma ga 6 ga naxpëxatügü. Rü guxüwama ga naxpëxatütüwa rü naxpëxatütütüwa rü namuxëtü. Rü ngunecü rü chütacü rü ñanagürügüecha:

“Naxüüne, naxüüne, naxüüne nixi ya törü Cori ya Tupana ya guxüetüwa ngëxmacü rü woetama ngëxmaëchacü”, ñanagürügüecha. ⁹⁻¹⁰ Rü yema daxüçüâx ga maxëxü, rü yexguma nüxü yacuëxüügüüxgu ga guma tochicaxüwa rütocü, rü moxë nüxna naxägügu, rü yema 24 ga äëxgacügü ga yaxögüxüârü rü yima woetama ngëxmaëchacüpëxegu nacaxäpüxügü, rü nüxü nicuëxüügü, rü napëxegu nananu ga norü ngëxcueruügü. ¹¹ Rü ñanagürügü:

“Pa Torü Cori, Pa Torü Tupanax, cuxü nixi i namexü na ticuëxüügüxü rü cuxü tataxëëgüxü, erü guxüetüwa cungëxma. Yerü cuma cunaxü ga guxüma rü curü ngüchaügagu nixi i nangóxü i ñuxmax”, ñanagürügü.

5

Popera ga idixixüchiga rü Tupana Nane ga ñoma wüxi ga carnerurüü imáciuchiga

¹ Rü ñuxüchi nüxü chadau ga guma tochicaxüwa rütocü, rü norü tügünemëxëwa nanange ga wüxi ga popera ga idixixü. Rü düxëtüwa rü aixepewa rü naxämatü ga yema popera. Rü 7 wa niñaxtachipëxe. ² Rü nüxü chadau ga wüxi ga norü orearü ngerüü ga daxüçüâx ga poraxüchixü ga tagaäcü içaxü rü ñaxü:

“¿Texé tixi ya yixema mexe na tayagautanüxü i norü ñaxtachipëxexü rü itayadixgüxü i ñaã popera?” ñaxü. ³ Natürü woo ga daxügüxü ga naãnewa rü bai ga ñoma ga naãnewa rü bai ga yuexütanüwa, rü tataxuma ga texé ga mexe na itayadixgüxü rü nüxü tadaumatüxü na ñuxü ñaxü ga yema popera. ⁴ Rü choma rü poraäcü chaxaxu yerü tataxuma ga texé ga mexë na itayadixgüxü rü nüxü tadaumatüxü na ñuxü ñaxü ga yema popera. ⁵ Natürü wüxi ga yema 24 ga äëxgacügü ga yaxögüxüârü, rü ñanagürü choxü:

“¡Täxü i cuxaxuxü! Erü yima Cristu ya Yudáta ya airüxü poracü ya äëxgacü ya Dabítaa ixícü, rü marü nüxü narüyexera i guxüma i chixexü. Rü ngëmacëx nüma nixi i namexü na yagautanüäxüçëx i ngëma 7 i norü ñaxtachipëxexü i ngëma popera rü na iyawëgüäxüçëx”. ⁶ Rü ñuxüchi nüxü chadau ga Tupana Nane ga ñoma wüxi ga carneruxacü ga mëxwa írüdaxürüü yexma chicü naxütagu ga guma tochicaxüwa rütocü rü natanügu ga yema ägümücü ga daxüçüâx ga maxëxü rü yema 24 ga äëxgacügü. Rü nüxü nayexma ga 7 ga nachatacuxre ga norü poraarü cuëxruü rü 7 ga naxëtü. Rü guma 7 ga naxëtü rü ngëma nixi i Tupanaäë i Üünexü i guxüma i ñoma i naãnewa namuxüârü cuëxruü ixixü. ⁷ Rü guma pecaduarü ütanüçëx yucü rü guma tochicaxüwa rütocüçëx nixü, rü nanayaxu ga yema popera ga norü tügünemëxëwa yexmaxü. ⁸ Rü yexguma nayauxägu ga yema popera, rü yema ägümücü ga daxüçüâx ga maxëxü rü yema 24 ga äëxgacügü rü inacaxgüäpüxü napëxegu ga guma pecaduarü ütanüçëx yucü. Rü wüxichigü ga yema äëxgacügü rü nüxü nayexma ga wüxi ga norü paxetarü ga arpa. Rü yexgumarüü ta nüxü nayexma ga copa ga uirunaxçëx ga pumaratëxemaã napagüxü. Rü yema pumaratëxe rü nayixichi ga yexguma yaxaxgu. Rü yema pumaragü, rü

ngêma nixî i Tupanaârû duûxûgûarû yumûxêgûarû cuèxruûgû. ⁹ Rû nagu nawiyaegû ga wûxi ga wiyae ga yexwacaxûxû ga ñaxû:

“Cuma nixî i cumexû na cunayaxuxû i ngêma popera rû cuyagautanûxû i ngêma norû ñaxtachipêxexû. Yerû cuma rû marû quimêxchirêx, rû cugûmaâ Tupanaâxû naxcêx cutaxe i nagûxûraûxû i duûxûgû i nagûxûraûxû i nachiuñanecûñax i nagûxûraûxû i nagawa idexagûxû. ¹⁰ Rû ngêmagûxû cuxûchica i ngextá âêxgacû íquiixûwa, rû Tupanaârû ngûxêeruûgûxû cuyaxîgûxêê na cumaâ wûxigu guxû i naânemaâ inacuèxgûxûcêx”,

ñanagûrûgû. ¹¹ Rû yemawena ichadawenû, rû nûxû chaxînú ga naga ga muxûchixûma ga Tupanaârû orearû ngeruûgû ga daxûcûñax. Rû norû ngâxûwa nayexma ga yema tochicaxû rû yema âgûmücû ga daxûcûñax ga maxêxû rû yema 24 ga âêxgacûgû. Rû namuxûchima ga yema Tupanaârû orearû ngeruûgû ga daxûcûñax ga yema yexmagûxû. ¹² Rû tagaâcû ñanagûrûgû:

“Daa nixî ya yima ñoma wûxi i carneruacûrûû imácû ga pecaduarû útanücêx yucû. Rû nûma nixî i namexû na guxûârû âêxgacû yîixû, rû guxûârû yora yîixû, rû guxû i cuèx nûxû ngêxmaxû, rû guxûârû yexera naporaxû. Rû nûma nixî i namexû na guxâma nûxû ngechaûgûxû rû nataxêêgûxû rû nûxû icuèxûûgûxû”, ñanagûrûgû. ¹³ Rû nûxû chaxînú ta ga naga ga guxûma ga yema Tupana ûxû i daxûguxû i naânewa rû ñoma i naânewa rû naânetaûwa rû taxtû i taxûwa ngêxmagûxû ga ñagûxû:

“Name nixî na guxûgutáma guxâma nûxû icuèxûûgûxû rû nûxû ngechaûgûxû rû nataxêêgûxû ya yima pecaduarû útanücêx yucû rû yima ngêma tochicaxûwa rûtocû, erû nûmagû nixî i guxûguma âêxgacûgû yixîgûxû”, ñanagûrûgû. ¹⁴ Rû yema âgûmücû ga daxûcûñax ga maxêxû rû ñanagûrûgû:

“Ngêmaâcû yîi”, ñanagûrûgû. Rû yema 24 ga âêxgacûgû rû inacaxgûâpûxû rû nûxû nicuèxûûgû.

6

Yema 7 ga ñaxtachipêxe-ruûchiga

¹ Rû ñuxûchi nûxû chadau ga yexguma guma pecaduarû útanücêx yucû yagauyegu ga yema nûxîraûxû ga norû ñaxtachipêxexû ga yema popera. Rû nûxû chaxînú ga wûxi ga yema daxûcûñax ga maxûxû ga tagaâcû ñoma duruanexûrûû ñaxû choxû:

“¡Nuâ naxû!” ñaxû. ² Rû ichadawenû rû nûxû chadau ga wûxi ga cowaru ga cómuxû. Rû yema naetûwa rûtoxû rû nûxû nayexma ga wûxi ga norû wûra. Rû wûxi ga ngêxcueruû nûxna naxâ. Rû poraâêâcûma norû cowarumaâ inaxûâchi na duûxûgûxû nayexeraxûcêx. ³ Rû yexguma guma pecaduarû útanücêx yucû yagauyegu ga yema norû taxre ga yema poperaarû ñaxtachipêxexû, rû nûxû chaxînú ga yema norû taxre ga yema daxûcûñax ga maxûxû ga ñaxû choxû:

“¡Nuâ naxû!” ñaxû. ⁴ Rû yema naxû ga wûxi ga cowaru ga dauxû. Rû yema naetûwa rûtoxû rû wûxi ga tara ga taxû nûxna naxâ. Rû yexgumarûû ta pora nayaxu na iyanaxoxêêaxûcêx na nûgû nangechaûgûxû ga duûxûgû. Rû yemaâcû nanaxû na nûgû nadêjûcêx ga duûxûgû. ⁵ Rû yexguma guma pecaduarû útanücêx yucû yagauyegu ga yema norû tomaêxpûx ga yema poperaarû ñaxtachipêxexû, rû nûxû chaxînú ga yema norû tomaêxpûx ga yema daxûcûñax ga maxûxû ga ñaxû choxû:

“¡Nuã naxũ!” ñaxũ. Rũ ichadawenũ rũ nüxũ chadau ga wüxi ga cowaru ga waxũxũ. Rũ yema naetüwa rütoxũ rũ naxmëxwa nüxũ nayexma ga wüxi ga tacüarũ yaruũ ga balanza. ⁶ Rũ nüxũ chaxĩnũ ga wüxi ga naga ga yema daxüçũâx ga maxëxũârũ ngãxũtanüwa inaxũxũ ga ñaxũ:

“Wüxi i ngunexũârũ puracütanũ rũ naxãtanũ i wüxi i kilo i trigu. Rũ wüxi i ngunexũârũ puracütanũ naxãtanũ i tomaëxpüx i kilo i chebada. ¡Naturũ tâxũ i cuyanatauxëëxũ i ngëma chixũ rũ yima binu!” ñanagürũ. ⁷ Rũ yexguma guma pecaduarũ ütanüçëx yucü yagauyegu ga yema norü ägümücü ga yema poperaarũ ñaxtachipëxexũ, rũ nüxũ chaxĩnũ ga yema norü ägümücü ga yema daxüçũâx ga maxëxũ ga ñaxũ choxũ:

“¡Nuã naxũ!” ñaxũ. ⁸ Rũ ichadawenũ rũ nüxũ chadau ga wüxi ga cowaru ga dexexũ. Rũ yema naetüwa rütoxũ rũ Yu nixĩ ga naega. Rũ yema naweama ne üxũ, rũ Yuexüchica nixĩ ga naega. Rũ yema taxre nanayauxgü ga pora na ñoma ga naãnewa rũ wüxi ga yema norü ägümücütücumü ga duüxügümaã inacuëxgüxüçëx na daimaã rũ taiyamaã rũ ðaaweanemaã rũ ngoxo idüraexümaã nayuexëëaxüçëx. ⁹ Rũ yexguma guma pecaduarũ ütanüçëx yucü yagauyegu ga yema norü wüximëëxpüx ga yema poperaarũ ñaxtachipëxexũ, rũ nüxũ chadau ga wüxi ga nachica ga ngextá Tupanacëx naxünagü nawa yagugüxũ na nüxna naxägüãxüçëx. Rũ yema nachicatüüwa nüxũ chadau ga naãëgü ga yema duüxügü ga Tupanaãrũ orexũ na yaxugüxüçëx nadëixũ. ¹⁰ Rũ yema naãëgü rũ tagaãcü ñanagürügü:

“Pa Torü Cori ya Guxüetüwa Ngëxmacü rũ Üünecü rũ Ixaixcümäcux, ¿ñuxgura tá ta i nüxna cucaxũ rũ cunapoxcuexũ i ngëma duüxügü i chixexũ ga toxũ dëixũ?” ñanagürügü. ¹¹ Rũ ñuxüchi ga Tupana rũ wüxichigü ga yema duüxügüna nanaxã ga naxchiru ga máxũ rũ cómuxũ. Rũ yema duüxügüãëgüxũ ñanagürü:

“¡Paxaãchi iperüngüë ñuxmatáta yangu i peeneëgü i Cristuaxũ puracüexũ i pexrüü tá dëixũ!” ñanagürü. ¹² Rũ yexguma guma pecaduarũ ütanüçëx yucü yagauyegu ga yema norü 6 ga yema poperaarũ ñaxtachipëxexũ, rũ nüxũ chadau ga poraãcü na naxiãxãchianexũ. Rũ üëxcü rũ wüxi ga naxchiru ga waxcharaxürüü nixĩ. Rũ tauemacü rũ guxüwama nagürüü naduema. ¹³ Rũ woramacurigü rũ ëxtagü rũ daxüwa narüyi rũ ñoma ga naãnegu nayi. Rũ ñoma orix i doxüxüma buanecü ya tacü rüyixëëxürüü nixĩ. ¹⁴ Rũ guxüma i daxüwa nüxũ idauxũ rũ inayarütaxu. Rũ ñoma wüxi i popera i dixcumüächixũ rũ iyarütaxuxürüü nixĩ. Rũ guxüma ga mëxpünegü rũ capaxügü rũ nixĩgachi ga nachicawa. ¹⁵ Rũ ñoma ga naãnewa yexmagüxũ ga nachiüãnegüarü äëxgacügü, rũ mëxpünemagu rũ mëxpüneärü nutatanügu nicuxgü. Rũ wüxigu yexma namaã nicuxgü ga yema togü ga äëxgacügü ga taxügü ga ñoma ga naãnemaã icuëxgüxũ, rũ churaragüarü äëxgacügü ga taxügü, rũ yema duüxügü ga muärü dïëraëxgüxũ, rũ yema duüxügü ga ñoma ga naãnewa poraexũ, rũ guxüma ga duüxügü ga coriãxgüxũ, rũ guxüma ga duüxügü ga ngearü coriãxgüxũ. ¹⁶ Rũ guxüma ga nümagü, rũ guma mëxpünexũ rũ guma nutagüxũ ñanagürügü:

“¡Toëtügu peyi na toxü ipicuxgüxüçëx naxchaxwa ya yima ngëma tochicaxüwa rütocü, rũ naxchaxwa ya yima pecaduarü ütanüçëx yucü erü tama tanaxwëxe na toxü napoxcuexũ! ¹⁷ Erü marü inangu i ngëma ngunexũ i äücümaxũ i nagu napoxcuexũ i ngëma duüxügü i tama Tupanaãrü ixĩgüxũ. ¿Rü texé tá namaã tapora i ngëma?” ñanagürügü.

7

Yema Yudíugü ga nacatüwa cuèxruüãxgüxüchiga

¹ Rü yemawena rü nüxü chadau ga ägümücü ga Tupanaärü orearü ngeruüügü ga daxücüãx ga ñoma ga naãneärü ägümücüpëxegu chigüxü. Rü ínanapoxüügü ga gucüma ga buanecügü na tama waixümüãneetügu naxüxüçèx, rü tama taxü i taxtüétügu naxüxüçèx, rü bai i tacü rü naíétügu naxüxüçèx. ² Rü yexgumarü ta nüxü chadau ga wüxi ga Tupanaärü orearü ngerü ga daxücüãx ga üèxcü íyarügoxüwaama ne üxü. Rü nüxü nayexma ga Tupana ya Maxücüarü tacüarü üégarü. Rü nüma rü tagaäcü nüxna nacagü ga yema togü ga ägümücü ga Tupanaärü orearü ngeruüügü ga nayauxgüxü ga pora na nachixexëégüãxüçèx ga guxüma ga waixümü rü guxüma ga taxü ga taxtü. ³ Rü ñanagürü nüxü:

“iTxü i yatacüma penachixexëëxü i waixümü rü taxtü i taxü rü naígü, ñuxmatáta nacatüwa tayaxüarü cuèxruüãxgü i ngëma Tupanaärü duüxügü ixígüxü!” ñanagürü. ⁴ Rü nüxü chaxínü ga ñuxre na yíxü ga yema cuèxruüãxgüxü. Rü guxüma ga Yudíugütanüwa rü 144,000 nixí. ⁵⁻⁸ Rü yema cuèxruüãxgüxü ga Yudíugü, rü ñaã nixí:

Yudátaagü - 12,000

Rubéütaagü - 12,000

Gadutaagü - 12,000

Achetaagü - 12,000

Netarítaagü - 12,000

Manachétaagü - 12,000

Chimeütaagü - 12,000

Lebítaagü - 12,000

Ichacátaagü - 12,000

Chaburáütaagü - 12,000

Yúchetaagü - 12,000

Beyamítaagü - 12,000

⁹ Rü yemawena ichadawenü, rü nüxü chadau ga muxüchixüma ga nagüxüraüxü ga duüxügü ga nagüxüraüxü ga nagawa idexagüxü ga guxüma ga nachíüñewa ne íxü. Rü yema tochicaxüpëxegu rü guma pecaduarü ütanüçèx yucüpëxegu nachigü. Rü yema na namuxüchixü rü taxücürüwa texé tayaxugü na ñuxre yíxü. Rü naxchiru ga icómüxü rü imáxümaã nixãxchiru. Rü naxmëxwa nanangegü ga wairaátügü. ¹⁰ Rü guxüma ga nümagü rü tagaäcü ñanagürügü:

“Yima tórü Tupana ya tochicaxüwa rütocü rü yima pecaduarü ütanüçèx yucü nixí ya tüxü maxëxëégücü”, ñanagürügü. ¹¹ Rü guxüma ga Tupanaärü orearü ngeruüügü ga daxücüãx rü nüxü ínachimaëguãchi ga yema tochicaxü rü yema 24 ga äëxgacügü rü yema ägümücü ga daxücüãx ga maxëxü. Rü yema tochicaxüpëxegu nanangücuchitanü ga yema orearü ngeruüügü, rü Tupanaxü nicuèxüügü. ¹² Rü ñanagürügü:

“Rü ngëmaäcü yí. Rü nüma nixí i namexü na guxüguma guxãma nüxü icuèxüügüxü, rü nataxëégüxü, rü moxë nüxna ixägüxü, rü nüxü ingechaügüxü, erü guxü i cuèx nüxü nangëxma, rü guxüetüwa nangëxma, rü guxüärü yexera napora. Rü ngëmaäcü yí”, ñanagürügü. ¹³ Rü ñuxüchi wüxi ga yema 24 ga äëxgacügü rü choxna naca, rü ñanagürü:

“¿Texëgü tixígü ya yíxema cómüchirügüxe, rü ngextá ne taxí?” ñanagürü. ¹⁴ Rü choma chanangãxü, rü ñacharügü:

“Pa Corix, cuma nixî i nüxû cucuáxû na texégü tixîgüxû”, ñacharügü. Rû yexguma ga nüma rû ñanagürü:

“Yixemagü tixîgü ga nawa ngupetütanüxê ga yema ngúxû ga taxû rû marü tügü iyauxgüchiruxe nagüwa ga guma pecaduarü ütanüçex yucü. Rû ngêmacèx nixî i ticómüchiruxû. ¹⁵ Rû ngêmacèx nixî i Tupanaârü tochicaxüpêxewa tangêxmagüechaxû rû ngunecü rû chütacü rû Tupana íngêxmaxüwa nüxû tapuracüexû. Rû nümatama ya Tupana ya tochicaxüwa rütocü rû tüxna nadau. ¹⁶ Rû marü tagutáma wenaxârü taiya tüxû nangux, rû tagutáma tiñawae. Rû marü tagutáma üèxcü tüxû nigu, rû tagutáma üèxcüarü nañanexû tüxû nangux. ¹⁷ Erü yima pecaduarü ütanüçex yucü i ngêma tochicaxüxütawa ngêxmacü, rû tá aixcúma meã tüxna nadau ñoma carnerugüna idauxürüü. Rû nawa tá tüxû nagagü i ngêma dexáarü chuxchuxügü i maxêëruü. Rû Tupana tá tüxû ínanapi i guxüma i tümagüüxêtü”, ñanagürü.

8

Yema norü 7 ga ñaxtachipêxeruüchiga rû yema buetare ga uirunaxcèxchiga

¹ Rû yexguma guma pecaduarü ütanüçex yucü yagayegu ga yema norü 7 ga yema poperaarü ñaxtachipêxexü, rû ngâxû ga ora nachipetüanemare ga daxüguxû ga nañnewa. ² Rû ñuxüchi nüxû chadau ga yema 7 ga Tupanaârü orearü ngeruügü ga daxüçüãx ga yexma Tupanapêxegu chigüxû. Rû wüxichigü nanayaxu ga norü corneta ga nüxna naxâxüne. ³ Rû yemawena ínangu ga wüxi ga to ga Tupanaârü orearü ngeruü ga daxüçüãx. Rû yéma nanange ga wüxi ga norü buetare ga uirunaxcèx ga pumaraarü gutêxeruü. Rû yema uirunaxcèx ga pumaraarü gutêxeruütaxmüpêxegu nachi. Rû nanayauxtêxe ga taxû ga pumara ga nüxna naxâxû na yema tochicaxüpêxewa yexmaxû ga pumaraarü gutêxeruütaxmüwa yaguâxüçex, na yemaâcü Tupanana naxââxüçex ga yema pumaratêxe na yema pumaraema rû wüxigu Tupanaârü duüxügüarü yumüxêmaã Tupanaxütawa nanguxüçex. ⁴ Rû yema pumaratêxe ga yema orearü ngeruüãxü yexmaxû rû daxû naxüéma wüxigu namaã ga Tupanaârü duüxügüarü yumüxêgü ñuxmata Tupanaxütawa nangu. ⁵ Rû ñuxüchi ga yema orearü ngeruü rû nanayaxu ga yema buetare ga pumaraarü gutêxeruü. Rû yema pumaraarü gutêxeruütaxmüwa nanayaxu ga âwe ga naïcü, rû gumamaã nanaxüâcu ga guma buetare. Rû ñuxüchi ñoma ga naãneetügu nanaña. Rû yexgumatama poraâcü naduruâchiane, rû poraâcü nicuxcuane rû nibèixbêxane rû naxîãxâchiane.

Tupanaârü orearü ngeruügü ga daxüçüãxârü cornetachiga

⁶ Rû yexguma ga yema 7 ga Tupanaârü orearü ngeruügü ga daxüçüãx ga icornetaãxü, rû nügü ínamexêégü na nagu yacuegüxüçex. ⁷ Rû wüxi ga yema Tupanaârü orearü ngeruü rû nüxira nayacue ga norü corneta. Rû yexgumatama ñoma ga naãneetügu narüyi ga gáxü rû üxüema ga nagümaã âëüxü. Rû wüxi ga yema norü tomaêxpüxarü üye ga ñoma ga naãne rû nixa. Rû yexgumarüü ta wüxi ga yema norü tomaêxpüxarü üye ga nañnecü rû nixa. Rû guxüma ga natüane rû nixae. ⁸ Rû yema norü taxre ga Tupanaârü orearü ngeruü rû nayacue ga norü corneta. Rû ñuxüchi wüxi ga tacü ga taxüchixû ga namêxpüneraüxü ga iyauxraxü, rû yexma taxtü ga taxügu nanaña. Rû wüxi ga yema norü

tomaëxpûxarü üye ga taxtû rü nagûxû nananguxuchi. ⁹ Rü wüxi ga yema norü tomaëxpûxarü üyetücumü ga yema taxtûwa maxêxû, rü nayue. Rü yexgumarüü ta wüxi ga yema norü tomaëxpûxarü üyetücumü ga wapurugü, rü inayi. ¹⁰ Rü yema norü tomaëxpûx ga Tupanaârü orearü ngeruü, rü nayacue ga norü corneta. Rü ñuxûchi wüxi ga taxüchicü ga woramacuri ga taemaxüchicü rü daxûwa narüngu. Rü wüxi ga omü ga ixaxûrüü nixî. Rü nagu nangu ga wüxi ga yema norü tomaëxpûxarü üye ga natügü rü natüxacügü. ¹¹ Rü guma woramacuri rü Üxûxû nixî ga naëga. Rü wüxi ga yema norü tomaëxpûxarü üye ga guxûma ga dexá rü naxûxchiü. Rü muxûma ga duüxügü rü yema dexáwa nayue yerü naxûxchiü. ¹² Rü yema norü ägümücü ga Tupanaârü orearü ngeruü rü nayacue ga norü corneta. Rü wüxi ga yema norü tomaëxpûxarü üye ga üèxcü rü nixo. Rü yexgumarüü ta wüxi ga yema norü tomaëxpûxarü üye ga tauemacü rü woramacurigü rü êxtagü rü nixo. Rü yemaäcü wüxi ga yema norü tomaëxpûxarü üye ga guxûma ga yema rü naxêâne. Rü ga ngunecü rü ägümücü ga ora naxêâne. Rü ga chütacü rü ägümücü ga ora naxaxuma ga tauemacü rü bai ga woramacurigü rü bai ga êxtagü. ¹³ Rü yemawena ichadawenü rü nüxû chaxînü ga wüxi ga İyü ga daxügu İxexeüxü ga tagaäcü ñaxû:

“Nangechäütümüügü i ngêma duüxügü i yea pecaduäxü i naänewa maxêxü i ngêxguma yacuegüägu tá ya norü cornetagü i ngêma togü i tomaëxpûx i Tupanaârü orearü ngeruügü”, ñaxû.

9

¹ Rü yema norü wüximêëxpûx ga Tupanaârü orearü ngeruü, rü nayacue ga norü corneta. Rü nüxû chadau ga wüxi ga woramacuri ga daxûwa rüngucü ga ñoma ga naänegu ngucü. Rü guma woramacuri nanayaxu ga yema äxmaxû ga taguma iyacuáxûrû chawî. ² Rü nayawâxna ga yema äxmaxû ga taguma iyacuáxû. Rü yéma inayagoema ga caxixü ñoma wüxi i taxû i uxearü caxixûrüü. Rü yema caxixü rü nanaxêëmaxêë ga üèxcü. ³ Rü yema caxixûwa ínachoxü ga munügü ga naâneqtügu yixü. Rü yema munügü rü nanayauxgü ga pora ga nüxna naxâxü na ñoma tuxchinawerüü duüxügüxü nachixüçèx. ⁴ Rü yema munümaâ nüxü nixu na tama natüanexü nachixexêëxüçèx rü bai i tacü rü nanetügü rü bai i tacü rü naİgü. Natürü nanamu na nachixexêëgüäxüçèx ga yema duüxügü ga tama Tupanaârü cuèxruü nacatüwa yexmaxü. ⁵ Natürü tama nanamu na yema duüxügüxü nadèixüçèx. Natürü nanamu na ngúxü nüxü yangexêëmaregüxüçèx ga wüximêëxpûx ga tauemacü. Rü yema ngúxü ga nüxü yangexêëgüxü, rü ñoma tuxchinawe duüxügüxü chixûrüü nixî. ⁶ Rü ngêma ngunexügügu rü duüxügü tá naxçèx nadaugü na nayuexü, natürü täütâma nayue. Rü woo nanaxwèxegüxüchi na nayuexü, natürü taxucürüwatâma nayue. ⁷ Rü yema munügü rü ñoma cowaru i guerawa İxûrüü nixİgü. Rü naëruwa nüxü nayexma ga tacü ga ñoma ngèxcueruü ga uirunaxçèxrüü ixİgüxü. Rü nachiwe rü nanaduüxüchiweraxügü. ⁸ Rü nayaegü rü ñoma ngeäxyaerüü nixİgü. Rü napütägü rü ñoma aipütägürüü nixİgü. ⁹ Rü naxûnewa nayexma ga norü poxûruü ga fierunaxçèx. Rü naxpèxatügüga rü ñoma muxüchine ya caru ya guerawa cowaru tügünegarüü ixİxü. ¹⁰ Rü nareexügü rü ñoma tuxchinawerüü naxânegu. Rü yema naneguwa rü naxäguchata na wüximêëxpûx ya tauemacü

duǔxǔgǔxǔ ngǔxǔ yangexēēgǔxǔcèx. ¹¹ Rǔ yema munǔgǔarǔ āēxgacǔ, rǔ yema āxmaxǔ ga taguma iyacuáxǔārǔ dauruǔ nixǔ. Rǔ Yúdǔgǔgawa ga yema munǔgǔarǔ āēxgacǔ, rǔ Abadóǔ nixǔ. Rǔ Griégǔgawa rǔ Apolióǔ nixǔ. Rǔ ngēma rǔ: “Chixexēēruǔ”, ñaxǔchiga nixǔ. ¹² Rǔ yexma nayacuèx ga yema nǔxǔraǔxǔ ga chixexǔ ga taxǔ, natǔrǔ ínayaxǔama ga to ga taxre. ¹³ Rǔ yema norǔ 6 ga Tupanaārǔ orearǔ ngeruǔ rǔ nayacue ga norǔ corneta. Rǔ nǔxǔ chaxǔnǔ ga wǔxi ga naga ga yema Tupanapēxewa yexmaxǔ ga uirunaxcèx ga pumaraarǔ gutēxeruǔtaxmǔwa inaxǔxǔ. ¹⁴ Rǔ yema naga rǔ nanamu ga yema orearǔ ngeruǔ ga cornetaǔxǔ, rǔ ñanagǔrǔ nǔxǔ:

“ǎYawēgǔxǔ i ngēma āgǔmǔcǔ i orearǔ ngeruǔgǔ i Chatanāārǔ ixǔgǔxǔ i taxtǔ i Eufrátēgu ngāxǔgǔxǔ!” ñanagǔrǔ. ¹⁵ Rǔ yemaācǔ niwēgǔxǔ ga yema āgǔmǔcǔ ga orearǔ ngeruǔgǔ na nadaiāxǔcèx ga wǔxi ga yema norǔ tomaēxpǔxarǔ üyetǔcumǔ ga duǔxǔgǔ. Yerǔ ga yema orearǔ ngeruǔgǔ rǔ woetama yemacèx ínmemaregǔ na yema ora rǔ yema ngunexǔ rǔ guma tauemacǔ rǔ guma taunecǔ nadaiāxǔcèx ga yema duǔxǔgǔ. ¹⁶ Rǔ nǔxǔ chaxǔnǔ na ñuxre na yǔxǔ ga yema orearǔ ngeruǔgǔarǔ churaragǔ ga cowaruétǔgu ǔxǔ. Rǔ 200 miyónegǔ nixǔgǔ. ¹⁷ Rǔ yemaācǔ nixǔ ga nǔxǔ chadauxǔ ga yema cowarugǔ ga yexguma changoxetǔgu. Rǔ yema churaragǔ ga yema cowaruétǔgu ǔxǔ rǔ nǔxǔ nayexma ga norǔ ngèxcuxǔnexǔ ga poxǔruǔ ixǔxǔ ga ñoma ǔxǔxetǔrǔyǔ iyauraxǔ. Rǔ yema poxǔruǔ rǔ nixāmatǔ rǔ nidaumatǔ rǔ niyèǔxmatǔ rǔ nidexmatǔ. Rǔ yema cowaruerugǔ rǔ ñoma aierurǔ nixǔgǔ. Rǔ naǔxǔgǔwa ínaxǔxǔ ga ǔxǔema rǔ caxixǔ rǔ azufre. ¹⁸ Rǔ wǔxi ga norǔ tomaēxpǔxarǔ üyetǔcumǔ ga duǔxǔgǔ rǔ nayue namaā ga yema tomaēxpǔx ga chixexēēruǔ ga ǔxǔema rǔ caxixǔ rǔ azufre ga yema cowarugǔexwa ǔchoǔxǔ. ¹⁹ Yerǔ ga yema cowarugǔ rǔ naǔxwa rǔ nareexǔwa nixǔ ga nǔxǔ nayexmaxǔ ga norǔ pora na duǔxǔgǔxǔ nadèǔxǔcèx. Yerǔ ga nareexǔgǔ rǔ ñoma āxtaperǔ nixǔgǔ, rǔ yemamaā nanangǔx ga duǔxǔgǔ rǔ ngǔxǔ nǔxǔ ningexēē rǔ nanadai. ²⁰ Natǔrǔ ga yema togǔ ga duǔxǔgǔ ga tama yema poxcuruǔgǔmaā yueǔxǔ, rǔ tama nǔxǔ narǔxoe ga yema chixexǔgǔ ga naxǔgǔxǔ. Rǔ tama nǔxǔ narǔxoe na nǔxǔ yacuèxǔǔgǔxǔ ga ngoxogǔ rǔ norǔ tupanantachicǔnèxǔgǔ ga uirunaxcèx rǔ dǔērǔmǔnaxcèx rǔ cobrenaxcèx rǔ nutagǔnaxcèx rǔ naǔnaxcèx. Rǔ yemaācǔ nǔxǔ nicuèxǔǔgǔama ga yema norǔ tupanantachicǔnèxǔgǔ ga ngearǔ maxǔǔxǔ rǔ tama nǔxǔ dauǔxǔ rǔ tama nǔxǔ ǔnǔxǔ rǔ tama ixǔxǔ. ²¹ Rǔ tama nǔxǔ narǔxoe na namāētagǔxǔ, rǔ yayuǔexǔ, rǔ nangēāēgǔxǔ rǔ nangǔtèèxǔgǔxǔ.

10

Orearǔ ngeruǔ ga nǔxǔ yexmaxǔ ga popera ga idixǔchiga

¹ Rǔ nǔxǔ chadau ga wǔxi ga to ga Tupanaārǔ orearǔ ngeruǔ ga daxǔgǔxǔ ga naǔnewa ǔrǔxǔxǔ. Rǔ wǔxi ga caixanexǔārǔ ngāxǔwa nayexma, rǔ wǔxi ga chirapa naétǔgu nabo. Rǔ nachuwe rǔ ñoma ǔèxcǔrǔyǔ niyauracǔyǔ. Rǔ naparagǔ rǔ ta ñoma ǔxǔemarǔyǔ niyauracǔyǔ. ² Rǔ naxmēxwa nǔxǔ nayexma ga wǔxi ga poperaxacǔ ga ǔiwēgǔxǔ. Rǔ norǔ tǔgǔneparǔ rǔ taxtǔ i taxǔtǔgǔ nachicutǔ. Rǔ norǔ ǔoxweparǔ rǔ waixǔmǔānegǔ nachicutǔ. ³ Rǔ ñuxǔchi ga nǔma rǔ tagaācǔ aita naxǔ ñoma wǔxi ya ai ya tagaācǔ aita ǔcǔrǔyǔ. Rǔ yexguma aita naxǔxǔgu rǔ 7 ēxpǔxcǔna naduruāchiane. ⁴ Rǔ yexguma yema 7 ēxpǔxcǔna na

naduruächianexüguwena rü chanaxümatüchaü. Natürü nüxü chaxĩnũ ga wüxi ga naga ga daxüguxü ga naãnewa inaxüxü ga ñaxü choxü:

“¡Tãxü i cunangoxëexü i ngëma 7 i duruanexü nüxü ixuxü! ¡Rü ngexrüma na cunaxümatüxü!” ñaxü choxü. ⁵ Rü ñuxüchi ga yema Tupanaärü orearü ngerü ga nüxü chadauxü na taxtü ga taxüetügu rü waixümüetügu nachicutüxü, rü daxü naxunagü ga norü tügünechacüü. ⁶ Rü inaxuneta naegagu ga Tupana ya yima guxüguma maxücü ya yima naxücü i daxüguxü i naãne rü ñoma i naãne rü taxtü i taxü rü guxüma i tacü nawa ngëxmagüxü. Rü ñanagürü ga yema orearü ngerü:

“Ñuxma rü marü täütama nuxcü ningu i ngëma Tupana nüxü ixuxü. ⁷ Erü ngëxguma nawa nanguxgu na ngëma norü 7 i Tupanaärü orearü ngerü inaxügüxü na yacueãxü ya norü corneta, rü ngëxguma tá nixĩ i yanguxü ga yema noxri ëxüguxü ga Tupanaärü uneta, yema nuxcümaügüxü ga norü orearü uruügümaã nüxü yaxuxü”, ñanagürü. ⁸ Rü yema naga ga noxri nüxü chaxĩnũxü ga daxüguxü ga naãnewa inaxüxü, rü wenaxärü chomaã nidexa. Rü ñanagürü choxü:

“¡Naxütawa naxü i ngëma Tupanaärü orearü ngerü i taxtü i taxüetügu rü waixümüãneetügu chicutüxü! ¡Rü nüxna nayaxu i ngëma poperaxacü i marü iiwëgüxü i naxmëxwa ngëxmaxü!” ñanagürü. ⁹ Rü naxütawa chaxü ga yema orearü ngerü, rü nüxna naxcëx chaca ga yema poperaxacü na choxna naxããxücëx. Rü nüma rü ñanagürü choxü:

“Ñã nixĩ. ¡Rü nayaxu rü nangõx! Rü cuëxwa rü berurerüü tá namaïcura. Natürü cuanüwa rü tá nanaxüxãchi”, ñanagürü choxü. ¹⁰ Rü yema orearü ngerümëxëwa chanayaxu ga yema poperaxacü, rü chanangõx. Rü chauëxwa rü berurerüü namaïcura. Natürü yexguma chanangõxguwena rü chauanüwa rü nanaxüxãchi rü changüxneca. ¹¹ Rü ñuxüchi chomaã nüxü nixu, rü ñanagürü choxü:

“Name nixĩ na wenaxärü Tupanaärü orexü quixuxü namaã i muxüma i nagüxüraüxü i duüxügü, rü muxüma i nachiüãnecüãxgü i duüxügü, rü muxüma i duüxügü i to i nagawa idexagüxü, rü muxüma i nachiüãnegüarü äëxgacügü”, ñanagürü choxü.

11

Taxre ga orearü uruüchiga

¹ Rü yemawena chanayaxu ga wüxi ga dexnemenëxã ga ngugürüü ixĩxüne ga choxna naxãxüne. Rü guma choxna naxãcü rü ñanagürü choxü:

“¡Inachi rü nangugü ya yima Tupanapata rü ngëma pumaraarü gutëxerüütaxmü! ¡Rü yaxugü rü ñuxre yĩxü i ngëma duüxügü i ngëma Tupanaxü icuëxüügüxü! ² ¡Natürü ngëma naãxtü ya Tupanapata, rü täütama cunangugü! Erü ngëma duüxügü i tama Tupanaãxü yaxögüxüna marü nanaxã. Rü nümagü rü tomaëxpüx ya taunecüarü ngãxü tá chixexü namaã naxügü ya yima ñãne ya üünene ya Yerucharéü. ³ Rü choma rü tá chanamu i taxre i chorü orearü uruügü na 1,260 i ngunexü duüxügümaã nüxü yaxugüxücëx i chorü ore. Rü nümagü i ngëma taxre rü tá niwëxchiru na ngëmawa duüxügü nüxü cuëxgüxücëx na ngechaü nüxü nguxgüxü”, ñanagürü choxü. ⁴ Rü ngëma taxre i orearü uruügü nixĩ i norü cuëxrüü i ngëma taxre i nanetü i orĩbu rü ngëma taxre i weraarü üruügü i tóru Cori ya ñoma i naãneärü yora ixĩcüpëxewa ngëxmagüxü. ⁵ Rü ngëxguma texé chixexü namaã ügüchaügu i ngëma

taxre i orearü uruüügü, rü nümagü rü üxüema ya naãxwa ínacuxechinemaã tüxü tá ínagu. Rü ngëmaãcü tá inayanaxoxëë i norü uwanügü. Rü ngëmaãcü tá tüxü nadai ya yíxema chixexü namaã ügüchaüxë. ⁶ Rü ngëma taxre i orearü uruüügü rü nüxü nangëxma i pora na íyachaxächixüçëx ya pucü na tama napuxüçëx i guxüma i ngëma 1,260 i ngunexüügü i nagu Tupanaärü orexü yaxugüxü. Rü ngëxgumarüü ta nüxü nangëxma i pora na nagüxü yaxixëëgüãxüçëx i dexá. Rü ngëxgumarüü ta nüxü nangëxma i pora na ñoma i naãnewa namugüãxüçëx i nagüxüraüxü i porxuruüügü na ngëmaãcü ngüxü duüxüügüxü yangexëëgüxüçëx i ngëxguma ngëma taxre naxwëxegügu. ⁷ Natürü ngëxguma ngëma taxre i orearü uruüügü nagüxëëgügu na nüxü yaxugüxü i Tupanaärü ore, rü ngëma ngoxo i ngëma äxmaxü i taguma iyacuáxüwa íxüxüxü, rü tá ngëma taxrena nayuxu. Rü tá nüxü narüyexera, rü tá nanadai. ⁸ Rü ngëma naxünegü i ngëma taxre rü tá yima ñãne ga tórü Cori nawa curuchawa ipotane ya Yerucharëüärü ítamüguwa nawogü. Rü yima ñãne rü nachixe rü ngëmacëx Chodomaärü ñãnemaã rü Equituanemaã nanaxugü. ⁹ Rü tomaëxpüx i ngunexüärü ngãxü rü muxüma i nagüxüraüxü i duüxüügü rü muxüma i guxü i nachiüñanecüãx i duüxüügü rü muxüma i duüxüügü i to i nagawa idexagüchigüxü, rü tá nüxü nadaugü i naxünegü. Rü täütama nanaxwëxegü na texë inatëxgüxü. ¹⁰ Rü ngëma duüxüügü i ñoma i naãnewa maxëxü rü tá nataãëgü na marü nayuxü i ngëma taxre. Rü ngëma na poraãcü nataãëgüxüchixü rü tá nügüna ãmare naxägü, yerü yema taxre ga orearü uruüügü rü poraãcü nanachixewe rü naãëwa nanangüxëëgü. ¹¹ Natürü yema tomaëxpüx ga ngunexüärü ngãxüguwena, rü Tupana wenaxärü nanamaxëxëë ga yema taxre. Rü wenaxärü ínarüdagü. Rü guxüma ga yema duüxüügü ga nüxü daugüxü rü poraãcüxüchi namuüë. ¹² Rü ñüxüchi ga yema taxre ga orearü uruüügü, rü nüxü naxüñüë ga wüxi ga naga ga tagaãcü daxüguxü ga naãnewa inaxüxü ga ñaxü: “¡Nuã daxüwa pexü!” ñaxü. Rü yemaãcü ga nümagü rü wüxi ga caixanexügu daxüguxü ga naãnewa naxü. Rü norü uwanügü rü yëma nüxü narüdaunü. ¹³ Rü yexgumatama poraãcü naxüñãchiane. Rü wüxi ga yema norü 10 arü üye ga yema ñãne, rü niwëxgü. Rü 7,000 ga duüxüügü nayue namaã ga yema ñãñãchiane. Rü yema togü ga duüxüügü ga maxëxü rü poraãcüxüchi namuüë. Rü Tupana ya daxüguxü i naãnewa ngëxmacüxü nicuëxüügü. ¹⁴ Rü yexma nayacuëx ga yema norü taxre ga chixexü. Natürü paxa tá ínangu i ngëma norü tomaëxpüx íxüxü.

Guma norü 7 ga cornetachiga

¹⁵ Rü yema norü 7 ga Tupanaärü orearü ngeruü, rü nayacue ga norü corneta. Rü nayexma ga nagagü ga tagaãcü daxüguxü ga naãnewa inaxüügüxü ga ñagüxü:

“Ñüxma rü yima mecü na namaã inacuëxgüxü i ñoma i naãne, rü nüma nixü ya tórü Cori ya Tupana rü Nane ya Cristu. Rü nüma rü guxügutáma namaã inacuëxgü”, ñagüxü. ¹⁶ Rü nümagü ga yema 24 ga äëxgacügü ga norü tochicaxüguwa rütogüxü ga Tupanapëxewa, rü yexma nanangüchitanü, rü Tupanaxü nicuëxüügü. ¹⁷ Rü ñanagürügü:

“Pa Torü Cori ya Tupana ya Guxüärü Yexera Poracüx, cuma rü woetama cuyexmaëcha, rü ñüxma rü ta cungëxmaëcha. Rü moxë cuxna taxägü, erü marü cugümëxëwa cunangëxmaxëë i guxüma, rü marü icunaxüügü na namaã icucuáxü. ¹⁸ Rü ngëma duüxüügü i tama cuxrü

ixīgüxü rü poraãcüxüchi nanuê, natürü nawa nangu i ngêma ngunexü i nagu tá cunapoxcuexü. Rü ngêxgumarüü ta marü nawa nangu na nüxü quicagüxü i guxüma i duüxügü i yuexü. Rü marü nawa nangu na nüxü cunaxütanüxü i ngêma curü duüxügü i curü orearü uruügü, rü ngêma duüxügü i cupêxewa imexü, rü guxüma i ngêma duüxügü i cuxü muüêxü i yaexü rü buexü. Rü marü nawa nangu na icuyanaxoxêêxü i ngêma duüxügü i nachixexêêxü i ñoma i naâne”, ñanagürügü. ¹⁹ Rü ñuxüchi Tupanapata ga daxüguxü ga naãnewa yexmane, rü niwãxna. Rü yéma norü aixepewa nüxü chadau ga yema baú ga Tupanaärü uneta ga nutagu ümatüxü. Rü nibèixbêxane, rü poraãcü nicuxcuane, rü naxiãxãchiane rü poraãcü gáuxü narüyi.

12

Wüxi ga nge rü wüxi ga coya ga taxü

¹ Rü ñuxüchi daxüwa nangox ga wüxi ga cuèxruü ga taxü. Rü iyexma ga wüxi ga nge ga üèxcürüü iyaaurachirucüücü. Rü ngütüütüüwa nayexma ga tauemacü. Rü yema ngürü ngèxcuerüü ga ngîruwa yexmaxü, rü 12 ga woramacurigü nixigü. ² Rü yema nge rü itacharaü. Rü poraãcü aita ixü yerü ixíracüchaü rü poraãcü inguxnecaxüchi. ³ Rü yemawena daxüwa nangox ga to ga cuèxruü. Rü yéma nayexma ga wüxi ga coya ga taxüchixü ga dauxü ga 7 ga naêru nüxü yexmaxü rü 10 ga naxchatacuxre. Rü wüxichigü ga naêruwa rü nüxü nayexma ga norü ngèxcuerüü. ⁴ Rü nareexümaã inayatüchigü ga wüxitücumü ga norü tomaêxpüxaruü üye ga woramacurigü, rü ñoma ga naãneetügu nanawogü. Rü yema coya rü ngîpêxegu nayachi ga yema nge ga íracücháücü, yerü tüxü nangöxchaü ga guxema ngíxácüxe ga yexguma tabuxgu. ⁵ Rü yema nge rü ixíracü, rü nayatü. Rü nüma rü tá guxü i nachiüãneärü âêxgacü nixí, rü tá namaã inacuèx. Natürü ga guma ngíne rü Tupana ngxna nanayaxu rü yema ínatoxüwa nanaga. ⁶ Rü yema nge rü wüxi ga nachica ga ngextá taxüema íxãpataxüwa iña. Rü yéma Tupana ngíxcèx nanamexêê ga wüxi ga ngíchica na yéma ngíxna nadauxücèx rü ngíxü naxüwemüxücèx ga 1,260 ga ngunexü. ⁷ Rü yemawena ga daxüwa rü nügü nadai. Rü Miguere ga Tupanaärü orearü ngeruügüarü âêxgacü ixícü rü guxüma ga natanüxü ga orearü ngeruügü, rü nügü nadai namaã ga yema coya ga taxüchixü rü norü orearü ngeruügü. Rü yema coya rü ñuxüchi norü orearü ngeruügü i chixexü rü poraãcü Tupanaärü orearü ngeruügümaã nügü nadai. ⁸ Natürü ga yema coya rü norü orearü ngeruügü rü tama Tupanaärü orearü ngeruügüxü narüporamaëgü. Rü ñuxüchi ga yema coya rü norü orearü ngeruügü rü nangechica ga daxüguxü ga naãnewa. ⁹ Rü yemaãcü ínatèxüchi ga daxüguxü ga naãnewa ga yema coya ga yema nuxcümaüxü ga äxtape. Rü nüma rü ngoxogu rü Chatanágu naxãega. Rü nüma nixí i guxüma i ñoma i naãnecüãx i duüxügüxü nawomüxêêxü. Rü nüma rü norü orearü ngeruügümaã ñoma ga naãnegu narüwoü. ¹⁰ Rü ñuxüchi nüxü chaxínü ga wüxi ga naga ga daxüguxü ga naãnewa tagaãcü ñaxü:

“Ñuxma rü marü nawa nangu na tórü Tupana rü norü duüxügüxü namaxêêxü. Rü ñuxma rü nüma tüxü nüxü nadauxêê na guxüärü yexera naporaxü rü guxüärü âêxgacü yíxü. Rü Nane ya Cristu rü marü tüxü nüxü nadauxêê na guxümaã inacuáxü. Yerü marü daxüguxü

ga naãnewa ínatèxüchi ga Chataná ga ngunecü rü chütacü tórü Tupanapèxewa taeneëgüxü yeücürü ixuechaxü. ¹¹ Rü nümagü ga yema taeneëgü, rü marü Chatanáxü narüyexeragü nagügagu ga guma pecaduarü útanücèx yucü rü nagagu ga Tupanaãrü ore ga nüxü yaxugüxü. Yerü ga nümagü rü tama nayanuxügü ga norü maxü, rü ínamemaregü na Tupanacèx nayuexü. ¹² ¡Rü ngëmacèx petaãëgü i guxãma i pema i daxügüxü i naãnewa ngëxmagüxe! ¡Natürü pengechaütümüügü i pema i yea naãne i pecadaãxüwa ngëxmagüxe rü taxtü i taxüwa ngëxmagüxe! Erü ngëma ngoxo i Chataná rü marü petanügu narütáe. Rü poraãcü nanu i nüma erü marü noxretama i ngunexü nüxü ínayaxü na chixexü naxüxü, erü paxa tá napoxcu”, ñanagürü ga yema naga. ¹³ Rü yema coya ga taxüchixü ga Chataná nagu icüxü rü yexguma nügü yacuèxãchigu ga ñoma ga naãnegu na natáexü, rü ngíwe ningëchigü ga yema nge ga íraxacücü. ¹⁴ Natürü ga Tupana rü ngixü naxüxpexatü ga yema nge. Rü nanaxïyüpexatügüraxü. Rü yemaãcü nachica ga ngextá taxúema íxãpataxüwa íña naxchaxwa ga yema coya ga Chataná nagu icüxü.. Rü yema nachicawa nixí ga Tupana ngíxna dauxü, rü ngíxü úwemüxü ga tomaëxpüx ga taunecüarü ngãxü. ¹⁵ Rü yema coya ga Chataná rü dexá nügüëxwa ínaxüxüxëë na wüxi ga natü naxüxücèx, rü yema natümaã ngíxü yachaxëëxücèx ga yema nge. ¹⁶ Natürü ga waixümmü rü ningëx na iyachexëëãxücèx ga yema dexá ga coya nügüëxwa íxüxüxëëxü. ¹⁷ Rü ñüxüchi ga yema coya ga Chataná, rü poraãcüxüchima ngímaã nanu ga yema nge. Rü ínixü na nügü namaã yadëixücèx ga yema togü ga ngíxãcügü ga yema nge. Rü ngëma ngíxãcügü i ngëma coyamaã nügü dëixü, rü ngëma nixí i ngëma duüxügü i meã Tupanaãrü orega íñüexü rü meã yaxögüechaxü i Ngechuchu ya Cristuarü ore i aixcüma ixíxü. Rü ñüxüchi ga yema coya rü norü numaã taxtü ga taxüãnacügu nayarüñu.

13

Taxre ga ngoxogüchiga

¹ Rü nüxü chadau ga wüxi ga ngoxo ga taxü ga taxtügu íñuãchixü ga 7 eruxü rü 10 chatacuxrexü. Rü wüxichigü ga naxchatacuxrewa rü nüxü nayexma ga norü ngëxcuerü. Rü naërugügu naxümatü ga ñuxre ga naegagü ga Tupanamaã guxchigagüxü. ² Rü yema ngoxo ga nüxü chadauxü, rü wüxi ga airüü nixí. Rü naxmëxgü rü chatü ga taxümxëgürüü nixí. Rü naãx rü wüxi ga aiëxrüü nixí. Rü yema coya ga Chataná rü yema ngoxoxü naporaxëë na naxrüü naporaxücèx rü naxrüü ãëxgacü yíxücèx na ñoma ga naãnemaã inacuéxücèx. ³ Rü wüxi ga naëruwa ga yema ngoxo, rü nüxü nayexma ga wüxi ga taxü ga norü oxri ga namaã nayuxchaüxü. Natürü ga yema norü oxri rü nüxü nixë, rü naxcèx nitaane. Rü guxüma ga ñoma ga naãnecüãx ga duüxügü rü poraãcü yema ngoxomaã nabaixãchie, rü nawe narüxí. ⁴ Rü ga duüxügü rü yema coya ga Chatanáxü nicuèxüügü yerü yema ngoxoxü naporaxëë na ãëxgacü yíxücèx. Rü yexgumarüü ta yema ngoxoxü nicuèxüügü, rü ñanagürügü:

“¿Texé tangëxma ya ñaã ngoxorüü poraxe? ¿Rü texé tapora na namaã tügü tadëixü?” ñanagürügü. ⁵ Natürü ga Tupana rü tama yema ngoxona nanachüxu na nügü yacuèxüxücèx rü tacü Tupanamaã yaxugüxücèx rü ãëxgacü na yíxücèx ga 42 ga tauemacü. ⁶ Rü yemaãcü chixexü naxü ga yema ngoxo. Rü poraãcü tacü Tupanamaã nixügü. Rü Tupanamaã

naguxchiga, rü napatamaã rü ta naguxchiga, rü tümamaã naguxchiga ya guxâma ya yíxema daxüguxü i naãnewa ngëxmagüxe. ⁷ Rü yema coya ga Chataná rü yema ngoxoxü naporaxëë na Tupanaärü duüxügümaã nügü nadëixüçex ñuxmatáta tüxü nayexera. Rü äëxgacüxü nayaxixëë na namaã inacuíxüçex ga nagúüraüxü ga duüxügü ga guxüma ga nachüüñecüãx ga nagúüraüxü ga nagawa idexagüxü. ⁸ Rü tá ngëma ngoxoxü nicuèxüügü i guxüma i duüxügü i ñoma i naãnewa maxëxü i noxritama naãne üxgu ngeégagüxü nawa i norü popera ya yima pecaduarü ütanüçex yucü i nagu yawügüãxü i ngëma duüxügü i marü Tupana nüxna naxãxü i maxü i taguma gúxü. ⁹⁻¹⁰ Rü ngëxguma texé äxchixëgu, rü name nixí i naga taxínü i ñaã tá pemaã nüxü chixuxü. Rü ngëxguma texé tümamaã naxuegugu na tüxü yayauxgüxü, rü noxtacüma tá tiyaxu. Rü ngëxguma texé tümamaã naxuegugu na tüxü yamëxgüxü, rü noxtacüma tá tüxü nimëxgü. Rü ngëmacëx ya yíxema Tupanaärü duüxügü ixígüxe, rü woo tacü rü guxchaxü tüxü ngupetügu, rü tanaxwëxe na yaxna namaã taxínüëxü rü tayaxögüamaxü. ¹¹ Rü yemawena nüxü chadau ga wüxi ga to ga ngoxo ga taxrechatacxrexü ga waixümüãnewa ixüxüxü. Rü yema naxchatacxre rü ñoma carneruchatacxrerü nixí. Natürü ga naga rü wüxi ga coya ga taxüchixügarü nixí. ¹² Rü yexguma yema nüxíraüxü ga ngoxopëxewa nayexmagu, rü naxrüütama napora. Rü ñoma ga naãnemaã inacüex, rü nanamu ga ñoma ga naãnewa maxëxü ga duüxügü na yema nüxíraüxü ga ngoxo ga ixëärü oxriáxüxü na yacuèxüügüxüçex. ¹³ Rü yema ngoxo nanaxü ga taxü ga cuëxruügü ga duüxügü tama nüxü cuáxü na naxügüãxü. Rü daxüwa nanayixëë ga üxü, rü ñoma ga naãnegu nayi napëxewa ga duüxügü. ¹⁴ Natürü ga Tupana rü tama yema ngoxona nanachüxu na ñoma ga naãnewa maxëxü ga duüxügüxü nawomüxëëxü namaã ga yema cuëxruügü ga yema nüxíraüxü ga ngoxopëxewa naxüxü. Rü yemaãcü ga yema ngoxo rü duüxügüxü namu na naxügüãxüçex ga naxchicünëxã ga yema nüxíraüxü ga ngoxo ga taramaã chexexü rü poraãcü rüxóxü rü tama yuxü. ¹⁵ Rü Tupana rü tama yema to ga ngoxona nanachüxu na namaxëëãxüçex ga yema nüxíraüxü ga ngoxochicünëxã. Rü yemaãcü ga yema ngoxo rü nanamaxëë ga yema naxchicünëxã na yadexaxüçex rü na nadaiaxüçex ga guxüma ga yema duüxügü ga tama nüxü icuèxüügüxü. ¹⁶ Rü yexgumarü ta guxüma ga duüxügüxü namu na norü tügünemëxëwa rü ëxna nacatüwa nüxü na nayexmaxüçex ga wüxi ga cuëxruü ga yema ngoxoëga ixíxü. Rü yemaãcü nanamu ga guxüma ga duüxügü rü woo buxü rü ëxna yaxü, rü woo duüxügü i muärü dïeruãxgüxü rü ëxna ngearü dïerüãxgüxü, rü woo duüxügü i ngearü coriãxgüxü rü ëxna duüxügü i ixãärü coriãxgüxü. ¹⁷ Rü taxucürüwa texé tümäärü tacüçex tataxe rü ëxna tümäärü tacümaã tataxe ga yexguma tümäärü tügünemëxëwa rü ëxna tümacatüwa tüxü natauxgu ga yema ngoxoëga rü ëxna yema ngoxoëgarü cuëxruü ga número. ¹⁸ Rü ñaã orexü na icuáxüçex, rü tanaxwëxe na tüxü nangëxmaxü i tórü cuëx. Rü yíxema tüxü nangëxmaxë i tümäärü cuëx, rü name nixí i tanangugü i ngëma número i ngëma ngoxoëga ixíxü. Erü ngëma número rü wüxi i yatüégachirëx nixí. Rü ngëma número rü 666 nixí.

14

Yema 144,000 ga duüxügüarü wiyae

¹ Rū yemawena ichadawenü, rü nüxü chadau ga guma pecaduarü ütanücëx yucü ga guma mëxpüne ga Siðügu äeganeetügu chicü. Rū naxütawa nayexma ga 144,000 ga duüxügü ga nacatüwa ixäegaxü namaã ga guma pecaduarü ütanücëx yucüega rü Nanatü ya Tupanaega. ² Rū ñuxüchi nüxü chaxñü ga wüxi ga naga ga tagaxü ga daxüguxü ga naãnewa inaxüxü ga ñoma taxü i cotüna i chuxchuxügarüü ixixü rü ñoma poraãcü yaduruanexürüü ixixü rü ñoma muxüchixü i duüxügü i arpawa ípaxetaxüxürüü ixixü. ³ Rū yema 144,000 ga duüxügü rü nagu nawiyaegü ga wüxi ga yexwacaxüxü ga wiyae napëxewa ga Tupanaärü tochicaxü rü napëxewa ga yema ägümücü ga daxüçüãx ga maxëxü rü napëxewa ga yema 24 ga äëxgacügü. Rū taxucürüwama texé ga togue nüxü tacuëxëga ga yema wiyae. Rū yema 144,000 ga duüxügüxícatama nixí ga nüxü cuëxgüxü. Rū yema nixí ga Tupana ñoma ga naãnewa deixü na namaxëxëãxütëx. ⁴ Rū yema nixí ga duüxügü ga tama ñoma ga naãneärü ngüchaü i chixexümaã nügü äüãchiarü maxüãxgüxü rü tama nüxü rüxoexü na Tupanaãxü yaxögüãxü. Rū nümagü rü yima Tupana Nane ga pecaduarü ütanücëx yucüwe narüxi i ngextá inaxüxüwa. Rū yemagü nixí ga ñoma ga naãneçüãxütanüwa nüxira Tupana naxcëx taxexü na noxrü rü Naneärü duüxügü i üünexü yixigüxütëx. ⁵ Rū yematanüwa rü taguma texé nüxü taxñü na doraxü yaxugüxü, erü Tupanapëxewa rü nataxuma i norü chixexü.

Orearü ngeruüü ga daxüçüãxärü orechiga

⁶ Rū ñuxüchi nüxü chadau ga wüxi ga to ga orearü ngeruü ga daxüguxü ga naãnegu íxexeüxü ga iyangexü ga Tupanaärü ore i guxügutáma ixixü, na guxü i nachiüãneçüãxgümaã rü nagüxüraüxü i duüxügümaã rü guxüma i duüxügü i nagüxüraüxü i nagawa idexagüxümaã nüxü yaxuxüçëx. Rū yemaãcü inayange ga yema Tupanaärü ore na guxüma i ñoma i naãnewa maxëxü i duüxügümaã nüxü yaxuxüçëx. ⁷ Rū tagaãcü ñanagürü:

“¡Nüxü pemuüë ya Tupana rü nüxü picuëxüüüü! Erü marü nawa nangu na guxüma i duüxügüna naçaxü. ¡Rü nüxü picuëxüüüü ya yima naxüçü i daxüguxü i naãne rü ñoma i naãne rü taxtü i taxü rü guxüma i natüxacügü!” ñanagürü. ⁸ Rū yemawena nangox ga to ga orearü ngeruü ga daxüçüãx, rü ñanagürü:

“Marü nagu nayarüchixe ya yima ñãne ya taxüne ya Babiróniã, rü nagu napögüe rü nayawëxtaüüxüëë ya norü ígü. Yerü yema ñãneçüãx rü nanachixexëë ga guxüma ga to ga nachiüãneçüãx ga duüxügü. Rü guxüma ga yema duüxügüxü namu na naxügüãxüçëx ga yema chixexü ga guma ñãnewa naxügüxü ga Tupanapëxewa poraãcü chixexü”, ñanagürü. ⁹⁻¹⁰ Rū yemawena nangox ga to ga orearü ngeruü ga tagaãcü ñaxü:

“Ngëxguma chi texé nüxü icuëxüüüü i ngëma ngoxo rü naxchicünëxãxü ticuëxüüüü rü tügü itaxãxgu na tümacatüwa rü êxna tümamëxëwa ngëma ngoxoégamaã tacuëxruüãxü, rü Tupana rü poraãcüxüchi tá tüxü napoxcu namaã i ngëma poxcu i guxüärü yexera ixixü i nümatama ya Tupana norü numaã namexëëxü. Rü üxümaã rü azufre i iyauraxümaã tá ngüxü tüxü ningexëë napëxewa i norü orearü ngeruüüü rü napëxewa ya yima Nane ga pecaduarü ütanücëx yucü. ¹¹ Rū naëma ya yima üxü ya nawa Tupana ngüxü tüxü ingexëne, rü guxügutáma ngëma nicaixqueecha. Rü bai i írarüwa tá tüxü narüna i ngëma ngüxü ya yixema ngëma ngoxoü rü ngëma

ngoxochicünèxãxũ icuèxũügũxe rü tügũ ixãxê na ngêma ngoxoégamaã taxãegaxũ. Rü bai i ngunecũ rü bai i chütacũ tá tüxũ narũna i ngêma ngúxũ”, ñanagürü. ¹² Rü ngêmacèx ya yíxema Tupanaärü duüxügũ ixígũxe rü norü orega ñnüèxê rü Ngechuchuaxũ yaxôgũxe, rü name nixĩ na yaxna namaã taxĩnüèxũ rü tayaxôgũamaxũ ega woo tacũ rü guxchaxũ tüxũ ngupetügu. ¹³ Rü ñuxũchi nüxũ chaxĩnü ga wüxi ga naga ga daxũguxũ ga naãnewa ñaxũxũ ga ñaxũ choxũ:

“¡Naxümatü i ñaã ore i tá cumaã nüxũ chixuxũ! Rü ñuxmaücüü tá tataãégü ya yíxema tórü Coriaxũ meã yaxôgũácüma yuexe. Erü Tupanaãe i Üünexũ rü ñanagürü: ‘Ngü, ngêmaãcü tá tataãégü ya yíxema, erü tá itarüngüê nüxna i tümaärü puracügü. Rü ngêma mexũ i taxügüxũ rü tümamaã wüxigu daxũguxũ i naãnewa tá naxü’”, ñanagürü.

Ñoma i naãnewa nanade i ngêma duüxügü i Tupanaärü ixígüxũ

¹⁴ Rü ñuxũchi ichadawenü rü nüxũ chadau ga wüxi ga caixanexũ ga cómuxũ. Rü yema caixanexüetüwa narüto ga Tupana Nane ga duüxũxũ ixícü. Rü naëruwa nayexma ga wüxi ga norü ngëxcueruũ ga uirunaxcèx. Rü namëxwa nayexma ga wüxi ga cüxchi ga ínapomaguxũ ga tãxechixũ. ¹⁵ Rü Tupanapatawa ñaxũxũ ga wüxi ga to ga orearü ngeruũ ga tagaãcü ñaxũ nüxũ ga guma caixanexüetüwa rütocü:

“¡Inaxügü na cunadexũ i ngêma duüxügü i cuxrü ixígüxũ! Erü marü nawa nangu na cugüxütawa cunagagüxũ, erü ngêma curü duüxügü i ñoma i naãnewa ngëxmagüxũ rü ínamemare na cunadexũ”, ñanagürü. ¹⁶ Rü ñuxũchi ga guma yema caixanexüetüwa rütocü rü ñoma trigu i buxuxürüü naãneëtügu ngĩmaã nayabuãchi ga norü cüxchi. Rü nanade ga yema norü duüxügü ga ñoma ga naãnewa yexmagüxũ. ¹⁷ Rü ñuxũchi daxũguxũ i naãnewa ngëxmane ya Tupanapatawa ñaxũxũ ga wüxi ga to ga orearü ngeruũ ga nüxũ nayexmacü ga wüxi ga cüxchi ga ínapomaguxcũ ga tãxechixcũ. ¹⁸ Rü yema pumaraarü gutëxeruütaxmüwa ñaxũxũ ga wüxi ga to ga orearü ngeruũ ga üxümaã icuáxũ. Rü nüma rü tagaãcü ñanagürü nüxũ ga yema to ga orearü ngeruũ ga yema cüxchi ga ínapomaguxcũ ga tãxechixcũ nüxũ yexmaxũ:

“¡Inaxügü na cunadexũ i ngêma duüxügü i yéa naãnewa ngëxmagüxũ i tama Tupanaärü ixígüxũ! Erü marü nawa nangu na Tupana napoxcuexũ”, ñanagürü. ¹⁹ Rü yema orearü ngeruũ rü ñoma ga naãneëtügu ngĩmaã nayabuãchi ga norü cüxchi. Rü nayadexechi ga yema duüxügü ga tama Tupanaärü ixígüxũ ga ñoma ga naãnewa yexmagüxũ. Rü wüxi ga taxũ ga nachicagu nanawocu na yexma Tupana norü numaã nadèixücèx, ñoma ubagü imèixtüüxürüü. ²⁰ Rü yema nachica ga ñãneärü íxpemawa yexmaxügu nanadaí. Rü guma nagü ga yéma íyaxüchicü, rü 300 ga kilómetru inayarübaichi, rü wüxi ga metruarü ngãxũ nixĩ ga norü mátama ga guma nagü.

15

Tupanaärü orearü ngeruũgü ga nüxũ nayexmaxũ ga 7 ga poxcuruũgü

¹ Rü ñuxũchi ga daxũguxũ ga naãnewa rü nüxũ chadau ga wüxi ga to ga taxũ ga cuëxruũ ga namaã ibaixächixũ. Rü nayexma ga 7 ga orearü ngeruũgü ga daxücüãx ga nüxũ yexmagüxũ ga 7 ga poxcuruũ. Rü yema poxcugu nixĩ ga yagüxũ ga norü nú ga Tupana. ² Rü yexgumarüũ ta nüxũ chadau ga ñoma wüxi ga nanaxtaaëtüwaraüxũ ga woruarüü

iyauraétücüüxü ga üxüema nawa inachixü. Rü yéma tayexmagü ga guxema nüxü rüyexeraxe ga yema ngoxo rü yema ngoxochicünèxã rü yema ngoxoéga rü yema número ga yema ngoxoéga ixixü. Rü yema nanaxtaaétüraüxügu tachigü. Rü tüxü nayexmagü ga tümaärü paxetarüügü ga arpa ga Tupana tüxna äxü. ³ Rü nagu tawiyaeü ga Moiché ga Tupanaärü duüxü ixicüarü wiyae. Rü yexgumarüü ta nagu tawiyaeü ga yema wiyae ga guma Tupana Nane ga pecaduarü ütanüçex yucüarü ixixü ga ñaxü:

“Pa Torü Cori ya Tupana ya Guxüärü Yexera Poracüx, nataxüchi rü namexëchi i guxüma i ngëma cuxüxü. Rü cuma rü guxügutáma guxüma i nachiüñnegüarü äëxgacü quixi. Rü cuma rü aixcüma meãma namaã icucüex rü taguma quidora. ⁴ ¿Rü texé täütáma cuxü tamuü, Pa Corix? ¿Rü texé täütáma cuxü ticüexüü? Erü cuma rü cuxicatama nixi i üünecü quixü. Rü guxüma i nachiüñnecüäx rü nuã tá naxi, rü tá cuxü nicüexüügü. Yerü marü nüxü nadaugü na quixaixcümaxü i guxüma i ngëma nüxü quixuxüwa rü aixcüma mea cunangügüxü i guxüma i ngëma chixexü ügüxü rü ngëma mexü ügüxü”,

ñanagürü ga yema wiyae. ⁵ Rü yemawena ichadawenü rü nüxü chadau ga daxügüxü ga naãnewa na yawãxnaxü ga yema nachica ga üünexü ga Tupanapataarü aixepewa yexmaxü ga ngexta namaã íngaxüügüxüwa ga guma nuta ga Tupanaärü mugü nagu ümatüçü. ⁶ Rü guma Tupanapatawa ínachoxü ga yema 7 ga orearü ngerüügü ga daxüçüäx ga nüxü nayexmagüxü ga yema 7 ga poxcuruügü. Rü naxchiru ga mexëchixümaã rü iyauracüüxümaã nixãxchiru. Rü yema norü goy-eremüügü rü uirunaxcëx nixi. ⁷ Rü ñuxüchi wüxi ga yema ägümüçü ga daxüçüäx ga maxüxü, rü wüxichigü ga yema 7 ga orearü ngerüügüna nanaxã ga wüxi ga copa ga uirunaxcëx ga Tupana ya guxüguma maxëchacüarü nu i äücümaxümaã ixãäcuxü. ⁸ Rü guma Tupanapata rü namaã naxãacu ga yema caixema ga Tupana ya mexëchicü rü poracüwa ne üxü. Rü taxucürüwama texé yexma taxücu ñuxmata nagü ga yema 7 ga poxcuruü ga yema 7 ga orearü ngerüügüaxü yexmaxü.

16

copagü ga Tupanaärü numaa ixãäcuxüchiga

¹ Rü ñuxüchi nüxü chaxinü ga wüxi ga naga ga tagaacü guma Tupanapatawa inaxüxü ga ñaxü nüxü ga yema 7 ga orearü ngerüügü:

“¡Ngema pexi, rü naãneetüwa peyabagüäcu i ngëma 7 i copagü i Tupanaärü nu i äücümaxümaã ixãäcuxü!” ñanagürü. ² Rü yéma naxü ga wüxi ga Tupanaärü orearü ngerüü, rü naãneetügu nayabaäcu ga norü copa. Rü guxüma ga duüxüügü ga yema ngoxoégamaã ixãegaxü rü yema ngoxochicünèxãxü icüexüügüxü, rü nawa inayarüögü ga taixna ga nguxuchixü ga taguma ixëxü. ³ Rü yema norü taxre ga orearü ngerüü, rü taxü ga taxtüétügu nayabaäcu ga norü copa. Rü nagüxü nananguxuchi ga dexá, rü ñoma wüxi i duüxü i texé imáxügürü nixi ga dexá. Rü guxüma ga tacü ga taxtüwa maxëxü rü nayue. ⁴ Rü yema norü tomaëxpüx ga orearü ngerüü rü natügüétügu rü natüxacügüétügu nayabaäcu ga norü copa. Rü guxüma ga yema natügü rü natüxacügü, rü nagüxü nanacëxichi. ⁵ Rü ñuxüchi nüxü chaxinü ga yema Tupanaärü orearü ngerüü ga guxüma ga dexámaã icuáxü ga ñaxü:

“Pa Torü Cori ya Tupana ya Üünecü ya Woetama Yexmaëchacü rü Ñuxma Ngëxmaëchacü, cuma rü wüxi i mexü cuxü na ngëmaäcü dexá nagüxü cunacëxichixëëxü naxchaxwa i ngëma duüxügü. ⁶ Yerü nümagü rü nanadai ga yema curü duüxügü rü curü orearü uruügü, rü inanaba ga nagü. Rü ñuxma i cuma rü wüxi i mexü nixi i cuxüxü na ngëma dexá nagüxü cunacëxichixëëxü na nawa naxaxegüxüçëx. Yerü yema nixi ga yema nanaxwëxegüxü rü yemacëx nixi ga curü duüxügüxü nadëixü”, ñaxü. ⁷ Rü nüxü chaxñü ga wüxi ga naga ga yema pumaraarü gutëxeruütaxmüwa inaxüxü ga ñaxü:

“Ngü, Pa Cori ya Tupana ya Guxüärü Yexera Poracüx, aixcüma nixi i namexü i ngëma cuxüxü”, ñaxü. ⁸ Rü yema norü ägümücü ga orearü ngeruü rü üexcüétügu nayabaäcu ga norü copa. Rü yemaäcü poraäcü nananaiemaxëë ga üexcü na yema norü nañëmaxümaä inaguäxüçëx ga duüxügü. ⁹ Rü guxüma ga duüxügü rü poraäcü nüxü nanguxema, natürü tama nüxü narüxoe ga nacüma ga chixexü rü tama Tupanaxü nicuëxüügü. Rü naguxchigagüama namaä ga Tupana ya guxüma i ngëma poxcuruümaä icuäcü. ¹⁰ Rü yema norü wüximëëxpüx ga orearü ngeruü, rü yema ngoxoarü tochicaxüetügu nayabaäcu ga norü copa. Rü guxüwama ga ngextá äëxgacü iyixüwa ga yema ngoxo, rü naxëäne. Rü yema na poraäcü nüxü nangüxü ga duüxügü, rü nügü nangöörü conüäxgü. ¹¹ Natürü woo yemaäcü nüxü na nangupetüxü ga duüxügü, rü tama nüxü narüxoechäü ga yema chixexü ga naxügüxü. Natürü yema na poraäcü nüxü nangüxü ga norü taixnagü, rü naguxchigagüama namaä ga Tupana ya daxügücü. ¹² Rü yema norü 6 ga orearü ngeruü, rü yema taxtü ga Euférateétügu nayabaäcu ga norü copa. Rü inayache ga yema taxtü na wüxi ga nama na yixüçëx naxcëx ga yema nachiuñänegüarü äëxgacügü ga üexcü iyarügoxüwa ne ixü. ¹³ Rü nüxü chadau rü yema coyaäxwa, rü yema nüxiraüxü ga ngoxoëxwa, rü yema to ga ngoxo ga yema orearü uruñnetaëxwa, rü wüxiëxwachigü inaxüxü ga wüxi ga naäë ga chixexü ga ñoma curururü ixixü. ¹⁴ Rü yema ngoxoäëgü nixi ga naxügüxü ga yema taxü ga cuëxruügü ga duüxügü taxucürüwa ügüxü. Rü yema ngoxogü rü inachoxü na nangutaquëxexëëgüäxüçëx i guxüma i ñoma i naänewa ngëxmagüxü i nachiuñänegüarü äëxgacügü na Tupana ya Guxüärü Yexera Poracümaä nügü nadaixüçëx i ngëxguma nawa nanguxgu i naäneärü gux. ¹⁵ Natürü dücax, rü pexuäëgü erü törü Cori ya Ngechuchu ya Cristu rü ñanagürü:

“Choma rü ngürüächi taxüetäma choxü inanguxëëyane íchangu, ñoma wüxi i ngítëxäxü ínguxürüü. Rü tataäë ya yixema ímemarexe ñoma wüxi i duüxü i naxchiru ímexëëxürüü na tama tangexchiruxüçëx rü taxänexüçëx i ngëxguma íchanguxgu”, ñanagürü. ¹⁶ Rü yema ngoxogü, rü nanangutaquëxexëë ga guxüma ga ñoma ga naänewa yexmagüxü ga nachiuñänecüäxgüarü äëxgacügü. Rü yema nachica ga nawa nangutaquëxegüxü, rü Armaguedóügu naxäega i Yudíugügawa. ¹⁷ Rü yema norü 7 ga orearü ngeruü, rü buanecügumare nayabaäcu ga norü copa. Rü guma Tupanapata ya daxügüxü i naänewa ngëxmanewa inanaxü ga wüxi ga naga ga tagaxü ga yema Tupanaärü tochicaxüwa inaxüxü ga ñaxü:

“Marü ningu”, ñaxü. ¹⁸ Rü nibëixbëxane, rü poraäcü nicuxcuane, rü niduruane. Rü poraäcü naxiäxächiane. Rü noxri Tupana duüxügüxü üxgumama rü taguma nayexma ga wüxi ga iäxächiane ga yemarüü

poraxũ. ¹⁹ Rũ guma ããne ga taxũne ga Babiróniã, rũ tomaẽxpũxgu ningũxyeane. Rũ guma ããnegũ ga ñoma ga naãnewa yexmagũne rũ niwextaũgũ. Rũ Tupana rũ nũxna nacuaxãchi ga guma ããne ga Babiróniããrũ chixexũ. Rũ yemacẽx norũ numaã poraãcũ nanapoxcu ga guma ããne, yerũ poraãcũxũchi namaã nanu. ²⁰ Rũ guxũma ga capaxũgũ rũ guxũnema ga mẽxpũnegũ, rũ inayarũxogũ. ²¹ Rũ daxũwa narũyi ga gáauxũ ga itapũtaxũ, rũ duũxũgũétũgu nayi. Rũ wũxipũtachigũ ga yema gáauxũ, rũ 40 ga kilogu nixĩ ga nayaxũ. Rũ ga duũxũgũ rũ Tupanamaã naguxchigagũ nagagu ga yema poxcuruũ ga gáauxũ, yerũ poraãcũ nũxũ nangux ga yema poxcu ga Tupana namaã napoxcuexũ.

17

Ããne ga Babiróniã ga wũxi ga nge ga ngẽãxũ- chicũgu ixuxũne

¹ Rũ yema 7 ga orearũ ngeruũgũ ga nũxũ yexmagũxũ ga 7 ga copagũ, rũ yematanũwa rũ wũxi ga orearũ ngeruũ, rũ chauxcẽx nixũ, rũ ñanagũrũ choxũ:

“¡Nuã naxũ! Rũ tá cuxũ nũxũ chadauxẽẽ i ãacũ tá nixĩ i ngĩrũ poxcu i ngẽma nge i ngeãxũchicũ i taxũ i dexágũétũwa rũtoxcũ. ² Rũ ñoma i naãnewa ngẽxmagũxũ i nachiũãnegũarũ ãẽxgacũgũ, rũ ngĩmaã namaxẽ, rũ yemaãcũ poraãcũ chixexũ naxũgũ. Rũ guxũma i ñoma i naãnecũãx, rũ ngĩrũ chixexũ nũxna naxũe”, ñanagũrũ. ³ Rũ yexguma Tupanaãẽ i Üünexũ yemaãcũ choxũ ngoxetũxẽẽgu, rũ yema orearũ ngeruũ rũ wũxi ga nachica ga ngextã taxũema Íãpataxũwa choxũ naga. Rũ yema ngĩxũ chadau ga wũxi ga nge ga wũxi ga ngoxo ga dauxũetũwa rũtoxcũ. Rũ yema ngoxo rũ guxũwama naxãegaxũne, rũ yema naegagũ rũ Tupanamaã naguxchiga. Rũ 7 nixĩ ga naẽru rũ 10 ga naxchatacxre. ⁴ Rũ yema nge rũ wũxi ga naxchiru ga dauxracharaxũ rũ dauxũmaã ixãxchiru. Rũ uirumaã rũ nutagũ ga mexẽchicũmaã ingãxãẽ. Rũ ngĩxmẽxwa ngĩxũ nayexma ga wũxi ga copa ga uirunaxcẽx. Rũ yema copa rũ namaã naxããcu ga nagũxũraũxũ ga yema Tupanapẽxewa chixexũ rũ nagũxũraũxũ ga chixexũgũ ga yema nge ũxũ. ⁵ Rũ ngĩcatũgu naxũmatũ ga wũxi ga naega ga taxũema nũxũ cuãxũ na ñuxũ ñaxũchiga yĩxũ. Rũ yema naega rũ ñanagũrũ:

“Rũ yima Babiróniã rũ guxũma i ngema duũxũgũ i chixexũ ũgũxũ i ñoma i naãnewa maxẽxũarũ mamã nixĩ”, ñanagũrũ. ⁶ Rũ ngĩxũ chadau ga yema nge ga na nangãxũxũ namaã ga guma nagũ ga yema duũxũgũ ga Tupanaãrũ ixĩgũxũ rũ yema duũxũgũ ga Ngechucharũ orexũ na yaxugũxũcẽx dẽixũ. Rũ yexguma yemaxũ chadẽuxgu, rũ chabaixãchi. ⁷ Rũ yexguma ga yema orearũ ngeruũ rũ ñanagũrũ choxũ:

“¿ãacũcẽx cubaixãchi? Dücẽx, tá cumaã nũxũ chixu na ãacũchiga yĩxũ i ngẽma nge, rũ ãacũchiga yĩxũ i ngẽma ngoxo i 7 eruxũ rũ 10 chatacxrexũ i naetũwa natoxũ. ⁸ Rũ ngẽma ngoxo i nũxũ cudauxũ, rũ yema nixĩ ga nuxcũmaxũchi maxchirẽxũ natũrũ ñũxma rũ marũ yuxũ rũ ngẽma ãxmaxũ i taxuguma iyacuãxũwa ngẽxmaxũ. Natũrũ paxa tá ngema Íxũxũxũ, rũ ñũxũchi ngẽma nachica i guxũgutãma nagu napoxcuxũwa tá ũxũ. Rũ ngẽma ngoxoma ã tá nabaixãchiãẽgũ i ngẽma duũxũgũ i ñoma i naãnewa maxẽxũ i tama nawa ngoxégagũxũ i ngẽma Tupanaãrũ popera i noxritama naãne ixũgũgu Tupana nagu yawũgũxũ i ngẽma duũxũgũ i nũxũ nangẽxmaxũ i maxũ i taguma gũxũ. Rũ nũmagũ i ngẽma duũxũgũ rũ aixcũma tá namaã nabaixãchiãẽgũ i ngẽxguma nũxũ nadaugũgu i ngẽma

ngoxo ga nuxcūmaxūchi maxchiréxū rü yuxū natürü wena táxarü ínguxū.⁹ Rū ñaã nixī i wüxi i ore naxcèx i ngēma duūxūgū i nūxū natauxchaxū na nūxū nacuèxgūxū. Rū ngēma 7 i naèru i ngēma ngoxo, rü yima nixī ya 7 ya mèxpúnechiga. Rū yima 7 ya mèxpúneētüwa nixī i natoxū i ngēma nge. Rū ngēxgumarūū ta i ngēma naèrugū, rü 7 i nachiuānegüarū ãëxgacügüchiga nixī.¹⁰ Rū wüximéëxpūx i ngēma ãëxgacügü rü marü togü nūxū narüyexeragü, rü ñuxma rü marü tama ãëxgacügü nixīgü. Rū ngēma norü 6 i ngēma ãëxgacügü, rü nüma rü ñuxma rü ãëxgacü nixī. Rū ngēma norü 7 tá nixī i yixcūra ínguxū. Natürü ngēxguma ínanguxgu i ngēma norü 7 i nawa iyacuáxū i ngēma ãëxgacügü, rü paxaächimare tá nixī i ãëxgacü yīxū.¹¹ Rū ngēma ngoxo ga nuxcūmaxūchi maxchiréxū rü ñuxma rü marü yuxū, rü ngēma nixī i norü 8 i ngēma ãëxgacügü. Rū nüma rü ngēma 7 tanūxū nixī. Natürü i nüma rü ngēma nachica i guxūgutáma nagu napoxcuxūwa naxū.¹² Rū ngēma 10 i naxchatacuxre i nūxū cudaduxū, rü 10 i nachiuānegüarū ãëxgacügüchiga nixī. Natürü i nümagü rü tauta inanaxügüe na duūxügümaã inacuèxgūxū. Natürü yixcūra tá nanayauxgü i pora na wüxitátama i ora ngēma ngoxomaã wüxigu ãëxgacügü yixīgüxúcèx.¹³ Rū ngēma 10 i ãëxgacügü rü wüxigu nagu narüxínüë na ngēma ngoxona naxägüáxúcèx i norü pora, na ngēma ngoxo namaã icuáxúcèx.¹⁴ Rū ñuxūchi i ngēma ãëxgacügü rü ngēma ngoxo rü tá nügü nadai namaã ya yima Tupana Nane ga pecaduarü ütanicèx yucü. Natürü ya yima Tupana Nane rü tá nūxū narüyexera, erü nüma rü guxū i corigüarü Cori nixī, rü guxū i nachiuānegüarū ãëxgacügüarü Æëxgacü nixī. Rū yíxema namücügü ixīgüxe, rü yíxemagü tixīgü ya Tupana tüxū dexe rü tümacèx naçaxe. Rü tümagü rü aixcūma naga taxínüë”, ñanagürü choxū.¹⁵ Rü yema orearü ngeruū rü ñanagürü ta choxū:

“Ngēma taxū i dexá i nūxū cudaduxū i naetüwa natoxū i ngēma nge i ngēãëxūchicü, rü nagúxüraūxū i duūxügüchiga nixī, rü guxūma i duūxügü i to i nagawa idexagüxūchiga nixī, rü guxūma i nachiuānegüarū ãëxgü i duūxügüchiga nixī.¹⁶ Rū ngēma 10 i naxchatacuxre i nūxū cudaduxū i nūxū ngēmaxū i ngēma ngoxo, rü tá ngēma nge i ngēãëxūchicüchi naxaie. Rü tá ngēma ngena nanapuxū i guxūma i tacü i ngīxū ngēmaxū, rü ngēmaãcü ngexchiruãcūma tá ngēxma irüxāūx. Rü tá ngīxū nangōxgü, rü üxüwa tá ngīxū nigugü.¹⁷ Yerü ga Tupana rü yema 10 ga ãëxgacügüxū nagu narüxínüëxèë na naxügüáxúcèx i ngēma nanaxwèxexū i nüma ya Tupana. Rü ngēmacèx i ngēma ãëxgacügü, rü tá wüxigu nagu narüxínüë na ngēma ngoxoxū naporaxèëgüxū na norü ãëxgacü yīxúcèx ñuxmatáta Tupana yanguxèë i ngēma nūxū yaxuxū.¹⁸ Rū ngēma nge i ngīxū cudèuxcü, rü yima nixī ya yima ñane ya taxüne ya guxūma i nachiuānegüarū ãëxgacügümaã icuáxüne”, ñanagürü.

18

Nagu nayarüchixe ga ñane ga Babiróniã

¹ Rū yemawena nūxū chadau ga wüxi ga to ga orearü ngeruū ga daxüguxū ga naãnewa íruxixū ga taxū ga ãëxgacü ixixū. Rü yema orearü ngeruūarü yauracüxūmaã nangóone ga ñoma ga naãne. ² Rū tagaãcü ñanagürü:

“Marü nagu nayarüchixe ya yima ñane ya Babiróniã ya itaégacüxüne. Rü ñuxma rü ngoxogüchiü nixī rü nagúxüraūxū i naãe i chixexügüchiü nixī.

Rü ñuxma rü ngëxma naxãchiũ i nagúxúraũxũ i ngurucugũ rü werigũ i chixexũ i duũxũgũ naxchi aiexũ. ³ Yerũ guxũma ga nachiuãnecũãxgũ, rü guma iãneãrũ chixexũ nüxna naxũe. Rü norũ ãëxgacũgũ, rü yema poraãcũ chixri namaxẽ. Rü guxũma ga ñoma ga nachiuãnecũãxgũ ga taxetanũxũgũ, rü nügũ namuãrũ dïeruãxẽëgũ namaã ga yema iãneãrũ yemaxũgũ ga tama Tupanapëxewa mexũ”, ñanagürũ. ⁴ Rü ñuxũchi nüxũ chaxĩnũ ga to ga naga ga daxũguxũ ga naãnewa inaxũxũ ga ñaxũ:

“¡Dücèx i guxãma i pema ya chorũ duũxũgũ ixĩgũxe, rü ípechoxũ nawa ya yima iãne na tama ngẽma iãnecũãxruũ pipecaduãxgũxũcèx rü tama nagu peyixũcèx i ngẽma poxcu i tá yima iãnewa nguxũ! ⁵ Erũ ngẽma iãnecũãxãrũ pecadugũ, rü nügũétüwa narünucue, rü düxwa marũ daxũguxũ i naãnewa nangu. Rü ñuxma ya Tupana rü nüxna nacuèxãchi i ngẽma chixexũ i naxũgũxũ, rü ngẽmacèx tá yima iãnexũ napoxcu. ⁶ Rü ngẽma poraãcũ chixexũ na naxũgũxũrũ, rü ngëxgumarũ tá ta nixĩ na chixexũmaã nüxũ penaxũtanũxũ i pemax. ¡Rũ ñuxma na ngẽma iãnecũãx togũmaã chixexũ naxũgũxũ, rü taxreëxpũxcũna tá penachixexẽ i pemax! ¡Rũ ngẽma chixexũ ga yema iãnecũãx togũcèx mexẽëgũxũ, rü pema rü taxreëxpũxcũna tá ngẽmaãcũ naxcèx penamexẽ! ⁷ ¡Rũ ngẽma na nügũ yacuèxũgũxũ rü mexèchixũwa na namaxèxũ, rü ngëxgumarũ tá ta nixĩ na ngũxũ nüxũ pingexèëgũxũ rü ngechaũ nüxũ pingexèëgũxũ! Erũ ñuxma i ngẽma iãnecũãx rü nügũãëwa ñanagürũgũ: ‘Yixema rü ñoma wüxi i ãëxgacürũ mexèchixũwa tangëxmagũ. Rü tagutãma wüxi i yutexũrũ tangechaũgũ’, ñanagürũgũ nügũãëwa i ngẽma iãnecũãx. ⁸ Rü ngẽmacèx tá nixĩ i wüxítãtama i ngunexũgu ínanguxũ i ngẽma iãneãrũ poxcuruũ. Rü ngẽma iãnecũãx rü ngúanemaã tá nayue, rü poraãcũ tá nangechaũgũ, rü poraãcũ taiya tá nüxũ nangux, rü norũ iãne rü üxũmaã tá nigu. Erũ naporaxũchi ya yima Tupana ya guxũãrũ Cori ixĩcũ i ngẽma iãnexũ poxcucũ”, ñanagürũ ga yema naga. ⁹ Rü ngẽma nachiuãnegũarũ ãëxgacũgũ ga yema iãnewa poraãcũ chixri maxèxũ rü mexèchixũwa yexmagũxũ, rü tá poraãcũ norũ ngechaũmaã yima iãnecèx naxauxe i ngëxguma nüxũ nadaugũgu i ngẽma üxũema i namaã yaxaxũ. ¹⁰ Natürũ ngẽma ãëxgacũgũ rü ngẽma poxcuxũ na namuèxũchèxwa rü tá yaxũwa nüxũ narũdaunũ, rü ñanagürũgũ tá:

“Cungechaũtũmũ, Pa Itaégacũxũne ya Iãne ya Babirónia ya Guxũ i Nachiuãnegũmaã Porachirénex. Erũ wüxítama i oragu cuxcèx ínangu i curũ poxcu”, ñanagürũgũ tá. ¹¹ Rü guxũma i ñoma i naãnecũãx i taxetanũxũ, rü tá poraãcũ norũ ngechaũmaã naxcèx naxauxe ya yima iãne. Erũ marũ taxúetãma naxcèx nüxũ tataxe i norũ ngẽmaxũgũ i ngẽma nangegũxũ. ¹² Rü marũ taxúetãma naxcèx nüxũ tataxe i norũ uiru, rü norũ dïerũmũ, rü norũ nutagũ i mexèchixũ, rü naxpũgũ i mexèchixũ i dauxraraxũ rü idauxcharaũ i ngema nangegũxũ. Rü ngëxgumarũ ta taxúetãma naxcèx nüxũ tataxe i nagúxúraũxũ i norũ naixchipanũgũ i yixixũ, rü norũ ngẽmaxũgũ i marfĩlnaxcèx rü mürapewa i mexèchixũnaxcèx rü cobrenaxcèx rü fierunaxcèx rü nutanaxcèx i ngema nangegũxũ. ¹³ Rü taxúetãma naxcèx nüxũ tataxe i norũ canela rü togũ i norũ üexũwemũxũgũ i yixixũ, rü pumaratèxe i guruũ ixĩxũ, rü togũ i pumaragũ i yixixũ, rü binugũ rü chixũgũ, rü arina i mexèchixũ, rü trigu i ngema nangegũxũ. Rü ngëxgumarũ ta ngema nanagagũ i wocagũ, rü carnerugũ, rü cowarugũ, rü autugũ i cowaru itúchigũxũ, rü duũxũgũ i puracũruũgũ. Rü ngẽmaãcũ woo duũxègũ rü ngema tüxũ nagagũ na

tümamaã nataxegüxcèx. ¹⁴ Rü ngêma taxetanüxü, rü ñanagürügü tá nüxü ya yima ñâne:

“Cuwa rü marü nataxuma i ngêma orix i curü duüxügüarü me ixixü. Rü marü nataxuma i guxüma i ngêma meruügü ga noxri cuxü yexmaxü, rü tagutáma wenaxârü cuxü nangêxma”, ñanagürügü tá. ¹⁵ Rü ngêma taxetanüxü i guxüma i ngêma orixgümaã rü ngêma meruügümaã taxegüxü rü guma ñânegu nügü muârü dîeruãxêxüchigüxü, rü yaxüwa tátama nüxü narüdaunü ya yima ñâne, erü nüxü namuñê i ngêma poxcu i yima ñânexü üpetüxü. Rü tá poraãcü norü ngechaümaã naxauxe. ¹⁶ Rü ñanagürügü tá:

“Nangechaütümüü ya yima ñâne ya itaxégacüxüne. Erü noxri rü ñoma wüxi i nge i mexêchixü i naxchiru i dauxracharaxü rü dauxcharaxümaã äxchirucü i uirumaã rü nutagü ya mexêchicümaã ngèxãexcürüü nixi. ¹⁷ Natürü ngürüächî nagux i guxüma i ngêma ñâneârü meruügü”, ñanagürügü tá. Rü guxüne ya wapurugüarü äëxgacügü, rü guxüma i norü duüxügü ya yima wapuruwa puracüexü, rü guxüma i duüxügü ya yima wapurugu ixü, rü guxüma i taxetanüxügü i wapurugu yarüxüüxü, rü yaxüwa tátama nayachaxgütanüächî, rü ngema tá nüxü narüdaunü. ¹⁸ Rü ngêxguma nüxü nadaugügu i norü caxixü na yaxaxü ya yima ñâne, rü tagaãcü tá ñanagürügü:

“Nataxuma ya nái ya ñâne ya daa ñâne ya itaxégacüxünerüü ixixüne”, ñanagürügü. ¹⁹ Rü norü ngechaümaã nügütégu tá waixümü nagünagügü, rü tá poraãcü naxauxe, rü tagaãcü ñanagürügü tá:

“Nangechaütümüü ya yima ñâne ya itaxégacüxüne. Rü noxri rü norü yemaxügümaã nügü nimuârü dîeruãxêëgü ga guxüne ga wapurugüarü yoragü. Natürü i ñuxma rü ngürüächî wüxi i oragutama rü inayarüxo i guxüma i ngêma. ²⁰ Natürü ñuxma na napoxcuxü ya yima ñâne, rü name nixi i petaãëgü i pema i daxüguxü i naânewa ngêxmagüe, rü pema i Tupana pexü imugüe, rü pema i Tupanaârü orexü ixugüe, rü guxâma i pema i Tupanaârü duüxügü ixigüe. Erü ñuxma na napoxcuxü ya yima ñâne, rü ngêmaãcü Tupana pexü naxütanü naxcèx ga yema chixexü ga pemaã naxügüxü ga guma ñânecüãx”, ñanagürügü. ²¹ Rü ñuxüchi wüxi ga Tupanaârü orearü ngeruü ga daxücüãx rü nanangenagü ga wüxi ga nuta ga taxüchicü ga ñoma tacüarü caruürüü ixicü. Rü yema orearü ngeruü rü taxtü ga taxügu nanaña ga guma nuta ga taxüchicü, rü ñanagürü:

“Ngêxgumarüü tá quixi na icuyarüxoxü, Pa ñâne ya Itaxégacüxüne ya Babiróniãx, rü tagutáma texé wena cuxü nadau. ²² Rü tagutáma wena curü itamügüwa texé nüxü taxînü i paxetarüügü i arpagü rü quenagü rü cornetagü. Rü ngêxgumarüü ta cuwa nataxütáma i puracütanüxügü i tacüwa puracüexü, rü tagutáma texé nüxü taxînü na cuwa inapuracüexü i chawüarü caruügü. ²³ Rü marü tagutáma texé nüxü tadau i cuwa i omü. Rü marü tagutáma texé nüxü taxînü i ngígüchigaarü petagüarü cuxcuane. Rü ngêmaãcü tá cumaã nangupetü woo ga noxri rü yema taxetanüxü ga cuwa taxegüxü rü guxüma ga togü ga taxetanüxüârü yexera nixigü. Rü ngêmacèx tá poraãcü cupoxcu nagagu ga yema chixexü ga namaã cunawomüxêëxü ga guxüma ga togü ga nachüñânecüãx ga duüxügü”, ñanagürü. ²⁴ Yerü guma ñânecüãx ga duüxügü nixi ga nadèixü rü inabaxêëgüxü ga nagü ga Tupanaârü orearü uruügü rü yema duüxügü ga Tupanaârü ixigüxü rü guxüma ga duüxügü ga ñoma ga naânegu Tupanaarü oregagu nadèixü.

19

¹ Rû yemawena nüxü chaxînü ga muxüma ga duüxügüga ga daxüguxü ga naãnewa tagaãcü ñagüxü:

“¡Ngîxã Tupanaxü ticuèxüügü! Erü nüma nixî i tüxü namaxêxêxü. Rû nüma ya törü Tupana nixî i guxüärü yexera namexêchixü rû naporaxüchixü. ² Rû nüma rû aixcüma meãma nanangugü i guxüma i duüxügüarü maxü, rû aixcüma tá nanapoxcue i ngêma chixexü ügüxü. Rû ngêmacèx marü nanapoxcu ya yima ñãne ya itaxégacüxüne ya chixene ya norü chixexümaã nachixexêene i guxüma i ñoma i naãnecüãx i duüxügü. Rû ñuxma i nüma ya Tupana rû norü duüxügü ga guma ñãnecüãx deüxüxü naxütanü”, ñanagürügü. ³ Rû ñuxüchi wenaxärü ñanagürügü:

“¡Ngîxã Tupanaxü ticuèxüügü! Erü ngema norü caxixü na yaxaxü ya yima ñãne, rû tagutáma ngéma nayarüxo”, ñanagürügü. ⁴ Rû yema 24 ga ãëxgacügü rû yema ägümücü ga daxücüãx ga maxêxü rû yexma nanangücuchitanü, rû Tupana ya norü tochicaxüwa rütocüxü nicuèxüügü. Rû ñanagürügü:

“Rû ngêmaãcü yî. ¡Rû ngîxã nüxü ticuèxüügü ya törü Cori!” ñanagürügü. ⁵ Rû ñuxüchi yema tochicaxüxütawa inanaxü ga wüxi ga naga ga ñaxü:

“Name nixî i törü Tupanaxü picuèxüügü i guxãma i pemax Pa Buxügü rû Pa Yaxügüx i norü duüxügü na pixîgüxü rû nüxü na pemuêxü”, ñaxü.

Tupana Nane ga pecaduarü ütanücèx yucüarü ngîgüarü petachiga

⁶ Rû ñuxüchi nüxü chaxînü ga tacü ga ñoma muxüchixü ga duüxügü idexagüxürüü ixîxü ga ñoma taxü i dexá i chuxchuxürüü ixîxü ga ñoma poraãcü yaduruanexürüü ixîxü ga ñaxü:

“¡Ngîxã Tupanaxü ticuèxüügü! Erü nüma ya törü Cori ya Tupana ya guxüärü yexera poracü, rû marü ningucuchi na guxümaã inacuáxü. ⁷ ¡Rû ngîxã tataãgü rû guxü i törü taãemaã nüxü ticuèxüügü! Erü marü nawa nangu na iyangîxü ya yima Tupana Nane ga pecaduarü ütanücèx yücü. Rû ngêma norü duüxügü i ñoma namèxürüü ixîgüxü rû marü nügü ínimexêgü. ⁸ Rû yima Tupana Nane rû ngêma nüxü yaxögüxüxü namu na mexêchixü rû cómuxü rû iyauracüxü i naxchirumaã na yaxãxchiruxü. Rû ngêma naxchiru i mexêchixü rû ngêma nixî i ngêma duüxügüarü maxü i mexüchiga”, ñanagürügü. ⁹ Rû ñuxüchi ga Tupanaärü orearü ngeruü, rû ñanagürü choxü:

“Chanaxwèxe i cunaxümatü i ñãã ore i cumaã tá nüxü chixuxü: ‘Tataãgü ya yíxema tüxna naxuxe i norü ngîgüarü petawa ya yima Tupana Nane ga pecaduarü ütanücèx yücü’ ”, ñanagürü. Rû ñuxüchi ñanagürü ta:

“Ngêma ore i cumaã nüxü chixuxü, rû Tupanaärü orexüchitama nixî”, ñanagürü. ¹⁰ Rû choma rû yema orearü ngeruüpèxegu chacaxãpüxü na nüxü chicuèxüxücèx. Natürü ga nüma rû ñanagürü choxü:

“¡Tãxü i ngêma cuxüxü! Erü choma rû ta Tupanaärü duüxü chixî, ngêxgumarüü i cuma rû cuenegü i Ngechuchuarü ore i aixcüma ixîxü ixögüechaxürüü ta chixî. Rû name nixî i Tupanaxü quicuèxüü”, ñanagürü. Erü ngêma ore i Ngechuchuchiga ixîxü, rû yematama ore nixî ga Tupanaärü orearü uruügü nüxü ixügüexü ga yexguma Tupanaãe i Üünexü nawa ideaxgu.

Guma Tupana Nane ga cowaru ga cómuxüetügu tonagücüchiga

¹¹ Rū ñuxūchi nuxū chadau ga daxūguxū ga naāne na yawāxnaxū. Rū yéma nangox ga wūxi ga cowaru ga cómuxū. Rū guma naetūwa rūtocū rū Ixaixcūmacū rū Aixcūma Yanguxēcū nixī i naega. Rū nūma rū aixcūma guxūma i duūxūgūarū maxūxū nacuēx, rū aixcūma tá guxūma i ngēma chixexū ūgūxūmaā nūgū nadai rū tá nanapoxcue. ¹² Rū naxētūgū, rū ñoma ūxūemarū ū niyauracūū. Rū naēruwa rū namu ga norū ngēxcueruūgū. Rū nacetūgu naxūmatū ga wūxi ga naega ga nūxīcatama nuxū nacuáxū. ¹³ Rū wūxi ga naxchiru ga ducharaxūgu nicux. Rū naega rū Tupanaārū Ore nixī. ¹⁴ Rū nawe narūxī ga guxūma ga norū churaragū ga daxūcūāx. Rū nūmagū rū naxchiru ga imexēchixū rū cómuxūmaā nixāxchiru. Rū cowarugū ga icómūxūētūgu naxī. ¹⁵ Rū naāxwa nayexma ga wūxi ga tara ga tēxechixū na yemamaā napíxēēāxūcēx i guxūma i ngēma duūxūgū i tama nuxū yaxōgūxū. Rū tá nūma nanaxwēxexūācūma ngēma duūxūgūmaā inacuēx. Rū nūma rū tá poraācū ngēma duūxūgū i tama yaxōgūxūxū napoxcu namaā i ngēma poxcu ya Tupana ya Guxūxū Rūporamaēcū norū numaā mexēēxū. Rū ñoma ubagū i norū maīxruūwa imējxtūūxūrūū tá nixī na napoxcueāxū. ¹⁶ Rū naxchirugu rū naperemagu naxūmatū ga wūxi ga naega ga ñaxū:

“Guxūma i nachīūānegūarū āēxgacūgūarū Āēxgacū, rū guxūma i corigūarū Cori ixīcū”, ñaxū. ¹⁷⁻¹⁸ Rū ñuxūchi nuxū chadau ga wūxi ga Tupanaārū orearū ngeruū ga daxūcūāx ga ūēxcūgu chixū. Rū nūma rū tagaācū ñanagūrū nuxū ga guxūma ga ngurucugū ga yexma ixexūtanūxū:

“¡Nuā pexī rū pengutaquēxegū naxcēx i ōna i taxū i Tupana pexcēx mexēēxū na penangōxūcēx i nachīūānegūarū āēxgacūgūmachi, rū churaragūarū āēxgacūgūmachi, rū yatūgū i poraxūchixūmachi, rū cowarugūmachi, rū ngēma cowaruētūgu īxū i duūxūgūmachi, rū ngēma duūxūgū i coriāxgūxūmachi rū ngēma ngearū coriāxgūxūmachi rū ngēma buxūgūmachi rū ngēma yaxūgūmachi!” ñanagūrū. ¹⁹ Rū ñuxūchi nuxū chadau ga yema nūxīraūxū ga ngoxo rū guxūma ga nachīūānegūarū āēxgacūgū ga norū churaragūmaā yéma ngutaquēxegūxū na nūgū nadējūcēx namaā ya yima cowaruētūgu īxūcū rū norū churaragū. ²⁰ Rū yema nūxīraūxū ga ngoxo rū niyaxu. Rū wūxigu namaā niyaxu ga yema to ga ngoxo ga orearū uruūneta ixīxū ga yema nūxīraūxū ga ngoxopēxewa naxūxū ga cuēxruūgū ga duūxūgū tama nuxū cuáxū na naxūgūāxū. Rū yema cuēxruūgūmaā nixī ga nawomūxēēāxū ga yema duūxūgū ga nuxū icuēxūūgūxū ga naxchicūnēxā ga yema nūxīraūxū ga ngoxo rū nūgū ixāgūxū na yema ngoxoégamaā na yaxūégagūxū. Rū yema nūxīraūxū ga ngoxo rū yema to ga ngoxo ga orearū uruūneta ixīxū, rū wūxigu maxēxūma nawa nawoū ya yima naxtaa ya ūxūmaā iyaurachiūne ya azufremaā ixaxūne. ²¹ Rū yema tara ga tēxechixū ga guma cowaruētūwa rūtocūēxwa yexmaxūmaā nanadai ga yema ngoxogūarū ngūxēēruūgū ga āēxgacūgū rū norū churaragū. Rū guxūma ga ngurucugū, rū yemamachīmaā nangāxcharaūgū.

20

Chataná rū 1,000 ga taunecū ninējx

¹ Rū yemawena nuxū chadau ga wūxi ga Tupanaārū orearū ngeruū ga daxūguxū ga naānewa írūxīxū. Rū naxmēxwa nayexma ga yema āxmaxū i taxuguma iyacuáxūārū chawī rū ñuxūchi wūxi ga cadena. ² Rū yema

Tupanaârü orearü ngeruũ rü yema coyaxũ niyaxu. Rü yematama coya nixĩ ga yema nuxcũmaũxũ ga äxtape ga ngoxo ga Chataná ixĩxũ. Rü yema orearü ngeruũ rü 1,000 ga taunecügücex nayanêix. ³ Rü yema orearü ngeruũ rü yema äxmaxũ i taxuguma iyacuáxũgu nayatêxcuchi. Rü ñuxũchi yexma meãma nanawãxtaũ na nũma ga Chataná rü marü taguma wenaxârü duũxũgũxũ nawomũxêẽxũcèx ñuxmatáta 1,000 ya taunecü ngêxma yangeã. Rü ngêxguma marü yanguxêẽãgu ya yima 1,000 ya taunecü, rü tá paxaxãchi nayangêx. ⁴ Rü ñuxũchi nüxũ chadau ga ñuxre ga tochicaxũgü. Rü yema tochicaxũwa tarütogü ga guxema Tupanaxũtawa nayauxgũxe ga pora na duũxũgũxũ ticagũxũcèx. Rü yexgumarüũ ta nüxũ chadau ga naãegü ga yema duũxũgü ga Ngechucharü orexũ na yaxugũxũcèx nadaũnaãgũxũ. Rü yema nixĩ ga duũxũgü ga meãma nüxũ ixugũxũ ga Tupanaârü ore rü tama yema ngoxoxũ icuèxũũgũxũ rü bai ga yema ngoxochicũnèxãxũ icuèxũũgũxũ, rü tama nügü ixãgũxũ na nacatũwa rü êxna naxmêxwa yema ngoxoégamaã yaxãegaxũ. Rü nüxũ chadau ga wena na namaxèxũ, rü 1,000 ga taunecü Cristumaã wũxigu äêxgacü nixĩgü. ⁵ Rü yemagü nixĩ ga nüxĩrama írüdagũxũ. Natürü ga yema togü ga yuexũ rü tãütáma namaxê ñuxmatáta yima 1,000 ya taunecüguwena. ⁶ Rü tataãegü ya yíxema tũxira írüdagũxe erü Tupanaârü duũxũgü tixĩgü. Rü ngêma Tupanaârü poxcu rü marü tãütáma tũmacèx nixĩ. Rü tá Tupanaârü rü Cristuarü ngũxêẽruũgü tixĩgü. Rü 1,000 ya taunecü tá Cristumaã äêxgacügü tixĩgü.

ngoxo i Chataná rü marü nagu nayarũchixe

⁷ Rü ngêxguma marü nangupetũgu ya yima 1,000 ya taunecü, rü Chataná rü tá ningêx i ngêma ínapoxcuxũwa. ⁸ Rü nũma i Chataná rü tá ínaxũxũ na yawomũxêẽãxũcèx i guxũma i ñoma i naãnecũãx i duũxũgü rü Goga rü Magoga na ngêmagũxũ nangutaquèxexêẽxũcèx na Tupanaârü duũxũgũmaã nügü nadèixũcèx. Rü ngêma Chatanáârü churaragü, rü ñoma taxtũ i taxũârü naxnecũchicutêxerüũ tá namuxũchi. ⁹ Rü ngêmaãcü i Chatanáârü churaragü rü tá ñoma i naãneârü tagu ninguchi. Rü tá Tupanaârü duũxũgũxũ rü yima íãne ya Tupana nüxũ ngechaxũne ya Yerucharèũxũ ínachoeguãchi. Natürü Tupana rü daxũwa tá nanayixêẽ ya üxũ, rü yimamaã tá nixae i guxũma i ngêma namaã rüxuwãngũxũ. ¹⁰ Rü ngêma ngoxo i ngêma duũxũgũxũ womũxêẽxũ, rü nawa tá natãe ya yima naxtaa ya üxũmaã iyaurachiũne ya azufremaã íxaxũne. Rü yima nixĩ ya naxtaa ga marü nawa nawoũne ga yema nüxĩraũxũ ga ngoxo rü yema to ga ngoxo ga orearü uruũneta íxĩxũ. Rü yima naxtaawa tá nixĩ i guxũgutáma ngunecü rü chũtacü ngũxũ yangegũxũ.

Ngêma taxũ i tochicaxũ i cómixũwa rütocüpêxewa nangugü i duũxũgü

¹¹ Rü ñuxũchi nüxũ chadau ga wũxi ga taxũ ga tochicaxũ ga cómixũ, rü nüxũ chadau ga guma nawa rütocü. Rü gumachaxwa nibuxmü ga ñoma ga naãne rü guxũma ga daxũwa nüxũ idauxũ, rü inayarũtauxe. ¹² Rü nüxũ chadau ga yema yuexũ ga yaexũ rü buexũ ga Tupanapêxegu chigũxũ. Rü ningena ga poperagü. Rü yexgumarüũ ta ningena ga yema Tupanaârü popera i nagu yawũgũxũ i ngêma duũxũgü i nüxũ nangêxmaxũ i maxũ i taguma gũxũ. Rü yema yuexũ rü yexgumarüũ ga ñuxãcü na namaxèxũ ga wũxichigü rü yexgumarüũ ga ñuxãcü na yema poperawa ínaxũmatũxũrũũãcũma Tupana namaã nüxũ nixu na ngextá tá naxĩxũ. ¹³ Rü yema yuexũ ga taxtũ ga taxũwa yexmagũxũ

rü wenaxârü inarüdagü. Rü yema yuexü ga tauquewa yexmagüxü rü wenaxârü inarüdagü. Rü yemaäcü inarüdagü ga guxüma ga duüxügü ga yuexü. Rü guxüma ga yema yuexü rü Tupana nüxna nicachigü rü yexgumarüü ga ñuxäcü na namaxêxü ga wüxichigü rü namaã nüxü nixu na ngextá tá naxixü. ¹⁴ Rü yemawena rü guma naxtaa ga üxümaã iyaurachiünewa nawoü ga yu guxüma ga norü poramaã. Rü guma naxtaa ga üxümaã iyaurachiüne, rü ngêma nixi i poxcu i taguma iyacuáxü i tümacêx ixixü ya yixema tama Tupanaârü duüxügü ixigüxe. ¹⁵ Rü guma naxtaa ga üxümaã iyaurachiünewa tawoü ga guxema ingeégaxe nawa i ngêma Tupanaârü popera i nagu tiwügüxü ya yixema tüxü nangêxmaxê i maxü i taguma gúxü.

21

Ngexwacaxüxü i ñoma i naãne rü guxüma i daxüwa ngêxmaxü

¹ Rü yemawena nüxü chadau na nayexwacaxüxü ga ñoma ga naãne rü guxüma ga tacü ga daxüwa yexmagüxü. Yerü yema nüxira yexmagüxü rü marü nangupetü, rü yema taxü ga taxtü rü marü nataxuma. ² Rü nüxü chadau ga guma ñãne ga mexüne ga Yerucharéü ga yexwacaxüne ga daxügüxü ga naãnewa Tupanaxütawa íruxixüne ga guxüwama mexêchine ñoma wüxi i pacü i ngêxguma iyangixgu rü ngítecêx ngigü mexêxcürüü ixixüne. ³ Rü nüxü chaxinü ga wüxi ga naga ga yema tochicaxüwa inaxüxü ga tagaäcü ñaxü:

“Tupana rü duüxügütanüwa nangexma i ñuxmax. Rü natanüwa tá namaxêcha. Rü nümagü rü norü duüxügü tá nixigü. Rü nüma ya Tupana rü natanüwa tá nangêxmaêcha, na guxüguma norü Tupana yixücêx. ⁴ Rü nüma tá inanapi i naxgüüëtü i guxüma i ngêma duüxügü. Rü marü tãütama texé tayu, rü texé tümaârü ngechaümaã taxaxu, rü texé ngüxü tingegü. Erü guxüma i ngêma ngüxü rü marü inayarüxo”, ñanagürü. ⁵ Rü guma yema tochicaxüwa rütocü rü ñanagürü:

“Dücêx, choma rü chanangexwacaxüxêê i guxüma i tacü i ngêxmaxü”, ñanagürü. Rü ñuxüchi ñanagürü ta:

“¡Naxümatü i ñãã ore! Erü ñãã ore rü aixcüma nixi, rü ñãã nixi i ore i mexü na yaxöxü”, ñanagürü. ⁶ Rü yemawena rü ñanagürü choxü:

“Ñuxma rü marü ningu i guxüma. Rü chowa nixi ga inaxügüxü ga guxüma, rü nataxuma i tacü i chorü yexera ngêxmaêchaxü. Rü yixema itawaxe, rü choma rü tá nangetanüácüma tüxü chaxaxêëmare nawa i ngêma dexá i maxêëruü. ⁷ Rü yixema nüxü rüporamaëgüxe i chixexü, rü tá tanayauxgü i guxüma i ngêma mexügü i nüxü chixuxü. Rü choma rü tá tümaârü Tupana chixi, rü tüma i chauxacügü. ⁸ Natürü ngêma muüëxü i nüxü rüxoexü na chowe naxixü, rü nawa tá nawoü ya yima naxtaa ya üxümaã iyaurachiüne ya azufremaã ixaxüne. Rü ngêxgumarüü ta i ngêma tama yaxögüxü, rü ngêma chixexü ügüxü, rü ngêma máëtagüxü, rü ngêma na i ngemaã ipexü, rü ngêma iyuüxü rü ngöxwëxegüxü, rü ngêma tupanenetachicünêxâxü icuèxüügüxü, rü ngêma idoratêëxgüxü, rü nawa tá nawoü ya yima naxtaa ya üxümaã iyaurachiüne ya azufremaã ixaxüne. Rü ngêma nixi i poxcu i taguma iyacuáxü i nüxü inanguxêëxü i ngêma tama yaxögüácüma yuexü”, ñanagürü.

Yexwacaxüne ga Yerucharéüchiga

⁹ Rû yema 7 ga orearû ngeruûgû ga nûxû yexmagûxû ga 7 ga copagû ga yema 7 ga poxcuruûmaã ixããcuxû, rû yematanûwa rû wûxi ga orearû ngeruû rû chauxcêx nixû, rû ñanagûrû choxû:

“¡Nuã naxû! Rû tá cuxû nûxû chadauxêê i ngêma yaxôgûxû i ñoma namêxrûû tá ixîgûxû ya yima Tupana Nane ga pecaduarû útanücêx yucû”, ñanagûrû. ¹⁰ Rû yexguma yemaãcû Tupanaãê i Úñexû choxû ngoxetûxêêgu, rû yema orearû ngeruû rû wûxi ga mèxpûne ga taxûnewa choxû naga. Rû choxû nûxû nadauxêê ga guma ñane ya úñene ga Yerucharêû ga daxûguxû ga naãnewa Tupanaxûtawa írûxîxûne. ¹¹ Rû guma ñane rû Tupanaârû yauracûxûmaã nangóone. Rû yema norû yauracûxû ga guma ñane rû ñoma wûxi ya nuta ya mexêchicûrûû nixî. Rû ñoma nuta ya yasperûû nixî na yachipetûxû. ¹² Rû guma ñane rû guxûwama ínapoxegu. Rû nataxûchi rû namáchanexûchi ga yema norû poxeguxû. Rû yema norû poxeguxû rû nûxû nayexma ga 12 ga norû îãx. Rû wûxichigû ga yema îãxwa nayexma ga wûxi ga Tupanaârû orearû ngeruû. Rû wûxichigû ga yema îãxwa nangoxêga ga wûxichigû ga yema 12 ga Acobu nane ga Yudíugû nawa ne îxû. ¹³ Rû tomaêxpûx ga norû îãx rû napêxewaama nayexma, rû yema to ga tomaêxpûx rû norû toxwecûwawa nayexma, rû yema to ga tomaêxpûx rû norû tûgûnecûwawa nayexma, rû yema to ga tomaêxpûx rû naweama nayexma. ¹⁴ Rû guma ñaneârû poxeguxû, rû 12 ga nuta ga taxûchicûétûwa ínaxûgû. Rû wûxichigû ga guma nutagûwa nangoxêga ga wûxichigû ga norû ngûexûgû ga guma Tupana Nane ga pecaduarû útanücêx yucû. ¹⁵ Rû yema orearû ngeruû ga chomaã ídexaxû, rû nûxû nayexma ga wûxi ga norû ngugûxû ga uirumenêxãnaxcêx na yemamaã nangugûãxúcêx ga guma ñane, rû norû îãxgû, rû norû poxeguxûgû. ¹⁶ Rû guma ñane rû nawûxigumare ga guxûcûwawa. Rû norû mèx rû nawûxigumare namaã ga norû tatachinû. Rû yema orearû ngeruû rû yema uirumenêxãmaã nanangugû ga guma ñane. Rû 2,200 kilómetru nixî ga norû mèx. Rû yexgumarûû ta 2,200 kilómetru nixî ga norû tatachinû. Rû 2,200 kilómetru ta nixî ga norû máchane. ¹⁷ Rû yemawena rû inanangu ga yema norû poxeguxû ga guma ñane. Rû 65 metru nixî ga norû máchane. Rû yemaãcû duûxûgûarû ngugûxûmaã nanangugû. ¹⁸ Rû yema norû poxeguxû ga guma ñane, rû nuta ga mexêchicû ga yaspénaxcêx nixî. Rû nûmatama ga guma ñane rû uirunaxcêx nixî. Rû ñoma woruarûû niyauracûû. ¹⁹ Rû guma nutagû ga itacû ga norû poxeguxûpara íxîgûcû, rû nagûxûraûcû ga nuta ga ímexêchicûmaã nangêxãê. Rû guma nûxûraûcû ga napara rû nuta ga yaspemaã nangêxãê. Rû guma norû taxre ga napara rû nuta ga safirumaã nangêxãê. Rû guma norû tomaêxpûx ga napara rû nuta ga ágatamaã nangêxãê. Rû guma norû ágûmûcû ga napara rû nuta ga esmerádamaã nangêxãê. ²⁰ Rû guma norû wûximêxpûx ga napara rû nuta ga onichemaã nangêxãê. Rû guma norû 6 ga napara rû nuta ga cornalínamaã nangêxãê. Rû guma norû 7 ga napara rû nuta ga crisólitumaã nangêxãê. Rû guma norû 8 ga napara rû nuta ga berílumaã nangêxãê. Rû guma norû 9 ga napara rû nuta ga topásiumaã nangêxãê. Rû guma norû 10 ga napara rû nuta ga crisoprásamaã nangêxãê. Rû guma norû 11 ga napara rû nuta ga yachítumaã nangêxãê. Rû guma norû 12 ga napara rû nuta ga amatístamaã nangêxãê. ²¹ Rû yema 12 ga norû îãx ga guma ñaneârû poxeguxû rû perlanaxcêx nixî. Rû wûxichigû ga yema îãx rû wûxitama ga perla nixî. Rû yema norû ítamû ga guma

ĩāneārũ ngāxũwa dapetũxũ, rũ uiruxicanaxcèx nixĩ. Rũ ñoma woruarũ niyauracũ. ²² Rũ guma ĩānewa rũ taxúnema ga ngutaquẽxepataxũ ga ngextá Tupanaxũ nawa yacuẽxũgũnẽxũ chadau, yerũ nũmatama ga Tupana ya poracũ rũ Nane ga pecaduarũ ũtanũcèx yucũ rũ yema nayexma na duũxũgũ nũxũ icuẽxũgũxũcèx. ²³ Rũ yima ĩāne rũ taxucèxma ùèxcũ rũ tauemacũ nũxũ nabaxi, erũ Tupanaārũ ngóonexũtama nixĩ i nangóonexẽẽxũ. Rũ yima Tupana Nane ga pecaduarũ ũtanũcèx yucũ nixĩ ya norũ omũ ixĩcũ. ²⁴ Rũ ngẽma Tupanaārũ ngóonexũ i yima ĩānẽxũ ngóonexẽẽxũ tá nixĩ i nangóonexẽẽxũ naxcèx i guxũma i ñoma i naānecũãx i duũxũgũ. Rũ ngema tá nangugũ i guxũma i nachiũānegũarũ ãẽxgacũgũ i yaxõgũxũ rũ tá Tupanana nayana i norũ mexũgũ. ²⁵ Rũ norũ ĩāxgũ rũ tagutáma narũwãxtagũ erũ ngema rũ guxũguma nangunexecha rũ taguma nachũta. ²⁶ Rũ ngẽma tá nanana i guxũma i ñoma i naānẽarũ mexũgũ. ²⁷ Natũrũ tagutáma ngẽxma naxũcu i ñacũ i Tupanapẽxewa chixexũ, rũ bai ya texé ya chixexũ ũxe rũ ěxna idoratèxáxe. Rũ yĩxema Tupana Nane ga pecaduarũ ũtanũcèx yucũarũ poperawa ngoxégagũxexicatátama tixĩgũ ya ngẽxma chocuxe.

22

¹ Rũ ñuxũchi ga yema orearũ ngerũ rũ choxũ nũxũ nadauxẽẽ ga wũxi ga natũ ga metacũchiũxũ rũ ichipetũchiũxũ ga dexá ga maxẽẽrũ. Rũ yema tochicaxũ ga nawa natogũxũ ga Tupana rũ Nane ga pecaduarũ ũtanũcèx yucũ, rũ nawa nixĩ ga ne nadaxũ ga yema natũ. ² Rũ guma ĩānẽarũ ngāxũwa dapetũxũ ga ĩtamũarũ ngāxũgu nida ga yema natũ. Rũ norũ guxũcutũwa narũxũgũ ga naĩgũ ga maxẽẽrũ. Rũ yema naĩgũ rũ wũxicanatama naxo ga wũxichigũ ga tauemacũgu rũ yemaãcũ 12 ěxpũxcũna naxo ga wũxi ga taunecũgu. Rũ naātũgũ ga yema naĩgũ, rũ guxũ i nachiũānecũãx i duũxũgũ i yaxõgũxũārũ taãexẽẽrũ nixĩ. ³ Rũ ngema rũ nataxũtáma i ñacũ i Tupana chixexũ namaã naxuxuchixũ. Rũ yima ĩānewa tá nangẽxma i norũ tochicaxũ ya Tupana rũ Nane ga pecaduarũ ũtanũcèx yucũ. Rũ norũ duũxũgũ rũ tá nũxũ nicuẽxũgũ. ⁴ Rũ ngẽma norũ duũxũgũ rũ tá nachiwexũchixũ nadaugũ, rũ tá naegamaã nixãegacatũ. ⁵ Rũ ngẽma rũ tagutáma nachũta. Rũ ngẽma norũ duũxũgũ, rũ taxucèxtáma nanaxwèxe i daparina rũ ěxna ùèxcũ na nangóonexũcèx. Erũ nũmatama ya tórũ Cori ya Tupana rũ tá nũxũ nabaxi. Rũ nũmagũ i ngẽma duũxũgũ rũ guxũgutáma wũxigu Tupanamaã ãẽxgacũgũ nixĩgũecha.

Marũ ningaica na wena núma naxũxũ ya Ngechuchu ya Cristu

⁶ Rũ ñuxũchi ga yema Tupanaārũ orearũ ngerũ rũ ñanagũrũ choxũ:

“Ñãã ore rũ aixcũma ixĩxũ nixĩ, rũ ñãã nixĩ i ore i mexũ na yaxõxũ. Rũ nũma ya tórũ Cori ya Tupana ga nuxcũma norũ orearũ urũgũmaã nũxũ ixucũ ga ñacũ tá na ngupetũxũ, rũ nũmatama nixĩ i ñuxma inamuãxũ i norũ orearũ ngerũ i daxũcũãx na norũ duũxũgũxũ nũxũ nadauxẽẽxũcèx na ñacũ tá paxa nangupetũxũ”, ñanagũrũ. ⁷ Rũ nũma ya tórũ Cori ya Ngechuchu rũ ñanagũrũ:

“Paxa tá íchangu. Rũ tataãẽ ya yĩxema naga ĩnũxè i ngẽma Tupanaārũ ore i ñãã poperagu ũmatũxũ”, ñanagũrũ. ⁸ Rũ chomatama i Cuãũ rũ nũxũ chaxĩnũ rũ nũxũ chadau i guxũma i ngẽma nũxũ chixuxũ. Rũ yemaxũ chaxĩnũguwena rũ nũxũ chadèuxguwena, rũ yema orearũ ngerũ ga

yemaxû choxû dauxêëxûpêxegu chacaxâpûxû na nüxû chicuèxüüxücèx.
 9 Natürü ga nüma rü ñanagürü choxû:

“¡Tâxû i ngêma cuxûxû! Erü choma rü ta Tupanaârü duüxû chixî, ngêxgumarüü i cuma rü cueneëgü i Tupanaârü orexû ixugûxû rü ngêma duüxûgü i naga ñnüëxû i ngêma ore i ñãã poperagu ümatûxû. Rü name nixî i Tupanaxû quicuèxüü”, ñanagürü. 10 Rü ñanagürü ta choxû:

“Tama name na icuyacúxû i ngêma Tupanaârü ore i ñãã poperagu ümatûxû, erü marü ningaica na yanguxû i ngêma ore. 11 Natürü ngêma chixexû ügûxû, rü chixexû tá naxügüecha. Rü ngêma Tupanapêxewa chixri maxêxû, rü chixri tá namaxêëcha. Natürü yîxema mexû ügüxe, rü name nixî na mexû taxügüechaxû. Rü yîxema Tupanapêxewa ixüünexê, rü name nixî na Tupanapêxewa tixüüneëchaxû”, ñanagürü. 12 Rü ñanagürü ga Ngechuchu:

“Dücèx, paxa tá íchangu namaã i ngêma ãmare i wüxichigüna tá chaxâxû ngêxgumarüü na ñüxâcü tanaxûxû i tümax. 13 Choma nixî i norü ügü i guxüma, rü chowa nixî i yacuáxû erü nataxuma i ñacü i choweama üxû. 14 Rü tataãëgü ya guxâma ya yîxema yima pecaðuarü ütanüçèx yucügüwa tügü iyauxgüchiruxe na Tupanapêxewa timexücèx na yima ñãneârü ñãxwa tichocuxücèx rü nüxû tangöxnetagûxûcèx i ngêma norü o i ngêma naî i maxêëruü. 15 Natürü täütâma yima ñãnewa nichocu i ngêma tama yaxögûxû, rü ngêma iyuüxû rü ngöxwèxegûxû, rü ngêma naî i nge-maã ipegûxû, rü ngêma máëtagûxû, rü ngêma tupananetachicünèxâxû icuèxüügûxû. Rü ngêxgumarüü ta i ngêma idoratèëxgûxû i norü me ixîxû na togûxû nawomüxêëgûxû, rü täütâma nawa nichocu ya yima ñãne. 16 Rü choma i Ngechuchu, rü guxâma i pema i yaxögûxûtanüwa chanamu i chorü orearü ngerüü na pemaã nüxû yaxuxücèx i guxüma i ngêma chorü ore. Rü choma nixî i Dabítaa chiîxû. Rü choma nixî ya yima wora-macuri ya pèxmama poraãcü nangóonexêëcürüü chiîxû”, ñanagürü. 17 Rü Tupanaãë i Üünexû rü guxüma i yaxögûxû, rü Ngechuchuxû ñanagürügü:

“¡Nuã naxû!” ñanagürügü. Rü yîxema nüxû ñnüxê i ñãã ore, rü:

“¡Nuã naxû!” ñatagügü. Rü yîxema itawáxe rü tüxû nachixégaxe, rü name nixî i nuã taxû rü tüxû nangetanüácüma nawa taxaxe i ngêma dexá i maxêëruü. 18 Rü guxâma ya yîxema írûxînüëxê i ñãã Tupanaârü ore i ñãã poperagu ümatûxû, rü tümamaã nüxû chixu rü ngêxguma chi texé íyatóxêëgu i ngêma Tupanaârü ore i ñãã poperagu ümatûxû, rü Tupana rü tá tümacèx nanayexeraxêë i ngêma poxcuruügü i ñãã poperawa nachiga naxümatûxû. 19 Rü ngêxguma chi texé nüxû üpetügu i wüxitama i ñãã Tupanaârü ore i ñãã poperagu ümatûxû, rü Tupana rü täütâma tüxû nüxû nangöxnetaxêë i ngêma norü o i ngêma naî i maxêëruü i ñãã poperawa nachiga naxümatûxû. Rü ngêxgumarüü tá ta täütâma tüxû nimucuchi nawa ya yima ñãne ya üünene i ñãã poperawa nachiga naxümatüne. 20 Rü yima nüxû ixücü i ñãã ore, rü ñanagürü:

“Ngêmaãcü, paxa tá íchangu”, ñanagürü. Rü ngêmaãcü yîi. Rü choma i Cuáü rü ñacharügü:

“¡Nuã naxû Pa Cori ya Ngechuchu!” ñacharügü. 21 Rü chanaxwèxe i tórü Cori ya Ngechuchu ya Cristu poraãcü pexû narüngüxêë i guxâma i pemax. Rü ngêmaãcü yîi.